

Bëngbe Bëtsa  
Cabëngaftaca  
Entsoyebuambna



New Testament in Camsá

# Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

## Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

---

PDF generated using Haiola and XeLaTeX on 11 Nov 2022 from source files dated 29 Jan 2022  
19104c0e-9046-5ff3-82fb-eb838c88dcf9

## Contents

San Mateo . . . . .	1
San Marcos . . . . .	50
San Lucas . . . . .	79
San Juan . . . . .	128
Hechos . . . . .	165
Romanos . . . . .	210
1 Corintios . . . . .	235
2 Corintios . . . . .	258
Gálatas . . . . .	274
Efesios . . . . .	283
Filipenses . . . . .	292
Colosenses . . . . .	298
1 Tesalonicenses . . . . .	304
2 Tesalonicenses . . . . .	309
1 Timoteo . . . . .	312
2 Timoteo . . . . .	319
Tito . . . . .	324
Filemón . . . . .	327
Hebreos . . . . .	329
Santiago . . . . .	349
1 San Pedro . . . . .	355
2 San Pedro . . . . .	362
1 San Juan . . . . .	366
2 San Juan . . . . .	372
3 San Juan . . . . .	373
San Judas . . . . .	374
Apocalipsis . . . . .	376

## San Mateo

*Jesube bēts taitanga*  
(Lc 3.23-38)

<sup>1</sup> Quemēnga imnamna Jesucristbe bēts taitanga: Jesucristna Rey David y Abrahámbentšana entšá inamna.

<sup>2-6</sup> Abraham yojamna Isaache taitá;

Isaacna Jacobēbe taitá

y Jacob, Judá y chabe catšátangbe taitá.

Judá, Fares y Zarabe taitá; y chatbe mamá Tamar yojamna;

Fares Esrombe taitá

y mua Arambe taitá.

Aram Aminadabēbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaíbe taitá.

Isaí Rey Davidbe taitá;

David Salomonbe taitá y muabe mamá yojamna chē Uriasbe shema inamná.

<sup>7-11</sup> Salomón Roboambe taitá;

Roboam Abíasbe taitá

y Abíasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzias Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catšátangbe taitá yojamna.

Chē Babilonioca entšanga chē israelitēnga tmojánishēche y choca imojanētámēna ora, Josías chē básēnga yojánabamna.

<sup>12-16</sup> Ya Babilonioca ndutámēnga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadoche taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;

Eleazar Matanbe taitá

y Matán Jacobēbe taitá.

Jacob Josebe taitá yojamna y Josena Mariybe boyá.

María Jesusbe mamá, Jesús chē Bēngbe Bētsabe Uámana Uabuayaná, chē Cristo ca uabainá.

<sup>17</sup> Chcasna, Abrahámbentšana Davidbentscoñe bnétsana canta bēts pamillanga imojéftsemna. Davídbentšana y chē israelitēnga Babilonioca imojanētamenēntscuana inye bnétsana canta bēts pamillanga; y inye bnétsana canta bēts pamillanga chē Israeloca entšanga imojanētamenentšana, chē Cristo tojanonýnántscōñe.

*Jesucristo tojanonýná*  
(Lc 2.1-7)

<sup>18</sup> Jesucristo jónýnnamna mēntšá tojanopasá: María tbojanšbuachená Joséftaca jobouamayama, pero cabá ndoñe cánýiñe ibontsiyena ora, tojanopasá Mariyna ngomamaná yojoquéda chē Uámana Espíritbe obenánaca. <sup>19</sup> José, Mariybe boyá, canye nyetsca soyēnguiñe tšabá jamama bošá inamna. Cha ndoñe yontseboše entšangbe delante cha

mal jaquédana; chíyecna tojanjuabó nýe iytécana Mariybentsana jtsojuánañana. <sup>20</sup> Y chca yojtsejuabnantscuana, mo otjenayoquécá canýe Bèngbe Bètsabe ángel tbojáninýe y chana Josébíoye tbojaníyana: “José, Davídbentsana entsá, ndoñe matenócochinýenana Mariáftaca jobouamayama, er chë bochántsebomna šešona chë Uámana Espíritbe obenánaca cha bochántsebomna. <sup>21</sup> María canýe šešona bochántsebomna y cha Jesús ca cochjuabaye. Chca echantsabaina er cha chabe entsánga chëngbe bacna soyënguentšana echanjátsebacaye ca” —chë ángel tbojaníyana.

<sup>22</sup> Lempe chca tojanochñëngo, cachcá chaotsemnama ntšamo Bèngbe Bètsá chabe juabna oyebuambnayëngbiajana tojanayancá. Chë oyebuambnayá mëntšá tojánayana:

<sup>23</sup> Chë cabá boyabása nduabuutmá ngomamaná echanjoquéda

y canýe šešona boyabásetema bochántsebomna,

y cha mochanjuabaye Emanuel ca.

(Emanuel endayana “Bèngbe Bètsá bëngaftaca ca”.)

<sup>24</sup> José chë otjénayentsana tojanofšená ora, tojanma ntšamo chë Bèngbe Bètsabe ángel tbojanmandaca y Mariáftaca tojanobouamá. <sup>25</sup> Pero ndoñe cánýiñe ibontsaníyena, sinó nýe chë šešonatema tojanonýná orscana. Chë šešonatema tojanonýná orna, José chábíoye Jesús ca tbojanabaye.

## 2

### *Reyes Magos Jesúsbiyoye tmojána*

<sup>1</sup> Herodes judiëngbe rey yojamna ora, canýe pueblo Judeoca, Belén ca uabáinentse Jesús tojanonýná. Chentsana, báseftanga, estrellënga uatsjëndayënga, magos ca uabáinënga, canýe bëts pueblöye Jerusalén ca uabáinöye tmojánashjajna. Chënga tmojánabo shinýe bocanöye luarëngocana. <sup>2</sup> Jerusalenocna chënga, Heródesbiyoye tmojána y tmojanënoticiá: “¿Ndayentse yojtsemna chë judiëngbe rey jtsemnama tojonýná cha ca? Bèngbe luarëngoca shinýe bocanöye chabe onýnana estrella fsëjinýe y as muentse cha jaboadórama tifjabo ca.”

<sup>3</sup> Rey Herodes chca tojanuena ora, corente yojtsenócochinýena, y nýetsca chë Jerusalemntse oyenëngnaca. <sup>4</sup> Chentsana chë rey tojánachembo nýetsca chë judiëngbe bachnangbe amëndayënga y chë judiëngbe ley abuátambayënga jenöyeyunayëngama. Mëntšá tojanatjá: —¿Ndayentse chë Bèngbe Bètsabe Uámana Uabuayaná, chë Cristo ca uabainá, jónýnama ibomna ca?

<sup>5</sup> Chënga tmojanjuá: —Judeoca, Belén pueblentse ca. Bayté entsemna chë Bèngbe Bètsabe juabna oyebuambnayá Miqueas mëntšá tojánábema:

<sup>6</sup> Y tsëngaftanga, Judeoca Belenentse oyenënga,

canýe mandayá tsëngaftangbentsana echanjabo.

Cha nýetsca chë Judeoca mándayëngbiamá más uamaná echántsemna,

y atšbe entsánga Israeloca echántsanýena.

Chíyeca tsëngaftangbe pueblo ndoñe nýe batšá uámana pueblo quenátsmëna ca.

<sup>7</sup> Chora Herodes iytécana chë maguënga tojánachembo y cuedádoca tojanatjá ntseco ora chë estrella tmojáninýama. <sup>8</sup> Herodes chë soyënga yojtsetátšëmbo ora, Belenöye chë maguënga tojanichamó, y mëntšá tojanéyana: “Chöyë motsajna y tsábá chë šešona šmochjánguango. Chašmojinýena ora, šmochjabëuenaey, as átšnaca chayobená jama chë šešona jadórama ca.”

<sup>9</sup> Rey Herodes chë soyënga tojánëyanentsana, chë maguënga tojtsatanoñe. Chora cachiñe tmojtjaninýe chë chëngbe luarëngoca tmojáninýe estrella y yojtsanebnatsana chë šešona yojtsemnëntscoñe. Chentsa juatsbuacá chë estrella yojójayiye. <sup>10</sup> Chë maguënga chë estrella tmojáninýe orna, corente oyejuayënga imojtsemna. <sup>11</sup> Chë yebnöyë tmojánamashjna ora, chë šešona tmojáninýe chabe mamá Mariáftaca. Chorna, tmojanoshamentsá y chë šešonatema tmojanadorá. Chora chëngbe cajontémënga tmojanëtsécaca y tmojanatštá castellano, incienco y canýe botamana uanguëtse soye, mirra ca uabáiniye. <sup>12</sup> Chentsana, mo canýe otjenayoquécá Bèngbe Bètsá chë maguënga tojanabuayená rey Herodesbiajana ndoñe chamondeshëcuanama. As chënga chentsana inýe benachëjana cachëngbe luarëngöyë tmojésanshëcuana.

### *Egiptó luaröyë tmojttsanachá*

<sup>13</sup> Chë maguënga tmojttsatanoñe ora, otjénayoca José canýe Bèngbe Bètsabe ángelbiyoye tbojáninýe y cha mëntšá tbojaníyana: “Motsbaná, chë šešonatema y chabe mamá mesëbiatše y Egiptöyë motsachá. Herodes chë šešonatema bochanjánguango jtsóbama, chíyeca choca cochtsoquedañe atše chacochjábuaeyenantscuana ca.”

<sup>14</sup> As José tojantsbaná, chë šešonatema y chabe mamá tojesanëbiatše y ibeta Egiptó benache tojëttsanbocna. <sup>15</sup> Y choca imojtsanomñe Herodes tojanóbanëntscuana. Chca

tojanopasá, cachcá chaotsemnama ntšamo Bëngbe Bëtsá chabe juabna oyebuambnayabi-ajana tojanayancá. Chë oyebuambnayá mëntšá tojánayana: “Egiptocana atšbe uaquiniá sënjanchembo ca.”

*Herodes tojanmandá basetémënga jtsëbáyama*

<sup>16</sup> Chë maguënga tmojtsaningñema Herodes tojántatšëmbona ora, puerte tbojánëtna, y tojanmandá lempe jtsëbáyama base boyabásetemënga uta uata bomnënga y cabá uta uata ndbomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninyama. <sup>17</sup> Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

<sup>18</sup> Ramá ca uabaina pueblentse canye oyebuambnayana tmojanuena, ngmënaca ošachiyana y becá tsetšanánaca oyebuambnayana.

Raquel yojamna chabe básengbiana ošachiyiñe, pero ndoñe yontseboše chamuatebiajuama, chabe básenga ya obanënga causa ca —cha tojanábema.

<sup>19</sup> José cabá Egiptoca yojtsomñe ora, Herodes tojanóbana. Chentšana, otjénayoca José canye Bëngbe Bëtsabe ángelbioye tbojáninye y cha mëntšá tbojaninyana: <sup>20</sup> “Motsbaná, chë šešonatema y chabe mamá mesëbiatše y Israeloye cochtá. Chë šešonatema jóbama bošënga ya obanënga montsemna ca.”

<sup>21</sup> As José tojantsbaná y chë šešonatema y chabe mamá Israel luaroye tojtésanébiatše. <sup>22</sup> Arquelao Judeoca yojanmánda chabe taitá Heródesbe cuentiñe, y José chca tojántatšëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Josena Galilea ca uabaina luaroye tojána. <sup>23</sup> Choye tojánashjango ora, José tojána canye pueblo Nazaret ca uabáinoye chentše joyénanama. Chca tojanochnëngo cachcá chaotsemnama ntšamo chë Bëngbe Bëtsabe juabna oyebuambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

### 3

*Juan chë Ubayaná entsanga yojanabuayiyiná*  
(Mc 1.1-8; Lc 3.1-9, 15-17; Jn 1.19-28)

<sup>1</sup> Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama. <sup>2</sup> Mëntšá cha yojanëtsëtsnaye: “Bëngbe Bëtsabe amëndayana ya echanjóshjango. Ngmënaca smochtënojuaoye tšëngaftangbe bacna soyëngama y chca amana smochtsajbaná y Bëngbe Bëtsabe benache smochtishache ca.”

<sup>3</sup> Juan yojamna canya ndabiana chë Bëngbe Bëtsabe juabna oyebuambnayá Isaiás mëntšá tojánayana:

Entsanga ndoyena luaroca canya enduáyebuache:

“Bëngbe Utabná echanjabo ca;

mo nda canye benache tojtseprontacá canye uámama entsá jashjanguama,

tšëngaftángnaca cachcá, Bëngbe Utabná jabama ainaniñe tšabe juabnëngaca smochtseprontana ca” —cha tojánayana.

<sup>4</sup> Juanbe entsáyá inauapormana camellbe stjënasheca y bobache yojanasnana. Cha inasaye chapulinatémënga y tjoca tjouangbe méloye. <sup>5</sup> Jerusalemoca entsanga, nyetsca Judea luarentša entsanga y chë Jordán ca uabaina béjaye béconana oyenënga imojánbocana Juan joyeunayama. <sup>6</sup> Bëngbe Bëtsábioye chëngbe bacna soyëngama jainpáda chentšana, Juan chë Jordán béjayiñe chënga yojanëbáyana.

<sup>7</sup> Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanam; as chora tojanéyana: “¡Mëtscuaye entsanga! ¿Nda tcmënjáuyana chë echanjóshjango uabouana castigüentsana smochjotsbocá ca? <sup>8</sup> Bëngbe Bëtsabeñe ndegombre ošbuáchiyënga smochtsemna, as chca chaotsinýna chë bacna soyënga amana tšëngaftanga ndegombre smojtsajbanama. <sup>9</sup> Y ndoñe smattsejuabnaye cach tšëngaftangbiana jayanama: ‘Abrahábentšana entsanga fsëndmëna ca’. Er atše scuayana, Bëngbe Bëtsá quem ndëtsbéngacnaca Abrahábentšana entsanga nanjábiana. <sup>10</sup> Chë tatšniá ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tontseshajo, jtseshatëtšana y iñoye jtsatmetšana. Tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

<sup>11</sup> “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiana más obenana bomná comna, y atše mercedo taitsatobuajoñe ni mo chabe shecochëtjonëshe jtsámabñama. Chë chabe benache aifne chamojtishachëngbiana Bëngbe Bëtsá echanjama chë echanjabábeyeca,

chê Uámana Espíritu chêngbe ainaniñe cháumashênguama. Pero chê benache ndoñe chamontishachêngbiamna, Bêngbe Bêtsá echanjama chê echanjabábeyeca, corente castigánenga chamotsemnama, mo ñeshéquécá. <sup>12</sup> Canye entśá chabe mêtśtá cucuatśiñe jiyébana, chabe trigo jtsóbobemana y chê ndoserverna shácuanënga jtsejashtśetsana. Chabe trigo chê grano uaquëcñaye tsañe jtsabuájua, y chê ndoserverna shácuanëngna ñfoye jtsatmetśana. Cachcá, chê atśbe ústonye echanjabana, chê tsabe entśanga echanjúbuaja, y chê bacna entśangna canye ññeshiñe echantsacastígaye, y chê ñne ndocna te queochátsfsana ca” —cha tojanéyana.

*Juan, Jesúsbiøye tbojanabaye*

*(Mc 1.9-11; Lc 3.21-22)*

<sup>13</sup> As Jesús, Galileocana tojana Jordán béjayoye, Juan yojtsemnoye, cha chabuábayama. <sup>14</sup> Pero Juan ndoñe yontseboše Jesús juabáyama, y mêtśá tbojaníyana: —Atśe sontsemna aca chaścuabaye, y ¿más atśe aca chochjuabaye ca?

<sup>15</sup> Chora Jesús tbojanjuá: —Morna chca chaotsemna. Entsemna lempe ntśamo Bêngbe Bêtsá tojamandacá jobedésana ca.

As Juan yojouena Jesús juabáyama. <sup>16</sup> Jesús ya uabainá yojtsemna ora, chê buyeshoicana tojtanshëbëbocna. Chorna Jesús tsbanánoye yojntješiye y tojáninye chê celoca atëfñiñe y chê Uámana Espíritu mo canye palomatemcá chábíoye yojtsastajuana. <sup>17</sup> Chora celocana Bêngbe Bêtsá mêtśá tojanáyana: “Mua atśbe bonshana uaquíñá endmëna. Chabíama corente sëntsoyejuá ca.”

## 4

*Jesús tojanobená Satanás jayëñjanama*

*(Mc 1.12-13; Lc 4.1-13)*

<sup>1</sup> Chentśana chê Uámana Espíritu entśanga ndoyena luaroye Jesús tbojanánatse, as Satanás chauábama cha jisháchichiyama.

<sup>2</sup> Chentśe canta bnëtsana te y canta bnëtsana ibeta ntjascá tbojanjëtana; chíyeca chora tbojaneshëntsena. <sup>3</sup> As Satanás tbojanobobeconá y tbojaníyana: —Aca ndegombre Bêngbe Bêtsabe Uaquíñá tcomñëse, momandá quem ndëtsbenga tandëse chaobíama ca.

<sup>4</sup> Pero Jesús tbojanjuá: —Bêngbe Bêtsabe uabemana palabrënguñe mêtśá endayana: “Entśá ñye tandëseca ndoñe vida ntsebomnana, sinó entśá endobena jtsiyenana lempe ntśamo Bêngbe Bêtsá tojayancá tbojtseyeunanëse ca.”

<sup>5</sup> Chentśana Satanás, Jerusalén, chê uámana bëtś pueblo ca uabánoye Jesús tbojanánatse, y chê Bêngbe Bêtsabe bëtś yebnentśe chê más tsbanánoca tbojanatsá. <sup>6</sup> Chentśe Satanás mêtśá tbojaníyana: —Aca ndegombre Bêngbe Bêtsabe Uaquíñá tcomñëse, muentśana fshantsoye montsëña, er Bêngbe Bêtsabe uabemana palabrënguñe endayana:

Bêngbe Bêtsá chabe angelënga echanjichamuá, chacmotsinýenama.

Chënga buacuatśëngaca cmochanjishache, shecuatśe ndëtśbeñe ndocá chacondomama ca —cha tbojaníyana.

<sup>7</sup> Chora Jesús tbojanjuá: —Cach Bêngbe Bêtsabe uabemana palabrënguñe mêtśá endayana: “Ndoñe matsbošana acbe Bêtsá chê Utabná bacna soyëngama jacochënguama ca.”

<sup>8</sup> Cabana, Satanás tbojanánatse canye bëtś tjoye y betso ñyetsca quem luarentśa amëndayëngbenache y chentśa ñyetsca uámana soyënga Jesúsbiøye tbojaninýinýe. <sup>9</sup> As Satanás tbojaníyana: —Aca chacojshëntsamentśé y chaścojadorase, lempe chê soyënga chochjattstaye ca.

<sup>10</sup> Y Jesús tbojanjuá: —¡Satanás, átśbentśana mojuaná! Bêngbe Bêtsabe uabemana palabrënguñe mêtśá endayana: “Bêngbe Bêtsá cochtsadorana y ñye cha cochtseserverna ca.”

<sup>11</sup> As Satanás cachcá tbojanonýá. Cachora Bêngbe Bêtsábíocana angelotëmënga tmojánabo Jesús jtseservénama.

*Jesús tojanontśé Galileoca chabe trabajo jamana*

*(Mc 1.14-15; Lc 4.14-15)*

<sup>12</sup> Juan chê Ubayaná cárceloye tmojanëtámíama Jesús tojanuena ora, Galilea luaroye cha tojtaná. <sup>13</sup> Pero ndoñe tonjanoquedá Nazaret pueblentśe, sinó Capernaumoca, uafjajónaye tsachañe; choye tojana joyënanama, chê uámana bëtś taitata Zabulón y Neftalibe luaríñe. <sup>14</sup> Chca tojanochñëngo, cachcá chaotsemnama ntśamo chê Bêngbe Bêtsabe juabna oye-buambnayá Isaías tojanayancá. Isaías tojánayana:

<sup>15</sup> Zabulón y Neftalibe luare, Jordán béjaye chenguánoica, uafjajónaye tsachañe;

Galilea luaríñe, ndoñe judío entśanga oyenentśe.

<sup>16</sup> Chê mo ibetiñe cuafstiyencá imojoyena entśanga, Bêngbe Bêtsabe soyënga nduabuatma causa, tmojinýe canya entśangbe juabnënga binýnayá.

Chë chëngbe juabnënga binÿnaya entsebuashinÿinÿana chë Bëngbe Bëtsábioye nduabu-atmëngbiana, y chë causa chabiana imomna mo obanëngcá, ndoñe binÿniñe jtsiyenëse ca —cha to-janábema.

<sup>17</sup> Cach orscana Jesús tojanontsé entsanga jábuayenama: “Bëngbe Bëtsabe amëndayana ya echanjóshjango. Ngménaca šmochtenójuaboje tšëngaftangbe bacna soyëngama y chca amana smochtsajbaná ca.”

*Jesús tojánachembo canta boyabásenga beonga ashebuánayënga cha chamuastama (Mc 1.16-20; Lc 5.1-11)*

<sup>18</sup> Canÿe te, Jesús chë Galilea uafjájónaye tsachajana vojtsaye y ndeolpe uta boyabásata tojanÿe: canÿa yojamna Simón, chë Pedro cánaca uabainá, y chabe uabentsá Andrés. Chatna atarraiëshangá ibnetsashbuëtsetšañe, er beonga ashebuánayata ibnamna. <sup>19</sup> Jesús to-janÿyana: “Atseftaca mabata; atše cbochanjábiana Bëngbe Bëtsabiana entsanga anguayata, y morscana nÿe beonga ashebuánayata ya ndoñe quešochátsmëna ca.” <sup>20</sup> Cachora chatbe atarraiëshangá cachcá tbojésanaboshjuana y Jesús tmojanasto.

<sup>21</sup> Y más chcoye, Jesús inÿe uta catsátata tojánanÿe: Santiago y Juan, chë Zebedeobe uaquiñata. Chata ibojtsomñe canÿe barquëshañe, chatbe taitáftaca, chëngbe atarraiëshangá atapórmayñe. Jesús tojánachembo, <sup>22</sup> y cachora chë barquësha tbojésanaboshjona, chë taitá cachentše imojëseboshjona y Jesús tmojanasto.

*Jesús ba entsanga yojanabuatambá y yojánashnaye (Lc 6.17-19)*

<sup>23</sup> Jesús nÿets Galilea luarëjana yojánana, chentše judiëngbe enefjuana yebnënguenache abuátambaye. Chë tšabe noticiënga Bëngbe Bëtsabe amëndayama entsanga yojanabuayiná y nÿetsca šocanëngama y tsetšanëngama yojánashnaye. <sup>24</sup> Nÿets Siria luarëjana entsanga cha imojtsebáyana. As entsanga nÿetsca šocana bomnënga Jesúsbioye imojtsënachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nÿetscanga yojánashnaye.

<sup>25</sup> Mallajta entsanga Galileocana, Decápolis luarocana, Jerusalenocana, Judeocana y chë Jordán béjaye chenguanocana Jesús imojústona.

## 5

*Ndayá Jesús tjoca tojanabuatambá*

<sup>1</sup> Jesús chë mallajta entsanga tojánanÿe ora, batsjoye tojántsjua y tojanótbema. Chabe ústonënga tmojanobobeconá y <sup>2</sup> Jesús tojanontsé mëntšá jabuátambana:

*Ndëmuanyënga imomna chë ndegombre oyejuayana bomnënga (Lc 6.20-23)*

<sup>3</sup> “Puerte oyejuayënga mochántsemna chë Bëngbe Bëtsabe soyënga tša imuajaboto ca juab-nayënga. Chca entsanga mochántsemna chë Bëngbe Bëtsabe amëndayoca mochtsiyenënga.

<sup>4</sup> “Puerte oyejuayënga mochántsemna chë mondbétsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

<sup>5</sup> “Puerte oyejuayënga mochántsemna chë uámanënga ndoñe mondbétsenobiamnayënga, er chënga mo chëngbe otocana soycá quem luare mochanjóyëngacñe.

<sup>6</sup> “Puerte oyejuayënga mochántsemna chë nÿetsca soyënguine tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nÿetsca soyënguine tšabá jamama bošënga mochanjobenaye jëfšinÿyana lempe ntšamo tmojtse-bošcá.

<sup>7</sup> “Puerte oyejuayënga mochántsemna chë inÿëngbiana ongmiayënga, er Bëngbe Bëtsá chëngbiana bochanjóngmia.

<sup>8</sup> “Puerte oyejuayënga mochántsemna chë nÿe tšabe juabnënga ainaniñe bomnënga; chënga Bëngbe Bëtsá mochanjinÿe.

<sup>9</sup> “Puerte oyejuayënga mochántsemna chë nÿetscanga natjëmbana chamotsiyenama amënga, er chënga Bëngbe Bëtsabe básenga ca mochantsabaina.

<sup>10</sup> “Puerte oyejuayënga mochántsemna chë inÿyënga tmojama chamotsesufrinënga, ntšamo Bëngbe Bëtsá yobošcá bëtšamama; chca entsanga mochántsemna chë Bëngbe Bëtsabe amëndayoca mochtsiyenënga.

<sup>11</sup> “Puerte oyejuayënga tšëngaftanga šmochtsemna, entsanga chacmojoyánguango y chac-mojtsécama ora y nÿetscna soyëngaca chacmojtšëbuayatsenaye ora, atšbe ústonënga bëtsemnama. <sup>12</sup> Móyejuanga, puerte móyejuanga, tšëngaftanga celoca becá šmochanjóyëngacñe.



Er ntsamo entšanga tsêngaftanga crñecamena, cachcá chë Bëngbe Bëtsabe juabna oyebuamb-nayëngbioye, chë tsêngaftangbe natsana monjanienëngbioye entšanga monjanëcamena ca” —Jesús tojánayana.

*Ošbuáchiyënga jtsemnana mo tamocá y binÿnayënga quem luarentša entsangbiana*  
(Mc 9.50; Lc 14.34-35)

<sup>13</sup> “Tsêngaftanga, quem luarentša entšanga jtsëjabuáchanëse šmojtсийena, Bëngbe Bëtsabe soyënga chamotsetatsëmbuama, as chëngbiana šmochántsemna mo chë mëntšena ndoñe chaondóndbemama tcojatboto tamocá. Pero chë tamó fténana tojtsóbemëse, ndoñe ntsopodénana tempcá sanana cachiñe jtëtsmënana. Chca, ya tondayama ntoservénana; chíyeca chë tamó tsáshenoye jtsëtsenana y entšanga jtsebotájayana.

<sup>14</sup> “Tsêngaftanga, ntšamo tsábá yomncá šmojtсийenëse, as quem luarentša entsangbiana šmochántsemna mo chë ibetiñe tojtsebínÿna soycá. Canÿe bëts pueblo batsjo juats-buañe tomnëse, ndoñe ntsopodénana iytëmenzá jtsemnana. <sup>15</sup> Canÿe uajuinÿanësha tcojuajuinÿena ora, ndoñe cajonëshe tajsoye jtsabuájuaama, sinó tsbanánoca juajájuaama, chca, nyetsca entšanga chë yebnentse tmojtsemnëngbiana chaotsebínÿnama. <sup>16</sup> Cachcá tsêngaftanga, entsangbe delante mo binÿnayëngcá šmochtsemna, as chënga tsêngaftanga tsábe soyënga šmuamama chamuinÿama, y chca, chënga chamuinÿanÿé chë Taitá, Bëngbe Bëtsá celoca endmëná, corente uamaná y obená bëtsemnana ca” —Jesús tojánayana.

*Chë Moisesbe leyama Jesús tojanabuatambá*

<sup>17</sup> “Ndoñe šmattsejuabnaye, ntšamo Moisesbe leyíñe iuayancá y chë Bëngbe Bëtsabe juabna oyebuambnayënga tmojanayancá jabëtsepochochama atse tijabo ca. Atse ndoñe chíyátabo chë soyënga jabëtsepochochama, sinó jabábuayenama ndayá chë soyënga ndegombre bëtsayanama. <sup>18</sup> Ndegombre šcuayana: Celoca y quem luare chaofjtsemnëntscuana, ndocná queochatobenaye ni canÿe punto, ni canÿe letra chë leyënguentshana jtsejuánana, lempe ntšamo jochnënguama yomncá chaofjtsemnëntscuana. <sup>19</sup> Chíyeca, nda nÿe mo canÿe mando chë leyënguiñe ndoñe tonjoyeuná cha, masque nÿe base soye chë mando tojtsemna, y chë ínÿenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuainÿenga tmojtsama ntšamo Bëngbe Bëtsá tojamëndacá y chë ínÿenga cachcá chamotsamama tmojtsabuátambase, chënga Bëngbe Bëtsabe amëndayoca uámanënga mochántsemna. <sup>20</sup> Chë soyëngamna mëntšá šcuayana: Tsêngaftanga chë ley abuátambayënga y fariseúngbioye ndoñe šmontsayënjanase, jtsamama ntšamo Bëngbe Bëtsá tcmojamëndacá, ndocna te Bëngbe Bëtsabe amëndayoye quešmochátamashjna.

*Ndayá chë ínÿengaftaca tbojetnama Jesús tojanabuatambá*

<sup>21</sup> “Tsêngaftanga šmojuena ntšamo Bëngbe Bëtsá tsêngaftangbe bëts taitanga tojanamëndacá: ‘Ndoñe catjóba ca. Chca ochjajnyá bontsemna jobuambayana chë entsangbiana tsábá o ndoñe tsábá tmonjamama endbayanabe delante, ndáyeca chca ca.’ <sup>22</sup> Pero atse šcuayana, nda cachabe catsátaftaca tbojeta, chánaca bontsemna jobuambayana chë entsangbiana tsábá o ndoñe tsábá tmonjamama endbayanabe delante, ndáyeca chca ca. Nda cachabe catsátbioye puerte tojtsábboyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda cachabe catsátbiana opjema ca tojayana, ntšamo cha bëtsamama, cha bontsemna chë infernoca iñeshoye jama.

<sup>23</sup> “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catšata ácaftaca etonaná yojtsemna ca, <sup>24</sup> as chë tcojiyëbo soye chë altarentša natsanoica cochjësebošhona, cochtá y acbe catsátaftaca cochtenoyántsia. Chentšana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

<sup>25</sup> “Nderado nda tcmojademanda y cabildoye jotsánama cmojtsemna, cabá choye ndáshjango ora, betso cháftaca cochtenoyántsia. Chca ndoñese, chë demandyá mandádbioye cmochanjúshjango, chë mandado josticiëngbe cucuatšíñe cmochanjóshhona y chënga cárceloye cmochanjutame. <sup>26</sup> Ndegombre cbëyana: Chentšana ndoñe quecochtëtsbocna lempe candesopagantscuana ca” —Jesús tojánayana.

*Chë boyá o shëmbioye ínÿaftaca íngñayama Jesús tojanabuatambá*

<sup>27</sup> “Tsêngaftanga šmojuena ntšamo Bëngbe Bëtsá tojanmandacá: ‘Acbe boyá o acbe shëmbioye ínÿaftaca ndoñe catjaíngña.’ <sup>28</sup> Pero atse cbëyana: Nderado canÿe boyabása ndëmuainÿe shembásabioye tbojinÿe y tojajuabó ‘malaye cha ca’, chë boyabása chca tojajuabose, ainanoca ya chë inÿe shembásaftaca cachabe shëmbioye tbojtseingñe.

<sup>29</sup> “Chíyeca, nderado acbe catsábioica bomínÿeca bacna soye tcojinÿe y cachca soye tcojamëse, más tsábá nántsemna chë bomínÿe cochtsenobuchjatsëca y cochtsëtsëna. Nÿets cuerpo jtseboznana y lémpca infernoye jama chacmotsëtsenamna, acbiana más tsábá

nántsemna n̄ye can̄ye soye acbe cuerpentšana chacoperd̄e. <sup>30</sup> Nderado acbe catšbioica cucuatšeca bacna soye tojam̄ese, más tšabá nántsemna ch̄e cucuatše cochtsenástjango y cochts̄ets̄ena. N̄yets cuerpo jtsebm̄nana y l̄empeca infiernoye chacmots̄ets̄enam̄na, achiana más tšabá nántsemna n̄ye can̄ye soye acbe cuerpentšana chacoperd̄e ca” —Jesús tojánayana.

*Ch̄e bouamnata en̄ets̄anama Jesús tojanabuatambá*  
(Mt 19.9; Mc 10.11-12; Lc 16.18)

<sup>31</sup> “M̄entšánaca leyiñe enduábemana: ‘Nd̄emuan̄ye boyá chabe shémaftaca tbojtsen̄ets̄ena, ch̄e boyá bontsemna chabe shema can̄ye tšuanácha juiyiyana, ndaȳeña chaotsayana cha ya ndoñe chabe shema yontsemna ca.’ <sup>32</sup> Pero atše cb̄eyana: Nda chabe shémaftaca tbojtsen̄ets̄ena y chca tojopasá ndoñe ch̄e shema in̄yafata tbtontseingñe causa, as ch̄e boyá jtsamana cha chabotseingñema, ch̄e shema in̄yafata tojtóbouamase. Y nda ch̄e úts̄ena shémaftaca tojtobouamá, chana can̄ye uabuatambá jtsebm̄nana, y chca, ch̄e ts̄em boyánaca can̄ye bacna soye jamana ca” —Jesús tojánayana.

*Ch̄e ents̄anga júrayama Jesús tojanabuatambá*

<sup>33</sup> “Tš̄engaftanga šmojouena ntšamo tš̄engaftangbe b̄ets taitángbioye tmojan̄eyancá: ‘Nderado točajayana: De Dios ch̄e soye chanjama ca; ojal ch̄e soye ndoñe catjama ca.’ <sup>34</sup> Pero atše cb̄eyana: Tondayama šmattsejúraye; ni celocama, er choca B̄engbe B̄etsabe t̄bmaniñe endm̄ena. <sup>35</sup> Ni quem luarama, er B̄engbe B̄etsabiana mo t̄šen̄et̄emcá endm̄ena, chiñe chabe shecuats̄enga jacjayama; ni Jerusalenama, er ch̄e pueblo endm̄ena B̄engbe B̄etsá ch̄e B̄ets Reybe b̄ets pueblo. <sup>36</sup> Ni tš̄engaftangbe bestšašama cach ndoñe, er tš̄engaftanga ndoñe quešmátobena ni mo can̄ye stj̄enash̄e ftsengūesh̄e o fjants̄esh̄e jabemana. <sup>37</sup> Tš̄engaftanga aiñe ca jayanama šmojtseboš̄ese, n̄ye aiñe ca šmochjayana, y ndoñe casna n̄ye ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

*Ch̄e ents̄anga mondb̄atenach̄n̄guama Jesús tojanabuatambá*  
(Lc 6.29-30)

<sup>38</sup> “Tš̄engaftanga šmojouena ntšamo tš̄engaftangbe b̄ets taitángbioye tmojan̄eyancá: ‘Nderado nda tcmojtsebuchjats̄eca, ácnaca derecho contsebm̄na can̄yeb̄e cha j̄etsbuchjats̄ecama ca; y nderado nda can̄ye juats̄aše tcmojts̄ásiye, ácnaca derecho contsebm̄na can̄ȳesh̄e cha jts̄iyama ca.’ <sup>39</sup> Pero atše cb̄eyana: Ndoñe matsbošana ch̄e ndayánaca tcmojab̄orlábioye jtach̄n̄guama; chamna, ndánaca catšbioica tcmojajuebjant̄etase, cochjomiye ch̄e in̄yoica cachcá chacmomama. <sup>40</sup> Nderado nda tcmojademanda y tojtseboše acbe shabuan̄ganejúa jtsabocñama, cha molesencia acbe quešsaianaca chauetsácñama. <sup>41</sup> Nderado nda tcmojuas̄má y tcmojamanda bn̄etsana cuadroca juyambama, in̄ye bn̄etsana cuadro cochjuyamba. <sup>42</sup> Nda ndaye soye tcmojotjañ̄ese, cochjatštaye; y nda ndaye soye tcmojatjase, cha ndoñe st̄ets̄oye catjaqūeda ca” —Jesús tojánayana.

*Ch̄e uayaȳngbiana bonsh̄ánana jtsebm̄nana*  
(Lc 6.27-28, 32-36)

<sup>43</sup> “Tš̄engaftanga šmojouena ntšamo tš̄engaftangbe b̄ets taitángbioye tmojan̄eyancá: ‘Acbe amigo cochtsebobonshana y acbe uayayá cochtsaboȳenja ca.’ <sup>44</sup> Pero atše cb̄eyana: Tš̄engaftangbe uayaȳnga šmochtsababuán̄yeshana, y ch̄e cm̄ecamen̄ngbiana B̄engbe B̄etsá šmochtseimpadana. <sup>45</sup> Chca tš̄engaftanga, ch̄e Taitá, B̄engbe B̄etsá, ch̄e celoca endm̄enabe básenga šmochántsemna; B̄engbe B̄etsá endb̄etsama tšabe y bacna ents̄angbeñe chabe shin̄ye chaotsebin̄yayama, y endb̄etsama ch̄e n̄yetsca soȳenguiñe tšabá jamama boš̄enga y ndoñe chca ents̄angbeñe chauaftema. <sup>46</sup> Tš̄engaftanga n̄ye ch̄e tš̄engaftanga tcmojtsababuán̄yeshan̄enga šmojt̄sababuán̄yeshan̄ese, ¿B̄engbe B̄etsábiocana ndayá šmochjuacaná? Romocama crocénana ents̄angbioye atjanaȳngnaca chca monduamana. <sup>47</sup> Y n̄ye ch̄e amigūngbioye šmojtsacheuanase, ¿ndaye b̄ets soye šmojtsama? Ch̄e ndoñe judīngnaca chca mondb̄etsama. <sup>48</sup> Tš̄engaftangbe Taitá, B̄engbe B̄etsá celoca endm̄ená, n̄yetsca tšabe soȳenga bomná y amá endm̄ená. Tš̄engaftangnaca cachcá šmochtsemna ca” —Jesús tojánayana.

## 6

*Jesús tojanabuatambá ntšamo tšabe soȳenga in̄yengbiana jamana*

<sup>1</sup> “Cuedado šmochtsebm̄na ndoñe ntsamama ents̄angbeñe tš̄engaftangbe tšabe soȳenga, n̄ye ch̄enga chca chamuin̄yama. Chca šmojam̄ese, tš̄engaftangbe Taitá, B̄engbe B̄etsá, celoca endm̄ená ndocna uacanana soye quecmocht̄et̄at̄at̄aye.

<sup>2</sup> “Chcasna, nderado nda caridá tojábem̄ese, chca ndoñe šmatjama ch̄e ntšamo šmojtsamama n̄yetscanga chamotsetatš̄embuama, mo can̄ye trompet̄f̄jua cuaf̄ts̄ajat̄et̄ancá, ch̄e caridá šmojábemama chaotsótatš̄embuama; chca monduamana ch̄e bacna

entsanga chë ntšamo ndegombre tmojuabnacá ndinÿinÿayënga, chë judiëngbe enefjuana yebnënguenache y tsáshenañe. Ndegombre chëyana, chë chca amënga ya chëngbe uacanana soye tmojóyëngacñe, ntšamo chënga tmojamama entsanga tsábá chëngbiana tmojtsoyebuambná ora. <sup>3</sup> Chcasna, nda caridá tcojábema ora, ndocná más chaondëtsetatsëmbo, mo chë uañicuayoica cucuatse ndoñe queondbatstatsëmbcá ndayá chë catšbioica cucuatse tojtsamama, <sup>4</sup> chca, acbe caridá iytëcana chaotsemnana. As, tsëngaftangbe Taitá, nda bominÿe endbëtsequëcñayë chë iytëmená tcojtsama soye, acbe uacanana soye cmochántatštaye ca” —Jesús tojánayana.

*Jesús tojanabuatambá ntšamo Bëngbe Bëtsáftaca jencuéntana*  
(Lc 11.2-4)

<sup>5</sup> “Bëngbe Bëtsáftaca šmojtsencuénta ora, ndoñe šmattsama chë bacna entsanga ntšamo ndegombre tmojuabnacá ndinÿinÿayëngcá. Chënga corente jtsogusetánana chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuéntayana, chca, nÿe entsanga chë soye chamuinÿama. Ndegombre šcuayana: chënga nÿe morskama ya montsábouacaná, chënga tsábá imojtsama ca entsanga tmojayana ora. <sup>6</sup> Pero aca Bëngbe Bëtsáftaca jencuéntama orna, acbe tsoye cochtamáshëngo, bësása cochtatame y cháftaca cochjencuénta. Chánaca chë iytëmenentše ácaftaca echántsemna. Bëngbe Taitá lempe bominÿe endetsequëcñá, masque cánÿenga šmojtsemna ora šmojtsama soyëngnacá. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatštaye.

<sup>7</sup> “Bëngbe Bëtsáftaca šmojtsencuénta ora, ndoñe nÿe cachcá ndoservena palabrenga ba soye šmattsichamo. Chca mondbëtsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámëсна, Bëngbe Bëtsá chënga más yochjóyaunaye ca. <sup>8</sup> Ndoñe chëngcá šmattsemna. Cabá nduyana ora, Bëngbe Bëtsá ya jtsëtatšëmbuana ntšamo tsëngaftanga cmojtsëjabotcá. <sup>9</sup> Chamna tsëngaftanga mëntsá cmontsétocana Bëngbe Bëtsáftaca jencuéntana:

Bëngbe Taitá, celoca icotsomñe.

Acbe uabaina chë más uámana uabainana chauesomñe.

<sup>10</sup> Acbe amëndayana chaóshjango.

Celoca yojtsemna ntšamo icobošcá;

quem luaríñnaca cachcá chaotsemna.

<sup>11</sup> Ménté šmiyatšatá cada te šnetsëjaboto tandëse.

<sup>12</sup> Bacna soyënga bënga fsëñjama: šmotsaperdónaye;

cachcá ntšamo chë bëngbiana bacna soyënga amënga fsëndbetsaperdonaycá.

<sup>13</sup> Bacna soyënga jamama šojocohëngo ora, šcochjujabuache chca ndenobuíyama.

Nÿetsca bacna soyënguentšana šmatsebacye.

<sup>14</sup> “Chë tsëngaftangbiana bacna soyënga amënga šmojtsaperdónasna, Bëngbe Taitá chë celoca endëtsomñá, tsëngaftanga cmochanjáperdonaye. <sup>15</sup> Pero chë tsëngaftangbiana bacna soyënga amënga ndoñe šmontsaperdónasna, Bëngbe Taitá cachcá, tsëngaftanga ndoñe quecmochátaperdonaye ca” —Jesús tojánayana.

*Chë Bëngbe Bëtsáftaca jencuéntama tondaye ntjascá*

<sup>16</sup> “Y nderado tsëngaftanga inÿe ora tondaye ntjascá šmojtsemna Bëngbe Bëtsáftaca jencuéntama, juebëngmëñënga ndoñe šmattsemna, ntšamo chë bacna entsanga chë ndegombre tmojuabnacá ndinÿinÿayënga mondbetsamcá, as chca, chënga imojtsayúnama entsanga chamuinÿama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entsanga tsábá chëngbiana tmojtsoyebuambná ora. <sup>17</sup> Aca nderado tcojtsayúna ora, cochtsojuejbabebye y aceitiyeca botamana cochtenochquëca, <sup>18</sup> as chca, entsanga ndoñe chamondëtsetatsëmbo aca tondaye ntjascá cojtsemnana. Nÿe acbe Taitá, lempe chë mo iytëmená yomna soyëngama tatsëmbuá, chama echántsetatsëmbo. Y cha, chë iytëmená tcojama soye bominÿe endbetsequëcñayá, acbe uacanana soye cmochántatštaye ca” —Jesús tojánayana.

*Chë celoca bomnana*

(Lc 12.33-34)

<sup>19</sup> “Bomnana quem laurentše ndoñe šmattsëjuabaye. Muentšna chë mejojón y inÿe pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana. <sup>20</sup> Más tsábá tsëngaftangbiana entsemna, mora quem laurentše tsabe soyënga šmojtsamamna, uacanana soyënga celoca chaotsójuabaye. Chentše ni chë mejojón, ni chë inÿe pochócaye soyënga acbe soyënga quemochatspochóca, ni atbëbanënga quemochátamashjna jatbëbama. <sup>21</sup> Er chë ndayentše acbe bomnana tojtsemnentša soyëngama acbe ainánaca cochántsejuabnaye ca” —Jesús tojánayana.

*Chë cuerpama uajuinjanésha**(Lc 11.34-36)*

<sup>22-23</sup> “Acbe bominye tsábá totsomñése, mo canye uajuinjanéshacá acbe cuerpama jtsemnana, chíyeca aca jtsobenana ntšamo tcojtsamcá chë bominyéca jtsónyayana. Chë bominye ndoñe tsábá tontsemnësa, chë bominye tondaye ntsoebenana jamana, ntšamo tcojtsamcá chacobená jinýama. Cachcá, acbe ainaniñe tsábe juabnënga tcojtsebomñése, lempe ntšamo chacojtsamcá tsábá echántsemna. Y acbe ainaniñe ndocna tsábe juabnënga tcontsebomñësa, lempe ntšamo chacojtsamcá ndoñe tsábá queochátsmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

*Chë Bëngbe Bëtsabiana bonshánana o chë nye quem luarentsa soyënga jtsebošana**(Lc 16.13)*

<sup>24</sup> “Ndocná ntsoebenana uta mandayata jtsaservénana: cánýabioye bochantsáboyënja y chë ínýabioyna bochántsebobonshana, o cánýabiana tsábá echántsetrabajaye y chë ínýabianna ndoñe tsábá. Ndoñe quecátobena Bëngbe Bëtsá jtsebobonshánana, nye quem luarentsa soyënga jtsebomnana yapa tcojtsebošëse ca” —Jesús tojánayana.

*Bëngbe Bëtsá chabe básënga jtsanyëna**(Lc 12.22-31)*

<sup>25</sup> “Chcasna atše scuayana: Ndoñe smattsenócochinýena ndayá smochjase o smochjofsiye vida jtsebomnana, ni ndaye entsáyá smochjuíchéjtuama cach ndoñe. Ndegombre, vida chë sanama más enduámana y cuerpo chë entsayama más. <sup>26</sup> Smochjanýe chë shloftšënga jtsongüefjnyana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguiñe quemnatsquëcjná; pero Bëngbe Bëtsá, celoca endmëná, chënga saná jtsatsatnyana. ¡Y tsëngaftanga chë shloftsetëmëngbiama puerte más smonduámana! <sup>27</sup> Masque chca endmëna, canya masque tša tojtsenócochinýena, ¿ntšamo nanjobenaye jamana chë ntsachetšá vida yochtsebomñentsana, canye hora vida más jabotiyana?

<sup>28</sup> “Y ndayá smochjuíchéjtuama, ¿ndáyeca šmojtsenócochinýena? Smochjinýe chë jajañe lirio uantsefjushangá jtsajuajnana: ndoñe ntsetrabájayana, ni ntsehabiamnyana. <sup>29</sup> Pero atše chéyana, ndegombre ni mo Rey Salomón nyetsca chabe bomnánaca nyetšá botamana mo chë lirio uantsefjushangacá quenjatspormana. <sup>30</sup> Bëngbe Bëtsá tša botamana shácuana tojuama, y chë shácuana mënté jajoca jtsamnana, yëfsana iñoca. Chca chë shácuana cha tojamëse, ndegombre tsëngaftangbiámna Bëngbe Bëtsá echanjama entsáyá chašmotšabomnana, jentšanga nye batšá Bëngbe Bëtsábeñe ošbuáchiyëngal <sup>31</sup> Ndoñe smattsenócochinýena, mëntšá jtsichámëse: ‘¿Ndayá mochjase?’ o ‘¿Ndayá mochjofsiye?’ o ‘¿Ndayá mochtichëtjo ca?’ <sup>32</sup> Chë soyëngama, chë Bëngbe Bëtsábioye nduabuátmënga mondbëtsenocochinýena, pero tsëngaftanga ndoñe. Tsëngaftangbe Taitá, Bëngbe Bëtsá, ndayá cmojtsëjbotama endétatsëmbo. <sup>33</sup> Chíyeca, tsëngaftangna natsana smochjshëtsebošë Bëngbe Bëtsá tsëngaftangbe ainaniñe chaotsemándama y lempe ntšamo cha tojamandacá smochtsama. Chca šmojamëse, Bëngbe Bëtsá lempe ntšamo cmojtsëjbotacá mochlanjátšataye. <sup>34</sup> Ndoñe matenócochinýenana ndayá yëfse yochjochnënguama. Yëfse luare cochántsebobna chë soyënga jinýama y jamama. Cada tescama endbëtsemna yapa totcá soyënga jájandmanama ca” —Jesús tojánayana.

**7***Ndoñe ntsichámuana chë inýenga tsábá o ndoñe tsábá tmonjamama**(Lc 6.37-38, 41-42)*

<sup>1</sup> “Ndocá inýengbiama smattsichamo chë ndoñe tsábá tmontsamama. Chca, Bëngbe Bëtsá ndoñe queochátichamo tsëngaftanga ndoñe tsábá šmonjama ca. <sup>2</sup> Chë ntšamo tsëngaftanga inýengbiama šmojtsichamcá tsábá o ndoñe tsábá tmontsamama, cachcá Bëngbe Bëtsá tsëngaftangbiama chë ntšamo šmojamama echántsihamo. Y ntšamo inýengbioye chašmójábiana, uabouana o ndoñe jabuache soyënga, cachcá Bëngbe Bëtsá tsëngaftangbioye mochlanjábiana.

<sup>3-5</sup> “Nderado canya chabe bominiñe canye niñëfja tojtsebomñése, cha ndoñe ntsoebenana chabe catšata jauyanama: ‘Acbe bominyentsána canye polvështema jtsebujátsëcana šmolesenciá ca’. Natsana cha bontsemna cachabe bominyentsána chë niñëfja jtsenobuchjátsëcana tsábá jinýama jobenayama, chabe catšatbe bominyentsána polvështema jtsebujátsëcana. Cachcá entsemna acbiama, ¡bacna entšá chë ntšamo ndegombre tcojuabnacá ndinýinýayál, chë tša bacna soye cojtsama ca acbe catšata tcojauyana ora, cach aca tša bëts bacna soyënga cojtsamama ntjenouaboycá; y chca, aca jamana canye bacna soye. Natsana cmontsemna chë cach aca ndoñe tsábe soyënga cojtsamama ngmënacá jshatenójuaboyana y chca amana jtsajbanana, y chentšana cocayé cochantsobena acbe catšata juajabuáchana ntšamo tsábá yomncá chaotsamama.

<sup>6</sup> “Chë Bëngbe Bëtsabe soyëngama josértama ndëboše entsanga ndoñe smattsabuyaiynaye. Aifñese nántsemna mo chë Bëngbe Bëtsabe bëts yebnoca uátšëmbona mëntsena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtsëtëmënga cotsëngbioye cuaftsëtšancá, chënga nýe jtsëbotájayana ca” —Jesús tojánayana.

*Smochjotjañe, šmochjáanguango y smochjachembo*  
(Lc 11.9-13; 6.31)

<sup>7</sup> “Smochjotjañe y Bëngbe Bëtsá cmochanjátstaye; smochjáanguango y smochanjinýena; smochjachembo y bësásá cmochanjébëtafjo. <sup>8</sup> Er ndánaca tojtsotjanaña, jóyëngacñana; y nda tojtsenguá cha, jónýenana; y nda tojtsechembuanábioye jebiatëfjuana.

<sup>9</sup> “¿Ndëmuanýe boyabása tšëngaftanguentsá, canýe tandëse chabe uaquiniá tbojtsotjanañe ora, canýe ndëtsbé chábioye buanjatštaye? <sup>10</sup> ¿O canýe mëtšcuaye buanjatštaye, beona tbojtsotjanañe ora? <sup>11</sup> Y chca, tšëngaftanga, bacna soye amënga, tšëngaftangbe basetëmënga tšabe soyënga jatšatayama šmojtsamanëse, imás tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátstaye!

<sup>12</sup> “Inýëngaftaca smochtsama ntšamo chë inýënga tšëngaftangaftaca chamotsamama smojtsebošcá. Chca endmëna ntšamo Moisesbe leyinë y chë Bëngbe Bëtsabe juabna oyebuambnayëngbe buatëmbana soyënguñe endayancá ca” —Jesús tojánayana.

*Chë base utëntsá bësásá*  
(Lc 13.24)

<sup>13</sup> “Chë base utëntsá bësásajana smochjámashjna. Chë utëntsá bësásajana y chë paselo jóyënama benache, infiernoye cmochanjuánatse y banga chëjana mondámashjuana. <sup>14</sup> Chë tšabe vida binýnoye jamna base utëntsá bësásajana endmëna y ndoñe paselo jóyënama benache, y chiñe báseftanga mondbinýëna.

*Chë Bëngbe Bëtsabe ndoñe ndegombre juabna oyebuambnayënga*  
(Lc 6.43-44)

<sup>15</sup> “Cuedado smochtseboamna chë Bëngbe Bëtsabe ndoñe ndegombre juabna oyebuambnayëngbiama. Chëngna mo oveshëngcá tšëngaftangbioye mochanjabo, pero ndegombre chënga mondmëna mo tšátjaye tjañe quešëngcá. <sup>16</sup> Tšëngaftanga betiyënga jtsabuatmana ntšamo cada ona tojtseshajcá; cachcá tšëngaftanga chcanga smochantsëbuatma, ndayá chënga mochtsamama. Uchmašeshe betiyentsana ndoñe uvas ntjuátabëbiana, ni higuibé cardo betiyentsana. <sup>17</sup> Chca, nyetsca tšabe betiyiñe tšabe soye jashájonana; y chë ndoñe tšabeshiñna podësca soye. <sup>18</sup> Canýe tšabe betiyiñe quenátopodena podësca soyënga jashájonana, ni canýe ndoñe tšabe betiyiñe tšabe soyënga jashájonana. <sup>19</sup> Ndaye betiye podësca shajuanëshe jtseshatëtšana y iñoye jtsatmetsana. <sup>20</sup> As chca tšëngaftanga chënga smochantsëbuatma, ndayá chënga mochtsamama ca” —Jesús tojánayana.

*Bëngbe Bëtsabe amëndayoye ndoñe nyetscanga jamashjnana*  
(Lc 13.25-27)

<sup>21</sup> “Ndoñe nyetscanga chë ‘¡Utabná! ¡Utabná ca!’ atše smojtsatsëtsnanga, Bëngbe Bëtsabe amëndayoye quemochátamashjna. Nýe ntšamo atšbe Taitá, celoca endmëná, tojtsebošcá amëngna aifñe. <sup>22</sup> Quem luare jopochócama te banga atše smochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, ábeñe betsošbuáchemá, bënga fsëndoyebuambná, y ácbeyeca bacna bayëñgbe juabna entšángbentsana fsëndëtabocana, y ácbeyeca bëts soyënga fsëndama ca.’ <sup>23</sup> Chora atše chanjójuaye: ‘Ndocna te checbaisëbuátmana. Atšbentsana mojuánanga, bacna soye ama entsanga ca’ ” —Jesús tojánayana.

*Chë uta ucuatjoniñe*  
(Mc 1.22; Lc 6.47-49)

<sup>24</sup> “Chcasna, nda atše šojoyeuná y chë ntšamo sëntsichamcá tojtsama, endmëna mo canýe tšabá juabnaye boyabasacá. Chë boyabásana ndëtsbeñe chabe yebna yojajëbo. <sup>25</sup> Uaftena yoyuáshjango, chë béjayënga yojóftjajna, chë yebnoye puerte yojtsebinýiaye, pero chë yebna ndoñe ntjuáshajayana, chë yebna ndëtsbeñe inajéboyeca. <sup>26</sup> Pero nda atšbe palabra tojouena y ntšamo sëntsichamcá ndoñe tontsama, endmëna mo canýe ndëjuabnaye boyabasacá. Chë boyabásana chabe yebna cascajuñe yojajëbo. <sup>27</sup> Uaftena yoyuáshjango, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtsáshajaye ca” —Jesús tojánayana.

<sup>28</sup> Jesús chë soyënga jóyëbuambayama tojanpochocá ora, chë entsanga ojnanánënga imojtsemna ntšamo cha tojánabuatambama. <sup>29</sup> Jesús tojanabuatambá nyets obenánaca, mo canýa mando bomnacá y ndoñe nýe mo chë ley abuatambayëngcá.

## 8

*Jesús, can'ya bacna nguayanánaca šocábíoye tbojanshná*  
(Mc 1.40-45; Lc 5.12-16)

<sup>1</sup> Jesús tjoicana tojtantsmá ora, ba entsanga tmojanasto. <sup>2</sup> Chora can'ye boyabása bacna nguayanánaca šocá Jesúsbíoye tojanobeconá, chabe delante yojoshamentsíyie y tbojaníyana: —Utabná, aca tcojtsebošése, catjobenaye atšbe šocana jtsebojuánana ca.

<sup>3</sup> As Jesús tojanacuen'yanéjaná, chë boyabásabíoye tbojánbojajo y tbojaníyana: —Aíñe, séntseboše. Socana cbotsebojuaná ca.

Y cachora chabe šocana tbojtsanóbojuanañe. <sup>4</sup> Jesús chë shnanábíoye tbojaníyana: —Mouena, ndocnábeñe cattsecuéntaye; n'ye chë Jerusalenoca báchnëbíoye motsa, y cha cochjín'nyíyie mora aca ya tšabá cojtsatsmënema. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca n'yetšcanga chamotatsëmbona mora aca ya ndoñe šocá contsemnama ca —Jesús tbojaníyana.

*Jesús can'ye Romano soldadëngbe amëndayabe bochichnayábíoye tbojanshná*  
(Lc 7.1-10)

<sup>5</sup> Jesús Capernaumoye tojánamashëngo ora, can'ye Romano soldadëngbe amëndayá Jesúsbíoye tojanobeconá can'ye pavorama jaimpádama. <sup>6</sup> Jesúsbíoye tbojaníyana: —Utabná, atšbe bochichnayá yebnocá šocá entsemna, jama ndoñe quenátobena y jabuache tsetšanánaca entsobësná ca.

<sup>7</sup> Chora Jesús tbojanjúá: —Cha jáshnama chanjá ca.

<sup>8</sup> As chë soldadëngbe amëndayá tbojaníyana: —Señor, atše merecido taitatobuajoñe atšbe yebnentše chacuamashënguama; n'ye mayana y atšbe bochichnayá tšabá echántsatsmëna. <sup>9</sup> Atšbíoye mándayënga atše sëndábamna y átsnaca soldadëngbe amëndayá sëndmëna. Atše can'ye soldado stjauyana “motsa ca”, cha cachora jana; y in'ya stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

<sup>10</sup> Jesús chca tojanuena ora, tojanenjaná y chë ústonënga tojanéyana: —Ndegombre cbéyana, ni mo n'yetš Israelentše ni can'ya quem boyabasacá Bëngbe Bëtsábeñe n'yetšá ošbuachiyá chiyátin'jena. <sup>11</sup> Y šcuayana, shin'ye bocanoicana y shin'ye uenatjëmbambanoicana bëtscá entsanga mochanjabo, y Abraham, Isaac y Jacob, chë judiëngbe tempsca uámana bëts taitángaftaca mochanjotbiamá Bëngbe Bëtsabe amëndayoca, cán'yiñe juasama. <sup>12</sup> Ba Israeloca entsanga, chë ndëmuan'yëngbiamá Bëngbe Bëtsabe amëndayana natsana yochtsanmëna, chocana mochantëbuacana chë ndëbin'yna luaroye, infernoyey. Chentše puerte mochanjenóbošachna y chë tsetšanama juatsašënga mochantseoftšëojnaye ca —Jesús tojánayana.

<sup>13</sup> Chora Jesús chë soldadëngbe amëndayábíoye tbojaníyana: —Acbe yebnoye motsatá y chë ntšamo cojtsošbuachecá cachá chaotsemna ca.

Cachora chë bochichnayá tšabá yojtsatsmëna.

*Jesús, Pédrëbe uambén mamábíoye tbojanshná*  
(Mc 1.29-31; Lc 4.38-39)

<sup>14</sup> Chentšana Jesús, Pédrëbe yebnoye tojána. Chentše Pédrëbe uambén mamá šocá calentóracá yojtsejutsnajona. <sup>15</sup> Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontšë chënga jobuácuedana.

*Jesús ba šoquënga tojanashná*  
(Mc 1.32-34; Lc 4.40-41)

<sup>16</sup> Chë te jaibétatama ora, Jesús yojtsemnoye banga bacna bayëjëngbe juabna uambaye entsanga tmojanënatse. Chora, n'ye can'ye Jesús jóyebuambayëse chë bacna bayëjënga imojtsaisebocana y n'yetšca šoquënga tojanashná. <sup>17</sup> Chca Jesús tojanma, cachá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjafsanca y bëngbe n'yetšca tsetšanana chábeñe tonjanoquedá ca.”

*Chë Jesús juastama bošënga*  
(Lc 9.57-62)

<sup>18</sup> Jesús tojánanye mallajta entsanga chabe shëconana; as tojanmandá uafjajónaye chenguana jama. <sup>19</sup> Chorna, can'ye ley abuatambayá Jesúsbíoye tbojanobeconá y tbojaníyana: —Buatëmbayá, atše séntseboše aca juastama, ndëmoye chacojtsá choye ca.

<sup>20</sup> As Jesús tbojaníyana: —Chë zorrënga mondbomna cuevëshënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

<sup>21</sup> Chora inya, cach uatsjendayënguentsá, Jesúsbiyoye tbojanianya: —Bëngbe Utabná, šmolesenciá atšbe taitá chjšhesabotbontsañe ca.

<sup>22</sup> Chora Jesús tbojanjá: —Nye šmasto. Chë Bëngbe Bëtsabiana mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe ca.

*Jesús chë binÿia y chë béjaye bonguana yojëtsbema*

*(Mc 4.35-41; Lc 8.22-25)*

<sup>23</sup> Chentšana Jesús canÿe barquëshoye tojánamashëngo y chabe uatsjëndayënga imojtsetjëmbambnaye. <sup>24</sup> Ndeolpe tša jabuache binÿia chë uafjajónaye béjayiñe yojóshjango; nyëtsá jabuachana yojtsemna, chë olëshënga barquësho imojtsetšbotsana. Y Jesús chora inëtsomañe. <sup>25</sup> As chabe uatsjëndayënga tmojána Jesús jetsefšenama y tmojanianya: —jBëngbe Utabná, šmatsebacá. Montsenatjëmbambana ca!

<sup>26</sup> Chora Jesús tojanëyana: —¿Ndáyeca tša šmojtsauatja? ¿Tša batšatema šmojtsosbuachë, Bëngbe Bëtsá tšëngaftanga jujuabuáchama yobenama ca?

Chca tojanëyana y tojantsbaná. Chora tojanmandá chë binÿia y chë býyeshe bonguana chaotsamënama, y lempe natjëmbana yojtsatsmëna. <sup>27</sup> Chabe uatsjëndayënga ojanánënga imojtsemna y mëntsá imojtsichamo: “¿Nda quem boyabása yomna? Cha tonjayana y chë binÿia y chë býyeshe tmonjoyeuná ca.”

*Chë Gadara luaroca entsata, bacna bayëjbe juabna uambayata*

*(Mc 5.1-20; Lc 8.26-39)*

<sup>28</sup> Jesús uafjajónaye chenguana tojánashjango, canÿe luare Gadara ca uabáinentše. Chorna chë utabuantsánëngbentsána útata, bayëjbe juabna uambayata, tbojánbocna y Jesúsbiyoye tbojanobóconata. Puerte tšatjayata ibnamna, chíyeca entsanga ndoñe ntšobenana chëjana jtsachnéjuanana; <sup>29</sup> y chora tbojanontsé chë bacna bayëjëngbeyeca mëntsá uayebuáchana: —¿Ndayá bëngaftaca cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufrima, chama cabá ndoñe chë tempo yontsemna ora ca?

<sup>30</sup> Chentša béconana ba cotšënga imnajena y chënga imnëtsosañe. <sup>31</sup> Y chë bayëjënga Jesús tmojanimpadá: —Muentšana jésebecanama aca tcojamëse, cochjama bënga chë cotšëngbeñe fchayamashjnama ca.

<sup>32</sup> Y Jesús tojanëyana: —Motsajna ca.

Chora chë bayëjënga chë boyabásatbentsána tmojésanbocana y chë cotšëngbeñe tmojánamashjna; cachora chë cotšënga batsjocana penëšëjana uafjajónayoye imojtsoshbuetše y yojtsatajo.

<sup>33</sup> Chora chë cotšënga anÿenënga tmojtsanacheta, y chë puebloye tmojánashjajna ora, tmojanontsé lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámna. <sup>34</sup> Chora nyetsca entsanga chë pueblentsána tmojánbocana y Jesús yojtsemnoye tmojána. Chë entsanga Jesús tmojáninÿe ora, tmojanimpadá chë luarentšana chaueseboचना.

## 9

*Jesús, canÿe jama ndobenábioye tbojanšhná*

*(Mc 2.1-12; Lc 5.17-26)*

<sup>1</sup> Chca tojanopasá chentšana, Jesús canÿe barquëshoye tojánamashëngo, uafjajónaye chenguana tojána y cachabe puebloye Capernaumoye tojtashjango. <sup>2</sup> Chora, canÿe jama ndobená, tjuashiñe jajóná, Jesús yojtsemnoye básefta boyabásënga tmojanamba. Jesús tojáninÿe chënga tša imojtsosbuáchema chë šocábioye jáshnama cha bétsobenama; as chë šocábioye tbojanianya: “Sobreno, añemo matsca; acbe bacna soyënga tcbontseboperdoná ca.”

<sup>3</sup> Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiana; mo chábioye cuafjoyenguangcá entsemna ca.” <sup>4</sup> Pero Jesús yojtsetátšëmbo ntšamo chënga imojtsejuabnaycá; chíyeca tojanëyana: “¿Ndáyeca nyëtsá bacna juabnënga ainaniñe šmojtsebomna ca? <sup>5</sup> ¿Tšëngaftangbiana ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca?’ <sup>6</sup> Atše cbochanjñyanÿiye ntšamo chë Bëngbe Bëtsá Entšá tbojanbemá quem luarentše mando yobomnama, entsanga bacna soyëngama jáperdonama ca” —Jesús tojanëyana.

As chë jama ndobenábioye tbojanianya: “Matëtsbaná, acbe tjuashe mesocñe y acbe yebnoye motsatoñe ca.”

<sup>7</sup> Chorna chë jama ndobená tojtantsbaná y cachabe yebnoye yojtsatoñe. <sup>8</sup> Chca tmojáninÿyama chë entsanga auatjanánënga imojtsemna y Bëngbe Bëtsá imojtsatschuanaye, cha chca obenana entsanga tojánatšatama.

*Jesús, Matéobioye tbojanchembo chabuastama*  
(Mc 2.13-17; Lc 5.27-32)

<sup>9</sup> Jesús chentshana tojtsanoñe y canye entsábioye tbojáninÿe, Mateo ca uabainá, chë Romocama impuesto entsángbioye atjanayentše inétsotbemañe. Chora Jesús tbojaníyana: “Smasto ca.” As Mateo chentshana tojéftsantsbaná y tbojanasto.

<sup>10</sup> Jesús cach Mateobe yebnentše yojtsesaye ora, banga Romocama impuesto entsángbioye atjanayënga y ínÿenga bacna soye amënga tmojánashjajna y mesëshentše Jesús y chabe uatsjëndayëngaftaca imojotbiama. <sup>11</sup> Chë fariseunga chca tmojáninÿe ora, Jesusbe uatsjëndayëngbioye tmojanatjá: —¿Ntsamo chca yojtsemna, tsëngaftangbe buatëmbayá chë impuesto atjanayënga y bacna soye amëngaftaca entsesá ca?

<sup>12</sup> Jesús chca tojanuena y chë fariseunga tojanéyana: —Chë salud bomnënga ashnyá ndoñe ntsëjabótana, pero chë soquënga aife. <sup>13</sup> Smochjá y ntsamo ndegombre iuayancá smochjuatsjinÿe quem Bëngbe Bëtsabe uabemana palabrenguiñe:

Atše sëntseboše tsëngaftanga lastemadënga chašmotsemna, y ndoñe nÿe bayënga chašmotsëbánaye Bëngbe Bëtsá jëtschuyama ca. Atše ndoñe chiyátabo chë Bëngbe Bëtsabe bominÿiñe tsabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

*Jesús tmojanatjá chë Bëngbe Bëtsáftaca jencuëntama tondaye saytescama*  
(Mc 2.18-22; Lc 5.33-39)

<sup>14</sup> Chentshana, Juan chë Ubayanabe ústonënga tmojanobeconá y Jesús tmojanatjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuëntama. ¿Ndáyeca acbe uatsjëndayënga ndoñe chca ca?

<sup>15</sup> As Jesús tojanéjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngmënaca ndoñe ntsemnëngana. Pero ora echanjobuache y chë boyabása bouamná chentshana mochantsánatseñe; chora cocayé chë ófjanënga tondaye más jasama quemochátsbomna. Ntsamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjëndayëngaftacana.

<sup>16</sup> “Ndocná canÿe uatanguá entsayá base tsëm entsëjuaca jtarmëndana. Er chë tsëm entsëjua jtsabéconana y chë uatanguá entsayá más jtsatanëcanana, y chca chë uátanëcniñe más bëtsiñe jtsabemana. <sup>17</sup> Y cach ndoñe chë tojtseshayana vínoye tanguá jasabenguíne ntjtaftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshana, y chë vínoye y chë jasabenga tondayama ntjatoservënana. Chiyeca comna, chë tojtseshayana vínoyna tsëm jasabenguíne juaftsuámama; y chca, chë jasabenga y chë vínoye jtsoservënana ca” —Jesús tojánayana.

*Jesús canÿe shembásabioye tbojanshá y tojanma Jairëbe bembetema cháuatayenama*  
(Mc 5.21-43; Lc 8.40-56)

<sup>18</sup> Jesús entsanga yojtsëtsëntscuana, chë judiëngbe enefjuana yebnentša canÿe mandayá tojánashjango y Jesusbe shecuatšentše yojoshamentšiyiye. Chë mandayá tbojaníyana: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

<sup>19</sup> Chentshana Jesús y chabe uatsjëndayënga chë mandayá tmojanasto. <sup>20-21</sup> Imojtsaye ora, canÿe shembása stëtsóicana Jesúsbioye yojobeconá. Bnëtsana uta uatama oboftjajuanánaca cha inapadecena. Chë sócá Jesúsbioye yojobeconá ora, yojtsejuabnaye: “Masque nÿe mo chabe entsayá sibiájua chaijuábojajo, salud chantinÿena ca.” Chentshana chë sócá Jesusbe entsayá tojanábojajo.

<sup>22</sup> Tojanábojajo ora, Jesús tojanobuértana, chë shembásabioye tbojáninÿe y tbojaníyana: “Añemo matsca, shembása. Bëngbe Bëtsábeñe icošbuachéyeca, mora tsabá contsatmëna ca.” Y cach orscana cha tsabá yojtsatsmëna.

<sup>23</sup> Chënga tmojtëtanontsé ayana y chora chë mandayábica chënga tmojánashjajna. Chentše Jesús tojánanye, ínÿengna chë veloriamama imojtsanflautaye y ínÿengna tša imojtsošachiye. <sup>24</sup> Chora Jesús tojanéyana: “Muentšana mobocnënga. Chë shembásetema cabá ndoñe obaná quenátsmëna; nÿe endëtsomañe ca.”

Pero chë entsanga Jesúsbioye nÿe imojtsáfchaye. <sup>25</sup> Pero Jesús pronto chënga chë yebnentšana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacueshache y cachora chë shembásetema tojtantsbaná. <sup>26</sup> Y nÿets chë luarëjana ndayá Jesús yojamama nÿetsca entsanga imojátatšëmbona.

*Jesús uta jtanata tojanashná*

<sup>27</sup> Jesús chentshana tojéftsanbocna ora, uta jtanata tbojanasto y mëntšá ibojtsaiuébuache: —¡Davidbentshana Entšá, bëndata šmotsalastemá ca!



<sup>28</sup> Jesús chë yebnoye tojanamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuachë atšë chca jamama chjobenaye ca?

Y tmojanjuá: —Arseñor. Aíñe ca.

<sup>29</sup> Chora Jesús tojánabuchbojajo y tojanëyana: —Ntšamo tsëndatbe ošbuáchiyana yomncá, cachcá chaotsemna ca.

<sup>30</sup> Y cachora jinýama ibojtsobena. Jesús bëtscá chata mëntšá tojanamëndá: —Ndocná más quem soye chaondëtsetatšëmbo ca.

<sup>31</sup> Pero chata chentšana tbojěftsanbocna y cachora tbojanontšë ndayá Jesús chátaftaca tojanmama nýets chë luarëjana jacúntana.

*Jesús, canýe ndëbiábioye tbojanshna*

<sup>32</sup> Chë jtanata ibojtsebocanëntscuana, básefta entsanga canýe ndëbiá, bacna bayëjbe juabna uambayá, Jesúsbioye tmojanamba. <sup>33</sup> Jesús chë bacna bayëja chábensana tbojtanábocna y cachora chë ndëbiá tojtanontšë oyebuambnayana. Entšanga ojanánënga imojtsichamo: “Ndocna te Israelentšë chca bëtš soye chemuáisinýe ca!”

<sup>34</sup> Pero chë fariseunga imojtsichamo: “Cach bacna bayëjengbe amëndayá, Satanás, muábioye obenana tbojatštá chë bayëjënga entsángbentsana jtëbuacanama ca.”

*Jesús entsangbiama tbojanongmé*

<sup>35</sup> Jesús nýetsca publënguëjana y luarënguëjana yojsachnějuana y chë judiëngbe enefjuana yebnënguenache entsanga yojsabuátambaye. Yojanabuayiyá chë tšabe noticiënga Bëngbe Bëtšabe amëndayama, y nýetsca šocanëngama y tsetšanama yojánashnaye. <sup>36</sup> Y chë entsanga tojánanýe ora, puerte tbojanongmé. Er chënga imojtsemna mo abuajënyá ndbomna oveshëngcá, puerte uamëntšnayënga ba soyëngama padecena causa, y chaujabuachama ndocná ntsebomncá. <sup>37</sup> Chora chabe uatsjëndayënga tojanëyana: “Canýe bëtš jajañe bëtscá játbanama entsemna, pero peonga nýe báseftanga. Cachcá quem luarentšë, bëtscá entsanga Bëngbe Bëtšábioye nduabuátmënga montsemna, y chëngbioye habiama abuayinyayënga nýe báseftanga. <sup>38</sup> Peonga tmojtsashbenëse chë nduifñbioye jaimpádana ba peonga chauichamoma chë jaja saná játbanama. Cachcá, Bëngbe Bëtšábioye moimpadanga ba abuayinyayënga chauichamoma, quem entsanga chábioye chamúbuajama ca” —Jesús tojanëyana.

## 10

*Jesús chë bnëtsana uta uatsjëndayënga tojanabacacá*

(Mc 3.13-19; Lc 6.12-16)

<sup>1</sup> Chentšana Jesús tojánachembo chabe bnëtsana uta uatsjëndayënga, y obenana tojanatsatá bacna bayëjengbe juabna entsángbentsana jtábocnama y nýetsca šocanëngama y tsetšanama jashnayama.

<sup>2</sup> Chë bnëtsana uta uatsjëndayënga mëntšá imojanabaina: chë natsaná Simón, Pedro cánaca uabainá y chabe uabentšá Andrés; Santiago y chabe uabentšá Juan, Zebedeobe uaquiñata; <sup>3</sup> Felipe y Bartolomé; Tomás y Mateo, chë Romocama impuesto entsángbioye atjanayá; Santiago, Alfeobe uaquiñá y Tadeo; <sup>4</sup> Simón, chë celote ca uabobainá y Judas Iscariote, chë uayayëngbe cucuatšifne Jesúsbioye boshjuaná.

*Jesús, chabe bnëtsana uta uatsjëndayënga tojanichamó, Bëngbe Bëtšabe amëndayama jábuayenama*

(Mc 6.7-13; Lc 9.1-6)

<sup>5</sup> Jesús chë bnëtsana uta boyabásenga tojanichamó chë tšabe noticiënga entsanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentšë Samaria luaroca ndoñe smatjěftsamashjna. <sup>6</sup> Nýe Israeloca publëngoye šmochjá. Choca entsanga mo ótsena oveshëngcá montsemna, Bëngbe Bëtšábioye corente nduabuatma causa. <sup>7</sup> Smochjá y entsanga šmochjábuayenaye Bëngbe Bëtšabe amëndayana echanjóshjanguama. <sup>8</sup> Chë šoquënga šmochjášnaye, šmochjama chë obanënga chámuatayenama, bacna nguayanánaca šoquënga šmochjášnaye y bacna bayëjengbe juabna entsángbentsana šmochtábocna. Chë obenana šmonjóyëngacñe tondaye ntjëtšajauacá; cachcá, chë soyënga šmojtsamama tondaye entsanga smattsayëngacaye.

<sup>9</sup> “Ndoñe smattsambaye crocënaná uasnanëchiñe. <sup>10</sup> Ni shecnaja sanaca benachiñama, ni inýe entsayá jtsenomódama, ni shecchëtjonëshënga, ni jatjonëfja, er chë tšabe trabajayá jtsomerecënaná ntšamo tbojtsajabotcá jóyëngacñama.

<sup>11</sup> “Nderado canýe bëtš pueblentšë o base pueblentšë chašmójáshjajna ora, smochjánguango canýe tšabe entšá, inýëngbioye ndaingñayá, y chabe yebnentšë šmochtsoquedañe, inýe puebloye játantscuana. <sup>12</sup> Canýe yebnoye chašmójámashjna ora, nýetsca chentša oyenënga mëntšá šmochjácheuaye: ‘Chë bëngbe ainaniñe tšabe ebionana

tšëngaftangbe ainaniñe chaotsemna ca.' <sup>13</sup> Chë yebnentša entsanga ainaniñe tšabe ebionana jtsebomnama mercedo tmojtsebuajonëse, chë tšëngaftangbe ainaniñe tšabe ebionana chëngaftanga chaotsemna. Ndóñesna, nýe cach tšëngaftangtaftaca chaotsomñe. <sup>14</sup> Y nderado canýe pueblentše o bëtš pueblentše chë entsanga ndoñe tcmonjúbuaja y ndoñe tcmonjóyaunase, chentšana šmochjésebocana y chë shecuatšentša polvëshe šmochjésenstoto. Chca, chë entsanga mochántsetatšëmbo chënga tšëngaftangtaftaca ndoñe tšabá tmonjamama. <sup>15</sup> Ndegombre šcuayana, quem luare jopochócama te, chë ndoñe chacmonjúbuaja y ndoñe chacmonjoyauná entsanga Bëngbe Bëtsá puerte jabuache echantsacastigaye, y chë bacna entsanga Sodoma y Gomorra luaroquëngna ndoñe nýa nýetšá jabuache queochatacastigaye ca" —Jesús tojánayana.

*Ntsamo chë uatsjëndayënga mochjansúfria*

<sup>16</sup> "Šmochjouena. Atše cbontsachamná mo oveshënga cuenta tjañe quešëngbeñe. Chýeca studio bomnënga mo mëtšcuayëngcá šmochtsemna y uamanënga mo palomatemëngcá. <sup>17</sup> Entsangbiama cuedado šmochtsebomna, chëngbe pueblentša amëndayëngbe cucuatšinë tšëngaftanga cmochanjábashejuana y chëngbe enefjuana yebnënguenache cmochanjátsetšenaye. <sup>18</sup> Atšbe ústonënga bëtsemnama, mandadëngbioye y reyëngbioye cmochanjuntase. Y chca, tšëngaftanga šmochanjobenaye chëngbeñe y chë ndoñe judiëngbeñe ntsamo atšbiana šmotatšëmbcá jóyebuambayama. <sup>19</sup> Pero chë mandadëngbe cucuatšinë chacmójábashejuana ora, ntsamo o ndayá šmochjayanama ndoñe šmattsenócochinýena. Chca orna, Bëngbe Bëtsá tšëngaftanga cmochanjabuayená ntsamo o ndayá jóyebuambayama. <sup>20</sup> Tšëngaftanga ndoñe chë oyebuambnayënga quešmochátsmëna, sinó chë tšëngaftangbe Taitá, Bëngbe Bëtsabe Espiritu, tšëngaftangbiajana echantsóyebuambnayë. <sup>21</sup> "Y canýe entšá cachabe catšátbioye uayayëngbe cucuatšinë bochanjáboshjona chamotšóbama; y canýe taitá cachabe uaquinábioynaca. Y chë básënga chëngbe bëtšëtsangbe contra mochántsemna y uayayëngbe cucuatšinë mochanjábashejuana chamotšëbáyama. <sup>22</sup> Tšëngaftanga atšbe ústonënga bëtsemnama, nýetsca entsanga cmochantsëbuayënjá; pero nda nýets tempo átšbeñe ošbuachiyá chaotsomñá, atšbocaná echántsemna. <sup>23</sup> Canýe pueblentše chacmójšécamena ora, inýe pueblöye šmochtsacheta. Ndegombre cbëyana, Israelentša nýetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

<sup>24</sup> "Ni canýe uatsjëndayá chabe buatëmbayabiama más uamaná ntsemnana, ni chë oservená chabe nduiñbiama más uamaná. <sup>25</sup> Chë uatsjëndayá ya cachabe buatëmbayacá jtsemnama tojashjáchése, ndayá más nanjátšboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canýe yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntsamo chënga tšëngaftanga cmochtsëboboatma ca?" —Jesús tojanýyana.

*Nda ndegombre cuantsebiauatja*  
(Lc 12.2-7)

<sup>26</sup> "Chýeca entsangbiama ndoñe matauatjëngana. Chë yoitytëmena soyentšana tondaye ntjinýcá queochaisoquéda, y chë ndótatšëmbo soye, ntsoatšëmbcá queochaisoquéda. <sup>27</sup> Chë mora cbontšëtsëtsná soyënga, chë entsangbiama mo ibetiñe cuaftsemncá soyënga, tšëngaftanga šmochjama entsanga botamana chama chamotsetatšëmbuama. Y chë iytëcana cbontšëtsëtsná soyënga nýetsca entsanga šmochtsabuayinyaye, mo nda canýe yebnentša tšbanánocana notiënga tojtsayebuachcá. <sup>28</sup> Ndoñe matauatjëngana nýe chë tšëngaftangbe cuerpo japochócama imobëñëngbiama y ainana jtsephócama ndoñe ntšobenana. Más šmochtsebiauatja chë nda endobena tšëngaftangbe cuerpo y tšëngaftangbe ainana jtsephócama, nýetsca tescama infernoca.

<sup>29</sup> "Uta jaja shloftšëtmata nýe canýe denario crocenánama mondbëtšena. Masque chca, ni canýetema obanatema fhantsoye jotsatšana, tšëngaftangbe Taitá, Bëngbe Bëtsá ndoñe tontsebošëse. <sup>30</sup> Y tšëngaftangbiama, Bëngbe Bëtsá botamana jtsantjësñana, y chca, cha lempe tšëngaftangbiama jtsetatšëmbuana, bueta stjënashënga tšëngaftangbe bestšašinë yomnámna. <sup>31</sup> Chýeca ndoñe matauatjëngana, tšëngaftanga ba jaja shloftšëtmëngbiama corente más šmondúamana ca" —Jesús tojánayana.

*Ndabiana Jesucristo yochjayana chabe entšá yomna ca*  
(Lc 12.8-9)

<sup>32</sup> "Nda atšbe entšá yomna ca entsangbe delante tojayanabiama, átšnaca, atšbe Taitá, chë celoca endmënabe delante chanjayana cha atšbe entšá yomna ca. <sup>33</sup> Pero nda entsangbe delante atšbe entšá ndoñe yondmëna ca tojayanabiama, átšnaca, atšbe Taitá, chë celoca endmënabe delante chanjayana cha atšbe entšá ndoñe yondmëna ca" —Jesús tojanýyana.

*Jesusbe causa, entsángbeñe más jtsentsjanayana*  
(Lc 12.51-53; 14.26-27)

<sup>34</sup> “Ndoñe šmattsejuabnaye atše quem luaroye tijabo nyetsca entsanga natjěmbana chamotsiyenama. Atše chama ndoñe chiyátabo; atše sěnjabo causa, entsanga más mochántsejšanaye. <sup>35</sup> Atše sěnjabo chě uaquiñá cachabe taitabe contra chaotsemnana, chě bembe cachabe mamabe contra y chě bebinuá chabe uambén mamabe contra chaotsemnana. <sup>36</sup> Y chca, ba entsangbe uyayyěnga cachěngbe pamíllanga mochántsemna.

<sup>37</sup> “Nda cachabe taitá o mamábioye atšbiana más tbojtsebobonshánese, cha ndoñe ntsomerecénana atšbe entsá jtsemnana. Nda cachabe uaquiñá o bémběbioye atšbiana más tbojtsebobonshánese, cha cach ndoñe. <sup>38</sup> Y nda nyetsca chabe quem luare soyěnga ndoñe tonjěseboshjona atše juastama, y atšbiana jasúfriama ndoñe tontseprontana y cruciñe jobanámna, cha ndoñe ntsomerecénana atšbe entsá jtsemnana. <sup>39</sup> Nda tojtsentšena quem luarentše bětscá soyěnga jtsebonnana y atšbiana jasúfriama ndoñe tontseprontana, chě nyetsca tescama yomna tšabe vida echanjobuetše. Pero nda quem luarentša soyěnga cachá tojesonjá atše juastama, masque chaóbana, chě nyetsca tescama yomna tšabe vida echántsebonna ca” —Jesús tojánayana.

*Chě uacanana soyěnga*  
(Mc 9.41)

<sup>40</sup> “Nda tšěngaftanga chacmojúbuaja, átsnaca cha šochanjofja; y nda atše chašojofja, chě nda šojichmóbioynaca cha bochanjofja. <sup>41</sup> Nda canyě Běngbe Bětsabe juabna oyebuambnáyábioye tbojyouná, cha chca bětsemnana, chábioye Běngbe Bětsá canyě uacanana soye bochántatšetaye, mo cach Běngbe Bětsabe juabna oyebuambnáyabe uacanana soycá. Y nda canyě nyetsca soyěnguiñe tšabá amábioye tbojofja, cha chca uamanama, chábioye Běngbe Bětsá canyě uacanana soye bochántatšetaye, mo cach nyetsca soyěnguiñe tšabá amabe uacanana soycá. <sup>42</sup> Y ndána, tšěngaftanguentsá canyě nduamanábioye masque nyě mo base búyeshtema tbojuabatšetá, atšbe ustoná bětsemnayeca, ndegombre Běngbe Bětsá canyě uacanana soye chábioye bochántatšetaye ca” —Jesús tojánayana.

## 11

*Juan chě Ubayanabe ichmóněnga*  
(Lc 7.18-35)

<sup>1</sup> Jesús tojanpochocá chabe bnětsana uta uatsjěndayěnga jábuayenama, y chentšana tojt-sanoñe chě luariñe pueblěnguenache oyena entsanga Běngbe Bětsabe palabra jabuátambana y jábuayenama.

<sup>2</sup> Chě tempo Juan chě Ubayaná cárceloye tmojanětame. Choca cha vojouena ndayá Jesús yojtsamama. Y as, Jesús yojtsemnoye, básefta chabe ústoněnga tojanichamó, <sup>3</sup> měntšá jatjayama: —¿Aca ndegombre cojtsemna chě jabama ibojanmėná, chě Uámana Uabuayaná, o šojtsamna injábiana jatobátmama ca?

<sup>4</sup> Chca tmojantjá orna, Jesús tojanějua: —Smochjá y Juan šmochjauyana ntšamo šmojouena y šmojinjćá. <sup>5</sup> Cha šmochjacuénta: Chě jtaněnga tšabá entsatěbinjěna, chě coshetěnga tšabá montsatana, chě bacna nguayanánaca šoquěnga shnáněnga montsatsmėna y chě tšěměnga montsuenana, chě obaněnga tmontayena y chě ndbomnějéměngbioye chě tšabe noticiěnga montsabuyayiná ca. <sup>6</sup> ¡Puerte oyejuayá chaotsemna chě nda atše bacna soye ndoñe tsama ca jtsejuabnyěse, átsbeñe ošbuáchiyana ndoñe tontsajbaná cha ca! —Jesús tojaněyana.

<sup>7</sup> Chěnga tmojtsatanoñe ora, Jesús tojanontsé Juanbiana chě entsanga jáuayana, měntšá: “Juan jinjěma šmojánbocana ora, žndayá jinjěma chě entsanga ndoyena luaroye šmojánbocana? ¿Canyě entsá ainaniñe tondaye añemo ndbomná, mo canyě šěše binjěica shatiyeyněscá? <sup>8</sup> Y ndoñese, žndayá jinjěma choye šmojánbocana? ¿Canyě boyabása uámana entsayaca bopormaná? Ndoñe. Tšěngaftanga šmondětatsěmbo chě boyabásenga uámana entsayaca bopormaněnga chě mándayěngbe yebněnguiñe mondbětsiyenama. <sup>9</sup> Y asna, žndayama choye šmojánbocana? ¿Canyě Běngbe Bětsabe juabna oyebuambnáyá jinjěma? Ndegombre, aifñe; y cběyana, ndegombre cha canyě Běngbe Bětsabe juabna oyebuambnáyabiana más bětšá endmėna. <sup>10</sup> Cha, Juan, endmėna ndabiana Běngbe Bětsá chabe uabemana palabrěnguiñe tojánayana mo chabe ichmonacá, měntšá tojánayana ora: Cristo, atšbe entsá natsana sěnjichmó achiana chaóyebuambana,

entsanga jábuayenama aca jabama ainaniñe tšabe juabněngaca chamotseprontánama ca.

<sup>11</sup> Ndegombre cběyana: Nyets tempo entsángbeñe, ndocná quenátsmėna Juan chě Ubayanabiama más bětšá; masque chca, Běngbe Bětsabe aměndayoca chě más batšá uamaná, más bětšá echántsemna ntšamo mora Juan yomnama.

<sup>12</sup> “Juan chë Ubayaná tojánabo orscana méntscóñama, bëtská entsànga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imomnëngna, chëngbe nyëts añémoca montseboše chë mándayana jtsepochoçama. <sup>13</sup> Juan candabëntscuana, nyëtsca Bëngbe Bëtsabe juabna oyebuambnyënga y Moisesbe Ley nyë Bëngbe Bëtsabe amëndayama tmonjanobuambá. <sup>14</sup> Y tšëngaftanga chë soyënga jóyëngacñama šmojtsebošëse, Juan entsemna chë Bëngbe Bëtsabe juabna oyebuambnyá Eliascá, chë jabama ibojamná. <sup>15</sup> Chë jouenama tmojtsoebenënga, chamouena ca” —Jesús tojánayana.

<sup>16</sup> Méntšánaca Jesús tojánayana: “¿Ndayacá morsca entsànga imomna? Chënga mondmëna mo chë plazëngoca mondbetsetbiámama basetemëngcá; chënga chëngbe enutëngbiyoye jtsayebuáçhana <sup>17</sup> y méntšá jtsichámuana: ‘Tšëngaftangbiamá fsënjaflautá y ndoñe chešmatlantšá; ngmënaca fsënjaversiá y ndoñe chešmatošachna ca.’ <sup>18</sup> Juan tonjánabo, y bëtská entsángbeñe ndoñe quenjatamana ni jasana, ni jofšiyana, y entsànga montsanichamo chana bacna bayëjbe juabna uambayá yojamna ca. <sup>19</sup> Morna, chë Bëngbe Bëtsá Entšá tbojanbemá tonjabo, y chana aïñe entsamana bëtská entsángbeñe jtseyayana y jtsofšëšayana, y entsànga montsichamo chana yapa uasayá y vinoye tmoýá entsemna ca y Romocama impuesto entsángbiyoye atjanayënga y bacna soye amëngbe amigo ca. Pero Bëngbe Bëtsá endbëtsinýänýnaye cha nyëts osertánana bomná yomnama, chë ndayá cha tojama ora ndayá chentšana tojóboçna soyëngaca ca” —Jesús tojánayana.

*Chë nduauenana entsànga  
(Lc 10.13-15)*

<sup>20</sup> Chentšana Jesús tojanontšë jucácanana chë entsànga, ndëmuanyënga imojoyena chë públënguïñe ndayenache ba chabe bëts soyënga tojanma, chënga bacna soyënga amana ndoñe tmonsananjbanama y Bëngbe Bëtsabe benache ndoñe tmonanishachama. Méntšá yojtšichamo: <sup>21</sup> “¡Tša lastema, Corazín puebloca entsángbiama! ¡Tša lastema, Betsaida puebloca entsángbiámna! Chë chentšë sënjama bëts soyënga, Tiro y Sidón bëts públënguentšë matënjochnënguse, chentšá bacna entsànga ya tempo ngmënaca matmëntenjuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótatšëmbuama uajojësha entsayangaca matmëntopormanga y chëngbe bestšašïñe jatinyá matmënjenotbótoto. <sup>22</sup> Pero ndegombre cbëyana, ntšamo entsànga tmojamama, tšabá o ndoñe tšabá bëtsemnama jayanama chaojbuache ora, tšëngaftanga más bëts castigo šmochántsebmoma, chë Tiro y Sidonoca bacna entsángbe castiguama. <sup>23</sup> Y tšëngaftanga, Capernaumoca entsànga, ¿šmojtsejuabná celóntscoca atsebánanënga šmochtsemna ca? ¡Chë uabouana infernoye cmochantsësetjango! Chë muentšë sënjama bëts soyënga Sodomoca matënjochnënguse, choca entsànga ya tempo ngmënaca chëngbe bacna soyëngama matmëntenjuabó y Bëngbe Bëtsabe benache matmëntishache, y chë bëts pueblo cabá cachcá méntscuana mantsomë. <sup>24</sup> Pero ndegombre cbëyana, quem luare jopochóçama te, Bëngbe Bëtsá puerte jabuache cmochantsacastigaye, y chë Sodoma luaroca entsángbiyoye ndoñe nyëtsá jabuache quemochatacastigaye ca” —Jesús tojánayana.

*“Atšbiyoye mabënga y šmochjóchna”  
(Lc 10.21-22)*

<sup>25</sup> Chë tempo, Jesús tojánayana: “Atšë chatschuá, Taita, celoca y quem luarentša Utabná. Aca, chë nyë batsá tatsëmbënga tcojanýnyé, chë tša tatsëmbënga y osertánëngbiama tcojaiyëme soyënga. <sup>26</sup> Aïñe, chama cbontsadorana, Taita, chca chaotsemnama tcojábosenayeca.

<sup>27</sup> “Atšbe Taitá lempe chca šonjatštá. Chë Uaquiñábïoye ndocná corente quebnatábuatma; nyë chë Taitá aïñe. Y chë Taitábïoye ndocná corente quebnatábuatma; nyë chë Uaquiñá aïñe, y ndábïoye chë Uaquiñá tojtseboše nda chë Taitá yomnama jinýänýiyama, chánaca chë Taitábïoye bochantsábuatma.

<sup>28</sup> “Atšbiyoye mabënga nyëtsca tšëngaftanga uamëntšnyënga y bëtská trabajo uangmënënga, y atšë chanjama tšëngaftanga chašmochnama. <sup>29</sup> Ntšamo canýe entsá, uacná yuguëšïñe juabatsëcana juanatsama, cachcá, tšëngaftanga atšë šmochjalesëncia jobnatsayama y jabuátambama. Atšbëntšana šmochjuatsjinýe: atšë uantado mëná sëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsebmoma. <sup>30</sup> Mo canýe uacnacá, ndoñe tishuta yuguëšëca o ndoñe uauta uasmanëshaca, paselo jama jobenayana, cachcá tšëngaftanga šmochántsemna atšë cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y más paselo nyëtsca soyënga jamama echántsemna ca” —Jesús tojánayana.

## 12

*Jesusbe uatsjéndayénga ochnayté trigo tmojanátabebe**(Mc 2.23-28; Lc 6.1-5)*

<sup>1</sup> Chê tempo, Jesús canýe ochnayté canýe jajajana yojtsachñéjuana. Chabe uatsjéndayéngna shéntseca imojtsemna, chíyeca tmojanontsé trigo juatabebiana y chë meshénga jasana.

<sup>2</sup> Chë fariseunga chca tmojanínýe ora, Jesús tmojaníyana: —Minýe, acbe uatsjéndayénga canýe soye montsama y chë soye ochnayté jamama ndoñe quenátslesenciana ca.

<sup>3</sup> As Jesús tojanéyana: —¿Ndoñe šmëndualía y šmondétatšémbo ndayá David y chabe enuténga tmojanmama, shéntseca imojtsemna ora? <sup>4</sup> Chca orna, David, Bëngbe Bëtsabe bëts yebnoye yojámashéngo y chë Bëngbe Bëtsá chentše yojamnama inýinýnaye tandëšénga yojase. Chë tandëše nýe ndánaca jasama ndoñe yonjalesenciana, ni Davidbiana, ni chabe enuténgbiana. Nýe bachnangbiana belesenciana chë tandëše jasama. Masque David chca tojanma, Bëngbe Bëtsá chora ndoñe tonjánayana David canýe bacna soye tojanma ca. <sup>5</sup> ¿O ndoñe šmëndualía y šmondétatšémbo, Moisesbe leyíne, chë bachnanga ochnayté Bëngbe Bëtsabe bëts yebnentše jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama? <sup>6</sup> Y atše šcuayana: Muentše canýa entsemna, cha chë Bëngbe Bëtsabe bëts yebnentša bachnangbiana más uamaná endmëna y chabe amëndayoca soyénga más entsámama chë bachnangbe mándayentša soyéngama. <sup>7</sup> Bëngbe Bëtsabe uabemana palabrénguine mëntšá endayana:

Atše séntseboše tšéngaftanga lastemadénga chašmotsemna,

y ndoñe nýe bayénga chašmotsébánaye Bëngbe Bëtsá jëtšchuyama ca.

Ntšamo chíne entsayancá ndegombre cmojtsésertánëse, tšéngaftanga ndoñe chéngbe contra šmattsichamo, chë ochnayté chca tmojtsaméngbiana. <sup>8</sup> Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

*Chë buashana cucuatše bomna entšá**(Mc 3.1-6; Lc 6.6-11)*

<sup>9</sup> Chentšana Jesús tojtsanoñe y chentša judiéngbe enefjuana yebnoye tojánamashéngo.

<sup>10</sup> Chentše yojtsemna canýe boyabása buashana buacuatše bomná. Chë fariseunga imojtsenguaye ndayánaca, as chca chénga jtsebomnama ndaye sóyeca Jesús mal jaquédama. Chcasna, chora chénga Jesús tmojantjá: —¿Queojtseseleenciana canýe ochnayté šocá jáshnama ca?

<sup>11</sup> Y Jesús tojanéjua: —¿Nda tšéngaftanguentšá, canýe oveshá tbojtsebomna y nýa chë ochnayté canýe fshantsentše atéfnoye chë oveshá tojtsótsatše, chora chë boyabása nanjá o ndoñe chë oveshá jatábocnama? <sup>12</sup> ¡Entšá oveshabiana puerte más uamaná endmëna! Chcasna, entelesenciana chë ochnayté tšabe soye jamama ca —Jesús tojanéyana.

<sup>13</sup> Chora Jesús chë buashana buacuatše bomnábioye tbojaníyana: “Macuenýanéjaná ca.” Y chë boyabásana tojanacuenýanéjaná y chora chëšša tšabá yojtsatamna mo cach inýetšacá.

<sup>14</sup> Pero chë fariseunga tmojésanbocana ora, tmojanontsé juabnayana ntšamo jamëse Jesús jóbama.

*Ndayá chë Bëngbe Bëtsabe juabna oyebuambnayá Jesusbiana tojánayana*

<sup>15</sup> Jesús chë soye tojántatšémbona ora, chentšana tojtsanoñe y ba entsanga tmojanasto. Nýetsca šoquénga tojanashná, <sup>16</sup> y tojanamëndá chabiana entsángbeñe ndoñe chamondëtsóyeuambnama. <sup>17</sup> Chca tojanamëndá, cachcá chaotsemnana ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana:

<sup>18</sup> Muentše atšbe oservená entsemna. Atše cha sënjabocacá,

atšbe bonshaná, y atše corente chabiana séntsoyejúá.

Atše chanjama atšbe Espíritu chabe ainaniñe chaotsemnana

y entsanga echanjabuayená, Bëngbe Bëtsá nýetsca luarénguentsana entsángbiana yoch-jayanama chénga tšabá o ndoñe tšabá tmonjamama.

<sup>19</sup> Cha ndoñe queochátayajuatsana, ni queochátschembumbuana.

Chabe oyebuambnayana tsáshenañe ndocná queochatuena.

<sup>20</sup> Mo nda chë atcana šëse ndoñe más jatsndbemana,

chë ndobenénga cha ndoñe queochátapochocaye.

Mo nda chë quinýenéjua nýe uabojátšena uajuinýnéjua ndoñe ntsafsanana,

chë Bëngbe Bëtsábeñe jtsošbuáchiyama imojtsebojátšangbe obatmanana chábeñe, cha ndoñe queochátabuajuanaye.

Cha nýets añémoca echanjëftsetrabája,

entsanga chéngbe ainaniñe Bëngbe Bëtsabe ndegombre soyénga chamóyëngacñëntscuana.

<sup>21</sup> Y nýetsca luarénguentsana entsanga chábeñe mochantsobátmana ca —cha tojánayana.

*Fariseunga tmojánayana Jesús Satanásbentsana obenana tojanóyëngacñe ca (Mc 3.20-30; Lc 11.14-23; 12.10)*

<sup>22</sup> Chora, Jesús yojtsemnoye canye boyabása jtaná y ndébiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabínynama y chabu-atauénanama. <sup>23</sup> Y nyetsca entsanga ojanánënga imojtsichamo: “¿Mua yojtsemna chë Davidbentsana Uámana Entśá, chë Cristo ca?”

<sup>24</sup> Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatśtá chë bayëjënga chauatëbuacnama ca.”

<sup>25</sup> Y Jesús yojtsetátsëmbo ntšamo chënga imojtsejuabnayama; as tojanëyana: “Canye amëndayentse entsanga tmojtsenojatá y tmojtseñayase, cachënga jenpochócana. Cachcá, canye bëts pueblentsa entsanga o canye yebnentsa pamállanga tmojtsenojatá y ndoñe tmontsenëyeuananëse, chënga ndoñe tšabá nyets tempo quemochátsmëna. <sup>26</sup> Cachcá, Satanás cachabe bayëjënga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mádayana quem luarentšë jëftsebomnana? <sup>27</sup> Tšëngaftanga šmotsichamo atšë Beelzebube obenánaca chë bayëjënga tsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebomna chë bacna bayëjënga jtëbuacnama? Chýecna, chënga montsinýinýná ntšamo ndegombre yomnana y tšëngaftanga ndoñe ndegombre soye šmotsichámuama. <sup>28</sup> Y atśna, chë Bëngbe Bëtsabe Espiritbeyeca chë bayëjënga entsángbentsana sëndëtëbuacana; y chë soye entsinýinýná Bëngbe Bëtsabe amëndayana tšëngaftangbioye tojóshjanguama.

<sup>29</sup> “¿Ntšamo nda nanjobenaye canye corente añemo bomna entšabe yebnoye jamashënguana y chabe soyënga jtsebocana, ndoñe natsana chábioye tconjshëtsebatsëquëse? Nye tcojshëtsebatsëquëšna aifne cuanjobenaye cha jefcana. Atšë ya chca Satanássoftaca sënjama.

<sup>30</sup> “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana.

<sup>31</sup> “Chýeca cbëyana, Bëngbe Bëtsá entsanga echanjáperdonaye nyetsca chëngbe bacna soyënga y chë Bëngbe Bëtsabiana puerte bacá oyebuambnayana, mo chábioye cuafjoyenguangcá; pero ndoñe queochátaperdonaye chë Uámana Espiritbiana puerte bacá ichámënga. <sup>32</sup> Bëngbe Bëtsá bochanjaperdóna chë Cha Entśá tbojanbemabiana ndoñe tšabá ichamuábioye; pero chë Uámana Espiritbiana ndoñe tšabá ichamuábioyna, ni quem luarentšë, ni ndocna te quebochatsperdóna ca” —Jesús tojánayana.

*Tšabe betiye o ndoñe tšabe betiye tondmënana, jtsotatsëmbuana ntšamo tojashajoncá (Lc 6.43-45)*

<sup>33</sup> “Canye betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënana, jtsotatsëmbuana ntšamo chëshe tojashajoncá. <sup>34</sup> ¡Mëtscuaye entsanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entsanga šmojtsemnëse? Er ndayá ainanoca becá tomnana entśá jtsóyebuambnayana. <sup>35</sup> Chë tšabe entśá, chë ainanoca tšabe juabnënga bomnentšana jtsóyebuambnayana, y chë bacna entšana chë ainanoca bacna juabnënga tobomnentšana jtsóyebuambnayana. <sup>36</sup> Y ndegombre cbëyana, chë entsangbiana tšabá o ndoñe tšabá tmonjamama jayanama tempo chaojobjuache ora, ndaye ndoservena palabra šmojóyebuambama, Bëngbe Bëtsabe delante šmochanjayana ndáyeca chca ca. <sup>37</sup> Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aifne o ndoñe cmontsemna castiganá jtsemnana ca” —Jesús tojánayana.

*Chë bacna entsanga Jesús tmojanimpadá canye bëts soye chaoma, chabe obenana jinýama (Lc 11.29-32)*

<sup>38</sup> Chentšana, básefta fariseunga y Moisesbe ley abuatambayënga Jesús tmojantjá: —Buatëmbayá, bënga fsëntseboše aca canye bëts soye chacoma, acbe obenana chašcuinýanyëma ca.

<sup>39</sup> As Jesús tojanëjua: —Quem puerte bacna entsanga y ndošbuáchiyënga montseboše atšë canye bëts soye chaoma, atšbe obenana jinýanyiyama; pero chca soye ndoñe quemochátinýe, sinó nye chë ndayá yomna mo chë Bëngbe Bëtsabe juabna oyebuambnayá Jonássoftaca tojanopasá soycá. <sup>40</sup> Ntšamo Jonás unga te y unga ibeta chë bëts beonbe uafsbioye yojëftsemncá, cachcá chë Bëngbe Bëtsá Entśá tbojanbemá unga te y unga ibeta fshantse jashenoye echanjëftsemna. <sup>41</sup> Morsca entsanga tšabá o ndoñe tšabá tmonjamama Bëngbe Bëtsá yochjayana te, Nínive bëts puebloca entsanga mochanjotsaye y morsca entsangbiana

mochanjayana ndoñe tšabá tmonjama ca; er chënga, Jonás yojtsabuayiyñaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiama más uamaná endmëna. <sup>42</sup>Morsca entšanga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entšangbiama echanjayana ndoñe tšabá tmonjama ca; er chana chë quem luare uajjbana luarëngocana tojánabo Salomonbe oseratanáca palabrënga joudenama, y chë mora muentše entsemnana, Salomonbiama más uamaná endmëna ca —Jesús tojánayana.

*Ndaya inopása chë bacna entsángaftaca*  
(Lc 11.24-26)

<sup>43</sup> Jesús mëntšánaca tojánayana: “Canýe bacna bayëja canýe entsábentšana tojésebcna ora, chë bayëjna bojojo luarënguenache jtsanana ndayentše jóchnama onguayíñe, y canýe luare ndoñe tonjínýena ora cha jenójuaboyana: <sup>44</sup> ‘Atšbe oyenoye, chë ndayentšana sënjëftsebcnoye chanjeshëcona ca’. Y choye tojtashjango orna, jinýenana lempe tšabá cha jtesamashënguama, mo chentše ndocná tontsiyencá, tsjajniñe y lempe botamaniñe cuaftsemncá. <sup>45</sup> Chorna chë bayëjna jana y inýe canýsëfta bayëjenga chabiamá más opëjenga jobiatšana y nyetscanga choye jamashjnana chë boyabásabeñe joyénanama. Y chca, chë boyabása tempscama más bacna entsá jtsemnana, chora chë natsanama más bayëjenga abama causa. Morsca puerte bacna entsángaftaca cachcá echanjochñëngo ca” —Jesús tojánayana.

*Chë Jesusbe ndegombre pamillanguentsënga*  
(Mc 3.31-35; Lc 8.19-21)

<sup>46</sup> Jesús cabá entsánga yojtsëtsnaye ora, chabe mamá y catsátanga tmojánashjajna y imojtseboše Jesúseftaca jóyebuambayama. Nýe shjoca imojtsemna; <sup>47</sup> asna, canýe boyabása Jesúsbioye tbojanbuayená: —Acbe mamá y acbe catsátanga shjoca montsemna y montseboše ácaftaca jóyebuambayama ca.

<sup>48</sup> Pero Jesús chë jauenayana tojánabioye tbojaninyana: —¿Nda atšbe mamá yomna, y ndëmuanyënga atšbe catsátanga ca?

<sup>49</sup> Y cachora chabe cucuatše tojanatsbaná, chabe uatsjéndayënga tojanënyanyë y tojánayana: —Quemënga montsemna mo atšbe mamá y mo atšbe catsatangcá. <sup>50</sup> Er ndánaca, ntšamo atšbe Taitá, celoca endmëná yobošcá tojtsama, jtsemnana atšbe catsata, atšbe uabëna y atšbe mamá, atšbe ndegombre pamillanguentsá ca —Jesús tojánayana.

## 13

*Chë jenabe cuento*  
(Mc 4.1-9; Lc 8.4-8)

<sup>1</sup> Cach te, Jesús yebnentšana tojéftsanbocna y uafjajónaye tsachoca tojanótbema. <sup>2</sup> Mallajta entsánga choye tmojanobeconá; as Jesús, chë uafjajónayentše yojanamna canýe barquëshoye tojánasëngo, tojanótbema; y chë entsánga tsachoca imojtsemna. <sup>3</sup> Chorna ba soyëngama cuentëngaca chënga tojanabuatambá.

Mëntšá tojanëyana: “Canýe jená chë jénaye jauquëshama yojéftsebcna. <sup>4</sup> Yojsëjquëshaye orna, básëfta jénaye benache juachañe yojuatquécjana, pero chë jaja shloftšënga imojástjajna y lempe imojtsósañe. <sup>5</sup> Inýe meshëngna ndëtšbenguiñe yojuatquécjana, ndoñe yapa fshantse binýentše. Chiñna betscó yojuábocna, fshantse ndoñe jashenocana yonjanmëna causa, <sup>6</sup> pero shinýe yojábocna ora, puerte yojojënyána y yojsnancta; y yojsábojo, bëtscá tbëtëjenga tondaye causa. <sup>7</sup> Inýe meshëngna ucmëshangañe yojuatquécjana, y chë ucmëshangá yojuájua orna, lempe yojsatscué. <sup>8</sup> Y inýe meshëngna, uanguanëshiñe yojuatquécjana y puerte botamana chiñe yojuashajo: ínýenache nýe canýe jénayentšana mo patse meshënga yojuashájona, ínýeñna mo chñënguana bnëtsana meshe y ínýeñna mo unga bnëtsana meshe.”

<sup>9</sup> Jesús chca jacuéntama tojanpochocá ora, mëntšá tojánayana: “Chë joudenama tmojt-sobenënga, šmochjouena ca.”

*Ndayeca Jesús cuentëngaca yojánabuatambaye*  
(Mc 4.10-12; Lc 8.9-10)

<sup>10</sup> Chora chë uatsjéndayënga tmojanobeconá y Jesús tmojtantjá: —¿Ndayeca entsánga cuentëngaca cojtsabuatambá ca?

<sup>11</sup> As Jesús tojanëjua: —Bëngbe Bëtsá tšëngaftanga cmontsinýanýná nyetsca chë mo iytëmcá yomna soyënga chabe amëndayama, pero chë ínýengbioyna ndoñe. <sup>12</sup> Nda tojtseboznábioye más jatštayana y chca cha corente bëtscá jtseboznana; pero chë tondaye tondboznábioyna, chë batšatema tobomna sóynaca mochántsebcna. <sup>13</sup> Chiyeca atše

cuenténgaca chénga séntsétsétsná. Chca, masque corente chamotsafsa, ndoñe chamondobená Bèngbe Bètsabe soyénga jinýama; y masque beca ché soyénga chamouena, ndoñe tšabá quemochátuenana, ni queochátésertana. <sup>14</sup> Chcáyecna, chéngbeñe entsemna cachcá ntšamo ché Bèngbe Bètsabe juabna oyebuambnayá Isaías tojanayancá:

Masque beca chamouena, ndoñe queochátésertana.

Masque puerte chamotsantješna, ndoñe quemochátinýe

<sup>15</sup> Quem entšanga ndoñe quemátsoše botamana jajuaboyana;

chénga uamatsáchtonénga montsemna

y chéngbe bomínýnaca cachcá.

Chca ndóñesna, chénga muantsobena jinýama, jouenama y ainaniñe josértama;

y chca, chénga bacna soyénga amana muantsajbaná y atšbe benache muantishache,

as atše chénga chayatsebacama ca —cha tojéftsanbema.

<sup>16</sup> “Tšéngaftangna oyejuayénga šmochanjoyena, er šmondobomna bomínýe y matscuašénga Bèngbe Bètsabe soyénga jinýama y jouenama. <sup>17</sup> Ndegombre chéyana, banga Bèngbe Bètsabe juabna oyebuambnayénga y nyetsca soyénguiñe tšabá aménga tmonjánbošena ché tšéngaftanga šmontsonýá soyénga jinýama, y ndoñe chemátaninýe; tmonjánbošena ché tšéngaftanga šmontsuenana soyénga jouenama, y ndoñe chemátanuena ca” —Jesús tojanéyana.

*Jesús ché jenabe cuentama tojanabuayená*

(Mc 4.13-20; Lc 8.11-15)

<sup>18</sup> “Chcasna, oído šmochajajao; ché jenabe cuento méntšá endayana: <sup>19</sup> Ché Bèngbe Bètsabe améndayama tmojouena y ndoñe tontsésertana entšanga mondména mo ché benache juachañe yojuatquécjana jenaycá; Satanás jabana Bèngbe Bètsabe palabra chéngbe ainantéšana jabétsabuajuanama, chénga chiñe ndoñe chamondétsošbuáchema. <sup>20</sup> Y ché ndétsénguiñe yojuatquécjana jénaye entsemna mo ché aife Bèngbe Bètsabe palabra tmojouena y Bèngbe Bètsabeñe jtsošbuáchiyama oyejuayénga tmojtsemna entšangcá; <sup>21</sup> pero ndoñe nyets tempo chana jochóajuana, y chca, ndoñe bayté Bèngbe Bètsaftaca ntjéftsemnéngana, ndoñe yapa tmontsašbuaché causa. Inýenga chéngbioye mochantsébuayénja y Bèngbe Bètsabeñe betsošbuáchiyama mochanjasúfrianga; chíyeca chénga Bèngbe Bètsabe palabra cachcá mochanjesonýaye. <sup>22</sup> Ché ucméshangañe yojuatquécjana jénaye entsemna mo ché Bèngbe Bètsabe palabra tmojouena entšangcá, pero quem luarentša soyéngaca oyejuayénga jtsemnana yapa mochántsenojuabnaye y mallajta crocénana y ba soyénga jtsebnomnana mochántseboše. Chíyeca chénga Bèngbe Bètsabe palabra jtsebnétjombana y ntšamo cha tojayancá ndoñe ntsamana. <sup>23</sup> Pero ché uanguanéshiñe yojuatquécjana jénaye entsemna mo ché Bèngbe Bètsabe palabra tmojouena y botamana jósertana entšangcá. Mo canýe betiye puerte tšabá tojtshajuancá, chénga bétscá tšabe soyénga Bèngbe Bètsabiama mochántsama. Inýenga inýengbiana más bétscá soyénga mochántsama, y chca, inýenga jtsemnana mo ché patse meshénga tojanshajo jenaycá, inýenga mo ché chnénguana bnétsancá y inýengna mo ché unga bnétsana meshénga tojanshajo jenaycá ca” —Jesús tojanabuayená.

*Ché tríguañe bacna shacuanama cuento*

<sup>24</sup> Jesús méntšánaca tojanacuntá: “Bèngbe Bètsabe améndayana endména mo ché tšabe jenaycá, canýe boyabása chabe jajañe yojáje. <sup>25</sup> Pero nyetscanga imojtsomañe orna, chabe uayayá yojáshjango y ché trigo jeniñe bacna shácuaña yojesejé y yojtsatoñe. <sup>26</sup> Y ché trigo yojuájua y ya yojtshajuana orna, ché bacna shácuañenaca yojuábocna. <sup>27</sup> As ché peonga imojá ché nduiño jauyanama: ‘Bacó, ché jajañe tšabe tconjanjé y as, ¿ndáyeca ché bacna shácuaña chiñe tojuábocna ca?’ <sup>28</sup> Y ché nduiño yojáyua: ‘Atšbe uayayá chca tojama ca.’ Chora ché peonga imojatjaye: ‘¿Quectseboše bēnga fchayá ché bacna shácuaña jetsejashtsésama ca?’ <sup>29</sup> Pero ché nduiño yojáyua: ‘Ndoñe. Ché bacna shácuaña šmojtsejashtsésana ora, ché trígnaca šmattsejashtse ca. <sup>30</sup> Más tšabana, cachcá mochjonýaye cánýiñe chaójuama, ché jaja saná játbana tempo chaojobuáchéntsuaña. Chora ché trabájayénga chanjichamuá y chanjáméndaye natsana ché bacna shácuaña chamotsejashtsése y chamotsentsacuacjuá jtsejuinýiyama, y chentšana ché shajuana chamuatbaná y atšbe grano uaquécjnaye yebniñe chamotsatsuamá ca’” —Jesús tojánayana.

*Ché mostaziye jenayama cuento*

(Mc 4.30-32; Lc 13.18-19)

<sup>31</sup> Jesús méntšánaca tojanacuntá: “Bèngbe Bètsabe améndayana endména mo canýe mostaza betiye jenaycá, canýe boyabása chabe jajañe yojáje. <sup>32</sup> Ndegombre, nyetsca jenayéngama ché mostaza jénaye ché más básetema endména, pero tojójua orna, ché jajañentše ché más béts betiye jóbemana. Tša béts betiye jtsemnana, chíyeca ba buacuashangá



jtsabomnana y chë jaja shloftšënga jana y chiñe uajajonëtemëngá jauábopormana ca” —Jesús tojánayana.

*Chë levadurama cuento*

(Lc 13.20-21)

<sup>33</sup> Quem inye cuétnaca tojanëyana: “Bëngbe Bëtsabe amëndayana endmëna mo levadurca; canye shembása chana jenájuabana unga medida arninñañe, nyëtsana chauabochama ca.”

*Ndáyeca Jesús entšanga cuentëngaca yojanabuayiyná*

(Mc 4.33-34)

<sup>34</sup> Jesús nyëtsca chë soyëngama lempe cuentëngaca entšanga jtsëtsëtsnayana, y cuentëngaca ndoñesna ndoñe yonjanoyebuambná. <sup>35</sup> Chca yojamna ndayá cachcá chaochnënguama ntšamo chë Bëngbe Bëtsabe juabna oyeubuambayá tojanayancá, mëntšá: Jabuátambamna cuentëngaca chanjôyebuambaye; chanjayana chë iytëmena soyëngama y chë entšanga ndoñe mondëtatšëmbo soyëngámncá; Bëngbe Bëtsá quem luare tojanma orscana chë soyënga yomna ca —cha tojánayana.

*Chë tríguañe bacna shácuana cuentama Jesús tojanabuayená*

<sup>36</sup> Chentšana Jesús chë entšanga tojtanichamó y yebnoye tojtanamáshëngo. Chentšna chabe uatsjëndayënga tmojanimpadá ndayá chë bacna shacuana cuento betsayancá chauabuayenama. <sup>37</sup> As Jesús tojanëyana: “Chë tšabe jénaye jená endmëna chë Bëngbe Bëtsá Entšá tbojanbemá, <sup>38</sup> y chë jajañna, quem luare. Chë tšabe jénaye entsemna chë Bëngbe Bëtsabe amëndayoye mochjámashjna entšanga, y chë bacna shácuana entsemna chë bacna bayëjëngbe amëndayabe entšanga, <sup>39</sup> y chë uayayá, chë bacna shácuana vojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotëmënga. <sup>40</sup> Ntšamo chë bacna shácuana jtsejashtsëtsana y iñoye jtsatmetšana jtsejuinñiyama, cachcá echántsemna quem luare jopochócama te. <sup>41</sup> Chorna, chë Bëngbe Bëtsá Entšá tbojanbemá chabe angelotëmënga echanjichamuá chë inyënga bacna soye chamomama amënga y chë bacna soyënga amënga chabe amëndayentšana chamotsajuanayama. <sup>42</sup> Y chora chëngbioye chë uabouana ifëshoye mochantsësetjango y chentse puerte mochanjenóbošachna y chë tsetšanama juatsašënga mochantsenoftšëjonnaye. <sup>43</sup> Chora, chë ntšamo Bëngbe Bëtsá yomandacá amëngna corente mo shinycá mochantsebuashinñiyana chëngbe Taitá, Bëngbe Bëtsabe amëndayoca. Chë jounama tmojtsobenënga, šmochjouena ca” —chora Jesús tojánayana.

*Chë fshantsiñe uaiytëmena bomnanama cuento*

<sup>44</sup> “Bëngbe Bëtsabe amëndayana endmëna mo chë fshantsiñe uaiytëmena bomnancá. Canye boyabása chë bomnana yojuinñyena y chentšana iytëcana cachentse yojesatbontšá. Corente oyejuayá vojta, nyëtsca chabe bomna soyënga yojetsatobuiye y chentšana chë fshantse yojtobuámiñe ca” —Jesús tojánayana.

*Chë corente uamana fiantse ndëtsëtëmënga cuento*

<sup>45</sup> “Mo canye entšá uamana fiantse ndëtsëtëmënga obuamnañacánaca endmëna chë Bëngbe Bëtsabe amëndayana. <sup>46</sup> Chana, canye corente uamana ndëtsëtëma yojinñyena ora, vojta y lempe chë inabomma soyënga yojetsatobuiye y chë ndëtsëtëma yojtobuámiñe ca” —Jesús tojánayana.

*Chë atarraiëshama cuento*

<sup>47</sup> “Bëngbe Bëtsabe amëndayana endmëna mo canye atarraiëshacá, buyeshoye jutšenana y nyëtsca beonga jashebuáyana. <sup>48</sup> Chë atarraiëshá jútjena tojtsamna orna, chë beonga ashebuánayënga jtsashëbjátsëcana, tsachoye juyambana y chentse juatbemana chë beonga jabocacayama; chë tšábënga sbarëquënguiñe juatsuámana y chë ndoñe tšábëngna jtsëtsanana. <sup>49</sup> Cachcá echanjochnëngo quem luare jopochócama tempo chaojobuache ora. Chë angelotëmënga mochanjábocana chë tšabe entšángbentšana bacna entšanga jaluárama, <sup>50</sup> y chë bacna entšangna chë uabouana ifëshoye mochántsatquëcjaye, y chentse puerte mochanjenóbošachna y chë tsetšanama juatsašënga mochantsenoftšëjonnaye ca” —Jesús tojanacuntá.

*Anteo y tsëm uamana bomnana*

<sup>51</sup> Chora chabe uatsjëndayënga Jesús tojanatjá: —¿Lempe chama quecmojtsësertana ca? Y chënga tmojanjuá: —Arseñor, añe ca.

<sup>52</sup> As Jesús tojanëyana: —Canye ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bëtsemnana cha tojtsatsjendá orna, mo canye yebnentša nduiñcá cha jtsemnana. Chë nduiñna chabe grano uaquëcjnaye yebnocana anteo y tsëm uamana bomnana juabocnana.

Cachá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca —tojanëyana.

*Jesús Nazaretoca*

*(Mc 6.1-6; Lc 4.16-30)*

<sup>53</sup> Jesús chë soyënga jacuéntama tojanpochocá ora, chentsana tojtsanoñe. <sup>54</sup> Y cachabe luaroye tojtannashjango y chentsá judiëngbe enefjuana yebnentse tojanontsé jabuátambama. Entsanga ojananánga imojtsichamo: —¿Chë lempe yojtsetatsëmbcá ndëmoca mua tojuat-sjinÿe ca? ¿Ntsámo nantsobena chca bëts soyënga jamama ca? <sup>55</sup> ¿Mua ndoñe yondmëna chë calpinterbe uaquiniá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata, <sup>56</sup> y chabe uabénanga ndoñe muentse bëngaftaca mondoyena? ¿Ndayentsana lempe chca mua yojtsebmoma ca? —chënga imojtsichamo.

<sup>57</sup> Y chë causa chë entsanga tmojanotjayaná y ndoñe imontseboše cha joyeunayana. Pero Jesús tojanëyana: —Nyetsquenache canÿe Bëngbe Bëtsabe juabna yebuambnaya bëtsá jabemëngana, pero cachabe luarontse, cachabe yebnentse ndoñe ca.

<sup>58</sup> Chiyeca chentse Jesús ndoñe tonjëftsanna ba bëts soyënga Bëngbe Bëtsabe obenánaca, chë entsanga chábeñe ndoñe montsanošbuaché causa.

## 14

*Ntsamo Juan chë Ubayaná tojanóbana*

*(Mc 6.14-29; Lc 9.7-9)*

<sup>1</sup> Chë tempo, Rey Herodes, chë Galileoca mandayá tojanuena ntsamo nyetsca entsanga Jesucristbiana imojtsichamcá. <sup>2</sup> As cha chabe oservënënga tojanëyana: “Mua Juan chë Ubayaná ctsemna, obanënguentsana tojtayena, chíyeca chca obenana bëts soyënga jamama yojtsebmoma ca.”

<sup>3</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamia. Herodes chca tojanma Herodíasbe causa, chabe catšata Felipe shema. <sup>4</sup> Juan Herodésbioye mëntšá ibnauácacana: “Ndoñe quenátslesenciana aca acbe catšatbe shëmaftaca jobouamayama, acbe catšata cabá ainá yotsomñe ora ca.”

<sup>5</sup> Y chama Herodes yojtseboše Juan jóbana, pero entsangbiana yojtsauatja, er chënga innajuabnaye Juan ndegombre Bëngbe Bëtsabe obenánaca yojanoyebuambná ca. <sup>6</sup> Pero Herodesbe cumpleañ oboyejuaye ora, Herodíasbe bembe entsangbe delante tojanlantsá y Herodes puerte chama yojtsóyejuaye. <sup>7</sup> Chiyeca Herodes, jajúrase, tbojanšbuachená ndayánaca jatšetayana, ntsámo tbojotjañcá. <sup>8</sup> Y Herodíasna lempe bémbëbioye ibojabuayená ntsámo Herodes jojuama. As chë bembe tbojanianyana: “Canÿe šcneniñe Juan chë Ubayanabe bestšaše šmatšetá ca.”

<sup>9</sup> Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnana. <sup>10</sup> Y as tojanmandá chë Juan yojanëtámenoca chabe bestšaše chamuetsëstjanguama. <sup>11</sup> Chentsana, canÿe šcneniñe chë bestšaše tmojanamba y chë tobiaše tmojanëntšabuaché y chana, chabe mamábioye.

<sup>12</sup> Chentsana, Juanbe ústonënga tmojánashjajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojancuentá.

*Jesús shachna uaranga boyabásenga saná tojanacaredadó*

*(Mc 6.30-44; Lc 9.10-17; Jn 6.1-14)*

<sup>13</sup> Jesús chca tojanuena ora, canÿe barquëshañe tojtsanoñe canÿe bën luaroye, entsanga ndoyena luaroye. Pero entsanga chama imojátatsëmbona y chë pueblënguentsana tmojánbocana shecuátšëca cha juastama. <sup>14</sup> Chentsana, chë barquëshoicana tojtannashjango ora, Jesús ba entsanga tojánanÿe, chë cha tmojánguanguënga. Chëngbiana tbojanongmé y chë entsanguentsana ba šoquënga tojanashná. <sup>15</sup> Ya jetiñe yojtsemna, chíyeca chë uatsjëndayënga Jesúsbioye tmojanobeconá y tmojanianyana: —Ya jetiñe entsemna y quem luaríñe ndocná quenatiyena. Entsanga cuantichamuá, pueblotëmëngoye chamotsoñama, saná chamobuámiñama ca.

<sup>16</sup> As Jesús tojanëjua: —Ndoñe quenátsiyta chënga chamotsatoñama. Tsëngaftanga saná šmochjacaredádaye ca.

<sup>17</sup> Y chënga tmojanjuá: —Muentse tondaye queftsátsbmoma; nÿe shachna tandëše y uta beónata ca.

<sup>18</sup> As Jesús tojanëyana: —Chë soyënga moye miyëbo ca.

<sup>19</sup> Chentsana Jesús tojanmandá entsanga chamoshëntsjatbiamama. Chorna, chë shachna tandëše y chë uta beónata tojanca, celoye tojanontjësé y Bëngbe Bëtsábioye chama tbojtanchuá. Chora chë saná tojanjatá, chabe uatsjëndayënga tojanëjátaye, y chëngna nyetsca entsanga tmojanacaredadó. <sup>20</sup> Nyetsca entsanga tmojanse jtoshachaye nyetsá y cabá chë

ojamnētēmēngaca bnētsana uta sbarēcua tmojanajutjé. <sup>21</sup> Chē tmojansēnga imojamna mo shachna uaranga boyabāsenga, shembāsenga y básenga ntjacuntacá.

*Jesús bėjaye juatsbuacá yojtseye*  
(Mc 6.45-52; Jn 6.16-21)

<sup>22</sup> Chentšana, Jesús chabe uatsjéndayēnga tojanamēndá chē barquēshoye jtamashjnama y chē uafjajónaye chenguánoica chabe natsana jashjajnana. Chēntscuana Jesús entsānga yojtichamuá. <sup>23</sup> Njētscanga tojanichamó orna, Jesús canyē tjoye tojántsjua canya jtsemnama, Bēngbe Bētsáftaca jencuéntama. Yojaibétata ora, cha canya chentse yojtsemna, <sup>24</sup> y chē barquēshana tsachocana bēnoca yojtsemna. Y chē olēshēnga chē barquēsha yojtšajantšetaye, chē binjia chēngbe contra yojtsemna causa. <sup>25</sup> Ya bínjanoyna, Jesús chēngbīoye yojobeconá; bėjaye juatsbuacá yojtseye. <sup>26</sup> Chabe uatsjéndayēnga chca cha tmojáninye orna, tša imojocochauatjaná y puerte auatjanánēnga tmojanoyó: —¡Canyē añemēse entsemna ca!

<sup>27</sup> Pero chora Jesús tojanéyana: —¡Añemo šmochtse bomna, atše Jesús sēndmēna; ndoñe matauatjēngana ca!

<sup>28</sup> Chora Pedro, Jesúsbiyē tbojanīyana: —Bēngbe Utabná, ndegombre aca tcojtsemnēse, momandá atše bėjaye juatsbuacá ácbīoye chayá ca.

<sup>29</sup> Y Jesús tbojanīyana: —Mabo ca.

Chora Pedro chē barquēshoicana tojánastjango y tojanontšé bėjaye juatsbuacá Jesúsbiyē jama. <sup>30</sup> Pero chē binjia tša jabuache yojtsemnama tojáninye ora, Pedro puerte yojtšauatja y tbojanontšé jtsenatjēmbambana. Chiyeca cha jabuache tojanchembo: —¡Bēngbe Utabná, šmatsbocá ca!

<sup>31</sup> Y cachora Jesús tbojanobuacuetēntsiye y tbojanīyana: —¡Tša batšatema ošbuachiyá! ¿Ndáyeca ndoñe bētsá átšbeñe contošbuaché ca?

<sup>32</sup> Chentšana chē barquēshoye chata tbojtanamáshēngo y cachora chē binjia bonguana yojtšatsmēna. <sup>33</sup> Y chora, chē barquēshoye imojtsemnēnga Jesusbe shecuatšentse tmojanoshamentšé y tmojanīyana: —¡Aca ndegombre Bēngbe Bētsabe Uaquīná comna ca!

*Genesaret ca uabáinoca, Jesús ba šoquēnga tojanashná*  
(Mc 6.53-56)

<sup>34</sup> Chē uafjajónaye tmojánenashbuachengo y canyē luare Genesaret ca uabáinoye tmojánashjajna. <sup>35</sup> Chentša entsānga Jesús tmojantēmbá ora, chē luarentša njētsca entsānga chama tmojántatsēmbona. As chē entsānga chēngbe šoquēnga Jesúsbiyē tmojánēnatse. <sup>36</sup> Y imojtseimpadana nje mo chabe entšayá sibiájuanaca juabojajuma chē šoquēnga chaulēsencia. Y njētscanga chabe entšayá sibiájua tmojanábojajēnga, shnánēnga imojtsatoquédaye.

## 15

*Ndáyeca canyē entšá Bēngbe Bētsabe delante ndoñe tšabia nántsemna*  
(Mc 7.1-23)

<sup>1</sup> Chora básefta fariseunga y judiēngbe ley abuatāmbayēnga, Jerusalenocana tmojánabēnga, Jesúsbiyē tmojanobeconá y tmojanīyana: <sup>2</sup> —¿Ndáyeca acbe uatsjéndayēnga ndoñe ntsamsa chē ntšamo bēngbe bēts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bēnga chē judiēnga fsēnduamancá, Bēngbe Bētsabe delante tšábēnga jtsatsmēnama ca?

<sup>3</sup> As Jesús tojanējua: —¿Y ndáyeca tšēngaftanga ndoñe šmontsama ntšamo Bēngbe Bētsá tojanmandacá, nje cach tšēngaftangbe bētsētsanga imnētsama soyēnga jtsamama ca? <sup>4</sup> Bēngbe Bētsá mēntšá tojanmandá: “Acbe bētsētsata stētsoye ndoñe catjáquedaye”, y “nda cachabe bētsētsatbīama podēscá tojóyebuambase, chana jóbanama jtsemnana ca.” <sup>5</sup> Pero tšēngaftanga šmondbētsichamo canyē entšá canobena chabe taitá o chabe mamá jauyanana: “Lempe ntšamo sēndbomncá Bēngbe Bētsá jaserviama entsemna, chiyeca tondaye quetsátsbomna aca juajabuáchama ca”; <sup>6</sup> y šmondbētsichamo nje ndánaca chca tojayanēse, ya ndoñe ntsemnana chabe taitá o chabe mamá stētsoye ndoñe ntjaquédana, ni ntjuajabuáchana ca. Y chca, tšēngaftangbīama tondaye ntsámanana ntšamo Bēngbe Bētsá tojanmandacá, y aife šmontsama ntšamo tšēngaftangbe bētsētsanga imojanamancá. <sup>7</sup> ¡Bacna entsānga, ntšamo ndegombre šmojuabnacá ndinjinjīnāyēnga! Nye tšabá chē Bēngbe Bētsabe juabna oyebuambayá Isaias tšēngaftangbīama tojanoyebuambá, mēntšá tojánayana ora:

<sup>8</sup> Bēngbe Bētsá tonjajana: “Quem entsānga mondbētsichamo Bēngbe Bētsá tša tšabia yomna ca; chca nje uayásaca,

pero chēngbe ainanentse atšbīama ndocna tšabe juabnēngaca.

<sup>9</sup> Chēnga nje bonamente mondbētsichamo: Bēngbe Bētsá tša tšabia yomna ca;

chēnga nje entsāngbe mandēnga jtsabuátambayana y Bēngbe Bētsabe mandēnga ndoñe ca”  
—cha tojánayana.

<sup>10</sup> Chentšana Jesús entšanga tojánachembo y tojanéyana: —Smochjouena y chacmésertá.  
<sup>11</sup> Ndayá entšá tojtšesacá, ndoñe quebochátsbema Bèngbe Bètsabe delante ndoñe tšabia. Inyètšá comna: ndayá entšá tojtsejuabná y tojtsoyebuambnacá endobena cha jabemana Bèngbe Bètsabe delante ndoñe tšabia ca.

<sup>12</sup> Chora chë uatsjéndayënga Jesúsbioye tmojanobeconá y tmojanianyana: —¿Quéctsetatšëmbo, ntšamo tconjayanama chë fariseunga ndoñe tšabá chenatëuénana ca?

<sup>13</sup> As Jesús tojanējua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nýe entšangbe buatëmbana soyëngaca. <sup>14</sup> Cachcá mónýaye; chënga montsemna mo jtanënga inýe jtanënga unachayëngcá. Y canýe jtaná inýe jtaná tbojtsánachase, nyëts útata canýe tbuabentše bochanjetsótsatše ca —Jesús tojánayana.

<sup>15</sup> Chora Pedro, Jesúsbioye tbojanianyana: —Ntšamo chë cuento bétsayanama šmabuayená ca.

<sup>16</sup> As Jesús tojanējua: —¿Tšëngaftángnaca cabá ndoñe cmontsësertana ca? <sup>17</sup> ¿Cabá ndoñe cmontsësertana lempe ntšamo šmojascá uafsbioye jomashënguana y chentšana cuerpentšana jtabocnana? <sup>18</sup> Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bèngbe Bètsabe delante ndoñe tšábenga jábiamana. <sup>19</sup> Ainanocana jtsóbocanana bacna juabnënga: jenóbama, shema o boyábioye inýaftaca jángñama, shembása o boyabásaftaca bacna soye jamama, jatbëbama, jobostërama y inýabiamana jtsayátšenayama. <sup>20</sup> Chë soyënga cocayé jtsobenana entšábioye Bèngbe Bètsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bèngbe Bètsabe delante ndoñe tšabia jabemama ca —Jesús tojánayana.

*Canýe shembása inýe luarocana ashjanganá Jesúsbeñe yojtsošbuache (Mc 7.24-30)*

<sup>21</sup> Jesús chentšana, Tiro y Sidón luarëngoye tojtšanoñe. <sup>22</sup> Canýe shembása Caná luarocá chentše inoyena; cha Jesúsbioye vojobeconá y mëntšá yojtšáyebuache: —¡Utabná, Rey Davidbentšana Entšá, šmotselastemá! ¡Atšbe bembe puerte entsesufrina, bacna bayëjbe juabna entsebobna causa ca!

<sup>23</sup> Jesús ndocá tbonjanjúá. As chabe uatsjéndayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

<sup>24</sup> As Jesús tojánayana: —Bèngbe Bètsá atše šonjichmó jtsanýenama nýe chë entšanga, chë mo ótsena oveshëngcá imomnënga Israeloquënga, y chë ndoñe judiënga ndoñe ca.

<sup>25</sup> Pero chë shembása tojána, Jesusbe shecuatšentše tojanoshamentšé y tbojanianyana: —¡Utabná! Diosmanda pavor šmotsébema. ¡Šmotsajabuache ca!

<sup>26</sup> Y Jesús tbojanjúá: —Chë judiënga mondmëna mo Bèngbe Bètsabe basengcá y atše ácbioye tchojuajabuache y chëngbioye ndoñesna, nántsemna mo chë básengbe saná chënga chaftsëbaquécá y quešënga ftsëbuajocá. Chca jamana ndoñe tšabá quenátšmëna ca.

<sup>27</sup> As cha tbojanjúá: —Arseñor. Pero chë quešëngnaca chëngbe nduiñëngbe mesëshentšana tmojatquécjanatemënga mondbase, chë nduiñënga tmojtšesá ora. Chcasna, Diosmanda šmotsajabuache ca.

<sup>28</sup> Chora Jesús tbojanianyana:

—¡Shembása, Bèngbe Bètsabeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtšatsmëna.

*Jesús ba šoquënga tojanashná*

<sup>29</sup> Jesús chentšana tojéftsanbocna y chë Galilea uafjajónaye tsachoye tojána. Chentšana, canýe batsjoye tojántsjua y choca tojanótbema. <sup>30</sup> Mallajta entšanga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanéshejango y cha nyëtscanga tojanashná. <sup>31</sup> Y chca orna, chë entšanga tmojáninýe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanënga yojtšëbinýna; y chama chënga corente ojanánënga imojtsemna. Chora chënga tmojanontšé jëtschuayana chë Israelentša entšanga imojánadorana Bèngbe Bètsá.

*Jesús canta uaranga boyabásenga saná tojanacaredadó (Mc 8.1-10)*

<sup>32</sup> Chentšana Jesús, chabe uatsjéndayënga tojánachembo y tojanéyana: —Quem entšangbiana šontsenngmena, er ya unga te chënga átšëftaca muentše montsemna y jasama tondaye quemátšobomna. Atše ndoñe quetsátšboše ntjascá cachëngbe yebnoye chënga jtichamuana, er benachiñe šhëntsama nantsabuatëcja ca.

<sup>33</sup> As chabe uatsjéndayënga tmojantjã: —¿Ntšamo muatjobenaye quem luarentše, ndocna entšã ndoyentše, chëfta entšangbiama sanã jinÿenama ca?

<sup>34</sup> Y Jesús tojanatjã: —¿Bueta tandëse šmojtsebmoma ca?

Y chënga tmojanjuã: —Canÿsëfta tandëse y bãsefta beonatëmënga ca.

<sup>35</sup> Chora Jesús tojanamëndã nÿetsca entšanga fshantsiñe chamotbiamama. <sup>36</sup> As chë canÿsëfta tandëse y chë beonatëmënga tojanca; Bëngbe Bëtsãbiøye chama tbojtanchuã, chë sanã tojanjatã y chabe uatsjéndayënga tojanëjatã. Chentšana nÿetsca entšangbioøye tmojanacaredadõ. <sup>37</sup> Nÿetsca entšanga tmojanse jtoshachaye nÿetšã. Y chentšana cabã canÿsëfta bëts sbarëcua tmojanajutjë chë tojanójamëtemëngaca. <sup>38</sup> Chë tmojansënga imojamna canta uaranga boyabásenga, shembásenga y básenga ntjacuntacã. <sup>39</sup> Chentšana Jesús, chë entšanga tojtanichamõ, barquëshoye tojánamashëngø y Magadãn luaroye tojtsanoñe.

## 16

*Chë fariseunga y saduceunga tmojánbošena Jesús chaoma canÿe bëts soye*

*(Mc 8.11-13; Lc 12.54-56)*

<sup>1</sup> Fariseunga y saduceunga tmojána Jesús jinÿama, y jisháchichiyama imojtseimpadana canÿe bëts soye chaoma, as jtsetatšëmbuama Jesusbe obenana ndegombre Bëngbe Bëtsãbiocana tainõbocanama.

<sup>2</sup> Pero Jesús tojanëjua: “Tšëngaftanga jetiñoøye šmondbëtsichamo: ‘ÿfse tšabe te echántsemna, er celoca buánganiñe entsemna ca.’ <sup>3</sup> Y cachëse šmondbëtsichamo: ‘Mënté echanjuafté, er celoca buánganiñe y ibetiñe entsemna ca.’ Tšëngaftanga celoye jontješiyëse, ntšamo chë tempo yochtsemnama tša tšabã jayanama šmojtsobenëse, ¿ndáyeca ndoñe šmontsobena jtsetatšëmbuana ndaye bëts soye Bëngbe Bëtsã quem tempo cmojtsinjãnyãna? <sup>4</sup> Quem puerta bacna entšanga y ndošbuáchiyënga montseboše atše canÿe bëts soye chaima, obenana jinÿanÿiyama; pero ndoñe chca quemochátinye, sinõ nÿe chë ndayã yomna mo chë Bëngbe Bëtsabe juabna oyebuambnayã Jonãsoftaca tojanopasã soycã ca” —Jesús tojánãca.

Chora Jesús tojésanabashejuana y chentšana tojtsanoñe.

*Jesús tojanabuayená chë fariseungbe buatëmbana soyëngama*

*(Mc 8.14-21)*

<sup>5</sup> Chë uafjãjãy chenguanoicana chënga tmojtanabo ora, chë uatsjéndayënga yojësebnëjtomba tandëse jesocñana. <sup>6</sup> Chora Jesús tojanëyana: —Smochtsantješna; cuedado šmochtsebmoma chë fariseunga y saduceungbe levadurama ca.

<sup>7</sup> Pero chë uatsjéndayëngna imojtsenatsëtsnaye: —Chca entsichamo, bënga tandëse ndoñe tmonjesocñama ca.

<sup>8</sup> Jesús chë soye yojtsetatšëmbo; chíyeca mëntšã tojanëyana: —¿Ndayeca tandëšama šmojtsenatsëtsná ca? ¡Tša batšatema ošbuáchiyana šmobomna! <sup>9</sup> ¿Cabã ndoñe cmontsësertana y ndoñe šmontsabouñyãna chë shachna tandëšentšana shachna uaranga entšanga sënjanëjuatsema y bnëtsana uta sbarëcua šmonjãnjutjema? <sup>10</sup> ¿Y ndoñe šmontsabouñyãna chë canÿsëfta tandëšentšana canta uaranga entšanga sënjanëjuatsema y canÿsëfta sbarëcua šmonjãnjutjema? <sup>11</sup> ¿Ndayeca ndoñe cmontsësertana atše tandëšama ndoñe šentsóyebuambnama? Cuedado šmochtsebmoma fariseunga y saduceungbe levadurama ca —Jesús tojanëyana.

<sup>12</sup> As chora chë uatsjéndayënga tojanësertã, Jesús ndoñe tonjãnyana chë tandëšentšã levadurama cuedado jtsebmomna ca, sinõ ndayã chë fariseunga y saduceungbe bu-atëmbana soyëngama.

*Pedro tojánayana, Jesús chë Cristo bëtsemnama*

*(Mc 8.27-30; Lc 9.18-21)*

<sup>13</sup> Jesús, Cesarea de Filipo luaroye tojánashjango ora, chabe uatsjéndayënga tojanatjã: —¿Nda ca entšanga imojtsichamo chë Bëngbe Bëtsã Entšã tbojanbemã yojtsemna ca?

<sup>14</sup> Chënga tmojanjuã: —Bãseftanga montsichamo Juan chë Ubayanã ca, inÿengna Elías ca, inÿengna Jeremías y inÿengna tempca inÿe Bëngbe Bëtsabe juabna oyebuambnayã ca.

<sup>15</sup> As Jesús tojanatjã: —Y tšëngaftangna, ¿nda atše bëtsemnama ntšamo šmochjaryana ca?

<sup>16</sup> Chora Simón Pedro tbojanjuã: —Acna chë Bëngbe Bëtsabe Uãmãna Uabuayanã condmëna, chë Bëngbe Bëtsã Ainabe Uaquiñã ca.

<sup>17</sup> Y Jesús tbojanÿana: —Simón, Jonasbe uaquiñã, oyejuayã cochanjoyena. Ndocna quem luarentša entšã chë soye checmatinÿinyé, sinõ atšbe Taitã, celoca endmënë. <sup>18</sup> Y mëntšãnaca cbëyana: Mora acna Pedro o chë ndëtšbecã contsemna, y chë ndëtšbeñe atšbe bëts yebna chanjajebø, y ni Satanás, chabe obenãnaca entšã jóbãnama, queochatobenaye jtsepoçócama. <sup>19</sup> Atše cbochanjãtsetaye obenana, mo llavëfjã, entšanga Bëngbe Bëtsabe amëndayoye jamashënguama chamobenama. Bëngbe Bëtsãftaca chacojtsencuënta ora,

canÿe soye ndoñe chaondětsemna ca chacojayanëse, Bëngbe Bëtšá cachá echanjayana. Y cháftaca chacojtsencuénta ora, canÿe soye añe chaotsemna ca chacojayanëse, Bëngbe Bëtšá echanjayana añe chca chaotsemna ca —Jesús tbojaniana.

<sup>20</sup> Chentšana chabe uatsjéndayënga tojanamëndá ndocnábeñe ntsecuéntayana cha, Jesús, chë Bëngbe Bëtšabe Uámana Uabuayaná, chë Cristo bëtsemnama.

*Jesús tojánayana cha ibojamna jóbana y jtayenana ca*  
(Mc 8.31–9.1; Lc 9.22-27)

<sup>21</sup> Chorscana Jesús tojanontšé chabe uatsjéndayënga jábuayenana cha ibojtsemna Jerusalenoye jama, y chocna chë bëtšejemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerte chaopadecema ca. Tojanëyana cha mochjanóba, pero unga tianoye yochtanayana ca. <sup>22</sup> Chora Pedro, Jesúseftaca tojanoluaré y tojanontšé mëntšá uatsëtsnayana: —¡Atšbe Utabná, Bëngbe Bëtšá ndoñe chaondëlesenciá chca chaopasama! ¡Ndocna te quenaisopodena chca ácaftaca jopásana ca!

<sup>23</sup> As Jesús tojanobuértana y Pédrëbioye tbojaniana: —¡Satanás, átšbentšana mojuaná! ¡Aca conteseboše atše canÿe bacna soye chašócochënguama! Pedro, acbe juabñënga Bëngbe Bëtšabiocana ndoñe quenatóbocana, sinó nÿe entšángbentšana ca.

<sup>24</sup> Chentšana Jesús chabe uatsjéndayënga tojanëyana: —Nda atšbe uatsjendayá jtsemnama tojtseboše, cháuyana nÿe Bëngbe Bëtšá yobena sempre chabe vidiñe jtsemándayana ca, chabe quem luarentša soyënga cachá chausonÿá atše juastama, y atšbiama jasúfriama chaotseprontana y cruciñe jobanámnaca. <sup>25</sup> Nda tojtsama quem luarentše bëtšcá soyënga jtsebmomna y atšbiama jasúfriama ndoñe tontseprontana, chë nÿetsca tescama yomna tšabe vida echanjopërdia. Pero nda quem luarentša soyënga cachá tojéftsonÿá atše juastama, masque chaóabana, chë nÿetsca tescama yomna tšabe vida echántsebmomna. <sup>26</sup> ¿Ndayama entšá buanjósërvia nÿetsca quem luarentša soyënga jtsebmomna, chë nÿetsca tescama yomna tšabe vida tojtsoperdëse? Ndegombre, canÿe entšá chë nÿetsca tescama yomna tšabe vida tojtsoperdëse, ndocna soye quenátsmëna cha chaobená joyiyama, chë nÿetsca tescama yomna tšabe vida jtsebmomna. <sup>27</sup> Chë Bëngbe Bëtšá Entšá tbojanbemá, chabe Taitabe obenánaca y puerte buashinÿinÿaniñe echanjabo chabe angelotëmëngtaftaca, y chora cada cánÿabioye bochantatšetaye cachá ntšamo cada ona tojéftsemcá. <sup>28</sup> Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtšá Entšá tbojanbemá amëndayacá jabana ntjëtšinÿcá ca —Jesús tojánayana.

## 17

*Jesús inÿetšá tojanobinÿná*  
(Mc 9.2-13; Lc 9.28-36)

<sup>1</sup> Chentšana chñënguana tianoye, Jesús tojéftšanëbiatše Pedro, Santiago y chabe catšata Juan, y inÿoye tojanënatse nÿe chënga, canÿe bëtš tjoye. <sup>2</sup> Chentše, chëngbe delante inÿetšá cha tojanobinÿná. Chabe jubiá shinÿcá yojtsebuashinÿinÿana, y chabe uichëtjonëjuangana mo binÿiniñcá uafjantsëjuangá yojtsamna. <sup>3</sup> Chca ora, chabe uatsjéndayënga tmojáninÿe Moisés y Elías tbojanobinÿná, Jesúseftaca encuéntaye.

<sup>4</sup> Chora Pedro, Jesúsbioye tbojaniana: “Bëngbe Utabná, itša tšabá bëngbiama cuanmëna muentše jtsemnana ca! Tcojtsebošëse, unga tambotëmënga atše chjapórma: cánÿetema acbiama, inÿetema Moisesbiama y inÿetemna Elíasbiama ca.”

<sup>5</sup> Pedro chca yojtsóyëbuambnantscuana, canÿe buashinÿinÿana jantšëtëshe nÿetscanga yojáutstbotse. Y chë jantšëtëshoicana canÿe oyebuambnayana tmojanuena mëntšá: “Mua atšbe bonshana Uaquiñá endmëna, atše chabiama sëntsoyëjuá. Cha šmochtseyeyana ca.”

<sup>6</sup> Y chë uatsjéndayënga chca tmojanuena ora, tmojanoshamentšé y jubiaca fshantsóntsoñe tmojanotšëbña, puerte auatjanánënga. <sup>7</sup> Chora Jesús chabe uatsjéndayëngbioye tojanobeconá, tojánabojajo y tojanëyana: “Matëtšbananga; ndoñe matauatjëngana ca.”

<sup>8</sup> Y tsbanánoye tmojanontjéšë ora, Jesús nÿe canÿa tmojáninÿe, ndocná inÿa más.

<sup>9</sup> Chë tjocana imojtsatstsmaye ora, Jesús tojanamëndá: —Bëngbe Bëtšá Entšá tbojanbemá obanënguentšana candëtayenëntscuana, ndocnábeñe chë šmonjinÿe soyama šmattsecuéntaye ca.

<sup>10</sup> As chë uatsjéndayënga Jesús tmojantjá: —¿Ndáyeca chë ley abuátambayënga mondbëtšichamo, canmëna Elías jabana chë Bëngbe Bëtšabe Uámana Uabuayanabe natsana ca?

<sup>11</sup> Chora Jesús tojanëjua: —Ndegombre canÿa Eliascá natsana echanjabo y ntšamo jtsemnana yomncá, lempe echánjabatsma ca. <sup>12</sup> Pero atše cbëyana, canÿa mo Eliascá ya tonjabo, entšanga ndoñe chematanotëmbá y cháftaca entšanga tmonjanma lempe ntšamo

tmojanbošencá. Y cachcá, chë Bëngbe Bëtsá Entšá tbojanbemá entsangbe cucuatšíñe echanjasúfria ca —Jesús tojánayana.

<sup>13</sup> Chora chë uatsjéndayënga tojanësertá, Juan chë Ubayanabiamá Jesús chca yo-jtsëtsëtsnana.

*Jesús, canye bacna bayëja tbojanbojuaná*

*(Mc 9.14-29; Lc 9.37-43)*

<sup>14</sup> Entšanga imojtsemnoye chënga tmojtanashajna ora, canye boyabása tojanobeconá, Jesusbë natsanoica yojoshamentsiye y tbojanayana: <sup>15</sup> —Utabná, atšbe uaquiniá mot-selastemá. Cha ataque bontsësháchichana y puerta entsesufrina, er cha inye ora iñoye jtseshajayana y inye orna, buyeshoye jtsoshbuetšana. <sup>16</sup> Ache uatsjéndayëngbioye cha sënjuánatse y ndoñe chematobená jtseboshnana ca —cha tbojanayana.

<sup>17</sup> As Jesús tojánayana: —¡Nyetšá ndošbuáchiyënga y bacna entsanga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? Moye chë básetema mánatse ca.

<sup>18</sup> Chora Jesús, chë basetëmbëñe bacna bayëjbioye tbojanácacana y chábentsana cha tojésanbocna. Cach orscana chë básetema tšabá yojtsatsmëna.

<sup>19</sup> Chentšana, chë uatsjéndayënga luaroca Jesúseftaca tmojanoyebuambá y tmojanayana: —¿Ndáyeca bënga ndoñe fsënjobená chë bacna bayëja jtabocnana ca?

<sup>20</sup> Y Jesús tojánayana: —Tšëngaftanga tša batšatema ošbuáchiyana bomna causa. Ndegombre šcuayana: tšëngaftanga batšatema ošbuáchiyana šmojtsebomñëse, masque nye mo canye mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena. <sup>21</sup> Pero chca bayëjënga jtëbuacnana jobenayana nye Bëngbe Bëtsáftaca jencuëntase y chama tondaye ntjascá jtsemñëse ca —Jesús tojánëyana.

*Jesús cachiñe tojánayana cha ibojamna jóbanana y jtayenana ca*

*(Mc 9.30-32; Lc 9.43-45)*

<sup>22</sup> Jesús y chabe uatsjéndayënga cányiñe Galilea luaroye imojétsaye ora, cha to-janëyana: “Chë Bëngbe Bëtsá Entšá tbojanbemá entsangbe cucuatšíñe mochanjáboshjona, <sup>23</sup> mochanjóba, pero unga tianoye echántayena ca.” Chë causa chë uatsjéndayënga puerta ngmënaca imojtsemna.

*Chë Bëngbe Bëtsabe bëts yebnama impuesto jtsatsquëcñayama*

<sup>24</sup> Jesús y chabe uatsjéndayënga Capernaumoye tmojánashajna ora, chë Bëngbe Bëtsabe bëts yebnama entsángbioye impuesto atjanayënga Pédrëbioye tmojáná y tmojtantjá: —¿Ache बातëmbayá Bëngbe Bëtsabe bëts yebnama impuesto queonyëtsatsquëcñayaca?

<sup>25</sup> Y Pedro tojanëjua: —Aíñe, cha endbetsatsquëcñayaca.

Chentšana, Pedro chë yebnoye tojánamashëngo ora, Jesús natsana mëntsá chábioye tbo-janiyana: —Simón, ¿ntšamo catjájuaboje? ¿Quem luarentša reyënga ndëmuanýëngbioye impuesto imnëtsayëngacaye y crocénana imnëtsatjanaye: cach luarentše oyenëngbioye o chë inye luarocana ashjajnëngbioye ca?

<sup>26</sup> As Pedro tbojanjuá: —Chë inye luarocana ashjajnëngbioye ca.

Y Jesús tbojanayana: —Chcasna, ndoñe quešnátsmëna chë atšbe Taitabe bëts yeb-nama impuesto jtsatsquëcñayana ca. <sup>27</sup> Pero ndocná mal chabonduínýnanamna uaf-jajónayoye motsa, anzuelëfjua cochjútsëna y chë natsana chaojuásjana beona cochjuábocna. Cochjuayetëfjoná y choye crocénana cochanjínýena y chánaca echanjoshjache atšbiamá y acbiamá jëtsjúuama. Cochjëftsejatsëca y cochjatsboshjona ca —Jesús tbojanayana.

## 18

*¿Nda chë más uamaná yomna?*

*(Mc 9.33-37; Lc 9.46-48)*

<sup>1</sup> Chentšana chë uatsjéndayënga Jesúsbioye tmojanobeconá y tmojtantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

<sup>2</sup> Chora Jesús canye basetëmbioye tbojanchembo y chëngbe tsëntsaca tbojanatsá. <sup>3</sup> Y tojánayana: —Ndegombre cbëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjóyëngacñe, cha ndocna te queochatobenaye Bëngbe Bëtsabe amëndayoye jamashënguama. <sup>4</sup> Chca, nda tojtsejuabná canye nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna. <sup>5</sup> Y nda átšbeñe ošbuachiyá bëtsemnayeca, tbojofja canya mo quem basetembioycá, chana atše jofjana ca —Jesús tojánayana.

*Resjo yomna, nderado bacna soyënga cuanjama*

*(Mc 9.42-48; Lc 17.1-2)*

<sup>6</sup> “Nda canye bássetema átsbeñe ošbuachiyábioye tbojaingñé bacna soye jamama, chabiama más tsábá nántsemna canye bēts nantsnēbē chamotsetamosēntsbua y chē mar bējaye shbuatsēntsoye chamotsashbuetše chabotsenatjēmbama. <sup>7</sup> ¡Tša lastema quem luarentša entsangbiama, chē inyenga bacna soye jamama chaócochēnguama tmojtsamēngbiama! Nýets tempo chca amēnga mochanjēftsemna. Pero, ipayajema chē inya bacna soye chaomama tojtsamá ca!

<sup>8</sup> “Chíyeca, acbe cucuátseca o acbe shecuátseca bacna soye tcojamēse, cochtsenástjango y bēnoye cochtsētseña. Acbiama más tsábá nántsemna celoye jamashēnguana chē nýetsca tescama yomna tsabe vida jtsebonnama, cucuatše ndbomná o cosheto, y ndoñe nýets uta cucuátseca o shecuátseca chē nýets tempo echanjesomñe iñeshoye chacmotséstjango. <sup>9</sup> Nderado acbe bomínýeca bacna soye tcojinýe y cachca soye tcojama, chē bomínýe cochtsenobuchjatsēca y bēnoye cochtsētseña. Acbiama más tsábá nántsemna, celoye jamashēnguana nýe canye bomínýeca, y ndoñe nýets uta bomínýeca infiernoye chacmotséstjango, chē bēts iñeshoye ca” —Jesús tojánayana.

*Chē ótsena oveshabiana cuento*  
(Lc 15.3-7)

<sup>10</sup> Mēntśánaca Jesús tojánayana: “Ni mo cánýabioye quem tsēm ošbuáchiyēnguentsana, chē mo basetemēngcá mondmēnēnga, mo nduamanacá šmattsonýaye. Ndegombre cbēyana, chēngbe angelotémēnga celoca, sempre atšbe Taitá celocáftaca mondētsemna ca. <sup>11</sup> Er chē Bēngbe Bētsá Entśá tbojanbemá tonjabo chē pochocánēnga jtsemnama imojtsajnēnga jabátsebacama.

<sup>12</sup> “¿Ntśamo tsēngaftanga šmatjájuaboye? Canye boyabása patse oveshēnga tojtsabamna y ndeolpe canye chentša oveshá tojtsotše. ¿Chē boyabása ndoñe chē inye esconēfta bnētsana y esconēfta oveshēnga tjoca cachcá nanjesēñýaye, jama chē ótsena oveshá jetsenguanguama? <sup>13</sup> Y chē oveshá jetsinýenama tojobenase, ndegombre chē boyabása más oyejuayá jtsemnana chē ótsena oveshabiana, y ndoñe nya chca chē inye esconēfta bnētsana y esconēfta oveshēngbiama chē ndoñe tmonjanotsēngbiama. <sup>14</sup> Cachcá, tsēngaftangbe Taitá, Bēngbe Bētsá, chē celoca endmēná, ndoñe quenátsboše ni canya quem basenguentsana mo otšenacá chaotsemna, bacna soyēnga jtsemāse oyena causa ca” —Jesús tojánayana.

*Ntśamo cuanjama inya japerdónama*  
(Lc 17.3)

<sup>15</sup> “Nderado acbe catšata, bacna soye tcmojaborlase, cochjá, cánýata šochjencuénta y cochjana cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tsábá ácaftaca echántatsmēna. <sup>16</sup> Pero ndoñe tcmojóyeunasna, inye útata cochjáchembo chacmotjēmbambama, chca, chata chabouena ntśamo cochjayanama y chamuayana ndegombre chca yomnama. <sup>17</sup> Y chata ndoñe tonjóyanase, chentša Bēngbe Bētsábeñe ošbuáchiyēnga macuntá. Y chēnga ndoñe tonjóyanasna, cochjayana cha yomna mo canya Bēngbe Bētsábioye nduabuatmacá, mo canye ndoñe judiyá ca o canye bacna entśá mo canya Romocama impuesto entsángbioye atjanayacá yomna ca.

<sup>18</sup> “Ndegombre cbēyana: Tsēngaftanga Bēngbe Bētsáftaca chašmojtsencuénta ora, chašmojayana canye soye ndoñe chaondētsemna ca, Bēngbe Bētsá cachcá echanjayana. Y cháftaca chašmojtsencuénta ora, chašmojayana canye soye añe chaotsemna ca, Bēngbe Bētsá echanjayana añe chca chaotsemna ca.

<sup>19</sup> “Mēntśánaca cbēyana: Nderado útata tsēngaftanguentsana quem luarentše tbojenoye-uná Bēngbe Bētsáftaca jencuéntama ndayánaca jótjañama, Bēngbe Bētsá chē celoca endmēná pronto chē soye cmochanjátšataye. <sup>20</sup> Ndayentše útata o únganga tmojénefnja, átsbeñe ošbuáchiyēnga bētsemnama, chentše atše chēngbe tsēntšaca chántsemna ca” —Jesús tojánayana.

<sup>21</sup> As Pedro tojána y Jesúsbioye tbojantjá: —Bēngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canýsēfta soye ca?

<sup>22</sup> Y Jesús tbojanjá: —Ndoñe nýe canýsēfta soyama quecbatatsētsná, sinó canýsēfta bnētsana soye canýsēfta ca.

*Ndayá inopása chē japerdónama ndēbošēngaftaca*

<sup>23</sup> Mēntśánaca Jesús tojanéyana: “Chochanjáuyana ntśamo Bēngbe Bētsabe amēndayana yomnana. Endmēna ntśamo canye réyēftaca tojanopasacá. Cha yojábošena chabe oservénēnga crocénana jtsētjañana. <sup>24</sup> ¡Tšētjañama yojóntša orna, canye boyabása imojuánatse, chē réybioye mallajta crocénana ibnandebena. <sup>25</sup> Chē oservená tondaye yonjábomna chē ndebénama jētsjájuama; asna chē rey yojamánda cha chamotsiye nýets tempo nýe



ínjábiamana chaotsoservénama, chabe shema y chabe básengnaca, y lempe ntšamo yojan-bomncánaca, y chca chë ndebénama jtopágama. <sup>26</sup> Chora chë oservená chë reybe she-cuatšentše yojoshamentšiyey y ibojtseimpáda: ‘Taita, Diosmanda šmotsëuantajema. Atše lempe cbochanjëséntšabuachiye ca.’ <sup>27</sup> Chë reyna chë boyabásabiamana ibojóngmia; as chë ndebénana ibojtseperdóna y ibojësšoshjona.

<sup>28</sup> ‘Chë oservenana chentsšana yojësebocna y benachiñe inye oservenáftaca ibojen-betše, cach mandadbiama trabajaya. Chë inye oservenana nye batšatema crocénana chábiyoye ibnandebena. Chora chë oservená chë enutábioyey tamošajentšana ibojishache y ibojóntša jtsëtajuashbebiana y mëntšá ibojauyana: ‘¡Ndebénana šmatsëntsabuaché ca!’ <sup>29</sup> Chora chë oservenabe shecuatšentše yojoshamentšiyey y ibojtseimpáda: ‘Dios-manda šmotsëuantajema. Atše lempe cbochanjëséntšabuachiye ca.’ <sup>30</sup> Pero chë oservená ndoñe yonjábosena, sinó yojama chë inye oservenábioyey cárceloye chamotsëtámiamana, chë ndebénana candëtsjájëntscuana. <sup>31</sup> Chë inye oservénënga chca imojinye ora, puertey yojóngmia y imojá lempe ntšamo yojopasacá chëngbe rey jacuéntama. <sup>32</sup> As chë rey yojamánda chë boyabása jobetšana, y ibojauyana: ‘¡Puerte bacna oservená! Sconjaimpadáyeca, nyets ndebénana tcbontseperdoná. <sup>33</sup> Acnaca cachcá cmondmëna chë cach aguécá muentša trabájayabiamana jóngmiana, ntšamo atše acbiama šonjongmecá ca.’ <sup>34</sup> Y tša chë rey ibojtsetna; as yojamánda jabuache chamotsetsetšená nyets ndebénana candëtsjájauantscuana ca’ —Jesús tojanacuntá.

<sup>35</sup> Chora Jesús tojánayana: ‘Atšbey Taitá, celoca endmëná, cachcá tšëngaftangaftaca echan-jama, tšëngaftangbey catšata ndoñe ndegombre nyets ainánaca šmonjaperdonase ca.’

## 19

### *Ndayá Jesús tojanabuatambá chë bouamnënga tmojtšenëtšenama*

(Mc 10.1-12; Lc 16.18)

<sup>1</sup> Chë soyënga tojánayanentšana, Jesús Galilea luarentšana tojtsanoñe y Judeoye tojánashjango, Jordán chenguánoica. <sup>2</sup> Ba entšanga tmojanasto y chentšey šoquënga tojanashná.

<sup>3</sup> Básefta fariseunga Jesúsbiyey tmojanobeconá y jisháchichiyama mëntšá tmojantjá: —¿Queojtselesenciana canye boyá nye ndayámnaca chabe shémbioyey cachcá jesonýayama ca?

<sup>4</sup> As Jesús tojanéjua: —¿Tšëngaftanga ndoñe chë Bëngbey Bëtsabey uabemana palabrénguiñe šmëndualía, Bëngbey Bëtsá, chë entšanga tojanabiamá, quem luare jobojátšama ora “boyá y shema tojanabiamama”? <sup>5</sup> Y Bëngbey Bëtsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chë útata mo canýacá bochántsemna ca.” <sup>6</sup> Y chca, ya ndoñe útata quebochátsmëna, sinó mo nye canýacá. Chcasna, entšá ndoñe chaondënbema ndayá Bëngbey Bëtsá mo canýiñcá tojéftsema soyey ca —Jesús tojánayana.

<sup>7</sup> Chora chë fariseunga tmojanianyana: —¿As, ndáyeca Moisés tojanmandá, chë shémbioyey canye uabemana tsbuanácha juiyiyana jtsenëtšenama y cachcá jesonýayana ca?

<sup>8</sup> Y Jesús tojanéyana: —Tšëngaftanga Bëngbey Bëtsabey mandënga jýyëngacñama ndoñe quešmátsbošey causa, Moisés tcmojanalesenciá shémbioyey jesëtšenana. Pero quem luare jobojátšama orna, ndoñe chca quenjatšmëna. <sup>9</sup> Atšey cbëyana, nda chabe shémaftaca tbojtšenëtšena y chca tojopasá ndoñe chë shema chabe boyábioyey inýaftaca tbtontseingñé causa, y chë boyá inýaftaca tojtóbouamasna, cha chë natsana shémbioyey inýaftaca jtseingñayana ca —Jesús tojánayana.

<sup>10</sup> Chora chabe uatsjëndayënga tmojanianyana: —Chca chë boyá y shémaftaca tojtsemnëna, ndoñe tšabá yontsemna jobouamayana ca.

<sup>11</sup> Y Jesús tojanéyana: —Nyetscanga ndoñe quemátobena chë palabrénga jýyëngacñana, nye chë Bëngbey Bëtsá tojama jýyëngacñama chamobenama, chëngna aiñe. <sup>12</sup> Ba soyënga comna ndayey causa chë boyabásenga ndoñe ntšobenana jobouamayana. Inýenga jónýnana jobouamayama ndobenënga, inýengbioyey cach entšanga jábiamana jobouamayama ndobenënga y inýengna, nyets tempo nye Bëngbey Bëtsabey amëndayama oservena causa ca —tojanéyana.

### *Jesús, basetëmëngbiama Bëngbey Bëtsábioyey tbojanimpadá*

(Mc 10.13-16; Lc 18.15-17)

<sup>13</sup> Entšanga basetëmënga Jesúsbiyey tmojanënatšey, cha chauabojajuama y Bëngbey Bëtsábioyey chëngbiama chaboimpadama. Pero chë uatsjëndayëngna tmojanontšey chë basetëmënga unachayënga jtsëcácanana. <sup>14</sup> Chora Jesús tojanéyana: “Cachcá mónýayey chë basetëmënga átsbioyey chamuaboy y ndoñe matéuyanana; er Bëngbey Bëtsabey amëndayana endmëna mo quem basetëmëngcá imomnëngbiama ca.” <sup>15</sup> As chë basetëmënga tojánabojajo, Bëngbey Bëtsá jaimpadase; y chentsšana cha tojtsanoñe.

*Canje bomna bobontse Jesúsbiöye tojána**(Mc 10.17-31; Lc 18.18-30)*

<sup>16</sup> Chentšana, canje boyabása tojána Jesús jinýama y méntśá tbojantjá: —Buatëmbayá, ¿ndaye tšabe soye chjama chë nyetsca tescama yomna tšabe vida jtsebomnama ca?

<sup>17</sup> Y Jesús tbojanjuá: —¿Ndayeca chë tšabe soye ndayá bëtsemnama şcojtsetjaná ca? Tšabia nýe canya endmëna: Bëngbe Bëtsá. Aca chë nyetsca tescama yomna tšabe vida jtsebomnama tcojtseboşëse, mandënga cochtseboşedecena ca.

<sup>18</sup> Chora chë bobontse tbojantjá: —¿Ndaye mandënga ca?

Y Jesús tbojanjuá: —“Ndoñe catjóba, acbe shema inýaftaca ndoñe cattseingñaye, ndoñe catjatlëba, ndoñe catjuaboñýena. <sup>19</sup> Acbe bëtsëtsata stëtsoye ndoñe catjáquedaye y ndëmuia entśanaca cochtseboşonshana ntşamo cach aca cuenobobonshanca ca” —Jesús tbojaniana.

<sup>20</sup> Chora chë bobontse tbojanjuá: —Atşe lempe chca nyets tempo sëndocumplina. ¿Ndayá más şojtsebuaşbena ca?

<sup>21</sup> As Jesús tbojaniana: —Aca lempe tšabá jamama tcojtseboşëse, motsa, acbe bomna soyënga cochjetsatobuyiye y chë crocënana, ndbomnjëmënga cochtşatşataye; chca, bëts uacanana soye celoca cochántsebomna. Chentšana cochjabo y şcochjuasto ca.

<sup>22</sup> Chë bobontse chca tojanuena ora, ngmënaca yojtşatoñe, cha corente bomná bemna causa.

<sup>23</sup> Chora Jesús chabe uatsjëndayënga tojanëyana: —Ndegombre cbëyana, puerte totcá entsemna canje bomnabiama Bëngbe Bëtsabe amëndayoye jamashënguama ca. <sup>24</sup> Chë bomnabiama cachiñe şcuatayana: Más paselo entsemna canje camello chë coshuf-jentśa atëfnëjana chauachnëngo, y ndoñe canje bomná Bëngbe Bëtsabe amëndayoye jamashënguama ca.

<sup>25</sup> Chabe uatsjëndayënga chca tmojanuena ora, puerte ojnánänënga imojtsemna y imojt-sichamo: —As, ¿nda yochjobenaye atşocaná jtsemnama ca?

<sup>26</sup> Jesús chënga tojanëñanyë y tojanëyana: —Entşanga ndoñe quemátobena jamama canýa atşocaná chaotsemnama, pero Bëngbe Bëtsá aíñe, er cha nyetsca soyënga jamama endobena ca.

<sup>27</sup> Chora Pedro tbojaniana: —Aca contsonýá, bënga lempe chë fsëndbomna soyënga fsënjëseboşhona y ácaftaca fsëntsajna. As, ¿ndayá bënga fchjójyëngacñe ca?

<sup>28</sup> As Jesús tojanëyana: —Ndegombre cbëyana, nyetsca quem luarentśa soyëngama mo tsmëcá jtsemnama tempo chaobjuache ora, chë Bëngbe Bëtsá Entśá tbojanbemá chabe buashinýinýana bëts tşenëşine reyca echanjót'bema jtsemándayama; y tşëngaftanga, chë atşe şmëstonëngna, chora bnëtsana uta uámana tbemaniñe şmochanjot'biana mo reyëngcá, chë Israeloca bnëtsana uta bëts pamillentsa entsangbiana jayanama tšabá o ndoñe tšabá tmonjamama. <sup>29</sup> Y ndëmuanyënga, atşe jaserviama tmojëftseboşhona cachëngbe yebna, catşátanga o uabënanga, befta o bebmá, básenga o fshantsënga, chë soyëngama patşe soye más mochanjójyëngacñe y chë nyetsca tescama yomna tšabe vídnaca. <sup>30</sup> Pero banga mora uámanënga imomnënga, nduámanënga mochántsemna; y banga mora nduámanënga imomnënga, uámanënga mochántsemna ca —Jesús tojanayana.

**20***Chë trabájayëngbiana cuento*

<sup>1</sup> Méntśanaca Jesús tojánayana: “Bëngbe Bëtsabe amëndayana endmëna mo canýe bëts jajañe nduiñcá. Chë nduiñna canýe te cabá cachëse yojábocna peonga janguanguama, chabe uvas betiyënga jajañe chamotrabajama. <sup>2</sup> Chë nduiño peonga yojánýena orna, imojenóyeunaye canýe tescama canýe denario crocënana jtëbuënyama. As chora yo-jichamuá chë uvas betiyënga jajoye jatrabájama. <sup>3</sup> Mo base moşenana ora, chë nduiño cachiñe yojábocna y plazoca atşanënga inýenga yojanyë, tondaye ntsamcá. <sup>4</sup> As yojáuyana: ‘Tşëngaftángnaca atşe uvas betiyënga jajoye motsajna jatrabájama y ntşamo chaşmojamcá cbochtëbuënyaye ca.’ Y chë entśanga imojá. <sup>5</sup> Nyetsto ora y bëts moşenana ora, chë nduiño cachiñe yojábocna y cachiñe cachcá yojopása. <sup>6</sup> Mo la cinco ora, chë nduiño cachiñe yojábocna y chenache inýenga yojánýena, tondaye ntsamcá. As yojátjaye: ‘¿Ndayeca tşëngaftanga nyets día ntjatrabajacá muentşe şmotsomñe ca?’ <sup>7</sup> Y chënga imojojuá: ‘Ndocná bënga cheşnataimpadá causa ca.’ As chë nduiño yojáuyana: ‘Tşëngaftángnaca atşe uvas betiyënga jajoye motsajna jatrabájama y cbochtëbuënyaye ca.’

<sup>8</sup> “Y ya bien jetiñe yojtsemna orna, chë nduiño chabe caporálbiöye ibojauyana: ‘Peonga metsachembo y cochtëbuënyaye. Chë ústonoye tmojáşhjajñënguentšana cochjabojátśa y chë natsana tmojáşhjajñënga ústonoye ca.’ <sup>9</sup> Y chë mo la cinco ora imojáşhjajñënga imojobeconá, y cada ona canýe denario crocënana yojtáyentşbuachiye. <sup>10</sup> Chentšana, chë natsana

jatrabájama imojáshjajnënga yojtsamna jobéconama y chënga imojétsejuabnaye más crocénana mochanóyëngacñe ca. Pero chëngnaca cach canye denario crocénana yojtëbuénaye. <sup>11</sup> Chca imojóyëngacñe orna, chënga imojóntša chë nduifñiama bacá ichámuana, <sup>12</sup> mëntšá: ‘Quemënga chë ústonoye tmonjáshjajnënga nye canye horatema tmonjatrabajá; ntšamo bënga šcontëbuenacá, cachcá chënga contëbuená y bëngna nyets día jabuache fsënjatrabajá y corente jënyá fsënjauantá ca.’

<sup>13</sup> “Pero chë nduifño canya chca yojtsichamuábioye ibojojuá: ‘Sobreno, acbiana ndocna ndoñe tsabe soye chiyatsma. ¿Ndoñe canye denario crocénana canye tescama tbonjenoye-uná ca? <sup>14</sup> Chcasna, acbe uacanana crocénana mesocñe y motsatoñe. Atše séntseboše chë ústonoye jatrabájama tojashjanguá jtabuénayana, cachcá ntšamo aca tchojtabuenacá. <sup>15</sup> Chca entsemna, er atše sëndobena atšbe crocénanaca nye ndayánaca jamana. ¿O aca envidia cojtsebmoma, atše tsabia tsmënama ca?’ —cha yojayana.

<sup>16</sup> Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnënga, nduámanënga mochántsemna ca.”

*Jesús cachiñe tojánayana cha jóbana y jtanayana*

(Mc 10.32-34; Lc 18.31-34)

<sup>17</sup> Chënga Jerusalenoye imojtsaye ora, Jesús barie tojánachembo chabe bnëtsana uta uatsjëndayënga y tojanéyana: <sup>18</sup> “Tsëngaftanga šmontsonyá mora bënga Jerusalenoye montsajna. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatsñe mochanjáboshjona, y chënga mochanjayana jóbana cha ibojtsemna ca, <sup>19</sup> y chë ndoñe judiëngbe cucuatsñe mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

*Chë Santiago y Juanbe mamabe impadana soye*

(Mc 10.35-45)

<sup>20</sup> Chentšana, Zebedeobe uaquiñatbe mamá chabe uaquiñátaftaca Jesúsbioye tojanobconá, chabe shecuatsentše yoJoshamentšiyé canye pavorama jaimpádama. <sup>21</sup> As Jesús tbojantjá: —¿Ndayá cojtseboše ca?

Y chë shembása tbojanayana: —Aca reycá chacojtsemánda ora, cochjamánda atšbe uaquiñata chabótbema canya acbe catšbioica y chë ínaya acbe uañicuayoica, ácaftaca chabotsemándama ca.

<sup>22</sup> Y Jesús tojanéjua: —Ntšamo šmontsotjanañama, tsëndata ndoñe quešnátstšëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

<sup>23</sup> Chora Jesús tojanéjua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentše entsemna ndëmuanyëngbiana atšbe Taitá tojaprontacá ca.

<sup>24</sup> Chë ínye bnëtsana uatsjëndayënga chca tmojanuena ora, chë uta catšátaftaca tmojanotjayaná. <sup>25</sup> Chora Jesús chë uatsjëndayënga tojánachembo y tojanéyana: —Tsëngaftanga šmondëtatšëmbo, chë ndoñe judiëngbeñe chë reyënga lempe jtsemándayana nya mo nduifñënga cuaftsemncá; y chë bëtsëta entsangna chëngbe obenánaca jtsemándayana, ndayánaca jtsamëse, chë ínye entsanga sempre chamotsayaunanama. <sup>26</sup> Pero tsëngaftangbeñna ndoñe chca chaondëtsemna. Inyëtšá; masna, nda tsëngaftanguentše chë más uamaná jtsemnama tojtsebošá bontsemna chë ínýënga jtsaservénana. <sup>27</sup> Y ndánaca tsëngaftanguentšá chë más uamaná jtsemnama tojtsebošá bontsemna jtsemnana mo nýe ínýabiana nyets tempo oservenacá. <sup>28</sup> Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá ínýënga jabáserviama. Y mo nda ínýënga játsebacama cuafjëtšajocá, cha echanjóbana, ba entsanga atsebácanënga chamotsemnana ca —Jesús tojánayana.

*Jesús uta jtanata tojanashná*

(Mc 10.46-52; Lc 18.35-43)

<sup>29</sup> Chënga, Jericó bëts pueblëtšana tmojánbocana ora, ba entsanga Jesús imojtséstona. <sup>30</sup> Uta jtanata benache juachañe ibnatbemana. Jesús chëjana yojsachñëjuanama chata tbojanuena ora, tbojanontšé uayebuáchana: —¡Utabná, Davídbentšana Entšá, šmotsalastemá ca!

<sup>31</sup> Entšanga chë jtanátbioye tmojtsanëcácana iytëca chabotsemnana, pero chatna más ibojtsáyebuache: —¡Utabná, Davídbentšana Entšá, šmotsalastemá ca!

<sup>32</sup> As Jesús yojtsaye, chë jtanata tojánachembo y tojanatjá: —¿Ndayá šojtseboše atše tsëndatbiama chjamama ca?

<sup>33</sup> Y chata tbojanjuá: —Utabná, bëndata chabuatëbínýnama ca.

<sup>34</sup>Jesús chatbiamá tbojanongmé y tojánabuchbojajo. Cachora chë jtanata tšabá yojtëbinÿna y Jesús tmojanasto.

## 21

*Jesús Jerusalenoye tojánashjango*

*(Mc 11.1-11; Lc 19.28-40; Jn 12.12-19)*

<sup>1</sup> Ya Jerusalenoca béconana imojtsemna y canÿe pueblo Betfagé ca uabáinoca tmojánashjango, canÿe tjashe Olivos ca uabáinentše. Chora Jesús uta chabe uatsjédayata tojanichamó, <sup>2</sup> y mëntšá tojanéyana: “Tsëndatbe natsana entsemna base pueblotémoye motsata. Cachora canÿe burrá utsbuaná šochanjínÿena y cháftaca canÿe burrotema echántsemna. Sochjuajafjoná y sochjuánatse. <sup>3</sup> Nderado nda ndayánaca chacmojáuyañese, sochjauyana: ‘Bëngbe Utabná bontšájaboto y chentšana camuentše echanjabáísabashejuana ca.’”

<sup>4</sup> Chca tojanopasá, cachcá chaotsemnama ntšamo chë Bëngbe Bëtsabe juabna oyebuambnayá tojanayancá. Cha mëntšá tojánábema:

<sup>5</sup> Jerusalén bëts pueblentše oyenënga mëyana:

“Minÿënga, tšëngaftangbe Rey chentše tšëngaftangbioye entsabó, ndoñe mo canÿa cachá bëtsá enobiamnayacá; canÿe búrrbeñe enjaquená; canÿe burrotëmiñe, canÿe uatrabájaye bayabe šesónbeñe ca.”

<sup>6</sup> Chora chë uatsjédayata tbojána y tbojanma ntšamo Jesús tojanamëndacá. <sup>7</sup> Chë uatsjédayatna chë burrá y chë burrotema tmojanënatse, entsáyëjuangá chátbeñe tbojanájtse y chora Jesús chábeñe tojanenoyagé. <sup>8</sup> Bëtscá entsanga chëngbe entsáyá chë benachëjana imojtsëtšatsana, y inÿengna betiyeshënguifne buacuafjënga imojtsetcoye y chiñe imojtsequëcñá. <sup>9</sup> Y chë natsana imojtsajñënga y chë ústonoyënga mëntšá imojtsaiuáyebuache: “¡Rey Davidbentsana Entšá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

<sup>10</sup> Jesús Jerusalenoye tojánamashëngo ora, nÿetsca entsanga imojtsenbouenana y banga imojtsenotíciaye: —¿Nda mua yojtsemna ca?

<sup>11</sup> Y chë entsanga imojtsëjuana: —Chë Bëngbe Bëtsabe juabna oyebuambnayá Jesús, chë Galileoca pueblo Nazaretocá ca.

*Jesús, Bëngbe Bëtsabe bëts yebnentšana enënga y obuámnayënga tojtanëbuacna*

*(Mc 11.15-19; Lc 19.45-48; Jn 2.13-22)*

<sup>12</sup> Chentšana Jesús, Bëngbe Bëtsabe bëts yebnoye tojánamashëngo y chë entsanga chentše imojtsena y imojtsobuámnafjënga chentšana tojtanëbuacna. Chëntšnaca imojtsemna entsanga canÿe crocénana enënga, y chë crocénana nÿe Bëngbe Bëtsabe bëts yebnentšama inoservena. Chëngbe mesëshangá tojtsanenásatájchquëca y chë palomatema enëngbe tšenëšëngnaca. <sup>13</sup> Y tojanéyana: “Bëngbe Bëtsabe uabemana palabrënguifne cha mëntšá tojánayana: ‘Átsbe bëts yebna echantsabaina átseftaca encuëntaye yebna ca’; pero tšëngaftangna, atbëbanëngbe oyeñiñe chë yebna šmojtsebema ca” —Jesús tojanéyana.

<sup>14</sup> Chentšana, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná. <sup>15</sup> Chë bachnangbe más uámana amëndayënga y ley abuátambayënga, Jesús bëts soyënga yojtsamama tmojáninÿe ora, y chë basetëmënga Bëngbe Bëtsabe bëts yebnentše imojtsayebuáchama tmojanuena ora, tša tmojanotjáyananga. Chë basetëmënga mëntšá imojtsáyebuache: “¡Chë Rey Davidbentsana Entšá matschuanga ca!”

<sup>16</sup> As Jesús tmojanianyana: —¿Ntšamo chë basetëmënga montsichamcá quectsuënanana ca?

Y Jesús tojanéjua: —Aifne, sentsuënanana. Pero, ¿tšëngaftanga Bëngbe Bëtsabe uabemana palabrënguifne chë soyama ndoñe šmëndualía? Chiñe mëntšá endayana:

Chë basetëmënga y ochóchaye šesonatëmëngbe cantëngaca aca tcojama entsanga chacmotsatschuanama ca.

<sup>17</sup> Chora Jesús chënga tojésanabashejuana y Jerusalenentšana Betania pueblloye tojtsanoñe; y chentše chë ibeta tbojánbobinÿna.

*Jesús tojánayana canÿe higo betiye ndoñe más chaondëshájona ca*

*(Mc 11.12-14, 20-26)*

<sup>18</sup> Chë te cachëse, Jesús cach bëts pueblloye yojtésa ora, tbojánishëntsenana. <sup>19</sup> Chora canÿe higo betiye benache juachaca yojinÿe; as choye yojobeconá, pero nÿe ena tsbuanáchënga chiñe yojinÿena. As Jesús chë higo betiyye tojánayana: “¡Ndocna te más chaondëshájona ca!” Y betscó chë higo betiye tojtsanbuashá.

<sup>20</sup> Chë uatsjédayënga chca tmojáninÿe ora, imojenjnaná y Jesús tmojantjá: —¿Ntšamo chca chë higo betiye canÿe ora tojtsebuashá ca?

<sup>21</sup> Y Jesús tojanéjua: —Ndegombre cbéyana, tšëngaftanga Bëngbe Bëtsabeñe ošbuáchiyana šmojtsebomna y chabiamá ainaniñe ndoñe inÿëtšá šmonjättsjuabnase, šmochantsobena

jamama ndoñe nñe ntšamo atše quem higo betiyeca sënjamcá, sinó quem tjoye, “muentšana mojuaná y uafjajónayoye moshbuetše ca” šmojananése, chca jochñenguana. <sup>22</sup> Y Bëngbe Bëtsáftaca chašmojtšencuénta ora, chábeñe jtsosbuáchiyëse, lempe ntšamo chašmojtjañcá šmochanjóyëngacñe ca — Jesús tojánayana.

### *Jesusbe obenana*

(Mc 11.27-33; Lc 20.1-8)

<sup>23</sup> Chca tojanopasá chentšana, Jesús Bëngbe Bëtsabe bëts yebnoye tojánamashëngo. Chentše yojtšabuátambantscuana, bachnangbe amëndayënga y judiëngbeñe bëtsëjemëngcá amëndayënga tmojanobeconá y tmojanjtá: —¿Ndaye deréchoca chë contsama soyënga aca cojtsama ca? ¿Chca jtsamama nda mando tcmënjatštá ca?

<sup>24</sup> As Jesús mëntšá tojanëjua: —Atšnaca canye soye sëntsebomna tšëngaftanga jatjayama, y quešmojojuase, átšnaca cchochjáyana ndaye deréchoca atše chca stsama. <sup>25</sup> ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca? —Jesús tojanëyana.

Chama chënga tmojanontšë mëntšá enatsëtsnayana: “ ‘Bëngbe Bëtsá ca’ chamojojuase, cha sochanjáyana: ‘As, ¿ndáyeca chë tcmojanabuayená soyënguiñe ndoñe šmonjanošbuaché ca?’ <sup>26</sup> Pero ndoñe quemuátobena jayanana ‘entšanga ca’; muentša entšangbiana bënga montsauatja, er nyëtscanga mondëjuabná Juan ndegombre Bëngbe Bëtsabe juabna oyebuambnayá yomna ca.” <sup>27</sup> Chcasna chënga Jesús tmojanjuá: —Bënga ndoñe queftsátstatšëmbo ca.

Y as Jesús tojanëyana: —Atše cach ndoñe quechochatëyana ndaye deréchoca chca stsama ca.

### *Chë uta uaquiñábiana cuento*

<sup>28</sup> Chora Jesús entšanga tojanatjá: —¿Ntšamo tšëngaftanga quem soyama šmatjayana? Canye boyabása uta uaquiñá yojánabamna, y cánýabioye ibojauyana: “Uaquiñá, mënté motsa atšbe uvas betiyënga jajoye jatrabájama ca.” <sup>29</sup> Chë uaquiñá ibojojuá: “¡Jama ndoñe quetsátsoše ca!” Pero botamana yojenójuaboye y pronto choye yojá. <sup>30</sup> Chentšana chë taitá chë inye uaquiñábioye cachcá ibojauyana. As cha ibojojuá: “Arseñor, añe chanjá ca.” Pero ndoñe yonjá. <sup>31</sup> ¿Chë útatentšana ndëmuanýá tojanma ntšamo chë taitá yojabošcá ca? — Jesús tojanatjá.

Y chënga tmojanjuá: —Chë natsaná ca.

Chora Jesús tojanëyana: —Ndegombre chëyana, chë Romocama entšangbioye impuesto atjanayënga y chë bacna vida bomna shembásenga, tšëngaftangbiana más montseprontana Bëngbe Bëtsabe amëndayoye jamashënguama. <sup>32</sup> Juan chë Ubayaná tonjánabo tšëngaftanga jábuayenama ntšamo jtsiyenana cmammama, ntšamo Bëngbe Bëtsá yobošcá, y tšëngaftanga chë tcmojanabuayená soyënguiñe ndoñe chešmatanošbuaché; y chë cuenta, chë Romocama entšangbioye impuesto atjanayënga y bacna vida bomna shembásengna añe chábeñe montsanošbuaché. Y tšëngaftanga, masque ntšamo chënga Bëngbe Bëtsábeñe imojtsosbuáchema lempe šmojinýëse, chë juabnayana ndoñe šmonjatrocá, chábeñe jtsosbuáchiyama ca —cha tojanëyana.

### *Chë puerte bacna trabájayëngbiana cuento*

(Mc 12.1-12; Lc 20.9-19)

<sup>33</sup> Mëntšanaca Jesús tojánayana: “Inye cuento šmochjatuena chašmuatsjinyama: Canye jajañe nduiño uvas betiyënga yojáje y chë shëconana yojajëtja. Chë uvasëšangá juantsëtetjiamna canye base luare yojajutjo y canye tsbanana jebna soye yojapórma chentše jtsaishanyama. Chentšana, inye trabájayënga chë jajañe yojárrendaye y chana inye luaroye yojtsoñe. <sup>34</sup> Chë uvasëšangá juashacama tempo yojobuache orna, chë jajañe nduiño básefta oservénënga yojichamuá chë arrëndayënga jáuyanama ntsachëtšá chë nduiño ibojtsotocánama. <sup>35</sup> Pero chë arrëndayëngna chë oservénënga imojishëche: Inyëngbioyna imojtsajantšetaye, inyëngbioye imojtsëbaye y chë inyëngbioyna ndëtšbëngaca imojtsatëchénganja. <sup>36</sup> As chë jajañe nduiño chë natsanama más ba oservénënga yojichamuá. Pero chë arrëndayëngna, ntšamo chë natsanëngaftaca imojamcá, cachcá chora imojama.

<sup>37</sup> “Cabana, chë jajañe nduiño cachabe uaquiñá ibojíchmua; as mëntšá yojtsejuabnaye: ‘Atšbe uaquiñá cocayé mochanjóyeunaye ca.’ <sup>38</sup> Pero chë arrëndayënga chë uaquiñá imojinye orna, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbangá y lempe chabe otocana soyënga bëngbiana echanjoquédá ca.’ <sup>39</sup> As chë uaquiñá imojishache, chë uvas betiyënga jajañentšana imojtsábocna y imojtsóba.”

<sup>40</sup> Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ¿ntšamo šmojtsejuabná chë arrendayëngaftaca cha yochjama ca?

<sup>41</sup> Y chënga tmojanjuá: —Chë puerte bacna arrëndayënga ni mo batšatema ntjalastemaycá echantsëbaye. Chë jajañe ínÿenga echanjárrendaye y chë uvasëšangá juashacama tempo chaojobuache ora, ntšamo chë nduiño chabojsotocancá chënga mochantíyie ca.

<sup>42</sup> Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga tmojtsanaboté ndëtsbé,

mora chë más bëts uashacuanëšentše entsejájona.

Chë soye Bëngbe Utabná, Bëngbe Bëtsá chca tojama,

y bënga chama ojanánënga fsëntsemna ca.

<sup>43</sup> Ntšamo chë nduiño chë arrëndayënga chë fshantse echántsabaca y ínÿenga echantsatsataye y chënga chabiama bëtscá shajuana mochanjatbanacá, cachchá, Bëngbe Bëtsabe amëndayana tšëngaftangbentsana mochantsejuána y ínÿengbioye mochántatsataye. Chënga Bëngbe Bëtsabe soyëngama mochanjouena y chë soyëngama ínÿengbioye mochanjabuayená, Bëngbe Bëtsabe amëndayoye jamashënguama. <sup>44</sup> Ndánaca chë ndëtsbeñe chaojotsatsá, chëbé bochántsatcacaye; y chë ndëtsbé ndábeñnaca chaojotsatše, polvëshe bochántsebema ca —Jesús tojánayana.

<sup>45</sup> Chë bachnangbe amëndayënga y fariseunga, Jesús chë jabuátambama cuentënga yojtsëtsësnama, tmojanenótatsëmbona chëngbiama chca yojtsóyebuambnama. <sup>46</sup> Chora chënga tmojánbošëna Jesús jishachana, pero entšangbiama imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

## 22

### *Chë casamento fiestama cuento*

*(Lc 14.15-24)*

<sup>1</sup> Chentšana Jesús tojanontšé cachiñe cuentëngaca chënga jabuátambana. Mëntšá tojánayana: <sup>2</sup> “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canÿe réyefraca tojanopasacá. Chë rey yojamánda canÿe bëts fiesta jamama, chabe uaquíñabe casamentama. <sup>3</sup> Chora chë rey chabe oservënënga yojichamuá chë ófanënga jobiatšama, pero chë ófanëngna ndoñe imonjouena jama. <sup>4</sup> As chë rey ínÿe oservënënga yojichamuá y mëntšá yojámëndaye: ‘Chë ófanënga šmochjáuyana, ya saná stsebofrontana ca. Sënjamandá, atšbe uacnënga y uamna bayënga minÿicánënga jobáyama y lempe entseprontana; y chamuabo chë casamento fiestama ca.’

<sup>5</sup> “Pero chë ófanënga ndoñe imonjouena. Canÿa, cachabe fshantse inabomnoye yojtsoñe; ínÿana chabe obuámnyañe trabajuama yojtsoñe; <sup>6</sup> y ínÿengna, chë reybe oservënënga imojishëche, jabuache imojtsatsetšenaye y imojtsëbaye. <sup>7</sup> Y chë rey chë soyama yojouena ora, corente ibojtsetna. As chabe soldadënga yojichamuá chë oservënënga obánayënga chamuetsëbáyama y chëngbe bëts pueblo jetsángbotjuama. <sup>8</sup> Chora chabe oservënënga yojáuyana: ‘Lempe entseprontana chë casamento fiestama, pero chë ófanënga ndoñe quenjatëmerecena moye jabama. <sup>9</sup> Motsajna tsashenangoye y ndëmuanÿëngnaca chašmojánÿenënga, chë casamento fiestama šmochjúbuaja ca.’ <sup>10</sup> As chë oservënënga tsashenangoye imojábocna y nÿetscanga imojánÿenënga imojáchemo, cánÿiñe tšabe y bacna entšanga, y chca, chë tšbocnoaicoa jútjena yojtsemna entšángama.

<sup>11</sup> “Chë ófanënga jánÿama chë rey yojámashëngo ora, chentše cánÿabioye ibojinÿe y chana ndoñe yontsemna ntšamo canÿe casamento fiestama endbetsemncá uichëtjoná. <sup>12</sup> As chë rey ibojauyana: ‘Sobreno, ntšamo canÿe casamento fiestama endbetsemncá ndoñe quecatichtëjona. ¿Ntšamo chca moye tcojamáshëngo ca?’ Pero chë boyabásana nÿe iytéca yojtsemna. <sup>13</sup> As chë rey chë fiestentše ujuatšnayënga yojámëndaye: ‘Shecuatše y cucuatše motsebatsëca y chë ndëbinÿna luaroye, infiernoye motsábocna. Chentše puerte echanjenóbošachna y chë tsetšanama juatsašënga echantsenofhtëšjojñaye ca’ —cha yojayana.”

<sup>14</sup> Jesús chca jacuëntama tojanpochocá ora, mëntšá tojánayana: “Chë fiestama ófanënga banga montsemna, pero chë bocacánënga choca jtsemnana nÿe báseftanga. Er Bëngbe Bëtsá banga jáchembuana chabe amëndayoye jamashënguama, pero nÿe báseftanga choca mochántsemna ca.”

### *Chë Romoca bëts mandadbiana impuesto jtsatsquëcñayama*

*(Mc 12.13-17; Lc 20.20-26)*

<sup>15</sup> Chentšana chë fariseunga tmojtsatanoñe y tmojanenoyeuná ntšamo Jesús tojyaniñe cha jisháchichiyana, as chca, mandadëngbeñe cha mal jaquédama. <sup>16</sup> Chama chënga tmojanichamó básefta cachëngbe usetonënga y ínÿengna Heródesbe ústonënga, Jesús jauyanama: —Buatëmbayá, bënga fsëndëtatšëmbo aca ndegombre soyënga cnetsabuátambama y consabuatambá ndegombre tšabe vida jtsebomnana, ntšamo Bëngbe Bëtsá yomandacá,

y ndoñe jatuenanana nñe ntšamo entšanga tmojatichamcá, er acbiamá tondaye quenatámána nda más uamaná o nduamaná tomnana. <sup>17</sup> Chcasna, ¿ntšamo catjájuaboye? ¿Tšabá tajojtsemna, César, chë Romoca bëts mandadbiama, bënga impuesto jtsat-squëcñayana o ndoñe ca?

<sup>18</sup> Jesús yojtsetátšëmbo chëngbe bacna juabnëngama; chíyeca tojanéyana: —Bacna entšanga, ntšamo ndegombre šmojuabnacá ndinýinýnayënga. ¿Ndáyeca tšëngaftanga šmojtseboše chë sóyeca atšë jisháchichiyama? <sup>19</sup> Chë šmatsquëcñná crocénana šminýinýé ca.

As canýe crocénana tmojanoyé. <sup>20</sup> Jesús tojanatjá: —¿Ndabe jubiá quem crocénániñe yojtsemna, y ntšamo muentše entsabemancá nda chca iuabaina ca?

<sup>21</sup> Y chënga tmojanjuá: —Césarbe jubiá; cha chca enduabaina ca.

As Jesús tojanéyana: —Césarbioye šmoctoyiye cha ibotocana soye; y Bëngbe Bëtsana cha ibotocana soye ca.

<sup>22</sup> Chënga chca tmojanuena ora, ojanánënga imojtsemna. As chënga cachcá Jesús tmojanonýá y tmojtsatanoñe.

*Obanënga jtayenama Jesús tmojantjá*

*(Mc 12.18-27; Lc 20.27-40)*

<sup>23</sup> Báseftanga judiëngbe amëndayënga, saduceos ca uabáinënga, imojanjuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntšá tmojantjá: <sup>24</sup> —Buatëmbayá, Moisés tojánayana nderado canýe boyá tojóbana básenga ntjéftasbashejuancá, ana chabe uabentsá jtemnana chë shëmaftaca jtobouamayana, chca, chabe uabochená obanabiama básenga jtsabamnama ca. <sup>25</sup> Chcase, canýe bëngbentše canýsëfta catšátanga monjamna. Chë natsaná tonjanobouamá y tonsanóbana. Básenga ndoñe quenjátabamna, chíyeca chë shemna chë uabentsáftaca ton-tanobouamá. <sup>26</sup> Y cháftaca cachcá tonjanopasá, chë inýe uabentsáftaca cachcá, y cachcá chë inýengaftaca y chë ústonoca uabentsáftacna. <sup>27</sup> Y chentšana chë shembásanaca tonsanóbana. <sup>28</sup> Y morna, chë obanënga chamojtayena ora, ¿ndabe chë canýsëfta catšatanguentsabe shema chë shembása yochtsemna, nýetscanga cháftaca tmojanobouamase ca? —chënga tmojantjá.

<sup>29</sup> As Jesús tojanéjua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa.

<sup>30</sup> Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá. <sup>31</sup> Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrenguiñe tojánayanama? Cha tonjánayana: <sup>32</sup> “Atšë sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

<sup>33</sup> Chë entšanga chca tmojanuena ora, ojanánënga imojtsemna ntšamo Jesús yojtsabuátambama.

*Chë más bëts uámana mando*

*(Mc 12.28-34)*

<sup>34</sup> Jesús chë saduceúngbioye iytëca tojánabiamama fariseunga tmojantatšëmbona ora, chënga tmojánenefña, <sup>35</sup> y canýa chënguentšá, ley abuatambayá, Jesúsbioye jisháchichiyama tbojantjá: <sup>36</sup> —Buatëmbayá, ¿Moisesbe leyiñe ndayá chë más bëts uámana mando yomna ca?

<sup>37</sup> As Jesús tbojanjuá: —“Utabná Bëngbe Bëtsá cochtsebobonshana nýets acbe ainánaca, nýets espritoca y nýets juábna.” <sup>38</sup> Chë soye endmëna chë más bëts uámana mando y nýetsca mandëngama chë natsanoca entsemna. <sup>39</sup> Y quem inýe soye, chë natsana mandcá endenoparecena. Endayana: “Ndëmua entšánaca cochtsebobonshana, ntšamo cach aca cuenobobonshancá ca.” <sup>40</sup> Chë uta mandentšana endóbocana lempe ntšamo Moisesbe leyiñe endayancá y ntšamo chë Bëngbe Bëtsabe juabna oyeuambnayeñga mondbetsabu-atambacá ca —Jesús tbojanayana.

*¿Cristo, ndabe entšábentšana yomna?*

*(Mc 12.35-37; Lc 20.41-44)*

<sup>41</sup> Chë fariseunga cabá cachentše imojtsemnëntscuana, <sup>42</sup> Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiama, chë Cristo? ¿Ndábentšana cha iuabó ca?

Y chënga tmojanjuá: —Davidbentšana ca.

<sup>43</sup> As Jesús tojanéyana: —¿Ntšamo chca nántsemna, cach David, chë Uámana Espiritbe mándoca, Crístbioye Utabná ca tbojtsabuátmëse? David mëntšá tojánayana:

<sup>44</sup> Bëngbe Bëtsá, atšbe Utabná Crístbioye tbojanayana:

atšbe catsbioica mótbema,

atšbe obenánaca acbe uayýènga acbe cucuatšíne chamoquedama chjamèntscuana ca.

<sup>45</sup> ¿Ntšámose Cristo, Daviddèntšana Entšá nántsemna, cach David “Utabná ca” chábioye tbojtsabobuátmése ca? —Jesús tojanatjá.

<sup>46</sup> Chora ndocná tonjanobená ni mo canýe palabra jojuana. Y chë tescana ndocná yonjenñemua Jesús más jatstjanayama.

## 23

*Jesús chë fariseungbiana y ley abuatambayèngbiana tojánayana, chënga ndoñe tsabá montsama ca*

(Mc 12.38-40; Lc 11.37-54; 20.45-47)

<sup>1</sup> Chora Jesús, entšanga y chabe uatsjèndayènga mèntšá tojanéyana: <sup>2</sup> “Chë fariseunga y chë ley abuatambayènga cmondbètsabuatambaye ntšamo Moisesbe leyènguiñe iuayancá.

<sup>3</sup> Chcasna, tšèngaftanga cmontsamna chënga joyaunayana y ntšamo tcmojauyancá, cachcá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá. <sup>4</sup> Mo canýe entšá, couáybioye uauta uasmanésha juasmayana y cachá tondaye tontsasmancá, chënga entšanga jtsamèndayana bètscá mandènga chamotsocumplínama, pero cachënga ni mo batšatema ntsamana chë mandènga jtsocumplínama. <sup>5</sup> Chënga lempe jtsamana nýe entšanga chamotséñyama. Chënga chë ñýngbiana más Bèngbe Bètsá imobobonshana ca chamotsejuabnama, chënga monduamana téntša sèndachèjènguiñe juabemana ntšamo Bèngbe Bètsabe uabemana palabrènguiñe endayancá, y juentsaca y buacuatsíne chëjènga jenábatsécana y sibijana nýa téntša uasebtotonanèjuangá jtsichétjonana. <sup>6</sup> Chënga jtsebošana chë fiestènguiñe nýa quèfseroca jtsetbíamanama, y chë judièngbe enefjuana yebnènguenache chë más uamana luarènguiñe. <sup>7</sup> Chënga jtsebošana tsáshenañe entšanga nýa respètoca chamotsacheuanama, y ‘abuatambayènga ca’ chamotsachembuanámnaca chënga jtsebošana.

<sup>8</sup> “Pero tšèngaftangna ndoñe šmattseboše entšanga ‘abuatambayènga ca’ chacmotsachembuanama, er nýetsca tšèngaftanga mo catsatangcá šmondmèna, Bèngbe Bètsábeñe betsošbuachéyeca, y nýe canýa endmèna tšèngaftangbe Buatèmbayá. <sup>9</sup> Tšèngaftanga ‘taitá ca’ chë ley abuatambayènga šmondbètsachembuana, pero tšèngaftanga ndocna quem luarentšá ‘taitá ca’ šmattsechembuana; tšèngaftanga nýe canýe Taitá šmondhomna, chë celoca endmèná. <sup>10</sup> Ndoñe šmattseboše entšanga ‘mándayènga ca’ chacmotsachembuanama; er nýe canýe Mandayá endmèna y cha Cristo endmèna. <sup>11</sup> Nda tšèngaftangbeñe chë más uamaná tojtsemná bontsemna chë ñýyenga jtsaservénana. <sup>12</sup> Nda cachá bètsá tojtsenobi-amná, nduamaná mochántsebema; y nda cachá nduamaná tojtsenobiannana, más bètsá mochánjábema.

<sup>13</sup> “¡Tša lastema tšèngaftangbiana, bacna entšanga ntšamo ndegombre šmojuabnacá ndinýinýnayènga fariseunga y ley abuatambayènga! Tšèngaftanga šmontsama entšangbiana puerte totcá chaotsemna Bèngbe Bètsabe amèndayoye jamashènguama, mo bésáša cuaftsebiatamiancá. Pero ni cach tšèngaftanga choye quešmátamashjuana, ni ñýyenga choye jamashènguama bošèngbioye chama quešmátalesenciana. <sup>14</sup> ¡Tša lastema tšèngaftangbiana, ntšamo ndegombre šmojuabnacá ndinýinýnayènga fariseunga y ley abuatambayènga! Tšèngaftanga chë viuángbioye chë tmobomna soyènga jtsabacayana, y entšangbe delante tsabá chacmotséñyama y chënga šmojtsaingñayama ndoñe chamondètsetatsèmbuamna, Bèngbe Bètsáftaca tša jtscuèntayana. Chë causa, Bèngbe Bètsá tšèngaftanga más jabuache ñýyngbiana cmochánjácástigaye.

<sup>15</sup> “¡Tša lastema tšèngaftangbiana, bacna entšanga ntšamo ndegombre šmojuabnacá ndinýinýnayènga fariseunga y ley abuatambayènga! Tšèngaftanga ba luarènguenache jtsajana canýa tšèngaftangbe ustóna onguayíñe, y šmojñyena ora, tšèngaftanga jamana cha chaotsemna tšèngaftangbiana uta soye más merecido buajóna infiernoye chaotsama.

<sup>16</sup> “¡Tša lastema tšèngaftangbiana; tšèngaftanga šmondmèna mo jtanènga entšanga unachayèngcá! Tšèngaftanga šmondbètsichamo: ‘Nda ñýabioye tbojašbuachená ndayánaca jamama y tojayana chë Bèngbe Bètsabe bèts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bèngbe Bètsabe bèts yebnentsa castellanama cha tojajurasna, añe jtsemnana chë tbojašbuachená soye jamama ca.’ <sup>17</sup> ¡Obèjémènga y nduabínýnènga! ¿Ndayá más uamana soye yomna, chë castellano o Bèngbe Bètsabe bèts yebna? Chë castellano Bèngbe Bètsabiana josérviana jtsemnana, nýe Bèngbe Bètsabe bèts yebnoca chë castellano tojtsemnayeca. <sup>18</sup> Tšèngaftanga mèntšánaca šmondbètsichamo: ‘Nda ñýabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bèngbe Bètsabiana altaroca tojtsejájona soyèngama tojajurasna, añe jtsemnana chë tbojašbuachená soye



jamama ca.' <sup>19</sup> ¡Nduabín'yèng! ¿Ndayá más uámana soye yomna, chë Bèngbe Bètsabiana tmojacjá soyènga o chë altar? Chë tmojacjá soyènga Bèngbe Bètsabiana josérviana jtsemnana, n'ye chë altaroca chë soyènga tmojacjáyeca. <sup>20</sup> Nda chë altarama tojajurá, ndoñe n'ye chë altarama ntsejúrayana. Lempe chë altar juatsboca tojtsemnámna cha jtsejúrayana. <sup>21</sup> Nda Bèngbe Bètsabe bèts yebnama tojajurá, ndoñe n'ye Bèngbe Bètsabe bèts yebnama ntsejúrayana. Bèngbe Bètsabiana cha jtsejúrayana, cha chë chentše oyená. <sup>22</sup> Y nda celocama tojajurá, chentše reyca Bèngbe Bètsabe t'bermanífiama cha jtsejúrayana y cachora Bèngbe Bètsabiámna, chentše yotbemanabiana.

<sup>23</sup> “¡Tša lastema tsèngaftangbiana, bacna entsanga ntšamo ndegombre šmojuabnacá ndin'yín'yayènga fariseunga y ley abuátambayènga! Tsèngaftanga Bèngbe Bètsabiana jtse-quecñayana chë jajañentša sananga bnètsanentšana can'ye soye; chë binche matatémenga menta, anis y chë cominentša sanángnaca. Pero tsèngaftanga n'ye batsá jtšamana chë leyentša más uámana soyènga, mo chë n'yetsca entsanga cachca derechènga chamotse-bomnana, ín'yenga jtsalastemánana y chë tsabe soyènguiñe jtšiyenana, chca, entsanga tsèngaftangbeñe chamotsošbuáchemana. Chë soyènga cocayé cmontsamna jtšamana, chë ín'ye tsabe soyènga amana ntjabnacá. <sup>24</sup> ¡Jtanènga entsanga unachayènga! Tsèngaftanga chë base soyènga jamama puerte jtšenócochin'yenana, pero jtsebnèjtjombana uámana soyènga jamama, Bèngbe Bètsá tojanmandá soyènga. Y chca, tsèngaftanga šmontsemna mo can'ye entsá ndayá tojtsabuchetjá bayèfja jtsejuánama, ndoñe ntjasama, jasama ndoñe yondèlesenciana ca chë leyíñe iuayana causa. Pero šmondmèna mo entsangcá ndèmuanyènga camellbe mèntšena jasana, y chë leyíñe endayana chcana jasama ndoñe yondèlesenciana ca.

<sup>25</sup> “¡Tša lastema tsèngaftangbiana, bacna entsanga ntšamo ndegombre šmojuabnacá ndin'yín'yayènga fariseunga y ley abuátambayènga! Tsèngaftanga šmondmèna mo entsangcá ndèmuanyènga platillèjenga y tazèšènga šhoicajana jtšobojabiana, pero tsoyna n'ye cachcá jon'yayana. Tsèngaftanga tša jtšentšénana entsangbiana mo tsabengcá jtšin'yàmana, pero tsèngaftangbe ainanentše jútjena entsemna n'ye jtšathèbanama y n'ye bètscá soyènga jésembomna juabnèngaca. <sup>26</sup> ¡Nduabín'ya fariseo! Cochjtsətsəjaná ainaniñe bacna soyènga bomnana. Chamna n'ye tsabe juabnènga chentše chotsebomna, y lempe ntšamo chacojtsamcá y entsanga chamojtsonyacá tsábá echántsemna.

<sup>27</sup> “¡Tša lastema tsèngaftangbiana, bacna entsanga ntšamo ndegombre šmojuabnacá ndin'yín'yayènga fariseunga y ley abuátambayènga! Tsèngaftanga šmondmèna mo obanèngbe cuevèshènga botamana uafjantsenèshèngcá; šhoicajana puerte botamanèshènga, pero tsoyna jútjena obanèngbe betashèngaca y janjuana soyèngaca. <sup>28</sup> Tsèngaftanga chca šmondmèna: entsangbe delante tsèngaftanga jtšin'yàmana mo n'yetsca soyènguiñe tsábá amèngcá, pero ndoñe chca quešmátmèna. Tsèngaftangbe ainanentšna chë bacna entsanga ntšamo ndegombre tmojuabnacá ndin'yín'yayèngcá y chë bacna soye amèngcá šmontsejuabná.

<sup>29</sup> “¡Tša lastema tsèngaftangbiana, bacna entsanga ntšamo ndegombre šmojuabnacá ndin'yín'yayènga fariseunga y ley abuátambayènga! Tsèngaftanga jtšamana chë Bèngbe Bètsabe juabna oyebuambnayènga tempsquènga bètsètsa entsanga chamotsemnana, chèngbe cuevèshènga jtšatspórmayèse. Tsèngaftanga cachcá jtšamana chë n'yetsca soyènguiñe tsábá amèngaftaca, chë chèngbiana jtenójuaboyama pormániñe jtšatsbótamayèse; <sup>30</sup> y chentšana šmondbètsichamo: ‘Bènga chë bèngbe bètsèjémèngbe tempo maftsjanienèse, chèngbiyoye ndoñe matmèjanèjabuache chë Bèngbe Bètsabe juabna oyebuambnayènga jobáyama ca.’ Pero mo chèngcá can'ye buayenana sóyeca tmojabèngbioyna ndoñe ntsayaunanana. <sup>31</sup> Pero ntšamo šmojtsamcá jtšamèse, tsèngaftanga šmontsin'yán'ná ndegombre chë Bèngbe Bètsabe juabna oyebuambnayèngbiyoye tmojanèbayèngbe entsanguentšana šromchena. Y mora cach tsèngaftangbe bèts taitangcá tsèngaftanga šmontsama. <sup>32</sup> ¡Mopochocanga jamama chë bacna soyènga, chë tsèngaftangbe bèts taitanga tmojanbojatsé jamama soyènga!

<sup>33</sup> “¡Mèts'cuayènga, mèts'cuaye entsanga! ¿Ndayá šmochjama chë infernocca uabouana castigüentšana jótšocama? <sup>34</sup> Chíyeca atše tsèngaftangbiyoye chanjichamuá Bèngbe Bètsabe juabna oyebuambnayènga, tsabe soye tatsèmbènga y abuátambayènga. Pero tsèngaftangna, ín'yèngbiyoye šmochantsèbaye y šmochanjácrucificaye; ín'yèngbiyoye chë enefjuana yebnènguenache šmochanjátsèsenaye y n'yetsca bèts pueblènguenache chènga šmochandúcama. <sup>35</sup> Chíyeca, tsèngaftangbiana n'yets castigo echántsemna chë n'yetsca soyènguiñe tsábá amènga tmojétsóbanama; Abel, chë jóbana cha chabotsemnana tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquíñana, Bèngbe Bètsabe bèts yebnentše tmojanóba, altar y chë entsanga Bèngbe Bètsábíoye imojánadorana luariñe. <sup>36</sup> Ndegombre cbéyana, lempe chë soyèngama castigo morsca entsangbiana echántsemna ca’ —Jesús tojánayana.

*Jesús tojanošachna Jerusalenoca entsangbiana*  
(Lc 13.34-35)

<sup>37</sup> Měntšánaca Jesús tojánayana: “¡Jerusalentša entsanga, Jerusalentša entsanga! Tšéngaftanga chě Běngbe Bětsabe juabna oyebuambnayēnga jtsěbáyana y chě Běngbe Bětsabe ichmónēnga ndětsbėngaca jtsatěchėnganjana jtsěbáyama. Bueta soye atše sėnjábošena tšéngaftanga átšbioye júbuajana, mo canye tuamba chabe bolletotémēnga chabe juatėngmiáša tajsoye cuaftajayecá, pero tšéngaftanga ndoñe chešmátsbošena. <sup>38</sup> Y šmochjinýe, atše mora cachcá cbochanjesėnyaye, y chca, atšna enánanga cbochanjesabashjuana, mo canye yebna cachcá tcojesonýa y énañe tcojeseboshjoncá. <sup>39</sup> Y atše cbéyana, ndegombre tšéngaftanga morscana atše ndoñe más quešmochántinýe; y atše šmochántinýe mēntšá chašmojtsichamo ora: ‘¡Corente bendición bomná, Běngbe Utabnabe obenánaca tojabá ca!’ ”

## 24

*Jesús tojánayana chě Běngbe Bětsabe bėts yebna lempe mochjánpochocama*  
(Mc 13.1-2; Lc 21.5-6)

<sup>1</sup> Jesús Běngbe Bětsabe bėts yebnentšana tojėftsanbocna y ya yojtsaye. Chorna chě uatsjėndayēnga tmojanobeconá nýe chėngbiana jatjayama, mēntšá: —Smėyana. ¿Mocna ora chě soyēnga Běngbe Bětsabe bėts yebnocna yochjochnėngo ca? ¿Ndayá yochjochnėngo bėnga jinýanýiyama aka jėsábama ora ya yojtsemnama y quem luare jopochócama tempo yojtsebuca ca?

*Ntšamo yochtsemna quem luare jopochócama tempo chaojtsobeco ora*  
(Mc 13.3-23; Lc 21.7-24; 17.22-24)

<sup>3</sup> Chentšana chėnga Olivos tjšashoye tmojána. Jesús choca yojtsetbemana; as, chě uat-sjėndayēnga tmojanobeconá nýe chėngbiana jatjayama, mēntšá: —Smėyana. ¿Mocna ora chě soyēnga Běngbe Bětsabe bėts yebnocna yochjochnėngo ca? ¿Ndayá yochjochnėngo bėnga jinýanýiyama aka jėsábama ora ya yojtsemnama y quem luare jopochócama tempo yojtsebuca ca?

<sup>4</sup> As Jesús tojanjá: —Cuedado šmochtsebmna ndocná chacmondáingñema. <sup>5</sup> Banga mochanjabo y mochantsabíchamo chėnga atše imomna ca. Mochántsihomo: “Atše chě Cristo sėndmėna ca” y chca, ba entsángbioye mochanjáingñaye. <sup>6</sup> Tšéngaftanga šmochanjouena canye luarentša entsanga inýe luaroca entsángaftaca imojtsentsjanama y nderado mochjentsjámna. Ndoñe matauatjėngana, er chca jochnėnguama endmėna; pero masque chcase, quem luare jopochócama cabá ndoñe queochátsmėna. <sup>7</sup> Canye luarentša entsanga inýe luaroca entsángaftaca mochántsihomo, y canye amėndayábentša entsanga inýe amėndayábioca entsángaftacna; y ba luarėnguiñe shėntsana echanjóshjango y chentša fshantsėnga echanjuangmėmana. <sup>8</sup> Masque chca jasúfriase, más chcoye cabá más mochanjatssúfria.

<sup>9</sup> “Chora, entsanga inýengbe cucuatšínē cmochanjábashjuana chacmatsetšenama y cmochantsėbaye; y atše ústonėnga bėtsemnayeca nýetsca luarėnguentša entsanga cmochantsėbuayėnja. <sup>10</sup> Chě tempo, banga mora atšbeñe ošbuáchiyėnga, ošbuáchiyana mochantsajbaná y mochantsenáboyėnja y jóbanama inýengbe cucuatšínē mochántsenboshjuana. <sup>11</sup> Banga Běngbe Bětsabe ndoñe ndegombre juabna oyebuambnayēnga mochanjábocana y ba entsanga mochanjáingñaye. <sup>12</sup> Nýetsá bacna juabnėnga entsangbe ainaniñe echanjėsemna, y chě causa banga ndoñe quemochátėnbobonshana. <sup>13</sup> Pero nda nýets tempo atšbeñe ošbuachiyá totsomñe, atsbocaná echántsemna. <sup>14</sup> Y quem tšabe noticiėnga Běngbe Bětsabe amėndayama nýets quem luariñe entsángbioye mochántsabuyiynaye, chca, chě ndegombre soyēnga Běngbe Bětsabiana chėnga chamotsetatšėmbuama. Chentšana cocay quem luare jopochócama tempo echántsemna.

<sup>15</sup> “Chě Běngbe Bětsabe juabna oyebuambnayá Daniel chě puerte uabouana soye tojėftsanabema chě pochócaye soyama. Tšéngaftanga chě puerte uabouana soye chě uamana ca uabiana luarentše chašmojinýe ora (nda tojtsalía, chabosertá), šmochántsetatšėmbo chě puerte ngmėnana tempo tojóshjanguama; <sup>16</sup> entsanga Judeoca chamojtsėmnėnga, bats-jabengoye chamotsacheta. <sup>17</sup> Y nda cachabe yebnentša tsbanánoca chaojtsemna, chaot-sachá chocana ntjastjancá ndayá tsoicana jėftsábocnama. <sup>18</sup> Y nda jajoca chaojtsemna, yebnoye ndoñe chaondėta ni mo chabe quėfsalía jesácñama. <sup>19</sup> ¡Tša lastema chě tempo ngomámanėnga chamojtsėmnėngbiana o ochóchaye šešonga chamojtsabamnėngbiana! <sup>20</sup> Běngbe Bětsá šmochtsempadana chě tšéngaftanga jachetama, uaftena tempo ora o canye ochnaytė ndoñe chaondėtsemnama. <sup>21</sup> Chca, chora puerte ngmėnana echántsemna. Tša jabuache ngmenancá, quem luare jabojátšama orscana y mēntsoñama y más chcoye, cachcá ngmėnana ndoñe ntjamnana. <sup>22</sup> Chě puerte ngmėnana tempo yapa bėn ndoñe

chaondétsemnana Bèngbe Bètsá ndoñe tonjalesenciase, ndocná quentatsbocá; pero chabe ubuáyanènga cha corente endábuayanýeshanayeca, echanjama yapa bèn tempo ndoñe chaondétsemnana.

<sup>23</sup> “Chora nderado nda cmochanjáuyana: ‘Minýènga, muentše chë Cristo entsemna’, o ‘Choca cha entsemna ca’, chë soyèngama ndoñe šmattsayaunana. <sup>24</sup> Chora mochanjábocana ndoñe ndegombre uámana ubuáyanènga, chènga Cristo imomna ca jtsichámèse, y Bèngbe Bètsabe ndoñe ndegombre juabna oyebuambnayéngnaca; y chènga mochanjama bès soyènga chèngbe obenana jinýanýiyama, entsanga jáingñama, y tmojobenase, chë Bèngbe Bètsabe bocacánèngnaca. <sup>25</sup> Atše ya chama tbonjabuayená chë tempo cabá ndóshjango ora. <sup>26</sup> Chiyeca, nderado chènga chacmojáuyana: ‘Minýènga, chentše chë Cristo entsemna, entsanga ndoyenoca ca’, choye ndoñe šmatjá; o chacmojáuyana: ‘Cha canýe tsoca entsemna ca’, chama ndoñe šmattsayaunana. <sup>27</sup> Er ntšamo chë tojatcuinýe ora, shinýe bocanoicana y shinýe uenatjèmbanarèntšcoñe jabuashinýinýenancá y ba luarènguenache entsanga jobenayana jinýama, cachá, Bèngbe Bètsá Entšá tbojanbemá quem luaroye chaojésabo te, entsanga nyets luarentše mochanjobenaye cha jinýama. <sup>28</sup> Canýe obanabe cuerpo tojtsemnana chë gallinacènga tmojátatšèmbona y cachora chë béconana jojotana. Cachá, chë castigo echántsemna nýa chama chë tempo chaojtsemna ora ca” —Jesús tojánayana.

*Bèngbe Bètsá Entšá tbojanbemá quem luaroye echanjésabo*

*(Mc 13.24-37; Lc 21.25-33; 17.26-30, 34-36)*

<sup>29</sup> Mèntšánaca Jesús tojánayana: “Chë puerte ngménana tempo chaojochñèngüentsana, shinýe ndoñe queochátsbuashinýinýana, juashcona ndoñe queochátsbinýnaye, celocana estrellènga echanjatquécjana y quem luarentša tsbanánoca espíritènga obenana bomnènga echanjángmèmana. <sup>30</sup> Chora canýe soye celoca echanjónýena entsanga jinýanýiyama Bèngbe Bètsá Entšá tbojanbemá ya iuaisaboma, y nyets luarenache entsanga mochanjenóbošachna, y Bèngbe Bètsá Entšá tbojanbemábioye mochanjinýe celoca jantšetèshiñe echántšaboye, puerte obenánaca y corente buashinýinýaniñe. <sup>31</sup> Y canýe trompetèfjua jabuache chaojuenana ora, cha chabe angelotémènga echanjichamuá Bèngbe Bètsabe ubuáyanènga júbuajama, nyets luarèngocana, celoca canýoica juachoicana y chë inýoica juachóntšcoñe.

<sup>32</sup> “Ntšamo higo betiyeca endbètsopasanama šmochjuatsjinýe: Tojtsaisabuacuana y tojtsaiséjotsana ora, chë tšabe tempo ya tojtsaisobecuama jtsotatšèmbuana. <sup>33</sup> Cachá, lempe chë ndayama tšèngaftanga tbonjauyancá chašmojinýe ora, šmochántsetatšèmbó Bèngbe Bètsá Entšá tbojanbemá ya jésaboma yojtsemnana. <sup>34</sup> Ndegombre cbéyana, lempe chca echanjochñèngo, morsa entsanga cabá ndóbana ora. <sup>35</sup> Celoca y quem luare echanjopochóca, pero atšbe palabra ndocna te queochaisopochóca.

<sup>36</sup> “Pero ndayté y ntseco ora Bèngbe Bètsá Entšá tbojanbemá yochjésaboma, ndocná quenátstatšèmbó, ni chë celoca angelotémènga, ni Bèngbe Bètsabe Uaquiñá. Nýe chë Taitá chama yotátšèmbó.

<sup>37</sup> “Ntšamo Noé yojéftsiyena ora tojanopasacá, cachá echanjopásá chë Bèngbe Bètsá Entšá tbojanbemá chaojésabo ora. <sup>38</sup> Noebe tempo, chë uabouana uaftena cabá nduáshjango ora, entsanga imnasaye, imnofšèsnaye y inmóbuamnaye; natjèmbana imojtsiyèñe, y chca imojtsomñe Noé chë barqueshoye tojánamashènguèntscuana. <sup>39</sup> Chènga tondaye imonjántatšèmbó, nýe chë uabouana uaftena tojánashjango y nyetscanga tojtsanényamba ora cocayé. Cachá echántsemna Bèngbe Bètsá Entšá tbojanbemá chaojésabo ora; ya chaojochñèngo ora, entsanga chama mochanjátatšèmbona. <sup>40</sup> Chora uta boyabásata jajoca bochantsemna; canýa mochanjesbetše y chë inýana ndoñe. <sup>41</sup> Uta shembásata bochantsejanýcoye; canýa mochanjesbetše y chë inýana ndoñe.

<sup>42</sup> “Chiyeca cuedado šmochtsebomna y yejuana šmochtsantješna, er ndoñe quešmátstatšèmbó ndayté tšèngaftangbe Utabná yochjésaboma. <sup>43</sup> Pero quem soye tšabá chachmèsertá: Chë yebnentša nduiño, ntseco ora ibeta atbèbaná yochjabama tojtsetatšèmbèse, cha nantsefšna y ndocnábioye buanjaleséncia jushañe chaotsendbemama tsoye jtsamashènguama y jtsatbèbama. <sup>44</sup> Chiyeca, tšèngaftàngnaca šmochtseprontana, er Bèngbe Bètsá Entšá tbojanbemá echanjésabo, entsanga chama tondaye chamontsejuabná ora ca” —Jesús tojánayana.

*Chë tšabe oservená y chë ndoñe tšabe oservená*

*(Lc 12.41-48)*

<sup>45</sup> “¿Nda yomna chë oservená ntšamo chë nduiño tojtsebošcá amá y nyets juábnaca amá? Cha jtsemnana nda chë nduiño bochjèftsebošhona chë yebnentšènga chaotsanýenama y jasama tojtsemna ora chaújuatšema. <sup>46</sup> Chë nduiño tojtashjango ora, chë oservenábioye tbojinýena ntšamo ibomncá jtsamése, chë oservená puerte oyejuayá echántsemna. <sup>47</sup> Ndegombre cbéyana, chë nduiño chábioye bochanjaimpáda lempe chabe

soyënga chabotsinýeñama. <sup>48</sup> Pero chë oservená bacna entśá tomñesna, jajuaboyana chë nduiño ndoñe betscó yochantabo ca, <sup>49</sup> y as, cha jontśana chë inýe oservénënga jtsajantśetayana, becá jtsesana y jtsetmuana inýe tēmiëngaftaca. <sup>50</sup> Y chabe nduiño jtsahjanguama ndoñe tontsejuabná te y ndoñe tontsetátśēmbo ora, cha echántashjango. <sup>51</sup> Chora chë nduiño jabuache bochantsecastíga, y ntśamo chë bacna entśanga ndayá ndegombre tmojuabnacá ndinýinýayënga jasúfriama entsamncá, cha echanjasúfria. Chora cha puerte echanjenóbośachna y chë tsetśanama juatsašënga echantsenoftěšojnaye ca” — Jesús tojánayana.

## 25

### *Chë bnětsana tobiašëngbiama cuento*

<sup>1</sup> Měntśanaca Jesús tojánayana: “Chë te chaojóshjango ora, Bëngbe Bětsabe amëndayana echántsemna mo ntśamo canýe casamento fiestentśe tojanopasacá. Měntśá yojópása: Bnětsana tobiašënga chëngbe querosine uajuinýaněshangá imojětsájaca y imojábocana chë casamento boyabása jajénguama. <sup>2</sup> Chë bnětsana tobiašënguentśana, shachnënga sempre enójuabnayënga innamna, y chë inýe shachnënga, ndenójuabnayënga. <sup>3</sup> Chë ndenójuabnayënga chëngbe uajuinýaněshangá imojětsájaca, pero querosine ndoñe imonjuabuyamba chë uajuinýaněshangañe cachiñe jtaftsuámama. <sup>4</sup> Pero chë sempre enójuabnayënga chëngbe uajuinýaněshangá imojětsájaca y querosinënaca botellěšënguiñe imojuabuyamba. <sup>5</sup> Chë casamento boyabásana ndoñe betscó yonjabo, chíyeca nyětsca tobiašënga ocnayana yojubuaache y imojtsomaná. <sup>6</sup> Mo tsěntseto orna, chënga imojouena mēntśá uayebuáchana: ‘¡Chë casamento boyabása ya endabó! ¡Jajénguama móbocana ca!’ <sup>7</sup> Asna, nyětsca tobiašënga imojotsbaná y imojontśa chë uajuinýaněshangá juabopróntana. <sup>8</sup> Chorna, chë shachna ndenójuabnaye tobiašënga chë inýe shachnënga siempre enójuabnayëngbiyoe imojáuyana: ‘Diosmanda tsěngaftange querosinentśana baseytema śměbuatśatá, bēngbe uajuinýaněshangá tojontśé jtsafsanana ca.’ <sup>9</sup> Pero chë sempre enójuabnayënga imojayana: ‘Ndoñe. Tchojubuatśatase, tsěngaftangbiama y bēngbiámna querosine echántashe. Más tsábá entsemna, chë querosine mondbětsenoye chaśma y tsěngaftangbiama chaśmauábuamiñe ca.’

<sup>10</sup> “Chorna, chë shachna ndenójuabnaye tobiašënga imojá chë querosine jauabuámiyama; pero chěntscuana chë casamento boyabása yojáshjango y chë sempre enójuabnayënga cháftaca chë casamento fiestoye imojámashjna, y chentśa bēsása imojtatame. <sup>11</sup> Chentśana chë inýe tobiašënga imojáshjajna y mēntśá imojtsichamo: ‘¡Taita, Taita, śmēbētafjo ca!’ <sup>12</sup> Pero chë casamento boyabása yojójua: ‘Ndegombre chēyana, tsěngaftanga ndoñe quechatēbuatma ca.’

<sup>13</sup> “Cachcá echántsemna Bëngbe Bětsá Entśá tbojanbemá chaojésabo ora; chíyeca śmochtseprontana, tsěngaftanga ndoñe queśmátstatśēmbo ndayté, ni mocna ora chca yochjópásama ca” — Jesús tojánayana.

### *Chë crocénanama cuento*

#### *(Lc 19.11-27)*

<sup>14</sup> “Bëngbe Bětsabe amëndayana endmēna mo ntśamo canýe boyabásaftaca tojanopasacá. Cha ibojtsemna inýe luaroye jtoñama; as chabe oservénënga yojáchembo y yojaimpádaye chabe crocénana chamotsinýenama. <sup>15</sup> Cányabioye ibojántśabuachiye shachna uaranga crocénana, inýabioyna uta uaranga y inýabioyna canýe uaranga. Chca yojamna ntśamo cada ona ibojobiashjachcá. Y as chë boyabása yojtsoñe. <sup>16</sup> Cachora chë shachna uaranga yojoyëngacñá yojá trato jabemama, y chca, inýe shachna uaranga crocénana yojábotiye. <sup>17</sup> Chë uta uaranga yojoyëngacñá cachcá yojama y inýe uta uaranga yojábotiye. <sup>18</sup> Pero chë canýe uaranga yojoyëngacñana, yojá, fshantsiñe yojajutjo y chabe mandayabe crocénana chentśe yojtseitēme.

<sup>19</sup> “Chentśana baytese chë oservénëngbe amëndayá yojtashjango y yojóntśa chë crocénanama chënga jatjayana. <sup>20</sup> Natsana yojáshjango chë shachna uaranga yojoyëngacñá y chabe mandayábioye inýe shachna uaranga crocénana ibojántśabuachiye y mēntśá ibojauyana: ‘Taita, aca shachna uaranga śconjanoyé y muentśe entsemna inýe shachna uaranga sēnjaboté ca.’ <sup>21</sup> As chë mandayá ibojauyana: ‘Tśa tsábá, tsabe oservená y ntśamo tsboścá amá. Aca quem base soyiñe lempe ntśamo tchojamandacá tcojámayeca, atśe cbochanjaimpáda más bētscá chaścotsinýeñama. Mamáshëngo y átśeftaca cochjóyejuaye ca.’ <sup>22</sup> Chentśana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga śconjanoyé y muentśe entsemna inýe uta uaranga sēnjaboté ca.’ <sup>23</sup> As chë mandayá ibojauyana: ‘Tśa tsábá, tsabe oservená y ntśamo tsboścá amá. Aca quem base soyiñe lempe ntśamo tchojamandacá tcojámayeca, atśe cbochanjaimpáda más bētscá chaścotsinýeñama. Mamáshëngo y átśeftaca cochjóyejuaye ca.’

<sup>24</sup> “Pero chë canÿe uaranga yojoyëngacñe oservená yojáshjango orna, chabe mandayábioye ibojauyana: ‘Taita, atse sëndétatšëmbo aca canÿe tsátjaye entsá comnama; acna chë ndoñe tconjajé chentše saná jocñana y chë ndoñe tconjujquëshe luarentše jobuátbanana. <sup>25</sup> Chama atse uatjana šjuábuache, chíyeca atše sënjá y fshantsiñe chë crocénana sënjetsëitëme. Pero muentše acbe crocénana entsatsmëna ca.’ <sup>26</sup> As chë mandayá ibojouá: ‘¡Bacna oservená y oyëñjayá! Chë ndayentše ndoñe tijajé chentše saná jocñana y chë ndoñe tiju-jquëshe luarentše jobuátbanana atše tsuamanama icojátatšëmbëse, <sup>27</sup> aca cmonjamna atšbe crocénana bancoca jetsobuájua y atše matijtabo ora, atšbe crocénana matijtoyëngacñe y chë chentšana tojoboté crocénanënaca ca.’ <sup>28</sup> Y as yojamënda: ‘Chë uaranga motseboca y chë bnëtsana uaranga entsebomnábioye chana motsatšëtá ca. <sup>29</sup> Er nda tojtsebomnábioye, más jatšetayana, y chca cha corente bëtscá jtsebomnana; pero tondaye tondbomnábioyna, chë batšatema tobomna sóynaca jtsebocana ca.’

<sup>30</sup> “Y chora cha yojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chë tšetšanama juatsašënga echantsenoftéšjojnaye ca’ ” — Jesús tojanëyana.

*Ntsamo chë quem luare jopochócama ora, nyëtsca entsangbiana mochjayana*

<sup>31</sup> Mëntšánaca Jesús tojánayana: “Chë Bëngbe Bëtsá Entšá tbojanbemá chabe obenánaca, buashinÿinÿaniñe y nyëtsca chabe angelotémëngaftaca chaojésabo ora, chë reybiama puerte buashinÿinÿana themaniñe echanjót'bema. <sup>32</sup> Chora nyëts luarëngoca entsanga chabe natsanoica mochanjénefna, y cha, entsanguentsana inÿenga echanjábacacaye, mo chë oveshënga abuajëñyá oveshënga chivëngbentsana endetsabacacnaycá. <sup>33</sup> Chë abuajëñyana, oveshënga chabe catšbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catšbioica echanjúbuaja y chë bacna entsangna chabe uañicuayoica echanjásaye.

<sup>34</sup> “Chorna chë Rey, Bëngbe Utabná, chabe catšbioica chamojtsemna entsanga echanjúyana: ‘Tšëngaftanga, Atšbe Taitá tsábeñe cmëtabna, mabënga ca; atšbe amëndaye luare mo tšëngaftangbiana otocana soycá mosháchiñënga; tšëngaftangbiana endëprontana, Bëngbe Bëtsá quem luare tonjanma orscana. <sup>35</sup> Er atše šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafšé; inÿe luarocana ashjangonacá sënjánana y posada šmonjanántšame. <sup>36</sup> Enašá sënjánana y entsáyá šmonjanëtšëtá jtichëtjuama; šocá sënjanjájona y šmonjanatsëtsaye; cárceloca sënjanëtámena y jabëuatsëtsayama šmonjánabo ca.’

<sup>37</sup> “As chë Bëngbe Bëtsá chabe bominÿiñe tsábenga tojábiamënga mochanjatjaye: ‘Bëngbe Utabná, ¿ntseco shëntseca tcbëñjáninÿe y tcbëñjanajuatšé? ¿Ntseco uajuendayá tcbëñjáninÿe y tcbëñjanafšé? <sup>38</sup> ¿O ntseco inÿe luarocana ashjangonacá tcbëñjáninÿe y posada tcbëñjanántšame, o enašá y entsáyá jtichëtjuama tcbëñjanëtšëtá? <sup>39</sup> ¿O ntseco šocá o cárceloca utamená tcbëñjáninÿe y jauatsëtsayama tifjána ca?’

<sup>40</sup> “As chë Utabná echanjóua: ‘Ndegombre cbëyana, lempe ntšamo chë atšbe catšátanguentsana chë más batšá uámanëngaftaca šmojamcá, cach átšëftaca šmonjanma ca.’

<sup>41</sup> “Chentsana chë Utabná chabe uañicuayoica chamojtsemna entsanga echanjúyana: ‘Atšbentsana mojuánanga atšbe Bëtsabe uabotënënga. Infiernoye motsajna, chë ndocna te queochátsfana inëshoye; choca endëprontana Satanás y chabe ustonëngbiana. <sup>42</sup> Er atše shëntseca sënjánana y tšëngaftanga saná ndoñe chešmatancaredadó; šonjanajuendá y ndoñe chešmatanafšé; <sup>43</sup> inÿe luarocana ashjangonacá sënjánana y ndoñe posada chešmatanántšame. Enašá sënjánana y ndoñe entsáyá chešmatanëtšëtá; šocá sënjanjájona y cárceloca sënjanëtámena y ndoñe chešmatanatsëtsá ca.’

<sup>44</sup> “As chënga mochanjatjaye: ‘Bëngbe Utabná, ¿ntseco tcbëñjáninÿe shëntseca o uajuendayá, o inÿe luarocana ashjangonacá, o enašá, o šocá o cárceloca utamená y ndoñe tcbëñjanajabuache ca?’

<sup>45</sup> “Y chë Utabná echanjóua: ‘Ndegombre cbëyana, tšëngaftanga ntšamo chë atšbe catšátanguentsana chë más batšá uámanëngaftaca, ndoñe šmonjanmcá, átšëftaca cach ndoñe chešmátanma ca.’

<sup>46</sup> “Chëngna infiernoye nyëtsca tescama mochantsësetjango, y chë Bëngbe Bëtsá chabe bominÿiñe tsábenga tojábiamëngna chë nyëtsca tescama yomna tsábe vida mochántsebomna ca” — Jesús tojánayana.

## 26

*Entšanga tmojanjuabó ntšamo jamëse Jesús jishachama  
(Mc 14.1-2; Lc 22.1-2; Jn 11.45-53)*

<sup>1</sup> Lempe chca tojánayantšana, Jesús chabe uatsjédayénga tojanéyana: <sup>2</sup> “Tšéngaftanga šmondétatsémo, uta te y ché Bashco fiesta echántsemna y Bèngbe Bètsá Entšá tbojanberná inýengbe cucuatšíne mochanjáboshjona chamocrucificama ca.” Ché fiesta inamna jtenójuaboyama Bèngbe Bètsá ché judiéngbe bèts taitanga Egiptocana tojánatsebacama.

<sup>3</sup> Chéntscuana, ché bachnangbe améndayénga y ché judiéngbeñe bètsèjeméngcá mándayénga tmojánenefjna, Caifás, ché bachnangbe más uamana améndayabe bèts yebnentše.

<sup>4</sup> Tmojanenójuabó y tmojanenoyeuná jtseíngñase Jesús jishachama, y jtsóbama. <sup>5</sup> Pero imojtsichamo: “Quem fiesténtscuana ndoñe, entsanga yapa muanjontša enbouenanana ca.”

*Canýe shembása botamana uanguètše bėjaye Jesusbe bestšašíne tbojanbuešcja*  
(Mc 14.3-9; Jn 12.1-8)

<sup>6</sup> Jesús Betania pueblentše yojtsemna, Simón ché bacna nguayanánaca šocá ca uabobuatmabe yebnentše. <sup>7</sup> Chéntscuana canýe shembása Jesúsbióye tojanabeoná. Ché shembásana tojanamba canýe alabastro jarrètema, jútjena canýe puerte uamana botamana uanguètše bėjayeca. Jesús mesèshentše yojtsemnéntscuana, ché shembása chabe bestšašíne ché botamana uanguètše bėjaye tbojanbuešcja.

<sup>8</sup> Ché uatsjédayénga chca tmojáninýe orna, tmojanotjayaná y tmojanontšé ichámuana: —¿Ndáyeca nýe bonamente ché soye chca yojtsemna ca? <sup>9</sup> Chamna, matmènjjobenanga ché bėjaye becá crocenánama juiyana y chánaca ndbomnjéménga matmènjjúbuache ca.

<sup>10</sup> Jesús ché soye tojanuena; as tojanéyana: —¿Ndáyeca ndoñe cachcá quem shembása šmochanjonýaye ca? Ntšamo tonjamcá tšabá entsemna. <sup>11</sup> Er ché ndbomnjéméngna nýets tempo tšéngaftangbeñe mochanjéftsemna, pero atše tšéngaftangftaca ndoñe nýets tempo quichásemna. <sup>12</sup> Ntšamo ché shembása tojamcá, ché botamana uanguètše bėjaye atšbe cuerpiñe jabuéšcýe, cha šontseprónta atše juatbontsa tescama. <sup>13</sup> Ndegombre cbéyana, quem luariñe ndayéntšnaca Bèngbe Bètsabe soyéngama chamojtsabuayiná chentše, ntšamo quem shembása tojamámna becá mochanjéftsoyebuambaye, chca, entsanga chabiana chamotsenójuabna ca —Jesús tojanéyana.

*Judas tojána bachnangbe améndayéngbióye, Jesús chamuishachama*  
(Mc 14.10-11; Lc 22.3-6)

<sup>14</sup> Canýa ché bnétsana uta uatsjédayénguentšá, Judas Iscariote ca uabainá, tojána bachnangbe améndayéngftaca jencuéntama. <sup>15</sup> Y tojanatjá: “¿Ntsachetšá šmatjtabuénaye y Jesús tšéngaftangbe cucuatšíne chochjayentšbashejuana ca?”

As chéngna, unga bnétsana ralbenga tmojtanabuená. <sup>16</sup> Y cach orscana Judas yojtsenguaye ntšámose y ntseco ora, Jesús chéngbe cucuatšíne jayentšbáshejuanama.

*Jesús chabe uatsjédayéngftaca Bashco saná tojanse*  
(Mc 14.12-25; Lc 22.7-23; Jn 13.21-30; 1 Co 11.23-26)

<sup>17</sup> Ché Bashco fiesta bojatšenté, ché levadúraca ndépormana tandése jasama fiesténtscuana, ché uatsjédayénga Jesúsbióye tmojanobeoná y tmojantjá: —¿Ndémoca aca cojtseboše bènga fchaiprontama Bashco saná chacosama ca?

<sup>18</sup> Y Jesús tojanéyana: —Ché bèts pueblóye motsajna canýe bacobe yebnoye y cha šmochjauyana: “Buatèmbayá tonjayana: ‘Atšbe ora ya echanjobuache, y atše acbe yebnoye séntšá, Bashco fiesta jamama atšbe uatsjédayéngftaca ca.’”

<sup>19</sup> As ché uatsjédayénga tmojanma ntšamo Jesús tojanaméndacá y ché Bashco fiesta saná tmojanprontá.

<sup>20</sup> Y tojanibétata orna, Jesús ché bnétsana uta uatsjédayéngftaca mesèshentše yojtsemna. <sup>21</sup> Y imojtsesantscuana, Jesús tojanéyana: —Ndegombre cbéyana, canýa tšéngaftanguentšá uayayéngbe cucuatšíne šochanjáboshjona ca.

<sup>22</sup> Chora ché uatsjédayénga puerte ngmènaca imojtsenaya y tmojanontšé canýánýa Jesús jatjayama: —Bèngbe Utabná, ¿nderado atše cha chtsemna ca?

<sup>23</sup> As Jesús tojanéjua: —Canýa nda chabe tandése entsefchecuacná cach atše séntsefchecuacná šcnenentše, cha uayayéngbe cucuatšíne šochanjáboshjona. <sup>24</sup> Ndegombre, Bèngbe Bètsá Entšá tbojanbernáftaca echanjópasa ntšamo Bèngbe Bètsabe uabemana palabrènguiñe chabiana iuayancá; pero, itša lastema ché bochjáboshjonabiana! Más tšabá chabiana manjamna ndoñe ntjónýnana ca.

<sup>25</sup> As Judas, ché boshjuaná, Jesúsbióye tbojantjá: —Buatèmbayá, ¿nderado atše chtsemna ca?

Y Jesús tbojanjuá: —Ndegombre tcjayana ca.

<sup>26</sup> Imojtsesantscuana, Jesús tandése tojanca, Bèngbe Bètsábióye chama tbojtanchuá, tojanjatá y ché uatsjédayénga tojanatšatá. Y méntšá tojánayana: “Mocñénga, mosénga. Atšbe cuerpo entsemna ca.”

<sup>27</sup> Chentshana, canye coptema vínoyeca tojanaca, Bèngbe Bètsábioye tbojtanchua y chë uatsjéndayënga tojanëfsasë. Y mëntšá tojánayana: “Nýetscanga quem coptémentšana mofšenga. <sup>28</sup> Quem vínoye atšbe buiñe entsemna. Atšbe buiñe echanjuábuashana entsanga chamotsetatšëmbuama ntšamo Bèngbe Bètsá entsanga tojanašebuachenacá añe yochjochñënguama. Chë buiñe bëtscá entsangbiana echanjuábuashana, chëngbe bacna soyëngama perdonänënga chamotsemnana. <sup>29</sup> Y ndegombre cbëyana, morscana atše ya ndoñe más chë uvasentsana obocniye quichaisofsiye. Chë tsëm vínoye tšëngaftangaftaca chanjofsiye, atšbe Taitabe amëndayoca chamojtsemna ora ca” —Jesús tojánayana.

*Jesús tojánayana, chábioye ndoñe bonjanabuátma ca Pedro yochjánayana*  
(Mc 14.26-31; Lc 22.31-34; Jn 13.36-38)

<sup>30</sup> Bèngbe Bètsá jëtschuayama tmojancantá chentshana, Olivos tjšahoye tmojëftsanbocana. <sup>31</sup> Choca Jesús tojánayana: —Tšëngaftanga nýetscanga quem ibeta átšbeñe ošbuáchiyana šmochantsobuetše y šmochántšacheta, er Bèngbe Bètsabe uabemana palabreñguñe, cha mëntšá tojánayana: “Chë oveshëngbe abujénýa chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora. <sup>32</sup> Pero obanënguentsana chaitayenentsana, tšëngaftangbe natsana Galileoye chanjá ca —cha tojanëyana.

<sup>33</sup> Chora Pedro tbojanjuá: —Masque nýetscanga áceñe ošbuáchiyana chamotsobuetše y chamotsacheta, ntšamo ácaftaca yochjopása causa, atše ndocna te ca.

<sup>34</sup> As Jesús tbojanayana: —Ndegombre cbëyana, cam ibeta, ngallo cabá ndëcánta ora, aca unga soye cochanayana ndoñe sconduabuatma ca.

<sup>35</sup> Pero Pedro tbojanayana: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nýetsca uatsjéndayëngnaca cachcá imojtsichamo.

*Getsemaní luarentše Jesús Bèngbe Bètsáftaca tbojanencuentá*  
(Mc 14.32-42; Lc 22.39-46)

<sup>36</sup> Chentshana, Jesús chabe uatsjéndayëngaftaca canye luare Getsemaní ca uabáinoye tojána. Choca tojanëyana: “Muentše motbiana, chëntscauna atše choye chanjá Bèngbe Bètsáftaca jencuëntama ca.”

<sup>37</sup> Y Pedro y chë Zebedeobe uta uaquñata tojëftsanëbiatše. Choca yojóntša puerte ngménaca y corente cochtsetšenaná jtsemnana. <sup>38</sup> Jesús tojanëyana: “Atšbe ainana puerte ngménaca entsemna, mo jobanamcá. Muentše moquedanga y átšeftaca šmochtsefšna ca.”

<sup>39</sup> Chora Jesús más natsanoye tojána, tojanoshamentšé y fshantsóntscoca yojotsejbéna, y mëntšá Bèngbe Bètsáftaca tbojanencuentá: “Atšbe Taitá, jopódianëse moma atše japadésama ndoñe chašondëtsemnana. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

<sup>40</sup> Chentshana, Jesús chabe unga uatsjéndayëngbiyoye tojtanabo y chëngna innétsomañe. Chca tojánanýena ora, Pédrëbioye tbojanayana: “¿Ni mo canye horatema tšëngaftanga šmonjobená átšeftaca jtsefnana ca? <sup>41</sup> Smochtsefšna y Bèngbe Bètsáftaca šmochtseñtaye, chca, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bèngbe Bètsá joyeunayama, pero cuerpiñe añemo ndoñe quešmátsbomna ca” —Jesús tojanëyana.

<sup>42</sup> Uta soyama tojtesaná y mëntšá Bèngbe Bètsáftaca tbojanencuentá: “Atšbe Taitá, atše japadésama ndoñe chašondëtsemnana jamama ndoñe jopódianëna, nýe ntšamo aca cojtsebošcá chaotsemna ca.”

<sup>43</sup> Y tojtanabo ora, chë uatsjéndayënga cachiñe innétsomañe; yapa ocnye causa nýe imojtsefshëtana. <sup>44</sup> As Jesús cachcá yojëftsëñyaye, y ungama cachiñe tojtesaná Bèngbe Bètsáftaca jencuëntama, y cach palabreñga tojánayana.

<sup>45</sup> Chora chë uatsjéndayëngbiyoye tojtanabo y tojanëyana: “¿Cabá šmotsomañe y šmotsochnañe ca? Ya ora tojjobuache, Bèngbe Bètsá Entšá tbojanbemá bacna soye amëngbe cucuatšine mochanjáboshjona. <sup>46</sup> Motsbananga, cuajna. Minýënga, chë boshjuaná ya entsebecóna ca.”

*Uayayënga Jesús tmojánishache*  
(Mc 14.43-50; Lc 22.47-53; Jn 18.2-11)

<sup>47</sup> Jesús cabá yojtsóyebuambnantscauna, Judas, canye chë bnétsana uta uatsjéndayënguentsá, tojánashjango, y cháftaca imojtsemna ba entsanga espadëjangaca y ngarotbëngaca prontänënga. Chënga imojamna chë bachnangbe amëndayënga y chë judiëngbeñe bëtšëjemëngcá amëndayëngbe ichmónënga. <sup>48</sup> Judas, chë boshjuaná, tojanjuabó ntšamo jamana entsanga jinýanýiyama ndëmua Jesús bëtsemnana. Chiyeca

yojáuyana: “Nda chajiauámocho, cha echántsemna. Smochjishache ca.” <sup>49</sup> Cachora Judas Jesúsbiroye tojanobeconá y tbojanchuá: —Buajtana, Buatëmbayá ca.

Y tbojtanámocho.

<sup>50</sup> Jesús tbojaniyana: —Enutá, moma chë ndayá jabomama tcojabo ca.

Chorna, chë entsanga tmojanobeconá, Jesús tmojánishache y tmojanánatse.

<sup>51</sup> Chca orna, canýe enutá Jesúseftaca yojtsemná, chabe espadëja tojanenosëngbotëntëna, y chë bachnangbe más uámana amëndayabe oservenábiroye canýe matscuaše tbojtsanëstjango.

<sup>52</sup> As Jesús tbojaniyana: “Espadëja matosëngbuajonýá. Nda espadëjaca tbojóba chana, cach espadëjaca echanjóbana. <sup>53</sup> ¿Aca ndoñe condëtatšëmbo, atše atšbe Taitábiroye stjaimpádase, cha cachora atšbiana nanjichamuá bnëtsana utama más ejércitënga angelotëmëngaca? <sup>54</sup> Pero chcasna, ¿ndayá Bëngbe Bëtsabe uabemana palabrënguifë endayanácá ntšamo nanjochnëngo? Chiñe endayana ntšamo entsopasancá jochnënguama canmëna ca.”

<sup>55</sup> Cachora Jesús entsanga tojanatjá: “¿Ndáyeca šmojabo espadëjagaca y ngarotbëngaca atše jishachama, mo atše canýe bacá uamana entšá cuaftsemncá ca? Atše cada te Bëngbe Bëtsabe bëts yebnoca tsëngaftangafaca sënjántbemana abuátambaye, y choca ndoñe chešmánishache. <sup>56</sup> Pero lempe quem soyënga chca entsopasana, cachcá chaotsemnana ntšamo Bëngbe Bëtsabe uabemana palabrënguifë chë Bëngbe Bëtsabe juabna oyebuambnáyënga tmojanayancá ca” —Jesús tojánayana.

Cachora nýetsca uatsjëndayënga tmojtsanëuatjaná y tmojtsanacheta, y Jesús chë uayayëngafaca cachcá tmojesanonýá.

*Jesús tmojanánatse chë judiëngbe más uámana amëndayëngbiroye (Mc 14.53-65; Lc 22.54-55, 63-71; Jn 18.12-14, 19-24)*

<sup>57</sup> Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentše chë ley abuátambayënga y chë judiëngbeñe bëtsëjemëngcá amëndayënga tmojánenefña. <sup>58</sup> Pedro bënocana Jesús tbojanasto, chë bachnangbe más uámana amëndayabe chashjöntsoñe; choye tojánamashëngo y chë Bëngbe Bëtsabe bëts yebnoca josticëngafaca yojótbema, chca, jtsetatšëmbuama ntšamo yochjopásama.

<sup>59</sup> Chë bachnangbe amëndayënga, chë bëtsëjemëngcá amëndayënga y ínýënga judiëngbe amëndayënga imojtsenguaye ndánaca masque uayátšenaye soye Jesusbe contra cháuyanama, as chënga jobenayama cha chaóbana ca jayanama, <sup>60</sup> pero ndoñe tmonjáninýëna, masque banga tmojánashajna Jesusbe contra uayátšenaye soyënga jayanama. Cabana, útata tbojánashjango, <sup>61</sup> y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajchcana y nýe unga tese jtëtsjebuana ca.”

<sup>62</sup> As chë bachnangbe más uámana amëndayá tojantsá y Jesúsbiroye tbojantjá: —¿Ndocá cochanjayana? ¿Ndáyase yojtsemna chë acbe contra montsichamo soye ca?

<sup>63</sup> Pero Jesús nýe iytëca yojtsemna. Chíyeca chë bachnangbe más uámana amëndayá tbojaniyana: —Bëngbe Bëtsá Ainabe mándoca chomandá chašcuyana aca ndegombre chë Cristo, chë Bëngbe Bëtsabe Uaquiná comna o ndoñe ca.

<sup>64</sup> Chora Jesús tbojanjuá: —Aca ndegombre yomncá tejayana. Y quem sóynaca cbëyana: Tsëngaftanga šmochanjinýe, atše, Bëngbe Bëtsá Entšá tbojanbemá, chë nýets obenana bomnabe catsbíoica jtsetbemanana y celoca jantšëtëshiñe jtsaboyana ca.

<sup>65</sup> Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte jbojtsetna causa, y tojánayana: —¿Ntšamo quem boyabása tonjoyebuambacá, Bëngbe Bëtsabiama entsemna mo cha cuafjoyenguangcá, chë chabe Uaquiná yomna ca cha tonjayana ora! ¿Ndáyama más entsanga šochjátëjajaboto Jesusbe contra chamuayanama? <sup>66</sup> ¿Ntšamo šmatjayana ca? —cha tojanatjá.

As chë entsanga tmojanjuá: —Ndegombre cha bëts bacna soye entsebomna; jóbanama bontsemna ca.

<sup>67</sup> Chora tmojanontšë Jesús juebëbuashëtjnyana, jabuache jantšëtayana y ínýënga imojtsejuëbjantšëta, <sup>68</sup> y imojtsatsëtsnaye: “Cristo, aca ndegombre Bëngbe Bëtsabe juabna oyebuambnáyá tcomnëse, ¡momalisiá nda tcmënjajantšëta ca!”

*Pedro tojánayana Jesúsbiroye ndoñe bonjanabuátma ca (Mc 14.66-72; Lc 22.55-62; Jn 18.16-18, 25-27)*

<sup>69</sup> Chëntscuana Pédrëna šhjoca yojtsemna, chashjoca yojtsetbemana. Chora, canýe shembása chentšá oservená tbojanobeconá y tbojaniyana: —Acnaca, Jesús chë Galileocáftaca conjánana ca.

<sup>70</sup> Pero Pédrëna, nýetscangbe delante tojánayana chábiroye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnátësertana ca.

<sup>71</sup> Chora Pedro bëšoye yojábocna. Chentšna, inýe shembása oservená chábiroye tbojáninýe y chë inýe entsanga tojanýëna: —Cha, Jesús chë Nazaretocáftaca enjánana ca.



<sup>72</sup> Pedro cachiñe tojánayana ndoñe bonjanabuátma ca, y mëntśá yojtsejúraye: —¡Chê boyabása ndoñe quetsatabuatma ca!

<sup>73</sup> Chentsana, chë chentse imojtsemnënga Pédrëbioye tmojanobconá y tmojanianyana: — Ndegombre, ácnaca chë uatsjendayënguentsá condmëna. Chë contsoyebuambnacá contsoyátëmbana ca.

<sup>74</sup> Chora Pedro tojanontśé ichámuana, Bëngbe Bëtsá chašotsecastigá ndoñe ndegombre soye stsihámëse ca; yojtsejúraye y yojtsichamo: —¡Chê boyabása ndoñe quetsatabuatma ca!

Y cachora canye ngallo yojacánta. <sup>75</sup> Y Pedro yojenójuaboye ntśamo Jesús tbojanianama. Cha mëntśá tbojanianyana: “Cabá ngallo ndécánta ora, aca unga soye cochanjayana ndoñe šconduabatma ca.” Y chentsana tojésanbocna y corente ngmënaca yojtsenóbošachna.

## 27

*Jesús, Pilátbioye tmojanánatse*  
(Mc 15.1; Lc 23.1; Jn 18.28-32)

<sup>1</sup> Tojanbinýna ora, nyetsca chë bachnangbe amëndayënga y judiëngbeñe bëtsëjemëngcá amëndayënga tmojanenefina jenóyeunayama ntśamo jamëse Jesús chaóbanama. <sup>2</sup> As, Jesús tmojanëcuébatšëca y tmojanánatse, y chca, Pilato, chë Judeoca Romano mandadbe cucuatšëne tmojánboshjona.

*Ntśamo Judas tojanóbana*

<sup>3</sup> Judas, chë boshjuaná, Jesús jóbanama ibojtsemnana tojanuena ora, puerte yojtseñocochinýena ntśamo tojáchjanguama, y chë unga bnëtsana ralbenga chë bachnangbe amëndayënga y bëtsëjemëngbiye tojtanamba, <sup>4</sup> y mëntśá tojanëyana: —Puerte bacna soye tijama. Atše canye bacna soye ndbomná tšëngaftangbe cucuatšëne tijáboshjona chaóbanama ca.

Pero chënga tmojanjúá: —¿Chê soye ndayá bëngbiama? Cach aca cochátotatšëmbñe ca.

<sup>5</sup> As Judas chë ralbenga Bëngbe Bëtsabe bëts yebnentše yojesëtsana, y yojá y yojëtsentšëyaye.

<sup>6</sup> Chë bachnangbe amëndayëngna chë ralbenga tmojtanatbaná y tmojánayana: — Quem crocenánama buiñe echanjuábuashana; ntśamo leyiñe endayancá, bënga ndoñe quemuátobena chë Bëngbe Bëtsabiana soyënga quëcjinayëtëmiñe chana jasegórana ca.

<sup>7</sup> Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámíyana, y chca, canye luare jtsebomnana ndayentše chë inye luarëngocana entšanga áshjajnënga jutabuantsama. <sup>8</sup> Chýeca, chë fshantse mëntscóñama Buiñe Luare ca uabaina. <sup>9</sup> Chca, tojanochnëngo ntśamo Jeremías, chë Bëngbe Bëtsabe juabna oye-buambnayá, tempśá tojanayancá, ndayá yochjanchnënguama. Chana mëntśá tojánayana: “Y chë unga bnëtsana ralbenga tmonjanca, ntsachetśá chë Israeloca entšanga cha tmojanamananacá, <sup>10</sup> y chánaca chë Alfarerbe Luare tmonjanbuamé, ntśamo Bëngbe Bëtsá šonjanmandacá ca.”

*Jesús Pilatbe delante*  
(Mc 15.2-5; Lc 23.2-5; Jn 18.33-38)

<sup>11</sup> Chentsana Jesús, chë mandado Pilátbioye tmojanánatse y cha mëntśá tbojantjá: —¿Aca chë judiëngbe rey cojtsemna ca?

Y Jesús tbojanjúá: —Aíñe, aca ndegombre yomncá tcjayana ca.

<sup>12</sup> Chë bachnangbe amëndayënga y chë bëtsëjemënga Jesús mal imojtsequédantscuana, cha ndocá ntjojuana. <sup>13</sup> Chýeca Pilato tbojantjá: —¿Ndoñe contsuenana lempe ntśamo acbe contra montsihamcá ca?

<sup>14</sup> Pero Jesús ni canye palabra ndoñe ntjojuana. Chë causa, chë mandado ndoñe yontsetátšëmbo ntśamo jajuaboyana.

*Jesús chaóbanaca tmojánayana*  
(Mc 15.6-20; Lc 23.13-25; Jn 18.38-19.16)

<sup>15</sup> Bashco fiesta ora, chë mandado yojanamana canye utamená jëtsboshjonana, nda entšanga tmojuabuayaná. <sup>16</sup> Chë tempo canye uachuana utamená inamna, Jesús Barrabás ca uabainá. <sup>17</sup> Nyetsca entšanga chentše imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabobuatma ca?”

<sup>18</sup> Er chë mandado yojtsetátšëmbo, entšangna envidia causa Jesús chabe cucuatšëne tmojánboshjonama.

<sup>19</sup> Pilato chë tribunal ca uabáinentse yojtsetbemanëntscuana, chabe shema canya tbojanichmó méntšá cha jauyanama: “Chë nyetsca soyënguife tšabá ama entšábioye ndocá matsborlánana; chabe causa ibeta otjénayoca puerte sënjasufri ca.”

<sup>20</sup> Pero chë bachnangbe amëndayënga y chë bëtsëjëmënga entšanga tmojanayënjána, Barrabás jëtsboshjona y Jesús chaóbona ca chamuayanama. <sup>21</sup> Chora chë mandado cachiñe tojanatjá: —¿Chë útatentšana nda šmojtseboše atše chjëtsboshjona ca?

Y chënga tmojánayana: —¡Barrabás ca!

<sup>22</sup> Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nyetscanga tmojanjuá: —¡Motsecrucificá ca!

<sup>23</sup> Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojanáyebuachena: —¡Motsecrucificá ca!

<sup>24</sup> Ndocá jamama yontsobenama y entšanga más jabuache enbouenanama tmojanontšema Pilato tojáninýe ora, cha tojanmandá býeshe juabuíyëboñana y nyetscangbe delante yojtsenacuentšabí. Méntšá tojánayana: —Atše ndocá chiyátayana, ni chiyatsma quem boyabása chaóbonama. Tšëngaftanga lempe šmonjama ca.

<sup>25</sup> Chora nyetsca entšanga tmojanjuá: —¡Quemuá yochjóbonama, bënga y bëngbe básengbiana castigo chaotsemna ca!

<sup>26</sup> As Pilato, Barrabás tbojanboshjona; tojanmandá soldadënga Jesús jabuache chamotsetsetšenama y chentšana entšangbe cucuatšínë tbojánboshjona chamocrucificama.

<sup>27</sup> Chentšana, chë mandadbe soldadënga Jesús tmojanánatse chë mandadbe bëts yebnëntša chashjoye y choca nyetsca soldadënga chabe shëconana tmojanófoto. <sup>28</sup> Chorna, entšayá tojtsanabotsca y shbuenda uafjatsenga entšayá mo reycá tmojanichëtjo. <sup>29</sup> Canýe coronésha tmojanapormá uchmašëfjangaca y tmojanabestšajó, y catšbioica cucuatšínë canýe niñëfja. Chorna, chabe shecuaatšëntse imojtsofshëntsaméntšenaye y imojtsáboyejuana. Méntšá imojtsichamo: “¡Bayté judiëngbe Rey cochtsemna ca!”

<sup>30</sup> Chëngnaca imojtsanbuashëtjnaye y cach niñëfjaca bestšaëntse imojtsëtsjanjnaye. <sup>31</sup> Y chca imnaftsáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y chora, jacrucificama tmojanánatse.

### *Jesús tmojanrucificá*

(Mc 15.21-32; Lc 23.26-43; Jn 19.17-27)

<sup>32</sup> Chë entšanga chentšana tmojánbocana ora, tmojánenbetše canýe bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

<sup>33</sup> Canýe luare Gólgota ca uabáinoca tmojánashajna ora (hebreo biyañe chca endayana “Obanabe Bestšashe Luare ca”), <sup>34</sup> Jesúsbioye vínoye hiéloyeca enájuañiye tmojanabuiyé chaofšema; pero yojaftántia y ndoñe yonjábošena chiye jofšiyama.

<sup>35</sup> Ya tmojanrucificá orna, chë soldadënga Jesusbe entšayamna, tsbanánoye tmojanëtsena, chca, jtsetatšëmbuama ndabiama yochjanáquedama. <sup>36</sup> Y chora chënga chentše tmojanotbiama Jesús jtsebojanýama. <sup>37</sup> Y chabe bestšaše juatsboicna canýe uabemana soye tmojananjo. Chiñe yojtsayana ndáyeca cha tmojanrucificama, méntšá: MUA JESÚS ENDMËNA, CHË JUDIËNGBE REY ca.

<sup>38</sup> Utata bacna soye ochjajnayátnaca chënga chentše tmojanrucificá, canýa Jesusbe catšbioica y chë ínýana chabe uañicuayoica. <sup>39</sup> Y chëjana imojtsachñëjuana entšangna, Jesús imojtsóyenguaye, imojtsobestšfshanenaye <sup>40</sup> y imojtsatsaye: “¡Aca chë icobena Bëngbe Bëtsabe bëts yebna jtšenásatajhcana y nýe unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

<sup>41</sup> Chë bachnangbe amëndayënga, ley abuatambayënga y chë judiëngbe bëtsëjëmëngcá mándayënga cachcá imojtsóyenguaye. Méntšá imojtsichamo: <sup>42</sup> “Cha ínýenga tojéftsatsebaca, pero cachá jëtsbocama ndoñe quenátobena. Cha Israeloca entšangbe Rey tojtsemnëse, chë cruzocana chauatastjango, y chca, bënga chábeñe fchtsošbuáchiye. <sup>43</sup> Cha tojayana Bëngbe Bëtsabeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánësel, er cha tonjánayana Bëngbe Bëtsabe Uaquiñá canmëna ca” — chënga imojtsichamo.

<sup>44</sup> Y chë bacna soye ochjajnayata, Jesúseftaca ibojtsecrucificanátnaca cachcá ibojtsóyenguaye.

### *Jesús tojanóbana*

(Mc 15.33-41; Lc 23.44-49; Jn 19.28-30)

<sup>45</sup> Nyetsto orscana las tresëntsoñe, nyets quem luare yojtseibétata. <sup>46</sup> Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá scojonýá ca?”)

<sup>47</sup> Chca tmojanuena ora, báseftanga chentše imojtsemna entšanguentšana imojtsichamo: “Cha Elías, chë Bëngbe Bëtsabe juabna oyebuambnyá, bontsechembuana ca.”

<sup>48</sup> As chora, chentša canya tojéftsánótjajo canye esponjéshe janguanguama, untja vínoyeca chéshe tojanfchequacuá, canye niñéfiñe tojananguesétjo y Jesúsbioye tojanbeconá chaofsema. <sup>49</sup> Pero inyengna tmojánayana: “Cachá mochjonýaye, er Elías tayochjabo jabátsbocama ca.”

<sup>50</sup> Pero Jesús cachiñe jabuache tojanoyó y tojanóbana. <sup>51</sup> Y cachora, Bèngbe Bèngbe Bètsabe bèts yebnoca yojúonyana entséjua tséntsaca yojtsenátataye, tsbanánocana fshantsoye. Chèjua bènèjua inauamna y chè tsatséntsaca inaujonýana. Fshantse yojuangmémama, ndètsbenga yojtsashtètšana, <sup>52</sup> y chè cuevèshènga obanèngaca yojtsètèfjo y banga Bèngbe Bètsabe entsànga tmojtanyena. <sup>53</sup> Y chènga, Jesús tojtanyenentsàna, chè cuevèshènguentšana tmojánbocana, y Jerusalén, chè uamana bèts pueblo ca uabáinoye tmojánamashjna y ba entsàngbioye tmojánèbèbuacana.

<sup>54</sup> Chè soldadèngbe amèndayá y chè inyènga, Jesús jtsebojanýama cháftaca tmojanouedanga, chè fshantse yojuangmémamanama tmojáninye ora, y nyetsca chè yojtsèchnèjuana soyèngama, puerte auatjanánènga imojtsemna y tmojánayana: “¡Ndegombre quem boyabása Bèngbe Bètsabe Uaquiñá yomna ca!”

<sup>55</sup> Ba shembásèngnaca chentše imojtsemna y bènocana imojtserreparana. Chèngna, Galileocana Jesús tmojanasto y cha imojanájabuachana. <sup>56</sup> Chè shembásèngbeñe imojtsemna María Magdalena; María, Santiago y Josebe mamá; y Zebedeobe uaquiñatbe mamá.

### *Jesús tmojanatbontsá*

*(Mc 15.42-47; Lc 23.50-56; Jn 19.38-42)*

<sup>57</sup> Ya yojtseibétatana ora, canye bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. <sup>58</sup> José tojána Pilato jinýama, Jesusbe cuerpo jottañama. As Pilato tojanmandá chè cuerpo chamontšabuáchema. <sup>59</sup> José chè cuerpo tojanca y canye nduatsenga lino entséjuaca tbojanandmaná. <sup>60</sup> Y canye chabe tsèm cuevèshiñe tbojanajó. Tempo cha inamándá chè cuevèshna ndètsbènguiñe chamopormama. Canye bèts ndètsbé tojansjoná y chè cuevèshoye amashjuanentše tojánachto; y chentšana José yojtsatoñe. <sup>61</sup> Pero María Magdalena y chè inye Mariyna chentše tbojtsanoquedañe y chè cuevèshe ndirichiñe tbojanótbema.

### *Soldadènga tmojána Jesús yojtsatbontsánentše jtsebojanýama*

<sup>62</sup> Yèfsana, chè ochnayté, chè bachnangbe amèndayènga y chè fariseunga cánýiñe tmojána Pilato jinýama. <sup>63</sup> Tmojaninyana: —Taita, bènga fsèntsejuabná ntšamo chè bostero cabá ainá ora tonjánayanama, chè unga tianoye cha jtayenama ca. <sup>64</sup> Chiyeca, momandá chè cuevèshe soldadènga chamotsashanyá unga tentscuana. Chca, chabe uatsjèndayènga ndoñe ibeta chamondabo chabe cuerpo jabétsatbèbama, y chentšana chènga entsànga chamúyana, Jesús tojtayena ca. Y chca, chabiamama quem ústonoye bostero soye, chè cachabiamama tojánayana soyèngama puerte más bacá nántsemna ca —chènga tmojaninyana.

<sup>65</sup> As Pilato tojanéyana: —Tsèngaftanga cach tsèngaftangbiamama soldadènga šmondábamna. Motsajna y chè cuevèshe cuedádoca šmochtsashanyá, ntšamo šmondètatšèmbcá ca.

<sup>66</sup> Chora chènga tmojána chè cuevèshe jtsashanyama; chè ndètsbena, tsengájajaseca imojjünšanáná, ntsotatsèmbcá ndocná choye chaondámashènguama, y soldadènga chentše tmojéftsanabashejuana.

## 28

### *Jesús tojtanyena*

*(Mc 16.1-8; Lc 24.1-12; Jn 20.1-10)*

<sup>1</sup> Ochneyté chentšana, chè inye semana bojatsenté yojtsebínýana ora, María Magdalena y chè inye María tbojána cuevèshoye jarrepárama. <sup>2</sup> Ndeolpe fshantse tojanangmémama, er Bèngbe Bètsabe canye ángel celocana tojantsma, chè cuevèshoye tojanobeconá, chè atamiana ndètsbé tojtsanjuaná y chiñe tojanótbema. <sup>3</sup> Chè ángelna mo canye tcuinýèjca yojtsebuash-inýinyana, y chabe uichètjonèjuangá uafjantsèjuangá mo jantšètèshcá yojtsamna. <sup>4</sup> Chè soldadènga chca tmojáninye ora, de auatja yojtsangmèmmaye y mo obanèngcá imojtsemna.

<sup>5</sup> Chora chè ángel chè shembásatbioye tojanéyana: “Ndoñe batauatjana. Atše sèntsetatšèmo tsèngaftanga Jesús, chè tmonjanrucificá cha šmojtsenguama. <sup>6</sup> Cha muentše ndoñe quenátšmèna; cha tontayena, ntšamo cachá tonjanayanacá. Mabata y sochjinýe cha endètsesegoranentše. <sup>7</sup> Betsco motsata y chè uatsjèndayènga sochjáuyana: ‘Jesús tontayena y tsèngaftangbe natsana Galileoye echanjá; choca šmochanjinýe ca.’” Y chora cha tojánayana: “Chca šondmèna tsèngaftanga jauyanana ca.”

<sup>8</sup> Cachora chè shembásata chè cuevèshèntšana tbojésanbocna, auatjanánata pero puerte oyejuayata, y tojéftsánótjajo chè soye chè uatsjèndayèngbeñe jobuambayama. <sup>9</sup> Y ndeolpe Jesús chata tojánèbèbuacna y tojanacheuá. Chatna, chábioye tbojanobéconata, tbojanadorata y chabe shecuatsè shèconana imojtbojcuá. <sup>10</sup> Y Jesús tojanéyana: “Ndoñe

batauatjana. Motsata atšbe uatsjédayënga, atšbe catšátanga jáuyanama Galileoye chamotsá y choca atše šmochjinýe ca.”

*Ntšamo chë soldadënga tmojánayana ndayá tojanochnënguama*

<sup>11</sup> Chë shembásata ibojtsayëntscuana, básefta soldadënga chë bëts puebloye tmojána y ntšamo tojanopasacá lempe chë bachnangbe amëndayëngbeñe tmojanobuambá. <sup>12</sup> As chë bachnangbe amëndayënga, chë judiëngbeñe bëtšejemëngcá mandayëngaftaca tmojánenefna jenóyeunayama. Chëngna chë soldadëngbioye bëtšcá crocénana tmojtanatšatá, <sup>13</sup> y mëntšá tmojanabuayená: “Tšëngaftanga šmochjayana, ibeta šmotsomáñëntscuana, Jesusbe uatsjédayënga tmojabo y chabe cuerpo tmojabétsatbëba ca. <sup>14</sup> Y chë mandado chë soyama chaojátatšëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” —chënga tmojanéyana.

<sup>15</sup> As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y mëntscóñama judiënga cachcá mondbétsichamo.

*Jesús chë uatsjédayënga tojanichamó, Bëngbe Bëtsabe soyëngama nyëtsquénache jábuayenama (Mc 16.14-18; Lc 24.36-49; Jn 20.19-23)*

<sup>16</sup> Chentšana, chë bnëtsana canýe uatsjédayënga Galileoye tmojána, chë ndëmua tjoye Jesús chënga tojanabuayená choye. <sup>17</sup> Y Jesús tmojáninýe ora, tmojtanadorá. Pero báseftangna imojëtsejuabnaye nderado cha ndoñe Jesús yontsemna ca. <sup>18</sup> Jesús chëngbioye tojanobecná y tojanéyana: “Bëngbe Bëtsá nyëts mando atše sonjatšetá celoca y quem luarentše. <sup>19</sup> Chcasna, motsajna, nyëts luarënguenache oyenënga atšbe uatsjédayënga šmochjábiamá. Entšanga šmochjubaye atšbe Taitá, atše chabe Uaquiñá y chë Uámana Espíritbe uabaina jayanëse, átšbeñe šmošbuachéyeca, <sup>20</sup> y šmochjabuatambá lempe ntšamo atše tchojamëndacá chënga chamóyeunama. Y ndegombre atše nyëts tempo tšëngaftangaftaca chanjëftsemna, quem luare jopochócantscuana ca” —Jesus tojanéyana.

## San Marcos

*Juan chë Ubayaná entsanga yojanabuayiná*

*(Mt 3.1-12; Lc 3.1-9, 15-17; Jn 1.19-28)*

<sup>1</sup> Měntsá tojanobojatšé chë tšabe noticiēnga Bēngbe Bětsabe Uaquiñá Jesucristbiamá.

<sup>2</sup> Ntšamo bayté entsemna, chë Bēngbe Bětsabe juabna oyebuambnayá Isaiás chabe librěšaŋe yojěftsayancá, ntšamo Bēngbe Bětsá chabe Uaquiñábíoye ibojauyanama cha tojanábema ora:

Minýe, atšbe abuayíynayá acbe natsana sěntsichamná,  
chë aca jabama lempe echanjapróna cha.

<sup>3</sup> Entšanga ndoyena luaroca cha enduáyebuache měntsá:

“Bēngbe Utabná echanjabo ca;

mo nda canýe benache tojtseprontacá canýe uámana entšá jashjanguama,

cachá tšēngaftanga, cha jabama ainaniñe tšabe juabnēngaca šmochtseprontana ca” —cha tojanábema.

<sup>4</sup> Chcase, Bēngbe Bětsá Juan tbojanichmó, y cha tojánbocna entsanga ndoyena luaroca, Bēngbe Bětsabe soyēngama abuayíynaye y entsanga ubáyana. Cha entsanga yojanětsětsnaye: “Tšēngaftangbe bacna soyēngama ngmēnaca šmochtenójuaboye, chca amana šochtsajbaná, y Bēngbe Bětsabe benache šmochtishache. Chora cbochjúbaye, y Bēngbe Bětsá tšēngaftangbe bacna soyēngama cmochanjáperdonaye ca.” <sup>5</sup> Nýets Judea luarocana chábiyoye entsanga imojánbocana, y Jerusalenětsana nýetsca entsāngnaca, y Bēngbe Bětsábíoye chēngbe bacna soyēngama jaimpáda chentsana, Juan Jordán ca uabaina bėjayıñe chēnga yojaněbáyana.

<sup>6</sup> Juanbe entsáyá inauapormana camellbe stjēnasheca y bobache yojanasnana; chapulinatémēnga y tjañe méloye inasaye. <sup>7</sup> Y měntsá entsanga yojanětsětsnaye: “Atšbe ústonoye inýa echanjabo, atšbiamá más obenana bomná; chíyeca atše mercedo taitatobuajoñe, ni mo jotsejbiyana chabe shechotětjoněshentša corriěja jajafjonama. <sup>8</sup> Atšna búyeshca chbonděubáyana, pero chë echanjabábeyecna, Bēngbe Bětsá bochanjíchmua chë Uámana Espíritu tšēngaftangbe ainaniñe cháuamashēnguama ca.”

*Juan, Jesúsbiyoye tbojanabaye*

*(Mt 3.13-17; Lc 3.21-22)*

<sup>9</sup> Chë tempo, Galilea luarocana Nazaret pueblentšana Jesús yojěftsebozna, y Juan yojtsemnoyoye tojána; y Jordán bėjayıñe Jesúsbiyoye cha tbojanabaye. <sup>10</sup> Bėjayoicana yojtashěbēbozna orna, tojáninýe celoca atěfjñiñe, y chë Uámana Espíritu chábiyoye mo palomatemcá yojtsastjajuana. <sup>11</sup> Y celocana Bēngbe Bětsá měntsá tbojaníyana: “Acna atšbe bonshana Uaquiñá condmēna; achíama corente sěntsoyejuá ca.”

*Jesús tojanobená Satanás jayěnjanamá*

*(Mt 4.1-11; Lc 4.1-13)*

<sup>12</sup> Chentsana chë Uámana Espíritu Jesúsbiyoye entsanga ndoyena luaroye tbojanánatse. <sup>13</sup> Canta bnětsana te chë entsanga ndoyena luaroca tbojanjětana, y Satanasma yojanabó jisháchichiyama. Chë luarentše tšátjaye bayēnga imnajena; chentsana, Bēngbe Bětsabe angelēnga cha imojtseservena.

*Jesús tojanontšé Galileoca chabe trabajo jamana*

*(Mt 4.12-17; Lc 4.14-15)*

<sup>14</sup> Juan cárceloye tmojanětámentšana, Jesús Galileoye tojesaná; y chiñe cha yojanabuayíyná chë tšabe noticiēnga Bēngbe Bětsabiamá. <sup>15</sup> Jesús entsanga yojanětsětsnaye: “Ora tocjobuache, Bēngbe Bětsabe amēndayana echanjoshjango. Tšēngaftangbe bacna soyēngama ngmēnaca šmochtenójuaboye, y chca amana šmochtsajbaná y Bēngbe Bětsabe benache šmochtishache; y ainaniñe chë tšabe noticiēnga Bēngbe Bětsabiamá šmochjójēngacñe ca.”

*Jesús tojánachembo canta boyabásēnga beonga ashebuánayēnga cha chamuastama*

*(Mt 4.18-22; Lc 5.1-11)*

<sup>16</sup> Galilea uafajónaye tsachajana Jesús yojtsaye ora, cha tojánánye Simón y chabe uabentšá Andrés; chatna atarraíēshangá ibnetsashbuětšeshañe, er beonga ashebuánayata chata ibnamna. <sup>17</sup> Chora Jesús tojaněyana: “Atšeftaca mabata. Atše cbochanjábiamá Bēngbe Bětsabiamá entsanga anguayata; y morscana, nýe beonga ashebuánayata ndoñe quešochátsmēna ca.”

<sup>18</sup> Y cachora chatbe atarraíēshangá cachcá tbojésanaboshjuana y Jesús tmojanasto.

<sup>19</sup> Más chcoye yojátaye orna, Jesús tojánanye Santiago y chabe uabentsá Juan, Zebedeobe uaquíñata; chatna barquëshañe ibnetsothemañe, chatbe atarraiëshangá atapórmayíñe. <sup>20</sup> Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúséftaca tbojtsanoñe.

*Jesús, bacna bayëjbe juabna cán'yabiöye tbojanbojuaná*  
(Lc 4.31-37)

<sup>21</sup> Chentsána, Jesús y chabe uatsjéñdayénga Capernaum ca uabaina puebloca tmojánashijana. Chë ochnayté, Jesús chë judiëngbe enefjuana yebnentse tojánamashëngo y yojóntša entsanga jabuátambama. <sup>22</sup> Entsanga imojtsenjanaye ntšamo Jesús yojtsabuatambacá, er chama mo canye mando bomnacá yojtsóyebuambnaye, ndoñe nye ntšamo Moisesbe ley abuatambayénga imojanabuatambacá. <sup>23</sup> Chë pueblentse judiëngbe enefjuana yebnentse yojtsemna canye entsá bacna bayëja uambayá, y chábeyeca chë boyabása yojóntša mentsá uayebuáchana: <sup>24</sup> —¿Ndayama bëngbiöye təcjabo, Jesús Nazaretocá? ¿Tcojabo bënga jabétsapochocama? Atše sëndétatšëmbo nda aca comnana, aca chë Bëngbe Bëtsabe Uamaná ca.

<sup>25</sup> Chora Jesús chë bayëjbiöye tbojtsanácacana, y tbojanianyana: —¡lytëca móbema y chábéntšana maisebocna ca!

<sup>26</sup> Chora chë bacna bayëjna tojanma chë boyabása ataque chaboshachama, jabuache tojanoyó y chábéntšana tojésanbocna. <sup>27</sup> Chama, nyetsca entsanga ojanánënga imojtsemna, y mentsá imojtsentjanaye: “¿Ndayá chca yojtsemna? ¿Canye tsëm buatëmbana soye? ¡Quem boyabása mando bomnacá y obenacá entsabuatambá, y chca, chë bayëjénga cha jtsamëndayana y chéngnaca joyeunayana ca!”

<sup>28</sup> Y betscó nyets Galilea luarentša pueblënguenache Jesusbiamá yojtsótatšëmbo.

*Jesús, Simón Pédrëbe uambén mamábíöye tbojanshná*  
(Mt 8.14-15; Lc 4.38-39)

<sup>29</sup> Chentsána, chë enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye. <sup>30</sup> Simonbe uambén mamá šocá inajájona, jabuache calentóracá, y Jesúsbiöye chë šocábiamá tmojanianyana. <sup>31</sup> As chora, Jesús tojanobeconá, chë šocábíöye tbojanábucushache y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontšé chënga jobuácuedana.

*Jesús ba šoquënga tojanashná*  
(Mt 8.16-17; Lc 4.40-41)

<sup>32</sup> Chë te jetiñe, shinëya ya yojuenatjëmba ora, chë luarentša nyetsca šoquënga y bacna bayëjénga uambayénga Jesúsbiöye tmojanénatse; <sup>33</sup> y nyetsca entsanga bëšoye imojobeconá. <sup>34</sup> Jesús banga tojanashná, nyetsca šocana bomnënga, y ba bacna bayëjénga entsanguentsána tojtanébuacna; y ndoñe tonjanalesenciá chë bayëjénga chamóyebuambama, er chënga imnatátšëmbo cha chë Cristo bëtsemnana.

*Chë judiëngbe enefjuana yebnënguenache Bëngbe Bëtsabe soyëngama Jesús yojanabuayíyná*  
(Lc 4.42-44)

<sup>35</sup> Yëfsana cabá cachëse, cabá ibetcă, Jesús tojëftsantsbaná, chë pueblentšana tojëftsanbocna y entsanga ndoyena luaroye tojtsanoñe, choca Bëngbe Bëtsáftaca jencuéntama. <sup>36</sup> Pero Simón y chabe enutëngna tmójána jetsenguanguama; <sup>37</sup> y tmojtsaninýena ora tmojanianyana: —Nyetscanga cmontsenguá ca.

<sup>38</sup> Y Jesús tojanëyana: —Inýoye cuajna, cam bëconana pueblëngoye, chíñnaca Bëngbe Bëtsabe soyëngama entsanga chayábuayenama; er chama atše sëñjabo ca.

<sup>39</sup> Y chentsána, Jesús yojánana Bëngbe Bëtsabiamá entsanga abuayíynaye chë judiëngbe enefjuana yebnënguenache, nyets Galileiñe, y entsángbentšana bacna bayëjénga yojtëbuacana.

*Jesús, canya bacna nguayanánaca šocábíöye tbojanshná*  
(Mt 8.1-4; Lc 5.12-16)

<sup>40</sup> Chentsána, canye boyabása bacna nguayanánaca šocá Jesúsbiöye tojanobeconá; y joshaméntšase mentsá tbojanimpadá: —Aca tcojtsebošëse, aca catjobenaye atšbe šocana jtsëbojuánama ca.

<sup>41</sup> Jesús chabiamá tbojanongmé; cucuátšëca tbojánbojajo y tbojanianyana: —Aíñe sëntseboše. ¡šocana chotsebojuaná ca!

<sup>42</sup> Y cachora chë šocana tbojtsanóbojuanañe y tšabá yojtsatsmëna. <sup>43</sup> Chora Jesús chábiöye tbojtanchmó, pero puerte mentsá tbojanmandá: <sup>44</sup> —Mouena; ndocnábeñe quem soye cattsecuéntaye; nye Jerusalenoca báchnëbiöye motsa y cha cochjínjínýiye aca mora ya tšabá cojtsatsmënama. Chora cochjuátšëmbona ntšamo Moisés chabe leyíñe tojanmandacá, Bëngbe Bëtsábíöye chama jëtschuayama, chca, nyetsca entsanga chamotátšëmbona mora ya tšabá cojtsatsmënama ca.

<sup>45</sup> Pero chë boyabásana, chentšana tojéftsanbocna y cachora yojóntša nyetsquénache entšanga yapa acúntayana Jesús tbojanshnama. Chë causa, Jesús ndoñe yontsobena entšangbe delante pueblënguenache jtsanana, ndayá nýe chë pueblënga béconana y nyetsca chë entšanga ndoyena luarënguñe yojánana; pero nyets luarëngocana chábioye entšanga imojánashjajuana.

## 2

### *Jesús, canýe jama ndobenábioye tbojanshná*

(Mt 9.1-8; Lc 5.17-26)

<sup>1</sup> Chentšana, Jesús Capernaumoye tojtanshjangoye; y entšanga imojátatšëmbona, Jesús yebnentše yojtsatsmënama. <sup>2</sup> Mallajta entšanga chentše tmojanójoto; chë causa chë yebnentše ya tondaye más luare entšangbiama yontsemna, ni mo chë amashjuanentše, y Jesús Bëngbe Bëtsabe soyëngama yojtsabuayinyaye. <sup>3</sup> Chora tojanopasá, canta boyabásenga tmojánashjangoye, canýe entšá jama ndobená imojtsaismana. <sup>4</sup> Pero ndoñe tmojanobená Jesús yojtsëmnoye cha juambana, tša entšanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanëštjango. <sup>5</sup> Jesús tojáninye chënga tša imojtsosbuaché chë šocá jáshnama cha yojanobenama; as chë jama ndobenábioye tbojanianyana: “Sobreno, mouena; acbe bacna soyënga tchontseboperdoná ca.”

<sup>6</sup> Chentše báseftanga judiëngbe ley abuátambayënga immatbemana; chënga chora mëntšá imojtsejuabnaye: <sup>7</sup> “¿Ntšámoyeca quem boyabása chca yojtsichamo? Jesús ndoñe tšabá Bëngbe Bëtsabiamana quenátichamo; mo chábioye cuafojyenguangcá entsemna. Ndocna entšá quenátobena inýabioye bacna soyëngama japerdonána; nýe Bëngbe Bëtsana aíñe ca.”

<sup>8</sup> Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanéyana: “¿Ndayeca chca tšëngaftanga ainaniñe šmojtsejuabná? <sup>9</sup> ¿Tšëngaftangbiama ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tchontseboperdoná’, o ‘Matëtsbaná, acbe tjuashe mesocñe y motsa ca’?” <sup>10</sup> Y chca, mora atše chochanjnyányiye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojanianyana: <sup>11</sup> “Atše cbëyana, matëtsbaná, acbe tjuashe mesocñe y acbe yebnoye motsatoñe ca.”

<sup>12</sup> Cachora chë jama ndobená tojtantsbaná, chabe tjuashe yojesocñe, y entšangbiajana chentšana yojésebocna. Chama nyetsca entšanga imojenjnaná y Bëngbe Bëtsábioye imojtsatschuanaye, y mëntšá imojtsichamo: “Nýa ndocna te tša bëts soye chemuáisinýe ca.”

### *Jesús, Levíbioye tbojanchembo chabuastama*

(Mt 9.9-13; Lc 5.27-32)

<sup>13</sup> Chentšana, Jesús cachiñe chë uafjajónaye tsachoye tojesaná; ba entšanga chábioye imojobeconá, y Jesús yojtsabuátambaye. <sup>14</sup> Chentšana yojtsataye orna, Jesús tbojáninye Levíbioye, Alfeobe uaquiñá, yojtsanotbemañe, entšanga impuesto atjanayacá inëtsotrabajañe. Chora Jesús tbojanianyana: “Smasto ca.”

Y Leví tojantsbaná y tbojanasto.

<sup>15</sup> Tojanopasá, Jesús Levibe yebnentše yojtsesaye, y banga Romocama entšanga impuesto atjanayënga y inýe bacna entšanga, mesëshentše cánýiñe imojtsetbiámama, Jesús y chabe uatsjëndayëngaftaca; er ba entšanga cha imojústona. <sup>16</sup> Chë fariseunga y chë ley abuátambayënga, chë entšangaftaca Jesús yojtsesama tmojáninye ora, chabe uatsjëndayëngbioye tmojanatjá: —¿Ndayeca tšëngaftangbe buatëmbayá, entšanga impuesto atjanayëngaftaca y bacna soye amëngaftaca yojtsesá ca?

<sup>17</sup> Jesús chca tojanuena; as mëntšá tojanéjua: —Chë salud tmotsobomñiënga, ashnayá ndoñe ntsëjábótana, pero chë šoquëngna aíñe. Y atše ndoñe chiyátabo chë Bëngbe Bëtsabe bominyiñe tšabá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

### *Jesús tmojantjá chë Bëngbe Bëtsáftaca jencuéntama tondaye saytescama*

(Mt 9.14-17; Lc 5.33-39)

<sup>18</sup> Canýe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuéntama tondaye ntjascá imojtsemna ora, básefta entšanga Jesúsbioye tmojanobeconá y mëntšá tmojanianyana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndayeca acbe uatsjëndayënga ndoñe chca ca?

<sup>19</sup> As Jesús tojanéjua: —Chë casamento fiestentše, chë ófjanënga saná ndoñe ntsabuáshebenana. ¿Ntšamo chca ndoñe nántsemna? Chë tojobouamá entšá chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana. <sup>20</sup> Pero

ora echanjobuache y chë boyabása chëngbentshana mochantsánatseñe; chora cocayé chë ófjanënga echántsamna tondaye ntjascá jtsemnana. Ntsamo chë tojobouamá boyabása y chë ofjanëngaftaca endmëncá, cachá endmëna atše y atšbe uatsjendayëngaftacnaca.

<sup>21</sup> “Ndocná, canýe tanguá entsáyá, base tsëm entsëjuaca jarmëndana; chca tcojamëse, chë tsëm entsëjuca jtsabëconana y chë tanguá entsáyá más jtsatanëcanana, y chca, chë uátanëcniñe más bëtsiñe jtsabemana. <sup>22</sup> Y cach ndoñe, chë tojtseshayana vínoye tanguá jasabenguiñe ntjataftsúamayana; er chë jasabenga jtseshëbëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juafsuámana; chca, chë jasabenga y chë vínoye josérviana ca” —Jesús tojánayana.

*Jesube uatsjendayënga canýe ochnayté trigo tmojanátabebe*  
(Mt 12.1-8; Lc 6.1-5)

<sup>23</sup> Canýe ochnayté, Jesús canýe jajajana yojtsaye; y chabe uatsjendayënga chëjana imojtsachnéjuana ora, tmojanontsé trigo juatabebiana. <sup>24</sup> Chë fariseunga chca imojinýe ora, Jesúsbióye tmojaníyana: —Minýe. ¿Ntsamo acbe uatsjendayënga montsamcá, ndoñe quenátselesnciana ochnayté jtsamama ca?

<sup>25</sup> Pero cha tojanéjua: —¿Ndoñe šmëndualía y šmondëtatšëmbo ntsamo Rey David y chabe enutënga tmojanmama shëntseca imojtsemna ora y jasama yojtsëjaboro ora? <sup>26</sup> Chca ora, Abiatar chë judiëngbe bachnangbe más uámama amëndayá inamna ora, David Bëngbe Bëtsabe yebnoye yojámarshëngo, y chë luarentše Bëngbe Bëtsá yojamnama inýinýnaye tandëšënga yo-jase; y chë cháftaca imojánajna entsángnaca yojátataye. Y chë tandëšna nýe bachnangbiama belesnciana jasama. Masque David chca tojanma, Bëngbe Bëtsá ndoñe tonjánayana David canýe bacna soye tojanma ca.

<sup>27</sup> Y Jesús más tojánayana: —Bëngbe Bëtsá ochnayté entsábíama tojama y entsá ndoñe tbonjánbema nýe chë ochnayté ndoñe chaondëtrabajama. <sup>28</sup> Chíyeca, Bëngbe Bëtsá Entšá tbojanbemá, ndayá entsá ochnayté tojtsama sóynaca jtsemándayana ca.

### 3

*Chë buashana cucuatše bomna entsá*  
(Mt 12.9-14; Lc 6.6-11)

<sup>1</sup> Chentšana, Jesús cachiñe chë judiëngbe enefjuana yebnoye tojésanamashëngo; y chentše canýe boyabása yojtsemna, buashana cucuatše bomná. <sup>2</sup> Chë fariseunga chiñe imojtser-rondana jinýama nderado Jesús chë ochnayté chábióye tabuanjashnama, as chca chënga jtsebmomna ndaye sóyeca cha mal jaquédana. <sup>3</sup> Chora Jesús chë buashana cucuatše bomnábíoye tbojaníyana: —Chentše, entsángbe delante motsa ca.

<sup>4</sup> Y chë fariseunga tojanatjá: —¿Ndayá yojtselesnciana ochnayté jamama, tsabe soye o ndoñe tsabe soye? ¿Jatsbocama o jtsepochoçama ca?

Pero chënga ndocá tmonjanjuá, nýe iytëca imojobiama. <sup>5</sup> Chora Jesús rábiaca y ngménaca chë fariseunga tojanëñyanýé, chënga ainaniñe josértama ndoñe montseboše causa; y chë buashana cucuatše bomnábíoye tbojaníyana: —Macuenyanëjaná ca.

As chë boyabása tojanacuenyanëjaná, y chora tsabá chëtsa yojtsatamna cach inýetsacá. <sup>6</sup> Pero chë fariseungna, chentšana tmojésanbocana ora, Rey Heródesbe ustonëngaftaca tmojanenoyeuná Jesube contra, y tmojanontsé juabnayana ntsamo jamëse Jesús jóbama.

*Mallajta entsanga Jesúsbióye tmojanobeconá*

<sup>7</sup> Chentšana, Jesús chabe uatsjendayëngaftaca tojanoluaré mar bëjaye tsachoye, y Galileo-cana bëtsá entsanga tmojanasto. <sup>8</sup> Inýe entsángnaca chábióye tmojanobeconá Judeocana, Jerusalenocana, Idumea ca uabaina luarocana, Jordán bëjaye chenguanocana, Tiro y Sidón pueblëngocana. Chënga tmojanobeconá, Jesús tša bëts soyënga yojtsamama tmojanuena ora. <sup>9</sup> Jesús chabe uatsjendayënga tojanéyana: “Motsajna y canýe barquësha atšbiama šmochjuapróna, tša entsanga ndoñe chašmondëtsatsëntšnama ca.” <sup>10</sup> Er cha banga tojanashná, y chë causa, nýetscanga šocana bomnënga chábióye tmojanajuatsëntšená cha jaboajuama.

<sup>11</sup> Y chë bacna bayëjënga uambayëngna, Jesús tojinýe ora, betscó chabe shecuatšëntše imojtsofshëntsaméntšenaye, y chë bacna bayëjëngbeyeca mëntsá imojtsáyebuache: “¡Aca Bëngbe Bëtsabe Uaquíñá condmëna ca!”

<sup>12</sup> Pero Jesús puerte tojanamëndá, nda cha bëtsemnama entsángbe delante ndoñe chamondëtsichámuama.

*Jesús chë bnëtsana uta uatsjendayënga tojanabacacá*  
(Mt 10.1-4; Lc 6.12-16)



<sup>13</sup> Chentšana, Jesús canye batsjoye tojánstjua, y ndēmuanýenga tšabá tbojanínýnanēnga tojánachembo. Y chēngna chábioye tmojanobeconá. <sup>14</sup> Chora, chēnguentšana bnētsana útata tojanēbuáyana, chamotsetjēmbambnama, y Bēngbe Bētsabe soyēngama entšanga chámabuayenama; <sup>15</sup> y chēnga obenana tojanatšatá entšángbentšana bacna bayējēnga jtēbuacanama. <sup>16</sup> Mēnga mondmēna chē bnētsana uta bocacānēnga: Simón, chē ndábioye Pedro ca Jesús tbojanabaye; <sup>17</sup> Santiago y chabe uabentsá Juan, Zebedeobe uaqúñata, chata tojanēbaye “boanerges ca”, y chca endayana “uajuesayabe uaqúñata ca”; <sup>18</sup> Andrés, Felipe, Bartolomé, Mateo, Tomás, Santiago, Alfeobe uaqúñá; Tadeo, Simón chē celote ca uabobainá; <sup>19</sup> y Judas Iscariote, chē chentšana ndoñe baytesna, Jesús uayayēngbe cucuatšíne bochjanboshjona.

*Ley abuatambayēnga tmojánayana, Jesús Satanásbentšana obenana tojánóyēngacñe ca (Mt 12.22-32; Lc 11.14-23; 12.10)*

<sup>20</sup> Chentšana, Jesús yebnoye tojtanamáshēngo, y tša entšanga chentše tmojanóoto; chē causa, ni cha ni chabe uatsjēndayēnga, ni mo jasama luare ndoñe imontsebmoma. <sup>21</sup> Jesusbe pamillanga ntšamo cha yojtsepásama tmojánatšēmbona ora, tmojána cha jetsbetšana, er entšanga imojtsencuéntaye cha opá tojtšanóbema ca.

<sup>22</sup> Y chē ley abuatambayēnga Jerusalenocana tmojánashajnēngna Jesusbiamama mēntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chē bacna bayējēnga amēndayá, Jesúsbioye obenana tbojatšeta entšángbentšana bacna bayējēnga chauatēbuacnama ca.”

<sup>23</sup> Chēnga chca imojtsichámuama, Jesús chēnga tojánachembo, y cuentēngaca tojanontšé jáuyanana, jinýanýiyama chēnga canye ndoñe ndegombre soyíne imojtsemnama, mēntšá: “¿Ntšamo Satanás nantsobena cachá jtenábocnama ca? <sup>24</sup> Canye amēndayábentše entšanga tmojtsenojatá y tmojtseányase, chē amēndayana ndoñe ntjatotonana. <sup>25</sup> Cachá, canye yebnentše pamillanga tmojtsenojatá y tmojtseányase, chē pamillanga ndoñe tšabá nyets tempo quemochátsmēna. <sup>26</sup> Y cachá, Satanás y chábenga ndoñe tmontsenēyeunana y cachabe contra tojtsemñese, chabe amēndayana ndoñe más queochátstotona; y cha ya ndoñe más chēngbe amēndayá queochátsmēna.

<sup>27</sup> “Ndocná quenátobena canye corente añemo bomna entšabe yebnoye jamashēnguana y chabe soyēnga jtsebocana, ndoñe natsana tconjshétsebséquēse. Nye tcojshétsebséquēse cocayé cuanjobenaye cha jefcana.

<sup>28</sup> “Ndegombre chéyana, Bēngbe Bētsá entšangbe nyetsca bacna soyēnga echanjáperdonaye, y ntšamo Bēngbe Bētsabiamama y inýengbiamama ndoñe tšabá tmontsichamo soyēngnaca; <sup>29</sup> pero chē Uámana Espiritbiamama ndoñe tšabá ichámēngna ndocna te queochátaperdonaye, er nyetsca tescama castigánēnga jtsemnana chēnga jtsamnana ca” —Jesús tojánayana.

<sup>30</sup> Jesús chca tojanéyana, er chēnga imojtsichamo cha bacna bayēja ibojtsambá ca.

*Chē Jesusbe ndegombre pamillanguentsēnga (Mt 12.46-50; Lc 8.19-21)*

<sup>31</sup> Chēntscuana, Jesusbe mamá y catšátanga choye tmojánashajana, pero nye shjoca imojtsemna; y canya tmojanichmó cha jachembuama. <sup>32</sup> Chē ba entšanga chentše chabe shēconana imojtsetbíamanēngna, chora tmojanayana: —Acbe mamá, acbe catšátanga y uabēngana shjoca montsemna; aca cmontsenguá ca.

<sup>33</sup> Chora cha tojanéyana: —¿Nda atšbe mamá yomna, y ndēmuanýenga atšbe catšátanga ca?

<sup>34</sup> Chentšana, chē chabe shēconanana tbíamanēngbioye jarrepárase, tojánayana: —Quemēnga mondmēna atšbe mamá y atšbe catšátanga. <sup>35</sup> Er ndánaca, ntšamo Bēngbe Bētsá yobošcá tojtsamá, jtsemnana atšbe catšata, atšbe uabena y atšbe mamá, atšbe ndegombre pamillanguentsá ca.

## 4

*Chē jenabe cuento (Mt 13.1-9; Lc 8.4-8)*

<sup>1</sup> Chentšana, uafjónoye tsachoca Jesús tojtētanontšé Bēngbe Bētsabe soyēngama jabuatambama. Mallajta entšanga tmojanobeconá causa, chē uafjónoyentše yojanamna canye barquēshoye Jesús tojánasēnga y tojanótbema; y chē entšanga tsachoca imojtsemna. <sup>2</sup> Chora cuentēngaca ba soyēngama tojanabuatambá.

Mēntšá tojanéyana: <sup>3</sup> “Smochjouena; <sup>3</sup> canye jená chē jénaye jaujquēshama yojéftsebocna. <sup>4</sup> Yojtsējquēshaye orna, básefta jénaye benache juachañe yojuatquécjana; pero jaja shloftšēnga imojástajana y lempe imojtsósañe. <sup>5</sup> Inye meshēngna ndētsbenguiñe yojuatquécjana, ndoñe yapa fshantse binýnentše. Chiñna betesco yojuábocna, ndoñe yapa jashenocana fshantse yojanmēna causa; <sup>6</sup> pero yojuábocna orna, puerte yojojénýana y

yojtsancta; y yojtsábojo yapa btëtjèngna tondaye causa. <sup>7</sup> Inye meshèngna ucmèshangañe yojuatquécjána; chë ucmashá yojuájua ora, lempe yojtsatscué, y chca, chë jénayentsána tondaye jonjuashájona. <sup>8</sup> Pero inye meshèngna, uanguaníñe yojuatquécjána, y bètsá tšabe shajuanèngna chiñe yojóbcna: ínñenache, canye meshentsána unga bnètsana meshèngna yojóbcna; ínñenachna, chnèngwana bnètsana meshèngna; y ínñenachna patse meshèngna ca” —cha tojánayana.

<sup>9</sup> Y chentšana, Jesús más tojánayana: “Chë jouenama tmojtsobenèngna, šmochjouena ca.”

*Ndáyeca Jesús cuentèngaca yojánabatambaye*  
(Mt 13.10-17; Lc 8.9-10)

<sup>10</sup> Chentšana, Jesús canya yojuquéda ora, chë chabe béconana imojtsemnèngna chabe bnètsana uta uatsjèndayèngaftaca, tmojantjá ndayá chë cuento bétsayanama. <sup>11</sup> As Jesús tojanéjua: “Bèngbe Bètsá tšèngaftanga cmontsinjányná nyetsca chë mo ytémencá yomna soyèngna chabe amèndayama, pero chë ínñengbiyoe ndoñe; chë soyèngama chèngna lempe cuentèngaca sèntsètsètsná. <sup>12</sup> Chca, masque beca chamotsafšna, ndoñe chamondobená chë Bèngbe Bètsabe soyèngna jinýama; y masque beca chë soyèngna chamouena, ndoñe queochátèsertana, chèngna Bèngbe Bètsábiyoe ndoñe chamondètobéconama, y cha ndoñe chaondáperdonama ca.”

*Jesús chë jenabe cuentama tojanabuayená*  
(Mt 13.18-23; Lc 8.11-15)

<sup>13</sup> Chentšana, Jesús tojanéyana: “¿Quem cuentama ndoñe tcmonjósertase, ntšamo chcase nyetsca cuentèngama cmochjóserta ca? <sup>14</sup> Chë jená endmèna chë tšabe noticièngama abuayinyayá. <sup>15</sup> Básefta entšanga mondmèna mo chë benache juachañe yojuatquécjána jenaycá. Chèngna Bèngbe Bètsabiana soyèngna jouenana; pero chora Satanás betso jabaná, chèngna chéngna ainaniñe yojtsemna Bèngbe Bètsabe palabra jabètsabuajuanama, chèngna chiñe ndoñe chamondètsobuáchemá. <sup>16</sup> Inye entšanga mondmèna mo chë ndètsbènguiñe yojuatquécjána jenaycá; chèngna Bèngbe Bètsabe palabra jouenana y oyejuayèngna jtsemnana; <sup>17</sup> pero ndoñe nyets tempo chana jochochájua; y chca, ndoñe bayté Bèngbe Bètsáftaca ntjèftsemnèngana, ndoñe yapa tmonsasbuaché causa. Inyèngna mochantsébuayènjá, y Bèngbe Bètsábeñe betsošbuáchiyama mochanjasúfrianga; chíyeca chèngna Bèngbe Bètsabe palabra cachcá mochanjesonýaye. <sup>18</sup> Inyèngna mondmèna mo chë ucmèshangañe yojuatquécjána jenaycá. Chèngna Bèngbe Bètsabe palabra mochanjouena, <sup>19</sup> pero quem luarentša soyèngaca oyejuayèngna jtsemnana yapa mochántseboše, y nye bomnana jèftsebojnama yapa mochanjésenouabnaye. Chë soyama y inye ba soyèngama yapa enócochinýena causa, Bèngbe Bètsabe soyèngama echantsebnètjomba, y ndoñe quemochátama ntšamo Bèngbe Bètsá tojayancá. <sup>20</sup> Pero ínñèngna mondmèna mo chë uanguaníñe yojuatquécjána jenaycá. Chèngna Bèngbe Bètsabe palabra botamana mochanjouena; nyets ainánaca mochántseprontana chiñe jtsošbuáchiyama. Mo canye betiyoe beca tšabá ntjètseshajuanacá, chèngna bètsá tšabe soyèngna Bèngbe Bètsabiana mochántsama. Inyèngna ínñengbiama más bètsá soyèngna mochanjama; y chca, ínñèngna mochántsemna mo chë unga bnètsana meshe tojanshajo jenaycá, ínñèngna mo chë chnèngwana bnètsancá, y ínñèngna mo chë patse meshèngna tojanboté jenaycá ca” —Jesús tojánayana.

*Chë uajuinýanèshama cuento*  
(Lc 8.16-18)

<sup>21</sup> Mèntšanaca Jesús tojánayana: “Ndocná juiyèbana canye uajuinýanèsha cajonèshe o jutsnèsha tajsoye juajájua. Ndoñe; uajuinýanèsha juiyèbana tsbanánaca juajájua, lempe chaotsebínýna. <sup>22</sup> Ndocna yoiytèmena soye ntjinýencá queochaisoquéda, y chë ndótatsèmo soye ntsotatsèmbcá queochaisoquéda. <sup>23</sup> Chë jouenama tmojtsobenèngna, šmochjouena ca.”

<sup>24</sup> Y mèntšanaca Jesús tojanéyana: “Tšabá šmochjájua boye ntšamo šmojtsuenanama. Nye batšatema šmojouenèse, nye batšatema cmochanjósertaye; pero aiñe tšabá šmojouenèse, chama corente cmochanjósertaye; y Bèngbe Bètsá echanjama tšèngaftanga más soyèngama chacmósertama. <sup>25</sup> Er ndá Bèngbe Bètsabe soyèngama tšabá tbojoserá, Bèngbe Bètsá echanjama cha más ba soyèngama chaboseratama; pero ndá chë soyèngama josértama ndoñe tontsebošá, chë nye batšá ibosertana soyèngama bochántsebnatjèmba ca” —cha tojánayana.

*Chë ojuajna jenayama cuento*

<sup>26</sup> Jesús mèntšanaca tojanéyana: “Bèngbe Bètsabe amèndayana endmèna mo ntšamo canye boyabása jénaye tojuatbontsá ora ehandbopasacá: <sup>27</sup> masque cha cada ibeta jtsojájua y bnèté jotsbanama, ibeta o bnèté, chë jénayentsána juabocnana y juájua, ntšamo chca yojtsájuañama chë boyabása ntjatstatsèmbcá. <sup>28</sup> Chë fshantse cachabe ponto jamana ndayánaca chiñe chaójuama; natsana tsbuanachètema jóbocnana, chentšana chë espiga, y

chentšana chë meshënga jashájonana. <sup>29</sup> Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

*Chë mostaztiye jenayama cuento*

(Mt 13.31-32; Lc 13.18-19)

<sup>30</sup> Jesús mëntśánaca tojanéyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama? <sup>31</sup> Endmëna mo canýe mostaza jénaye jájoca tcojajecá. Ndegombre, nýetsca quem luarentśa jenayëngama, mostaza jénaye chë más básetema endmëna; <sup>32</sup> pero tcojajé orna, jójuana, y jajañe chë más bëts betiye jóbemana, ba bëts buacuashëngaca; chíyeca chë jaja shloftšënga jana y chiñe uajajonëtemëngá jauábopormana ca.”

*Ndáyeca Jesús cuentëngaca entsanga yojanabuayiná*

(Mt 13.34-35)

<sup>33</sup> Chca Jesús Bëngbe Bëtsabe soyëngama entsanga yojanabuatambá, ba cuentënguentšana, mo chë tmonjouena cuentcá, ntsachetsá chë entsanga josértama tmojobenacá. <sup>34</sup> Tondaye yonjanabuatambá ndoñe cuentëngaca ntsemëncá; pero chabe uatsjëndayëngna lempe yojanabuayiná, cánýenga tmojtsemna ora.

*Jesús chë binýia y chë béjaye bonguana yojëtsbema*

(Mt 8.23-27; Lc 8.22-25)

<sup>35</sup> Cach te, yojtseibëtatana ora, Jesús chabe uatsjëndayënga tojanéyana: “Uafjajónaye chenguana cuajna ca.”

<sup>36</sup> Chorna, chë entsanga jesabáshejuanëse, chë uatsjëndayënga Jesús tmojtšanánatseñe, cach yojänenjaquena barquëshañe; y inýe entsángnaca inýe barquëshangañe tmojanasto. <sup>37</sup> Chentsana, chë uafjajónaye béjayañe tśa jabuache binýia yojóshjango; olëshënga chë barquësha imojtsëtsbotsana, y chë causa chë barquësha yojóntśa búyeshca jtsobuajútjiana. <sup>38</sup> Y chëntscuana, barquësha stëtsóica, tsëntšenëshañe Jesús yojtsomañe. Chora chë uatsjëndayënga tmojtšanfšëná y tmojaníyana: —¡Buatëmbayá! ¿Tondayana cmontsentśamna bënga chašotsënatjëmbama ca?

<sup>39</sup> As Jesús tojantsbaná, chë binýia tbojanácacana, y chë bëts uafjajónayoye tojánayana: —¡Natjëmbana cochtsemna! ¡Bonguana ca!

Y cachora chë binýia yojëtsčëjca, y lempe bonguana yojtsatsmëna. <sup>40</sup> Chora chabe uatsjëndayënga tojanéyana: —¿Ndáyeca tśa šmojtšauatja? ¿Bëngbe Bëtsá tšëngaftanga jujabuáchama yobenama cabá ndoñe šmontsošbuaché ca?

<sup>41</sup> Chama, chënga puerte auatjanánënga imojtsemna y mëntśá imojtsenatsëtsnaye: “¿Nda quem boyabása yomna? Cha tonjayana y chë binýia y chë béjaye tmonjoyeuná ca.”

## 5

*Chë Gerasa luaroca bacna bayëja uambayá*

(Mt 8.28-34; Lc 8.26-39)

<sup>1</sup> Chentšana, uafjajónaye chenguánoica tmojánashjajna, Geraseno ca uabaina entsangbe luaroje. <sup>2</sup> Jesús barquëshoicana tojánastjango, y cachora, chë obanëngbe cuevëshënguentšana canýe entsá, bacna bayëjbe juabna uambayá, tojánbocna y tbojanjébingo. <sup>3</sup> Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca; <sup>4</sup> er ba soye cadenëjuangaca y inýe soyëngaca cha nýetsá tmojanbatsëca, pero cha nýetsca soye yojtsátabebe y yojtsenájaca, y ndocná yonjobenaye cha bonguana chaotsemnama. <sup>5</sup> Nýets tempo, bnëté y ibeta, obanëngbe cuevëshënguenache y tjañenache yojánana yoye, y ndëtsbéngaca enotsetšenaye. <sup>6</sup> Jesúsbiyoe bënëcana tbojáninýe ora, chábiyoe tojanótjajo y chabe natsanoica yojoshëntsamentšiyey; <sup>7</sup> y mëntśá yojtsáyebuache: —¿Ndayá átšëftaca cojtseboše, Jesús, celoca Bëngbe Bëtsabe Úaquíñá? ¡Bëngbe Bëtsabe delante choimpadá, ndoñe šcatjatsetšëná ca!

<sup>8</sup> Chca tbojaníyana, er Jesús chábiyoe tbojaníyana: —¡Bacna bayëjbe juabna, chábentšana maisebocna ca!

<sup>9</sup> Chentšana Jesús tbojantjá: —¿Ntšamo cabaina ca?

Y chë bacna bayëjëngbe juábnaca cha tbojanjuá: —Atśna Legión ca sënduabaina, bëtscanga fsëndmëna causa ca.

<sup>10</sup> Y tśa Jesús ibojtserruana chë luarentšana ndoñe chaondëtëbucanama. <sup>11</sup> Chentśa bënëcana ba cotšënga imnajena, batsjoca imnétsosañe; <sup>12</sup> as chë bacna bayëjënga Jesúsbiyoe tmojanimpadá: —Chë cotšëngbiyoe šmichamó, chëngbeñe fchayamashjna ca.

<sup>13</sup> Y Jesús aiñe tojanalesenciá; as chë bacna bayëjënga chë entsábentšana tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëšëjana uafjajónayoye imojtsoshbuetše y yojtsatajo.

<sup>14</sup> Chora, chë cotsënga anÿenënga tmojtsanacheta auatjanánënga, y tmojána chama jacuéntama chë pueblaca y chabuenache; y entsãnga tmojánabo ntšamo tojanopasacá jinÿama. <sup>15</sup> Jesús yojtsemnoye chë entsãnga tmojánashjajna ora, tmojáninÿe chë tempo bacna bayëjënga uambayá, inétsotbemañe, entsáyá uichëtjoná y chabe nyets juábna. Y chë entsãnga chama imojtsëuatjaná. <sup>16</sup> Chë tmojáninÿënga imojtsecuéntaye, ntšamo chë bayëjbe juabna uambayáftaca tojanopasama, y chë cotsëngaftaca ntšamo tojanopasámnaca. <sup>17</sup> Chora chë entsãnga tmojanontsé Jesús impadánana chë luarentšana chaotsatoñama.

<sup>18</sup> Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca. <sup>19</sup> Pero ndoñe tbonjanlesenciá, sinó mentsá tbojanianá: “Acbe yebnoye motsatoñe, acbe pamílangbiöye, y cochjácutayé ndayá Bëngbe Utabná cháftaca tojamama, y ntšamo cha ácbiöye tcmojalastemama ca.”

<sup>20</sup> Chentšana, chë entsá yojtsatoñe y tojanontsé Decápolis uabaina pueblënguenache jacúntana lempe ntšamo Jesús cháftaca tojanmcá; y nyetscanga imojtsenjanaye.

*Jesús canÿe shembásabiöye tbojanshná y Jairëbe bembetëmbiöye tbojtananená  
(Mt 9.18-26; Lc 8.40-56)*

<sup>21</sup> Chentšana, Jesús cachiñe chë uafjájónaye chenguana tojesaná barquëshañe. Chocna ba entsãnga tmojanobuashconá, y Jesús chë uafjájónaye tsachañe yojtsemna. <sup>22</sup> Chorna, tojánashjango chë judiëngbe enefjuana yebnentša canÿe mandayá, Jairo ca uabainá. Jesúsbiöye tbojáninÿe ora, chábentše tojanoshëntsamentšé, <sup>23</sup> y tša ibojtseimpadana, mentsá: —Atšbe bembetema ya echantsóbana; Diosmanda mabo, acbe cucuatšënga chábeñe cochjájua, salud chauatinÿenama y cháuatayenama ca.

<sup>24</sup> As Jesús cháftaca tojána; pero bëtscá entsãnga imojtsëstona, chábiöye imojtsentsëntšenaye. <sup>25</sup> Chë entsãnguentše yojtsaye canÿe shembása šocá; cha ya bnëtsana uta uata oboftjajuanánaca inapadecena. <sup>26</sup> Cha puerte tojansufri, ba ashnayëngbe cucuatšëñe, y lempe ntsachetsá inabomncá tojanpochocá jenóshnama; pero ndoñe ibontsatšécacjana, nÿe más peor ibojtsobiamnaye. <sup>27</sup> Chë shembása yojouena ntšamo Jesús ba šoquënga tojánashnama, y as stëtšoicana entsãngbe tsëntsajana yojobeconá, y Jesusbe entsáyá yojauábojajo. <sup>28</sup> Cha chca tojanma, er yojtsejuabnaye: “Masque nÿe mo chabe entsáyá sibiájua chajjuábojajo, y salud chantsatsbomna ca.” <sup>29</sup> Y cachora chë oboftjajuanana ibojtsobojuána; y chabe cuerpiñe ibojebiónana ya tšabá yojtsatsmënama. <sup>30</sup> Chora Jesús yojaséntia chábentšana obenana yojóbcnama, mo ndábiöye tbojashná orcá; as cha tojanobuértana entsãngbeñe y tojanatjá: —¿Nda atšbe entsáyá tojuabojajo ca?

<sup>31</sup> Chabe uatsjëndayënga tmojanjuá: —Aca contsonyá chë entsãnga cmontsatsëntšená, y cabá cochjátsnoticiaye nda entsáyá tojuabojajo ca.

<sup>32</sup> Pero Jesús cátoye yojtserreparana jinÿama nda tbojánbojajuama. <sup>33</sup> As chë shembása, chë ntšamo cháftaca yojopásama jtsetatšëmbëse, tojanobeconá ngëmnyá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbiöye tbojanianá. <sup>34</sup> Chora Jesús tbojanianá: —Bembe, Bëngbe Bëtsábeñe ičošbuachéyeca shnaná contsatsmëna. Natjëmbana motsatoñe; acbe šocana tontsopochocá ca.

<sup>35</sup> Jesús cabá yojtsóyebuambnantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojanianá: —Acbe bembe tontsóbana; ¿ndayama más Buatëmbayá chama cochjátebëyaboma ca?

<sup>36</sup> Y Jesús, ntšamo chënga imojtsichamcá ntjatuenancá chë judiëngbe enefjuana yebnentša mandayábiöye tbojanianá: —Ndoñe matauatjana. Nÿe Bëngbe Bëtsábeñe cochtsošbuáchiye cha tšabá chaotsatsmënama ca.

<sup>37</sup> Y Jesús ndoñe tonjanalesenciá Jairëbe yebnoye banga chamuastama; nÿe Pedro, Santiago y Juan, Santiagbe uabentsana, aiñe. <sup>38</sup> Chentšana, chë mandayabe yebnoye tmojánashjajna ora, Jesús tojánanÿe entsãnga tša imojtsenbouenana, entsãnga imojtsošachiye y puerte ngëménaca imojtseyoye. <sup>39</sup> As chë yebnoye tojánamashëngo y chë entsãnga tojanëyana: “¿Ndayama tša šmojtsenbouenana y tša šmojtsendëntjana? Chë shembásetema ndoñe chenatóbana, nÿe endëtsomañe ca.”

<sup>40</sup> Pero entsãnga nÿe imojtsáfchaye. As Jesús nyetsca entsãnga shjoye tojtanébuacna, y tojëftsanëbiatše chë basetembe bëtšëtsate y chabe enutënga; y chë shembásetema yojtsemnoye tojánamashëngo. <sup>41</sup> Chora Jesús tbojánabuacueshache y cachëngbe biyañe tbojanianá: “Talita, cum ca.” (Chca endayana “Shembásetema, matëtsbaná ca”.)

<sup>42</sup> Cachora, chë bnëtsana uta uata bomna shembásetema tojtantsbaná y yojtsobenana jama. Y chë entsãnga chama imojtsenjanaye. <sup>43</sup> Pero Jesús corente tojanamëndá ndocnábeñe chama ntsecuéntayana ca, y tojanamëndá chë básetema saná chamuiyé chaosama.

## 6

*Jesús Nazaret puebloca*  
(Mt 13.53-58; Lc 4.16-30)

<sup>1</sup> Chentšana Jesús tojéftsanbocna y cachabe luaroye tojtanashjango, y chabe uatšjéndayënga cháftaca tmojána. <sup>2</sup> Ochnayté tojanobuache ora, Jesús tojanontsé chë judiëngbe enefjuana yebnentše entšanga jabuátambana.

Chë ba entšanga cha jóyebuambayama tmojanuënga, imojenjaná y tmojánayana: “¿Ndëmoca quem boyabása lempe chca tojuatsjinýe? ¿Ndaye osertánana mua tmojatšeta, y ntšámoyeca cha yojtsobena chca bëts soyënga jtsamana ca? <sup>3</sup> ¿Mua ndoñe chë calpintero yondmëna, Mariybe uaquíña, y chabe catsátanga ndoñe mondëmëna Santiago, José, Judas y Simón; y chabe uabënanngaca muentše ndoñe bëngaftaca mondoyena ca?” —chënga imojtsichamo.

Chë causa chënga tmojanotjayaná, y ndoñe montseboše joyeunayana. <sup>4</sup> As Jesús tojanëyana: “Nýetsca luarënguenache canýe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luarentše, ni cachabe pamíllangbenache, ni cachabe yebnentše ca.”

<sup>5</sup> Chë entšanga chentše chábeñe ndoñe montsanošbuaché causa, Jesús ndoñe tonjanobená ni canýe bëts soye Bëngbe Bëtsabe obenánaca chentše jëftsemana; nýe básefta šoquëngbeñe cucuatšënga tojanjajó y tojanashná. <sup>6</sup> Jesús ojnananá yojtsemna cachábentša entšanga chábeñe ndoñe montsanošbuaché causa.

*Jesús, chabe uatšjéndayënga tojanichamó Bëngbe Bëtsabe amëndayama jábuayenama*  
(Mt 10.5-15; Lc 9.1-6)

Chentšana, chë chaboye base pueblënguenache Jesús yojánana, Bëngbe Bëtsabe soyëngama abuátambaye. <sup>7</sup> Y chë bnëtsana uta uatšjéndayënga Jesús tojánachembo, y utáta inýoye tojanichamó, entšángbentšana bacna bayëjënga jtëbuacnama obenana jatšatayëse; <sup>8</sup> y mëntsá yojáuyana: “Benachiñama tondaye šmattsambaye, nýe canýe jatjonëfja; ndoñe šmattsambaye saná, ni shecnaja, ni crocénana uasnanëchiñe. <sup>9</sup> Nduámánëshe šmochjesóshecohëtjo, y nýe canýájua šmochjesíchëtjo ca.”

<sup>10</sup> Mëntsánaca tojanëyana: “Posada chacmojúyentšame yebnentše šmochtsoquedañe inýe puebloye játantsuana. <sup>11</sup> Canýe luaroye chašmojáshjajna y ndocná posada chacmonjuyentšame, y joyeunayama ndoñe chamontsebošëse, chentšana šmochjësebecana, y shecuatšentša polvëshe šmochjësensototo, chca, chëngbioye jimýanyiyama chënga ndoñe tšabá tšëngaftangaftaca tmonjamama ca.”

<sup>12</sup> Chentšana, chë uatšjëndayënga tmojéftsanbocna y entšanga imojánabuayinyaye, chë tšabe benache chámuatishachama, bacna soyënga amana jtsajbanase. <sup>13</sup> Entšángbentšana ba bacna bayëjënga tmojtanëbuacna, y ba šoquënga aceitíyeca tmojananëttojto y tmojanashná.

*Ntšamo Juan chë Ubayaná tojanóbana*  
(Mt 14.1-12; Lc 9.7-9)

<sup>14</sup> Rey Herodes Jesusbiamá yojátatšëmbona, er nýetsquénache nýetsca entšanga chabiama imojtsóyebuambnaye. Entšanga Jesusbiamá imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

<sup>15</sup> Inýengna imojtsichamo: “Cha entsemna chë Bëngbe Bëtsabe juabna oyebuambnayá Elías ca.”

Y inýengna: “Muana canýa Bëngbe Bëtsabe juabna oyebuambnayá, mo chë tempsquëngcá ca.”

<sup>16</sup> Heródesna ntšamo entšanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentšana tojtayena ca.”

<sup>17</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamá. Herodes chca tojanma Herodíasbe causa, chabe uabentša Felipe shema. Herodes chë shëmaftaca tojanobouamá, Felipe cabá ainá ora. <sup>18</sup> Y chama, Heródesbioye Juan ibojánbuayinyaye: “Ndoñe quenátšlesenciana acbe uabentsabe shema acbe shema chaotsemnama ca.”

<sup>19</sup> Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena, <sup>20</sup> er Herodes yojántatšëmbo, Juan canýe nýetsca soyënguiñe tšabá amá, nýe Bëngbe Bëtsábioye sempre oservená inamnama. Chama cha yojánauatja y ndoñe yonjanaleséncia cha chamóbama. Y Juan Bëngbe Bëtsabe soyëngama Heródesbioye tbojtsebuayinyá ora, ntšamo jajuaboyana ndoñe yontsetatšëmbo, pero masque chca, oyejuayá Juánbioye ibnayeunana. <sup>21</sup> Pero Herodías tojáninýena mocna ora Juan chamóbama. Heródesbe cumpleañó oboyejuaye ora, bëtscá saná tmojanprontá, y Herodes yojúbuaaja

chabe amëndayënga, soldadëngbe amëndayënga y Galileoca uamana entšanga. <sup>22</sup> Chora, chë oboyejuaye luaroye Herodiasbe bembe tojanamashëngo, tojanlantsá, y Herodes y nyetsca ófanënga chama tša imojtsóyejuaye. As chë rey, chë tobiášbioye tbojaniana: —Ndayánaca šmotjañe y atše cbochjåtsetaye ca.

<sup>23</sup> Y jajúrase, mēntšá tojansbuachená: —Ntšamo chašcojotjañcá cbochjåtsetaye, masque atše amëndayentsá bomnantšana tsěntsañnaca ca.

<sup>24</sup> Chentšana, chë tobiáše yojéftsebcna y chabe mamábioye ibojatjaye: —¿Ndayá chjotjañe ca?

Y chabe mamá ibojojuá: —Juan chë Ubayanabe bestšaše ca.

<sup>25</sup> Cachora chë tobiáše betscó chë rey yojtsemnoye tojtanamashëngo, y tbojaniana: —Atše séntseboše, cam ora Juan chë Ubayanabe bestšaše canye šcneněšife chašcuatsetá ca.

<sup>26</sup> Herodes chama corente tbojanongmé, pero chë entšangbe delante y jajúrase tbojansbuachená causa, ndoñe yonjobenaye ntšamo tbojaniancá jeběbuetámenana.

<sup>27</sup> Cachora chë rey canye soldado ibojíchmua, Juanbe bestšaše chauyěbama. <sup>28</sup> As chë soldado cárceloye tojána, Juánbioye bestšaše tbojšaněštjango, y canye šcneněšife tojanamba. Chë tobiášbioye tbojaněntšabuaché, y chana, chabe mamábioye.

<sup>29</sup> Juanbe ústonënga chama imojátatšěmbona ora, choye tmojánashajna, chabe cuerpo tmojėsanocñe y jauátbontsama tmojána.

*Jesús shachna uaranga boyabásenga saná tojanacaredadó*

*(Mt 14.13-21; Lc 9.10-17; Jn 6.1-14)*

<sup>30</sup> Chë Jesús tojánichamonga chábioye tmojtashajna ora, lempe ntšamo tmojanmama y tmojanabuatambama cha tmojancuentá. <sup>31</sup> Chora Jesús tojaněyana: “Cuajna ínjoye, entšanga ndoyena luaroye, bašatema jóchna ca.” Cha chca tojánayana, er tša entšanga imojtsaye y imojtsaběbana; ni mo jasama ndoñe luare imontsebmoma.

<sup>32</sup> As cányenga barquěshañe tmojtsanoñe, entšanga nděbínjoye. <sup>33</sup> Pero chënga imojtsoñama entšanga tmojánanye, y nděmuanyenga imojamnama imojtsetátšěmbo; chcasna, chë entšanga shecuátšeca betscó tmojána, nyetsca pueblënguentšana, y chëngbe natsana choye tmojánashajna. <sup>34</sup> Chentšana, chë barquěshoicana tojánastjango ora, Jesús ba entšanga tojánanye; chëngbiana tbojanongmé, er imojtsemna mo abuajěnyá ndbomna oveshëngcá; y tojanontšé ba soyëngama jabuátambana.

<sup>35</sup> Ya jetiñe yojtsemna orna, chabe uatsjëndayënga tmojanobobeconá y tmojaniana: —Ya jetiñe entsemna, y quem luariñe ndocná quenatiyena. <sup>36</sup> Entšanga cuantichamuá, pueblotëmngoye y inye luarëngoye chamotsoñama, ndayánaca jasama chamobuamiñama ca.

<sup>37</sup> Y Jesús tojaněyana: —Tšëngaftanga saná chëngbioye šmochjacaredádaye ca.

Chora chënga tmojaniana: —Crocénana queftšátsbomna, uta patse denario nyetšá, chëfta entšangbiana saná jabuámiyama ca.

<sup>38</sup> As Jesús tojaněyana: —¿Bueta tanděse šmojtsebmoma? Marrepárange ca.

Ya imojtsetátšěmbo ora, tmojaniana: —Shachna tanděse y uta beónata fsěntsebmoma ca.

<sup>39</sup> Chora Jesús entšanga tojanamëndá ínjoya ínycoca chamoshěntšatbiamama. <sup>40</sup> As chënga tmojanotbiana patse patsënga y shachna bnětsátsanënga. <sup>41</sup> Chora Jesús chë shachna tanděse y chë uta beónata tojanca, y celoye jontjeshyěse, Bëngbe Bětsábioye chama tbojtanchuá. Chentšana chë tanděšënga tojanjatá y chabe uatsjëndayënga tojanayentšbuaché chë entšanga jatšatayama. Y chë uta beónatnaca nyetscanga tojanějátaye. <sup>42</sup> Nyetscanga tmojanse jtoshachaye nyetšá. <sup>43</sup> Y chentšana, chë tanděse y chë beonentšana ojamnětëmënga tmojanatbaná, y bnětsana uta sbarěcua tmojanajutjé. <sup>44</sup> Chë saná tmojansënga imojamna shachna uaranga boyabásenga, shembásenga y básenga ntjacuntacá.

*Jesús béjaye juatsbuacá yojtsaye*

*(Mt 14.22-27; Jn 6.16-21)*

<sup>45</sup> Chentšana, Jesús chabe uatsjëndayënga tojanamëndá chë barquěshoye jtašnjama, chë uafjajónaye chenguana jangana y chabe natsana Betsaida ca uabaina puebloca jashjanana. Chënga imojtsebcaněntscuana, Jesús chë entšanga yojtichamuá. <sup>46</sup> Nyetscanga tojtandiošoftá ora, tjoye cha tojtšanoñe Bëngbe Bětsáftaca jencuéntama.

<sup>47</sup> Yojtseibétatana ora, chë barquěsha uafjajónaye tsěntsaca yojtsamna, y Jesús, canya fshantsoca. <sup>48</sup> Jesús tojáninye chëngbiana totcá yojtsemna, chë barquěshaca natsanoye jtsayana, er binýia chëngbe contra yojtsemna. Ya binýiana ora, chëngbioye yojobeconá, béjaye juatsbuacá yojtsaye, y ya chëngbiajana nye ndericho jachñënguama yojtsemna. <sup>49</sup> Y chënga, chë béjaye juatsbuacá cha yojtsayama tmojáninye ora, tmojanjuabó cha canye añeměse yojtsemna ca, y tmojanontšé yoyana; <sup>50</sup> er nyetscanga chca tmojáninye y cochauatjanánënga imojtsemna. Pero Jesús cachora tojaněyana: “¡Añemo šmochtsebmoma; atše Jesús sěndmëna; ndoñe matauatjëngana ca!”

<sup>51</sup> Chorna, chënga imojtsemna barquëshoye cha tojánasëngo, y chë jabuache binjya tojanëjbana, y nyetscanga puerte auatjanänënga y ojananänënga imojtsemna. <sup>52</sup> Chënga tmojáninÿe chëfta entsànga tandëse jujátayana, pero chëngbe ainanoca cabá ndoñe imontsobena josértana, Jesús lempe jamama obená bëtsemnama.

*Genesaret ca uabáinoca Jesús ba soquënga tojanashná  
(Mt 14.34-36)*

<sup>53</sup> Chë uafajónaye tmojánenashbuachengo ora, Genesaret ca uabaina luaroye tmojánashjajna, y chë uafajónaye tsachoca chë barquëshu tmojanëtsbua. <sup>54</sup> Chë barquëshoicana tmojánastjajna y cachora entsànga Jesús tmojantëmbá. <sup>55</sup> Chíyeca, chë luariñe yebnënguenache betesco chënga tmojána, y tmojanontsé chë soquënga tjuashënguifne juyambana, chë ndémoye tmojanuena Jesús yojtsemna luaroye. <sup>56</sup> Y ndayentse cha tojámashëngüentse, publënguifne, bëtts publënguifne y base pueblotémënguifnaca, chë soquënga benachoye imojtsëbuacana, y Jesús corente imojtseimpadana chë soquënga chaualesenciá, ñye mo chabe entsáyá sibúajua juabojajuana. Y nyetscanga tmojuábojajënga tsábá imojtsatsmëna.

## 7

*Ndáyeca canÿe entsá Bëngbe Bëtsabe delante ndoñe tsabia nántsemna  
(Mt 15.1-20)*

<sup>1</sup> Chentšana, fariseunga Jesúsbiyoye tmojanobeconá y báseftanga ley abuátambayëgnaca, Jerusalencana áshjajnënga. <sup>2</sup> Chënga tmojáninÿe básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá. <sup>3</sup> Er chë fariseunga y nyetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëtts taitanga imojanamancá. Chënga imojanjuabná, chca jtsamëse Bëngbe Bëtsabe delante tsábënga jtsatsmënama ca. <sup>4</sup> Chë sananga enocana tmojtshango ora, ba soye ndoñe tmontsacuentšabese, tondaye ntjasana; y ba soyëgnaca imojánama, pero ñye chëngbe bëtts taitanga chca jamana imojanamánayeca, mo chë béjayeca juabáyana tazëšënga, matbajënga, calderëshënga y jutsnëshangá. <sup>5</sup> Chë causa, chë fariseunga y chë ley abuátambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo bëngbe bëtts taitanga monjanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tsábá jtsatsmënama ca?

<sup>6</sup> Chora Jesús tojanëyana: —Ñye tsábá chë Bëngbe Bëtsabe juabna oyebuambnayá Isaías tsëngaftangbiana tojánayana, bacna entsànga chë ntšamo ndegombre šmojuabnacá ndinÿinÿinayënga ca, mëntšá enduabemanentse: Quem entsànga mondbëtsichamo Bëngbe Bëtsá tša tsabia yomna ca; chca ñye uayásaca, pero chëngbe ainanentse ndocna tsabe juabnëngaca.

<sup>7</sup> Pero chënga ñye bonamente mondbëtsichamo Bëngbe Bëtsá tša tsabia yomna ca; chënga ñye entsàngbe mandënga jtsabuátambayana, y Bëngbe Bëtsabe mandënga ndoñe ca —cha tojánayana.

<sup>8</sup> Chora Jesús tojanëyana: —Ntšamo Bëngbe Bëtsá tojanmandacá stëtsoye tsëngaftanga šmojtsequedá, ñye ntšamo entsànga monduamancá jtsamama ca.

<sup>9</sup> Y mëntšánaca tojanëyana: “Tsëngaftanga ntšamo Bëngbe Bëtsá tojanmandacá stëtsoye jtsequédana, ñye ntšamo tsëngaftangbe anteunga imojanamancá jtsamama. Tsëngaftanga jtsejuabnayana tsábá šmojtsama ca chca šmojtsama ora. <sup>10</sup> Moisés tonjánayana: ‘Acbe bëttsëtsata ndoñe stëtsoye catjquedaye’, y ‘nda chabe bëttsëtsabiana ndoñe tsábá tonjoyebuambá chana, jóbana jtsemnana ca.’ <sup>11</sup> Pero tsëngaftanga šmondbëtsichamo, canÿe entsá yobena chabe taitá o chabe mamá jáuyanana: ‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana ‘Bëngbe Bëtsabiana uátšëmbona soyënga ca’). <sup>12</sup> Tsëngaftanga šmondbëtsichamo, nda chca tojanayëse, ya ndoñe obligaciönaca ntsemnana chabe taitá o mamabiana ndayánaca jamama ca. <sup>13</sup> Chca, tsëngaftanga šmontsama entsànga Bëngbe Bëtsabe palabra stëtsoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entsàngbeñe tempscana y mëntsoñama yochnëjuancá. Y ba soyënga tsëngaftanga cachcá šmontsama ca” —Jesús tojánayana.

<sup>14</sup> Chora Jesús, cachifne entsànga tojtanchembo y tojanëyana: “Nyetscanga šmochjouena y chacmësertá. <sup>15</sup> Ndayá entsá tojtsesacá, ndoñe ntjábemana ndoñe tsabia Bëngbe Bëtsabe delante. Inÿetšá comna: ntšamo entsá tojtsejuabná y tojtsoyebuambnacá endobena jabe-manana ndoñe tsabia Bëngbe Bëtsabe delante. <sup>16</sup> Chë jouenama tmojtsobenënga, šmochjouena ca” —cha tojánayana.

<sup>17</sup> Jesús entsànga tojéftsanabashejuana y yebnoye tojtanamáshëngo ora, chabe uatsjëndayënga tmojantjá ntšamo cha tojánayana. <sup>18</sup> As cha tojanëyana: “¿Tsëngaftángnaca

cabá ndoñe cmontsésertana ca? ¿Cabá ndoñe cmontsésertana, lempe ntšamo entšá tojascá ndoñe ntšobenana chábioye jabemana ndoñe tšabia Bēngbe Bētsabe delante; <sup>19</sup> er ainanoye ndoñe ntjómashēnguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana n̄yetsca sananga tšabá jasama yomna ca y chē saná ndoñe ntjamana can̄ye entšá bacna soye chaotsamama ca. <sup>20</sup> Y mēntšánaca tojánayana: “Ntšamo chē entšá tojtsejuabná y tojtsoyebuambnacá, chē soye cocayé endobena entšá jabemana ndoñe tšabia Bēngbe Bētsabe delante. <sup>21</sup> Er ainanocana jtsóbocanana bacna juabnēnga: shembásaftaca o boyabásaftaca bacna soye jamama, jatbēbama, jóbama, <sup>22</sup> bacna juabnēnga boyá o shēmbioye in̄yafaca jaingñama, jtsatbomnayama, n̄yetsca bacna soyēnga jamama, in̄yenga jaingñama, n̄ye cachá jenomándama ntšobencá jtsiyenama, in̄yabioye jtsántšabošama, in̄yabiama jtsayátsenayama, jtsenábotamnayama y n̄ye opēnga jtsobi-amnayama. <sup>23</sup> N̄yetsca quem bacna soyēnga entšabe ainanocana jóbocnana, y cha jabemana ndoñe tšabia Bēngbe Bētsabe delante ca” —cha tojánayana.

*Can̄ye shembása in̄ye luarocana ashjanganá Jesúsbeñe yojtsošbuaché*  
(Mt 15.21-28)

<sup>24</sup> Jesús chentšana, Tiro ca uabaina luaroye tojtsonoñe, y can̄ye yebnentše tojánamashēngo. Cha yojtseboše ndocná chama chaondētsetatsēmbuama; pero ndoñe yonjobenaye iytēmenana jatsmēnana. <sup>25</sup> Y betscó, can̄ye shembása, can̄ye bembe bacna bayēbe juabna uambayá ibnabomná, Jesusbiamá oyebuambnayana yojouena ora, chábioye tojánabo y chabe shecuatšentše tojanoshēntsamentšé. <sup>26</sup> Chē shembása ndoñe yonjamna judiá, sinó Sirofenicia luarocá. Tojánabo y Jesúsbioye thojanimpadá chabe bembetēmbentšana bacna bayēja chabuataábocnama. <sup>27</sup> Pero Jesús thojaniyana: — Atše šondmēna natsana judío entšangbiamá chē soyēnga jamana; chentšana cocayé chanjobenaye chca in̄ye entšangbiamá jamana. Atše acbiamá, can̄ye ndoñe judiá, soyēnga stjámēse, nántsemna mo chē básengbe saná quešēnga cuaftsēbuajocá ca.

<sup>28</sup> Y cha thojanjuá: —Arseñor, chca jtsemnana. Pero chē quešēngnaca mond-base chē básenga mojtšesá ora tmojatquécjanatemēnga. Chcasna, Diosmanda átšnaca šmotsajabuache ca.

<sup>29</sup> As Jesús thojaniyana: —Tšabá tcjayana; chcasna, acbe yebnoye motsatoñe. Chē bacna bayēja acbe bembetēmbentšana tonjésebocna ca.

<sup>30</sup> Chentšana, chē shembása chabe yebnoye tojtaná, y thojánin̄yena chē bembetema jutsnēshentše yojtsojájoñe, y chē bacna bayēja ya ndoñe chábeñe yontsemna.

*Jesús, can̄ye boyabása tšmá y ndēbiábioye thojanshná*

<sup>31</sup> Tiro pueblentšana Jesús tojēftsanbocna, y Sidón y Decápolis luarentša pueblēnguējana jachnēnguse, Galilea uafjajónayoye tojánashjango. <sup>32</sup> Cha chentše yojtsemna ora, chábioye tmojanánatse can̄ye entšá tšmá y ndēbiá, y tmojanimpadá chabe cucuatšēnga chē šocábeñe chaojájoma, chaboshnama. <sup>33</sup> Chorna Jesús entšángbentšana luaroye thojanánatse, cán̄yata. Chora chē šocabe matscuašoye ntšabuafjēnga yojajué, cucuatšīne yojabuashētjo, y chē šocabe bichtaja yojábojajo. <sup>34</sup> Chentšana, Jesús celoye tojanontješé, jabuache yojáshachna, y hebreo palabriñe thojaniyana: “¡Efata ca!” (Chca endayana “¡Chacmotsauenana ca!”)

<sup>35</sup> Cachora, chē boyabásabe matscuaše tšabá yojtsatsmēna y tšabá yojtsuenana; chē bichtaja tšabá yojtóbema y tšabá yojtsoyebuambnaye. <sup>36</sup> Y Jesús chē entšanga tojanamēndá chama ndocnábeñe ntsecuéntayana. Pero masque tša chama yojtsamēndaye, entšanga más chabiamá imojtsencuéntaye. <sup>37</sup> Chama chē entšanga puerte imojtsenjnanaye, y mēntšá imojtsichamo: “¡Lempe tšabá entsama! Chē tšmēnga chamouenama, y chē ndēbianga chamóyebuambama entsama ca.”

## 8

*Jesús canta uaranga entšanga saná tojanacaredadó*  
(Mt 15.32-39)

<sup>1</sup> Chē tempo, ba entšanga Jesúsbioye cachīne tmojanobeconá, y jasama tondaye imontse-bomna. As Jesús chabe uatsjēndayēnga tojánachembo y tojanēyana: <sup>2</sup> —Quem entšangbiamá šontsengmena, er ya unga te átšeftaca montsemna y mora jasama tondaye quemátsbomna. <sup>3</sup> Cachēngbe yebnoye tondaye ntjascá stichamuase, shēntsama benachējana nantsabuatēcja; y báseftanga bēn luarocana tmojabo ca.

<sup>4</sup> As chabe uatsjēndayēnga tmojanianyana: —¿Ntšamo nda nanjobenaye quem luarentše, ndocna entšá ndoyentšē, chēfta entšangbiamá saná jin̄yenama ca?

<sup>5</sup> Chora cha tojanatjá: —¿Bueta tandēse šmojtsebomna ca?

Y chēnga tmojanjuá: —Can̄yēšfta ca.

<sup>6</sup> Chentšana, Jesús tojanamēndá entšanga chamoshēntsjatbiamama. Chorna, chē can̄yēšfta tandēse tojanca y Bēngbe Bētsábioye chama thojanchuá. Chentšana tojanjatá,



chabe uatsjédayénga tojanéjatá, y chéngna ché entsángbioye. <sup>7</sup> Básefta beonatéméngnaca inmabomna; as Jesús, Bèngbe Bètsábioye chama tbojtanchuá y chabe uatsjédayénga tojanaméndá entsánga jujátayama. <sup>8</sup> Njétscanga tmojanse jtoshachaye njétsá. Chentšana cabá canýséta bèts sbarécua tmojanajutjé ché ojamnétéméngaca. <sup>9</sup> Ché tmojansénga imojamna mo canta uaranga njétsá. Chentšana Jesús ché entsánga tojtanadiosoftá. <sup>10</sup> Chora Jesús barquëshañe tojánenjoyiye chabe uatsjédayéngaftaca, y tmojtsanoñe Dalmanuta ca uabaina luaroye.

*Ché fariseunga tmojánbošena, Jesús chaoma canýe bèts soye, chabe ndegombre obenana jinýama*

(Mt 16.1-4; Lc 12.54-56)

<sup>11</sup> Chentšana, fariseunga tmojánabo y tmojanontsé Jesúseftaca enatsétsnayana. Y jisháchichiyama, imojtseimpadana canýe bèts soye chaoma, as jtsetatsémbuama Jesusbe obenana Bèngbe Bètsábocana ndegombre tainóbocanama. <sup>12</sup> Y Jesús ngménaca, jabuache yojáshachnése, méntšá tojánayana: “¿Ndáyeca tséngaftanga, ché mora oyenénga, šmojtseboše canýe bèts soye chaimama tséngaftanga atšbe obenana jinýanjýyama ca? Ndegombre chéyana, quem entsánga ndocna chca soye quemochatínýe ca.”

<sup>13</sup> Chorna ché entsánga cachcá tojesanénýá, ché barquëshoye yojtamáshéngo, y uafjajónaye chenguana yojtsoñe.

*Jesús tojanabuayená fariseungbe buatémbana soyéngama*

(Mt 16.5-12)

<sup>14</sup> Ché uatsjédayénga yojésebnétjomba ndaye soye jasama jesocñama, y ché barquëshoye nýe canýe tandése imojtsebmoma. <sup>15</sup> Jesús tojanéyana: —Smochtsantjesna; cuedado smochtsebmoma fariseunga y Heródesbe levadurama ca.

<sup>16</sup> Chora ché uatsjédayénga tmojanontsé enatsétsnayana: —Chca entsichamo, benga tandése ndoñe tmonjesocñama ca.

<sup>17</sup> Jesús yojtsetátšémbo, chabe uatsjédayénga imojtsejuabnaye chana tandésama yojtsétsétsnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyénga jtsamése imojoyenama. Chcasna, méntšá tojanéyana: —¿Ndáyeca tandésama šmojtsoyebuambná? ¿Cabá ndoñe cmontsésertana, ni šmontsetátšémbo? ¿Ainanoca ndoñe šmontseboše chacmésertama? <sup>18</sup> Bominýe šmondobomna, pero ndoñe quešmátobena jinýana; jouenama šmondobena, y ndoñe quešmátuenana, y ndayá tijamama ndoñe quešmatsjuabná. <sup>19</sup> Ché shachna uaranga entsánga shachna tandésentšana sènjanejató chentšana, ¿bueta sbarécua ché ojamnétéméngaca šmènjanejajutjé ca? —Cha tojanatjá.

Y chénga tmojanjuá: —Bnètsana utáca ca.

<sup>20</sup> —Y ché canýséta tandésentšana canta uaranga entsánga sènjanejató chentšana, ¿bueta bèts sbarécua ché ojamnétéméngaca šmènjanejajutjé ca?

Y chénga tmojanjuá: —Canýsétáca ca.

<sup>21</sup> As Jesús tojanéyana: —¿Y cabá ndoñe cmontsésertana ca?

*Jesús canýe jtanábioye tbojanshná, Betsáida puebloca*

<sup>22</sup> Chentšana tmojánashajna Betsáida puebloca; y chora, entsánga canýe boyabása jtaná Jesúsbioye tmojanánatse, y tmojanimpadá cha jaboajuana chabotseshnama. <sup>23</sup> As, ché jtanábioye tbojanábuacueshache, y ché pueblo chaboye tbojanánatse. Chorna, yebuáyeca ibojabuchanétjo, y chábeñe cucuatšénga yojajájua, y tbojantjá nderado ndayá jinýama tayojtsanobena ca. <sup>24</sup> As ché jtaná yojontjesiye y tojánayana: —Boyabásenga sèntsénýa; mo betiyéngcá montsemna, pero montsobonjá ca.

<sup>25</sup> Chora Jesús, ché jtanabe fšnébeñe cachiñe cucuatšénga yojajájua. Y ché boyabása yojtsobena lempe tsabá jinýama; ya shnaná yojtoquéda. Y yojtsobena njétsca soyénga botamana jinýana. <sup>26</sup> Chentšana, Jesús cachabe yebnoye tbojtaničmó y méntšá tbojaníyana: —Ché puebloye ndoñe catjéftsamashéngo ca.

*Pedro tojánayana, Jesús ché Cristo bétsemnama*

(Mt 16.13-20; Lc 9.18-21)

<sup>27</sup> Chentšana, Jesús tojánbocna chabe uatsjédayéngaftaca Cesarea de Filipino luaroca puebléngoye, y benachiñe chabe uatsjédayénga tojanatjá: —¿Nda atše bétsemnama ca entsánga imojtsichamo ca?

<sup>28</sup> Y chénga tmojaníyana: —Inýenga montsichamo Juan ché Ubayaná ca, inýengna Elías ca, y inýengna, canýe Bèngbe Bètsabe juabna oyebuambnayá ca.

<sup>29</sup> As Jesús tojanatjá: —Y tséngaftangna, ¿nda atše bétsemnama ntšamo šmochjayana ca?

Y Pedro tbojanjuá: —Acna ché Cristo condmèna, ché Bèngbe Bètsabe Uámana Uabuayaná ca.

<sup>30</sup> Chentsana Jesús corente chënga tojanamëndá, chë nda cha yojamnana ndocnábeñe ntsecuëntayana.

*Jesús tojánayana cha ibojamna jóbanana y jtsayenana ca*  
(Mt 16.21-28; Lc 9.22-27)

<sup>31</sup> Y Jesús tojanontsé chabe uatsjéndayënga jabuátambana, cha, chë Bëngbe Bëtsá Entsá tbojanbemá, ibojamna puerte jasúfria ca; chë judiëngbeñe bëtsëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtemnana ca. Entsanga mochjanóba, pero unga tianoye yochtanayena ca. <sup>32</sup> Nÿetscanga catafjosertaycá chama yojtsóyebuambnaye. As Pedro, Jesúsbioye luaroye tbojanánatse, y tojanontsé jtsáuyanana. <sup>33</sup> Pero Jesús yojobuértana, chabe uatsjéndayënga tojanënyañé, y Pédrëbioye mëntsá tbojtsanbochembo: “¡Satanás, átsbentšana mojuaná! Pedro, achë juabnënga Bëngbe Bëtsábíocana ndoñe quenatóbocana, sinó nÿe entsángbentšana ca.”

<sup>34</sup> Chentsana, Jesús chabe uatsjéndayënga y chë inÿe entsanga tojánachembo chamouenama, y tojanéyana: “Nda atšbe uatsjendayá jtemnana tojtseboše, cháuyana nÿe Bëngbe Bëtsá yobena sempre chabe vidíñe jtemándayana ca, chabe quem luarentsa soyënga cachcá chauesonyá atše juastama, y atšbiana jasúfria chaotseprontana y cruciñe jobanámnaca. <sup>35</sup> Nda tojtsama quem luarentse bëtscá soyënga jtebomnana y atšbiana jasúfria ndoñe tontseprontana, chë nÿetsca tescama yomna tšabe vida echanjopérdia. Pero nda quem luarentsa soyënga cachcá tojëftsonyá atše juastama, y chë tšabe noti-ciënga atšbiana abuántsbaye causa, masque chaóbana, chë nÿetsca tescama yomna tšabe vida echántsebomna. <sup>36</sup> ¿Ndayama entsá buanjósërvia nÿetsca quem luarentsa soyënga jtebomnana, chë nÿetsca tescama yomna tšabe vida tojtsoperdese? <sup>37</sup> Er canÿe entsá chë nÿetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nÿetsca tescama yomna tšabe vida jtebomnana. <sup>38</sup> Chcasna, nda mora atšbiana y atšbe buayenana soyëngama tojtsëuatja entsángbeñe, chënga chë Bëngbe Bëtsábiana nduauenanënga y bacna soye amënga, chë Bëngbe Bëtsá Entsá tbojanbemánaca chabiana echantsëuatja, chabe Taitabe bëts obenánaca y chabe angelëngaftaca chaojésabo ora ca” —cha tojanéyana.

## 9

<sup>1</sup> Mëntsánaca Jesús tojanéyana: “Ndegombre cbëyana, báseftanga muentše montsemnënga ndoñe quemochatóbana, Bëngbe Bëtsá entsángbeñe chabe obenánaca jabomándama jabana ntjëftsinycá ca.”

*Jesús inÿetsá tojanobinÿná*  
(Mt 17.1-13; Lc 9.28-36)

<sup>2</sup> Chentsana chnënguana tianoye, Jesús tojëftsanëbiatše Pedro, Santiago y Juan, y ínÿoye tojanënatse nÿe chënga, canÿe bëts tjoje. Y chëngbe delante Jesús inÿetsá tojanobinÿná; <sup>3</sup> chabe uichëtjonëjuangá tša yojtsabuashinÿinÿyana; corente uafjantsëjuangá yojtsamna; nÿa chca juafjantsama ndocná quem luarentše quentatobenaye. <sup>4</sup> Chca orna, chë uatsjéndayënga tmojáninÿe, Moisés y Elías tbojanobinÿná Jesúseftaca encuëntaye.

<sup>5</sup> Chora Pedro, Jesúsbioye tbojaninyana: “¡Buatëmbayá, tša tšabá bëngbiama cuanmëna muentše jtemnana ca! Mora fchanjapórma unga tambotëmënga: canÿetema acbiana, ínÿetema Moisesbiana y ínÿetema Elíasbiana ca.”

<sup>6</sup> Chca tojánayana, chë uatsjéndayënga yapa auatjanánënga imojtsemna causa, y Pedro ndoñe yontsetátšëmbo ntšamo jayanana. <sup>7</sup> Chora canÿe jantsetëshe yojóbema, y chëngbioye yojáutsbotse; y chë jantsetëshoicana canÿe oyebuambnayana tojanóbocna, mëntsá: “Mua atšbe bonshana Uaquíñá endmëna; cha šmochtseyeyanana ca.”

<sup>8</sup> Y ndeolpe, chëngbe shëconana tojanrrepará ora, ya ndocná más tmonjáninÿe; nÿe Jesús canÿa chëngaftaca yojtsemna.

<sup>9</sup> Chë tjocana imojtsatsstmaye ora, Jesús chë uatsjéndayënga tojanamëndá: —Bëngbe Bëtsá Entsá tbojanbemá obenënguentšana candëtayenëntscuana, chë mënté tjoca šmonjinÿe soyama ndocnábeñe šmattsecuëntaye ca.

<sup>10</sup> Chë uatsjéndayënga aiñe chca tmojanuena; pero chënga imojtsentjanaye ndayá cha yojtsentsáyana, cha yochtanayena ca cha tojánayana ora. <sup>11</sup> Y Jesúsbioye imojtsetjanaye: —¿Ndayeca chë ley abuátambayënga mondbétsichamo, canmëna Bëngbe Bëtsabe Uámana Uabuayanabe natsana Elías jabana ca?

<sup>12</sup> As cha tojanéjua: —Ndegombre, canÿa Eliascá natsana echanjabo, y ntšamo jtemnana yomncá lempe echánjabatsma. Pero ntšamo Bëngbe Bëtsabe uabemana palabrënguiñe endayancana, Bëngbe Bëtsá Entsá tbojanbemá puerte caochjasúfria, y ínÿenga puerte camochtsáboyënja ca. <sup>13</sup> Ndegombre cbëyana, canÿa Eliascá ya tonjabo, y cháftaca entsanga

tmonjanma lempe ntšamo tmojabošencá, ntšamo chaochnënguama Bëngbe Bëtsabe uabemana palabrenguine endayanca.

*Jesús, canye basa bayëbe juabna uambayábioye tbojanshná*  
(Mt 17.14-21; Lc 9.37-43)

<sup>14</sup> Chentšana, chënga tmojtaná chë inye uatsjëndayëngbioye. Chora, Jesús tojáninye ba entšanga chë uatsjëndayëngbe shëconana imojtsemnama, y básefta ley abuatambayëngna chëngaftaca imojtsenatsëtsnaye. <sup>15</sup> Njëtscá entšanga cha tmojáninye ora, imojenjaná y tmojanótájajo cha jachuyama. <sup>16</sup> Chora Jesús chënga tojanatjá: —¿Ndayama chëngaftaca šmenatsëtsná ca?

<sup>17</sup> Y canya entsanguentsá tbojanjá: —Buatëmbayá, muentše ácbioye sënjuánatse atšbe uaquiná; bacna bayëbe juabna entsambá, y chë causa, jóyebuambayama ndoñe quenátobena. <sup>18</sup> Nye ndayéntsáca cha tojtsemnentše, chë bayëja chábioye jishachana y jtsenajuáchesënjana; chentše uayoicana shashiye jtsabocanana, jtsenoftëšfjojnayana y obanacá jtsatsjájonana. Acbe uatsjëndayënga sënjaimpadá chë bacna bayëja chamuatábocnama, pero ndoñe chematobená ca —cha tbojanayana.

<sup>19</sup> As Jesús tojánayana: —¡Njëtšá ndošbuáchiyënga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? ¡Moye chë básetema manatse ca!

<sup>20</sup> Chora chë básetema chábioye tmojanánatse; y chë bayëja Jesúsbioye tbojáninye ora, tojanma chë basa ataque chaboshachama, y chë basa fshantsoye yojashajaye, yojtsojan-duounaye y uayoicana shashiye yojtsábocana. <sup>21</sup> As Jesús chë básabe taitábioye tbojantjá: —¿Buetayté chca yojtsepása ca?

Y cha tbojanjá: —Básetema orscana chca; <sup>22</sup> ba soye, chë bayëja chábioye iñoye jtsatmetšana y buyeshoye jtabuetsána, jtsóbama. Chiyeca, nderado ndayá chabiama jamama tcojtsobenëse, bënga šmotsalastemá y šmotsëjabuache ca.

<sup>23</sup> Chora Jesús tbojanayana: —¿Ndáyeca “ndayá jamama tcojtsobenëse ca” šcjayana? Nda Bëngbe Bëtsábeñe tojtsošbuáchebiana lempe endopodena ca.

<sup>24</sup> Y chora chë básabe taitá tojanáyebuachena: —Añíe, Bëngbe Bëtsábeñe sëntsošbuaché; Diosmanda, ¡más jtošbuáchiyama šmajabuache ca!

<sup>25</sup> Y bëtsáca entšanga imojtsótotoma Jesús tojáninye ora, chë bacna bayëja tbojtsanbochembo mentsá: —¡Bacna bayëja, chë básetema tësmá y ndëbiá biamnayá; chábensána maisebocna y ndocna te más chábeñe catjésamashëngo ca!

<sup>26</sup> Y chë bayëja chábensána yojësebocna, yojtseyoye y chë básabioye jabuache ibojese-shatiyiyé; y chë básana mo obanacá tojanouedá, y chë causa banga imojtsichamo cha obaná yojtsemna ca. <sup>27</sup> Pero Jesús tbojanábuacueshache y tbojtanatsbaná; y chë básana yojtëtsaye.

<sup>28</sup> Chentšana, Jesús canye yebnoye tojánamashëngo, y chabe uatsjëndayëngna luaroca cha tmojantjá: —¿Ndáyeca bënga ndoñe fsënjobená chë bayëja jtabocnana ca?

<sup>29</sup> Y Jesús tojanéjua: —Chca bayëjënga jtëbuacanamna jobenayana nye Bëngbe Bëtsáftaca jencuëntase, chabuájabuachama jaimpádase ca.

*Jesús cachiñe tojánayana cha ibojamna jóbanana y jtayenana ca*  
(Mt 17.22-23; Lc 9.43-45)

<sup>30</sup> Chentšana tmojëftsanbocna ora, Galilea luarëjana imojtsajna; y Jesús yojtseboše chama ndocná chaondëtsatšëmbuama, <sup>31</sup> er cha chabe uatsjëndayënga yojtsabuátambaye. Mëntsá cachabiana yojanëtsëtsnaye: “Bëngbe Bëtsá Entšá tbojanbemá entsangbe cucu-atsiñe mochanjáboshjona; mochanjóba, pero chentšana unga tianoye echántayena ca.”

<sup>32</sup> Pero chënga ndoñe yontsósertana ntšamo Jesús yojtsanëtsëtsnacá, y chama jatstjanayamna chënga imojtsauatja.

*¿Nda chë más uamaná yomna?*  
(Mt 18.1-5; Lc 9.46-48)

<sup>33</sup> Chora Capernaum puebloye chënga tmojánashajana; y cach yebnentše imojtsemna ora, Jesús chë uatsjëndayënga tojanatjá: “¿Ndayama benachiñe šmabáyenatsëtsnaye ca?”

<sup>34</sup> Chëngna nye iytëca tmojanobiama, er benachëjana chënga imnayénatsëtsnaye, chënguentsá nda chë más uamaná bëtsemnana. <sup>35</sup> As Jesús tojanótbema, chabe bnëtsana uta uatsjëndayënga tojánachemo y tojánëyana: “Ndánaca nyëtscangbiana chë más uamaná jtsenama tojtsebošëse, cha chë más nduamaná chaóbema y nyëtscanga chaotsaserverna ca.”

<sup>36</sup> Chora Jesús canye básetema tbojánishache, chëngbe tsëntsaca tbojanatsá, tbojantbá y chënga tojanëyana: <sup>37</sup> “Ndánaca, átsbeñe ošbuachiya bëtsemnayeca, tbojofja canya mo quem basetemcá, chana atše jofjana; y nda atše sojofja, chora cha nye atše ndoñe ntjofjana, sinó chë šojichmó chábioynaca jofjana ca.”

*Nda ndoñe bëngbe contra tontsemná, bëngaftaca jtsemnana*  
(Mt 10.42; Lc 9.49-50)

<sup>38</sup> Juan, Jesúsbioye tbojaniana: —Buatëmbayá, bënga fsënjinye canye boyabása, y cha aca jótšëmbonëse, bacna bayëjbe juabna entšangbentsana endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

<sup>39</sup> As Jesús tbojanjá: —Ndoñe šmatjuauyaná; er ndocná quenátobena canye bëts soye jamana Bëngbe Bëtsabe obenánaca, atše jótšëmbonëse, y chentsana atšbe contra jatöyebuambayana. <sup>40</sup> Ndegombre, nda ndoñe bëngbe contra tontsemná, bëngaftaca jtsemnana. <sup>41</sup> Y ndánaca, masque nye býeshtema tsëngaftanga tcmojubuatšatá, tsëngaftanga átšbenga bëtsemnaye, chábioye Bëngbe Bëtsá canye uacanana soye bochántatšetaye, cha chë tsabe soye tojamama ca.

*Resjo yomna, nderado bacna soyënga cuanjama*  
(Mt 18.6-9; Lc 17.1-2)

<sup>42</sup> Chentsana Jesús tojánayana: “Canya átšbeñe ošbuachiyábioye mo quem basetemcá, nda tbojaingnë atše ustonama chaotsajbanama, más tsábá chabiama nántsemna canye bëts nantsnëbé chamotsetamošëntšbua y mar bëjayoye asentoye chamotsashbuetše chabotse-natjëmbama. <sup>43</sup> Nderado acbe cucuatšëca bacna soye tcojama, más tsábá nántsemna chë cucuatše chacotsenacuéstjango. Acbiama más tsábá endmëna celoye jamashënguana nyëtscá tescama vida jtsebmomna, nye canye cucuatše bomná, y ndoñe nyëtš útatšëca infiernoye chacmotocá jama, chë ndocna te yochanjáfsana íñeshoye; <sup>44</sup> choca útsenënga puerte nyëtscá tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátšfsana.

<sup>45</sup> “Nderado acbe shecuátšëca bacna soye tcojama, acbiama más tsábá nántsemna chë shecuatše chacotsenashëcuátšjango. Acbiama más tsábá endmëna cosheto celoye jamashënguana nyëtscá tescama vida jtsebmomna, y ndoñe nyëtš útatšëca infiernoye chacmotšëtšëna; <sup>46</sup> choca útsenënga puerte nyëtscá tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátšfsana.

<sup>47</sup> “Nderado acbe bominyëca bacna soye tcojinye y cachca soye tcojama, más tsábá nántsemna chë bominye chacotsenobuchjátsëca. Acbiama más tsábá endmëna Bëngbe Bëtsabe amëndayoye jamashënguana nye canye bominye bomná, y ndoñe nyëtš útabeca infiernoye chacmotšëtšëna; <sup>48</sup> choca útsenënga puerte nyëtscá tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátšfsana.

<sup>49</sup> “Tamó tsabe soye endmëna. Ntšamo chë tamó canye tsabe soye endmëná, Bëngbe Bëtsá echanjama nyëtscá tsëngaftangbiana tsábenga chašmotsemnana, chë átšbeñe betsošbuáchemá šmojtsepadecena ora šmojuantase. <sup>50</sup> Tamó tsabe soye endmëna. Pero chë tamó fténana tojtsóbemëse, ndoñe quešmátobena jamana cachiñe chabe tempšca sanana chaotsatsbomnana, ni saná jatamuama. Mo tsabe tamocá entšangbiama šmochtsemna, chëngbeñe jtsiyenëse ntšamo Bëngbe Bëtsá yobošcá, y nyëtšcángaftaca natjëmbana šmochtsiyena ca” —cha tojánayana.

## 10

*Ndayá Jesús tojanabuatambá bouamnënga tmojtšëntšënamá*  
(Mt 19.1-12; Lc 16.18)

<sup>1</sup> Chentsana, Jesús chë luarentšana tojéftsanbocna y tojána Judea luaroye y Jordán chenguana. Entšanga cachiñe chábioye tmojánabo, y cha chënga yojtšabuátambaye, chë ntšamo jamana yojanamancá. <sup>2</sup> Básefta fariseunga chábioye tmojanobeconá, y jisháchichiyama mëntsá imojtšëntšënamá: —¿Queojtšëseleciana canye boyá chabe shëmbioye cachcá jesonýayama ca?

<sup>3</sup> Chora cha tojanëjua: —¿Ntšamo Moisés chë soyëngama tcmënjamamëndaye ca?

<sup>4</sup> Y chënga tmojánayana: —Moisés tojanalesenciá chë boyá chabe shëmbioye chabuiyé canye tsbuanácha, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonýá ca.

<sup>5</sup> Chora Jesús tojanëyana: —Tsëngaftanga Bëngbe Bëtsabe mandënga ainaniñe jöyëngacñama ndoñe quešmátšboše causa, Moisés chca tsëngaftanga tcmojéftšanamëndá.

<sup>6</sup> Pero quem luare jobojátšama orna, “Bëngbe Bëtsá canye boyabása y canye shembása tonjánabiamá. <sup>7</sup> Chýyeca, chë boyabása chabe taitá y chabe mamá echanjésabashejuana, chabe shëmaftaca jenútanama, <sup>8</sup> y chë útatna mo canýacá bochántsemna.” Y chca, ya ndoñe útata quebochátmëna, sinó nye mo canýacá. <sup>9</sup> Chcasna, entšá ndoñe chaondëndbema ndayá Bëngbe Bëtsá mo canýiñcá tojéftšema soye ca —cha tojánayana.

<sup>10</sup> Ya cach yebnocá imojtsatsmëna ora, chabe uatsjëndayënga cach soyama imojtëttšjaye. <sup>11</sup> Y Jesús tojanëyana: “Nda chabe shëmbioye cachcá tbojesonýá y inýaftaca tojtöbouamase,

cha chë natsana shémbioye inýe shembásaftaca jtseíngñayana; chana canýe uabuatmá jtse-bomnana. <sup>12</sup> Y chë shema chabe boyábioye cachcá tbojesonýá, y inýaftaca tojtóbouamase, chánaca chë natsana boyábioye inýaftaca jtseíngñayana; canýe uabuatmá jtse-bomnana ca” —Jesús tojánayana.

*Jesús, basetémëngbiama Bëngbe Bëtsábioye tbojanimpadá*  
(Mt 19.13-15; Lc 18.15-17)

<sup>13</sup> Entšanga, basetémënga Jesúsbioye tmojanënatse, chauabájajuama y Bëngbe Bëtsábioye chëngbiama chaboimpadama; pero chabe uatsjéndayëngna tmojanontsé chë basetémënga unachayënga jtsécacánana. <sup>14</sup> Jesús chca tojáninýe ora, tbojánetna y chë uatsjéndayënga tojanëyana: “Cachcá mónýaye chë basetémënga átsbioye chamuabo y ndoñe matéuyanana; er Bëngbe Bëtsabe amëndayana endmëna chë mo quem basetémëngcá imomnëngbiama. <sup>15</sup> Ndegombre chëyana, nda Bëngbe Bëtsabe soyënga ndoñe tonjóyëngacñe mo canýe basetemcá jtsosbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

<sup>16</sup> Y chë basetémënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tšabe bendicionënga chëngbeñe chaotsemnana.

*Canýe bomna entsá Jesúsbioye tojána*  
(Mt 19.16-30; Lc 18.18-30)

<sup>17</sup> Jesús jama tojtëtanontsé ora, canýe boyabása chábioye tojanótjajo, chabe shecuatšentsë tojanoshëntsamentsé, y mëntšá tbojantjá: —Tšabe Buatëmbayá, ¿ndayá šojtsemna jamana chë nýetsca tescama yomna tšabe vida jtse-bomnana ca?

<sup>18</sup> Y Jesús tbojanjuá: —¿Ndáyeca “tšabia ca” šcjayuana? Tšabia nýe canýa endmëna: Bëngbe Bëtsá. <sup>19</sup> Aca icotátšëmbo Bëngbe Bëtsá tojanmandacá: “Ndoñe catjóba, acbe shema inýaftaca ndoñe cattseíngñaye, ndoñe catjatbëba, ndoñe catjuaboínýena, inýëngbioye ndoñe catjáingñaye ndayánaca jabacama, y acbe bëtsëtsata ndoñe stëtšoye catjáquedaye ca.”

<sup>20</sup> Chora chë boyabása tbojanjuá: —Buatëmbayá, atse lempe chë mandënga básetema orscana sëndocumplina ca.

<sup>21</sup> Jesús bonshanánaca tbojanonýinýe y mëntšá tbojanianaya: —Canýe soye cmontse-buáshbena jamana: Motsa, lempe ntšamo icobomncá cochjetsatobuiye, y chë crocënana, ndbomnjëmënga cochatsataye; chca, celoca canýe bëts bomnana cochántsebomna. Chentšana, cochjabo y šcochjuasto ca.

<sup>22</sup> Pero chë bobóntsbioye inýëtšá ibojtsinýnana Jesús chca tbojanianama; y puerte ngmënaca yojtá, cha puerte bomná inamna causa.

<sup>23</sup> Chora Jesús cátoye tojanrrepará y chabe uatsjéndayënga tojanëyana: —¡Puerte totcá entsemna bomnëngbiama Bëngbe Bëtsabe amëndayoye jamashënguama ca!

<sup>24</sup> Chca imojouena ora, chë uatsjéndayënga ojanánënga imojtsemna, pero Jesús cachiñe tojanoyebuambá y mëntšá tojanëyana: —Atšbe básënga; ¡puerte totcá entsemna Bëngbe Bëtsabe amëndayoye jamashënguama! <sup>25</sup> Ndegombre, más paselo endmëna chë coshuffentša atëfñëjana canýe camello chauachnëngo, y ndoñe canýe bomná Bëngbe Bëtsabe amëndayoye jamashënguana ca.

<sup>26</sup> Pero chë uatsjéndayënga nýe más imojtsenjanaye y imojtsentjanaye: —¿As, nda yochjobenaye atsbocaná jtsemnana ca?

<sup>27</sup> Chora Jesús tojanënyanýe y tojanëyana: —Entšanga ndoñe quemátobena jamana canýa atsbocaná chaotsemnana, pero Bëngbe Bëtsá añe; er Bëngbe Bëtsá lempe jamana endobena ca.

<sup>28</sup> Chora Pedro tbojanianaya: —Aca contsonýá, bënga lempe chë fsëndbomna soyënga fsënjësebošhona y ácaftaca fsëntsajna ca.

<sup>29</sup> As Jesús tojánayana: —Ndegombre chëyana, ndánaca átsbioye jasërviana y chë tšabe noticiënga jábuayenama, tojësebošhona chabe yebna, catšátanga o uabënanga, bebmá o befta, o básënga, o fshantsënga, <sup>30</sup> cha mora quem luarentse echanjóyëngacñe chama patse soye más yebnënga, catšátanga, uabënanga, bebmanga, básënga, y fshantsënga, masque puerte chaosufrima inýënga mochántsama; y chë inýe luarocna, chë nýetsca tescama yomna tšabe vida echanjóyëna. <sup>31</sup> Pero banga, mora uámanënga imomnënga, nduámanënga mochántsemna; y banga, mora nduámanënga imomnëngna, uámanënga mochántsemna ca — Jesús tojánayana.

*Jesús cachiñe tojánayana cha jóbanama y jtayenama*  
(Mt 20.17-19; Lc 18.31-34)

<sup>32</sup> Chentšana Jerusalenoye imojtsaye, y Jesús yojtsebnatsana. Chë uatsjéndayënga puerte ojanánënga imojtsemna, Jesús ndauatjácá choye yojtsayama; y inýe becá entsanga ústonoye imojtsajnëngna, imojtsayáuatja. Jesús cachiñe chabe bnëtsana uta uatsjéndayënga barie

tojánachembo y tojanontsé jáuyanana ntšamo cháftaca jopásama yojtsemnana. <sup>33</sup> Měntšá tojaněyana: “Tšəngaftanga šmontsonýá, Jerusalenoye bəngə mora montsajnama. Chocna, chě Bəngbe Bětsá Entšá tbojanbemá, chě bachnangbe améndayəngə y ley abuatəmbayəngbe cucuatšifne mochanjáboshjona, y chəngə mochanjayana cha chaóbana ca; y ndoñe judiəngbe cucuatšifne mochanjáboshjona. <sup>34</sup> Chəngə mochantsáboyejuana, mochántsebušhěttojto, mochántsetjanja y mochanjoba, pero chentšana unga tianoye cha echántayena ca.”

*Santiago y Juan, Jesús tmojanimpadá canye pavor cháuabiamama  
(Mt 20.20-28)*

<sup>35</sup> Chora, Santiago y Juan, Zebedeobe uaquiñata, Jesúsbioye tbojanobeconá y tmojanianyana: —Buatəmbayá, bəndata fsəntseboše pavor chašcuabiamama ntšamo chacbojaim-padacá ca.

<sup>36</sup> Y Jesús tojanatjá: —¿Ndayá šojtseboše atše tsəndatbiamə chjamama ca?

<sup>37</sup> Y chata tbojanianyana: —Aca reycá chacojtsemánda ora, cochjalesencia bəndata fchay-obená jótbeməna, canya acbe catšbioica y inya acbe uañicuayoica ca.

<sup>38</sup> As Jesús tojaněyana: —Ntšamo šmontsojtjanañama tsəndata ndoñe quešnátstəšəmo. ¿Ntšamo atše chaitseufrincá, tsəndátnaca cachcá jasúfriama tašatjobenaye? ¿Y entšanga puerte bacá chacmojtšəbuatsená ora, tašochjauánta, ntšamo atše chjauantacá ca?

<sup>39</sup> Y chata tbojanianyana: —Añe fchanjobenaye ca.

Y Jesús tojaněyana: —Ndegombre tsəndátnaca atšcá šochanjasúfria, y atšbe causa cmochántsamna bətscá soyəngəma jasúfria. <sup>40</sup> Pero atše ndoñe quetsátobəna jamándana nda atšbe catšbioica y atšbe uañicuayoica chaótbeməma. Chě útəntse entsemna ndəmuənəngbiama atšbe Taitá tojaprontacá ca.

<sup>41</sup> Chě inye bnětsana uatsjəndayəngə chca tmojanuena ora, tmojanontsé Santiago y Juánoftaca jotjəyanana. <sup>42</sup> Pero Jesús nyetsca uatsjəndayəngə tojánachembo y tojaněyana: “Tšəngaftanga šmondətatšəmo, quem luarentša améndayəngə lempe jtsemándayana, nya mo nduiəngə cuafsemncá; y chě bətsətsa entšanga chəngbe obenánaca jtsemándayana, ntšámnaca jtsaměca; chě inye entšanga sempre chamotsayaunanama. <sup>43</sup> Pero tšəngaftangbeñe ndoñe chca chaondətsemna. Inyetsá; masna, nda tšəngaftangbeñe chě más uamaná jtsemnəma tojtseboše, cha bontsemna chě inyəngə jtsaservénana; <sup>44</sup> y ndánaca tšəngaftanguentsá chě más uamaná jtsemnəma tojtsebošá, bontsemna jtsemnəna nyetscangbiama, mo nye inyabiamə nyets tempo oservenacá. <sup>45</sup> Cachcá, Bəngbe Bětsá Entšá tbojanbemá ndoñe chenátəbo cha chamotseservénəma, ndayá inyəngə jabəserviamə. Y mo nda, inyəngə jətsebacəma cuafjopagacá, cha echanjóbəna ba entšanga atsebácanəngə chamotsemnəma ca” —cha tojánayana.

*Jesús canye jtanábioye tbojanshná  
(Mt 20.29-34; Lc 18.35-43)*

<sup>46</sup> Chentšana, Jesús y chabe uatsjəndayəngə Jericó uabaina puebləye tmojánashjajna. Y Jesús chabe uatsjəndayəngəftaca y bətscá entšəngəftaca Jericó puebləntšana vojtsaisə-bocəna ora, Timeobe uaquiñá, Bartimeo ca uabainá, canye jtaná leməšəna otjanañá, benache juachañe yojtsetbeməna. <sup>47</sup> Y Jesús Nazaretocá chějəna vojtsachnějuanəma cha vojátətsəmbəna ora, tojanontsé mēntšá uayebuáchəna: —¡Jesús, Davídbentšəna Entšá, šmotselastemá ca!

<sup>48</sup> Chorna, banga chě jtaná imojtsácacəna iytəca chaótbeməma. Pero cha más vojtsáyebuache: —¡Davídbentšəna Entšá, šmotselastemá ca!

<sup>49</sup> Chora Jesús tojantsá y chě inyəngə tojaněyana: —Chě jtaná mochembo ca.

As chě jtaná tmojanchembo, y mēntšá tmojanianyana: —¡Añemo cochtsebošmna; motsbaná! Jesús cmontsechembūana ca.

<sup>50</sup> Y chě jtaná, quefsaiya jtsenátsejquěse, vojontsənjə y betscə Jesúsbioye vojobeconá.

<sup>51</sup> Chora, Jesús chě jtanábioye tbojantjá: —¿Ndayá cojtseboše atše acbiama chjamama ca?

Y chě jtaná tbojanjuá: —¡Buatəmbayá, šmolesenciá atše chašuatəbinynəma ca!

<sup>52</sup> As Jesús tbojanianyana: —Motsatoñe. Tšabá jtsatsmənəma Bəngbe Bětsábeñe icošbuachéyeca, tšabá contsatsmənəca.

Y cachora cha tšabá ibojtabinynə, y Jesúsbioye benachějəna ibojtsəstəna.

## 11

*Jesús Jerusalenoye tojánashjango  
(Mt 21.1-11; Lc 19.28-40; Jn 12.12-19)*

<sup>1</sup> Ya Jerusalenoye imojtsebeconá ora, Betfagé y Betania puebləngə bəconəna, Olivos ca uabaina tjashe juachañe, Jesús uta chabe uatsjəndayəta tojanichamó, <sup>2</sup> y mēntšá tojaněyana: “Tsəndatbe natsəna entsemna base pueblotə moye motsata. Chašojáshjango y cachora šochanjinyəna canye burrotəma utsbuaná; chábeñe cabá ndocná tonjenojayə.

Sochjuajafjoná y sochjuánatse. <sup>3</sup> Nderado nda, ¿ndáyeca šmojtšanachá ca? chacmojátjase, sochjojuá: ‘Béngbe Utabná bontsájaboto y chora bochantabáiseboshjona ca.’”

<sup>4</sup> As chata tbojána, y tbojáninýena chë burrotema tsáshenañe, canýe bëshásañe utsbuaná, y imojuajafjoná.

<sup>5</sup> Y básefta entsanga chiñe imojtsemnënga, chátbioye tmojanëyana: “¿Ndayá šojtsama? ¿Ndayeca chë burrotema šojtsajafjná ca?”

<sup>6</sup> As chata tbojanjuá ntšamo Jesús tojanëyancá; y chë entsanga tmojanalesenciá chë burrotema chamuánatsama. <sup>7</sup> Chentšana, chë burrotema Jesúsbioye tmojanánatse; chë burrotémeñe chatbe entsáyá tbojánátjate, y Jesús chábeñe tojanenojayé. <sup>8</sup> Bëtscá entsanga chëngbe entsáyá chë benachëjana imojtsanëtétsatsana, y ínýengna chë jajoca imojuatëtsetse buacuashangá chiñe imojuacjaye. <sup>9</sup> Y chë natsana imojtsajnënga y chë ústonoyënga mëntšá imojtsaiuáyebuache: “¡Béngbe Bëtsá matschuanga! ¡Corente bendición bomná, chë Béngbe Utabnabe obenánaca tojabá! <sup>10</sup> ¡Tša tsábá chë echanjóshjango amëndayana, béngbe bëts taitá Davidd yojëftsemánda orcá! ¡Béngbe Bëtsá celocá matschuanga ca!”

<sup>11</sup> Jesús Jerusalenoye tojánashjango, y Béngbe Bëtsabe bëts yebnoye tojánamashëngo. Chabe shëconana lempe yojëftserrepárase, y ya yojtseibétatana causa, chabe bnëtsana uta uatšjéndayëngaftaca tojëftsanbocna, Betania puebloye.

*Jesús tojánayana canýe betiye ndoñe más chaondëshájona ca  
(Mt 21.18-19)*

<sup>12</sup> Yëfsana, Betaniocana Jerusalenoye chënga imojtészajna ora, Jesús tbojánishëntsena. <sup>13</sup> Bënocana canýe higo betiye yojinýe; as tojána jontješiyama tainashajo o ndoñe. Pero nýe tsbuanachënga chiñe yojinýena, chora ndoñe shajo tempo bëtsemna causa. <sup>14</sup> As Jesús chë higo betiyoye tojánayana: “¡Ndocna te más chaondëshájona entsanga chamosama ca!”

Y chabe uatšjéndayënga imojouena ntšamo cha tojanayancá.

*Jesús, Béngbe Bëtsabe bëts yebnentsana enënga y obuámnayënga tojtanëbuacna  
(Mt 21.12-17; Lc 19.45-48; Jn 2.13-22)*

<sup>15</sup> Jerusalenoye tmojánashjajnentšana, Jesús Béngbe Bëtsabe bëts yebnoye tojánamashëngo, y tojanontsé chentšana jtëbuacnana chë chentše imojtsena y imojtsobuámmañënga. Chëntšnaca imojtsemna entsanga canýe crocénana enënga, y chë crocénana nýe Béngbe Bëtsabe bëts yebnentsama inoservena. Chë entsanga crocénana atrocayëngbe mesëshangá tojtsanenásatajchquëca, y chë palomatëmënga enëngbe tsenëshëngnaca; <sup>16</sup> y ndoñe tonjanalesenciá ndocná Béngbe Bëtsabe bëts yebnëjana chë soyënga chaotsëchnëjuanama. <sup>17</sup> Y tojanontsé entsanga mëntšá jabuátambana: “Ndegombre, Béngbe Bëtsabe uabemana palabrenguñe cha mëntšá tojánayana: ‘Atšbe bëts yebna echantsabaina nýetsca luarentša entsangbiama átšeftaca encuëntaye yebna ca’; pero tsëngaftangna atbëbanëngbe oyeñiñe chë yebna šmojtsebema ca” —uámana tojanëyana.

<sup>18</sup> Chë bachnangbe más uámana amëndayënga y chë ley abuátambayënga tmojátantšëmbona ntšamo yojochnënguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nýetsca entsanga imojtsenjnanaye ntšamo cha yojanabuátambana. <sup>19</sup> Pero yojtseibétatana ora, Jesús chabe uatšjéndayëngaftaca chë bëts pueblentsana yojesóboçñe.

*Chë higo betiye tojtsanbuashá  
(Mt 21.20-22)*

<sup>20</sup> Yëfsana cachëse, cachëjana imojtészachnëjuana ora, tmojáninýe chë higo betiye parejo tbëjëngaca yojtsebuashá. <sup>21</sup> Chora Pedro yojenójuaboye ntšamo yojopásama; as Jesúsbioye tbojanianya: —¡Buatëmbayá, minýe; chë tconjayana ndocna te más tsabe betiye chaotsemnana betiye tojtsebuashá ca!

<sup>22</sup> Y Jesús tbojanianya: —Béngbe Bëtsábeñe šmochtsošbuáchiye. <sup>23</sup> Ndegombre chëyana, nderado nda quem tjoye tojayana, “¡chentšana mojuaná y bëts uafjajonayoye motsëshbuetše ca!” y chca tojayana ainaniñe inýetsá juabna ntjatsbomncá, y ainaniñe puerte tojtsobuaché ntšamo tojayancá añe yochjochnënguama, ndegombre chca echanjochnëngo. <sup>24</sup> Chíyeca cbochanjúayana, lempe ntšamo Béngbe Bëtsáftaca chašmojtsencuënta ora chašmojtsotjanañama, ainaniñe corente šmochtsejuabnaye ya šmojóyëngacñe ora, y ndegombre chca šmochántsebmoma. <sup>25</sup> Y Béngbe Bëtsáftaca chašmojtsencuënta ora, šmochjenójuaboye nderado nda ndaye bacna soye tsëngaftangbiama tojamama, y cháftaca cabá etonánënga šmojtsemnëse, šmochtseperdóna; chca, Béngbe Bëtsá, celoca endmëná, tsëngaftangbe bacna soyëngama chacmotsaperdonama. <sup>26</sup> Pero inýa ndoñe šmonjaperdonasna, Béngbe Taitá, celoca endmëná, cach ndoñe tsëngaftanga quecmochátaperdonaye ca —cha tojánayana.

*Jesusbe obenana**(Mt 21.23-27; Lc 20.1-8)*

<sup>27</sup> Chca tojanopasá chentsana, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobeconá bachnangbe amëndayënga, ley abuátambayënga y chë judiëngbeñe bëtsëjemëngcá amëndayënga, <sup>28</sup> y mëntśá tmojantjá: — ¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatsetá ca?

<sup>29</sup> As Jesús tojanëyana: —Atśnaca sëntsebmna canye soye tsëngaftanga jatjayama. Chašmojuuase, átśnaca cbochjáuyana ndaye deréchoca atśe chca stsama. <sup>30</sup> ¿Nda Juan chë Ubayaná tbojanichmó entśanga jubáyama, Bëngbe Bëtsá o entśanga? Smëyana ca.

<sup>31</sup> Chora chënga tmojanontśe mëntśá enatsëtsnayana: “ ‘Bëngbe Bëtsá ca’ chamojuuase, cha šochanjáuyana: ‘As ¿ndáyeca chë cha tmojanabuayená soyënguifne ndoñe šmonjanošbuaché ca?’ <sup>32</sup> Pero ndoñe quemuátobena jayanana ‘entśanga ca.’” Chca tmojánayana, er chënga entśangbiana imojánauatja, er nyetścanga imojanjuabná, Juan ndegombre Bëngbe Bëtsabe juaabna oyebuambnayá yojannama. <sup>33</sup> Chcasna, chënga tmojanjuá: —Bënga ndoñe queftsátststšëmbo ca.

Y Jesús tojanëyana: —As atśe cach ndoñe quebochatëyana ndaye deréchoca atśe chca stsama ca.

**12***Chë puerte bacna trabájayëngbiana cuento**(Mt 21.33-46; Lc 20.9-19)*

<sup>1</sup> Chora Jesús tojanontśe cuentëngaca jabuátambana. Mëntśá tojanëyana: “Canye entśá bëtscá uvas betiyënga yojáye, y chë shëconana yojajétja. Chë uvasëšangá juantśëtetjamna canye bse luare yojajutjo; y canye tsbanana jebna soye yojapórma chiñe jtsashanyama. Chentsana, inye trabájayënga chë jajañe yojýentśame, y chana inye luaroye yojtsoñe.

<sup>2</sup> Chë uvasëšangá juashacama tempo yojobuache orna, chë jajañe nduiño canye oservená ibojichmua chë arrëndayënga jáuyanama ntsachetśá chë nduiño ibojtsotocánama.

<sup>3</sup> Pero chëngna, cha imojishache, imojtsejantsetaye, y tondaye ntajatacá imojtichmuá.

<sup>4</sup> Chentsana, chë nduiño inye oservená ibojichmua; pero chana, bestšaše imojtselisia y podesca imojtsóyenguango.

<sup>5</sup> Chentsana inya ibojatichmuá, y chana chë arrëndayënga imojtsóba. Y bángnaca yojichamuá; pero chëngna, inyëngna imojtsajantsetaye y inyëngna imojtsëbaye.

<sup>6</sup> “Chë nduiño cabá canya ibojtsábojamna jíchmuama: cachabe bonshana uaquiñá. Cabana, cha ibojichmua y mëntśá yojtsejuabnaye: ‘Atśbe uaquiñá cocayé mochanjóyeunaye ca.’

<sup>7</sup> Pero chë arrëndayënga cha imojinýe ora, imojeniayana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbangá, y lempe chabe otocana soyënga bëngbiana echanjoquéda ca.’ <sup>8</sup> Chcasna, cha imojishache, imojtsóba y chë uvas betiyënga jajañentśana más chcoye imojetsëtśena ca” —Jesús tojancuentá.

<sup>9</sup> Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjetsëbaye, y inye trabájayënga chë uvas betiyënga jajañe echanjárrendaye.

<sup>10</sup> “¿Tsëngaftanga ndocna te Bëngbe Bëtsabe uabemana palabra šmëndualía? Chiñe mëntśá endayana:

Chë yebna jebuanënga tmojtsanaboté ndëtsbé,

mora chë más bëts uashacuanësentśe entsejájona.

<sup>11</sup> Chë soye Bëngbe Utabná, Bëngbe Bëtsá chca tojama, y bënga chama ojananánga fsëntsemna ca.”

<sup>12</sup> Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatśëmbona cha chca tojancuentá jinýanyiyama chënga mo chë puerte bacna trabájayëngcá imojanmënama. Pero entśangbiana imojtsauatja, chíyeca cachcá tmojanonýa y chentsana imojtsóñenga.

*Chë Romoca bëts mandadbiama impuesto jtsatsquëcnyayama**(Mt 22.15-22; Lc 20.20-26)*

<sup>13</sup> Chentsana chënga, bášepta fariseunga y Heródesbe ústonënga Jesúsbioye tmojanichamó, ndayá cha tojanyiñe jisháchichiyama, as chca jtsebmnama ndaye sóyeca mandadëngbeñe cha mal jaquédana.

<sup>14</sup> Chënga tmojána y Jesús tmojanianayana: —Buatëmbayá, bënga fsëndëtatśëmbo aca ndegombre soyënga cnetśabuátambama, y ndoñe jatuenanana nye ntśamo entśanga tmojatichamcá, er acbiana tondaye quenatámama nda más uamaná o nduamaná tomnana; y contśabuátambá ndegombre tsábe vida jtsebmnama, ntśamo Bëngbe



Bětsá yomandacá. Chcasna, ¿tšabá tanántsemana, César, chě Romoca běts mandadbiama bēnga impuesto jtsatsquēcjnayana? ¿Fchtsatsquēcjnaye o ndoñe ca? —chēnga tmojantjá.

<sup>15</sup> Jesús yojtsetátšēmo, chēnga bacna entšanga ntšamo ndegombre tmojuabnacá nd-injīnīnyāyēnga imojamnama; chíyeca tojanēyana: —¿Ndáyeca tšēngaftanga šmojtseboše chě soyeca atše jisháchichiyama? Canye denario crocénana šmiyēboñe, atše chayobená jinýama ca.

<sup>16</sup> As canye crocénana tmojanoyé y Jesús tojanēyana: —¿Ndabe jubíá quem crocenánife yojtsemna, y ntšamo muentše entsabemancá nda chca iuabaina ca?

Y chēnga tmojanjuá: —Césarbe jubíá; cha chca enduabaina ca.

<sup>17</sup> Chora Jesús tojanēyana: —Chcasna, César šmochtōyīye cha ibotocana soye; y Bēngbe Bětsana cha ibotocana soye ca.

Y nýetscanga chama imojenjaná.

*Obanēnga jtayenama Jesús tmojantjá*

*(Mt 22.23-33; Lc 20.27-40)*

<sup>18</sup> Chentšana, bāseftanga saduceo ca uabaina entšanga tmojána Jesús jinýama. Chēnga imojanjuabná obanēnga ndocna te ntayenana ca. Chíyeca, Jesús mēntšá tmojanīyana: <sup>19</sup> —Buatēmbayá, Moisés tojéftsanabema, nderado canye boyá tojóbana y bāsenga ndoñe tonjětsabáshejuanēsna, canmēna chě uabentsá chě shēmaftaca jtobouamayana, chca, chabe uabočená obanabiama bāsenga jtsabamnama ca. <sup>20</sup> Y chcase, canye, canýsēfta catsátanga monjamna. Chě natsaná tonjanobouamá y tontsanóbana bāsenga ntjěftsabashejuancá. <sup>21</sup> Chentšana, chě ústona uabentsá chě shēmaftaca tonjanobouamá, pero chana tontsanóbana, bāsenga ntjěftsabashejuancá; chě inye uabentsáftaca cachcá tonjanopasá. <sup>22</sup> Chca, nýetsca canýsēfta catsátangaftaca cha tonjanobouamá, pero ndocná bāsenga ntjěftsabáshejuanana. Y chentšana chě shembásanaca tontsanóbana. <sup>23</sup> Y morna, chě obanēnga chamojtayena ora, ¿ndabe chě canýsēfta catsatanguentsabe shema chě shembása yochtsemna, nýetscanga cháftaca tmojanobouamase ca? —chēnga tmojantjá.

<sup>24</sup> As Jesús tojanēyana: —Ntšamo Bēngbe Bětsabe uabemana palabrēnguīñe endayancá ndoñe tcmjonosertá, ni Bēngbe Bětsabe obenanama. Chíyeca ntšamo ndoñe yondmēncá šmontsichamo. <sup>25</sup> Er obanēnga chamojtayena ora, ni boyabāsenga ni shembāsenga quemochatóbouamnaye, y chca, chēnga mochántsemna mo celoca angelotemēngcá. <sup>26</sup> Y chě obanēnga jtayenama, ¿Moisesbe librěšañe ndoñe šmēndualía ntšamo Bēngbe Bětsá tbojanīyanama, chě betiyetema yojtsángbototjuana ora? Bēngbe Bětsá mēntšá tbojanīyana: “Atše sēndmēna Abraham, Isaac y Jacobēbe Bětsá ca.” <sup>27</sup> Bēngbe Bětsá chca tojánayana ora, entsichamo cha ndoñe yondmēna obanēngbe Bětsá, sinó aina entšangbe Bětsá ca, er masque chēnga tmojanóbana, chēnga cabá Bēngbe Bětsáftaca mondoyena. Tšēngaftanga canye ndoñe ndegombre soyīñe šmontsemna ca —tojanēyana.

*Chě más bēts uámana mando*

*(Mt 22.34-40)*

<sup>28</sup> Chentše yojtsemna canye ley abuatambayá. Cha yojouena ntšamo Jesús y chēnga imojtsenatsētsnayana, y yojtsetátšēmo Jesús tšabá tojanējuama. As, tojanobeconá y Jesúsbioye tbojantjá: —¿Ndáyá chě más bēts uámana mando yomna ca?

<sup>29</sup> Y Jesús tbojanjuá: —Chě más uámana mando mēntšá endmēna: “Israeloquēnga šmochjouena, Utabná, Bēngbe Bětsá endmēna, y nye canye Bēngbe Utabná endmēna, ndocná más. <sup>30</sup> Utabná Bēngbe Bětsá cochtsebobonshana nýets acbe ainánaca, nýets espírituca, nýets juábnaca y nýets añēmoca.” <sup>31</sup> Y chentšana quem inye mándnaca: “Ndēmua entšánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámama ca —Jesús tojánayana.

<sup>32</sup> Chora, chě ley abuatambayá Jesúsbioye tbojanīyana: —Buatēmbayá, puerte tšabá tcjayana. Ndegombre yomncá contsichamo, nýe canye Utabná endmēna y ndocná más. <sup>33</sup> Y cha jtsebobonshánana nýets ainánaca, juábnaca y añēmoca, y ndēmua entšánaca jtsebobonshánana cachá cuenobobonshancá, puerte cuámana. Cach nýetsá ndoñe quenatámama bayēnga jtsébánayana, ni chě uátšēmbona soyēnga Bēngbe Bětsá jětschuayama ca.

<sup>34</sup> Cha nýets juábnaca tbojanjuama Jesús tojánīnye ora, tbojanīyana: —Batsatema cmontsebuáshbena jtseprontánama, Bēngbe Bětsá chacolesenciam aca ainantše jtsemándayama ca.

Y chentšana, ya ndocná yonjenñēmua Jesús más jatstjanayama.

*¿Cristo ndabe entšabentšana yomna?*

*(Mt 22.41-46; Lc 20.41-44)*

<sup>35</sup> Jesús Bèngbe Bètsabe bèts yebnentše yojtsabuátambaye ora, tojánayana: “¿Ndáyeca chë ley abuátambayënga mondbètsichamo chë Uámana Uabuayaná Davídbentsána iuabó ca?” <sup>36</sup> Cach David, chë Uámana Espíritbe mándoca mēntšá tojánayana:

Bèngbe Bètsá, atšbe Utabná Crístbioye tbonjaníyana:  
atšbe catšbioica mótbema,

atšbe obenánaca, acbe uayayënga acbe cucuatšíñe chamóquedama chjamēntscuana ca.

<sup>37</sup> ¿Ntšámose Cristo Davídbentsána Entšá nántsemna, cach David ‘Utabná ca’ chábioye tbojtsabobuátmēse ca?” —cha tojanéyana.

Y chë bètsá entšanga, oyejuayënga imojtsuenana.

*Jesús chë ley abuátambayëngbama tojánayana, chënga ndoñe tsabá montsama ca*  
(Mt 23.1-36; Lc 11.37-54; 20.45-47)

<sup>38</sup> Mēntšánaca Jesús chënga yojtsabuátambaye: “Cuedado šmochtsebomna y ndoñe šmattsama chë ley abuatambayëngcá. Chënga jtsogusetánana bēnēna entšayangaca jtsajnnana y jtsebošana tsáshenañe entšanga nýa respétoca chamotsacheuanama. <sup>39</sup> Chë judiëngbe enefjuana yebnënguenache, chë más uámana luarënguñe jtssetbíamanana, y chë fiestënguenache nýa quëfseroca. <sup>40</sup> Pero chënga, viudángbioye chë tmobomna soyënga jtsabacayana, y entšangbe delante tsabá chamotséñyama, y chëngbioye imojtsaíngñama ndoñe chaondétsótatšëmbuamna, Bèngbe Bètsáftaca tša jtsencuéntayana. Chë causa, Bèngbe Bètsá íñyëngbama más chënga echanjácastigaye ca” —Jesús tojánayana.

*Jesús yojtséñyaye chë crocénana quëcñayënga*  
(Lc 21.1-4)

<sup>41</sup> Jesús jabuátambama tojanpochocá ora, tojanótbema Bèngbe Bètsabe bèts yebnentše, chë crocénana quëcñayëtema ndirichíñe; y chë crocénana quëcñayënga yojtséñyaye. Bètsá bomnëngna becá crocénana imojtsequëcñayee. <sup>42</sup> Chora, canýe viudá ndbomnjémmnaca yojbeconá y nýe uta crocénana chëtémíñe yojaftsesegóra. <sup>43</sup> Chora Jesús chabe uatsjëndayënga tojánachembo chamobéconama, y mēntšá tojanéyana: “Ndegombre cbéyana, quem viudá ndbomnjéjema, Bèngbe Bètsabíama nýetscangbíama más tonjëftsesegóra. <sup>44</sup> Chë bomnëngna chë yojtsóyentšjamentšana tmonjëftsesegóra, y cabá bomnana imotsóboñe; y chë viudana tonjëftsesegóra lempe ntsachetšá yobomncá; masque tša ndbomnjéjema, chë vida jtsebomnana lempe ntsachetšá yobomncá tonjëftsesegóra ca.”

## 13

*Jesús tojánayana chë Bèngbe Bètsabe bèts yebna lempe mochjánpochocama*  
(Mt 24.1-2; Lc 21.5-6)

<sup>1</sup> Jesús Bèngbe Bètsabe bèts yebnentšana tojëftsanbocna ora, canýe chabe uatsjendayá tbojaníyana: —Buatëmbayá, minýe, jtsa bèts ndétsbenga, y tša botamana bèts yebnënga ca!

<sup>2</sup> Chora Jesús tbojaníyana: —Tsabá cochjínýe tša botamana bèts yebnënga. Pero muentše ndoñe queochaisoquéda ni mo canýe ndétsbé inýebé juatsboye. Lempe mochantsepochoá ca.

*Ntsamo yochtsemna quem luare jopochócama te chaojtsobeco ora*  
(Mt 24.3-28; Lc 21.7-24; 17.22-24)

<sup>3</sup> Chentšana, Olivos tjšashoye chënga tmojána. Bèngbe Bètsabe bèts yebnentša ndirichíñe yojamna; y Jesús tojanótbema ora, Pedro, Santiago, Juan y Andrés iytécana tmojantjá, <sup>4</sup> ntsamo cha tojanayaná ntsoco yochjanopásama, y chca jopásama ya tojtsobecuama entšanga chamotsetatšëmbuama, ndayá Bèngbe Bètsá yochjanma ca.

<sup>5</sup> Chora Jesús tojanéjua: “Cuedado šmochtsebomna ndocná chacmondáingñema. <sup>6</sup> Banga mochanjabo y mochantsabíchamo chënga Jesús imomna ca. Mochántsichamo: ‘Atše chë Cristo sëndmēna ca’, y chca, ba entšanga mochanjáingñaye.

<sup>7</sup> “Entšanga tmojtsentsjanama y nderado mochjentsjámna tsëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócama tempo cabá ndoñe queochátsmēna. <sup>8</sup> Canýe luarentša entšanga inýe luaroca entšangaftaca mochántsentsjanaye, y canýe amëndayábentša entšanga inýe amëndayábioica entšangaftácnaca; ba luarënguenache fshantse echanjuangmēmana y bèts shéntsana echanjóshjango. Masque chca jasúfriase, más chcoye cabá más mochanjatssúfria.

<sup>9</sup> “Pero tsëngaftangna cach tsëngaftangbíama šmochtsantješna; entšanga cmochanjishëche y amëndayëngbe cucuatšíñe cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bétsemna causa, mandadëngbioye y reyëngbioye cmochanjunatse, choca, chëngbe delante ntsamo atšbíama šmotatšëmbcá chašmuayanama. <sup>10</sup> Er entseyta, quem luare cabá ndopochóca ora, Bèngbe Bètsabe tsabe noticiënga nýetsca luarënguentša entšángbioye chaóshjanguama. <sup>11</sup> Y inýengbe

cucuatsiñe jabáshejuanama chacmojtsēnáchá ora, ndoñe šmattsenócochinýena ntšamo chora šmochjayanama. Chora šmochjayanana ntšamo Bēngbe Bētsá yochjamcá tsēngaftanga chašmuayanama, er tsēngaftanga cányēnga ndoñe chora quešmochátóyebuambnaye, ndayá chē Uámana Espíritu tsēngaftangbiajana echantsóyebuambnaye.

<sup>12</sup> “Canýe catsata cachabe catsata inýēngbe cucuatsiñe bochanjáboshjona chamotsóbama, y bētsētsanga cachēngbe básēnga mochanjábashējuana chamotsēbáyama; y chē básēnga chēngbe bētsētsangbe contra mochántsemna y chamotsēbáyama mochanjábashējuana.

<sup>13</sup> Atšbe ústonēnga bētsemna causa, nyētsca luarēnguentša entsānga cmochantsēbuayēnja; pero nda nyēts tempo átšbeñe ošbuachiyá totsomñe, atsbocaná echántsemna.

<sup>14</sup> “Chē Bēngbe Bētsabe juabna oyebuambnayá Daniel, chē puerte uabuana soye quem luare jopochócoma tojétsanabema. Chē puerte uabuana soye, chca jtemnana inýoca tsēngaftanga chašmojinýe ora (nda tojtsalía, chabosertá), šmochántsetatšēmo chē puerte ngmēnana tempo tojóshjanguama; chorna, chē Judeoca chamojtemna entsānga, batsjabengoye chamotsacheta; <sup>15</sup> chama, nda cachabe yebntšša tsbanánoca chaotsemna, chocana ndoñe chaondétastjango, ni chaondétamashēngo tsoicana ndayá jesábocnama; <sup>16</sup> y nda jajoca chaotsemna, yebnoye ndoñe chaondéta ni mo chabe quēfsaiya jesácñama. <sup>17</sup> ¡Tša lastema chē tempo ngomámanēnga o ochóchaye šešonga chamotjsabamna shembásēngbiamá! <sup>18</sup> Bēngbe Bētsá šmochtseimpadana chē ngmēnana tempo ndoñe chaondóshjango uaftena tempo ora, <sup>19</sup> er chora puerte ngmenancá echántsemna. Tša jabuache ngmenancá, quem luare jobojátšama orscana y mēntscoñama y más choeye, cachcá ngmēnana ndoñe ntjamnana. <sup>20</sup> Chē puerte ngmēnana tempo, yapa bēn ndoñe chaondétsemnana Bēngbe Bētsá ndoñe tonjalesencise, ndocná quentatsbocá; pero cha, chabe ubuáyanēnga, chabe bocacánēnga corente endábabanýeshanayeca, echanjama yapa bēn tempo ndoñe chaondétsemnana.

<sup>21</sup> “Chora nderado nda chacmojáyuana: ‘Minýe, muentše chē Cristo entsemná’, o ‘Choca cha entsemna ca’, chē soyēngama ndoñe šmattsayaunana. <sup>22</sup> Er mochanjábocana ndoñe ndegombre uámana ubuáyanēnga, chēnga Cristo imonna ca jtsichámēse, y Bēngbe Bētsabe ndoñe ndegombre juabna oyebuambnayēngnaca; y chēnga mochanjama bēts soyēnga chēngbe obenana jinýanýiyama, entsānga jáingñama, y tmojobenase, chē Bēngbe Bētsabe bocacánēngnaca. <sup>23</sup> ¡Cuedado šmochtsebonna! Cabá chca ndochñēngo ora, lempe tcbonjabuayená ca” — Jesús tojanéyana.

*Bēngbe Bētsá Entšá tbojanbemá quem luaroye echanjésabo  
(Mt 24.29-44; Lc 21.25-36)*

<sup>24</sup> Mēntšánaca Jesús tojanéyana: “Pero chē tempo, entsānga puerte chamojasufrí chentšana, shinýe ndoñe queochátsbuashinýinýana, juashcona ndoñe queochátsbinýayne, <sup>25</sup> celocana estrellēnga echanjatquécjana, y quem luarentša tsbanánoca espíritēnga obenana homnēnga echanjángmēmana. <sup>26</sup> Y chora, entsānga mochanjinýe, Bēngbe Bētsá Entšá tbojanbemá jantšetēshiñe echántsaboye, corente obenánaca y corente buashinýinýaniñe. <sup>27</sup> Chora cha chabe angelēnga echanjámēndaye chē Bēngbe Bētsabe ubuáyanēnga júbuajama, nyēts luarēngocana, quem fshantsoca cányoica juachoicana, celoca inýoica juachóntsoñe.

<sup>28</sup> “Chē hígo betiyama šmochjatsjinýe: Tsēm buacuafjēnga tojtsebonna ora y tojtšaiséjotsana, jtsotatšēmbuana chē tsabe tempo ya tojtšaisobecuama. <sup>29</sup> Cachcá, chē soyēnga ndayama tsēngaftanga tcbonjauyancá chašmojinýe ora, šmochántsetatšēmo Bēngbe Bētsá Entšá tbojanbemá ya jésabama yojtsemnana. <sup>30</sup> Ndegombre chēyana, lempe chca echanjochñēngo, morsca entsānga cabá ndóbana ora. <sup>31</sup> Celoca y quem luare echanjopochóca, pero atšbe palabra ndocna te queochaisopochóca.

<sup>32</sup> “Pero Bēngbe Bētsá Entšá tbojanbemá ndaytē y ntseco ora yochjésabama, ndocná quenátstatšēmo, ni chē celoca angelēnga, ni Bēngbe Bētsabe Uaquiniá. Nýe chē Taitá chama yotátšēmo.

<sup>33</sup> “Chíyeca, cuedado šmochtsebonna y yejuana šmochtsantješna, er ndoñe quešmátstatšēmo mocna ora yochtsemna Bēngbe Bētsá Entšá tbojanbemá jésabama tempo. <sup>34</sup> Echántsemna mo canýe entsácá; chana inýe luaroye ya jéftseboncama ora, chabe oservēngbe jéftsamēndana chabe yebna chamotsinýenama. Cada ona canýe trabajo jéftsebonýiyana, y chē shanyá jéftsemándana botamana chaotsantješnama. <sup>35</sup> Chcasna, cuedado šmochtsebonna, šmochtsantješna, er ntšamo chē trabajayēngcá chē yebna nduiño ntseco jtashjanguama, ndoñe ntsetatšēmbuana, mo nderado jétatana, tséntseto ora, binýanoye o cachēse, tsēngaftanga cachcá, Bēngbe Bētsá Entšá tbojanbemá ntseco jésabama ndoñe quešmátstatšēmo; <sup>36</sup> ndoñe cuedado šmontsebonnēse, nderado cha nýe ndeolpe nántashjango, tsēngaftanga ndēprontánēnga šmojtsemna ora, mo ftsomañe cuenta. <sup>37</sup> Chíyeca, ntšamo tsēngaftanga bochanjauyancá, nyētscanga chanjáyuana: ¡Puerte cuedado šmochtsebonna ca!” — Jesús tojanayana.

## 14

*Entsanga imojtsejuabnaye ntšamo jamése Jesús jishachama*

(Mt 26.1-5; Lc 22.1-2; Jn 11.45-53)

<sup>1</sup> Bashco fiestama uta te yojetsájamma, chë Bëngbe Bëtsá Egíptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse sayora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseingñase, y jtsóbama. <sup>2</sup> Báseftanga imojtsichamo: “Quem fiesténtsucana ndoñe, er nderado entsanga yapa muanjónťša enbouenanana ca.”

*Canýe shembása botamana uanguëtse bėjaye Jesusbe bestšašine tbojanbuescja*

(Mt 26.6-13; Jn 12.1-8)

<sup>3</sup> Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canýe shembása tojánashjango. Chë shembása yojúshjango canýe alabastro jarrëtema jútjena canýe becá uamana y botamana uanguëtse bėjayeca, ena nardana uanguëtšiyey; chana chë jarrëtema yojáťsba y chë bėjaye Jesusbe bestšašine tbojanbuescja. <sup>4</sup> Chca tmojáninye ora, báseftanga chentše imojtsemnënga tmojanotjayaná y mëntšá imojtsenatsëtsnaye: —¿Ndáyeca nýe bonamente chë soye yojtsemna ca? <sup>5</sup> Chamna, matmënjobenanga chë bėjaye unga patse denario crocénanama juiyana, y chánaca ndbomnjémënga matmënjújabuache ca.

Y chë shembásabiama podesca imojtsichamo.

<sup>6</sup> Chora Jesús tojanëyana: —¿Ndáyeca quem shembása ndoñe cachcá šmochanjonýaye ca? ¡Ndocá matatsana! Atšbiama tšabe soye tonjama. <sup>7</sup> Er ndbomnjémënga nýets tempo tšëngaftangbeñe mochanjéftsemna, ndayténaca šmojábošena ora, šmatjobenaye tšabe soye chëngbiama jamana; er atše tšëngaftangaftaca ndoñe nýets tempo quichásemna. <sup>8</sup> Quem shembása lempe ntšamo tojobenacá atšbiama tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná sëntsemna ora. <sup>9</sup> Ndegombre cbëyana, quem luaroca ndayéťsnaca Bëngbe Bëtsabe tšabe noticiënga chamojtsabuayiyá chentše, ntšamo quem shembása tojamánaca becá mochanjéťsoyebuambaye, chca, entsanga chabiama chamotsenójuabnana ca —cha tojanëyana.

*Judas tojána bachnangbe amëndayëngbiyoye, Jesús chamuishachama*

(Mt 26.14-16; Lc 22.3-6)

<sup>10</sup> Chentšana, Judas Iscariote, canýe chë bnëtsana uta uatsjendayënguentšá, tojána chë bachnangbe amëndayëngaftaca jencuéntama, Jesús chëngbe cucuatšine jaboshjonama. <sup>11</sup> Chca tmojanuena ora, chënga imojóyejuaye y tmojanšbuachená crocénana jtabuénayana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšine jaboshjonana.

*Jesús chabe uatsjendayëngaftaca Bashco saná tojanse*

(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> Chë Bashco fiesta bojatšenté, chë levadúraca ndëpormana tandëse sayté, chë uatsjendayënga Jesús tmojantjá: —¿Ndëmoca cojtseboše bënga fchajprontama, Bashco saná chacosama ca?

Chca te chë judiënga imojanamana, Bëngbe Bëtsá jëtschuayamna canýe oveshá jóbana chora jasama, chë Egíptocana chëngbe bëts taitanga Bëngbe Bëtsá tojánatsebacama jtenójuaboyama.

<sup>13</sup> As Jesús uta chabe uatsjendayata tojanichamó y mëntšá tojanëyana: —Chë bëts puebloye motsata. Chašojáshjango ora, canýe bacó mochanjóbiate, matbajiñe búyeshe echantsabuyambaye; cha šochjuasto y šochtserreparana ndëmuanýe yebnentše yochjámarshënguama; <sup>14</sup> y chë yebna nduiño šochjauyana: “Buatëmbayá tonjayana: ¿Ndayentše chë tsañe yojtsemna, Bashco saná atše atšbe uatsjendayëngaftaca jasama ca?” <sup>15</sup> As cha cmochanjínányiye canýe bëts tsañe, tsbanana pisoca, lempe prontaniñe; chentše šochjapronta bënga mochjasama ca.

<sup>16</sup> As chë uatsjendayata tbojána y tbojáninyena lempe ntšamo Jesús tojanëyancá; y chentše chë Bashco saná tbojanprontata.

<sup>17</sup> Tojanibétata ora, Jesús chë yebnoca tojánashjango, chabe bnëtsana uta uatsjendayëngaftaca. <sup>18</sup> Y mesëshentše imojtsesaye ora, Jesús tojanëyana: —Ndegombre cbëyana, canýa tšëngaftanguentšá, átšeftaca entsesá cha, uayayëngbe cucuatšine šochanjáboshjona ca.

<sup>19</sup> Chorna chë uatsjendayënga ngmënaca imojtsemna, y tmojanontsé canýányá cha jatjajana: —¿Atše chtsemna ca?

<sup>20</sup> Y Jesús tojanëjua: —Canýa chë bnëtsana utatentšá entsemna. Chabe tandëse cach atše sëntsefchecuacná šcnenentše cha entsefchecuacná. <sup>21</sup> Ndegombre, Bëngbe Bëtsá Entšá tbojanbemáftaca echanjopása ntšamo chabiama Bëngbe Bëtsabe uabemana palabrenguiñe

endayancá. Pero, itša lastema chë bochjáboshjonabiamá! Chabiamá más tšabá manjamna ndoñe ntjónŷnana ca —Jesús tojánayana.

<sup>22</sup> Imojtsesantscuana, tandëse tojanca, Bëngbe Bëtsábioye chama tbojtanchuá, tojanjataye y chabe uatsjéndayënga tojanëjatá, y mëntšá tojánayana: “Mocñënga, mosënga, atšbe cuerpo entsemna ca.”

<sup>23</sup> Chentšana, canŷe coptema vínoyeca tojanaca, Bëngbe Bëtsábioye tbojtanchuá, chabe uatsjéndayënga tojanëfšašë, y nyëtscanga tmojanofšë. <sup>24</sup> Mëntšá tojánayana: “Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojašebuachenacá ndegombre yochjochnënguama. Chë buiñe bëtšca entšangbe tšabiamá echanjuábuashana. <sup>25</sup> Y ndegombre cbëyana, morscana ya ndoñe más chë uvasëšentsana obocniye quichaisofšiyë. Chë tšëm vínoye tšëngaftangaftaca chanjofšiyë, Bëngbe Bëtsabe amëndayoca chamojtsemna ora ca” —tojánayana.

*Jesús tojánayana, chábioye ndoñe bonjanabuátma ca Pedro yochjánayanama*  
(Mt 26.30-35; Lc 22.31-34; Jn 13.36-38)

<sup>26</sup> Bëngbe Bëtsábioye jëtšchuyama tmojancantá chentšana, Olivos tjšashoye tmojëfšsanbocana. <sup>27</sup> Jesús tojanëyana: —Nyëtsca tšëngaftanga quem ibeta átšbeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabrënguñe, cha mëntšá tojánayana: “Chë oveshënga abujëñŷa chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojšhache ora. <sup>28</sup> Pero obanënguentsana chaitayenentšana, tšëngaftangbe natsana Galileoye chanjá ca —cha tojanëyana.

<sup>29</sup> Chora Pedro tbojanianyana: —Masque nyëtscanga ácbëñe ošbuáchiyana chamotsobuetše y chamotsacheta, atše nŷa ndocna te ca.

<sup>30</sup> Chora Jesús tbojanianyana: —Ndegombre cbëyana, cam ibeta, ngallo cabá uta soye ndëcánta ora, aca unga soye cochanjyana ndoñe sconduabuátma ca.

<sup>31</sup> Pero Pedro más yojšsichamo: —Masque chašotsemna ácaftaca jóbanama, atše ndoñe quichátayana ndoñe chonduabuátma ca.

Y nyëtscanga cachá imojtsichamo.

*Getsemaní luarentše Jesús, Bëngbe Bëtsáftaca tbojanencuentá*  
(Mt 26.36-46; Lc 22.39-46)

<sup>32</sup> Chentšana, canŷe luare Getsemaní ca uabáinoye tmojána. Chocna Jesús tojanëyana: “Muentše motbiamá, chëntscuana atše choye chanjá, Bëngbe Bëtsáftaca jencuéntama ca.”

<sup>33</sup> Y tojëfšsanëbiatše Pedro, Santiago y Juan. Choca cha yojóntša puerte ngménaca jtsemnana y corente cochsetšenaná. <sup>34</sup> Chëngbioye tojanëyana: “Atšbe ainaa puerte ngménaca entsemna, mo jobanacmá. Muentše moquedanga y šmochtsefšna ca.”

<sup>35</sup> Chentšana, Jesús más natsanoye tojána, tojanoshëntamentšë y fshantsóntscoca tojanotsejbéna y Bëngbe Bëtsábioye tbojanimpadá, jopódianëse, chë tša japadésa ora ndoñe chaondóshjanguama. <sup>36</sup> Mëntšá yojšsichamo: “Atšbe Taitá, aca lempe jamama condobena; tojopodese, cochjama atše japadésama ndoñe chašondëtsemnana. Pero ntšamo atše stebošcá ndoñe chaondëtsemna, sinó ntšamo aca cojtsebošcá ca.”

<sup>37</sup> Chentšana, chabe unga uatsjéndayëngbioye tojtanabo, y chëngna inmëtsomañe. Chca tojánanŷëna ora, Pédrëbioye tbojanianyana: “Šimón, ¿cotsomañe? ¿Ni mo nŷe canŷe hora jtsefšnama ndoñe tconjobená? <sup>38</sup> Smochtsefšna y Bëngbe Bëtsáftaca šmochtsencuéntaye, bacna soye jamana ndoñe chacmonócocohënguama. Tšëngaftanga ndegombre šmontschebošë espíritoca Bëngbe Bëtsá joyeunayana, pero cuerpiñe ndoñe añemo quešmátsbomma ca.”

<sup>39</sup> Jesús cachiñe tojesaná y Bëngbe Bëtsáftaca tbojanencuentá, cach palabrénga jayanëse. <sup>40</sup> Yojtabo orna, chë uatsjéndayënga cachiñe inmëtsomañe; chënga imojtsefšhëtana ocnaye causa, y ndoñe imontsobena ntšamo jojuana.

<sup>41</sup> Chentšana, tojtesaná y tojtanabo ora tojanëyana: “¿Cabá šmotsomañe y šmotsochnañe? Nŷe nyëtšá; hora tojjobuache, Bëngbe Bëtsá Entšá tbojanbemá bacna soye amëngbe cucuatšifne mochanjáboshjona. <sup>42</sup> Motsbananga, cuajna. Minŷënga, atše boshjuaná ya entsebecóna ca.”

*Uayayënga Jesús tmojánishache*  
(Mt 26.47-56; Lc 22.47-53; Jn 18.2-11)

<sup>43</sup> Jesús cabá yojšsýeubambnantscuana, Judas, canŷe chë bnëtsana uta uatsjéndayënguentsá, tojánashjango y cháftaca ba entšanga espadëjangaca y ngarotbéngaca prontánënga. Chënga imojamna chë bachnangbe amëndayënga, ley abuatambayënga y judiëngbeñe bëtšëjemëngcá mándayëngbe ichmónënga. <sup>44</sup> Judas, chë boshjuaná, tojanjuabó ntšamo jamana entšanga jinŷanŷiyama ndëmua Jesús bëtsemnana. Chíyeca, yojáuyana:

“Nda chajiauámocho, cha echántsemna; šmochjishache y cuedádoca šmochjuánatse ca.”  
 45 Chcasna, Judas Jesúsbioye tojanobeconá y tbojanianaya: “¡Buatëmbayá ca!”

Y tbojanámocho. 46 Chora chë entsanga tmojánishache y tmojanánatse.

47 Pero canya chentše Jesúseftaca yojtsemná, chabe espadëja yojenosëngbotëntšena, y chë bachnangbe más uámana amëndayabe oservená canye matscuaše tbojtsanëštjango.

48 Y Jesús chë entsanga tojanatjá: “¿Ndayeca šmojabo espadëjanga y ngarotbëngaca atše jishachama, mo atše canye bacá uamana entsá cuaftsemncá ca?” 49 Atše cada te tšëngaftangbeñe sëndëtsemna Bëngbe Bëtsabe bëts yebnoca abuátambaye, y ndocna te choca chešmánishache. Pero tšëngaftanga chca átšeftaca šmontsama, cachcá ntšamo Bëngbe Bëtsabe uabemana palabreñguife endayanca chaotsemnama ca” —tojánayana.

50 Chorna, nyetsca uatsjëndayënga tmojtsanëuatjaná y tmojtsanacheta, y Jesús cachcá chë uayayëngaftaca tmojesanonýa. 51 Canye bobontse Jesúsbioye ibojtséstona, nye canye uafjantse entsëjua uichëtjoná. Cha chë entsanga tmojánishache, 52 pero chëngbe cucuatšifne chë entsëjua jesáboshjonëse, chë bobontsna enasá yojtsachá.

*Jesús tmojanánatse chë judiëngbe uámana amëndayëngbioye  
 (Mt 26.57-68; Lc 22.54-55, 63-71; Jn 18.12-14, 19-24)*

53 Chentšana, Jesús tmojanánatse chë bachnangbe más uámana amëndayábioye; y chocna, nyetsca chë bachnangbe amëndayënga, bëtsëjemëngcá amëndayënga y ley abuátambayënga tmojánenëfjna. 54 Pedro bënocana Jesús tbojanasto, chë bachnangbe más uámana amëndayabe yebnentsá chashjónscoñe; y chentše tojanocuéda. Chë Bëngbe Bëtsabe bëts yebnoca josticiëngaftaca yojtsetbemana; ifne juachaca yojtsešbonena.

55 Chë bachnangbe amëndayënga y chë judiëngbe uámana mándayënga imojtsenguaye canya, nda ndayánaca Jesusbe contra cháuyayana, as jobenayama cha chaóbona ca jayanama; pero ndoñe montsaninýana. 56 Er masque banga Jesusbe contra uayátsenaye soyënga imojtsichamo, nyetscanga ndoñe cachca soye montsanichamo.

57 Báseftanga imojtsaye y mëntšá Jesusbe contra, ndoñe ndegombre betsemncá tmojánayana: 58 “Bënga cha fsënjoyeuná mëntšá: ‘Atše quem Bëngbe Bëtsabe bëts yebna, entsangbe pormanaya yebna, chantsepochóca; y unga tese inye Bëngbe Bëtsabe bëts yebna, entsángbeyeca ndëpormanaya yebna chanjëtšjebo ca.’ ”

59 Pero masque chca imojtsichamo, nyetscanga ndoñe cachca soye montsanichamo.

60 Chorna, chë bachnangbe más uámana amëndayá yojtsbaná, nyetscangbe tsëntsaca yojtsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë ache contra montsichamo soye ca?

61 Pero cha nye iytéca yojtsemna y ndocá ibontsëjuana. Chë bachnangbe más uámana amëndayá cachifne tojtëtantjá, mëntšá: —¿Aca chë Cristo icomna, Bëngbe Bëtsá chë nda fsëndadoranabe Uaquiná ca?

62 Y Jesús tbojanjúa: —Arseñor, atše cha sëndmëna; y tšëngaftanga šmochanjinye, atše, Bëngbe Bëtsá Entšá tbojanbomá, chë nyets obenana bomnabe catsbioica chantsetbemana, y celoca jantšëtëshiñe chántsaboye ca.

63 Chora, chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ndayama más entsanga šochjätëjaboto Jesusbe contra chamuayanama ca? 64 Tšëngaftanga šmonjouena ntšamo chë entsá entsichamcá, y chca Bëngbe Bëtsabiana entsemna mo cha cuafjoyenguangcá, chë chabe Uaquiná yomna ca cha tonjayana ora. ¿Ntšamo tšëngaftanga šmatjayana ca? —cha tojanëyana.

Y nyetscanga tmojánayana, cha ndegombre bacna soye yojtsebobna y jóbanama ibojtsemna ca.

65 Chorna báseftanga tmojanontsé Jesús buashëtjnayana; jubiá imojútsbotse, imojtsetantšetaye y imojtsetjanaye: “¡Momalisiá nda tcmënjajantšetá ca!” Y chë Bëngbe Bëtsabe bëts yebnoca josticiëngna imojtsajuebantšetaye.

*Pedro tojánayana Jesúsbioye ndoñe bonjanabuátma ca  
 (Mt 26.69-75; Lc 22.56-62; Jn 18.15-18, 25-29)*

66 Pédrëna, tsmanoca yojtsemna chashjoca. Chora, canye shembása, chë bachnangbe más uámana amëndayabe oservená yojáshjango; 67 y Pédrëbioye tbojáninye ora, cha ifne juachaca yojtsanšbonena, yejuana ibojnyinýiye y tbojanianaya: —Acnaca, Jesús Nazaretocáftaca conjánana ca.

68 Pero Pedro tojánayana chábioye ndoñe bonjanabuátma ca; y mëntšá tojánayana: —Ndayama cojtsichámuama ndoñe quetsátstatšëmbo, ni quešnátësertana ca.

Y šhjoye, amashjuanóntscoñe yojábocna; y chora canye ngallo yojacánta. 69 Chë oservená cachifne Pédrëbioye tbojáninye y tojanontsé chë inyënga jauyanana: —Muánaca Jesusbe uatsjëndayënguentšá entsemna ca.

<sup>70</sup> Pero chana cachiñe tojánayana Jesúsbiye ndoñe bonjanabuátma ca. Chentšana, chë chentše imojtsemnëga Pedro tmojátaniyana: —Ndegombre aca chënguentšá contsemna; ácnaca Galileocá contsemna ca.

<sup>71</sup> Pero Pedro tojanontsé ichámuana: —¡Bëngbe Bëtsá chašotsecastigá ndoñe ndegombre soye stsihámese ca! —y yojóntša júrayana— ¡Atše chë entšá ndoñe quetsatabuatma, ndabiamá tsëngaftanga šmontsatsësná ca!

<sup>72</sup> Y cachora chë ngallo uta soyama yojacánta, y Pedro yojenójuaboye ntšamo Jesús tbojanianama: “Ngallo cabá uta soye ndécánta ora, aca unga soye cochanjayana ndoñe šconduabuatma ca.” Y tojanontsé enóbošachiyana.

## 15

### *Jesús Pilátbiye tmojanánatse*

(Mt 27.1-2, 11-14; Lc 23.1-5; Jn 18.28-38)

<sup>1</sup> Tojanbinýna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuátambayënga cánýentše tmojánenefña, nýetsca chë luarentša más uámána mandayëngaftaca, jenóyeunayama ntšamo jamëse Jesús jóbama. Jesús tmojanëcuëbatsëca y tmojanánatse, y Pilato, chë Judeoca mandadbe cucuatšifne tmojánboshjona.

<sup>2</sup> Pilato Jesúsbiye tbojantjá: —¿Aca chë judiëngbe rey cojtsemna ca?

Y Jesús tbojanjúá: —Añfe, aca ndegombre yomncá tcjayana ca.

<sup>3</sup> Chë bachnangbe amëndayënga bëtscá soyënga Jesusbe contra imojtsichamo; <sup>4</sup> chíyeca Pilato cachiñe Jesúsbiye tbojantjá: —¿Ndocá šcochanjojúá ca? Minýe; bëtscá soyënga acbe contra montsichamo ca.

<sup>5</sup> Pero Jesús ndoñe más tbonjanjúá; chë causa, Pilato ndoñe yontsetátšëmbo ntšamo jajuaboyana.

### *Jesús chaóbana ca tmojánayana*

(Mt 27.15-31; Lc 23.13-25; Jn 18.38-19.16)

<sup>6</sup> Cada Bashco fiesta ora, Pilato yojanamana canýe utamená jëtsboshjonana, ndánaca entsánga tmojuabuayaná. <sup>7</sup> Chë tempo yojamna canýa Barrabás ca uabainá; cárceloye inautáména chabe enutëngaftaca. Chëngna entsánga tmojtšanëbave, mandadëngbe entsángaftaca imojentsjaná ora. <sup>8</sup> Chora, entsánga tmojánashjajna y tmojanontsé Pilátbiye jauyanana, ntšamo Bashco fiesta ora jamama yojanamancá chaomama. <sup>9</sup> Y Pilato tojanëjua: —¿Tsëngaftanga šmojtseboše tsëngaftangbe rey atše chjëtsboshjona ca?

<sup>10</sup> Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšifne tmojánboshjonama. <sup>11</sup> Pero chë bachnangbe amëndayëngna entsánga tmojanañemó chamuenbouënanama, Pilato jauyanama chëngbiama Barrabás chabuatsboshjona ca. <sup>12</sup> Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

<sup>13</sup> Y chënga tmojanáyebuachena: —¡Motsecrucificá ca!

<sup>14</sup> Y Pilato entsánga tojanéyana: —¿Ndáyeca? ¿Ntšamo cha tojobuachjanguá ca?

Pero chëngna más añémoca tmojtëtanayebuachena: —¡Motsecrucificá ca!

<sup>15</sup> As Pilato, entsángaftaca tsábá joquédama yojtsebóseyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentšana soldadëngbe cucuatšifne tbojánboshjona, chamocrucificama.

<sup>16</sup> Chentšana, chë soldadënga Jesús tmojanánatse chë mandadbe bëts yebnentša chashjoye, y nýetsca soldadënga tmojánachembo chamobéconama. <sup>17</sup> Shbuenda uafjatsenga uinýna entsáyá mo reycá tmojanichëtjo; canýe coronësha tmojanapormá uchmašëfjangaca y tmojanabestšajó. <sup>18</sup> Y chentšana tmojanontsé jachuyana: “¡Bayté judiëngbe Rey cochtsemna ca!”

<sup>19</sup> Canýe niñëfjaca Jesús bestšasiñe imojtsëtsjanjnaye, imojtsebuashëtjnaye, y chabe delante imojtsofshëntsaméntšenaye. <sup>20</sup> Y chca imnaftsáboyejuanentšana, chë shbuenda uafjatsenga entsáyá tmojtšanabotsca y cachabe entsáyá tmojtanichëtjo, y pueblo chaboye tmojanánatse jacrucificama.

### *Jesús tmojanrucificá*

(Mt 27.32-44; Lc 23.26-43; Jn 19.17-27)

<sup>21</sup> Chora, canýe entšá chëjana yojtsatashjajuana, Simón ca uabainá, Cirene pueblócá, Alejandro y Rufbe taitá; jajocana yojtsatachnëjuana; y chë soldadëngna imojuatária Jesusbe cruz jëftsocutsayama.

<sup>22</sup> Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”); <sup>23</sup> y tmojanabuiyé vínoye mirraca enájuañe, pero Jesús ndoñe yonjúayëngacñe. <sup>24</sup> Y chentšana tmojanrucificá; y chabe entsayangamna, tsbanánoye tmojanëtšena jinýama ndayá cada ona yochjëftsanáçñama.

<sup>25</sup> Cachése, base mošenana ora Jesús tmojanrucificá. <sup>26</sup> Y chabe bestšaše juatsboicna canye uabemana soye tmojananjo. Chiñe yojetsayana ndáyeca cha tmojanrucificama, mēntsá: MUA CHĒ JUDIËNGBE REY ENDMĒNA ca.

<sup>27</sup> Y cháftaca útata bacna soye ochjajnayátnaca tmojanacrucificá, canya chabe catsbioica, y ínyna chabe uañicuayoica. <sup>28</sup> Chca cháftaca tmojanma, chaochnēnguama ntšamo Bēngbe Bētsabe uabemana palabrenguñe chabiana iuayancá, mēntsá: “Y chábioye tmonjáninye mo chē puerte bacna soye amēnguentsá canya cuaftsemncá ca.”

<sup>29</sup> Y chējana imojtsachnējuana entsanga, Jesús imojtsóyenguaye, imojtsobestšfshanenaye y chojtsatsaye: “¡Aca chē Bēngbe Bētsabe bēts yebna cochtsánenasatajcha y nye unga tese cochtanjebo, <sup>30</sup> cach aca mentsbocá y cruzocana matastjango ca!”

<sup>31</sup> Cachá chē bachnangbe amēndayēnga y chē ley abuátambayēnga imojtsáboyejuana, y chēnga imojtsenatsētnaye: “Cha ínynega tojētsatsebacá, pero cachá jétsbocama ndoñe quenátobena. <sup>32</sup> ¡Chē Cristo, chē Israeloca Rey! ¡Cruzocana chauatastjango, bēnga jinynama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

*Jesús tojanóbana*

(Mt 27.45-56; Lc 23.44-49; Jn 19.28-30)

<sup>33</sup> Nýetsto orscana y las tresētscoñe, nýets quem luare yojtseibétata. <sup>34</sup> Chca orna, Jesús chabe biyañe tojanáyebuachena: “Eloi, Eloi, ¿lema sabactani ca?” (Chca endayana “Atšbe Bētsá, atšbe Bētsá, ¿ndáyeca cachá scojonýa ca?”)

<sup>35</sup> Chca tmojanuena ora, báseftanga chentše imojtsemnēnga imojtsichamo: “Mouenēnga, chē Bēngbe Bētsabe juabna oyebuambnayá Elías bontsechambuana ca.”

<sup>36</sup> As chora, canya tojanotjajo, untja vínoyeca canye esponjēshe tojanfchecuacuá, canye niñēñiñe tojananguēsētjo y Jesúsbioye tojanbeconá chaofšema; y tojánayana: “Cachá mochjonýa, er Elías tayochjabo jabátēstjanguama ca.”

<sup>37</sup> Pero Jesusna, jabuache tojanoyó y tojanóbana. <sup>38</sup> Y chē Bēngbe Bētsabe bēts yebnoca yojjónýana entsējua tsēntsaca yojtsenátataye, tsbanánocana fshantsoye. Chējua bēñejua inauamna y chē tsatsēntsaca inaújonýana. <sup>39</sup> Chē romano soldadēngbe amēndayá, Jesusbe ndrichiñe yojtsemna; y ntšamo cha tojanobancá tojáninye ora, tojánayana: “¡Ndegombre quem boyabása Bēngbe Bētsabe Uaquíñá yomna ca!”

<sup>40</sup> Básefta shembásēngnaca chentše imojtsemna, bēnocana imojtserreparana; chēnguentsē imojtsemna María Magdalena; María, Santiago chē más basa y Josebe mamá; y Salomé. <sup>41</sup> Chē shembásēngna Jesús tmojanasto y tmojanájabuache cha Galileoca yojamna ora; y inye ba shembásēngnaca chentše imojtsemna, chē cháftaca Jerusalenoye tmojánanga.

*Jesús tmojanatbontsa*

(Mt 27.57-61; Lc 23.50-56; Jn 19.38-42)

<sup>42</sup> Chē yēfsana ochnayté yojtsēmnayeca, cach te yojánamna saná japróntana chē yēfsana jasama. Ya yojtseibétatana ora, <sup>43</sup> Pilato yojtsemnoye tojana canye boyabása, José ca uabainá, Arimatea pueblócá; cha inamna canye chē luarentsa uámana mandayēnguentsá. Cha Bēngbe Bētsábeñe yojtsošbuáchiye y yojanobátmana chabe amēndayana chaóshjanguama. Nduatjácá Pilátbioye Jesusbe cuerpo tojanotjañe. <sup>44</sup> Pilato yojenjaná Jesús tša betsco yojóbanama; as tojanmandá chē soldadēngbe amēndayá chamuachembo, jatjayama Jesús ya bēn obaná tayojtsemnana. <sup>45</sup> Chē soldadēngbe amēndayana Pilátbioye ibojauyana Jesús ya obaná yojtsemna ca; y as chora, Josébioye tojanlesencia Jesusbe cuerpo chabotsámabañama. <sup>46</sup> Chora, José canye uafjantse lino entsējua tojanabuamé, Jesusbe cuerpo cruzocana tojanēstjango, chē lino entsējuaca tojanandmaná, y canye cuevēshiñe ndētsbeñe pormánēshiñe tojanajjó; chentšana canye ndētsbé tojansjoná, y chē cuevēshoye amashjuanentše tojánachto. <sup>47</sup> María Magdalena y María, chē José y Santiagbe mamá, tojáninye ndayentše Jesusbe cuerpo tojananjóma.

## 16

*Jesús tojtanayena*

(Mt 28.1-10; Lc 24.1-12; Jn 20.1-10)

<sup>1</sup> Ochnayté tojanopasá ora, María Magdalena, María Santiagbe mamá, y Salomé, botamana uanguētsē bėjaye tmojanabuamé, chíyeca jama Jesusbe cuerpo janētjuama; <sup>2</sup> y tmenguse, chē semana bojatsēntena, cabá cachése, shinye yojábocna ora, chē cuevēshoye tmojána. <sup>3</sup> Imojtsaye ora imojtsayénatsētnaye: “¿Chē cuevēshoye amashjuanentša ndētsbé nda bochtsabuajuána ca?”

<sup>4</sup> Pero imojontjeñe ora, tmojáninye chē cuevēshoye amashjuanentša bēts ndētsbé, chentšana juanániñe. <sup>5</sup> As chēnga choye tmojánamashjna y choye tmojáninye canye



bobontse bën uafjantse entsjéjua uichétjoná, chë cuevëshentša catsbioica inétsotbemañe; y chë shembásenga imojouatjaná. <sup>6</sup> Pero chë bobontse tojanéyana: “Ndoñe matauatjéngana; tséngaftanga šmondéngua Jesús Nazaretocá, chë tmonjancrucificá cha. Cha ya tontayena; muentše ndoñe quenátsmèna. Minyènga cha enjéftsejajonentše. <sup>7</sup> Motsajna, y Pedro y chë inye uatsjéndayènga šmochjáuyana: ‘Jesús tséngaftangbe natsana Galileoye echanjá. Choca cha šmochanjinye, ntsamo cachá tmojanéyancá ca.’”

<sup>8</sup> As chë shembásenga betscó chë cuevëshentšana tmojésanbocana, er puerte auatjanánènga imojtsemna y ngmémnayènga imojtsemna; y chë causa, chë soyama ndocná tmonjaniyana.

*Jesús, María Magdalénbioye tbojánébëbocna*  
(Jn 20.11-18)

<sup>9</sup> Jesús tojanayentšana, chë semana bojatšenté, Jesús natsana María Magdalénbioye tbojánébëbocna. Tempo Jesús chábentšana canyšéfta bacna bayèjènga tojtanébuacana. <sup>10</sup> Cha Jesúsbioye ainá tbojáninýentsšana, tojána Jesúseftaca imojánajnénga chama jaúnayama; chéngna ngménaca y sáchénaca imojtsemna. <sup>11</sup> Pero chénga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninýe ca tmojanuena ora.

*Uta ustonata Jesúsbioye tbojáninýe*  
(Lc 24.13-35)

<sup>12</sup> Chentšana, uta ustonábtbioye, básefta yebnénga yojamna luaroye ibojétsaye ora, Jesús tojánébëbuacna, mo inýa cuaftsemncá. <sup>13</sup> Chora chata tbojésanshëcona chë inýenga chama jacúntama; pero chéngna cach ndoñe ndegombre ca tmojanjuabó.

*Jesús chë uatsjéndayènga tojanichamó, Bèngbe Bètsabe soyèngama nyetsquénache jábuayenama*  
(Mt 28.16-20; Lc 24.36-49; Jn 20.19-23)

<sup>14</sup> Cabana, Jesús chë bnétsana canýe uatsjéndayènga tojánébëbuacna, chénga imojt-sesaye ora; y tojanécácana chë cha ainá yojtsemnama ndoñe ndegombre yontsemna ca tmojanjuaboma y nyets ainánaca chábeñe ndoñe montsanošbuachema, er cha ainá tmojáninýènga chama tmojanacuntá ora, chca ndoñe ndegombre yontsemna ca chë uat-sjéndayènga tmojánayana.

<sup>15</sup> Chentšana Jesús tojanéyana: “Nyets luarèngoye motsajna, y nyetsca entsánga chë tsabe noticiéngama šmochtsabuayiyenaye. <sup>16</sup> Nda chiñe chaojtsošbuaché y tséngaftanga chašmojuabaye, cha atsbocaná echántsemna; pero nda ndoñe tontsošbuaché, cha nyets tempo castiganá echántsemna. <sup>17</sup> Chë átsbeñe ošbuáchiyènga ndegombre soyènga imo-jtsabuayiyenama, entsánga mentsá mochántsetatšémbo: atše jótšëmbonése, átsbeñe bet-sošbuachéyeca, entsángbentsšana bacna bayèjèngbe juabna mochántábocna; tempo chénga ndmabiyañe mochantsóyebuambnaye. <sup>18</sup> Masque nderado cucuatšínne mëtšcuayènga tmo-jishache o veneno tmojofšenga, ndocá quemochatspása; y šoquèngbeñe cucuatšènga chamojacjá ora, chénga shnánènga mochántatsmèna ca” —Jesús tojanéyana.

*Jesús Bèngbe Bètsábioye tojtaná*  
(Lc 24.50-53)

<sup>19</sup> Bèngbe Utabná Jesús jóyebuambayama tojanpochocá chentšana, celoye cha tmojtanats-baná, y uámana luarentše, Bèngbe Bètsabe catsbioica yojtótbema jtsamándayama. <sup>20</sup> Y chë uatsjéndayèngna tmojánbocana y Bèngbe Bètsabe soyèngama nyetsquénache entsánga tmojanabuayená. Cach Bèngbe Utabná chénga yojanéjabuáchana, y yojánama entsánga chamotsetatšëmbuama chë buayenana soye ndegombre Bèngbe Bètsabe soyènga bétsemnama, chë uatsjéndayènga bétsoyènga jamama obenana chamotsebomnama cha jtsamése.

## San Lucas

### *Jabojátsama*

<sup>1</sup> Ba entšanga Jesusbe historia tmojuábema, ntšamo bēngbeñe ndegombre tojopasacá. <sup>2</sup> Chē historia juabemamna, chēnga tmojanuena ntšamo Jesusbe uatsjédayēnga y inye entšanga chabiana immencuentaycá. Chē entšangna tmojáninye y tmojanuena ndayá Jesús tojanmama y ntšamo tojanayancá, y chentsana chabe tšabe noticiēnga entšángbīoye tmojanabuayená. <sup>3</sup> As, átšnaca sēnjontsé cuedádoca juanoticiāna lempe ntšamo Jesusbīama imojtsichamcá, tojanobojatšentsana mēntsoñe. Mora šontsinýana tšabá yojtsemna acbīama juabemana ntšamo ndegombre yomncá, uámana taitá Teófilo, chē tījuanoticiá soyēngama, ntšamo ndegombre bēngbeñe tojopasacá. <sup>4</sup> Ba soyēnga Jesusbīama tcmojabuátēmbanga, y atše sēntseboše aca chacotsetátšēmo, ntšamo tcojouencá ndegombre yomnama.

### *Canýe ángel tojanabuayená Juan chē Ubayaná jónýnama*

<sup>5</sup> Herodes Judea luaroca rey inamna ora, yojamna canýe judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentsana entšá inamna (Aarón, chē más uámana bachnangbe natsana amēndayá). <sup>6</sup> Chatna tšabá amata ibnamna Bēngbe Bētsabe bominýiñe, y ntšamo Bēngbe Bētsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca. <sup>7</sup> Básenga tondaye ibonjánabamna, Isabel šešona jtsebomnama ndobena causa, y chatna ya bētsanánata ibojtsemna.

<sup>8-9</sup> Chē bachnanga Bēngbe Bētsabe bēts yebntšē tmojtsoserverna ora, sempre imojanamana jabocacayana, nda tšabá tbojtsónýená, Bēngbe Bētsábīoye atschuanaye luaroye cháuama incienso jajuinýiyama. Canýe, Zacaríasbe entšanga Bēngbe Bētsabe bēts yebnoca, Bēngbe Bētsábentšē imojtsoserverna orna, Zacaríasbīoye tšabá ibojonýena; y chca, cha ibojotóca jana incienso jajuinýiyana. <sup>10</sup> Zacarías, incienso yojtsejuinýantscuana, ba entšanga shjoca imojtsemna, Bēngbe Bētsáftaca encuéntaye. <sup>11</sup> Nýe ndeolpe, Bēngbe Utabnabe canýe ángel tojanonýná chē incienso jajuinýiyama altarentša catšbīoica. <sup>12</sup> Zacarías chábīoye tbojáninye ora, tojanenjaná y corente uatjana tbojanábuache.

<sup>13</sup> Chora chē ángel tbojanýana: —Zacarías, ndoñe matauatjana. Bēngbe Bētsá tonjouena ntšamo tconjaimpadacá. Acbe shema Isabel canýe šešona bochántsebomna, boyabásetema, y chana Juan ca cochjuabaye. <sup>14</sup> Chama aca corente oyejuayá cochántsemna, y bētscá entšanga mochanjóyejuaye acbe uaquíná tojonýnama. <sup>15</sup> Er cha, Bēngbe Bētsabīama canýe uámana entšá echántsemna. Ndocna te queochaisofsiye vínoye, ni jabuáchiye. Chē Uámana Espiritu chabe ainaniñe echantsemádaye, cha cabá ndonýna orscana. <sup>16</sup> Banga Israeloca entšanga, ntšamo cha chaojayanama mochanjontsé joyeunayana Bēngbe Bētsá, chēngbe Utabná. <sup>17</sup> Cha echanjášhango chē Bēngbe Bētsabe Uámana Uabuayanabe natsana, y echántsebomna obenana y canýe espíritu ntšamo chē Bēngbe Bētsabe juabna oyeubambnayá Elías inabomncá. Chabe natsana echanjášhango, bētsétsanga chēngbe básēngaftaca ndoñe chamondétsentsjanama, y chē nduauenanēnga cachiñe chamotsatsjuabnama ntšamo chē Bēngbe Bētsabe bominýiñe tšabá amēnga mondbetsejuabnacyá. Y chca, entšanga cha echantsapróntaye Bēngbe Utabná jabama orscama ca —chē ángel tbojanýana.

<sup>18</sup> As Zacarías chē ángelbīoye tbojantjá: —¿Ntšamo atše stjobenaye jtsetatšēmbuana chē šcontsatsá soye ndegombre bētsemnama? Er atše ya bētsējema sēntsemna y atšbe shémnaca cachcá ca.

<sup>19</sup> Chora chē ángel tbojanjúá: —Zacarías, atše ángel Gabriel sēndmēna; atše Bēngbe Bētsábīoca sēndoserverna. Cha šonjichmó chē tšabe noticiēnga aca jauyanama y jue-nayama. <sup>20</sup> Morna, chē cbontsatsá soyiñe ndoñe quecatošbuaché causa, ndēbiá cochanojóquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

<sup>21</sup> Chē ángel Zacaríaseftaca yojtsóyebuambnantscuana, entšanga shjoca Zacaríasbīama imojtsobátmana, y mēntšá imojtsejuabnaye: “¿Ndayeca tša bēn Bēngbe Bētsabe bēts yebntšē ibojtsobiamná ca?” <sup>22</sup> Zacarías tojtanbocna ora, ndoñe yontsobena chē entšángaftaca jóyebuambayana. Chēnga tmojántatšēmbona, chē Bēngbe Bētsábīoye atschuanayentšē Zacarías mo otjenayoquécá Bēngbe Bētsábīocana canýe soye tojáninýama, er chēngbīoye jatšēmbombonana yojáuyana, ndēbiá yojoquéda causa.

<sup>23</sup> Chabe tempo, chē Bēngbe Bētsabe bēts yebntšē jtsetrabájayama tojanpochocá ora, Zacarías cachabe yebnoye tojtaná. <sup>24</sup> Chentsana baseftaytese, chabe shema Isabel ngomananá yojoquéda, y chē causa, chē shema shachna ishinye cach tsoca yebntšē

totanoquedá. <sup>25</sup> Cha mentsá yojtichamo: “Béngbe Utabná mora atšbiana tojtenojuabó, entsángbentše atšbe ngménana jtsebojuánama, básenga tondaye Déntsabamna causa ca.”

*Canýe ángel tojanabuayená Jesús jónýnama*

<sup>26</sup> Isabel chnēnguana ishinýe ngomamaná yojtsemna ora, Béngbe Bětsá, ángel Gabriel tbojanichmó Galilea luaroye, Nazaret ca uabaina puebloye, <sup>27</sup> canýe shembása María ca uabainá jauatsétsayama. Mariyna cabá boyabása nduabuatomá inamna, pero Joséftaca jobouamayama tbojanšbuachená. Y Josena, rey Davidbentšana entsá inamna. <sup>28</sup> Ché ángel Mariýbioye tojána y mentsá tbojančuá: —¡Mouena. Béngbe Bětsá tšabe bendición acbiana tonjama! ¡Béngbe Utabná ácaftaca entsemna ca!

<sup>29</sup> Chca tojanuena ora, María yojenjnaná chē soyama, y yojtsejuabnaye ndáyeca chē ángel chca tbojančuama.

<sup>30</sup> Chora chē ángel tbojaníyana: —María, ndoñe matauatjana, Béngbe Bětsá entsama tšabe bendicionēnga chacotsebomnama. <sup>31</sup> Aca ngomamaná cochanjoquedá y canýe šešona boyabásetema cohántsebomna, y chana Jesús ca cochjuabaye. <sup>32</sup> Cha puerte echantsámama, y entsángna Béngbe Bětsabe Uaquiñá ca chábioye mochantsáobuatma. Y Béngbe Bětsá chē Utabná, chábioye canýe rey bochanjábema, ntsamo David yojamncá, <sup>33</sup> y Jacobēbentšana entsanga nyetsca tescama echantsamēndaye, y chabe mándayana ndocna te queochaisopochóca ca —ché ángel tbojaníyana.

<sup>34</sup> Chentsána María chē ángelbioye tbojantjá: —¿Ntsamo chca yochjopása, cabá ndoñe boyá sēntsebomñese ca?

<sup>35</sup> Y chē ángel tbojančuá: —Chē Uámama Espiritu echanjabo nyets ábeñe, y Béngbe Bětsabe obenánaca ngomamaná cochanjoquedá. Chabe obenana mo jantsetēshcá cmochanjaboútsbotse; chíyeca chē echanjónýna šešona Uamaná echántsemna, y chábioye Béngbe Bětsabe Uaquiñá ca mochantsáobuatma. <sup>36</sup> Mouena, Isabel, ache primá, canýe šešona bochántsebomna, masque ya bētsanán cha entsemna; chē “šešona ndbomná ca” monjan-aboatomá, mora ya chnēnguana ishinýe ngomamaná entsemna, <sup>37</sup> er Béngbe Bětsá lempe jamama endobena ca —cha tojánayana.

<sup>38</sup> Chora María chē ángelbioye tbojaníyana: —Béngbe Bětsabe oservená atše sēntsemna. Béngbe Bětsá átseftaca chaoma ntsamo šcojauyancá ca.

Y chentsána chē ángel tojtsatanoñe.

*María tojána Isabel jabuáchama*

<sup>39</sup> Chentsána, María tojanoprontá y tojanochēmo canýe puebloye, Judeoca tjañenache luariñe. <sup>40</sup> Chocna cha, Zacaríasbe yebnentše tojánamashēngo y Isabelbioye tbojančuá.

<sup>41</sup> Isabel ntsamo María tbojančuama tojanuena ora, Isabelbe šešona chabe uafsbioye tojanobonjó, y chē Uámama Espiritu Isabelbeñe tojánamashēngo chabe ainaniñe jtsemándayama.

<sup>42</sup> Chcasna, Isabel jabuache tojánayana: —¡Béngbe Bětsá acbiana más tšabe bendicionēnga entsama nyetsca shembásengbiana, y chē cohántsebomna šešonbiámna cachcá! <sup>43</sup> Atše merecido taitatobuajoñe, atšbe Utabnabe mamá chašubobuáchama; <sup>44</sup> er atše sēnjouena ntsamo šconjachuá, y cachora atšbe šešona oyejuayá atšbe uafsbioye tonjobonjó. <sup>45</sup> ¡Aca Béngbe Bětsábeñe tojošbuaché; cojtsetátšēmo Béngbe Bětsá ntsamo tcmojašbuachenacá yochjamama; chíyeca puerte oyejuayá cohántsemna ca!

<sup>46</sup> Chora María tojánayana:

“Nyets ainánaca Béngbe Utabná chantsadorana,

<sup>47</sup> y Béngbe Bětsá, atšbe Atsbocayabiana corente chanjóyejuaye.

<sup>48</sup> Béngbe Bětsá atšbiana tojtenojuabó, atše chabe oservenējema.

Er morscana muentša entsanga nyetscanga puerte oyejuayá ca šmochantsáobuatma.

<sup>49</sup> Béngbe Bětsá, chē nyets obenana bomná, chabe obenánaca bēts soyēnga atšbiana tonjama. ¡Béngbe Bětsá puerte Uamaná ca entsabaina!

<sup>50</sup> ¡Morsca entsanga y más hcoyēnga, chábioye yeunanēngbiana, cha sempre bochántse ngmenal!

<sup>51</sup> Cha, chabe obenánaca bēts soyēnga tojama,

y chē nýe cachēnga bētsétsanga enobiamnyēngbe juabna tojtsepochocá;

<sup>52</sup> reyēngbioye chēngbe mándayentšana tojtsatsatše;

pero chē nýe cachēnga bētsétsanga ndenobiamnyēngbioye, uámanēnga tojábiana.

<sup>53</sup> Chē shēntseca imomnéngbioye, chamosama bētscá cha tojatsatá,

pero chē bomnéngbioyna tondaye tonjatsatá.

<sup>54</sup> Cha tojanéjabuache chabe entsanga Israeloca, chabe oservenēnga,

y ndoñe tbonjánebnatjēmba jtsalastemánana,

<sup>55</sup> nyetsca tescama chē Abraham y chábentšana entsángbioye,

ntsamo béngbe bēts taitanga Béngbe Bětsá tojanašebuchenacá ca” —cha tojánayana.

<sup>56</sup> Mariyna unga ishinýe Isabeláftaca tojanoquedá, y chentsána cachabe yebnoye tojtana.

*Juan chë Ubayaná tojanonýná*

<sup>57</sup> Isabel jtseshócanama tojanóntšabuache ora, canýe šešona boyabásetema tojanonýná.  
<sup>58</sup> Isabelbe juachañe oyenënga y chabe pamíllanga tmojántatsëmbona ntšamo Bëngbe Bëtsá chábiye ibojalastemama, y chama corente Isabélaftaca tmojanoyejuanga. <sup>59</sup> Chë šešona posuftayté yojtsebomna ora, tmojánashjango y chëtëmbiye chë más delicadentše base bobachtema tmojantëtše, ntšamo chë judiënga imojanamancá. Chënga imojëtseboše chë šešónbiye Zacarías ca juabáyana, cach beftcá; <sup>60</sup> pero chabe mamá tojanëyana: —Ndoñe. Quem šešona echantsabaina Juan ca.

<sup>61</sup> As chënga Isabébiye tmojaniana: —Acbe pamíllangbeñe ndocná chca quenatabaina ca.

<sup>62</sup> Chora chënga jatšëmbombonana Zacaríasbiye tmojantjá, ntšamo chë šešona chaotsabainama cha yojtseboše ca. <sup>63</sup> Zacaríasna jatšëmbombonana canýe tablëbé tojanëyá y chiñe tojanábema: “Cha entsabaina Juan ca”. Y chë causa, nyëtsanga ojanánënga imojtsemna. <sup>64</sup> Y cachora Zacarías jóyebuambayama yojtobenaye, y yojntšé Bëngbe Bëtsábiye jëtschuayana. <sup>65</sup> Chë juachañe oyenënga nyëtsanga tmojanëuatjaná, y Judeoca nyëtsca chë tjañenache luaríñe entsanga chë soyëngama imojtsencuëntaye. <sup>66</sup> Nyëtsanga chë soyëngama tmojántatsëmbona ora, chëngnaca corente chama imojtsejuabnaye y mëntšá imojtsichamo: “¿Chë básetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

*Zacarías, Bëngbe Bëtsábiye jëtschuayama*

<sup>67</sup> Chë Uámana Espíritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntšá tojánayana:

<sup>68</sup> “¡Chë Utabná, chë Israeloca entsangbe Bëtsá matschuanga, er cha tonjabo chabe entsanga jabújabuachama y jabátsebacama!

<sup>69</sup> Cha bochanjíchmu canýe atsebacayá puerte obenana bomná, y cha echántsemna Bëngbe Bëtsabe oservená Davidbentsána entsá;

<sup>70</sup> ntšamo Bëngbe Bëtsá bayté entsemna, chë chabe juabna oyeuambnayëngbiajana, chë chábinga imomnëngbiajana bënga šojanašebuachenacá, mëntšá:

<sup>71</sup> Cha canýa bochjanichmuá bëngbe uayayënga y nyëtsca uaboyënjëngbiana bënga jabátsebacama;

<sup>72</sup> bëngbe bëtsétsangbiye jálastemama,

y jenójuaboyama y jamama chabe uámana trato,

<sup>73</sup> ntšamo Bëngbe Bëtsá, bëts taitá Abrahámbiye tbojanšbuachenacá.

<sup>74</sup> Cha tbojanšbuachená bëngbe uayayëngbiana bënga jabátsebacama, chca, bënga ndauatjá Bëngbe Bëtsá jasérviana,

<sup>75</sup> y chabe entsangcá, nyëtsca soyënguifne tšabá amënga, Bëngbe Bëtsabe delante nyëtsca te bëngbe vidënguifne jëftsiyenama.

<sup>76-77</sup> Y aca, atšhe básetemna, Bëngbe Bëtsabe juabna oyeuambnayá ca cmochantsábobuatma, entsángbiye Bëngbe Bëtsabe soyëngama cochtsabuayiyama,

Bëngbe Utabná cabá ndáshjango ora, bacna soyënga amana chamuajbanama;

as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantsopróntaye.

<sup>78-79</sup> Bëngbe Bëtsá bënga puerte šualastemánayeca,

canýa bëngbe juabnënga binýnayá bochanjíchmu,

bënga chë bacna soyënga causa mo ibetiñcá y obanëngbe luarentscá vida bomnëngbiye jabátsebacama,

y jabuátambama ntšamo natjëmbana jtsiyenana ca” —cha tojánayana.

<sup>80</sup> Chë básetema yojntšé jobóchana y chabe espírituca puerte. Bayté, entsanga ndoyena luarënguenache cha yojëftsiyena, Bëngbe Bëtsá Israeloca entsángbiye cha tojáninýanýentscuana. Chentšana, chamuábuatmanamna tojanontšé Israeloca entsángbeñe jóyebuambayana.

**2***Jesucristo tojanonýná*

(Mt 1.18-25)

<sup>1</sup> Chë tempo yojamna canýe Romoca bëts mandado, Augusto ca uabainá; y cha, chë natsanama tojanmandá nyëtsca entsanga chamuenábemama. <sup>2</sup> Chë soye tojanochnëngo Cirenio ca uabainá Siroca mandado yojamna ora. <sup>3</sup> Chamna, nyëtsanga tojanotocá jtangana jenábemëngama, cada ona ndémoca chëngbe bëts taitanga imojëftsiyena puebloye.

<sup>4</sup> As, Josénaca Galilea luarentšana Nazaretocana yojëftsebocna y Judeoye, Belén puebloye, tojtaná. Tempo, Josebe bëts taitá rey David, Belenoca inoyena. Y José,

Davidbentsana entsá inámnyecna, choye jenábemama tojtaná. <sup>5</sup> Mariáftaca tojána jenábemama, y muana tbojanšbuachená Joséftaca jobouamayama. Mariá ngomamaná yojtsemna, <sup>6</sup> y Belenoca ibojtsemnentscuana, chë ora tbojanóntsabuache jtsešócanama. <sup>7</sup> Y chentše Mariá ibojtsebmoma chabe natsana šešona, canýe boyabásetema. Posadoca tondaye luare yontsemna casna, chata nýe uacnëngbe átana tambuentše tbojanokedá. Y Jesús tojanonýná orna, Mariá tbojanentsacjuá y canýe bachetémiñe tbojanajá.

*Chë angelotémënga y chë oveshënga abujáñýanga*

<sup>8</sup> Belén béconana, chë íbeta, oveshënga abujáñýanga shëntsjoca cachëngbe oveshëngaftaca imojtsemna. <sup>9</sup> Nýe ndeolpe, Bëngbe Bëtsábíocana canýe ángel tojánébëbuacna, y Bëngbe Bëtsábentšana corente yojtsebuashinýinýana chëngbe shëconániñe. Chama chënga puerte imojocohauatjaná.

<sup>10</sup> Chora chë ángel tojanéyana: “Ndoñe matauatjëngana. Sënjabo tšabe soyënga tonjopasama jábuayenama, nýetscanga chamóyejuama. <sup>11</sup> Mora chë David tonjanonýná pueblentše canýe šešona tonjonýná. Cha tšëngaftangbe atsebacyá echántsemna y tšëngaftangbe entšangbiámna. Cha endmëna chë Bëngbe Bëtsabe Uámana Uabuayana, Cristo ca uabainá, y Bëngbe Utabná. <sup>12</sup> Ndegombre chca entsemnama mëntšá šmochanjátatšëmbona: canýe šešona ntsacjuaná y uacnëngbe bachetémiñe jajoná šmochanjínýena ca” —cha tojanéyana.

<sup>13</sup> Cachora, celocana mallajta angelënga chë natsana ángelbentše tmojánbocana y Bëngbe Bëtsábíoye mëntšá imojtsatschuanaye:

<sup>14</sup> “;Bëngbe Bëtsá, celoca entsemná matschuanga!

Bëngbe Bëtsábíoye yeunanëngbiam, Bëngbe Bëtsá corente entsoyejuá; quem luariñe chëngbeñe puerte tšabá chaotsemna ca.”

<sup>15</sup> Chentšana chë angelënga celoye tmojésanshëcuana. Y chora chë oveshënga abujáñýanga tmojanontsé jeniyanana: “Belenoye cuajna, chë quem tojopasá soye jinýama. Ndegombre, Bëngbe Bëtsá chë soye šojanýanyé ca.”

<sup>16</sup> As betso tmojána y tmojanányena Mariá, José y chë šešonatema bachetémiñe jajoná. <sup>17</sup> Chë šešona tmojáninýe ora, chënga tmojanacuntá Jesusbe bëtsétsata y chë inýëngbíoye, ntšamo chë šešonbiam chë ángel tojanéyancá. <sup>18</sup> Nýetscanga chë tmojanuenënga tmojanenjaná ndayá chë oveshënga abujáñýanga imojtsacúntama. <sup>19</sup> Pero Mariýna nýe cachabe ainanoca quem soyëngama más bën inétsenuabnañe.

<sup>20</sup> Chentšana, chë oveshënga abujáñýanga tmojtaná Bëngbe Bëtsá atschuanaye, ndayá tmojáninýama y tmojanuenama. Nýetsá tojanopasá lempe ntšamo chë ángel tojanéyancá.

*Bëngbe Bëtsabe bëts yebnoye Jesús tmojanamba*

<sup>21</sup> Posufta te tojánashjache ora, chë basetëmbíoye chë más delicadentše base bobachtema tmojantëtše, Bëngbe Bëtsabe entsá bëtsemnama chaotšinýnama, ntšamo judiënga imojanamancá; y Jesús ca tmojanabaye, ntšamo chë ángel tbojaníyancá, Mariá cabá ndoñe ngomamaná yontsemna ora.

<sup>22</sup> Y chë tempo tojanóshjango, ndaye ora José y Mariá yojtsamna jamana ntšamo Moisesbe leyíñe iuayancá, ndayá jamama yojanmëncá, canýe shembása Bëngbe Bëtsabe delante tšabia jtsatsmënama, canýe šešona tbojtsebmontšana. Asna, Jerusalemoye tbojánata y chë básetema tmojanamba, Bëngbe Bëtsabe bëts yebnoca jinýinýiyama, <sup>23</sup> ntšamo chë Bëngbe Utabná Moisésbíoye tbojaníyë leyënguiñe iuayancá, mëntšá: “Canýe yebnentše chë natsana šešona boyabása tojtsemnëna, Bëngbe Bëtsábíoye cha jinýinýiyana chábíoye chabotseservënama ca.” Chcasna, chë básetema Bëngbe Bëtsabe bëts yebnoye tmojanamba. <sup>24</sup> Y tmojanamba janshana uta shloftše, Bëngbe Bëtsá jëtschuayama, ntšamo Bëngbe Utabnabe leyíñe yomandancá. Chiñe mëntšá endayana: “Chë natsana šešona chaojonýná ora, boyabásetema tojtsemnëne, janshana šmochjuamba uta fchetnatëmata o uta šešona palomatëmata, Bëngbe Bëtsá jëtschuayama ca.”

<sup>25</sup> Jerusalemoca inamna canýe bacó, Simeón ca uabainá; cha inamna nýetsca soyënguiñe tšabá amá, y yojaniyena ntšamo Bëngbe Bëtsá yomandacá. Cha yojanobátmana chë tempo ndaye ora, Bëngbe Bëtsá bochjanichmuá canýa Israeloca entšanga cháuatsebaca. Y chë Uámana Espiritu chabe ainaniñe yojtsemna; <sup>26</sup> chíyeca, chë lempe chca ndopása ora, cha yojtsetátšëmbo cha ndoñe yochjanóbanama, chë Bëngbe Bëtsabe Uámana Uabuayana ntjéftsinýá. <sup>27</sup> Chë Uámana Espiritu tbojanmandáyeca, Simeón Bëngbe Bëtsabe bëts yebnoye tojána; y Jesusbe bëtsétsata chë básetema tmojanamba ora, ntšamo Moisesbe leyíñe iuayancá chabiamama jamama ora, <sup>28</sup> Simeón tbojanocutsá y Bëngbe Bëtsábíoye tbojtanchuá. Cha mëntšá tojánayana:

<sup>29</sup> “Bëngbe Utabná, mora šmoleseñciá, atše acbe oservená natjëmbana jóbanana, er ya tconjama ntšamo šconjanšbuachenacá;

<sup>30</sup> atše chë entsangbe Atsebacyá sënjinýe.

<sup>31</sup> Aca cha tcojichmó n̄yets luarenache entsangbiamá.

<sup>32</sup> Cha ch̄e ndoñe judiēngbe juabnēnga bin̄ynayá echántsemna; y chábeyeca, n̄yets quem luarentse mochanj́atatsēmbona, ch̄e acbe entsangbiamá, Israelo-quēngbiamá ca” —cha tojánayana.

<sup>33</sup> José y María ibojenjanata ntšamo Simeón Jesusbiamá yojtsichámuama. <sup>34-35</sup> Chentsana, Simeón Bēngbe Bētsábioye tbojanimpadá tšabe bendicionēnga chata chabotsebomnama chaomama; y María, ch̄e Jesusbe mamábioye tbojanianá: “Quem soyēnga corente cmochanjacochtsetšenaná, mo ainana espadējaca cuafjenēchnēngcá. Cha Israeloca banga echanj́apochocaye y banga echanj́atsebacaye; y chca, ntšamo banga ainaniñe imojuabnacá echantsótatsēmo. Israeloca banga quem básetema mochantsábotena y chabe palabrēngnaca ca” —cha tbojanianá.

<sup>36</sup> Chéntšnaca yojtsemna can̄ye shembása Bēngbe Bētsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentšá; ya bētsananá cha inamna. N̄ye can̄yēfta uata cha yojeftsebouamna; <sup>37</sup> y chabe boyá tojanóbanentsana, cha posufta bn̄etsana y canta uata viudá inamna. Ndocna te Bēngbe Bētsabe bēts yebnentšana yonjábocana, y chentše tojanoquedá bn̄eté y ibeta, Bēngbe Bētsáftaca encuéntaye y cha atschuanaye; y chama, ba soye yojanamana tondaye ntjascá jtsemnana. <sup>38</sup> Simeón, María y Josébioye yojsétsētsnaye ora, Ana chēngbioye yojobeconá, y ch̄e Atsebacayá tojanon̄ynama Bēngbe Bētsábioye tbojtanchuá chentsana, Jerusalenoca entsángbioye, ch̄e can̄ye atsebacayá Israeloca entsangbiamá imojanobatmanēngbioye tojanéyana, chana Jesús yojétsemna ca.

### *Jesús Nazaret puebloca*

<sup>39</sup> José y María lempe ntšamo ch̄e Utabnabe leyēnguiñe iuayancá tbojanma ora, Galilea luaroye tbojanata, cachēngbe puebioye, Nazaretoye. <sup>40</sup> Y ch̄e básetema yojsobóchaye, y más añemo yojtsejacana y más osertánana yojtsebomna. Y Bēngbe Bētsá yojánama cha bētscá tšabe bendicionēnga chaotsebomnama.

### *Jesús Bēngbe Bētsabe bēts yebnoca*

<sup>41</sup> Chabe bētsétsata ibojanamana cada uata Jerusalenoye jana Bashco fiestama, ch̄e Bēngbe Bētsá ch̄e judiēngbe bēts taitángbioye Egiptocana tojánatsebacama jtenójuaboyama fiesta. <sup>42</sup> Jesús bn̄etsana uta uata tojánashjache ora, Jerusalenoye tmojáná, ntšamo imojanamancá. <sup>43</sup> Ch̄e fiesta tojanopochocá chentsana, chabe bētsétsata yebnoye ibojtsataye, y chata ntsetatšēmbcá, Jesusna Jerusalenoca yojsotquedañe. <sup>44</sup> Chata ibojétsejuabnaye Jesús ch̄e in̄ye entsángaftaca yojsataboye ca; chcasna, can̄ye te n̄yetsá benachējana tojánata ora, tbojanontsé chabe pamíllangbeñe y ubuatmēngbeñe jtsenguanguana, <sup>45</sup> pero ndoñe ibonjobenaye jtsin̄yenana. As, chata chora Jerusalenoye tbojésansh̄econa choca cha jetsenguanguama.

<sup>46</sup> Unga tianoye chata tbojanobená Bēngbe Bētsabe bēts yebnentše cha jetsin̄yenana. Chana ch̄e Moisesbe ley abuatambayēngbe tsēntsaca inétsotbemañe, chēngbioye inayaunana, inatjanaye. <sup>47</sup> N̄yetsca ouenanēnga imojtsenjanaye Jesús tša osertaná inamnana, y tša tšabá jojuama cha yojsobenama. <sup>48</sup> Chabe bētsétsata chca tbojánin̄ye ora, chátnaca ibojenjaná. Chora, chabe mamá tbojanianá: —Uaquíñá, ¿ndáyeca chca bēndátaftaca tcojama? Taitá y atše corente enócochin̄yenata cbondēngúá ca.

<sup>49</sup> As Jesús tojanéyana: —¿Ndáyeca atše šmonguá? ¿Ndoñe šondétatsēmo atše somna atšbe Taitabe yebnentše jtsemnana ca?

<sup>50</sup> Pero ch̄e bētsétsata ndoñe tonjanēsertá ntšamo cha tojanéyancá.

<sup>51</sup> Chentsana Jesús ch̄e bētsétsataftaca Nazaretoye tojtáná y chata yojsayaunana. Y chabe mamana n̄ye cachabe ainanoca ch̄e soyēngama ch̄e bēn inétsenojuabnañe. <sup>52</sup> Jesús yojsobóchaye y más juabna yojtsebomna; y Bēngbe Bētsá y n̄yetsca entsanga corente oyejuayēnga chabiamá imojtsemna.

## 3

### *Juan ch̄e Ubayaná entsanga yojanabuayiná*

(Mt 3.1-12; Mc 1.1-8; Jn 1.19-28)

<sup>1</sup> Bn̄etsana shachna uatama Tiberio César Romoca bēts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey. <sup>2</sup> Anás y Caifás ch̄e bachnangbe más uámana amēndayata ibojamna. Cach tempo, can̄ye luare entsanga ndoyentše Bēngbe Bētsá tbojanatsétsá Juánbioye; Juan, Zacaríasbe uaquíñá. <sup>3</sup> As Juan n̄yetsca luarēnguejana Jordán bējaye bēconana tojánachnēngo, entsanga mēntšá utsétsnaye: “Tšēngaftangbe bacna soyēngama ngmēnaca šmochtenójuaboye, chca amana šmochtsajbaná y Bēngbe Bētsabe benache šmochtishache. Chora chochjúbaye, y Bēngbe Bētsá tšēngaftangbe bacna soyēngama

cmochanjáperdonaye ca.”<sup>4</sup> Chê soye tojanopasá, cachcá ntšamo chë Bëngbe Bëtsabe juabna oyebuambayá Isaias chabe librëšañe yojëftsabemcá. Cha mëntšá tojanábema: Entšanga ndoyena luaroca canya enduáyebuache:

“Bëngbe Utabná echanjabo ca; mo nda canye benache tojtseprontacá canye uamana entšá jashjanguama, cachcá, tšëngaftángnaca, Bëngbe Utabná jabama ainanentše tšabe juabnëngaca smochtseprontana.

<sup>5</sup> Nyetsca jachañe echantojútjia, y tjañe y batsjabenga mochantenájachibiaye.

Chë scundma benachënga ndirichëjënga echántsatsmëna, y chë bacá mana benachënga mochantenájachibiaye.

Mo chë chca tmojtsamëngcá, canye benache japróntana canye rey cháushjanguama, tšëngaftángnaca bëtscá smochtseprontana tšëngaftangbe ainaniñe, Bëngbe Utabná jabama.

<sup>6</sup> Y nyetsca entšanga mochanjinye chë Atsebacayá Bëngbe Bëtsábentšana jabana ca” —cha tojanábema.

<sup>7</sup> Chë entšanga Juan chaubáyama imojánbocana ora, Juan yojanëtsëtsnaye: “¡Mëtšcuaye entšanga! ¿Nda tcmënjáyana chë echanjóshjango uabouana castigüentšana smochjotsbocá ca? <sup>8</sup> Bëngbe Bëtsábeñe ndegombre ošbuáchiyënga smochtsemna, as chca chaotsinýna, tšëngaftanga chë bacna soyënga amana ndegombre smojtsajbanama. Y ndoñe smattsejuabnaye cach tšëngaftangbiana jayanama: ‘Bëngna Abrahábentšana entšanga, Bëngbe Bëtsabe entšanga fsëndmëna ca’. Er atše chanjayana, Bëngbe Bëtsá quem ndëtšbéngacnaca Abrahábentšana entšanga nanjábiana. <sup>9</sup> Tatšnia ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tonjashájona, jtseshatëšana y iñoye jtsatmetšana; tšëngaftangftácnaca cachcá, tšabe soyënga ndoñe smontsamëse, Bëngbe Bëtsá cmochanjácastigaye ca” —cha yojanëtsëtsnaye.

<sup>10</sup> —¿Y as, ndayá jamama šojtsamna ca? —chora chë entšanga tmojantjá.

<sup>11</sup> Y Juan tojanëjua: —Chë uta quëšaiya uabomná bontsemna canyiyá jutštayana chë tondaye tonduabomná. Saná bomná bontsemna juajatayana chë tondaye saná tond-bomnábiye ca.

<sup>12</sup> Romocama entšángbiye impuesto atjanayëngnaca jenábayama tmojánabo. Chënga Juánbiye tmojantjá: —Buatëmbayá, ¿ndayá jamama šojtsamna ca?

<sup>13</sup> Y Juan tojanëyana: —Nye ntšamo chë leyíñe yomandancá entšángbiye crocénana smochtsayëngacaye ca.

<sup>14</sup> Básefta soldadëngnaca chábiye tmojantjá: —¿Ndayá jamama šojtsamna ca?

Y Juan tojanëyana: —Ndocnábiye tondaye šmatjáboca, ni jauátjanase, ni nye ndayámnaca bonamente jobuáchëse; y nye ntsachetšá smacaná crocénanaca oyejuayënga smochtsomñe ca.

<sup>15</sup> Entšanga chë Bëngbe Bëtsabe Uamana Uabuayanabiana imojtsobátmana, y chënga Juanbiana imojtsejuabnaye nderado cha chë Bëngbe Bëtsabe Uamana Uabuayaná nanjamna ca; <sup>16</sup> pero Juan tojanëyana: “Ndegombre, atše béjayece chondubáyana. Pero chë echanjabá atšbiana corente más obenana endbomna, y atše mercedo taitatobuajoñe ni mo jotsejbiyana chabe shecochëtjonëshentša corriëja jajafjonama. Chë Bëngbe Bëtsabe benache chamojtishachëngbiana, Bëngbe Bëtsá echanjama chë echanjabábeyeca, chë Uamana Espiritu chëngbe ainaniñe cháumashënguama. Pero chë ndoñe chamontishachëngbiamna, Bëngbe Bëtsá echanjama chë echanjabábeyeca, chënga corente castigánënga chamotsemnama, mo iñeshequécá. <sup>17</sup> Canye entšá chabe mëtštá cucuatšíñe jiyëbana, chabe trigo jtsóbobemama, y chë ndoservena shácuaniënga jtsejashtsëtsana. Chabe trigo chë grano uaquëcñnaye tsañe jtsabuájua, y chë ndoservena shácuaniënga iñeshoye jtsatmetšana. Cachcá, chë átšbentšana echanjabá, chë tšabe entšanga echanjúbuaja, y chë bacna entšangna iñeshiñe echantsacastigaye, y chë iñe ndocna te queochátsfana ca” —cha tojanëyana.

<sup>18</sup> Chca y inye palabrëngaca Juan chë tšabe noticiëngama yojanabuayinýna. <sup>19</sup> Tempo, Juan Heródesbiye tojanácacana, cha tojanobouamama cachabe catšata Felipe shëmaftaca, Felipe cabá oyena ora; chana Herodías ca uabainá. Chama Juan tojanácacana y nyetsca bacna soyënga Herodes tojanmámnaca. <sup>20</sup> Pero Herodes Juánbiye joyeunaye luariñna, cabá inye más bëts bacna soye tojántana: Juánbiye cárceloye thojtsanëtame.

*Juan, Jesúsbioye thojanabaye  
(Mt 3.13-17; Mc 1.9-11)*

<sup>21</sup> Pero Herodes Juánbiye cabá ndutame ora, Juan ba entšanga tojanëbaye, y Jesúsnaca tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo, <sup>22</sup> y chë Uamana Espiritu mo canye palomatemcá Jesúsbioye yojtsastjajuana; y celocana Bëngbe Bëtsá thojaniyana: “Acna atšbe bonshana Uaquíñá condmëna. Achiana corente sëntsoyejuá ca.”

*Jesusbe bēts taitanga**(Mt 1.1-17)*

<sup>23-38</sup> Jesús unga bnētsana uata yojtsebomna, entsāngbeñe Bēngbe Bētsabe soyēngama jōyebuambayama yojontsé ora. Entšanga imojanjuabná Jesús Josebe uaquiñá yojamna ca.

José yojamna Elibe uaquiñá.

Elí Matatbe uaquiñá

y Matatna Levibe uaquiñá.

Leví yojamna Melquibe uaquiñá,

Melqui Janabe uaquiñá

y Jana Josebe uaquiñá.

José yojamna Matatíasbe uaquiñá,

Matatíasna Amosbe uaquiñá.

Amós Nahumbe uaquiñá,

Nahúm Eslibe uaquiñá

y Esli yojamna Nagaiibe uaquiñá.

Nagai yojamna Maatbe uaquiñá,

Maatna Matatíasbe uaquiñá.

Matatías Semeibe uaquiñá,

Semei Joseche uaquiñá

y Josec yojamna Judabe uaquiñá.

Judá yojamna Joanambe uaquiñá

y Joanán Resabe uaquiñá.

Resa Zorobabelbe uaquiñá,

Zorobabel Salatielbe uaquiñá,

y Salatielna Neribe uaquiñá yojamna.

Neri yojamna Melquibe uaquiñá,

Melqui Adibe uaquiñá.

Adi Cosambe uaquiñá,

Cosam Elmadambe uaquiñá,

y Elmadamna yojamna Erbe uaquiñá.

Er yojamna Jesusbe uaquiñá

y Jesús Eliezerbe uaquiñá.

Eliezer Jorimbe uaquiñá

y Jorimna Matatbe uaquiñá.

Matat yojamna Levibe uaquiñá,

Leví Simeonbe uaquiñá

y Simeón Judabe uaquiñá.

Judá Josebe uaquiñá,

José Jonambe uaquiñá,

y Jonamna yojamna Eliaquimbe uaquiñá.

Eliaquim yojamna Meleabe uaquiñá,

Melea Menabe uaquiñá.

Mena Matatbe uaquiñá,

y Matata yojamna Natanbe uaquiñá.

Natán yojamna Davidbe uaquiñá,

David Isaibe uaquiñá

y Isaína Obedbe uaquiñá.

Obed Boozbe uaquiñá,

Booz Salabe uaquiñá

y Sala yojamna Naasonbe uaquiñá.

Naasón yojamna Aminadabēbe uaquiñá,

Aminadab Adminbe uaquiñá

y Admin Arnibe uaquiñá.

Arni Esrombe uaquiñá,

Esrom Fáresbe uaquiñá

y Fáresna yojamna Judabe uaquiñá.

Judá yojamna Jacobēbe uaquiñá,

Jacob Isaacbe uaquiñá

y Isaacna Abrahambe uaquiñá.

Abraham Tarebe uaquiñá

y Taré yojamna Nacorbe uaquiñá.

Nacor yojamna Serugbe uaquiñá,



Serug Ragaube uaquiñá  
 y Ragauna Pelegbe uaquiñá.  
 Peleg Heberbe uaquiñá,  
 y Heber yojamna Salabe uaquiñá.  
 Sala yojamna Cainanbe uaquiñá,  
 Cainán Arfaxadbe uaquiñá  
 y Arfaxadna Sembe uaquiñá.  
 Sem Noebe uaquiñá  
 y Noé yojamna Lamecbe uaquiñá.  
 Lamec yojamna Matusalenbe uaquiñá,  
 Matusalén Enoche uaquiñá  
 y Enocna Jaredbe uaquiñá.  
 Jared Mahalaleelbe uaquiñá,  
 y Mahalaleelna yojamna Cainanbe uaquiñá.  
 Cainán yojamna Enosbe uaquiñá,  
 Enós Setbe uaquiñá,  
 Set Adanbe uaquiñá  
 y Adán Bëngbe Bëtsabe uaquiñá.

#### 4

##### *Jesús tojanobená Satanás jayëñjanama*

(Mt 4.1-11; Mc 1.12-13)

<sup>1</sup> Juan, Jesúsbioye tbojanabáyentsana, chë Uámana Espiritu Jesusbe ainaniñe yojtsemándaye. Jesús Jordán bejajoicana tojtaná y chë Uámana Espiritna entsanga ndoyena luaroye tbojanánatse. <sup>2</sup> Chentse canta bnëtsana te tbojanjëtana, y Satanasma yojanabó Jesús jisháchichiyama. Chë canta bnëtsana tentscuana Jesús tondaye tonjanse, y cabana ibojeshëntsena.

<sup>3</sup> Chora Satanás tojésanabo y tbojaniyana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

<sup>4</sup> As Jesús tbojanjuá: —Bëngbe Bëtsabe uabemana palabrenguiñe mëntšá endayana: “Entšá nýe tandëseca ndoñe vida ntsebomnana ca.”

<sup>5</sup> Chentšana, Satanás canýe bëts tjoye tbojanánatse y betscó nýetsca quem luarentša amëndayëngbenache tbojaninýinyé. <sup>6</sup> Chora Satanás tbojaniyana: —Atše nýets obenana cbochjätsetaye y lempe quem amëndayëngbenache yobinýna soyëgnaca. Atše lempe chca sënjóyëngacñe y sëntsobena jatšetayama nda stsebošábioye. <sup>7</sup> Aca chacojoshëntsamentšé y chaščojadorase, lempe nýetsá acbiama echántsemna ca.

<sup>8</sup> Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Acbe Bëtsá, chë Utabná cochtsadorana y nýe cha cochtseservena ca.”

<sup>9</sup> Chentšana, Satanás Jerusalenoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojaniyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, <sup>10</sup> er Bëngbe Bëtsabe uabemana palabrenguiñe endayana: Bëngbe Bëtsá chabe angelënga echanjichamuá, chacmotsinýenama.

<sup>11</sup> Chënga buacuatšëngaca cmochanjishache, shecuatše ndocá ndëtsbeñe chacondomama ca —cha tbojaniyana.

<sup>12</sup> Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

<sup>13</sup> Cabana, Satanás tojanajbaná bošana Jesúsbioye tbojanjuá. <sup>14</sup> Cabna soyëngama jacochënguama, y bënama Jesúsbenšana tojtsanojuánañe.

##### *Jesús tojanontšé Galileoca chabe trabajo jamana*

(Mt 4.12-17; Mc 1.14-15)

<sup>14</sup> Chentšana, Jesús Galileoye tojesaná chë Uámana Espiritbe obenánaca, y nýetsca entsanga chë luariñe chabiama imojtsencuëntaye. <sup>15</sup> Jesús yojtسابuátambaye chë judiëngbe enefjuana yebnënguenache, y nýetscanga cha imojtsatschuanaye.

##### *Jesús Nazaret puebloca*

(Mt 13.53-58; Mc 6.1-6)

<sup>16</sup> Chentšana Jesús Nazaretoye tojtanashjango, chë pueblentše cha tojanoboché, y ochnayte, ntšamo cha yozanamancá, chë judiëngbe enefjuana yebnentše tojanamashëngo. Y chocna tojantsbaná Bëngbe Bëtsabe palabra jualiama. <sup>17</sup> Chë Bëngbe Bëtsabe juabna oyebuambnayá Isaiásbe librëša tmojaninýé chauliama. Chë librëša yojutëfjona orna, tojaninýena mëntšá uábemanentše:

<sup>18</sup> “Chë Utabnabe Espiritu átšëftaca entsemna,

er atše uabuayaná stsemna chë Bëngbe Bëtsabe tšabe noticiënga chë ndbomnëngbeñe jôyebuambayama.

Cha šonjichmó jábuayenama, chë utámenënga chentšana ya chamuáisebocanama;

jamama chë jtanënga chamobenama tšabá jubínÿnama;

jamama chë inÿengbe causa imosufrínënga, tempcá cachcá tšabá chamotsatsmënama;

<sup>19</sup> y entšanga jáuyanama ndëmuca ora chë Utabná chabe entšanga yochjatsebacye ca.”

<sup>20</sup> Jesús jualiáma tojanpochocá y chora chë uajabuachanábioye chëša tbojtaniyé y tojtantótbema. Nÿetsca entšanga chë enefjuana yebnentše imojtsemnënga Jesúsbioye imojt-sobuáuatja. <sup>21</sup> Chora Jesús tojanontšë mëntšá jayanana: —Camëntë tšëngaftangbeñe tonjopasá ntšamo quem librëšañe iuabemancá ca.

<sup>22</sup> Nÿetscanga Jesúsbiama tšabá imojtsencuëntaye y ojanánënga imojtsemna tša botamana cha vojtsóyebuambnama. Y chënga imojtsentjanaye: —¿Quem boyabása ndoñe Josebe uaquiniá yondmëna ca?

<sup>23</sup> Jesús yojtsetátšëmo ntšamo cha tojánayaniñe chënga ndoñe tmonjanóšbuachema. As tojanéyana: —Ndegombre tšëngaftanga ntšamo entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe pueblëntšnaca cachcá moma ca”.

<sup>24</sup> Y cachora Jesús más tojanoyebuambá, mëntšá: “Ndegombre cbéyana, ni canÿe Bëngbe Bëtsabe juabna oyeuambnáyábioye cachabe pueblentše tšabá quematonýá. <sup>25</sup> Ndegombre cbéyana, Elías, chë Bëngbe Bëtsabe juabna oyeuambnáyá, Israeloca inamna ora, ba viu-danga chentše imojamna. Chë tempo, unga uata y tséntsane nÿetšá ndoñe tonjanafte y bëts shëntsana chë luariñe yojtsebinÿna. <sup>26</sup> Pero Bëngbe Bëtsá, Elíasbioye ndoñe tbonjanichmó ni mo canÿe Israelentša viudábioye, y aifne tbojanichmó inÿoye, Sarepta ca uabáinoye, Sidón béconaca, canÿe chentša viudábioye. <sup>27</sup> Eliseo, chë Bëngbe Bëtsabe juabna oyeuambnáyá, Israeloca inamna ora, chentše banga imojamna bacna nguayanánaca šoquënga, y ni mo canÿa chentša šocábioye tbonjanshná, pero aifne canÿe šocábioye, Naamán ca uabainá, cach bacna nguayanánaca, Siriocá ca” —cha tojánayana.

<sup>28</sup> Chë judiëngbe enefjuana yebnentše imojtsemna entšanga chca tmojanuena ora, puerte tojánëtëna. <sup>29</sup> As, chora chënga tmojantsbaná, chë pueblentšana Jesús imojtábocna y más tsjuanoye canÿe peñëšëjana imojuánatse. Chënga imojanajebna cach peñëšiñe, y chë entšanga imojtseboše Jesús chocana jtsajuatsëntšana. <sup>30</sup> Pero Jesusna chëngbe tsëntšajana tojánachnëngo y inÿoye tojtsanoñe.

*Jesús, bayëjbe juabna canÿyabioye tbojanbojuaná*  
(Mc 1.21-28)

<sup>31</sup> Chentšana, Jesús cach Galileoye tojesaná, Capernaum puebloye, y choca tojanontšë, chë ochnayté, chë judiëngbe enefjuana yebnentše entšanga jabuátambana. <sup>32</sup> Entšanga imojtsenjnanaye ntšamo Jesús vojtsabuátambama, er chamna mo canÿe mando bomnacá vojtsóyebuambnaye.

<sup>33</sup> Chë enefjuana yebnentše, canÿe boyabása bacna bayëja uambayá yojtsemna, y chabe causa chë boyabása tojanontšë mëntšá uayebuáchana: <sup>34</sup> —¡Cachcá šmonýál ¿Ndayama bëngbioye təcjabo, Jesús Nazaretocá? ¿Tcojabo bënga jabëtsapochocama? Atše sëndëtátšëmo nda aca comnama, aca chë Bëngbe Bëtsabe Uamaná ca.

<sup>35</sup> Chora Jesús chë bacna bayëjbioye tbojtsanácacana y tbojanianaya: —¡lytëca móbema y chábentšana maisebocna ca!

As chora chë bayëja entsanguentše chë boyabásabioye tbojanshajayé, y ndocá ntjëftsemcá chábentšana yojësebocna. <sup>36</sup> Chë soyama nÿetsca entšanga imojénjnanaye y mëntšá imojt-senatsëtsnaye: “¡Tša chca palabrënga! ¡quem entšá mandayacá y obenacá chë bayëjënga entsamënda, y chënga montsaisebocana ca!”

<sup>37</sup> Y Galileoca nÿetsca pueblënguifne Jesúsbiama vojtsótátšëmo.

*Jesús, Simón Pédrëbe uambén mamábioye tbojanshná*  
(Mt 8.14-15; Mc 1.29-31)

<sup>38</sup> Chentšana, Jesús chë judiëngbe enefjuana yebnentšana tojëftsambocna y Simombe yebnentše tojánamashëngo. Simombe uambén mamá šocá inajájona jabuache calentóraca, y chë chentše imojtsemna entšanga chabiamama Jesúsbioye tmojanimpadá. <sup>39</sup> Chora Jesús chë šocábioye yojtsejbëna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontšë chënga jobuácuedana.

*Jesús ba šoquënga tojananshná*  
(Mt 8.16-17; Mc 1.32-34)

<sup>40</sup> Shinÿe yojuenatjẽmba ora, banga inÿe y inÿe ðocana bomnẽnga Jesúsbioye tmojanenatse, y cha nÿetsca ðocuẽngbeñe cucuatšẽnga tojanajó y tojanashná. <sup>41</sup> Chora, ba ðocuẽngbentšana bacna bayẽjẽnga imojtsaisebocana y mẽntšá imojtsanchembumbuana: “¡Aca chẽ Bẽngbe Bẽtsabe Uaquĩná condmẽna ca!” Pero Jesusna yojsẽcácana y ndoñe tonjanalesenciá chamóyebuambama, er chẽ bayẽjẽnga imnatátšẽmbo cha chẽ Cristo bẽtsemnama.

*Chẽ judiẽngbe enefjuana yebnẽnguenache, Bẽngbe Bẽtsabe soyẽngama Jesús entsanga yojanabuayĩná*

*(Mc 1.35-39)*

<sup>42</sup> Yẽfsana tojanbinÿna ora, Jesús chẽ pueblentšana tojẽftsanbocna, y canÿe luaroye, entsanga ndoyenoye tojtsanoñe. Pero entsanga tmojana cha jetsenguanguama, y cha yojtsemnoye tmojanashjajna. Chẽnga imojtẽseboše Jesús cach pueblentše chaotsoquedáñama, <sup>43</sup> pero Jesús tojanẽyana: “Atše ðontsemna chẽ tšabe noticiẽnga Bẽngbe Bẽtsabe amẽdayama inÿe pueblẽnguenáchnaca jábuayenana. Chama Bẽngbe Bẽtsá ðonjichmó ca.”

<sup>44</sup> Y chentšana, Jesús yojánana Bẽngbe Bẽtsabiana entsángbioye abuayĩnaye, chẽ judiẽngbe enefjuana yebnẽnguenache Judeoca.

## 5

*Canÿe te mallajta beonga ashebuánaye te*

*(Mt 4.18-22; Mc 1.16-20)*

<sup>1</sup> Canÿe te, Jesús, Genesaret ca uabaina uafjajónaye tsachañe yojtsemna ora, ba entsanga tmojanashjajna, y chẽnga tša imojtsenajuatsẽntšnaye Bẽngbe Bẽtsabe palabra jounama.

<sup>2</sup> Jesús, chẽ uafjajónaye tsachañe bécoñe tojáninÿe uta ena barquẽsha; chẽ beonga ashebuánayẽngna barquẽshanguentšana tmojẽftsanbocna atarraiẽshangá jetsáboshabiana.

<sup>3</sup> Jesús canÿe barquẽshañe tojánamashẽngo; chẽsha Simónbeshana inauamna. Chora Simónbioye mẽntšá tbojaniana: “Quem tsacháñentšana chcoye mẽyamba ca.”

<sup>4</sup> Tojanótbema ora, Jesús chẽ barquẽshoicana tojanontšẽ entsanga jabuátambama. Jabuátambama tojanpochocá orna, Simónbioye tbojaniana: —Shbuatsẽntsoye barquẽsha mẽyamba y tšẽngaftangbe atarraiẽshangá šmochjushbuetše, beonga jashebuáyama ca.

<sup>5</sup> Pero Simón tbojanjuá: —Buatẽmbayá, nÿets ibeta fsẽndanguá y tondaye chibiátashebuaye. Pero aca chca tcjayánayecna, cachiñe atarraiẽsha chantẽtẽshbuetše ca.

<sup>6</sup> Tmojanẽshbuetše orna, bẽtsá beonga tmojánishẽche y chẽngbe atarraiẽshangá tojanontšẽ jtsatanẽcanana. <sup>7</sup> As, chẽ inÿe barquẽshañe imojtsemna enutẽngbioye tmojánẽfatšẽmbo, jabújabuachama chamuábama. Chora chẽnga tmojánabo, y nÿets uta barquẽsha beongaca tmojanajutjẽ. Tša chẽftanga causa, tojanontšẽ chẽ uta barquẽsha jtsenatjẽmbambana. <sup>8</sup> Simón Pedro chca tojáninÿe ora, Jesúsbentše tojanoshẽntsamentšẽ y tbojaniana: —¡Bẽngbe Utabná, atše bacna soye amá sẽndmẽna, chíyeca átšbentšana mojuaná ca!

<sup>9</sup> Chẽ tša beonga jashebuáyama Jesús tojanmama, Simón y chẽ cháftaca imojtsemnẽnga imojouatjaná. <sup>10</sup> Santiago y Juan, chẽ Zebedeobe uaquĩnata y Simonbe enutata, chátnaca auatjanánata ibojtsemna. Chora Jesús Simónbioye tbojaniana: —Ndoñe matauatjana. Morscana, entsanga Bẽngbe Bẽtsabiana cochántanguaye, y nÿe beonga ashebuayanáyá ndoñe queochátmẽna ca.

<sup>11</sup> As chora chẽ barquẽshangá tsachoye tmojtanẽyamba y lempe jẽseboshjonẽse, Jesús tmojanasto.

*Jesús, canÿa bacna nguayanánaca ðocábioye tbojanashná*

*(Mt 8.1-4; Mc 1.40-45)*

<sup>12</sup> Jesús canÿe pueblentše yojtsemna ora, chentše tojánashjango canÿe entsá bacna nguayanánaca ðocá. Chẽ ðocá Jesúsbioye tojáninÿe ora, tojanoshẽntsamentšẽ y jubiaca fshantsóntsoñe yojtsejbéna y tbojanimpadá: —Bẽngbe Utabná, aca tcojtsebošese, aca catjobenaye atšbe ðocana jtsebojuánana ca.

<sup>13</sup> As Jesús cucuatšeca tojánbojajo y tbojaniana: —Aĩñe, sẽntseboše. ¡ðocana cbotsebojuaná ca!

Y cachora chẽ ðocana tbojtsanóbojuanañe. <sup>14</sup> Chora Jesús tbojanmandá: —Ndocnábẽñe chẽ soye cattsecuẽntaye; nÿe Jerusalenoca báchnẽbioye motsa, y cha cochjinÿinÿiye aca mora ya tšabá cojtsatmẽnama; y chora cochjuátšẽmbona ntšamo Moisés chabe leyĩñe tojanmandacá, Bẽngbe Bẽtsábioye chama jẽtschuyama, chca, nÿetsca entsanga chamotátšẽmbona mora ya tšabá cojtsatmẽnama ca.

<sup>15</sup> Pero ndayá Jesús yojtsemama más entsanga imojátatšẽmbona, y ba entsanga imojtsojotoye chábioye joyeunayama y chẽngbe ðocanẽngama chauashnama. <sup>16</sup> Pero Jesús yojanamana jtsoñana entsanga ndoyena luarẽngoye y choca Bẽngbe Bẽtsáftaca ibnẽncuentaye.

*Jesús, canýe jama ndobenábioye tbojanshná*  
(Mt 9.1-8; Mc 2.1-12)

<sup>17</sup> Canýe te, Jesús vojtsabuatambá ora, chentše básefta fariseunga y ley abuátambayënga imojtsetbiámána, Galileoca nýetsca pueblënguentšana áshjajnënga, Judeoquënga y Jerusalemocuënga. Y chora Jesús shoquënga vojtsashnaye, Bëngbe Bëtsabe obenánaca. <sup>18</sup> Chora tojanopasá, básefta boyabásenga canýe šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús vojtsesemnoye, <sup>19</sup> pero jamashjnama ndoñe tmojanobená, tša entšanga causa. Chcasna, gradasëšënguëjana chë yebnentša tsbanánoye tmojánasëngo y batšá tejëshe tmojtsanjuaná. Chorna, chë atëfñëjana chë šocá tjuashiñe tmojanëštjango, entšangbe tsëntsaca, Jesusbe natsanoica.

<sup>20</sup> Jesús tojáninýe cha chë šocá jáshnama bëtsobenama chënga puerte imojtsošbuáchemá. As, chë jama ndobenábioye tbojanianyana: “Bacó, acbe bacna soyënga tcbontseboperdoná ca.”

<sup>21</sup> Chora chë ley abuátambayënga y chë fariseunga mëntšá tmojanontšë juabnyana: “Quem boyabása ndoñe tšabá Bëngbe Bëtsabiamá quenátichamo; mo chábioye cuafjoyenguangcá entsemna. Ndocna entšá quenátobena bacna soyëngama inýa japerdonana; nýe Bëngbe Bëtsá aifñe ca.”

<sup>22</sup> Pero Jesús vojtsatšëmbo ntšamo chënga imojtsejuabnyama; as tojanéyana: “¿Ndáyeca tšëngaftangbe ainaniñe chca šmojtsejuabná? <sup>23</sup> ¿Tšëngaftangbiamá ndayá más paselo nántsemna tšëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’?” <sup>24</sup> Y chca, morna atše cbochanjínýanýiye, chë Bëngbe Bëtsá Entšá tbojanbemá quem luariñe obenana yobomnana, entšanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojanianyana: “Atše chëyana, matëtsbaná, tjuashe mesocñe y acbe yebnoye motsatoñe ca.”

<sup>25</sup> Cachora chë jama ndobená tojtantsbaná entšangbe delante, chë cha inajájona tjuashe yojesocñe y Bëngbe Bëtsábioye atschuanaye chentšana vojtsatoñe. <sup>26</sup> Chama nýetsca entšanga imojéjñanaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinýe ca.”

*Jesús, Levíbioye tbojanchembo chabuastama*  
(Mt 9.9-13; Mc 2.13-17)

<sup>27</sup> Chca yojochnëngüentšana, Jesús chentšana tojëftsanbocna y canýe entšábioye tbojáninýe, Leví ca uabainá, chë entšangbioye impuesto Romocama atjanayentše inëtsoibemañe. Chora Jesús tbojanianyana: “Smasto ca.”

<sup>28</sup> Y Leví lempe tojésanboshjona, tojantsbaná y Jesús tbojanasto.

<sup>29</sup> Chentšana, Levina bëts fiesta chabe yebnentše Jesusbiamá vojama. Y chë fies- tentše imojtsemna banga impuesto atjanayënga; y inýe entšángnaca mesëshentše imojtsetbiámána. <sup>30</sup> Chora, chë fariseunga y chë ley abuátambayënga tmojanontšë chë Jesusbe uatsjëndayëngbiamá podesca oyebuambnyana; y chëngbioye mëntšá tmojanéyana: — ¿Ndáyeca tšëngaftanga impuesto atjanayëngaftaca y bacna soye amëngaftaca šmojtsesá y šmojtsoššësná ca?

<sup>31</sup> Y Jesús tojanéjua: —Salud bomnënga ashnayá ndoñe ntsëjabótana, pero shoquënga aifñe.

<sup>32</sup> Y atše ndoñe chiyátabo chë Bëngbe Bëtsabe bominýiñe tšabá amënga jabáchembuama, sinó chë bacna soye amënga imomna ca juabnyënga Bëngbe Bëtsábioye jabáchembuama ca.

*Jesús tmojantjá chë Bëngbe Bëtsáftaca jencuëntama tondaye saytescama*  
(Mt 9.14-17; Mc 2.18-22)

<sup>33</sup> Chora chënga Jesúsbioye tmojanianyana: —Juan chë Ubayanabe uatsjëndayënga y chë fariseungbe usetonënga monduamana ba soye Bëngbe Bëtsáftaca jtsencuëntayana, y chama ba soye tondaye ntjascá jtsemnana; pero acbe uatsjëndayënga nýe nýets tempo jesosañana y jesofšëšñañana ca.

<sup>34-35</sup> Chora Jesús tojanéjua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntšamo chca ndoñe nántsemna? Chë tojobouamá cha chëngaftaca tojtsemnëntscuana, chë ofjanënga bëtscá jasana y cháftaca oyejuayënga jtsemnana. Pero ora echanjóshjango y chë boyabása chëngbentšana mochantsánatseñe; chora cocayé chë ofjanënga echántsamna tondaye ntjascá jtsemnana. Ntšamo chë tojobouamá cha y chë ofjanëngaftaca endmëncá, cachcá endmëna atše, atšbe uatsjëndayëngaftacnaca ca —cha tojanéjua.

<sup>36</sup> Jesús mëntšánaca tojanacuntá jabuátambama: “Ndocna queonýbatatëtse basájua tsëm entšayañe, tanguá entšayá jtarmëndama. Chca tcojamëse, chë tsëm entšayá jtsandbemana, y chë tcojuatëtse entšëjua chë tanguájuañe ndoñe tšabá ntsinýnana. <sup>37</sup> Y cach ndoñe, chë tojtseshayana vínoye tanguá jasabenguñe ntjtaftsuámayana. Tcojuaftsuamasna, chë jasabenga jtseshëbéjuaña y chë vínoye jtsabuáshanaña; y chca, chë vínoye y chë jasabenga

todayama ntjatoservénana. <sup>38</sup> Chíyeca co, chë tojtseshayana vínoyna tsëm jasabengüñe juaftsuámana. <sup>39</sup> Ndocná, chë bóchena vínoye tojatémo y chentsana játsbošana chë tojtseshayana vínoye jatofsiyana; cha jayanana: ‘Chë bóchena vínoye tša tšabeye ca.’”

## 6

*Jesusbe uatsjéndayënga ochnayté trigo tmojanátabebe*  
(Mt 12.1-8; Mc 2.23-28)

<sup>1</sup> Canye ochnayté, Jesús canye jajajana yojtsaye; chabe uatsjéndayënga trigo imojtsaiuatabnaye, imojtsaiúshenécaye, y imojtsaiuasaye. <sup>2</sup> Chë causa, básefta fariseunga tmojanatjaye: —¿Ndayeca šmojtsama chë ochnayté jamama ndoñe quenátslesenciana soye ca?

<sup>3</sup> Y Jesús tojanéjua: —¿Ndoñe šmëndualía y šmondétatšëmbo, ntšamo rey David y chabe enutënga tmojanmama shëntseca imojtsemna ora y jasama yojtsëjabeto ora? <sup>4</sup> Chca orna, David Bëngbe Bëtsabe bëts yebnentse yojámashëngo y chë Bëngbe Bëtsá chentše yojamnana inýinýnaye tandëšënga yojase, y chë cháftaca imojánajna entsángnaca yojátataye. Y chë tandëšana nye bachnanga belesenciana jasama. Masque David chca yojama, Bëngbe Bëtsá chora ndoñe tonjánayana David canye bacna soye tojanma ca —Jesús tojanéjua.

<sup>5</sup> Y Jesús más tojanéyana: “Chë Bëngbe Bëtsá Entšá tbojanbemá, chë entsá ochnayté tojtsama sóynaca jtsemándayana ca.”

*Chë buashana cucuatše bomna entsá*  
(Mt 12.9-14; Mc 3.1-6)

<sup>6</sup> Inye ochnayté, chë judiëngbe enefjuana yebnoye Jesús tojánamashëngo y tojanontšë jabuátambana. Y chentše yojtsemna canye entsá, catšbioica cucuatše buashanëtše bomná; <sup>7</sup> y chë ley abuátambayënga y fariseunga chiñe imojtserrondana jinýama nderado Jesús chë ochnayté chábioya tabuanjashna, as chca chënga jtsebomnana ndaye sóyeca Jesús mal jaquédana. <sup>8</sup> Pero Jesús chëngbe juabna yojtsetátšëmbo; asna chë buashana cucuatše bomna boyabásabioye tbojanianyana: “¡Motsbaná y chentše tsëntsaca motsa ca!” Y chë entsá yojotsbaná y entsangbe tsëntsaca yojotsaye. <sup>9</sup> Chora Jesús chë ínýengbioye tojanéyana: “¿Ndayá yojtseseleenciana ochnayté jamana, canye tšabe soye o canye ndoñe tšabe soye? ¿Jatsbocana o jtsepochócana ca?”

<sup>10</sup> Y nyëtscanga chabe chabuajana imojtsemnënga tojanënyanjé, y chë buashana cucuatše bomnábioye tbojanianyana: “Macuñyanëjaná ca.” Y chë boyabása tojanacuenyanëjaná, y tšabá chëtša yojtsatamna. <sup>11</sup> Pero chë ínýengna puerte tmojanotjayaná, y tmojanontšë enatsëtsnayana ndayá muanjobenaye Jesusbe contra jamana ca.

*Jesús chë bnëtsana uta uatsjéndayënga tojanabacacá*  
(Mt 10.1-4; Mc 3.13-19)

<sup>12</sup> Chë tempo, Jesús tjoye tojána Bëngbe Bëtsáftaca jencuéntama; y nyët ibeta cháftaca tojanencuentá. <sup>13</sup> Tojanbinýna ora, chabe ústonënga tojánachembo, y chënguentšana tojanëbuáyana bnëtsana uta uatsjéndayënga, chë ndëmuanýënga “chabe ichmónënga cánaca” tojanëbobaye. <sup>14</sup> Chënga imojamna: Simón, chë Pedro cánaca Jesús tbojanabobayá; Andrés, Simonbe catšata; Santiago y Juan, Felipe y Bartolomé, <sup>15</sup> Mateo y Tomás, Santiago, Alfeobe uaqüñá; Simón, chë celote ca uabobainá; <sup>16</sup> Judas, Santiagebe uaqüñá; y Judas Iscariote, chë más chcoye, Jesús uayayëngbe cucuatšëne bochjanboshjoná.

*Jesús ba entsánga yojanabuatambá y yojánashnaye*  
(Mt 4.23-25)

<sup>17</sup> Chentsana, Jesús chëngaftaca chë tjocana tojtantsmá y canye jachañe tojanoquedá ba chabe ustonëngaftaca y ba inye entsángaftaca. Ba entsánga choye tmojánabo Judeocana, Jerusalenocana y Tiro y Sidón, chë mar bëjaye bëconana pueblënguentšana, Jesúsbioye oído jabuájua y chëngbe šocanëngama chauashnama. <sup>18</sup> Y chábeyeca chë bacna bayëjbe juabna uambayënga tšabá imojtsatsmëna. <sup>19</sup> Nyëtscá entsánga tša imojtseboše y ndayánaca imojtsama Jesús jabojuama, er chábentsana bëts obenana yojtsóbocana y nyëtscanga yojtsashnaye.

*Chë ndegombre oyejuayana bomnënga y ndëmuanýëngbiama tša lastema yochtsemna*  
(Mt 5.1-12)

<sup>20</sup> Jesús chabe uatsjéndayëngbioye tojanontješé y tojanéyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiama entsemna ca.

<sup>21</sup> “Puerte oyejuayënga tšëngaftanga chë mora oshëntsiyënga, er becá šmochantóshachaye ca.

“Puerte oyejuayënga tšëngaftanga chë mora šmošachenga, er chentsana šmochántatenbiajuaye ca.

22 “Puerte oyejuayënga šmochtsemna, entšanga chacmojtšëbuayënja ora, chacmojtšatëbuacana ora, chacmojtšëyanguá ora, y tšëngaftanga ndoñe tšabá šmontsama ca chënga chamojtsichamo ora, tšëngaftanga atšbe ústonënga bëtsemnama. 23 Chë te puerte šmochjójeyuaye, er celoca canye bëtš uacanána šmochántsebomna. Chëngbe Bëtš taitanga, cachcá chë Bëngbe Bëtšabe juabna oyebuambnayëngaftaca tmonjanma ca.

24 “Pero įtša lastema tšëngaftanga bomnëngbiama, er mora oyejuayënga įtsemnama ya bëtšcá šmojóyëngacñe ca!

25 “Įtša lastema tšëngaftanga chë mora shachanëngbiama, er shëntsana šmochántsebomna ca!

“Įtša lastema tšëngaftanga chë mora oyejuayëngbiama, er ngménama šmochanjenóbošachna ca!

26 “Įtša lastema tšëngaftangbiama nýetsca entšanga tšabá chamojtsoyebuambná ora; er cachcá chëngbe bëtš taitanga monjánama chë Bëngbe Bëtšabe ndoñe ndegombre juabna oyebuambnayëngaftaca ca!” —Jesús tojanéyana.

*Chë uayayëngbiama bonshánana įtsebomnana  
(Mt 5.38-48; 7.12)*

27 “Pero tšëngaftanga, átšbioye ouenanënga cbéyana: Tšëngaftangbe uayayënga šmochtsababuánýeshana; chë tcmojtsëbuayënjëngbiama tšabe soyënga šmochtsama; 28 chë tšëngaftangbiama bacna soyënga bošëngbiama, Bëngbe Bëtšá šmochtseimpadana tšabe bendicionënga chamóyëngacñama; chë tcmojjóyanguanguëngbiama, Bëngbe Bëtšá šmochtseimpadana. 29 Nderado ndánaca cánýoica tcmojajuebjantšetase, cochjomiye chë įnyoica cachcá chacmomama; nderado ndánaca quëfsaiya tcmojjuábocana, cachcá cochjonýaye acbe shabuanguanëjuanaca chauetsácñama. 30 Ndánaca chacmojtjañábioyna, jatšetayana; y nda ndayánaca chacmojtšëfcábioyna, ndoñe catjontšínýena chacmatoyema. 31 Įnyëngaftaca šmochtsama, ntšamo chë įnyënga tšëngaftangaftaca chamotsamama šmojtsebošcá.

32 “Tšëngaftanga, nýe chë tcmojtsababuánýeshanënga šmojtšababuánýeshanëse, įndaye tšabe soye chca šmattsama?; er chë bacna entšángnaca chca mondbëtšama. 33 O nderado, nýe chë tšëngaftangbiama tšabe soyënga tmojtšamëngbiama tšabe soyënga šmojtšamëse, įndaye tšabe soye chca šmattsama?; er bacna entšángnaca chca mondbëtšama. 34 O nýe chë cmochtëchenanguama šmojtsejuabnángbioye šmojųýentšamëse, įndaye tšabe soye chca šmattsama?; er chë bacna entšángnaca mondbetsenántšamiana, chëngbentšana cachcá įtójyëngacñama įtsobátmanëse. 35 Pero tšëngaftangna cmontsamna chë uayayënga įtsababuánýeshanana; y tšabe soyënga chëngbiama įtsamana y įjýentšamiana, chëngbentšana ndayánaca įtójyëngacñama ntjatobatmancá. Chca, tšëngaftanga uacanána cuenta canye bëtš soye šmochanjójyëngacñe, y celoca endmëna Bëngbe Bëtšabe básenga šmochántsemna; Bëngbe Bëtšá chë ndochuanayëngaftaca y bacna entšangaftácnaca tšabia comna. 36 Įnyëngbiama lastemadënga šmochtsemna, ntšamo tšëngaftangbe Taitá y omncá ca” —Jesús tojánayana.

*Ndoñe ntsichámuana chë įnyënga tšabá o ndoñe tšabá tmonjamama  
(Mt 7.1-5)*

37 “Ndocá įnyëngbiama šmattsichamo chë ndoñe tšabá tmontsamama, y Bëngbe Bëtšá ndoñe queochátichamo tšëngaftanga ndoñe tšabá šmonjama ca. Įnyëngbiama ndoñe šmattsichamo ndoñe tšabá tmonjama ca, y Bëngbe Bëtšá ndoñe queochátichamo tšëngaftanga ndoñe tšabá šmonjama ca. Įnyënga šmochjáperdonaye y Bëngbe Bëtšá cmochanjáperdonaye. 38 Įnyëngbioye šmochjatsataye y Bëngbe Bëtšá cmochántatsataye. Mo nda canye biaco medidiñe bëtšcá tojajutjé, uashëshe y cmojtiyecá, Bëngbe Bëtšá cachcá cmochántatsataye. Ntšamo tšëngaftanga įnyëngbioye chašmojábiamá, uabouana o ndoñe jabuache soyënga, Bëngbe Bëtšá cachcá tšëngaftangbioye cmochanjábiamá ca” —Jesús tojánayana.

39 Jesús quem cuéntnaca tojánayana jabuátambama: “¿Canyë įtaná nantsobena inýe įtaná įtsanachayama? ¿Chca ndoñe nýets útata ndaye tšubentšë buanjótsatše? 40 Chë uatšjendayá ndoñe ntsemnana chë buatëmbayabiamá mäs bëtšá. Pero chabe uatšjendayana chaojapochocá ora, cach buatëmbayacá įtsemnana.

41-42 “Canyá chabe bominýiñe canye niñëjfa tojtsebomnëse, cha ndoñe ntšobenana chabe catsátbioye jauyanana: ‘Acbe bominýentšana canye polvëštëma įtsebuchjátsëcama šmoleseñcá ca’. Natsana cha bontsemna cachabe bominýentšana chë niñëjfa įtsenobuchjátsëcana, tšabá įjnyama jobenayama, chabe catsatbe bominýentšana chë polvotëma įtsebuchjátsëcama. ¡Cachcá entsemna acbiama, bacna entšá chë ntšamo ndegombre tcojuabnacá ndinýinýnayá! Chë tša bacna soye cojtsama ca acbe catsátbioye tcojauyana ora, cach aca tša bëtš bacna soyënga cojtsamama ntjenojabuoycá; y chca, aca jamana canye bacna soye. Natsana cmontsemna chë cach aca ndoñe tšabe soyënga

cojtsamama ngménaca jshatenójuaboyana y chca amana jshétsajbanana, y chentšana cocayé cochantsobena acbe catsata juajabuáchana ntšamo tšabá yomncá chaotsamama ca” —Jesús tojánayana.

*Tšabe betiye o ndoñe tšabe betiye tondmënama, jtsotatsëmbuana ntšamo tojashajonca*  
(Mt 7.17-20; 12.34-35)

<sup>43</sup> “Ndoñe queonýbatsmëna, chë canýe tšabe betiýiñe podesca soye jashájonana; ni canýe ndoñe tšabe betiýiñe tšabe soye jashájonana. <sup>44</sup> Betiýënga jtsabuatmana ntšamo cada betiye tojtseshajcá. Uchmašëshentšana quenátopodena higuëbé jocñana; ni uvašëša, shëshëntša betiýentšana. <sup>45</sup> Chë tšabe entšana, chabe ainanoca tšabe juabnënga bomnentšana jtsóyeuambnayana; y chë bacna entšana, chabe ainanoca ndoñe tšabe juabnënga bomnentšana jtsóyeuambnayana. Er ndayá becá ainanoca tomnamá entšá jtsóyeuambnayana ca” —Jesús tojánayana.

*Chë uta ucuatjoniñe*  
(Mt 7.24-27)

<sup>46</sup> “¿Ndayeca tšëngaftanga atše šmnëtsaysa, ‘Utabná, Utabná ca’, y ntšamo atše stsichamcá ndoñe ntsamana? <sup>47</sup> Cbochanjáuyana ndacá yomna nda átsbiøye tojabo, atšbe palabra tojouena y ntšamo stsichamcá tojtsama: <sup>48</sup> Cha endmëna mo canýe entšacá, nda canýe yebna jajebuamna becá fshantse jashenoye vojajutjo y ndëtsbenguíñe yojúcuatjoye. Bëjayënga yojtsóftjajna ora, chë yebnëjana vojjobuachnëngo, pero ndoñe yonjobenaye juashajayana, er chë ndëtsbenguíñe jabuache yojáucuatjona. <sup>49</sup> Pero nda atšbe palabra tojouena y ntšamo stsichamcá ndoñe tontsama, endmëna mo canýe entšacá, nda canýe yebna vojajebno nýe fshantsiñe, tondayíñe ntjucuatjoycá. Bëjaye yojóftjango y jabuache chë yebnoye vojjobuá ora, chë yebna yojtsáshajaye y lempe yojtsopochóca ca” —Jesús tojánayana.

## 7

*Jesús canýe Romano soldadëngbe amëndayabe bochichnayábiøye tbojanshná*  
(Mt 8.5-13)

<sup>1</sup> Entšángbiøye chca jáuyanana tojanpochocá ora, Jesús Capernaum puebloye tojána. <sup>2</sup> Chentše yojoyena canýe romano soldadëngbe amëndayá. Cha ibnabomna canýe bochichnayá puerte bonshaná, y chora cha šocá yojtsemna, ya jtsóbanama. <sup>3</sup> Jesús ba šoquëngbiøye yojáshnama encuéntayana chë amëndayá yojouena ora, báseftanga bëtsëjemëngcá amëndayënga cha tojanichamó, chauábama Jesús jaimpádama y chabe bochichnayábiøye chabotseshnáñama. <sup>4</sup> Chënga Jesúsbiøye tmojánashjango y tša imojtseimpadana, mëntšá: “Quem soldadëngbe amëndayá mercedo entsebuájona chacotsájabuachama; <sup>5</sup> er cha bëngbe luarentša entšángbiøye corente endábabanýeshana, y cachá chë bëngbe nefnyana posada šonjayentsjebo ca.”

<sup>6</sup> Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbiøye mëntšá chamuauyanama: “Atšbe Utabná, ndoñe yapa matenócochinýenana átsbiøye jabama. Atše mercedo taitsatobuajoñe aca atšbe yebnoye chacuamashënguama; <sup>7</sup> chíyeca ni mo añemo chiyatentšetá jama aca jajëbenguama. Morna nýe cochjayana y atšbe bochichnayá tšabá echántsatsmëna. <sup>8</sup> Er atše sëndábamna átsbiøye mándayënga y átsnaca soldadëngbe amëndayá sëndmëna. Atše canýe soldadbiøye stjauyana ‘motsa ca’, cha cachora jana; y ínýabiøye stjauyana ‘mabo ca’, cha cachora jabana; y nderado atšbe bochichnayábiøye ndayánaca chaomama stjamánda, chánaca cachora chë soye jamana ca” —cha yojáuyana.

<sup>9</sup> Jesús chca tojanuena ora, chë mándayabiama yojenjanáná, y jobuértanëse chë ba entšanga cha ustonëngbiøye tojanëyana: “Ndegombre chëyana, ni mo nýets Israelentše, ni canýa quem boyabasacá tša ošbuachiyá chíyatínýena ca.”

<sup>10</sup> Y chë ichmónënga yebnoye tmojtaná orna, tmojáninýena chë bochichnayá ya tšabá yojtsatsmëna.

*Jesús tojanma canýe viudabe uaquiñá cháuatayenama*

<sup>11</sup> Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjëndayënga y ba entšanga imojtsaye. <sup>12</sup> Chë pueblo amashjuanoye yojtsebeconá orna, entšanga chë pueblentšana canýe obaná imojtsábocana jauátbontsama; chë obaná canýe viudabe uaquiñá inamna y nýe cha uaquiñá. Bëtscá entšanga chë obanabe mamá imojtsetjëmbambnaye. <sup>13</sup> Bëngbe Utabná chë viudábiøye tbojáninýe ora, chabiama tbojanongmé y tbojanayana: “Ndoñe matošachena ca.”

<sup>14</sup> Y jobëconase, chë ataúše tojánbojajo, y chë obaná atambayënga tmojantsá. Y Jesús chë obanábiøye tbojanayana: “Bobontse, atše cbëyana: ¡Matëtsbaná ca!”

<sup>15</sup> Chora chë obaná tojtantsbaná y tojanontsé oyebuambnayana; y chabe mamábioye Jesús chë bobontse tojtananátse. <sup>16</sup> Nýetsca entsanga tša uatjana yojbuache chca tmojáninýe ora, y Bëngbe Bëtsá imojtsatschuanaye, mëntsá jayanése: “Bëngbentše canýe Bëngbe Bëtsabe juabna oyebuambnayá cuatënjonýná ca.” Y mëntsánaca: “Bëngbe Bëtsá tojabo chabe entsanga jabújabuachama ca.”

<sup>17</sup> Y nýets Judea luarëjana y chë chábuañe luarenache entsanga imojátatsëmbona ndayá Jesús tojanmama.

*Juan chë Ubayanabe ichmónënga*  
(Mt 11.2-19)

<sup>18</sup> Juan, lempe ntšamo Jesús yojsamama yojátatsëmbona; er chabe ústonënga chama tmojancuentá. As Juan, chënguentšana úтата tojánachembo, <sup>19</sup> y Jesúsbioye yojichamuá jatjayama cha tayojamna chë Cristo, chë jabama ibojanmëná, chë Uámana Uabuayaná, o inýabiama jatobátmama tayojétsamna ca. <sup>20</sup> As chë Juanbe ichmónënga Jesúsbioye tmojanobeconá y tmojaniana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna inýabiama jatobátmama ca.

<sup>21</sup> Chë ichmónata tojánashjango ora, Jesús banga yojsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojsatëbinýna. <sup>22</sup> Chora Jesús mëntsá tojanéjua: —Motsata y Juánbioye šochjauyana ntšamo šojinýe y šojouëca: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tšëmënga montsuenana, chë obanënga tmontayena, y chë ndbomnjëmëngbioye chë tšabe noticiënga montsabuayinýná. <sup>23</sup> ¡Puerte oyejuayá chaotsemna, nda atše ndoñe bacna soye stsama ca jtsejuabnaye, átsbeñe ošbuáchiyana ndoñe tontsajbaná cha ca! —Jesús tojanéyana.

<sup>24</sup> Chë Juanbe ichmónata chentšana tojésanbocentšana, Jesús tojanontsé Juanbiamama entsanga jáuyanana, mëntsá: “Juan jinýama šmojánbocna ora, ¿ndayá jinýama šmojánbocana entsanga ndoyena luaroye? ¿Canýe entsá ainaniñe tondaye añemo ndbomná, mo canýe šše bínýiaca shatiyeynëscá? ¿Y ndoñese, ¿ndayá jinýama choye šmojánbocana? ¿Canýe boyabása uámana entsayaca bopormaná? Ndoñe. Tšëngaftanga šmondëtatšëmbo chë uámana entsayaca bopormánënga y chë bëtscá bomnánaca nýe tondayama ntsecochinýencá vida bomnëngna, reyëngbe yebnënguñe mondbëtsiyenama. <sup>26</sup> Asna, ¿ndayá jinýama choye šmojánbocana? ¿Canýa Bëngbe Bëtsabe juabna oyebuambnayá? Ndegombre; y cbëyana, canýa Bëngbe Bëtsabe juabna oyebuambnayabiamama más bëtscá. <sup>27</sup> Cha, Juan, endmëna ndabiamama Bëngbe Bëtsá chabe uabemana palabrënguñe tojánayana mo chabe ichmonacá, mëntsá tojánayana ora:

Cristo, atšbe entsá natsana sënjichmó acbiamama chaóyeuambama, entsanga jábuayenama aca jabama ainaniñe tšabe juabnëngaca chamotseprontánama ca.

<sup>28</sup> Ndegombre cbëyana: Nýets tempo entsángbeñe, ndocná quenátsmëna Juan chë Ubayanabiamama más bëtscá; masque chca, Bëngbe Bëtsabe amëndayoca chë más batšá uamaná, cha más bëtscá echántsemna ntšamo mora Juan yomnama ca” —Jesús tojánayana.

<sup>29</sup> “Nýetsca entsanga chca Juánbioye tmojanóyeunanga y chë Romocama entsángbioye impuesto atjanayëngnaca, nýets ainánaca tmojánayana Bëngbe Bëtsá nýetsca soyënguñe tšabá amá yomna ca; er tmojánenabaye ntšamo jubáyama Juan yojanamancá. <sup>30</sup> Pero chë fariseunga y ley abuatambayënga, ntšamo jubáyama Juan yojanamancá jýyëngacñama ndoñe tmonjánbošena ora, tmojtasanabotë ndayá Bëngbe Bëtsá chëngbiamama jamama yojanjuabnacá.”

<sup>31</sup> Jesús mëntsánaca tojánayana: “Cbochanjáuyana ndayacá morsca entsanga imomna, y ndayëngcá chënga imomna. <sup>32</sup> Chënga mondmëna mo chë plazëngoca mondbetsetbiámama basetemëngcá; chëngna mëntsá jbuache jtsenatsayana: ‘Tšëngaftangbiamama fsënjaflautá y ndoñe chešmatslantsá; ngmënacama fsënjavërsiá y ndoñe chešmatenóbošachna ca.’ <sup>33</sup> Juan chë Ubayaná tonjánabo y ndoñe quenjatamama bëtscá entsángbeñe jtsemnana, ni tandëse jasana, ni vínoye jofšiyana; y tšëngaftanga šmotsichamo chana bacna bayëjbe juabna uambayá inamna ca. <sup>34</sup> Morna, chë Bëngbe Bëtsá Entsá tojbanëmá tonjabo y chana aiñe entsamana bëtscá entsángbeñe jtsesayana y jtsofšësnayana, y tšëngaftanga chabiamama šmotsichamo: ‘Chana yapa uasayá y vínoye tmoyá entsemna y Romocama entsángbioye impuesto atjanayënga y bacna soyënga amëngbe amigo ca’. <sup>35</sup> Pero Bëngbe Bëtsá endbëtsinýinýaye cha nýets osertánana bomná yomnama, chë ndayá cha tojama ora ndayá chentšana inobocna soyëngaca ca” —cha tojánayana.

*Jesús, chë fariseo Simonbe yebnentše*

<sup>36</sup> Canýe fariseo Jesúsbioye tojanofja saná jauasama, y Jesús chabe yebnoye tojána y mesëshentše yojótbema. <sup>37</sup> Chë pueblentše yojamna canýe shembása, bacna vida bomná. Jesús chë fariseobe yebnentše yojsesama chë shembása yojátatsëmbona; as cha



chë yebnoye tojánashjango y tojanamba canýe alabastro botellëse, jútjena canýe botamana uanguëtse béjaye. <sup>38</sup> Jesúsbe shecuatšentše vojoshëntsamentšije, šachénaca; shëchbuíyeca chabe shecuatšënga yojtsefchecuacná y cachabe stjënashaca ibojtsatšshéchojuaye. Chabe shecuatšënga yojtonguëtšentšije y chë botamana uanguëtse béjaye ibojtsashecbueścaca. <sup>39</sup> Chë fariseo Jesúsbiyoe ofjáná chca tojáninýe ora, mëntšá Jesusbiamma yojtsejuabnaye: “Cha ndegombre canýe Bëngbe Bëtsabe juabna oyebuambnayá tojtsemnése, nantsetátšëmbo nda y mocna shembása yomna chë bontsebana shembása: canýe bacna vida bomna shembása ca.” <sup>40</sup> As Jesús chë fariséobiye tbojanianyana: —Simón, cuentado palabra šmotsoyeuná ca.

Y chë fariseo tbojanjá: —Arseñor, Buatëmbayá ca.

<sup>41</sup> Y Jesús tojánayana: —Canýe entšá crocénana uyentšamianá, uta ndebénata yojánabamna. Canýa shachna patse denario crocénana ibojandebena, y chë ínýana, shachna bnëtsana. <sup>42</sup> Pero chë útata tondaye ibontsebomna ndayentšana cha jëtsëntsabuáchiyama; as chë uyentšamianá nýets útata chë ndebénana yojtsaperdónaye.

Chora chë fariséobiye tbojanianyana: —Mora šmëyana, ¿chë útatašana nda más chë uyentšamianábiyoe buantsebomnashana ca?

<sup>43</sup> Y Simón tbojanjá: —Atše šontsinýana chë más bëtscá ndebená ca.

Y Jesús tbojanianyana: —Ndegombre, ntšamo endmëncá tcjayana ca.

<sup>44</sup> Jesús, chë shembásabiye jontješiyëse, Simónbiyoe tbojanianyana: —Minýe quem shembása. Atše acbe yebnoye sënjamashëngo y aca býeshe ndoñe chešcatabuatsëtá atšbe shecuatšëngama. Y quem shembásana, cachabe shëchbuíyeca šontseshecjabebé y chabe stjënashaca šontseshechojó. <sup>45</sup> Ndoñe chešcatámocho, pero cha tonjámashëngo orscana ndoñe ntjájbanana atšbe shecuatšënga onguëtšentšnaye.

<sup>46</sup> “Aca bestšašine aceitiye ndoñe chešcatsbueścja, y chana aiñe botamana uanguëtse béjaye šonjashecbueścja. <sup>47</sup> Chcasna atše cbëyana, cha šonjinýanýe atšbiama corente bonshánana yojtsebomna, er atše chabe bëtscá bacna soyënga sëntsebopeřoná; pero nda nýe básefta bacna soyëngama stjaperdóna chana, nýe batšatema bonshánana jtsebomnana ca.”

<sup>48</sup> Y chora Jesús chë shembásabiye tbojanianyana: “Acbe bacna soyëngama peřonaná contsemna ca.”

<sup>49</sup> Chora chë ofjánënga chentše imnatbíamanëngna tmojanontšé enatsëtsnayana: “¿Nda quem entšá yojtsemna, chë bacna soyëngamnaca entšángbiyoe jtsaperdónayana ca?”

<sup>50</sup> Y Jesús más chë shembásabiye tbojanianyana: “Aca átšbeñe icošbuachéyeca, atsbocaná cochántsemna; natjëmbana motsatoñe ca.”

## 8

### *Chë Jesúsbiyoe imojanájabuachana shembásënga*

<sup>1</sup> Chca tojanopasá chentšana, Jesús bëts y base pueblënguëjana yojánana, tšabe noti-ciënga Bëngbe Bëtsabe amëndayama entšanga abuátambaye y abuayinýaye. Chë bnëtsana uta uatsjëndayëngna cháftaca imojtsajna. <sup>2</sup> Básefta shembásëngama imojtsetjëmbambnaye; chëngbentšana Jesús bacna bayjëngna tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canýsëfta bacna bayjëngna tojtanëbuacna; <sup>3</sup> Juana, Cuzbe shema (Cuza yojamna rey Heródesbe canýe uajabuachaná); Susana y inýe shembásënga; chëngna chë imojánbomna soyëngaca chëngbiyoe imojanëjabuáchana.

### *Chë jenabe cuento*

(Mt 13.1-9; Mc 4.1-9)

<sup>4</sup> Ba pueblënguentšana mallajta entšanga tmojánbocana Jesús jinýama. Ba entšanga jounama tmojanobeconá ora, Jesús mëntšá tojanacuntá: <sup>5</sup> “Canýe, canýe jená jénaye jaujquëshama yojëftsebočna. Yojtsëjquëshaye orna, básefta jénaye benache juachañe yojuatquëcjana; chiñna entšanga imojtsebotájaye, y jaja shloftšënga imojástjajna y imojtsósañe.

<sup>6</sup> Inýe meshëngna ndëtsbenguíñe yojuatquëcjana. Yojuábocna orna, betscó yojtsábojo, chë fshantsiñe ndoñe yapa býeshe yonjamna causa. <sup>7</sup> Inýe meshëngna uhmëshangañe yojuatquëcjana y chë uhmëshangá lempe yojtsatscué, chë jénayeca canýiñe yojuábocna ora. <sup>8</sup> Inýe meshëngna, uanguaniñe yojuatquëcjana. Yojuájua orna, bëtscá yojuashájona; canýe jénayentšana nýa mo patse meshënga yojuashájona.”

Jesús chca jacuëntama tojanpochocá ora, tojanáyebuachena: “Chë jounama tmojt-sobenënga, šmochjouena ca.”

### *Ndáyeca Jesús cuentëngaca yojánabuatambaye*

(Mt 13.10-17; Mc 4.10-12)

<sup>9</sup> As chora chabe uatsjëndayënga tmojantjá: —¿Ntšamo chë cuento yojtsayana ca?

<sup>10</sup> Y Jesús tojanëyana: —Bëngbe Bëtsá tšëngaftanga cmontsinýanýná nýetsca chë mo iytëmencá yomna soyënga chabe amëndayama, pero chë ínýëngbiyoyna ndoñe; chë soyëngama

chënga lempe cuentëngaca sëntësëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque beca quem soyënga chamouena, ndoñe queochátësertana ca.

*Jesús chë jenabe cuentama tojanabuayená*  
(Mt 13.18-23; Mc 4.13-20)

<sup>11</sup> “Chë cuento mëntsá endayana: Chë jénaye Bëngbe Bëtsabe palabra entsemna. <sup>12</sup> Chë benache juachañe yojuatquécjiana básefta jénaye endayana chë básefta entšanga Bëngbe Bëtsabiama soyënga tmojouenënga; pero chora Satanás betso jabana chënga Bëngbe Bëtsabe palabra jabëtsabuajuanama, chca, chënga ndoñe chamondëtsošbuáchema y bacna soyënguentšana ndatsebácanënga chamotsemnana. <sup>13</sup> Inÿe entšanga mondmëna mo chë ndëšbenguñe yojuatquécjiana jenaycá. Chë entšangna Bëngbe Bëtsabe palabra jouenana y oyejuayënga jtsemnana. Pero ndoñe nÿets tempo chana jocochájuana; y chca, ndoñe bayté Bëngbe Bëtsáftaca ntjéftsemnëngana, cha ndoñe yapa tmontsašbuaché causa. Inÿenga móchantsëbuayënja y Bëngbe Bëtsábeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonÿaye. <sup>14</sup> Inÿe entšanga mondmëna mo chë uhmëshangañe yojuatquécjiana jenaycá. Chëngna Bëngbe Bëtsabe palabra jouenana, pero quem luarentša soyëngaca oyejuayënga jtsemnana yapa jesenójuabnayana, y mallajta crocënana y ba soyënga jtsebomnana yapa jésebošana; chama y ba soyëngama yapa enócochinÿena causa, Bëngbe Bëtsabe soyëngama echantsebnëtjomba y ndoñe quemochátama ntšamo Bëngbe Bëtsá tojayancá. <sup>15</sup> Inÿe entšangna mondmëna mo chë uan-guaniñe yojuatquécjiana jenaycá. Chëngna Bëngbe Bëtsabe palabra botamana mochanjouena; tsabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canÿe betiye puerte tsábá tojtseshajuancá, chënga bëtscá tsabe soyënga Bëngbe Bëtsabiama móchantsama. Chca móchántsama, Bëngbe Bëtsábeñe jtsošbuáchiyëse y nÿetsca soyënguñe puerte uantadënga jtsemnëse ca” —Jesús tojanabuayená.

*Chë uajuinÿanëshama cuento*  
(Mc 4.21-25)

<sup>16</sup> “Ndocná canÿe uajuinÿanësha juajuinÿenana, chentšana ndaye sóyeca chësha jtsëstama o jutsnësha tajsoye jtsajájuama; juajuinÿenana ndayá tsbanánoca juajájuama, chë luarentše amashjuanëngbiana chaotsebinÿinama. <sup>17</sup> Er ndocna yoitytëmena soye, ntjinÿcá queochaiso-quéda, y chë entšangbiana ndótatsëmbo soye, ntsotatsëmbcá queochaisoquéda.

<sup>18</sup> “Chcasna, botamana šmochjouena, er nda Bëngbe Bëtsabe soyëngama tsábá tbojsertá, Bëngbe Bëtsá echanjama cha más ba soyëngama chabosertama; pero nda chë soyëngama ndoñe tontsebošá, chë nÿe batsá ibosertana soyëngama bochántsebnatjëmba ca” —Jesús tojánayana.

*Chë Jesusbe ndegombre pamillanguentšënga*  
(Mt 12.46-50; Mc 3.31-35)

<sup>19</sup> Chora, chabe mamá y chabe catsátanga chë Jesús yojtsemnentše tmojánashjajna, pero ndoñe imontsobena chábioye jobéconana, yapa entšanga causa. <sup>20</sup> As canÿa Jesúsbioye mëntsá tbojaniana: —Acbe mamá y acbe catsátanga shjoca montsemna y montseboše aca jinÿama ca.

<sup>21</sup> As Jesús tojánayana: —Chë Bëngbe Bëtsabe palabra tmojouenënga y ntšamo tmojouena tmojtsamënga jtsemnana atšbe mamá y atšbe catsátanga, atšbe ndegombre pamillanguentšënga ca.

*Jesús chë binÿia y chë béjaye bonguana yojëtsbema*  
(Mt 8.23-27; Mc 4.35-41)

<sup>22</sup> Canÿe te, Jesús chabe uatsjëndayëngaftaca canÿe barquëshoye tojánamashëngo y chënga tojanëyana: “Uafjajónaye chenguana cuajna ca.”

As tmojána; <sup>23</sup> y imojtsenachñëjuanëntscuana Jesús yojtsomaná. Ndeolpe, chë béjayiñe corente jabuache binÿia yojóshjango y yojontsé béjaye chë barquëshoye jtsobuajútjiana. Y chca, chëngbiana puerte resjo yojtsemna. <sup>24</sup> Chora chë uatsjëndayënga tmojána Jesús jetsefšenama y mëntsá tmojaniana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binÿia y chë bëts olëshëngoye tojanmandá: “Bonguana sochtsemna ca.” Y chë binÿiayana tojanëjbana y lempe bonguana yojtsatsmëna.

<sup>25</sup> Chentšana Jesús chabe uatsjëndayënga tojanëyana: —¿Bëngbe Bëtsá tsëngaftanga ju-jabuáchama yobenama, cabá ndoñe šmontsošbuaché ca?

Y chënga auatjanánënga y ojanánënga mëntsá imojtsenatsëtsnaye: —¿Nda quem boyabása yomna? ¡Cha tojamandá ora, masque chë binÿia y chë béjaynaca joyeunayana ca!

*Chë Gerasa luaroca bacna bayëja uambayá**(Mc 8.28-34; Mc 5.1-20)*

<sup>26</sup> Chentšana Gerasa ca uabaina luaroye tmojánashjajna, Galilea ndirichiñe. <sup>27</sup> Jesús fshantsoye tojánastjango ora, chë pueblócana canye entsá chábioye tojánabo. Cha ya bayté bayëje juabna yojtsebomna, ndocna entsáyá yonjanichétjona; y yebniñe ndoñe yonjaniiyena, sinó obanënge cuevëshënguenache. <sup>28</sup> Chë entsá, Jesúsbioye tbojániniye ora, chabe natsanoica yojoshëntsamentsiye y mëntśá yojtsáyebuache: —¿Ndayá átšeftaca cojtseboše, Jesús chë celoca Bëngbe Bëtsabe Uaquiniá? ¡Diosmanda ndoñe Scatjatsetšená ca!

<sup>29</sup> Chca tbojaniiyana, er Jesús tojanmandá chë bacna bayëje juabna chábentšana chauesebomna. Ba soye chë bayëja yojánama chë entsá ndoñe tšabá chaotsemnama. Chë entsangca imojuamana cucuatšentsana y shecuatšentsana cha jtsëtsbuayana bonguana chaotsemnama, pero chana jtsatabebiana, y chë bacna bayëje mándoca entsangca ndoyena luarëngoye yojánachana. <sup>30</sup> Jesús chë boyabásabioye tbojantjá: —¿Ntšamo cabaina ca?

Y cha tbojanjá: —Atše sënduabaina Legión ca.

Cha chca tojánayana, er chábeñe ba bacna bayëjenga tmojánamashjna. <sup>31</sup> Y chë bayëjenga Jesús tmojanimpadá, chë corente uabouana tboye ndoñe chaondichamuama. <sup>32</sup> Chentša béconana ba cotšënga imnajena, tjoca immétsosañe; as chë bayëjenga Jesús tmojanimpadá chë cotšëngbeñe jamashjna chaualesenciamá, y Jesús añe chca tojanalencia. <sup>33</sup> As chë bayëjenga chë entsábentšana tmojésanbocana y chë cotšëngbeñe tmojánamashjna; y chentšana, chë cotšënga batsjocana peñëshëjana uafjajónayoye imojtsoshbuetše y yojtsatajo.

<sup>34</sup> Chë cotšënga anyëñenga chca yojopásama tmojániniye ora, chentšana tmojtsanacheta y tmojána chë soye jacuéntama chë pueblóca y chiñe luarenache. <sup>35</sup> Entšangca tmojánbocana ndayá tojanopasacá jinýama, y Jesús yojtsemnoye tmojánashjajna ora, tmojániniye chë entsá chë ndábentšana bayëjenga tmojtanbocna, Jesusbe shecuatšentše yojtsótbemañe, entsáyá uichétjoná y chabe nyëts juábnaca. Y chë entsangca chama corente imojoutatjaná. <sup>36</sup> Ntšamo yojopasacá tmojániniyëngna entsángbiye tmojanacuntá ntšamo chca chë bacna bayëje juabna uambayá chora ya tšabá yojtsatmëñana. <sup>37</sup> Chentšana, nyëtscanga chë Gerasa luarentše oyeñenga Jesúsbioye imojtseimpadana chë luarentšana ínýoye chaotsoñama, er chënga corente imojtsauatja. As Jesús chë barquëshoye tojtanamáshëngo y chentšana tojtsanoñe. <sup>38</sup> Chë entsá chë ndábentšana bacna bayëjenga tmojtanbocana, Jesúsbioye tbojanimpadá cháftaca jama chabolesenciamá; pero cha ndoñe tbojanlesencia. Jesús tbojanmandá chauatoquedama y mëntśá tbojaniiyana: <sup>39</sup> “Acbe yebnoye motsatoñe y cochjácutayalempa ntšamo Bëngbe Bëtsá acbiama tojamcá ca.”

Chentšana chë boyabása yojtsatoñe, y nyëts pueblëjana tojanacuntá ntšamo Jesús chabiama tojanmca

*Jesús canye shembásabioye tbojanshná y tojanma jairëbe bembetema cháuatayenama*  
*(Mt 9.18-26; Mc 5.21-43)*

<sup>40</sup> Jesús chë uafjajónaye chenguánoica tojtanashjango ora, nyëtsca entsangca oyejuayënga tmojtanofja, er nyëtscanga chabiama imojanobátmana. <sup>41</sup> Chora tojánashjango canye entsá, Jairo ca uabainá. Cha inamna chë pueblentše chë judiëngbe enefjuana yebnentša mandayá. Jesusbe shecuatšentše yojoshëntsamentsiye y ibojtseimpadana chabe yebnoye cháuama; <sup>42</sup> er chë nýe canye bembe cha ibnabomná, bnëtsana uta uata bomná, chora ya jóbana yojtsemna.

Y Jesús yojtsayëntscuana, chë entsangca chábioye imojtsojuatsëntsenaye. <sup>43</sup> Chë entsánguentše yojtsaye canye shembása, oboftjajuanánaca šocá; cha ya bnëtsana uta uata chca inapadecena. Lempe ntšamo yojanbomncá ashnayëngbiye atóbocayinë yojtsepochóca, y ndocná yonjobenaye cha jáshnana. <sup>44</sup> Chë shembásana stëtsaicana Jesúsbioye yojobecóná y chabe entsáyá sibuájua tojanábojajo. Y chachora chë oboftjajuanana ibojtsobojuána. <sup>45</sup> Chora Jesús tojanatjá: —¿Nda šjabojajo ca?

Nyëtscanga imojtsichamo ndoñe ca; as Pedro tojánayana: —Buatëmbayá, entsangca cmontsatsëntšená y cmontsayájuatsëntsenaye ca.

<sup>46</sup> Pero Jesús cachiñe tojánayana: —Pronto nda šojábojajo, er atše sënjasenté obenana átšbentšana jóbocnana, mo nda stjashna orcá ca.

<sup>47</sup> Chë shembása tojániniye Jesús yojtsetátšëmbo cha tbojánbojajuama. As chora, ngmëmnyá tojána y Jesusbe shecuatšentše yojoshëntsamentsiye; y nyëtscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama. <sup>48</sup> Chora Jesús tbojaniiyana: —Bembe. Bëngbe Bëtsábeñe icošbuachéyeca shnaná contsatmëna. Natjëmbana motsatoñe ca.

<sup>49</sup> Jesús cabá yojtsóyebuambnantscuana, chë judiëngbe enefjuana yebnentša mandayábocana canya tojánashjango, y chë mandayábioye tbojaniiyana: —Acbe bembe ya tontsóbana; ndoñe más chë Buatëmbayábioye matëbéyabomana ca.

<sup>50</sup> Pero Jesús chë soye tojanuena; as chë mandayábioye tbojanianyana: —Ndoñe matauatjana. Nye Bëngbe Bëtsabeñe cochtsošbuáchiye y acbe bembe tšabá echántatsmëna ca.

<sup>51</sup> Chë yebnoye tmojánashjajna ora, Jesús ndoñe tonjanalesenciá banga choye jamashj-nama, nye Pedro, Juan y Santiago y chë shembásetembe bëtsëtsatna aife. <sup>52</sup> Nÿetscanga imojtsenóbošachiye y ngmëna imojtsóyebuambnaye, pero Jesús tojanéyana: “Ndoñe matenóbošachengana. Cha ndoñe chenatóbana; cha nye endëtsomañe ca.”

<sup>53</sup> Chë entsanga Jesúsbioye nye imojtsáfchaye, er chënga imojtsetátsëmbo chë shembásetema obaná yojëtsemnama. <sup>54</sup> Chora Jesús chábioye tbojanábuacueshache y jabuache tbojanianyana: “¡Shembásetema, matëtsbaná ca!”

<sup>55</sup> Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatšé, chaosama. <sup>56</sup> Chë shembásetembe bëtsëtsata puerte ojnánata ibojtsemna; y Jesús tojanamëndá, ndayá tojanopasama ndocnábeñe ntsecuëntayana.

## 9

*Jesús, chabe uatsjédayënga tojanichamó, Bëngbe Bëtsabe amëndayama jábuayenama*  
(Mt 10.5-15; Mc 6.7-13)

<sup>1</sup> Chentšana, Jesús chabe bnëtsana uta uatsjédayënga tojánachembo, y mando y obenana tojanatšatá bacna bayëjënga entsángbentsana jtëbuacanama y šocanëngama jashnayama. <sup>2</sup> Tojanichamó Bëngbe Bëtsabe amëndayama jábuayenama y entsángbioye jashnayama. <sup>3</sup> Y mëntsá tojanéyana: “Benachiñama tondaye šmattsambaye; ni jatjonëfja, ni shecnaja, ni saná, ni crocënana; ni inye entsëjua jenotrócama cach ndoñe. <sup>4</sup> Canye yebnentše posada chacmojuyentsame ora, chentše šmochjoquëda inye pueblöye játantscuana. <sup>5</sup> Nderado ndayentše posada ndoñe chacmonjuyentsame, chentšana šmochjësebocana y shecuatšentsa polvëshe šmochjëstoto, chca, chëngbioye jinýanjyiyama chënga ndoñe tšabá tšëngaftangaftaca tmonjamama ca” —Jesús tojanabuayená.

<sup>6</sup> Asna chë uatsjédayënga tmojëftsambocana y tmojána, nÿetsca chë base pueblotëmënguenache chë tšabe noticiënga abuayinyaye y entsanga šocanëngama áshnaye.

*Herodes y Jesús*  
(Mt 14.1-12; Mc 6.14-29)

<sup>7</sup> Jesusbiana y ntšamo yojtsanopasánama rey Herodes tojántatsëmbona; y ndoñe yontsetátsëmbo ntšamo jtsejuabnayana, er báseftanga imojtsanichamo Juan chë Ubayaná obanënguentšana tojtanayena ca, <sup>8</sup> inyënga imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y inyënga canya chë tempo imojanmëna Bëngbe Bëtsabe juabna oyebuambnayënguentšá obanënguentšana tojtanayena ca. <sup>9</sup> Pero Heródesna tojánayana: “Cach atše sënjanmandá juambe bestšaše chamotsëštjanguama. ¿As, nda cha nántsemna, chë ndabiana chca soyënga jtsóyebuambnayana séntsuenana ca?”

Chíyeca Herodes yojtsenguaye ntšamo jamëse Jesús jinýama.

*Jesús shachna uaranga boyabásenga saná tojanacaredadó*  
(Mt 14.13-21; Mc 6.30-44; Jn 6.1-14)

<sup>10</sup> Chë Jesús tojánichamonga chábioye tmojtanashjango ora, lempe ntšamo chënga tmojanmama tmojancuentá. Y Jesús, nye chënga jëftsëbiatsese inyoye tojtanoñe, Betsaida ca uabaina pueblöye. <sup>11</sup> Pero chë entsanga chë soye tmojántatsëmbona, y as tmojanasto; y Jesusna tšabá chënga tojanëbuaja, y Bëngbe Bëtsabe amëndayama yojtsëtsësnaye, y chë šoquënga imojtsemnëngbioye tojanashná.

<sup>12</sup> Ya jetiñe yojtsobiamná orna, chë bnëtsana uta uatsjédayënga Jesúsbioye tmojanobecóná y mëntsá tmojanianyana: —Chë entsanga cuantichamuá, jóchnama y saná jonguangoñama chamotsama chë bëconana pueblotëmënguenache y luarënguenache; er quem luariñe ndocná quenatiyena ca.

<sup>13</sup> Jesús chora tojanéyana: —Tšëngaftanga saná chëngbioye šmochjacaredádaye ca. Pero chënga tmojanjúá: —Nye shachna tandëse y uta beónata fsëntsebomna; nÿetscangbiana saná jabuámíyama nderado nda tojasna, aife cuanjacaredádaye ca.

<sup>14</sup> Er mo shachna uaranga boyabásenga immamna. Pero Jesusna chabe uatsjédayënga tojanéyana: —Mamëndá nÿetscanga chamotbiamama shachna bnëtsátsanënga ca.

<sup>15</sup> As chënga chca tmojanma y nÿetsca entsanga tmojanotbiana. <sup>16</sup> Chora, Jesús chë shachna tandëse y chë uta beónata tojanca, y celoye tojanontjéšë, Bëngbe Bëtsábioye chama tbojtanchuá, tojanjatá y chabe uatsjédayënga tojanantregá entsángbioye chamuatšatama. <sup>17</sup> Nÿetsca entsanga tmojanse jtoshachaye nÿetšá, y cabá bnëtsana uta sbarëco tmojanajutjé chë ojannëtëmëngaca.

*Pedro tojánayana, Jesús chë Cristo bëtsemnama*  
(Mt 16.13-19; Mc 8.27-29)

<sup>18</sup> Canye te, Jesús canya Bèngbe Bètsáftaca ibojtsencuéntaye ora, chabe uatsjéndayënga cháftaca imojtsemna. Chora tojanatjá: —¿Nda atše bétsemnana entšanga imojtsichamo ca?

<sup>19</sup> Y chënga tmojanjuá: —Báseftanga montsichamo Juan ca, ínÿengna Elías ca, y ínÿengna canye Bèngbe Bètsabe juabna oyebuambnayá tempśá mora tojtayena ca.

<sup>20</sup> As Jesús tojanatjá: —Y tšëngaftagna, ¿nda atše bétsemnana ntšamo šmochjayana ca?

Y Pedro tbojanjuá: —Acna chë Cristo condmëna, chë Bèngbe Bètsabe Uámana Uabuayaná ca.

*Jesús tojánayana cha ibojamna jóbanana y jtayenana*  
(Mt 16.20-28; Mc 8.30-9.1)

<sup>21</sup> Pero Jesús corente chënga tojanamëndá ndocnábeñe chama ntsecuéntayana. <sup>22</sup> Y mëntśá cachabiamna tojánayana: —Chë Bèngbe Bètsá Entśá tbojanbemá bontsemna puerte jasúfriana, chë judiëngbeñe bëtšëjemëngcá amëndayëngbiana, chë judiëngbe bachnangbe más uámana amëndayëngbiana y ley abuatambayëngbiana uabotená jtsemnana. Entšanga mochanjóba, pero unga tianoye cha echántayena ca.

<sup>23</sup> Chentšana nÿetsca entšanga tojanëyana: “Nda atšbe uatsjendayá jtsemnana tojtseboše, cháuyana nÿe Bèngbe Bètsá yobena sempre chabe vidiñe jtsemándayana, chabe quem luarentša soyënga cachcá chauesonÿá atše juastama, y cada te chaotseprontana átsbeyeca jasúfriana, y cruciñe jobanámna. <sup>24</sup> Nda tojtsama quem luarentše bëtscá soyënga jtsebonmna y atšbiana jasúfriana ndoñe tontseprontana, chë nÿetsca tescama yomna tšabe vida echanjobuetše. Pero nda quem luarentša soyënga cachcá tojéftsonÿá atše juastama, masque chaóbana, chë nÿetsca tescama yomna tšabe vida echántsebonmna. <sup>25</sup> Er ¿ndayama entśá buanjosería nÿetsca quem luarentša soyënga jtsebonmna, cha pochocaná jtsemnana tojtsá y chë nÿetsca tescama yomna tšabe vida tojtsoperdese? <sup>26</sup> Er ndëmuanyë entśá, atšbiana o atšbe buayenana soyëngama tojtsëuatja, chë Bèngbe Bètsá Entśá tbojanbemánaca chabiana echantsëuatja, cha chabe bëtš buashinÿinÿaniñe chaojésabo ora, chabe Taitabe bëtš obenánaca y chabe angelotëmëngaftaca adoraná. <sup>27</sup> Ndegombre cbëyana, báseftanga muentše montsemnënga quemochatóbana, Bèngbe Bètsá chabe obenánaca entśangbeñe jabomándama jabana ntjéftsinÿcá ca” —cha tojánayana.

*Jesús inÿetśá tojanobinÿná*  
(Mt 17.1-8; Mc 9.2-8)

<sup>28</sup> Mëntśá tojanopasá: Chca palabrënga tojanoyebuambá chentšana posuftaytese, Jesús tojéftsanëbiatše Pedro, Santiago y Juan, y canye tjoye tojántsjua, Bèngbe Bètsáftaca jencuéntama. <sup>29</sup> Bèngbe Bètsáftaca ibojtsencuéntantscuana, chabe jubíá inÿetśá yojtsinÿna, y chabe uichëjtjonëjuangá tša uafjantsëjuangá yojtsamna y tša yojtsabuashinÿinÿyana. <sup>30</sup> Chora uta boyabásata tbojanonÿná, Jesúseftaca ibojtsencuéntaye. Chata ibojamna Moisés y Elías; <sup>31</sup> corente buashinÿinÿaniñe ibojtsemna, y chënga imojtsencuéntaye ntšamo Jesús Jerusalenoca jasúfriana y jóbanana. <sup>32</sup> Masque Pedro y chabe enutata tša ocnayënga imojtsemna, nÿe imojtsefšna y tmojáninÿe Jesusbe juachañe tša yojtsebuashinÿinÿyana y chë uta boyabásata cháftaca ibojtsemna. <sup>33</sup> Chë uta boyabásata Jesúsbentšana ibojoluára ora, Pedro, Jesúsbiyoe tbojanianyana: “Buatëmbayá, ítša tšabá bëngbiana cuanmëna muentše jtsemnana ca! Mora fchanjapórama unga tambotëmënga: cánÿetema acbiana, ínÿetema Moisesbiana y inÿyetemna Elíasbiana ca.”

Pero Pedro ndoñe yontsetátšëmbo ntšamo yojtsichámuama. <sup>34</sup> Y chca yojtsoyebuambnantscuana, canye jantsetëshe yojóbema, y chëngbiyoe yojáutsbotse, y chënga chë tsoye imojtsemnana tmojáninÿe ora, chë uatsjéndayënga chama imojtsauatja. <sup>35</sup> Chora chë jantsetëshoicana canye oyebuambnayana tojanóbocna, mëntśá: “Mua atšbe Uaquiñá endmëna, atšbe uabuayaná; cha šmochtseyeunana ca.”

<sup>36</sup> Chë oyebuambnayana tmojanuenentšana, tmojáninÿe Jesús canya yojtsemna. Chë uatsjéndayënga iytëca imojtsemna, y chë tempo ndocnábiyoe chama imonjuenaye.

*Jesús, canye basa bacna bayëbe juabna uambayábioye tbojanshna*  
(Mt 17.14-21; Mc 9.14-29)

<sup>37</sup> Yëfsana, chë tjocana tmojtantsmá ora, ba entšanga tmojánbocana Jesús jajëbenguama. <sup>38</sup> Chora, chë entšanguentšana canye boyabása tojanontśë mëntśá uayebuáchana: —Buatëmbayá, Diosmanda atšbe uaqiñá minÿe. Nÿe cha atšbe uaqiñá endmëna; <sup>39</sup> y mora, bayëbe juabna chábioye bontśësháchichana, y nÿe ndeolpe jontšana yoyana, ataque joshachana y uayoicana shashiye jtsabocanana. Y chábensana chë bayëja ndoñe betso ntjësebocnana, y cuerpiñe corente maltrataná jeseboshjonana. <sup>40</sup> Acbe uatsjéndayënga sënjaipadá chë bayëja chábensana chamuatábocnana, pero ndoñe chematobená ca.

<sup>41</sup> As Jesús tojánayana: —¡Nÿetśá ndošbuáchiyënga y bacna entšanga! ¿Buetayté šojtsemna tšëngaftangaftaca jéftsemnana y jtsëuantánana ca?

Chora chë boyabásabioye tbojaníyana: —Moye chë uaqiñá mánatse ca.

<sup>42</sup> Chë basa yojtsebecóná ora, chë bacna bayéja chábioye tbojanshajayé y inýe ataque tbojanëshache. Pero Jesús chë bayéjbioye tbojanácacana, chë basetémbioye tbojanshná y chabe taitábioye tbojtánëtrégá. <sup>43</sup> Y nýetscanga puerte ojanánënga imojtsemna, Bëngbe Bëtsá tsa obenana bomná inamnana.

*Jesús cachiñe tojánayana cha ibojamna jóbanana y jtayenana ca*

*(Mt 17.22-23; Mc 9.30-32)*

Nýetsca entšanga, ndayá Jesús yojtсамama ojanánënga imojtsemnëntscuana, chabe uatsjédayënga cha tojanéyana: <sup>44</sup> “Quem soye tšabá šmochjouena y ndoñe chacondébnëtjomba: Chë Bëngbe Bëtsá Entšá tbojanbemá entšangbe cucuatšifne mochanjáboshjona ca.”

<sup>45</sup> Pero chënga ndoñe yontsósertana ntšamo Jesús yojtšëtsësnacá, er Bëngbe Bëtsá ndoñe tonjalesenciá chama chaósertama; y imojtsautja Jesús jaimpádana chama chaubuayenama.

*¿Nda chë más uamaná yomna?*

*(Mt 18.1-5; Mc 9.33-37)*

<sup>46</sup> Chë tempo, chë uatsjédayënga tmojanontsé enatsëtsnayana, nda chë más uamaná bëtsemnana. <sup>47</sup> Jesús yojtsetátsëmbo ntšamo chënga imojtsejuabnayama; asna, canýe básetema tbojánishache, chabe juachaca tbojántbema, <sup>48</sup> y chëngbioye tojanéyana: “Nda átšbeñe ošbuachiyá bëtsemnana, quem basetémbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chíyeca, tšëngaftanguentše chë más nduamaná, cha chë más uamaná entsemna ca.”

*Nda bëngbe contra ndoñe tontsemná, bëngaftaca jtsemnana*

*(Mc 9.38-40)*

<sup>49</sup> Juan, Jesúsbioye tbojaníyana: —Buatëmbayá, bënga fsënjinye canýe boyabása y cha aca jótšëmbonëse, entšángbentsana bacna bayéjbe juabna endëtëbuacana; pero cha bëngaftaca ndoñe quenátšmëna causa, chama fsënjesauyaná ca.

<sup>50</sup> As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

*Santiago y Juánbioye Jesús tojanëcácana*

<sup>51</sup> Jesús celoye jtama yojtšobeco ora, nýets añémoca cha yojtsejuabnaye Jerusalenoye jama. <sup>52</sup> Natsana básëftanga tojanichamó, y chënga tmojána canýe base pueblotémoye Samaria luaroca, posada chabiama janguangoñama; <sup>53</sup> pero chë luarentša entšanga ndoñe tmonjánbošena posada juantšamiana, er tmojántatšëmbona cha Jerusalenoye yojtšayama, chë chëngbe uayayëngbe uamana pueblöye. <sup>54</sup> Chabe uatsjédayata, Santiago y Juan, chë soye tbojáninye ora, Jesús tmojaníyana: “Bëngbe Utabná, ¿quetseboše bëndata fchaimandá celocana ifešhe chaótsatše y quem entšanga chaotsapochóyaca ca?”

<sup>55</sup> Pero Jesús yojobuértana y chátbioye tojtšanëcácana, chca juabna bomna causa.

<sup>56</sup> Chentšana chënga inýe pueblotémoye tmojtšanoñe.

*Chë Jesús juastama bošënga*

*(Mt 8.19-22)*

<sup>57</sup> Benachëjana imojtsajna ora, canýe boyabása Jesúsbioye tbojaníyana: —Atšbe Utabná, atše sëntseboše aca juastana ndémoye chacojtšá choye ca.

<sup>58</sup> Y Jesús tbojanjuá: —Chë zorrënga cuevëshënga mondbomna ndayentše jtsiyenama y chë shloftsetëmëngna uajajonëshangá; pero chë Bëngbe Bëtsá Entšá tbojanbemá ndoñe quenátšbomna ndayentše jóchnama ca.

<sup>59</sup> Jesús inýe entšábioye tbojaníyana: —Smasto ca.

Pero cha tbojanjuá: —Atšbe Utabná, šmolesenciá atšbe taitá chjšhesabotbontsañe ca.

<sup>60</sup> As Jesús tbojaníyana: —Chë Bëngbe Bëtsabíama mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe. Acna, motsa y Bëngbe Bëtsabe amëndayama entšanga cochjabuayená ca.

<sup>61</sup> Inýana Jesúsbioye tbojaníyana: —Atšbe Utabná, atše sëntseboše aca juastama, pero šmolesenciá natsana atšbe pamíllangbíama jaisodiósoftama ca.

<sup>62</sup> As Jesús tbojaníyana: —Nda cachabe soyëngama tbojtšengmena, Bëngbe Bëtsabe amëndayocama ndoñe ntšoservénana; er cha jtsemnana mo canýe arayacá, chë tojtšetrabája ora, stëtšoye tojtšaisantješncá ca.

## 10

*Jesús canýsëfta bnëtsana y uta entsanga tojanichamó Bëngbe Bëtsabe soyëngama jábuayenama*  
<sup>1</sup> Chë soyënga chentsana, Bëngbe Utabná Jesús inyë canýsëfta bnëtsana y útatna tojanabacacá, y utata chabe natsana tojanichamó, chë cha ibojtsemna jama pueblëngoye y luarëngoye.

<sup>2</sup> Mëntšá chënga tojanëyana: “Canýe bëts jajañe bëtscá játbanama entsemna, pero peonga báseftanga; chíyeca, chentsa nduñbiyoye jaimpádana ba peonga chauichamó chë jaja saná játbanama. Cachcá, quem luarentše bëtscá entsanga montsemna Bëngbe Bëtsábiyoye nduabuátmënga, y chëngbiyoye chabiyama abuayinyayënga nýe báseftanga. Chíyeca, Bëngbe Bëtsá moimpadanga ba abuayinyayënga chauichamó quem entsanga chábiyoye jábuajama.  
<sup>3</sup> Motsajna; smochjinýe, atše tsëngaftanga cbontsichamná mo oveshënga cuenta, tjañe quešëngbeñe. <sup>4</sup> Ndoñe šmattsambaye shecnaja, ni crocénana šmattsaiuábuenana, ni shecochëtjonëshe; y nda chacmojacheuá ora, ndoñe yapa bën chentše šmatjáisënobiamnaye.

<sup>5</sup> “Ndaye yebnentše chašmojámarshjna ora, natsana smochjayana: ‘Lempe tsábá quem yebnentše chaotsomñe ca’. <sup>6</sup> Y chë yebnentše chca juabna bomna entsanga tmomñëna, chë tsábiana ndegombre chentše echántsemna; pero ndoñese, chca tsábiana chentše ndoñe queochátmëna. <sup>7</sup> Canýe yebnentše smochjoquéda, y smochjase y smochjofšiyey ntsámo chentše chacmojacaredadaycá; er chë trabajayá mercedo jtsebuájonana chca juácana. Canýe pueblëntše nýe inyë y inyë yebnënguenache ndoñe matajnana.

<sup>8</sup> “Ndaye pueblëntše chašmojámarshjna y tsábá chacmojúbuajentše, smochjase ntsámo chentše chacmojacaredadaycá; <sup>9</sup> chentsa šoquënga smochjášhnaye y smochjáuyana: ‘Bëngbe Bëtsabe amëndayana tsëngaftangbeñe entsemna ca’. <sup>10</sup> Pero canýe pueblëntše chašmojáshjango y ndoñe chacmonjúbuaja, chentsa tsashenangoye smochjábocana y mëntšá smochjayana: <sup>11</sup> ‘¡Chë tsëngaftangbe pueblëntša polvëshe, chë bëngbe shecuatšënguñe tojuanjëshe, camuentše šcuesenstëtoná, chca, tsëngaftanga chašmotsetatšëmbuama ndoñe tsábá šmonjamama! Pero masque chca, smochtsetatšëmo chë Bëngbe Bëtsabe amëndayana tsëngaftangbeñe entsemna ca.’ <sup>12</sup> Ndegombre cbéyana, quem luare jopochócama te, chë luarentša entsángbiyoye Bëngbe Bëtsá puerte jabuache echantsacastígaye, y Sodoma puebloca bacna entsángbiyoye ndoñe nýa nýetsá jabuache ca” — Jesús tojánayana.

*Chë nduauenana entsanga*

*(Mt 11.20-24)*

<sup>13</sup> “¡Tša lastema Corazín puebloca entsángbiama! ¡Tša lastema Betsaida puebloca entsángbiama! Er chë muentše Bëngbe Bëtsabe obenánaca sënjama soyënga, chë bëts pueblënga Tiro y Sidonoca chca matënjochnënguse, chentsa bacna entsanga ya tempo chëngbe bacna soyëngama ngmëna matmëntenójuabonga y Bëngbe Bëtsabe benache matmëntishache, y chca tmojamama chaotsótatšëmbuama, uajojësha entsayangaca matmëntopormanga y jatinýashifne matmëntjotbiama. <sup>14</sup> Pero ntsámo entsanga tmojamama, tsábá o ndoñe tsábá bëtsemnana jayanama chaojobuache ora, tsëngaftanga más bëts castigo smochántsebomna, chë Tiro y Sidonoca bacna entsángbe castiguama. <sup>15</sup> Y tsëngaftanga, Capernaum pueblëntša entsanga, ¿celóntscoca atsebánanënga smochtsemna ca šmojtsejuabnanga? ¡Chë uabouana infiernoye cmochantsësetjango!

<sup>16</sup> “Nda tsëngaftanga tmojoyauná, chana atše joyeunayana; y nda tsëngaftanga tmojtšëbaté, chana atše jtsabotena; y nda atše šojtsaboté, chana chë nda šojichmó chábiyoye jtsabotena.”

*Chë canýsëfta bnëtsana y uta entsanga tmojtanashjajna*

<sup>17</sup> Chë canýsëfta bnëtsana y útatna Jesús yojtsemnoye tmojtanashjajna, puerte oyejuayënga; y chábiyoye mëntšá tmojaninyana: —¡Bëngbe Utabná, aca jótšëmonëse, chë bacna bayjëngnaca šonjoyauná ca!

<sup>18</sup> Y Jesús tojánëyana: —Ndegombre. Y tsëngaftanga Satanásbiyoye chca smontseyëñjaná ora, entsemna mo Satanás celocana canýe tcuinýcá jtsotsatsana stjinyá. <sup>19</sup> Atšna obenana tcbonjatšatá mëtšcuayënga y alacranëngbeñe chašmotsajnama, y bëngbe uyayá Satanasbe nýets obenana jáyëñjanama, tsëngaftanga ndocá ntjapasacá. <sup>20</sup> Pero móyejuanga, ndoñe chë bacna bayjëngnaca chacmóyanama obenana smochtsebomnana, sinó tsëngaftangbe uabaina celoca ya yojtsábëmanama, er tsëngaftanga chë nýetsca tescama yomna tsabe vida smochántsebomna ca —cha tojanëyana.

*Jesús puerte tojanoyejuá*

*(Mt 11.25-27; 13.16-17)*

<sup>21</sup> Chora Jesús, chë Uámana Espiritbeyeca, corente oyejuayá tojánayana: “Atše cbatschuá, Taita, celoca y quem luarentša Utabná. Aca, chë nýe batšá tatsëmbënga tconjanýanyé, chë

tša tatsëmbënga y osertánëngbiama tcojaiytëme soyënga. Aíñe, chama cbontsadorana, Taita, aca chca chaotsemnna mtojábošenayeca.

<sup>22</sup>“Atšbe Taitá lempe chca šonjatšetá. Chë Uaquiñábioye ndocná corente quebnatábuatma; nýe chë Taitá aíñe. Y chë Taitábioye ndocná corente quebnatábuatma; nýe chë Uaquiñá aíñe, y ndëmuanýëngbioye chë Uaquiñá tojtseboše nda chë Taitá yomnna jinýañýiyama, chëngnaca chë Taitábioye mochantsábuatma ca.”

<sup>23</sup> Chentšana, Jesús chabe uatsjëndayëngbioye tojanobuértana y nýe chëngbioye tojanéyana: “¡Puerte oyejuayënga chë ntšamo tšëngaftanga šmontsonýáca jinýama tmojt-sobenënga! <sup>24</sup> Er atše chéyana, banga Bëngbe Bëtsabe juabna oyebuambnayënga y reyënga tmojánbošëna chë tšëngaftanga šmontsonýá soyënga jinýana, pero ndoñe tmonjáninýe; y tmojánbošëna chë šmontsuenana soyënga jouenana, pero ndoñe tmonjanuena ca” —cha tojánayana.

#### *Chë Samarioca tšabe entsabiama cuento*

<sup>25</sup> Canýe judiëngbe ley abuatambayá yojontsé Jesúseftaca jóyebuambayama, y jisháchichiyonna mëntšá tbojantjá: —Buatëmbayá, ¿ndayá šojtsemna jamana chë nýetsca tescama yomna tšabe vida jtsebomnna ca?

<sup>26</sup> Y Jesús tbojanjuá: —¿Ntšamo leyíñe iuábemana? ¿Ndayá chiñe condbëtsaliaye ca?

<sup>27</sup> Chë ley abuatambayá tbojanjuá: —“Chë Utabná Bëngbe Bëtsá cochtsebobonshana nýets ainánaca, nýets espíritoca, nýets añémoca y nýets juábna”; y “ndëmua entsánaca cochtsebobonshana, ntšamo cach aca cuenobobonshancá ca.”

<sup>28</sup> Chora Jesús tbojanijana: —Tšabá šconjojuá. Chca cochtsama y chë nýetsca tescama yomna tšabe vida cochántsebomna ca.

<sup>29</sup> Pero chë ley abuatambayá tšabá jenoquédamna Jesúsbioye tbojantjá: —Y ¿ndase chë ndëmua entsánaca yomna ca?

<sup>30</sup> As Jesús tbojanjuá: —Canýe, Jerusalenocana Jericó benache canýe entsá yojtsetsmá, y básefta salteadorënga imojëbëböcna. Lempe imojtsefta, chë entsáyánaca; imojtsejantšetaye y chentšana imojtsatöñënga, y chë entsá batšá obaná imojëšëboshjona. <sup>31</sup> Ndeolpe, chë benachëjana canýe judiëngbe bachna yojtsachnëjuana. Chë entsábioye ibojinýe ora, nýe chabuacá yojtsëchnëguañe. <sup>32</sup> Cachcá, canýe Levita, chë canýe Bëngbe Bëtsabe bëts yebnoca trabajayá chëjana yojtsachnëjuana; y chë entsábioye ibojinýe orna, nýe chabuacá yojtsëchnëguañe.

<sup>33</sup> “Chorna, cach benachëjana canýe samaritano ináboye. Chë entsábioye ibojinýe orna, ibojóngmia. <sup>34</sup> Chábioye yojobeconá, aceitiye y vínoyeca ibojáshna, y lisianënguifë entsëjuaca ibojuantsacjuá. Chabe couayíñe ibojëftsënjayiye, canýe yebnoye posada uyentsámianoye ibojuanats, y chentše chábioye ibojëftsiniýena. <sup>35</sup> Yëšana, chë samaritano uta denario crocénana yojenóbojatsëca, chë mo uta tesca traba juama crocénana nýetšá, y chë posada nduifñbioye ibojesabuenaye, y mëntšá ibojauyana: ‘Quem boyabása cochtsiniýena, y nderado más crocénana muabiana chacojenábojafjonasna, mëjana chaitisachnëjuana ora, choch-jabábasabuenaye ca.’ <sup>36</sup> Y chcasna, ¿chë unganguentsána nda cmojtsiniýana chë entsabiama yojtsejuabnaye cha cachacá entsá inamnna ca?”

<sup>37</sup> Y chë ley abuatambayá tbojanjuá: —Chë entsabiama tbojanongmé cha ca.

Y Jesús tbojanijana: —Asna, motsa y cachcá cochjama ca.

#### *Jesús, María y Martbe yebnentše*

<sup>38</sup> Chentšana, Jesús benachëjana yojtsaye y canýe base pueblotëmoye tojëftsanamashëngo; y canýe shembása Marta ca uabainá, chabe yebnentše tbojanofja. <sup>39</sup> Martna canýe quenata ibnabomna, María ca uabainá. Cha Jesusbe shecuatšentše yojótbema chabe palabra jouenama; <sup>40</sup> y chëntscuana Marta ba soyënga yojtsama. Cha Jesúsbioye tojanobeconá y tbojanijana: —Utabná, ¿tundayana cmontsentšamna, atšbe quenata nýe canýa chašonýá lempe jamama ca? Mëyana chašúájabuache ca.

<sup>41</sup> Chora Jesús tbojanjuá: —Marta, Marta, bëtscá soyëngama contsenóochinýena y contsenomantšná; <sup>42</sup> pero nýe canýe soye endmëna chë yoiyta soye jamama. María chca jamama tojobuáyana, chë más tšabe soye, y ndocná queochatsma cha chaotsajbanama ca.

## 11

#### *Ntšamo Bëngbe Bëtsáftaca cuanjencuénta (Mt 6.9-15; 7.7-11)*

<sup>1</sup> Canýe, Jesús Bëngbe Bëtsáftaca ibojtsencuëntaye canýe luarentše. Tojanpochocá orna, canýa chabe uatsjëndayënguentsá tbojanijana: —Bëngbe Utabná, Bëngbe Bëtsáftaca jencuëntama šmabuatambá, ntšamo Juan chabe uatsjëndayëngaftaca tojanmca ca.

<sup>2</sup> Y Jesús tojanéyana: —Bëngbe Bëtsáftaca chašmojtscuënta ora, šmochjayana: Bëngbe Taitá, acbe uabaina chë más uamana uabainana chauesomñe.



Acbe amëndayana chaóshjango.

<sup>3</sup> Mënté smiyatsatá, cada te šnetsëjaboto tandëse.

<sup>4</sup> Bacna soyënga fsënjama: šmotsaperdónaye;

er bēngnaca nyētsanga chē bēngbiama bacna soyënga amēngbiolye fsēndbetsaperdónaye.

Bacna soyënga jamama šojocochëngo ora, šcochjubahuache chca ndenobuíyama.

<sup>5</sup> Jesús mēntšánaca tojanéyana: “Nderado aca acbe bacóbiolye tsēntseto ora tcojá y tcojauyana: ‘Bacó, Diosmanda unga tandëse šmotsemná, <sup>6</sup> er canye atšbe amigo yebnoca tonjáshjango y tondaye quetsátsbomna cha jonánjama ca.’ <sup>7</sup> Ndegombre, cha tsocana tcmojouá: ‘Ndoñe šmatébeyabomana. Bēsáša ya entsatámena y atše y atšbe básenga ya fsēntsojá; ndoñe quetsátobena mora jotsbanana y chē tandëse jámnana ca.’ <sup>8</sup> Ndegombre, chē bacó ndoñe tonjotsbaná chē tandëse jámnana, cháftaca šuenatsētsnámase, cha pronto jotsbanana chca uebéyabomana ndoñe tconjabaná causa, y lempe ntšamo cmojtsajabotcá cha cmochanjoiye. <sup>9</sup> Chcasna, atše chéyana: Smochjotjañe y Bēngbe Bētsá cmochanjátataye; smochjánguango y smochanjínjēna; smochjachembo y cmochanjébetafo. <sup>10</sup> Er ndánaca ndayá tojtsotjanañá, jóyēngacñana; y tojtsenguá cha, jónjēnana; y nda tojtsechembuanábolye jebiatéñjuaana ca.

<sup>11</sup> “¿Nda tsēngaftanguentšana nantsobena, taitá tojtsemnēse, cachabe uaquiñábolye canye mētsuayē jatštayana, beona tbojtsotjanañe ora; <sup>12</sup> o canye alacránashe joiyana, shēmnēbē tbojtsotjanañe ora? <sup>13</sup> Y chca, tsēngaftanga, bacna soyënga amēnga, tsēngaftangbe basatemēngbiolye tsabe soyënga jatšatayama šmojtsamanēse, imás chē celoca Taitá, chē Uámana Espiritu echanjatsataye, chca tmojtsotjanañēngbiolye ca!” —Jesús tojánayana.

*Fariseunga tmojánayana Jesús Satanásbentšana obenana tojanóyēngacñe ca*  
(Mt 12.22-30; Mc 3.20-27)

<sup>14</sup> Jesús canye entsábentšana canye bacna bayēja tbojtjanábocna. Chē bayēja ndēbiá chē entsábolye tbojánbema, y chárentšana tojésanbocna ora, chē ndēbiá tojtantonšé oyebuambnayana. Y chē entsanga chama imojenjaná; <sup>15</sup> pero báseftanga imojtsichamo: “Beelzebú, cach Satanás, chē bacna bayējēngbe amēndayá, quem boyabásabolye obenana tbojatsatá chē bayējēnga chauatēbuacnama ca.”

<sup>16</sup> Y inyēnga, Jesús jisháchichiyamna tmojanimpadá canye bēts soye chaoma, jinjánjyiyama cha celoca obenana inabomna o ndoñe. <sup>17</sup> Pero Jesús yojtsetátsēmbó ntšamo chēngbe juabna bētsemnana. As tojanéyana: “Canyē amēndayábentšē entsanga tmojtsenojatá y tmojtsenáyase, cachēnga jtsenpochócana; y canye yebnentse oyenēnga tmojtsenojatá y tmojtsenáyase, chē pamúllanga tsabá nyēts tempo ndoñe quemochátsmēna. <sup>18</sup> Cachcá, Satanás tojtsenojatá y cachabe contra tojtsemnēse, ¿ntšamo nantsobena chabe mándayana quem luarentse jēftsebomnana? Chca sēntsihamo, er tsēngaftanga šmotsichamo Beelzebube obenánaca chē bayējēnga tsatēbuacana ca; <sup>19</sup> pero chca ndegombre tojtsemnēse, ¿ndábeyeca tsēngaftangbe usetonēnga obenana imojtsebomna chē bacna bayējēnga jtēbuacnama? Chiyecna, cachēnga montsinjínjyná ntšamo ndegombre yomnana, y tsēngaftanga ndoñe ndegombre soye šmotsichámuaama. <sup>20</sup> Y atšna, Bēngbe Bētsabe obenánaca entsāngbentšana chē bayējēnga sēndētēbuacana; y chē soye entsinjínjyná, Bēngbe Bētsabe amēndayana tsēngaftangbiolye tojóshjanguama.

<sup>21</sup> “Canyē corente añemo bomna entsá, bētscá ármangaca chabe yebna tojtsinjēnēse, chē tsoca tomna soyënga ndoñe ntjotšana. <sup>22</sup> Pero inyá chabiama más añemo bomná tojabo y tbojabetsēyēnjaná, chē cha yojanabhuaché armangá jtsabocana y chē tobomna sóynaca; y ntšamo chē inyá tojtsebošcá chē soyēngaca jamana.

<sup>23</sup> “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana ca” —Jesús tojánayana.

*Ndayá inopása chē bacna entsāngaftaca*  
(Mt 12.43-45)

<sup>24</sup> “Canyē bacna bayēja canye entsábentšana tojésebocna ora, bojojo luarēnguenache chē bayēja jtsanana, ndayentse jóchnama onguayíñe. Ndoñe tonjínjēna ora, jenójuaboyana: ‘Atšbe oyenoye, chē ndayentšana sēnjēftsebocnoye chanjesshēcōna ca.’ <sup>25</sup> Y choye tojtashjango ora, jinjēnana lempe tsabá cha jtesamashēnguama, mo tsajniñe y prontániñe cuaftsemncá. <sup>26</sup> Chora chē bayēja jana y inyē canyēsēfta bayējēnga, chabiama más opējēnga jobiatšana, nyētsanga choye jamashjnama, chē boyabásabeñe joyēnanama. Y chca, chē boyabása tempscana más bacna entsá jtoquédana, chora chē natsanama más bayējēnga abamna causa ca” —Jesús tojánayana.

*Chē ndegombre oyejuayana*

<sup>27</sup> Jesús chë soyënga yojtsichamëntscuana, entšanguentše canye shembása yoyuayebuáchena: —¡Puerte oyejuayá chë quem luaroye tcmojúshjango y tcmojéftseboché shembása ca!

<sup>28</sup> As Jesús tbojanianyana: —Más oyejuayana bomnëngna, chë Bëngbe Bëtsabe palabra tmojouena y chca tmojtšamënga ca.

*Chë bacna entšanga Jesús tmojanimpadá canye bëts soye chaoma, chabe obenana jinýama (Mt 12.38-42; Mc 8.12)*

<sup>29</sup> Entšanga más imojtsójoye Jesús yojtsemnentše, y Jesús tojanontsé jáuyanana: “Morsca entšanga puerte bacna entšanga; chënga montšotjanañe atše canye bëts soye chaima atšbe obenana jinýama, pero ndoñe chca quemochátinýe, sinó nýe chë ndayá yomna mo chë Jonásoftaca tojanopasá soycá. <sup>30</sup> Er chca, ntšamo Jonás Nínive pueblocu entšanga canye bëts soye tojaninýanýe Bëngbe Bëtsá obená yomnama chamotsetatšëmbuama, chë Bëngbe Bëtsá Entšá tbojanbemánaca entsinýanýná morsca entšángbioye, Bëngbe Bëtsabe amëndayana tojóshjanguama. <sup>31</sup> Bëngbe Bëtsá ntšamo morsca entšanga tmojanmama yochjayana te, chë Sur luaroca reiná echanjotsaye y morsca entšangbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrenga jouenama, y chë mora muentše entsemnana, Salomonbiamu más uamaná endmëna. <sup>32</sup> Chë entšanga tšabá o ndoñe tšabá tmonjamama jayanama te, chë Nínive bëts pueblocu entšángnacu mochanjotsaye y mochanjayana morsca entšanga ndoñe tšabá tmonjama ca; er chënga, Jonás yojtsabuayinýe ora, tmojanoyeuná y chë tšabe benache tmojtšanishache, y chë mora muentše entsemnana, Jonasbiamu más uamaná endmëna ca” —Jesús tojánayana.

*Chë cuerpama uajuinýanësha (Mt 5.15; 6.22-23)*

<sup>33</sup> “Ndocna canye uajuinýanësha juajuinýenana, canye iytëmena luaroye juajájuama, ni canye cajonëshe tajsoye, sinó canye tšbanana luaroca juajájuama, chca, chë luaroye amashjuanëngbiama chaotsebinýnama. <sup>34</sup> Acbe bominýe tšabá totsomñëse, acbe cuerpama mo canye uajuinýanëshacá jtsemnana; chíyeca aca jtsobenana, ntšamo tcojtsamcá chë bomínýeca jtsonýayana. Chë bominýe ndoñe tšabá tontsemnëšna, chë bominýe tondaye ntšobenana jamana, ntšamo tcojtsamcá chacobená jinýama. Cachcá, acbe ainaniñe tšabe juabnënga tcojtsebošnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebošnëšna, lempe ntšamo chacojtsamcá ndoñe tšabá queochátsmëna. <sup>35</sup> Cuedado šmochtsebošna, tšëngaftangbe ainaniñe nýe tšabe juabnënga chaotsebošnëse, chca, lempe ntšamo chašmojtsamcá tšabá chaotsebošnëse, y bacna juabnënga ndoñe chaondëtsemnana. <sup>36</sup> Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canye uajuinýanësha puerte tšabá tojtsebinýnacá ca” —Jesús tojánayana.

*Jesús chë fariseungbiama y ley abuátambayëngbiama tojánayana, chënga ndoñe tšabá montsama ca*

*(Mt 23.1-36; Mc 12.38-40; Lc 20.45-47)*

<sup>37</sup> Jesús chca jayanama tojanpochocá ora, chábioye canye fariseo tbojanofja chabe yebnoye jauasama. As Jesús tojánamashëngo y mesëshentše tojanótbema. <sup>38</sup> Chë fariseo tojanëuatjaná, Jesús ntsacuentšabiácá jasama yojontsé causa, ndoñe ntšamo chë judiënga imošanamancá, Bëngbe Bëtsabe delante tšábanga jtsatsmënama. <sup>39</sup> Pero Bëngbe Utabná tbojanianyana: “Tšëngaftanga fariseunga šmondmëna mo entšangcá ndëmuanýënga chë tazëšënga y šcnenënga shjoicajana jtsóbojabiana, pero tsoyna nýe cachcá jonýayana. Tšëngaftanga becá jtsamana entšangbiama mo tšabengcá jtsinýnama; pero tšëngaftangbe ainanentše jútjena entsemna nýe jtsatšëbanama y bacna soyënga jtsamama juabnëngaca. <sup>40</sup> ¡Juabna ndbomnënga! Tšëngaftanga ndoñe šmondëtatšëmbo, chë tšëngaftangbentšana entšanga ndayá jinýama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiamu cachcá enduámana ndayá tšëngaftangbe ainanoye yomna soyënga, y chë entšangbe delante šmojama soyënga. <sup>41</sup> Tšëngaftanga cmontsamna, chë soyënguifne ndayá ainaniñe yomnentsána inýëngbioye jatšatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

<sup>42</sup> “¡Tša lastema tšëngaftangbiama fariseunga! Tšëngaftanga Bëngbe Bëtsabiamu jtse-quečjnayana chë jajañentša sananga bnëtsanentšana canye soye nyëtsá, y chë binche matatëmënguentšana menta, ruda y nyetsca binche matatëmënguentšánëšnacá; pero nýe

batsá jtsamana chë nyetscanga cachca derechënga chamotsebomnama y cha jtsebobotshánama. Quem soyënga cocayé cmontsamna jtsamana, chë inye tsabe soyënga ntjajbanacá ca.

<sup>43</sup> “¡Tsa lastema tsëngaftangbiama fariseunga! Tsëngaftanga tsa jtsebošana chë judiëngbe enefjuana yebnënguenache chë más uamana luarënga jtsebomnama, y benachiñe nya puerte respétoca entsanga chacmotsacheuanayama ca.

<sup>44</sup> “¡Tsa lastema tsëngaftangbiama! Smondmëna mo obanënga uatbontsaniñcá, ndoñe ntsinynana, y entsanga ntsetatšëmbcá chiñe jtsebotájayana. Chca šmondmëna, er tsëngaftangbe ainana entsemna jútjena bacna juabnëngaca, pero entsangbiama ndoñe chca quešmátinyna ca.”

<sup>45</sup> Jesús chca tojánayana ora, canye ley abuatambayá tbojanayana: —Buatëmbayá, chca palabrënga contsoyebuambná ora, bëngbiámna ndoñe tsabá quecátichamo ca.

<sup>46</sup> Pero Jesús tojánayana: —¡Tsa lastema tsëngaftangbiámna, chë ley abuatambayënga! Mo canye entsá, couáybioye canye uauta uasmanësha tbojuasmá, y chësha ndoñe yapa chaondëtsautama tondaye tonsamcá, tsëngaftanga entsángbioye jtsamëndayana bëtscá mandënga chamotsocumplínama, pero cach tsëngaftanga ni mo batsatëmnaca jtsamana chë mandënga jtsocumplínama ca.

<sup>47</sup> “¡Tsa lastema tsëngaftangbiama! Tsëngaftanga jtsamana chë Bëngbe Bëtsabe juabna oyeuambnayënga tempsquënga bëtsëtsa entsanga chamotsemnana, chëngbe cuevëshënga jtsatspórmayëse; pero chë mo chëngcá, canye buayenana sóyeca tmojabëngbioye ndoñe ntsayaunanana. Y chë tempsquënga chca oyeuambnayëngbioye tsëngaftangbe bëts taitanga tmojtšanëbaye. <sup>48</sup> Chca jtsamëse, tsëngaftanga šmontsinynáná, ntšamo chë bëts taitanga tmojanmca tsabá yomna ca tsëngaftanga šmojtsejuabnama, er chënga chë oyeuambnayëngbioye tmojtšanëbaye y tsëngaftanga chëngbe cuevëshënga jtsatspórmayana.

<sup>49</sup> “Chíyeca, Bëngbe Bëtsá chabe bëts osertanána tojánayana: ‘Atšë chëngbioye chanjichamú atšbe juabna oyeuambnayënga y atšbiama abuayinayënga, y básëftangbioye mochantsëbaye y inyëngbioyna mochantsëcamiye ca.’ <sup>50</sup> Y chca, nyets castigo morsca entsángbeñe echántsemna, nyetsca Bëngbe Bëtsabe juabna oyeuambnayënga tmojóbanama, Bëngbe Bëtsá quem luare tojanma orscana; <sup>51</sup> Abélbioye tbojanóba orscana, Zacarías tmojanóbancoñe. Zacaríasna Bëngbe Bëtsabe bëts yebnentšë tmojanóba, altar y chë entsanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyeuambnayënga tmojanóbanama, morsca entsángbeñe nyets castigo chaotsemnana ca.

<sup>52</sup> “¡Tsa lastema tsëngaftangbiama, chë ley abuatambayënga! Tsëngaftanga jtsamana, Bëngbe Bëtsabe soyëngama jtsetatšëmbuama entsangbiama yapa totcá chaotsemnana. Cach tsëngaftanga ndoñe quešmátobena chë soyëngama tsabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

<sup>53</sup> Jesús chë soyënga tojánayanama, chë ley abuatambayënga y fariseunga puerte tojánëtëna, y cha chentsana yojtšaisebocana ora, tmojanontšë chábioye becá tjanayana, y imojtsama ba soyëngama chaóyebuambama, <sup>54</sup> chca, jisháchichiyama jtsebošëse, cachá ntšamo tojayana sóyeca chënga jtsebomnama ndáyeca chábioye mal jaquédana.

## 12

*Jesús, chë bacna entsanga ntšamo ndegombre tmojuabnacá ndinyninayëngbiama tojanabuatambá*

<sup>1</sup> Chëntscuana, ba uaranga entsanga chentšë tmojanóoto; tša entsanga causa, nyetscanga imojtsenatsëntsenaye. Chora Jesús tojanontšë jóyebuambayama, y natsana chabe uatsjëndayëngbioye tojanëyana: “Chë fariseunge buatëmbana soyëngama cuedado šmochtebomna, chënga mondmëna bacna entsanga, ntšamo ndegombre tmojuabnacá ndinyninayënga. Ntšamo chë levadura jamana nyetsana chauábochema, cachcá chëngbe buatëmbana soyëngaca, chë fariseunga montsobena jamana bëtscá entsanga ntšamo ndoñe tsabá tontsemncá chamotsamama. <sup>2</sup> Er ndocna yoityëmena soye, ntjinycá queochaisoquéda; y chë ndótatšëmbo soye, ntsoatšëmbcá queochaisoquéda. <sup>3</sup> Chíyeca, chë mora nye tsëngaftangbiama šmojtšichamo soyënga, chë entsangbiama mo ibetiñcá cuaftsemna soyënga, entsanga chama botamana mochanjátatšëmbona. Y chë iytëcana šmojtšichamo soyënga, nyetsca entsángbioye mochántšabuayinaye, mo nda canye yebnentšë tsbanánocana notciënga tojtšayebuchcá ca” —cha tojanëyana.

*Nda ndegombre cuantsebiauatja*  
(Mt 10.26-31)

<sup>4</sup> “Tsëngaftanga, atšbe amiguënga, cbochjáuyana: Ndoñe matauatjëngana nye chë tsëngaftangbe cuerpo japochócama imobenëngbiama, pero chentsana más jamana ndoñe ntšobenana. <sup>5</sup> Cbochanjabuayená ndábioye cmojtšamna jtsebiauatjana:

šmochtsebiauatja chë nda vida jtsabuajuánama y chentsana infiernoye jtsichámuama obenana endbomnábioye; chábioye cocayé šmochtsebiauatja ca.

<sup>6</sup> “¿Shachna jaja shloftšetémenga ndoñe nýe uta denario crocenánama mondbétsena? Pero masque chca, Bëngbe Bëtsá chëngbiama sempre jesenójuabnyana. <sup>7</sup> Y tsëngaftangbiama Bëngbe Bëtsá lempe endétatsëmbo, y bueta stjënëjenga tsëngaftangbe bestšašine yomnámnaca. As ndoñe matauatjengana; tsëngaftanga ba jaja shloftšëngbiama corente más šmonduámana ca” —Jesús tojánayana.

*Ndabiana Jesucristo yochjayana chabe entsá yomna ca*  
(Mt 10.32-33; 12.32; 10.19-20)

<sup>8</sup> “Atše cbëyana, nda atšbe entsá yomna ca entsangbe delante tojayanabiama, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entsá chabia yomna ca; <sup>9</sup> pero nda entsangbe delante, atšbe entsá ndoñe yondmëna ca tojayanabiama, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entsá ndoñe yondmëna ca.

<sup>10</sup> “Bëngbe Bëtsá bochanjaperdóna, nda chë Bëngbe Bëtsá Entšá tbojanbemabiama ndoñe tšabá tontsichamuábioye, pero chë Uámana Espiritibiama ndoñe tšabá tontsichamuábioyana ndoñe.

<sup>11</sup> “Tsëngaftanga chë judiëngbe enefjuana yebnëngoye, ntšamo entsanga bétsamama ichámëngbioye y mandadëngbioye chacmojunatse ora, ndoñe šmattsenócochinýena ntšamo o ndáyaca šmochjëuyanama, o ndáyá šmochjayanamama; <sup>12</sup> er chë Uámana Espiritu cmochanjabuayená ntšamo jayanama tojtsemncá, jóyebuambayama chacmojtšamna ora ca” —Jesús tojánayana.

*Entšabiama resjo yomna, nýe yapa bomnana jesejuabayana*

<sup>13</sup> Chentsana, canýa entsanguentšá Jesúsbioye tbojaninyana: —Buatëmbayá, atšbe catšata momandá chë átšbioye otocana soyënga chašuatoyé ca.

<sup>14</sup> Y Jesús tbojaninyana: —Bacó, ¿nda atše šojábema tsëndatbe ujatanayá ca?

<sup>15</sup> Y entsángbioye tojanéyana: —Smochjinýe y cuedado šmochtsebomna chë nýe yapa soyënga jtsebomnana bošama; er masque bétsá soyënga chašmotsóbomñe, chca ndoñe quešmochátstatsëmbo aífne tšabe vida taišmochjónýenamama ca.

<sup>16</sup> Y chora mëntšá tojanacuntá: “Inamna canýe bomna entsá, y chabe fshantsënguifne tša jaja saná yojtšopodena. <sup>17</sup> Chë bomná chora mëntšá yojtsejuabnaye, ‘¿Y morna, ntšamo chjama? er ndoñe quetsátsbomna ndayentše atšbe jaja saná jtsobocjayama ca.’ <sup>18</sup> Y mëntšá chojaninyana: ‘Chë grano uaquëcjnaye yebnënga chantsendbiama, y inýe más bëts yebnënga chanjëtsjebo, y chiñe nýetsca atšbe jaja saná chantsóboçjaye y nýetsca atšbe soyëngnaca. <sup>19</sup> Y chora atše chjeninyana: Bacó, bëtsá soyënga contseboçjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.’ <sup>20</sup> Pero Bëngbe Bëtsá chábioye ibojauyana: ‘Obëjema, cach quem ibeta cochanjóbana; y asna, chë contseboçjana soye, ¿ndabiana yochtsemna ca?’”

<sup>21</sup> Y Jesús chora tojánayana: “Chca endbopása chë nýe chabiama bomnana tojtsejuabá y bëtsá Bëngbe Bëtsabe soyënga ndoñe tonjëftsashjáftaca ca.”

*Bëngbe Bëtsá chabe básenga jtsanýenana*  
(Mt 6.25-34)

<sup>22</sup> Chentsana, Jesús chabe uatsjëndayënga tojanéyana: “Quem soye cbëyana: Ndoñe šmattsenócochinýena ndáyá šmochjase o šmochjóšiyë vida jtsebomnana, ni ndaye entsáyá šmochjuichëtjuama cach ndoñe. <sup>23</sup> Ndegombre, vida chë sanama más enduámana y cuerpo chë entsáyama más. <sup>24</sup> Chë ftsenga shloftšënga šmochjanýe: tondaye ntjájena, ni jaja saná ntjátbanana, ni grano uaquëcjnaye yebnënga ntsebomnana; pero Bëngbe Bëtsá chënga saná jtsatšatnyana. ¡Y tsëngaftanga chë ftsenga shloftšëngbiama puerte más šmonduámana! <sup>25</sup> Masque chca endmëna, masque canýa tša tojesenócochinýena, ¿ntšamo nanjobenaye jamana, chë ntsachetšá vida yochtsebomnentsana canýe hora vida más jabotiyana? <sup>26</sup> Chcasna, nýe chë base soye jamama ndoñe šmontsobenëse, ¿ndayama chë inýe soyëngama šmochjatenócochinýena?”

<sup>27</sup> “Smochjuinýe chë lirio uantšëfjushangá jtsajuajnana: ndoñe ntsetrabájayana, ni ntseshabiamnyana. Pero atše cbëyana, ndegombre ni mo rey Salomón, nýetsca chabe bomnánaca, chë lirio uantšëfjushangacá nýetsá botamana quenjatspormana. <sup>28</sup> Bëngbe Bëtsá tša botamana shácuana tojuama, y chë shácuana mënté jajoca jtsam-nana y yëfsana iñoca. Cha chë shácuana chca tojamëse, ndegombre tsëngaftangbiám-naca Bëngbe Bëtsá echanjama entsáyá chašmotsábomnana, jentšanga Bëngbe Bëtsábeñe nýe batsá ošbuáchiyënga! <sup>29</sup> Chiyeca, ndoñe šmattsenócochinýena ndáyá jasama o jofšiyama onguayifne; <sup>30</sup> er chë soyëngama quem luarentša entsanga mondbétsenocochinýena, pero

tšëngaftanga ndoñe. Tšëngaftangna canye Taitá šmondobomna, y cha endétatšëmbo ndayá cmëjabótama. <sup>31</sup> Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtsëjaboto soyënga nye šmochanjóyëngacñe ca” —Jesús tojánayana.

*Chë celoca bomnana  
(Mt 6.19-21)*

<sup>32</sup> “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuínýnana chabe amëndayana tšëngaftanga jatšatayama. <sup>33</sup> Lempe ntšamo šmombomná šmochtsatobuiye y chë ujabotëngbioye šmochtsatsataye. Mo ndotanguánaye shecnajiñe crocénana cuafjacjacá, celoca tšabe soyënga šmochjoubuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca; <sup>34</sup> er chë ndayentše tšëngaftangbe bomnana tojtsemntšá soyëngama, ainánaca tšëngaftanga šmochántsejuabnaye ca” —Jesús tojánayana.

*Bëngbe Utabná yochjésabama jtseprontánana*

<sup>35</sup> “Mo chë oservénënga, chë entsáyá uichëtjónënga y uajuinýananëshangaca chëngbe nduíño yochtashjanguama cuafstobatmancá, tšëngaftanga šmochtseprontana Bëngbe Utabná yochjésabama. <sup>36</sup> Chca, tšëngaftanga šmochántsemna mo chë oservénënga, tšabe entsáyaca bopormánënga y uajuinýananëshangaca chëngbe amëndayá casamentocana yochtashjanguama cuafstobatmancá; y chca, chë nduíño tojabochembo ora, cachora chë oservénënga jtebiatëfjuama. <sup>37</sup> Puerte oyejuayënga chë oservénënga, chë nduíño tojtashjango ora tmojtsefnënga. Ndegombre ebhëyana, chora chë mandayá sëndorëche echantšnaye, mesëshentše chë oservénënga echanjábtiama, y saná echanjuuatšiyë. <sup>38</sup> Puerte oyejuayënga chënga, chë tmojtsefnënga cha tojtashjango ora, masque tséntseto ora o bínýanoyë. <sup>39</sup> Quem soye tšabá chacmësértá: chë yebnentša nduíño, ntseco ora atbëbaná yochjabama tojtsetatšëmbëse, cha ndoñe nanjaleséncia ndocná jushañe chaondbemama, chë yebnoye jtsamshënguama y jtsatbëbama. <sup>40</sup> Tšëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entsánga chama tondaye tmontsejuabná ora ca” —Jesús tojánayana.

*Chë tšabe oservená y chë bacna oservená  
(Mt 24.45-51)*

<sup>41</sup> Pedro, Jesúsbioye tbojanayana: —Utabná, ¿chë tconjayana cuento nye bëngbiana o nyëtscangbiana yochtsemna ca?

<sup>42</sup> Y Bëngbe Utabná tbojanjá: —¿Nda yomna chë oservená, ntšamo chë nduíño tojtsebošcá amá y nyët juábnaca amá? Cha jtsemnana nda chë nduíño bochjéftsebošhona chë yebnentšënga chaotsañenama, y jasama tojtsemna ora chaíjuatsema. <sup>43</sup> Puerte oyejuayá chë oservená, chë nduíño tojtashjango ora, cha tbojínýena jtsamëse ntšamo tbojtsemncá. <sup>44</sup> Ndegombre ebhëyana, chë nduíño chábioye bochanjaimpáda nyëtscá chabe soyënga chabotsinýeñama. <sup>45</sup> Pero chë oservená, chabe nduíño betseco ndoñe yochantabo ca tojtsejuabná, y tojontsé chë inýe oservénënga, boyabásenga y shembásenga jtsajantšetayana, becá jtsesana, jofšiyana y jtsótmenana, <sup>46</sup> cha ndoñe tontsejuabná te y tontsetatšëmbo ora, chabe nduíño echántashjango y puerte jabuache bochantsecatíga, y echanjama cha jasúfriama chabotsemnana, mo chë Bëngbe Bëtsábeñe ndošbuáchiyënga mochanjasufriacá.

<sup>47</sup> “Chë oservená, nda tojtsetatšëmbo ndayá chë nduíño tojtsebošama, pero ndoñe tontsetprontana y ndoñe tontsobedecena, cha ba soye mochántsetjanja. <sup>48</sup> Y chë oservená, ntsetatšëmbcá ntšámnaca tojabuachjuanguá, y chë causa chamotsetjanjama tbojtsemnëna, chana más batšá mochántsetjanja. Nda bëtscá soyënga tmojattšábioye jauyanana, bëtscá soyënga chaoma ca; y nda bëts trabajo tmojabonyébioyna jauyanana, más bëts trabajo chaoma ca.”

*Jesube causa, entšángbeñe más jtsentsjanayana  
(Mt 10.34-36)*

<sup>49</sup> “Atše sënjabo quem luariñe jabojuinýiyama, y jtsá sëntseboše malaye ya ctsangbototjuana! <sup>50</sup> Atše šontsemna puerte jasúfriana, y ipuerte ngménaca sëntsobátmana chca chaotsemnana! <sup>51</sup> ¿Tšëngaftanga šmojtsejuabná atše tijabo quem luarentše entsánga natjëmbana chamotsiyenama? Ndegombre ndoñe chca queochátšëmna; atše sënjabo causa, entsánga más mochántsejantsejanyë. <sup>52</sup> Er mëntescana, canye yebnentše, shachnënga ndoñe quemochátënyeyunana, únganga útatbe contra y útata úngangbe contra mochántsemna. <sup>53</sup> Taitá uaquiñabe contra echántsemna, y uaquiñá taitabe contra; bebmá, bebëbe contra, y bembe bebmabe contra; uambén mamá, bebincuabe contra, y bebincuá uambén mamabe contra ca” —cha tojánayana.

*Ndaye tempo yochtsemnama ntšamo inétsotatsēmbō*  
(Mt 16.1-4; Mc 8.11-13)

<sup>54</sup> Mēntšánaca Jesús entsanga tojanéyana: “Tšéngaftanga, chē jantšetēshēnga shinýe ue-natjēmbambanoicana tojóboconama šmojinýe ora šmondbētsichamo ‘echanjuafé ca’, y ndegombre chca jopásana. <sup>55</sup> Y tsmanoicana tojtsebínýia orna, tšéngaftanga šmondbētsichamo ‘echanjōjēnyana ca’, y ndegombre chca jopásana. <sup>56</sup> ¡Bacna entsanga, chē ntšamo ndegombre šmojuabnacá ndinýinýayēnga! Ntšamo quem luarentše yochtsemnama, ndayá celoca šmojinýama tša tšabá šmojtsetatsēmbēse, ¿ndáyeca ndoñe šmontsobena jsetatsēmbuana ndaye bēts soye quem tempo Bēngbe Bētsá cmojtsinýanýnama ca?” —Jesús tojánayana.

*Chē uayayáftaca natjēmbana jtenbemana*  
(Mt 5.25-26)

<sup>57</sup> “¿Ndáyeca cach tšéngaftanga ndoñe šmondbáyana ndayá tšabá bētsemnana? <sup>58</sup> Nderado nda tcmojtsedemandá y cabildoye jotsánama cmojtsemna, cabá choye ndáshjango ora, betso cháfata cochtenoyántsia. Chca ndóñese, chē demandáyá mandádbioye cmochanjúshjango, chē mandadna josticiēngbe cucuatšife cmochanjáboshjona, y chēnga cárceloye cmochanjutame. <sup>59</sup> Ndegombre chéyana, chentšana ndoñe quecohtētsbocna, nýets ndebénana candesopagantscuana ca” —Jesús tojánayana.

## 13

*Bēngbe Bētsabe benache jtishachana*

<sup>1</sup> Cach ora, báseftanga tmojána Jesús jinýama, y tmojanquentá ndayá chē mandado Pilato tojanmama; chana básefta Galileoca boyabásenga tojtsanēbaye, y chēngbe buiñe yojenajuabó chē Bēngbe Bētsábioye jētschuayama tmojanóba bayēngbe buiñeca.

<sup>2</sup> Y Jesús chēnga tojanéyana: “¿Tšéngaftanga šmojtsejuabná, chē Galileoca entsanga chca tmojapasá, chē luarentše inýe boyabásēngbiana chēnga más bacna soye amēnga imojamna causa ca? <sup>3</sup> Ndegombre chéyana, ndoñe. Y cach tšéngaftanga, bacna soyēnga amama ndoñe šmontsajbaná y Bēngbe Bētsabe benache ndoñe šmontishachēse, tšéngaftángnaca šmochanjóba. <sup>4</sup> O, ¿tšéngaftanga šmnetsejuabnaye, chē Jerusalemētsa bnētsana posufta entsanga tmojanóbanēnga, chē Jerusalemoca binche uafjajónaye Siloé béconana tšbanana jebna soye tojtsanáshajaye ora, chēnga imojamna chē inýenga Jerusalemēntše oyenēngbiana más bacna soyēnga amēnga ca? <sup>5</sup> Ndegombre chéyana, ndoñe. Y cach tšéngaftanga, bacna soyēnga amama ndoñe šmontsajbaná y Bēngbe Bētsabe benache ndoñe šmontishachēse, tšéngaftángnaca šmochanjóba ca” —Jesús tojanéyana.

*Chē ndēshajona higo betiyama cuento*

<sup>6</sup> Jesús mēntšá tojanacuntá jabuátambama: “Canýe entšá jajoca canýe higo betiye in-abomna, y yojá nderado nantseshájonama, pero tondaye yonjinýena. <sup>7</sup> Chcasna, chē jajañe bojanýabioye cha ibojauyana: ‘Mouena, ya unga uata tsabó quem higo betiyoeye jaborrepárama, nderado nantseshájonama, pero ndocna te tondaye chiyátinýena; chiyeca, motsetētše. ¿Ndayama quem jajañe yochjátsjena ca?’ <sup>8</sup> Pero chē jajañe inýená ibojauyana: ‘Bacó, inýe uata cachcá monýá, fshantse chanjáboplojua y uanganēshe chanjabotboto. <sup>9</sup> Nderado chca jamēse, nanjashájona; y ndóñesna, chora cocayé cuantsetētše ca.’”

*Jesús canýe ochnayté, canýe tsēštjona shembásabioye tbojanshná*

<sup>10</sup> Canýe, canýe ochnayté Jesús yojontšé entsanga jabuátambana, chē judiēngbe enefjuana yebnentše, <sup>11</sup> y chentše yojtsemna canýe shembása; cha ya bnētsana posufta uata yojtseoca. Canýe bacna bayēja chábeñe tojánamashēngo y chca tseštjoná tbojtsanbema, y tondayama yontsobena jtondirichana. <sup>12</sup> Jesús chábioye tbojaninýe ora, tbojanchembo y mēntšá tbojaniana: “Batá, mora ya ndoñe socá quecátsmēna ca.”

<sup>13</sup> Chora Jesús chabe cucuatšēnga chábeñe tojanjajó, y cachora chē shembása yojtondiricha, y tojanontšé Bēngbe Bētsábioye jētschuayama. <sup>14</sup> Pero chē enefjuana yebnentša mándayana tbojanetna, Jesús chē shembása ochnayté tbojanshnama, y entsanga tojanéyana: —Chnēngwana te comna jatabájama; chora šmochjabo jenóshnama; ochnaytese ndoñe ca.

<sup>15</sup> Y Bēngbe Utabná tbojanjá: —¡Bacna entsanga, ntšamo ndegombre šmojuabnacá ndinýinýayēnga! ¿Tšéngaftanguentšá ndocná chē ochnayté chabe uacná o chabe burrotema buanjuaafjoná, juanasatama bējaye chaofšema? <sup>16</sup> Chcasna, quem shembása, canýe Abrahámēntšana entšá, y Satanáshe causa bnētsana posufta uata šocá yojtsemna, ¿ndoñe tšabá yondmēna canýe ochnayté chē bayēja jtsebojuánana ca?

<sup>17</sup> Jesús chca tojánayana ora, chabe uayayēnga imojtséuatja, y nýetsca entsanga imojtsóyejuaye Jesús tša bēts soyēnga yojtsamama.

*Chē mostaziye jenayama cuento*  
(Mt 13.31-32; Mc 4.30-32)

<sup>18</sup> Jesús mēntśánaca tojánayana: “¿Ndayacá Bēngbe Bētsabe amēndayana yomna, o ndaye sóyeca nanjopódia chama jábuayenana ca? <sup>19</sup> Endmēna mo canye mostaza jénaye, canye entśá jajañe tojajecá; chiyna jójuana y canye bēts betiye jóbemana; tśa bētsashe jóbemana, chíyeca chē jaja shloftśēnga chē buacuashēnguiñe uajajonētemēngá jauábopormana ca.”

*Chē levadurama cuento*

(Mt 13.33)

<sup>20</sup> Mēntśánaca Jesús tojánayana: “¿Ndaye sóyeca chjobenaye Bēngbe Bētsabe amēndayama jábuayenama ca? <sup>21</sup> Endmēna mo levadurcá; canye shembásaca chana jenájua banga unga medida arninñyañe, nyetsana chauabochama ca.”

*Chē base utēntśá bēsásaca*

(Mt 7.13-14, 21-23)

<sup>22</sup> Jerusalemoye benache, Jesús entśanga yojsabuátambaye bēts pueblēnguiñe y base pueblotemēnguiñe. <sup>23</sup> Chē yebnentśa nduñño chaojotsbaná y chē bēsásaca chaojtatamentśana, tśēngaftanga chē shjoca chaśmojtsemnēnga, śmochántsechembuana, mēntśá jtsichámēse: “Utabná, śmēbētafjo ca.” Pero cha cmochanjáuyana, “Atśe ndoñe quetsátstatśēmbo ndēmoquēnga tśēngaftanga śmomnama ca.” <sup>26</sup> Chora tśēngaftanga śmochanjontśé ichámua: “Acaftaca cánñiñe fsēnjase y fsēnjofśe, y aca bēngbe tsáshenañe tconjua tamáb ca.” <sup>27</sup> Pero cha cmochanjójuaye: “Ya tcbonjáuyana, ndēmoquēnga śmomnama ndoñe tśatśēmbo ca. ¡Atśbentśana mojuánanga, bacna soyēnga amēnga ca!

<sup>28</sup> “Chora chentśe puente śmochanjenóbośachna y tsetśanama juatsaśēnga śmochantsenofťśojnaye, Abraham, Isaac, Jacob y nyetscanga Bēngbe Bētsabe juabna oyebuambnayēnga Bēngbe Bētsabe amēndayoca imojtsemnama chaśmojinñe ora, y tśēngaftanga chentśana cmochtēbuacanama. <sup>29</sup> Y shinñe bocanoicana y uenatjēmbambanoicana, tsmanoicana y tsjuanoicana entśanga mochanjabo y juasama mochanjotbiamá Bēngbe Bētsabe amēndayentśe. <sup>30</sup> Y banga mora nduámanēnga imomnēnga, chora uámanēnga mochtántsemna; y banga mora uámanēnga imomnēnga, chora nduámanēnga mochtántsemna ca” —Jesús tojánayana.

*Jesús tbojanongmé Jerusalementśa entśangbiama*  
(Mt 23.37-39)

<sup>31</sup> Jesús chē soyēnga tojanéyana ora, básefta fariseunga tmojánashjajna y tmojaninyana: —Muentsana motsatoñe; Herodes entsebośe aca jtsóbama ca.

<sup>32</sup> Y Jesús tojanéjua: —Motsajna y śmochjauyana chē corente studio bomná, mo tjañe mesetá: “Minñe, mēnté y yēfse entśangbentśana bacna bayējēnga sēndētēbuacana y soquēnga sēndáshnaye, y baseftaytesna chanjapochóca ca.” <sup>33</sup> Pero atśe śontsemna mēnté y yēfse jtsayana, y baseftaytesna Jerusalemoye jana, er ndoñe tsábá ntsemnana canya Bēngbe Bētsabe juabna oyebuambnayá Jerusalementśa chábuañe chaóbana ca.

<sup>34</sup> “¡Jerusalementśa entśanga, Jerusalementśa entśanga, tśēngaftanga chē Bēngbe Bētsabe juabna oyebuambnayēnga jtsébáyana, y chē Bēngbe Bētsabe ichmónēngbioye ndētśbēngaca jtsatēchénganjana jtsébáyama! ¡Bueta soye atśe sēnjábośena tśēngaftanga átśbioye júbuajama, mo canye tuamba chabe bolletotēmēnga juatēngmiáša tajsoye cuaftajayecá, pero tśēngaftanga ndoñe cheśmátsbośena! <sup>35</sup> Y śmochjinñe, mora atśe cachcá cbochanjesēñyaye, y chca, atśna enánanga cbochanjēśabashejuana, mo canye yebna cachcá tcojesonñá y eñañe tcojeseshjoncá. Y ndegombre, tśēngaftanga morscana ndoñe más atśe quetśemochátinñe; y atśe śmochántinñe, chē: “¡Corente bendición bomná, Bēngbe Utabnabe obenánaca tojabá ca! chaśmojtśichamo ora ca” —Jesús tojánayana.

## 14

*Jesús, canye uafshachanáca śocábioye tbojanshná*

<sup>1</sup> Canye ochnayté, Jesús tojána jasama fariseungbe canye amēndayabe yebnoye; y chē fariseunga yejuana imojtserreparana, er ndayá Jesús nanjama. <sup>2</sup> Chēntśnaca, chabe delante yojtsemna canye entśá uafshachanáca śocá. <sup>3</sup> As Jesús chē ley abuátambayēnga y fariseunga tojanatjá: “¿Quenlesenciana canye ochnayté canye śocá jáshnama o ndoñe ca?”

<sup>4</sup> Chēngna ndocá tmonjanjuá. As Jesús chē śocábioye tbojánishache, tbojanshná y tbojaninyana chaotsatoñe ca. <sup>5</sup> Y chē fariseunga tojanéyana: “¿Nda tśēngaftanguentśá, nderado chabe uaquiná o uacná canye tboye tojtsótsatśe, cachora ndoñe nanjá jetsejátsēcama, masque ochnayté totsomñēse ca?”

<sup>6</sup> Y chënga ndocá tmonjanobená cha jojuana.

*Chë casamentoye ófjanënga*

<sup>7</sup> Jesús tojáninýe ntšamo chë ófjanënga quëfseroye imojtsachnjëjuana jotbiamama; as mëntšá chënga tojanabuayená: <sup>8</sup> “Canýe casamentama nda chacmojojfa ora, quëfseroca ndoñe catjót'bema, er nderado inýe ofjaná acbiana más uamaná ústonoye nandaboye; <sup>9</sup> y nderado chë tsëndatbe ofjajaná nanjabo y cmatjauyana: ‘Mua chentše chaótbema, maluaré ca’, y chora cmatjotóca ouatjentše chafjoca jana jatótbemana. <sup>10</sup> Chamna, nda chacmojojfa ora, chafjoca cochjót'bema, chca, chë ofjajaná chaojabo ora chacmëyana: ‘Taita, quëfseroye motsëchnëngoñe ca’. Y chca, aca chë chentše tmojtsetbiámánëngbiana uamaná cochántsemna. <sup>11</sup> Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, añe bëtsá mochanjábema ca.”

<sup>12</sup> Y chë tbojanofja entsábioynaca Jesús mëntšá tbojaníyana: “Fiesta chacojama o sananga chacojtsebomna ora, ndoñe cattšëbuájajana acbe amiguënga, catšátanga, ni pamillanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantëtojfa, y chca ya acbe uacanana soye cochántsebomna. <sup>13</sup> Chamna, canýe fiesta chacojama ora, cochjúbuaja ndbomnjëmënga, jama ndobenënga, coshetënga y jtanënga, <sup>14</sup> y aca corente oyejuayá cochántsemna; er chënga ndoñe quemochatobenaye cachá aca jtëtojjana, pero acna acbe uacanana soye cochántsebomna, chë Bëngbe Bëtsabe bominýiñe tsábënga imomnënga chamojtayena ora ca” —cha tbojaníyana.

*Chë bëts sanama cuento*

(Mt 22.1-10)

<sup>15</sup> Chca tojanuena ora, canýa chë mesëshentše tbeaná tojánayana: —¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

<sup>16</sup> Chora Jesús tbojaníyana: —Canýe bacó canýe bëts saná yojapróna y ba entsanga yojúbuaja. <sup>17</sup> Juasama ya yojobuache ora, canýe oservená ibojíchmuá chë ófjanënga jáuyanama chamotsajna, ya lempe yojtseprontana ca. <sup>18</sup> Pero chorna nyëtscanga imojontšé jtsoyátšëmbuana. Canýa yojayana: “Cabá mora canýe fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.” <sup>19</sup> Inýa yojayana: “Bnëtsana toronga sënjobuámiñe, y šontsemna jana jányama, jaárama taimochjosérvia. Chcasna, aslëpaye šmotsepacenciá ca.” <sup>20</sup> Y inýa yojayana: “Cabá mora sëntsobouamá, y chë causa, ndoñe quichatobenaye jama ca.” <sup>21</sup> Chora chë oservená yoješshëcona y lempe chabe nduñíbioye ibojauenaye. Chë nduñño tša ibojtsetna, y chë oservenábioye ibojauyana: “Cam ora motsa tsashenangoye y benachëngoye, y moye cochjunatse ndbomnjëmënga, jama ndobenënga, jtanënga y coshetënga ca.” <sup>22</sup> Chentša bënëntscose, chë oservená chë nduñíbioye ibojauyana: “Bacó, ya sënjama ntšamo šconjamandacá, y cabá ínýengbiana luare entsemna ca.” <sup>23</sup> As chë nduñño ibojauyana: “Motsa benachëngoye y betiyetemëngaca jetjaniñëngoye, y entsanga cochjautáriaye moye chamuábama, atšbe yebna chaojutjiana; <sup>24</sup> er ndegombre chëyana, chë natsana sënjobuajënguentsá ndocná atšbe saná queochatsse ca.”

*Ntšamo yomna Cristbe ustóná jtsemnama*

(Mt 10.37-38)

<sup>25</sup> Mallajta entsanga Jesús imojtsëstona; as cha tojanobuértana y tojanëyana: <sup>26</sup> “Nderado nda átsbioye tojabo, y ntšamo chabe taitá, chabe mamá, chabe shema, chabe básënga, chabe catšátanga y uabënanga tuababuánýeshanama, y ntšamo cachá tuenobobonshánama, atše ndoñe más corente šontsebobonshánëse, cha ndoñe ntšobenana atšbe uatsjendayá jtsemnama. <sup>27</sup> Y nda, atšbiana ndoñe tontseprontana jasúfriama y cruciñe jobanámna, y nyëtsca chabe quem luare soyënga ndoñe tonjëseboshjona atše juastama, cha ndoñe ntšobenana atšbe uatsjendayá jtsemnama.

<sup>28</sup> “Nderado nda tsëngafanguentsá tojtsejuabná canýe tsbanana jebna soye japórmama, ¿cha natsana ndoñe nanjót'bema jinýama ntsachetšá crocénana chentše yochjuába, y japochócama nyëtšá crocénana tayojtsebomnana? <sup>29</sup> Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nyëtscanga chca tmojinýënga, muantsáfchaye y mëntšá muantsichamo: <sup>30</sup> ‘Quemëjema jajebuama tonjontšé, y japochócama ndoñe chentatobená ca.’

<sup>31</sup> “O ýndaye rey inýe réyefitaca jëntsama tbojotocase, natsana ndoñe nanjót'bema jauaboyama, nderado nanjobenaye bnëtsana uaranga soldadëngaftaca chë ínýabioye jayëñjanana, chë inýa uta bnëtsana uaranga soldadëngaftaca tojtsabose? <sup>32</sup> Y ndóñesna, chë inýe rey cabá bënoca tojtsemna ora, básipta entsanga echanjichamuá, cha jauyanama más tsabá yomna ndoñe jatentsjanayana ca.



<sup>33</sup> “Chcasna, ndánaca tsëngaftanguentśá, lempe ntšamo toboimncá ndoñe cachcá tonjesonýá, cha ndoñe ntsobenana atšbe uatsjendayá jtsemnama ca” —Jesús tojánayana.

*Chë tamó fténana tojtsebocna ora*  
(Mt 5.13; Mc 9.50)

<sup>34</sup> “Tamó tšabe soye endmëna; pero chë tamó fténana tojtsóbemëse, tsëngaftanga ndoñe quešmátobena jamana tempcá sanana cachiñe chaotsatsmënana, ni saná jatamuama. Chë ftëna tamó tondayama ntoservénana, cachcá, chë atšbe uatsjendayënga jtsemnama tojtsebošënga, pero lempe jëseboshjonama ndoñe tmontseboše, cach ndoñe chama ntoservénana. <sup>35</sup> Chë ftëna tamó ndoñe ntoservénana ni fshantsama, ni uanguanëshama. Nýe jtsëtšenana. Chë jouenama tojtsobenënga, šmochjouena ca” —Jesús tojánayana.

## 15

*Chë óšëna oveshabiana cuento*  
(Mt 18.10-14)

<sup>1</sup> Nýetsca chë Romocama impuesto entšángbiøye atjanayënga y inýe bacna soyënga amënga, Jesúsbiøye imojánajna chabe palabra jouenama; <sup>2</sup> y chë fariseunga y ley abuátambayënga chama Jesusbiana podësca imojtsøyebuambná, mëntśá: —Mua bacna soyënga amëngaftaca entsenuta y chëngaftaca entsesá ca.

<sup>3</sup> As Jesús mëntśá tojanacuntá, chënga jabuátambama: <sup>4</sup> —¿Nda tsëngaftanguentśá, canýe patse oveshënga tojtsabamna, y canýa tbojtsobuëtsëse, chë inýe esconëfta bnëtsana y esconëfta oveshënga shëntsjañe ndoñe cachcá nanjesënyaye, y nanjá chë otšená jetsenguanuama candëtsónýeñëntscuana? <sup>5</sup> Y tbojtsinýena ora, oyejuayá chë oveshá jesotantśajuana; <sup>6</sup> y yebnoye tojtashjango orna, chabe amiguënga y juachañe oyenënga jáchembuana y mëntśá jáuyanana: “Atšeftaca móyejuanga, er chë sëntsanobuëtsë oveshá sëntsinýena ca.” <sup>7</sup> Atšë chëyana, cachcá, celócnaca más oyejuayana jtsebínýnana, canýe bacna soyënga amá tšabe benache tojtishachabiana, y ndoñe nýa yapa, esconëfta bnëtsana y esconëfta tšabe soyënga amëngbiana, chë ndoñe yondujaboto bacna soyënga amana jtsajbanana ca.

*Chë crocénana tojtsónýena shembásabiana cuento*

<sup>8</sup> “O mëntśá, ¿ndëmua shembása, bnëtsana uámana crocénana tojtsebomna y cánýana tojtsobuëtsëse, chora ndoñe canýe uajuinýanësha nanjuajuinýená, y cuedáoca chë yebna nantsetsajo y botamana chë crocénana nantsenguango candëtsónýeñëntscuana? <sup>9</sup> Y tojtsinýena ora, chabe amiguënga y juachañe oyena shembásenga jáchembuana, y mëntśá jáuyanana: ‘Atšeftaca móyejuanga, er chë sëntsanobuëtsë crocénana sëntsinýena ca.’ <sup>10</sup> Atšë chëyana, cachcá, chë Bëngbe Bëtsabe angelotëmëngbeñe oyejuayana jtsebínýnana, nýe canýe bacna soyënga amá chë tšabe benache tojtishachabiana ca” —Jesús tojánayana.

*Chë uaquiñá bacna benachiñe ayá*

<sup>11</sup> Jesús mëntśánaca tojanacuntá: “Canýe entśá uta uaquiñata yojánabamna; <sup>12</sup> y canýe, chë ngomëñche uaquiñá chabe taitábiøye ibojauyana: ‘Taita, atšbe otocana soyënga šmatatšetá ca.’ As chë befta lempe chë uta uaquiñata yojtjëtaye.

<sup>13</sup> “Chentśana baseftaytesna, chë más bobontse uaquiñá lempe ntšamo ibojobuachcá yojtsatobuiye y chë crocénánaca bën luaroye yojtsoñe, y choca, cha nýe ntšamo ibojocochëngcá, mocá yojenobuiye, y chca, lempe yojtsepochóca. <sup>14</sup> Lempe crocénana yojtsoshañe orna, bëts shëntsana chë luarentšë yojóshjango, y chë causa cha ibojotóca shëntseca jtsejétanana. <sup>15</sup> As, cha yojá trabajo janguangoñama y yojínýena chë luarentśa canýe entśábentšë; chana, chabe jajoje ibojíchnua cotsënga jtsanýenama. <sup>16</sup> Chë bobontsna yojtseboše chë cotsbe saná jtsesana, pero ndocná tondaye ibonjanájuatšnaye.

<sup>17</sup> “Cabana, botamana yojinýe ntšamo yojtsepasacá, y mëntśá yojenójuaboje: ‘¡Bueta trabajayënga atšbe taitabe yebnentšë bëtscá saná mondëtsóboimfe, y atšë muentšë shëntsama chanjóbona ca! <sup>18</sup> Chantá atšbe taitabe yebnoye y mëntśá cha chanjauyana: Taita, šmotseperdoná. Atšë tijama ndayá Bëngbe Bëtsá ndoñe yondbošcá, y ntšamo aca ndoñe condbošcá. <sup>19</sup> Mora ya mercedo taitatobuajoñe acbe uaquiñá jtsabáinama; nýe canýe acbe trabajayacá Diosmanda šmatofja ca.’ <sup>20</sup> Chca jëftsenójuaboješë, yojontšë cachabe yebnoye jtana.

“Cabá bënoca yojtsemna ora, chabe taitá chábiøye ibojinýe, y chabe uaquiñabiana ibojóngmia, y jajëbenguama betso yojá; ibojajebengo, ibojtotsejcuá y tša yojtsøyejuayayama chë uaquiñábiøye ibojtámochó. <sup>21</sup> Chora chë uaquiñá ibojauyana: ‘Taita, šmotseperdoná. Atšë tijama ndayá Bëngbe Bëtsá ndoñe yondbošcá, y ntšamo aca ndoñe condbošcá; mora ya mercedo taitatobuajoñe acbe uaquiñá jtsabáinama ca.’ <sup>22</sup> Pero chë Taitana chabe oservënënga yojámëndaye: ‘Betso chë más tšabe entśayá mauaca y matspormanga, montšabuechëtjo y matšshecchëtjo. <sup>23</sup> Mora chë más minýica uacná šmochjuánatse y

šmochjášbua. ¡Mochjase y mochjóboyejuaye ca! <sup>24</sup> Quem atšbe uaquiñá mo obanacá endánmëna y mora bënga montsetátšëmbo cha ainá yotsomñama. Quem atšbe uaquiñá mo otšenacá endánmëna y mora tmontsinÿena ca.’ Y chentšana imojontsé joboyejuayama.

<sup>25</sup> “Chë yebnoca fiesta yojtsemnëntscuana, chë mayor uaquiñana jajoca inëtšomñe. Yebnoye yojtsataye y ya bëconana yojtsemna orna, cha vojouena imojtsabuastoye y imojtselántsaye. <sup>26</sup> As chora cha canÿe oservenábioye ibojachembo y mëntšá ibojatjaye: ‘¿Ndayá bëngbe yebnentše yojtsopasana ca?’

<sup>27</sup> “As chë oservená ibojojuá: ‘Acbe uabentsá tontashjango y chama acbe taitá šonjutarié chë más minÿica uacná jáshbuama, cha tšabá tojtashjanguama ca.’ <sup>28</sup> Pero chë uabóchena catšatna corente ibojtsetna y ndoñe yontseboše tsoye jtamashënguama. As cach befta yojábocna chë catsátbioye jaimpádama chauatamashënguama. <sup>29</sup> Chora cha chë taitábioye ibojauyana: ‘Taita, aca condétatšëmbo bueta uata cbetsajabuáchanama, nyets tempo cbetseyeunanama, pero ndocna te ni mo canÿe chivotema chešcaisatštá atšbe amiguëngaftaca joboyejuayama. <sup>30</sup> Y masna, acbe uaquiñá chë bacna vida bomna shembásengaftaca acbe crocénana pochocayá tojtashjango ora, chë más minÿica uacná chabiana tcojášbua ca’ — chë uaquiñá ibojauyana.

<sup>31</sup> “Chora chë befta ibojojuá: ‘Atšbe uaquiñá, aca sempre átšeftaca condëtsemna y lempe ntšamo atše tsbomncá acbiámna endmëna. <sup>32</sup> Pero mora tšabá entsemna joboyejuayama y joyejuayëngama; er acbe uabentsá mo obanacá endánmëna, y mora bënga montsetátšëmbo cha ainá yotsomñama; mo otšenacá endánmëna, y mora tmontsinÿena ca.’ ”

## 16

### *Chë nduiñbe ndoñe tšabe uajabuachanábiama cuento*

<sup>1</sup> Jesús mëntšánaca chabe uatsjëndayënga tojanacuntá: “Inamna canÿe bomna entšá, y cha ibnabomna canÿe uajabuachaná chabe soyëngaca chaotsinÿenama; y chë nduiño imojuenaye chë uajabuachaná chabe soyëngaca ndoñe tšabá yontsamama. <sup>2</sup> Asna, chë nduiño ibojachembo y mëntšá ibojauyana: ‘¿Ntšamo acbiana šmotsatsëtsnacá ndegombre yojtsemna ca? Mora cuenta šmatatštá ntšamo atšbe soyëngaca tojamama, er morscana ya ndoñe atšbe soyënga inÿená queochátšëmna ca.’ <sup>3</sup> Chë uajabuachaná yojontsé jenójuaboyana, y mëntšá yojeniyana: ‘¿Y mora ntšamo chtsemana, chë nduiño atšbe trabajuentsana sojtabocna ora? Ndoñe añemo quetsátšbomna fshantse jatrabájama, y lemošna jótjañamna séntšëuatja. <sup>4</sup> Ya séntsetatšëmbo ndayá chjama, chca, atšbe trabajuentsana chašojtábocna ora, atše jtsabamnana ndëmuanÿënga chëngbe yebnentše chašmofjama ca.’

<sup>5</sup> “Chentšana, canÿánÿa chë chabe nduiñbioye ndebénënga yojáchembo. Cánÿabioye ibojatjaye: ‘¿Ntsachetšá atšbe nduiño icondebena ca?’ <sup>6</sup> Y cha ibojojuá: ‘Canÿe patse barrilëšangá aciteiye ca.’ As cha ibojauyana: ‘Muentše acbe recibëcha entsamna; mora mótbema y inÿácha nÿe shachna bnëtsana barrilëšangama matapormá ca.’ <sup>7</sup> Chentšana inÿabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canÿe patse medida trigo ca.’ As cha ibojauyana: ‘Muentše acbe recibëcha entsamna; chiñe nÿe posufta bnëtsanama mábema ca.’ <sup>8</sup> Chentšana, chë nduiño tšabá yojayana chë ndoñe tšabá ama mayordombiana, cha študioca yojamama. Chë nÿe quem luarama enójuabnaye entšanga, cachëngbe soyëngaca puerte studio bomnënga mondmëna; y chë entšangbe juabnënga binÿnayábënga ndoñe nÿa yapa ca.

<sup>9</sup> “Atše cbabuayená, quem luarentše, chë bacna soyënga amëngbe luarentša bomnánaca amiguënga šmochjábiana, inÿënga jtsëjabuáchanëse. Chca, chë bomnana tojtsopochocá ora chašmotsabamna ndëmuanÿënga chë nÿetsca tescama oyenoye chacmúbuajama ca.

<sup>10</sup> “Nda básefta soyënguñe lempe tšabá tojama, bëtscá soyënguñnaca lempe tšabá echanjama; y nda básefta soyënguñe ndoñe tšabá tonjama, bëtscá soyënguñnaca cach ndoñe tšabá queochatsma. <sup>11</sup> Chcasna, quem luarentše, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanÿiye? <sup>12</sup> Y chë ndoñe tšëngaftangbe sóyeca ndoñe tšabá šmonjamëse, ¿nda cmochjantšabuáchiye ndayá tšëngaftangbiana yomncá ca?

<sup>13</sup> “Ndocná ntšobenana uta mandayata jtsaservënana; er cánÿabioye bochantšáböyënja y chë inÿabioyna bochantšebobonshana, o cánÿabiama tšabá echántsetrabajaye, y chë inÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtsebonnma tcojtsebošëse ca” —Jesús tojánayana.

<sup>14</sup> Chë fariseunga, becá crocénana jtsebonnma bošënga innamna, lempe chca chënga tmojanuena, y Jesúsbioye imojtsáböyëjuana. <sup>15</sup> As Jesús tojanëyana: “Tšëngaftanga entšangbe delante mo tšábënga cuaftsemncá jtseboniamnayana, pero Bëngbe Bëtsá endétatšëmbo ndayá tšëngaftangbe ainaniñe yomnana; er ndayá entšanga más tojtsebošcá, Bëngbe Bëtsá ntšáböyënjana ca.

*Moisesbe ley y Bëngbe Bëtsabe amëndayana*

<sup>16</sup> “Moisesbe ley y chë Bëngbe Bëtsabe juabna oyebuambnayënga tšëngaftanga cmon-janabuayiyá, Juan chë Ubayaná quem luaroye tonjánabëntscuana. Cha tonjánabo orscana montsabuayiyá chë tšabe noticiënga Bëngbe Bëtsabe amëndayocama, y nyëtscanga tša montseboše choye jamashënguama ca.

<sup>17</sup> “Más paselo endmëna, celoca y quem luare chaopochocá, y ndoñe chë ntšamo leyíne iuayancá, chë ndayá jopásama yomnama, ni mo canye punto ndoñe chca chaondëtsemnama ca” —Jesús tojánayana.

*Ndayá Jesús tojanabuatambá chë bouamnënga tmojtsenëtšenama*

(Mt 19.1-12; Mc 10.1-12)

<sup>18</sup> “Nda chabe shémbioye cachá tbojesonýa y ínÿaftaca tojtóbouamase, cha chë natsana shémbioye ínÿaftaca jtseingñayana; y nda chë útšena shembásaftaca tojobouamá chana, canye uabuatambá jtsebomnana, y chca, chana canye bacna soye jtsamana ca” —Jesús tojánayana.

*Chë bomná y chë ndbomnëjema Lázaro*

<sup>19</sup> “Canye bomna entšá inamna; cha yojanamana uámana y botamana shbuenda uaf-jatsenga y lino entsayangá jtichëtjuana, y cada te bëts fiestënga yojánama. <sup>20</sup> Canye ndbomnëjmëna inamna, Lázaro ca uabainá, bacna nguayanánaca šocá; y cha yojanamana chë bomnabe bësásentšë fshantsiñe jótbemana. <sup>21</sup> Quem ndbomnëjema yojtseboše chë bomná yojtsesayentšana yojatquëcjana sanángaca jtoshachayana; y chë quešënga imnaboye chabe nguaye cuerpo jajáfuama. <sup>22</sup> Canye te Lázaro yojtsóbana, y Bëngbe Bëtsabe angelënga Abrahámioye cha imojtamba, chë nyëtscanga oyejuayënga mondmëna luaroye. Chë bomnánaca yojóbana y imojuábtontsa.

<sup>23</sup> “Chë bomná infiernoca puerte ngmëniñe yojtsesufrina ora, tsbanánoye yojontješiyë y bënoca Abraham ibojinjë, y Lázaro cháftaca yojtsemna. <sup>24</sup> As chë bomná yojuyebuáchena: ‘jTaita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem íñeshoca tša séntsesufrina ca.’ <sup>25</sup> Pero Abraham ibojauyana: ‘Uaquíñá, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátšbomna; pero morna, cha tšabá y oyejuayá entsemna, y aca jabuache ngmënaná contsebomna. <sup>26</sup> Y ínÿe soye, canye bëts tšuañe entsemna tšëngaftangbiocana mëntscóñe; chca, chë tšëngaftangbioye muentšana jenachnënguama tmojtsebošënga ndoñe chamondëtšobena, ni chocana bëngbioye cach ndoñe ca.’

<sup>27</sup> “Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe yebnoye; <sup>28</sup> choca šëndábamna shachna catšátanga; as cháuyana ntšamo moca atše stsepasana y ntšamo jamëse chënga ndoñe chaondëtšamna quem ngmëñënga luaroye jabama ca.’ <sup>29</sup> Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëtsanábema soyënga; jchëngbioye chamoy-auná ca!’ <sup>30</sup> Chë bomná ibojajuá: ‘Ndoñe, Taita Abraham; nderado obanënguentšana canya chëngbioye tojase, aíñe chë tšabe benache muantishache ca.’ <sup>31</sup> Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóyaunase, Bëngbe Bëtsábeñe ndoñe quemochatošbuáchiye, masque canye obaná chauatayenëse, chëngbioye jábuayenama ca’ ” —Jesús tojancuentá.

## 17

*Resjo yomna, nderado bacna soyënga cuanjama*

(Mt 18.6-7, 21-22; Mc 9.42)

<sup>1</sup> Jesús chabe uatsjëndayënga tojanëyana: “Sempre echanjëftsemna juabnënga bacna soyënga jamama; pero, jtša lastema chë entšabiana ndabe causa ínÿënga bacna soyënga tmojama! <sup>2</sup> Más tšabá chabiana nántsemna canye nantsnëbé chamotsetamošëntšbua y mar bëjayoye chamotsashbuetse, y ndoñe chë canya Bëngbe Bëtsábeñe ošbuachiyá bacna soye chaomama juanatsana. <sup>3</sup> Cuedado šmochtsebomna.

“Acbe catšata bacna soye tojamëse, cochjuácacana; y yochtsajbaná ca cha tojayanëse, cochtseperdóna. <sup>4</sup> Masque nÿe canye te, canyšëfta soye ntšámna tcmojaborlá, y canyšëfta soye ‘chca ndoñe más quechochtšborlá ca’ tcmojauyanëse, aca cmontsemna cha jtseperdónana ca” —Jesús tojánayana.

*Bëngbe Bëtsábeñe jtsošbuáchiyëse, corente obenana jtsebomnana*

<sup>5</sup> Chë uatsjëndayënga Bëngbe Utabnábioye tmojanianana: —Ošbuáchiyana šmababuát ca.

<sup>6</sup> Y chë Utabná tojanëjua: —Tšëngaftanga ošbuáchiyana, batšatema masque nÿe mo mostaza jenaycá šmojtsebomnëse, quem sicomoro betiyoye šmatjauyana: “quemuentšana mojšastse y mar bëjayoca mojé ca”, y quem betiye chca nanjama ca.

*Chë oservená ndayá ibomna jamana*

<sup>7</sup> “Nderado canya tšëngaftanguentšá canye bochichnayá tbojtsebomna, cha jajocana tojtashjango jajañe arayocana o uacnënga anñenocana, ¿chábioye bochjauyana: ‘Matabo y mabose ca?’ <sup>8</sup> Ndoñe, chamna mënšá bochanjauyana: ‘Jetiñe juasama cochjuábua, y moprontá atše jaserviama atše candëse y candofšentscuana; y chentšana aca cochjase y cochjofšiyee ca.’ <sup>9</sup> Y chë bochichnayábioye ndoñe quebochtëtšchuaeye ndayá tbojutariećá cha tojamama. <sup>10</sup> Tšëngaftángnaca cachcá, lempe ntšamo Bëngbe Bëtsá tcmojutariećá chašmojama ora, cmontsamna jayanana: ‘Nduámana oservénënga fšëndmëna; er nýe ntšamo jamama šuamncá tifjama ca’ ” —Jesús tojánayana.

*Jesús, bnëtsanënga bacna nguayanánaca šoquënga tojanashná*

<sup>11</sup> Jerusalenoye benache, Jesús tojánachnëngo Samaria y Galilea luarëjana. <sup>12</sup> Y canye pueblotemoye tojánashjango ora, bnëtsana boyabásenga bacna nguayanánaca šoquënga chábioye tmojána; chábentšana bënoca chënga tmojanoquedá, <sup>13</sup> y mënšá imojtsáyebuache: —Jesús, Buatëmbayá, šmotsalastemá ca!

<sup>14</sup> Jesús chënga tojánanye ora, tojanëyana: —Jerusalenoca bachnángbioye motsajna, y chënga šmochjínñanyíye tšëngaftanga mora ndëšoquënga šmojtsemnana ca.

Y tojanopasá, chë bnëtsanënga cabá imojétsayëntscuana, ya shnánënga imojtoquédaye. <sup>15</sup> Canya chënguentšá, shnaná yojtsemnana tojáninye ora, yojeshëcona Bëngbe Bëtsábioye jabuache atschuanaye; <sup>16</sup> y Jesusbe delante yojshëntsamentsiye, jubiaca fshantssoñe yojtsejéna, y chábioye ibojtsatschuanaye; y chë boyabásana Samarioca entšá inanna.

<sup>17</sup> Chora Jesús tbojaninyana: —Bnëtsanënga mondmëna chë shnánënga tmontoquedanga. ¿Ndayentše chë inye esconëftanga imojtsemna? <sup>18</sup> ¿Nýe quem boyabása, inye luarocana ashjangoná, tojeshëcona Bëngbe Bëtsá jëtšchuyama? ¿Ndayeca chë inýenga ndoñe ca?

<sup>19</sup> Y chë entšábioye tbojaninyana: —Matëtsbaná y matsatoñe; Bëngbe Bëtsábefee aca icošbuachëyeca shnaná contsatmëna ca.

*Ntšamo Bëngbe Bëtsabe amëndayana yochjóshjango*  
(Mt 24.23-28, 36-41)

<sup>20</sup> Canye, chë fariseunga Jesús tmojantjá, mocna ora chë Bëngbe Bëtsabe amëndayana yochjanóshjanguama; y cha tojanëjua: “Bëngbe Bëtsabe amëndayana chaojóshjango ora, tšëngaftanga ndoñe quešmochatobenaye chca jinýana. <sup>21</sup> Chora ndoñe quemochátichamo ‘Muentše entsemna’ o ‘Choca entsemna ca’; er Bëngbe Bëtsabe amëndayana ya tšëngaftangbeñe entsemna ca” —cha tojánayana.

<sup>22</sup> Ntšamo Noé uatsjëndayënga tojanëyana: “Canye tempo echanjóshjango, y chora tšëngaftanga šmochántseboše canye te jtsebomnana, ntšamo chë Bëngbe Bëtsá Entšá tbojanbemá tšëngaftangbeñe nejëtsemna orcá; pero chora ndoñe chca queochatóshjango. <sup>23</sup> Chora báseftanga mochántsihomo: ‘Muentše entsemna’ o ‘Choca entsemna ca’; pero choye ndoñe šmatjá, ní šmatjúseto. <sup>24</sup> Er chë tojtacuinýe ora, ntšamo celoca catoica juachoica tojabuashinýinýenacá, chca echántsemna chë Bëngbe Bëtsá Entšá tbojanbemá quem luaroye chaojésabo te. <sup>25</sup> Pero natsana cha bontsemna puerte jasúfriana, y morsca entšangbiana uaobotená jtsemnana.

<sup>26</sup> “Ntšamo Noé yojaniyena ora tojanopasacá, cachcá echanjopásá chë Bëngbe Bëtsá Entšá tbojanbemá quem luaroye chaojésabo ora. <sup>27</sup> Chë tempo, entšanga imnasaye, imnofšësnaye, imnóbouamnaye; natjëmbana imojtsiyëñe, y chca, natjëmbana imojtsomñe, Noé chë barquëshoye tojánamashënguëntscuana; pero chora uabouana uaftena tojánashjango y chë entšanga tojtsanapochocá. <sup>28</sup> Cachcá ntšamo Lot yojaniyena ora tojanopasacá: entšanga imnasaye, imnofšësnaye, imnóbouamnaye, imojtsena, sananga imnajena y imnajejuana; <sup>29</sup> pero Lot Sodoma bëtš pueblentšana tojéftsanbocna ora, Bëngbe Bëtsá tojanma celocana iñeshe y azufre chauaftema, y chentša entšanga tojtsanapochocá. <sup>30</sup> Cachcá echántsemna chë Bëngbe Bëtsá Entšá tbojanbemá chaojtonýná ora.

<sup>31</sup> “Chë tena, nda cachabe yebnentša tsbanánoca chaojtsemna, y chabe soyënga cach tsoca tojtsebomñese, chocana ndoñe chaondëstajango chë soyënga jesabobocnama; y nda jajoca chaojtsemna, yebnoye ndoñe chaondëta. <sup>32</sup> Menójuabonga ntšamo Lotbe shëmaftaca tojanopasama. <sup>33</sup> Nda tojtsentšena quem luarentše bëtšcá jtsebomnana y atšbiana jasúfriama ndoñe tontseprontana, chë nýetsca tescama yomna tšabe vida echanjobuetše. Pero nda quem luarentša soyënga cachcá tojonýá atše juastama, masque chaóbana, chë nýetsca tescama yomna tšabe vida echántsebomna.

<sup>34</sup> “Atše chëyana, chë ibeta, chë Bëngbe Bëtsá Entšá tbojanbemá chaojtonýná ora, útata canye jutsnëshañe bochántsemna; canya mochanjesbetše y chë inýana ndoñe. <sup>35</sup> Uta shembásata cánýiñe bochántsejanýcoye; canya mochanjesbetše y chë inýana ndoñe. <sup>36</sup> Uta boyabásata jajoca bochántsetrabajaye; canya mochanjesbetše y chë inýana ndoñe ca” —cha tojanëyana.

<sup>37</sup> Chora chë uatsjéndayënga Jesús tmojantjá: —Utabná, ¿ndëmoca chca yochjopása ca? Y cha tojanjuá: —Chë obanabe cuerpo tojtsementse chë gallinacënga jojotana ca.

## 18

### *Chë viudá y chë manda biam a cuento*

<sup>1</sup> Jesús mentsá tojanacuntá, entsanga jabuátambama, Bëngbe Bëtsáftaca nyets tempo jtsencuentayana yomnama, ainaniñe añemo jtsebomnama ndocna te ntjajbanacá. <sup>2</sup> Mentsá tojánayana: “Canýe pueblentse canýe mandado inamna; chana ni Bëngbe Bëtsábíoye ndoñe bonjánebiauutja, ni entsanga yonjánayaunana. <sup>3</sup> Chë pueblentse canýe viudánaca inamna; chana canýe demanda yojánbomna. As chë mandádbíoye yojobeconá y mentsá ibojauyana: ‘Diosmanda atšbe uayayá motsecastigá ndayá sojaborlama ca.’ <sup>4</sup> Bayté chë mandado ndoñe yonjábosena chë viudábíoye joyeunayama; pero chentsana cha yojenójuaboye: ‘Masque Bëngbe Bëtsá ndoñe quetsátebiauutja, ni entsanga ndoñe quetsátayaunana, <sup>5</sup> pero quem viudá cada ora endabó causa, añe chanjóyeunaye, chabe uayayá chanjacastigá; ndoñesna cada te nandaboye y cabana ya sochanjanaméntsá ca.’”

<sup>6</sup> Chentsana Bëngbe Utabná tojánayana: “Smonjouena ntšamo chë ndoñe tšabá ama mandado yojayancá. <sup>7</sup> Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora inýengbe causa montsesufrina y cada te Bëngbe Bëtsá mondbëtseimpadana chaújabuachama. ¿Más chamuatoatmá ca yochjáuyana? <sup>8</sup> Atše cbëyana, Bëngbe Bëtsá betscó tšëngaftanga cmochanjátsebacaye, tšëngaftanga chë inýengbe causa mora smojtsesufrinënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentse entsanga yochjánýena ca?” —Jesús tojánayana.

### *Chë fariseo y chë Romocama impuesto atjanayabiam a cuento*

<sup>9</sup> Báseftanga imojtsanjuabná chënga tšabe entsanga inamna ca, pero chë inýengbíoye imojtsëbuayëñja; chíyeca Jesús mentsá tojanacuntá jabuátambama: <sup>10</sup> “Uta boyabásata Bëngbe Bëtsabe bëtš yebnoye tbojána Bëngbe Bëtsáftaca jencuëntama: canýa yojamna fariseo, y chë inýana, canýe Romocama entsángbíoye impuesto atjanayá. <sup>11</sup> Chocna chë fariseo, tsanana Bëngbe Bëtsábíoye mentsá ibojtsecuëntaye: ‘Bëngbe Bëtsá, chontsatschuaná atše chë inýengcá ndoñe quetsatsmënama: atbëbanënga, puerte bacna soye amënga y shëmbíoye inýaftaca ingñayënga; y ni quem Romocama impuesto atjanayacá ndoñe quetsatsmënama. <sup>12</sup> Atše sënduamana, ácaftaca jencuëntamna, canýe semaniñe uta soye tondaye ntjascá jtsemnana; y lempe stjonýenentšana, bnëtsanentšana canýe soye acbiama sëndëquëcná ca.’ <sup>13</sup> Pero chë Romocama impuesto atjanayana, bënoca yojtsemna, ni celoye ntjontjësíycá, yojtsenócochjantsetaye y mentsá yojtsichamo: ‘¡Atšbe Bëtsá, smotselastemá, atšajema bacna soye amá tsmëna causa ca!’”

<sup>14</sup> Chentsana Jesús tojánayana: “Atše cbëyana, quem Romocama impuesto atjanayá chabe yebnoye tojtaná chabe bacna soyëngama perdonaná, pero chë fariseo ndoñe. Er nda cachá bëtšá tojtsenobiamná, nduamaná mochántsebema; y nda cachá nduamaná tojtsenobiamná, añe bëtšá mochanjábema.”

### *Jesús, basetëmëngbiama Bëngbe Bëtsábíoye tbojanimpadá*

(Mt 19.13-15; Mc 10.13-16)

<sup>15</sup> Entšanga imojanamana Jesúsbíoye basetëmënga junatsana chauabájajuama, y Bëngbe Bëtsábíoye chëngbiama chaboimpadama; pero chë uatsjéndayënga chca tmojáninýe ora, tmojanontšé chë basetëmënga unachayënga jtsécácanana. <sup>16</sup> Pero Jesusna chë basetëmënga tojánachembo, y mentsá tojánayana: “Cachcá mónýaye chë basetëmënga átsbíoye chamuabo, y ndoñe matëuyana; er Bëngbe Bëtsabe amëndayana endmëna chë mo quem basetëmëngcá imomnëngbiama. <sup>17</sup> Ndegombre cbëyana, nda Bëngbe Bëtsabe soyënga ndoñe tonjóyëngacñe mo canýe basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

### *Canýe bomna entsá Jesúsbíoye tojána*

(Mt 19.16-30; Mc 10.17-31)

<sup>18</sup> Canýe mandayá Jesúsbíoye tbojantjá: —Tšabe Buatëmbayá, ¿ndayá sojtsemna jamana chë nyetsca tescama yomna tšabe vida jtsebomnama ca?

<sup>19</sup> Y Jesús tbojanjuá: —¿Ndáyeca šcjauyana “tšabia ca”? Tšabia nýe canýa endmëna: Bëngbe Bëtsá. <sup>20</sup> Aca condëtatšëmbo ntšamo Bëngbe Bëtsá tojanmandacá: “Acbe shema inýaftaca ndoñe cattseingñaye, inýa ndoñe catjóba, ndoñe catjatbëba, ndoñe catjuaboiñyena y acbe bëtšëtsata ndoñe stëtšoye catjáquedaye ca.”

<sup>21</sup> Chora chë boyabása tbojanjuá: —Atše lempe chca básetema orscana sëndocumplina ca.

<sup>22</sup> Jesús chca tojanuena ora, tbojaníyana: —Cabá canýe soye cmontsebuáshbena jamana: lempe ntšamo icobomncá cochjtsatobuyie, y chë crocënana, ndbomnëjëmënga

cochtsatšataye; chca, celoca canye bĕts bomnana cochántsebomna. Chentšana, cochjabo y šochjuasto ca.

<sup>23</sup> Chĕ entšá chca tojanuena ora, puerte ngménaca yojtsemna, er cha corente bomná inamna. <sup>24</sup> Chca ngmená tbojáninĕ ora, Jesús tojánayana: —¡Yapa totcá bomnĕngbiama entsemna Bĕngbe Bĕtsabe amĕndayoye jamashĕnguama! <sup>25</sup> Ndegombre, más paselo endmĕna canye camello chĕ coshuffjentša atĕfjnĕjana chauachnĕngo, y ndoĕne canye bomná Bĕngbe Bĕtsabe amĕndayoye jamashĕnguana ca.

<sup>26</sup> Chora, chĕ chca imojouenĕnga tmojánayana: —¿As nda yochjobenaye atsbocaná jtsemnana ca?

<sup>27</sup> Y Jesús tojanĕjua: —Ndayá entšanga ndoĕne mondobena jamana, Bĕngbe Bĕtsá aiĕne endobena jamana ca.

<sup>28</sup> Chora Pedro, Jesúsbioye tbojanianyana: —Bĕngbe Utabná, aca contsonyá, bĕnga lempe chĕ fsĕndbomna soyĕnga fsĕnjĕsebošhĕona, y ácaftaca fsĕntsajna ca.

<sup>29</sup> Jesús chora tojanĕyana: —Ndegombre cbĕyana, ndánaca Bĕngbe Bĕtsábioye jaserviama, chabe amĕndayama jtsabuayinyayĕse, cachcá tojĕftsebošhĕona chabe yebna, shema, catsátanga, bĕtsĕtsanga o básanga, <sup>30</sup> cha mora quem luarentse chĕ soyĕngama más echanjóyĕngacĕne, y chĕ inĕne luarocna, chĕ nĕyetsca tescama yomna tšabe vida ca.

*Jesús cachiĕne tojánayana cha jóbanama y jtayenama*

*(Mt 20.17-19; Mc 10.32-34)*

<sup>31</sup> Jesús chabe bnĕtsana uta uatsjĕndayĕnga barie tojánachembo, y mĕntšá tojanĕyana: “Smontsetátšĕmbo mora Jerusalenoĕ bĕnga montsajnama, y choca lempe echanjóchnĕngo ntšamo chĕ Bĕngbe Bĕtsabe juabna oyebuambnayĕnga, chĕ Bĕngbe Bĕtsá Entšá tbojanbemabiama tmojanabemcá; <sup>32</sup> er choca cha chĕ ndoĕne judiĕngbe cucuatšĕne mochanjáboshĕona, y mochantšáboyejuana, mochanjóyenguango, mochantsebuashĕtoĕto; <sup>33</sup> y chamojátjanjentsana, mochanjóba, pero unga tianoye cha echántayena ca.”

<sup>34</sup> Chĕ uatsjĕndayĕnga tondaye tonjanĕsertá, ni montsetátšĕmbo ndayá bĕtsemnana ntšamo Jesús yojtsĕtsĕtsnacá, er chĕngbiama yojamna josértama ndopodena soyĕnga.

*Jesús, Jericó puebloca canye jtanábioye tbojanshná*

*(Mt 20.29-34; Mc 10.46-52)*

<sup>35</sup> Tojanopasá, Jesús Jericó puebloĕ yojtsebĕconaye ora, canye jtaná benache juachaĕne inatbemana, lemošna otjanaĕne. <sup>36</sup> Entšanga chĕjana imojtsachnĕjuanama tojanuena ora, yojanotícia ndayá yojtsopasana ca, <sup>37</sup> y chĕ entšanga tmojanianyana, —Jesús Nazaretocá entebeconá ca.

<sup>38</sup> As cha yojontsé uaye buáchana: —¡Jesús, Davídbentšana Entšá, šmotselastemá ca!

<sup>39</sup> Chĕ natsana imojtsajnĕnga chĕ jtaná imojtsácacana, iytĕca chaobemama; pero cha más yojtsáye buache: —¡Davídbentšana Entšá, šmotselastemá ca!

<sup>40</sup> As Jesús tojantsá y tojanmandá cha chamobetšama. Cha ya bĕcoĕne yojtsemna ora, Jesús tbojantjá; <sup>41</sup> —¿Ndayá cojtseboše atše acbiama chjamama ca?

Y chĕ jtaná tbojanjúa: —Atšbe Utabná, atše sĕntseboše chašuatábĕnyĕna ca.

<sup>42</sup> Chora Jesús tbojanianyana: —Matinĕne, Bĕngbe Bĕtsábeĕne betsošbuachĕyeca shnaná contsatsmĕna ca.

<sup>43</sup> Y cachora cha tšabá ibojtabĕnyĕna, y Jesúsbioye ibojtsĕstona, Bĕngbe Bĕtsá atschuanaye. Y nĕyetsca entšanga, chca tmojáninĕ ora, Bĕngbe Bĕtsá imojtsatschuanaye.

## 19

*Jesús y Zaqueo*

<sup>1</sup> Jesús Jericó puebloca tojánashjango ora, chĕ pueblĕjana cha yojtsachnĕjuana. <sup>2-3</sup> Chora, canye bomna entšá, chĕ Romocama entšanga impuesto atjanayĕngbe amĕndayá, Zaqueo ca uabainá, yojtseboše Jesús jinĕyama. Pero ndoĕne yontsobena jinĕyama, bĕtscá entšanga causa y cha becuca inamna causa. <sup>4</sup> Chcasna, cha betscó natsanoye tojaftsanótjajo y canye sicomoro betiyeshoye tojánashĕngo, chca, Jesús chĕjana tojtsachnĕjuana ora, jinĕyama jobenayama. <sup>5</sup> Jesús chĕ betiyeshoye tojánashjango ora, tsbanánoye tojanontjĕsé y Zaqueobioye tbojáninĕne. As Jesús tbojanianyana: “Betscó chocana matastjango, Zaqueo, er mĕntĕ chanjá acbe yebnoye jatema ca.”

<sup>6</sup> Chora Zaqueo betscó tojtastjango y chentšana puerte oyejuayá Jesúsbioye tbojanofja. <sup>7</sup> Entšanga chca tmojáninĕ ora, tmojanontsé Jesusbe contra mĕntšá ichámuaana: “Jesús tonjá canye bacna soyĕnga amabe yebnentše jatema ca.”

<sup>8</sup> Chora Zaqueo tojantsá, Bĕngbe Utabná Jesús bentše, y mĕntšá tbojanianyana: —Mouena, atšbe Utabná, atšbe bomna soyĕnguentšana tsĕntsaĕne ndbomnĕjmĕnga chanjátšataye y nda más crocĕnana tijĕftseyĕngacá, chĕ ntsachetšá tijĕftsefcama canta soye más chantoyiye ca.

<sup>9</sup> As Jesús tbojaníyana: —Ménté, aca acbe bacna soyénguentsana atsbocaná contsemna, er Zaqueo, ácnaca Abrahámbentsana entsá condmèna. <sup>10</sup> Er chë Bèngbe Bètsá Entsá tbojanbemá tojabo chë pochocánènga jtsemnana imojtsajnènga jabétsanguanguama y jabátsebacama ca.

*Chë crocenánama cuento  
(Mt 25.14-30)*

<sup>11</sup> Entsanga chë soyènga imojtsuenana, y Jesús inye soye tojanacuntá jabuátambama, er cha ya Jerusalén béconana yojtsemna, y entsanga imojtsejuabnaye chë Bèngbe Bètsabe améndayana ya yochjanóshjango ca.

<sup>12</sup> Jesús tojanéyana: “Canýe luarentša uámana entsá inye bën luaroye yojá, cachabe luar-entša rey chamobemama y chentsana cachábíoye jtama. <sup>13</sup> Cabá nda ora, chabe bnétsana oservénènga yojáchembo y bétscá crocénana cada cánýabíoye yojéftsayentšbuachiye, y méntša yojeftséyana: ‘Quem crocénana trato šmochjábema atše candétabentsana ca.’ <sup>14</sup> Pero cachabe luarentša entsanga cha imojuáya, as chéngna básefta entsanga imojchamuá chë inye bën luaroca méntša chamuayanama: ‘bènga ndoñe queftsátsoše cha bèngbe rey chaotsemnana ca.’

<sup>15</sup> “Pero pronto chë luarentša rey cha imojábema. Y chë luaroye yojtá orna yojamánda chë crocénana yojéftsayentšbuáchenga chamobéconama, jtsetatšëmbuama ntsachetsá cada ona chë crocénana yojongánama. <sup>16</sup> Chë natsaná yojáshjango y yojayana: ‘Taita, acbe crocénana bnétsana soye más tonjoboté ca.’ <sup>17</sup> Y chë rey ibojójuá: ‘Tša tsábá, tsábe oservená. Aca quem base soyíne ntšamo tbojamandacá tsábá tcojámayeca, bnétsana pueblentša mandado chacotsemnana cbojayé ca.’ <sup>18</sup> Chentsana inýa yojáshjango y yojayana: ‘Taita, acbe crocénana shachna soye más tonjoboté ca.’ <sup>19</sup> Y chë rey ibojauyana: ‘Acnaca shachna pueblentša mandado cochántsemna ca.’

<sup>20</sup> “Chorna inýa yojobeconá y méntša yojayana: ‘Taita, muentše acbe crocénana entsatsmèna; canýe pañueléjuañe bonguana sèntsejajo. <sup>21</sup> Atše acbiana uatjana šonjuábuache, er aca canýe tsátjaye entsá condmèna; aca chë ndoñe condbuajonentšana jocñana y chë ndoñe tconjájé luarentšana jaja saná jobuátbanana ca.’ <sup>22</sup> As chë rey ibojauyana: ‘Bacna oservená, cach acbe palabrèngaca chanjínýanýiye aca ndoñe tsábá tconjamama. Atše chë ndoñe sèndbuajonentšana jocñana y chë ndoñe sènjájé luarentšana jobuátbanana tsuamanama icojátatšëmbèse, <sup>23</sup> ¿ndáyeca ndoñe tconjá chë crocénana bancoca jetsobuájua, y atše camoye matijtabo ora, mašctoyé chë crocénana y chë chentsana tojoboté crocénanèna ca?’ <sup>24</sup> Y chë chentše imojtsemna entsanga yojáuyana: ‘Chë crocénana motseboca y chë bnétsana soye más tojabotébiyoye chana motsatsetá ca.’ <sup>25</sup> As chéngna imojojuá: ‘¡Pero cha ya bnétsana soye más entsebomna ca!’ <sup>26</sup> Y chë rey yojójuá: ‘Atše chéyana, nda tojtsebomnábiyoye, más mochanjátsetaye; pero nda tondaye tondbomnábiyoye, chë tojtsejuabná batšatema yobomna sóynaca mochántseboca ca. <sup>27</sup> Y chë atše uayayènga, chë chéngbe rey atše chaitsemnana ndoñe monjánbošèngna, moye ménatse y atšbe delante šmochtsébaye ca’ ” —cha chora yojayana.

*Jesús Jerusalenoye tojánashjango  
(Mt 21.1-11; Mc 11.1-11; Jn 12.12-19)*

<sup>28-29</sup> Chca tojéftsanayana chentsana, Jerusalenoye yojétsaye ora, Jesús tojánashjango canýe tjashoye, Olivos ca uabáiniñe, Betania y Betfagé pueblènga béconana. Chora, uta chabe uatsjéndayata tojanichamó, <sup>30</sup> méntša jáuyanése: “Tsèndatše natsana entsemna base pueblotémoye motsata. Chašojáshjango ora, canýe burrotema utsbuaná šochanjínýena. Chábeñe cabá ndocná tonjenojayé. Sochjuajafjoná y sochjuánatse. <sup>31</sup> Y nderado nda ndáyeca šojtsajafjná ca chacmojátjasna, šochjuayana: ‘Bèngbe Utabná bontsajaboto ca.’ ”

<sup>32</sup> Chë uatsjéndayata tbojana y lempe ntšamo Jesús tojanéyancá tbojaníyena. <sup>33</sup> Y chë burrotema imojtsajafjná orna, chë burrotema nduiñènga tmojanéyana: —¿Ndáyeca chë burrotema šojtsajafjná ca?

<sup>34</sup> Chora chata tbojánayana: —Bèngbe Utabná bontsajabótoyeca ca.

<sup>35</sup> Chentsana Jesúsbiyoye chë burrotema tmojanánatse, y chë burrotémbeñe chatbe entsáyá tbojanjátse, y chábeñe Jesús tmojanenjayé. <sup>36</sup> Y cha yojtsachnéjuana ora, entsanga chéngbe entsáyá benachéjána imojtsètètsatsana.

<sup>37</sup> Olivos tjashe tsmanoye yojtsebeconá ora, chë bétscá entsanga, Jesúsbeñe ošbuáchiyènga, tmojanontsé uayebuáchana y Bèngbe Bètsá oyejuayènga jètschuyana, Bèngbe Bètsabe obenánaca bétsoyènga Jesús tojanmama. <sup>38</sup> Chéngna méntša imojtsichamo: “¡Corente bendición bomná chaotsemna, chë Bèngbe Utabnabe obenánaca tojabo Rey ca! ¡Celoca tsábá entsemna! ¡Bèngbe Bètsá matschuanga ca!”

<sup>39</sup> Chë entsanguentše básefta fariseunga imojtsemnènga, Jesús tmojaníyana: — Buatèmbayá, acbe ústonènga mecácana chca ndoñe chamondétsáyebuachama ca.

<sup>40</sup> Pero Jesús mentsá tojanéjua: —Ndegombre cbéyana, mēnga iyteca tmojobiamēse, chē ndētsbenga muanjuayebuáchena ca.

<sup>41</sup> Jesús Jerusalén béconana tojánashjango, y chē bēts pueblo tojáninye ora, chentša entsangbiamá tojánenobošachna. <sup>42</sup> Y mēntšá tojánayana: “¡Malaye šmēntsetátsēmo, nye mo mēnténaca, ndayá yojtseita tsēngaftangbeñe lempe tsábá chaotsomñama! Pero mora chē soye tsēngaftangbe bominýama entsēitēmena. <sup>43</sup> Er Jerusalenoca bacna tenga echanjóshjango; chora uayayēnga chentša shēconánējana canye tapiēse mochantsepórma, mochantsejētja y nyetsca juachoicana mochanjontsé tsēngaftanga jtsatsejana, <sup>44</sup> y lempe mochantsepochoa. Muentša oyenēnga mochantsebaye, y ni mo canye ndētsbé inyebé juatsboca quemochaiseboshjona, chē Bēngbe Bētsá tsēngaftanga játsebacama tojabo ora, ndoñe chešmatoyeuná causa ca” —Jesús tojánayana.

*Jesús, Bēngbe Bētsabe bēts yebnentsana enēnga y obuámnayēnga tojtanébuacna*  
(Mt 21.12-17; Mc 11.15-19; Jn 2.13-22)

<sup>45</sup> Chentšana, Bēngbe Bētsabe bēts yebnoye Jesús tojánamashēngo y tojanontsé chē chentše imojtsenēnga chentšana jtēbuacnana, <sup>46</sup> y tojanéyana: “Bēngbe Bētsá chabe uabemana palabrenguiñe tojayana: ‘Atšbe bēts yebna echántsemna átšeftaca encuéntaye yebna ca’, pero tsēngaftangna, atbēbanēngbe oyeñiñe chē yebna šmojtsebema ca.”

<sup>47</sup> Y cada te, Bēngbe Bētsabe bēts yebnentsē Jesús entsānga yojtsabuátambaye; y bachnangbe amēndayēnga, ley abuátambayēnga y chē pueblentša mandayēngnaca imojtsenguaye ntšamo jamēse cha jóbana. <sup>48</sup> Pero ndoñe tmonjáninýena ntšamo, er nyetsca entsānga corente imojtseyeunana ntšamo cha yojtsoyebuambnacá.

## 20

*Jesusbe obenana*  
(Mt 21.23-27; Mc 11.27-33)

<sup>1</sup> Canye te, Bēngbe Bētsabe bēts yebnentsē Jesús yojtsabuátambaye, y chē tsabe noticiēngama yojtsabuayiná ora, tmojánashjajna bachnangbe amēndayēnga, ley abuátambayēnga, judiēngbeñe bētsējemēngcá mandayēngaftaca cānyñe; <sup>2</sup> y Jesús tmojaninyana: —Sméyana; ¿ndaye deréchoca chē contsama soyēnga aca cojtsama ca? o ¿chca jtsamama nda obenana tcmēnjatsetá ca?

<sup>3</sup> Chora Jesús tojanéjua: —Atšnaca canye soye sēntsebonna tsēngaftanga jatjayama. Smochjojuanga. <sup>4</sup> ¿Nda Juan chē Ubayaná tbojanichmó entsānga jubáyama, Bēngbe Bētsá o entsānga ca?

<sup>5</sup> Chora chēnga tmojanontsé enatsētsnayana: “ ‘Bēngbe Bētsá ca’ chamojuuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’ <sup>6</sup> Y ndoñe quemuátobena jayanana ‘entsānga ca’; entsānga ndētsbéngaca buattsēbaye, er nyetscanga becá mondējuabná Juan ndegombre Bēngbe Bētsabe juabna oyeubuambnayá yojamnama.” <sup>7</sup> Chcasna, chēnga tmojanjuá ndoñe monjántatsēmo nda Juan tbojanichmó entsānga jubáyama ca.

<sup>8</sup> Y Jesús tojanéyana: —Asna atše cach ndoñe quechochatéyana ndaye deréchoca chca stsama ca.

*Chē puerte bacna trabájayēngbiamá cuento*  
(Mt 21.33-44; Mc 12.1-11)

<sup>9</sup> Chentšana Jesús tojanontsé entsānga jáuyanana, y quem cuéntoca tojanabuatambá: “Canye entsá uvas betiyēnga yojáje y chē fshantse inye trabájayēnga yojyúentsame, y baytescama bēn luaroye yojtsoñe. <sup>10</sup> Chē uvasēsangá juashacama tempo yojobuache orna, chē jajañe nduiño canye oservená ibojíchmua chē trabájayēnga jáuyanama ntsachetšá cha ibojtsotocánama. Pero chēngna cha imojtsejantsetaye, y tondaye ntoyiyá imojtichmuá. <sup>11</sup> Chentšana inya ibojíchmua; pero chē trabájayēnga cha imojtsejantsetaye, imojtsóyenguango, y tondaye ntoyiyá imojtichmuá. <sup>12</sup> Chē nduiño inya ibojatichmuá; pero chánaca chēnga imojtsejantsetaye, imojtselisia, y chentšana imojtábocna.

<sup>13</sup> “Chora chē nduiño yojeniyana: ‘¿Y mora ntšamo chjama ca? Catchšbe bonshana uaquiñá chanjíchmuá; nderádose cha aiñe mochanjóyeunaye ca.’ <sup>14</sup> Pero chē trabájayēnga, chē uaquiñá imojinye orna imojeniyana: ‘Mua chē fshantse nduiñbe uaquiñá entsemna. Lempe chabe soyēnga mua echanjóyēngacñe; motsóbanga y nyetsca chabe otocana soyēnga bēngbiamá echanjóquédá ca.’ <sup>15</sup> Chcasna, chē uvas jajañentšana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chē jajañe nduiño chē trabájayēngaftaca yochjama ca? <sup>16</sup> Cha co echanjá y chē trabájayēnga echanjatsēbaye, y chē uvas betiyēnga jajañe inye trabájayēnga echanjárrendaye ca.



Chë entsanga chca tmojanuena ora, tmojánayana: —¿Bëngaftaca ndocna te chca chaondopasá ca!

<sup>17</sup> Pero Jesús tojanënyané y tojánayana: —As ¿ndayama Bëngbe Bëtsabe uabemana palabrënguine iuayana?:

Chë yebna jebuanënga tmojtsanaboté ndëtsbé,

mora chë más bëts uashacuanësentse ente sjáona ca.

<sup>18</sup> Ndánaca chë ndëtsbéne chaojotsatsá, chëbé bochántsatcacaye; y chë ndëtsbé ndábeñnaca chaojotsatsé, polvëshe bochántsebema ca —Jesús tojánayana.

<sup>19</sup> Chë bachnangbe amëndayënga y ley abuatambayënga tmojanenótatsëmbona Jesús chca tojanacuntá jinýanyíyama, chënga mo chë puerte bacna trabajayëngcá imojamnama; asna tmojánbošena cachora jishachana, pero entsangbiana imojtsauatja.

*Chë Romoca bëts mandadbiama impuesto jtsatsquëcñayama  
(Mt 22.15-22; Mc 12.13-17)*

<sup>20</sup> Chentšana chënga báseftanga tmojanichamó, mo ndegombre tšabe entsanga cuaftsemnécá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama. <sup>21</sup> As chënga tmojantjá: —Buatëmbayá, bënga fsëntsetatšëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y achbiana tondaye quenatámana nda más uamaná o nduamaná tomnana. Aca contsabuatambá ndegombre tšabe vida jtsebonnama, ntšamo Bëngbe Bëtsá yomandacá. <sup>22</sup> Chcasna, šmëyana, ¿tšabá tayojtsemna bënga, César, chë Romoca bëts mandadbiama, impuesto jtsatsquëcñayana o ndoñe ca?

<sup>23</sup> Jesús yojtsetatšëmbo, ntšamo cha tojayaniñe jisháchichiyama chënga imojtsebošama; as tojanëyana: <sup>24</sup> —Chë šmatsquëcñá crocénana šminýinyënga ca; ¿ndabe jubíá chë crocénániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubíá; cha chca enduabaina ca.

<sup>25</sup> Y Jesús tojanëyana: —César šmochtöyie cha ibotocana soye; y Bëngbe Bëtsana cha ibotocana soye ca.

<sup>26</sup> Y chca, chë ichmónënga ndoñe imonjobenaye jisháchichiyana, ndayá cha entsangbe delante tojayaniñe. Masna, ntšamo tojanëjuama, ojanánënga iytëca imojobiama.

*Obanënga jtayenama Jesús tmojantjá  
(Mt 22.23-33; Mc 12.18-27)*

<sup>27</sup> Chentšana, báseftanga saduceo ca uabaina entsanga tmojána Jesús jinýama. Chënga imojanjuabná obanënga ndocna te ntayenana ca. Jesús mëntšá tmojantjá: <sup>28</sup> —Buatëmbayá, Moisés bëngbe leyënguine tojëftsanabema, nderado canýe boyá tojtsóbana y básenga ndoñe tonjëftsabáshejuanëšna, canmëna chë uabentsá chë shëmaftaca jtobouamayana, chca, chë chabe uabochená obanabiana básenga jtsabamnama ca. <sup>29</sup> Chcace, canýe bëngbentše canýsëfta catšátanga monjamna. Chë natsaná tonjanobouamá y tonsanóbana, básenga ntjëftsabashejuancá; <sup>30</sup> chentšana chë inýa chë shëmaftaca tonjanobouamá, y cachcá tonjanopasá. <sup>31</sup> Chë inýe uabentsá chora cháftaca tonjanobouamá, pero tontsanóbana básenga ntjëftsabashejuancá; y cachcá, chë inýe uabentsëngnaca cháftaca tmonjanobouamá, pero nyetscanga tmonjanóbana básenga ntjëftsabashejuancá. <sup>32</sup> Cabana, chë shembásanaca tontsanóbana. <sup>33</sup> Y chcasna, chë obanënga chamojtayena ora, ¿ndabe chë canýsëfta catšatanguentsabe shema chë shembása yochtsemna, nyetscanga cháftaca tmonjanobouamase ca? —chënga tmojantjá.

<sup>34</sup> Chora Jesús tojanëyana: —Quem luarentše boyabásenga y shembásenga mondbëtsobouamnaye; <sup>35</sup> pero chë echanjóshjango luaroye jama y obanënguentsana jtayenama mercedo jtsebuájona chamojobenangna, masque boyabásenga o shembásenga, ya ndoñe quemochatóbouamnaye, <sup>36</sup> ni queochátotodena chënga chamóbanama, y chca, chënga mochántsemna mo angelëngcá, y Bëngbe Bëtsabe básenga mochántsemna, obanënguentsana mochtayénayeca. <sup>37</sup> Y Moiséšnaca, chë yojtsángbototjuana betiyetémama tojanábementše, bënga šontsinýáná chë obanënga imnátayenama; chentše Bëngbe Bëtsá tojánayana cha yomna Abraham, Isaac y Jacobëbe Bëtsá ca. <sup>38</sup> Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

<sup>39</sup> Chora básefta ley abuatambayënga Jesús tmojanianyana: —Buatëmbayá, tšabá tcjayana ca.

<sup>40</sup> Y ya ndoñe más montsenñëmua inýe soyëngama jatstjanayana.

*¿Cristo ndabe entsábentšana yomna?  
(Mt 22.41-46; Mc 12.35-37)*

<sup>41</sup> Jesús tojanatjá: “¿Ndáyeca tséngaftanga šmnétsichamo chë Uámana Uabuayaná, chë Cristo, Rey Davidbentsana iuabó ca? <sup>42</sup> Er cach David, chabe librësañe Salmos ca uabainësañe, tojánayana:

Bëngbe Bëtsá, atšbe Utabná Crístbioye tbojanayana:

‘Atšbe catšbioica mótbema,

<sup>43</sup> atšbe obenánaca, acbe uayayënga acbe cucuatšifne chamoquedama chjaméntscuana ca.’

<sup>44</sup> ¿Ntšámoše, Cristo, Davidbentsana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

*Jesús chë ley abuatambayëngbiana tojánayana chënga ndoñe tšabá montsama ca*  
(Mt 23.1-36; Mc 12.38-40; Lc 11.37-54)

<sup>45</sup> Nýetsca entšanga imojtsuenana, y Jesús chabe uatsjëndayënga tojanëyana: <sup>46</sup> “Cuedado šmochtsebmna, y ndoñe šmattsama chë ley abuatambayëngcá; chënga jtsogusetánana bënëna entšayangaca jtsajnana, y jtsebošana tsáshenañe entšanga beca respétoca chamotsacheuanayama. Chënga chë judiëngbe enefjuana yebnënguenache chë más uámana luarënguifne jtsetbiámanana, y fiestënguifne nya quëferoca. <sup>47</sup> Pero chë viudángbioye chë tmbomna soyënga jtsabacayana; y entšangbe delante tšabá chacmotsënyama y chënga imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá inyëngbiana más chënga echanjácastigaye ca” —Jesús tojánayana.

## 21

*Jesús yojtsënyaye chë crocémana quëcjnayënga*  
(Mc 12.41-44)

<sup>1</sup> Bëngbe Bëtsabe bëts yebnentšë, Jesús yojtsënyaye chë bomnënga crocémana jtse-  
quëcjnyana chë crocémana quëcjnyatëmiñe; <sup>2</sup> y canye viudá ndbomnjëmnaca tbojáninye,  
uta crocémana chëtemiñe yojaftsesegóra. <sup>3</sup> Chora Jesús tojánayana: “Ndegombre chëyana,  
quem viudá ndbomnjëjema, Bëngbe Bëtsabiama nýetscangbiana más beca tonjëftsesegorá;  
<sup>4</sup> er nýetscanga tmonjëftsesegorá chë yojtsóyentsjamentšana, pero chana, masque tša nd-  
bomnjëjema, cha vida jtsebomnana lempe ntsachetsá yobomncá tonjëftsesegorá ca.”

*Jesús tojánayana Bëngbe Bëtsabe bëts yebna lempe mochjánpochocama*  
(Mt 24.1-2; Mc 13.1-2)

<sup>5</sup> Bãseftanga imojtsichamo chë Bëngbe Bëtsabe bëts yebnama, tša yojtsebotamanana  
puerte uámana ndëtsbéngaca y chë entšanga imojanamana juambana Bëngbe Bëtsábioye  
uátšëmbona soyëngaca ca. As Jesús tojánayana: <sup>6</sup> —Canye tempo echanjójshjango, y lempe  
ntšamo mora muentšë šmontsonýacá tondaye queochatoquëda, ni mo canye ndëtsbé inyëbé  
juatšbioye. Lempe mochantsëpochóca ca.

*Ntšamo yochtsemna quem luare jopochócamate chaajtšobeco ora*  
(Mt 24.3-28; Mc 13.3-23)

<sup>7</sup> Chora chënga tmojantjá: —Buatëmbayá, ¿ntseco chca yochjopása? ¿Y ndayá Bëngbe Bëtsá  
yochjama, chca jopásama yojtšobecuama entšanga chamotsetatšëmbuama ca?

<sup>8</sup> Y Jesús tojánayana: —Cuedado šmochtsebmna nodcná chacmondáingñema. Er banga  
mochanjabo y mochantsabíchamo chënga atšë imomna ca. Mochántšichamo: “Atšë chë  
Cristo sëndmëna”, y “Mora chë tempo entsemna ca”. Pero ndoñe šmatjóyaunaye. <sup>9</sup> Y  
tséngaftanga, entšanga imojtsentsjanama y entšanga mandadëngbe contra imojtsennama  
chašmojtsuenana ora, ndoñe šmattsauatja, er entseyta natsana chë soyënga chaochnëngo;  
pero masque chca, chë quem luare jopochócamate tempo cabá ndoñe queochátsmëna ca.

<sup>10</sup> Y mëntšánaca Jesús tojanëyana: “Canye luarentša entšanga, inye luaroca  
entšangaftaca mochántšentsjanaye; y canye amëndayábentša entšanga, inye amëndayábioica  
entšangaftácnaca. <sup>11</sup> Ba luarënguifne jabuache echanjuangmëmana, bëts shëntsana, y  
entšanga pochóccaye šocanënga echanjójshjango; y celoca echántsemna puerta uabouana  
soyënga y bëts soyënga, entšanga jinýanýiyama quem luare ya yochtopochócamate.

<sup>12</sup> “Pero cabá ndoñe chca chaodochnëngo ora, tséngaftanga cmochanjíshëche y  
chašmosufrima mochántšama; bënga judiëngbe enefjuana yebnëngoye cmochanjuntatse  
játsetšenama y cárceloyncaca cmochanjútame, y reyënga y mandadëngbióynaca  
cmochanjuntatse, atšbe ústonënga bëtsemna causa. <sup>13</sup> Chca šmochanjapása, ntšamo  
atšbiana šmotatšëmbcá chënga chašmëyanama. <sup>14</sup> Natsana ndoñe šmatjåtšjuabnaye  
jenëuyana ntsamo chora jóyebuambayana, <sup>15</sup> er atšë chanjama puerta tšabá y  
osertanáncaca tséngaftanga chašmóyebuambama; y chca, tséngaftangbe uayayënga ndoñe  
quemochatobenaye jayanana ndoñe tšabá šmontsichamo ca, y ndocá jojuama  
quemochatobenaye. <sup>16</sup> Pero uayayëngbe cucuatšifne cmochanjábashejuana cach  
tséngaftangbe bëtsétsanga, catšátanga, pamillanga y amiguënga; y tséngaftanguentšana

báseftanga cmochantsëbaye. <sup>17</sup> Y nÿetsca entsãnga cmochantsëbuayënja, atšbe ústónënga bêtsemma causa. <sup>18</sup> Pero tsëngaftangbe bestšasentsãna ni mo canÿe stjënëja quecmochátabajajo. <sup>19</sup> Tsëngaftanga nÿets tempo átšbeñe ošbuáchiyënga chašmojtsemnëse, chë nÿetsca tescama yomna tsãbe vida šmochãntsebmoma ca.

<sup>20</sup> “Jerusalén nÿets šhëconana soldadënga chašmojanÿe ora, šmochtsetãtsëmbo Jerusalén jopochócama tojobuáchama. <sup>21</sup> Chorna, chë Judeoca oyenënga batsjabengoye chamot-sacheta; Jerusalemntše chamojtsemnënga, chentšana chamuaisebocana; y chë ja-jenache chamojtsemnënga, Jerusalemoye ndoñe chamondésamashjina. <sup>22</sup> Er chora echãntsemna chë entsãngbe jabuache castigo; lempe ntšamo Bëngbe Bëtsabe uabe-mana palabrénguiñe endayaná chora echanjochñëngo. <sup>23</sup> ¡Tša lastema chë tempo shembásenga ngomámanëngbiama o ochóchaye básenga chamojtsabamnëngbiama! Er chora corente ngmënanana quem luarentše echãntsemna, y quem luarentša entsãngbiama chë uabouana castigo. <sup>24</sup> Inÿenga espadëjaca mochanjóbana, y inÿengbiyoye nÿetsca luarënguëjana utámënënga mochanjunatse; y chë ndoñe judiënga, Jerusalemoca entsãngbiyoye mochãntsatsëjaye y mochantsëbaye, chca chaotsemnama Bëngbe Bëtsá tojalesenciantscuana ca” —Jesús tojánayana.

*Bëngbe Bëtsá Entšá tbojanbemá quem luaroye echanjësabo  
(Mt 24.29-35, 42-44; Mc 13.24-37)*

<sup>25</sup> Mëntsãnaca Jesús tojánayana: “Chora bêts soyënga echantsinÿna shinÿiñe, juashconiñe y estrellënguëñe; y quem luarentša entsãnga tša mochãntsausatja, ndayá jamama ntsetatšëmbcá, chë mar béjaye y olëshënga corente echantsefshauenana causa. <sup>26</sup> Entšanga echantsabuátëcja tša auatja causa y ndayá quem luaríñe yochjopásama enócochinÿena causa; er chë quem luarentša tsbanánoca espírituënga obenana bomnënga echanjãngmëmana. <sup>27</sup> Y chora entsãnga mochanjinÿe, chë Bëngbe Bëtsá Entšá tbojanbemá jantšëtsëñiñe echãntsaboye, puerte obenánaca y corente buashinÿinÿaniñe. <sup>28</sup> Chë soyënga jochñënguama chaojobjatšë ora, añemo šmochjentsetaye y bestšase játsbanase šmochjarrepára, er chora echãntsemna chë tsëngaftangbe atsebacyana ca” —Jesús tojánayana.

<sup>29</sup> Mëntsãnaca Jesús tojánëyana jabuátambama: “Šmochjinÿe canÿe higo betiye o ndaye inÿe betíynaca. <sup>30</sup> Tojtsaisëjotsanama šmojinÿe ora, jtsëtatšëmbuana chë tsãbe tempo ya yojtsaisobecuama. <sup>31</sup> Cachcá, chë soyënga yojtsëchnëjuyanama chašmojinÿe ora, šmochtsetãtsëmbo chë Bëngbe Bëtsabe amëndayana ya yojtsobecuama.

<sup>32</sup> “Ndegombre chëyana, lempe chca echanjochñëngo, morsca entsãnga cabá ndóbana ora. <sup>33</sup> Celoca y quem luare echanjopochóca, pero atšbe palabra ndocna te queochaisopochóca.

<sup>34-35</sup> “Cuedado šmochtsebmoma y ndoñe šmatjaleséncia tsëngaftangbe ainaa bacna juabnëngaca chaotsemnama, jenomándama ntsoyencá mocá enobuena causa, tmoye causa y nÿe quem luarentša soyëngama enócochinÿena causa; y tsëngaftanga prontánënga šmochtsemna, nÿe ndeolpe chë te chaojbuache ora; y tsëngaftanga ndëprontánënga ndoñe chašmondëtsemna, mo tsëngaftangbiama canÿe uachmaniñe cuaftsemncá. Er nÿetsca quem luarentša entsãngbiama chca echãntsemna. <sup>36</sup> Cuedado šmochtsebmoma y yejuana šmochtsantješna; nÿe ntseco órnaca Bëngbe Bëtsáftaca šmochtsencuëntaye, chca, chë echanjopása soyëngama jótsbocama chašmobenama, y chë Bëngbe Bëtsá Entšá tbojanbemabe delante jashjanguama ca” —Jesús tojánëyana.

<sup>37</sup> Jesús, bnëté Bëngbe Bëtsabe bêts yebnentše yojánabuatambaye, y ibetna, Olivos uabaina tjashoye yojánaye joquédama. <sup>38</sup> Y nÿetsca entsãnga cabá cachëse Bëngbe Bëtsabe bêts yebnoye imojánajna Jesús joyeunayama.

## 22

*Entšanga tmojanjuabó ntšamo jamëse Jesúsbiyoye jishachama  
(Mt 26.1-5, 14-16; Mc 14.1-2, 10-11; Jn 11.45-53)*

<sup>1</sup> Ya yojëtsobeco Bashco fiesta, chë levadúraca ndëpormana tandëse saye fiesta, chë Bëngbe Bëtsá Egiptocana judiëngbe bêts taitanga tojánatsebacama jtenójuaboyama. <sup>2</sup> Chë bachnangbe amëndayënga y ley abuátambayënga imojtsenguaye ntšamo jamëse Jesús jóbana, pero entsãngbiama imojtsauatja.

<sup>3</sup> Chora Satanás, Judas chë Iscariote ca uabobuatmabe ainaniñe bacna juabnënga tojan-jajó. Chánaca yojamna chë bnëtëna uta uatsjendayënguentsá; <sup>4</sup> y tojáná, chë bachnangbe amëndayënga y Bëngbe Bëtsabe bêts yebnoca soldadëngbe amëndayëngaftaca jencuëntama, ntšamo Jesús chëngbe cucuatšëñe jayentšbáshejuanama. <sup>5</sup> As chënga imojóyejuaye, y Judas tmojanšbuachená crocënanana chama jtatšëyana. <sup>6</sup> Y Júdasna añe ca tojánayana; y cach orscana cha yojtsenguaye ntšamo jamana y ndëmua ora Jesús chëngbiyoye jayentšbáshejuanama, ndocna entsãnga ora.

*Jesús chabe uatsjédayëngaftaca Bashco saná tojanse*  
(Mt 26.17-29; Mc 14.12-25; Jn 13.21-30; 1 Co 11.23-26)

<sup>7</sup> Chê Bashco fiesta ora tojanóshjango, chë levadúraca ndëpormana tandëse sayté; chë te yojamna, Bëngbe Bëtsá jëtschuayamna canyë oveshá jóbana chora jasama. <sup>8</sup> As Jesús, Pedro y Juánbioye tojanëyana: —Motsata y saná šochjaprónta Bashco fiestama bënga mochjasama ca.

<sup>9</sup> Chora chata tbojantjá: —¿Ndémoca cojtseboše chë saná fchjapróntama ca?

<sup>10</sup> Y Jesús tojanëjua: —Jerusalentše chašojámashëngo ora, canyë bacó cmochanjóbiatše, matbajiñe búyeshe echantsabuyambaye. Cha šochjuasto, y šochtsonyaye ndëmuanýe yebntše cha yochjámashënguama; <sup>11</sup> y chentša nduiño šochjauyana: “Chë Buatëmbayá šonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjédayëngaftaca jasama ca?’ ” <sup>12</sup> As cha cmochanjínýanýe canyë bëts tsañe, tsbanana pisoca; ya lempe echántseprontana, y chentše, Bashco fiestama saná šochjaprónta ca.

<sup>13</sup> As chë útata tbojáná, y tbojáninýena lempe ntšamo Jesús tojanëyancá, y chentše chë Bashco saná tbojanprontata.

<sup>14</sup> Jasama tojanobuache ora, Jesús mesëshentše tojanótbema chabe uatsjédayëngaftaca, chë cachënga más chcoye chabe ichmónënga ca uabáinënga. <sup>15</sup> Chora Jesús tojanëyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufri ora. <sup>16</sup> Muentšana ndoñe más quemëntša saná quichaisese, Bëngbe Bëtsabe amëndayana candóshjanguëntscuana. Chora echantsótatsëmbo ntšamo quem fiesta ndegombre iuayancá ca.”

<sup>17</sup> Chorna canyë coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfsënga; y cbëyana, <sup>18</sup> chë uvas betiyentša shajuanentšana obocniye ndoñe más quichaisofsiye, Bëngbe Bëtsabe amëndayana candóshjanguëntscuana ca.”

<sup>19</sup> Chentšana, tandëse tojanca y Bëngbe Bëtsábioye tbojtanchuá; tojanjatá, tojanatsatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiama jtenójuaboyama ca.”

<sup>20</sup> Tmojansentšana, chë coptémaca tojanma cachcá ntšamo chë tandëseca tojanmcá y mëntšá tojánayana: “Quem coptema vínoye entsemna chë Bëngbe Bëtsabe tsëmtrato entšangaftaca. Atšbe buiñe echanjuábuashana, tšëngaftanga chašmotsetatsëmbuama ntšamo Bëngbe Bëtsá entšanga tojanašebuachenacá ndegombre yochjochnënguama. Chë buiñe tšëngaftangbe tšabiama echanjuábuashana. <sup>21</sup> Pero chë uayayëngbe cucuatšifñe šochjaboshjoná, mesëshentše átšeftaca entsemna. <sup>22</sup> Ndegombre, chë Bëngbe Bëtsá Entšá tbojanbemáftaca echanjopása, ntšamo Bëngbe Bëtsá chabiama tojanjuabocá. ¡Pero tša lastema chë hochjáboshjonabiama ca!” —Jesús tojánayana.

<sup>23</sup> Chorna chë uatsjédayënga tmojanontšë entjanayana, chënguentšá nda chë boshjuaná bëtsemnana.

*Nda chë más uamaná yomna*

<sup>24</sup> Chë uatsjédayënga imojtsenatsëtsnaye chënguentšá nda chë más uamaná bëtsemnana. <sup>25</sup> As Jesús tojanëyana: “Chë ndoñe judiëngbeñe, chë reyënga chëngbe entšangbioye nýe ntšámna jtsamëndayana, y chentša amëndayënga jtsamana, entšanga chëngbioye tšabe soye amënga ca chamotsëbobuátmama. <sup>26</sup> Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá. <sup>27</sup> Er, ¿ndase chë más uamaná yomna, chë mesëshentše jasama tojotbemá o chë uajuatšnáyá? Ndegombre co chë mesëshentše tojotbemá; pero atšna tšëngaftangbeñe sëntsemna mo chë oservenacá.

<sup>28</sup> “Atšbe padecéniñe tšëngaftanga sempre átšeftaca šmondëtsemna. <sup>29</sup> Chíyeca, atšbe bariëna, canyë amëndayana cbochanjatsataye, ntšamo atšbe taitá canyë amëndayana sojatštacá; <sup>30</sup> chca, atšbe amëndayoca mesëshentše átšeftaca šmochanjase y šmochanjofsiye, y uamana tbemaniñe mo reyëngcá šmochanjotbiama, chë Israeloca bnëtsana uta pamíllanga entšangbiama chašmuayanama tšabá o ndoñe tšabá chënga tmonjamama ca” —Jesús tojánayana.

*Jesús tojánayana, chábioye ndoñe bonjanabuátmca Pedro yochjánayana*  
(Mt 26.31-35; Mc 14.27-31; Jn 13.36-38)

<sup>31</sup> Jesús mëntšánaca tojánayana: —Simón, Simón; cochtsetatsëmbo, Satanás obenana tonjotjañe tšëngaftangaftaca nýe ntšámna jamama, mo chë trigo matënga tcojtsashatiyëncá; <sup>32</sup> pero atšna Bëngbe Bëtsá sënjaimpadá, átšbeñe ošbuáchiyana ndoñe chacmondëtsebuáshbenama. Y aca, nýets ošbuáchiyana átšbeñe chacojtsatsbomna ora, chë inýe ošbuáchiyënga cochjájabuache átšbeñe sempre chamotsošbuáchemca ca.

<sup>33</sup> Chora Simón tbojaniana: —Bëngbe Utabná, atše sëntseprontana ácaftaca cárceloje jámnaca y jobanámnaca ca.

<sup>34</sup> Y Jesús tbojaniana: —Pedro, atše cbëyana, cam ibeta bínjanoye, ngallo cabá ndécanta ora, aca unga soye cochanjayana ndoñe šconduabuátma ca.

*Chë más jabuache ora yojtsobeco*

<sup>35</sup> Chentšana Jesús tojanatjá: —¿Chë ni shecnájaca, ni crocenánaca, ni shecochëtjonësheca tcbonjanichamó ora, nderado ndayá tmojanabuáshebena ca?

Y chënga tmojanjuá: —Tondaye ca.

<sup>36</sup> Chora tojanéyana: —Mora ndoñe chca; shecnaja tobomná, chëja chauesocñe y crocenánama shecnëbénaca; y nda ndoñe espadëja tondbomna, chabe quëfsaiya chaot-satábuiye y canýe espadëja chauatobuamiñe. <sup>37</sup> Er cbëyana, entseyta átšeftaca chaopasá, ntšamo Bëngbe Bëtsabe uabemana palabrënguñe atšbiana iuayancá, mëntšá: “Y chábioye tmonjáninýe mo chë puerte bacna soye amënguentšá canýa cuaftsemncá ca.” Y lempe ntšamo atšbiana iuabemancá, mora ya echanjochñengo ca —Jesús tojanéyana.

<sup>38</sup> As chënga tmojaniana: —Bëngbe Utabná, muentše uta espadëja entsemna ca.

Y japochoçamna cha tojanayana: —Nýe nýetšá ponto ca.

*Getsemani luarentše, Jesús Bëngbe Bëtsáftaca tbojanencuentá*

*(Mt 26.36-46; Mc 14.32-42)*

<sup>39</sup> Chentšana, Jesús tojánbocna y ntšamo yojanamancá Olivos tjšashoye tojána, y chabe uatsjëndayënga tmojanasto. <sup>40</sup> Choca tmojánashjajna ora, Jesús tojanéyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

<sup>41</sup> Y chë uatsjëndayëngbentsana yojoluára, mo canýe ndëtsbé jutšenëntscoca nýetšá, y yojoshëntsamentšiyë Bëngbe Bëtsáftaca jencuëntama. <sup>42</sup> Jesús mëntšá tojánayana: “Taita, aca tcojtsebošëse, moma atše ndoñe chašondëtsemna chca jasúfria. Pero ntšamo atše stsebošá ndoñe chaondëtsemna, sinó ntšamo aca cojtsebošá ca.”

<sup>43</sup> Chca orna celocana canýe ángel tbojánebëbocna, añemo chaotsebomnama juajabuáchama. <sup>44</sup> Jesús tša ngmëniñe yojtsemna, y Bëngbe Bëtsáftaca más ibojtsencuëntaye. Y chabe bosese yojtsemna mo fshantsiñe buiñe cuaftsebuastëtjuancá.

<sup>45</sup> Bëngbe Bëtsáftaca jencuëntama tojanpochocá ora, tojtantsbaná y chabe uatsjëndayënga imojtsemnoye tojána; y chënga imnëtsomañe, tša ngmënacá imojtsemna causa. <sup>46</sup> Chora tojanéyana: “¿Ndáyeca šmotsomañe? Motsbananga y Bëngbe Bëtsá šmochtseimpadana, bacna soye jamama ndoñe chacmondócochënguama ca.”

*Uayayënga Jesús tmojánishache*

*(Mt 26.47-56; Mc 14.43-50; Jn 18.2-11)*

<sup>47</sup> Jesús cabá yojtsóyebuambnantscuana, ba entšanga chentše tmojánashjajna. Chë Judas ca uabainá, canýa chë bnëtsana uta uatsjëndayënguentšá, chë entšangbe natsana yojtsaye. Cha yojobeconá Jesús juamóchama; <sup>48</sup> pero Jesús tbojaniana: “Judas, ¿canýe juamochëse chë Bëngbe Bëtsá Entšá tbojanbemá uayayëngbe cucuatšñe cochjaboshjona ca?”

<sup>49</sup> Chë Jesúseftaca imojtsemnënga tmojáninýe ntšamo chora yochjanopásama; as tmojaniana: —Bëngbe Utabná, ¿espadëjaca fšcotsatsejaye ca?

<sup>50</sup> Y canýa chënguentšá, chë bachnangbe más uámana amëndayabe bochichnayábioye catšbioica matscuase tbojtsantëtše, y tbojtsanëštjango. <sup>51</sup> Chora Jesús tojanéyana: —Cachá monýá; nýe nýetšá ponto ca.

Y chë bochichnayábioye chë matscuase tbojánbojajo y tbojanshná. <sup>52</sup> Chentšana, chë bachnangbe amëndayënga, chë Bëngbe Bëtsabe bëts yebnentšá soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanéyana: “¿Ndáyeca espadëjanga y ngarotbëngaca šmojabo atše jishachama, mo atše canýe bacá uamana entšá cuaftsemncá ca? <sup>53</sup> Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmátanbojajo. Pero ora toçjobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemándaye ca” —Jesús tojanéyana.

*Pedro tojánayana Jesúsbioye ndoñe bonjanabuátma ca*

*(Mt 26.57-58, 69-75; Mc 14.53-54, 66-72; Jn 18.12-18, 25-27)*

<sup>54</sup> Chentšana Jesús tmojánishache, y chë bachnangbe más uámana amëndayabe yebnoye tmojanánatse. Y Pedro bënëcana ibojtsëstona. <sup>55</sup> Choca, chashja tsëntsaca, canýe iñeshe tmojanangbotjó y entšanga chë shëconana imojtsetbiámama; y Pédrënacá chentše chëngaftaca yojótbema. <sup>56</sup> Chora, canýe shembása chentša oservená, Pédrëbioye tbojáninýe chë iñe juachaca yojtsetbemana; tbojanonýinýe y tojánayana: —Muánaca cháftaca endánmëna ca.

<sup>57</sup> Pero Pedro ndoñe ca tojánayana, y chë shembásabioye mëntšá tbojaniana: —Sobrená, atše cha ndoñe quetsatabuatma ca.

<sup>58</sup> Ndoñe yapa bën y inña chábioye tbojataninnye y tbojanianyana: —Acnaca chë uatsjendayënguentsá condmëna ca.

Pero Pedro tbojanjá: —Bacó, atše ndoñe quetsátsmëna ca.

<sup>59</sup> Chentša benëntscosna, inña más yojátayana: —Ndegombre, muánaca cháftaca enjánana; muánaca Galileocá entsemna ca.

<sup>60</sup> Y Pedro tojánayana: —Bacó, ndayama cojtsichámuama ndoñe quetsátstátsëmbo ca.

Cachora, y Pedro cabá vojtsóyebuambnantscuana, canye ngallo yojacánta. <sup>61</sup> Chora Bëngbe Utabná yojobuértana y Pédrëbioye tbojanonýinýe; y Pedro chora yojenójuaboye ntšamo Bëngbe Utabná tbojanianama: “Cam ibeta bínýanoye, ngallo cabá ndécánta ora, aca unga soye cochanjayana ndoñe šconduabuatma ca.” <sup>62</sup> As Pedro shjoye tojánbocna, y corente ngmënaca yojtsenóbošachna.

*Jesús imojtsáboyejuana*  
(Mt 26.67-68; Mc 14.65)

<sup>63</sup> Chë Jesús imojtsebojanjá entsanga cha imojtsáboyejuana y imojtsejantšetaye; <sup>64</sup> y jtsabuchëntsacjuse, imojtsetjanaye: “¡Momalisiá, nda tcmënjantšetá ca!” <sup>65</sup> Y imojtsóyenguaye, nye mocá soyënga jtsatsëtsnayëse.

*Jesús, chë judiëngbe uámana mándayëngbe delante*  
(Mt 26.59-66; Mc 14.55-64; Jn 18.19-24)

<sup>66</sup> Tojanbinýna ora, chë bëtsëjemëngcá amëndayënga, bachnangbe amëndayënga y ley abuátambayënga tmojanenefjna, y chëngbioye Jesús tmojanánatse. Choca tmojantjá: <sup>67</sup> —Sméyana, žaca Bëngbe Bëtsabe Uámana Uabuayaná, chë Cristo comna ca?

Y Jesús tojanéjua: —Añe ca tbojáuyanëse, tšëngaftanga chama átšbeñe ndoñe quešmochatošbuáchiye. <sup>68</sup> Y nderado tbojájatšasna, tšëngaftanga ndoñe quešmochatojuá ca. <sup>69</sup> Pero cam orscana, chë Bëngbe Bëtsá Entšá tbojanbemá, chë Bëngbe Bëtsá nyets obenana bomnabe catsbioica echántatsbemana ca.

<sup>70</sup> Chora nyetscanga tmojantjá: —¿As, aca chë Bëngbe Bëtsabe Uaquiñá comna ca?

Y Jesús tojanéjua: —Cach tšëngaftanga chca šmontsichamo; atše cha sëndmëna ca.

<sup>71</sup> As chora chënga tmojánayana: —¿Ndayama más entsanga šochjátëjaboto Jesusbe contra chamuayanama? Er cach bënga chabe uayásentsana chca tmojouena ca.

## 23

*Jesús, Pilatbe delante*  
(Mt 27.1-2, 11-14; Mc 15.1-5; Jn 18.28-38)

<sup>1</sup> Nyetsca mándayënga tmojëtsantsbaná, y Pilátbioye, chë Judeoca mandádbioye Jesús tmojanánatse. <sup>2</sup> Y chentše tmojanontšé cha mal jaquédana, mëntšá: —Bënga fsënjínýena mua entsabuatambá bacna soyënga, quem luarentša entsangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsatsquëcjnyana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canye reycá ca.

<sup>3</sup> Chora Pilato Jesúsbioye mëntšá tbojantjá: —¿Aca chë judiëngbe Rey cojtsemna ca?

Y Jesús tbojanjá: —Añe, aca ndegombre yomncá tcjayana ca.

<sup>4</sup> As Pilato, chë bachnangbe amëndayënga y entsanga tojanéyana: —Atše ni mo canye soye chiyátinýena, quem boyabása castiganá chaotsemnama jayanama ca.

<sup>5</sup> Pero chënga más tmojanáyebuachena: —Nyets Israel luarëjana entsabuatambá, Galilea entsangbe amëndayëngbe contra jtsemnama. Galilea luaroca chca tonjabojatšé y mora moca judeócnaca cachá entsama ca.

*Jesús Rey Heródesbe delante*

<sup>6</sup> As Pilato, Galilea luarama yojouena ora, tojanatjá Jesús Galileocá tayojamnama.

<sup>7</sup> Y Jesús añe Galileoca yojamnama cha tojántatsëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalenentše cha yojtsemna.

<sup>8</sup> Herodes Jesúsbioye tojáninýe ora, corente tojanoyejuá. Chana tempšana inaboše Jesús jinýama. Cha ba soyënga Jesusbiama tojanuena, y yojtseboše jinýama Jesús jamana canye bëts soye, Bëngbe Bëtsabe obenánaca. <sup>9</sup> Heródesna ba soyënga tbojantjá, pero cha ndocá tbojanjuá. <sup>10</sup> Y chëntšnaca, chë bachnangbe amëndayënga y judiëngbe ley abuátambayënga imojtsemna, y Jesús corente mal imojtsequédaye.

<sup>11</sup> Chora, Herodes y chabe soldadënga Jesúsbioye corente imojtsáboyënja, y jtsaboyejuanamna, botamana entsayangá tmojanichëtjo, mo canye reycá; chentšana cachiñe Pilátbioye tmojesanichmó. <sup>12</sup> Cach te Herodes y Pilato tbojtananatsëtsaye; tempna chata ibojenáyata.

*Jesusbiama chaóvana ca tmojánayana*  
(Mt 27.15-26; Mc 15.6-15; Jn 18.39-19.16)

<sup>13</sup> Chentšana Pilato, chë bachnangbe amëndayënga, chë pueblentša amëndayënga y nyëtca entšanga tojánachembo, <sup>14</sup> y mëntšá tojanéyana: —Tšëngaftanga quem entšá átsbioye šmojuánatse, mo bacna soye entšangbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiamna šmonjayana, pero atšna ni mo canye soye chiyátinýena, quem boyabása castiganá jtsemnna imojtsemna ca jayanama. <sup>15</sup> Herodes cach ndoñe, chíyeca cachiñe bëngbioye cha tbojesichmó. Quem boyabása ni mo canye ndoñe tonjobuachjanguá jóbanama chabotsemnna. <sup>16</sup> Chcasna, jabuache chamotsecastigá y chentšana chanjétsboshjona ca —cha tojánayana.

<sup>17</sup> Yojamna canye utamená jëtsboshjonana, ntšamo Bashco fiesta ora jamana imojanamancá. <sup>18</sup> Pero chora entšanga cánýiñe tmojanáyebuachena: —¡Jesús chaóbanal! ¡Barrabás matsboshjona ca!

<sup>19</sup> Barrabás inautámena, mandadëngbioye ndëtsayaunanama chë bëts pueblentše entšanga tojánenautanama y entšá óbanaye causa. <sup>20</sup> Pilato cachiñe tojánayana Jesúsbioye jëtsboshjonama yojtsanboše ca; <sup>21</sup> pero entšangna más tmojtétanayebuachena: —¡Motsecrucificá! ¡Motsecrucificá ca!

<sup>22</sup> Pilato ya unga soyama tojtétanayana: —¿Ntšamo bacna soye mua tojobuachjanguá ca? Ni mo canye bacna soye chiyátinýena, mua jóbanama chabotsemnna. Chcasna, chanjacastigá y chora chanjétsboshjona ca.

<sup>23</sup> Pero chëngna más imojtsechembuana Jesús chamotsecrucificama. Cabana, chë bachnangbe amëndayënga y chë entšangbe jabuache chembumbuanánaca, Pilato tmojanëyëñjaná Jesús chamóbama. <sup>24</sup> As Pilato tojanmandá ntšamo chë entšanga imojtsotjánañca chaotsemnna; <sup>25</sup> as chora Pilato, Barrabásbioye cachcá tbojtbanboshjona, chë nda inautámena mandadëngbioye ndëtsayaunanama entšangbioye tojánenautanama y entšá óbanaye causa. Y Jesusna entšangbe cucuatšíñe tbojánboshjona, ntšamo chënga tmojtsebošcá chamomama.

### *Jesús tmojanrucificá*

*(Mt 27.32-44; Mc 15.21-32; Jn 19.17-27)*

<sup>26</sup> As jacrucificama Jesús tmojanánatse. Chora jajocana inátaboye canye boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

<sup>27</sup> Y banga chë pueblentša entšanga imojtséstona; y chë shembásenga imojtséstonëngna imojtsayošachiye y ngmënaca imojtsanioye, Jesús chca yojtsepásama. <sup>28</sup> As Jesús chëngbioye tojanobuértana y tojanéyana: “Jerusalenentša shembásenga, atšbiama ndoñe matošachena; cach tšëngaftangbiama y tšëngaftangbe básengbiama šmochjenóbošachna. <sup>29</sup> Canye te echanjóshjango y chë te šmochántsicahamo: ‘Tša tšabá chë shembásenga šësona ndbomnëngbiama, chë quem luaroye šësonga ndoñe tmonjétsšeshejajñëngbiama, y chë šësonga ndoñe tmonjétsabachengbiama ca.’ <sup>30</sup> Chora entšanga jetsóitanama mochántseboše y mochanjontsé ichámuana: ‘¡Tjashënga šmotsëtebuantsá y batsjabenga šmotsaitame ca!’ <sup>31</sup> Atše, chë ndocna bacna soye amá, chíyeca puerta obená, chca šmjoborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfšhna betíyeca chca tmojtsamëse, ntšamo chë tojtsebuashá betíyeca mochjama ca?” —cha tojanéyana.

<sup>32</sup> Jesúseftaca cruciñe jóbanama, útata bëts bacna soyënga ochjajnayátnaca imojtsënachaye. <sup>33</sup> Chë “Obanabe Bestšashe ca” uabaina luaroye tmojánashjajna ora, Jesús tmojanrucificá y chë bëts bacna soyënga ochjajnayátnaca, canya chabe catšbioica y chë inýana chabe uañicuayoica. <sup>34</sup> Chora Jesús mëntšá tojánayana: “Taita, mëngbe bacna soye motsaperdónaye, er ntšamo montsamama chënga ndoñe quemátstatšëmbo ca.”

Chë soldadënga Jesusbe entšayamna, tsbanánoye tmojanétsena, chënga jtenájatayama. <sup>35</sup> Entšanga chentše imojtsemnënga chca imojtsonýaye, y chë pueblentša mandayëngnaca Jesús imojtsáboyejuana y mëntšá imojtsenatsëtsnaye: “Inýengna aifñe tojéftsatsebacá; mora cachá chauntsbocá, cha ndegombre Cristo, chë Bëngbe Bëtsabe Uámana Uabuayaná tomnëse ca.”

<sup>36</sup> Soldadëngnaca Jesús imojtsáboyejuana; tmojanobeconá y untja vínoye imojtsefšësnaye, <sup>37</sup> y mëntšá imojtsatsaye: “¡Chë judiëngbe Rey tcomnëсна, cach aca mentsbocá ca!”

<sup>38</sup> Jesusbe bestšaše juatsboicna canye uabemana soye tmojananjo; chiñe mëntšá yojtsanábemana: MUA CHË JUDIËNGBE REY ENDMËNA ca.

<sup>39</sup> Canye bëts bacna soyënga ochjajnayá yojtsecrucificaná, Jesúsbioye mëntšá tojanóyenguango: —Chë Bëngbe Bëtsabe Uámana Uabuayaná tcomnëсна, mentsbocá y bëndátnaca šmatsebocá ca.

<sup>40</sup> Pero chë inýe bëts bacna soyënga ochjajnayana mëntšá tbojanácacana: —¿Ni mo Bëngbe Bëtsá ndoñe condërrespectana? Bëndátnaca bontsamna chacá jóbanama. <sup>41</sup> Ndegombre

bëndata muentše bontsemna bēts bacna soyēnga ochjajnaye causa, y chíyeca chca jasúfriama bontsamna. Pero quem boyabása ni mo canýe bacna soye ndoñe tonjobuachjanguá ca.

<sup>42</sup> Y chorna, quem bēts bacna soyēnga ochjajnayá Jesúsbioye tbojaníyana: —Jesús, atšbiama cochtenójuaboýe aca reycá jabomándama chacojtabo ora ca.

<sup>43</sup> Y Jesús tbojanjá: —Ndegombre cbēyana, mēnté átšeftaca celoca, chē nyētscanga oyejuayēnga mondbetsemnoça, aca cochantsatsmēna ca.

*Jesús tojanóbana*

*(Mt 27.45-56; Mc 15.33-41; Jn 19.28-30)*

<sup>44</sup> Nyetsto orscana las tresētscoñe nyēts quem luare yojtseibétata. <sup>45</sup> Y shinýe yojtsajbaná binýnáyana, y Bēngbe Bētsabe bēts yebnentše yojújonýana entšējua tsēntsaca yojtsenájataye. Chējua bēñējua inauamna y chē tsatsēntsaca inaujonýana. <sup>46</sup> As Jesús tojanáyebuachena: “Taita, atšbe espírítu acbe cucuatšifne šcoboshjona ca.”

Y chca jayanama tojanpochocá ora, tojanóbana.

<sup>47</sup> Chē romano soldadēngbe amēndayá chca tojáninýe ora, Bēngbe Bētsábíoye tbojtandorá, mēntšá jayanēse: “Ndegombre, quem boyabása ainaniñe tšabe juabñēnga bomná inamna ca.”

<sup>48</sup> Nyētsca entšanga chē soye jinýama tmojánabēnga, chca tojanopasama tmojáninýe ora, tmojanontšé jtangana enocochjantšetaye, ngménama. <sup>49</sup> Pero Jesusbe nyētsca ubuátmēnga y chē shembásēnga Galileocana tmojanastēngna, chaboca tmojanouedá chē soyēnga onýayiñe.

*Jesús tmojanatbontsá*

*(Mt 27.57-61; Mc 15.42-47; Jn 19.38-42)*

<sup>50</sup> Yojanmēna canýe boyabása, José ca uabainá, canýe Judeoca pueblócá, Arimatea ca uabaina; cha inamna canýa chē pueblentša uámana amēndayēnguentšá y canýe tšabe entšá y nyētsca soyēnguñe tšabá amá. <sup>51</sup> Chánaca yojanobátmana chē Bēngbe Bētsabe amēndayana chaóshjanguama, y tondaye tbojanogustá ntšamo chē inýe amēndayēnga tmojanuabó y Jesúsēftaca tmojanmca. <sup>52</sup> Cha Pilátbodye tojána y Jesusbe cuerpo tbojanotjañe. <sup>53</sup> José chē cruzocana Jesusbe cuerpo tbojtantšjango, canýe lino entšējuaça tbojanandmaná y canýe cuevēshiñe, peñēshiñe pormániñe, tbojanjajó. Chentše cabá ndocná mondějajo. <sup>54</sup> Yēfsana ochnayté bētsēmnayecna, cach te yojanotocana saná japróntana chē yēfsana jasama; y chē ochnayté ya yojtsebínýana.

<sup>55</sup> Chē shembásēnga, Galileocana Jesús tmojantjēmbabanga, tmojána y chē cuevēshe tmojáninýe, y tmojanrrepará ntšamo Jesusbe cuerpo tmojanjajoma. <sup>56</sup> Yebnoye tmojaná orna, tmojanprontá botamana uanguētše bējayēnga y soyēnga chē cuerpiñe janétjuama.

Chē ochnaytena chēnga tmojanochná, ntšamo Moisesbe leyíñe yojanmandancá.

## 24

*Jesús tojtanyena*

*(Mt 28.1-10; Mc 16.1-8; Jn 20.1-10)*

<sup>1</sup> Y tmengo, chē inýe semana bojatsēntena, cabá cachēse, Jesús tmojanatbontsá cuevēshoye chē shembásēnga tmojána, y tmojanamba chē tmojanprontá botamana uanguētše soyēnga.

<sup>2</sup> Pero choye tmojánashjajna orna, tmojáninýena chē cuevēshoye amashjuanentša ndētšbé chentšana juanániñe, <sup>3</sup> y choye tmojánamashjina ora, Bēngbe Utabná Jesusbe cuerpo ndoñe tmojáninýena. <sup>4</sup> Chē shembásēngna ndoñe imontsetátšēmo ntšamo jajuaboyana chē soyama; chora, uta boyabásata, uabuashinýinýana entšayá uichétjonata chentše tbojabántsaye. <sup>5</sup> Y chē shembásēnga tmojanēuatjanama y fshantsoye imojtsatsejbénama, chata tbojanéyana: “¿Ndáyeca obanēngbentše chē vida totsobomñá šmojtsenguá ca? <sup>6</sup> Muentše cha ndocná quenátšmēna, er cha ya tontayena. Menójuabonga ndayá cha tmojanéyanama, cha cabá Galileoca enjamna ora. Cha tonjánayana: <sup>7</sup> “Chē Bēngbe Bētsá Entšá tbojanbemá bontsemna bacna soye amēngbe cucuatšifne chamoboshjonama, chamocrucificama y unga tianoye cháuatayenama ca” —chata tbojánayana.

<sup>8</sup> Chora chē shembásēnga Jesusbe palabrēngama imojtenójuaboýe, <sup>9</sup> y chē cuevēshentšana tmojaná ora, chē tšabe noticiēnga chē bnētsana canýe uatsjēndayēnga y inýe entšángbioye tmojanacuntá. <sup>10</sup> Chē uatsjēndayēngbioye chca cuentayēngna imojamna María Magdalena, Juana, y María, chē Santiagbe mamá, y chē inýe shembásēnga chēngaftaca imojamnēnga. <sup>11</sup> Pero chē uatsjēndayēngna mēntšá chē shembásēngbiana imojtsejuabnaye: “Chēnga montsoyebuambná mo corente juabna ndbomñēngcá ca.” Y chca, chēnga chē soyiñe ndoñe montsanošbuaché.

<sup>12</sup> Pero chentšana, Pedro tojétsantsbaná y ochamanana chē Jesús tmojanjajó cuevēshoye tojána. Y choca yojtsemna ora, yojotsejbéna tsoye jontješiyama, pero nýe ena entšējuangá



yojuiniye, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

*Chë Emaús puebloye benachiñe*  
(Mc 16.12-13)

<sup>13</sup> Cach te, uta uatsjédayata Emaús puebloye ibojtsaye. Emaús yojamna Jerusalenocana bnétsana canye kilómetroca. <sup>14</sup> Chata ibojtsayencuéntaye lempe ntšamo tojanopasama. <sup>15</sup> Y tojanopasá, ibojtsencuéntaye y ibojtsenatsétsnayéntsucua, cach Jesús tojanobeconá y chátaftaca cánýiñe yojtsaye; <sup>16</sup> masque imojtsonýaye, ndoñe ibontsobena cha jótëmbana. <sup>17</sup> Jesús tojanéyana: —¿Ndayama benachiñe šuabanencuéntaye ca?

As chata ngménaca ibojtsaye, <sup>18</sup> y canýa, Cleofás ca uabainá, tbojaniyana: —¿Nýe aca cojtsemna, inýe luarocana ashjangoná Jerusalenentse oyená, ndayá chentse quem diënga yopásanama ndétatšëmbuá ca?

<sup>19</sup> Chora cha tojanéyana: —¿Ndaye soyënga ca?

Y chata tbojaniyana: —Chë Jesús Nazaretocáftaca tonjopasá soyëngama. Cha enjamna canye Bëngbe Bëtsabe juabna oyebuambnayá, puerte obenana bonná ndayá jamama y jayanama, Bëngbe Bëtsabe delante y nýetsca entšangbe delante. <sup>20</sup> Y ntšamo, chë bachnangbe amëndayënga y chentša mandadënga inýëngbe cucuatšñe tmonjábošhiona, jóbana ibojtsemna ca entšanga chamuayanama y chamocrucificama. <sup>21</sup> Bënga chabíama fsënjanoábátmana, Césarbe cucuatšentšana Israeloca entšangbe atsebacyá chaotsemnama; pero morna ya unga te entsemna chca tonjopasá. <sup>22</sup> Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanjajó cuevēshoye tmonjá, <sup>23</sup> y chabe cuerpo ndoñe tmonjínýena; as chora chënga bëngbiyoye tmontabo y montsabichamo angelënga tmojëftsanýe y chënga catmënjayana cha ainá yojtsatmëna ca. <sup>24</sup> Bëngbentšana baseftangnaca chentšana chë cuevēshoye tmonjá, y tmojínýena ntšamo chë shembásenga tmonjayancá, pero Jesús ndoñe tmojëftsinýe ca — chata ibojtsichamo.

<sup>25</sup> As Jesús chata tojanéyana: —¡Tša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama! <sup>26</sup> ¿Mo ndoñe yonjamna chë Uámana Uabuayaná chë soyënga chaosufrima, y chentšana nýetsca entšanga corente cha chamuatschuama ca?

<sup>27</sup> Chentšana Jesús tojanontšë chata jábuayenana, lempe ntšamo chabíama yojanoyebuambnacá chë Bëngbe Bëtsabe uabemana palabrënguiñe; yojontšë Moisesbe librëšangañe y chë Bëngbe Bëtsabe juabna oyebuambnayëngbe librëšangañnaca.

<sup>28</sup> Chë ibojétsaye puebloye imojtsebeconá ora, Jesús tojanma mo más chcoye cuaftsacá. <sup>29</sup> Pero chatna tmojanataríe chentše chaotsoquedáñama, mëntšá jauyanëse: —Bëndátaftaca motsoquedáñe; ya jetiñe entsemna y ya echanjaibétata ca.

As Jesús chátaftaca tojtsoquedáñe. <sup>30</sup> Chentšana tojanopasá, juasama mesëshentše imojtsetbíamana ora, Jesús chë tandëse tojanca, Bëngbe Bëtsábíoye tbojtanchuá, chë tandëse tojanjatá, y chata tojanatšatá. <sup>31</sup> As, chora chë uatsjédayata ibojobenaye Jesús jótëmbana; pero chana nýe ndeolpe yojuenatjëmba. <sup>32</sup> Chora chata ibojtsenatsétsnaye: “Chë benachiñe Bëngbe Bëtsabe uabemana palabrëngama šondabuayíyná ora, ndegombre bëngbe ainaniñe más bontseboše cha más chašotsabuayíynama, ¿ndoñe chca ca?”

<sup>33</sup> As, cachora tbojëftsantsbanata y Jerusalenoye tbojtánata; choca tmojáninýena chë bnétsana canye uatsjédayënga cánýentše imojtsemna y chëngbe enutëngnaca; <sup>34</sup> y mëntšá imojtsichamo: —¡Ndegombre Bëngbe Utabná tojtayena; Simónbiyoye tbojëbëbocna ca!

<sup>35</sup> As chata tbojanontšë jacúntana, ntšamo benachiñe tbojanpasacá, y ntšamo Jesúsbiyoye imojótëmba, chë tandëse tojanjatá ora.

*Jesús chabe uatsjédayënga tojánebëbuacna*  
(Mt 28.16-20; Mc 16.14-18; Jn 20.19-23)

<sup>36</sup> Chë uatsjédayënga chë soyëngama cabá imojtsencuéntantsucua, Jesús chëngbe tséntsaca tojabántsaye y mëntšá tojanéyana: “Chë atšbe ainaniñe tšabe ebionana tšëngaftangaftaca chaotsemna ca.”

<sup>37</sup> Pero chënga tša auatjanánënga imojtsemna, y canye añemëse imojétsonýaye ca imojtsejuabnaye. <sup>38</sup> Pero Jesús tojanéyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca? <sup>39</sup> Atšbe cucuatšënga y atšbe shecuatšënga minýënga; šmobjajo y šmochanjínýe. Cach atšë séntsemna. Canye añemëсна, ni mëntšëna ni betašënga ntsebomnana; pero tšëngaftanga šmontsonýá, atšna aiñe ca” —tojanéyana.

<sup>40</sup> Chca yojtsichámëse, chabe cucuatšënga y chabe shecuatšënga tojaninýanýe. <sup>41</sup> Y chënga cabá ndoñe montsanošbuaché, chca noticiama corente imojtsóyejuama y tša ojanánënga imojtsemna causa; as Jesús tojanatjá: “¿Muentše ndayá jasama quešmëbomna ca?”

<sup>42</sup> As can'ye tabena buana beonbiana tmojanoyé; <sup>43</sup> Jesús tojanocñe y chéngbentse tojanse. <sup>44</sup> Chentšana Jesús tojanéyana: “Quem palabrënga entsemna ntšamo cabá tšëngaftangaftaca sënjamna ora tbonjanëyancá: Entsemna, lempe chaopasá ntšamo atšbiana iuabemancá, Moisesbe leyënguifne, chë Bëngbe Bëtsabe juabna oyebuamb-nayëngbe uabemana librëšangañe y Salmos librëšañnaca ca.”

<sup>45</sup> Y chora chë uatsjëndayënga, Jesúsbeyeca tmojanobená chë Bëngbe Bëtsabe uabemana palabrëngama josértana. <sup>46</sup> Chentšana Jesús tojanéyana: “Ntšamo atšbiana iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca. <sup>47</sup> Y morna atšbe uabaina jayanëse, átšbeñe betsošbuáchemá, n'yets quem luarentse šmochjónšá entšanga atšbiana jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuaperdonama; chë soyënga Jerusalemntse chaobojatšé. <sup>48</sup> Tšëngaftanga atšbiana soyënga šmonjinýe y šmondëtatsëmbo. <sup>49</sup> Atšbe Taitabe šbuachenaná, tšëngaftangbiana chanjíchmuá. Pero morna camuentse Jerusalemntse moquedanga, Bëngbe Bëtsabe obenana chašmóyëngacñëntscuana ca” —cha tojanéyana.

*Jesús celoye tojtantsjuá*  
(Mc 16.19-20)

<sup>50</sup> Chentšana, Jesús chabe uatsjëndayënga ínýoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjëndayënga tšabe bendicionënga chamóyëngacñama. <sup>51</sup> Chca yojsamëntscuana, cha chëngbentšana tojanoluaré y tojanontsé celoye játsjuana. <sup>52</sup> Chë uatsjëndayëngna, Jesús tmojtanadorá chentšana, Jerusalemntse oyejuayënga tmojtaná; <sup>53</sup> y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

## San Juan

*Cristo, chë Bëngbe Bëtsabe Uámána Oyebuambnayana ca Uabainá*

<sup>1</sup> Quem luare ndobojátsa ora, Cristo, chë Bëngbe Bëtsabe Uámána Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna. <sup>2</sup> Ndegombre cha, chë tempscana Bëngbe Bëtsáftaca yojtsanmëna. <sup>3</sup> Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye matëñjanma. <sup>4</sup> Cachábeñe nyets vida inamna, y quem vídaca tojánabo quem luarentsa entsangbe juabnënga jabuábinýayama. <sup>5</sup> Cha tonjánabo moye, chë entsangbe juabnënga ndoñe binýniñe yonjamnoye, chiñe jabobínýayama. Cha sempre chca yobínýna, y Satanás chë entsangbe juabnënga ndoñe binýniñe chaondëtsemnama amá, ndoñe yondobena chë binýnayabe obenana jtsejuánana.

<sup>6</sup> Inamna canýe boyabása, Juan ca uabainá; y Bëngbe Bëtsá tbojanichmó, <sup>7</sup> binýnayabiama chaóyeuambama; entsángbeñe binýnayabiama cháuyanama, chca, ntšamo Juan chë binýnayabiama tojayana soyëngaca, nyetscanga Jesúsbeñe chamotsošbuáchemá. <sup>8</sup> Juan ndoñe yonjamna chë binýnayá. Cha inamna canýe ichmoná, chë nda binýnayá yomnabiama entsángbeñe chauabayánama. <sup>9</sup> Chë ndegombrá quem luaroye tonjánabo chë entsangbe juabnënga jabuábinýayama.

<sup>10</sup> Chë Bëngbe Bëtsabe Uámána Oyebuambnayana quem luariñe yojtsanmëna; masque cháftaca Bëngbe Bëtsá quem luare tojanma, nda cha yojannama muentša oyenënga ndoñe monjánatšëmbo. <sup>11</sup> Cachabe luare entsángbioye tonjánabo, y entsánga ndoñe tmonjánbošena cha jofjana. <sup>12</sup> Nyetscanga, ndëmuanýenga cha tmojanëbuaja y chábeñe tmojtsošbuáchenga, cha derecho tonjanatšatá jtsobenama Bëngbe Bëtsabe básenga ca jtsabáinama. <sup>13</sup> Quem ošbuáchiyëngna, chca jtsemnama ndoñe tmonjanobená entsangbe buiñentsana tmojanonýayeca, o ndaye entsabe juabnentsana. Nýe Bëngbe Bëtsábeyeca chca chabe básenga imojtsabaina.

<sup>14</sup> Cha, chë Bëngbe Bëtsabe Uámána Oyebuambnayana, entsá tojanóbema, y quem luare bëngaftaca yojëftsiyena. Cha yomna chë Bëngbe Bëtsabe nýe canýe Uaquiñá; chíyeca bënga tifjáninýe chabe bëts obenana y chabe tsabe juabna, chë Bëngbe Bëtsábentsana tojanóyëngacñana. Cha corente jtsababuánýeshanëse šojánanýena y yojëftsiyena ntšamo ndegombre inamncá. <sup>15</sup> Juan mëntsá chabiama yojanáyeuache: “Chabiama sënjanoyebuambná, chë ndabiama chora atše sënjánayana, chë átsbentšana jabamana atšbiamá más uamaná endmëna, er atše cabá ndonýna orna, cha ya yojtsemna ca.”

<sup>16</sup> Cha tša tsabe ainana bómnyayeca, bënga nyetscanga mallajta tsabe bendicionënga tmojóyëngacñe. <sup>17</sup> Moisesbiajana tifjanóyëngacñe chë Bëngbe Bëtsá tojanmandá soyënga. Pero Jesucristbeyeca, Bëngbe Bëtsá tsabe bendicionënga bëngbiamá tojama y chë ndegombre soyënga bënga tmojëftsashjache. <sup>18</sup> Ndocná, ndocna te Bëngbe Bëtsábioye tbonjinýe. Chë nýe canýe Uaquiñá ibobomná, cach Bëngbe Bëtsá yomna; y cha, Bëngbe Bëtsá chë Taitáftaca cánýiñe mo canýacá yomna. Mua, chë Uaquiñá, bëngbiamá tojama, Bëngbe Bëtsá juabuátmanama chaotsopodënama.

*Juan chë Ubayaná Jesucristbiamá tojanabuayená*

*(Mt 3.11-12; Mc 1.7-8; Lc 3.15-17)*

<sup>19</sup> Canýe te, Jerusalenoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnama chamuatjayama. <sup>20</sup> Chocna, Juan chëngbeñe ndegombre tojanobuambá: —Atše, chë Bëngbe Bëtsabe Uámána Uabuayaná ndoñe quetsátsmëna ca.

<sup>21</sup> As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyebuambnayá Elías ca?

Y Juan tojanéjua: —Atše cha ndoñe quetsátsmëna ca.

Chora chënga tmojantjá: —As, ¿chë Bëngbe Bëtsabe juabna jabóyeuambayama jabamá ca?

Y Juan tojanéjua: —Ndoñe ca.

<sup>22</sup> Chora chënga tmojanianya: —Asna, ¿aca ndase cojtsemna? Bënga šontsamna nda aca cojtsemnama jtsatšëmhuana, as chë šonjadespachenga jacúntama. ¿Ndayá cojtsobena cach acbiama jayanama ca?

<sup>23</sup> Y Juan mëntsá tojanéjua: —Atše sëntsemna chë ndabiama Bëngbe Bëtsabe juabna oyebuambnayá Isaías mëntsá tojanábema: “Entsanga ndoyenoca canýe abuayiynayá echántsemna, y entsanga mëntsá echántsabuyiynaye: Bëngbe Utabná echanjabo ca. Mo nda canýe benache tojtseprontacá, tšëngaftángnaca cachcá, cha jabama tsabe juabnëngaca smochtseprontana ca.”

<sup>24</sup> Chorna, báseftanga chë fariseungbe ichmónënguentsana, <sup>25</sup> Juan tmojanjá: —Chë Bëngbe Bëtsabe Uámána Uabuayana, Cristo ca uabainá, ndoñe tcontsemnëсна, ni Elías, ni chë Bëngbe Bëtsabe juabna jabóyebuambayama jabamá ndoñesna, ¿ndáyeca entsanga cojtsëbayana ca?

<sup>26</sup> Chora Juan tojanëjua: —Atšna, béjeyeca entsanga sëndëubáyana. Pero tsëngaftangbeñe canya entsemna; cha ndoñe quešmatábuatma; <sup>27</sup> y cha atšbe ústonoye echanjšhango. Atšbe merecido taitsatobuajoñe, ni mo jotsejbiyama, chabe shecochëtjonëshentša corriëja jajaffonama ca.

<sup>28</sup> Chca tojanopasá, canye pueblo Betania ca uabáinentše, Jordán béjaye chenguana. Cach béjajiñe, Juan entsanga yojanëbáyana.

*Jesús chë Bëngbe Bëtsabe Oveshatema ca uabainá*

<sup>29</sup> Yëfsana, Juan yojtsemnoye Jesús yojtsebëconaye, y chë cháftaca imojtsemna entsanga tojanëyana: “Smochjinýe. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjajuana ca. Cha jobanëse, quem luarentša entsanga bacna soyëngama perdonánënga mochántsemna. <sup>30</sup> Atšbe chabiamna cbonjutsëtsná, mëntsá sënjanayana ora: ‘Atšbe ústonoye canya echanjšhango. Cha atšbiamna más uamaná endmëna, er atšbe cabá ndonýna ora, cha ya yojtsemna ca.’ <sup>31</sup> Tempna, cach atšbe ndoñe quetsjátantatšëmbo nda cha bëtsemnana. Pero atšna inýenga béjeyeca ubáyana sëndabó, Israeloca entsanga quem boyabása chamuábuatmanama ca” —Juan tojanëyana.

<sup>32</sup> Chentsana Juan mëntsánaca tojanobuambá: “Chabiamna mëntsá bominye sënjanajó: chë Uámána Espiritu, mo canye palomatemcá, celocana tonjánastjango y quem boyabásabe juatsbuañe tonjanototóná. <sup>33</sup> Atšbe cabá ndoñe quetsjátantatšëmbo nda cha bëtsemnana, pero chë béjeyeca jubáyama šonjanichmó cha, mëntsá šonjaniana: ‘Nda chacojinýe, chë Uámána Espiritu jastjanguana y chabe juatsbuañe jototonana, chábeyeca atšbe chanjichmua chë Uámána Espiritu entsangbe ainaniñe cháumashënguama ca.’ <sup>34</sup> Y morna, atšbe aiñe chca tijinýe, y ndegombre tsëngaftanga cbëyana, cha chë Bëngbe Bëtsabe Uaquiñá entsemna ca” —cha tojanëyana.

*Chë Jesusbe natsana ústonënga*

<sup>35</sup> Yëfsana, Juan chabe uatsjëndayënguentsana útataftaca cachoca yojtësemna. <sup>36</sup> Jesús yojtsachnëjuanama, Juan tbojáninýe ora, tojanëyana: “Sochjinýe. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

<sup>37</sup> Chora chë Juanbe uta uatsjëndayata, chca tbojanuena ora, Jesús tmojanasto. <sup>38</sup> Jesús tojesanontjeshë y tojánanýe chata imojtëstëstonama. As, tojanatjá: —¿Ndayá šojtsenguá ca?

Y chata tbojaniana: —¿Rabí, ndayentše icyoena ca? (Rabí endayana “Buatëmbayá ca.”)

<sup>39</sup> Chora Jesús tojanëjua: —Mabo y šochjinýe ca.

As chata tbojána y tbojáninýe ndayentše cha yojaniyenana. Y chentše cháftaca tojëtšsanajëtana, ya jetiñe mo las cuatro ora yojtsemna ca.

<sup>40</sup> Chë Jesusbiamna oyebuambnayana Juánbioye tojanóyëunata y Jesús tbojanasto útataftaca cányana Andrés ca yojanabaina; cha yojamna Simón Pédrëbe catšata. <sup>41</sup> Andrés, cabá ndocna inýe soye ndëma ora, tojána chabe catšata Simón janguanguama. Y tbojáninýena ora, Simónbioye tbojaniana: “Chë Bëngbe Bëtsabe Uámána Uabuayana, Cristo, fsënjínýena ca.”

<sup>42</sup> Chentsana Andrés, Simónbioye tbojanánatse Jesús yojtsemnoye. Jesús, Simónbioye tbojáninýe ora, tbojaniana: “Aca condmëna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndëtšbé ca.”)

*Jesús, Felipe y Natanael tojánachembo chamuastama*

<sup>43</sup> Yëfsana, Jesús tojanjuabó Galilea luaroye jama. Benachiñe Felípbioye tbojáninýena y tbojaniana: “Smasto ca.”

<sup>44</sup> Chë boyabása Felipe, Betsaida pueblócá inamna. Andrés y Pédrëna cach pueblócata ibnamna. <sup>45</sup> Chentsana Felipe tojána Natanael janguanguama; y tbojaniana: —Chë ndabiamna leyënga librëšangañe Moisés tojanábema cha fsënjínýena ca. Cachabiamna, Bëngbe Bëtsabe juabna oyebuambnayëngnaca tmojanábema. Cha Jesús entsemna, Josebe uaquiñá, chë Nazaretocá ca.

<sup>46</sup> Chora Natanael tbojaniana: —¿Ndaye tšabe soye Nazaretocana nanjopódia jóbocnana ca?

Y Felipe tbojanjú: —Mabo y cochjinýe ca.

<sup>47</sup> Natanael yojtsebëconama, Jesús tbojáninýe ora tojánayana: —Moye canye entšá entsabó; cha ndegombre endomerecena Israelbentsana entšá jtsemnana. Cha tšabe entšá endmëna; ndocnábioye quebnatsingña ca.

<sup>48</sup> Chora Natanael Jesúsbioye tbojanatjá: —¿Ntšamo atšbe šcuabuatumna ca?

Y Jesús tbojanjuá: —Felipe cabá aca ndëchembo ora, atše tchonjinýe, chë higo betiye tchetsoye condëtsomñe ora ca.

<sup>49</sup> As, Natanael tbojaniana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entšangbe Rey ca!

<sup>50</sup> Chora Jesús tbojanjuá: —¡Aca átsbeñe cojtsosbuaché, nýe chë higo betiye tchetsoye tchojinýe ca tbojauyanama? Ndegombre, chë soyama más bëts soyënga cochanjinýe ca.

<sup>51</sup> Chentšana Jesús tojanýana: —Ndegombre šcuayana: Tšëngaftanga šmochanjinýe celoca atëfñiñe, y Bëngbe Bëtsabe angelotëmënga jtsetsjuajnana y jtsastjauanana Bëngbe Bëtsá Entšá tojanbemabe tatsëtsoca.

## 2

### *Canýe casamento Galilea luaroca, Caná pueblentše*

<sup>1</sup> Chentšana unga tianoye, canýe casamento inamna, canýe pueblentše Caná ca uabáinentše, Galileoca. Chë oboyejuayoca Jesusbe mamá yojtsemna. <sup>2</sup> Jesús y chabe uatsjëndayëngnaca chë casamentoca ófanënga imojtsemna. <sup>3</sup> Chë oboyejuayentše, vínoye yojtsopochóca y Jesusbe mamá tbojaniana: —Ya tondaye vínoye quemátsbomna ca.

<sup>4</sup> As, Jesús tbojanjuá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

<sup>5</sup> Chentšana, chabe mamá, chentša oservëngënga tojanýana: —Lempe šmochjama, ntšamo cha chacmojuayancá ca.

<sup>6</sup> Chocna, chnënguana ndëtsbé matbaja inamna. Chca matbajënguentša béjayerca, judiënga imojanamana jtsacuéntšabiana cabá ndëse ora, ntšamo tempo entšanga imojanamancá, Bëngbe Bëtsabe delante tšábënga jtsatsmënëma. Cada matbajiñe, mo shachna o canýsëfta bnëtsanáua béjaye yojanába.

<sup>7</sup> Chora Jesús chë oservëngënga tojanamëndá: “Quem matbajënga béjayerca mobuajutetjé ca.” Y chënga, chora lempe tmojanbuajutetjé.

<sup>8</sup> Y Jesús tojanýana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanama.

<sup>9</sup> Chora, chë fiesta otocaná, chë béjayerca Jesús vínoye tojanbemiyë tojanfantitiá, ndëmocana yojóbcnana ntsetatsëmbcá. Pero chë oservëngënga aiñe imojtsetátsëmbo ndëmocana, er cachënga chë béjayerca tmojanbuatsjo. As, chë fiesta otocanana, chë bobontse bouamnábioye tbojanchembo, <sup>10</sup> y tbojaniana: “Nýetscanga monduamana natsana chë más uámana vínoye jushebëcana, y chë ófanënga becá tmojatëmo ora, chë más batsá uámaniye. Pero acna, chë más uámana vínoye morscama tojtsabofjajó ca.”

<sup>11</sup> Ntšamo Jesús tojanmá Caná pueblentše, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninýanýe; y as, chabe uatsjëndayënga chábeñe imojtsosbuaché.

<sup>12</sup> Chca tojanopasá chentšana, Jesús canýe pueblo, Capernaum ca uabáinoye tojtsanoñe. Chorna, chabe mamá, chabe catšátanga y chabe uatsjëndayënga cha tmojantjëmbambá, y choca baseftatescama tmojanoqueadá.

### *Jesús Bëngbe Bëtsabe bëts yebnentšana bacna entšanga tojtanëbuacna*

(Mt 21.12-13; Mc 11.15-18; Lc 19.45-46)

<sup>13</sup> Ya canýe judiëngbe bëts fiesta, chë Bashco fiesta yojëtsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoyë tojána. <sup>14</sup> Jerusalenoca, Bëngbe Bëtsabe bëts yebnentše, Jesús tojánanýëna uacnënga, oveshënga y paloma enënga, y entšángbioye crocënaná atrócayënga, chëngbe luarënguenache imojtsetbiámana. <sup>15</sup> Jesús chca tojánanýe ora, biajënga tojanaca, tjanjanëja tojanobopormá, y Bëngbe Bëtsabe bëts yebnentšana nýetscanga tojtanëbuacna, chëngbe oveshënga y uacnëngaca. Chentšana Jesús, Bëngbe Bëtsabe bëts yebnentšama yojanoserverna crocënaná atrócayëngbe crocënaná tojtsanëjquësheshe, y chë mesëshangá tojtsanenásatajchquëca. <sup>16</sup> Chë paloma enëngna Jesús tojanýana: —¡Quem soyënga lempe muentsšana matábocana! ¡Ndoñe matsbuamnana ni mátenana atšbe Bëtsabe yebnentše, mo cánýentše jiyama luarentše cuaftsemncá ca!

<sup>17</sup> Y as, chabe uatsjëndayënga tmojanenoyuabó ntšamo Bëngbe Bëtsabe uabëmana palabrëngüñe iuyanama: “Bëngbe Bëtsabe yebna jtseboguanama juabna, nýets átsbeñe entsemna ca.”

<sup>18</sup> Chora, judiënga Jesús tmojantjá: —¿Ndaye bëts soye cochjama bënga chašcuinýanýëma, aca ndaye deréchoca bëngaftaca chca cojtsobenama ca?

<sup>19</sup> As Jesús tojanëjua: —Quem Bëngbe Bëtsabe yebna menásatajchca, y atše unga tese chtëtsbaná ca.

<sup>20</sup> Chora chë judiënga tmojanianya: —Canta bnëtsana chnënguana uatiñe, quem Bëngbe Bëtsabe yebna tmojanjebo. ¿Y aca, nÿe unga tese lempe cochtëtsjebno ca?

<sup>21</sup> Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye. <sup>22</sup> Chama, Jesús obanënguentšana tojtayanena ora, chabe uatsjëndayënga tmojanenoujabó ntšamo muentše cha tojanëyanama. Chca ora, Bëngbe Bëtsabe uabemana palabrénguiñe y Jesús chora tojánayana palabrénguiñe más chënga imojtsošbuaché.

*Jesús nyëtsca entšangbe juabna iuábuatma*

<sup>23</sup> Jesús Jerusalenoca chë Bashco fiestama yojtsemnëntscuana, entšanga tmojáninÿe Jesús jamana bëts soyënga Bëngbe Bëtsabe obenánaca. Chíyeca, ba entšanga chábeñe imojtsošbuaché. <sup>24</sup> Pero Jesús chëngbeñe ndoñe yontsošbuaché, cha nyëtscanga yojanëbuatma causa. <sup>25</sup> Y Jesús ndoñe bonjanájaboto chë entšangbe soyëngama chabotsebuaiyina, er cachá entšangbe ainaniñe nyëtsca juabnënga yojanábuatma.

### 3

*Jesús y Nicodemo*

<sup>1</sup> Inamna canÿe boyabása Nicodemo ca uabainá. Cha yojamna fariseungentšá y judiëngbe canÿe amëndayá. <sup>2</sup> Chana ibeta Jesúsbiyoe tojána y tbojanianya: —Buatëmbayá, bënga fsëntsetatšëmbo aca canÿe buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tojtsemnëse. Chíyeca bënga chca fsëntsetatšëmbo ca —cha tbojanianya.

<sup>3</sup> Chora Jesús tbojanjá: —Ndegombre cbëyana, nda ndoñe cachiñe tontonÿná, cha ndoñe quenátobena Bëngbe Bëtsabe amëndayana jinÿama ca.

<sup>4</sup> Y Nicodemo tbojanjá: —¿Ntšamo, canÿe entšá ya bëtsá tojtsemna ora, nantsobena cachiñe jtónÿnama ca? Ndegombre, cha ndoñe ntsobenana cachabe mamabe cuerpiñe jtamashënguana cachiñe jtónÿnama ca.

<sup>5</sup> Chora Jesús tbojanjá: —Ndegombre cbëyana, béyayeca y chë Uámana Espiritbeyeca ntjonÿnacá, ndocná quenátobena Bëngbe Bëtsabe amëndayoye jamashënguama. <sup>6</sup> Nda bëtsëtsabentšana tojonÿná cha, quem luarentša entšangcá jtsemnana; pero chë Uámana Espiritbeyeca tojonÿná chana, jtsemnana canÿa chë Uámana Espiritu ainaniñe bomná. <sup>7</sup> Ndoñe matenjnanana ntšamo tbonjauyanama: “Nyëtscanga entsamna cachiñe jtónÿnama”. <sup>8</sup> Chë binÿia ndëmuajana tojtseboše jtsemnana, chëjana jtšanana. Masque entšanga, chë binÿiyama jtsuenanana, ndoñe ntsetatšëmbuana ndëmocana yobama y ndëmoye yojtsoma. Cachcá, tsëngaftanga ndoñe quešmátstatšëmbo ntšamo entšanga chë Uámana Espiritbeyeca tmojtsónÿnama; pero tsëngaftanga šmontsetátšëmbo aiñe chca yomnama ca —Jesús tbojanianya.

<sup>9</sup> Chora Nicodemo tbojanjá: —¿Ntšamo chca nántsemna ca?

<sup>10</sup> Y Jesús tbojanjá: —Aca, canÿe Israeloca abuatambayá, ¿chë soyëngama ndoñe condëtatšëmbo ca? <sup>11</sup> Ndegombre cbëyana, bëngna chë fststátšëmbo soyëngama fsëntsoyebumbná, y chë tifjinÿe soyëngama ndegombre bëtsëmna fsëntsichamo. Pero tsëngaftangna, chë cbontsëtsëtsná soyënguiñe ndoñe quešmatošbuaché. <sup>12</sup> Atše, quem luarentša soyëngama sënjoyebumbá y tsëngaftanga átsbeñe ndoñe chešmatošbuaché. Y as, ¿ntšamo átsbeñe šmochtsošbuachiye, celoca soyëngama cbojtsëtsëtsnase?

<sup>13</sup> “Ndocná, nÿe cachábeyeca Bëngbe Bëtsábiyoe tonjátsjua. Nÿe chë celocana tojabá aiñe, chë Bëngbe Bëtsá Entšá tbojanbemá. <sup>14</sup> Y chcase, ntšamo Moisés entšanga ndoyenoca bronca mëtscuaye tsbanánoca tbojananguësëtcá, soquënga tsabá chamotsatšëmna; cachcá entsemna, Bëngbe Bëtsá Entšá tbojanbemá entšanga chamuatsbanama; <sup>15</sup> chca, nyëtscanga chábeñe tmojtsošbuachenga, chë nyëtsca tescama yomna tsabe vida chamotse-bomnama ca” —Jesús Nicodëmbiye tbojanianya.

*Ntsachetšá Bëngbe Bëtsá entšanga iuababuányëshana*

<sup>16</sup> Mëntánaca Jesús tojánayana: —Bëngbe Bëtsá quem luare entšangbiyoe tša yojánabuanÿeshanayeca, chë nÿe canÿe Uaquiñá ibobomná, bëngbiyoe tbojichmó, nyëtsca chábeñe ošbuachiÿënga ndoñe chamondóbanama, y aiñe chë nyëtsca tescama yomna tsabe vida chamotse-bomnama. <sup>17</sup> Er Bëngbe Bëtsá chabe Uaquiñá quem luaroye ndoñe tbojichmó quem luare entšangbiamama jabáyanama ntšamo tmojamama castiganënga chaotsannama ca, sinó, entšanga chábeyeca atsebácanënga chamotse-bomnama.

<sup>18</sup> “Nda Bëngbe Bëtsabe Uaquiñábeñe tojtsošbuáchebiamama, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiamama, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nÿe canÿe Uaquiñá ibobomnábeñe ndoñe yontsošbuaché causa. <sup>19</sup> Chca, chë ndoñe tmontsošbuáchengbiamama cha ya tojayana,

ntšamo tmojamama castigánënga chamotsemna ca; er chë entšangbe juabnënga binÿnyáyá quem luaroye tojabo, pero ba entšanga tmojábošëna jtsomñana, chë entšangbiamama bacna juabnëngaca chamotsebomnana amáftaca. Chënga sempre bacna soyënga jtsamana; chíyëca chënga jtsebošana cháftaca jtsomñama. <sup>20</sup> Chë bacna soyënga tojtsamá ndoñë ntsebošana, chë binÿnyáyá chabe bacna soyënga chabuinÿnyëma, ni chabe bacna soyëngama chabuácacanamama. Chíyëca, chë bacna soyënga jtsamëse oyená, chë binÿnyáyábioye jtsáboyënjana, y chë binÿnyáyábioye ndoñë ntjabana. <sup>21</sup> Pero nda sempre tojtsiyëna ntšamo ndegombre yomncá jtsamëse, chana aíñë chë binÿnyáyábioye jabana, chë binÿnyáyá chabiamama chabuinÿnyëma, chë tojama soyëngna, ntšamo Bëngbe Bëtsá tojtsebošcá tojamama ca” — Jesús tojánayana.

#### *Juan chë Ubayaná cachiñë Jesucristbiamama tojanabuayená*

<sup>22</sup> Chca tojanopasá chentšana, Jesús chabe uatsjëndayëngaftaca básefta Judeoca pueblëngoye tojtsanoñë. Chiñë, baseftatescama chë uatsjëndayëngaftaca tojanoquedá, entšanga ubáyana. <sup>23</sup> Cach tempo, Juanënaca entšanga yojanëbáyana Enonoca, Salim béconana, er choca bëtscá béjaye inabinÿna. Ba entšanga choye imojtsaye, y Juan chënga yojanëbáyana. <sup>24</sup> Chca tojanopasá, chë Heródesbe soldadënga Juan cabá ndutame ora.

<sup>25</sup> Chë tempo, básefta Juanbe ústonënga tmojanontsé inÿe judíoftaca enatsëtsnayana ntšamo tempo judiënga chë jtsacuëntšabiamama imojanámanama. <sup>26</sup> Chora, chënga Juánbioye tmojánabo y tmojanayana: —Buatëmbayá, chë Jordán chenguánoica ácaftaca enjamná, ndabiamama tša tsábá conjanoyebuambná, mora entšanga entsëbayana y nÿetscanga cha montséstona ca.

<sup>27</sup> As Juan tojanëyana: —Ndocná quenátobena tondaye ntsebomnana, Bëngbe Bëtsá ndoñë tbonjatsetase. <sup>28</sup> Cach tsëngaftanga tsábá šmonjanuena y šmontsobena ndegombre yomnama jayanana, atse ndoñë chë Bëngbe Bëtsabe Uámama Uabuayaná tsjanmëna ca sënjanayanama; sinó, Bëngbe Bëtsá atse šojanichmó chë Uabuayanabe natsana, chabiamama entšanga jabábuayenama. <sup>29</sup> Chë tobiaše tojtsobouamá ora, chë bobontse chábioye jtsebomnana; y chabe amigna, chabiamama jtsobátmanana y chë bobontse bouamnabe oye-buambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyebuambnamama sëntsuenana ora, átšnaca corente oyejuayá séntsemna. <sup>30</sup> Cha bontsemna más uamaná jtsemnana, pero atse šontsemna más nduamaná jtsemnana ca —Juan tojanëyana.

#### *Ntšamo yomna chë celocana tojabá*

<sup>31</sup> Mëntšánaca Juan tojánayana: “Chë tsbanánocana tojabá, nÿetsca entšangbiamama más uamaná endmëna. Chë quem luare oyená quem luare entšangcá jtsemnana y quem luarentša soyëngama jtsóyebuambnayana, pero chë celocana tojabana, nÿetsca entšangbiamama más uamaná endmëna. <sup>32</sup> Cachá ntšamo tojinÿe y tojouenca entsoyebuambná, pero chë entsichamo soyënguiñë ndocná quenatošbuaché. <sup>33</sup> Nda ntšamo cha tojtsóyebuambnañë tojtsóbuaché y chca tojtsama, jtsinÿanÿayana Bëngbe Bëtsá ndegombre soyënga inet-sichámuama. <sup>34</sup> Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámama Espiritu, nÿets tempo corente chabotsájabuachanamama, ntšamo cach Bëngbe Bëtsá tojtsichamo y cachcá chaotsichámuama. <sup>35</sup> Chë Taitá Uaquiñábioye bondbobonshana, y chë Uaquiñábioye obenana tbojatsetá nÿetsca soyënguiñë jtsemándayama. <sup>36</sup> Nda chë Uaquiñábeñë tojtsóbuaché, chë nÿetsca tescama yomna tsábe vida echántsebomna; y nda chë Uaquiñábioye ndoñë tbontsašbuaché, chana chë vida ndoñë queochátsbomna, y chë Bëngbe Bëtsabe uabouana castigo nÿetsca tescama chábeñë echántsemna ca” —cha tojánayana.

## 4

#### *Jesús y chë Samaria luaroca shembása*

<sup>1</sup> Chë fariseunga tmojanuena Jesús, Juanbiamama más ústonënga yojtsabamnamama, y más entšanga yojtsëbáyana. <sup>2</sup> Pero ndegombre, cach Jesús ndocnábioye bonÿyanábayana, sinó chabe uatsjëndayënga. <sup>3</sup> Bëngbe Utabná Jesús, ntšamo chë fariseunga tmojanuena tojántatšëmbona ora, Judea luarocana tojëftsanbocna y Galileoye tojtaná.

<sup>4</sup> Choye jtamna ibojamna Samaria luarëjana jachnënguana. <sup>5</sup> Samariocna, canÿe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaquiñá Josébioye tbojëftsanlargá fshantse béconana. <sup>6</sup> Choca yojamna cánÿentse atëfjóniñë, búyeshë jobuatsjuama, Jacobëbe atëfjóniñë ca uabáiniñë. Mo nÿetsto ora, chentše Jesús yojtsemna, aniñë uamëntšayá, chë atëfjóniñë batsjaca yojótbema. <sup>7-8</sup> Chabe uatsjëndayëngna chë puebloye tmojána saná jobuámiñama. Chora, canÿe shembása Samariocá, chë atëfjónoye tojánashjango, búyeshë jauafcamama; as Jesús tbojanayana: —Búyeshëma šmabuatssetá ca.

<sup>9</sup> Y chë shembása tbojanjuá: —Aca canye judío condmëna y atšna canye samaritaná. ¿Ntšamo cojtsobena atše býeshe juabuátjañama ca? (Cha chca tojanayana, er canjanopasana, judiëngna samaritanëngaftaca ndoñe monjanenatsëtsná.)

<sup>10</sup> Chora Jesús tbojanjuá: —Aca mo cojtsetátšëmbo nye ntšamo Bëngbe Bëtsá aca jatsetayama yojtsebošcá, y nda chë býeshe cmojtsábuatjanañama, acna más cha catjuábuatjañe, y chana béjaye vida bomniye cmajtuabuátšetaye ca.

<sup>11</sup> Y chë shembása tbojaniana: —Señor, tondaye quecátsbomna nye mo ndayecnaca býeshe jabuatsjuama, y chë atëfjóniñe corente tboca endmëna; y as, ¿ndayentsana cochjobenaye béjaye vida bomniye atše juabuátsetayama? <sup>12</sup> Bëngbe tempsca bëts taitá Jacob, quem atëfjóniñe bëngbiana tojëfšsanboshjona. Cachá, chabe básenga y chabe bayënga muentšana býeshe tmojëfšsanofšë; y ¿aca chabiana más bëtsá comna ca? —chë shembása yojtšichamo.

<sup>13</sup> As Jesús tbojanjuá: —Nýetscanga chë quem býeshentsana tmojofšenga, chënga cachiñe echantëtéjuendaye. <sup>14</sup> Pero chë chanjuabuátšetaye býeshentsana tojofšë chana ndocna te cachiñe quebochëtajuendaye. Cha chanjuabuátšetaye býeshna, chábeñe echántsemna mo cánýentšë béjaytema obocaniñcá, chë nýetsca tescama yomna tšabe vida jtsebomnna ca —cha tbojaniana.

<sup>15</sup> Chora chë shembása tbojaniana: —Señor, chca býeshe šmabuátšetá, as atše ndoñe cachiñe chašondetsajuendama, ni býeshe juafcamá moye jtsaboyama ndoñe chašondëtsemnna ca.

<sup>16</sup> As Jesús tbojaniana: —Motsa acbe boyá jachembuama y cochjésabo ca.

<sup>17</sup> Chora chë shembása tbojanjuá: —Boyá ndoñe quetsátsbomna ca.

As Jesús tbojaniana: —Tšabá tcjayana boyá ndoñe condmëna ca. <sup>18</sup> Er, aca shachna boyanga conjánabamna, y chë mora contsebomnna, acbe boyá ndoñe quenátšmëna. Ntšamo tconjayancá ndegombre entsemna ca.

<sup>19</sup> Chë shembása chca tojanuena ora, Jesúsbioye tbojaniana: —Señor, mora atše sëntsetatšëmbo, aca canya Bëngbe Bëtsabe juabna oyebuambnayá comnna. <sup>20</sup> Bëngbe tempsca bëts taitanga quem tjoca Bëngbe Bëtsá monjánadorana; pero tšëngaftanga, judiënga smondbëtsichamo, bënga Bëngbe Bëtsá jadóramna, Jerusalenoca chë luare canmëna ca.

<sup>21</sup> Chora Jesús tbojanjuá: —Shembása, šmoyeuná; canye tempo echanjóshjango y chora tšëngaftanga ndoñe quecmochátamna Bëngbe Bëtsá jadóramna, ni quem tjoye jabama, ni Jerusalenoye jana. <sup>22</sup> Tšëngaftanga samaritanënga ndoñe quešmatábuatma nda šmetsadoránama; pero bënga aiñe fsënduábuatma, er chë atsebacayá judiënguentšana end-abó. <sup>23</sup> Pero ora entsoshjajuana, ya chë tempo tocjobuache, ndaye ora chë Bëngbe Bëtsá chë Taitá ndegombre atschuanayënga, chë Espiritbeyeca y ndegombre juabnëngaca chábioye mochántadorana. Er chë Taitá enteboše chë chábioye adórayënga chca chamotsamama. <sup>24</sup> Bëngbe Bëtsá, Espiritu endmëna; y chë chábioye adórayënga entsamna, chë Uámana Espiritbeyeca y ndegombre juabnëngaca cha jtsadoránana ca —Jesús tbojaniana.

<sup>25</sup> Chora chë shembása tbojaniana: —Atše sëndëtatšëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojshjango orna, cha nýetsca soyëngama cašochjabuayená ca.

<sup>26</sup> As Jesús tbojaniana: —Atše, chë ácaftaca entsoyebuambná cha, cha entsemna ca.

<sup>27</sup> Chëntscuana, Jesusbe uatsjëndayënga tmojtanashjajna, y tmojtšanëuatjaná, Jesús canye shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndayeca cháftaca cojtsoyebuambná ca?

<sup>28</sup> Chorna, chë shembása chabe uafcanëja tojësanboshjona, y chë puebloye betscó tojtaná. Chocna, entsanga tojanëyana: <sup>29</sup> “Mabënga canye boyabása jinýama ca. Cha atše šonjauyana lempe ntšamo tijamcá. ¿Chë boyabása, chë Cristo tanántsemna ca?” —cha yojtšichamo.

<sup>30</sup> As chë entsanga chë pueblcana tmojánbocana y Jesús yojtsemnnoye tmojánashjajna. <sup>31</sup> Chca yojtšopasánentscuana, chë uatsjëndayënga Jesúsbioye imojtseimpadana: —Buatëmbayá, batsatema mose ca.

<sup>32</sup> Pero cha tojanëyana: —Atše canye soye jasama sëntsebomna. Tšëngaftanga chë soyama ndoñe quešmátatšëmbo ca.

<sup>33</sup> Chora chë uatsjëndayënga tmojanontšë entjanayana: —¿Nderado nda jasama chabiana tojiyëbo ca?

<sup>34</sup> Y Jesús tojanëyana: —Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiana entsemna. <sup>35</sup> Tšëngaftanga šmondbëtsichamo: “Cabá canta ishinyë entsashbena jaja saná chaotsebinýnama ca”; pero atše cbëyana: Minýënga tša entsanga moye montsabëbana; chënga montsemna mo jajañe saná játbanama tojtseprontancá. <sup>36</sup> Tšëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanánana jtsësháchifiana. Cachcá, tšëngaftanga cmontsamna



atšbiana entšanga júbuajana, chë nyetsca tescama yomna tšabe vida chamotsebomnama. Chë jaja saná átbanaye ora, jenënga y chë atbanayënga cánýiñe oyejuayënga jtsemnana. Cachcá, chë entšanga átsbeñe chamojtsošbuaché ora, nyetscanga, chë atšbiana obuájajanënga y chë atšbiana trabájayëngnaca cánýiñe oyejuayënga mochántsemna. <sup>37</sup> Quem entšangbe ichámuana, canýe ndegombre soye endmëna: “Chë jená canýa jtsemnana, y atbanayana inýa ca.” <sup>38</sup> Atše tšëngaftanga cbonjichamó canýe soye játbanama, y tšëngaftanga tondaye chešmatsma chca chaotsebíñyama. Inýenga chiñe bëtscá tmonjëftsetrabája, y tšëngaftangna, chëngbe trabajënguentsana šmojolograñe ca —Jesús tojánayana.

<sup>39</sup> Bëtscá entšanga, Samarioca pueblentšënga Jesúsbeñe imojtsanošbuaché, ntšamo chë shembása tojanéyanama. Chë shembása tojanéyana: “Lempe ntšamo atše tijamcá cha šonjauyana ca.” <sup>40</sup> As chë samaritanënga, Jesús yojtsemnentše tmojánashhajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjétana. <sup>41</sup> Y más entšanga, cach ntšamo Jesús yojtsanëtsëtsnacá tmonjanuena ora, chábëñe imojtsanošbuaché.

<sup>42</sup> Y chë shembása chë entšanga tmojanianyana: “Mora cocayé fsëntsošbuaché, ndoñe nýe ntšamo aca šcojáuyanama, sinó cach bënga chábioye oído fsëñjubaujóyeca; y mora fsëntsetatšëmbo ndegombre cha yojtsemna chë quem luare entšangbiana Atsebacyá ca.”

*Jesús, canýe mandado uajabuachanabe básabioye tbojanshná*

<sup>43</sup> Uta te chentšana, Jesús Samariocana tojáisanbocna y Galileoye tojataná. <sup>44</sup> Cach Jesús mëntšá tojánayana: “Canýa Bëngbe Bëtšabe juabna oyebuambnayá, cachabe luarentše oyenënga ndoñe bëtšá ntjabemëngana ca.” <sup>45</sup> Galileoca oyenënga Jerusalenoye tmojána, y tmojáninýe nyetsca bëtš soyënga ntšamo Jesús Bashco fiesta ora choca tojanmca. Chýyeca, Jesús Galileoye tojtanashjango ora, chënga tšabá tmojtanojfa.

<sup>46</sup> Galileocna, Jesús cachiñe Caná puebloye tojéšanashjango, chë béjayeca vínoye cha tojánbementše. Choca yojtsemna canýe mandadbe uajabuachaná, y chabe uaquiñana Capernaum puebloca šocá yojtsejájona. <sup>47</sup> Jesús Judeocana Galileoye tojánashjanguama, chë uajabuachaná tojanuena ora, Jesúsbiyoye tojána y ibojtseimpadana chabe yebnoye cháuama, chabe uaquiñá chabunetseshnáñama, er ya jtsóbanama yojtsemna ca. <sup>48</sup> As Jesús tbojanianyana: —Tšëngaftanga, Bëngbe Bëtšabe obenana jinýanýiyama bëtš soyënga atše jamama ndoñe šmonjinýëse, átsbeñe ndocna te ntšošbuáchiyana ca.

<sup>49</sup> Chora, chë mandadbe uajabuachaná Jesúsbiyoye tbojanianyana: —Taita, betso mabo, atšbe uaquiñá cabá ndóbana ora ca.

<sup>50</sup> As Jesús tbojanianyana: —Acbe yebnoye motsatá. Acbe uaquiñá ainá endëtsomñe ca.

Chë boyabásana tojanošbuaché ntšamo Jesús tbojanianyancá y tojtaná. <sup>51</sup> Cha yojtsataye orna, chabe oservénënga tmojánbocana jajébenguama y tmojanianyana: —Acbe uaquiñá tšabá entsatsmëna ca.

<sup>52</sup> As cha tojanatjá: —¿Ntseco orscana tbënjatëcja ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

<sup>53</sup> Chora chë taitá tojanenujabó, cachca ora Jesús tbojanianyana: “Acbe uaquiñá ainá endëtsomñe ca”. Y cha y nyetscanga chabe yebnentše oyenënga Jesúsbeñe imojtsanošbuaché.

<sup>54</sup> Ntšamo Jesús chora, chë uajabuachanabe uaquiñabiana tojanmca, Judeocana Galileoye yojtsataye orna, yojamna chabe utama chca bëtš soyë jamama, Bëngbe Bëtšabe obenana jinýanýiyama, Galilea luaroca.

## 5

*Jesús canýe jama ndobenábioye tbojanshná*

<sup>1</sup> Baseftayté chentšana, chë judiënga canýe oboyejuaye te imojtsebomna ora, Jesús Jerusalenoye tojána. <sup>2</sup> Choca, chë Oveshëngbe amashjuana ca uabáinentše yojamna canýe binche uafjajónaye, entšangbe pormániñe. Chë béjayna judiëngbe biyañe Betzata ca inuabaina. Chë béjaye juachañe shachna amashjuana otsojebniñe inamna. <sup>3</sup> Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana. <sup>4</sup> (Nderado nderado, Bëngbe Bëtšábioca canýe ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënanana.) <sup>5</sup> Chë šoquënguifne canýe boyabása inamna, unga bnëtšana y posufta uatama jama ndobená. <sup>6</sup> Jesús chë jajonábioye tbojáninýe ora y ba uatama chca yojamnna tojántatšëmbona ora, tbojantjá: —¿Quecojtseboše tšabá jtsatsmënama ca?

<sup>7</sup> Y chë šocá tbojanjuá: —Taita, ndocná quetsátsbomna nda chašujabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inýa atšbe natsana jtsamashënguana ca.

<sup>8</sup> Y Jesús tbojanianyana: —Matëtsbaná, acbe tjuashe mesocñe y matontsé jóyenana ca.

<sup>9</sup> Cach ora chë boyabása tšabá yojtsatsmëna, chabe tjuashe tojésanocñe y tojanontsé jtsanana. Chca tojanopasá ora, chë ochnayté inamna. <sup>10</sup> Chíyeca, chë tbojanshnábioye chë judiënga tmojaniana: —Mëntena ochnayté. Mënté ndoñe quenátopodena aca tjuashe jtsecutsnana ca.

<sup>11</sup> Y chë boyabása tojanëyana: —Chë šonjashná cha mëntšá šonjauyana: “Acbe tjuashe mesocñe y montsé jóyëna ca”.

<sup>12</sup> As chënga tmojantjá: —¿Nda yojtsemna chë “acbe tjuashe mesocñe y montsé jóyëna ca” tcmojauyaná ca?

<sup>13</sup> Pero chë shnaná ndoñe yontsetátsëmbo nda tbojanshnama. Chocna bëtsá entšanga imojtsemna; chcasna, Jesús chëngbe tsëntsajana tojanenatjëmbo.

<sup>14</sup> Chentsana, Jesús Bëngbe Bëtsabe bëts yebnentše chë boyabásabioye tbojáninÿëna y tbojaniana: —Mouena; mora aca ya ndoñe šocá quecátsmëna; bacna soyënga ndoñe cachiñe cattsama. Añëse, acbiama puerte mal echanjopása ca.

<sup>15</sup> Chë boyabása tojtsanoñe y chë judiënga tojanëyana: —Chë šonjashná cha Jesús entsemna ca.

<sup>16</sup> Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama. <sup>17</sup> Pero Jesús tojanëyana: “Atšbe Taitá nÿets tempo tšabe soyënga endbëtsama; cachcá, átšnacá tšabe soyënga séntsama ca.”

<sup>18</sup> Jesús tojanma ntšamo ochnayté ndoñe yonjanapodencá, y Bëngbe Bëtsabiama tojánayana “Atšbe Taitá ca”. Mëntšá Jesús yojtsanobiamná cach Bëngbe Bëtsacá. Chama, chë judiënga más imojtseboše Jesús jóbama.

#### *Bëngbe Bëtsabe Uaquiñabe obenana*

<sup>19</sup> Chentsana Jesús tojanëyana: “Ndegombre šcuayana: Bëngbe Bëtsabe Uaquiñá, nÿe cachabe cuenta tondaye quenátobena jamana. Cha jtsonÿayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana. <sup>20</sup> Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinÿinÿná; y más bëts soyënga bochanjinÿinÿiye, chë soyëngama tšëngaftanga chašmenjnanama. <sup>21</sup> Chë Taitá endama obanënga chámuatayenama y tšabe vida chamotsebonnama; cachcá, chë Uaquiñá entsama tšabe vida chamotsebonnama, ndëmuanÿënga cha tojtsebošcá. <sup>22</sup> Chë Taitá ndocnabiamna jatichámuana tšabá o ndoñe tšabá yontsama ca. Chabe Uaquiñábioye nÿets obenana tbonjatšetá nÿetscangbiamna jayanama tšabá o ndoñe tšabá tmontsamama.

<sup>23</sup> Chca, chënga chamuinÿinÿé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nÿetscanga mondbetsinÿinÿnáyca. Nda chë Uaquiñábioye ndoñe más uamaná tbonsebiamná, cach ndoñe más uamana ntsebiamnayana chë Taitábioye, nda chë Uaquiñá tbojchmóbioye.

<sup>24</sup> “Ndegombre šcuayana: Nda ntšamo atšë séntsichamcá šojoyeuná, y chë muentše šonjichmó chábeñe tojtsošbuaché, chë nÿetsca tescama yomna tšabe vida jtsebonnama. Chabiamna chë Uaquiñá ndoñe queochátayana castiganá chaotsemna ca. Chca, Bëngbe Bëtsabiama cha ya ndoñe más mo obanacá queochátsmëna, chábeñe ndošbuáchiye causa; y ya ndoñe nÿetsca tescama castiganá queochátsmëna. Y añë, chë nÿetsca tescama yomna tšabe vida echántsebonna.

<sup>25</sup> “Ndegombre šcuayana: Chë jobuáchama te ya tocjobuache. Chë te, chë Bëngbe Bëtsabiama mo obanëngcá imomnënga mochanjouena Bëngbe Bëtsabe Uaquiñá jtsóyëbuambnayana. Nda chca tšabá chašojoyeuná cha, tšabe vida echántsebonna.

<sup>26</sup> Er ntšamo Bëngbe Taitá obenana endbomncá, cachá jamama entšanga vida chamotsebonnama, chabe Uaquiñábioynaca obenana tbojatšetá entšanga vida chamotsebonnama jamana. <sup>27</sup> Chë Uaquiñá endmëna nda Bëngbe Bëtsá Entšá tbojánbema; chíyeca chë Taitá chábioye obenana tbojatšetá nÿetscangbiamna jayanama tšabá o ndoñe tšabá tmontsamama. <sup>28</sup> Chama ndoñe matenjnanana. Er canÿe tempo echanjobuache, y chora chë Uaquiñá obanënga echántschembuana; chënga mochanjouena y cach ora, chëngbe oyenocana mochanjésebobana. <sup>29</sup> Tšabe soyënga tmojëttsemënga, obanënguentšana mochántayena, chë nÿetsca tescama yomna tšabe vida jtsebonnama. Pero bacna soyënga tmojëttsemëngna obanënguentšana mochántayena nÿetsca tescama castiganënga jtsemnama ca” —Jesús tojanëyana.

#### *Jesús, ndegombre Bëngbe Bëtsabe ichmoná inamna*

<sup>30</sup> Mëntšánaca Jesús cachatbiamna tojánayana: “Nÿe átšbeyeca tondaye quetsátobena jamana. Chë Taitá šontsemánada ntšamo nÿetscangbiamna jayanama tšabá o ndoñe tšabá tmontsamama. Nÿe chca atšë séntsobena chë soye jamama. Ndoñe quetsátsoše jamana nÿe ntšamo cach atšë stsebošcá; pero sempre sëndbëtseboše jamama, ntšamo Taitá, chë šonjichmó cha tojtsebošcá. Chíyeca atšë nÿetscangbiamna séntsichamo tšabá o ndoñe tšabá tmontsamama; y ntšamo nÿetscangbiamna séntsichamcá, ndegombre endmëna.

<sup>31</sup> “Ntšamo cach atšbiana tijayanama, ndegombre entsemna ca stsihámëse, ntšamo stsihámécá, nyetscangbiana tondaye ntšámanana. <sup>32</sup> Pero inya entsemna. Cha endétatsëmbo y entsichamo ntšamo ndegombre atšbiana yomncá; y séntsetatsëmbo ntšamo cha atšbiana yojtsichámécá, nyetscangbiana aífie yojtsámanama. <sup>33</sup> Tšéngaftanga ínŷenga šmojanichámó atšbiana Juan jatjayama; y ntšamo cha tcmojauyancá ndegombre endmëna. <sup>34</sup> Masque chë soyënga cha tcmojáuyana, ndoñe quešnatájaboto ndocna entsá atšbiana chaotsichamo ‘cha aífie chca endmëna ca’. Atše quem soyënga séntsichamo ndayá nŷe tšéngaftanga atsebácanënga chašmotsemnana. <sup>35</sup> Juan enjamna mo canŷe u-juinŷanësha tojtsajuinŷana y tojtsabuashinŷinŷancá. Tšéngaftanga chabe buashinŷinŷanana šmonjinŷe, y šmonjábošëna rato cháftaca oyejuayënga jtsemnana. <sup>36</sup> Pero chë atše sënŷama soyëngacna más entsinŷinŷëna ntšamo atšbiana ndegombre yomncá, chë ntšamo Juan atšbiana tojánayanama. Ndayá atšbe Taitá sojabonyé jamama, ntšamo atše séntsamécá, entsinŷinŷná ndegombre chë Taitá šojichmoma. <sup>37</sup> Atšbe Taitá, chë šojichmó chánaca entsichamo ntšamo atšbiana ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinŷe. <sup>38</sup> Pero tšéngaftangbe ainanoye chabe palabra ndoñe tonjómashëngo, cha tbojichmóbeñe tšéngaftanga ndoñe quešmatošbuaché causa. <sup>39</sup> Tšéngaftanga, Bëngbe Bëtsabe palabra tša jtsatsjéundayana, er šmondobátmanana, chca jtsamëse chë nyetsca tescama yomna tšabe vida jónŷënama. Y Bëngbe Bëtsabe uabemana palabrënguiñe atšbiana endayana ntšamo ndegombre yomncá; <sup>40</sup> pero masque chca, tšéngaftanga ndoñe quešmátšboše atše jtséstonana, y chca, tšabe vida jtsebojnana.

<sup>41</sup> “Atše ndoñe quetsátšboše entšanga yapa tšabá atšbiana chamotsichámuama. <sup>42</sup> Y inŷe soye, atše puerte chondëbuatma, y séndétatsëmbo tšéngaftanga Bëngbe Bëtsá ndoñe šmondobonshánama. <sup>43</sup> Atšna atšbe Taitabe cuenta sënŷabo, y tšéngaftanga ndoñe quešmátšboše atše jofjana. Pero inya, cachabe cuenta tojabábioye cocayé aífie šmatjofja. <sup>44</sup> Tšéngaftanga corente jésebošana, ínŷenga tšéngaftangbiana tšabá chamotsichámuama, y ínŷëngbiana tšabá jtšichámuama; pero ndoñe ntsebošana chë nŷe canŷe Bëngbe Bëtsá tšéngaftangbiana cachcá chaotsichámuama. Chca šmojtsamëse, ¿ntšamo šmochtobena Bëngbe Bëtsábeñe jtsošbuáchiyana? <sup>45</sup> Ndoñe šmattsejuabnaye, atšbe Taitabe delante tšéngaftangbe contra atše chjayana ca ntšamo tšéngaftanga šmojtsamama. Tšéngaftanga tša jtsobátmanana atsebácanënga jtsemnana, chë ntšamo Moisesbe leyinŷe endayancá šmojtsamama; pero ndegombre, ntšamo cha tojayancá, cach tšéngaftangbe contra entsemna. <sup>46</sup> Tšéngaftanga, chë Moisés tojéftsanabema soyinŷe šmojtsošbuachese, átsbeñnaca šmattšošbuáchiye, er cha atšbiana tojanábema. <sup>47</sup> Pero chë tojanábema soyinŷe tšéngaftanga ndoñe šmontošbuachesa, ¿ntšamo šmochjobenaye chë atše séntsichamo soyënguiñe jtsošbuáchiyana ca?” —Jesús tojanéyana.

## 6

*Jesús shachna uaranga boyabásenga saná tojanacaredadó*  
(Mt 14.13-21; Mc 6.30-44; Lc 9.10-17)

<sup>1</sup> Chë soyënga tojanopasá chentsšana, Jesús chabe uatsjéundayëngaftaca tojána Galilea uafjajónaye chenguana. Chë uafjajónayna Tiberias cánaca inauabaina. <sup>2</sup> Ba entšanga imojtséstonana, er chënga tmojáninŷe cha bëts soyënga jtsamana, šoquënga jtsashnayëse. <sup>3</sup> As Jesús tjoye tojántsjuá, y choca chabe uatsjéundayëngaftaca tojanótbema. <sup>4</sup> Ya judiëngbe canŷe fiesta, chë Bashco fiesta, yojétsobeco.

<sup>5</sup> Jesús tojanótbema ora, tojanontjéšë y tojánanŷe ba entšanga chábioye imojtsebëconaye. As Felípbioye thojaniyana: —¿Ndayentše saná cuanjabuámiye nyetsca quem entšanga chamosama ca?

<sup>6</sup> Jesús chca thojaniyana, ana Felípbioye jinŷama ntšamo cha tabuanjojuama; er cach Jesús tšabá inatátsëmbo ndayá jamama. <sup>7</sup> Y Felipe thojanjuá: —Ni mo uta patse denario crocenánaca nanjopódia tandëse jabuámiyama, nyetsca entšanga nŷe mo batšatémnaca chamuétsesama ca.

<sup>8</sup> Chorna, Jesusbe canŷe uatsjendayá, Andrés ca uabainá, Simón Pédrëbe catsata, Jesúsbioye thojaniyana: <sup>9</sup> —Muentše entsemna canŷe básetema y cha shachna cebada tandëse y uta beónata entsebojnana. Pero, ¿ndayase nŷe nyëtsatema chëfta entšangbiana ca?

<sup>10</sup> As Jesús tojánayana: —Entšanga mëyana chamotbiama ca.

Becá shácua chë luariñe inamna, y nyetsca entšanga chiñe tmojanoshëntsjatbiama. Chë entšanguentše shachna uaranga boyabásenga imojtsemna. <sup>11</sup> Chora Jesús, chë tandëse

chabe cucuatšine tojanca, y Bëngbe Bëtsábioye chë tandësama tbojtanchuá; y chabe uatsjéndayënga tojanëjata, y chë uatsjéndayëngna nyetsca entsanga imojtsetbiámënënga tmojanatšatá. Cachá Jesús chë beónaca tojanma, y ntšamo entsanga imojanbošcá tmojanatšatá. <sup>12</sup> Nyetscanga tmojanse y tmojanoshachá ora, Jesús chabe uatsjéndayënga tojanëyana: —Chë ojamnëtemënga šmochtsatbananga, tondaye nje cachá ntjëftsonyáyama ca.

<sup>13</sup> As chënga tmojanatbaná, y chë tmojanse shachna cebada tandësentšana tojanójamëtemëngaca, bnëtsana uta sbarécua tmojanajutjé. <sup>14</sup> Chë entsanga quem bëts soye Jesús jamama tmojáninýe ora tmojánayana: “Ndegombre quem boyabása, chë quem luaroye jabama Bëngbe Bëtsabe juabna jabóyebuambayama cha entsemna ca.”

<sup>15</sup> Jesús yojtsetátšëmbo entsanga chëngbe rey jabemama imojetsebošama. Chíyeca chajoye tojtsaisanoñe canýa jtsoññama.

*Jesús béjaye juatsbuacá yojtsaye*  
(Mt 14.22-27; Mc 6.45-52)

<sup>16</sup> Tojanibétata ora, Jesusbe uatsjéndayënga chë uafjájónayoye tmojantsmá; <sup>17</sup> barquëshañe tmojanenojayé, y tmojanontšé jenashbuachënguana, chca, Capernaumoca jenbocnama. Ya ibeta yojtsemna, y Jesús cabá ndoñe chëngbioye ntashjanguana. <sup>18</sup> Chca imojtse-nashbuachnëjuana orna, chë béjayiñe jabuache binýia tojanóshjango y bëts olëshënga chë barquëshoye yojtsóantšetaye. <sup>19</sup> Shachna o chnënguana kilómetro chënga tmojána ora, tmojáninýe Jesús chëngbioye yojtsebëconaye, béjaye juatsbuacá yojtsaye. Chënga chca tmojáninýe ora tša tmojanocochautjaná, <sup>20</sup> pero Jesús tojanëyana: “Atše sëndmëna; ndoñe matauatjëngana ca.”

<sup>21</sup> Chora chë uatsjéndayënga oyejuayënga imojtseboše Jesús chë barquëshoye jofjana, y ndoñe bënëntscose ya chë imojtsaye luaroye tmojánashjajna.

*Entsanga Jesús tmojánguango*

<sup>22</sup> Yëfsana, nyetsca entsanga, chë uafjájónayoye chenguánoica tmojanoqueđanga tmojáninýe, chë inýe yëfsana chë nýe canýe barquësha yojuamnëshañe Jesusbe uatsjéndayënga tmojt-sanoñama, y Jesús chëngaftaca ndoñe tonjánama. <sup>23</sup> Pero chëntscuana, Tiberias pueblentšana inýe barquëshangá tojanáshjajna canýe luarentše, chë Bëngbe Utabná Jesús chabe Taitábioye tbojtanchuá chentšana, entsanga saná tmojanse luare bëconana. <sup>24</sup> Asna, ni Jesús ni chabe uatsjéndayënga chentše ndoñe montsemnama chë entsanga tmojáninýe ora, chë barquëshangañe tmojanenojayé y Capernaumoye tmojána Jesús jetsenguanguama.

*Jesús, chë nyetsca tescama yomna tšabe vida jtsebomnama tandëse*

<sup>25</sup> Chë uafjájónayoye chenguánoyoye tmojánashjajna ora, Jesús tmojáninýena y mëntšá tmojan-tjá: —¿Buatëmbayá, ntseco ora muentše tcojášhjangó ca?

<sup>26</sup> Y Jesús tojanëyana: —Ndegombre chëyana, tšëngaftanga ndoñe atše quešmatšngué, chë bëts soyënga tijamama, sinó nýe chë jtoshachaye nyetsá tandëse šmojasama. <sup>27</sup> Ndoñe matenángmenana chë nýe ndoñe bën y jopochócana sanama; chë ndmopochócaye saná, chë nyetsca tescama yomna tšabe vida jtsebomnama saná šmochjánguango. Chë saná, Bëngbe Bëtsá Entšá tbojanbemá cmochanjátsataye, er Bëngbe Bëtsá chë Taitá tonjinýanýé, tšabe soyëngaca, cha chábioye tbojuábuayanama ca —tojánayana.

<sup>28</sup> Chora chë entsanga tmojantjá: —¿Ndayá fchjama ntšamo Bëngbe Bëtsá yojtsebošcá chaotsemnama ca?

<sup>29</sup> Chca tmojantjá ora, Jesús tojanëyana: —Chë Taitá entseboše tšëngaftanga chabe ichmonábeñe chašmotšošbuáchema ca.

<sup>30</sup> Chora chënga tmojanianya: —¿Ndaye tšabe soye cochjama acbe obenana bënga jinýanýiyama ca? Chë soye chaftšjinýëse, áceñe fchantšošbuáchiye. ¿Bëngbiamá taicoch-jama ca? <sup>31</sup> Bëngbe tempšca bëts taitanga entsanga ndoyenoca maná ca uabaina saná tmojanse. Bëngbe Bëtsabe uabemana palabreñguñe mëntšá endayana: “Cha celoca tandëse tonjanatšatá chamosama ca” —chënga tmojánayana.

<sup>32</sup> Chora Jesús tojanëyana: —Ndegombre chëyana, Moisés chënga ndoñe chë celoca tandëse tonjanatšatá; Bëngbe Bëtsá Bëngbe Taitá chëngbioye tojanatšatá chë maná ca uabaina tandëse; y cha endmëna nda celocana chë ndocna te ndmopochócaye tandëse ndegombre cmondatsatná. <sup>33</sup> Er Bëngbe Bëtsábocana tandëse entsemna chë celocana tojastjanguá; y cha quem luare entsangbiamá entsama chë nyetsca tescama yomna tšabe vida chamotsebomnama ca —cha tojanëyana.

<sup>34</sup> Chora chënga tmojanimpadá: —Taita, chë tandëse sempre šcochtsatšatnayca ca.

<sup>35</sup> Y Jesús tojanëjua: —Atše sëndmëna entsanga chë nyetsca tescama yomna tšabe vida jtsebomnama tandëse. Nda atše chašojtsëstona, sempre oyejuayá echanjëftsemna y Bëngbe Bëtsabe soyënga nyets tempo echanjesóbmñe, mo nda nyets tempo saná totsobomñíca, y

ndocna te tboñtsishéñtsancá. <sup>36</sup> Pero ntšamo ya tbonjauyancá, tšéngaftanga atše šmonjinýe y cabá ndoñe átšbeñe quešmatošbuaché. <sup>37</sup> Nda atšbe Taitá atšbiana tbojabocacá, cha atše šochantséštona; y nda átšbioye šojtséštona, átšbentšana quichtétábocna. <sup>38</sup> Er atšna celocana sējnabo chē šojichmó cha ntšamo yojtsebošcá jamama, y ndoñe nýe ntšamo atše stsebošcá. <sup>39</sup> Y chē šojichmó cha entseboše, ni mo canýa chē atšbiana tojabacacá chentšana, atše chaileñcia pochocaná chaotsemnana; y quem luare jopochócama tena, nýetscanga atšbiana tojabacangbiana chámuatayenama atše chaimama. <sup>40</sup> Er atšbe Taitá entseboše, nda chabe Uaquiniábioye tbojinýe y chábeñe tojtsošbuaché, chē nýetsca tescama yomna tšabe vida chaotseboñna, y quem luare jopochócama tena, cha cháuatayenama atše chaimama ca —Jesús tojanéyana.

<sup>41</sup> “Atše sēntsemna chē celocana tojóshjango tandēse ca” Jesús tojanéyana causa, chē judiēnga tmojanontsé chabiana podesca íchámuana. <sup>42</sup> Chēnga mēntšá imojtsichamo: —¿Mua ndoñe Jesús yondmēna, chē Josebe uaquiná? Chabe bētsétsata bēnga tmotsábuatmñe. ¿Ntšamo cha mora yochjátichamo celocana tojástjango ca?

<sup>43</sup> As Jesús tojanéyana: —Atšbiana ndoñe podesca matichámuana. <sup>44</sup> Ndocná quenátobena atše juastana, chē Taitá, chē šojichmó cha, ainaniñe chca chaotsebošama ndoñe tbonjuajuabúachēse; y atše chanjama cha cháuatayenama quem luare jopochócama te. <sup>45</sup> Chē tempsquēnga Bēngbe Bētsabe juabna oyebuambnáyēnga mēntšá tmojanábema: “Cach Bēngbe Bētsá nýetscanga echanjuabatambá ca.” Chcasna, nda atšbe Taitábioye tbojoyeuná, y ntšamo chē Taitá tbojabuatēmbacá tojuatsjinýe, cha atše sochanjuasto.

<sup>46</sup> “Ndocná atšbe Taitá tbonjinýe. Nýe chē Bēngbe Bētsábicocana tojabá aiñe. <sup>47</sup> Ndegombre šcuayana: Nda átšbeñe tojtsošbuaché, chē nýetsca tescama yomna tšabe vida echántseboñna. <sup>48</sup> Atše sēndmēna entšanga chē nýetsca tescama yomna tšabe vida chamotseboñnama tandēse. <sup>49</sup> Masque tšéngaftangbe bēts taitanga, entšanga ndoyenoca chē maná ca uabaina saná tmojanse, pronto tmojanóbana. <sup>50</sup> Pero atše sēntsoyebuambná ndayá chē celocana tojóshjango tandēšama. Nda chē tandēse tojase, ndoñe queochatóbana. <sup>51</sup> Atše sēntsemna entšanga chē nýetsca tescama yomna tšabe vida jtseboñnama tandēse, chē celocana tojóshjanguēse. Nda quem tandēse tojase, nýetsca tescama nýe ainá echanjesomñe. Chē chanjátšataye tandēšna, cach atšbe cuerpo entsemna. Chca chanjama quem luare entšanga chē nýetsca tescama yomna tšabe vida chamotseboñnama ca” —Jesús tojánayana.

<sup>52</sup> Chora chē judiēnga tmojanontsé enatsétsnayana: —¿Ntšamo cha yochjobenaye cachabe cuerpo jatšatayana bēnga jasama ca?

<sup>53</sup> As Jesús tojanéyana: —Ndegombre šcuayana: Tšéngaftanga Bēngbe Bētsá Entšá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmochátšomna. <sup>54</sup> Nda atšbe cuerpo tojase y atšbe buiñe tojofšé, chē nýetsca tescama yomna tšabe vida echántseboñna, y quem luare jopochócama te atše chanjama cha cháuatayenama. <sup>55</sup> Atšbe cuerpo ndegombre saná endmēna, y atšbe buiñe ndegombre ofšēšnayie. <sup>56</sup> Nda atšbe cuerpo tojase y atšbe buiñe tojofšé, átšeftaca canýiñe mo canýacá echántsemna, y átšnaca cháftaca. <sup>57</sup> Atšbe Taitá, chē šojichmó cha, vida endomna, y atše chábeyeca vida sēndboñna; cachcá, nda atšbe cuerpo tojase, chana átšbeyeca vida jtseboñnana. <sup>58</sup> Chē ndaye soyama atše sēntsoyebuambná, atšbe cuerpo y atšbe buiñe, entsemna chē celocana tojóshjango tandēse. Masque tšéngaftangbe bēts taitanga chē maná ca uabaina tandēse tmojanse, pronto tmojanóbana; pero quem tandēse ndoñe cachcá quenátšmēna. Nda quem tandēse tojase, nýe nýets tempo vida echanjesóboñne ca —Jesús tojánayana.

<sup>59</sup> Chē soyēngna Jesús tonjanabuatambá Capernaum pueblentse, chē judiēngbe enefjuana yebnentse.

*Chē nýetsca tescama yomna tšabe vida jtseboñnana palabrenga*

<sup>60</sup> Chca tmojanuena ora, banga Jesusbe ústonēnga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

<sup>61</sup> Jesús yojtsetátšēmbó chēnga ndoñe tšabá imontsichámuama; as, chēnga tojanatjá: —¿Ntšamo chontsētsētnacá ndoñe tšabá cmontsēuenana ca? <sup>62</sup> Y chcasna, Bēngbe Bētsá Entšá tbojanbemá, chē cha tempo inamna luaroye tojētštsjuama šmojinýēse, ¿ntšamo šmatsejuabnaye? <sup>63</sup> Bēngbe Bētsabe Espiritu entsama entšanga chē tšabe vida chamotseboñnama. Chē cuerpo ndoñe uámana soye quenátšmēna; chē tbonjáuyana soyēnguiñe entsemna chē Uámana Espiritbe uajuabúachenana y chē tšabe vida. <sup>64</sup> Pero masque chca entsemna, tšéngaftangbentšana banga átšbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entsanga jábuayenama Jesús tojanbojatsé orscana, cha inatátsëmbo ndëmuan'yenga chábeñe ndoñe mochanjanošbuáchiye, y nda chë uayayëngbe cucuatšifñe yochjéftsayentšbashejuana. <sup>65</sup> Y Jesús yojtëtóntša oyebuambnayana: — Chiyeca, atše tšëngaftanga tbonjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

<sup>66</sup> Chë causa, chentšana, ba chabe ústonëga cachá tmojesanonýa, y cháftaca ya ndoñe imontsajna. <sup>67</sup> Chora Jesús, chë bnëtsana uta uatsjëndayënga tojanëyana: —¿Y tšëngaftangnaca, jtsóñama y atše jéseboshjonama šmojtseboše ca?

<sup>68</sup> Chora Simón Pedro tbojanjá: —Bëngbe Utabná Jesús, ¿chcasna ndábioye fchjanga ca? Nye aca šcontsëtsná chë nyetsca tescama yomna tšabe vida jtsebomnama palabrenga. <sup>69</sup> Acheñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

<sup>70</sup> Chora Jesús tojanëyana: —Atše tbonjabacacá, chë bnëtsana útata; pero canya tšëngaftangntšana, mo Satanase canye trabajayacá entsemna ca.

<sup>71</sup> Judas Iscariote, chë Simonbe uaqiñabiama chca Jesús tojánayana. Er chana masque canya chabe bnëtsana uta uatsjëndayënguentšá inamna, Jesús uayayëngbe cucuatšifñe yochjáftsayentšbashejuana.

## 7

### *Jesusbe catšátanga chábeñe ndoñe montsanošbuaché*

<sup>1</sup> Chë soyënguentšana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chiyeca, Jesús ndoñe yontseboše Judeoye jama. <sup>2</sup> Chora, judiëngbe canye bëts fiesta semana yojtsobeco. Quem fiestënguentšucana, chë judiënga imojanamana tambënguiñe jtsiyenana. <sup>3</sup> As chora Jesusbe catšátanga tmojanayana: — Muentše ndoñe catjoquéda; Judeoye motsa, choca condbomna ústonëga, ntšamo contsamcá chócnaca chaminýama. <sup>4</sup> Er nda tojtseboše chamotsábuatmama, chabe soyënga ndoñe iytëcana ntšamana. Aca bëts soyënga Bëngbe Bëtsabe obenánaca contsamëсна, motsa y nyetscangbe delante chca chochjama ca —chënga tmojanayana.

<sup>5</sup> Er ni mo cach Jesusbe catšátanga chábeñe ndoñe montsanošbuaché. Chiyeca chënga chca tmojanayana.

<sup>6</sup> Chora Jesús tojanëjua: —Atšbe ora cabá ndoñe quentóshjango, pero tšëngaftangbiana mocna órnaca tšabá endëtsomñe. <sup>7</sup> Chë nye quem luarama enójuabnaye entsanga ndoñe quemátobena tšëngaftanga jtsëbuayënjana, pero átšbioyna aifñe, er atše puerte tšabá sëntsinýañná ntšamo chënga imojtsamcá ndoñe tšabá yontsemnama. <sup>8</sup> Tšëngaftanga chë fiesta ma šmochjá. Atšbe ora cabá ndoñe quentóshjango. Chiyeca atše choye ndoñe quicháta ca —cha tojánayana.

<sup>9</sup> Jesús chë soyënga tojanëyana y cach Galileoca tojtsanoquedañe.

### *Chë tambënguiñe jtsiyenama fiesta*

<sup>10</sup> Chabe catšátanga chë fiestoye tmojána chentšana, Jesúsna tojána, masque ndoñe entsángbeñe, sinó mo iytëcana cuya. <sup>11</sup> Chë fiestocna, judiënga Jesús imojtsenguaye y imojtsichamo: —iNdayentšë chë boyabása yojtsemna ca?

<sup>12</sup> Entsángbeñe ba soyënga chabiana iytëcana imojtsichamo. Inyënga chabiana imojtsichamo: “Cha tšabia endmëna ca”; pero inyënga: “Cha entsanga entsaingña ca”.

<sup>13</sup> Pero ndocná Jesusbiana becá añémoca yontsoyebuambná, chë judiëngbe amëndayëngbiana imojtsauatja causa.

<sup>14</sup> Chë fiesta semana tsëntsañe yojtsó ora, Jesús Bëngbe Bëtsabe bëts yebnentše tojánamashëngo, y tojanontšë jabuátambana. <sup>15</sup> Chentše chë judiënga, ntšamo Jesús tojanabuatambacá tmojanuena ora, ojanánënga imojtsichamo: —Bëtscá ntjuatsjinýcá, ¿ntšamo nyetšá nantsetatšëmbo ca?

<sup>16</sup> As Jesús tojanëjua: —Atšbe buatëmbayana ndoñe nye átšbentsana quenatóbocana, ndayá chë šojichmó chábentšana. <sup>17</sup> Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe buatëmbayana Bëngbe Bëtsábocana yóbocanama o nye átšbentsana. <sup>18</sup> Nda nye cachabe juábnaca tojtsoyebuambná, jtsebošana entsanga más bëtsá chamobemama; pero nda bëtscá tojtsama, chë tbojichmóbioye entsanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseingñayana.

<sup>19</sup> “Ndegombre, Moisés tšëngaftangbiana ley tojéftsanaboshjona. Pero masque chca, tšëngaftangntšá ndocná quenátama ntšamo cha tojéftsanmandacá. Y ¿ndáyeca šmojtseboše atše jóbama ca?” —Jesús tojanatjá.

<sup>20</sup> Chora entsanga tmojanjá: —iNdegombre aca bacna bayëjbe juabna contsambá! ¿Nda yojtseboše aca jóbama ca?

<sup>21</sup> Chora Jesús tojanéyana: —Nýetsca tséngaftanga ojnánánēnga atše šmontsonyá, atše canye ochnayté canye entśá tijashnama. <sup>22</sup> Pero, Moisés tcmojñtsanamēndá bássetema base bobachtema chē más delicadentse jatētsana, chaotsinýnama (ndoñe nýe Moisésbeyeca chca, sinó Moisésbiamá más tempca bēts taitanga chca jamama imojanamánayeca); y tséngaftanga canye bássetema base bobachtema chē más delicadentse jatētsana, masque chē te canye ochnayté totsomñēse. <sup>23</sup> Y mora, ntšamo Moisés tcmojñtsanamēndá ndoñe cachcá ntjonýayama, canye bássetema chca jatētsana masque ochnayté; as, ¿ndáyeca atše šmojtsayaná, atše ochnayté canye entśabe nýets cuerpo tijashnama? <sup>24</sup> Nýe batśá jinýēse, ínýēngbiamá ndoñe matichámēngana tśabá o ndoñe tśabá tmonjama ca. Ntšamo chē soyēnga ndegombre bētssemnama natsana lempe tśabá jshétsetatšēmbēse, šmochjayana tśabá o ndoñe tśabá tmonjama ca —Jesús tojánayana.

*Jesús tojánayana ndēmocana cha tojánabama*

<sup>25</sup> Chora bássetanga Jerusalenoca oyenēnga tmojanontśé ichámuana: —¿Mua ndoñe yontsemna chē jóbama montsenguá cha ca? <sup>26</sup> Masque ba entśangbe delante entsoyebuambná, ndocná chábioye ndocá ntjauyanana. ¿Nderado mo chē bēngbe amēndayēnga imojtsejuabná cha chē Cristo, chē Uámana Uabuayaná yojtsemna ca? <sup>27</sup> Pero bēnga mondétatšēmbo ndēmocá quem boyabása yomnana; y chē cuenta, chē Cristo chaojabo ora, ndocná queochátstatšēmbo ndēmocana cha yochjabama ca —chēnga imojtsichamo.

<sup>28</sup> Chca tojanuena ora, Bēngbe Bētsabe bēts yebnentse Jesús yojtsabuátambayēntscuana, cha jabuache tojánayana: —¿Tséngaftanga šmojtsejuabná atše ndegombre šmabuatma, y ndēmocana tijabama šmojtsetatšēmbo ca! Pero nýe atśbe cuenta, ndoñe chiyátabo, ndayá canya šojichmóyeca, nda ntšamo ndegombre yomncá nýetsca soyēngama endbētsoyebuambnaye; y tséngaftanga cha ndoñe quešmatábuatma. <sup>29</sup> Atśna aiñe cha sēnduábuatma, er atše chábentšana sēnjabo y cha quem luaroye šonjichmó ca —Jesús tojánayana.

<sup>30</sup> Jesús chca tojánayana ora, chēnga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango. <sup>31</sup> Banga chentse Jesúsbeñe imojtsanošbuaché y tmojánayana: “Chē Uámana Uabuayaná chaojabo ora, ¿quem boyabásabiamá más tśabe soyēnga yochjama ca?”

*Chē fariseunga tmojánbošena Jesús jishachama*

<sup>32</sup> Chē fariseunga tmojánatšēmbona ntšamo entśanga Jesusbiamá iytēcana imojtsencuéntaye. As, chēnga y chē bachnangbe amēndayēnga tmojanichamó bássetanga Bēngbe Bētsabe bēts yebnoca josticiēnga, Jesús chamuishachama. <sup>33</sup> Chora Jesús tojánayana: “Muentšana nýe basefatiyé tséngaftangafaca chanjéftsemna; chentšana, chē šojichmó chábioye chanjétpadésa. <sup>34</sup> Chora tséngaftanga atše šmochántseguaye, pero ndoñe quešmochátinýena; y ndayentse chántsemnoca ndoñe quešmochatobenaye jashjanguama ca.”

<sup>35</sup> Chora chē judiēnga tmojanontśé entjanayana: “¿Ndēmoye quem boyabása yochjá, y bēnga ndoñe mochanjobenaye jinýenama ca? ¿Inýe fshantsēngoye, judiēnga tmojuashanēngbioye yochjá, y choca chē ndoñe judiēnga yochjabuatambá? <sup>36</sup> ¿Ntšamo yojtsentsáyana cha šonjauyancá, chē ‘tséngaftanga atše šmochántseguaye, pero ndoñe quešmochátinýena; y ndayentse chántsemnoca ndoñe quešmochatobenaye jashjanguama ca?’ —chēnga imojtsichamo.

*Béjayēnga vida bomniye*

<sup>37</sup> Chē fiesta jopochócama te yojamna chē más uámana te. Chē te, Jesús entśángbentse tojantsá y jabuache tojánayana: “¿Nda tbojtsajuendá, átšbioye chauabo y chaošfél? <sup>38</sup> Ntšamo Bēngbe Bētsabe uabemana palabreñguñe endayancá: ‘Nda átšbeñe tojtsošbuaché, cha echántsemna mo ndabe ainantšana vida bomna béjayēnga tojtsobocancá.’ Chca echántsemna átšbeñe ošbuáchiyēngbiamá ca” —cha tojánayana.

<sup>39</sup> Chē sóyeca, Jesús yojtseboše jayanana, chábeñe ošbuáchiyēnga chē Uámana Espiritu mochjanóyēngacñe ca; er chē Uámana Espiritu cabá ndoñe tonjánabo, Jesús corente bētsá yojamnana cabá ndoñe tmonjaninýē causa.

*Nýetsca entśanga ndoñe cachcá Jesusbiamá imontsejuambnaye*

<sup>40</sup> Chca tmojanuena ora, ínýēnga imojtsichamo: —Quem boyabása ndegombre chē Bēngbe Bētsabe juabna oyeuambnáyá entsemna, chē Cristbe natsana jabamá ca.

<sup>41</sup> Inýēnga imojtsichamo: —Ndegombre cha chē Cristo, chē Uámana Uabuayaná entsemna ca.

Pero ínýēnga: —Ndoñe, er chē Cristo Galileocana ndoñe queochátabo. <sup>42</sup> Ndegombre, Bēngbe Bētsabe uabemana palabreñguñe endayana, chē Cristna rey Davidbentšana entśá

canmëna, y Belenocana caochjabo ca, cach puebllocana ndayentśá David inamna ca — chënga imojtsichamo.

<sup>43</sup> Y chca, ínÿengna Jesusbe pavor imojtsemna, y ínÿengna chabe contra. <sup>44</sup> Inÿenga imojtseboşe Jesús jishachama, pero ndocná tbonjánishache.

*Chë amëndayënga Jesúsbeñe ndoñe montsanoşbuaché*

<sup>45</sup> Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtanashjaina ora, tmojanatjá: —¿Ndáyeca ndoñe Jesús şmonjuánatse ca?

<sup>46</sup> Chora chë josticiënga tmojanëjua: —Ndocná quenatoyebuambná ntşamo chë boy-abása tonjoyebuambacá ca.

<sup>47</sup> Chora chë fariseunga tmojanëyana: —¿Tşëngaftángnaca şmojalesenciá cha chacmaingñema ca? <sup>48</sup> ¿Nderado bëngbe amëndayënguentśá o bënga fariseunguentśá nÿe mo canÿa chábeñe tayojsosbuaché? <sup>49</sup> Pero quem entşanga, ntşamo leyíñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

<sup>50</sup> Chora Nicodemo, canÿa fariseunguentśá, chë Jesúseftaca jencuéntama ibeta tojáná cha, tojánayana: <sup>51</sup> —Ntşamo bëngbe leyíñe endayancá, bënga ndoñe quemuátobena jayanana canÿe entśá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatşëmbuama ca.

<sup>52</sup> Chora chënga Nicodemo tmojanjúá: —¿Acnaca chábeñe cojtsoşbuaché y mo canÿe Galileoca entśacá cojtsejuabná ca? Bëngbe Bëtsabe uabemana palabrenguiñe cochjuat-sjinÿe, y cochanjinÿe ni canÿa Bëngbe Bëtsabe juabna oyebuambnayá Galileocana yochjabo ca.

*Chë shema boyábioye ínÿaftaca ingñayá*

<sup>53</sup> Fariseunga y bachnangbe amëndayënga chë josticiëngbioye tmojanëcácanentşana, cada ona cachabe yebnoye imojtsatóñënga.

## 8

<sup>1</sup> Pero Jesusna canÿe tjoye, Olivos ca uabáinoye tojtsanoñe. <sup>2</sup> Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nÿetsca entşanga tmojanobeconá jounama, y Jesús tojanótbema y tojanontśé jabuátambama.

<sup>3</sup> Chorna, báseftanga ley abuátambayënga y fariseunga tmonjánashjaina, y canÿe shembása tmojanëshjango. Chana tmojáninÿena chabe boyábioye ínÿaftaca ibnetsoingñañëntscuana; nÿetscangbe tsëntsaca tmojanatśá, <sup>4</sup> y Jesús tmojanianaya: —Buatëmbayá, quemuá fsëñjínÿena chabe boyábioye ínÿaftaca bondëtsoingñañëntscuana. <sup>5</sup> Leyíñe Moisés şonjanamëndá mëntśá uamana shembásengna ndëtşbéngaca jtsëbáyama. ¿Ca ntşamo catjayana ca?

<sup>6</sup> Jesús chca tmojanianaya ana jisháchichiyama, chca chënga jtsebobmna ndáyeca chabe contra jayanana. Pero Jesús nÿe fshantsoye yojotsejbéna y yojóntsa ntşabuáfjaca fshantsiñe juabemama. <sup>7</sup> Chënga nÿe imojtsetjanaye causa, Jesús tojantsbaná y tojanëyana: —Nda tşëngaftanguentśá tondaye bacna soyënga tondbomná, chaobojatśé ndëtşbeca jatëchënjama ca.

<sup>8</sup> Chentşana Jesús cachiñe fshantsoye yojtotsejbéna, y yojtëtóntsa fshantsiñe jtëtabemama.

<sup>9</sup> Chca tmojanuena ora, entşanga tmojanontśé canÿánÿa chentşana jésecocanana; nat-sana chë más bëtsanánënga y chë ínÿengna ústonoye. Canÿa Jesús tonjanoquedá y chë shembásanaca. <sup>10</sup> As, Jesús tojtantsá y tbojantjá: —¿Shembása, ndayentşe chë acbe contra ichámënga imojtsemna? ¿Ndocná acbiama tonjayana castiganá chacotsemna ca?

<sup>11</sup> Ndoñe, Taita, ndocná ca —chë shembása tbojanjúá.

Chora Jesús tbojanianaya: —Atşe cach ndoñe acbiama quichátayana castiganá chacotsemna ca. Morna, motsatoñe, pero ndoñe más bacna soye catsama ca.

*Jesús yomna quem luarentśa entşangbe juabna binÿnayá*

<sup>12</sup> Jesús cachiñe Bëngbe Bëtsabe bëts yebnentşe yojtsabuátambaye, y entşanga mëntśá tojanëyana: —Atşe sëndbinÿina quem luare entşangbe juabnënga. Nda atşe chaşojtsëstona, cha echantsiyena atşe chë binÿnayáftaca; y ndoñe mo ibetiñcá queochátaye, y chca, tşabe vida echántsebobmna ca.

<sup>13</sup> Chora chë fariseunga Jesús tmojanianaya: —Aca nÿe cach acbiama chca contsoye-buambná; chcana, chë ntşamo contsichamcá tondaye quenatámama ca.

<sup>14</sup> As chora Jesús tojanëjua: —Ntşamo cach atşbiama sëntsichamcá añe entsámama, masque nÿe atşe stsichamo ntşamo atşbiama ndegombre yomncá. Er atşe sëndëtatşëmbo ndëmocana tijabo y ndëmoye tstsá. Pero tşëngaftanga ndoñe chca queşmátstatsëmbo.

<sup>15</sup> Tşëngaftanga şmondbëtsichamo ínÿengbiama tşabá o ndoñe tşabá tmontsamama, chca, nÿe ntşamo entşanga mondbetsejuabnaycá. Pero atşna ndocnabiama chca quetsátichamo. <sup>16</sup> Atşe ndoñe nÿe canÿa quetsátsmëna ínÿabiama jayanama tşabá o ndoñe



tšabá tontsamama; ndayá atšbe Taitá, chë šonjichmó cha, átseftaca chca jayanana. Chíyeca, atše inýabiama tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana. <sup>17</sup> Tšëngaftangbe leyíñe enduábemana, uta entšata ndayámnaca cachcá tbojayanëse, ntšamo chata tbojayanca puerde jtsámanana ca. <sup>18</sup> Y morna, atše séntsicamo chë ntšamo cach atšbiana ndegombre yomncá, y atšbe Taitá, chë šonjichmó chánaca entsichamo ntšamo atšbiana ndegombre yomncá ca —Jesús tojánayana.

<sup>19</sup> Chora chënga tmojanjtá: —¿Ndayentše acbe Taitá yojtsemna ca?

Y Jesús tojanéjua: —Tšëngaftanga ndoñe quešmatábuatma ni atše ni atšbe Taitá. Atše šmojtsábuatmëсна, atšbe Taitánaca šmattsábuatma ca.

<sup>20</sup> Bëngbe Bëtsabe bëts yebnoca, chë crocénana jacayama luarentše yojtsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

*“Chë chanjá luaroye, tšëngaftanga ndoñe quešmatobena jama”*

<sup>21</sup> Chora Jesús yojtétóntša oyebuambnayana: —Atše chantá, y chora tšëngaftanga atše šmochántseguaye. Masque chca, šmochanjóbana tšëngaftangbe bacna soyëngama ndëperdonánënga. Chë chanjá luaroye, tšëngaftanga ndoñe quešmatobena jama ca —Jesús tojánayana.

<sup>22</sup> Chora chë judiënga tmojanontsé enatsëtsnayana: —¿Mo nderado yojtsejuabná jt-senóitanama, y chíyeca yojtsichamo chë cha yochjá luaroye bënga ndoñe montsobena jama ca?

<sup>23</sup> Chora Jesús tojanéyana: —Tšëngaftanga quem luaroquënga šmondmëna; atšna t-bananocá, celocá sëndmëna. Tšëngaftanga nýe quem luarama enójuabnayënga šmondmëna, pero atše ndoñe. <sup>24</sup> Chíyeca atše chca tcbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bëtsemnana ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

<sup>25</sup> Chora chënga tmojanjtá: —¿As aca ndase cmëna ca?

Y Jesús tojanéyana: —Entšanga jabuátambama šenjanbojatsé orscana chama tcbonjáuyana.

<sup>26</sup> Atše ba soyënga séntsebornna tšëngaftangbiana jayanama, tšëngaftangbe contra jayanama; pero chë šonjichmó cha nýetsca soyëngama ndegombre endbëtsichamo, y atšna ntšamo chábensana tijouencá, cachcá quem luare oyenënga séntsëtsëtsná ca —cha tojanéyana.

<sup>27</sup> Pero chënga ndoñe tonjanësértá Jesús cachabe Taitabiana chca tojanéyanama. <sup>28</sup> As Jesús tojanéyana: —Bëngbe Bëtsá Entšá tbojanbemá chašmojatsbaná ora, šmochántsetatšëmbo nda sëndmëna atše bëtsemnana. Cachcá, tšëngaftanga šmochántsetatšëmbo, nýe cach atšbe juábnaca atše tondaye jamama sëndobenama. Nýe ndayá atšbe Taitá šojabuatëmbacá atše sëndoyebuambná. <sup>29</sup> Y chë šonjichmó cha ndoñe nýe canýa quešnátsboshjuana. Chca endmëna, er atše sempre sëndbëtsama ntšamo cha oyejuayá jabemama tojtemncá ca —Jesús tojánayana.

<sup>30</sup> Jesús chca tojánayana ora, banga chábeñe imojtsanošbuaché.

*Bëngbe Bëtsabe básenga y chë nýe bacna soye jtsamama vida bomnënga*

<sup>31</sup> Chora Jesús, chë chábeñe imojtsanošbuaché judiënga tojanéyana: —Ntšamo cbontsëtsëtsnacá tšëngaftanga sempre šmojtsamëse, ndegombre atšbe uatsjëndayënga šmochántsemna. <sup>32</sup> Ntšamo ndegombre yomncá šmochántsetatšëmbo; y ntšamo ndegombre yomncá jtsetatšëmbëse, atsebácanënga šmochántsemna ca.

<sup>33</sup> Chora chënga tmojanjuá: —Bëngna Abrahábentsana entšanga fsëndmëna, y ndocná ndocna te chešnáišishëche nýe chabiana nýets tempo jtsoservënama. As, ¿ndáyeca šcojtsëtsëtsná bënga atsebácanënga fchtsemna ca?

<sup>34</sup> Chora Jesús tojanéyana: —Ndegombre šcuayana: Nda bacna soyënga tojtsama, cha nýe bacna soyënga jamama juabnëngaca mandaná jéftsemnana. <sup>35</sup> Canýe oservená ndoñe nýets tempo chë pamillentšá ntjéftsemnana, ntšamo canýe uaquiñá sempre chë pamillentšá jesomñancá. <sup>36</sup> Y chca, Bëngbe Bëtsabe Uaquiñá chacmojátsebacase, tšëngaftanga ndegombre atsebácanënga šmochántsemna bacna soyënga juabnënguentšana. <sup>37</sup> Atše sëndéatšëmbo tšëngaftangna Abrahábentsana entšanga šmomnana; pero tšëngaftanga šmontseboše atše jóbama, ntšamo atše cbontsëtsëtsnacá ainaniñe jýyëngacñama ndoñe quešmátsboše causa. <sup>38</sup> Ntšamo atšbe Taitábica tijinjá, cach soyëngama atše séntsoyebuambná. Tšëngaftangnaca, cachcá ntšamo tšëngaftangbe taitábentsana šmojouencá šmotsama ca —tojanéyana.

<sup>39</sup> Chora chënga tmojanjuá: —Bëngbe uámana bëts taitá, Abraham endmëna ca.

As Jesús tojanéyana: —Tšëngaftanga Abrahambe básenga ca jtsabáinama mercedo šmojtsebuajónëse, chë ntšamo Abraham tojéftsema y cachcá tšëngaftanga šmattsama. <sup>40</sup> Atšna ntšamo ndegombre yomncá sëndoyebuambná, ntšamo Bëngbe Bëtsábentsana tsouenancá. Pero mora tšëngaftanga šmontseboše atše jóbama; Abraham ndocna te chca

chenaisobuachjanguá. <sup>41</sup> Tšëngaftangna, ntšamo tšëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojanayana: —Bënga nÿe enaquécana básenga ndoñe queftsátsmëna. Chë nÿe canÿe taitá tsëndbomná, Bëngbe Bëtsá endmëna ca.

<sup>42</sup> Chora Jesús tojanëyana: —Bëngbe Bëtsá ndegombre tšëngaftangbe taitá tojtsemnëse, tšëngaftangna atše smattsebobonshana. Er atšna, Bëngbe Bëtsábiocana sënjabo y muentše sëntsemna. Nÿe atšbe ponto ndoñe chiyátabo; Bëngbe Bëtsá šonjichmó. <sup>43</sup> ¿Ndayeca tšëngaftanga ndoñe šmontsobena atšbe palabrénga josértana? Co, ntšamo chontsëtsëtsnacá joyeunayama ndoñe quešmátsboše causa chca. <sup>44</sup> Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátsama orscana, Satanás entšá obanayá endmëna. Satanasbe juabnoca, ndocna tšabe soyënga ni ndegombre soyënga ntšebínÿnana. Chíyeca, ndocna te cha ntšamo ndegombre yomncá ntšamana. Cha canÿe bostero endmëna, y chábtëtsana nÿetsca bostero soyënga jtsóbocanana. Chíyeca, cha tojtsebostero ora, nÿe ntšamo cachá yomnana jtsichámuana. <sup>45</sup> Atšna sempre ntšamo ndegombre yomncá chon-dutsëtsná; chíyeca, chë séntsichamo soyiñe tšëngaftanga ndoñe quešmatóšbuaché. <sup>46</sup> ¿Nda tšëngaftanguentšá nanjobenaye jinÿanjÿiyana atše ndaye bacna soye tijamama? Y atše, nÿe ntšamo ndegombre yomncá stšichámëse, ¿ndayeca chë tijayaniñe ndoñe šmontsošbuaché? <sup>47</sup> Nda Bëngbe Bëtsabe entšá tomna, ntšamo Bëngbe Bëtsá tojtšichamcá jtsuenanana. Pero tšëngaftangna ndoñe Bëngbe Bëtsabe entšanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca —Jesús tojanëyana.

*Cristo Abrahambiana más natsana ya yojtsemna*

<sup>48</sup> Chora chë judiënga tmojanayana: —Ajá, bënga co ndegombre ftsichamo, aca nÿe samaritano y bacna bayëjbe juabna uambayá comna ca ftsichamo ora ca.

<sup>49</sup> Y Jesús tojanëjua: —Atše ni mo canÿe bayëjbe juabna quetsatambá. Ntšamo atše séntsamcá, endmëna jinÿanjÿiyama atšbe Taitá Bëngbe Bëtsá uamaná yomnana; pero tšëngaftangna, atše chca tsmënama ndoñe quešmatinÿinÿná. <sup>50</sup> Atše ndoñe quetsátsboše inÿenga atše más uamaná chašmoberama. Pero inÿa endmëna; cha aiñe endboše atše bëtsá bëtsemnama chaminÿanjëma. Y chánaca endmëna chë inÿengbiana tšabá o ndoñe tšabá tmontsamama endbetsichamuá. <sup>51</sup> Ndegombre šcuayana, nda ntšamo atše séntsichamcá tojouena y chca tojama, ndocna te quechatóbana ca —Jesús tojánayana.

<sup>52</sup> Chora chë judiënga tmojanayana: —Mora cocayé fsëntsetatšëmbo aca ndegombre bacna bayëjbe juabna uambayá comnana. Abraham tojanóbana, y cachcá, nÿetscanga Bëngbe Bëtsabe juabna oyebuambnayëngnaca. ¿Y mora aca cochjátichamo, “Nda ntšamo atše séntsichamcá tojouena y chca tojama, cha ndocna te quechatóbana ca”? <sup>53</sup> ¿O aca, bëngbe bëts taitá Abrahambiana más bëtsá comna? Cha tojanóbana, y Bëngbe Bëtsabe juabna oyebuambnayëngnaca. ¿Ndase cojátsmëna ca aca cojatsjuabná ca? —chënga imojtsichamo.

<sup>54</sup> Chora Jesús tojanëjua: —Atše nÿe cach atše más bëtsá stsenobiamnasna, chë soye tondaye nantsámama. Pero chë más bëtsá šojtsebiamná cha, atšbe Taitá endmëna, cach ndabiana tšëngaftanga šmondbëtsichamo tšëngaftangbe Bëtsá canmëna ca. <sup>55</sup> Pero tšëngaftanga cha ndoñe quešmatábuatma; atše aiñe. Y atše, “cha ndoñe quetsatabuatma ca” stšichámëse, átšnaca cach tšëngaftangcá canÿe bostero stsemna. Pero ndegombre atše cha sënduábuatma, y ntšamo cha tojtšichamcá, atše sëndouenana y cachcá sëndbëtsama. <sup>56</sup> Tšëngaftangbe uámana bëts taitá Abraham, chë atše jabama te jinÿama yojtsejuabnaye ora, puerte oyejuayá yojtsemna. Y pronto tojëftsaninÿe, y puerte tojanoyejuá ca —Jesús tojánayana.

<sup>57</sup> Chora chë judiënga tmojanayana: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojëftsinÿe ca?

<sup>58</sup> Chora Jesús tojanëjua: —Ndegombre chëyana, Abraham cabá ndoñe ainá quen-jatšmëna ora, atše ya sënjëtsemna ca.

<sup>59</sup> Jesús chca tojanëjua ora, chënga ndëtsbenga tmojanájaca cha jtsatëchënganjama. Pero Jesusna oitanánana, Bëngbe Bëtsabe bëts yebnentšana tojësancocna.

## 9

*Jesús tojanma, canÿe boyabása jtaná onÿnaná chabuabínÿnama*

<sup>1</sup> Canÿe luarëjana yojtsachnëjuana ora, Jesús canÿe boyabásabioye tbojáninÿe. Chë boyabásana jtaná inónÿna. <sup>2</sup> Chë uatsjëndayënga Jesús tmojantjá: —Buatëmbayá, ¿ndayeca quem boyabása jtaná inónÿna? ¿Camuá bacna soyënga tojamama, o chabe bëtsëtsangbe bacna soyënga causa ca?

<sup>3</sup> Chora Jesús tojanëjua: —Ni cachabe bacna soyëngama, y ni chabe bëtsëtsangbe bacna soyënga causa. Chca endmëna ndayá entšanga jinÿanjÿiyama ntšamo Bëngbe Bëtsá yobencá.

<sup>4</sup> Cabá yojtsësháchena ora, šontsamna jamana ntšamo chë šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobeyaye. <sup>5</sup> Quem luariñe chjëftsemnëntscuana, atše quem luare entšangbe juabnënga binýnaya chanjëftsemna ca —tojanëyana.

<sup>6</sup> Chca tojánayanentšana, Jesús fshantsiñe tojanbuashëtjo, y chë yebuáyeca batšá ngüiche tojánbema, y chë jtaná chë ngüichea tbojanbucharëtjo. <sup>7</sup> Chora chë jtaná tbojaníyana: —Motsa y metsobúchjabebye, chë binche uafjajónaye entšangbe pormániñe, Siloé ca uabáiniyoca ca. (Siloé, judiëngbe biyañe endayana “Ichmoná ca”).

Y chë jtaná tojána; choca yojetsobúchjabebye, y yebnoye tojtaná ora, ya ibojtsabinýna. <sup>8</sup> Chë juachañe oyenënga y chë jtaná tempo lemošna otjanañana tmojáninýënga, imojtsentjanaye: —¿Mua ndoñe yondmëna chë enjanamana jótbemana lemošna jótjañama ca?

<sup>9</sup> Inýënga imojtsichamo: —Cha entsemna ca.

Y inýëngna: —Cha ndoñe quenátsmëna, pero chacá entsábona ca.

Y chach shaná yojtsichamo: —Atše cha sëndmëna ca.

<sup>10</sup> As chë entsanga tmojanjtá: —¿Ntšamo chca mora cmojtsabinýna ca?

<sup>11</sup> Y cha tojanëjua: —Chë boyabása, Jesús ca uabainá, ngüiche yebuáyeca tonjábema, šonjabucharëtjo y šonjauyana: “Motsa y Siloé uafjajónayiñe metsobúchjabebye ca”. Chcasna, atše sënjá, sënjetsobúchjabebye y cachora šontsabinýna ca.

<sup>12</sup> Chora chënga tmojanjtá: —¿Ndayentše cha yojtsemna ca?

Y chana: —Atše ndoñe quetsátstatšëmbo ca —tojanëjua.

### *Chë jtaná shnanábioye fariseunga imojtsetjanaye*

<sup>13</sup> Chora chë entsanga, chë jtaná inamná fariseúngbioye tmojanánatse. <sup>14</sup> Chë Jesús batšá yebuáyeca ngüiche tojánbema, y chë jtaná tojanma te, canýe ochnayté inamna. <sup>15</sup> As chë fariseunga chë boyabása tmojanjtá: —¿Ntšámoyeca mora cmojtsabinýna ca?

Chora cha tojanëjua: —Cha ngüiche yebuáyeca tonjábema y šonjabucharëtjo. Sënjetsobúchjabebye, y cachora šonjuabinýna ca.

<sup>16</sup> As chora básefta fariseunga imojtsichamo: —Chë jtaná chabotsabinýnama tojamá ndoñe tonjochná, y ochnayté tojatrabajá. Chýyeca cha Bëngbe Bëtsabe entšá ndoñe quenátsmëna ca.

Inýënga imojtsichamo: —Cha canýe bacna soyënga amá tojtsemnëse, ¿ntšamo nantsobena canýe bëts soye Bëngbe Bëtsabe obenánaca jamama ca?

Y chca, inýënga Jesusbe pavor imojtsemna, y inýëngna chabe contra. <sup>17</sup> Chama chënga cachiñe chë jtaná inamná tmojtëtantjá: —Er aca mora chacmotsabinýnama cha tojamëse, ¿chabiama ntšamo catjyana ca?

Chora cha tojanëjua: —Chana canýa Bëngbe Bëtsabe juabna oyeuambnayá entsemna ca.

<sup>18</sup> Pero chë judiënga ndoñe montsanošbuaché, cha chë jtaná inamná y chora ibojtsabinýnama. As chënga, inýënga tmojanichamó chë boyabásabe bëtsétsata jobiatšama.

<sup>19</sup> Chë bëtsétsata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre tašojtsichamo cha jtaná inonýnama? Chcase, ¿ntšamo mora cha ibojtsabinýna ca?

<sup>20</sup> Chora chë bëtsétsata tmojanëjua: —Aíñe fsëndëtatšëmbo cha bëndatbe uaquiñá endmënama y jtaná tonjanonýnama. <sup>21</sup> Pero ndoñe queftsátstatšëmbo ntšámoyeca mora chca ibojtsabinýnama, ni bëndatbe uaquiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena tšëngaftanga razón jatšatayama ca —chata tbojánayana.

<sup>22</sup> Tempo, chë judiënga imojenóyeunaye, chëngbe enefjuana yebnënguentšana jtëbuacanana chë Jesús ndegombre chë Uámána Uabuayaná, chë Cristo yojamna ca tmojanënga. Chë bëtsétsatna chama ibojtsauatja; <sup>23</sup> chýyeca tmojanëyana: “Cha ya bëtsá entsemna. Cachá motjanga ca”.

<sup>24</sup> As cachiñe chë judiënga chë jtaná inamná tmojanchembo y tmojaníyana: —Bëngbe Bëtsabe delante cach acbiama ndegombre mobuambá. Bënga fsëndëtatšëmbo chë boyabása canýe bacna soyënga amá yomna ca.

<sup>25</sup> Chora cha tojanëjua: —Cha canýe bacna soyënga amá o ndoñe tondmënama, atše ndoñe quetsátstatšëmbo. Atše nýe mëntšá sëntsetatšëmbo: Atše jtaná sënjanmëna, pero mora šontsabinýna ca.

<sup>26</sup> Chora chënga cachiñe tmojatantjá: —¿Ntšamo tcmënjama? ¿Ntšamo cha tënjama chacmotsabinýnama ca?

<sup>27</sup> Y cha tojanëjua: —Ya tcbonjáuyana y ndoñe chešmatoyeuná. ¿Ndayeca cachiñe šmojtseboše jatuenama? ¿Tšëngaftángnaca šmojtseboše chabe ústonënga jtsemnana ca?

<sup>28</sup> Chora chënga cha tmojtsanóyenguango y tmojaníyana: —Acna canýe chabe ustoná cojtsemna, pero bënga ndoñe; bëngna Moisesbe ústonënga fsëndmëna. <sup>29</sup> Bënga fsëndëtatšëmbo,

Bèngbe Bètsá Moisésbioye tbojanatsètsama, pero chë boyabásabiana ndoñe queftsátstatšëmbo ni mo ndëmocana cha tojabama ca —chënga imojtsichamo.

<sup>30</sup> Chora chë boyabása tojanējua: —¡Ntšamo chca nántsemna! Tšëngaftanga ndoñe šmontsetátšëmbo ndëmocana cha tojabama; pero chašubabínŷama cha tonjama. <sup>31</sup> Bënga tšabá mondétatsëmbo, bacna soyënga amënga Bëngbe Bètsá ndoñe queondbátayaunanama. Chana, nŷe chábioye adorayá y ntšamo cha tojtsebošcá amábioye joyeunayana. <sup>32</sup> Quem luare jobojátšama orscana ndocna te quenaisótatsëmbo canŷe jtaná onŷnanabiana ndánaca cha chabotsabinŷama tojéftsemama. <sup>33</sup> Quem boyabása, Bëngbe Bètsabe ichmoná chabe soyënga jamama ndoñe tontsemnëse, tondaye nantsobena jamama ca —chë entšá tojánayana.

<sup>34</sup> As chë fariseunga tmojanianiya: —¡Ndayá! Aca tcojanonŷná orscana, corente bacna soyënga amá tcomnëse, ¿ntšamo mora bënga šcochjátabuatambaye ca?

Y chora chë judiëngbe enefjuana yebnentsana cha tmojtanábocna.

*Chë Bëngbe Bètsabe soyëngama mo jtanëngcá imomnënga*

<sup>35</sup> Chë jtaná tmojtanábocnama Jesús tojanuena ora, tojána cha janguanguama. Tbojáninŷena ora tbojanianiya: —¿Aca Bëngbe Bètsá Entšá tbojanbemábeñe quecojtsošbuaché ca?

<sup>36</sup> Y cha tbojanjúá: —¿Taita, nda cha yojtsemna, as atše chábëñe jtsošbuáchiyama ca?

<sup>37</sup> As Jesús tbojanianiya: —Aca ya tconjinŷe; chë ácaftaca entsoyebuambná cha entsemna ca.

<sup>38</sup> Chora, chë boyabása Jesúscentse tojanoshamentšé jëtschuayama y tbojanianiya: —Atšbe Utabná, aíñe sentsošbuaché ca.

<sup>39</sup> Chora Jesús chë entšanga tojanējyana: —Atše quem luaroye tijabo ndayá entšanga jinŷanŷiyama ntšamo cachënga Bëngbe Bètsabe soyëngama imojuabnama. Chë Bëngbe Bètsabe soyëngama ndosertánënga, chë soyënga atše chanjinŷanŷiyeye ora, mo jtanëna shnanëngcá mochántsemna; y chë Bëngbe Bètsabe soyëngama corente imotátšëmbo ca juabnayëngna chanjinŷanŷiyeye, nŷe batsá Bëngbe Bètsabe soyëngama imotatsëmbuama. Y chca, chënga, masna mo jtanëngcá mochántsemna y ndoñe mo chë jinŷyama obenëngcá.

<sup>40</sup> Básefta fariseunga Jesúseftaca imojtsemnënga chca tmojanuena ora, cha tmojanianiya: —Ndegombre bënga ndoñe mo jtanëngcá queftsátsmëna ca.

<sup>41</sup> Chora Jesús tojanējua: —Tšëngaftanga Bëngbe Bètsabe soyëngama ndétatsëmbënga šmojtsemna ca, y ndegombre chë soyëngama ndoñe cmontsésertana ca šmojobuambase, ndayá šmojtsemná Bëngbe Bètsá mo bacna soyënga cuenta ndoñe queochátónŷaye. Pero tšëngaftanga corente Bëngbe Bètsabe soyëngama cmojtsésertana ca šmojtsichámëna, Bëngbe Bètsá ndoñe queochatobenaye tšëngaftangbe bacna soyëngama jáperdonana ca —Jesús tojanējyana.

## 10

*Chë oveshënga abujējñya y chabe oveshënga*

<sup>1</sup> As Jesús tojanējyana: “Ndegombre šcuayana: Nda chë oveshëngbe luaroye bësháshajana ndoñe tonjámashëngo, pero aíñe inŷajana tojtsamáshëngo, chana canŷe atbëbaná y abacayá jtsemnana. <sup>2</sup> Pero chë bësháshajana tojamashënguana, chë oveshënga anŷená jtsemnana. <sup>3</sup> Chë bëshásha ebtafjuaná, chë bëshásha jebëtafjuana, y chë oveshënga abujējñya ntšamo cada ona tmabaincá chë oveshënga jáchembuana. Y chë oveshënga jtsetatšëmbuana chëngbe abujējñya yojtsachembuanama; y chë luarentšana cha jubuacnana. <sup>4</sup> Nŷetsca oveshënga tmojábocana ora, chë abujējñya chënga jtsebñantsanana, y chë oveshënga jtséstonana, er chabe oye-buambnayana chënga joyátëmbana. <sup>5</sup> Pero chë tmonduabuatmábioyna chë oveshënga ndoñe ntjuastana; nŷe chábentsana jtsachetëngana, chë oveshënga chabe oye-buambnayana ndoñe ntjoyátëmbana causa ca” —Jesús tojánayana.

<sup>6</sup> Jesús entšanga chca tonjanacuntá, pero chënga ndoñe ntjosértana ntšamo yojt-sentšayancá.

*Jesús, chë oveshënga tšabe abujējñya*

<sup>7</sup> As Jesús cachiñe tojanējyana: “Ndegombre cbëyana: Atše sëndmëna chë bëshásha oveshënga mondbétsamashjuanëjana. <sup>8</sup> Nŷetscanga chë atšbe natsana tmojábënga, atbëbanënga y abacayënga imnamna, pero chë oveshënga ndoñe chëngbioye ntjóyaunayana. <sup>9</sup> Atše chë bëshásha sëndmëna. Nda quem bësháshajana tojamashënguá, atšbocaná echántsemna. Canŷe oveshá jamashënguana y jabocnana, y shácuana jónŷenana. Cachcá, chë quemëjana tojamashënguá, lempe echanjónŷyena.

<sup>10</sup> “Chë atbëbaná jabana nŷe jatbëbama, jóbama y lempe jtsepochócama; pero atšna, entšanga vida chamotseboznama y átšeftaca bëtscá tšabe vida chamotseboznama tijabo.

<sup>11</sup> “Atše sèndmèna chë oveshènga tšabe abujènyà. Chë oveshènga tšabe abujènyà sempre jtsèprontàna chèngbiana jòbanama, chabe oveshènga ababuányeshanayeca. <sup>12</sup> Pero nda nýe crocenánama totrabáya y chë oveshènga ndoñe chábenga tmontsemna, cha nderado tojinýe canýe tjañe queše chë oveshèngbiye tojtšobécocnama, cachora nýe cachcá jesènyayana y jtsachana. Chë tjañe queše oveshènga jtsacamiyana, y chë oveshèngna nýe cátoye jtsachetana. <sup>13</sup> Cha jtsèmnana nýe crocenánama trabajáyá; chabiana nýe chë uacanánana más uámana soye jtsèmnana, y chë oveshèngbiana tondayana ntsentšammana; chíyeca cha jtsachana.

<sup>14</sup> “Atše sèndmèna chë oveshènga tšabe abujènyà. Atše chènga sèndèubuatma, y chèngnaca atše smonduábuatma. <sup>15</sup> Cachcá, chë Taitá Bèngbe Bètsá atše sonduábuatma y atše chábioye. Atše sempre sèndètseprontana jòbanama, atšbe oveshènga sèndababuanýeshanayeca. <sup>16</sup> Atše inýe oveshènga sèndábamna, pero chènga ndoñe quem luariñe oveshènga quemátmèna. Atše šontsemna chèngnaca moye juantsana. Chèngnaca atšbe oyebuambnayana mochanjouna, y muentša oveshèngtaftaca cánýiñe mochántsemna, y atšna nýetsca chë oveshèngbiana chë abujènyà chántsemna.

<sup>17</sup> “Atše sempre sèndètseprontana jòbanama, chora jtayenama. Chíyeca chë Taitá šondbobonshana. <sup>18</sup> Ndocná atšbe vida quešochatsbojuána, pero chènga sèndababuanýeshanayeca siempre sèndètseprontana jòbanama, cach atše chca sèndbošeyeca. Derecho sèndètšóbmón chèngbiana jòbanama, y chora jtayenama. Chca endmèna ntšamo atšbe Taitá šonjamandacá ca” —Jesús tojánayana.

<sup>19</sup> Chë soyènga chë judiènga tmojanuena ora, cachiñe banga Jesusbe contra y inýengna Jesusbe pavor imojtsichamo. <sup>20</sup> Banga imojtsichamo: —Chana bacna bayèbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

<sup>21</sup> Pero inýengna imojtsanichamo: —Ndocna bacna bayèbe juabna uambayá ntsobenana chca jóyebuambayama. ¿Canýe bayèja nantsobena jamama canýe jtaná chabotsabinýnama ca?

*Chë judiènga ndoñe imontsošbuáchiye Jesús Bèngbe Bètsabe Uaquiñá bétsemnama*

<sup>22</sup> Canýe uaftena tempo inamna, y Jerusalemntše canýe fiesta imojtsebomna. Chë fiesta inamna cada uata, Bèngbe Bètsabe bèts yebna tempo cachiñe tmojtanjebuama entšanga jtenójuaboyama. <sup>23</sup> Jesús Bèngbe Bètsabe bèts yebnoca yojétsana, canýe amashjuana otšojebniñe, Salomonbe Amashjuana ca uabáinentše. <sup>24</sup> Chora, chë judiènga tmojanóbobuashcona, y tmojtanjá: —¿Buetaytentscuana bènga fchjéftsemna acbiana ndegombre soye ntsetatšèmbcá? Aca chë Cristo cojtsemñe, chama lempe tšabá šmanýanýe ca.

<sup>25</sup> As Jesús tojánjúa: —Ya tcbonjáuyana y tšèngtaftanga átšbeñe ndoñe ntsošbuáchiyana. Chë atše sèndama soyènga, atšbe Taitá Bèngbe Bètsabe obenánaca, cmontsinýanýná nda atše bétsemnana. <sup>26</sup> Pero tšèngtaftanga átšbeñe ndoñe quešmatsošbuaché, er tšèngtaftanga atše ndoñe quešmatštona, ntšamo chë oveshènga chë tšabe abujènyà mondbetsèstoncá. <sup>27</sup> Chë atše smonduátonènga, atše smondbóyeunaye y smondbèuanta. Atše chènga sèndèubuatma. <sup>28</sup> Atše chanjama, quem entšanga chë nýetsca tescama yomna tšabe vida chamotsebomnana; chènga ndocna te pochocánènga quemochátmèna, y ndocná quenátobena átšbentšana chènga jefcana. <sup>29</sup> Atšbe Taitá Bèngbe Bètsá, chë entšanga atše chašmuastama tojamá, nýetscangbiana más bètsá endmèna, chíyeca ndocná quenátobena chábentšana chènga jefcana. <sup>30</sup> Chë Taitá y atše canýa fsèndmèna ca —Jesús tojánayana.

<sup>31</sup> Chora, chë judiènga cachiñe ndètšbenga tmojanájaca Jesús jtsatèchénganjama. <sup>32</sup> Pero Jesús tojánjúa: —Atše tšèngtaftangbeñe, ba bèts soyènga sènjama atšbe Taitá Bèngbe Bètsabe obenánaca. ¿Ndèmuu chentšá soyama atše smochtsatèchénganjaca?

<sup>33</sup> Chora chë judiènga tmojanjúa: —Ni canýe quem bèts soyèngama bènga queftsátsboše aca jtsatèchénganjama. Aca Bèngbe Bètsabiama ndoñe tšabá quecátichamo; mo chábioye cuafjyoyengucá entsemna. Aca nýe canýe entšá condmèna, pero acna contsichamo cach aca Bèngbe Bètsá comna ca; chíyeca bènga fsèntseboše ndètšbèngacaca aca jtsatèchénganjama ca —chènga tmojanijana.

<sup>34</sup> Chora Jesús tojánjúa: —Bèngbe Bètsabe uabemana palabrènguiñe mèntšá endayana: “Atše sènjayana tšèngtaftanga diosènga šmomna ca.” <sup>35</sup> Bèngbe Bètsá chca tojánayana chë chabe palábraca y cha chamotseservénama tojánamandangbiana; ndocná quenátobena jinýanýiyana ni mo canýe soye Bèngbe Bètsabe uabemana palabrènguiñe, ndoñe ndegombre soye yomnana. <sup>36</sup> Y atšbiana, Bèngbe Bètsabiácá uabuayaná y quem luare ichmoná, ¿ntšamo tšèngtaftanga šmojtšobena jayanama, “aca Bèngbe Bètsabiama ndoñe tšabá quecátichamo ca”, chë Bèngbe Bètsabe Uaquiñá sèndmèna ca atše tijayanama? <sup>37</sup> Ntšamo atšbe Taitá endamcá atše ndoñe sèntsamèse, tšèngtaftanga átšbeñe ndoñe šmattsošbuáchiye. <sup>38</sup> Pero, ntšamo atšbe Taitá endamcá atše aife stsamèse, masque ndoñe átšbeñe smontsošbuaché, nýe chë Taitabe obenánaca soyènga tijamama smochtsóšbuáchiye. As, canýe ora chašmotsetátšèmbó y chacmèsertá, chë Taitá átšbeñe yomnana y atše chábèñe tsmènama ca —Jesús tojánjúa.

<sup>39</sup> Chora chënga cachiñe tmojánbošena Jesús jishachama, pero cha chëngbentšana tojan-otsbocá.

<sup>40</sup> Chentšana, Jesús Jordán bėjaye chenguana tojesaná y choca tojtsanoquedañe. Chentše Juan tempo entšanga yojanëbáyana. <sup>41</sup> Ba entšanga tmojána Jesús jinýama, y mëntšá imojtsichamo: “Ndegombre, masque Juan ni mo canýe bëts soye Bëngbe Bëtsabe obenánaca tojñéftsema, lempe ntšamo quem boyabásabiama tonjanoyebuambacá, ndegombre yojama ca.” <sup>42</sup> Y chentše, ba entšanga Jesúsbeñe imojtsanošbuaché.

## 11

### *Lázaro tojanóbana*

<sup>1</sup> Inamna canýe boyabása šocá, Lázaro ca uabainá. Cha inoyena canýe pueblo Betania ca uabáinentše, Marta y Mariáftaca, chabe uabénata. <sup>2</sup> Quem María inamna nda Bëngbe Utabná Jesusbe shecuatšíne botamana uanguëtsiye tbojanáshecbuešcja, y chabe stjënashaca tojtanshechojó cha. <sup>3</sup> Chë uta uabénatna inýenga tmojanichamó Jesús jauenayama: — Bëngbe Utabná, chë aca condobonshaná šocá entsemna ca.

<sup>4</sup> Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero aínë entsemna Bëngbe Bëtsabe obenana entšanga jinýanýiyama, y Bëngbe Bëtsabe Uaquiñá chamuatschuama ca.

<sup>5</sup> Jesús corente yojánababuanýeshana Marta, María y chatbe uaftše Lázaro. <sup>6</sup> Masque chcasna, Lázaro šocá yojtsemna ca Jesús tmojanayana ora, cabá uta te más cha yojëtsemna luarentše tojtsanoquedañe. <sup>7</sup> Chentšana, chabe uatsjëndayënga tojanëyana: —Judeoye cachiñe cuajna ca.

<sup>8</sup> As chë uatsjëndayënga tmojanayana: —Buatëmbayá, baseftayté entsemna chë luaroca judiënga cmonjanbuachetá ndëtsbéngaca jtsóbama; y mora, ¿cabá choye jtésama cojtseboše ca?

<sup>9-10</sup> Chora Jesús tojanëyana: —Bnëtsana uta hora bnëté endmëna. Nda bnëté tojt-sana, ndoñe ntjojëstjiana, binýniñe bëtsemnayeca. Cachcá átšeftaca endmëna, tondaye quenátopodena átšeftaca jopásana, atše jóbanama cabá ndoñe tonjobuache ora. Pero ibeta tojtsanëse, cha jtsojëstjiana, ndoñe binýniñe causa. Cachcá, bënga šontsamna yo-jtsëshächenëntscuana jatrabájana. Atšbe jóbanama tempo chaojšhjangora, ya ndoñe queochátëshachena jatrabájama ca —tojánayana.

<sup>11</sup> Chentšana tojanëyana: —Bëngbe amigo Lázaro tojtsomaná, pero atše choye chanjá jetsefsenama ca.

<sup>12</sup> Chora chë uatsjëndayënga tmojanjuá: —Bëngbe Utabná, tojtsomanase yojtsayana chana tšabá yochtsatsmëna ca.

<sup>13</sup> Pero Jesús yojtsanëtsëtsná ndayá Lázaro tojtsanóbana ca, y chabe uatsjëndayëngna imojtsejuabnaye Lázaro ndegombre yojtsomáñama. <sup>14</sup> As Jesús tšabá tojanëyana: — Lázaro tontsóbana. <sup>15</sup> Atše sëntsoyejuá choca atše ndoñe tsmënama, tšëngaftangbe tšabiama chaotsemnama; chca, tšëngaftanga más átšbeñe chašmotsošbuáchema. Pero cuajna cha jinýama ca.

<sup>16</sup> Chora Tomás, chë Gemelo ca uabobainá, chë inýe uatsjëndayënga tojanëyana: “Bëngnaca cuajna, cháftaca mochjóbana ca.”

### *Jesús iuama entšanga chámuatayenama y chë nyetsca tescama yomna tšabe vida chamotse-bomnana*

<sup>17</sup> Jesús chë béconana tojánashjangora, tojántatšëmbona Lázaro ya canta te uatbontsána yojtsemnama. <sup>18</sup> Betania pueblo yojamna Jerusalén béconana, mo unga kilómetroca. <sup>19</sup> Ba judiënga tmojána Marta y María jautsëtsayama y jatjëmbambayama ndoñe tša ngmënaca chabondëtsemnama, chatbe uaftše tojanóbana causa. <sup>20</sup> Jesús yojtsashjajuanama Marta tojántatšëmbona ora, tojánbocna cha jajëbenguama, pero María cach yebnentše tojanoquedá.

<sup>21</sup> Chora Marta Jesúsbioye tbojanayana: —Bëngbe Utabná, aca muentše macmëñese, atšbe uaftše ndoñe matënjóbana. <sup>22</sup> Pero atše sëntsetatšëmba, masque ndayánaca mora Bëngbe Bëtsá chacojotjañe, y cha lempe chca cmochjätsetaye ca.

<sup>23</sup> Y Jesús tojanjuá: —Ache uaftše echántayena ca.

<sup>24</sup> Chora Marta tbojanayana: —Aínë, atše sëndëtatšëmba cha yochtayenama, pero quem luare jopochócama te, nyetsca obanënga mochtayena ora ca.

<sup>25</sup> As Jesús tbojanayana: —Atše sëndmëna chë entšanga chámuatayenama y chë nyetsca tescama yomna tšabe vida chamotsebonnana endamá. Nda átšbeñe tojtsašbuaché, masque chaóbana, echántayena. <sup>26</sup> Y nda cabá ainá totsomñe y átšbeñe tojtsašbuaché, ndocna te queochatóbana. ¿Chë cbontsatsá soyiñe quecojtsašbuaché ca? —Jesús tbojantjá.

<sup>27</sup> Chora Marta tbojanayana: —Aínë, Bëngbe Utabná, atše ábeñe sëntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnana ca.

*Jesús, Lázaro yojtsátbontsana cuevëshentše yojenóbošachna*

<sup>28</sup> Chca tojánayanentšana, Marta tojtáná chabe quenata María jachembuama, y iytécana tbojanianaya: “Buatëmbayá tonjáshjango y entseboše aca jinýama ca.”

<sup>29</sup> María chca tojanuena y cachora tojéftsanbocna y tojána Jesús jinýama. <sup>30</sup> Jesús cabá ndoñe chë pueblöye tonjánamashëngo; yojetsemna Marta tbojanjébengo luarentse. <sup>31</sup> Chë yebnentše imojtsemna judiënga, María tša ngménaca ndoñe chaondëtsemnama tjëmbambayënga, tmojánbocna María juastama; er chë tojéftsantsbaná y tojéftsanbocna ora, chë judiënga imojtsejuabnaye, Lázaro yojtsátbontsana luaroye María yojtsaye, choca jošachnama ca.

<sup>32</sup> Jesús yojtsemnentše María tojánashjango ora, chá bentše tojanoshamentšé y tbojanianaya: —Bëngbe Utabná, aca muentše macménëse, atšbe uaftše ndoñe matënjóbana ca.

<sup>33</sup> María y cháftaca tmojánashjajna judiënga, nyetscanga imojetsenóbošachiye; y Jesús chca tojáninýe ora, corente tbojancochtsetšena y puerte ngménaca yojtsemna. <sup>34</sup> Chora Jesús tojanatjá: —¿Ndayentše cha šmojuatbontsá ca?

Y chënga tmojanjuá: —Bëngbe Utabná, mabo y cochjinýe ca.

<sup>35</sup> Chora Jesús tojánenobošachna. <sup>36</sup> As chë judiënga tmojánayana: —¡Minýënga, tša ibnabobonshana ca!

<sup>37</sup> Pero inýe judiënga imojtsichamo: —Chë jtaná chabuabínýnama tojamá, ¿tondaye tonjobená jamama, Lázaro ndoñe chaondóbanama ca?

*Lázaro tojtayanena*

<sup>38</sup> Jesús, cachiñe puerte cochtsetšenaná, chë uatbontsánöye tojanobeconá. Chë luarna cuevëshe inamna, y amashjuanentše canýe bëts ndëtšbeca yojtsatámena. <sup>39</sup> Chora Jesús tojanéyana: —Chë ndëtšbé mojuánanga ca.

Chora Marta, chë obanabe uabena tbojanianaya: —Bëngbe Utabná, mora ya bacá yojt-songuëtšé, er ya canta te entsemna cha tontsóbana ca.

<sup>40</sup> Y Jesús tbojanjuá: —Ndegombre, ya tbonjauyana, aiñe átšbeñe tcojtšošbuáchese, cochjinýe Bëngbe Bëtsá puerte obená y bëtsá bëtsemnama ca.

<sup>41</sup> Chora chë ndëtšbé tmojanjuá; Jesús celoye yojtñešiyë y Bëngbe Bëtsábioye tbojanianaya: “Taita, cbatschuá atšbe opresido tcojouenama. <sup>42</sup> Atše sëndétatšëmbo aca sempre šcondbëtseyëunanama; atše chca tbonjauyana, muentše montsemna entsangbe tšabiamá, chca, aca atše šcojichmoma, chënga chamotšošbuáchema ca.”

<sup>43</sup> Chca tojánayanentšana, jabuache tojánayana: “¡Lázaro, chentšana matsbocna ca!”

<sup>44</sup> Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcjuaná. As Jesús tojanéyana: “Motsejafjoná y jama chaotsobena ca.”

*Chë judiëngbe amëndayënga tmojanenoyeuná Jesúsbioye jóbama  
(Mt 26.1-5; Mc 14.1-2; Lc 22.1-2)*

<sup>45</sup> Chë soyëngama, banga chë judiënguentšana, María jatjëmbambayama tmojánanga, y ntšamo Jesús tojanmá tmojáninýënga, Jesúsbeñe imojtšošbuaché. <sup>46</sup> Pero inýe judiënga fariseüngbioye tmojána, ntšamo Jesús tojanmama chënga jacúntama. <sup>47</sup> As, chë fariseunga y chë bachnangbe amëndayënga tmojánenefjna inýe judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama. <sup>48</sup> Nýe cachcá chamojonýase, nyetsca entsanga chábeñe mochantšošbuáchiye; chë romanëngbe amëndayënga mochanjabo y lempe mochantsepochoá, Bëngbe Bëtsabe bëts yebna y bëngbe luare Israel ca—chënga imojtsichamo.

<sup>49</sup> Pero canýa chënguentšá, Caifás ca uabainá, chë uata chë bachnangbe más uámana amëndayá inamná, tojanéyana: —Tšëngaftanga tondaye quešmátstatšëmbo. <sup>50</sup> Y ndoñe quešmatsjuabná, tšëngaftangbiamá más tšabá yojtsemna nýe canýe boyabása Israeloca entsangbiamá chaóbana, y ndoñe nyëts bëngbe luare chamotsepochoá ca —cha tojanéyana.

<sup>51</sup> Pero Caifás chë soye nýe cachabe juábna ndoñe chca tonjánayana. Cha, chë uata chë bachnangbe más uámana amëndayá inámnayeca, Bëngbe Bëtsabe Espíritbe obenánaca tojánayana Jesús ibojana Israeloca entsangbiamá jóbana ca. <sup>52</sup> Y ndoñe nýe Israeloca entsangbiamá, sinó chë inýe luarënguiñe Bëngbe Bëtsabe básenga tmojánáshanënga chamu-atábama, as chca, nyetscanga nýe canýe luarentša entsanga chamotsemnama. <sup>53</sup> Chcasna, cach tescana judiëngbe amëndayënga tmojanenoyeuná Jesús jóbama.

<sup>54</sup> Chýyeca Jesús entsángbeñe, Judea luariñe ya ndoñe yontsana. Chë luarentšana tojéftsanbocna y canýe luaroye tojtsanoñe, entsanga ndoyeniñe béconana, canýe pueblo Efraín ca uabáinoye. Y chentše chabe uatsjëndayëngaftaca tojtsanoquedañe.

<sup>55</sup> Judiëngbe Bashco fiestama batšá yojtsájamna, y ba entsanga pueblënguentšana Jerusalenoye imojtsajna, soyënga choca jamama ntšamo tempo inamná, chca, Bëngbe

Bëtsabe bominjama tsábenga jtsemnana, chë Bashco fiesta cabá ndobuache ora. <sup>56</sup> Chocna, judiënga Jesús imojtsenguaye, y Bëngbe Bëtsabe bëts yebnentse imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

<sup>57</sup> Chë fariseunga y chë bachnangbe amëndayënga tmojanmandá, nderado nda Jesús ndayentse tojtsemnana tojtsetatšëmbësna, chaobuambá ca, as Jesús jishachama.

## 12

*María, botamana uanguëtsiye Jesúsbeñe tbojanáshecbuešcja*  
(Mt 26.6-13; Mc 14.3-9)

<sup>1</sup> Chnénguana te chë Bashco fiesta mojtšájamna ora, Jesús Betania pueblöye tojtána. Lázaro, chë Jesús tbojtananéna cha, choca inoyena. <sup>2</sup> Chentšna bëts saná Jesusbiam tmojanábua. Marta tojanëjuatšé, y Lázaro yojtsemna chë Jesúseftaca juasama meséshañe imojtsetbiámanënguente. <sup>3</sup> As María canye jarrëtema tojanaca; chiñe yojanaftsuama canye botamana uanguëtsiye, bëtsá uámaniye, ena nárdoca pormániye. Chë uanguëtsiye, María, Jesusbe shecuatšënguñe tbojanáshecbuešcja, y cachabe stjënashaca tbojtanshechojó. Chora, chë yebnentse ena nardiñana yojtsonguëtsiye.

<sup>4</sup> Chora, canya Jesusbe uatsjendayënguentsá, Judas Iscariote, chë Jesús uayayëngbe cuatšëñe yochjanayentšbashejuaná, tojánayana: <sup>5</sup> —Quem botamana uanguëtsiye unga patse denario crocénana enduámana. ¿Ndáyeca ndoñe šmonjuie y ndbomnjémënga chë crocénana mašmëntsátá ca?

<sup>6</sup> Pero Judas chca tojánayana, chë ndbomnjémëngbeñe ntsejuabnacyá, sinó cha atbëbaná inamna causa. Judas chëngbe crocénana shecnëšëñe yojánatbëna, y ba soye, chë shecnëšoye imojanatsuáma crocénanentšana cha yojánatbëbana.

<sup>7</sup> As Jesús tbojanjá: —Cachá monjá. María mëntscoñe chë botamana uanguëtsiye iuabofjájona, cha jobenayama átsbeñe jabešcjama, er ndoñe bën y atse šmochanjaitëme. <sup>8</sup> Chë ndbomnjémëngna tsëngaftangbeñe sempre mochanjesomñe, pero atse ndoñe ca — tojánayana.

*Judiënga tmojanenoyeuná Lázaro jóbama*

<sup>9</sup> Ba judiënga tmojantatsëmbona Jesús Betanioca yojtsemnana, y choye tmojána, ndoñe nye Jesús jinýama, sinó Lázarnaca, chë Jesús tbojtananéna cha. <sup>10</sup> As chë bachnangbe amëndayënga tmojanenoyeuná Lázarnaca jóbama. <sup>11</sup> Chabe causa, ba judiënga chëngbiöye cachá tmojesanëñya y Jesúsbeñe imojtsošbuaché.

*Jesús Jerusalenoye tojánashjango*  
(Mt 21.1-11; Mc 11.1-11; Lc 19.28-40)

<sup>12</sup> Chë yëfsana, mallajta entšanga, Jerusalenoca fiesta tmojánashjajnënga, tmojantatsëmbona Jesús choye yochjánashjanguama. <sup>13</sup> As chëngna palma betiye buacuafjënga tmojanatëtsetše, y Jesús jajëbenguama tmojánbocana, y mëntsá imojtsáyebuaiche: “¡Bëngbe Bëtsá matschuanga! ¡Corente bendición bomná chë Bëngbe Utabnabe obenánaca tojabál ¡Corente bendición bomná chë Israeloquëngbe Rey ca!”

<sup>14</sup> Jesús canye burrotema tbojáninýena y chábeñe tojanenoyáyé. Ntšamo Bëngbe Bëtsabe uabemana palabrenguñe iuayancá, cachá tojanopasá. Chiñe mëntsá endayana Jerusalenoca entšangbiam:

<sup>15</sup> Sión bëts pueblöca oyenënga, ndoñe matauatjëngana.

Minýënga, tsëngaftangbe Rey burrotëmiñe enjaquená entsabó ca.

<sup>16</sup> Chca orna, Jesusbe uatsjendayënga chë soyëngama ndoñe tonjanëšertá; pero chentšana, Jesús corente bëtsá yomnama Bëngbe Bëtsá tojaninýanjé ora, chë uatsjendayënga chama tmojanenoyuabó, lempe ntšamo Bëngbe Bëtsabe uabemana palabrenguñe iuayancá y cachá Jesúseftaca tojanopasama.

<sup>17</sup> Chë Jesúseftaca imojtsemna entšanga, Lázarböye uatbontšánöye tbojanchembo ora y chentšana tbojtananéna ora, ntšamo tmojáninýama chora imojtsecuëntaye. <sup>18</sup> Chiyeca, ba entšanga tmojánbocana Jesús jajëbenguama, chë bëts soye Bëngbe Bëtsabe obenánaca cha tojanmama tmojanuénayeca. <sup>19</sup> Pero chë fariseunga imojtsenatsësnaye: “Tsëngaftanga šmontsonýá bënga tondaye jamama quemuátobenama y más, inýetscanga cha montsëstona ca!”

*Básefta Grecia luaroca entšanga Jesús tmojánanguo*

<sup>20</sup> Bashco fiesta, chë Bëngbe Bëtsá jadórana Jerusalenoye tmojánangbeñe, básefta griego entšangnaca imojtsemna. <sup>21</sup> Chëngna, Felipe chë Galilea luarocá, chë Betsaida pueblócáböye, tmojanobeconá y tmojanimpadá: “Señor, bënga fsëntseboše Jesús jinýama ca.”



<sup>22</sup> Chora Felipe tojána Andrés jauyanama, y chë útatna Jesúsbioye tbojána, chë grieguëngbiana jauenayama. <sup>23</sup> Jesús chata tojanéyana: “Chë Bëngbe Bëtsá Entsó tbojanbemá corente bëtsá yomnama jinýanýiyama te ya tojobuache. <sup>24</sup> Ndegombre šcuayana: Canýe trigo jénaye ndoñe fshantsiñe tmonjuatbontsá y ndoñe tonjóbanëse, nýe cach canýe trigo jénaye jesomñana. Pero tmojuatbontsá y tojóbanase, bëtsá jashájonana. <sup>25</sup> Cachá, nda nýe cachá tojtsenóbobonshana, cha chabe vida echanjétsobuetse. Pero nda nýe cachá ndoñe tontsenóbobonshana y ntšamo atše stsemandacá, quem luariñe vida tojtsebomñentscuana cha tojtsamëse, chë nýetsca tescoma yomna tšabe vida echántsebomna. <sup>26</sup> Nda ntšamo stsemandacá jamama tojtseboše, atše chašotséstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiana, atšbe Taitá Bëngbe Bëtsá echanjínýanýiye bëtsá yomnama ca” —Jesús tojánayana.

*Jesús tojánayana cha yochjanóbanama*

<sup>27</sup> Y más Jesús tojánayana: “¡Mora tša cochtsetšenaná séntsemna! ¿Atše chjyana: ‘Taita, chë átseftaca echanjopása soyënga šmotsebojuaná ca?’ Ndoñe; er más chama atše quem luaro ye tijabo. <sup>28</sup> Taita, šminýanýe aca puerte bëtsá y obená comnama ca.”

Y cachora, celocana canýe oyebuambnayana tojanóbcna mëntšá: “Ya tchonjinýanýe atše puerte bëtsá y obená tsmënama, y mora cachiñe cachá chanjama ca.”

<sup>29</sup> Entšanga chca tmojanuena ora, ínýenga imojtsichamo nýe tojanjuésase ca; pero ínýenga imojtsichamo: —Canýe ángel chábioye tbonjuatsésá ca.

<sup>30</sup> Chora Jesús tojanéyana: —Ntšamo šmonjouencá, atšbiana ndoñe quenátsmëna, sinó tšëngangbiana. <sup>31</sup> Mora chë tempo entsemna, chë quem luare entšanga tmojëftsema bacna soyënga jinýanýiyama y chëngbe castiguama jayanama. Y mora, chë nýetsca bacna soyënga mandayá, quem luarentšana mochántábocna. <sup>32</sup> Pero atše fshantsocana atsbananá chaitsemna ora, nýetsca entšanga átšbioye chanjúbuaja ca —Jesús tojánayana.

<sup>33</sup> Chca cha yojtsichamo, ana jinýanýiyama ntšamo jóbanama ibojamnama. <sup>34</sup> Chora chë entšanga tmojanjá: —Bëngbe Bëtsabe uabemana palabrenguiñe endayana, y chíyeca bënga fsëndétatšëmbo chë Cristo nýetsca tescoma vida yochtsebomna ca. As, ¿ndáyeca cojtsichamo, Bëngbe Bëtsá Entsó tbojanbemá chamuatsbanama yojtsemna ca? ¿Nda yojtsemna Bëngbe Bëtsá Entsó tbojanbemá ca? —chënga imojtsichamo.

<sup>35</sup> Y Jesús tojanéyana: —Nýe baseftatescama chë entšangbe juabnënga binýnayá tšëngangbeñe entsemna. Chë binýnayá cabá tšëngangbeñe yojtsemñentscuana, cháftaca šmochtsajna. Chca, mo ibetiñá ndoñe quešmochátajna. Nda ndoñe binýniñe tojtsana, cha ndoñe ntsetatšëmbuana ndëmuajana yojtsana. <sup>36</sup> Chë binýnayá cabá tšëngangbeñe endétssemñentscuana, chábeñe šmochtošbuáchiye; as, tšëngangbe juabnënga binýniñe echántsemna ca —Jesús tojánayana.

Chë soyënga tojánayanentšana, Jesús tojtsanoñe y entšangbiana yojetsóitana.

*Ndáyeca chë judiënga Jesúsbeñe ndoñe montsanošbuaché*

<sup>37</sup> Masque Jesús, judiëngbe delante ba bëts soyënga Bëngbe Bëtsabe obenánaca tojëftsema, chënga ndoñe chábeñe ntsošbuáchiyana, <sup>38</sup> ntšamo Bëngbe Bëtsabe juabna oyebuambnayá Isaiás tojanabemcá, cachá chaotsemnama. Isaiás mëntšá tojánayana:

Bëngbe Utabná, ¿nda bëngbe buayenana soyiñe yojtsošbuaché?

Y ¿nda tbojosertá, acbe obenana tcojinýinýe ora ca?

<sup>39</sup> Chíyeca chënga ndoñe montsobena Jesúsbeñe jtsošbuáchiyama, er Isaiás mëntšanaca tojëftsanabema:

<sup>40</sup> Bëngbe Bëtsá tojama chënga chabe soyëngama ndoñe botamana chamondëtsejuabnama y chabe soyënga ainaniñe ndoñe chamondóyëngacñama, as ndoñe chaondëtsešertánama ca.

Y Bëngbe Bëtsá entsichamo: “Chca entsemna, chënga atšbe benache ndoñe chamondishachama,

y atše ndoñe ntjátsebacama;

y chca, chënga mochántsemna mo ndëshnana entšangcá ca.”

<sup>41</sup> Isaiás chca tojánayana, er tojáninýe Jesús puerte bëtsá y obená yojamnama, y chca chë uabemaniñe Jesusbiana yojanoyeuambná.

<sup>42</sup> Pero masque chca iuábemanëse, ba judiënga imojtsanošbuaché, y banga judiëngbe amëndayëngnaca Jesúsbeñe imojtsanošbuaché. Pero chëngna, Jesúsbeñe imojtsošbuáchemama entšangbeñe ndoñe montsichamo. Chca imojánama chë fariseungbiana auatja causa, chë judiëngbe enefjuana yebnënguentšana ndoñe chamondëtëbuacnama. <sup>43</sup> Chëngbiana más yojanámama, entšanga chëngbiana chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

*Jesube palabrengaca yochtsótatšëmbo entšanga tšabá o ndoñe tšabá tmonjamama*

<sup>44</sup> Chora Jesús mēntśá jabuache tojánayana: “Nda átsbeñe tojtsošbuaché, ndoñe nye átsbeñe ntsošbuáchiyana; chē nda šojichmó chábefñaca cha jtsošbuáchiyana. <sup>45</sup> Cachca, nda atše šojtsonyá, chē šojichmó chábioynaca cha jtsonyayana. <sup>46</sup> Atše quem luaroye tjabo entsangbe juabñēnga jabobínynama, chca, nda átsbeñe tojtsošbuaché, mo ibetiñcá ndoñe chaondtsemnama. <sup>47</sup> Pero nda atšbe soyēngama tojouena, pero ntšamo sēntsichamcá ndoñe tontsama, atše chabiamana ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentśa entsānga tmojamama tšabá o ndoñe tšabá yontsemna ca jatichámuama; quem luaroye sēnjabo ndayá chēnga jabátsebacama. <sup>48</sup> Nda atše šojtsaboté y atšbe palabrēngama ndoñe šonjoyeuná, ya entsebmoma nda chabiamana yochjayana bēts castigo jtsebmomana ibojtsemna ca. Atše tjanoyebuambá palabrēngaca, quem luare jopochócama te chabiamana chca echántsayana. <sup>49</sup> Er atše ndoñe nye atšbe juábnaca quetsatoyebuambná. Chē Taitá, chē šonjichmó cha, šonjamandá ntšamo jayanana y ndayá jabuátambana. <sup>50</sup> Atše sēndētátšēmo, atšbe Taitá tojamandá orna, cha jamándana entsānga chē nyetsca tescama yomna tšabe vida chamotsebmomana. Chíyeca, ndayá sēntsichamcá, endmēna ntšamo atšbe Taitá Bēngbe Bētsá šojamandacá ca” —Jesús tojánayana.

### 13

#### *Jesús chabe uatsjēndayēnga tojanashecjabebé*

<sup>1</sup> Bashco fiesta cabá ndobuache ora, Jesús yojtsetátšēmo chabe tempo tojanóshjanguama, quem luarentśana jēftsebmomana y chabe Taitábioye jtama. Ntšamo Jesús chábēnga yojan-ababuanýeshancá, chē quem luare imojamnēnga, chórnaca yojtseboše chē bēts bonshánana puerte más jinñanýiyana.

<sup>2</sup> Pero Satanás, Júdasbe ainaniñe bacna juabñēnga tojanjajó, uayayēngbe cucuatšīñe Jesús jayentśbáshejuanamana. Judas Iscariote, Simonbe uaquíñá. <sup>3</sup> Jesús yojtsetátšēmo chabe Taitá Bēngbe Bētsá nyets obenana tojánatsetama. Cachcá, Jesús yojtsetátšēmo, Bēngbe Bētsábíocana cha tojánabama y cachábioye jtama ibojtsemnama. <sup>4</sup> Chcasna, chē ibeta jasama tmojanpochocá ora, mesēshentśana tojantsbaná, chabe juatsboye uichētjoníya tojanenátsejca y canýe tualléjua tojanenasná. <sup>5</sup> Chentśana, canýe bachešīñe búyeshē tojanbuešcja y tojanontsé chabe uatsjēndayēnga jushecjabebiyana y jtšhechojuana cha yojtšasana tualléjuaca.

<sup>6</sup> Pero, Simón Pedro tbojanobuache ora, Jesúsbioye tbojaníyana: —Atšbe Utabná, ¿aca scochjuashecjabiá ca?

<sup>7</sup> Chora Jesús tbojanjuá: —Atše sēntsama soye mora ndoñe quecmátēsertana; pero más chchoye añe cmochanjósérta ca.

<sup>8</sup> As Pedro tbojaníyana: —¡Ndocna te šcatjuashecjabiá ca!

<sup>9</sup> Pero Jesús tbojaníyana: —Ndoñe chacbonjuashecjabeše, atšbia ndoñe quecochátšmēna ca.

<sup>9</sup> Y Simón Pedro tbojaníyana: —¡Atšbe Utabná, as nye atšbe shecuatšēnga ndoñe, ndayá atšbe cucuatšēnga y bestśásnaca ca!

<sup>10</sup> Pero Jesús tbojanjuá: —Nda bebená tojtsemna, nye shecuatše jtsashecjabiama jtšababótana, ndoñe nyētśá cachiñe. Nda tojtsobebé, ndoñe tsengá ntsemnana. Cachcá, mo bebēngēnga cuenta tšēngaftanga šmontsemna; pero canýa muentše entsemna, y cha mo bebenacá ndoñe quenátšmēna.

<sup>11</sup> Jesús yojtsetátšēmo nda chē uayayēngbe cucuatšīñe boshjuaná yochtsanmēnamana, chíyeca tojánayana: “Tšēngaftanguentśá canýa entsemna, cha mo bebenacá ndoñe quenátšmēna ca”.

<sup>12</sup> Jushecjabebiyama tojanpochocá ora, chabe juatsboye uichētjoníya tojtšaníchētjo, y mesēshentše tojtánótbema. Chora tojanéyana: —¿Chē tchbonjábiamana soyama quecmojtsēsertana ca? <sup>13</sup> Tšēngaftanga atše šmondobauyana Buatēmbayá y Bēngbe Utabná ca; tšabá chca šmontsichamo, er atše ndegombre chca sēndmēna. <sup>14</sup> Atše, tšēngaftangbe Buatēmbayá y Utabná, tchbonjushecjabebé; chcasna, tšēngaftāngnaca cmontsamna jenáshecjabebiyana. <sup>15</sup> Ntšamo quem sóyeca tchbonjanýanýecá, tšēngaftanga cachcá šmochtsama. <sup>16</sup> Ndegombre scuayana, chē oservaná chabe nduíñbiamana ndoñe más uamaná ntsemnana. Cachcá, chē ichmoná chē tbojichmobiamana ndoñe más uamaná quenátšmēna. <sup>17</sup> Quem soyēnga chašmojuatsjinýe y chca chašmojamēse, tšēngaftanga puerte oyejuayēnga vida šmochanjēftsebmomna.

<sup>18</sup> “Atše sēndētátšēmo chē tjabacacangbiamana, chíyeca atše nyētschangbiamana ndoñe chca quetsatoyebuambná. Y ntšamo Bēngbe Bētsabe uabemana palabrēnguiñe endayancá cachcá chaotsemnana, chē ‘canýa átšeftaca tandēse tonjasá, atšbe contra echántsemna ca’, cachcá echanjopása. <sup>19</sup> Mora, cabá ndoñe chca tonjopasá ora, lempe chē soyēnga sēntsichamo. As, chca chaojopasá ora, átsbeñe šmochantsošbuáchiye, y as šmochántsetátšēmo atše tsmēna chē nda sēndmēná. <sup>20</sup> Ndegombre scuayana: Nda atše tijichmóbíoye tojofja, cha

atše šochanjofja; y nda atše šojofja, cha chë nda šojichmóbiye bochanjofja ca” —Jesús tojánayana.

*Jesús tojánayana uayayëngbe cucuatšifne Judas bochjáboshjonama  
(Mt 26.20-25; Mc 14.17-21; Lc 22.21-23)*

<sup>21</sup> Chë soyënga tojánayanentshana, Jesús corente cochtsetšenana yojtsemna, y tojánayana: —Ndegombre šcuayana, canya tšëngaftanguentšá uayayëngbe cucuatšifne šochanjáboshjona ca.

<sup>22</sup> Chora, chabe uatsjëndayënga tmojanontšë enonjinyayana, y ndoñe montsetátšëmbo ndabiamna Jesús chca tojánayanama. <sup>23</sup> Canye uatsjëndayá, chë Jesús puerte ibnabobonshana, Jesusbe juachaca inatbemana. <sup>24</sup> As, Simón Pedro chábiye tbojánefjatšëmbo, ndabiamna Jesús chca tojánayanama Jesúsbiye chabotjama. <sup>25</sup> Chë puerte bonshana uatsjëndayá, Jesúsbiye batšatema más tojanosjoná y tbojantjá: —Bëngbe Utabná, ¿nda cha yojtsemna ca?

<sup>26</sup> Chora Jesús tbojanjá: —Atše canye base tandëtema chanjafchécuacuaye y ndábiye chajoyé, cha entsemna ca.

As Jesús canye base tandëtema tojanfchecuacuá, y Judas, Simón Iscariotbe uaquifábíoye, tbojanoyé. <sup>27</sup> Tandëse tojanóyëngacñe y cach ora, Satanás Júdasbe ainaniñe bacna juabnënga tbojáncochëngo. As Jesús tbojanjá: “Chë cochanjama soye, cam ora moma ca.”

<sup>28</sup> Pero ni canya chë jasama imojtsetbiamanënguentšá tbojanësertá, ndayama Júdasbiye chca tbojanianama. <sup>29</sup> Judas inamna chëngbe crocénana shecnëšifne uambayá; chíyeca inyënga tmojanjuabó Jesús chca ibojtsatsaye, ana ndayá yojtseita soye chë fiestama chauabuámíyama, o ndbomnéjëmënga ndayánaca chautšatama ca.

<sup>30</sup> Júdasna chë base tandëtema tojanóyëngacñe, y cachora chentšana tojéftsanbocna. Chora ya ibeta yojtsemna.

*Chë tsëm mando*

<sup>31</sup> Judas tojéftsanbocnentshana, Jesús tojánayana: —Ora tocjobuache, Bëngbe Bëtsá Entšá tbojanbemá corente bëtsá y obená yomnama jinjányayama; y mua echanjinyányiye Bëngbe Bëtsá corente bëtsá y obená yomnama. <sup>32</sup> Cha echanjinyányiye Bëngbe Bëtsá chca yomnama, chíyeca Bëngbe Bëtsánaca echanjinyányiye corente bëtsá y obená yomnama, y mora entsemna chë ndaye ora Bëngbe Bëtsá chca chabiamna yochjinyányiye. <sup>33</sup> Atšbe básënga, baseftatescama tšëngaftangaftaca séntsemna. Chora šmochántseguaye, pero ntšamo judiënga sënjauyancá, mora cachca tšëngaftanga cbëyana: Chë chanjá luaroye, tšëngaftanga ndoñe quešmátobena jama ca. <sup>34</sup> Canye tsëm soye cbetsamëndá: Njëtscanga šmochtsenbobonshana. Ntšamo atše tšëngaftanga cbondábuauñyeshana, cachcá tšëngaftanga šmochtsenbobonshana. <sup>35</sup> Tšëngaftanga šmojtsebobonshánëse, njëtscana entšanga mochántsetátšëmbo, tšëngaftanga atšbe uatsjëndayënga šmommna ca —Jesús tojanëyana.

*Jesús tojánayana, chábiye ndoñe bonjanabuátma ca Pedro yochjánayanama  
(Mt 26.31-35; Mc 14.27-31; Lc 22.31-34)*

<sup>36</sup> Chora Simón Pedro tbojanjá: —Bëngbe Utabná, ¿ndëmoye cochjá ca?

As Jesús tbojanjá: —Atše séntsa luaroye, mora aca ndoñe quecátobena atše juastana, pero más chcoye aifne šochanjuasto ca.

<sup>37</sup> As Pedro tbojanjá: —Atšbe Utabná, ¿ndáyeca ndoñe séntsobena mora aca juastama? ¡Atše séntseprontana acbiamna jóbanama ca!

<sup>38</sup> Chora Jesús tbojanjá: —¿Ndegombre cojtseprontana atšbiamna jóbanama? Ndegombre cbëyana, cabá ngallo ndécánta ora, aca unga soye atšbiamna cochanjayana: “Cha ndoñe quetsatabuatma ca”.

## 14

*Jesúsbeycana entšanga jobenayana Bëngbe Bëtsábiye jama*

<sup>1</sup> Mëntšánaca Jesús tojánayana: —Ndoñe ainana tsetšanënga matsmënana. Tšëngaftanga Bëngbe Bëtsábeñe šmondosbuaché; átšbeñnaca šmochtsosbuáchiye. <sup>2</sup> Atšbe Taitá Bëngbe Bëtsá endmënoca, ba luarënga joyënanama endmëna. Ndoñe chca tontsemnëse, atše chca matchënjáuyana. Morna, cha endmënoye atše chanjá tšëngaftangbiamna canye luare joyënanama jabuáprontama. <sup>3</sup> Atše chaijá y chë luare chacbojabuaprontá ora, cachifne moye chanjésabo, tšëngaftanga átšeftaca junatsama. As, atše chaitsemnoye, tšëngaftangnaca chašmotsá joyënanama. <sup>4</sup> Atše chanjá choye ntšamo jama y jashjanguama ya šmontsetátšëmbo ca —Jesús tojánayana.

<sup>5</sup> Chora Tomás Jesúsbiye tbojanjá: —Bëngbe Utabná, ndëmoye cochjama ndoñe queftšátstatšëmbo. As, ¿ntšamo bënga fchtsetátšëmbo ntšamo choye jama ca?

<sup>6</sup> Chca tbojaniana ora, Jesús tbojanjuá: —Atše sèndmèna benachcá; chëjana tcojtsase, pronto jashjanguana. Atše sèndmèna ntšamo ndegombre yomncá sempre oyebuambnayá, y entšanga chë nyetsca tescama yomna tšabe vida chamotsebomnama endamá. Nye átsbeyeca endopodena ndayëjana jama, y atšbe Taitá Bëngbe Bëtsábioca jashjanguama. <sup>7</sup> Tšëngaftanga atše šmojtsabuatmëse, atšbe Taitánaca šmattsábuatma. Morscana ya cha šmotsábuatma y cha šmontsonyá ca —tbojaniana.

<sup>8</sup> Pero Felipe tbojaniana: —Atšbe Utabná, nye chë Taitá šmanyanýe, ndayama más ca.

<sup>9</sup> Chora Jesús tbojaniana: —Chëfta te tšëngaftangaftaca sèntsemna, y ¿cabá ndoñe atše šcotsábuatma, Felipe? Nda atše šojinýe, chë Taitá Bëngbe Bëtsábioynaca jinyana. As, ¿ntšamo atše šcojtsatsá, chë Taitá šmanyanýe ca? <sup>10</sup> ¿Ndoñe condošbuaché, atšbe Taitá átsbeñe y átsnaca chábeñe nye canýacá ftsmënana? Chë chontsëtsëtsná soyënga, ndoñe nye atšbe juábnaca chca quetsatoyebuambná. Atšbe Taitá, chë átsbeñe vida endomná jtsamana lempe ntšamo stsamcá. <sup>11</sup> Muiñe smochtsošbuáchiye: Atšbe Taitá átsbeñe endmèna, y átsnaca chábeñe no nye canýacá sèndmèna. Chama ndoñe šmontsošbuachese, as nye chë tijama soyëngámna átsbeñe smochtsošbuáchiye. <sup>12</sup> Ndegombre šcuayana, nda átsbeñe tojtssošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átsbeñe ošbuachiyá, chama más bëts soyënga echanjama. <sup>13</sup> Tšëngaftanga ndaye sóynaca Bëngbe Bëtsábioye šmojotjañe, y chca šmojama atše jótšëmbonëse, átsbeñe šmošbuachéyeca, lempe šmochanjóyëngacñe; chca, chë Uaquiñá echanjinyanyíye chë Taitá corente bëtsá y obená yomnama. <sup>14</sup> Tšëngaftanga ndaye sóynaca atše šmojotjañe, y chca šmojama atše jótšëmbonëse, átsbeñe šmošbuachéyeca, atše chë soye chanjama ca —Jesús tojánayana.

*Jesús tojanašebuachená chë Uámana Espiritu jíchmuama*

<sup>15</sup> Mèntšánaca Jesús tojánayana: “Tšëngaftanga atše šmojtsebobonshánëse, ntšamo cbontsamëndacá cachcá šmochanjama. <sup>16</sup> Chca chašmojamëse, atšbe Taitá Bëngbe Bëtsá tšëngaftangbiana chanjaimpáda, tšëngaftanga jabújabuachama y jabáñemuayama inya cha chabuichmoma, chë Uajabuachaná nyetsca tescama tšëngaftangaftaca chauétsëmmana. <sup>17</sup> Cha, chë Uámana Espiritu endmèna chë nyetsca soyënguiñe ntšamo ndegombre yomncá oyebuambnayá. Chë nye quem luarama enójuabnaye entšanga, chë átsbeñe ndošbuáchiyënga ndoñe quematonýá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga aíñe cha šmotsábuatma. Cha tšëngaftangaftaca entsemna, y tšëngaftange ainaniñe sempre echanjëtsiyena.

<sup>18</sup> “Atše ndoñe quechócháisabashejuana, mo uajchonga cuenta chašmotsemnama. Tšëngaftangbiye chanjésabo. <sup>19</sup> Muentšana baseftaytese, chë nye quem luarama enójuabnaye entšanga ndoñe más quešmochátonýaye; pero tšëngaftagna aíñe, atše cachíñe šmochántinýe. Atše ainá chántsemna, chíyeca tšëngaftanga átsëftaca tšabe vida šmochántsebomna. <sup>20</sup> Chë Uámana Espiritu tšëngaftange ainaniñe chašmojóyëngacñe ora, tšëngaftanga šmochántsetatsëmbo, atše atšbe Taitábeñe nye canýacá tsmënana; cachcá, tšëngaftanga šmochántsetatsëmbo, tšëngaftanga átsëftaca cachcá nye canýacá šmomnama y átsnaca tšëngaftangaftaca. <sup>21</sup> Nda totátšëmbo ntšamo atše tijamandacá y sempre chca tojtsama, cha ndegombre šojtsebobonshana. Nda átsbiye šojtsebobonshana, chábiye atšbe Taitánaca bochántsebobonshana. Atšnaca cha chántsebobonshana, y nda atše tsmënana cha chanjinyanyíye ca” —Jesús tojánayana.

<sup>22</sup> Chora, inýe Judas, ndoñe Judas chë Iscariote, Jesúsbiye tbojaniana: —Bëngbe Utabná, ¿ntšamo chca yojtsemna, nye bënga šcochjinyanyíye ntšamo cach aca comnama, y nyetsca quem luarentšëngbiye ndoñe ca?

<sup>23</sup> Chora Jesús tbojanjuá: —Nda atše šojtsebobonshana, ntšamo atše sèntsoyebuambnacá echanjama. Atšbe Taitánaca chábiye bochántsebobonshana, y bëndata chábiye fchanjabo y chábeñe vida fchantsebomna. <sup>24</sup> Nda ndoñe šontsebobonshana, ndoñe queochátama ntšamo sèntsoyebuambnacá. Ntšamo sèntsoyebuambnacá ndoñe nye atšbe juábnaca quenátsmèna, sinó chë Taitá, chë šonjichmó chabe juábnaca.

<sup>25</sup> “Atše cabá tšëngaftangaftaca sèntsemnëntsucana, lempe quem soyëngama sèntsoyebuambná. <sup>26</sup> Chë Uajabuachaná, chë Uámana Espiritu, atšbe impadanánaca atšbe Taitá bochanjíchmuama. Cha lempe cmochántsabatambaye, y echanjama nyetsca chë tchonjáuyana soyëngama chašmuatenójuaboma.

<sup>27</sup> “Chë atšbe ainaniñe puerta tšabe ebionana tšëngaftangbiana šcuétešboshjona, cbetsatsatá. Chë nye quem luarama enójuabnaye entšanga cmondbëtsatsatnaye soyëngcá ndoñe quenátsmèna, chë atše cbontsatsatná ainaniñe puerta tšabe ebionana. Ainana tsetšanënga ndoñe matsmënana, ni matauatjëngana. <sup>28</sup> Ya šmonjouena ntšamo tchonjáuyancá: ‘chanjá y tšëngaftangbiye chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábiye jama šojtsemnama, er chë Taitá atšbiana más bëtsá endmèna. <sup>29</sup> Quem

soyënga tchonjáuyana, cabá ndoñe chca tonjopasá ora; as, chca chaojopasá ora, chiñe jenojúaboyëse átšbeñe chašmotsosbuáchema.

<sup>30</sup> “Chë quem luarentša bacna soyënga mandayá endabó; chíyeca atše ya ndoñe bëtscá tšëngaftangafaca quichaisóyebuambaye. Pero cha tondaye quenátobena atše jabórlana. <sup>31</sup> Masque cha chca endmëna, chca entsemna, atše chë Taitábíoye tšbobonshánama quem luarentša entsanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanëyana.

## 15

*Jesús yomna mo chë tšabe uvas betiyácá*

<sup>1</sup> Mëntšánaca Jesús tojánayana: “Atše sëndmëna mo chë tšabe uvas betiyácá, y atšbe Taitá Bëngbe Bëtsá chë tšabe uvas betiye inyënacá. <sup>2</sup> Chë inyëná, chë uvas betiyentša buacuafjënga ndëshajuánëfjënga jtsebuacuetëtsetšana; pero chë uvas betiyentša buacuafjënga shajuánëfjënga jtsobolimpiana, bëtscá chaotseshájuanama. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábíoye corente bochantsecastíga. <sup>3</sup> Tšëngaftanga šmonjouena ntšamo tijayancá; bëtscá chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcá. <sup>4</sup> Atšeftaca cányiñe mo canýacá šmochtsemna y atše tšëngaftangafácnaca. Chë buacuafja uvas betiyentšana juanánëfja ndoñe ntšobenana nýe cachabe ponto jashájonana. Cachcá, tšëngaftanga átšeftaca ndoñe cányiñe mo canýacá šmontsemnëse, ndoñe šmattsobena Bëngbe Bëtsabiama bëtscá soyënga jamama.

<sup>5</sup> “Atše chë tšabe uvas betiyácá sëndmëna y tšëngaftanga chë buacuafjëngcá. Nda átšeftaca cányiñe mo canýacá tojtsemna y atše cháftacnaca, cha Bëngbe Bëtsabiama bëtscá soyënga echanjama, mo canýe buacuafja becá tojtšeshajuancá. Er, tšëngaftanga atšbe uajabuáchenana ndoñe šmontsebošnëse, átšeftaca cányiñe mo canýacá ndoñe šmontsemna causa, tondaye šmattsobena jamama. <sup>6</sup> Canýa átšeftaca cányiñe mo canýacá ndoñe tontsemnëse, cha jtsemnana mo canýe buacuetëtšëna buacuafja, utsenëfja y buashánëfjácá. Chca buacuafjënga, entsanga jtsatbanana, iñeshoye jtsëtšenana y chentše jtsejuinýiyana. Cachcá, nda ndoñe átšeftaca cányiñe mo canýacá tontsemna, ndoservená jtsemnana y luaroca cha mochantsesegóra.

<sup>7</sup> “Tšëngaftanga átšeftaca cányiñe mo canýacá šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe. <sup>8</sup> Chë shajuana buacuafjëngcá tšëngaftanga chašmojtsemna ora, šmochanjinýanýiye atšbe Taitá corente bëtsá y obená yomnana. Y chca, tšëngaftanga atšbe ndegombre uatšjëndayënga šmochántsemna. <sup>9</sup> Ntšamo chë Taitá šondbobonshancá, átšnacá cachcá tšëngaftanga cbondábuanýeshana. Chíyeca, šmochtsiyena atšbe bonshánama jtsejuabnayëse. <sup>10</sup> Atše sëndama ntšamo atšbe Taitá šondëmandacá. Chíyeca atše sëndoyena chabe bonshánama jtsejuabnayëse. Cachcá tšëngaftángnaca, ntšamo atše cbontsamëndacá šmojtsamëse, atšbe bonshánama jtsejuabnayëse šmochantsiyena.

<sup>11</sup> “Atše chca cbontsëtsëtsná, chë atše sëntsebojna oyejuayana tšëngaftángnaca chašmotsebojnana, y tšëngaftanga puerte chašmotsóyëjuama. <sup>12</sup> Mëntšá cbetsamëndá: Ntšamo atše cbondábuanýeshancá, cachcá šmochtsenbobonshana. <sup>13</sup> Chë chabe amiguëngbiana tojóbanabiana, ndocna quenátobena chabiana más bonshánana jtsebojnana. <sup>14</sup> Ntšamo atše tijamandacá tšëngaftanga šmojtsamëse, atšbe amiguënga šmochántsemna. <sup>15</sup> Chë oservená ndoñe ntsetatšëmbuana ndayá chabe nduñio tojtsamama. Chíyeca atše tšëngaftanga oservëngca ca ndoñe quecbatëtšëtsná. Morscana mëntšá chontsëtsëtsná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentšana tijuatsjinýcá, tšëngaftanga tchonjinýanýe. <sup>16</sup> Tšëngaftanga ndoñe atše chešmatábuayana, pero atše aifne tšëngaftanga tchonjubacacá y tchonjubuáuyana, Bëngbe Bëtsabe trabajo jamama; y chca, mo canýe betiye sempre tojtseshajuana y chë shajuana ndocna te tontsopochocacá, tšëngaftanga chašmotsemnana. Chca, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachëyeca, cha lempe cmochanjátsataye. <sup>17</sup> Mëntšá atše cbetsamëndá: Smochtsenbobonshana ca” —Jesús tojanëyana.

*Jesús y chabe entsanga, chë nýe quem luarama enójuabnayëngbiana uaboyëñjanënga*

<sup>18</sup> Mëntšánaca Jesús tojánayana: “Pero chë nýe quem luarama enójuabnaye entsanga tcmojtsëbuayëñjëse, šmochjenójuaboye, natsana chënga atše šmonjanáboyëñjama. <sup>19</sup> Tšëngaftanga, chë nýe quem luarama enójuabnaye entsanguentšana šmojtsemnëse, chënga cmattsababuánýeshana cachëngbengbiocyá. Pero tšëngaftanga ndoñe chë nýe quem luarama enójuabnaye entsanguentšana quešmátsmëna, y atšna, chë quem luare

oyenënguentšana tsëngaftanga tcbonjabacacá. Chíyeca chë nÿe quem luarama enójuabnaye entsanga tsëngaftanga cmontsëbuayënja. <sup>20</sup> Smochjenójuaboye ntšamo tcbonjáuyanama: ‘Chë oservená chabe nduíñbiana ndoñe más uamaná quenátsmëna ca’. Chënga monjánama atše chaisufrima; tsëngaftángnaca chašmotsesufrínama mochántsama. Entšanga ntšamo atše tijayanentshana ntsachetsá tmojtsamcá, cachcá chënga mochántsama ntšamo tsëngaftanga chašmojtsëtsná chentshana. <sup>21</sup> Chë chacmojtsëbuayënjënja, chë sojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

<sup>22</sup> “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebmoma. Pero mora, chëngbe bacna soyëngama chënga ndoñe quemátobena jayanana, ‘jChca fsënjama ntsetatšëmbcá ca!’ <sup>23</sup> Nda atše šojtsábøyënja, atšbe Taitábíoyanaca jtsábøyënja. <sup>24</sup> Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebmoma. Pero mora, masque ntšamo sënjamcá tmonjinjëse, chënga atše šmontsábøyënja y atšbe Taitábíoyanaca. <sup>25</sup> Chca chënga montsama, ntšamo chëngbe leyënguñe enduabemancá cachcá chaopasama. Chiñe mëntsá endayana: ‘Nÿe tondayama chënga šmonjanábøyënja ca.’

<sup>26</sup> “Atše, atšbe Taitábentshana chë Uajabuachaná y añemuayá tsëngaftangbiöye chanjichmua. Cha chë Uamana Espíritu endmëna, chë nÿetsca soyënguñe ntšamo ndegombre yomncá oyebuambnayá. Cha endmëna chë Taitábentshana ichmoná; y cha lempe atšbe tsabe soyënga cmochantsëtsësnaye. <sup>27</sup> Chorscana, tsëngaftángnaca atšbiama entsanga šmochantsëtsësnaye, er tsëngaftanga átšeftaca šmondëtsemna, entsanga jábuayenama atše sënjanbojatšë orscana ca” —Jesús tojánayana.

## 16

<sup>1</sup> Mëntsánaca Jesús tojánayana: “Atše quem soyënga cbontsëtsësná, tsëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora. <sup>2</sup> Chëngna, chë judiëngbe enefjuana yebnënguentšana cmochantëbuacana. Chca tempo chaojoubuache ora, chë tsëngaftanga chacmojtsëbáyënga mëntsá mochántsejuabnaye: ‘Bënga tsábá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’ <sup>3</sup> Chënga, chë Taitá Bëngbe Bëtsá ndoñe quematábuatma, y átšbiöye cach ndoñe. Chíyeca, chca cmochanjáborlaye. <sup>4</sup> Atše chca tsëngaftanga cbontsëtsësná, ntšamo tcbonjáuyanama chašmuenójuaboma, chca tempo chaojoubuache ora ca” —Jesús tojánayana.

### *Ndayá chë Uamana Espíritu inétsama*

Mëntsánaca tojánayana: “Entšanga jábuayenama sënjanbojatšë orscana, chë echanjopása soyëngama ndoñe quecbënjatanëtsësná, er atše tsëngaftangaftaca sënjetsemna. <sup>5</sup> Pero morna, chë sojichmó cha yomnoye chantá; y tsëngaftanguentšá ndocná sochanjatjaye, ‘ñndëmoye cojtsá ca?’ <sup>6</sup> Mora, tsëngaftangbe ainana ngmëncaca entsemna, atše chca tcbonjáuyanama causa. <sup>7</sup> Pero ndegombre scuayana: Atše chanjá y chca tsëngaftangbe tsábiamá echántsemna. Atše ndoñe quetsjase, chë Uajabuachaná y añemuayá ndoñe tsëngaftangbiöye queochátabo. Pero aiñe chanjá, y chora cha tsëngaftangbiöye chanjichmua. <sup>8</sup> Cha chaojášhango ora, echanjama quem luarentšá entsanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominjñe tsábiamá jtsemnana, y ndayá yomna chë Bëngbe Bëtsá entsangbiamá jayanana tsábá o ndoñe tsábá tmonjamama. <sup>9</sup> Entšanga átšbeñe ndoñe quematošbuaché. Chíyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana. <sup>10</sup> Chë Taitábíoye chanjá y atše ndoñe más quešmochátinÿe. Chíyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominjñe tsábiamá jtsemnana. <sup>11</sup> Quem luarentšá bacna soyënga mándayabiamá Bëngbe Bëtsá ya tonjayana, ntšamo cha tojamama ndoñe tsábá yontsemna ca y nÿetsca tescama castiganá chaotsemna ca. Chíyeca chë Uajabuachaná echanjama entsanga corente chamotsetátšëmbo, ndayá ndegombre yomna chë Bëngbe Bëtsá entsangbiamá jayanana tsábá o ndoñe tsábá tmonjamama.

<sup>12</sup> “Atše cabá ba soyënga sëntsebmoma tsëngaftanga jáuyanama. Masque chcasna, mora tsëngaftanga ndoñe quešmátobena chë soyëngama josértana. <sup>13</sup> Pero chë Uamana Espíritu, chë nÿetsca soyënguñe ntšamo ndegombre yomncá oyebuambnayá, chaojášhango ora, lempe ntšamo ndegombre yomncá cmochanjabuatambá. Cha ndoñe nÿe cachabe juábñaca queochátoyebuambnaye. Ntšamo chë Taitá chábíoye tbojauyancá, tsëngaftanga cachcá cmochanjáuyanana, y cha cmochanjábuayenaye ntšamo yochjopásama. <sup>14</sup> Atšbe soyënguentšana cha echanjójyëngacñe, y cach soyëngama cmochanjabuatambá. Chcase cha cmochanjñanjñiye atše bëtsá y obená bëtsemnana. <sup>15</sup> Lempe ntšamo chë Taitá endbomncá, atšbe soyëngnaca endmëna. Chíyeca atše tcbonjáuyanana, chë Uamana Espíritu atšbe soyënguentšana yochjójyëngacñe y cach soyëngama cmochjabuatambá ca.”

<sup>16</sup> “Baseftayté y atše ndoñe más quešmochátinje. Inje baseftayté y cachiñe šmochantétinje ca” —Jesús tojanéyana.

*“Tsëngaftangbe ngménana, oyejuayana echanjóbema”*

<sup>17</sup> Chora Jesusbe básefta uatsjéndayënga imojtsentjanaye: —¿Ntšamo yojtsentsáyana, chë “baseftayté y atše ndoñe más quešmochátinje, y inje baseftayté y cachiñe atše šmochantétinje, er atše chë Taitábioye chanjá ca”? <sup>18</sup> ¿Ntšamo yojtsentsáyana, chë “baseftayté ca”? Ndoñe quemuatstatšëmbo ntšamo yojtsentsáyanama ca —chënga imojtsichamo.

<sup>19</sup> Jesús yojtsetátšëmbo chënga chca jatjayama imojtsebošama, y tojanéyana: —Atše tcbonjáuyana: “Baseftayté y atše ya ndoñe más quešmochátinje, y inje baseftayté y cachiñe atše šmochantétinje ca.” ¿Chë soyëngama šmojtstentjaná ntšamo stsentšáyana? <sup>20</sup> Ndegombre šcuayana: Tsëngaftanga šmochanjenóbošachna y puerte ngménënga šmochántsemna, pero chë nje quem luarama enójuabnaye entsanga corente oyejuayënga mochántsemna. Masque tša ngménënga šmochántsemna, chentšana tsëngaftangbe ngménana, oyejuayana echanjóbema. <sup>21</sup> Canje shembása tbojontšabuache šešona jónýnama ora, tša ngménaca cha jésemnana, puerte tbojtsetsetse causa. Chë šešona ya tojonýna ora, cha ndoñe ntsenójuabnayana chë tša ibuántsetšama. Canje šešona quem luaroye cháuashjanguama chë shembása tojámayeca, chora cha tšabá y oyejuayá jtsemnana. <sup>22</sup> Ndegombre, tsëngaftangnaca cachcá, chora tša ngménaca šmochántsemna. Pero atše tsëngaftangbioye chajésabo ora, atše šmochantétinje y corente oyejuayënga šmochántatsmëna. Y ndocná queochatobenaye chë oyejuayana jabuajuánana.

<sup>23</sup> “Chë te chaojshjango ora, tsëngaftanga ndocá atše quešmochatstjaye. Ndegombre šcuayana, lempe ntšamo atše Taitá šmojtjañcá, y chca šmochama atše jótšëmbonëse, átsbeñe šmošbuachéyeca, cha lempe cmochanjátšataye. <sup>24</sup> Mëntscoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjóyëngacñe, y chca, bëtscá oyejuayana šmochántsebmna ca” —Jesús tojanéyana.

*Jesucristo, quem luarentše mandayábioye yëñjanayá*

<sup>25</sup> Mëntsánaca Jesús tojánayana: “Chë soyëngama lempe cuentëngaca tsëngaftanga tcbonjáuyana; pero tempo echanjobuache, chora atše ya ndoñe más cuentëngaca quebochátëtsësnaye; chë cuentna, puerte botamana lempe atšbe Taitabiana cbochanjáuyana. <sup>26</sup> Chë tena, atše jótšëmbonëse, átsbeñe šmošbuachéyeca, atšbe Taitábioye šmochanjotjañe. Y atše cbéyana; chca, chë te ndoñe quešochatájaboto tsëngaftangbiama atšbe Taitá jatsimpadánana. <sup>27</sup> Atše ndoñe quichatsimpadana, er cach Taitá tsëngaftanga cmondábabuanýeshana. Tsëngaftanga atše šmondobobonshánama, y Bëngbe Bëtsábocana atše tijabama šmojtšošbuáchema, chë Taitá cmondábabuanýeshana. <sup>28</sup> Atše chë Taitábocana sënjabocna y quem luaroye sënjabo. Pero mora quem luare chanjéftsebošhona atšbe Taitábioye jtama ca” —Jesús tojánayana.

<sup>29</sup> Chora chabe uatsjéndayënga tmojanayana: —Mora ya ndoñe cuentëngaca quecatoyebuambná, chíyeca lempe paselo josértama bëngbiama entsemna. <sup>30</sup> Mora fsëntsetatšëmbo aca nýetsca soyëngama cotatšëmbuama, y ndoñe quenátsiya ndocná aca chacmátstjanama, er aca chëngbe juabnënga jtsabuatmana, chënga cabá aca ndëtjaye ora. Chiyeca bënga fsëntšošbuaché aca Bëngbe Bëtsábocana tcojabama ca —chënga tmojanayana.

<sup>31</sup> As Jesús tojanéyana: —¿Mora chiñe šmojtšošbuaché ca? <sup>32</sup> Ya tempo tocjobuache y cam ora entsemna, tsëngaftanga nýetsquénache šmochanjuáshana y atše nje canya šmochanjésebošhona. Pero atše ndoñe nje canya quichátsmëna, chë Taitá átšeftaca entsëmnayeca. <sup>33</sup> Atše lempe quem soyënga cbontsëtsësná, tsëngaftangbe anianiñe tšabe ebionana chašmotsebmna, átšeftaca cányiñe mo canýaca jtsemnëse. Quem luarentše šmochanjasufrina; pero añemo šmochtsebmna, atše ya chë quem luarentša mandayá sënjayëñaná ca —Jesús tojánayana.

## 17

*Jesús chabe uatsjéndayëngbiama Bëngbe Bëtsábioye tbojanimpadá*

<sup>1</sup> Jesús chë soyënga tojánayanentšana, celoye tojanontješé y Bëngbe Bëtsábioye tbojanayana: “Taita, atšbe te ya tocjobuache. Minýanjé, atše acbe Uaquiñá, corente bëtsá y obená bëtsemnana. As, atše acbe Uaquiñá, aca corente bëtsá y obená comnana chainýanjema. <sup>2</sup> Mora aca nýets obenana šconjatšetá nýetsca entsángbeñe, nýetscanga chë atšbiama tcojábacacanga chë nýetsca tescama yomna tšabe vida chamotsebmna atše chaimama. <sup>3</sup> Chë nýetsca tescama yomna tšabe vida jtsebmna endmëna aca, chë nje canje y ndegombre Bëngbe Bëtsá jtsabuatmana, y atše Jesucristo, acbe ichmoná.

<sup>4</sup> “Lempe ntšamo šconjamandacá atše sënjapochocá, y chca quem luariñe sënjama aca corente bëtsá y obená comnama jinýanýiyama. <sup>5</sup> Taita, quem luare cabá ndoñe quenjatsmëna ora, aca tconjaninýanýé atše corente bëtsá y obená ácaftaca bëtsemnama. Mora moma atše cachcá ácaftaca chaitsemnama.

<sup>6</sup> “Aca quem luarentša entšanguentsana quem boyabásenga tconjabacacá y atšbiana šconjinýinýé. Atše chënga sënjanýanýé ntšamo ndegombre aca comnama. Chënga acbe entšanga mondmëna; y acna, chë atšbiana chënga šconjinýinýiyá. Chënga acbe palabra tmonjouena y tšabá tmonjyouná. <sup>7</sup> Chiyeca chënga mondétatšëmbo, lempe ntšamo atše tsbomncá ácbentšana tijóyëngacñama. <sup>8</sup> Atše chënga sënjáuyana ntšamo aca scojauyancá, y chënga montsošbuaché chë atše sënjauniñe. Chiyeca, chënga ndegombre mondétatšëmbo atše acbiocana tijabama, y montsošbuaché aca chë atše scojichmó cha comnama.

<sup>9</sup> “Atše chëngbiana cbontseimpadana. Chë nye quem luarama enójuabnaye entšangbiana ndoñe quecbátsimpadana, pero aíñe chë atšbiana šcojinýinýiyëngbiana, er chënga acbe entšanga mondmëna. <sup>10</sup> Lempe ntšamo atše tsbomncá, acbiámna endmëna; y cachcá, lempe ntšamo cobomncá, atšbiámna endmëna. Acbengbe vidëngaca aca tcojinýanýé atše corente bëtsá y obená bëtsemnama.

<sup>11</sup> “Atše ndoñe quem luarentše quešocháisetotona, pero chënga aíñe cabá camuentše mochanjëftsemna. Atše chantá ácaftaca jtsatsmënama. Uámana Taitá, chë atšbiana šconjinýinýiyënga acbe obenánaca cochtsanýena. Chca ntšamo bëndata mo canýacá bondmëna, chëngnaca cachcá chamotsemnama. <sup>12</sup> Atše chëngaftaca sëntsemnëntscuana, chënga sëntsanýena, aca šconjatšetá obenánaca. Atše chënga sëndánýena, y ni canýa queochátsmëna infiernoca pochocaná, nye chë infiernoca pochocaná jtsemnama ibomná chana aíñe, ntšamo acbe uabemana palabrenguiñe endayancá, cachcá chaotsemnama.

<sup>13</sup> “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtsná, chca, chë atše sëntsebobna puerte bëtscá oyejuayana chëngnaca chamotsebobnama. <sup>14</sup> Atše chënga sënjáuyana ntšamo aca scojauyancá. Ntšamo atše ndoñe quetsátsmëna chë nye quem luarama enójuabnaye entšanguentsá, cachcá, chënga cach ndoñe quemátsmëna. Chiyeca, chë nye quem luarama enójuabnaye entšanga chënga montsëbuayënja. <sup>15</sup> Atše ndoñe quecbátsimpadana, chënga quem luarentšana chacúbuacanama; pero aíñe, nyetsca bacna soyënguentsana chacuatsebacama. <sup>16</sup> Ntšamo atše ndoñe quetsátsmëna chë nye quem luarama enójuabnaye entšanguentsá, cachcá, chënga cach ndoñe quemátsmëna. <sup>17</sup> Cochjama chënga acbe entšanga chamuëtsemnama, y chca, nye acbiana vida chamotsebobna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna. <sup>18</sup> Ntšamo aca quem luaroye šconjanichmocá, cachcá átsnaca chënga sëntsachamná, quem luare entšanga jábuayenama. <sup>19</sup> Chëngbiana atše cachiñe mëntšá cbëyana: Atše nye acbiana sëndmëna. Y chca, chëngnaca, ntšamo acbiana ndegombre yomncá jtsóyebuambnayëse acbe entšanga chamotsemna, y chca, nye acbiana vida chamuëtsebobna, ntšamo ndegombre yomncá chënga imoyenama.

<sup>20</sup> “Pero nye chëngbiana ndoñe quecbátsimpadana, sinó chë átsbeñe mochtsošbuáchiyëngbiannaca, chë atšbiana šconjinýinýiyënga, chëngbioye atšbiana ínýenga chamojtsabuayinýa ora; <sup>21</sup> as chënga nyetscanga canýiñe mo canýacá chamotsemnama. Ntšamo aca, Taita, átsëftaca canýiñe mo canýacá bondmëna y átsnaca ácaftaca, cachcá chëngnaca canýiñe mo canýacá bëndataftaca chamotsemnama cbontseimpadana. Y chca, quem luarentša nyetsca entšanga, atše scojichmoma chamotsošbuáchema. <sup>22</sup> Ntšamo chë obenana y uámanana šconjatšetacá, cachcá átsnaca chënga sënjatšatá. As, ntšamo bëndata canýiñe mo canýacá bondmëna, chëngnaca cachcá canýiñe mo canýacá chamotsemnama. <sup>23</sup> Atše chëngbe ainaniñe sëntsemna, y aca átsëftaca canýiñe mo canýacá bondmëna; as, chëngnaca nyetsca soyënguiñe canýiñe mo canýacá chamotsemnama. Y chca, quem luarentša entšanga chamotsetátšëmbo aca scojichmoma, y chamotsetátšëmbo ntšamo atše šcondbobonshancá, chëngnaca cachcá condábabanýeshanama.

<sup>24</sup> “Taita, atšbiana chënga šconjinýinýiyi. Atše mëntšá sëntseboše: chë atše chántsemnoca, chëngnaca chamotsemna, y chentše, chë šconjatšetá obenana y uámanana chënga chámuiñe. Quem luare cabá ndoñe quenjatsmëna orscana, šconjábobonshana; chiyeca, cachora tconjaninýanýé atše corente bëtsá y obená bëtsemnama. <sup>25</sup> Taita, nyetsca soyënguiñe tšabá amá, masque chë nye quem luarama enójuabnaye entšanga ndoñe quematábuatma, atše aíñe cbonduábuatma, y quem boyabásenga montsetátšëmbo, aca comna chë scojichmó cha. <sup>26</sup> Atše chënga sënjinýanýé ntšamo ndegombre aca comnama, y más chanjinýanýiyi; chca, ntšamo šcondbobonshancá, chëngnaca cachcá chamotsenbobonshánama y atše chëngbe ainaniñe chaitsemnama ca” —Jesús tojánayana.



## 18

*Uayayënga Jesús tmojánishache*

*(Mt 26.47-56; Mc 14.43-50; Lc 22.47-53)*

<sup>1</sup> Chë soyënga Jesús tojëftsanayanentšana, chabe uatsjëndayëngaftaca tojëftsanbocna, chë binche béjaye Cedron ca uabáiniye chenguana jama. Chentše inamna canye tjashetema; y Jesús chabe uatsjëndayëngaftaca choye tojánamengo. <sup>2</sup> Y Judas, chë Jesús uayayëngbe cucuatsiñe boshjuaná, tšabá chë luare yojanábuatma, er Jesús y chabe uatsjëndayënga ba soye chentše imojáneneñjuana. <sup>3</sup> Chora Judas tojánashjango, y cháftaca ba soldadënga y básefta Bëngbe Bëtsabe bëts yebnocá josticiënga; chënga imojamna chë bachnangbe amëndayënga y fariseungbe ichmónënga; nyetscanga uajuinñanëshangaca, lamparëshangaca y espadëjängaca uajátënga.

<sup>4</sup> Jesúsna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entšanga tojanéyana: —¿Nda šmojtsenguá ca?

<sup>5</sup> Y chënga tmojanjuá: —Jesús, chë Nazaretocá fsëntsenguá ca.

As Jesús tojanéjua: —Atše cha sëndmëna ca.

Y Judas, chë boshjuaná, chánaca chë entšángaftaca yojtsemna. <sup>6</sup> Jesús tojanéyana: “Atše cha sëndmëna ca”, y cachora chë entšanga tmojanostëtsánanga y fshantsoye tmojánshajaye.

<sup>7</sup> Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

<sup>8</sup> As Jesús tojanéyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachá šmochjónýaye chamotsóñëngama ca.

<sup>9</sup> Chca tojanopasá, ana ntšamo Jesús tojanayancá cachá chaotsemnama, chë “Atšbe Taitá Bëngbe Bëtsá, chë šconjínýinýiye entšanguentšana ni canya pochocaná queochátsmëna ca”.

<sup>10</sup> Simón Pedro canye espadëja inasëngbuájonýana; asna, tojanenosëngbotëntšena y chë bachnangbe más uámana amëndayabe canye oservenábioye catšbioica matscuaše tbojtsanëštjango. Chë oservená Malco ca inauabaina. <sup>11</sup> As Jesús, Pédrëbioye tbojaniyana: “Acbe espadëja matosëngbuajonýá. Ntšamo atšbe Taitá Bëngbe Bëtsá tojanmandacá, chë atše puerte ngmënana jtsebomnama, ¿ndoñe chca chaondëtsemna ca?”

*Jesús, Anasbe yebnocá*

*(Mt 26.57-58; Mc 14.53-54; Lc 22.54)*

<sup>12</sup> Chentšana chë soldadënga, chëngbe amëndayá y Bëngbe Bëtsabe bëts yebnocá josticiënga Jesús tmojánishache y tmojanëcuébatšëca. <sup>13</sup> Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá. <sup>14</sup> Caifás yojamna nda jidiënga tojanéyana: “Tšëngaftangbiana más tšabá entsemna canye boyabása Israeloca entšangbiana chaóbana ca.”

*Pedro tojánayana Jesúsbioye ndoñe bonjanabuátma ca*

*(Mt 26.69-70; Mc 14.66-68; Lc 22.55-57)*

<sup>15</sup> Simón Pedro y inye uatsjendayá Anasbe yebnoye Jesús imojtsëstona. Chë inye uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúseftaca chabe chashjónťsoñe jashjanguana. <sup>16</sup> Pero Pédrëna nýe shjoca, amashjuanentše tojanoquedá. Chcasna, chë inye uatsjendayá tojánbocna y chë bëshása ebtafjuana shembásaftaca tojanoyebuambá. Chora Pedro tbojanëmashëngo. <sup>17</sup> As chë shembása Pédrëbioye tbojaniyana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

<sup>18</sup> Tša yojtsesëсна causna, chë oservénënga y chë josticiënga shjoca tmojanniñe y chentše imojtšbioniye. Y Pédrëna chëngaftaca yojtšëbonena.

*Ntšamo chë bachnangbe más uámana pasado amëndayá, Jesúsbioye tbojantjá*

*(Mt 26.59-66; Mc 14.55-64; Lc 22.66-71)*

<sup>19</sup> Chora, chë bachnangbe más uámana pasado amëndayá tojanontšë Jesús jatjayama chabe uatsjëndayëngbiana y ndayá cha entšanga yojánabuatambamnaca. <sup>20</sup> Y Jesús tbojanjuá: —Atše nyetsca entšangbe delante sënjoyebuambá. Sempre chë entšangbe eneñjuana yebñënguenache sëndabuatambá, y Bëngbe Bëtsabe bëts yebnócnaca, nyetsca jidiënga mondëtsenëfuanentšë; y chca, iytëmencá tondaye chiyatoyebuambá. <sup>21</sup> ¿Ndáyeca chca šcojtsetjaná? Atšbe palabra tmojouenënga májtjaye, as chënga chacmëyana ntšamo atše tijáuyana. Chënga mondëtatšëmbo ntšamo atše tijayancá ca —Jesús tbojanjuá.

<sup>22</sup> Jesús chë soyënga tojánayana ora, canye josticio chentše yojtsemná, Jesúsbioye tbojanuebantšëtá y tbojaniyana: —¿Chca chë bachnangbe más uámana amëndayá cuanjojuá ca?

<sup>23</sup> Y Jesús tbojanjuá: —Ndoñe tšabá tijayanésna, šmëyana ndayentše chë podesca palabra yojtsemna; y tšabá tijóyeuambasna, ¿ndáyeca šcojajuebantšetá ca?

<sup>24</sup> Chentšana, Anás tojanmandá, chë bachnangbe más uámana amëndayá Caifasbe yebnoye, Jesús batsécná chamuánatsama.

*Pedro cachiñe tojánayana Jesúsbióye ndoñe bonjanabuátma ca*

*(Mt 26.71-75; Mc 14.69-72; Lc 22.58-62)*

<sup>25</sup> Chéntscuana, Pedro yojtšešbonena, tsanana chë ñe juachaca. Chora chë entšanga tmojantjá: —¿Aca ndoñe chabe uatsjendayënguentsá condmëna ca?

Y Pedro ndoñe ca tojánayana: —Atše ndoñe quetsásmëna ca —cha tojánayana.

<sup>26</sup> Chora, chë bachnangbe más uámana amëndayabe canye oservená Pédrëbioye tbojanayana: —¿Atše ndoñe cháftaca chë tjashetémoca tchbonjinje ca?

Chë oservená inamna chë Pedro tbojtsanmatstšabe pamillo.

<sup>27</sup> Y Pédrëna cachiñe ndoñe ca tojánayana, y cachora canye ngallo yojacánta.

*Jesús Pilatbe delante*

*(Mt 27.1-2, 11-14; Mc 15.1-5; Lc 23.1-5)*

<sup>28</sup> Chentšana, Caifasbe yebnentšana Jesús tmojanánatse chë romano mandadbe yebnoye. Ya yojtsebínýana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canye ndoñe judiëbe yebnoye nda tojámashënguse. <sup>29</sup> Chíyeca Pilato tojánbocna y chënga tojanéyana: —¿Ndayá quem boyabásabe contra šmochjayana ca?

<sup>30</sup> Chora chë entšanga tmojanjuá: —Bacá uamana ndoñe tontsemñëse, ndoñe matifjuánatse ca.

<sup>31</sup> As Pilato tojanéyana: —Tšëngaftanga matánatse, y ntšamo cach tšëngaftangbe leyíñe iuayancá muabiana šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

<sup>32</sup> Chca tojanopasá, ana ntšamo Jesús cachá jóbana tojanayancá cachá chaotsemnana. <sup>33</sup> As Pilato cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

<sup>34</sup> Y Jesús tbojanjuá: —¿Ntšamo šconjatjacá, cach aca chca cojtsejuabnýyeca chca yojtsemna o ñnyënga atšbiana tcmojacuentáyeca ca?

<sup>35</sup> Chora Pilato tbojanayana: —¿Mo atše judío quetsmëna? Cach ábioca entšanga y chë bachnangbe amëndayënga muentše tcmojújshjango. ¿Ndayá tcojama ca?

<sup>36</sup> Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojsemnésna, atšbe ústonënga muantsatsejaye atše chë judiëngbe cucuatsíñe ndoñe chašmondoboshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

<sup>37</sup> As Pilato tbojanayana: —¿As aca rey cojtsemna ca?

Y Jesús tbojanjuá: —Tšabá tchayana; atše rey sëndmëna. Chama atše tijeñýná y quem luaroye tijabo; y atše sënjabo ndegombre soyëngama jabóyeuambayama. Y chca soyënga jtsamëse tmojenënga, atše jtseyeunanana ca.

<sup>38</sup> Chora Pilato tbojanayana: —¿Y ndayase chë ndegombre soye yomna ca?

*Jesusbiana tmojanayana chaóbana ca*

*(Mt 27.15-31; Mc 15.6-20; Lc 23.13-25)*

Chca tbojantjá chentšana, Pilato cachiñe tojánbocna judiëngaftaca jóyeuambayama, y tojanéyana: —Atše ni mo canye soye chiyátinýena, quem boyabása castiganá chaotsemna ca jayanama. <sup>39</sup> Pero tšëngaftanga šmondétatšëmo, Bashco fiestama atše canye utamená cachá jëtsboshjonama. ¿šmojtseboše chë judiëngbe Rey chjëtsboshjona ca?

<sup>40</sup> Chorna nýetsca entšanga cachiñe tmojanáyebuachena: —¡Ndoñe, cha ndoñe! ¡Barrabás matsboshjona ca!

Barrabasna canye bacá uamana entšá inamna.

## 19

<sup>1</sup> Chora Pilato, Jesús tbojanánatse y tojanmandá chamotsetjanjama. <sup>2</sup> Y canye coronësha uchmašëfjangaca chë soldadënga tmojanapormá y Jesús tmojanabestšajó; y canye shbuenda uafjatsenga entšayá mo reyca tmojanichëtjo. <sup>3</sup> Chorna chënga imojtsóbobecocnaye y jtsafchayama imojtsatsétsnaye: “¡Bayté judiëngbe Rey cochtsemna ca!” Y imojtsejuebantšetaye.

<sup>4</sup> Pilato cachiñe tojánbocna y entšanga tojanéyana: —Šmochjouena; cha chanjuábocna, chë boyabása castiganá chaotsemna ca jayanama atše ni mo canye soye ndoñe sënjinýenama chašmotsetatšëmbuama ca.

<sup>5</sup> As Jesús tojánbocna chë uchmašëffjangaca coronësha uabestšajoná y chë shbuenda uafjatsenga entšayá mo reyca uichëjtjoná. Y Pilato tojanëyana: —¡Muentšë chë boyabása entsemna ca!

<sup>6</sup> Chë bachnangbe amëndayënga y chëngbe josticiënga cha tmojáninÿe ora, tmojanontšë uayebuáchana: —¡Motsecrucificá! ¡Motsecrucificá ca!

Chora Pilato tojanëyana: —Cach tšëngaftanga mánatse y šmochjacrucificá; atšë ni mo canÿe soye chiyátinÿena quem boyabása castiganá chaotsemna ca jayanama ca.

<sup>7</sup> Chora chë judiënga tmojanjuá: —Bëngna canÿe ley fsëndbomna, ntšamo chiñe endayan-cana, quem boyabása jóbanama bontsemna, Bëngbe Bëtsabe Uaquiniá entsenobianná causa ca.

<sup>8</sup> Pilato chca tojanuena ora, más yojtšauatja. <sup>9</sup> Cachiñe chabe yebnoye tojtanamáshëngo y Jesús tbojantjá: —¿Ndëmocá aca cmëna ca?

Pero Jesús ndocá tbojanjuá. <sup>10</sup> Chora Pilato tbojanijana: —¿Ndoñe šcochanjojuá ca? ¿Ndoñe condétatšëmbo, aca jacrucificama o jëtsboshjonama atšë tsobenama ca?

<sup>11</sup> As Jesús tbojanjuá: —Acbe obenana Bëngbe Bëtsá ndoñe macmënjánatšetase, tondaye cattsobena átšëftaca jamama; chíyeca, acbe cucuatšinë šonjaboshjoná, acbiama más bëts bacna soye tonjama ca.

<sup>12</sup> Cach orscana Pilato yojtšenguaye ntšamo jamana, jobenayama Jesús jëtsboshjonama; pero chë judiënga imotsáyebuache: —¡Chacojëtsboshjonëšna, Césarbe amigo ndoñe condmëna! ¡Nda rey tojtšenobianná chana, Césarbe uayayá jtsemnana ca!

<sup>13</sup> Pilato chë soyënga tojanuena ora, chashjoye Jesús tbojanábocna. Pilato tojanótbema chabe puestentšë tribunaloca. Chë tribunaloca chashjañna hebreo biyañe Gabata ca inauabaina, y endayana “ndëtsbëngaca pormániñe ca”. <sup>14</sup> Bashco fiestama canÿe te yojtšajamna, y mo nÿetsto ora yojtsemna. Chora Pilato chë judiënga tojanëyana: —¡Muentšë tšëngaftangbe rey entsemna ca!

<sup>15</sup> Pero chënga tmojanáyebuachena: —¡Chaóbana! ¡Chaóbana! ¡Motsecrucificá ca!

As Pilato tojanantjá: —¿Tšëngaftangbe rey atšë chjacrucificá ca?

Y chë bachnangbe amëndayënga tmojanjuá: —Bëngbe rey nÿe César endmëna, ndocná más ca.

<sup>16</sup> Chentšana Pilato, chëngbe cucuatšinë Jesús tbojánboshjona chamocrucificama y chë judiënga cha tmojanánatse.

### *Jesús tmojanrucificá*

(Mt 27.32-44; Mc 15.21-32; Lc 23.26-43)

<sup>17</sup> Jesús tojánbocna chabe cruz tantšajónana y tmojanánatse canÿe luaroye, “Obanabe Bestšashe ca” uabáinoye (hebreo biyañe Gólgota ca inauabaina). <sup>18</sup> Chentšë cha tmojanrucificá y inÿe útatnaca cátaoica tmojanrucificá; Jesusna tsëntsaca. <sup>19</sup> Pilato tojanmandá canÿe uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca. <sup>20</sup> Y ba judiënga chë uabemana soye tmojanalía, er chë Jesús tmojanrucificá luare Jerusalenó béconana inamna, hebreo, latín y griego biyañe yojetsábemana. <sup>21</sup> Chca juabemama tojanmandáyeca, chë bachnangbe amëndayënga Pilato tmojanijana: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atšë sëndmëna ca”.

<sup>22</sup> Pero Pilato tojanëjua: —Ntšamo tijuábema cachá chaotsábemana ca.

<sup>23</sup> Chë soldadënga Jesús tmojanrucificá chentšana, chabe entšayangá tmojanájaca y cántañe tmojanajata, nÿetsca canta soldadëngbiama. Chabe cmesëjua tmojanaca; chëjuana yojanamna nduajonanëjua, nÿetsëjua uabianánëjua. <sup>24</sup> As chë soldadënga tmojanëyana: “Ndoñe matjuátanëca; más tšabana tsbanánoye mochjútšëna, ndabiama yochjuáquedama chaotsotatšëmbuama ca.”

Chca tojanopasá ana ntšamo Bëngbe Bëtsabe uabemana palabrenguiñe endayancá cachá chaotsemnana, chë “Atšbe entšayangá tmojatenájataye; atšbe cmesëjuamna tsbanánoye tmonjanëtšëna, ndabiama jauquédama jtsotatšëmbuama ca.” Y lempe chca chë soldadënga tmojanma.

<sup>25</sup> Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena. <sup>26</sup> Jesús chabe mamábioye tbojáninÿe, y chabe juachacna chë Jesusbe bonshana uatsjendayá yojtsemna. Chora chabe mamá tbojanijana: “Mama, chentšë acbe uaquiniá entsemna ca.”

<sup>27</sup> Y chë bonshana uatsjendayá tbojanijana: “Chentšë acbe mamá entsemna ca.”

Cach orscana, chë uatsjendayá chabe yebnentšë Jesusbe mamábioye tbojanofja.

### *Jesús tojanóbana*

(Mt 27.45-56; Mc 15.33-41; Lc 23.44-49)

<sup>28</sup> Jesús yojtsetátsëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrënguifë endayancá cachcá chaotsemnama, tojánayana: “Sontsajuendá ca.”

<sup>29</sup> Chentše inamna canýe matbaja buajútjena untja vínoyeca. As, chë soldadënga canýe esponjëshe chë vínoyeca tmojanfchecuacú, canýe hisopo niñëfjiñë tmojananguësëtjo y játsbanase, Jesusbe uayásoye tmojanbeconá. <sup>30</sup> Chë untja vínoye Jesús tojanofšë ora, tojánayana: “Ya lempe tojochnëngo ca.”

Tojanotsejbé y tojanóbana.

*Canýe soldado chabe lanzësaca costillaca Jesúsbiøye tbojanashacuá*

<sup>31</sup> Bashco fiestama canýe te yojtsájamna, y chë judiënga ndoñe imontseboše chë crucificánënga cachentše chë ochnayté chamotsemnama, chë te puerte uámana te bëtsemnayeca. As Pilato tmojanimpadá chë crucificánënga shecuatsënga jetsatcacayama y chë cuerpënga chentšana jtsejuánama chaomandama. <sup>32</sup> As chë soldadënga tmojána y shecuatsënga imojtsatcacaye, natsana canýa y chentšana chë inýa, Jesúseftaca yojtsecrucificaná. <sup>33</sup> Pero Jesúsbiøye tmojanbeconá ora, ya obaná tmojáninýe; chíyeca chabe shecuatsënga ndoñe tmojanatcacá. <sup>34</sup> Masque chca, canýe soldado Jesúsbiøye costillaca canýe lanzësaca tbojanashacuá. Y cachora buiñe y búyeshe chentšana tonjanóbocna. <sup>35</sup> Chë mëntšá cuentayá chentše enjamna y tonjáninýe, y ndegombre entsichamo; cha endëtátšëmbo ndegombre yojtsichámuama, chca, tšëngaftángnaca chiñe chašmotsošbuáchema. <sup>36</sup> Chë soyënga chca tojanopasá, ntšamo Bëngbe Bëtsabe uabemana palabrënguifë endayancá cachcá chaotsemnama. Chiñe endayana: “Ni mo canýe betaše cha quemochatsëntšátca ca.” <sup>37</sup> Y inýoca, Bëngbe Bëtsabe uabemana palabrënguifë endayana: “Chë tmojenachentsá hominýe mochanjabuájua ca.”

*Jesús tmojanatbontsá*

*(Mt 27.57-61; Mc 15.42-47; Lc 23.50-56)*

<sup>38</sup> Chë soyënga tojanopasá chentšana, José Arimateocá, Pilátbiøye tbojanimpadá Jesusbe cuerpo jesocñama chabolesenciamana. José inamna Jesusbe canýe ustoná, masque nýe iytëcana, chë judiëngbiamana auatja causa. Pilato aifñe tbojanlesenciá; as José tojána y Jesusbe cuerpo yojtsámbañe. <sup>39</sup> Nicodemo, chë ibeta Jesúsbiøye tbojanbuachá, chánaca tojánashjango y tojanëyamba unga bnëtsana kilo mirra y áloe enájuaabnana. <sup>40</sup> As José y Nicodemo Jesusbe cuerpo tbojanca y tmojanandmaná chë botamana uanguëtše soyëngaca unëtjona entšëjuangaca. Judiënga chca innauamana, obaná juatbontsama ora. <sup>41</sup> Jesús tmojan-crucificá luarentše canýe base jajañe inamna, y chiñe canýe tšëm cuevëshe, entšangbe pormánëshe, obanëngbiamana; chëshiñe cabá ndocna obaná mondëjajo. <sup>42</sup> Asna, nýe chentše Jesusbe cuerpo tmojansegorá, chë Bashco fiestama canýe te yojtsájamna causa, y chë cuevëshe chë béconana inámnyeca.

## 20

*Jesús tojtanyena*

*(Mt 28.1-10; Mc 16.1-8; Lc 24.1-12)*

<sup>1</sup> Chë inýe semana bojatsënté, cabá cachëse, cabá ndëbinýna ora, María Magdalena chë cuevëshoye tojána y tojáninýe inýoca yojtsemna chë cuevëshoye amashjuanentša ndëtšbé. <sup>2</sup> Asna, tojëtsanótjajo y tojána chë Simón Pedro y chë inýe uatsjendayá, ndábioye Jesús tša ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshentsana tmojtsámbañe y ndayentše tmojtsejájoma ndoñe queftsátstátšëmbo ca.”

<sup>3</sup> Chora Pedro y chë inýe uatsjendayá chentšana tojëtsanbocna y chë cuevëshoye tbojánata. <sup>4</sup> Nýets útata ibojtsëchamana, pero chë inýe uatsjendayá Pëdrëbiamana más betscó tojanótjajo y natsana chë cuevëshoye tojánashjango. <sup>5</sup> Tojanotsejbé y chë chentše tmojanacjá entšëjuangá tojáninýe, pero choye ndoñe tonjánamashëngo. <sup>6</sup> Chentšana, Simón Pedro chabe ústonoye tojánashjango y chë cuevëshoye tojánamashëngo, y tojáninýe chë chentše tmojanacjá entšëjuangá. <sup>7</sup> Y chë Jesús juabestšëntsacjuama tojanaservé entšëjuana ndoñe chë inýajuangaca yontsamna, sinó inýoca botamana uandmananëjua. <sup>8</sup> Chora chë inýe uatsjendayá, chë cuevëshoye natsana tojanashjanguá, choye tojánamashëngo. Tojáninýe y Jesús tojtanyenama yojtsanošbuaché. <sup>9</sup> Chëntsoñe chë útata cabá ndoñe yontsósertana ntšamo Bëngbe Bëtsabe uabemana palabrënguifë endayancá, chë Jesús obanënguentšana jtayanama ibojamnana. <sup>10</sup> Chentšana chë uatsjendayata chatbe oyenoye tbojtaná.

*Jesús, María Magdalénbiøye tbojánëbëbocna*

*(Mc 16.9-11)*

<sup>11</sup> Pero María chentše tojanoquedá, chë cuevëshe juachaca šachénaca; yojtsošachentscuana tojanotsejbé cuevëshoye jarrepárama. <sup>12</sup> Y tojáninýe uta angelotémata

uaffantsějua uichětjonata, Jesusbe cuerpo yojéftsejajóntše ibojtsetbemana. Canýa tséntšéněshoica y chě inýana matsěscoica. <sup>13</sup> Chora chata tmojaniana: —Shembása, ¿ndayama cošaché ca?

As cha tojanjuá: —Atšbe Utabná tmojtsámbaňe, y ndayentše tmojtsejájoma ndoňe quetsátstátšěmbo ca.

<sup>14</sup> Chca tojánayana ora, tojanostětšantješé y tojáninýe chentše Jesús yojtsemna, pero María ndoňe yontsetátšěmbo cha Jesús bétsemnama. <sup>15</sup> Chora Jesús tbojaniana: —Shembása ¿ndayama cošaché? ¿Nda conguá ca?

María yojtsejuabnaye chě boyabásana yojtsemna chentša base jajaňe uaishanýa ca; chíyeca tojantjá: —Bacó, aca tcojuamběsna, šmēyana ndayentše cojtsejájó, as atše cha jesocňama ca.

<sup>16</sup> As Jesús tbojaniana: —¡María ca!

Chora María chábioye tojanontješé y tbojaniana: —¡Rabuni ca! (hebreo biyaňe chca endayana “Buatěmbayá ca”).

<sup>17</sup> Chora Jesús tbojaniana: —Ndoňe šcatábojajo, er atše cabá ndoňe atšbe Taitábioye quetstětstsjua. Pero motsa atšbe catšátangbioye y cochjáuyana, atše stsetsjuá atše y tsěngaftangbe Bětsábioye, atše y tsěngaftangbe Taitábioye ca.

<sup>18</sup> As María Magdalena tojána y Jesusbe uatsjéndayěnga tojanéyana cha chě Utabnábioye tojáninýe ca y cha chě palabrěnga tojánayana ca.

*Jesús chabe uatsjéndayěnga tojáneběbuacna*

*(Mt 28.16-20; Mc 16.14-18; Lc 24.36-49)*

<sup>19</sup> Tojanibétata ora, cach semana bojatsenté, chě uatsjéndayěnga tmojánenefna canýe luarentše, pero lempe tmojtanatame, chě judiěngbiana auatja causa. Chora Jesús tojánamashěngo, chěngbe tsěntsaca tojantsá y měntsá tojanacheuá: “Chě atšbe ainaniňe tsabe ebionana tsěngaftangftaca chaotsema ca.”

<sup>20</sup> Y chca tojanéyana ora, chabe cucuatšěnga y costillaca tojaninýanjé. Chora chě uatsjéndayěnga oyejuayěnga imojtsemna, chěngbe Utabná tmojáninýama. <sup>21</sup> As Jesús cachiňe tojanéyana: “Chě atšbe ainaniňe tsabe ebionana tsěngaftangftaca chaotsemna. Ntsámo atšbe Taitá Běngbe Bětsá šojchmocá, átsnaca cachcá tsěngaftanga cbontšachamná ca.”

<sup>22</sup> Chca tojánayana ora, chěngbioye tojangouo y tojanéyana: “Chě Uámana Espíritu šmochjójěngacňe. <sup>23</sup> Nděmuanýěnga chěngbe bacna soyěngama chašmojáperdonanga, perdonáněnga mochántatsmēna; y ndoňe chašmonjáperdonasna, nděperdonáněnga mochántsemna ca.”

*Tomás, Běngbe Utabnábioye ainá tbojáninýe*

<sup>24</sup> Pero Tomás, chě Gemelo ca uabobainá, canýa chě bnětsana uta uatsjendayěnguentšá, chě uatsjéndayěngftaca ndoňe yontsemna, Jesús tojánashjango ora.

<sup>25</sup> Chíyeca, “běnga chě Utabná fsěnjínýe ca”, chě inýe uatsjéndayěnga tmojaniana ora, Tomás tojanéjua: “Atše chabe cucuatšěňe chě uajabonjana uinýiňe ndoňe sěnjínýe, y chíňe atšbe ntsabuafja ndoňe sěnjajué y atšbe cucuatšě chabe costillaca ndoňe, ndoňe quichátosbuachiye ca.”

<sup>26</sup> Canýe semana tojanochněngo ora, chě uatsjéndayěnga cachiňe canýe luarentše tmojánenefna. Y Tomásna chěngftaca yojtsemna. Masque chentše atámeninýe yojtsemna, Jesús tojánamashěngo, chěngbe tsěntsaca tojantsá y tojanéyana: —Atšbe ainaniňe tsabe ebionana tsěngaftangftaca chaotsema ca.

<sup>27</sup> Chora Tomásbioye tbojaniana: —Acbe ntsabuafja muentše mojué y atšbe cucuatšě minýe; acbe cucuatšě miyěbo y atšbe costillaca mojué. Y ndošbuachiyá ndoňe matsmēnana, sínó atše tujayenama cochtsošbuachiye ca.

<sup>28</sup> As Tomás tbojaniana: —¡Atšbe Utabná y atšbe Bětsá ca!

<sup>29</sup> Chora Jesús tbojaniana: —Tomás, nýe šconjínýeyeca cojtsošbuaché. ¡Běngbe Bětsá chaoma puerte oyejuayěnga chamotsemna chě nýe ntjínýcá tmojšbuachenga ca!

*Ndayama quem librěša tmojanábema*

<sup>30</sup> Jesús, chabe uatsjéndayěngbe delante inýe běts soyěnga Běngbe Bětsabe obenánaca tonjéftsema, pero quem librěsaňe ndoňe quenatábemana. <sup>31</sup> Y quem librěsaňe soyěngna, entsábemana tsěngaftanga chašmotsošbuachema, Jesús, chě Cristo y Běngbe Bětsabe Uaquiňá bétsemnama; y chcase, chábeňe chašmojtsošbuachese, chábeyeca chě nýetsca tescama yomna tsabe vida chašmotsebomnama.

## 21

*Jesús, canýsěfta chabe uatsjéndayěnga tojáneběbuacna*

<sup>1</sup> Chca tojanopasá chentšana, Jesús inye soye uatsjédayënga tojánebëbuacna, Tiberias mar béjaye tsachañe. Chora mëntśá tojanopasá: <sup>2</sup> Cányëntşe imojtsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblocá; Zebedeobe uaquiñata y Jesusbe inye uta uatsjédayata. <sup>3</sup> Simón Pedro chënga tojanëyana: —Sëntśá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canýe barquëshoye tmojánamashjna; pero chë ibeta tondaye tmojáninýena. <sup>4</sup> Ya yojtsebínýana orna, Jesús chë tsachoca yojtsemna, pero chë uatsjédayënga ndoñe imontsetátsëmbo cha Jesús yojamnama. <sup>5</sup> Chora Jesús tojanatjá: —Básenga, ¿tondaye smonjashbuá ca?

Y chënga tmojanjuá: —Tondaye ca.

<sup>6</sup> As Jesús tojanëyana: —Barquëshá catšbioica chë atarraiešha mëtšena y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nyetśá beonga tmojánishëche causa. <sup>7</sup> As chë Jesusbe bonshana uatsjendayá, Pédrëbioye tbojanianya: “¡Bëngbe Utabná entsemna ca!”

Simón Pedro chca soye tojanuena y cachora entsáyá tojtanichëtjo, er nduichëtjoná yojtsemna, y chë béjಾಯe tojanoshbuëtse. <sup>8</sup> Chë inye uatsjédayëngna chë barquëshañe tmojána, y chë atarraiešha jútjena beóngaca imojtsásjaye, er chë tsachocama bécoñe imojtsemna, nye canýe patse metroca. <sup>9</sup> Fshantsoye tmojánastajna ora, chënga tmojáninýena canýe chebániñe pormániñe, y chentśna canýe beona y tandëšnaca yojtsesegorana. <sup>10</sup> Chora Jesús tojanëyana: “Chë smonjáshebuaye beonguentšana báseftanga miyëbo ca.”

<sup>11</sup> Simón Pedro chë barquëshoye tojánamashëngo, y chë atarraiešha jútjena bëts beóngaca, uasjojónana tsachóntsoñe tojanëyamba. Mo canýe patse y shachna bnëtsana y unga beóngaca; pero masque nyetśá beonga, chë atarraiešha ndoñe ntjuatanëcanana. <sup>12</sup> Chora Jesús tojanëyana: “Mabënga, smochjase ca.”

Chë uatsjédayënguentšana ni canýa yontsenñémua cha jatjayama nda cha yojamnama, er nyetścanga imojtsetátsëmbo cha chë Utabná bëtsemnama. <sup>13</sup> Chora Jesús tojanobeconá, chë tandëse tojanca y chënga tojanatsatá, y chë beónacnaca cachá tojanma.

<sup>14</sup> Chóracna, Jesús ya unga soyama chabe uatsjédayënga yojtsanebëbuacana, obanënguentšana tojtayanentšana.

### *Jesús, Simón Pédroftaca tojanoyebuambá*

<sup>15</sup> Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquiñá, ¿quemëngbiana más quešcbobonshana ca?

Y Pedro tbojanjuá: —Atšbe Utabná, aíñe. Aca condëtatsëmbo atše aíñe cbondbobonshánama ca.

As Jesús tbojanianya: —Atšbe entsanga, mo oveshatemëngcá imomnënga, cochtsanýena ca.

<sup>16</sup> Chora cachiñe tbojantjá: —Simón, Juanbe uaquiñá, ¿quešcbobonshana ca?

Y Pedro tbojanjuá: —Atšbe Utabná, aíñe. Aca condëtatsëmbo atše aíñe cbondbobonshánama ca.

As Jesús tbojanianya: —Atšbe entsanga, mo oveshëngcá imomnënga, cochtsanýena ca.

<sup>17</sup> Y unga soyama tbojtëtantjá: —Simón, Juanbe uaquiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbojantjá causa; y tbojanjuá: —Atšbe Utabná, aca lempe condëtatsëmbo. Aca condëtatsëmbo atše aíñe cbondbobonshánama ca.

As Jesús tbojanianya: —Atšbe entsanga, mo oveshëngcá imomnënga, cochtsanýena. <sup>18</sup> Ndegombre cbëyana: Más bobontse conjamna ora, conjanamana cach aca jtichëtjuana y ndëmoye jama cojtseboše choye jtsoñana; pero tanguá chacojtsemna orna, buacuatsënga cochanjatsbaná, y inýa cmochantichëtjo y ndëmoye jama ndoñe chacontseboše choye cmochanjuánatse ca —Jesús tbojanianya.

<sup>19</sup> Chca tojánayana, ana jtsotatsëmbuama ntšamo Pedro jóbanama ibojamnama, y chë chca jóbanëse, Bëngbe Bëtsá corente bëtsá y obená bëtsemnama Pedro yochjáninýanýiyama. Y chca tojánayanentšana, Pédrëbioye tbojanianya: —Smasto ca.

### *Jesube bonshana uatsjendayá*

<sup>20</sup> Pedro tojesanenostëtsantješé y tojáninýe, Jesusbe bonshana uatsjendayá ústonoye yojtsaye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbojantjá: “Bëngbe Utabná, ¿nda chë boshjuaná yochtsemna ca?”

<sup>21</sup> Pedro chábioye tbojáninýe ora, Jesúsbioye tbojantjá: —Atšbe Utabná, y cháftaca, ¿ntšamo yochjopásca ca?

<sup>22</sup> Chora Jesús tbojanjuá: —Atše quem luaroye jesabáměntscuana cha ainá chauesomñama atše stsebošěse, ¿aca ndayá chama cmatjátsěntšamna? Acna nýe šmasto ca.

<sup>23</sup> Chíyeca, chentšana, Jesucristbeñe ošbuáchiyěngbenache nýetscanga imojánichamo, chě uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabáměntscuana cha ainá chauesomñama atše stsebošěse, ¿aca ndayá chama cmatjátsěntšamna? ca”.

<sup>24</sup> Mua endmēna chě uatsjendayá; cha entsichamo quem soyěnga ndegombre yojamnama, y camuá quem librěšañe lempe tonjuábema. Y bēnga mondětatsěmbo cha ndegombre soye endóyebuambnama.

<sup>25</sup> Jesús inýe ba soyěnga tonjěftsema; tša bětscá soyěnga endmēna, nderado lempe cada canýe soye tcojuábema y librěsangá tcojuapormá, atše sěntsejuabná, nýetsca chěsangá quem luarentše ndoñe nanjuába.

## Hechos

*Jesús tojanašebuachená chë Uámana Espiritu jíchmuama*

<sup>1</sup> Teófilo, atšbe natsana librěšaŋe tcbonjuábobema lempe ntšamo Jesús tojanmama y tojánabuatabama, chca tojanbojatsé orscana, <sup>2</sup> y Běngbe Bětsá celoye tbojtanatsbanantscuana. Cabá celoye nděta orna, chë chabe ichmoněngcá tojanabacacá boyabásengna Jesús tojěftsanaměndá, chë Uámana Espiritbiajana, ndayá jamama yojánamnana. <sup>3</sup> Jesús cruciŋe tojánóbana y tojtanayentšana, ba soye chë ichmóněnga yojánebėbuacana, chca, chěnga jinyányiyama cha ndegombre tojtanayenama. Canta bnětsana tentscuana cha yojánebėbuacana y Běngbe Bětsabe aměndayama chěnga yojanabuatabá.

<sup>4</sup> Canye, Jesús chabe ichmóněngaftaca yojětsemna ora, měntšá tojanaměndá: —Jerusalenentšana ndoŋe šmatjábocana. Camuentše šmochjobátma, ntšamo atšbe Taitá tcmonjanašebuachenacá chaošhjanguěntscuana, ndayama atše tcbonjáyuyana. <sup>5</sup> Ndegombre, Juan entšanga béjayecca tonjanėbaye; pero ndoŋe baytesna, Běngbe Bětsá chë Uámana Espiritu bochanjíchmu, tšěngaftangbe ainaniŋe jtsemándayama cháuamashěnguama ca.

*Jesús celoye tojtantsjuá*

<sup>6</sup> Canye, chë ichmóněnga Jesúseftaca cányiŋe imojtsemna ora, chěnga tmojantjá: —¿César y chë Romoquěngbe aměndayentšana tašcochjatsebacá, y mora běnga, Israeloca entšanga, canye Rey quemochtsatsbomna ca?

<sup>7</sup> As Jesús tojanėyana: —Tšěngaftanga ndoŋe quecmátamna chë soyěngama jtsetatšěmbuana. Nye atšbe Taitá aiŋe; y cha, chabe obenánaca echanjamánda mocna ora y ndaytė chca chaopasama. <sup>8</sup> Chë Uámana Espiritu tšěngaftangbe ainaniŋe jtsemándayama chaojabo ora, tšěngaftanga obenana šmochanjóyěngacŋe. Chentšana, ntšamo atšbiama šmotatšěmbcá, chë tcbonjabuatabá soyěnga, entšanga šmochjáyuyana Jerusalenentše, nyets Judea luarifiŋe, Samarioca y quem luarentša nyets luarěnguenáchnaca ca.

<sup>9</sup> Chë soyěnga tojánayentšana y chabe uatsjėdayěnga imojtsonyaye ora, Běngbe Bětsá, Jesúsbioye tbojtanatsbaná y canye jantšetěshe chábioye ibojútsbotse y ndoŋe más tmonjanobená cha jinyama. <sup>10</sup> Jesús celoye yojtsetsjuama chěnga bėn imojtserreparáněntscuana, nye ndeolpe, uta boyabásata uafjantse entšayaca bopormánata chěngbe juachaca tbojabantsaye, <sup>11</sup> y chěngbioye tmojanėyana: “Galileoca entšanga, ındáyeyca celoye šmojtsantješana? Jesús, chë tšěngaftangaftaca enjamná celoye tontá y ntšamo mora šmonjinycá cha celoye jtama, cachcá quem luaroye cha echanjėsabo ca.”

*Judasbe cuenta Matías tmojanábuayana*

<sup>12</sup> Jesusbe ichmóněnga chë Olivos tjashocana Jerusalenoye tmojtaná. Chë tjocana Jerusalenóntsoŋna bėcoŋe inamna, ndayěntscoca canye ochnaytė jama yojanlesenciana nyetšá. <sup>13</sup> Jerusalenoye tmojtanashjajna orna, chë yebnentša tsbanánoca tsoye tmojtanášěngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiniá, Simón chë Celote ca uabobainá, y Judas, chë Santiagbe uaquiniá. <sup>14</sup> Chěnga sempre imojanamana jteneŋjina Běngbe Bětsáftaca jencuěntama básefta shembásengaftaca, María Jesusbe mamá y Jesusbe catsátangaftaca.

<sup>15</sup> Chë tempo tmojáneneŋjina canye patse y uta bnětsana Jesucristbeŋe ošbuáchiyěnga, y canye, Pedro tojantsá y tojanėyana: <sup>16</sup> “Jesucristbeyeca atšbe catsátanga, endánėyta ntšamo Běngbe Bětsabe uabemana palabrěnguiŋe iuabemancá chaochněnguama, y tempo, David chë Uámana Espiritbeyeca chiŋe tojanábema ntšamo Júdaseftaca yochjanopásama; chcasna, Judas uayayěnga tojánentse Jesús chamuišhachama. <sup>17</sup> Júdasnaca běngbe enutá enjamna y Jesús chábioynaca tbonjanábuayana běngcá chabe trabajuifiŋe jtsoservénama. <sup>18</sup> Tšěngaftanga šmondětatsěmbo, chë Judas bacna soye tojanmama tmojtanabuená crocénánacna fshantse tmojánbuamema. Chentšana cha tojtsanótsatse y chabe bestšaše tsěntsaca tbojtsanashtětěšena y chabe uafsbentšana nyetsca chabe chunchullějuangá tojtsanášana. <sup>19</sup> Jerusalenentše oyeněnga chë soyama tmojántatšěmbona ora, chë fshantse chěngbe biyaŋe Acéldama ca tmojanabaye. Acéldama endayana ‘Buiŋe Luare ca’. <sup>20</sup> Salmos librěšaŋe, Jesucristo uayayěngbe cucuatšifiŋe boshjuanabiama měntšá enduábemana:

Chabe yebna énaŋe chaotsemna  
y ndocná chentše chaondětsiyena ca.

Y měntšanaca endayana:

Chabe cuenta inya chabe trabajo chaoma ca.

<sup>21</sup> “Chcasna, mora muentše montsemna taitanga běngaftaca mondenutěnga, Běngbe Utabná Jesús běngaftaca enjamněntscuana, <sup>22</sup> Juan Jesúsbioye tbonjanabaye orscana y Běngbe Bětsá Jesúsbioye běngbentšana celoye tbonatanatsbanantscuana. Y mora šontsamna



canya mēnguentśá juabuayanama, Jesús tojtanayenama entśángbioye bēngaftaca jábuayanama ca.”

<sup>23</sup> As chora útata tmojanabocacá: José, nda Barsabás ca imojanábobuatma y ín'yengna Justo ca; y chentśana Matías. <sup>24</sup> Chora Bēngbe Bētsáftaca mēntśá tmojanencuentá: “Bēngbe Utabná, aca nyetscangbe ainana icuabuatma; chcasna, śminyan'yé nda quem útatentśana cochjuábuayanana, <sup>25</sup> canye ichmonacá Júdasbe cuenta chaotrabajama. Judas ya ndoñe canye ichmoná quenátśmēna, bacna soye tojama causa, y cha mora yojtsemna chē ndayentśe jtsemnama ibomna luaroca ca” —chēnga tmojánayana.

<sup>26</sup> Y nda chē ichmoná yochtsemnama jtsotatśēmbuamna tsbanánoye tmojanētśena y Matías tojanobuache; as cach orscana, Jesucristbeñe ośbuáchiyēnga chabiama imojanjuabná mo canye Jesusbe ustonacá, cachcá ntśamo chē bnētsana canye uatsjédayēngbiama chēnga imojanjuabnacá.

## 2

*Chē Uámana Espiritu ośbuáchiyēngbeñe tojánamashēngo*

<sup>1</sup> Pentecostés ca uabaina fiesta tojanobuache ora, chē jaja sananga tmojanobuábtanama fiesta te, Jesucristbeñe ośbuáchiyēnga nyetscanga cán'yíñe canye luarentśe imojtsemna. <sup>2</sup> Ndeolpe, celocana mo canye jabuache bin'yíēcá yojtsaishauenana y chca, tśa jabuache shauenanana tojanóshjango nyets yebnentśe, chēnga imojtsetbiámanentśe. <sup>3</sup> Y chora bichtajēnga mo iñeshcá yojón'yna y can'yán'yabeñe yojojátaye. <sup>4</sup> Chca chē Uámana Espiritu tojánamashēngo chēngbe ainaniñe jtsemándayama; chora nyetscanga tmojanontśé in'yētśá biyangana, chēnga tempo ndmabiyañe, ntśamo chē Uámana Espiritu yojtsamcá chēnga in'yētśá chamotsebiyama.

<sup>5</sup> Chē tempo Jerusalenentśe imojtsemna ba judiēnga, Bēngbe Bētsá puerte adórayēnga, nyets luarēngocana áshjajnēnga; chēnga tmojánabo Bēngbe Bētsá jētschuayama. <sup>6</sup> Entśanga chē shauenanana tmojanuena ora, tmojanójoto y ndoñe imontsetátśēmo ntśamo jtsejuabnayana ndayá yojtśopasánama, er chē in'yē luarocana áshjajnēnga imojtsuenana chē Jesucristbeñe ośbuáchiyēnga in'yētśá biyangana jtsóyebuambnayana, ntśamo cada ona chēnga imojanbiyacá. <sup>7</sup> Chē soyēngama entśanga puerte imojenjaná y mēntśá imojtsenatsētśnaye: “Chē chca montśóyebuambnanga Galileoquēnga mond'mēna. <sup>8</sup> Chcase, ¿ntśámoyeca bēnga imojtśobena chēnga joyaunayana cach bēnga mondēbiyacá ca? <sup>9</sup> Muentśe montsemna Partioquēnga, Medioquēnga, Elam, Mesopotamia y Judeoquēnga, Capadocia, Ponto y Asia luaroquēngnaca, <sup>10</sup> Frigioquēnga, Panfilia, Egipto y Libia, chē Cirene béconana luaroquēnga. Báseftangna Romoquēnga montsemna; <sup>11</sup> chēngbeñe nderado judiēnga camuentśe on'yán'ēnga, pero ín'yengna ndoñe, y chēnga Bēngbe Bētsá mondbētsatśchuanaye cach ntśamo chē judiēnga monduamancá. In'yengna Cretocana y Arabiocánēnga tmojabo. ¡Y bēnga montsobena chē Galileoca judiēnga joyaunayana Bēngbe Bētsá bēts soyēnga tojamama cach bēnga mondēbiyacá ca!” —chē entśanga imojtsichamo.

<sup>12</sup> Chē causa nyetscanga imojtsenjñanaye y ntśamo jtsejuabnayama ntsetatśēmbcá imojtsemna y imojtsentjanaye: “¿Ndayá chē soye yojtsayana ca?”

<sup>13</sup> Pero ín'yengna, chē soyēngama chēngbioye imojtsēbayajuana y imojtsichamo: “Chēnga tēmiēnga montsemna ca.”

*Ntśamo Pedro chora tojanoyebuambá*

<sup>14</sup> Chentśana, Pedro tojtansá chē in'yē bnētsana canye ichmónēngaftaca y jabuache tojanontśé chē entśanga jáuyanana, mēntśá: “Atśbe entśanga judiēnga y nyetscanga Jerusalenentśe oyenēnga, tśabá śmochjouena. Ntśamo tojopasama cbochanjábuayanaye, as chacmésertama. <sup>15</sup> Tśēngaftanga śmontsejuabná atśe y atśbe enutēnga tēmiēnga ítsemna ca, pero ndegombre, tēmiēnga ndoñe queftsátśmēna; cabá cachēna, base mošenana ora ctsomñe. <sup>16</sup> Pero ntśamo entsopasánama, Bēngbe Bētsabe juabna oyebuambnayá Joel mēntśá tojanábema:

<sup>17</sup> Bēngbe Bētsá mēntśá tojánayana: ‘Quem luare jopochócama te chaojtśobeco ora, chē soyēnga echanjochnēngo.

Atśe chanjama, atśbe Espiritu nyetscangbe ainaniñe cháuamashēnguama.

Chentśana, tśēngaftangbe uaqiñēnga y bemianga atśbe soyēngama entśanga mochantsētśētsnaye;

tśēngaftangbe bobontśēngna, atśe chanjama soyēnga mochantson'yaye mo otjenayoquēcá; y tśēngaftangbe bētsējémēngna atśbe soyēnga mochantsojtēnaye.

<sup>18</sup> Chca ora, atśe chanjama nyetsca atśbe oservēngbiama, boyabásenga y shembásenga, chēngbe ainaniñe atśbe Espiritu cháuamashēnguama, as chēnga atśbe soyēngama entśanga mochantsētśētsnaye.

<sup>19</sup> Atśe chanjama bēts soyēnga celoca;

y quem luariñe echántsemna buiñe, iñeshe y ngona mo jantšeteshcá, atšbe obenana jinjánýiyama.

<sup>20</sup> Cabá chë puerte uamana te, chë Bëngbe Utabná bëts soyënga jamama ndobuache ora, shinë ndoñe queochátsbuashinjinýana

y juashcona buanganëtema mo buiñcá echántsemna.

<sup>21</sup> Y as, ndánaca Bëngbe Utabná tbojtsotšëmbuaná, cha bochanjatsbocá.’

Chca Joel tempo tojanábema ca” —Pedro tojánayana.

<sup>22</sup> Chora Pedro tojatanëyana: “Israeloquënga, šmochjouena ntšamo cbochanjauyancá: Bëngbe Bëtsá ndegombre tcmonjaninýanýe, Jesúsbiöye chabe trabajo biamnayá cha tbojánbemama. Chë soye Bëngbe Bëtsá tcmonjaninýanýe, Jesús chë Nazaretocáftaca cha tojanma bëts soyëngaca y ójanana soyëngaca, Bëngbe Bëtsabe obenana jinjánýiyama. Cach tsëngaftanga chë soyëngama šmondétatšëmbo, Bëngbe Bëtsabe obenánaca chë soyënga tsëngaftangbeñe Jesús tonjánmayeca. <sup>23</sup> Ndegombre tsëngaftangbe cucuatšifne Jesús tmonjánboshjona, pero cabá ndëboshjona ora, Bëngbe Bëtsá tojanjuabó ntšamo jopásana vojammama; y ntšamo tsëngaftanga cháftaca šmochjanmámnaca cha inatátšëmbo. Tsëngaftangna Jesús šmonjanishache y šmonjanma cha chamóbama y chamocrucificama, bacna entšangbe cucuatšifne. <sup>24</sup> Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

<sup>25</sup> Chora Pedro tojatanëyana: “Rey David tempo Jesusbiamma mëntšá tojëftsanabema, ntšamo cha Bëngbe Bëtsábiöye tbojanianama:

Atšbe Utabná, aca sempre átšeftaca condbëtsemna,

y siempre átšeftaca condboquedá atše juajabuáchama,

chíyeca ndocná queochatobenaye atše jauátjanama.

<sup>26</sup> Chíyeca atše corente oyejuayá sëntsemna,

y atšbe uayášaca chontsatschuaná.

Atše masque chanjóbana, tšabá sëndétatšëmbo aca atšbe Bëtsá, atše chaitayenama cochjama.

<sup>27</sup> Aca, Bëngbe Bëtsá, obanëngbe luarentše ndoñe quešochátsboshjona,

y ndoñe queochatsleséncia acbe uamana oservenabe cuerpo chaotspochocama.

<sup>28</sup> Aca chë tšabe benache šconjaninjinýe, ntšamo tšabe vida jtsebomnana.

Aca átšeftaca condbëtsemnana, atše puerte oyejuayá sëntsemna ca —David tojëftsanabema ca.”

<sup>29</sup> Chentšana Pedro tojatanëyana: “Baconga y batanga, šontsemna ndegombre tsëngaftanga jábuayenana tšabá chacnësertama. Bëngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare bëconana. <sup>30</sup> Cach David canýe Bëngbe Bëtsabe juabna oyeuambnayá inamna. Cha tšabá inatátšëmbo Bëngbe Bëtsá bëtscá tbojanšbuáchenama, Davidbe entšanguentsana canýa, Cristo, cach Davidcá rey jabemama. <sup>31</sup> David inatátšëmbo chë Uamana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojëftsanabema, obanëngbe luarentše Cristo ndoñe ntjëftseboshjonana y Bëngbe Bëtsá ndoñe ntjaleséncia chabe cuerpo chaotspochocama ca. <sup>32</sup> Bëngbe Bëtsá tojama Jesús cháuatayenama y bënga cha fsënjinye. Chíyeca bënga fsëntsetatšëmbo chca ndegombre bëtsemnana. <sup>33</sup> Bëngbe Bëtsá, Jesús celoye tfontanatsbaná chabe catšbiöica jtsatsmënama jtsemándayama, y Bëngbe Bëtsá chë Uamana Espiritu Jesúsbiöye tbojanëntšabuaché ntšamo chë Taitá tbojanšbuachenacá. Ntšamo tsëngaftanga šmontsonýa y šmontsuenancá entsemna, Jesucristoftaca chë Uamana Espiritu bëngbe ainaniñe cháumashënguama Bëngbe Bëtsá tojámayeca. <sup>34</sup> David ndoñe Jesuscá celoye tonjáná, pero mëntšá tojëftsanábema:

Bëngbe Bëtsá atšbe Utabná Crístbiöye tbonjanianama:

‘Atšbe catšbiöica cochtsetbemana,

<sup>35</sup> acbe uayayënga acbe cucuatšifne chamoquedama atšbe obenánaca chjamëntscuana ca.’ ”

<sup>36</sup> Chora Pedro tojatanëyana: “Tsëngaftanga nyets Israeloquënga šmochtsetátšëmbo, atše ndegombre cach Jesusbiamma sëntsoyeuambnana. Cha tsëngaftanga šmonjancrucificá, pero Bëngbe Bëtsá chábiöye tbonjábema Bëngbe Utabná y chabe Uamana Uabuayaná, chë Cristo ca.”

<sup>37</sup> Chë soyënga tmojanuena ora, entšanga cochtsetšenánënga imojtsemna, y Pedro y chë inýe ichmónëngbiöye tmojanëyana: —Baconga, žndayá mora jamama šojtsamna ca?

<sup>38</sup> As Pedro tojanëjua: —Ngménaca šmochtenójuaboye bacna soyënga šmojtšamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tsëngaftangbe bacna soyëngama cmochanjáperdonaye y echanjama chë Uamana Espiritu tsëngaftangbe ainaniñe jtsemándayama cháumashënguama. <sup>39</sup> Bëngbe Bëtsá chë

soyënga tmonjanašebuachená tsëngaftangbiama, tsëngaftangbe básengbiama y nyëts chë bën luarënguenache imomna entsangbiama, nyëtscanga chë Bëngbe Utabná Bëngbe Bëtsá chábioye jabama chaojubuáyanënga ca.

<sup>40</sup> Inye palabréngnaca Pedro tojatanëyana y bëtscá tojanabuayená mëntsá: “¡Bëngbe Bëtsá chë Israeloca bacna entsanga echanjácastigaye. Chašmótsbocamna, chëngbentsana šmochtsojuánañe ca!”

<sup>41</sup> Ba entsanga imojtsanošbuaché ntšamo Pedro tojanëyanama y tmojánenabaye. Cach te mo unga uaranga entsanga nyëtsá tmojanoboté, Jesucristbeñe ošbuáchiyënga jtsemnama. <sup>42</sup> Chënga corente imojtseboše jtsamama chë Jesube ichmónënga imojtsabatambá soyënga. Tšabá yojsacochebiona nyëtscanga cánýiñe jtsemnama y imojanamana mo chë Jesucristbeñe ošbuachiyëngcá cánýiñe jtsesayana y cánýiñe Bëngbe Bëtsáftaca jtsencuéntayana.

#### *Ntšamo chë natsana Cristbeñe ošbuáchiyënga vida imnabomna*

<sup>43</sup> Nyëtscanga imojtsenjnanaye, chë ichmónënga bëts soyënga y inye soyënga chabe obenana jinýañiyama chamomama Bëngbe Bëtsá tojánmayeca. <sup>44</sup> Nyëtsca chë Jesucristbeñe ošbuáchiyënga sempre cánýiñe mo canýacá imojtsemna y nyëtsca chëngbe bomna soyënga nyëtscangbiama yojtsemna. <sup>45</sup> Chënga imojanamana fshantsënga jtsatobuíyana y chë imojánbomna soyëngnaca, y chë crocénana jujátayana ntšamo chë inyënga tojtsëjabotcá. <sup>46</sup> Cada te imojanamana Bëngbe Bëtsabe bëts yebnentše jénefnana cha jëtschuayama, y yebnënguenache cánýiñe imojtsesaye oyejuayënga y ndoñe ojëndayënga. <sup>47</sup> Chënga imojanamana Bëngbe Bëtsá jtsatschuanayana, y nyëtsca entsanga imojtsejuabnaye chë Jesucristbeñe ošbuáchiyëngbiama tšabe entsanga imojamna ca. Y cada te Bëngbe Bëtsá yojsama más ošbuáchiyënga chamóbotema, chë ndëmuanyënga cha yojsatsëbacayënga.

### 3

#### *Pedro canye coshétbioye tbojanshá*

<sup>1</sup> Canye te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entsanga imojanamana Bëngbe Bëtsáftaca jtsencuéntayana. <sup>2</sup> Bëngbe Bëtsabe bëts yebnentše canye cosheto yojtsemna; tojanonýná orscana chca šocá inamna. Entsanga imojanamana cada te cha juanatsana canye luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsachnëjuanënga lemošna chaótejañama. <sup>3</sup> Pedro y Juan Bëngbe Bëtsabe bëts yebnoye jamashënguama chë cosheto tojánaniye ora, canye lemošna chábioye yojótejañe. <sup>4</sup> Chatna chë šocá imojtsonýaye, y Pedro tbojaniyana: “Šcochtsënyaye ca.”

<sup>5</sup> As cha yojsënyaye y yojtsejuabnaye ndayá chjójyëngacñe ca. <sup>6</sup> Chora Pedro tbojaniyana: “Quetsátsbomna ni crocénana, ni castellano aca jatšetayama, pero atše chanjama Jesucristbe obenánaca ndayá acbiama jamama atše stsobencá: Jesús chë Nazaretocá obenana endbomna; chíyeca atše cbëyana chabe mándoca, matëtsbaná y cochtsana ca.”

<sup>7</sup> Pedro chca tbojaniyana ora, tbojanábuacueshache catšbióicatše y tbojtanatsbaná, y cachora chë cosheto shecuatšifne y shëmiabeñe añemo yojsatsbomna. <sup>8</sup> As chë cosheto, canye jontsënjše tšabá tojantsá y tojanontšé tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojsayontsënjnaye y Bëngbe Bëtsá ibojtsatschuanaye, tbojanshnama. <sup>9</sup> Chë Bëngbe Bëtsabe bëts yebnentše imojëtsemnënga nyëtscanga cha tmojáninýe tšabá jtsanana y Bëngbe Bëtsá jtsatschuanayana. <sup>10</sup> Chënga imnatátsëmbo cha chë cosheto yojamnana, chë nda yojanamana Bëngbe Bëtsabe bëts yebnoca, chë Botamana Amashjuantšë jótbemana, entsanga lemošna jotejañama. Cha tšabá yojsatsmënamna entsanga ojnanánënga imojtsemna.

#### *Ntšamo Pedro tojanoyebuambá Salomonbe Amashjuana ca uabáinentše*

<sup>11</sup> Chë cosheto ya shnaná ora, ndoñe yontseboše Juan y Pédrëbentsana joluárana. As, nyëtsca entsanga ojnanánënga tmojanótjajo chë amashjuana otsbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojëtsemnoye. <sup>12</sup> Pedro chë entsanga tojánaniye ora, tojanëyana: “Taitanga y mamanga, Israeloquënga, žndáyeca chë soyëngama ojnanánënga šmojtsemna? ¿Ndáyeca nyë šcojtsëbuatjta? ¿Šmojtsejuabná nyë bëndatbe obenánaca quem boyabása tifjashná ca? ¿O šmojtsejuabná quem boyabása tifjashná bëndata Bëngbe Bëtsá puerte tšabá ftsadoránayeca? <sup>13</sup> Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinýanyé chabe oservená Jesús chë más uamaná yomnana. Cha tsëngaftanga chë mándayëngbe cucuatšifne šmonjánboshjona chamóbama. Pilato enjëtseboše Jesús jëtsboshjonama, pero tsëngaftanga Pilatbe delante šmonjánayana chca ndoñe šmonsanboše ca, y chíyeca Pilato ndoñe tbontanboshjona. <sup>14</sup> Jesús uamaná y nyëtsca soyënguiñe tšabá amá enjamna, pero tsëngaftangna cha šmonsanoboté y Pilato šmonjanimpadá chabe cuenta canye boyabása, entsá obanayá, chabuatsboshjonama. <sup>15</sup> Y chca, chë ndegombre

tšabe vida chašmotseboimnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninye y chama fsëndétatsëmbo. <sup>16</sup> Jesús puerte obená endménayeca, quem cosheto añémoca entsatsmëna. Ntšamo šmonjinýe y šmonjatatsëmbonca ndegombre tonjopasá Jesúsbeñe betsošbuáchemá. Chë Jesúsbeñe jšošbuáchiyana tonjama cha tšabá tšëngaftangbeñe chaotsatsmënama.

<sup>17</sup> “Taitanga y mamanga, atše sëndétatsëmbo tšëngaftanga causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatsëmbcá. <sup>18</sup> Tempo, Bëngbe Bëtsá chë chabe juabna oyebuambnayënga tojanamëndá entsanga jábuayenama, chë Bëngbe Bëtsabe Uámana Uabuayaná puerte ngmënana yochtsanbomnama. Morna, ntšamo Bëngbe Bëtsá tojanancá ya tonjochnëgo. <sup>19</sup> Chcasna, ngmënaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbonñama, <sup>20</sup> y tšëngaftangbioye bochanjíchmuá Jesús, chë tempo chabe Uámana Uabuayaná Bëngbe Bëtsá tbojanbemá. <sup>21</sup> Canýe te echanjóshjango, Bëngbe Bëtsá lempe tsmëmacá jëtsbemama. Chë tentscuana Jesús bontsemna celoca joquédana. Chca echanjochnëgo ntšamo Bëngbe Bëtsá chabe juabna oyebuambnayëngbiajana entsanga tojanabuayenacá. <sup>22</sup> Moisés bëngbe bëts taitanga tojanabuayená: ‘Chë Utabná Bëngbe Bëtsá canýe chabe juabna oyebuambnayá ntšamo atše sëndmëncá, cmochanjayentsíchmuá. Cha tšëngaftangbentsana echanjábocna y tšëngaftanga cmontsamna ntšamo chacmojtsëtsësnacá cha jtseyeunanana. <sup>23</sup> Ndánaca chábioye ndoñe chabonjoyeuná, cha bontsemna chë Bëngbe Bëtsabe entsángbentsana luaroca jtsemnama y chamotsepochochocama ca’ —cha tojánayana.

<sup>24</sup> “Y nýetsca chë Bëngbe Bëtsabe juabna oyebuambnayëngnaca Samuel orscana, entsanga tmojanabuayená ndayá quem tempo yochjanchnënguama, ntšamo mora montsonýacá. <sup>25</sup> Chabe juabna oyebuambnayëngftaca Bëngbe Bëtsá tojanašebuachená bëts soyënga tšëngaftangbiamá, y tšëngaftangbe bëts taitángftaca canýe trato tojánbema; chë soyënga cabá tšëngaftangbiamá entsemna. Bëngbe Bëtsá Abrahámioye mëntšá tbojaniiyana: ‘Chë ácbentsana entsángbeyeca tšabe bendicionënga chanjama nýetsca quem luarentša entsangbiamá ca.’ <sup>26</sup> Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnama ca” —Pedro tojánayana.

## 4

### *Pedro y Juan Jerusalemntša mandadëngbe delante*

<sup>1</sup> Pedro y Juan cabá entsanga imojtsëtsësnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga. <sup>2</sup> Chatna entsángbioye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashjajna amëndayënga tojánëtëna. <sup>3</sup> As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana. <sup>4</sup> Masque chca, banga entsanguentsana, ntšamo Pedro y Juan tbojanayancá tmojanuenënga, añe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nýe boyabásenga jacuëntase.

<sup>5</sup> Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalemntše tmojánenefna. <sup>6</sup> Chëntšnaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nýetsca pamillangnaca. <sup>7</sup> Chora chënga tmojanmandá Pedro y Juan junatsama, y chëngbe tsëntsca tojanatsá y mëntšá tmojanatjá: —¿Nabe obenánaca chë soyënga šojtsama, o, nda derecho tcmënjatsatá chë soyënga chašotsamama ca?

<sup>8</sup> As Pedro, chë Uámana Espiritu chabe ainaniñe corente jtsemándayëse, mëntšá tojanëjua: —Israeloca mándayënga y bëtsëjemënga, <sup>9</sup> mëntë sconjatjá chë jama ndobenáftaca tšabe soye tifjamama y ntšamo cha mora jama yojtsatobenama. <sup>10</sup> Chcasna, ntšamo tojopasama bochanjabuayená, chca, tšëngaftanga y nýetsca Israeloca entsanga chë soyënga chašmotsetatsëmbuama. Quem boyabása, chë tšëngaftangbe tsëntsca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tšëngaftanga šmonjanrucificá y ndabiamá Bëngbe Bëtsá tojanma cháuatayenama. <sup>11</sup> Jesusbiamá Bëngbe Bëtsabe uabemana palabrënguiñe mëntšá endayana: “Chë yebna jebuanënga tmontsanaboté ndëtsbé, mora chë más bëts uashacuanësentše entsejájona ca”. Tšëngaftanga šmondmëna mo chë yebna jebuanëngcá, er Jesúsbioye šmontsanaboté y mora cha chë más uamaná entsemna. <sup>12</sup> Nýe cha yobena tšëngaftanga játsëbacama. Bëngbe Bëtsá ndocna inýe

entsábioye tbonjatsetá chabe obenana chca jamama; chíyeca quem luarentše ndocná más quenátobena bēnga játsebacama. Nýe Jesucristbe obenánaca aīne ca —Pedro tojánayana.

<sup>13</sup> Chēnga imojenjaná Pedro y Juan tša aīémoca ibojtsóyebuambnama tmojáninýe ora, y chata tempo nduatsjínýenata y librēša nduabuatmata bētsemnama tmojántatsēmbona ora. Chca chē mándayēnga tmojántatsēmbona chata Jesúseftaca bayté ibojamnama. <sup>14</sup> Y entsānga imojtsonýaye chē tmojanšná cha chentše chátaftaca yojtsemnama; chē causa, chēnga ndocá más tmojanobená chatbe contra jatichámuana. <sup>15</sup> As chora tmojaneméndá chentšana chábuaisebocnama y chentše tmojanoque dangna chē soyama imojtsenatsētsnaye. <sup>16</sup> Chēnga imojtsentjanaye: “¿Ndayá chátaftaca mochjama ca? Jerusalenentše oyenēnga montsetátsēmba chata chē bēts soye Bēngbe Bētsabe obenánaca tbojanama; chē causa, bēnga ndoñe quemuátobena jayanana chata chca ndoñe tbojnama ca. <sup>17</sup> Pero entsānga chama ndoñe más chamondētsencuéntamna, chata mochjáuyana: ‘Ndoñe más entsāngbeñe Jesús smattsebáyana; y ndoñe chašmonjouenēse, jabuache castigo šochántsebomma ca.’”

<sup>18</sup> As chē mándayēnga cachiñe chata tmojánachembo y tmojaneméndá ndoñe más Jesús jtsebáyana, ni chabiana entsāngbeñe jtsabuátambayana. <sup>19</sup> Pero Pedro y Juan tbojánayana: “¿Ntšamo tšēngaftanga smatjayana ntšamo fchanjayana ca? Ndegombre, Bēngbe Bētsabe bominýiñe ndoñe tšabá quenátsmēna tšēngaftangbioye aīne joyaunayana y chábioye ndoñe. <sup>20</sup> Er bēnga queftsátobena jtsajbanana oyebuambnayana chē tifjinýe y tifjouena soyēngama ca.”

<sup>21</sup> Chē mandayēngna chátbioye tojtsanautatjá, pero chentšana tmojtanabáshejuana. Nýetsca entsānga Bēngbe Bētsá imojtsatschuanaye ntšamo tojanopasama; chíyeca, chē mándayēnga ndoñe tmojanobená tondaye ntjinýenana ntšamo chata jácastigama. <sup>22</sup> Chē boyabása, ndáftaca chata chē bēts soye Bēngbe Bētsabe obenánaca tbojanma, inabomma canta bnētsana uatama más.

*Jesucristbeñe ošbuáchiyēnga Bēngbe Bētsá tmojanimpadá más aīemo chauatšatama*

<sup>23</sup> Pedro y Juan ya tmojtanabáshejuana ora, tbojánata chē inýe ošbuáchiyēngaftaca jateninýenama y lempe ntšamo chē bachnangbe amēndayēnga y bētsējemēngcá mándayēnga chátbioye tmojanēyancá, chēngbioye tmojanacutá. <sup>24</sup> Chēnga chca tmojanuenentšana, nýetscanga cányiñe tmojanontšé Bēngbe Bētsáftaca mēntšá jencuéntama: “Bēngbe Utabná, aca chē nda tojama celoca, fshantse, nýetsca bējayēnga y lempe ntšamo chenache yomncá, <sup>25</sup> chē Uámama Espíritbiajana tcojánayana y acbe oservená David, ntšamo tcojanayancá tojanábema, mēntšá:

¿Ndáyeca entsānga yapa imojtsetsátjaye ca?

¿Ndáyeca imojtsejuabná nýe bonamentiaa soyēnga jamana?

<sup>26</sup> Quem luarentša reyēnga y amēndayēnga imoprontánēnga,

nýetscanga tmojenoyeuná Bēngbe Bētsá y chabe Uámama Uabuayaná chē Cristbe contra jtsemnama ca —cha tojanábema.

<sup>27</sup> “Ndegombre chca tonjopasá. Rey Herodes y Poncio Pilato, quem bēts pueblentše, ndoñe judiēngaftaca y israelitēngaftaca tmonjánenefjna, jenóyeunayama ntšamo jamana, Jesús chē acbe uámama oservená y chē Uámama Uabuayaná tojabemábioyējóbama. <sup>28</sup> Tempo, Bēngbe Bētsá, acbe obenánaca y ntšamo icnabošcá tcojanmandá ntšamo mora chaotsemnama, y chēnga chca Jesúseftaca tmonjama. <sup>29</sup> Morna Bēngbe Bētsá, mouena ntšamo chēnga montsichamo, bēnga jasúfriama cašojsamna ca; chcasna, cochjama bēnga fchayobená Jesusbe tšabe noticiēnga bēts aīémoca entsāngbeñe jtsóyebuambnayama, <sup>30</sup> y cochjama acbe obenánaca šoquēnga tšabá chamotsatsmēnama y cochjama bēnga fchayobená bēts soyēnga jamama, Jesús chē uámama oservenabe obenánaca y cha jótšēmbonēse ca” —chēnga tmojánayana.

<sup>31</sup> Bēngbe Bētsáftaca jencuéntama tmojanpochocá orna, chē tmojánenefjntšē tojanangmēmama; y nýetscangbe ainaniñe chē Uámama Espiritu tojanontšé más jtsemándayana, y chēnga tmojanontšé más aīémoca Bēngbe Bētsabe soyēngama entsānga jábuayenama.

*Nýetsca bomna soyēnga nýetscangbiana yojtsemna*

<sup>32</sup> Jesucristbeñe ošbuáchiyēnga, nýetscanga canýe juabna imojtsebomma y ainaniñe cach canýe ebionana. Ndocná ntjatichamuana chabe soyēnga nýe chabiana yojtsemna ca, pero aīne imojtsichamo, “atše sēndbomma soyēnga nýetscangbiana entsemna ca”. <sup>33</sup> Chē Jesusbe ichmónēngna puerte obenánaca mēntšá imojtsichamo: “Fsēnjinýe y fsēntsetatsēmba Bēngbe Utabná Jesús obanēnguentsana tojtayenama ca.” Y Bēngbe Bētsá yojtsama chē ichmónēnga bētscá tšabe bendicionēnga chamotsebomma. <sup>34</sup> Jesucristbeñe ošbuáchiyēngbeñe ndocná yonjamna ndayánaca uajabotá, er nýetscanga fshantse o yebna bomnēnga imojanamana jtsatobuíyana, y chē crocénana <sup>35</sup> chē ichmónēngbioye jayentsbuáchiyana, ntšamo

tojtšëjabotcá nÿetscanga jujátayama. <sup>36</sup> Chca tojanma canÿa Bëngbe Bëtsabe bëts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá. <sup>37</sup> Chana, fshantse yojtsatobuiye, y chë crocénana Jesusbe ichmónëngbioye yojáventšbuachiye, chë uajabótëngbiana chaoservema.

## 5

### *Ntšamo Ananías y Safirafaca tojanopasá*

<sup>1</sup> Inamna canÿe bacó, Ananías ca uabainá, y chabe shemna, Safira ca. Chatna canÿe fshantse tbojáníye. <sup>2</sup> Ananías y Safirna tbojanenóyeunata; chcasna, batšá crocénana cachatbiana tbojanobuajó y chë tojanóyama crocénana ichmónëngbioye Ananías tojanamba, pero tojanéyana chana canjamna nÿets crocénana ntsachetšá chë fshantsama tbojanosháchiñe ca. <sup>3</sup> As Pedro tbojaníyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámana Espiritu chë crocénánama jabuambayama ca? Acna chë fshantsama tmojtbatnená crocénánentsana cach acbiana batšá tcontóbojama. <sup>4</sup> Cabá ntsatobuiye ora, chë fshantse ácbeshe endánmëna y tojtsatobuiyentsana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tojajuabó chë crocénánama chca jobostérama? Chca jamëse, ndoñe nÿe entšángbioye quecatabuambná, sinó Bëngbe Bëtsánaca ca” —Pedro tbojaníyana.

<sup>5</sup> Ananías chë palabrënga tojanuena ora, obaná tojánshajaye. Y nÿetscanga chama tmojántatšëmbonënga corente imojtsauatja. <sup>6</sup> Chentšana, básefta bobontšënga tmojánashjajna y Ananíasbe cuerpo entšëjuaca tmojanandmaná y jauátbontsama tmojanamba.

<sup>7</sup> Mo unga horëntscose, Ananíasbe shema Safira tojánashjango, pero ndoñe yontsetátšëmbo ntšamo chabe boyáftaca tojanopasama. <sup>8</sup> Chora Pedro tbojantjá: —Ndegombre šmëyana, chë šmonjayana nÿetsnama chë fshantse šmojiye ca?

As chë shema tbojanjuá: —Aíñe, nÿetšnama fsëñjiye ca.

<sup>9</sup> Pedro tbojaníyana: —¿Ndáyeca tsëndata šojenoyeuná Bëngbe Utabnabe Espiritu jabuambayama, y cabá castigo jtsebonnama ndoñe šontsobatmana ca? Acbe boyá jauátbontsama tmonjuambënga muentšë bëšoca montsemna y mora ácnaca cmochanjuamba ca.

<sup>10</sup> Cachora Safira Pédrebe shecuatšentšë obaná tojánshajaye. Chë bobontšënga tmojtanamáshjna ora, obaná Safira tmojáníyena; asna, chentšana tmojanamba y cachabe boyabe juachaca tmojanatbontšá. <sup>11</sup> Y nÿetsca Jesucristbeñe ošbuáchiyënga chentšë imojtsëmnënga y nÿetscanga chë soye tmojántatšëmbonënga, corente imojtsauatja.

### *Ba bëts soyënga chë ichmónënga tmojanma, Bëngbe Bëtsabe obenana jinÿanÿiyama*

<sup>12</sup> Chë Jesucristbe ichmónëngaftaca ba bëts soyënga entšángbeñe yojtšëbinÿna Bëngbe Bëtsabe obenana jinÿanÿiyama; y nÿetsca Jesucristbeñe ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebnentšë. <sup>13</sup> Chë ínÿënga, chë Jesucristbeñe ndošbuáchiyëngna, imojtsauatja Jesucristbeñe ošbuáchiyëngaftaca jtsënutana; pero entšangna chë ošbuáchiyëngbiana tšabá imojtsëncuentaye. <sup>14</sup> Bëngbe Utabnábeñe ošbuáchiyënga más imojtsóbotena, bëtscá boyabásënga y shembásëngna. <sup>15</sup> Tša bëts soyënga chë ichmónëngaftaca yojtšëbinÿna; chíyeca entšanga imojanamana jutsnëshangañe y tjuashënguñe tsáshenoye šoquënga jubuacnana, chca, Pedro chëjana tojtsachñëjuana ora, nÿe mo chabe sómbrenaca chëngbe cuerpëjana chaochnënguama, shnánënga jtsatsmënama. <sup>16</sup> Jerusalén chábuañe pueblënguentšana ba entšanga imojanamana jabana, y šoquënga y bacna bayëjbe juabna uambayënga imojtsëyabó; y nÿetscanga shnánënga imojtsatsmëna.

### *Bëngbe Bëtsá tojanma Pedro y chë inÿe ichmónënga cárcelocana natjëmbana chámuaisebocnama*

<sup>17</sup> Chë ichmónënga tša tšabá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebonna. <sup>18</sup> As chë ichmónëngbioye tmojánishëche y chë bëts pueblentša cárceloye tojtsanëtame. <sup>19</sup> Pero ibetna, Bëngbe Utabná canÿe ángel tbojanichmó y chë utámenentsa bëšášangá cha tojánatëfjo, chënga tojtanébuacna y mentsá tojanéyana: <sup>20</sup> “Motsajna, Bëngbe Bëtsabe bëts yebnentšë šmochjámashjajna, y entšanga šmochjámashjajna ntšamo cuanjama chë nÿetsca tescama yomna tšabe vida jtsebonnama, Jesucristoftaca canÿiñe mo canÿacá jtsemnëse ca.” <sup>21</sup> Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontšë entšanga jabuátambana.

Chëntscuana, chë bachnangbe más uámana amëndayá y chabe ústonënga, chë Israe- loca bëtsëjemëngcá mándayënga y inÿe chentša amëndayënga tmojánachembo jénefnama y jenóyeunayama; as chora chënga tmojanmandá chë utámenocana chë ichmónënga jobiatšama. <sup>22</sup> Pero chë soldadënga chë utámenoye tmojánashjajna ora, chënga chentšë ndoñe tmonjánanÿena. Chcasna, chënga tmojtaná chë mándayënga chca jaúnayama.

23 Y tmojanayana: “Chë utámenoca fsënjínÿena lempe tšabá endëtsëtámeñe y soldadëngna nÿetsca bësáŝangá monduabojanÿanga; pero fsënjatëfjo y tsoye fsënjámashjna orna ndocná chibiátinÿena ca.”

24 Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojtsëtëmmana y imojtsentjanaye ndayá chentšana yochjanopásama. 25 Chorna, chënga imojtsemnentše canÿe boyabása tojánashjano, y mëntšá tojanëyana: “Chë šmojutámiënga mora Bëngbe Bëtsabe bëts yebnoca montsemna, entšanga montsabuatambá ca.”

26 Chë soldadëngbe amëndayá tojána soldadëngaca, chë Jesusbe ichmónënga junatsama; pero nÿe tšabá tmojanënatse, er chënga entšangbiana imojtsautja, nderado cachëngbioye ndëtsbéngaca muantsëbaye. 27 Chëngbioca tmojanëshejajna ora, mandayëngbioye tmojanënatse; chora chë bachnangbe más uámana amëndayá mëntšá tojanëyana: 28 —Bënga jabuachana tcbontšëuyaná y tcbonjáuayana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambama soyëngama ca. Masque chcasna, mora tšëngaftanga nÿetsca chë Jerusalenentša oyenënga chabe soyëngama šmojtšabuatambá y šmojtseboše, cha tojanóbanama castigo bëngbeñe chaotsemnana ca.

29 Chorna, Pedro y chë inÿe ichmónënga tmojanayana: —Bënga šontsamna natsana Bëngbe Bëtsá joyeunayana y chentšana entšangbioye. 30 Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tšëngaftanga šmonjanóba canÿe cruciñe juajabonjëse. 31 Bëngbe Bëtsá tbontatsbaná y chabe catšbioica tbojëtsbema, jtsamëndayama, y tbojëbema entšangbe Unachayá y Atsebacayá, chca, Israeloca entšanga ngménaca chamuenójuaboma bacna soyënga imojtsamama y chca amana chamotsajbanama, y chëngbe bacna soyëngama perdonánënga chamotsemnana. 32 Bënga fsëntsichamo ndayá bënga ndegombre tifjinÿe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbëtšama chë Uámana Espíritu cháumashëngo chë tmojtseyeunanëngbe ainaniñe jtsemándayama ca —chënga tmojanayana.

33 Chë mándayënga chca tmojanuena ora, puerte tmojanotjayaná y tmojanbošena chë ichmónënga jtsëbáyama. 34 Pero chë mándayënguentše yojtsemna canÿe fariseo, Gamaliel ca uabainá. Chana canÿe ley abuatambayá inamna y entšanga puerte inmarrespetana. As cha tojantsá y tojanmandá chë ichmónënga ratotema chentšana jubuacnama. 35 Chentšana chë inÿe mándayënga tojanëyana: “Israeloca taitanga, puerte cuedado šmochtsebomna ntšamo quem boyabásëngaftaca šmochjamama. 36 Quem soyama šmochjenójuaboye: Ndoñe bayté quenátsmëna, Teudas tonjánbocna y cha enjánichamo canÿe uámana entšá canjamna ca, y mo canta patse entšanga cha tmojanasto. Pero chora inÿyenga cha tmontsanóba y chabe ústonënga tmontsanáshana, y chca lempe tontsanopochocá. 37 Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca inÿyenga tmontsanóba y nÿetsca chabe ústonënga tmontsanáshana. 38 Chÿeca atše cbëyana, quem boyabásënga matabáshejuana y ndocá mataborlánana. Ntšamo chënga montsamancá, nÿe entšangbe juabna y nÿe chëngbe trabajo tojtsemnëse, betscó echanjopochocá. 39 Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyëñjanama. Cuedado šmochtsebomna, nderado mo Bëngbe Bëtsabe uayayënga šmuatjanenobiana ca” —cha tojanëyana.

Y as chënga Gamaliel tmojanoyeuná. 40 Chcasna, chë ichmónëngbioye tmojanachembo, tmojtšanachebuánanja y tmojanëyana Jesusbe uabáinaca entšangbeñe ndoñe chamondëtsoyebuambná ca; y chentšana tmojtšanabáshejuana. 41 Chora chë ichmónënga chë amëndayëngbentšana puerte oyejuayënga tmojësanbocna, er Bëngbe Bëtsá tojanalesenciá jasúfria, chënga Jesusbiana oservénënga bëtsemnayeca. 42 Chentšana, chënga cada te imojanabuatambá y Jesús, chë Uámana Uabuayaná, chë Cristo bëtsemnana entšangbioye imojanabuayiná, Bëngbe Bëtsabe bëts yebnentše y yebnënguenáchnaca.

## 6

### *Chë ichmónëngbiana ujabuáchanënga tmojanëbuáyana*

1 Chë tempo, Jesucristbeñe ošbuáchiyënga betscó imojtsóbotena. Chora chë Jesucristbeñe ošbuáchiyëngbentše, chë judiënga griego biyanga batšá imojtsetsátjaye y chë judiënga hebreo biyangbiana mëntšá tmojanayana: “Chë griego biyangbe viudángbioye ndoñe cachca quemnatëjabuáchana ntšamo chë hebreo biyangbe viudángbioye cada te montšëjabuachancá ca.”

2 Asna, chë bnëtsana uta ichmónënga nÿetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyeuambnayana nÿe chë viudanga jtsanÿenama chë tojtšëjaboto soyënguiñe.

<sup>3</sup> Chcasna, baconga y batanga, tšəngaftanguentsana canjšəftanga mēbuáyana, tšabá mand-bomnəngcá šmēbuátmənga, chamotsemna osertánənga y chē Uámána Espírítu chəngbe ainaniñe chaotsemánda, as chənga chē ujabótənga jtsəjabuáchanama trabajo fchanjábaniyyə.  
<sup>4</sup> Y bəngna šontsamna nýets tempo Bəngbe Bətsáftaca jtsencuəntayana y Bəngbe Bətsabe palabra entsanga jtsabuayiynayana ca” —chənga tmojánayana.

<sup>5</sup> Nýetscanga tojanogusetá ntšamo chē ichmónənga tmojanayancá; as, Esteban tmojanábuayana; canýe boyabása puerte ošbuachiyá cha inamna y chē Uámána Espírítu chabe ainaniñe yojanmánda. Chentsana tmojanəbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entsá, Antioquía bəts pueblócá, y cha yojanamana Bəngbe Bətsá jtsadoránana mo cach judiəngcá).  
<sup>6</sup> Chentsana chənga tmojanənatsə Jesucristbe ichmónənga imojtsemnoye; chocna, chē Jesusbe ichmónənga Bəngbe Bətsá tmojanimpadá chē ichmónəngbe trabajənguiñe chē ubuáyanənga chaujabuachama, chəngbe cucuatšənga chəngbe bestšaentše jajajuase.

<sup>7</sup> Más banga Bəngbe Bətsabe palabra imojtsuenana, y chca, Jesucristbeñe ošbuachiyənga más imojtsóbotena, y Jerusalemntše más ošbuachiyənga betscó imojtsóbotena. Y ba judiəngbe bachnəngnaca tmojanontšə Jesucristbeñe jtsəošbuachiyana, ntšamo chē inýenga imojtsanošbuacheca.

#### *Esteban tmojánishache*

<sup>8</sup> Esteban, Bəngbe Bətsabe obenana y chábentsana tšabe bendicionənga yojtsebmone, entsəngbeñe bəts soyənga yojtsama. <sup>9</sup> Bəseftanga “Ya Cachcá Atabashejuana Oservénənga ca” uabainəngna tmojanontšə Estebanoftaca enatsətsnayana. Chənga imojamna judiənga Cirenouənga, Alejandriouənga, Cilicia y Asioquəngnaca, y chəngbe enefjuana luare yojanabaina “Ya Cachcá Atabashejuana Oservénəngbe Yebna ca”.  
<sup>10</sup> Pero chē Uámána Espírítu tojana Esteban chaóyebuambama bətscá osertanacá, y chíyeca chənga ndoñe imontsobena ntšamo cha jojuana. <sup>11</sup> As chənga bəseftanga tmojanəbuənyə Estebanbe contra podescá soye chamuayanama, mēntšá: “Cha fsənjoyeuná Moisesbiana y Bəngbe Bətsabiana ndoñe tšabá jtsóyebuambayana, mo caufjoyanguacá ca.”  
<sup>12</sup> Chcase chənga tmojanma entsanga, bətsəjeməngcá mándayənga y ley abuátambayənga Estebanbe contra chamóntša enbouenanana; y as, Esteban tmojanotbá y chē mándayənga imojtsemnoye imojučəmo.  
<sup>13</sup> Y tmojanənatsə bəsefta entsanga, uayátsenayə soyənga y podescá soyənga Estebanbe contra chamuayanama; as chənga mēntšá tmojánayana: “Mua bacna soyənga entsichamo chē Bəngbe Bətsá jtsadoránama bəts yebnama y Moisesbe leyəngama.”  
<sup>14</sup> Y fsənjoyeuná cha jayanana, Jesús Nazaretocá Bəngbe Bətsabe bəts yebna caochtsepochóca y caochjama bənga nýe chabe mandəngaca mandánənga chamotsiyenama y ndoñe ntšamo Moisés bəngbe bəts taitanga tojətsanabuatambacá ca.”

<sup>15</sup> Chē mándayənga y nýetscanga chentše imojətsətbiamanənga Esteban tmojanonýinýe ora, tmojáninýe chabe jubíá yojtsebuashinýinýana mo canýe ángelbe jubiacá.

## 7

#### *Ntšamo Esteban tojanenəuyaná*

<sup>1</sup> Chora chē bachnangbe más uámána aməndayá, Estebanbiyoe tbojantjá: —¿Ntšamo acbiana montsichamcá ndegombre yojtsemna ca?

<sup>2</sup> As Esteban tojanəjua: —Taitanga y baconga, mouenənga. Bəngbe Bətsá, chē corente uamaná endməná, Abrahámbyoe tbojánəbəbocna, cha Mesopotamioca yojaniyena ora; tbojánəbəbocna, Harán bəts puebloca joyənanama cabá nda ora, <sup>3</sup> y Bəngbe Bətsá tbojaniyana: “Metseboshjona acbe fshantse y acbe pamíllanga y cbochanjinýinýiyyə luaroye cochjá ca.”  
<sup>4</sup> As Abraham chabe luare Caldea tojətsanboshjona y tojána Haránoca joyənanama. Chabe taitá tojanóbanentsana, Bəngbe Bətsá Abrahámbyoe chē luaroye tbojanánatsə, chē mora tšəngaftanga šmontsiyenentše. <sup>5</sup> Pero quem luaríñe ni mo base fshantse ndoñe tbojətsanatsə, ni mo ndayentše jtsiyenama. Pero añe Abrahámbyoe tbojanšbuachená chē fshantse jatšətayama, chabiana y chabe básəngbiana, Abraham tojóbanentsana. Chca tbojanšbuachená ora, Abraham ni canýe šəšona bonjánbomma. <sup>6</sup> Y Bəngbe Bətsá mēntšá tbojaniyana: “Chē ácbəntsana entsanga, inýəngbe luaroca áshjajnənga mochántsemna, y choca oyenənga chəngbe oservénənga chəngbiyoe mochanjábiana y canta patse uatəntscuana jabuache mochanjasufrina ca.”  
<sup>7</sup> Y mēntšánaca tbojaniyana: “Pero atšə chanjácastigayə chca oservénənga chacmojábiana luarentša entsanga; y as, chentsana chē ácbəntsana entsanga mochanjəšebocana y mora bontsemna luaroye mochanjəšabo y muentšə atšə šmochántšadorana ca.”  
<sup>8</sup> Bəngbe Bətsá Abrahámbyoe tbojanšbuachená nýe cha y chabe básəngbe Taitá cha jtsəmmama y jamama tšabe bendicionənga chəngbeñe chaotsemnama, y chama, chaotsinýnamna tbojanmandá chabe šəšona, boyabásetema tojonýná ora, base bobachtəma chē más delicadentše jatətsana. Chíyeca, chabe uaquíñá Isaac tojanonýná



ora, posufla tianoye Abraham base bobachtema chë más delicadentse tbojantëtse. Isaac cachcá tojanma chabe uaqüñá Jacoboftaca y Jacob cachcá tojanma chë chabe bnëtsana uta uaqüñëngaftaca. Chënga monjamna chë Israeloca bnëtsana uta bëts pamíllangbe taitanga.

<sup>9</sup> “Quem uaqüñënga bëngbe bëts taitanga monjamna. Chëngna, chëngbe uabentsá Josëbioye envidia imnabomna y tmojtsatanobuiye, Egiptoye canye oservenacá chamotsánatseñama. Pero Bëngbe Bëtsá Josëbioye nÿets tempo ibnauájabuachana, <sup>10</sup> chíyeca nÿetsca chabe ngmenënguentšana tbojanatsbocá y Bëngbe Bëtsá tojanma cha chaotsetatšëmbuama tšabá jóyebuambayama chë Egiptoca réybentšë, Faraón cha uabainá. Bëngbe Bëtsá tojanma chë Faraón chaoyejuá ntšamo José yojamnama; chíyeca Faraón Josëbioye tbojánbema Egiptoca mandado y chabe yebnënguentšë oyenëngbiánaca.

<sup>11</sup> “Chë tempo, Egiptó y Canaán luariñe bëts shëntsana tojanóshjango y puerte ngménana yojtsemna y bëngbe bëts taitanga ndoñe imontsobena saná jónÿenama. <sup>12</sup> Pero Jacob tojánatšëmbona Egiptoca saná yojtsemnama; asna, chabe uaqüñënga, chë bëngbe bëts taitanga choye tojanichamó. Chora yojamna chë natsanama chënga Egiptoye jama. <sup>13</sup> Uta soyama chënga tmojtesaná ora, José chabe catšátanga tojanëyana: ‘Atše José sëndmëna, tšëngaftangbe uabentsá ca.’ Chca chë Faraón Josebe pamíllangbiam tojánatšëmbona. <sup>14</sup> Chentšana, José tojanmandá chabe taitá Jacob y nÿetsca pamíllanga Egiptoye chamotsama. Canyëšta bnëtsana shachnënga imojamna chë Egiptoye tojanëyana. <sup>15</sup> Chcasna, Jacob Egiptoye tojána choca joyénanama. Choca cha tojanóbana y chë inÿe bëngbe bëts taitángnaca. <sup>16</sup> Jacob y chabe básenga, ntšamo imojtsobancá, chëngbe cuerpo Siquem bëts puebløye imojtsatambaye y tmojanëtebuantsá, Abraham tojëftsambuamé cuevëshënguifne. Abraham canye crocénanama Hamorbe uaqüñëngbiøye, chëshënga yojtëyentšbuamiñe Siquem puebloca.

<sup>17</sup> “Ntšamo Bëngbe Bëtsá Abrahámioye tbojanšbuachenacá jamama yojtsobeco ora, Egiptoca corente tmojanoboté Israeloca entšanga y banga chënga imojtsemna. <sup>18</sup> Cabana, Egiptoca inÿe rey tojanoyá y cha Josëbioye ndoñe tbojanabuátmana. <sup>19</sup> Chë reyna, bëngbe entšanga, chë bëngbe bëts taitángbioye tojanaingñé y tojanma chënga puerte chamosufrima; tojanamëndá, chë tmojtsónÿna šešonatëmënga cachcá jtsëñÿayana chamotsóbanama. <sup>20</sup> Chë tempo canye básetema tojanonÿná y cha Moisés ca tmojanabaye. Bëngbe Bëtsá Moisésbiam oyejuayá yojtsemna y chabe bëtsëtsata cach yebnentšë tmojanboché unga ishinÿëntsuana. <sup>21</sup> Cachcá jonÿayama yojtsamna orna, Faraonbe bembe tbojanocñe y mo cachabe uaqüñá cuenta tbojanboché. <sup>22</sup> Chca, chë Egiptoquënga imnatátšëmbo soyënga Moisés tmojanbutëmbá y canye uámana entšá tojánbocna jóyebuambayama y ndayánaca jamama.

<sup>23</sup> “Canta bnëtsana uata tojánashjache ora, tojanenojuabó jama jtsëtatšëmbuama ntšamo chë Israeloquënga, chabe entšanga imojtsemnama. <sup>24</sup> Canye, Moisés tojáninÿe canye Egiptocá canye Israelocábioye ibojtsejantšëta ye ora; as Moisés tbojanoboguiyaná y chë Egiptocábioye tbojtsanóba. <sup>25</sup> Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisésbe obenánaca chë Egiptoca mandentšana chëngbioye játsebacama ca. Pero chë Israeloquënga ndoñe yontsësertana. <sup>26</sup> Yëfsana, Moisés tojánanÿena útata, cach Israelocata, ibojtsentsjanaye; chora cha betso tojána jetsëuyanama y tojanëyana: ‘Tšëndata catšata šondmëna, ¿ndáyeca šojtsentsjanata ca?’ <sup>27</sup> As, chë inÿabioye ibojtsentsjanayá Moisésbioye tbojtsanajuatšëntšë y tbojaniana: ‘¿Nda bëngbeñe tcmëñajayé mandado y chë tšabá o ndoñe tšabá fstsamama chacuayanama ca?’ <sup>28</sup> ¿Cojtseboše átšnaca jóbama, ntšamo tonjopasá yëfse chë Egiptocábioye tconjobacá ca?’ <sup>29</sup> Moisés chca tojanuena ora, Madián luaroye tojtsanachá y choca yojoyena inÿe luarocana ashjanganocá. Chentšë uta uaqüñata yojëftsamanna.

<sup>30</sup> “Chentšana canta bnëtsana uatëse, entšanga ndoyena luariñe, Siná tjañe béconana, canye ángel tbojánëbëbocna zarzësha yojtsángbototjuantšë. <sup>31</sup> Moisés yojenjaná ndayá yojtsonÿama y tšabá jinÿama tojanobeconá ora, tojanuena Bëngbe Bëtsá mëntšá ibojtsatšësnaye: <sup>32</sup> ‘Atše acbe bëts taitangbe Bëtsá sëndmëna, Abraham, Isaac y Jacobë Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontsebmna choye jontjësiyama. <sup>33</sup> As Bëngbe Utabná tbojaniana: ‘Motsenóshecbotsca, er acca contsemntšë nÿe atšbiam luare endmëna, er átšnaca chentšë sëntsemna. <sup>34</sup> Ndegombre sënjinÿe ntšamo atšbe entšanga Egiptoca montsesufrina y sënjouena chëngbe oyabøjuayana, y atšë sënjabo chënga jabátsebacama. Chcasna, mabouena, Egiptoye chochanjíchmuca ca’ —Bëngbe Bëtsá tbojaniana.”

<sup>35</sup> Chentšana Esteban tojanëyana: “Quem Moisés entšanga tmojtsanoboté y tmojaniana: ‘¿Nda bëngbeñe tcmëñajayé mandado y chë tšabá o ndoñe tšabá fstsamama chacuayanama ca?’ Masque chca, Bëngbe Bëtsá mo mandayacá y atsebacayacá tbojesanichmó, chë zarzëshentšë tojanobinÿná ángeloftaca. <sup>36</sup> As Moisés, bëngbe bëts taitanga Egiptocana tojánëtebuacna y bëts soyënga tojanma, y inÿe soyënga Bëngbe Bëtsabe obenana jinÿanÿiyama Egiptentšë, chë Buángana ca uabaina mar bëjayentšë y entšanga ndoyena

laurentše, canta bnětsana uatěntscuana. <sup>37</sup> Cach Moisés Israeloca entšanga měntšá tojaněyana: ‘Běngbe Bětsá tšěngaftanguentšana canya bochanjábema atšcá Běngbe Bětsabe juabna oyebuambnayá ca.’ <sup>38</sup> Moisés Israeloca entšangaftaca yojtěftsemna chě entšanga ndoyena luaroca. Choca chě entšanga tmojánenefnna Sinai tjañe béconana. Chentšana canyě ángel Moisésoftaca tojanoyebuambá, běngbe běts taitángbiyoe chě buayenana soye Moisés chaóyebuambama, chě entšanga tšabe vida jónyēnana palabrenga; y Moisés chca tojanma, bēngnaca chě palabrenga jounama jobenayama.

<sup>39</sup> “Pero bēngbe bēts taitanga ndoñe tmonjánbošena joyeunayama, masna nye tmojt-sanaboté y Egiptoey jesshēconama imojtsaiseboše. <sup>40</sup> Moisés cabá chě tja tsjuanoca chě ángeloftaca yojtsemna ora, chēngbe bachnangbe más uámana amēndayá Aarónbiyoe mēntšá tmojanianyana: ‘Bēngbe Bětsabe cuenta šmayentšpormá canyě buashinjinjyana soye jadórama, bēnga chašunatsama. Er bēnga quemátstatšēmo ndayá yojtšopasana Moisés, chě Egiptocana šonjěftšēbuacnāftaca ca.’ <sup>41</sup> As tmojanma canyě buashinjinjyana soye mo canyě uacnabecá y cha jadórama ba bayēnga tmojanēbaye, y tmojanóboyejuanga cachēnga chě soye tmojanpormáye. <sup>42</sup> Chě causa, Bēngbe Bětsá chēngbentšana tojtšanojuánañe y cachcá tojesanēñyaye chēngbe bacna soyēnga causa, estrellatēmēnga chamotsadoránama. Chca jochnēnguama, Bēngbe Bětsabe juabna oyebuambayēngbe librěšañe mēntšá endayana, ntšamo Bēngbe Bětsá tojanayancá:

Israeloca entšanga,

¿Atše jětschuayama bayēnga chešmēnjanēbaye y chě soyēnga chešmēnjanátšēmbona, chě canta bnětsana uata entšanga ndoyena laurentše tšěngaftanga šmonjěftsemna ora?

<sup>43</sup> Atše jadóra cuenta, chě Molocbiamá jebna soye šmonjanacutšá y cha šmonjánadorana, y chě Refánbe estréllacnaca cachcá šmonjánama.

Chě soyēnga mo Bēngbe Bětsá cuenta šmonjánbomna y cach tšěngaftanga šmonjanobopormá jadórama.

Mora chě causa atše chanjama, Babilonientšana más chcoye tšěngaftanga chacmotsēnatsama ca” —chiñe endayana.

<sup>44</sup> “Bēngbe tempsca bēts taitanga entšanga ndoyena luaroca, chě jatsjacama opodena yebna innabomna; chě yebnentše Bēngbe Bětsá chēngaftaca tojanoyebuambá. Inajebna ntšamo Bēngbe Bětsá Moisésbiyoe tbojanmandacá, y cha tojanma ntšamo chaojebuama Bēngbe Bětsá tbojaninjinjēcá. <sup>45</sup> Bēngbe bēts taitangna chēngbe taitángbentšana chě jatsjacama opodena yebna chēngbiamá tmojanóyēngacñe, y chēnga chě Canaán luaroye Josuéftaca, chě inyě luaroquēngaftaca jěntsjama tmojána ora, chě jebna soye tmojanamba y chocna, Bēngbe Bětsábeyeca chentšá entšangbiyoe Israeloquēngbentšana tmojtānēbuacna; y chě jebna soyna chě tmojanayēñjaná laurentše tojanoquedá, rey David yojtěftsiyeněntscuana. <sup>46</sup> David tšabá mandbomná inamna, chíyeca Bēngbe Bětsá cháftaca puerta yotsóyejuaye. David chábiyoe lesencia tbojanotjañe jajebuama, Bēngbe Bětsá chě Jacob tbojanadorá cha, chentše chaotsiyenama. <sup>47</sup> Pero Salomón inamna nda chě Bēngbe Bětsabe bēts yebna tojanjebúá. <sup>48</sup> Masque chě celoca Bēngbe Bětsá, entšangbe jebna yebniñe ndoñe quenatiyena. Ntšamo Bēngbe Bětsabe juabna oyebuambnayá tojanabemcá, ndayá Bēngbe Bětsá tojanayancá:

<sup>49</sup> ‘Celoca endmēna chě luare ndayentšana atše tsmánda,

y quem luare endmēna nye mo canyě tšēnētemcá ndayentše atšbe shecuatsēnga chjacayae.

As, ¿ntšamo atšbiamá jebna yebna šmochjajebo ca?’ —chě Utabná jayanana—;

‘o ¿ndaye yebnentše atše jóchnama chjobenaye,

<sup>50</sup> ndegombre cach atše nyetsca chě soyēnga tijamēse ca?’ ”

<sup>51</sup> Esteban mēntšanaca tojaněyana: “Tšěngaftanga nyets tempo josértama ndēbošēnga šmondmēna; šmondbomna ainana mo chě Bēngbe Bětsábeñe ndošbuáchiyēngbe ainancá, y Bēngbe Bětsabe soyēngama nduauenanēnga šmondmēna. Tšěngaftanga ndocna te quešmátšboše chě Uámana Espíritu joyeunayana. Ntšamo tšěngaftangbe bēts taitanga monjaninyencá, tšěngaftángnaca cachcá. <sup>52</sup> ¿Bēngbe Bětsabe juabna oyebuambnayēnguentšana, ndábíyoe tšěngaftangbe bēts taitanga ndoñe monjanacmena? Chě Bēngbe Bětsá tojanichamó entšanga chēnga tmojtšanēbaye, y mēngna entšangbiyoe imojanabuayinyá Cristo, chě ntšamo Bēngbe Bětsá yobošcá amá yochjánabama. Pero morna, uayayēngbe cucuatšíñe cha šmojábošhona y šmojóba. <sup>53</sup> Bēngbe Bětsabe mandēnga angelēngaftaca tšěngaftanga šmonjánóyēngacñe, pero chě soyēnga ndoñe quešmátšyēunana ca” —cha tojaněyana.

*Esteban ndětsbēngaca tmojanóba*

<sup>54</sup> Chentša mándayēnga chca tmojanuena ora, Estébanoftaca tmojanotjayaná y tmojanenaftěšbonzentsé, rábiaca imojtsemnana. <sup>55</sup> Pero chě Uámana Espíritu Estébanbe ainaniñe corente yojtsemádaye. Celoye yojtjēsiye y Bēngbe Bětsabe buashinjinjyanana yojinñe, y Jesús, Bēngbe Bětsabe catšbioica yojtšatsana. <sup>56</sup> As, Esteban tojánayana: “¡Mouenēnga,

séntsonyá celoca entsatēfjna y Bēngbe Bētsá Entśá tbojanbemá Bēngbe Bētsabe catšbioica entsemna jtsamēndayama ca!”

<sup>57</sup> Chora chēnga jabuache imojtseyoye, imojtsenamatsachto ndoñe más ntsuenanama y Estēbanbioye tmojanontśēnja. <sup>58</sup> Chentśana, chēnga chē pueblentśana tmojtsanábocna y ndētsbēngaca tmojtsanatēchēnganja. Chē Estēbanbioye mal tmojanqūedangna entśayangá tmojtsanenátsejca y canye bobontse, Saulo ca uabainá, tmojesanábonyiñe chaotsiyēnama.

<sup>59</sup> Ndētsbēngaca imojtsénanantscuana, Esteban Bēngbe Bētsáftaca ibojtsencuéntaye y mēntśá tojánayana: “Bēngbe Utabná Jesús, atśbe espíritu śmóyēngaca ca.”

<sup>60</sup> Chentśana Esteban tojanoshamentśé y jabuache tojánayana: “¡Bēngbe Utabná, chēngbe bacna soye motsaperdoná ca!” Y chca tojánayana ora, tojánóbana.

## 8

<sup>1</sup> Saulo chentśe yojtsemna y tśabá imojtsama ca yojtsejuabnaye, Esteban tmojanóbama.

*Saulo yojánama chē Cristbeñe ośbuáchiyēnga chamotsesufrínama*

Cach te, inyēnga tmojanontśé Jesucristbeñe ośbuáchiyēnga Jerusalenentśe ucamenana y jtsamana puerte chamotsesufrínama; chcasna, chēnga tmojtsanacheta y Samarioye y Judeoye tmojanáshana. Nye chē Jesucristbe ìchmónēnga ndócnoye tmonjánacheta. <sup>2</sup> Básefta boyabásēnga, Bēngbe Bētsá adórayēngna, Esteban tmojanamba jauátbontsama y chabiamana puerte tmojánenobosachna. <sup>3</sup> Chēntscuana, Saulo yojtsentśēna Jesucristbeñe ośbuáchiyēnga jtsapochócama y yebnēnguenache yojánamashjuana boyabásēnga y shembásēnga sjojónana ubuacana jutámiamana.

*Felipe Samaria luaroca tśabe noticiēngama yojanabuayiyiná*

<sup>4</sup> Y Jesucristbeñe ośbuáchiyēnga tmojanáshānēngna nyetsquénache imojánabuayiyinaye Jususbe tśabe noticiēnga. <sup>5</sup> Chca, Felipe Samarioye tojána y tojanontśé chē Bēngbe Bētsabe Uámāna Uabuayaná, Cristbiamana, chentśana entśanga jábuayenama. <sup>6</sup> Entśanga imojánenēfjuana Felipe joyeunayama y tmojáninnye bēts soyēnga cha jtsamana, Bēngbe Bētsabe obenana jinjáníyiyama. Chēnga nyetscanga ntśamo Felipe yojtsichamcá tśabá imojtseyeunana. <sup>7</sup> Banga bayējbe juabna uambayēnga tśabá imojtsatsmēna y chē bacna bayējēnga jabuache jtsaiyoyēse chēngbentśana imojtsaisebocana; y banga jama ndobenēnga y coshetēnga tśabá imojtsatsmēna. <sup>8</sup> Chē soyama chē pueblentśa oyenēnga corente imojtsóyejuaye.

<sup>9</sup> Pero canye pueblentśe Samarioca inamna canye boyabása, Simón ca uabainá; cha tempo inamna canye bocjuaná y chē Samarioca entśanga chabe soyēngama imojánenjinanaye. Cha yojánichamo cha canye uámāna entśa canjamna ca. <sup>10</sup> Y chábioye corente imnayeunana nyetscanga, uámanēnga y nduámanēngnaca. Entśanga imojánichamo: “Mua entsemna chē Bēngbe Bētsabe bēts obenana injáníynayá ca.”

<sup>11</sup> Y ndegombre chēnga corente imnayeunana, er cha chē bocjuanana soyēngaca bayté chē entśanga ingñēnēnga y ojnānānēnga yojtsabamna. <sup>12</sup> Pero chē luarentśa entśangna, Felipe tmojanoyeuná chē cha yojtsētsētná tśabe noticiēnga Bēngbe Bētsabe amēndayama y chē Jesucristbiamana tśabe soyēnga. Chorna chēnga Jesucristbeñe imojtsosbuáchiye, y boyabásēnga y shembásēnga tmojánenabaye. <sup>13</sup> Y cach Simónēnaca Jesucristbeñe yojtsosbuáchiye y tojanenábaye, y chentśana cada te Felipeftaca cha yojtsanmēna. Cha tojáninnye Felipe chē bēts soyēnga Bēngbe Bētsabe obenánaca jamana, y chama ojnānānā yojtsemna.

<sup>14</sup> Chē Jerusalenoca imojtsemna ìchmónēnga tmojántatśēmbona Samarioca entśanga Bēngbe Bētsabe palabra tmojanoyeunama; as, chora Pedro y Juan choye tmojanichamó. <sup>15</sup> Pedro y Juan Samarioye tojánashjango ora, chentśe Jesucristbeñe ośbuáchiyēngbiamana Bēngbe Bētsá tmojanimpadá, as chē Uámāna Espíritu chēngbeñe cháuamashēnguama jtsamāndayama. <sup>16</sup> Er cabá ni mo cānyābeñe chē Uámāna Espíritu tonjánamashēngo; chēnga tmojánenabaye Bēngbe Utabná Jesús jótśēmbonēse, chábeñe ośbuáchiyēnga jtsēmnama imojtsēbōyeyaca. <sup>17</sup> As Pedro y Juan chēngbe bestśašīne cucuatśēnga tbojancjá, y chca, chē Uámāna Espíritu tojánamashēngo chēngbe ainaniñe jtsēmāndayama.

<sup>18</sup> Simón tojáninnye, chē ìchmónēnga entśangbeñe cucuatśēnga tmojacjá ora, chē Uámāna Espíritu chēngbeñe jamashēnguana. As chora Simón chē ìchmónēnga tojanéyana: —Quem crocénana mosháchiñe, <sup>19</sup> y átśnaca chē obenana śmatśetá, y ndábefinaca cucuatśēnga chajajajó ora, chábeñnaca chē Uámāna Espíritu cháuamashēngo ca.

<sup>20</sup> As Pedro tbojanayana: —¡Acbe crocénana infiernoye chaotsá y ácnaca, chē Bēngbe Bētsabe tśetana soye crocénānaca jobuámiñama yopodena ca tcojajuabó causa! <sup>21</sup> Ndegombre, aca bēngaftaca ndoñe quecátśmēna, ni bēngbe trabajo acbiamana quēnátśmēna, Bēngbe Bētsabe delante acbe ainaniñe tśabe juabnēnga ndoñe quecátśbomna causa. <sup>22</sup> Ngmēnaca cochjenójuaboye quem bacna soye tcojamama y chca amana cochtsajbaná y Bēngbe Bētsá cochjaimpáda, aca chca tcojajuaboma nderádose cmatjaperdóna. <sup>23</sup> Atśe sēntsetatśēmbō, acbe ainaniñe tśa bacna juabnēnga inyēngbiamana yojtsemnama; y bacna

soyënga amana jtsajbanama ndoñe quecátobena causa, aca mo canyë ntsacjuanacá contsemna ca —Pedro tbojanianya.

<sup>24</sup> As chora Simón tojanëyana: —Bëngbe Utabná atsbïama šochjaimpáda, ntšamo šmonjauyancá ndoñe chandëpasama ca.

<sup>25</sup> Pedro y Juan, ntšamo Bëngbe Utabná Jesucristbïama tbojaninýcá y ibnatatšëmbcá entšanga imojtsëtsnaye. Chentšana, Jerusalemoye tbojésanata y tbojánachnëngo ba Samarioca pueblënguëjana, tšabe noticiënga entšanga abuyiynaye.

*Felipe y chë Etiopía luaroca reinabe uajabuachaná*

<sup>26</sup> Chentšana, Bëngbe Utabnabe canyë ángel Felípbïoye tbojanianya: “Moprontá y tsmana luarëngoye motsa, Jerusalementsana Gaza ca uabaina bëts puebloye benachëjana ca.” Chë benachna entšanga ndoyena luarëjana yojanachnëngona. <sup>27</sup> As Felipe yojëtsëtsbaná y tojána. Benachiñe tbojáneninýena canýa Etiopía luarocáftaca. Etiopía luaroca canyë reiná inamna y chë boyabásana chabe uajabuachaná y chabe crocénana bojanýa inamna. Chana Jerusalemoye tojánabo Bëngbe Bëtsá jadórama. <sup>28</sup> Chora Etiopía luaroye yojtsataye, chabe cochëshañe inayésenotbemañe, y chë Bëngbe Bëtsabe juabna oyebuambnayá Isaíasbe uabemana librëša yojtsaiualiyae.

<sup>29</sup> Chora chë Uámana Espíritu Felípbïoye tbojanianya: “Mobeconá y chë cochësha juachaca cochtsaye ca.” <sup>30</sup> As Felipe betso yojobeconá. Chora yojouena chë Etiopía luarocá, Isaíasbe uabemana librëša yojtsaiualiyae; as tbojantjá: —¿Chë contsalía soye quecmojtsosertana ca?

<sup>31</sup> Y chë Etiopía luarocá tbojanjúá: —¿Ntšamo šochjosërta, ndocná šonjabuayenase ca?

Y Felípbïoye tbojanianya: —Diosmanda, atšbe cochëshoye mášëngo y atšbe juachaca mabótbema ca.

<sup>32</sup> Isaíasbe uabemana librëšañe mëntšá yojtsaliyae:

Cha tmojanánatse mo canyë oveshá jóbama cuafjuanatšá; y chë mo canyë oveshá tmojtsëtsbotjná ora, cha iytëca jtsemnana, chánaca cachcá, chacá tondaye chenátanayana.

<sup>33</sup> Entšanga tmonjanma cha puerte chaosufrima,

mo cha canyë nduamaná cuafsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbïama jacuéntana,

quem luarentša chabe vida tmonsanbojuaná causa ca.

<sup>34</sup> Chora chë Etiopía luaroca uajabuachaná Felípbïoye tbojanianya: —Diosmanda, šmoubuayená, ¿ndabïama Bëngbe Bëtsabe juabna oyebuambnayá chca yojtsichamo, cachabiama o inýabïama ca?

<sup>35</sup> As Felipe tojanontsé, chë Isaíasbe librëšañe yojtsayana sóyeca, Jesusbe tšabe noticiënga jábuayenama.

<sup>36</sup> Chentša bënëse, canyë béjaye obëjniñe juachañe ibojtsachnëjuana. Chora chë uajabuachaná tojánayana: —Muentše béjaye entsemna. ¿Ndáyeca ndoñe nanjopódia atše muentše uabainá jtsemnama ca? Diosmanda, šmabaye ca.

<sup>37</sup> As Felipe tbojanianya: —Jesucristbeñe nýets acbe ainánaca tcojtsosbuáchese, aifñe echanjopódia juabáyama ca.

Y chë boyabása tbojanjúá: —Aifñe, sëntsošbuaché Jesucristo Bëngbe Bëtsabe Uaquiná yomnama ca.

<sup>38</sup> As chë Etiopiacá tojanmandá chë cochësha chauátotonama. Chentšana, nýets útata chë béjayoye tbojanashëbëbuástjango y Felipe, chë Etiopioca uajabuachanábiyoye tbojanabaye.

<sup>39</sup> Chë béjayentsana tbojtambocna ora, chë Uámana Espíritu Felipe ibojtsánatseñe y chë uajabuachaná ya ndoñe más Felípbïoye ibontsonýaye, pero corente oyejuayá yojtsatoñe.

<sup>40</sup> Felipe tojántatšëmbona Azoto bëts puebloca yojtsëmnama, y chentšana tojána nýetsca pueblënguenache chë tšabe noticiënga abuyiynaye, Cesarea puebloye jashjanguëntscuana.

## 9

*Ntšamo Saulo Crístbeñe ošbuachiyá tojanóbema  
(Hch 22.6-16; 26.12-18)*

<sup>1</sup> Saulo chëntscuana cabá Bëngbe Utabnábeñe ošbuachiyënga yojanautatjná jtsëbáyama. Chama cha tojána chë bachnangbe más uámana amëndayábïoye, <sup>2</sup> uabemana tsbuanachangá jauátjañama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninýanýé Benache ustoniñe, boyabásenga o shembásenga tojánýenëse, jótabayama y Jerusalemoye junatsama. Y chca jamama tojánbocna. <sup>3</sup> Pero ya Damasco béconana yojtsaye orna, nýe ndeolpe chabe juachañe celocana canyë bëts tcuinýe tojanbuashinýinýena. <sup>4</sup> Chora Saulo fshantsoyey tojánshajaye y canyë oyebuambnayana tojanuena, mëntšá: —Saulo, Saulo, ¿ndáyeca chca šcojtsacmena ca?

<sup>5</sup> As Saulo tbojantjá: —¿Nda comna, Bëngbe Utabná ca?

Y chë oyebuambnayana tbojanjuá: —Atše sëndmëna Jesús y aca condama atšbe entšanga chamotsesufrínama. <sup>6</sup> Pero matëtsbaná y Damascoye mamáshëngo; chentše canýa cmochanjabuayená ndáyá jamama cmojtsemnama ca.

<sup>7</sup> Chë Sáuloftaca imojánajna boyabásenga tša auatjanánënga imojtsemna y chíyeca ndoñe imontsobena jóyebuambayana; er nýe chë oyebuambnayana tojanuena, pero ndocná tmonjáninýe. <sup>8</sup> As Saulo fshantsentsana tojtantsbaná y tojtanobuchattëfjona ora, tondaye yontsobena jinýana. Chcasna, chë ínýenga tmojëftsanobuacuetëntsé y chca, Damascoye tmojanánatse. <sup>9</sup> Chentše yojëftsemna unga te, jinýama ntsoencá, ni ntjascá y tondaye ntjofšiyá.

<sup>10</sup> Damascoca Jesucristbeñe canýe ošbuachiyá inoyena, Ananías ca uabainá. Cha Bëngbe Utabnábiyoye mo otjenayoquécá tbojáninýe y Bëngbe Bëtsá tbojanianya: —Ananías ca.

As cha tbojanjuá: —Bëngbe Utabná, ¿ndáyá chjama ca?

<sup>11</sup> Y Bëngbe Utabná tbojanianya: —Moprontá y motsa chë “Ndericho tsáshenañe ca” uabáinoye, y Júdasbe yebnentše cohjanotícia canýe boyabásabíama, Saulo ca uabainábíama, Tarso pueblócá; cha mora Bëngbe Bëtsáftaca bentsencuénta. <sup>12</sup> Saulo ya tonjinýe mo otjenayoquécá, canýe entšá Ananías ca uabainá entsamashjuana y chabe cucuatšënga chabe bestšasiñe entsejájua, chca, cha chabuatabínýnama ca.

<sup>13</sup> Ananías chca tojanuena ora, tojánayana: —Bëngbe Utabná, banga ba soyënga chabíama šmonjacuentá; Jerusalenoca tša bacá acbe entšanga imomnënga tojáborye. <sup>14</sup> Y mora entsebmoma mando chë bachnangbe amëndayëngbentsana, muentše aca otšëmbuanënga jótabayama ca.

<sup>15</sup> As Bëngbe Utabná tbojanianya: —Motsa, er atše cha sënjuábuayana atšbíama chaotrabajama; chaóyebuambama ndoñe judiëngbeñe, reyëngbeñe y Israeloca entšángbeñnaca, y chca, chënga atšbíama chamotatsëmbonama. <sup>16</sup> Atše cha chanjinýinýiye ntsachetšá ibojtsemna atšbeyeca jasúfriama ca.

<sup>17</sup> As Ananías tojána Saulo yojtšannëna yebnoye. Tojánamashëngo ora, Saulëbe bestšasiñe chabe cucuatšënga tojanjájó y tbojanianya: “Jesucristbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chacmatabínýnama y chë Uámana Espiritu acbe ainaniñe jtsemándayama cháuamashënguama ca.”

<sup>18</sup> Cachora, Sálëbe bominyentsana mo beonbe bobachëshëngcá tojantquécjana, y chca, ibojtsatabínýna; chora tojantsbaná y tojanenábaye. <sup>19</sup> Chentšana, Saulo tojanse y añemo yojtšatsbomma y baseftayté chë Jesucristbeñe ošbuáchiyëngaftaca tbojántotona, Damascoca.

#### *Damasco puebloca Saulo entšanga yojanabuayinýa*

<sup>20</sup> Saulo cachorscana tojanontsé jábuayenama judiëngbe enefjuana yebnënguenache, Jesús Bëngbe Bëtsabe Uaquíñá bëtsemnama. <sup>21</sup> Chë imojtsuenanënga nýetscanga imojtsenjanayey mentsá imojtsichamo: “Mua entsemna chë Jerusalenoca Jesúsbiyoye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšëñe jabáshejuanama.”

<sup>22</sup> Pero Saulo cada ora más añémoca yojtsoyebuambnaye y puerte tšabá yojaninýanýná Jesús Bëngbe Bëtsabe Uámana Uabuayaná bëtsemnama. Chíyeca chë Damascoca judiënga ndoñe imontsobena ntšamo cha jojuana.

#### *Ntšamo Saulo judiëngbentsana tojtšanachá*

<sup>23</sup> Bayté tojanochnëngo ora, judiënga tmojanenoyeuná ntšamo jamëse Saulo jóbama, <sup>24</sup> pero Saulo chë soye tojántatsëmbona. Bnëté y íbeta, chë bëtš pueblentsa bëšašanguenache chënga chabíama imojananyá, jtsóbama; <sup>25</sup> pero chë Jesucristbeñe ošbuáchiyënga, íbeta, cha canýe bëtš sbarëcuíñe tmojtšanatsuumá, y chë pueblentsa shëconana tapiëšëjana tmojtšanëštjango. Chca cha tojanotsbocá.

#### *Saulo Jerusalenoca*

<sup>26</sup> Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nýetscanga imojtšebíauatja y ndoñe imontsošbuaché Saulo Jesucristbe ustóna yojtsemnama. <sup>27</sup> Chcasna, Bernabé Sálëbiyoye tojëftsantbetse y chë Jesucristbe ichmónëngbiyoye tbojanánatse, y tojanacuntá Saulo benachiñe Bëngbe Utabnábiyoye tbojáninýama, ntšamo Bëngbe Utabná tbojanianama y ntšamo cha Damascoca tša añémoca Jesusbíama entšanga tojánabuayenama. <sup>28</sup> As Saulo Jerusalenentše tojanototóna y chë Jesucristbe ichmónëngaftaca yojánana. Bëngbe Utabnabíama bëtš añémoca entšanga yojanabuayinýa y <sup>29</sup> yojanoyebuambná y imojanenatsëtsná chë griego biyá judiëngaftaca; pero chëngna imojtsenýeyunana Saulo jtsóbama. <sup>30</sup> Jesucristbeñe ošbuáchiyënga chca tmojántatsëmbona ora, Saulo Cesarea luaroye tmojanánatse, y chentšana Tarso pueblonye tmojanichmó.

<sup>31</sup> Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nyëtsanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritue uajabuáchenanaca, Jesucristbeñe ošbuáchiyënga más tmojanoboté.

*Pedro Enéasbiyoe tbojanshná*

<sup>32</sup> Pedro yojánabuache nyëtsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entšanga jabuachámnaca tojána. <sup>33</sup> Lida pueblentše canya tbojáninyëna, Eneas ca uabainá. Cha jama ndobená inamna y posufta uata jutsnëshañe chca inajáona. <sup>34</sup> Pedro tbojaniyana: “Eneas, Jesucristo tcmonjashná. Matëtsbaná y acbe tjuashe motsejacadá ca.” Y cachora chë jama ndobená tojtantsbaná.

<sup>35</sup> Nyëtsanga chë Lida pueblentše y Saronoca oyenënga chë entšá shnaná tmojáninyë. Y as, chënga bacna soyënga amana tmojtsanajbaná y cach orscana tmojanontšë Bëngbe Utabnábeñe ošbuáchiyana.

*Pedro tojanma Dorcas cháuatayenama*

<sup>36</sup> Chë tempo, Jope puebloca yojaniyena canye shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha nyëts tempo tšabe soyënga yojánama y yojanamana chë tojtšëjabetënga jujabuáchana. <sup>37</sup> Pero chora, šocana tbojanshache y tojtsanóbana. Tmojtsanbebé chentšana, canye tsoye tsbanana tsañoca chabe cuerpo tmojtñanajáj. <sup>38</sup> Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuáchiyënga tmojantatšëmbona Pedro choca yojtsemna. Asna, uta boyabásata tmojanichamó Pedro jauyanama: “Diosmanda, betscó Jope pueblöye mabo ca.”

<sup>39</sup> As Pedro tojtšantsbaná y chë uta boyabásaftaca tojána. Choye tmojánashajna ora, tmojanánatse chë Dórcasbe cuerpo yojtsemnoye, tsbanánoca; chorna, nyëtsca viudanga sachénaca Pédrëbiyoe tmojanóbobuashcona y imojtsinýinýnaye chë Dorcas yojaujonaná entšayangá y cmešëjuangá, cabá chëngaftaca yojëftsemna ora. <sup>40</sup> Pedro tojanmandá nyëtsanga chentšana chamotsebocanama; chora Pedro yojoshëntsamentšiyë y Bëngbe Bëtsáftaca ibojencuentá. Chentšana, Pedro chë obanábiyoe tbojanonýinýë y tbojaniyana: “Tabita, matëtsbaná ca.”

As Dorcas tojtanobuchatefjona y Pédrëbiyoe tbojáninyë ora, tojanótbema. <sup>41</sup> Chora Pedro tbojanábuacushache y tbojtanatsbaná. As Pedro tojánachembo nyëtsca chë Jesucristbeñe ošbuáchiyënga, chë viudanga y chë inýënga, y Dorcas ainá tojtaniñyané. <sup>42</sup> Chë soye nyëts Jope pueblentše tojanótatšëmbona y banga Bëngbe Utabnábeñe imojtsóšbuáchiye. <sup>43</sup> Y Pedro bayté Jope pueblentše tojanoquedá, Simón chë bobáchëshiñe trabajayabe yebnentše.

## 10

*Pedro y Cornelio*

<sup>1</sup> Cesarea pueblentše inamna canye boyabása Cornelio ca uabainá; cha inamna chë Italiano ca uabaina soldadëngbe amëndayá. <sup>2</sup> Cornelio Bëngbe Bëtsábiyoe ibnarrespetana y nyëtsca chabe yebnentša oyenëngaftaca Bëngbe Bëtsá puerte imojánadorana. Becá crocëñana inaquëcjnaye chë judiënga ndbomñëjëmënga jujabuáchama y sempre Bëngbe Bëtsáftaca ibñencuentaye.

<sup>3</sup> Canye te, mo bëts mošenana ora, cha botamana tojáninyë mo otjenayoquëcá, mëntšá: Bëngbe Bëtsabe canye ángel Cornelio yojtsemnoye yojtsamashjuana y tbojaniyana: — ¡Cornelio ca!

<sup>4</sup> Cornelio chë ángelbiyoe ibojtsonýaye y auatjananá tbojaniyana: —Taita, ¿ndayá yojtsemna ca?

Y chë ángel tbojaniyana: —Bëngbe Bëtsá condbëtseimpadanama y chë ujabótënga condbëtšëjabuachanama, Bëngbe Bëtsá ácaftaca entsoyëjuá y lempe mochóanjóyeunaye.

<sup>5</sup> Chcasna, mora básipta boyabásenga Jope bëts pueblöye michamó y Simón, chë Pedro ca monduabobuatmá, moyë chamuánatse. <sup>6</sup> Cha posada entsebomna inýë Simónbentše, chë bobáchëshiñe trabajayabe yebnentše. Chabe yebna mar béjaye tsachañe endmëna. Cha mochóanjauyana ndayá jamama cmojtsemna ca.

<sup>7</sup> Chë Cornéliëbiyoe ibojuatsëtsaye ángel tojtsatanoñe ora, Cornelio chabe oservenënguentsana útata tojánachembo y canye soldádnaca, chabe uajabuachaná, Bëngbe Bëtsá adorayá; <sup>8</sup> lempe ntšamo yojopasacá chënga tojanacuntá y chentšana Jope pueblöye tojanichamó.

<sup>9</sup> Yëfsana mo nyëtsora, chënga benachiñe Jope béconana imojtsajnëntscuana, Pedro yebnentša tsbanánoyë tojánasëngo, Bëngbe Bëtsáftaca jencuëntama. <sup>10</sup> Becá tbojánishëntsena y jasama yojtseboše; pero imojtsebopróntantscuana, Pedro mo otjenayoquëcá mëntšá tojáninyë: <sup>11</sup> Celoca yojtsatëfjna y mo canye bëts entšayëjuacá yojtsabá y nyëts canta sibientšana yojtsëjónýana. <sup>12</sup> Chë entšayëjuañe imojtsemna nyëtsca bayënga, ósojnyaye

bayënga y nyëtsca shloftšëngnaca. <sup>13</sup> Y tojanuena canye oyebuambnayana mëntsá: —Motsbaná, Pedro; mobaye y quem bayënga mose ca.

<sup>14</sup> Chora Pedro tojánayana: —Ndoñe, atšbe Utabná. Atše ndocna te chiyáise Moisesbe leyíñe ndoñe yondélesenciana jasama bayënga y chë jasama ndoñe tšabá imomna bayënga ca.

<sup>15</sup> Y cachiñe tojtëtanuena chë oyebuambnayana mëntsá: —Bëngbe Bëtsá tojalesenciá y canye matsá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

<sup>16</sup> Chë soye unga soyama chca tojanopasá chentšana, chë entšayëjua celoye tojtanátsjua. <sup>17</sup> Pero Pedro ndoñe yontsetátsëmbo ntšamo tojaninýca ndayá chabiana vojtsayanama. Chëntšcuana, chë Cornéliëbe ichmónënga noticiánana Simónbe yebnocca tojánashjajna y shjoca bësoca imojtsobátmana. <sup>18</sup> Tmojanchembo ora, tmojanënoticiá Simón, chë Pedro ca uabobainá, chentše taibojatanama.

<sup>19</sup> Pedro, ndayá tojáninýama chabosertama vojtsenójuabnantscuana, chë Uámama Espiritu tbojaniyana: “Mouena, muentše mora unga boyabásenga cmontsenguá. <sup>20</sup> Motsbaná, mocana matastjango y yapa ntjatenojubnaycá chëngaftaca cohjá, er atše chënga sënjichamó ca”.

<sup>21</sup> As Pedro tojtanastjango y chë tmojánashjajnënga tojanëyana: —Atše sëndmëna chë šmontsenguá cha. ¿Ndáyeca moye šmojabo ca?

<sup>22</sup> Chora chënga tmojanjúá: —Cornelio šonjichamó. Cha endmëna chë soldadëngbe amëndayá, canye tšabá mándbomna entšá y Bëngbe Bëtsábioye adorayá, y nyëtsca judiënga chabiana tšabá mondbëtsoyeuambnayë. Bëngbe Bëtsabe canye ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebo mncá cha jounama ca.

<sup>23</sup> As chënga tojanëmashengo y posada tojanëyentšame. Yëfsana Pedro chë unga boyabásengaftaca tojána. Básefta Jesucristbeñe ošbuáchiyënga Jope pueblentšënga Pedro tmojan-tjëmbambá.

<sup>24</sup> Chë inye yëfsana Cesarea pueblöye tmojánashjajna. Chentše Cornelio Pédrëbiana vojtsobatmana, y Cornelio tojanëbuaja pamillanga y tšabe amiguëngnaca chentše imojtsemna. <sup>25</sup> Pedro tojánashjango ora, Cornelio tojánbocna jajëbenguama y chabe shecuatšentše vojshëntsamentšiyë cha jadórama. <sup>26</sup> Pero Pédrëna tbojtanatsbaná y mëntsá tbojaniyana: —Matëtsbaná, atše cach aquécá nýe canye entšá sëndmëna ca.

<sup>27</sup> Pedro Cornélioftaca encuëntaye chë yebnentše tojánamashëngo y ba entšanga tojánaniyëna, chentše tmojanótotënga. <sup>28</sup> Chora Pedro tojanëyana: —Cach tsëngaftanga šmondëtatšëmbo chë judiëngbe leyënguiñe endayana ndoñe yondopodena canye judío ndoñe judío entšangaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinýinýë atše ndocna te šondmëna inýabiana jatsjuabnayana cháftaca jenútanama ndoñe tšabá yondmëna ca. <sup>29</sup> Chíyëca, šmonjobetše ora, ndocá ntjatichamcá nýe sënjabo ca.

Chora tojanatjá: —¿Ndáyeca šmonjobetše ca?

<sup>30</sup> As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuëntaye y ndeolpe sënjinýe atšbe delante canye boyabása uabuashinýinýana entšayaca bopormaná. <sup>31</sup> Cha šonjauyana: “Cornelio, Bëngbe Bëtsá condbëtseimpadanama y chë ujabótënga condbëtsejabuachanama, Bëngbe Bëtsá ácaftaca entšoyëjúá y lempe cmochanjóeyunaye ca. <sup>32</sup> Básefta boyabásenga Jope bëts pueblöye michamo y Simón chë Pedro ca monduabobuatná moye chamuánatse ca. Cha posada entsebo mna inye Simónbentše, chë bobáchëshiñe trabajayabe yebnentše, y chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.” <sup>33</sup> Chcasna, cachora sënjichamó aca jobëtšama, y aslëpaye jabama tcojyaunama. Y as morna, nyëtscanga Bëngbe Utabnabe delante fsëntseprontana jounama lempe ntšamo Bëngbe Bëtsá tmojamandacá ca —cha tojánayana.

#### *Ntšamo Pedro tojanoyebuambá Cornéliëbe yebnentše*

<sup>34</sup> Pedro chora tojanontsé mëntsá jóyebuambayama: —Mora atše šontsosertana, ndegombre Bëngbe Bëtsabiana nyëtscanga cachcá uámanënga imomnana. <sup>35</sup> Nyëts luarënguenache Bëngbe Bëtsá júbuajana cha tmojtsatschuaná y tšabe soyënga tmojtsamënga. <sup>36</sup> Tsëngaftanga šmondëtatšëmbo, Bëngbe Bëtsá Israeloca entšanga tojánabuayenama, tšabe noticiënga jtsóyebuambnayëse, chënga nyëtscanga ainaniñe tšabe ebionana chamotsebo mna, Jesucristbeyëca; y cha endmëna nyëtsca entšangbe Utabná. <sup>37</sup> Tsëngaftanga šmondëtatšëmbo ntšamo nyëts Judeoca tonjanopasama. Chë soye Galilea luaroca tojanobojatšë, Juan entšanga yojanabuayiná orscana, chënga bacna soyënga amana chamotsajbanama y

chamuenábayama. <sup>38</sup> Smondétatsëmbo ntšamo Bëngbe Bëtsá, Jesús Nazaretocábioye tbojanábuayanama y tojanma chë Uámana Espiritu chabe ainaniñe cháuamashënguama, y tojanma Jesús corente obená chaotsemnana; y šmondétatsëmbo ntšamo Jesús enjánana entsangbiana tšabe soyënga amiñe y nyetscanga chë Satanás yojánama chamosufrimënga áshnaye, er Bëngbe Bëtsá cháftaca yojtsemna.

<sup>39</sup> Bënga fsënjáninýe y fsëndétatsëmbo lempe ntšamo Jesús tojanmá Jerusalenoca y nyets Judea luariñe; y cha tmonjanóba, canýe cruciñe jacrucificase. <sup>40</sup> Pero Bëngbe Bëtsá tonjanma unga tianoye cha cháuatayenama y bëngbeñe chaonýnma. <sup>41</sup> Cha nyetsca entsangbe delante ndoñe chenátanbocna, pero añe bëngbeñe, chë tempo Bëngbe Bëtsá šojanëbuayanënga, Jesús tojtanayenama chamuinýnma. Y tojtanayentšana bënga cháftaca fsënjanse y fsënjanošfé. <sup>42</sup> Cha šonjichamó entsanga jábuayanama y jayanama ndegombre cha yomna chë Bëngbe Bëtsabe uabuayaná, chë nda obanëngbiana y ainëngbiana yochjayana tšabá o ndoñe tšabá tmonjamama. <sup>43</sup> Bëngbe Bëtsabe juabna oyebuambnayënga nyetscanga cach Jesusbiana tmojánayana, nda Jesúsbeñe tojtošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

*Ndoñe judiënga chë Uámana Espiritu tmojanóyëngacñe*

<sup>44</sup> Pedro chë palabrenga cabá yojtsóyebuambnantscuana, chë Uámana Espiritu tojánamashëngo nyetsca chë imojtsuenanëngbe ainaniñe jtsemándayama. <sup>45</sup> Chë judiënga Jesucristbeñe ošbuáchiyënga Pédroftaca tmojánabënga imojenjaná, chë Uámana Espiritu ndoñe judiëngbeñnaca cháuamashënguama Bëngbe Bëtsá tojanmama. <sup>46</sup> Chënga imojtsuenana chënga inýetsá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

<sup>47</sup> Chora Pedro tojánayana: “Pero mëngna chë Uámana Espiritu tmonjóyëngacñe ntšamo bënga tmonjóyëngacñecá. Chcasna, ndocná queochatobenaye jamana chënga uabáinënga ndoñe chamondëtsemnana ca.” <sup>48</sup> As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftaytë chëngaftaca chaoquedama.

## 11

*Ntšamo Pedro chë Jerusalenoca imojánenefuana ošbuachiyëngbioye tojanëyana*

<sup>1</sup> Jesucristbe ichmónënga y chë Judeoca Jesucristbeñe ošbuáchiyënga tmojántatsëmbona, chë ndoñe judiëngnaca Bëngbe Bëtsabe palabriñe imojtsošbuáchema. <sup>2</sup> Pero Pedro Jerusalenoye tojesaná ora, báseftanga chabiana ndoñe tšabá tmonjánayana. Chënga imojanma chë juabnayënga, chë ndoñe judiënga ošbuáchiyënga boyabásenga canjánamna chë más delicadentše base bobachtema tëtšenënga jtsemnana ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca. <sup>3</sup> As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

<sup>4</sup> Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanëyana: <sup>5</sup> —Atše Jope puebloca sënjanma y Bëngbe Bëtsáftaca sënjencuénta ora, mo otjenayoquécá sënjáninýe celocana mo canýe bëts entsëjuacá átšbioye enjësabeconaye y nyets canta sibiocana enjëséjonýna. <sup>6</sup> Y botamana sënjanrrepará ndayá chë tsoye bëtsemnana y sënjáninýe choye monjëtsemna uamna y tjoca bayënga, ósjojnaye bayënga y nyetscna shloftšëngnaca. <sup>7</sup> Y sënjanuena canýe oyebuambnayana mëntšá: “Motsbaná, Pedro; mobaye y quem bayënga mose ca.” <sup>8</sup> Chora atše sënjánayana: “Bëngbe Utabná, ndoñe; atše ndocna te chiyáise chë Moisesbe leyinë ndoñe yondëlesenciana jasama bayënga y jasama ndoñe tšabá imomnënga ca.” <sup>9</sup> Chentšana cacñiñe sëntëtuanena chë celocana oyebuambnayana mëntšá: “Bëngbe Bëtsá tojalesenciá y canýe bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.” <sup>10</sup> Chë soye unga soyama chca tonjanopasá y chentšana chë entsëjua celoye totanátšjua. <sup>11</sup> Y cachora unga boyabásenga Cesarea puebloca ichmónënga, chë posada sëndbomnentše tmonjánashjajna, atše janguanguama. <sup>12</sup> Y chë Uámana Espiritu šonjanmandá atše yapa ntjatenojubnycá chëngaftaca jama; y quem chnënguana Jesucristbeñe ošbuachiyëngnaca átšeftaca tmonjána. Nyetscanga canýe entsá Cornelio ca uabainabe yebnoye sënjánamashjna; <sup>13</sup> y chana bënga šonjanacuntá ntšamo tojáninýe, cachabe yebnentše canýe ángel ibojtsebiatsana y mëntšá tbojanianama: “Básefta boyabásenga Jope bëts pueblöye michamó y moye chamuánatse Simón, chë Pedro ca monduabobuatmá, <sup>14</sup> y cha cmochanjabuayená ntšamo aca y acbe yebnentša oyenënga šmochjotsbocá ca.” <sup>15</sup> As, atše jóyebuambayama sënjanabojatšé orna, chë Uámana Espiritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

<sup>16</sup> “Chora sënjanenoiubáb ntšamo Bëngbe Utabná tonjánayanama: ‘Ndegombre, Juan entsanga béjayeca tonjanëbaye; pero Bëngbe Bëtsá chë Uámana Espiritu bochanjichmua, tšëngaftangbe ainaniñe jtsemándayama cháuamashënguama ca.’ <sup>17</sup> Chcasna, chëngnaca



Bèngbe Bètsá chë Uámana Espíritu tonjatsáta, ntšamo bènga, chë Utabná Jesucristbeñe ošbuáchiyënga, šonjanatsataca. Y chca, atše ndoñe quetsásmëna canye tša uamaná, Bèngbe Bètsá jauyanama ntšamo cha yobošca ndoñe chaondëtsemna ca.”

<sup>18</sup> Jerusalemoca Jesucristbeñe ošbuáchiyënga chë soyënga tmojanuena ora, ndocá más tmojanantjá y Bèngbe Bètsá tmojtanchuá, mëntšá: —¡Asna, Bèngbe Bètsá chë ndoñe judiëgnaca tojalesenciá chëngbe bacna soyëngama ngmëna chamuatenójuaboma y chca amana chamotsajbanama, chë nyetsca tescama yomna tšabe vida chamotsebomnana ca!

*Ntšamo Antioquia pueblota tojanobojatsé, entsanga Jesucristbeñe ošbuáchiyana*

<sup>19</sup> Esteban tmojanóba chentsana, tmojanontsé chë Jesucristbeñe inye ošbuachiyëngnaca jatëcamiyama. As chentsana báseftanga yojtsamna bën luarëngoye jtsachetëngana Fenicioye, Chipre y Antioquia luarëngoye, y chenache chënga Jesucristbe soyëngama imojanoyebuambná, pero nye judiëngbiama. <sup>20</sup> Pero báseftanga imojamna Chipre y Cirene luaroquënga, y chënga Antioquia bëts pueblote tmojánashajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase. <sup>21</sup> Bèngbe Utabnabe obenana chëngaftaca yojtsemna, y chca, ba entsanga tmojanajbaná bacna soyënga amana y tmojanontsé Bèngbe Utabnábeñe jtsošbuáchiyana.

<sup>22</sup> Jerusalemoca Jesucristbeñe ošbuáchiyënga chë soye tmojántatsëmbona ora, Antioquia luaroye Bernabé tmojanichmó. <sup>23</sup> Bernabé choye tojánashjango orna, tojáninye ntšamo Bèngbe Bètsá tšabe bendicionënga chëngbeñe tojanmama y chama corente tojanoyejuá. Nyetscanga tojanabuayená chamotsiyena nyets ainánaca Bèngbe Utabnábeñe jtsošbuáchiyëse. <sup>24</sup> Bernabé inamna canye entsá tšabe soyënga amá, chë Uámana Espíritu chabe ainaniñe yojtsemándaye y bëtsca ošbuachiyá inamna. Y banga tmojanontsé Bèngbe Utabnábeñe jtsošbuáchiyana.

<sup>25</sup> Chentsana, Bernabé Tarso pueblote tojána Saulo janguanguama, <sup>26</sup> y tbojáninyëna ora, Antioquia luaroye tbojëftsanbetše. Antioquia luarentšna canye uata nyetsá Jesucristbeñe ošbuáchiyëngaftaca cányiñe ibojëftsemna y ba entsanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

<sup>27</sup> Chë tempo, básefta Bèngbe Bètsabe juabna oyebuambnayënga Jerusalemocana Antioquia luaroye tmojána. <sup>28</sup> Chënguentšana canya Agabo ca uabainá tojantsá y chë Uámana Espíritbeyeca tojánayana, mëntšá: “Nyets luariñe entsanga oyenife bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora. <sup>29</sup> Chcasna, chë Antioquia bëts pueblentsa Jesucristbeñe ošbuáchiyënga imojenóyeunaye ntsachetšá crocënanëna juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama. <sup>30</sup> Chca tmojanma, y Bernabé y Šauloftaca chë crocëna tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbiote.

## 12

*Santiago tmojanóba; Pedro tmojanëtame*

<sup>1</sup> Chë tempo, rey Herodes básefta Jesucristbeñe ošbuáchiyënga tojánishëche jutámiamana y jatsetšenama. <sup>2</sup> Tojanmandá espadëjaca chamóbama Santiago, Juanbe catsata; <sup>3</sup> y Herodes tojántatsëmbona judiënga chë soye tojanogúsetama; as, cha tojanmandá Pédrëna chamutámiamana. Chca tojanopasá chë levadúraca ndëpormana tandëse sayté, Bashco fiesta ora. <sup>4</sup> Pedro tmojánishache orna, Herodes tojanmandá chamutámiamana, y chë cárceloca soldadënga cantátanga tmojanenajatá cántentše cha chamotsebojanýama. Herodes yojtësejubnaye, Bashco fiesta tojochnëngo ora Pedro juabocnana, entsangbe delante jayanama cha chaóbanama. <sup>5</sup> Chcasna, Pedro yojtsetámëna y chë soldadëngna corente imojtsebojanýa. Pero Jesucristbeñe ošbuáchiyëngna bëtsca Bèngbe Bètsá imojtseimpadana Pédrëbiama.

*Bèngbe Bètsá tojanma Pedro natjëmbana cárcelocana cháuaisebocnana*

<sup>6</sup> Canye te yojtšajamna Herodes entsangbe delante Pedro juabocnana. Chë te ibetna, Pedro yojtšomañe y cátaoica canye soldado yojtsemna; uta cadenëjuaca yojtšabatsëna y inye soldadëngna bëšócana chë utámeniñe imojtsebojanýa. <sup>7</sup> Ndeolpe, Bèngbe Utabnabe canye ángel tojánbocna, y lempe chë utámeniñe yojtsebuashinyinýana. Chora chë ángel tēchañe Pédrëbiote tbojánbojajo, tbojanšëná y tbojanianyana: “Betsco motsbaná ca.” Y cachora chë cadenëjuangá Pédrëbe buacuatsënguentšana tojanatquécjána, <sup>8</sup> y chë ángel tbojanianyana: “Matichëtjo y matóshecochëtjo ca.” Pedro tojanma ntšamo chë ángel tbojanianyancá, y chora chë ángel tbojátanyana: “Mataquëfsayé y šmasto ca.”

<sup>9</sup> Pedro utámenocana chë ángel ibojtsëstona, pero ndoñe yontsetátšëmbo aiñe ndegombre o ndoñe bentsemna chë ángel yojtšama cha chocana cháuaisebocnana; masna, ibojtsinyana mo canye otjénayoca cuaftsemncá ca. <sup>10</sup> Y utentše chë soldadënga imojtsebojanýajana

chata tbojánachnëngo y yerëša bësásoye tbojánashjango, chë ndayëša yojanamna tsáshenoye jabocnana; y chë bësásana nÿe cachabe ponto yojotëfjo. Chentšana tbojëftsanbocna ora, canÿe tsáshenëjana ibojtsaye, y nÿe ndeolpe chë ángel Pédrëbentšana yojtsojuánañe.

<sup>11</sup> Nÿa chora Pedro tbojanosertá y tojánayana: “Mora tsábá şjosertá, ndegombre Bëngbe Utabná chabe ángel tbojichmó atşe jatsbocama Herodesbe cucuatşentšana y lempe ntşamo judiënga átşeftaca jamama imojuabnámnaca ca.”

<sup>12</sup> Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentşe banga cânÿiñe imojtsemna, Bëngbe Bëtsáftaca encuéntaye. <sup>13</sup> Pedro chë tsashenoica bësásoca tojanchembo ora, canÿe oservená, Rode ca uabainá, tojánbocna jarrepárama. <sup>14</sup> Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tsábe noticia jaúnayama, Pedro bësoca yojtsemna ca. <sup>15</sup> Chë tsoca imojtsemnëngna chora tmojanianyana: “¿Opá chetşebocna ca?”

Pero chë oservená yojtsichamo ndegombre ca. Y chënga tmojanianyana: “¡Chabe ángel ctsemna ca!”

<sup>16</sup> Chëntscuana Pedro cabá yojtsechambuana; tmojánebiatëfjo y tmojáninÿe ora, chënga puerte imojenjaná. <sup>17</sup> Pero Pedro tojánëfjatşëmbo iytéca chamobiamama y tojanacuntá ntşamo Bëngbe Utabná utámenocana tbojánatsbocama. Chentšana tojánëyana: “Ntşamo tonjopasama Santiago y chë Jesucristbeñe inÿe oşbuáchiyënga şmochjaúnaye ca.”

Chora Pedro chë yebnentšana tojtáisebocna y inÿoye yojáta.

<sup>18</sup> Tojanbinÿna ora, chë soldadënga puerte imojóntşa enbouenanana, ntşamo Pédroftaca tojanopasama ndoñe imontsetátşëmbo causa. <sup>19</sup> As Herodes tojanmandá Pedro chamot-senguanguama; pero jtsinÿenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojanbojanýa soldadënga jtsëbáyama. Chë soyënga tojanochnëngo chentšana, Herodes Judea luarentšana tojëftsanbocna y Cesarea luaroye tojtsanoñe, y choca tojtsanoquedáñe.

#### *Herodes tojanóbana*

<sup>20</sup> Herodes corente yojtsetşátjaye Tiro y Sidonoquëngaftaca; as chënga tmojanenoye-uná Herodesbioye jama. Canÿe uámana uajabuachaná, Blasto ca uabainábioye tmojanayeuamaná, y chana tojanaşebuachená Herodes jauyanama ndoñe más entjayánanënga chamondëtsemnana, er Tiro y Sidonoca entşanga yida innabomna Herodesbe luaroca sanángaca. <sup>21</sup> Chcasna, rey Herodes inÿe tescama tojánachembo. Chë tena, jóyebuambayama Herodes uámana entşayaca yojtopórma y yojótbema chabe mándaye tbementşe; chentšana tojanonguamé. <sup>22</sup> Chora entşanga tmojanontşé mëntşá uayebuáchana: “¡Chë entsoyebuambná cha entşá ndoñe quenátşmëna! ¡Chana canÿe dios entsemna ca!”

<sup>23</sup> Cachora, Bëngbe Bëtsabe canÿe ángel tojanma Herodes şocana chaboshachama, chabe cuenta Bëngbe Bëtsá chamuatschuama entşanga ndoñe yonjáuyana causa. Herodes tojanóbana mamángaca sasná.

<sup>24</sup> Pero chë tempo más bëtşcá entşanga Bëngbe Bëtsabe palabra imojtsuenana y Jesucristbeñe imojtsoşbuáchiye.

<sup>25</sup> Bernabé y Saulo chatbe trabajo tbojëftsanma ora, Jerusalenocana Antioquía luaroye tbojésanata y Juan, chë Marcos ca uabobuatná, chátaftaca tmojëftsanbetşe.

## 13

#### *Bernabé y Saulo tbojanbojatsé Bëngbe Bëtsabe trabajo jamama*

<sup>1</sup> Antioquía luaroca Jesucristbeñe oşbuáchiyënguentşe imojtsemna Bëngbe Bëtsabe juabna oyebuambnayënga y oşbuachiyëngbioye abuatambayënga. Chënga imojanabaina Bernabé, Simón (chë Sibetá ca uabobuatná), Lucio Cirenocá, Manaén (nda tojanoboché cânÿiñe Herodes, chë Galileoca réyefraca) y Saulo. <sup>2</sup> Canÿe te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espiritu tojánayana: “Mora şmochjaleséncia Bernabé y Saulo tşëngaftangbentšana chabuétşebocnana; chatna canÿe trabajuama sënjabacacá ca.”

<sup>3</sup> Bëngbe Bëtsá jëtşchuyama tondaye ntjascá imojtsemnëntscuana y cháftaca imojtsencuéntantscuana, chëngbe cucuatşënga chatbe bestşáşe juatşoica tmojancjá, chatbe trabajuñe chaujabuachama Bëngbe Bëtsá jtseimpadánëse. Y chentšana chátbioye tmojtana-dioşoftá.

#### *Bernabé y Saulo Chipre luaroca*

<sup>4</sup> As Bernabé y Saulo, chë Uámana Espiritbeyeca ichmónata, Seleucia ca uabáinoye tbojánata y chentšana bejaycá, Chipre luaroye. <sup>5</sup> Salamina bëtş puebløye tbojánashjango ora, tbojanontşé Bëngbe Bëtsabe palabrama entşanga jábuayenama, chentşa judiëngbe enefjuana yebnënguenache. Juan Marcos mo chatbe uajabuachanacá ibojtşebomna.

<sup>6</sup> Njets chë luarëjana tmojánachnëngo orna, Pafos puebloye tmojánashajna; y chentše tmojáninjëna canyë judío tatšëmbuá, Barjesús ca uabainá. Cha yojánichamo cha canjamna canyë Bëngbe Bëtsabe juabna oyebuambnayá ca, pero ndoñe chca yonjamna. <sup>7</sup> Chë tatšëmbuá inatrabájaye chë Chipre luaroca mandadbiana, Sergio Paulo ca uabainá; y chë mandadna corente oseratná inamna. Cha yojtseboše Bëngbe Bëtsabe palabra jouenama; as tojanmandá Bernabé y Saulo jobiatšana. <sup>8</sup> Pero chë tatšëmbuá, grieguife Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtsošbuáchema, ntšamo chë Jesucristbeñe ošbuáchiyënga imojanošbuachecá. <sup>9</sup> Chora, Saulo chë Pablo ca imojanábobuatnabe ainaniñe chë Uamana Espiritu corente yojtsemándaye; as chë tatšëmbuábioye yejuana ibojonjñiyë, <sup>10</sup> y tbojanijana: “¡Abuambnayá, puerte bacna entšá, Satanasje uaquiñá y tšabe soyënga ndoñe chaondëtsebinjñinama trabajayá! Bëngbe Utabnabe njëtscá ndegombre soyëngama aca contschiamo uayátšenaye soyënga yojtsemna ca. <sup>11</sup> Mora, Bëngbe Bëtsá cmochanjacastíga, jtaná cochanjoquéda y baseftayté jinjñama queochatobenaye ca.”

Cachora Elimas mo ibetiñá chojoquéda y ibojtsonguaye canyá buacuetëntšnana chabuánatsama, jtaná yojtsemna causa. <sup>12</sup> Chë mandado chca tojáninjë ora, Jesucristbeñe yojtsošbuaché y yojenjaná Bëngbe Utabnabe soyënga tojanatsjinjñama.

### *Pablo y Bernabé Antioquia pueblentše, Pisidia luaroca*

<sup>13</sup> Pablo y chabe enutënga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalenoye tojésanshëcona. <sup>14</sup> Pergentšana Antioquia puebloye tbojátanata; chë pueblo inamna Pisidia luare bëconana. Chentšna, ochnayté, chë judiënge enefjuana yebnoye tbojánamashëngo y tbojanótbema. <sup>15</sup> Moisesbe leyíne y Bëngbe Bëtsabe juabna oyebuambnayënge uabemana librësangañe tmojanalía orna, chë enefjuana yebnentša mándayënga canyá tmojanichmó chënga jáuyanama: —Israeloquënga, bënga fsëntseboše entšanga chašmabuayená, nderado ndayá jayanama šmojtsebonmñese, muentša entšanga añemo chamotsebonmna ca.

<sup>16</sup> As Pablo tojéscá y entšángbioye cucuátseca tojánefjatsëmo iytëca chamobiamama, y tojánayana: —Šmochjouena Israeloquënga y ndoñe judiënga Bëngbe Bëtsá adórayënga. <sup>17</sup> Israeloca entšanga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtsçanga chamotsemnana, chënga Egiptoça injë luarocana ashjajñëgcá imojoyena ora. Y chentšana, cachabe obenánaca chë luarocana chënga tojésanëbuacana. <sup>18</sup> Canta bnëtsana uata njëtšá, Bëngbe Bëtsá entšanga ndoyena luaroca chënga yojanëuantana, <sup>19</sup> y cha tojanma chë Canaán luaroca canyšëftentša entšanga chamopochocama y bëngbe bëts taitanga chëngbe fshantsënga nduiñënga tojánabiamama. <sup>20</sup> Chë tempo, chë Bëngbe Bëtsá Abrahámioye quem fshantse jatsetayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentšana, Bëngbe Bëtsá chëngbiana mandadënga tojánabiamama, Bëngbe Bëtsabe juabna oyebuambnayá Samuel chëngbe mandayá yojëftsemna tempëntscuana. <sup>21</sup> Chentšana, Israeloquënga Samuel tmojanimpadá canyë rey chabojayé chaotsamëndama; as Bëngbe Bëtsá Saúlbioye chëngbe rey tbojانبema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentšá. <sup>22</sup> Más choyna, Bëngbe Bëtsá Saúlbioye chë mándayentšana tbojtšanjuaná, y chentšana Davidbioye mo chëngbe reyca tbojانبema. Chabiamama Bëngbe Bëtsá tojánayana: ‘Atše sëndétatsëmo, David, Isaibe uaquiñá, canyë tšabe entšá yomnama y chama atše sëndoyeuá, y cha sempre endëprontana ntšamo atše stsebošcá jtsamama ca.’ <sup>23</sup> Davidbentšana canyë entšá Jesús enjamna, nda Bëngbe Bëtsá tbojanichmó Israeloca entšanga jabátsebacama, ntšamo cach Bëngbe Bëtsá chëngbe bëts taitanga tojanasebuachenacá. <sup>24</sup> Cabá Jesús ndëbocna ora, Juan njëtscá Israeloquënga tojanabuayená bacna soyënga amana chamotsajbanama y chamuenábayama. <sup>25</sup> Juanbe trabajo jopochócama yojtsobeco ora, cha tojánayana: ‘¿Nda atše tsmënama tšëngaftanga šmojuabná ca? Chë tšëngaftanga šmontsejuabná atše tsmëna ca cha, atše ndoñe quešatsmëna. Pero átsbentšana echanjabo canyá, y atše mercedo taitsatobuajojne ni mo jotsejbiyama chabe shecochëtjonëshentša corriëja jajafjonama ca.’

<sup>26</sup> “Chase morna, Abrahámibentšana entšanga y ndoñe judiënga Bëngbe Bëtsá adórayënga; bëngbiana entsemna quem buayenana soye, chë Bëngbe Bëtsá entšanga jatsebacana. <sup>27</sup> Masque cada ochnayté, Bëngbe Bëtsabe juabna oyebuambnayënge uabemana palabra monjanalía chëngbe enefjuana yebnentše, Jerusalenentša oyenënga y chentša mándayënga ndoñe quenjatanësertana nda Jesús bëtsemnana, y chë tmojtšalía soyëngama cach ndoñe. Y chca, chënga Jesús chamóbama tmojانبoshjona ora, chë chca amënga tmojanma ntšamo Bëngbe Bëtsabe juabna oyebuambnayënge librësangañe iuabemancá. <sup>28</sup> Y masque ndocna

bacna soye tmojaninýena Jesús jóbanama chabotsemnana, Pilato tmojanimpadá chaomandá chábioye jóbama. <sup>29</sup> Chentsana, lempe ntšamo Bèngbe Bètsabe uabemana palabrenguiñe iuayancá Jesúseftaca tojanochnèngo ora, chabe ústonènga chë cruzocana tmojanèštjango y tmojanatbontsá. <sup>30</sup> Pero Bèngbe Bètsá tojanma Jesús cháuatayenama. <sup>31</sup> Chë Galileocana Jerusalenoye cháftaca tmojánanga, baytentscuana Jesús yojánebuacana; y morna, lempe ntšamo Jesusbiam tmojaninýcá, chënga entšángbeñe montsoyebuambná.

<sup>32</sup> “Y chca, mora bënga chë tšabe noticiënga cbontsëtsëtsná. Ntšamo Bèngbe Bètsá bëngbe bëtš taitanga tojanašebuachenacá, <sup>33</sup> cha tonjama, bënga chë chëngbe entsànguentšëngbiam, chca chaotsemnana. Y Bèngbe Bètsá chca tojama, Jesús cháuatayenama cha jamëse. Rey David, Bèngbe Bètsabe uabemana palabrenguiñe, segundo salmentse mëntsá tojanábema, ntšamo Bèngbe Bètsá Jesúsbioye tbojanianama: Aca atšbe uaquiñá condmëna.

Mënté entsanga sënjinýanýe aca atšbe Uaquiñá comnana ca.

<sup>34</sup> Y tempo Bèngbe Bètsá chabe uabemana palabrenguiñe tojaninýanýe cachá jamama Jesús cháuatayenama y ndoñe cachiñe chaondóbanama, mëntsá tojánayana ora: Chë ndegombre soyënga y chë tšabe bendicionènga ntšamo David sënjanšbuachenacá, tšëngaftanga cbochanjátšataye ca.

<sup>35</sup> Inýoca Bèngbe Bètsabe uabemana palabrenguiñe, Salmos librëša uabiamnayá, mëntsá tojanábema ntšamo Jesús Bèngbe Bètsábioye tbojanianama:

Aca ndoñe quecochatsleséncia atšbe cuerpo, chë acbe Uámama oservenabe cuerpo chaotso pochocama ca.

<sup>36</sup> David, chabe tempo imojoyenëngbiam tojanma, ndayá cha chaomama Bèngbe Bètsá tojanjuabocá. Cha tojanóbana y tmojanatbontsá chë chabe bëtš taitángbioye tmojanëtabuantsá luarentse, y chabe cuerpo tojanopochocá. <sup>37</sup> Pero chë Bèngbe Bètsá tojanma chauatayenamabe cuerpna, ndoñe tonjanopochocá.

<sup>38-39</sup> “Asna, baconga y batanga, atše sëntseboše tšëngaftanga quem soye chašmotsetátšëmbo: Ndayá Jesús tojanmama, entsanga chëngbe bacna soyëngama perdonánënga montsemna. Jesúsbeyecá, nyetsca chábeñe tmojtsošbuáchenga, bacna soyëngama perdonánënga mochántsemna. Ntšamo Moisesbe leyíñe iuayancá tmojanmama, chënga ndoñe tmojanobená chca perdonánënga jtsemnana; nyë Jesúsbeñe jtsošbuáchiyëse chënga perdonánënga jtsemnana. <sup>40</sup> Cuedado šmochtsebmoma, ntšamo Bèngbe Bètsabe juabna oyebuambnayënga tmojanayancá, tšëngaftangaftaca ndoñe chaonochnënguama.

<sup>41</sup> Bèngbe Bètsá mëntsá tojánayana:

Smochjouena. Tšëngaftanga chë ntšamo atše tijayancá šmojtšábotenga, ojanánënga šmochántsemna y šmochanjóbana.

Tšëngaftanga cabá vida šmombomnëntscuana, atše bëtš soyënga chanjéftsema,

y masque ndánaca chë soyëngama chacmojtšacúnta,

tšëngaftanga chiñe ndoñe quešmochatošbuáchiye ca” —Pablo tojanoyebuambá.

<sup>42</sup> Pablo y chabe enutënga chë judiëngbe enefjuana yebnentšana tmojëftšanbocna ora, chë ndoñe judiënga chëngbioye tmojanaimpadá, chë inýe ochnaytescama chë soyëngama más jábuayenama. <sup>43</sup> Chentse chë te jenefjnama tempo tojanopochocá ora, ba judiënga y ndoñe judiënga, chë Bèngbe Bètsábioye imojánadorana mo chë judiëngcá, Pablo y Bernabé tmojanéseto. Y chatna chënga tmojanabuayená nyets tempo chamotsejuabnana, Bèngbe Bètsá chëngbiam tšabe soyënga yojtsamama.

<sup>44</sup> Chë inýe semana, chë ochnaytena, nýa mo nyetsca chë pueblentse oyenënga tmojanobecná Bèngbe Bètsabe palabra jouenama. <sup>45</sup> Pero ba entsanga choye jouenama tmojánama chë judiënga tmojáninýe ora, tmojanotjayaná, ba entsanga Pablo imojtseyeunanama; as chënga tmojanontsé mocá ichámuana ndayá cha yojtsóyebuambnana, y chábioye oyenguayana. <sup>46</sup> As Pablo y Bernabé más añémoca mëntsá tbojánayana: “Endánëyta, natsana tšëngaftanga, chë judiënga šmommënga, Bèngbe Bètsabe palabra jshabuayenana. Pero tšëngaftanga chë palabra šmontsáboté, y šmontsejuabná tšëngaftangbiam ndoñe tšabá yontsemna chë nyetsca tescama yomna tšabe vida jtsebmomna ca; chë causa, bënga fchantsoñe chë ndoñe judiëngbeñe Bèngbe Bètsabe palabra jóyebuambayama. <sup>47</sup> Er Bèngbe Bètsá chama šjanichamó, mëntsá jauyanëse:

Aca tcbonjuábuayana chë ndoñe judiëngbioye tšabe noticiënga jábuayenama, chaósertama.

Y chca, aca chëngbiam cochántsemna mo canýe birýnayacá.

Chca, ábeyeca nyets luarënguenache entsanga atše chanjatsebacá ca.”

<sup>48</sup> Chë ndoñe judiënga chca tmojanuena ora, puerte imojtsóyejuaye y tmojanontsé mëntsá ichámuana: “Bèngbe Utabnabe palabra tšabá bëngbiam entsemna ca.” Y chora, chë nyetsca tescama yomna tšabe vida jtsebmomna Bèngbe Bètsá tempo tojánabacacanga, tmojanontsé Jesúsbeñe jtsošbuáchiyana. <sup>49</sup> Y chca, nyets chë luariñe más entsanga Bèngbe Bètsabe palabra imojtsuenana. <sup>50</sup> Pero chë judiënga tmojanoyebuambá, šembásëngaftaca Bèngbe Bètsá

adórayënga y uámanënga, y chë pueblentsá uámana taitángaftaca, jamama Pablo y Bernabé chabosufrima y chë luarentšana jtëbuacnama. <sup>51</sup> As, Pablo y Bernabé tbojésanshecstëtonata, judiënga jinñanñiyama chënga ndoñe tšabá tmojanmama; y chentšana, Iconio pueblöye tbojtsanoñe. <sup>52</sup> Pero Jesucristbeñe ošbuáchiyënga corente oyejuayënga imojtsemna, y chë Uámana Espíritu chëngbe ainaniñe corente yojtsemádaye.

## 14

### *Pablo y Bernabé Iconio puebloca*

<sup>1</sup> Iconioca, Pablo y Bernabé cánñiñe tbojánamashëngo chë judiëngbe enefjuana yebnentsë y corente obenánaca Bëngbe Bëtsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché. <sup>2</sup> Pero chë judiënga Jesucristbeñe ndošbuáchiyënga, chë ndoñe judiëngbiöye tmojanayëñjaná, Pablo y Bernabebíama podesca chamotsejuabnana. <sup>3</sup> Chíyeca, Pablo y Bernabé bayté chentse tbojanotoná y ndauatjca Bëngbe Utabná Jesucristbíama tbojanoyebuambá. Bëngbe Utabná obenana chata tojanatšatá bëts soyënga jtsamama, y chë soyëngaca Bëngbe Utabná entšanga tojaninñanýe, ndayá chë ichmónata ibojtsoyebuambnacá ndegombre bëtsemnama, chë Bëngbe Bëtsá nýetscanga iuababuánýeshanana. <sup>4</sup> Pero nýetsca chë pueblentsá entšanga ndoñe cachá imontsejuabnaye; inýenga chë judiëngaftaca imojtsemna, y inýengna chë Jesucristbe ichmonátaftaca. <sup>5</sup> As, chë judiënga y ndoñe judiënga chentša mandayëngaftaca tmojanenoye-uná chata jtsatsetšenama y ndëtsbéngaca jtsébáyama. <sup>6</sup> Pero Pablo y Bernabé chama tbojántatšëmbona orna, tbojtsanëchañe Litra y Derbe pueblöye, Licaonia luaroca, y choca chábuañe luarëngoye; <sup>7</sup> y chë luarënguenáchnaca, chata Jesucristbe tšabe noticiënga entšanga tmojanabuayená.

### *Litra puebloca, ndëtsbéngaca Pablo tmojtsanatëchënganja jtsóbama*

<sup>8</sup> Litra puebloca inamna canýe boyabása jama ndobená. Ndocna te yondobena jana, chca cosheto inónýna causa. Chë boyabásana yojtsetbemana <sup>9</sup> ouenana ntšamo Pablo yojtsichamcá. Y Pablo chábiöye tbojanonñinýe ora, tojántatšëmbona chë šocá tša yojtsošbuáchema, shnaná jtsatsemnama; <sup>10</sup> as Pablo, juayebuáchenëse tbojaníyana: “¡Motsbaná y acbe shecuatšëngaca tšabá motsa ca!”

Chora chë boyabása, canýe jontsenýese tojantsá y yojóntša anana. <sup>11</sup> As chë entšanga, ndayá Pablo tojanmá tmojaninýe ora, tmojanontsé uayebuáchana chë Licaonia luarentšana biyañe, mëntsá: “¡Bëngbe diosënga bëngbiöye tbojátsma mo entšatcá ca!”

<sup>12</sup> Bernabé imojtsábobatma Zeus ca, mo chë chëngbe diosënga amëndayacá; y Páblëna Hermes ca, mo chë inýe diosëngíama oyeuambnayacá. Páblëbiöye chca imojtsábobatma, er cha más yotsoyebuambná. <sup>13</sup> Zeusbíama chentša bachna inabomma canýe yebna chë pueblo chaboca, chábiöye jadórama. Chë bachna, uacnënga tojanënatse y uantseffjushangá tojanëyamba chë Zeus jadórama yebnentsá amashjuanoye; y cha y chë entšanga imojtseboše chë uacnënga jashebuáyana y jajuinñiyana, chca, chë ichmonátbiöye jadórama.

<sup>14</sup> Bernabé y Pablo chama tbojántatšëmbona ora, entšayá tbojtsanenántšajatanëca, entšanga jinñanñiyama, ntšamo chënga imojtsamcá chata tondaye yonjógusetama, y tbojétsanotjajo entšangbe tsëntsajana y mëntsá ibojtsaychembumbuana: <sup>15</sup> “Baconga y batanga, ¿ndáyeca chca šmojtsama ca? Bëndata cach tšëngaftangcá entšata fsëndmëna. Muentsë bëndata fsëntsemna nýe jábuayenama Bëngbe Utabná Jesucristbe tšabe noticiënga, tšëngaftanga chë quem ndoservena soyënga, vida ndbomma soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nýetsca bëjayënga y lempe ntšamo chenache yobinñncá. <sup>16</sup> Masque tempo, Bëngbe Bëtsá entšanga tojanalesenciá cada ona chaoma ntšamo tojtsejuabnacá, tšabá cachëngbíama yojtsëmnayeca, <sup>17</sup> Bëngbe Bëtsá ndocna te ntjájbanana tšëngaftanga jtsinñanñinayana, cachá tojama tšabe soyëngaca, mocna Bëtsá cha yomnana. Cha endama tšëngaftangbíama chauaftema y chë matënga botamana chaoshájonama, y becá saná cmondatsatná; y cha endama tšëngaftangbe ainaniñe corente oyejuayana chašmotsebomnana ca” —chata tbojánayana.

<sup>18</sup> Masque chë soyënga tbojánayana, nýe batšatema más bën y ya ndoñe matbëñjanobenata chë entšanga jtséuyanana uacnënga jashebuáyama, chca, chátbiöye jadórama.

<sup>19</sup> Chca ora, básefta judiënga tmojánashjajna Pisidioca, Antioquiocana y Iconiocana, y chentša entšangbiöye tmojanayëñjaná, Jesucristbe ichmonatbe contra chamotsemnama. Chcasna, Pablo ndëtsbéngaca imojtsënanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca. <sup>20</sup> Pero Jesucristbeñe ošbuáchiyënga Pablo tmojanóbobuashconca orna, cha tojtantsbaná y cachiñe chë pueblöye tojtsaná; y chë yëfsana, Bernabéftaca Derbe pueblöye tojána.

<sup>21</sup> Derbe puebloa Jesucristbe tšabe noticiënga entsãnga tmojanabuayená, y chca, entsãnga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiye. <sup>22</sup> Chë luarënguenache chata ibojánana chë Jesucristbe ustonëngbiye atañemuaye, cada te chábeñe más chamotsošbuáchema. Y entsãngbiye tmojanëyana: “Bëngbe Bëtsabe amëndayoye jamashënguamna, bënga šontsamna quem luarentše bëtsá jëtšepadëcnana ca.” <sup>23</sup> Njëtšca ošbuachiyëncá enefjuanenache, bëtsëjemëncá mándayënga tmojanabacá, chentša Jesucristbeñe ošbuachiyënguentšana, cachënga chentša ošbuachiyëngbiye jtsamëndayama. Bëngbe Bëtsá jëtšchuyama tondaye ntjascá imojtsemna y cháftaca imojtsencuénta ora, cha tmojanimpadá, chë ošbuachiyënga Bëngbe Utabnabe cucuatšife chamotsemnana, ndábeñe chënga imojtsošbuachë.

*Pablo y Bernabé, Siroica Antioquia puebloye tbojtanata*

<sup>24</sup> Pisidia luarëjana tbojánachnëgo ora, Panfilia luaroye tbojánashjango. <sup>25</sup> Perge pueblentše Jesucristbe tšabe noticiënga entsãngbiye tmojanabuayená, y chentšana Atalia puebloye tbojánata. <sup>26</sup> Chentšana, Bernabé y Pablo, bejaycá tbojtanata Siroica Antioquia puebloye. Chentša entsãnga Bëngbe Bëtsá tmojanimpadá chata chibe cucuatšife chabotsemnana, chë trabajuñe chaotsanjënama; y chorna, chë trabajo ya tbojanpochocá. <sup>27</sup> Choye tbojtanashjango ora, njëtšca Jesucristbeñe ošbuachiyëngbiye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninñanýé, chë ndoñe judiëngnaca chamotsobenama Jesucristbeñe jtsošbuachiyama. <sup>28</sup> Y Pablo y Bernabé bayté chentše tbojanotoná Jesucristbeñe ošbuachiyëngtaftaca.

## 15

*Ichmónënga y bëtsëjemëncá mándayënga Jerusalemoca tmojánenefjna jencuëntama*

<sup>1</sup> Chë tempo, báseftanga Judeocana áshjajnënga tmojanontsé, Antioquia pueblentše, chentša Jesucristbeñe ošbuachiyënga mëntšá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyñe endayancá, ndoñe quenátopodena tšëngtaftanga atsebácanënga jtsemnana ca.” <sup>2</sup> Chiyeca, Pablo y Bernabé jabuachana chca buatëmbayëngtaftaca imojánenatsësnaye. Cabana, tmojanëbuáyana Pablo, Bernabé y ínýënga Jerusalemoye chamotsama, choca chë Jesucristbe ichmónëngtaftaca y chë chentše Jesucristbeñe ošbuachiyëngbeñe bëtsëjemëncá mándayëngtaftaca chama chamencuentama.

<sup>3</sup> Chcasna, chë Antioquioca imojánenefjuana Jesucristbeñe ošbuachiyënga Jerusalemoye chënga tmojanichamó. Fenicia y Samaria luarëjana imojtsachnëjuana ora, chënga tmojanacuntá ntšamo chë ndoñe judiënga chëngbe tempasca soyënguñe ošbuachiyana tmojtšanjbanama y chora Bëngbe Bëtsábeñe imojtsošbuáchema. Jesucristbeñe chentša ošbuachiyënga chca tmojanuena ora, puerte oyejuayënga imojtsemna.

<sup>4</sup> Pablo y chë ínýënga Jerusalemoye tmojánashjajna ora, chentša Jesucristbeñe ošbuachiyënga, Jesucristbe ichmónënga y bëtsëjemëncá mándayënga chëngbiye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá. <sup>5</sup> Pero básefta fariseunga, chora ya Jesucristbeñe ošbuachiyënga, tmojtšantá y mëntšá tmojánayana: “Chë ndoñe judiënga entsamna chë más delicadentše base bobachtema tëtšëncá jtsemnana, bënga judiëngcá; y tšëngtaftanga cmontsamna chënga jáuyanana, ntšamo Moisesbe leyënguñe iuayancá chamotsamana ca.”

<sup>6</sup> As, chë Jesucristbe ichmónënga y bëtsëjemëncá mándayënga tmojánenefjna jencuëntama, chë ndoñe judiënga añe o ndoñe yonjánamna chë más delicadentše base bobachtema tëtšëncá jtsemnana, ntšamo chë judiënga imojanamancá. <sup>7</sup> Bën y bëtsá chënga tmojanencuentá chentšana, Pedro tojantšaná y mëntšá tojanëyana: “Jesucristbeyeca catšátanga, tšëngtaftanga šmondëtatšëmbo, ya bayté entsemna Bëngbe Bëtsá tšëngtaftangbentšana atšë šonjanábuayana, Jesucristbe tšabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema. <sup>8</sup> Bëngbe Bëtsá jtsetatšëmbuana lempe ntšamo entsãnga tmojtsejuabnacá. Y cha šonjaninñanýé, chë ndoñe judiëngnaca imnobena chabe entsãnga jtsemnana, chábeñe tmojtsošbuáchese, chë Uámana Espiritu chëngbe ainaniñe cháumashënguama cha tojanma ora, ntšamo cha bëngbe ainaniñe tojanmca. <sup>9</sup> Y chca, Bëngbe Bëtsabiama njëtšcanga cachcá monduámana, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnana y ainaniñe tšabe juabna chamotsebonnana, Bëngbe Bëtsabe palabriñe jtsošbuachiyëse. <sup>10</sup> Y mora, ¿ndáyeca tšëngtaftanga ndoñe šmontseboše ntšamo Bëngbe Bëtsá tojamcá? Pero tšëngtaftanga šmontseboše, chë ndoñe judiënga Jesucristbeñe ošbuachiyënga lempe chë leyentša mandënga chamotsocumplñina, mo nda ínýabiye uauta uasmanësha cuaftasamënnacá; pero lempe chë mandënga, ni bëngbe bëts taitanga ni bënga ntsoebenana

jocúmpliana. <sup>11</sup> Y chca ndoñe chaondétsemna. Bënga mondošbuaché bënga atsebácanënga imomnama Bëngbe Utabná Jesús chabe tšabe juabna sojaninýanyéyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanéyana.

<sup>12</sup> Chorna, chentše imojtsemna entsanga nyetscanga iytéca tmojanobiama, y tmojanuena Bernabé y Pablo jtsóyebuambayana, chë bëts soyëngama, Bëngbe Bëtsabe obenana entsanga jinýanyiyama, y inýe soyëngama chabe obenánaca, ntšamo chë ndoñe judiëngbeñe Bëngbe Bëtsá chátaftaca tojanmá.

<sup>13</sup> Chë útata jóyebuambayama tbojanpochocá ora, Santiago mëntšá tojánayana: “Jesucristbeyeca catšátanga, smochjouena: <sup>14</sup> Simón šonjabuayená ntšamo Bëngbe Bëtsá natsana tojaninýanyé, chë ndoñe judiëngnaca cha iuanýenama, y chíyeca cha chënguentšana banga tojubuáyana chabe entsanga chamotsemnana. <sup>15</sup> Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyeubuambayënga tmojanayancá, ntšamo yochjanopásama y ntšamo Bëngbe Bëtsabe uabemana palabrenguñe endayancá, mëntšá:

<sup>16</sup> Chentšana atše chanjésabo

y chë Rey Davidbe pamíllanga cachiñe uámanënga chantabiama;

mo nda canýe uáshajayena yebna tojëtsejbcá, atše, Davidbe pamíllanga cachiñe uámanënga chantabiama;

<sup>17</sup> chca, chë inýe entsanga chamonguango ndayá jamana atše, tšëngaftangbe Utabná, más chašmotsábuatmama,

nyetsca ndoñe judiënga, chë atše entsanga chamotsemnana atše tijábacacanga.

<sup>18</sup> Chca atše, tšëngaftangbe Utabná sentsichamo,

nda ya bayté entsemna tonjanma entsanga chë soyënga chamotsetatšëmbuama ca —chiñe endayana.”

<sup>19</sup> Chentšana Santiago mëntšá tojanéyana: “Chíyeca atše sëntsejuabná, bënga ndoñe šontsamna chë ndoñe judiëngbiana jamana más totcá chaotsemnana Jesucristo jtsëstonama. <sup>20</sup> Chamna, šontsamna chënga juabuábiamana y jáuyanana ndoñe chamondëtsesá, sananga chë ndaye soyënga entsanga tmojuabná diosënga yomna ca jadórama tmojuiyëbana; bacna soyënga shembásenga o boyabásengaftaca ndoñe chamondëtsama y ndoñe chamondëtsesá tsešana bayëngbe mëntšena, y buiñe cach ndoñe ca. <sup>21</sup> Er chë natsana tempënga orscana, nyetsca pueblënguenache mondëna chë Moisés tojëtšanayana soyënga entsángbioye abuaiyinyayënga; y chabe leyënga, nyetsca ochnayté mondbetsaliaye chë bënga judiëngbe enefjuana yebnënguenache ca” —cha tojanéyana

*Chë Jerusalemoca ichmónënga y bëtsëjemëngcá mándayënga canýe tsbuanácha tmojanichmó chë ndoñe judiëngbiana*

<sup>22</sup> Chentšana, chë Jesucristbe ichmónënga y bëtsëjemëngcá mándayënga, nyetsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojanëbuáyana Judas, chë Barsabás ca uabobuatmá, y Silas; chata ibnamna uámanata chë Jesucristbeñe ošbuáchiyënguentše. <sup>23</sup> Y chëngaftaca canýe tsbuanácha tmojanichmó, y chiñe mëntšá yojëtšayana:

Bënga chë Jesucristbe ichmónënga y chë bëtsëjemëngcá mándayënga, cach tšëngaftangcá Jesucristbeñe ošbuáchiyënga, fsëntseboše Bëngbe Bëtsá salúdoca chacmotsábouamna, tšëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

<sup>24</sup> Bënga fsëntsetatšëmbo bëngbentšana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtšabuátambama y chë causa, tšëngaftanga ndoñe šmontsetatšëmbo ntšamo jtsejuabnayana ndayá jamana yomnana, Jesucristbe canýe ndegombra ustoná jtsemnana. <sup>25</sup> Chcasna, bënga fsënjenoyeuná y šonjúnýnana tšabá yojtsemna báseftanga bënguentšana jabacacayana tšëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama. <sup>26</sup> Chë útata ba soye tbojotsbcá vida jáshbiana, Bëngbe Utabná Jesucristbiana oservëniñe. <sup>27</sup> Chátaftaca Judas y Silas fsënjichamó; y chatna cach tšëngaftangaftaca bochanjóyebuambaye ntšamo quem tsbuanáchañe yojtsábemanama.

<sup>28</sup> Chë Uámana Espiritu y bënga cachcá fsëntsejuabná, bënga ndoñe šontsamna tšëngaftanga jamëndana bëtscá jabuache mandënga Moisesbe leyënguñe chašmotsocumplínama. Nýe quem uámana soyënga chiñe añe cmontsamna jtsobedecánana: <sup>29</sup> Ndoñe šmattsesaye mëntšena, chë ndaye soyënga entsanga tmojuabná diosënga yomna ca jadórama tmojóba bayëngbiana; ndoñe šmatjofsiye buiñe, ni šmatjase tsešana bayëngbe mëntšena; y shembásenga y boyabásengaftaca bacna soyënga ndoñe šmattsama. Chë soyënga ntšamcá, tšabá šmochanjava.

Bèngbe Bètsá salúdoca chacmotsábouamna ca —chiñe yojétsayana.

<sup>30</sup> Chcasna, chë quem Jerusalenocana ichmónënga tmojésanodiošoftanentšana, Antioquia puebloye tmojána; y chocna, nyetsca chë Jesucristbeñe ošbuachiyëngbiolye tmojanëbuaja y chë tsbuanácha tmojanayentšbuaché <sup>31</sup> Chë Antioquia pueblentša Jesucristbeñe ošbuáchiyënga ntšamo chë tsbuanáchañe yojtsbameancá tmojanalía ora, bëts añemo tmojtanca y corente imojtsóyejuaye. <sup>32</sup> Judas y Silas Bèngbe Bètsabe juabna oye-buambnayata ibnamna; as, chátnaca chë chentša Jesucristbeñe ošbuachiyëngbiolye ba soyënga tmojanéyana, chënga añemo chamotsatsbomnama y Jesucristbeñe corente chamotsošbuáchema. <sup>33</sup> Chentšana baseftaytese, chentša Jesucristbeñe ošbuáchiyënga chëngbiolye tmojanadiošoftá, chë ndëmuanyënga tmojanichamóngbiolye jtama. <sup>34</sup> Pero Silasna tšabá ibojtsinýana cachentše más jéftsajëtanama. <sup>35</sup> Pablo y Bernabé baseftayshinýe Antioquia pueblentše tbojanototóná y ba inýengaftaca Bèngbe Utabná Jesucristbe tšabe noticiënga entšanga tmojanabuatambá y tmojanabuayená.

*Pablo cachiñe inýe luarëngoye tojána, Bèngbe Bètsabe trabajo jamama*

<sup>36</sup> Chentšana baseftaytese, Pablo Bernabébiolye tbojaníyana: “Bèngbe Utabnabe palabra tbojanabuayená luarëngoye bochjésa, choca Jesucristbeñe ošbuáchiyënga jábuachama y jányama ntšamo imojtsemnama ca.”

<sup>37</sup> Bernabé yojtseboše, Juan chë Marcos ca uabobuatmábíolye chátaftaca jéftsbetšama. <sup>38</sup> Pero Páblëna ndoñe tšabá ibontsinýana cha jéftsbetšana, er Juan chátbentšana tojtsanojuánañe Panfilía luarocana, y ndoñe tonjanatjëmbambá, Bèngbe Bètsabe trabajo japochócantscuana. <sup>39</sup> Y chë palabrama tondaye tbojanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tojéftsantbetše, y bejaycá Chipre luaroye tojánata; <sup>40</sup> y Páblëna, Silas tbojanábuayana jéftsbetšama. Chë Antioquia pueblentša Jesucristbeñe ošbuáchiyënga Bèngbe Bètsá tmojanimpadá Pablo y Silas Bèngbe Utabnabe cuatšíñe chabotsemnama, chatbe trabajuiñe chaotsanyënama. Chentšana, Pablo Silaseftaca tojánbocna y <sup>41</sup> Siria, Cilicia luarënguëjana tojánachnëngo entšanga añemo atšatnaye, chë luarenache enefjuana ošbuáchiyënga Jesucristbeñe más chamotsošbuáchema.

## 16

*Pablo Timotéobiolye tbojáninýena*

<sup>1</sup> Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaquíñá y chabe taitana griego entšá inamna. <sup>2</sup> Chë Listra y Iconioca Jesucristbeñe ošbuáchiyënga Timoteobíama tšabá imojanoyebuambná. <sup>3</sup> Pablo tojánbošëna Timoteo jéftsbetšama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nyetsca judiënga imnatátsëmbo Timoteobe taitá griego inamnama. <sup>4</sup> Chë ibojtsachnëjuana pueblënguenache chata ibojtsana Jesucristbeñe ošbuachiyëngbiolye abuayinaye, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama yojtsamncá. <sup>5</sup> Nyets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

*Pablo mo otjenayoquécá canýe Macedonioca entsábíolye tbojáninýe*

<sup>6</sup> Chë Uámana Espíritu, Pablo y Silasbiolye tojaninýanyé, chata ndoñe yontsanamna Asia luaroca Bèngbe Bètsabe palabra entšanga jábuayenana; asna, tojánachnëngo Frigia y Galacia luarëjana. <sup>7</sup> Y Misía luaroca enajëbanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondëtsama. <sup>8</sup> Misía luarëjana tmojánachnëngo ora, Troas luaroye chënga tmojána. <sup>9</sup> Chë te ibeta, Pablo mo otjenayoquécá tojáninýe canýe Macedonioca boyabása ibojtsebiatsana y mëntšá ibojtseimpadana: “Diosmanda Macedoniolye mabo y šmabëjabuache ca.” <sup>10</sup> Pablo chca tojáninýe y cachora lempe tmonjanprontá Macedoniolye jama. Atšnaca, chë quem soyënga uabiamnayá, chënga sënjëtsetjëmbambnaye. Bënga fsënjëtsejuabnaye ndegombre Bèngbe Bètsá šojtsanachembuana choye jama ca, Jesucristbe tšabe noticiënga choca entšanga jábuayenama.

*Pablo y Silas Filipos puebloca*

<sup>11</sup> As, Troasentšana bejaycá fsënjána Samotracia luaroye, y yëfsana Neápolis puebloye, <sup>12</sup> y chentšana Filíposoye. Filipos enjamna canýe uámana bëts pueblo Macedonioca y bëtscá romanënga oyenýe. Chë luarentše baseftayté fsënjanoquedanga. <sup>13</sup> Canýe ochnaytena, chë pueblentšana fsënjëftsantbocna y chë fshájaye tsachoye fsënjána. Fsënjanuena chentše canjamna canýe luare Bèngbe Bètsáftaca jencuëntama ca, y fsënjána janguanguama.



Fsënjáninýena ora, chentše fsënjanothiama y Bëngbe Bëtsabe palabra fsënjanoyeubuambá chentše tmojanóoto shembásengbiamá. <sup>14</sup> Enjamna canýe shembása, Lidia ca uabainá, Tiatira pueblócá, y cha enjamna uámana uabuángana uafjatsenga entšayá uená. Cha inamna Bëngbe Bëtsábioye adorayá y chentše Páblëbioye ibotseyeunana. Bëngbe Bëtsá tojanma cha chabosertá lempe ntšamo Pablo yojtsoyeuambnacá, Jesucristbeñe chaotsóbuáchemá. <sup>15</sup> Cha y chabe yebnentše oyenëgra tmojánenabaye ora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre stsošbuaché ca; chcasna, mabënga yebnoye, átsbentše chašmoquedama ca.”

Y šonjanëterié bënga chentše joquédama.

<sup>16</sup> Canýe te, chë Bëngbe Bëtsáftaca encuëntaye luaroye fsënjétsajna orna, šonjanëbiatše canýe tobiáše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobiáše yojanmalísiaye soyëngama. <sup>17</sup> Chë tobiáše tonjanontsé Pablo y bënga usetonana y mëntšá enjétsaychembumbuana: “¡Quem boyabásenga montsemna chë celoca Bëngbe Bëtsabe oservënénga y tšëngaftanga cmontsabuayiyiná ntšamo Bëngbe Bëtsá yobena tšëngaftanga játsëbacama ca!”

<sup>18</sup> Y bayté chca enjanchembumbuana; chë causa, Pablo bonjëtsetana y cabana, tonjanobuértana y chë bacna bayëjbioye mëntšá tbonjaniyana: “¡Jesucristbe obenánaca y cha jótšëmbonëse, cbontsemánda chë tobiášbentšana chacuaisebocnama ca!”

Y cachora chë bacna bayëja chë tobiášbentšana tojésanbocna.

<sup>19</sup> Pero, chë bayëjbe juabna chárentšana tojésanbocnama y chëngbiamá más crocénana jabemama chora chë tobiáše ndoñe yontsobenama, chë tobiáše nduiñënga tmojáninýe ora, Pablo y Silasbioye tmojánishëche y tmojtsanasojoye plazoye, mandayëngbioye.

<sup>20</sup> Chë mandayëngbioye tmojanënatše ora, chënga mëntšá imojtsichamo: “Quem boyabásata judío entšata bondmëna, y muatbe causa bëngbe pueblëntša entšanga montsenbouenana, <sup>21</sup> y bontsabuatambó soyënga jamama ntšamo chë judiënga imuamancá y bëngbe leyënguiñe chë soyënga jamama ndoñe quenátslesenciana. Bënga ndoñe quešnátamna ni jouenana, ni jamana chë soyënga, romanënga bëtsemnayeca ca” —chënga imojtsichamo.

<sup>22</sup> Chora chë entšanga tmojanontsé uayebuáchana; as, chë mándayënga tmojanamëndá chata entšayá jtsëtsejquécana y niñëfjéngaca jtsachebuáanganjana. <sup>23</sup> Jabuache tmojanachebuáanganjëntšana, cárceloye tmojanautame y chë utámenënga shanyá tmojanmandá yejuana chaotsabuajënyá. <sup>24</sup> Chca tmojanmandá ora, chë utamianá chata tojanënatše chë más tsoye utámenoye y shecuatšentšana tsbuanëšine tojanatsebuá.

<sup>25</sup> Pero tsëntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inýe utámenëngna chca imojtsuenana. <sup>26</sup> Ndeolpe, corente jabuache yojtšëbánjua y chë utámena yebna fshantsocana yojtšábonjnaye. Cachora, nyëtscá chë utámenentša bëšašangá tojantéjfo y nyëtscá utámenënga chë cadenëjuangá yojtšayentšafjona. <sup>27</sup> Pero chë utámenënga shanyá tojanofšená y chë utámenentša bëšašangá yojtšatëfjnama tojáninýe ora, cha tojanuabó nyëtscá utámenënga tmojtsanacheta ca; chë causa, chabe espadëja yojenosëngbotëntšena jtsenóitanama. <sup>28</sup> Pero Pablo tbojánbochembo: —¡Acbe cuerpo ndocá matenábomana; nyëtscanga camuentše fsëndëtsomñe ca!

<sup>29</sup> Asna, chë utámenentša shanyá canýe uajuinýanësha tojanéyá y chë utámenoye ochamanana tojánamashëngo y auatja causa ngmëmnyá Pablo y Silas shecuatšentše yojoshëntsamentšiyë. <sup>30</sup> Chentšana tojtanëbuacna y tojanéyana: —Señórata, ¿ndayá šojtsemna jamama atše atsbocaná jtsemnama ca?

<sup>31</sup> Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëngnacá ca.

<sup>32</sup> Y cha y nyëtscanga chë yebnentše imojtsemnënga, Bëngbe Utabnabe palabra tmojanabuayená. <sup>33</sup> Cach ora chë ibeta, chë utamianá chata tojanënatše chë lisianënguiñe jetsajabiamá. Chentšana, cha y chabe pamállanga tmojánenabaye. <sup>34</sup> Chentšana, chë utamianá chata tojanënatše chabe yebnoye y saná tojanacaredadó. Cha y nyëtscanga chë yebnentše oyenënga oyejuayënga imojtsemna, Bëngbe Bëtsábeñe imojtsóbuáchemá.

<sup>35</sup> Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama. <sup>36</sup> Chë utamianá Páblëbioye tbojaniyana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

<sup>37</sup> Pero Pablo chë soldadënga tojanéyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entšangbe delante, bacna soyënga aiñe o ndoñe tatifjamama cabá ndinýanýiyë ora, y cárceloye šmonjautame. ¿Y mora imojtseboše iytécana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

<sup>38</sup> Chentsana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatsëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja. <sup>39</sup> Chcasna, cach mándayënga tmojána chata perdón jatëtejañama; chentsana tmojtanebuacna y tmojanëyana: “Diosmanda, muentsana inye luaroye motsoñata ca.” <sup>40</sup> As chata chë utámenentšana tbojëftsanbocna y Lídiëbe yebnoye tbojëftsanata. Chentsna, Jesucristbeñe ošbuáchiyëngaftaca tmojánenefjna y chata tbojánayana soyëngaca chëngbioye tmojanañemó. Y chentsana, chata inýoye tbojtsanoñe.

## 17

### *Tesalónica puebloca, Pablo y Silasbioye ndoñe tšabá tmojanëbuaja*

<sup>1</sup> Pablo y Silas inye luaroye ibojtsaye ora, Anfípolis y Apolonia bëts pueblënguëjana tbojánachnëngo y canýe bëts pueblo, Tesalónica ca uabáinoye tbojánashjango. Chentše, chë judiënga canýe yebna imnabomna chënga jénefnama. <sup>2</sup> Pablëna, ntšamo enjanamancá, cada ochnaytë chë jénefnama yebnoye yojánaye, unga semanëntscuana, y chentše chë judiëngaftaca yojanoyebuambná y imojánëtsnaye. Bëngbe Bëtsabe uabemana palabrenguiñe iuayana soyëngaca, <sup>3</sup> chënga yojanabuayiná y ndegombre yojaninýañná, Bëngbe Bëtsabe Uámana Uabuayaná jóbana y chentsana jtayenama ibojamnama. Y mëntšá yojanëtsná: “Chë Cristo, Jesús endmëna, ndabiama atše cbontsabuayiná ca.”

<sup>4</sup> Judiënguentšana báseftanga chiñe imojtsošbuáchiye y Pablo y Silas tmojanëseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásëngna. <sup>5</sup> Pero chë judiënga ndošbuáchiyënga chca tmojáninýe ora, puerte envidia imojtsebomna. Asna, chënga tmojánachembo banga, tondaye amënga y bacna entšanga, y chënga tmojanenutaná jamama nyëtscá chë pueblentša entšanga chamotsenbouénanama; y canýe entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentsana jesëbuacnama y entšangbe cucuatšifne jabáshejuanama. <sup>6</sup> Pero chentše ndocná tmojáninýena; as chë entšanga Jasón imojtsejjoye y chentsá mándayënga imojëtsemnoye tmojanánatse y Jesucristbeñe inye ošbuachiyëngnaca choye tmojanënatse, y mëntšá imojtsáyebuaiche: “¡Chë boyabásata, chë ndëmuanyata ibojtsama nyëtscá luarentša entšanga chamuenbouénanama, quem luaróynaca tbojabo, <sup>7</sup> y Jasón chabe yebnentše chata tojúbuaia ca! ¡Chënga montsama ntšamo chë Romoca bëts mandadbe mandënguifne ndoñe quenatslesenciancá, er chënga montsichamo inye rey canmëna, Jesús ca, y cha, César chë Romoca mandadbe cuenta nyëtscángbeñe yojtsemánda ca!” —chënga imojtsáyebuaiche.

<sup>8</sup> Chë entšanga y chë pueblentša mándayënga chca tmojanuena ora, corente imojenbouéna. <sup>9</sup> Pero Jasón y chë inýyënga, cháftaca imojtsemnënga, crocénana tmojtanjajó, y as tmojtanabáshejuana.

### *Pablo y Silas Berea Pueblooca*

<sup>10</sup> Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts pueblöye chabuëtsebocnama. Y chata choye tbojánashjango ora, chë judiëngbe enefjuana luaroye tbojánata. <sup>11</sup> Chentša judiënga imojamna más tšabe ainana bomnënga chë Tesalonicoca judiëngbiama; chcasna, oyejuayënga chë buayenana soye Jesucristbiama tmojanóyëngacñe, y cada te Bëngbe Bëtsabe uabemana palabra imojanalia, jtsetatsëmbuama, ntšamo Pablo y Silas ibojtsëtsësnacá aiñe o ndoñe ndegombre yojtsemnama. <sup>12</sup> Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásënga y boyabásëngna. <sup>13</sup> Pero, Pablo Bereoca chë Bëngbe Bëtsabe buayenana soyama entšanga yojtsabuayinama chë Tesalonicoca judiënga tmojántatsëmbona ora, chënga choye tmojána y tmojanma chentša entšanga chamuenbouénanama. <sup>14</sup> Chcasna, banga Jesucristbeñe ošbuáchiyënga tmojanma cachora Pablo chentsana chauëtsebocnama y bëjaye tsachoye chaotsoñama; chëntscuana, Silas y Timoteo Bereoca tbojanoquedá. <sup>15</sup> Pablo tmojantjëmbambá entšangna, Atenas ca uabaina bëts pueblóntsoñe cháftaca tmojána. Chentsana, Pablo chënga tojanabuayená chamuaisshëconama Silas y Timoteo jaúnayama betscó jtsayana, Pábloftaca jateninýenama.

### *Pablo Atenas pueblooca*

<sup>16</sup> Pablo Atenas bëts puebloca Silas y Timoteo yojtsëbatmanëntscuana, puerte tbojanongmé, er cha tojáninýe chentša entšanga imojtsadorana bëtscá cachëngbe pormanana soyënga, ndayama chënga imojanjuabná diosënga yojamna ca. <sup>17</sup> Chiyëca, chë judiëngbe enefjuana yebnentše, judiënga y ndoñe judiënga Bëngbe Bëtsá adórayëngaftaca

imojánenatsétsnaye, y cada te chentša plazoca chë ndëmuanyënga chentše imojanashja-juanëngaftácnaca. <sup>18</sup> Y báseftanga, ntšamo jtsejuabnyama entšanga abuátambayënga, epicureunga y estoiquënga ca uabainëngnacá Pábloftaca imojánenatsétsnaye. Inyënga imo-itsichamo: “¿Ndayama quem hostero yojtsoyebuambná ca?” Y inyënga: “Chana inyë luarëngoca entšangbe diosëngbiana muentše entsabóyebuambnyae ca.”

Chënga chca imoitsichamo, er Páblëna Jesusbiana y chë obanënga jtayenama yojanoyebuambná. <sup>19</sup> Asna, chentša entšanga cha tmojanánatse canyë luaroye, entšanga jénefnama y oyeubuambnyënga joyaunayama luare, Areópago ca uabáinoe. Chentše imojanamana uámanënga jénefnana, nderado ndabiana jayanama tšabá o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bëtsayanana bënga quefstsobena jtsetatšëmbuama ca? <sup>20</sup> Aca tsëm soyënga šcontsëtsëtsná y bënga fsëntseboše jtsetatšëmbuana ndayá chë soyënga bëtsayanana.

<sup>21</sup> Er nyëtscanga Atenasentša oyenënga y inyë luarëngocana áshajnënga, corente yojanogüsetana chë tojtsopasana tsëm soyëngama jtsuenanana y jtsencüentayana.

<sup>22</sup> As Pablo tojantšá chëngbe tsëntsaca chë Areópago ca uabáinentše y tojánayana: —Atenasentša entšanga: ntšamo bominyë sënjjajácá, atše sëntsetatšëmbo tšëngaftanga ba diosënga puerte šmayaunana y šmadoránama. <sup>23</sup> Atše sëndánrreparana tšëngaftangbe diosënga šmétsadorana luarënguenache y sënjinýena canyë altar y chentše mëntšá iuábemana: “Chë Bëtsá nduabuatumbiana ca”. Y morna, chë Bëtsá chë nda ntsabuatumcá šmadoránabiana, atše cbontsabuayiná.

<sup>24</sup> “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórama entšangbe jebna yebnënguiñe, <sup>25</sup> ni quebnatájaboto ndocná chabiana tondaye chaondétsama, er cha endmëna nda inétsama bënga vida chamotsebomnama y jtseshachnayama chamotsobemana, y cha nyëtsca soyënga šnetsatšatnaye.

<sup>26</sup> “Cha nýe canyë boyabásabentšana nyëts luarënguentša entšanga tojánabiana, nyëts quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entšanga chamuetsiyenama; <sup>27</sup> chca, Bëngbe Bëtsá chamonguanguama, masque chabiana ndoñe corente tmontsetatšëmbo, y chamuinýena y chábeñe chamotsošbuáchemá; pero ndegombre, Bëngbe Bëtsá bëngbentše cada cánýabentšana ndoñe bënoca quenatšmëna. <sup>28</sup> Ntšamo canyá tojanayancá: ‘Bënga Bëngbe Bëtsáftaca cánýiñe mo canýácá mondmëna; chábeyeca bënga vida mondbomna, jobónjuama mondbena y ainënga mondmëna ca’. Ntšamo tšëngaftanguentša báseftanga bëts soyëngama uabiamnyëngnacá tmojanayancá: ‘Bënga nyëtscanga Bëngbe Bëtsabe básanga mondmëna ca’. <sup>29</sup> Y chcasna, Bëngbe Bëtsabe pamillanga bënga tmonñese, ndoñe quešnátamna jtsejuabnyana Bëngbe Bëtsá yomna mo cach entšangbe castellano, midió o chë ndëtsbeca pormana soyëngcá ca, er chë soyëngna nýe ntšamo entšanga tmojajuabocá y tmojtsobencá japórmana. <sup>30</sup> Pero Bëngbe Bëtsá tojanjuabó ndoñe ntjatonýayana chë entšangbe tempsca ndosertánana, y morna, nyëtsca luarënguentša entšanga entsamënda, ndaye bacna soyënga tmojtsamama ngmënacá chamuenojuabó, chca amama chamotsajbaná y Bëngbe Bëtsabe benache chamuatishache ca. <sup>31</sup> Bëngbe Bëtsá canyë te tojuinýananá, y chë tena, ndocnábiyoe inyábiana más tšabá ntjatonýaycá, cha echanjayana entšanga tšabá o ndoñe tšabá tmonjamama; lempe chca cha echanjama canyá cachá tbojabocacá entšáftaca, Jesús; y chca yochtsemnamna, Bëngbe Bëtsá entšanga tojinýanyé, chë bocacaná Jesús cháuatayenama cachá tojánmayeca ca” —Pablo tojánayana.

<sup>32</sup> Chë obanënga mochtayenama ichámuana chë entšanga tmojanuena ora, báseftanga Pablo imojtsáboyeuana, y inyëngna mëntšá imoitsichamo: —Bënga fsëntseboše chë contsichamo soyënga más chcoye cachiñe jatuenama ca.

<sup>33</sup> As Pablo chëngbentšana tojésanbocna. <sup>34</sup> Pero báseftanga aiñe Jesucristbeñe imojtsošbuáchiye y Pablo tmojanasto más jatuenama; chënguentše imojamna Dionisio, canyá chë Areopagoca thiamanënguentšá; canyë shembásanaca, Dámaris ca uabaina, y inyënga.

## 18

### *Pablo Corinto puebloca*

<sup>1</sup> Chë soyënga tojanochnëngüentšana, Pablo Aténasentšana Corinto bëts puebloye tojána. <sup>2</sup> Chocna, canyë judío Ponto luaroca onýnanáftaca tbojáneninýena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nyëtsca judiënga Romocana chamuáisebocanama choca bëts mandado Claudio tojanmandá causa. Pablo tojána chata jautsëtsayama, <sup>3</sup> y ntšamo chata jamama Páblënacá jamama inatátšëmboyecna, chátaftaca yojtsoquedañe y cánýiñe chënga innatrabájaye; chënga innatátšëmbo mo tambotemëngcá entšëjuaca japórmana. <sup>4</sup> Y nyëtsca ochnayté, Pablo yojanamana chentša judío

entsangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtsentsëna judiënga y ndoñe judiënga chamotsošbuáchemá, ntšamo cha yojtsanëtsëtsnacá ndegombre bëtsemnana.

<sup>5</sup> Silas y Timoteo Macedoniocana choye tbojánashjango ora, Pablo nÿets tempo Bëngbe Bëtsabe soyëngama entsanga yojtsabuayiynaye y puerte tšabá chë judiënga yojaninÿaññá, Jesús ndegombre Bëngbe Bëtsabe Uámana Uabuayaná bëtsemnana. <sup>6</sup> Pero chë judiënga Páblëbe contra imojtsemna y tmojanontsé podesca chabiamá ichámuana. Asna, Pablo chabe uichëtjoniyangá yojtsenántšasjajaye, chënga jinÿañiyama chënga ndoñe tšabá tmojnánchjanguama, y tojanëyana: “Tšëngaftanga ndatsebácanënga chašmójobanëse, cach tšëngaftanga šmochtsótatsëmbñe; atšna ndoñe. Mëntescana chë ndoñe judiënga jábuayenama chantsoñe ca.”

<sup>7</sup> Chorna, chë judiëngbe enefjuana yebnentsana tojëftsanbocna y canÿe boyabása, Ticio Justo ca uabainábioye tojtsonañoñe. Cha Bëngbe Bëtsábioye ibojánadorana y chë enefjuana yebnentsa juachaca inoyena. <sup>8</sup> Y Crispo, canÿe chë enefjuana yebnentsa mandayá, Bëngbe Utabná Jesucristbeñe yojtsošbuáchiye y nÿetsca chabe pamíllagnaca; y banga chë Corintentsëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. <sup>9</sup> Canÿe íbeta, Bëngbe Bëtsá Páblëbioye mo canÿe otjenayoquécá tbojanianana: “Ndoñe matauatjana; nÿe cochtsana atšbe soyëngama oyebuambnaye y ndoñe iytëca cattsemana. <sup>10</sup> Er atše ácaftaca sëntsemna y ndocná quecmochátsbojajo ntšámnaca jáborlama; atše bëtsáca entsanga quem pueblentse sëndábamna ca.” <sup>11</sup> Chcasna, Pablo Corintentsë canÿe uata y chnënguana shinÿe tojanototóná, Bëngbe Bëtsabe palabra entsanga abuatambaye.

<sup>12</sup> Pero, Galión chë Acaya luarentsa mandado inamna ora, chë judiënga imojoyeunaye Páblëbe contra; cha tmojánishache y chë tribunaloye tmojánánatse. <sup>13</sup> Chocna, chë mandado tmojanianana: —Mua entsanga entsëtsëtsná y entsama chënga Bëngbe Bëtsá chamotsadorana, pero ndoñe ntšamo bëngbe leyënguiñe endayancá ca.

<sup>14</sup> Pablo jóyebuambayama uatajanóntša orna, Galión chë judiënga tojanëyana: —Quem entsá nderado inÿabioye matbëñjoba o ndayánaca chca matëñjobuachjanguá, as cocayé atše matijótëma tšëngaftanga judiënga yejuana joyaunayama; <sup>15</sup> pero ntšamo šmontsichamcá entsemna nÿe buatëmbana soyëngama, nÿe tšëngaftanga šmëbuatma entsangbiama y cach tšëngaftangbe leyëngama; chcasna, cach tšëngaftanga cmontsamna jenóyeunayana y jamana ntšamo chašmojenoyenacá. Atše quem base soyëngama ndoñe quetsátsboše ngoberna jtsemnana ca.

<sup>16</sup> As Galión tojanamëndá chë tribunal luarentšana chë judiënga jtëbuacnama. <sup>17</sup> Chorna, chë entsanga tmojánishache chë judiëngbe enefjuana yebnentsa mandayá, Sóstenes ca uabainá, y Galionbe delante imojtsejantšetaye. Pero Galión chë soye tondayana ibontsentsamna.

*Pablo Antioquiye tojtaná y chentsana cachiñe inÿe luarëngoye tojána, Bëngbe Bëtsabe trabajo jamama*

<sup>18</sup> Pablo cabá bayté Corintentsë tbojánatotona. Chentsana, Jesucristbeñe ošbuachiyëngbentsana tojesanodiošoftá y bejaycá Siria luaroye tojána, Priscila y Aquílaftaca. Cabá Sirioye nda ora, Cencrea puebloca nÿets stjénashe yojtsenátšbotje, Bëngbe Bëtsábioye jinÿinÿiyama canÿe soye tbojánšbuáchenama. <sup>19</sup> Efeso puebloye tmojánashjajna ora, Páblëna Priscila y Aquila tojesanabashejuana. Chentsana, cha tojána chë chentsa judiëngbe enefjuana yebnoye y chentse chë judiëngaftaca yojanoyebuambná y imojánenatsëtsnaye. <sup>20</sup> Báseftanga Pablo tmojanimpadá inÿe baseftayté chentse chauesomñama, pero chana ndoñe tonjanoyauná; <sup>21</sup> chentsana, chëngbentsana tojesanodiošoftá, mëntsá jëftsëyanëse: “Nderádose cachiñe chantésabo tšëngaftanga jabábuachama, Bëngbe Bëtsá Šojalesenciase ca.”

Chora, Pablo bejaycá Efesocana tojëftsanbocna. <sup>22</sup> Cesarea puebloye tojánashjango ora, tojána jacheuayama Jesucristbeñe ošbuáchiyënga Jerusalenoca; y chentsana Antioquiye tojána. <sup>23</sup> Chentse baseftayté yojëftsemna; y chentsana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

*Apolos, Efeso puebloca Bëngbe Bëtsabe soyëngama yojanabuayiyná*

<sup>24</sup> Cach tempo, Efesoye tojánashjango canÿe judío, Apolos ca uabainá, Alejandría bëts pueblocá; cha puerte obená inamna jonguamiyama y corente inatátšëmbo Bëngbe Bëtsabe uabemana palabrëngama. <sup>25</sup> Bëtsáca tojánatsjinÿe chë Bëngbe Utabná tojaninÿaññé benachama; añëmoca yojanoyebuambná y Jesusbe soyëngama botamana yojanabuatambá, masque cha nÿe ntšamo Juan entsanga tojánabuatambama y tojanëbáyama inatátšëmbo. <sup>26</sup> Ndauatjá Apolos tojanontsé jóyebuambayama chë judiëngbe enefjuana yebnentsë. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe inÿinÿyena benache bëtsemnana. <sup>27</sup> Apolos

Acaya luaroye jama yojtseboše orna, Jesucristbeñe ošbuáchiyënga bëtscá tmojanañemó y choca Jesucristbeñe ošbuáchiyëngbiama canýe tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanéjabuache. Bëngbe Bëtscá chëngbe tšabiama yojanjuabnáyeca, chënga Jesucristbeñe corente imojtsošbuáchiye. <sup>28</sup> Entšangbe delante chë judiëngaftaca jabuachana imojänenatsëtsnaye y nyëtscanga tojaninýanýé, ntšamo ndoñe tšabá inamncá chë judiënga imnatatšëmbuama; y Bëngbe Bëtscabe uabemana palabrëngaca chënga tojaninýanýé, Jesús Bëngbe Bëtscabe Uámana Uabuayaná bëtsemnma.

## 19

### *Pablo Efeso puebloca*

<sup>1</sup> Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentše básiesta ošbuáchiyënga tojánanýena, pero chëngna nyë ntšamo Juan chë Ubayaná tojanabuatambacá imnatatšëmbo. <sup>2</sup> Pablo chënga tojanatjá: —¿Uámana Espiritu chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiana ora ca?

Chora chënga tmojanjuá: —Ni mo queftsátstatšëmbo chë Uámana Espiritu yomnama ca.

<sup>3</sup> Y Pablo tojanéyana: —As, çntšamo šmojánenabaye ca?

Y chënga tmojanjuá: —Fšënjánenabaye ntšamo Juan entšanga yojanëbayancá ca.

<sup>4</sup> As Pablo tojanéyana: —Juan tojanëbaye chë bacna soyënga amama ngménaca tmojanenujabó, chca amana tmojanajbaná y chë Bëngbe Bëtscabe benache tmojánishachënga, y entšanga yojanëtsëtsná chë chábensana yochjanashjanguábeñe chamotsošbuaché ca; y cha Jesús endmëna ca —Pablo tojánayana.

<sup>5</sup> Chca tmojanuena ora, chënga tmojánenabaye Bëngbe Utabná Jesús jótšëmbonëse, chábeñe imojtsošbuáchema. <sup>6</sup> Pablo chëngbe bestšasiñe chabe cucuatšënga tojanjajó ora, Uámana Espiritu chëngbe ainaniñe tojánamashëngo jtsemándayama; tmojanontšë inýëtšá biyangana, chënga tempo ndmabiyañe, y Bëngbe Bëtscabe juabna imojtsoyebuambná. <sup>7</sup> Chentše imojtsemna bnëtsana uta entšanga.

<sup>8</sup> Unga shinyëntscuana Pablo yojánaye chë judiëngbe eñefjuana yebnoye y ndauatjá Jesucristbe soyëngama yojanoyebuambná; entšangaftaca imojänenatsëtsnaye y entšanga yojanëtsëtsná Bëngbe Bëtscabe amëndayama, chënga chábeñe chamotsošbuáchema. <sup>9</sup> Pero ba nduauenanënga ndoñe imontsošbuaché y Bëngbe Utabná tojaninýanýé Benachama entšangbeñe bacna soyënga imojtsichamo. Chcasna, Pablo chëngbentsana tojtsanujoánañe y nyë chë Jesucristbeñe ošbuáchiyënga tojanëbuaja canýe scueloye, canýe entšá Tirano ca uabainabe yebnoye. Chentše cada te chë ouenanëngaftaca yojanoyebuambná, <sup>10</sup> y chca yojánama uta uatëntscuana; y chca, nyëtscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca. <sup>11</sup> Y Bëngbe Bëtscá puerte bëtsc soyënga Pábloftaca yojtsama. <sup>12</sup> Tša bëtsc soyënga tojanma; chíyeca, nyëtscá chë Pablo tojuabojajo entšayá y pañuelëjuangá, entšanga imojanamana šoçüëngbiyoye juyambana, y chca tmojama orna, chë šocanënga juenatjëmbana y chë bacna bayëjënga entšangbentsana jésebocanana.

<sup>13</sup> Pero básiesta judiënga tsáshenañe bacna bayëjënga entšangbentsana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbiyoye mëntšá imojtsëtsëtsnaye: “Bëngbe Utabná Jesús, Pablo bondbetsebayaná jótšëmbonëse y chabe obenánaca cbontsamënda muabentsana chašmuaisebocnana ca.”

<sup>14</sup> Chca imojánama chë judío Esceva ca uabainabe canýsëfta uaquiñënga. Esceva inamna bachnangbe amëndayá. <sup>15</sup> Pero canýe, Escévëbe uaquiñënga chca tmojánayana orna, chë bacna bayëja mëntšá tojanéjua: “Atše Jesús sënduábuatma y sëndëtátšëmbo nda Pablo yomnana; pero tšëngaftanga, çndëmuanýënga šmomna ca?”

<sup>16</sup> As, cachora chë bacna bayëjbe juabna uambayá chëngbiyoye tojanontšënja y tša añemo bonná bëtsemnayeca chënga tojtsanayëñaná, jabuache jtsajantsetayëse; chë causa, chënga chë yebnentsana tmojtsanacheta enašënga y lisiánënga. <sup>17</sup> Nyëtscanga Efesoca oyenënga, judiënga y ndoñe judiënga, chca tmojánatšëmbona y corente imojtsanauatja. Y chca, Bëngbe Utabná Jesús entšanga más imojtsachtuanaye.

<sup>18</sup> Jesucristbeñe imojtsošbuachiyënguentsana, banga imojánashjuana y entšangbe delante imojtsecompšaye, tempo bacna soyënga tmojanmama; <sup>19</sup> banga, chë bocjuanana soyënga jamama imojanëntšëñënga, chëngbe bocjuanana librëšangá tmojaninyëbo y entšanga imojtsantješna ora, chëšangá imojtsajuiniýiye. Tmojanjuabó ntsachëtšá chë librëšangá bëtšamanama y tojanóbocna shachna bnëtsana uaranga crocënanana nyëtšá. <sup>20</sup> Y

chca, Bèngbe Utabnabe palabra más ba entšanga imojtsuenana y chiñe imojtsošbuáchiye y Bèngbe Bètsá chabe obenana entšangbeñe yojtsinýinýnaye.

<sup>21</sup> Chca tojanochnèngüentšana, Pablo tojanjuabó Macedonia y Acaya luarènguèjana jachnènguse, Jerusalenoye jésama. Y yojtsejuabnaye cha ibojtsemna Jerusalenentšana Romoye jama ca. <sup>22</sup> Asna, chabe uajabuachanènguentšana útata, Timoteo y Erasto, Macedonoye cha tojanichamó. Chèntscuana Pablo baseftayté más Asia luarentše tbojanjétana.

*Efesoca entšanga tmojánenbouenana*

<sup>23</sup> Chè tempo, Efesoca entšanga corente tmojánenbouenana, chè Bèngbe Utabná yojtsinýanýná Benache imojtsisháchichanèngbe causa. <sup>24</sup> Chè entšanga chca tmojanma, er canýe entšá mídioca soyènga pormayá, Demetrio ca uabainá, chènga tojanayèñaná chca jamama. Cha yojanamana binche soyetémènga japórmana y chètémènga yojáninýna mo chè Efeso pueblongbe diosá Artemisa jadórmana bèts yebncá. Demétrioftaca imojantrabájangna bètsca crocénana imojanójacañe chè soyetémènga eniñe. <sup>25</sup> Demetrio tojanèbuaja cháftaca imojantrabájanga y ínýenga cach mídioca soyènga pormayènga, y mèntšá tojanéyana: “Baconga, tsèngaftanga šmondétatsèmo, bènga bètsca crocénana jtsebomnanna quem trabajuentšana chca jopódiana. <sup>26</sup> Pero tsèngaftanga šmontsonýá y šmotsuenana ntšamo chè Pablo ca uabainá yojtsichamcá. Cha entsichamo, chè entšangbe pormana soyènga ndoñe yontsemna jtsadoránana ca; y chca ba entšanga tojabuayená y chènga aiñe montseyeunana. Chè soyna ndoñe nýe muentše Efesentše chca quenátapasana; nýets Asia luarífnaca chca entsopasana. <sup>27</sup> Resjo entsemna; chca causa, entšanga bèngbe trabajuama ndoñe tsábá quemochátichamo y chè uámana Artemisa jadórmana bèts yebnama mochántichamo uámana yebna ndoñe yondmèna ca. Y chca, Artemisbe obenana entšanga mochantsábotena y Artemisa ndoñe bañe quemochátatuatma, nda Asientše y nýets luarífnaca monadorana ca.”

<sup>28</sup> Chca tmojanuena ora, chca pormayènga puerte tojánétèna y tmojanáyebuachena: “¡Efesoquèngbe Artemisa corente bètsá endmèna ca!”

<sup>29</sup> Y chca, nýetsca chè pueblentša entšanga tmojánenbouenana. Tmojanotabá Gayo y Aristarquèbioye, Macedonioca boyabásata, Pablèbe tjèmbambayata; y sjojónana tmojanènatše chèngbe enefjuana yebnóntsoñe. <sup>30</sup> Pablo tojánbošena choye jamashènguama chè entšangftaca jóyebuambayama, pero Jesucristbeñe ošbuáchiyènga ndoñe tmonjanlesenciá. <sup>31</sup> Chè Asioca mándayèngbentše báseftanga imnamna Pablèbe amiguènga, y chènga Pablèbioye palabra tmojanafja chè jénefnama yebnoye ndoñe chaondámashènguama.

<sup>32</sup> Chèntscuana, entšanga imojtsejotonocna, ínýenga imojtsechembumbuana canýe soye y ínýengna ínýe soye, chènga corente imojtsenbouenana causa, y banga chentše imojtsemnènga ndoñe imontsetátsèmo ndayama choye tmojanobéconama. <sup>33</sup> Pero básefta judiènga, canýe entšá, Alejandro ca uabainá, chè entšangbe natsanoye tmojanajuatsèntše, y báseftanga cha tmojanbuayená ntšamo yojtsopasánama. Asna, Alejandro tojánèfatšèmo cucuátseca iytèca chamobiamama, er cha yojtseboše entšangbe delante chè judiènga jobuauyanama. <sup>34</sup> Pero, Alejandro judío bemnama chè entšanga tmojánatšèmbona ora, nýetscanga tmojanáyebuachena uta horèntscuana, mèntšá: “¡Efesoquèngbe Artemisa corente bètsá endmèna ca!”

<sup>35</sup> Chè pueblentša mándayèngbe uajabuachaná, entšanga iytèca jábiamama tojanobená ora, tojanéyana: “Efesoquènga, nýets luariñe endótatsèmo, quem pueblentše oyenènga iuamna jtsinýenana chè Artemisa jadórmana bèts yebna y chè cha jadórmana celocana otatsšena ndètsbé. <sup>36</sup> Ndocná quenátobena chama jayanama ndoñe ndegombre yondmèna ca. Chcasna, natjèmbana motsomñènga y tondaye matamèngana corente tsábá ntjshajuabocá. <sup>37</sup> Tsèngaftanga quem boyabásenga moye šmojunatše, masque Artemisbe yebnentše tondaye tmonjathèba y bèngbe Artemisbiana ndoñe podesca tmonjoyebuambá. <sup>38</sup> Demetrio y cháftaca šmotrabájanga, nderado ndabiana ndaye demanda šmojtsebomnèšna, cabildoca endatèfjna y chentše mándayènga montsemna chè mandènga jouenama, y chèngbentše cada ona šmochjèftsendemánda. <sup>39</sup> Y tsèngaftanga ínýe soye šmojtseguasna, cmontsamna ntšamo bèngbe leyènguñe yomandancá, nýetsca quem pueblentše oyenèngftaca jenóyeunayana. <sup>40</sup> Ndayá mènté tojopasá causa, resjo entsemna bèngbiana chamuayana, ntšamo leyènguñe yomncá bènga ndoñe montsama ca; y bènga ndoñe quemuátobena ndayá jojuana, ndáyeuca quem enbouenanana tojopasá ca šojátjayèse ca” —cha tojanéyana. <sup>41</sup> Y chca jayanèse, chè entšanga tojanichamó.

## 20

*Pablo, Macedonia y Grecia luaroye tojána*

<sup>1</sup> Chè enbouenanana tojanochnèngo ora, Pablo chè Jesucristbeñe ošbuachiyèngbioye tojanèbuaja jábuayenama, añemo chamotsatsbomnana; tojesanodiošoftá y Macedonoye

tojéftsanbocna. <sup>2</sup> Chê luarënguëjana cha tojánachnëngo Jesucristbeñe oşbuachiyënga becá añemo atátsatnaye, ba chabe palabrëngaca; chentšana, Grecia luaroye tojánashjango, <sup>3</sup> y chentşe unga ishinÿe tojanoquedá. Barquëshañe Sirioye játama Pablo yojtseprontana orna, tojántátsëmbona chë judiënga cha jtsóbama tmojanenöyëumama. Asna, tojanenöjubó jesshëconama, cach Macedonia luarëjana jésachnënguse. <sup>4</sup> Pablo quem boyabásenga tmojantjëmabá: Sópater, chë Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófirmnaca, Asia luarocata. <sup>5</sup> Chënga tmonjanonatsé y şonjanëbatma Troasoca. <sup>6</sup> Chë levadúraca ndëpormana tandëşe saye fles-tentšana, Filíposentsana barquëshañe fsënjëftsanbocna y shachna tianoye, Troasoca chë tmonjanonatsenga fsëntanishëche, y chentşe canÿe semana fsënjanoquedanga.

#### *Ntsamo tojanopasá Troas puebloca*

<sup>7</sup> Chë inÿe semana jobojátama te, fsënjánenefjna Jesucristbeñe oşbuachiyëngcá tandëşe jajatayama, cánÿiñe jasama; y Pablo entsànga enjëtsëtsësnaye. Cha bonjamna yëfsana chentšana jëftsebocnana; chë causa, más bën chëngaftaca tonjanoyebuambá, tsëntsetëntscuana. <sup>8</sup> Fsënjamma canÿe tsoye tsbanana tsañoca y chentşe ba uajuinÿanëshangá enjanamna; <sup>9</sup> y canÿe bobontse, Eutico ca uabainá, ventanentşe enjántbemana. Pablo bën enjanoyebuambná causa, chë bobontse ocnyana tbojanábuache. Cabana, corente tojtsanomaná ora, chë unga tsañocana tontsanótsatşe y obaná chora tmontanatsbaná. <sup>10</sup> As, Pablo tonjánastjango, chë bobóntsbiöye tbonjanotsbuajó y tbonjanotsejcuá. Y chë entsànga tonjanëyana: “Ndoñe nÿetsá matauatjëngana; ainá cha entsatsmëna ca.”

<sup>11</sup> Chentšana Pablo cach tsbanánoye tonjesaná y tandëşe tonjanjatá, jtenójuaboyama ndayá Jesús jóbaneşe tojanmama. Chora Pablo chë entsàngaftaca tonjanse y tontëtanontsé oyeubambnayana, jabinÿnëntscuana. Chora Pablo chentšana tontsanofñe. <sup>12</sup> Y chë otsatsëna bobontsna ainá imojtsatánatşeñe, y chama chë entsànga corente oyejuayënga imojtsemna.

#### *Pablo Troasentsana Mileto pueblöye tojána*

<sup>13</sup> Bëngna fsënjanonatsé y barquëshañe fsënjána Aso pueblóntsoñe, chentšana Pablo jtesbetsama, ntsamo fsënjanenoyeunacá, er Pablo tonjánboşena fshantscá choye jana. <sup>14</sup> Asoca Pábloftaca fsëntaneninÿena ora, bëngaftaca barquëshañe cha tonjána Mitilene pueblöye. <sup>15</sup> Chentšana fsënjëftsanbocna y yëfsana Quío luarëjana fsënjánachnëngo, y chë inÿe yëfsana Samos luaroye fsënjánashjajna. Chentšana fsënjána y yëfsana Mileto pueblöye fsënjánashjajna. <sup>16</sup> Chca tonjanochnëngo er Pablo ndoñe chenátanboşena Efesoye jama, Asia luariñe ndoñe yapa ndétsëmnama. Chca tojánboşena er cha enjëtsëboşe betscó Jerusalenoca jtsatsmënama, tojopodesna chë judiëngbe fiesta, Pentecostés ca uabaina fiestama.

#### *Ntsamo Pablo chë Efesoca oşbuachiyëngbeñe bëtsëjemëngcá mándayënga tojanëyana*

<sup>17</sup> Miletocana Pablo tonjanmandá chë Efesoca oşbuachiyëngbeñe bëtsëjemëngcá mándayënga jobiatsana. <sup>18</sup> Chënga tmonjánashjajna ora, Pablo tonjanëyana: “Tsëngaftanga şmondëtatşëmbo ntsamo atşe quem Asia luaroye sënjabánashjango orscana tsëngaftangbeñe snetsamana. <sup>19</sup> Nÿets tempo Bëngbe Utabná sëndëservena y cach atşe uamaná ndoñe quetsatenobiamná. Corente shëchbuiye tijëftsoferdé y ba soyënguine tijasufri, chë judiënga atşe jóbama mondboşe causa. <sup>20</sup> Y lempe ntsamo tsëngaftangbe tsabiama yomncá tbonjabuayená; tondaye ntjatsbuetamencá. Nÿetscangbe delante sënjabuatambá y tsëngaftangbe yebnënguenáchnaca. <sup>21</sup> Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngmënacá chamuënojuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsoşbuáchemá. <sup>22</sup> Y mora Jerusalenoye chanjá; Uámana Espiritu chca şontsemánda y ndayá choca chjapásamna ndoñe quetsátstatsëmbo. <sup>23</sup> Nÿe mëntsá aife sëndëtatşëmbo: Nÿetsca bëts pueblënguenache ndayëjana atşe chandbëtsana, Uámana Espiritu şondbëtsëbuayinaye entsànga caşmochjutame y puerte chaisufriama camochjama ca. <sup>24</sup> Atşbe vida cach atşbiama ndoñe yapa quenatámana, chaitsaina o chayóbana. Pero atşbiama iuámanana endmëna ndayá atşe jobenayana atşbe trabajo jëftsepochócana, ndayá Bëngbe Utabná Jesús şoanjanmandá jamama, chë tşabe noticiënga Bëngbe Bëtsá entsàngaftaca tşabia yomnama jábuayenama.

<sup>25</sup> “Y mora atşe ndegombre sëntsetatşëmbo, tsëngaftangbentsana, chë ndëmuanÿëngbentşe Bëngbe Bëtsabe amëndayama sënjabuayená, ndocná atşe más queşmochátinÿe. <sup>26</sup> Chiyeca, atşe ndegombre mënté cbetsëyana: Atşe tondaye quetsátstatsëmbo nderado nda ndatsbocaná chaojóbanabiamá, <sup>27</sup> er atşe ntsamo Bëngbe Bëtsá jamama yojuabnacá lempe tcbonjabuayená, tondaye ntsebuetamencá. <sup>28</sup> Chcasna, cach tsëngaftangbiama şmochtsantjeşna y nÿetscanga muentşe Jesucristbeñe oşbuachiyëngbiámnaca. Chëngbeñe mo chëngbe abuajëñyëngcá Uámana Espiritu tmonjayayé, Bëngbe Bëtsabe entsànga chaşmotsanÿenama, chënga Bëngbe Bëtsá chábenga tojábiamá, chabe Uaquiñabe buiñe juabuáshanëşe y jóbaneşe,

mo bëtská cuafjopagacá. <sup>29</sup> Atše sëntsetatšëmbo, atše chaitsoñe orna, banga mochanjabo y chënga mochântsemna mo corente tšátjaye tjañe quešëngcá, Jesucristbeñe ošbuáchiyënga chábeñe ošbuáchiyana chamotsajbanama chënga jamama. <sup>30</sup> Y tšëngaftangbentsánëñenaca báseftanga mochanjabocana y entsángbiyoye uayátsenaye soyënga mochanjabuatambá, chca, báseftanga Jesucristbeñe ošbuáchiyënga chë ínÿengbentsána chamotsoluarema y nÿe chë abuátambayëngbiyoye chamotsësetonama. <sup>31</sup> Chcasna, sempre šmochtsantsëña; ndoñe chacmondëbnëtjomba, atše unga uatëntscuana, bnëté y íbeta, tšëngaftanga cada ona cbondëtsabuayiyana y chama atše puerte tijasufri.

<sup>32</sup> “Y morna, Jesucristbeyeca catšátanga, Bëngbe Bëtsabe cucuatšifne cbëtsabashejuana y ntšamo tšëngaftangbiana chabe tšabe juabna yomnama palabréngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchema, y endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entsángbiyoye, ndëmuanyënga cha tojáchembo chabe entsanga chamotsemnana. <sup>33</sup> Atše ndocnabe crocëñana, o castellano o entsáyá atšbiana quetsatántšaboše; <sup>34</sup> más ínÿetsá, y tšëngaftanga lempe šmondëtatšëmbo, atše cach atšbe cucuatšëca tijëfsetrabajama, atšbiana y átšëftaca imojamnéngbiana opresido enjamna soyënga janguanguama. <sup>35</sup> Atše nÿets tempo sëndinÿanÿná entsá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabréngama sempre jtsejuabnyëse: ‘Canÿe entsá más oyejuayá jtsemnana ndayánaca ínÿabiyoye tbojtšatšëtná ora, y ínÿabiyoye tbojtseyëngacá ora ndoñe nÿa nÿetsá ca’ —Pablo tonjanoyebuambá.

<sup>36</sup> Pablo chë soyënga tonjánayanentšana, tonjanoshamentšé y nÿetscanga chentše monjëtsemnéngaftaca Bëngbe Bëtsá tmonjanótsëmbona. <sup>37</sup> Nÿetscanga tmonjánenobošachna y Pablo tmontanotsejjuá y tmontanámochi. <sup>38</sup> Y entsanga corente ngmëñaca monjëtsemna, chënga ndocna te más cha mochántinÿe ca Pablo tojanëyana causa. Chentšana, chënga chë barquësha enjtsamnëntscöñe cha tmonjantjëmbambá.

## 21

### *Pablo Jerusalemoye tojána*

<sup>1</sup> Chë Jesucristbeñe ošbuáchiyënga fsënjëftsanashejuana ora, barquëshañe fsëñjanenoyé y ndericho Cos luaroye fsëñjana; chë yëfsana Rodasoye y chentšana Pátara puebloye. <sup>2</sup> Pátara pueblentse canÿe barquësha fsëñjáninÿena, Fenicioye enjtsaye; asna, chëshañe fsëñjanenoyé y chentšana fsënjëftsanbocna. <sup>3</sup> Fsëñtsanachnëjuana ora, fsëñjáninÿe Chipre luare; Chipre bëngbe uañicuayoica tonjanoquedá y bëngna Sirioye fsëñjëtšaye. Tiro pueblentse chë barquëshëntša uasmanëshangá jëftsáboshjonama yojámnyeca, chë puebloye bënga fsënjëftsanamashjna. <sup>4</sup> Chentšna, Jesucristbeñe ošbuáchiyënga fsëñjánanÿena y canÿsëfta te chëngaftaca fsëñjanoquedá. Chënga Pablo tmonjanianÿana cha ndoñe ibonjamna Jerusalemoye jtsayana ca, er chë Uámana Espiritu tojanabuayená ndayá choca cháftaca jopásama. <sup>5</sup> Chë canÿsëfta te tonjanochnëngo ora, chentšana fsënjëftsanbocna y nÿetscanga parejo chëngbe shëmangaftaca y básengaftaca šonjanatjëmbambá chë pueblo chabóntscöñe; y chentše, chë chëñyañe fsëñjanoshamentšé y Bëngbe Bëtsá fsëñjanimpadá. <sup>6</sup> Chentšana, fsëñjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnéngoye tmontaná.

<sup>7</sup> Tirentšana fsënjëftsanbocna y Tolemaida puebloye fsëñjánashjajna; y chentše tonjanopochocá bëngbiana bejaycá chë te ayana. Tolemaidentše Jesucristbeñe ošbuáchiyënga fsëñjanacheuá y chëngaftaca canÿe te fsëñjanoquedanga. <sup>8</sup> Yëfsana, bënga chentšana fsënjëftsanbocna y Cesarea luaroye fsëñjánashjajna. Chocna, bënga fsëñjana Felipe chë Jesucristbiana tšabe noticiënga abuayiyayabe yebnoye y cháftaca fsëñjanoquedanga. Felipe enjamna canÿa chë Jesucristbe ìchmónëngbiyoye ujabuachanënguentšá, Jerusalemoca ubuáyanënga. <sup>9</sup> Felipe enjánabamna canta ndëbouamna bembalianga y chënga monjamna Bëngbe Bëtsabe juabna oyebuambnyënga. <sup>10</sup> Ya bayté chentše fsënjëtsemna orna, Judeocana tonjánashjango canÿa Bëngbe Bëtsabe juabna oyebuambnyáy, Agabo ca uabainá. <sup>11</sup> Agabo bëngbiyoye tonjánashjango ora, Pablëbe uasnanëja tonjanca y cucuatšënga y sheuatšënga cachá tonjanenabatsëca y mëntšá tonjánayana: “Uámana Espiritu entsichamo, Jerusalemoca quem uasnanëja nduifbiyoye chë judiënga mëntšá camochjama y ndoñe judiëngbe cucuatšifne camochjáboshjona ca.”

<sup>12</sup> Chca fsëñjanuena ora, bënga y chentša entsanga Pablo fsëñjanimpadá Jerusalemoye ndoñe chaondëtsama. <sup>13</sup> Chora Pablo tonjánayana: —¿Ndáyeca šmojtšošaché y šmojtsama atšbe ainaniñe puerte ngmëñana chaotsemnana ca? Atše sëntseprontana y ndoñe nÿe chašmobatsëcama; Jerusalemoca jobanámna sëntseprontana, Bëngbe Utabná Jesusbiana ca —cha tonjánayana.



<sup>14</sup> Jáyēnjanama ndoñe chibiatanobená ora, ndoñe más chibiatanimpadá; n̄ye mēntśá fsēnjaníyana: —Ntśamo Bēngbe Utabná yojtseboścá chaotsemna ca.

<sup>15</sup> Chē soyēnga tonjanochnēngüentsana, fsēnjanoprontá y Jerusalenoye fsēnjána. <sup>16</sup> Cesareoca, bāsefta Jesucristbeñe ośbuáchiyēnga choye ōnjanatjēmbambá y chočna, chēnga ōnjanēnatse can̄ye Chipre luaroca entsábe yebnoye, Mnasón ca uabainá, ndábentśe bēnga joquédama. Mnasón tempscana inamna Jesucristbeñe ośbuachiyá.

*Pablo tojána Santiago jauatsētsayama*

<sup>17</sup> Jerusalenoye fsēnjánashajina orna, chentśa Jesucristbeñe ośbuáchiyēnga oyejuayēnga ōnjanēbuaja. <sup>18</sup> Yēfsana, Pablo bēngaftaca tonjána Santiago jábuachama, y chentśe, n̄yetsca chē ośbuachiyēngbeñe bētsējemēngcá mandayēngnaca monjētsemna. <sup>19</sup> Pablo tonjanacheuá y chentśana tonjanacuntá lempe ntśamo Bēngbe Bētsá Páblēbe trabájoca chē ndoñe judiēngbeñe tojanmama.

<sup>20</sup> Chca tmonjanuena ora, Bēngbe Bētsá tmontanchuá y Pablo mēntśá tmonjaníyana: “Morna, Jesucristbeyeca bēngbe catśata, contsonyá ntśamo ba uaranga judiēnga Jesucristbeñe imojtsośbuáchemá, y chēnga n̄yetscanga montsan̄tjeśna n̄yetsca Jesucristbeñe ośbuáchiyēnga chē Moisesbe leyentśa n̄yetsca mandēnga chamotsocumplínama. <sup>21</sup> Y entśanga chēngbioye noticia tmojatśatá, aca chē in̄ye luarēnguenache imoyena judiēnga cojtsabuatambá, Moisés tojanmandá soyēnga ndoñe ntseyeunanama y basetēmēnga base bobachtēma chē más delicadentśe ndoñe ntjatētśama, ntśamo bēnga judiēnga fsēnduamancá, y ntśamo bēnga fsēndētātśēmbcá ndoñe chamondētśamana ca. <sup>22</sup> Y morna, ¿ntśamo chē soyēngama cochtsemana? Ndegombre, chēnga mochanjātātśēmbona aca moye tcojabama. <sup>23</sup> Chcasna, ntśamo cbochanjabuayenacá cochjama: Bēngbentśe canta boyabásēnga montsemna y chēnga entsamna Bēngbe Bētsabiama can̄ye ōbuachenana soye jamama. <sup>24</sup> Acaftaca cochjunatse, chēngaftaca cochtsemna y chēngcá cochtsama Bēngbe Bētsabe delante tśábēnga jtsatsmēnama ntśamo chamojtsama ora, y ntsachētśá jētśájuaama chaojtsamncá, aca cochjētśájua, as chēnga chamobená n̄yets stjēnashe jtsenátśbotjiamá, jin̄yan̄íyama, ntśamo Bēngbe Bētsábioye tmojaśbuachenacá ya tmojamama. Y chca, n̄yetsca judiēnga mochanjin̄ye ndoñe ndegombre yontsemna chē ntśamo chēngbioye acbiama tmojacuntacá; masna, chēnga mochanjātātśēmbona aca ndegombre ntśamo Moisesbe leyíñe yomandancá icuamama. <sup>25</sup> Y chē ndoñe judiēnga Jesucristbeñe imojtsośbuachengbiāmna, bēnga ya fsēnjubúabiama y fsēnjáuyana ndayá jtsocumplínama chēnga yojtsamnama, mēntśá: ‘Ndoñe chamondētśesá mēntśēna, chē entsānga tmojtsejubná diosēnga imomna soyēnga jadórama tmojiyēbana; ni buiñe, ni tsešana bayēngbe mēntśēna; y ndoñe chamondētśama bacna soyēnga shembásēnga y boyabásēngaftaca ca’ ” —chēnga tmojánayana.

*Bēngbe Bētsabe bēts yebnentśe judiēnga Pablo tmojánishache*

<sup>26</sup> As Pablo, yēfsana chē cántanga tonjanēnatse y chēngaftaca tonjanma soyēnga Bēngbe Bētsabe delante tśábēnga jtsatsmēnama. Chentśana, Pablo Bēngbe Bētsabe bēts yebnoye tonjánamashēngo chē bachnānga júnayama, ndaytēntścoñe yojamna chē cantangbiama soyēnga jtsamama, Bēngbe Bētsabe delante tśábēnga jtsatsmēnama, y jayanama ndaytē chēngbiama yojtsemna ndaye ora cada ona ibojtsemna ndayánaca Bēngbe Bētsabe bēts yebnoye juambana, Bēngbe Bētsabiama juatśēmbonama.

<sup>27</sup> Chēnga tmojanenoyeuná y tmojánayana can̄yśēfta tentsuana chca jamana ca. Chē can̄yśēfta te ya jochnēnguama yojtsemna orna, bāsefta judiēnga Aſioquēnga Pablo tmojánin̄yē Bēngbe Bētsabe bēts yebnoca y tmojanma entśanga chamuenbouēnanama. Y cha tmojánishache, <sup>28</sup> mēntśá jtsayebuáchēse: “¡Israeloca entśanga, śmabētśējabuache ca! Quem boyabása entsemna chē n̄yets luarēnguenache iuana abuátambaye soyēnga bēngbe entśangbe contra, y ntśamo bēngbe leyēnguiñe endayanama contra, y quem Bēngbe Bētsabe bēts yebnama ndoñe tśabá yontsoyebuambná. Y cabana quem Bēngbe Bētsabe bēts yebnoye grieguēnga tojúmashēngo, y chca cha tonjama chē Bēngbe Bētsabe bēts yebna Bēngbe Bētsabe bomin̄yíñe ndoñe tśabá chaondētsemnama ca” —chēnga imojtsichamo.

<sup>29</sup> Chca imojtsichamo, er entśanga Pablo tmojánin̄yē chē bēts pueblentśe Trófiomo Efeſocáftaca; y imojtsejubnaye chábíoye Bēngbe Bētsabe bēts yebnoye Pablo tojanánatse ca.

<sup>30</sup> N̄yetsca chē pueblentśa entśanga tmojánēnbouenana, y ochamanana chē Pablo yojtsemnoye tmojánashajina. Pablo tmojánishache y Bēngbe Bētsabe bēts yebnentśana shjoye tmojtsansojó, y cachora chentśa bēšaśangá tmojanatame. <sup>31</sup> Jtsóbama ya imojtsebuachēta ora, chē Romoca soldadēngbe mandayá tojántātśēmbona n̄yetsca chē bēts pueblentśa entśanga imojtsenbouenana. <sup>32</sup> Asna, chē mandayá chabe soldadēnga y in̄ye chentśa amēndayēnga tojánachembo y can̄yíñe chē entśanga imojtsemnoye tmojētsanótjajo. Entśanga, chē mandayá y chē soldadēngbioye tmojánán̄yē ora, tmojtsanajbaná Pablo jantśetayana.

<sup>33</sup> Chorna, chë soldadëngbe amëndayá tojanobeconá, Páblëbioye tbojánishache y tojanmandá uta cadenëjuaca cha chamotsebátsécama y tojanatjá: “¿Nda mua yomna y ndayá tojama ca?” <sup>34</sup> Pero chë entsángbeñe, ínÿenga canÿe soye imojtsáyebuache y ínÿengna ínÿe soye; y chca, ntšamo ndegombre tojanopasama jtsetatšëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama. <sup>35</sup> Chë soldadëngbe oyenoca grádasbengoye tmojánashajna ora, chë soldadëngbe tojanotocá Pablo cutsnana juambama, chë entsánga tša rábiaca imojtsemna causa, <sup>36</sup> er chënga ústonoye imojtsaye y “¡Chaóbana ca!” imojtsaiuáyebuache.

*Ntšamo Pablo entsánga delantë tojanenëuyaná*

<sup>37</sup> Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tašcatjaleséncia ratotema ácaftaca jóyebuambayama ca?

Y chë mandayá tbojanjúá: —¡Aca icobena griego biyañe jóyebuambayama! <sup>38</sup> As, ¿aca ndoñe condmëna chë Egiptocá, chë ndoñe bayté quenátsmëna entsánga yojanëtsétsná chë mándayëngbe contra chamotsemnana y chë canta uaranga podesca uamana entsánga puñálaca uajatëngaftaca, entsánga ndoyena luaroye tojanbocná ca?

<sup>39</sup> Chora Pablo tbojanjúá: —Atšë judío sëndmëna, Tarso pueblota onÿnana, canÿe uamana pueblentšë Cilicia luaroca; Diosmanda šmoleseñciá entsánga jáuyanama ca.

<sup>40</sup> As, chë soldadëngbe amëndayá chca tbojanlesenciá. Páblëna chë gradabenguiñe tojantsá y cucuatšë tojanatsbaná entsánga iytëca chamobiamama. Nÿetscanga iytëca imojtsemna orna, Pablo hebreo biyañe mentsá entsánga tojanëyana:

## 22

<sup>1</sup> “Baconga y taitanga, mora šmochjouena atšë jenëuyanama ntšamo chjayancá ca.”

<sup>2</sup> Pablo cachëngbe biyañe, hebreo biyañe yojsóyebuambnana entsánga tmojanuena ora, más iytëca tmojanobiamama. As Pablo tojanëyana: <sup>3</sup> “Atšë judío sëndmëna. Tarso pueblentšë, Cilicia luaroca sënjanonÿná, pero muentšë Jerusalemëntšë sënjanoboché y sëndëtatšëmo soyëngna Gamaliëlbeyeca chca botamana sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nÿets atšë ainánaca Bëngbe Bëtsá sëndëserveda, ntšamo nÿetsca tšëngaftanga mora šmotsamancá. <sup>4</sup> Atšë sënjanama chë Jesucristo tojaninÿé Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame. <sup>5</sup> Chë judío bachnangbe más uamana amëndayá, nÿetsca chë judiëngbeñe bëtsëjemëngcá mándayënga y ínÿe muentšá mándayënga mondobena jayanana ntšamo sentsichamcá ndegombre yomnama. Chënga uabemana tšuanachangá smonjaninÿe, bëngbe catšátanga judiënga chamotsetatšëmbuama atšë mando stsanbomnana, Jesucristbeñe ošbuáchiyënga jótabayama; y Damascoye sënjana choça Jesucristbeñe ošbuáchiyënga jótabayama, moye Jerusalemoye junatsama jacistigayama.”

*Pablo tojanacuntá ntšamo Jesucristbeñe ošbuachiyá tojanóbema*  
(Hch 9.1-19; 26.12-18)

<sup>6</sup> “Pero canÿe te benachiñe Damasco béconana sënjëtsaye orna, mo nÿetsto ora, nÿe ndeolpe atšë juachañe canÿe bëts tcuinÿe celocana tonjanbuashinÿinÿena. <sup>7</sup> Y fshantsoye sënjëtseshajaye y canÿe oyebuambnayana sënjanuena mentsá: ‘Saulo, Saulo, ¿ndáyeca šcojtsacmena ca?’ <sup>8</sup> Atšë sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjúá: ‘Atšë sëndmëna Jesús Nazaretocá, y aca condama atšë entsánga chamotseufirinama ca.’ <sup>9</sup> Chë átšëftaca monjáninÿënga chë bëts tcuinÿe tmojáninÿe y tmojanouatjananga, pero chë oyebuambnayana ndoñe tmojanuena. <sup>10</sup> Chora atšë sënjantjá: ‘¿Bëngbe Utabná, ndayá jamama šojtsemna ca?’ Y cha šonjaninÿe: ‘Matëtsbaná y mëtëtontšë Damascoye jama. Chentšë canÿa cmochanjabuayená ndayá jamama cmojtsemnana ca.’ <sup>11</sup> Chë tcuinÿe yapa tonjanbuashinÿinÿena causa, atšë jtaná sënjanoquedá. Chcasna, chë ínÿenga šmontanobuacuetëntšë y chca, Damascoye sënjanashjango.

<sup>12</sup> “Chentšë enjamna canÿe bacó Ananías ca uabainá; cha inoyena ntšamo Bëngbe Bëtsá yobošcá y yojánama ntšamo bëngbe leyënguiñe iuayancá, y nÿetsca chentšá judiënga monjanamana chabiamama tšabá jtsóyebuambnayana. <sup>13</sup> Cha tonjánabo atšë jinÿama y tonjánashjango ora, šonjaninÿe: ‘Jesucristbeyeca atšë catšata, Saulo, chacmotsatabinÿna ca.’ Cachora y cha sënjaninÿe.

<sup>14</sup> “Chentšana cha tonjánayana: ‘Bëngbe bëts taitangbe Bëtsá aca tcmojuábuayana, ntšamo cha acbiamama yobošcá chacotsetatšëmbuama, chë nÿetsca soyënguiñe Tšabá Amá chacuinÿama y cachabe uayásentšana chacóyeunama. <sup>15</sup> Bëngbe Bëtsá chca tojama, aca chë chabe buayenana soyëngama entsángbeñe chacóyeuambama, y chamna nÿets luarëntšá entsángbeñe cochjacuënta, ntšamo tcojinÿe y tcojouencá. <sup>16</sup> Y mora, jndoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnana ca’ ” —cha šonjaninÿe.

*Pablo tojanacuntá ntšamo chë ndoñe judiëngbiyoe tmojánichmoma*

<sup>17</sup> “Jerusalenoye sëntaná ora, Bëngbe Bëtsabe bëts yebnoye sënjána cháftaca jencuéntama, y ndeolpe atše mo otjenayoquécá sënjanoquedá. <sup>18</sup> Chca orna, Bëngbe Utabná sënjániniye y cha mëntšá šonjanianyana: ‘Betsco motsa y cam ora Jerusalenentšana mëtešocna; quemuentša entšanga ndoñe quecmochatóyeunaye ntšamo atšbiana condétatšëmbo y consëtsëtsnacá ca.’ <sup>19</sup> Atše sënjanjuá: ‘Bëngbe Utabná, chënga mondétatšëmbo atše sënjánana nyëtsca chëngbe enefjuana yebnënguenache y chë ácebeñe ošbuáchiyënga sënjanëtámiana y sënjánatsetšenaye; <sup>20</sup> y acbiama ndegombre oyebuambnayá Esteban tmonjanóba ora, átšnaca chentše sënjamna y tšabá imojtsama ca chama sënjëtsejubnaye, y cabá chë monjanóbanangbe entšayëjuangá atše chora sënjanabojanýa ca’ —atše sënjanjuá. <sup>21</sup> Pero chca sënjánayana ora, Bëngbe Utabná šonjanianyana: ‘Motsa; atše bën luarëngoye, ndoñe judiëngbiyoe cbochanjíchmuca ca.’ ”

*Pablo y chë soldadëngbe amëndayá*

<sup>22</sup> Chë entšanga chëntscoñe tmojanuena; pero chë ndoñe judiëngbiana tojanoyebuambá orna, chënga tmojanontšë uayebuáchana: “¡Ndoñe tšabá quenátsmëna cha vídaca chaotsemnama! ¡Motsóba ca!” <sup>23</sup> Y chënga más imojtsáyebuache; puerte rábiaca chëngbe uichëtjonëjuangá tsbanánoye imojtsëbëntaye y tsbanánoye polvëshe imojtsëtsana; <sup>24</sup> chë causa, chë mandayá tojánayana chë soldadëngbe oyenoye Pablo chamotsemáshëngo ca, y tojanmandá chamotsetjanja chaobuambana ndáyeca entšanga chca chabe contra imojtsáyebuache. <sup>25</sup> Pero jtsetjanjama ya tmojanbatsëca orna, chentše imojtsemna soldadëngbe amëndayábiyoe Pablo tbojantjá: —¿Tšëngaftanga šmobena canýe entšá derecho bomná mo canýa Romoca onýnanacá jatjanjana, ndegombre tšabá o ndoñe tšabá tonjamama cabá ndayana ora ca?

<sup>26</sup> Chë básefta soldadëngbe mandayá chë soye tojanuena ora, tojána y nyëtsca soldadëngbe amëndayábiyoe chama ibojuenaye, mëntšá: —¿Ndayá cochjama? Chë entšá derecho bomna mo canýa Romoca onýnanacá canmëna ca.

<sup>27</sup> As chë amëndayá tojána Pablo yojtsemnoye y tbojanianyana: —Smëyana, ¿aca derecho bomná mo canýa Romoca onýnanacá comna ca?

Y cha tbojanjuá: —Arseñor ca.

<sup>28</sup> Chora chë amëndayá tojánayana: —Atše becá crocénana sënjëtsajó mo canýa Romoca onýnanacá derecho jtšebomnama ca.

As Pablo tbojanjuá: —Y atšna derecho bomná mo canýa Romoca onýnanacá sëndmëna atše tijanonýná orscana, er atšbe taitá chca derecho bomná inamna ca.

<sup>29</sup> Chcasna, chë jatjanjama imojtseprontanënga, Páblëbentšana tmojanojuaná; y chë mandayánaca tojanjuaná y yojtsauatja, Pablo derecho bomná mo canýa Romoca onýnanacá yojannama tojántatšëmbona ora, er cha tojanmandá Pablo chamotsebátsëcamá.

*Pablo, Jerusalenentša uámana mándayëngbe delante*

<sup>30</sup> Chë soldadëngbe amëndayá yojtseboše ndegombre jtsetatšëmbuama ndaye soyama judiënga Páblëbe contra imojtsichámuaama; asna, yëfsana tojanmandá cadenëjuangá jt-sajaffonana y chë bachnangbe amëndayënga y nyëtsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

## 23

<sup>1</sup> Chora Pablo, nyëtsca chë mandayëngbiyoe tojanënyanýe y tojanëyana: —Taitanga, atše mëntëntscoñe tsiyena jtšamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

<sup>2</sup> As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotšáyëjantšëta. <sup>3</sup> Pero chora Pablo Ananíasbiyoe tbojanjuá: —¡Bëngbe Bëtsá ácnaca cmochanjëtsjantšëta, bacna entšá, ntšamo ndegombre tcojuabnacá ndinýinýnayá! Aca chentše contsetbemana tšabá o ndoñe tšabá tijamama jayanama, ntšamo Moisesbe leyifne yomandancá; as, ¿ndáyeca cojtsemánnda chašmojantšëta? Chca chë leyifne ndoñe quenátslesenciana ca.

<sup>4</sup> As, chabe béconana imojtsemna entšanga tmojánayana: —¿Chca chë Bëngbe Bëtsabe bachnangbe más uámana amëndayábiyoe cochjóyenguango ca?

<sup>5</sup> Chora Pablo tojánayana: —Taitanga, atše ndoñe quetsátstátšëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrënguiñe mëntšá endayana: “Entšangbe mandayabe contra ndoñe catjayana ca.”

<sup>6</sup> Pablo tojániniye chë mándayënguentše báseftanga saduceunga y ínýengna fariseunga imojtsemnama; as, mëntšá tojánáyebuachena: —Taitanga, atše fariseo sëndmëna; atšbe bëtsëtsanga fariseunga mondmëna. Atše, jtsošbuáchiyëse chë obanënga mochtayenama tšobátmana causa, atše ndoñe tšabá séntsama ca tšëngaftanga šmochjayana ca.

<sup>7</sup> Pablo chca tojánayana ora, chë fariseunga y saduceunga tmojanontsé enatsëtsnayana, y chë causa nyëtsca entsanga ndoñe cachcá imontsejuabnaye. <sup>8</sup> Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aïñe chë soyënguïñe jtsosbuáchiyana. <sup>9</sup> Y nyëtscanga tša imojtsáyebuache; asna, básipta fariseunga ley abuátambayënga tmojantsbaná y jabuachana mentsá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canyë ángel o espíritu muábioye ndegombre tojauyana ca.”

<sup>10</sup> Entsanga más imojtsáyebuache y chë soldadëngbe amëndayá yojtsauatja nderado entsanga Pablo muantsatcacaye; as, cha tojanmandá soldadënga chamua Pablo chë entsángbentsana jaisábocnaya y chë soldadëngbe oyenoye cachiñe jesánatsama.

<sup>11</sup> Yëfsana íbeta, Bëngbe Utabná Páblëbioye tbojánëbëbocna y tojaniyana: “Pablo, ainaniñe añemo cochtsebomna. Ntsamo aca atšbiana condétatsëmo y muentse Jerusalenentse condoyebuambnacá, cachcá cmontsemna Romoca jamama ca.”

*Judiënga tmojanenoyeuná Pablo jtsóbama*

<sup>12</sup> Chë inyë yëfsana, judiënguentsana básëftanga tmojanenoyeuná Pablo jtsóbama, y tmojanjurá tondaye ntjasana, ni ntjofsiyana, cha jóbantscuana. <sup>13</sup> Chca jamama tmojanjuabó entsanga imojamna canta bnëtsanëngama más. <sup>14</sup> Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mentsá tmojánayana: “Bënga Bëngbe Bëtsá mentsá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofsiyana, Pablo jóbantscuana. <sup>15</sup> Morna, tsëngaftanga y chë inyë muentsa mandayëngaftaca chë soldadëngbe amëndayá smochjaimpáda Pablo moye chabuánatsama; y smochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

<sup>16</sup> Pero, Páblëbe uabenbe uaquiñá chë soye tojántatsëmbona; asna, tojána chë soldadëngbe oyenoye, chama Pablo jauenayama. <sup>17</sup> Chorna, Pablo canyë básëfta soldadëngbe mandayábioye tbojanchembo y tojaniyana: “Diosmanda quem basa mánatse chë nyëtsca soldadëngbe amëndayábioye; canyë soye entsebomna chábioye juenayama ca.”

<sup>18</sup> As, cha chë bobontse tojéftsanbetse, chë nyëtsca soldadëngbe amëndayábioye tbojanánatse y tojaniyana: “Chë utamená Pablo šonjachembo y šonjaimpáda quem bobontse ábioye juanatsana; mua caojtsebomna canyë soye aca jauyanama ca.”

<sup>19</sup> Chë soldadëngbe amëndayá chë bobóntsbioye tojéftsanobuácuetëntsiye, luaroye tbojanánatse y tojantjá: —¿Ndayá cojtsebomna atše jauyanama ca?

<sup>20</sup> As chë bobontse tojaniyana: —Judiënga tmojanenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca. <sup>21</sup> Pero ndoñe catjóyaunaye; chënguentsana canta bnëtsanëngama más entsanga iytëmenënga Páblëbiana mójansaná. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofsiyana, Pablo jóbantscuana. Mora chënga montseprontana y montsobátmana ntsamo aca chë soyama cochjáuyanama ca —chë bobontse tojaniyana.

<sup>22</sup> Chentsana, chë soldadëngbe amëndayá chë bobóntsbioye tojanmandá, ndayá ibojueyanama ndocnábeñe ntseuëntayana, y chentsana tbojanichmó.

*Pablo tmojanánatse Félix, chë Cesareoca mandádbioye*

<sup>23</sup> Chentsana, chë soldadëngbe amëndayá tojánachembo útata chë inyë soldadëngbioye mandayënguentsana, y tojanamëndá chamoprontama uta patse soldadënga, inyë canyëtsëfta bnëtsanënga couayënguïñe y inyë uta patse lanzëšangaca, Cesarea puebioye íbeta, las nueve ora jabocanama; <sup>24</sup> y tojanamëndá couayënga chamoprontá Pablo chauenójayama. Y tojanmandá tsabá y ndocá ntjapasacá Pablo chamuánatsama, Félix chë Cesareoca mandádbioye. <sup>25</sup> Y canyë tsbuanácha chëngaftaca tojanichmó y chëchañe mentsá yojtsábemana:

<sup>26</sup> Claudio Lisias, chë bëts uámana mandado Felixbiana: Salud bomná chacotsomñe.

<sup>27</sup> Judiënga quem boyabása tmojishache y montseboše jtsóbama; pero cha mo canyá Romoca onýnanacá derecho bomná yomnama sënjátatsëmbona ora, atšbe soldadëngaftaca sënjá y chëngbe cucuatšentsana cha sënjatsbocá. <sup>28</sup> Atše sëntseboše jtsetatsëmbuana ndaye soyama chënga chabe contra imojtsichámuama; as, cha sënjuánatse nyëtsca chë judiëngbe amëndayënga montsemnoye; <sup>29</sup> y chentsana, atše sënjátatsëmbona chënga chabe contra imojtsichamo ana cachëngbe leyentša soyëngama, pero cha tondaye tonjoubuchjanguá, cha jóbama bënga chašotsamnama, ni mo cárceloye jutámia. <sup>30</sup> Pero atše sënjátatsëmbona chë judiënga tmojanenoyeuná cha jtsóbama; chýyeca, cam ora cha ábioye sentsichamná, y chabe contra ichámëngna sënjáuyana, ndayá muabe contra jayanama imojtsebomncá acbe delante chamuayana ca.

<sup>31</sup> Chentšana, chë soldadënga tmojanana ntšamo tmojanamëndacá, ibeta Pablo tmojëftsanbetše y Antípatris pueblöye tmojanánatse. <sup>32</sup> Yëfsana, chë shecuátšeca tmojána soldadënga cach soldadëngbe oyenöye tmojësanshëcuana, y chë couayíñe enjaquenënga Pábloftaca tmojána. <sup>33</sup> Cesareöye chënga tmojánashajna ora, chë tsbuanácha chë mandádbioye tmojanantšabuaché, y Páblëna chabe cucuatšíñe tmojánboshjona. <sup>34</sup> As chë mandado chë tsbuanácha tojanalía; chentšana, cha tojanënoticiá ndaye luarocá Pablo inamnama, y Cilicia luarocá cha inamnama cha tojántatšëmbona ora, <sup>35</sup> tbojaniana: “Ache contra ichámënga chamobeconá ora, ácbioye oído chochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanýama.

## 24

*Ntšamo Pablo chë mandado Félixbe delante tojanenëuyaná*

<sup>1</sup> Shachna tianöye, Ananias, chë bachnangbe más uámana amëndayá, Cesareöye tojána báseftangaftaca chë judiëngbeñe bëtsëjemëngcá mándayënguentsana y canýa entsanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

<sup>2</sup> Pablo tmojanábocna ora, Tértulo tojanontsé chabe contra jayanama y Félixbioye tbojaniana: “Aslëpaye, taita mandado, ácbeyeca bënga natjëmbana fsëndoyena y aca puerte obiashjachá cómnayeca ba tsabe soyënga quem luarentša entsangbiana yojtsebinýna. <sup>3</sup> Nýets tempo y nýetsquénache chë soyënga fsëndóyëngacañe, bëts uámana mandado, y bënga chama corente chondetsechuaná. <sup>4</sup> Pero ndoñe yapa bën jatenbiamnayanama, Diosmanta ratotema šmotsoyauná. <sup>5</sup> Bënga fsëntsetatšëmbo quem boyabása entsanguentše entsemna mo bacna shacuaná, nýets luarënguénache yojtsana y yojtsama chë judiënga nýetscanga cachca soye ndoñe chamondëtsejuabnama, y cha yojtsemna chë Nazaretocabe ustonënga uanatsaná. <sup>6</sup> Y tonjáböšena jamama Bëngbe Bëtsabe bëts yebna, Bëngbe Bëtsabe bominýíñe ndoñe tsabá chaondëtsemnama; chíyeca bënga cha fsënjotbá. Bënga fsënjáböšena chabiana jayanana tsabá o ndoñe tsabá tonjamama, ntšamo bëngbe leyënguiñe endayancá; <sup>7</sup> pero chë soldadëngbe amëndayá Lisias tonjontremeté y jabuachana bëngbe cucuatšentsana tbojšánatseñe, <sup>8</sup> y tonjayana chë chabe contra ichámënga caojtsamna ácbioye chama jabana ca. Cach taitá chacojatjá ora, ndegombre soyënga cochántsetatšëmbo ndáyeca bënga muabe contra fstsichámuama ca” —cha tojánayana.

<sup>9</sup> Y chë judiënga chentše imojëtsemnënga imojtsanichamo aiñe chca tojanopasá y lempe ndegombre yojtsemna ca.

<sup>10</sup> Chentšana, chë mandado Páblëbioye tbojánëfjatsëmbo chaóyebuambama; as Pablo tojánayana: “Atše sëndëtatsëmbo aca ba uatama comna muentša entsangbiana tsabá o ndoñe tsabá tmojanama ichamuá; chcasna, tondayama ntsauatjá y puerte oyejuayá acebe delante šcuenëuyaná. <sup>11</sup> Ntšamo cach aca jsetatšëmbuama contsobencá, cabá bnëtsana uta te entsemna atše Jerusalenöye sënjá, Bëngbe Bëtsá jadórama. <sup>12</sup> Y quemënga ndoñe chešmátinýena nderado ndáftaca jabuachana enatsësnayíñe, ni entsanga chamuënbouënanama amiñe, Bëngbe Bëtsabe bëts yebnoca, ni chëngbe enefjuana yebnënguénache, ni inýe luarënguénache chë bëts pueblentše. <sup>13</sup> Quem entsanga tondaye quemátšobma ntšamo jayanama, atšbe contra montsichamo soyënga ndegombre yojtsemna ca. <sup>14</sup> Pero ndegombre endmëna y chanjayana, atše bëngbe taitangbe Bëtsá sëndëserveda, jtsiyenëse ntšamo Bëngbe Bëtsá šonjaninýanjé benache yomncá; y quem entsanga montsichamo, básefta soyënga ntšamo bënga quem Tsëm Benache ustonënga ftsosbuachecá, ndoñe ndegombre yondmëna ca. Pero atšna nýetsca chë Moisesbe leyíñe y Bëngbe Bëtsabe juabna oyebuambnáyëngbe uabemana librësanguentsa soyënguiñe sëndosbuaché; <sup>15</sup> y atše cach chëngcá, puerte jtsošbuáchiyëse Bëngbe Bëtsabeñe sëndobátmana cha yochjama chë mochjóbenënga chámuatayenama, nýetsca entsanga, lempe tsabá amënga y chë ndoñe tsabá amëngaca. <sup>16</sup> Chíyeca, atše nýets tempo puerte tsabá sëndama, tondayama ntjatenócochinýenama y atšbe ainana natjëmbana chaotsomfiama, Bëngbe Bëtsabe delante y entsangbe delántnaca.

<sup>17</sup> “Básefta uatama inýe luarënguénache atše sëndánana; ndoñe bayté quenátšmëna cach atšbe luaröye sëntashjango, chentša ndbomnjëmënga jubabuachama ndayánaca jatšatayama y bayënga jobáyama, Bëngbe Bëtsá jëtschuayama. <sup>18</sup> Atše sënjama soyënga Bëngbe Bëtsabe delante tsabá jtsatšmënama; chentšana, básefta Asioca judiënga Bëngbe Bëtsabe bëts yebnentše šmonjínýena, pero ndoñe chešmátinýena ni ba entsángaftaca, ni enbouënaníñe. <sup>19</sup> Chë šmonjinýenënga entsamna ácbioye jabana y acebe delante atšbe contra chamuayana, nderado ndayá tmojtsebomnëse. <sup>20</sup> O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tijobuáchjanguama chešmënjínýena, atše castiganá jtsemnna šojtsemna ca chënga chamuayana; <sup>21</sup> o nderado nántsemna chë atše chëngbentše sëntsemna ora, mëntšá

tijuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tsëngaftanga atšbe contra šmochjayana ca.’”

<sup>22</sup> Félix bëtscă inatátsëmbo Bëngbe Utabná tojaninÿinÿé Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entsanga tojanëyana: “Chë soldadëngbe amëndayá Lisias chaojšhjangora, chanjayana ntšamo quem tsëngaftangbe sóyeca jamama ca.”

<sup>23</sup> Y chentša soldadëngbe amëndayábioye tbojanmandá Pablo jtsebojanÿama, pero nÿe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošcă cha chamuauájabuachama.

<sup>24</sup> Chentšana baseftaytese, chë mandado Félix Cesareoye tojtannahjanga, chabe shema Drusílaftaca, canÿe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canÿa nanjobenaye Jesucristbeñe ošbuachiyá jtsemnana. <sup>25</sup> Pero, nÿetsca soyënguñe tsábá jtsamama, cachá jenomándama jtsobenama y ntšamo tmojamama nÿetsca entsangbiama Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojanianyana: “Mora, mata; luare quëtstsebonna ora, chobchjachembo ca.”

<sup>26</sup> Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanóſjajana cháftaca jencuëntama. <sup>27</sup> Y chca uta uata tojanochnëngora; chentšana, Félix ya ndoñe más chë mandado yontsemna y chabe cuentna Porcio Festo mandadcă tmojántbema. Félix yojtseboše chë judiëngbe delante tsábá joquédama, chíyeca utamená Pablo tbojëftsanboshjona.

## 25

### *Pablo Festbe delante*

<sup>1</sup> Festo chë luaroye tojánashjanga y unga tianoye, Cesarea pueblentšana Jerusalenoye cha tojána. <sup>2</sup> Chocna, chë bachnangbe amëndayënga y chë más uámana judiënga Fëstbioye tmojána Páblëbe contra jayanama. <sup>3</sup> Y tmojanimpadá, mo chëngbiama canÿe bëts pavor cuenta, cha chaomandá Pablo Jerusalenoye chamuánatsama. Chëngna imojëtsejuabnaye Pablo benachiñe chamotsóbama. <sup>4</sup> Pero Festo tojanëyana, Páblëna Cesareoca utamená yojtsemna y baseftaytese cha choye jtama ca. <sup>5</sup> Y tojanëyana: “Chamna, tsëngaftangbe amëndayënga átšeftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

<sup>6</sup> Festo Jerusalenentše posufta o bnëtsana te más chëngaftaca tbojëftsanjëtana y chentšana Cesareoye tojáná. Yëfsana, cha tojanótbema chabe puestente tribunaloca y tojanmandá Pablo choye chamuánatsama. <sup>7</sup> Pablo choye tojánashjanga ora, Jerusalenocana tmojánashjajna judiënga tmojanobobconá y ba uabouana soyënga chabe contra imojtsichamo, pero ni canÿe chë soyëngama tmonjanobená jinÿanÿiyana chca ndegombre bëtsemnana.

<sup>8</sup> Y Pablo, cachá jenëuyanama mëntšá yojtsichamo: —Atše tondaye chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

<sup>9</sup> Festo yojtseboše chë judiëngaftaca tsábá joquédama; as Páblëbioye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

<sup>10</sup> As Pablo tojánayana: —Atše sëntsemna chë Romoca bëts mandado tojichamó amëndayëngbe delante y chënga entsamna jayanama atše tsábá o ndoñe tsábá sënjamama. Ntšamo ndegombre contsetatsëmbcă, judiëngbe contra atše ndocna bacna soye chiyatsma. <sup>11</sup> Nderado atše ndaye bëts soye tijobuachjanguá y chama atše jóbanaama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšine atše jaboshjonana. Chíyeca, Diosmanda chë Romoca bëts mandado cháuyana tsábá o ndoñe tsábá sënjamama ca —Pablo tojánayana.

<sup>12</sup> As Festo, chë soyama chabe buayinÿayënga tojanantjá y chentšana tojánayana: —Chë Romoca bëts mandado quem soyama cháuyanama tcojábóšenëšna, chábioye cochjá ca.

### *Festo, Rey Agrípaftaca tbojanencuentá ntšamo Pábloftaca jamama*

<sup>13</sup> Chentšana baseftayté tojanochnëngora, Rey Agripa y Berenice Cesareoye tbojána, Festo jauatsëtsayama. <sup>14</sup> Bayté chata chentše tojanajëtana; y chca, Festo chë réybioye tbojanencuentá Páblëbe soyama. Cha mëntšá tbojanianyana: —Muentse endmëna canÿe entsá, Pablo ca uabainá; Félix utamená tbonjëftseboshjona, atše mandadcă sënjontsé ora. <sup>15</sup> Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcă mándayënga Páblëbe contra demanda tmonjajajó y šmonjaimpadá cha

jóbanama ibojtsemna ca atše jayanama. <sup>16</sup> Y atše sēnjáuyana: “Chē romanēnga ndoñe quematamana ndocnabiama jayanana cha jóbanama ibojtsemna ca, chabe contra ichámēnga chabe delante ndoñe tmontsemnēse, chca, chama jenēuyanama cha chaobenama ca.” <sup>17</sup> Chíyeca, chēnga moye tmonjabo ora, ndoñe yapa bēn ntjatenobiamnycá cach yēfsana atšbe puestentse tribunaloca sēntótbema y sēnjamandá chē boyabása jobetšana. <sup>18</sup> Pero chabe contra ichámēnga, ntšamo atše sēndanjuabnacá chēnga mochjayanamna ni mo canye bēts soye chabe contra chemátayana, chēnga jóyebuambayama tonjóyentšbuache ora. <sup>19</sup> Chēnga chabe contra montsichamo, nye cachēngbe Dios ntšamo jadórana yomnana y canya Jesús ca uabainábiam; cha tojanóbana, pero Pablo entsichamo cha ainá yotsomñe ca.

<sup>20</sup> “Chora atše ndoñe quetstétsetatšēmo ntšamo chē soyiñe jamana; asna, Pablo sēnjantjá Jerusalenoye jama tayojétseboše ca, choca atše jayanama tšabá o ndoñe tšabá cha tonjanmama. <sup>21</sup> Pero cha šonjaimpadá camuentše jaboshjonana, cach Romoca bēts uámana mandado chē soyama tojayanētsucana ca. Chcasna, atše sēnjamandá cha chamotsebojanýama, chē mandádbioye jíchmuama atše jobenayētsucana ca” —Festo tbojancuentá.

<sup>22</sup> Chca tbojanencuentá ora, Agripa Féstbioye tbojanianana: —Atšnaca sēntseboše chē boyabása joyeunayama ca.

Y Festo tbojanjá: —Cach yēse oído chábioye cochanjabuájua ca.

<sup>23</sup> Chē yēfsana, Agripa y Berenice corente uachuanentše chē tribunaloye tbojánamashjna y chátaftaca tmojánamashjna chē soldadēngbe amēndayēnga y chē pueblentša uámana taitanga. Chentšana Festo tojanmandá Pablo jobetšana; <sup>24</sup> y chora cha tojánayana: “Rey Agripa y nyetsca taitanga bēngaftaca šmojtsemnēnga: Chentše entsemna chē boyabása. Nyetsca judiēnga chabe contra átšbentše montsabíchamo, Jerusalenoca y quem Cesarea pueblēntšnaca, y nya jtsayebuáchēse tša šmontseimpadana cha chaóbanama; <sup>25</sup> pero atše sēntsejuabná quem boyabása tondaye tonjama, jóbanama chabotsemnana ca. Y más, cachá šonjaimpadá chē Romoca bēts uámana mandado César chabe soyama cháuyanama; chcasna, chca chanjama, chábioye cha chanjíchmu. <sup>26</sup> Pero atše, atšbe bēts uámana mandádbioye quem boyabásabiam juábobemama ndocna serito soye quetsátsbomna causa, tšēngaftangbe delante cha tijatsá, y masna, acbe delante, bēts rey Agripa; chca, lempe chacojattjá chentšana, ndayá juabemama atše chaitsebomnana. <sup>27</sup> Er atše sēntsejuabná ndoñe corente juabnayabe soye yomna, canye utamená jíchmuana y ndayama chabe contra tmojtsichámua ndoñe lempe ntjuabemana ca” —cha tojánayana.

## 26

### *Pablo tojanontsé rey Agripbe delante jóyebuambayama*

<sup>1</sup> Chentšana, Agripa Páblēbioye tbojanianana: —Jóyebuambayama contselesenciana, cach aca chacuenéuyanama ca.

As Pablo, chē réybioye jachuayama cucuatše tojanatsbaná y jenēuyanama tojanontsé mēntšá jayanama: <sup>2</sup> —Atše ndegombre sēntsoyejúá mora chjobenaye acbe delante jóyebuambayama, uámana rey Agripa, chca, atše jenēuyanama nyetsca soyēngama ntšamo judiēnga atšbe contra montsichámua; <sup>3</sup> y más sēntsoyejúá, taitá conduábuatmama lempe ntšamo judiēnga monduamancá y condétatšēmo chē judiēnga ndayama imuenoboyebuambnana. Chcasna, Diosmanda uantádoca šmotsoyeuná.

### *Pablo tojanacuntá ntšamo cha tempo inamnana*

<sup>4</sup> “Nyetsca judiēnga mondétatšēmo ntšamo atše tempscana chēngbeñe tsiyenama, bobontse sēnjamna orscana, atše sēnjanonýná luarentše y Jerusalenentše. <sup>5</sup> Chēngnaca mondétatšēmo y montsobena jayanana, chēnga tmojtsebošēse, chca ndegombre yomnata; atše nyets temp fariseucá vida sēndbomna, y chē fariseunga mondayema más soyēnga jtsamēse chē judiēngbe leyēngaca chē inye judiēngbiam. <sup>6</sup> Y mora, ntšamo Bēngbe Bētsá bēngbe bēts taitanga tojanašebuachenacá, chē obanēnga jtayenama cha yochjamama puerte jtsošbuáchiyēse atše obatmana causa, šmojuánatse atšbe contra jayanama. <sup>7</sup> Bēngbe bnētsana uta Israeloca bēts pamíllanga mondobátmana chē šbuachenana soye chēngbiam chaóshjanguama y chíyeca, cada te bnētē y ibeta chēnga Bēngbe Bētsá mondadorana y mondéservena. Y atše cach soyama obatmana causa, bēts rey Agripa, judiēnga mora atšbe contra montsabíchamo. <sup>8</sup> ¿Ndáyeca tšēngaftanga judiēnga šmojtšichamo, chē obanēnga chámuatayenama Bēngbe Bētsá yochjamama jtsošbuáchiyama ndoñe šmontsobena ca?

### *Pablo tojanacuntá, ntšamo tempo cha Jesucristbeñe ošbuáchiyēnga yojanaborlánama*

<sup>9</sup> “Y cach átšnaca sēnjanjuabná atše šojamna lempe ntšamo stjobenacá jamana, Jesús chē Nazaretocábeñe ošbuáchiyēnga corente chamosufrima, <sup>10</sup> y chca Jerusalenentše atše sēnjamna. Chē bachnangbe amēndayēnga mando šmonjanatšétá, y chca, banga Jesucristbeñe ošbuáchiyēnga cárceloje sēnjanētame; y jtsēbáyama ca chēngbiam montsanichamo

ora, átsnaca aíñe chca chamoma ca sēnjánichamo. <sup>11</sup> Y ba soye, chē judiēngbe enefjuana yebnēnguenache jabuache chēnga sēnjanatsetšená, chēnga Jesucristo ústonana chamotsajbanama, y chēngaftaca tša etonaná sēnjétsemna causa, chē inye luarēngoca bēts pueblēnguenáchnaca chēnga sēnjanécamena.”

*Pablo tojanacuntá ntšamo cha Jesucristbeñe ošbuachiyá tojanóbema*  
(Hch 9.1-19; 22.6-16)

<sup>12</sup> “Y cachcá jamama canye te Damascoye sēnjétsaye; chē bachnangbe amēndayēnga uabemanēchangá šmonjanētšabuaché chca jamama y, cachēnga choye šmonjanichmó. <sup>13</sup> Pero, uámana rey, chē benachējana mo nyetsto ora, sēnjáninye canye bēts tcuinye celocana, shinjama corente más enjétebinjynaye, y atše y chē átšeftaca ajnēngbe shēconana corente enjétebuashinjynana. <sup>14</sup> Nyetscanga fsēnjánshajaye y atše sēnjanuena canye oyebuambnayanana, hebreo bayañe, mēntšá šonjétsatsaye: ‘Saulo, Saulo, ¿ndáyeca chca šcojtsacmena ca? Cach aca bacá consenabomá, atše entšanga chamosufriama tcojtsama ora, mo uacná ngmēche niñēfiñe cha tojtsoscunjná orcá, cachá jenótsetšenana ca.’ <sup>15</sup> As atše sēnjánayana: ‘¿Nda comna, Bēngbe Utabná ca?’ Y chē Utabná šonjanjuá: ‘Atše sēndmēna Jesús, y aca condama atše entšanga chamosufriama ca. <sup>16</sup> Pero matétsbaná y matétsá. Atše cbonjébēbocna jinjyniyama aca tchojuábuayanama atše šcochjaserviama, y chacotsetatšēmbuama y entšanga chacuacuntama, mora tconjinjye soyama y más chcoye atšbiama cbochanjinjyniyeye soyēngámna. <sup>17</sup> Atše chanjama judiēnga y ndoñe judiēnga tondaye chacmondēborlama; y morna, ndoñe judiēngbiyeye cbontsichamná, <sup>18</sup> chēnga atše soyēngama josértama aca chacomama. Chca, chēnga bacna juabnēnga ndoñe chamondétsebmoma, mo ibetiñe cuaftsemnēngcá, sinó mo binjyniñcá chamotsemna átšeftaca, atše chē entšangbe juabnēnga binjynayá. Satanashbe cucuatšifñe ndoñe chamondétsebmoma, sinó Bēngbe Bētsabe obenánaca chamotsiyenama; chēnga átšbeñe chamotsošbuáchemama, y chca, chēngbe bacna soyēngama perdonánēnga chamotsemnana y chēnga chamotsebmomna canye luare entšangaftaca, chē ndēmuanjēngbiyeye Bēngbe Bētsá tšabe entšanga y chabe entšanga tojábiamama, chēnga átšbeñe betsošbuáchiyama ca’ —cha šonjanianama.

*Pablo tojanma ntšamo chē mo otjenayoquécá tojaninjycá*

<sup>19</sup> “Chcasna, bēts rey Agripa, atše sēnjanma chē mo otjenayoquécá sēnjáninye ora ntšamo Cristo šonjanianycá; <sup>20</sup> y natsana, Damascoca entšanga chē tšabe noticiēngama sēnjanabuayená; chentšana, Jerusalenoquēnga y nyetsca chē Judea luaroquēnga y ndoñe judiēngnaca; chēnga sēnjánaimpadana bacna soyēnga amama ngmēnaca chamuatenójuaboma, chca amana chamuajbaná y Bēngbe Bētsabe benache chámuatishachama, y soyēnga chamotsama jinjyniyama chca ndegombre tmojanmama. <sup>21</sup> Chca sēnjánama causa, judiēnga Bēngbe Bētsabe bēts yebnoca šmonjanishache y tmonjánbošena atše jtsóbana. <sup>22</sup> Pero Bēngbe Bētsá sempre šonduájabuachana, y chca, cada te mēntscóñama, nyetscanga Bēngbe Bētsabiamama sēndabuayináyá, uámanēngbiyeye y nduámanēngbioynaca; nye ntšamo Moisés y Bēngbe Bētsabe juabna oyebuambnayanēnga tmojanianycá, ntšamo yochjopásama atše sēndoyebuambná; inyetsá ndoñe. <sup>23</sup> Chēnga tmonjánayana: ‘Bēngbe Bētsabe Uámana Uabuayaná, Cristo jóbanama bontsemna; pero chaojóbanentšana, cha chē natsaná echántsemna obanēnguentšana jtayanama, y cha judiēngbiyeye y ndoñe judiēngbiyeye echanjabuayená, y chca, chēnga mochántsetatšēmbo nyetscanga chábeñe tmojtsosbuáchenga atsebácanēnga mochtsemnama ca.’ ”

*Pablo tojanma rey Agrípbiyeye jáyēnjanama, Jesucristbeñe ošbuachiyá chaóbemama*

<sup>24</sup> Pablo, cachá jenēuyanama chē soyēnga tojánayana ora, Festo mēntšá tojánayebuachena: —¡Pablo, opá cojtsóbema! Yapa ualiaye causa, opá tcojtsóbema ca.

<sup>25</sup> Pero Pablo tojanjuá: —Opá ndoñe quetsátsmēna, bēts uámana Festo; inyetsá entsemna; atše sēntsoyebuambná nyets juábna, y ndegombre soyēnga. <sup>26</sup> Chentšē rey Agripa entsuenana, y cha puerte tšabá chē soyēngama endétatšēmbo, chíyeca, tondayama ntjatauajcá, atše chabe delante sēntsoyebuambná; atše corente sēndétatšēmbo chánaca chē soyēngama yotatšēmbuama, er ndayá Jesús tojanmá, ndoñe tonjopasá ndaye iytēmena chaboye. <sup>27</sup> Bēts rey Agripa, ¿Bēngbe Bētsabe juabna oyebuambnayanēnga tmojánayana soyēnguiñe aca quecosbuaché? Atše sēntsetatšēmbo aíñe chíñe cošbuáchemama ca —Pablo tojanianama.

<sup>28</sup> Chora Agripa tojanjuá: —Batšatema más y maščjayēnjaná Jesucristbe ustoná atše jóbemama ca.

<sup>29</sup> As Pablo tojánayana: —Nye batšatema más o bētsacama más, atše Bēngbe Bētsá sēntseimpadana, ndoñe nye bēndatbe barie, sinó nyetscanga chē mora šmojtsuenanēnga, atšcá Cristbe ústonēnga chašmbiamama, pero utámenēnga ndoñe chamondétsemna, ntšamo mora atše sēntsemncá ca.



<sup>30</sup> Chorna, chë rey, chë mandado, Berenice y chë chëngaftaca imojantbiámanënga tmojantsbaná, <sup>31</sup> y luaroye tmojána chë soyama jencuéntama. Mëntsá imojtsichamo: — Quem boyabása ndocna bacna soye tonjama jóbanama chabotsemnana, ni mo utamená jtsemnana ndoñe quebnásmëna ca.

<sup>32</sup> Y Agripa Féstbioye tbojaniana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

## 27

### *Roma bëts puebloye Pablo tmojanichmó*

<sup>1</sup> Italia ca uabaina luaroye Pablo jíchmuama tmojanenoyeuná ora, atše, quem librëša uabiamnayá, cháftaca sënjána. Chora Pablo y chë inye utamenënga Julio ca uabainabe cucuatšíñe tmonjánabashejuana. Julio enjamna canya chë Romoca bëts mandadbe soldadënguentsá mandayá. <sup>2</sup> Asna, fsënjánašëngo canye Adramitio puebloca barcuíñe; ya chë Asioca bëts pueblëngoye juama enjëtsamna. Cesarea pueblentsana fsënjánbocna y Aristárncaca bëngaftaca enjëtsamna; cha enjamna Tesalónica bëts pueblócá, Macedonia luaroca.

<sup>3</sup> Chë inye yëfsana, Sidón puebloye fsënjánashjajna. Chentše Julio, tsábá mandbomná Pábloftaca enjëtsamna; tbonjanlesenciá chabe amiguëngbioye chauabuáchama, chënga chamofjama y chamóbocuedama. <sup>4</sup> Sidonocana fsënjëftsanbocnentsana, bëngbe contra corente enjëtsëbinýiaye. Chiyeca, Chipre fshantsënga catšbioicajana, ndoñe yapa quentëtsëbinýiayëjana bënga fsënjána. <sup>5</sup> Cilicia y Panfilia luarënga bëconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

<sup>6</sup> Chë soldadëngbe amëndayá, canye Alejandria puebloca barco chentše tonjáninýena, Italia luaroye yojétsaye; asna, šonjanamëndá chë barcuíñe jenójayiana. <sup>7</sup> Baseftaytentscuana uenana fsënjánana y pordonto fsënjánobená Gnido pueblentsá ndirichíñe jashjanguana. Cabá bëngbe contra enjëtsëbinýiaye causa, Salmón luarëjana fsënjánachnëjna, Creta fshantsënga bëconana, ndoñe yapa quentëtsëbinýiayëjana. <sup>8</sup> Y chca, pordonto bejaycá fsënjánana, fshantsënga bëconana; chentšana, canye pueblo, Tsabe Puertënga ca uabáinentše fsënjánashjajna, Lasea ca uabaina pueblo bëconana.

<sup>9</sup> Chca, bayté tonjanochnëngo y chora chë bejaycá jama puerte resjo enjëtsëmna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuaperdonama, y chora chë uaftena tempo joshjanguama ya enjëtsobeco.

<sup>10</sup> Chiyeca Pablo chë entsanga mëntsá tonjanabuayená: “Baconga, atše šontsinýana mora puerte resjo entsemna bejaycá játama, y ndoñe tsábá queochátsmëna, ni chë uasmanëshangama, ni chë barcuama y bëngbiana cach ndoñe, mo nderado muanjanóbana ca.”

<sup>11</sup> Pero chë soldadëngbe amëndayá Páblëbioye ndoñe ntjoyeunayana; más, chë barcuentsá mandayá y chë barco nduifñioye aiñe. <sup>12</sup> Ndoñe tsábá yonjamna, chë barco chora enjëtsëmmentše chë uaftena tempëtsëscuana jëftsemnana; chë causa, nýa mo nýetscama tmonjanenoyeuná cachíñe bejaycá chentšana játama, nderado cuanjobenaye Fenice puebloye jashjanguama y chentše jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinýe endbetsenatjëmbambana juachoica tsjuanoicajana y tsmanoicajana.

### *Mar bëjayiñe puerte uaftena y binýia tojanóshjango*

<sup>13</sup> Chentšana tonjanontsé tsmanoicana batšá binýiayana, chiyeca chë entsanga tmonjanjuabó ya yojtsanopodena jtëtóntsana jama ca. As, chentšana fsënjëftsanbocna y bejaycá fsënjána, Creta fshantsënga beconanëjana. <sup>14</sup> Pero baseftayté chentšana, chë fshantsëngocana tonjanontsé corente jabuache binýiayana y chë barquëshoye enjëtsoshjajuana. Chë binýia yojanabaina Nordeste binýia ca. <sup>15</sup> Chë barcna nýe chë binýiëbe ponto tonjanontsé uayana; chë binýia enjëtsobayëjana jama ndoñe quentëtsopodena causa, šonjanotocá nýe ntšamo tojtsebinýiacá chašúyambama. <sup>16</sup> Chentšana fsënjánachnëjna Cauda ca uabaina stëtsocicajana, base fshantsënga mar bëjayoca; chiñe ya ndoñe tša jabuache quentëtsëbinýiaye y pordonto fsënjánobená buyeshoicana jtabocnana chë barco enjanasjá canouše, ndoñe chaondëtsóndbemama. <sup>17</sup> Ya chë barquëshoye fsëntanëšëngo orna, chë entsanga lazëjangaca chë barquëshá tmontsanabatsécaca, más uamorochësha chaotsamnana. Pero chënga monjëtsauatja nderado chë barco chë Sirte ca uabaina cascajuentsë nanjetsánjua; asna, chë barcuentsá ancla tmonjanashëbéútsëna, chë barco ndoñe betscó chaondëtsábonjnama, y ntšamo enjetsanbinýiaycá fsënjána. <sup>18</sup> Chë inye yëfsana y chë binýiayana cabá jabuache enjëtsëmna causa, chënga tmonjanontsé chë barcuentsá uasmanëshangá jtsëshbuëtsetšana; <sup>19</sup> y unga tianoye bëngnaca šonjanotocá, cach bëngbe cucuatšëca, chë barcuentsá soyënga buyeshoye jtsëtsanana. <sup>20</sup> Baytentscuana bënga

ndoñe chibiatanobená jinýana ni shinýe, ni estrellatémenga, tša tonjéseitebeta causa; y tša jabuache enjésebinýiaye causa, bénga ya ndoñe quefstétsanobatmana chentšana jótsbocana.

<sup>21</sup> Ya bayté enjésemna y chéntsucana tondaye saná ntjascá fsénjésemna. Chentšana, Pablo béngbe tséntsaca tonjantsá y tonjánayana: “Bacongá, tsabá manjamna atše mašménjanoyeuná y Creta luarocana ndoñe matménjéftsanbocna; chca mora ndoñe mal mamojtsepasá y ndoñe nýa nýetšá matménjobuetše. <sup>22</sup> Pero mora ngnénaca ndoñe matsménjéngana; masque ché barco echantsenatjémba, tséngaftanguentšá ndocná queochatóbana. <sup>23</sup> Ibeta canýe ángel šonjébëbocna; Béngbe Bétsá, ndabia atše sëndmëna y nda sëndëserveda, cha tbojichmó; <sup>24</sup> y ché ángel mëntšá šonjauyana: ‘Pablo, ndoñe matauatjana; entseyta aca ché Romoca béts mandábiyoye chacotsama, y aca Béngbe Bétsábia cómnayeca, nýetsca quem barcuuñe ajnënga jobanémntšana cha echanjatsebácá ca.’ <sup>25</sup> Chcasna, bacongá, ndoñe matauatjéngana, er atše Béngbe Bétsábeñe corente séntsošbuaché y lempe ntšamo ché ángel šonjauyancá echanjóbcna. <sup>26</sup> Pero mora entseyta canýe fshantse mar béjayiñe chašúshejanguama ca” — cha tonjanéyana.

<sup>27</sup> Canýe ibeta, uta semana fsénjánana chentšana ché Adriático ca uabaina mar béjayiñe fsénjésemna, y nýe ínýoye y ínýoye ché binýia šonjétsëyambaye. Y mo tséntseto yojésemna orna, ché barcuentsá trabájayénga tmojanjuabó ya fshantse béconana imojésemna ca. <sup>28</sup> As chénga tmonjanmedidá ntsachetsá ché býyeshe buatjoye inamnama y tonjanóbocna unga bnétsana y chnënguana metro; más chcoye cachíñe tmonjanmedidá y uta bnétsana canýsëfta metro tonjanóbocna. <sup>29</sup> Chénga monjétsauatja nderado béts ndétsbéngaca nanjétsántšëtjiama; asna, ché barco stétsóicajana canta ancla buyeshoye tmonjanashébëútsëna, ché barco ndoñe más chaondétsabonjnama, y tša monjéteboše betscó chaobínýnama. <sup>30</sup> Chéntsucana, ché barcuentsá trabájayénga tmojánbošena chentšana jtsachetana; chamna, chénga tmojanontsé ché canouše buyeshoye justjanguana, pero chca imojétsama, mo ché anclénga ché barco natsanoica cuaftséstjajuancá. <sup>31</sup> Pero Pablo ché soye tojáninýe, y ché soldadéngbe amëndayábiyoye y ché soldadéngbiyoye tonjanéná y mëntšá tonjanéyana: “Ché barcuentsá trabájayénga cach quem barcuentsé ndoñe chamonjoquedase, tséngaftanga ndoñe quešmochatobenaye muentšana jótsbocama ca.”

<sup>32</sup> As, ché soldadénga tmonjáná y ché canoušentša lazéjénga tmontsantétsëtse y buyeshoye chëse tmontsantsatse.

<sup>33</sup> Enjésebinýana ora, Pablo nýetscanga tonjanaimpadá ndayánaca chamoséngama, mëntšá jáuyanése: “Ya uta semana entsemna y tséngaftanga ni mo batšatema chešmatamaná, y tondaye chešmatbsmuananga. <sup>34</sup> Diosmandá, masque nýe mo batšatémnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

<sup>35</sup> Pablo, chca tonjánayanentšana, canýe tandëse tonjanca y nýetscangbe delante Béngbe Bétsábiyoye thontančuá. Chorna, tonjanjatá y tonjanontsé jasama. <sup>36</sup> Chentšana nýetscanga tmonjanenñemó y chéngnaca tmonjanse. <sup>37</sup> (Ché barcuentsé nýetscanga fsénjamna uta patse y canýsëfta bnétsana y chnënguanénga.) <sup>38</sup> Ntšamo innabošca tmonjansentšana, buyeshoye trigo tmontsanashaná, chca, ché barco ndoñe yapa chaondétsautama.

### *Ché barco tojtsanenatjémba*

<sup>39</sup> Ya tonjanbinýna ora, ché barcuentsá trabájayénga ndoñe queméntétsatšëmbo ndaye fshantse chentše bétsemnama, pero tmonjáninýe ché fshantsentše canýe luare jachañe, ché béjaye ché luaroye omashjuanentše, y chiñe canýe chényañe enjamna; as chénga tmonjanjuabó jarrepáрана naderado cuanjobenaye chéjana ché barco ché fshantsoye juyambana.

<sup>40</sup> Asna, ché anclétsa lazéjénga tmontsantétsëtse y ché anclénga buyeshoye tmontsanboshjuana, y ché timón, ché barco juyambama oservena soyentša uabatsécnjéngnaca tmontsanjafjoná. Chorna, ché barcuentsá natsanoica niñëšiñe entšéjua tsbanánoye tmon-tanéséngo, y ché binýia tonjanma ché barco chaontsé ché chényoye juabéconama. <sup>41</sup> Pero ché barco canýe luaroye tonjánashjango, y chentše ché béjaye catatoicajana enjetsobuá y ché barco canýentše, bétsca cascajo buyeshiñe binýentše tontsanajo. Ché barcuentsá natsanoica lado ché cascajiñe entsanajuena, ndócnoye juabónjuama ntsopodencá, y ché stétsóica lado puerto entsanashatiyina y lempe entsanandbiamná, yapa binýia causa y býyeshe chentše enjétojantšetaye causa.

<sup>42</sup> Chora, ché soldadénga tmonjanjuabó ché utáménënga jtsébáyana, jachbabëse chénga ndoñe chamondétsachetama. <sup>43</sup> Pero ché soldadéngbe amëndayá inaboše Pablo jatsbocama, y chíyeca ché soldadéngbiyoye ndoñe chenatanalesencia chca jamana; y tojanmandá nýetscanga ché jachbabama obenéngna natsana ché buyeshoye joshbuetsana tsachoye chamuashjanguama, <sup>44</sup> y ché ínýengna tablëshënguifne o ché barcuentsá pedazënguifne chamoshbuetsama. Y chca, nýetscanga fsénjanobená tsabá y ndocá ntjapasacá fshantsoye jashjanguama.

## 28

*Pablo Malta luaroca*

<sup>1</sup> Ya n̄jetscanga fshantsoca t̄sabá fs̄nj̄etsemna ora; fs̄nj̄ántat̄s̄m̄bona ch̄e luare Malta ca yojanabaina. <sup>2</sup> Ch̄e luarent̄sa ents̄anga b̄ngaftaca corente t̄sabá mándbom̄n̄ga mon̄j̄etsemna; can̄ye íf̄eshe tmonjanangbotj̄o y šonjan̄ebuaja choca b̄nga jat̄ósbonyama, er t̄sa en̄j̄etsaftena y yapa en̄j̄etses̄sna. <sup>3</sup> Pablo tojanatbaná básefta buashana chames̄éf̄īnga y ch̄e íf̄eshoye en̄j̄etseshac̄n̄aye ora, can̄ye m̄t̄s̄cuaye tojánbocna y en̄j̄etsachaye, chent̄se yapa obon̄ȳaye causa, y Pábl̄e cucuat̄sīne tontsanoj̄nyá. <sup>4</sup> Ch̄e luarent̄sa ents̄anga, ch̄e m̄t̄s̄cuaye Pábl̄e cucuat̄sīne vojtsajon̄yanama tmonj̄ánin̄ye ora, mon̄j̄etsenats̄s̄n̄aye: “Quem boyabás̄a ndegombre in̄ya obanayá cuanm̄ena; mar b̄jayoca jobanáment̄šana tojots-bocá, pero chca uamana causa, diosá Justicia ndoñe quebnatsles̄encia cha vida chaotse-bom̄n̄na ca.”

<sup>5</sup> Pero Pablo tontsanenacuest̄et̄oná y íf̄eshoye ch̄e m̄t̄s̄cuaye tbontsantsat̄se y Pablo ndocá chenatanpasá. <sup>6</sup> Ch̄e ents̄anga imoj̄etsejuabnaye ch̄ábioye bochtsacuefshachá y n̄ye ndeolpe obaná yochjashajaye ca. Pero b̄en tonjanoch̄n̄engo y ndocá chenátanopasama ch̄nga tmonj̄ánin̄ye ora, ya ndoñe cachcá quem̄ent̄ts̄anjuabnaye y tmonjanont̄s̄e ichámuana Pablo can̄ye dios inamna ca.

<sup>7</sup> Chent̄sa b̄econana inamna ch̄e luarent̄sa mandayabe fshants̄enga. Cha šonjan̄ebuaja y corente t̄sabá šonjanacuedá, unga tents̄cuana. Ch̄e taitana Publico ca inauabaina. <sup>8</sup> Ch̄e tempo, Pábl̄e taitá šocá jutsn̄eshañe inajáona, calentórac̄a y buif̄eca buamach̄n̄ejuanána. Pablo tonjána cha jin̄yama y tonjánamash̄engo; B̄ngbe B̄ts̄ábioye tbonjanimpadá y ch̄e šocáb̄eñe chabe cucuat̄s̄enga tonjanj̄o, y chca, cha sh̄naná en̄j̄etsats̄m̄ena. <sup>9</sup> Chca tonjanopasá chent̄šana, ch̄e luarent̄sa in̄ye šoqūenga Pábl̄ebioye monj̄ánajna y cha enj̄ánash̄n̄aye. <sup>10</sup> B̄ts̄cá t̄sabe soȳenga chent̄se b̄ngbiam̄a tmonjanma, y cach̄iñe j̄atama ya ch̄e barcuíñe fs̄ent̄anenoyajenga orna, lempe nt̄samo bejaycá jama šonjan̄ebotcá ch̄nga šonjanatsatá.

*Pablo Romoye tojánashjango*

<sup>11</sup> Ch̄e fshantsent̄se mar b̄jayoca unga ish̄in̄ye fs̄nj̄éftsemna, y chent̄šana can̄ye Alejandriocana yojanabá barcuíñe fs̄nj̄enanenoyajé; ch̄e barco n̄jets̄ uaftena tempo ch̄e luarent̄se yoj̄éftsamna y enjanabaina Cástor y Pólux ca, mo ch̄e roman̄ngbe uta diosata cat̄satcá. <sup>12</sup> Chent̄šana, Siracusa b̄ets̄ puebl̄oye fs̄nj̄ánashjajna y chent̄se unga te fs̄nj̄éftsemna; <sup>13</sup> y chent̄šana fshantse b̄econana bejaycá fs̄nj̄ána, Regio puebl̄oye jashjangūents̄cuana. Ȳéfsana, tsmanoicana tsjuanoye en̄j̄etsebin̄ȳiaye, y chca, ch̄e in̄ye ȳéfsana Puteoli puebl̄oye fs̄nj̄ánashjajna. <sup>14</sup> Chent̄se básefta Jesucrist̄b̄eñe ošbuáchiȳenga fs̄nj̄ánan̄yena, y šonjan̄ebuaja ch̄ngaftaca can̄ye semana chent̄se j̄éft̄saj̄etanama; y chent̄šana Romoye fs̄nj̄éft̄sanbocna. <sup>15</sup> Romoca Jesucrist̄b̄eñe ošbuáchiȳenga ya imoj̄etsetat̄s̄m̄bo b̄nga choye fchjanashjajnama; chcasna, ch̄nga tmonj̄ánbocna b̄nga jaj̄ebenguama can̄ye luare Foro del Apio y Unga Tabern̄nga ca uabainónt̄soñe. Pablo ch̄nga tonj̄ánan̄ye ora, B̄ngbe B̄ts̄á t̄bontanchuá y puerte añ̄emoca en̄j̄etsemna. <sup>16</sup> Romoye fs̄nj̄ánashjajna ora, soldad̄engbe am̄endayá Pábl̄ebioye tbonjales̄enciá cán̄yabe yebnent̄se chaotsiyenama, y tonjanmandá can̄ye soldado chabotsebojan̄yama.

*Ndayá Pablo Romoca tojanma*

<sup>17</sup> Choye fs̄nj̄ánashjaj̄nent̄šana unga tianoye, Pablo tonjanmandá chent̄se imnoyena judīnga más uáman̄nga chamob̄econama; y n̄jetscanga ya tmojáneneñna ora, cha tojan̄yana: —Cat̄sátanga judīnga, masque at̄se tondaye chiyatsma b̄nga judīnga mondb̄ets̄ama soȳengama contra, ni b̄ngbe b̄ets̄ taitanga imojanamana soȳengama contra, judīnga Jerusalenoca šmonjanishache y roman̄ngbe cucuat̄sīne šmonj̄ánboshjona. <sup>18</sup> Ch̄e roman̄nga lempe šmonjant̄já chent̄šana, mon̄j̄etseboše at̄se j̄étsboshjonana, er ndocna bacna soye chemátanin̄yena at̄se j̄obanama chašotsemnama. <sup>19</sup> Pero ch̄e judīnga ndoñe quem̄t̄etseboše at̄se chašmuatsboshjonama; chíyeca, šonjanotocá jáimpadana cach Romoca b̄ets̄ uámana mandado cháuyana at̄se t̄sabá o ndoñe t̄janmama, masque at̄se tondaye quets̄átbom̄na, cach at̄sbe luarent̄sa ents̄anga, judīngbe contra jayanama. <sup>20</sup> Chíyeca, at̄se t̄bonj̄ubuaja ján̄yama y jáuyanama, er ndayama ch̄e Israeloca ents̄anga puerte jt̄sošbuáchiȳese mondbátmanama, ch̄e oban̄nga mochtayenama, at̄se mora utamená s̄ent̄semna ca —tojan̄yana.

<sup>21</sup> Chora ch̄nga tmojan̄iyana: —B̄nga ni mo can̄ye tsbuanácha Judeocana fchiyat̄aȳngaca acbiama noticīngaca, y ni can̄ye cat̄sata judío, chocana moye ashjaj̄n̄guents̄á, ndocna bacna soye acbiama chešnatacutá. <sup>22</sup> B̄nga fs̄ent̄seboše joudenana nt̄samo aca cojuabnama, er nt̄samo Jesucrist̄be uston̄ngbiam̄a fsts̄tat̄s̄m̄bcá, entsemna ana n̄jets̄ luarenache ch̄ngbe contra ents̄anga imojtsichamo ca.

<sup>23</sup> Asna, canye tescama Pablo tmojaniyana chca chaotsemnana; y chë tena, ba entšanga chë Pablo posada inabomnoye tmojanobeconá. Y cachëscana tojanjéanëntscuana, Pablo entšanga yojanëtsëtsná Bëngbe Bëtsabe amëndayama, ndayama cha ininje y inatátšëmbo; y yojtsentšena chënga jáyëñjanama Jesúsbeñe chamotsošbuáchema, Moisesbe leyënguentša soyëngaca y Bëngbe Bëtsabe juabna oyebuambnayëngbe uabemana libréšangañe soyëngaca. <sup>24</sup> Báseftanga aïñe imojtsošbuáchiye ntšamo Pablo yojtsanëtsëtsnacá ndegombre bëtsemnana, pero ínjëngna ndoñe. <sup>25</sup> Njëtscanga ndoñe cachcá montsanjuabnaye causa, tmojanontšé chentšana jésebecanana. As Pablo tojanëyana: “Njëts razónaca chë Uámána Espíritu tšëngafangbe taitanga tojanëyana, Bëngbe Bëtsabe juabna oyebuambnayá Isaiásbijana, mëntšá:

<sup>26</sup> Motsa chë entšanga jauyanama:

‘Bëtscá šmochantsuenana, pero tondaye quecmochátësertana; tša šmochantsafšna, pero tondaye quešmochátinje.

<sup>27</sup> Muentša entšanga ainánaca josértama ndoñe quemátsboše causa, chënga nduauenanënga montsemna y nduabinýñëngnaca; chënga bomínýeca ndoñe chamondobená jinýama, ni chëngbe matscuašeca jouenama, ni chëngbe ainánaca josértama ndoñe chamondobená, chca, atšbe benache ndoñe chamondishachama, atše ndoñe ntjátsebacama ca.’ ”

<sup>28</sup> Pablo chora mëntšá tojanëyana: “Ndegombre šmochtsetátšëmbo, cach quem Bëngbe Bëtsabe buayenana soyënga entšanga bacna soyënguentšana játsebacama, chë ndoñe judiëngbioye mochanjábuayenaye, y ndegombre chënga cocayé aïñe mochanjóyeunaye ca.” <sup>29</sup> (Pablo chca tojánayana ora, chë judiënga chentšana imojésebecana y tša imojtsenatsëtsnaye.)

<sup>30</sup> Pablo uta uata chentše tonjanoquedá canye uántšamena yebnentše; y njëtscanga cha jauatsëtsayama monjánajñënga cha enjanëbuájajana. <sup>31</sup> Njëtscangbe delante puerta añémoca entšanga enjanabuayiná Bëngbe Bëtsabe amëndayama, y enjanabuatambá soyënga Bëngbe Utabná Jesucristbiana, y ndocna Romoca mandayá quebëñjatanauyá chca jtsamama.

## Romanos

### *Pablo Romoca ošbuáchiyënga jacheuayama*

<sup>1</sup> Atše Pablo, Jesucristbe oservená, quem tsbuanácha séntsabianná. Bëngbe Bëtsá sonjanchembo Jesucristbe ichmoná jtsemnana, y sonjanbocacá chabe tšabe noticiëngama entsanga chayábuayenama.

<sup>2</sup> Ya bayté entsemna, Bëngbe Bëtsá chabe juabna oyebuambnayëngaftaca chë tšabe noticiënga entsanga tojanašebuachená, y chënga chca tmojëfstanábema Bëngbe Bëtsabe uabemana palabrénguiñe. <sup>3-4</sup> Chë tšabe noticiëngna, chabe Uaquiñá Bëngbe Utabná Jesucristbiana jtsóyebuambnayana. Entśá quetsomñecana, tojanonýná canýe rey Davidbentša entsábentšana; pero chabe espíritu sempre uamanáyecna, Bëngbe Bëtsá chabe obenánaca entsanga tojaninýanyé Jesucristo chabe Uaquiñá bëtsemnana. Cha chca tojaninýanyé chë Uaquiñá cháuatayenama cha tojanma ora.

<sup>5</sup> Chábeyeca, Bëngbe Bëtsá atše canýe bëts soyama šojanábuayana, Jesucristbe ichmoná jtsemnana, chabe soyëngama entsanga jábuayenama, y nýets luarënguenache Jesucristbeñe ošbuáchiyënga chamotsemnana, y chca, ntšamo cha yomandacá chënga chamotseyeunanama. <sup>6-7</sup> Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanýënga Bëngbe Bëtsá tmojáchembo Jesucristbenga chašmotsemnana. Atše tšëngaftangbiana séntsabianná, tšëngaftanga Bëngbe Bëtsabe bonshánënga y chabe entsanga chašmotsemnana chëmbonënga. Atše séntsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnana, y chaboma tšëngaftanga ainaniñe tšabe ebionana chašmotsebomnana.

### *Pablo tša inaboše Roma bëts puebloye jama*

<sup>8</sup> Jabojátsamna, Bëngbe Bëtsá, Jesucristbiajana šcuatschuá, cada ona tšëngaftanguentšabiama, er nýets quem luariñe entsanga tša monjesoyebuambná tšëngaftanga Jesucristbeñe bëtscá šmojtsošbuáchema. <sup>9</sup> Bëngbe Bëtsá, nda nýets ainánaca séndëservena, tšabe noticiënga chabe Uaquiñabiana abuaiyinyaiñe, endétátšëmbo atše nýets tempo Bëngbe Bëtsáftaca stsencuénta ora, tšëngaftangbiana séndétseimpadanama; <sup>10</sup> y mora Bëngbe Bëtsá séntseimpadana, nýa mora y cha tojtsebošëse, chašolesenciá jama tšëngaftanga jautsëtsayama. <sup>11</sup> Er atše tša sënýešeboše tšëngaftanga jányama, chca, atše chayobená jamana chë Uámana Espiritbentšana yóbocana tšabe soyënga tšëngaftanga chašmotsebomnana; y chca, tšëngaftanga ainaniñe bëts añemo chašmotsebomnana, y Jesucristbeñe corente chašmotsošbuáchema; <sup>12</sup> o más tšabá jayanamna, tšëngaftanga y átsëftaca mochjenájabuache ainaniñe bëts añemo jtsebomnana, tšëngaftanga y átsnaca Jesucristbeñe tša imošbuacheyeca.

<sup>13</sup> Y morna, Jesucristbeyeca catšátanga, séntseboše tšëngaftanga chašmotsetátšëmbo atše ba soye jama tijájuaboma, tšëngaftanga jautsëtsayama, pero mëntscoñama ndoñe tšjobenaye. Atše séntseboše ndayá chayobená jamana inýënga tšëngaftangbioca Jesucristbeñe chamotsošbuáchema, ntšamo inýëngbeñe ndoñe judiëngbeñe tonjopasacá. <sup>14</sup> Atše Jesucristbiana canýe oservená séndmëna, y chíyeca nýetscángaftaca obligaciönaca bëtsemna, chë pueblënguiñe oyenëngaftaca y bën tjoye oyenëngaftaca, chë uatsjinýenëngaftaca y ndoñe chcangaftácnaca. <sup>15</sup> Chíyeca atše tša séntseboše tšëngaftanga chë Romoca šmoyenëngnaca chë tšabe noticiënga jábuayenama.

### *Chë tšabe noticiënga Bëngbe Bëtsabe obenana jtsinýanýanayana*

<sup>16</sup> Atše ndoñe quetsátëuatja chë tšabe noticiënga jtsabuayinayama, er chë noticiënga jtsinýanýanayana Bëngbe Bëtsabe obenana; y chë obenánaca, nýetscanga Jesucristbeñe ošbuáchiyënga jtsobenana atsebácanënga jtsemnana, natsana chë judiënga chca ošbuáchiyënga, pero chë ndoñe judiëngnaca. <sup>17</sup> Er chë tšabe noticiënga jtsinýanýanayana ntšamo Bëngbe Bëtsá inétsama entsanga chabe bominýiñe tšábenga chamotsemnana. Y entsanga chabe bominýiñe tšábenga jábiamana, chënga Jesucristbeñe tmojtsošbuáchema. Ntšamo Bëngbe Bëtsabe uabemana palabrénguiñe endayancá: “Nýe ndabiana Bëngbe Bëtsá tojama chabe bominýiñe tšabia chaotsemnana, cha Bëngbe Bëtsábeñe betsošbuáchema, cha ndegombre chë nýetsca tescama yomna tšabe vida echántsebomna ca.”

### *Bëngbe Bëtsabe delante nýetscanga culpa bomnënga mondmëna*

<sup>18</sup> Bëngbe Bëtsá celocana tojinýanyé, chë uabouana castigo, tša tbojetnama entsangbiana chaotsemnana, ainaniñe bacna juabnënga bomnëngbiana y chë bacna soyënga amëngbiana y ndëmuanýëngbiana, masque Bëngbe Bëtsabe ndegombre soyënga jtsotatšëmbñana, tša bacna soyënga tmojtsama causa, ndoñe ntjalesénciana cachënga jtsiyenama ntšamo ndegombre yomncá. <sup>19</sup> Bëngbe Bëtsá echanjácastigaye, er ntšamo entsanga imobencá Bëngbe

Bëtsabiana jtsetatsëmbuama soye, chëngaftaca sempre endëtsemna. Y chca endmëna, Bëngbe Bëtsá chë soye tojinÿanyëyeca. <sup>20</sup> Bëngbe Bëtsá quem luare tojanma orscana, entsanga mondetsobena botamana josértana, Bëngbe Bëtsabe obenana ndocna te yochjéftsopochócama y cha ndegombre Bëngbe Bëtsá yomnama. Chë soyënga Bëngbe Bëtsabiana entsanga quemátobena jinÿana; nÿe jtsetatsëmbuamna aíñe. Entsanga mondobena chë soyënga Bëngbe Bëtsabiana jtsetatsëmbuana, cachá tojanma soyëngaca. Chcasna, chënga ndoñe quemátobena jayanana bacna soye tmojama, cha nduabatma causa ca. <sup>21</sup> Chënga Bëngbe Bëtsabiana mondëtatšëmo, pero ndoñe ntsebošana chábioye jadórana, “aca ndegombre Bëngbe Bëtsá condmëna ca” jtsichámëse, ni cha ntsatschuanayana. Pero, ntšamo chënga tmojtsejuabnacá tondaye ntsámanana; ndoservena juabnëngaca y bacna juabnëngaca montsiyena, y chca, chënga montsiyena, jtsamëse ntšamo cachëngbe juabnënga yomncá, mo ibetiñe cuafstajncá. <sup>22</sup> Chënga jtsichámuana corente osertánënga imomna ca, pero ndegombna juabna ndbomnënga mondëmëna. <sup>23</sup> Chënga ndoñe ntsadoránana Bëngbe Bëtsá, chë ndocna te yochjéftsobaná; chë cuenta, soyënga tmojobopormá mo entsangá, y chëngna aíñe jóbanana; o soyënga shloftšëngcá o bayëngcá, o osjojnayëngcá, y chënga diosënga imomna ca jtsejuabnayëse jtsadoránana.

<sup>24</sup> Chíyeca, Bëngbe Bëtsá cachá tojónÿa, cachëngbe ainaniñe puerte bacna juabnëngaca mandánënga chamotsiyenama, y chca, bacna soyëngnaca ínÿengaftaca imojtsama; chë soyëngamna jtsëuatjana chënga entsamna. <sup>25</sup> Chënga chca jtsemnana, er ndoñe tmonjábosëna Bëngbe Bëtsabe ndegombre soyënguiñe jtsošbuáchiyana, pero chë ndoñe ndegombre soyënguiñe cocayé jtsošbuáchiyana; chënga jtsadoránana y jtseservénana, Bëngbe Bëtsá quem luarentse tojama soyënga; pero ndoñe ntsadoránana, ni ntseservénana cach Bëngbe Bëtsá, chë nÿetsca chë soyënga tojanmá. Entsanga nÿets tempo cha chamotsatschuaná. Chca chaotsemna.

<sup>26</sup> Entsanga chca ndoñe tšabá tmonjámayeca, Bëngbe Bëtsá cachá tojónÿa, chënga ínÿengaftaca bacna soyënga jtsamama chamotsebošana; chë soyëngamna jtsëuatjana chënga entsamna. Y chca, chë shembásengnaca tmojtšajbaná boyabásengaftaca jtsamana ntšamo tšabá yomncá, inÿe shembásengaftaca bacna soyënga jtsamama. <sup>27</sup> Cachá, boyabásenga tmojtšajbaná shembásengaftaca jtsamana ntšamo tšabá yomncá; y tša imojtseboše inÿe boyabásengaftaca bacna soyënga jtsamama. Chënga chë inÿe boyabásengaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguiñe jasúfriase, ntšamo chëngbe bacna soyëngama yojtšëmerecencá.

<sup>28</sup> Chënga ndoñe tmonjábosëna jtsiyenana jtsejuabnayëse, ntšamo entsanga Bëngbe Bëtsabiana imotatsëmbcá ndegombre bëtsemnana. Chíyeca Bëngbe Bëtsá cachá tojónÿa, cachëngbe ndbëmana juábncaca chamotsiyenama; y chca, chënga ba soyënga jtsamana, jamama ndoñe yontsamncá. <sup>29</sup> Chënga nÿetscna bacna soye jtsamana: ainaniñe nÿetscna bacna juabna jtsebošnana, nÿe cachëngbiana bëtscá soyënga jtsebošnana tša jésebošana, y ínÿengbioye ntšámnaca jáborlama jtsebošana; chënga nÿe játsbošana inÿa tojtsebošna soyënga jtsebošnana, ínÿenga jtsëbanayana. Mondëmëna penzentserënga, ínÿenga áingñayënga, puerte bacna soyënga ínÿengbiana bošënga, y uayátsenayënga. <sup>30</sup> Chënga ínÿengbiana podësca jtsóyebuambnayana, Bëngbe Bëtsá jtsáyayana, ínÿenga jtsóyanguayana, nÿe cachëngbe soyënga más iuámána ca jésejuabnayana, tša jtsenábatomnayana, jésejuabnayana ntšamo muanjobenaye más bacna soyënga jamana; chëngbe bëtšétsangbioye ndoñe ntsayaunanana. <sup>31</sup> Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebobonshánana y ndocnabiana ntjóngmiana. <sup>32</sup> Y chënga corente mondëtatšëmo chca soyënga amëngbiana, Bëngbe Bëtsá chabe leyíñe tojajana jóbanama yojtšëmerecena ca; pero masque chca, chënga nÿets tempo chca jtsamana, y oyejuayënga jtsénÿayana ínÿenga cachá tmojtsama ora.

## 2

### *Bëngbe Bëtsá echanjama chë ndoñe tšabe soye amënga bëtš castigo chamotsebošnana*

<sup>1</sup> Chcasna tšëngaftanga, chë ínÿenga ndoñe tšabá montsama ca šmojtšichámënga, ndoñe quemátobena jayanana ndáyeca chca cach tšëngaftanga šmojama soyëngama. Tšëngaftanga chca ínÿengbiana šmojtšichamo ora, jtsinÿanyñayana cach tšëngaftángnaca ndoñe tšabá šmonjamama, y castigánënga jtsemnana cmontsamna, er tšëngaftanga cachëngcá šmojtšiyena. <sup>2</sup> Bënga mondëtatšëmo, Bëngbe Bëtsá ntšamo ndegombre yomncá inétsamama, chë chca amëngbiana ndoñe tšabá tmonjama ca y castigánënga jtsemnana yojtšamna ca cha tojajana ora. <sup>3</sup> Y tšëngaftanga, chë ínÿenga ndoñe tšabá montsama ca šmojtšichámënga, y cachca soyënga šmojtsama, ¿šmojtsjuabná Bëngbe Bëtsabe castigüentšana šmochjotsbocá ca? <sup>4</sup> Bëngbe Bëtsá tšëngaftangbiana corente tšabe juabna endbomna; mora ndoñe quemátacastigaye, y tšëngaftangafacta puerte uantado nÿe chca

endétsemna. ¿Chama tséngaftanga cha šmojtsábotena? ¿Ndoñe šmondétatšëmbo Bèngbe Bètsá chca corente jtsababuányeshanése cmojtsénŷa, tséngaftanga juabna chašmotrocama y chabe benache chašmuishachama cha yobóseyeca? <sup>5</sup> Er tséngaftanga ndoñe quešmátsboše chacmotséertánama, y bacna soyènga amama jtsajbanama ndoñe quešmátsboše causa, šmantsama más bèts castigo chašmotsebonnama, chë ndayté Bèngbe Bètsá ntšamo entsanga tmojamcá tsábá o ndoñe tsábá bétsemnama yochjayana ora; chë te, Bèngbe Bètsá echanjamánda chë ndoñe tsábe soye amènga bèts castigo chamotsebonnama, y chë tsábe soye amèngna, uacanana soye; y chca echanjama ntšamo ndegombre yomncá, y echanjínŷanŷiye cha tša tbojetna, entsanga ndoñe tsábá tmonjamama. <sup>6</sup> Chca, chë te, ntšamo cada ona tojéftsemama, Bèngbe Bètsábentšana echanjójyèngacñe. <sup>7</sup> Ndèmuanyènga nyets tempo tsábá jtsamése imoyena, y chca imonguá Bèngbe Bètsá más uámanènga chauabiama, cha chéngbiana tsábá chaotsyebuambná y tsábe vida jtsebonnama chaoma; chë te chéngbiana Bèngbe Bètsá echanjama, chë nyetsca tescama yomna tsábe vida chamotsebonnama. <sup>8</sup> Inŷenga imoyena, nŷe cachèngbe juabnèngaca chéngga tsábá jtsomñiama; y ntšamo ndegombre tsábá yomncá tmojtsaboté, ntšamo ndoñe tsábá yomncá jtsamama. Y Bèngbe Bètsá chë te, ndoñe tsábá tmonjéftsobuachjanguamna puerte etonaná echanjayana nyetsca tescama castigánènga jtsemnana chénga yojtsamna ca. <sup>9</sup> Bèngbe Bètsá echanjama, chca amèngna puerte chamosufrima y lastemcá chéngbiana chaotsemnama, er yapa tsetšénana chéngbiana echanjéftsemna; chca echántsemna chë chcángbeñe judiènga imomnèngbiana natsana, y ndoñe judièngbiámnaca. <sup>10</sup> Pero chë te, Bèngbe Bètsá echanjama, ntšamo tsábá yomncá amèngna puerte uámanènga chamotsemnama, chéngbiana corente tsábá echanjójyebuambaye, y echanjama chénga cháftaca tsábá tempcá chamot-satsmènama; y chca echántsemna chë chcángbeñe judiènga imomnèngbiana natsana, pero ndoñe judièngbiámnaca.

<sup>11</sup> Er Bèngbe Bètsabiana nyetscanga cachcá monduámána. <sup>12</sup> Chë Moisesbe ley ndoñe monduábomnènga, bacna soye tmojamamna castigo mochántsebonna, masque leyènga ndoñe monduábomnèse, ndayá yojtsamna jamama chaúyanama; y chë Moisesbe leyènga imuabomnèngbiamna, bacna soye tmojamama, Bèngbe Bètsá echanjayana chénga ndoñe tsábá tmonjama ca y castigo chamotsebonna ca, chë leyènguñe iuayana soyèngaca. <sup>13</sup> Chca endmèna, er Bèngbe Bètsá ndoñe queonŷbatsma entsanga chabe bominŷiñe tsábènga chamotsebonna, nŷe ntšamo chë leyíñe iuayancá tmojtsuenanama, sinó ntšamo leyènguñe iuayancá, ndayá jamama yojtsamncá tmojtsamése. <sup>14</sup> Chë ndoñe judiènga chca leyènga ndoñe quematábomna, pero chéngbe ainanentša juabnènga tojtsétsètsná ndayánaca jamana, y ndayá chamotsamama ntšamo chë leyènguñe tomandancá chénga tmojamése, chénga jtsinŷanŷinayana tsábá imotátšëmbo ndayá aíñe o ndoñe inétsamna jamama, masque leyènga ndoñe tmonduábomnèse, ndayá yojtsamna jamama chaúyanama. <sup>15</sup> Ntšamo tmojtsiyencá chénga jtsinŷanŷinayana, ndayá leyíñe yomandánama chénga ainaniñe cachcá imojuabnama. Ntšamo chénga ainaniñe imotátšëmbo y imojuabnacá ndayá cachènga tmojamama, jtsinŷanŷinayana chénga ntšamo chë leyíñe yomandánama cachcá imojuabnama. Inŷe ora, chéngbe juabnènga echantsétsètsnaye aíñe o ndoñe tsábá tmonjama ca; y ndayté, Bèngbe Bètsá nyetscangbiana ntšamo tmojamama yochjayana ora, cachèngbe ainaniñe tmojuabó soyèngaca, cha echanjínŷanŷiye ndayá tsábá o ndoñe tsábá tmonjamama. <sup>16</sup> Chë te, Bèngbe Bètsá nyetscangbiana echanjayana chéngbe juabnèngama y ntšamo tmojamama, ndayá entsanga tempo ndoñe tmonjáninŷama; cha chca echanjama Jesucrístoftaca; y chë atšè sèndabuayinŷa tsábe noticiènga entsichamo ndegombre chca yochtsemnama.

### *Judiènga y Moisesbe ley*

<sup>17</sup> Y mora tséngaftangbiana, chë judiènga šmomna ca ichámènga, y tša šmojtsejuabná Moisesbe léyeca tséngaftanga tsábe vida jtsebonnama, y jtsenábotamnyana Bèngbe Bètsábe ubuáyana entsanga šmomna ca; <sup>18</sup> tséngaftanga chë ntšamo Bèngbe Bètsá yobošcá tséngaftanga chašmotsamama tatšèmbènga, y chë leyentšana šmojuatsjinŷe jobocacayana ndayá más tsábá jamama tojtsemncá. <sup>19</sup> Tséngaftanga tša jésejuabnayana, šmobena inŷenga chë ntšamo tséngaftanga cmésertancá ndosertánènga jujabuáchama ca, mo jtanènga unachayènga cuaftsemnèngcá, o mo chë ndoñe binŷniñcá oyenèngbe juabnènga binŷnayèngcá; <sup>20</sup> tséngaftanga jtsejuabnayana chë ntšamo tsábá yomncá ndosertánèngbiana abuáiyinŷayènga šmomna ca, y mo chë basengcá tondaye nduatsjinŷenèngbiana abuátambayènga ca. Tséngaftanga tša jésejuabnayana chë ley šmobomnama, lempe šmotátšëmbo ca y ntšamo šmojtsichamcá ndegombre yojtsemna ca. <sup>21</sup> Y chcasna, tséngaftanga chë inŷenga abuátambayènga, ¿ndáyeca ndoñe cach tséngaftanga šmondétsánatsana? Tséngaftanga inŷengbioye jtsabuayinŷayana ndoñe chamondétsatbèbanama; as, ¿ndáyeca cach tséngaftanga šmnétsatbèbana? <sup>22</sup> Tséngaftanga jtsichámuana, acbe shema o boyábioye ndoñe inŷaftaca cattseingñaye ca; as, ¿ndáyeca tséngaftanga cachcá šmnétsama? Tséngaftanga jtsáboyènjana

soyënga chë ndayama inyënga tmojtsichamo diosënga yomna ca y jtsadórayana; as, ¿ndáyeca chë soyënga chënga jadórama yebnënguentsana uamana soyënga šmnëtsatbëbana? <sup>23</sup> Tšëngaftanga tša jtsenábotamnayana chë ley šmobomnana; as, ¿ndáyeca šmonyíbëtsama inyënga Bëngbe Bëtsabiana podësca chamotsóyebuambnana, tšëngaftanga chë leyentša mandënga jobedësama ndocna te ntsebošana causa? <sup>24</sup> Chama, Bëngbe Bëtsabe uabemana palabrënguifë mëntšá endayana: “Tšëngaftanga judiëngbe causa, ndoñe judiëngbeñe Bëngbe Bëtsabiana ndoñe tšabá quematoyeuambná ca.”

<sup>25</sup> Tšëngaftanga ntšamo leyifë yomandancá šmojtsamëse, Bëngbe Bëtsábënga šmomnana jinýanýiyama, chë más delicadentše base bobachtema tëtšëñënga jtsemnana tšabá nántsemna; pero ntšamo chiñe tomandancá ndoñe šmontsamëse, chca tëtšëñënga jtsemnana, tondayama ntososervëñana, y chca, tšëngaftanga jtsemnana mo chë más delicadentše base bobachtema ndëtëtšëñëngcá. <sup>26</sup> Y chë ndoñe judiënga chë más delicadentše base bobachtema tëtšëñënga, judiëngcá ndoñe quemátsmëña; pero chënga ntšamo leyifë yomandancá tmojtsamëse, ndegombre Bëngbe Bëtsá chënga echanjúbuaja mo cachabe entšangcá. <sup>27</sup> Y chca, tšëngaftanga judiëngbiana Bëngbe Bëtsá echanjayana ndoñe tšabá šmonjama ca, ntšamo leyifë yomandancá ndoñe šmontsama causa. Cha chca echanjama, er bëtscá ndoñe judiënga mondmëña y chënga ntšamo leyifë yomandancá mondocumplina, pero chënga ndoñe quemátsmëña tšëngaftangcá tëtšëñënga, jtsinýnana Bëngbe Bëtsábënga šmomnana. Tšëngaftanga, masque Bëngbe Bëtsabe uabemana ley šmonduábomna y chë más delicadentše base bobachtema tëtšëñënga šmondmëña, cabá ndoñe šmontsama ntšamo leyifë iuayancá, ndayá jamama cmojtsamnama.

<sup>28</sup> Chcasna, nda chë más delicadentše base bobachtema tmojatëtse ora, chábioye chë soye ndoñe ntjábemana canye ndegombre judío. Y canye entšá ndoñe Bëngbe Bëtsábia ntsemnana nye inyënga chë más delicadentše base bobachtema tmojatëtšama. <sup>29</sup> Y canye entšá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entšá yomnana tojtsinýnñase. Y chca, canye ndegombre judío, chënga Bëtsabe entšá yomnana chaotsinýnamna ndoñe quenátsmëña chë más delicadentše base bobachtema jtsetëtšëñana, sinó ntšamo Bëngbe Bëtsá tojamcá chabe ainaniñe chaotsebínýnana. Bëngbe Bëtsabe Espíritu jamana entšá chca ainana chaotsebonmna, ndayá inétsinýnñayë cha canye ndegombre judío yomnana; y chë uabemana ley ndoñe quenátobena chca jamana. Bëngbe Bëtsá endmëña chë tšabe soye entšabiana ichamuá; entšanga ndoñe.

### 3

<sup>1</sup> Chcase, ndánaca šuatjatjaye, as ¿Bëngbe Bëtsabe entšá jtsemnana jëftsashjáchama, más tšabá yojtsemna canye judío jtsemnana ca? ¿Base bobachtema chë más delicadentše tëtšëñá jtsemnana becá yojtsámama ca? <sup>2</sup> Aifë, chca jtsemnana corente enduámama y nyëtsca soyënguifë; natsana chjayana, Bëngbe Bëtsá, judiënga chabe palabra tojanabanýe, nyëtschangbiana chamotsinýñenama. <sup>3</sup> Y morna, ¿ndayá yochjopása nederado judiënguëntše báseftanga ya ndoñe chca tmontsentšëñëse? Y chë causa, ¿Bëngbe Bëtsánaca yochtsajbaná ntšamo tojašebuachenacá amana? <sup>4</sup> ¡Ndoñe, ndegombre ndoñe! Chca ndoñe cha queochatsma; tšëngaftanga šmondëtatsëmbo Bëngbe Bëtsá sempre endbëtsama ndayá jamama tojašebuachenacá, masque nyëtsca entšanga bosterënga chamotsomñe. Er Bëngbe Bëtsabe uabemana palabrënguifë Bëngbe Bëtsabiana mëntšá endayana:

Aca ntšamo chacojayana ora, nyëtscanga mochanjinýe aca ntšamo ndegombre yomncá cnëtsamama;

y chacojtsenëuyaná ora, sempre cochanjinýanýie acbe contra tmojtsoyeuambnángbioye, chënga ndoñe tšabá montsamama ca.

<sup>5</sup> Pero bënga ndoñe tšabe soye montsama ca báseftanga tmojayana ora, Bëngbe Bëtsá sempre tšabá inétsamama entšanga más tšabá jinýama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tšabá tonjama ca, bëngbiana castigo chaotsemna ca cha tojayana ora? (Morna atše sëntsoyeuambná ntšamo entšanga jóyebuambayama monduamancá.) <sup>6</sup> ¡Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nyëts tempo ntšamo ndegombre yomncá ndoñe tontsamëse, ndegombre cha ndoñe nanjobenayë jayanama nyëtsca quem luarentša entšangbiana, ntšamo tmojamcá tšabá o ndoñe tšabá bëtsemnana.

<sup>7</sup> Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerte uamaná y bëtsá yomnana jinýanýiyama, y Bëngbe Bëtsá siempre ntšamo ndegombre yomncá tojtsamama jinýama entšanga tmojtsobenëse, ¿ndáyeca Bëngbe Bëtsá cabá iuichamo ntšamo atše tijamcá ndoñe tšabá yontsemna ca y atše canye bacna soye amá stsemna ca?” <sup>8</sup> Y chcase, ndánaca mëntšá nanjátayana: “Ntšamo ndoñe tšabá yondmëncá mochjama, chca, entšanga chámuinýe Bëngbe Bëtsá puerte tšabia yomnana ca.” Ndegombre, atše mal jaquédama báseftanga



tmojayana atše chca stsabuatambá ca; Bèngbe Bètsá chca abuatambayënga echanjácastigaye, ntšamo castigánënga jtsemnana imomerecencá.

*Ntšamo entšá tojtsamama, Bèngbe Bètsabe bominiyíne ndocná tšabia ntsemnana*

<sup>9</sup> Y asna, ¿Bèngbe Bètsá bënga judiënga inyëngbiana más tšabá šonya? ¡Ndoñe, ndegombre ndoñe! Atše ya sënjininyé judiënga y ndoñe judiëngnaca, chë bacna soyënga jamama juabnëngaca mandánënga imomnana. <sup>10</sup> Er Bèngbe Bètsabe uabemana palabrenguiñe mētšá endayana:

Ntšamo entšá tojtsamama, ndocná Bèngbe Bètsabe bominiyíne tšabia quenátsmëna.

¡Ndoñe, ndegombre ndoñe, ni mo canya chca quenátsmëna!

<sup>11</sup> Ndocná quenátsmëna ntšamo ndegombre yomncá chabotsosertánama;

¡Ndocná quenátsmëna nda chaotseboše Bèngbe Bètsáftaca jtsemnana!

<sup>12</sup> Nyetscanga ndoñe tšabe benache tmojishache y chiñe montsajna.

Chënga nyetscanga Bèngbe Bètsabe bominiyíne tondayama quemátoserverna.

Ndocná quenátsmëna ntšamo tšabá yomncá chaotsamama, ¡ni canya ndoñe!

<sup>13</sup> Ntšamo tmojtsichamcá puerte bēts bacna soye jtsemnana, mo canye obanabe cuevēshe atēfñēshe puerte bacá tojtsonguētšecá.

Chënga tmojtsoyebuambná soyëngaca inyëngbiye jtsaíngñayana.

Chë tmojtsichamo soyëngaca puerte bacna soye inyëngbiana jtsamana, mo canye mētšcuaye tbojtseftēse orcá, chë veneno canye entšábiye jóbana.

<sup>14</sup> Chënga, nyets tempo inyëngbiana podesca jtsichámuana, y sempre jtsyebuambnayana chë inyënga ntšámnaca jáborlama.

<sup>15</sup> Sempre jtseprontánana inyëngbiye ntšámnaca jáborlama y jobáyama.

<sup>16</sup> Chënga siempre jtsiyenana inyënga chamotsesufrínama jtsamése, y nye ntšámnaca jtsaborlánana.

<sup>17</sup> Chënga ndocna te tondaye ntjamana nyetscanga natjëmbana chamotsiyenama;

<sup>18</sup> Chënga ndoñe ntсийenana Bèngbe Bètsabiana jtsejuabnyése, cha chë más bētsá nyetscangbiana yomnana ca —chiñe endayana.

<sup>19</sup> Er bënga mondétatšëmbo, lempe ntšamo leyíne iuabemancá, chë leyëngaca mandánënga imoyenëngbiana yomnana. Chcasna, chë ley endmëna, Bèngbe Bètsabe delante ndocná chaondobená jayanama, cha ndoñe tšabá tonjama, chama ndoñe yonjátatšëmbo causa ca; y endmëna jinñanyiyama, ntšamo tmojamcá tšabá o ndoñe tšabá bētssemnana Bèngbe Bètsá nyetscangbiana yochjayana ora, nyetscanga yojtsamna chabe delante jayanama, ndáyeca ntšamo tšabá yomncá ndoñe tmonjama ca. <sup>20</sup> Er, Bèngbe Bètsá ndoñe queochatma ndocná chabe bominiyíne tšabia chaotsemna, ntšamo leyíne yomandancá cha tojamama; chë ley bëngbiana jamana, nye bënga bacna soye tmojamama chamotsetatšëmbuama.

*Ntšamo Bèngbe Bètsá inama entšanga chabe bominiyíne tšábenga chamotsemnana*

<sup>21</sup> Pero mora, Bèngbe Bètsá tonjinñanyé ntšamo cha inama entšanga tšábenga chabe bominiyíne chamotsemnana; y Bèngbe Bètsá ndoñe ntjamana canya chabe bominiyíne tšabia chaotsemnana, ntšamo ibomncá cha tojtsamama, ntšamo chë leyënguiñe y mandënguiñe yomncá. Pero masque mora chca, Bèngbe Bètsá tonjinñanyé, Moisesbe leyíne y Bèngbe Bètsabe juabna oyebuambnayëngbe librëšangañe yopodena jinñenana chca yochtsemnana.

<sup>22</sup> Bèngbe Bètsá jamana entšanga chabe bominiyíne tšábenga chamotsemnana, chënga Jesucristbeñe tmojtsobuáchema. Bèngbe Bètsá nyetscanga Cristbeñe ošbuáchiyëngbiana chca jamana, y chabiana nyetscanga cachcá monduámana; <sup>23</sup> er nyetscanga bacna soye tmojama, y chë causa, ndocna entšá tonjobená jashjáchana ndocna bacna soye ndbomná jtsemnana y puerte bētsá jtsemnana, ntšamo Bèngbe Bètsá tojanjuabocá entšanga chamotsemnana. <sup>24</sup> Pero Bèngbe Bètsá chëngbiana corente tšabe juabna bómnyeca, mo ndayá cuafjatšatacá, cha jamana chënga chabe bominiyíne tšábenga chamotsemnana. Bèngbe Bètsá chca tojanma, Cristo Jesúsbeyeca, entšanga atsebácanënga chamotsemnana y ya ndoñe más bacna soyënga jamama juabnëngaca mandánënga chamondëtsemnana cha tojanma ora. <sup>25</sup> Bèngbe Bètsá cha tjojanábuayana, chabe buñe juabuáshañe y jóbañe, cha chaotsemna ndábeyeca Bèngbe Bètsá entšanga bacna soyëngama jáperdonama; Jesucristbeñe jtsobuáchiyése entšanga jobenayana perdonánënga jtsemnana. Bèngbe Bètsá chca tojanma, jinñanyiyama cha inétsama entšanga tšábenga chabe bominiyíne chamotsemnana, chë entšanga bacna soyënga tmojanmama chë tempo ntjatonñayacá, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye. <sup>26</sup> Cha lempe chca tojanma, jinñanyiyama cha sempre ntšamo ndegombre yomncá inétsamama, y nyetscanga Jesucristbeñe ošbuáchiyënga chabe bominiyíne tšábenga chamotsemnana inétsamama.

<sup>27</sup> Chcáyeca, entsá ndoñe ntsobenana tondayama ntsenábotamnayana. Chca endmëna, er Bëngbe Bëtsá tsabia chabe bominiñiñe jabemana, ndoñe ntšamo leyiñe tomandancá cha tojtsamama, sinó nñe Jesucristbeñe tojtsosbuáchema. <sup>28</sup> Y chca jayanëse, mora bënga tsabá montsetátšëmbo, Bëngbe Bëtsá inétsama canñe entsá tsabia chabe bominiñiñe chaotsemnana, nñe Jesucristbeñe tojtsosbuáchema, y ndoñe ntšamo leyiñe yomandancá cha tojtsamama.

<sup>29</sup> ¿O Bëngbe Bëtsá nñe judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna; <sup>30</sup> er nñe canñe Bëtsá nñetscangbiana endmëna, y cha echanjama chë más delicadentse base bobachtema tétšenënga imomnëngbiana y ndoñe chcangbiámnaca, chabe bominiñiñe tsábenga chamotsemnana, Jesucristbeñe tmojtsošbuáchema. <sup>31</sup> Chcasna, Bëngbe Bëtsá jamana entsanga chabe bominiñiñe tsábenga chamotsemnana, Jesucristbeñe tmojtsošbuáchema; ¿chca yojtsayana chë ley nñe tondayama yondoservena ca? ¡Ndoñe, ndegombre ndoñe! Inñetšá, chca jamana chë ley más chaotsámanama.

## 4

### *Ntsamo Abrahánoftaca tojanopasá*

<sup>1</sup> Morna Abrahambiana mochjóyebuambaye, bëngbe tempsca bëts taitá, y mochjinñe ndayá tojánatsjinñe Bëngbe Bëtsábeñe ošbuáchiyana bomnentsana. <sup>2</sup> Abraham chabe bominiñiñe tsabia chaotsemnana, ndayá cha tojanmama Bëngbe Bëtsá matënjammëse, cha matënjanobená entsángbeñe ndayama jtšenábotamnayana, pero Bëngbe Bëtsabe delante ndoñe; <sup>3</sup> er Bëngbe Bëtsabe uabemana palabrenguiñe mëntsá endayana: “Abraham, Bëngbe Bëtsábeñe yojtsosbuáchiye, y chíyeca Bëngbe Bëtsá tonjánayana cha chabe bominiñiñe tsabia yojamna ca.”

<sup>4</sup> Canñe entsá trabajayá, crocénana josháchiñana ndayá tojamama, pero chë crocénana ndoñe nñe tšetanana ntsemnana, sinó chana jtsemnana ntšamo cha tojtsomerecencá. <sup>5</sup> Er menójuabonga, nda tondaye tontsama Bëngbe Bëtsá cháuyanama cha chabe bominiñiñe tsabia yomna ca, pero aíñe tojtsosbuaché Bëngbe Bëtsábeñe, nda endbáyana chë bacna soye tojamënga mora mo ndoñe chca cuafjamcá chamotsemna ca, chabiama Bëngbe Bëtsá echanjama chabe bominiñiñe tsabia chaotsemnana, chabe ošbuáchiyama. <sup>6</sup> Rey David cachcá chabe librësañe tojánayana, chë ndabiama Bëngbe Bëtsá jayanana chabe bominiñiñe tsabia chaotsemna ca, masque chabiama chca cháuyanama tondaye tonjamëse. David chca entsabiama tojánayana, cha puerte echantsoyejuaye ca. <sup>7</sup> Chabe librësañe mëntsá tojanábema:

¡Tša oyejuayënga jtsemnana chë Bëngbe Bëtsá chëngbe bacna soyënga tojáperdonanga, chë Bëngbe Bëtsá chëngbe bacna soyënga tojabuajuánanga!

<sup>8</sup> ¡Puerte oyejuayá jtsemnana chë Bëngbe Bëtsá mo ndoñe bacna soye cuafjama cuenta tbojtsonyá cha ca!

<sup>9</sup> ¿David tojánayana nñe chë más delicadentse base bobachtema tétšenënga imomnëngbiana oyejuayana yomna ca? Ndoñe; ndoñe chca mondmëñëngbiámnaca. Y muentse tmonjayana, Abraham Bëngbe Bëtsábeñe yojtsosbuachéyeca, Bëngbe Bëtsá tojánayana cha chabe bominiñiñe tsabia yojamna ca. <sup>10</sup> Y ¿ntseco chca tojanopasá? ¿Abraham ya chë más delicadentse base bobachtema tétšená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tétšená yontsemna ora. <sup>11</sup> Y cabá chentšana, Abraham base bobachtema chë más delicadentse tétšená yojtsemna; y chca yojamna jinñanñiyama, Bëngbe Bëtsá tempo ya chabiama tojánayana cha chabe bominiñiñe tsabia yojamna ca, cha Bëngbe Bëtsábeñe yojtsosbuáchema. Lempe chca tojanopasá, jinñanñiyama Abraham mo taitacá yomnama Bëngbe Bëtsábeñe imošbuachëngbiana, masque ndoñe base bobachtema chë más delicadentse tétšenënga mondmëna. Y cachcá Bëngbe Bëtsá chë ošbuáchiyëngbiana tojánayana, chënga chabe bominiñiñe tsábenga imomna ca. <sup>12</sup> Y Abrahámnaca endmëna mo chë taitacá, chë más delicadentse base bobachtema tétšenënga imomnëngbiana, pero aíñe Bëngbe Bëtsábeñe corente jtsosbuáchiyëse imoyenëngbiana, cachcá ntšamo bëngbe bëts taitá Abraham Bëngbe Bëtsábeñe yojtsosbuachecá. Y cha cabá chë más delicadentse base bobachtema ntsetétsena ora, ya chca yojtsosbuáchiye.

### *Jtsosbuáchiyëse, ntšamo Bëngbe Bëtsá tojašebuachenacá jóshjanguana*

<sup>13</sup> Bëngbe Bëtsá tojanašebuachená Abrahambiana y chábentšana entsangbiana, quem luare chëngbiana yochjëftsemna ca. Y chca tojanašebuachená, ndoñe Abraham ntšamo leyiñe yomandancá betsobedecénama, sinó cha Bëngbe Bëtsábeñe yojtsanosbuáchema, y chíyeca Bëngbe Bëtsá tojánayana cha chabe bominiñiñe tsabia yojamna ca. <sup>14</sup> Pero,

ntšamo Bèngbe Bètsá tojanašebuachenacá, bènga ntšamo chë leyíñe yomandancá tmojtsamèngbiamá yojtsemna ca tmojayanèse, Bèngbe Bètsábeñe jtsošbuáchiyana tondayama nantsoSERVERENA, y ntšamo Bèngbe Bètsá tojanašebuachenacá tondaye ntsámanana. <sup>15</sup> Chë ley juabocnana, Bèngbe Bètsá puerte etonaná entsanga cháucastigama, chënga ntšamo chíñe luayanca ndoñe tmontsamama; pero ndocna mandënga tontsemnëse, ndocná ntsobenana chë ndoñe tontsayancá ndoñe ntjamana.

<sup>16</sup> Y chca, Bèngbe Bètsá Abrahámbioye tbojanšbuachená, cha yojtsanošbuachéyeca, ntšamo Bèngbe Bètsá tojanašebuachenacá, ndegombre chaotsemnana chë Bèngbe Bètsábeñe imošbuáchemá mo Abrahámbentsana entsangcá imomnèngbiamá; y Bèngbe Bètsá chca tojanašebuachená, cha chëngbe tsábiamá iuantjéshayeca. Chë mo Abrahámbentsana entsangcá imomnèngbeñe, ndoñe quemnatsmëna nýe chë ntšamo ley yomandacá imnétamënga, sinó nýetscanga chë ntšamo Abraham tojanošbuachecá Bèngbe Bètsábeñe imošbuachëgnaca. Y Abraham nýetscanga bèngbiamá, Bèngbe Bètsábeñe ošbuáchiyënga, mo taitacá endmëna. <sup>17</sup> Ntšamo Bèngbe Bètsábeñe uabemana palabrénguñe endayancá, Bèngbe Bètsá Abrahámbioye ibojtsatséshayeca ora: “Atse sënjama aca ba luariñe entsangbiamá atšbe bominyíñe taitá chacotsemnana ca.” Chë ntšamo tojanašebuachenacá ndegombre tsábe soye endmëna, er Bèngbe Bètsá chca Abrahambiamá yojanjuabná; y Bèngbe Bètsá endmëna ndábeñe Abraham yojtsanošbuaché, y nda inétsama entsanga chámuatayenama, y nda inamánda y entsanga jobenayana jinýama ndayá ndocna te tmonjaninýcá.

<sup>18</sup> Abraham Bèngbe Bètsábeñe yojtsošbuáchiye y yojtsobatmana ntšamo tbojanšbuachenacá chaotsemnana, masque entsábe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entsangbe taitá”, ntšamo Bèngbe Bètsá tbojaninýancá: “Achentsana entsanga tša mallajta mochántsemna, ndocná queochatobenaye jacúntana ca”. <sup>19</sup> Abraham yojanobatmanéntscuana, cha puerte chábeñe yojtsanošbuaché, ntšamo tbojanšbuachenacá jóyëngacñama, masque Abraham yojtsónýaye ya bétsanánjema yojtsemnana, er ya mo patse uata yojtsebomna, y chabe shema, Sara, ndoñe yonjobena šešonga jtsabamnana. <sup>20</sup> Abraham ndocna te tonjanajbaná Bèngbe Bètsábeñe ošbuáchiyana, y ni mo canýe ndoñe yonjanjuaboje chë ntšamo Bèngbe Bètsá tbojanšbuachenacá ndoñe joparëjana ca; sinó más corente chábeñe yojtsanošbuaché, y chca Bèngbe Bètsábioye ibojtsatschuanaye, <sup>21</sup> er cha tsábá inatátšëmbó, ntšamo tbojanšbuachenacá jamama, ndegombre Bèngbe Bètsá obená inamnana. <sup>22</sup> Chíyeca, Bèngbe Bètsá tojánayana cha chabe bominyíñe tsábiamá yojamna ca.

<sup>23</sup> Pero, chabe bominyíñe tsábiamá yojamna ca Bèngbe Bètsá tojánayana ora, ndoñe nýe Abrahambiamá chca ntsóyebuambnayana; <sup>24</sup> ndayá bèngbiámna, ndëmuanyëngbiamá Bèngbe Bètsá yochjayana chabe bominyíñe tsábënga imomna ca, bènga Bèngbe Bètsábeñe imošbuachéyeca; Bèngbe Bètsá, nda tojanma Bèngbe Utabná Jesús cháuatayenama. <sup>25</sup> Bèngbe Bètsá tojanalesenciá entsanga Jesús chamóbama, bènga bacna soyënga tmojanma causa, y Bèngbe Bètsá tojanma cha cháuatayenama. Bèngbe Bètsá chca tojanma jobenayama, bènga chabe bominyíñe tsábënga jábiamama.

## 5

### *Mora bènga Bèngbe Bètsábeñe bominyíñe tsábënga montsemna*

<sup>1</sup> Er Bèngbe Bètsá tojama bènga chabe bominyíñe tsábënga chamotsemnana, bènga chábeñe imošbuachéyeca; mora tempcá tsábá Bèngbe Bètsáftaca bènga montsatsmëna, Bèngbe Utabná Jesucristbeyeca. <sup>2</sup> Bènga Cristbeñe mondošbuáchemá, cha tojama bènga chamotsetatšëmbuama Bèngbe Bètsá tša tsábiamá yomnana, y Bèngbe Bètsábiocana tsábe soyënga jtsebomnëse mora chamotsiyenama. Bènga tša oyejuayënga jésemnana, er Bèngbe Bètsábeñe jtsošbuáchiyëse mondobátmana cha puerte uámanënga y bëtšétsanga sochjábiamama, batsá ntšamo cachá yomncá. <sup>3</sup> Y ndoñe nýe chama bènga oyejuayënga jésemnana, ndayá bènga tmojtsesufrina y padecena soyënguñe tmojtsajna órnaca. Chca mondbama, er bènga mondetatšëmbó bènga tmojtsesufrina orna, bènga juatsjinýana ntšamo uantadënga jtsemnana padecena soyënguñe tmojtssemna ora, Bèngbe Bètsábeñe jtsošbuáchiyëse. <sup>4</sup> Bènga padecena soyënguñe tmojtssemna ora, más tsábá uantadënga jtsemnana mondobéyayeca, Bèngbe Bètsá oyejuayá bèngaftaca jtsemnana, padecena soyënguentšana ndegombre tsábá tmojachnëngo ora. Bèngbe Bètsá oyejuayá bèngaftaca chaotsemnana bènga tmojanma ora, bènga jtsobenana más jtsobátmanana, ntšamo sojašebuachenacá cha yochjamama. <sup>5</sup> Bènga chca tmojtsobátmanëse, ndocna te nýe bonamente quemochatobátmana, er Bèngbe Bètsá sojinýanjé tša bëtscá cha šuababuánýeshanama. Bèngbe Bètsá chca tojama chë Uámana Espíritbeyeca, y cha endmëna nda Bèngbe Bètsá tbojanichmó bèngbe ainaniñe chaotsemnana jtsemándayama.

<sup>6</sup> Tempo bënga tondaye chemuatanobená jamana Bëngbe Bëtsabe bominiyiñe tšábenga jtsemnana, y chora Cristo tojanóbana bënga chë bacna soyënga tmojamëngbe tšabiamana, nya chama tempo yojamna ora. <sup>7</sup> Ndoñe paselo quenátsmëna jajuaboyana, ndáyeca canya nantseprontana jóbana canya ntšamo chë leyiñe yomandancá jamama tojtsamanabiama; pero, canya bëtsá jtsababuányeshanëse tšabe soyënga inyëngbiama tojtsamabiama, naderáose chabiamana jóbana cuantseprontana. <sup>8</sup> Pero Bëngbe Bëtsá bënga šojanýanýe tša šuababuányeshanama, er bënga cabá bacna soyënga ntsamcá imojoyena ora, Cristo bëngbiama tojanóbana.

<sup>9</sup> Cristo, chabe buiñe juabuáshanëse bëngbiama tojanóbanayeca, Bëngbe Bëtsá tojanma bënga chabe bominiyiñe tšábenga jtsemnana. Y chca endmënayeca, ndegombre Cristo šochanjátsebacaye, entšanga ndoñe tšabá tmonjama ca y castigo chëngbiama chaotsemna ca Bëngbe Bëtsá chaojayana ora. <sup>10</sup> Bënga tempo Bëngbe Bëtsá imojanaya; pero cha tojanma bënga cháftaca tempcá tšabá chamotsatsmënama, chabe Uaquiñá tojanóbanayeca. Y mora, bënga natjëmbana cháftaca chamotsemnana ya tojama ora, ndegombre atsebácënëga mochántsemna, chabe Uaquiñá ainá yómnyeca. <sup>11</sup> Y ndoñe nyë chca, ndayá Bëngbe cháftaca puerte oyejuayënga chamotsemnánaca Bëngbe Bëtsá jamana, ndayá Bëngbe Utabná Jesucristo bëngbiama tojánmayeca. Y mora, chábeyeca Bëngbe Bëtsá tojama bënga cháftaca tempcá tšabá chamotsatsmënama.

### *Adán y Cristo*

<sup>12</sup> Canye entšá bacna soye tojanma causa, nyëtscana entšanga bacna soyënga amënga tmojábocana; y cha tojanóbana, bacna soyënga tojanma causa. Y chca, nyëtscana entšanga entsamna jóbana, er nyëtscanga bacna soyënga tmojama. <sup>13</sup> Bëngbe Bëtsá Moisésbiöye chë leyënga cabá nduántšaboshjona ora, entšanga quem luarentšë bacna soyënga tmojanma. Pero ndocna ley tontsemna ora, Bëngbe Bëtsá ndoñe ntjanonýayana entšanga bacna soyënga tmojamama. <sup>14</sup> Nyëtscana entšanga, Adánbentšana Moisésbentšocñe, nyëtscanga yojánamna jóbana, ntšamo cach Adán tojanmcá ndoñe tmonjanmëngnaca, ntšamo cha ndoñe chaondëmama Bëngbe Bëtsá tbojanmandacá cha tojanma ora. Y Adánbeñe entšanga mondobena jinýama, ntšamo chë jabama ibojamná canye soyënguiñe yochtsannëna.

<sup>15</sup> Pero ntšamo chë útata tbojanmcá ndoñe cachca soye quenátsmëna; er Bëngbe Bëtsá entšangbe tšabiamana jtsejuabnáyëse tšabe soyënga chëngbiama tojanma ora, ndoñe yonjama mo ntšamo Bëngbe Bëtsá tbojanmandacá ndoñe chaondëmama Adán tojanma orcá. Tšëngaftanga šmondétatšëmbo, nyë canye entšá canye bacna soye tojanma causa, cha tojanma nyëtscana entšanga jóbana chaotsamnana, pero Bëngbe Bëtsá entšangbe tšabiamana yojuabnáyeca, más bëts soyënga jamana, chë Adánbe bacna soye entšangbiama bacna soyënga tojanmama. Chca, Bëngbe Bëtsá tojanma ba entšanga bëtsá tšabe soyënga chamotsebmnama; y chca tojama, nyë canye entšá, Jesucristo, tšabe soyënga tojánmayeca. <sup>16</sup> Chë ba entšanga bëtsá tšabe soyënga chamotsebmnama Bëngbe Bëtsá tojamentšana endóbocana soye, puerte inyëtšá comna, chë entšá Adán, canye bacna soye tojanmentšana tojanóbocna soyama. Adán bacna soye tojanmentšana, Bëngbe Bëtsá tojánayana chana bacna soye tojanma y castigo jtsebmnama ibojtsemna ca, y nyëtscana entšángnaca chë causa; pero masque nyëtscanga bacna soyënga tmojama, Bëngbe Bëtsá entšangbe tšabiamana ndoñe bëndëtsebnatjëmbayeyeca, tojanma entšanga chabe bominiyiñe tšábenga chamotsemnana y chë bacna soyëngama castigánënga ndoñe chamondëtsemnana. <sup>17</sup> Ndegombre endmëna, canye entšá bacna soye tojanma causa, nyëtscana entšanga jóbana yojtsamna. Pero puerte más, canye entšá Jesucristo tojanma. Ndëmuanyëngbiama Bëngbe Bëtsá tojama bëtsá tšabe soyënga chamotsebmnama, ndëmuanyëngbiama Bëngbe Bëtsá tojama chabe bominiyiñe tšábenga chamotsemnana, y Bëngbe Bëtsábiocana chca tmojóyëngacñënga, chënga nyëtscanga mochantsiyena bacna soyënga jtseyënjanayëse y nyëtscana tescama mo bëtsëtsangcá; y chca echántsemna ndayá Cristo tojánmayeca.

<sup>18</sup> Y chca, ntšamo canye entšá, Adán, canye bacna soye tojanmama, Bëngbe Bëtsá tojánayana nyëtscanga bacna soye tmojanma y castigánënga chamotsemna ca; cachcá ntšamo canye entšá, Cristo, puerte tšabe soye tojánmayeca, Bëngbe Bëtsá jayanana nyëtscanga imojtsobena chabe bominiyiñe tšábenga jtsemnana y chë nyëtscana tescama yomna tšabe vida jtsebmnama ca. <sup>19</sup> Y ntšamo Bëngbe Bëtsá tbojanmandacá ndoñe chaondëmama canye entšá tojanma causa, nyëtscana entšanga bacna soye amënga tmojanobiama; cachcá, ntšamo Bëngbe Bëtsá tbojanmandacá canye entšá, Jesucristo, tojánmayeca, Bëngbe Bëtsá tojanma bëtsá entšanga chabe bominiyiñe tšábenga chamotsemnana.

<sup>20</sup> Chë ley entšangbe cucuatšinë tmojanáboshjona, jinýanýiyama ntšamo ndegombre yomna bacna soyënga jtsamana; pero entšanga más bacna soyënga imojtsama ora, Bëngbe

Bëtsá cabá más chëngbe tšabiana yojtsanjuabnaye y más tšabe soyënga chëngbiana yojtsama. <sup>21</sup> Chcasna, mora mochjayana, entšanga bacna soyëngaca puerte mandánënga imojamna, y chca, nyetscanga jóbanama yojamna ca. Pero mora, ya ndoñe chca quenátsmëna, er Bëngbe Bëtsá tojama entšanga chabe bominyiñe tšábënga chamotsemnana, Bëngbe Utabná Jesucristbeyeca chë nyetsca tescama yomna tšabe vida chamotsebomnana; chiyeca mora bënga montsobena jtsiyenama, Bëngbe Bëtsá šojatšatá tšabe soyënga lempe bëngaftaca jtsemnëse.

## 6

### *Cristbeyeca bënga tšabe vida jtsebomnana*

<sup>1</sup> Y asna, ¿ntšamo mochjayana? ¿šojtsamna jtsiyenana sempre bacna soyënga jtsamëse, chca, Bëngbe Bëtsá šuababuányeshanama más chašotsinyányanama, cha más bacna soyënga bënga jtsaperdónayëse? <sup>2</sup> ¡Ndoñe, ndegombre ndoñe! Tempo bënga monjaniiyena bacna soyënga jamama juabnëngaca mandánënga, pero mora bënga montsobena jtsiyenana chë juabnënga tondaye bëngbiyoe ntsamcá, y chca, bënga montsobena mo obanëngcá chë soyëngama jtsemnana; y as, ¿ndáyëca bënga muatjatsjuabnaye ntšamo ndoñe tšabá tontsemncá jatiyenana? <sup>3</sup> Er ndegombre tšëngaftanga šmondëtatšëmbo, bënga uabáinënga tmojanocuédá ora, tmonjaninyányé bënga Cristo Jesúseftaca cányiñe mo canyácá bëtsemnana; y bënga uabáinënga tmonjanocuédá ora, enjamna mo bënga cuafjobancá, ntšamo Cristo tojanobancá. <sup>4</sup> Bënga uabáinënga tmonjanocuédá ora, enjamna mo bëngnaca cháftaca cuafjobancá, y cháftaca uatabuantsanëngcá. Chca yojamna, bënga chamotsobenama mo tsëm entšangcá jtsiyenama, ntšamo Cristoftaca tojanopasacá, cha cháuatayenama Bëngbe Bëtsá tojanma ora, chabe puerte bëts obenánaca.

<sup>5</sup> Bënga Cristoftaca cányiñe mo canyácá jtsemnëse, cha tojanóbana ora mo bëngnaca cháftaca cuafjobancá enjámnyeyeca, ndegombre bënga cányiñe mo canyácá cháftaca mochántsemna, bënga cachiñe vida nyetsca tescama chamotatsbomnana Bëngbe Bëtsá jtsamëse, ntšamo Cristo cháuatayenama cha tojanmá. <sup>6</sup> Y bënga mondëtatšëmbo, chë ntšamo bëngbe vida enjamncá, bacna juabnëngaca mandánënga, Jesucristbeyeca cabá ntsošbuáchiye ora, mora ya ndoñe chca yontsemnana; y chca entsemna mo chë tempca vida chaóbanama cuafjamcá, Cristo tmojanrucificá ora. Chca yojamna, Bëngbe Bëtsá jobenayama chë bacna soyënga jamama bëngbe juabnënga jtsepochócama; y chca, ya ndoñe más chë bacna soyëngaca mandánënga chamondëtsemnana, mo nyëts tempo nyë inyabiama oservenëngcá. <sup>7</sup> Er canyë entšá tojóbaná ora, chë bacna soyënga chábiyoe ya ndoñe más ntsemándayana. <sup>8</sup> Er Cristo tojanóbana ora, mo bëngnaca cháftaca cuafjobancá endmënyeyeca, cháftaca jtsiyenamnaca bënga montsošbuaché. <sup>9</sup> Bënga mondëtatšëmbo Cristo cháuatayenama y ndocna te cha cachiñe jatóbanama Bëngbe Bëtsá tojanmama; y ndocna obenana queochatsma cha cachiñe chauatóbanama. <sup>10</sup> Cha tojanóbana, y chë bacna soye jamama juabnënga ndocna te ntjobenayana chábiyoe jamándana, y inyënga ndoñe imontsobena ntšamo cha jabórlana; y ntšamo mora cha yoyencá, Bëngbe Bëtsá jtserervénama yomna. <sup>11</sup> Cachcá, tšëngaftanga cmontsamna jtsejuabnyana, chë ya ndoñe más bacna soyëngaca mandánënga šmojtsemnana, pero vida šmobomna lempe jtsamëse Bëngbe Bëtsá tšëngaftangaftaca oyejuayá chaotsemnana, Cristo Jesúseftaca cányiñe mo canyácá jtsemnëse.

<sup>12</sup> Tšëngaftanga cmontsamna, chë bacna soyënga jamama ainanentšë šmobomna juabnëngaca ndoñe más mandánënga ntsemnana, chca, tšëngaftanga ndoñe chašmondëtsamama juabnëngaca nyë cach tšëngaftanga, tšëngaftangbe cuerpiñe tšabá jtsomñama. <sup>13</sup> Tšëngaftanga ndoñe quecmátamna jalesénciana ndaye tšëngaftangbe cuerpentša soye, bacna soyënga jamama chaoservema. Chamna, tšëngaftanga cmontsamna Bëngbe Bëtsá jauyanana, lempe ntšamo tšëngaftanga šmomncá, cha jaserviama chaotsemna ca, tšëngaftanga chë šmomna mo ya ndoñe más obanëngcá Bëngbe Bëtsabiana, y tojanma tšabe vida chašmotsebomnana; y jauyanana nyetsca tšëngaftangbe cuerpentša soyëngna Bëngbe Bëtsá jaserviama yojtsamna ca. <sup>14</sup> Ndoñe quecmátamna bacna soyëngaca mandánënga jtsemnana, er tšëngaftanga ndoñe quešmátiyena leyiñe iuayana soyëngaca mandánënga, y šmondoyena Bëngbe Bëtsá tšëngaftangbiana tšabá jtsejuabnyëse.

### *Osbuachiyá obligacionaca jtsemnana ntšamo tšabá yomncá jamama*

<sup>15</sup> Y asna, ¿bënga imojtsobena bacna soyënga jamana, chë leyiñe iuayana soyëngaca ndëmandánënga imomnana, y Bëngbe Bëtsá bëngbiana tšabá jtsejuabnyëse bënga imoyenama? ¡Ndoñe, ndegombre ndoñe! <sup>16</sup> Tšëngaftanga tšabá šmondëtatšëmbo, inyabe cucuatšifne mo nyëts tempo nyë inyabiama oservenëngcá šmojoquédá ora, cha jtsobedecénama, ndegombre tšëngaftanga chë nduiñbiana nyëts tempo oservénënga jtsemnana. Chcasna, cachcá jtsemnana, chë tšëngaftanga šmojabocacá bacna soyëngaca

mandánënga jtsemnana, y chca jtsemnana mo Bëngbe Bëtsabe bominiyïne tšëngaftanga nyëtsca tescama obanënga cuaftsemncá, o Bëngbe Bëtsá jtsobedecénama, y chca, chabe bominiyïne tšábënga jabocanana. <sup>17</sup> Pero šontsamna Bëngbe Bëtsá jtsatschuanayana, er tempo tšëngaftanga mo nyë inýabiama oservenëngcá šmojamna, bacna soyënga jamama juabnëngaca mandánënga; pero mora nyëts ainánaca šmojoyeuná, ntšamo chë tcmojanabuatambá soyënguïne šmojyëngacñëcá. <sup>18</sup> Bëngbe Bëtsá tšëngaftanga cmojatsebacá, bacna soyëngaca ndëmandánënga chašmotsemnana, y morna mo Bëngbe Bëtsabiama oservenëngcá šmojabocna, ntšamo tšabá yomncá jtsamama. <sup>19</sup> Muentše sënjoyebuambá ntšamo entsanga mondbetsichamcá, er tšëngaftanga ndoñe corenta juabna quešmátsbomna toto palabrënga chacmósertama. Tempo, tšëngaftanga šmonjanamana jalesénciana, lempe ntšamo šmojamncá mandánënga jtsemnana, bacna soyënga shembásaftaca o boyabásaftaca jamama juabnëngaca, y nyë ndaye bacna soyënga jamama juabnëngaca. Cachcá, mora tšëngaftanga cmontsamana jalesénciana tšëngaftanga chašmotsemnana juabnëngaca mandánënga tšabe soyënga jtsamama, chca, ndegombre Bëngbe Bëtsabe entsanga chašmotsemnana.

<sup>20</sup> Tšëngaftanga, cabá bacna soyënga jamama juabnëngaca mandánënga šmonjamna ora, tšëngaftanga ndoñe obligacionaca quešmënjatsmëna ntšamo Bëngbe Bëtsabiama tšabá yomncá játamama. <sup>21</sup> ¿Ndaye tšabe soye tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtsëuatja. Chca soyënga tcojamentšana jóbocnana, entsá nyëtsca tescama castiganá chaotsemnana, mo Bëngbe Bëtsabe bominiyïne nyëtsca tescama obaná cuaftsemncá. <sup>22</sup> Pero mora, ndoñe quešmátsmëna bacna soyënga jamama juabnëngaca mandánënga, y mora bëtscá šmojtsentsëna Bëngbe Bëtsá jtseyunanana y jtseservénana. Chca jtsamana, tšëngaftangbiamna puerte tšabá entsemna, er chca, Bëngbe Bëtsabe entsanga šmochántsemna, y cabana, chë nyëtsca tescama yomna tšabe vida šmochántsebmna. <sup>23</sup> Bacna soyënga tcojtsamentšana jóbocnana entsá nyëtsca tescama castiganá chaotsemnana, mo Bëngbe Bëtsabe bominiyïne nyëtsca tescama obanënga cuaftsemncá; pero, Bëngbe Bëtsá šojtsatsatná soyënguentsana, jóbocnana chë nyëtsca tescama yomna tšabe vida jtsebmnnana, Cristo Jesús Bëngbe Utabnáftaca cániyïne mo canýacá jtsemnëse.

## 7

### *Chë bouamnátbentsana ndayá bëngbiamna mochjuatsjinýe*

<sup>1</sup> Jesucristbeyeca catšátanga, tšëngaftanga šmotátšëmbo ntšamo chë leyënga entsangbiamna inëtsemnana; tšëngaftanga šmotátšëmbo, ntšamo chë leyïne tojtsayancá canýe entsá chaot-samamna, nyë chë entsá tojtsainëntscuana chábioye jtsemándayana. <sup>2</sup> Chcasna, canýe bouamna shembása, ntšamo chë leyïne endayancá bontsemna chabe boyáftaca jëtsemnana, chë boyá tuainëntscuana; pero chë boyá tojtsobanëšna, chë leyïne endayana, chë shemna canýa jtoquédana, chë boyabiamna ndëmandaná ca. <sup>3</sup> Y chca, chë shema inýe boyabásaftaca chabe boyábioye tbojaingñë, chë boyá cabá vida totsóbomñe ora, chë shemna jtsabáinana chabe boyábioye inýaftaca ingñayá ca. Pero chabe boyá tojtsobanëšne, chë leyïne endayana chë shemna canýa jtoquédana, chë boyabiamna ndëmandaná ca, y cha jtsobenana inýaftaca jtobouamayana; y chca tojama ora, boyábioye inýaftaca ingñayana ndoñe ntsemnana.

<sup>4</sup> Tšëngaftanga chë ošbuachiyëngaftácnaca cachcá endmëna; ya ndoñe más chë léyeca mandánënga quešmátsmëna, er Cristo tojanóbana ora šmojánbocna, mo chë soyëngama obanënga cuafjoquedangcá, inýabe entsanga jtsemnana, Crísbënga, ndabiamna Bëngbe Bëtsá tojanma cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jaserviama. <sup>5</sup> Bënga chë nyë ntšamo cabënga imnabošcá monjaniyena ora, chë ley enjanoserverna bëngbe ainaniñe chamotsebmnnama bacna soyënga jamama puerte bëtš juabnënga, nyë bënga tšabá jtsomñama. Ba bacna soyënga tmonjanma, y chë causa bënga šonjánamna nyëtsca tescama castiganënga jtsemnana, mo Bëngbe Bëtsabe bominiyïne nyëtsca tescama obanënga cuaftsemncá. <sup>6</sup> Pero mora Bëngbe Bëtsá šojatsebacá chë léyeca ndëmandánënga chamotsemnana; chë ley tempo enjamna bëngbiamna mo canýe amëndayacá. Pero mora bënga chë leyama mo obanëngcá montsemna; chca, bënga ndoñe chamondëšiyenama ntšamo tempo enjamncá, chë uabemana leyëngaca mandánënga, y aïñe tsmëcá chamotsiyenama, ntšamo chë Uámana Espiritu iuamcá bënga vida chamotsebmnnama.

*Bacna soye jamama juabna tcojtsebmnnëse, chë ley jamana entsá bacna soye chaomama*  
<sup>7</sup> Báseftanga muanjayana cach ley bacna soye yomna ca; ndegombre, chë ley ndoñe chca quenátsmëna. Chë léyeca atše tšabá sëndëtátšëmbo ndayá yomna bacna soye jamana. Atše ndocna te matijántátšëmbona ndayá yomna chë “inýabioye jtsántšabošana”, “inýabioye ndoñe catsantsaboše ca” chë leyïne ndoñe matmënjanábemëse. <sup>8</sup> Pero bacna soyënga jamama juabnënga atše bomna causa tonjanma, atše puerte chaitsebošama chë ndoñe šonjamna jtsebošana soyënga; y chca chë juabnëngaca tonjanopasá, atše chë leyënguïne ndayá

iuayanama jtsejuabnayése. Er ndocna ley tondmëna ora, entśá ndoñe ntsetatsëmbuana ndayá yomna bacna soye jtsamana. <sup>9</sup> Canýe tempo enjamna, chora atśe sënjaniyena leyëngama ntsetatsëmbcá, pero ntśamo leyíñe iuayancá sënjanabuátmana ora, ndayá jamama ndoñe yonjamnama, atśe sënjanontśé chë bacna soyënga jamama juabnëngaca mandaná jtsemnna; <sup>10</sup> y chora atśe sënjántatsëmbona, chë causa šojtsanmëna nyëtśca tescama castiganá jtsemnna, mo Bëngbe Bëtsabe bominiýiñe nyëtśca tescama obaná cuaftsemncá. Bëngbe Bëtsá chë mando tojanma, atśe chë nyëtśca tescama yomna tśabe vida jtsebojnna chayobenama, chë ley jtseyeunanése; pero ndoñe chiyatanobedecé causa, chë mando tonjanma atśe chašotsemna nyëtśca tescama castiganá jtsemnna. <sup>11</sup> Chë leyentśa mandíñe inýe soyënga ndoñe šonjëtsemna jamama ca yojtśayanayeca, chë bacna soyënga jamama juabnënga átśbeñe, šmonjaningñe bacna soyënga jamama; y chë mando bëtsemnna, chë bacna soyënga jamama juabnënga tmonjanma atśe chašotsemna nyëtśca tescama castiganá jtsemnna, mo Bëngbe Bëtsabe bominiýiñe nyëtśca tescama obaná cuaftsemncá.

<sup>12</sup> Pero bënga mëntśa mochýana: chë leyña tśabe soye endmëna, er Bëngbe Bëtsábiocana tojanóbocna, y chë mandëngnaca Bëngbe Bëtsábiocana tojanóbocna ca; chiñe endayana ndayá tśabá yomna jamana y chca tśabá jtsemnana. <sup>13</sup> Y asna, žquem tśabe soye tojanma atśe chašotsemna nyëtśca tescama castiganá jtsemnna, mo Bëngbe Bëtsabe bominiýiñe nyëtśca tescama obaná cuaftsemncá? ¡Ndoñe, ndegombre ndoñe! Chë bacna soyënga jamama juabnënga atśe bomna causa, chca átśeftaca tonjanopasá. Chë tśabá yomna sóyeca, chë bacna soyënga jamama juabnënga tmonjanma atśe chašotsemna nyëtśca tescama castiganá jtsemnna. Chca chë juabnëngaca tonjanopasá, entśanga jobenayama ntsetatsëmbuana ndayá yomna bacna soye jamana; y chë mando, bacna soye jamama ndoñe yondmëna ca jtsichámuana causa, nyëtśca entśanga mondobena jinýana canýe bacna soye, mo canýe puerte bëtś bacna soycá.

<sup>14</sup> Bënga mondëtatśëmbo chë ley Bëngbe Bëtsabe ley yomnna, pero atśna nýe canýe entśá sëndmëna, canýa tempo nýe bacna soyënga jamama juabnëngaca mandaná. <sup>15</sup> Ndegombre ndoñe queśnatësertana ntśamo sëntsamcá, er ndoñe ntsamana ndayá jamama stsebošcá, pero añe jtsamana ndayá jamama ndoñe šontsogustancá. <sup>16</sup> Pero chë atśbe ainaniñe stsejuabná ndoñe tśabá tontsemna soye stsamëse, ndayama leyíñe iuayana ndoñe candmëna ntsamana ca, chca atśe jtsinýanýayana chë ley ndegombre tśabe soye yomnna. <sup>17</sup> Chcasna, atśe ya ndoñe ntsemnana chë chca tojtśamá, ndayá chë bacna soye jamama atśbe ainaniñe yomna juabnënga jtsamana atśe chca jamama. <sup>18</sup> Atśe sëndëtatśëmbo, atśbe ainaniñe tondaye yontsemna ntśamo tśabá yomncá atśe jamama. Masque sëntseboše ntśamo tśabá yomncá jamama, ndoñe quetsátobena chca jamama. <sup>19</sup> Atśe ndoñe quetsátama chë tśabe soye ndayá jamama sëndbošcá, pero añe sëntsama chë bacna soye ndayá jamama ndoñe sëndbošcá. <sup>20</sup> Chë ndayá ndoñe jamama sëntsebošcá stsamëse, chca jtsayanana, atśe ya ndoñe stsemna chë chca yojtśamá, sinó chë bacna soye jamama atśbe ainaniñe yomna juabnënga chca yojtśama.

<sup>21</sup> Chca, atśe tijátatsëmbona ndayá átśeftaca yojtśopasánana; masque, ntśamo tśabá yomncá jamama stseboše, bacna juabnënga sempre jtsemándayana atśe bacna soye chaimama. <sup>22</sup> Atśbe ainanoca puerte sëntsoyejuá, Bëngbe Bëtsábiocana yóbocana mandëngama. <sup>23</sup> Pero atśe sënjinýena inýe soye átśeftaca yojtśopasánama; chë bacna soye jamama atśbe ainaniñe yomna juabnënga yojtśama atśe ndoñe ntjanama ntśamo atśbe juabnoca yomna mo ndegombre soycá, mo chë bacna soyëngaca mandaná cuaftsemncá.

<sup>24</sup> ¡Tśa lastema atśbiama! Chë bacna soye jamama juabnënga átśbeñe entsemánda, y entsama atśe chašotsemna nyëtśca tescama castiganá jtsemnna, mo Bëngbe Bëtsabe bominiýiñe nyëtśca tescama obaná cuaftsemncá. ¿Nda nanjobenaye chentśana atśe jatsbocama? <sup>25</sup> Nýe Bëngbe Bëtsá endmëna nda yobena atśe jatsbocama, Bëngbe Utabná Jesucristbeyeca. Chábioye chama mochtsatschuanaye. Atśbe ainanoca atśe añe sëntsejuabná chë ley puerte tśabe soye yomna ca, y jobedésama sëntseboše; pero chë bacna soye jamama átśbeñe yomna juabnëngaca, atśe bacna soyënga sëntsama, ntśamo chë juabnënga šontsemnadá.

## 8

### *Ntśamo Bëngbe Bëtsabe Espíritu yomandacá jtsiyenana*

<sup>1</sup> Y chca, Bëngbe Bëtsá ndoñe ntjayanana, Cristo Jesúseftaca cánýiñe mo canýacá imonñënga, chëngbe bacna soyëngama nyëtśca tescama castigánënga jtsemnna yojtśamna ca. <sup>2</sup> Er, chë Uámana Espíritofaca mandánënga mondmënayeca, Bëngbe Bëtsá šojatsebacá, bënga chë bacna soye jamama juabnëngaca mandánënga ndëtsemnna, y nyëtśca tescama castigánënga ndëtsemnna, mo Bëngbe Bëtsabe bominiýiñe nyëtśca tescama obanënga cuaftsemncá. Chë Uámana Espíritu jamana bënga ndegombre tśabe vida chamotsebojnna, cánýiñe mo canýacá Cristo Jesúseftaca jtsemnëse. <sup>3</sup> Bëngbe Bëtsá tojanma ndayá Moisesbe

ley ndoñe tonjanobenacá, er entsanga mondoyena nye ntšamo cachënga imobošcá, y nye cánýenga ndoñe ntšobenana jamana ntšamo tojtsamncá. Bëngbe Bëtsá tojánayana entsángbëñe bacna juabnëngbe mando jtsepochócama ca, y chama chabe Uaquiná tbojanichmó. Cha quem luaroye mo canýe entsacá tojánabo, canýe ainánaca, mo chë entsanga bacna soye amëngbe ainancá, pero ndocna te ni mo canýe bacna soye ndoñe tonjëftsema; y tojánabo, chábeyeca entsanga bacna soyëngama perdonánënga chamotsemnana. <sup>4</sup> Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espiritu ainaniñe yomandacá y ndoñe nye ntšamo bënga entsanga tmojtsebošcá, chamobenama tšabá jamana ntšamo chë leyíñe yomandancá, ntšamo šojtsamncá.

<sup>5</sup> Chë nye cachënga tšabá jtsomñama cachëngbe juabnëngaca imoyenënga, nye sempre jésejuabnayana bacna soyënga jtsamama, chca bacna juabnëngaca mandánënga; pero ntšamo chë Uámana Espiritu ainaniñe uamëndacá oyenëngna, sempre jésejuabnayana tšabe soyënga jamama, ntšamo chë Uámana Espiritu yobošcá. <sup>6</sup> Ntšamo chë nye cachá tšabá jtsomñama juabnëngaca mandaná oyenentšana jóbocnana entšá nyetsca tescama castiganá chaotsemnana, mo Bëngbe Bëtsabe hominýiñe nyetsca tescama obaná cuaftsemncá; y ntšamo chë Uámana Espiritu tojtsemandacá oyenentšana jóbocnana chë nyetsca tescama yomna tšabe vida jtsebošnana y ainaniñe tšabe ebionana. <sup>7</sup> Chë nyets tempo oyenënga nye ntšamo tmojtsebošcá nye cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoñe ntšamana ntšamo cha tojtsamëndacá, y chca jamama ndoñe ntšobenana; <sup>8</sup> y chca, chë nye chca bacna juabnëngaca oyenënga, ndoñe ntšobenana jamana ntšamo Bëngbe Bëtsá tšabá tbojtsinýancá.

<sup>9</sup> Pero tšëngaftanga ndoñe quešmátiyena nye cach tšëngaftanga tšabá jtsomñama cach tšëngaftangbe juabnëngaca, sinó šmojtsiyena ntšamo chë Uámana Espiritu tšëngaftangbe ainaniñe cmamëndacá, er chë Uámana Espiritu sempre tšëngaftangbe ainaniñe iuëtsemna. Nda ndoñe quem Cristbe Espiritu tondbomná, ndoñe Cristbia ntsemnana. <sup>10</sup> Pero Cristo sempre tšëngaftangbe ainantšë vida totsóbomñëse, masque tšëngaftangbe cuerpënga yochjopochóca, quem laurentse entsanga bacna soyënga jtsamana causa, tšëngaftangbe espiritu nyets tempo vida echanjesóbomñe, er Bëngbe Bëtsá tojama tšëngaftanga chabe hominýiñe tšábënga chašmotsemnana. <sup>11</sup> Y Bëngbe Bëtsabe Espiritu, Jesús cháuatayenama tojamabe Espiritu, sempre tšëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóbaná cuerpo, cachiñe vida chaot-satsbomnana. Cha chca echanjama chabe Espiritoftaca, y mua sempre tšëngaftangbe ainaniñe iuëtsemna.

<sup>12</sup> Chcasna, Jesucristbeyeca catšátanga, šontsamna jtsiyenana ntšamo chë Uámana Espiritu ainaniñe šuamëndacá; ndoñe quešnátamna jtsiyenana nye bënga tšabá jtsomñama cabëngbe bacna juabnëngaca; <sup>13</sup> er nye bënga tšabá jtsomñama cabëngbe bacna juabnëngaca šmojtsiyenëse, castigánënga šmochántsemna, mo Bëngbe Bëtsabe hominýiñe obanënga cuaftsemncá; pero Uámana Espiritbeyeca, chca juabnëngaca nyetsca bacna soyënga jtsamana jtsajbanama šmojobenase, chë nyetsca tescama yomna tšabe vida šmochántsebošna.

<sup>14</sup> Ntšamo chë Uámana Espiritu yomandacá tmojtsemëngna, Bëngbe Bëtsabe básënga jtsemnana. <sup>15</sup> Er Bëngbe Bëtsá ndoñe tonjama bënga ainaniñe canýe espiritu chamotsebošnana, mo nye ínýabiamá nyets tempo oservenëngcá chašotsamëndama, y chca cha chaoma bënga cachiñe chamotséuatjama; sinó chë Bëngbe Bëtsá tojama bënga chamotsebošnana Espiritu jamana bënga Bëngbe Bëtsabe básënga chamotsemnana, y chë Espiritu endama “Atšbe Taitá ca” bënga Bëngbe Bëtsá chamotsechëmbuanama. <sup>16</sup> Y chë Uámana Espiritu y bëngbe espiritu canýe ora jayanana bënga Bëngbe Bëtsabe básënga imomna ca. <sup>17</sup> Y Bëngbe Bëtsabe básënga mondmenayeca, bënëngaca mochanjóyëngacñe ndayá cha chabe básënga jatšatayama tojašebuachenacá; bënga y Cristo cánýiñe chë soyënga mochanjóyëngacñe, er bënga inýe soyënguñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsëtsanga chášuibiamama, ntšamo cach Cristo yomncá.

*Bëngbe Bëtsá bëtsëtsanga y uámanënga šochjábiamá*

<sup>18</sup> Atšë ndegombre sëndëtatšëmbo, ntšamo quem tempo bënga imosufrincá, puerte batšatema yomna chë bëngbe tšabiamá uámanana y buashinýinýanana Bëngbe Bëtsá šochjínýanýiyama. <sup>19</sup> Lempe ntšamo Bëngbe Bëtsá tojamcá endmëna mo tša cuaftsobatmancá, chaobuache chë Bëngbe Bëtsá ntšamo chabe básënga imomnana jinýanýiyama ora. <sup>20</sup> Er lempe ntšamo Bëngbe Bëtsá tojamcá, mora ndoñe yontsoservena ntšamo chaotsemnana cha tojanjuabocá. Chca tojanopasá, ndoñe chë lempe ntšamo cha tojanmccá chca chaotsemnana tojánbošenayeca, ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmccá josérviama ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmccá entsemna mo cuaftsobatmancá canýe te, ndëmua ora chë soyënga chaoservema cha yochjamama



jtsetatsëmbëse, ntšamo quem luare jobojátsama ora chama cha yojanjuabnacá; <sup>21</sup> Bëngbe Bëtsá canye te yochjama lempe ya ndoñe más chaondetsopochocama. Y chora, ntšamo Bëngbe Bëtsá yochjamcá chabe básenga chamotsemnana, lempe ntšamo cha yojanjuabnacá, chabe uámanana y buashinýinýanana jtsebojnana, cachcá yochjama lempe chë cha tojanma soyëngaca.

<sup>22</sup> Er bënga mondétatsëmbo lempe ntšamo Bëngbe Bëtsá tojanmcá mëntscoñama yomna mo canye shembása šešona jtsebojnana ora tbojtsetsetsama tojtsobësnacá; er lempe ntšamo cha tojanmcá entsemna mo tša cuaftsebošcá Bëngbe Bëtsá chaomama, chë soyënga chaoservema ndayama cha tempo tojanjuabocá. <sup>23</sup> Pero ndoñe nýe chë lempe ntšamo Bëngbe Bëtsá tojanmcá yojsemna mo chë shembasacá, sinó bëngnaca; y bënga ainaniñe mondbomna chë Uámana Espiritu, y chë soye endmëna ndayá natsana bënga tmojanóyëngacñe, chë Bëngbe Bëtsá bëtscá soyënga šochjátsatayentsana; bënga bëngbe ainanoca tša jesobësnayana, bënga chabe básenga chamotsemnana Bëngbe Bëtsá chaomama mondobátmanëntscuana, y hcá, Bëngbe Bëtsá chaoma bënga ndocna te ndopochócama cuerpënga chamotsebojnana. <sup>24</sup> Bënga, Bëngbe Bëtsábeñe jtsošbuáchiyëse monjobátmana ntšamo cha tojanayancá chaomama, y chíyeca cha bënga šojatsebacá; pero ndayama tmobatmancá, ya tojtsëchnëjuanama bënga tmojtsonýase, chora chama ya ndoñe ntjátobatmanëngana. Er ndocná jatobátmanana chë ndayá jinýama ya tojobenacá. <sup>25</sup> Pero ndayama bënga tmobatmancá, cabá ndoñe jinýama tmontsobena soye tojtsemnëse, bënga jtsamnana Bëngbe Bëtsábeñe jtsobatmanana, uantadënga jtsemnëse, ntšamo tojayancá Bëngbe Bëtsá chaomëntscuana.

<sup>26</sup> Uámana Espiritnaca bënga šochandbëtsëjabuachana, er bënga ainaniñe ndoñe corente ntsošbuáchiyana. Bënga ndoñe quemuátstatsëmbo Bëngbe Bëtsáftaca jencuëntana ntšamo ndegombre tšabá yomncá; pero cach Espiritu Bëngbe Bëtsábiyë bëngbiama jtsojtjanañana, mo hcá ora chabe ainanoca tša cuaftsobësnacá; y ndayá hcá ora tbojtsojtjanañamna, bënga ndoñe ntjobenayana bëngbe palábraca chama jóyebuambayama. <sup>27</sup> Y Bëngbe Bëtsana, ntšamo entsanga ainanoca tmojtsebošcá yonýa, y ntšamo chë Espiritu jayanama tojtsebošcá yotátsëmbo, er chë Espiritu chabe entsangbiama ibotjanañe, ntšamo Bëngbe Bëtsá yobošcá.

*Bënga ayëñjanayëngama más tmojábobcana*

<sup>28</sup> Y bënga mondétatsëmbo, Bëngbe Bëtsá nýetsca soyënguiñe inétsama cha imobobonshánëngbe tšabiama, ndëmuanyënga cha tojáchembo chabe entsanga chamotsemnana, ntšamo cha jamama yojanjuabnacá. <sup>29</sup> Jesucristbeñe imošbuachëngbiama, Bëngbe Bëtsá quem luare tojanma orscana yojanjuabná y chënga tojanabacacá hcá chamotsemnana, y chë tempscana tojaninýanáná chënga chabe Uaquiñacá chamotsemnana; hcá, chabe Uaquiñá chë bëtscá catšátangbeñe chë natsaná chaotsemnana. <sup>30</sup> Y chë Bëngbe Bëtsá hcá tojánabacacangnaca, tojánachembo chabe entsanga chamotsemnana; chëngbiama tojanma chabe bominiñe tšábenga chamotsemnana, y chëngbiámncá yochjama chabe uámanana y obenanentsana chamotsebojnana.

<sup>31</sup> Y asna, ¿chë soyëngama ntšamo mochjayana? Co Bëngbe Bëtsá bëngaftaca tojtsemnëse, bënga jáyëñjanama ndocná queochatobenaye ca. <sup>32</sup> Cha tondaye tonjanma chabe Uaquiñá jasúfriama ndoñe chabondëtsëmnana, sinó tojanalesenciá entsanga chamóba, nýetsca bëngbe tšabiama. Bëngbe Bëtsá chabe Uaquiñáftaca hcá tojanmëse, ndegombre Bëngbe Bëtsá lempe šochanjátsataye. <sup>33</sup> ¿Nda nanjobenaye jayanama chë Bëngbe Bëtsá tojábacacanga bacna soyënga tmojana y castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominiñe tšábenga imomna ca. <sup>34</sup> Y asna, ¿nda nanjobenaye jayanama bënga castigánënga jtsemnana šojtsamna ca? ¿Cristo Jesús cha yojtsemna? Ndoñe. Cristo, nda bëngbiama tojanóbana, pero cabá más, ndabiama Bëngbe Bëtsá tojanma cháuatayenama, y mora Bëngbe Bëtsábe catšbioica yojtsebemana, jamándama y puerte bëtsá chentšë jtsemnana; y choca, chánaca bëngbiama Bëngbe Bëtsábiyë ibotjanañe. <sup>35</sup> ¿Ndayá nanjobenaye Cristbentsana, chë tša šondababuanýeshanábentsana bënga jtsajuánayana? ¿Padeccena soyënguiñe jtsemnana, tša jtsetsetsana, bënga chamosufrima inýënga tmojtsama ora, tondaye saná shëntsana ora, tondaye entsáyá tmontsábomna ora, o resjo bëngbiama tojtsemna ora, o bënga jtsëbáyama inýënga tmojtseboše ora? <sup>36</sup> Ntšamo Bëngbe Bëtsabe uabemana palabrenguiñe endayancá, canye entsá Bëngbe Bëtsábiyë ibojauyana ora: Ache causa entsanga cada te šontsëtsësná bënga jtsëbáyama ca; entsanga bëngbiyë nýe ntšámncá jtsaborlánana;

bëngaftaca jamana mo chë jobáyama oveshëngaftaca mondbetsamcá ca.

<sup>37</sup> Pero ndoñe; nýetsca chë soyënguentšana bëngna ayëñjanayëngama más tmonjábocana, cha bënga suababuánýeshanayeca. <sup>38</sup> Er atše tšabá sëndétatsëmbo tondaye yondobena, bënga Bëngbe Bëtsábentsana, chë tša šondababuanýeshanábentsana jtsajuánayana: masque ainënga o obanënga tmojtsemna; ni angelënga, ni amëndayënga hcá jamama quemátobena;

ni chë mora yojtsëchnëjuana soyënga, ni chë más chcoye yochjopása soyënga; ni ndocna obenana cach ndoñe; <sup>39</sup> ndocna quem luarentša tsbanánoca soye, ni quem luarentša tajsoica soye; ni ndocna inye soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentšana, chë bënga šondababuanÿeshanábentšana jtsajuánayana, chë Cristo Jesús Bëngbe Utabnáftaca Bëngbe Bëtsá sojanÿanÿé bonshánentšana!

## 9

### *Bëngbe Bëtsá Israeloca entšanga tojabacacá, uámanënga chamotsemnana*

<sup>1</sup> Atše, Crísoftaca cánÿiñe mo canÿacá quetsomñecana, ntšamo sentsichamcá ndegombre endmëna; atše ndoñe quetsátsbostero. Atše ainanoca juabnënga, Uámana Espíritbeyeca jtsemandánëse, chë šmonybëuyana tšabá o ndoñe tšabá tijamama, šmontsatsëtsná atše ndoñe stsebosterama. <sup>2</sup> Ndegombre, atše puerte ngmënacá atše entsangbiamá, chë Israeloquëngbiamá sëntsemna y atšbe ainana tša šontsetsetše, chënga Jesucristëñe jtsošbuáchiyama ndoñe quemátsboše causa. <sup>3</sup> Tšabá tojtsemnëse, atše stjobenaye jtsebošana cach atše Bëngbe Bëtsábeyeca nÿetsca tescama castiganá y Crístbentšana luaroca jtsemnama, atšbe entsanga, chë cach atšcá buiñe bomna entsanga jujabuáchama. <sup>4</sup> Chënga mondmëna chë Israeloca entsanga, chë Bëngbe Bëtsabe bocacana entsanga. Bëngbe Bëtsá chënga chabe basengcá tojánabiamá y chë tša bëtsá y uamaná cha yomnama chënga tojaninÿanÿé. Bëngbe Bëtsá ba soye chënga tojanabuayená ndayá cha chëngbiamá yojánboše y ndayá chëngbiamá jamama, y chë ley chëngbe cucuatšičiñe tojanáboshjona. Chënga monjántatšëmbo ntšamo Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játsebacana. <sup>5</sup> Chënga mondmëna chë bëngbe tempsca uámana bëts taitangbentšánënga, y Crístnaca mo canÿe entsacá, mo canÿe Israeloca entsangbentšacá tojánabo; y cha endmëna Bëngbe Bëtsá, nÿetsca soyënguiñe mandayá. Nÿetsca entsanga nÿets tempo cha chamotsatschuaná. Chca chaotsemna.

<sup>6</sup> Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá ton-jama ca; er, nÿetsca Israeloca entsangbentšënga ndoñe Bëngbe Bëtsabe ndegombre entsanga quemátsmëna. <sup>7</sup> Ni nÿetsca Abrahábentšana entsanga, ndoñe chabe ndegombre básenga quemátsmëna; er Bëngbe Bëtsá Abrahámbioye tbojanianá: “Chë ácbentšana entsanga nÿe Isaácbentšana mochanjabo ca.” <sup>8</sup> Chca entsayana, bëngna ndoñe šontsamna jtsejuabnayana Abrahámbentšana nÿetsca entsangbiamá mo Bëngbe Bëtsabe basengcá; inÿetšá, nÿe chë Bëngbe Bëtsá tbojanšbuachenáyeca Abraham yojánabamna básengbiamá cocayé entsemna jtsejuabnayana, Abrahábentšana ndegombre entsanga bëtsemnana. <sup>9</sup> Er mëntšá endmëna ntšamo Bëngbe Bëtsá tojánayana, Abrahámbioye tbojanšbuachená ora: “Camëntša tempo entsba uata chanjésabo, y Sara canÿe šësona bochántsebomna ca.”

<sup>10</sup> Pero nÿe nÿetšá ndoñe quenátsmëna. Chë Rebeche uta básatna canÿe taitá ibnabomna, bëngbe tempsca bëts taitá Isaac. <sup>11-12</sup> Bëngbe Bëtsá, Rebécbioye tbojanianá: “Acbe mayor uaquiñá, acbe ngomëñche uaquiñábioye bochanjasérvia ca.” Cha chca tojánayana jinÿinÿiyama chë básatbentšana canÿa cha tbojánbocama, Jacob, y ndoñe chë inÿe basa, Esaú, chca jamama tempo cha tojanjuabóyeca. Rebécbioye chca tbojanianá chë básata cabá ndonÿna ora, y ni canÿe basa cabá ndocna soye ndama ora. Y chca, ntšamo tojanopasacana, tojanopasá chë básabentšana canÿa y ndoñe chë inÿa chca chaotsemnana Bëngbe Bëtsá tbojanábuyanayeca, y ndoñe ndayá chata tbojanmama. <sup>13</sup> Ntšamo Bëngbe Bëtsá chabe uabemana palabrenguiñe tojanayancá: “Jacob sënjanbobonshana, y Esaú sënjanáboyënja ca.”

<sup>14</sup> Y asna, ¿ntšamo mochjayana? ¿Bëngbe Bëtsá ndoñe cachcá nÿetscángaftaca endëtsemna ca? ¡Ndoñe, ndegombre ndoñe! <sup>15</sup> Er Bëngbe Bëtsá Moisésbioye tbojanianá:

Atše šochanjóngmia nda chaitsebošabiamá,

y nda chaitsebošá chanjalastéma ca.

<sup>16</sup> Y chca, Bëngbe Bëtsá canÿe entšá jabocacayana, ndoñe ndayá chë entšá tojtsebošama o tojamama, ndayá Bëngbe Bëtsá tbojalastemama. <sup>17</sup> Er Bëngbe Bëtsabe uabemana palabrenguiñe, Faraón chë Egiptoca réybioye cha tbojanianá: “Atše rey tcbonjábema, tša bëtscá atšbe obenana yomnama nÿetscanga ácheñe chayinÿanÿyema, y nÿets luarentša entsanga atšbiamá chamotatsšëmonama ca.” <sup>18</sup> Y chca, Bëngbe Bëtsá jalastëmana nda tojtsebošábioye, y nda tojtsebošábioye jalesénciana chabiamá nduauenaná chaotsomñama.

<sup>19</sup> Pero ndánaca tšëngaftanguentšá šuatjatjaye: “Bëngbe Bëtsá chca tojtsemëse, ¿ntšamo cha nantsobena jayanana canÿe entšá bacna soye tojama ca? ¿Nda nanjobenaye chë ndayá Bëngbe Bëtsá tojtsebošama corente contra jtsemnana?” <sup>20</sup> Pero, nÿe entšá quecotsemñecá, ¿ntšamo catjobenaye tša uamaná comna ca jtsejuabnayana, Bëngbe Bëtsá jatstjanayama ndáyeca canÿe soye chca yojtšama ca? ¿Chë pormana soye chë chca tojamábioye buan-jayana: “¿ndáyeca chca šcojama ca?”? <sup>21</sup> Chë fshantse soyënga pormayá jtsobenana

canje fshantsentsana jamana, canje matbaja uamana tescama, y inyajna cada te chaot-soservénama. Cachcá, Bèngbe Bètsá jtsobenana jamana ntšamo cha tojtsebošcá, ndayá cha tojama sóyeca.

<sup>22</sup> Bèngbe Bètsá yojáboše jinýanýiyama entšangaftaca tbojánetnama, chèngbe bacna soyèngama; y yojáboše cha puerte obená yomnna jinýanýiyama. Chíyeca, chènga tša yojanéuanta, chènga chë ndëmuanýengbiana Bèngbe Bètsá yochjánayana chèngbe bacna soyèngama castigánènga jtsemnna yojánamna ca, chë ndëmuanýenga jtsapochócama Bèngbe Bètsá yojtsanprontana. <sup>23</sup> Y chánaca yojáboše jinýanýiyama cha puerte uamaná y bètsá yomnna. Cha tojama, bènga chë ndëmuanýenga cha šojanalastemá, chabe obenantšana y uámanantšana chamotsebomnna; y cha tempo chca tojanjuabó bènga uámanènga y bètsétsanga jábiamama. <sup>24</sup> Bènga mondmèna chë ndëmuanýenga Bèngbe Bètsá chama šojánachembo, inýengna judío entšanguentsana, y inýengna ndoñe judièngbentsana. <sup>25</sup> Ntšamo chabe uabemana palabrénguiñe, Oséasbe librèsañe Bèngbe Bètsá tojanayancá: Entšanga ndoñe átsbenga mondmèngga, chènga “atšbe entšanga ca” chantsébobuatma; y canje luarentša entšanga ndoñe sènjánababuanýeshanènga, chèngna “atšbe bonshánènga ca” chantsébobuatma.

<sup>26</sup> Y cach luare ndayentše Bèngbe Bètsá tojánayana: “Tsèngaftanga atšbe entšanga ndoñe quešmátsmèna ca”, cachentše Bèngbe Bètsá ainá chènga echanjáuyana “atšbe básenga ca”.

<sup>27</sup> Israeloca entšangbiana, Isaías jabuachana tojánayana:

Masque Israeloca entšanga puerte banga chamotsemna, nýa mo chë mar béjayoca chènýañe cascajca,

Bèngbe Bètsá nýe báseftanga chentšana echanjítsebacaye;

<sup>28</sup> er, ndoñe bèn y Bèngbe Utabná canje y nýetsca tescama echanjayana,

nýets quem luarentša entšangbiana ndayá chènga tmojamama tsábá o ndoñe tsábá bétsemnna,

y chèngaftaca echanjama ntšamo chaojayancá ca —cha tojánayana.

<sup>29</sup> Ntšamo Isaías tojanayancá, Bèngbe Bètsá Israeloca entšangaftaca ntšamo jamama tojanoyebuambá ora:

Bèngbe Utabná, nýets obenana bomná,

inýenga bènga jtsapochócama cha tojanalesenciá ora,

báseftanga bèngbe entšanguentsènga ainènga chamotsomñama ndoñe matènjanmèse,

bènga mora pochocánènga mamojtsemna, mo chë Sodoma y Gomorra pueblèngoca entšangcá ca,

cha nýetscanga y nýetsca tescama tojtsanapochócaye ca.

#### *Israeloca entšanga y chë tsabe noticiènga*

<sup>30</sup> Chcasna, mora mèntšá mochjayana: ndoñe judiènga tondaye monjánama Bèngbe Bètsabe bominýiñe tsábenga jtsemnna, pero cha tojanma chènga chabe bominýiñe tsábenga chamotsemnna, chènga chábeñe imojtsošbuáchiyama. <sup>31</sup> Pero, Israeloca entšanga imojánboše Bèngbe Bètsabe bominýiñe tsábenga jtsemnna, ntšamo chë leyiñe uyayancá jtsamèse; pero ndoñe chca tmonjanobená. <sup>32</sup> ¿Y ndáyeca chca? Co chë Bèngbe Bètsabe bominýiñe tsábenga jtsemnna, chábeñe jtsošbuáchiyèse, chènga tondaye monjánama causa chca, sinó chca jtsemnna imojánboše nýe ntšamo leyiñe uyayancá jtsamèse. Y chca, chèngna Jesús tmojtsanaboté, ntšamo chë Bèngbe Bètsabe uabemana palabrénguiñe chë tmojtsanábotengbiana endayancá, chèngbiana cha yomna mo chë ndètsbé ndayèñe chènga jtsojestjamcá ca. <sup>33</sup> Bèngbe Bètsabe uabemana palabrénguiñe cha chca tojánayana: Smochjinýe, atše sènjama Jerusalenentše canýa chaotsemna, y cha endmèna mo ndètsbecá ndayentše chènga mochjojestje,

y canje peñéscá ndayèše yochjama chènga chamotsótsatšama;

pero nda chábeñe tojtsošbuaché, ndocna te nýe bonamente queochátobatmana ca.

## 10

<sup>1</sup> Jesucristbeyeca catsátanga, atše nýets ainánaca sèntseboše y Bèngbe Bètsá sèntseimpadana, cha Israeloca entšanga cháuatsebacama. <sup>2</sup> Atše sèndétatšèmba y sèntsobena chèngbiana jayanama, chènga puerte mondboše Bèngbe Bètsá jaserviama, pero ntšamo chènga yojtsésertancá, ntšamo Bèngbe Bètsá jaserviama yojtsamnamna, ndoñe quenátsmèna ntšamo ndegombre yomncá. <sup>3</sup> Chènga ndoñe tonjanésertá ntšamo Bèngbe Bètsá inétsama entšanga chabe bominýiñe tsábenga chamotsemnna, y cachènga tmojánguango ntšamo jamèse jobenayama Bèngbe Bètsabe bominýiñe tsábenga jtsemnna; pero ndoñe chca tmonjanobená, chë entšanga chabe bominýiñe tsábenga chamotsemnna ntšamo Bèngbe Bètsá inetsamcá ainánaca ntjoyèngacñécá. <sup>4</sup> Er Cristo tojama entšanga

ndoñe chamondétsama ntšamo leyiñe iuayancá, Bèngbe Bètsabe bominiñiñe tšábenga jtsemnama, chca, chènga chamobenama chabe bominiñiñe tšábenga jtsemnama, Cristbeñe jtsošbuáchiyese.

<sup>5</sup> Chè Bèngbe Bètsabe bominiñiñe tšábenga jtsemnama bošèngbiana, ntšamo leyiñe iuayancá jtsamése, Moisés mèntšá tojánayana, chèngbiana tojanábema ora: “Nda tojtsama nyetsca mandénga ntšamo leyènguiñe endayancá, tšabe vida echántsebomma, nyets tempo chè leyèngaca mandaná ca.” <sup>6</sup> Mèntšá endmèna ntšamo Bèngbe Bètsabe uabemana palabrénguiñe iuayana, entsànga chabe bominiñiñe tšábenga chamotsemnama ntšamo cha inétsamama, Jesucristbeñe jtsošbuáchiyese: “Ndoñe cattsetjanaye: ‘¿Nda celoye yochjátsjua ca?’ (chca endmèna ndayá Cristo quem luaroye chaotsmama); <sup>7</sup> o, ‘¿Chè obanènga imomna luaroye yochjátsma ca?’ (chca endmèna ndayá Cristo chè obanènga imomna luarentsana chaotjsuama).” <sup>8</sup> Ntšamo Bèngbe Bètsabe uabemana palabrénguiñe iuayancá mèntšá endmèna: “Tšèngaftanga paselo šmontsobena ntšamo Bèngbe Bètsá tojabuayenacá jounenama, tšèngaftanga ya chama palabréngaca šmojoyebuambá y tšèngaftange ainaniñe chama šmojtsejuabná.” Chè buayenánana endmèna ndayá bènga ftsabuayiyinacá, y chiñe endayana Jesucristbeñe jtsošbuáchiyama šojtsamna ca. <sup>9</sup> Chè buayenana soyènguiñe endayana, Jesús ndegombre Bèngbe Utabná yomna ca aca tcojayanése, y Jesucristo cháuatayenama Bèngbe Bètsá tojanmama, nyets ainanaca tcojtošbuáchese, Bèngbe Bètsá cmochjatsbocá ca. <sup>10</sup> Er ainanoca bènga Jesucristbeñe jtsošbuáchiyana y Bèngbe Bètsá jamana cachabe bominiñiñe tšábenga chamotsemnama; palabréngaca bènga jinñanyiyana ndegombre Jesucristbeñe imojtsošbuáchema, y Bèngbe Bètsá bènga játsebacana.

<sup>11</sup> Er Bèngbe Bètsabe uabemana palabrénguiñe mèntšá endayana: “Nda Bèngbe Bètsábeñe tojtsošbuaché, ndocna te nye bonamente queochátobatmana ca.” <sup>12</sup> Judiènga y ndoñe judiènga atsebácanènga ndocmèna cach sóyeca, er canye Utabná nyetscangbe Utabná endmèna, y cha tmojtsošbuanèngbiana, cha bètsá jtsamana. <sup>13</sup> Er Bèngbe Bètsabe uabemana palabrénguiñe mèntšá endayana: “Ndánaca Bèngbe Utabná tbojtsošbuanábioye, cha bochanjatsbocá ca.” <sup>14</sup> Pero, ¿ntšamo cha mochjótšèmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiana jóyebuambayama ndoñe tmonjounése? ¿Y ntšamo chabiana mochjouena, chabe buayenana soyènga chènga jáuyanama ndocná tontsemnése? <sup>15</sup> ¿Y ntšamo chabe buayenánana mochtsošbuátambaye, chéngbioye jáchamuaa ndocná tontsemnése? Ntšamo Bèngbe Bètsabe uabemana palabrénguiñe endayancá: “¡Tšá tšabá chè buayenánana abuátambayènga tmojáshjajna ora ca!”

<sup>16</sup> Pero nyetscanga chè tšabe noticiènga ndoñe ntjoyeunayana. Cach Isaías mèntšá tojánayana: “Utabná, ¿nda chè mondabuayiyiná soyènguiñe yojtsošbuaché ca?” <sup>17</sup> Chcasna, chè tšabe noticiènga jounése, entsànga jobenayana Jesucristbeñe jtsošbuáchiyana; y nda Cristbiana tojtsabuayiyinase, entsànga chabe buayenánana jounenana.

<sup>18</sup> Pero atše šcotjá: ¿ndegombre nandmèna judiènga chè buayenánana ndoñe tmonjanuena ca? ¡Aíñe, chènga aífne tmonjanuena! Ntšamo Bèngbe Bètsabe uabemana palabrénguiñe endayancá, chè Bèngbe Bètsabe buayenana soyèngama oyeuambnáyèngbiana: Chèngbe oyeuambnáyana nyets quem luaríñe tojóshjango, y chéngbe palabrénga nyets luarènguentša entsangbenache tojuáshana ca.

<sup>19</sup> Pero cachiñe šcotjá: ¿Israeloca entsànga chè buayenánana ndoñe tonjanésertá ca? Natsana, Moisés mèntšá tojánayana, chè ndoñe judiènga Jesucristbeñe tmojtsošbuaché ora, ntšamo chè judiènga mochtšanjuabnáyama tojanoyebuambá ora:

Atše, Bèngbe Bètsá, chanjama, ndayá chè ndoñe judiènga chamojashjache soyèngama tšèngaftanga chašmotsiyentšbuašama, chènga chè ndoñe monjamna mo tšèngaftangcá atšbe entsànga.

Atše chca chanjama chèngaftaca, chènga chè tempo Bèngbe Bètsabe soyèngama ndoñe tonjanésertá ca.

<sup>20</sup> Isaíasnaca, Bèngbe Bètsabiana tojanoyebuambá ora, puente añémoca tojánayana: Chè atše ndoñe šmondènguanga, šmonjínjyena; y chè atšbiana ndoñe mondènoticiàngbioye sènjenonjinyé ca.

<sup>21</sup> Pero Israeloca entsangbiana mèntšá tojánayana:

Nyets tempo atše tša sènjánama, chènga átšeftaca tšabá tempcá chamotsatsmènama, pero chènga ndoñe chemátanbošena jounenama, y atšbe contra monjètsemna ca.

## 11

*Bèngbe Bètsá, Israeloca entsangbiana tšabe juabna yobomnama tojinñanyé*

<sup>1</sup> Y as mora šcotjá: ¿Bèngbe Bètsá chabe entsànga tojtsanébaté? ¡Ndoñe, ndegombre ndoñe! Cach atše canye Israelocá sèndmèna, Abrahábentsana entsá y Benjaminbe bèts pamillentsana entsá. <sup>2</sup> Bèngbe Bètsá chabe entsànga ndoñe tonjubaté, chè tempscana

tojánabacanga. Tšéngaftanga šmondétatšémbo ntšamo Bèngbe Bètsabe uabemana palabrènguiñe endayanca, Bèngbe Bètsabe juabna oyebuambnayá Elias, Israeloca entsàngbe contra Bèngbe Bètsábioye cha ibojanatsètsná ora: <sup>3</sup> “Bèngbe Utabná, acbe juabna oye-  
buambnayénga tmojtsébaye y acbiana pormana altarènga tmojtsepochocá; nýe atše vídaca  
tijoquedá, y chénga montseboše átšnaca jóbama ca.” <sup>4</sup> Y mèntšá Bèngbe Bètsá tbojanjáú:  
“Atše canýsèfta uaranga boyabásenga atšbiana sènjacuedá, Baal ndoñe tmonjadoranga,  
ndayá entsànga tmojobopormá y imojtsejuabná canýe dios yomna ca.” <sup>5</sup> Mórñaca  
cachcá entsemna, judiènguentše báseftanga monduájamma Jesucristbeñe ošbuáchiyènga,  
ndèmuanyènga Bèngbe Bètsá tojabacacá, cha chéngbiana tšabe juabna bómnyeyca. <sup>6</sup> Bèngbe  
Bètsá entsànga jabacacayana chéngbiana tšabe juabna bómnyeyca; y ndoñe chca ntjamana  
ndayá entsànga tmojamama. Er ndayá tmojamama Bèngbe Bètsá entsànga tojabacacase, cha  
nanjínñanyíye cha chca inétsama, ndoñe nýe chéngbiana tšabe juabna bómnyeyca.

<sup>7</sup> ¿Y asna? Israeloca entsànga ndoñe chemátaninýena ntšamo Bèngbe Bètsabe bominýiñe  
tšabenga jtsemnana, pero chénguentšénga básefta bocacánèngna aínfe tmojanobená.  
Bèngbe Bètsá tojanalesenciá ché inýenga Israeloquènguentšana chabe buayenana  
soyènga ainaniñe ndoñe chamondóyèngacñama; <sup>8</sup> ntšamo Bèngbe Bètsabe uabemana  
palabrènguiñe endayanca: “Bèngbe Bètsá tojama chénga chabe soyèngama jósertama ndoñe  
chamondétsobenama, y mèntsoñama chénga ndoñe quemátobena chabe soyèngama ni  
jinýana ni josértana, mo nduabínýnènga o nduauenanènga cuaftsemnèngcá ca.” <sup>9</sup> Davídnaca  
chéngbiana mèntšá tojánayana:

Mo ché entsànga canýe fiestentše oboyejuayènga, chéngbe uayayèngbeyeca nýe ndeolpe  
ishèchenèngcá,

y mo ché bayèngbiana uachmaniñe ishèchenèngcá, chénga mal chamopasama chaomama  
Bèngbe Bètsá séntseimpadana, mo nda ndétsbeñe cuaftsojestjicá.

Chca Bèngbe Bètsá chaoma, chéngbe bacna soyèngama;

y cha cháuyana chénga puerte castigánènga jtsemnana yojtsamna ca, bacna soyènga  
tmojama causa;

<sup>10</sup> Bèngbe Bètsá chaoma ntšamo mochjapásama chénga ndoñe chamondobená jtse-  
tatšémbuana,

y chaoma puerte chamosufrima, nýets tempo padecena soyènguiñe jtсийenése ca —cha  
tojánayana.

#### *Bèngbe Bètsá ndoñe judiènga tojatsebacá*

<sup>11</sup> As mora šcotjá: ¿Israeloca entsànga Bèngbe Bètsá ndoñe tmonjanoyeuná ora, cha  
tojánayana chénga nýetsca tescama castigánènga jtsemnana yojtsamna ca, ndocna inýe soye  
chéngbiana ntsemncá? ¿Chéngbiana yojamna mo ché ndétsbeñe jójéstjiana y jtšabanama  
ndoñe más ntjobenayancá? ¡Ndoñe, ndegombre ndoñe! Chca ndoñe quenátsmèna. Chénga  
Bèngbe Bètsá ndoñe chematanoyeuná causa, ndoñe judiènga tmonjántatšémbona ndayá  
bètsèmnana Bèngbe Bètsábeyeca atsbocaná jtsemnana; y ché causa, mora, judiènga, ndayá  
ché ndoñe judiènga Bèngbe Bètsábentšana tmojoshachiñcá montsiyèntšbuaše. <sup>12</sup> Judiènga  
bacna soyènga tmojanma causa, inýe entsànga quem luarentše tmojobená ba tšabe  
soyènga jtsebobnana. Ché judiènga tmonjanorrebajá causa, ché ndoñe judiènga ba tšabe  
bendicionènga Bèngbe Bètsábentšana tmojoshachiñe. Y chca, ché bètscá judiènga Bèngbe  
Bètsá jatsebacama, chénga atsebacánènga chamojtsemna ora, más bètscá tšabe bendicionènga  
Bèngbe Bètsábentšana nýetsca entsàngbiana echántsemna.

<sup>13</sup> Ntšamo mora chanjayancá, tšéngaftanga ndoñe judièngbiana entsemna. Bèngbe Bètsá  
šojichmó chabe soyèngama ché ndoñe judiènga jábuayenama; atše séntsejuabná puerte  
uámama trabajo stsebobna ca. <sup>14</sup> Atše séntsobátmana, quem trabájoca atše jobenayana  
jamama ché cach atšcá buiñe bomna entsànguentšénga, ndayá ché ndoñe judiènga Bèngbe  
Bètsábentšana tmojoshachiñcá chamotsiyèntšbuaše, y chca, ndayá tijamama, Bèngbe Bètsá  
chénguentšana báseftanga cháuatsebacama. <sup>15</sup> Er ché judiènga Bèngbe Bètsá tojtsanébaté ora,  
cha tojanma inýe entsànga quem luarentše cháftaca tempcá tšabá chamotsatšmènamá;  
y chénga cha chamojoyeuná ora, corente tšabá echántsemna, nýa chénga mo obanènga  
cuabmèncá y cuaftsatayanèngcá. <sup>16</sup> Nda canýe arninýentšana ché natsana tandése Bèngbe  
Bètsabiana josérviana yojtsemna ca tojayanése, jtsemnana mo nýetsana chabiana cuaftsem-  
ncá. Canýe betiyèntša tbètèjènga Bèngbe Bètsabiana yojtsemna ca canýa tojayanése, nýetsca  
ché betiyèntša buacuafjèngnaca Bèngbe Bètsabiana jtsemnana.

<sup>17</sup> Ché judiènguentše báseftanga Jesucristbeñe ndoñe montsanošbuaché ora, tšéngaftanga  
ché ndoñe judiènga šmonjanobená chabeñe jtsošbuáchiyana. Y chca, judiènga monjamna  
mo canýe jena olivo betiyèntšana entsànga tmojatètše buacuafjèngcá, y tšéngaftangna  
mo tjoca olivo betiyèntša buacuafjènga, ché jena olivo betiyeshiñe jenèfjèngcá. Mora  
tšéngaftanga Bèngbe Bètsábentšana cachca tšabe soyènga ché judièngaftaca šmontsebobna,

mo chë jena buacuafjènga y cachentša buacuafjènga cach tbëtjèntšana lempe cuaft-soyèngacañcá. <sup>18</sup> Ndoñe šmattsenábotamnaye, tsèngaftanga Bèngbe Bètsabe tsabe soyènga šmojtsebmnama, chë Jesucristbeñe ndoñe montsanošbuaché judièngbiama yojamna soyènga. Smochtsejuabnaye, buacuafjènga chë tbëtjèngayeca vida jtsebmnama, y ndoñe tbëtjènga chë buacuafjèngayeca; cachcá, tsèngaftanga nje Bèngbe Bètsábeyeca chë tsabe soyènga šmojtsebmna.

<sup>19</sup> Pero tsèngaftanga šmuatjayana: “Aíñe, pero Bèngbe Bètsá básefta judiènga tojanëbaté, Jesucristbeñe ndoñe montsanošbuaché causa; chíyeca bènga fsèñjanobená mo buacuafjènga betiyiñe jenëfjèngcá chca tsabe bendicionènga Bèngbe Bètsábentšana jójèngacñana ca.” <sup>20</sup> Ndegombre, chènga Jesucristbeñe ndoñe montsanošbuaché causa, mo buacuètèšenëfjèngcá tmonjanoquedá, pero Jesucristbeñe šmojtsebuachema, tsèngaftanga šmojoquedá Bèngbe Bètsábentšana tsabe bendicionènga jtsoyèngacañcá. Chcasna, chama ndoñe šmattsenábotamnaye; más tsabana cuedado jtsebmnama. <sup>21</sup> Er Bèngbe Bètsá, chë Jesucristbeñe ndoñe montsanošbuaché judiènga, ndoñe tonjanaperdoná, y chènga chabe entsanga bétsemnana, monjamna mo cach betiyentša buacuafjèngcá; tsèngaftanga, chë mo betiyiñe jena buacuafjèngcá šmommènga, cha cach ndoñe quecmochátaperdonaye, chabeñe ošbuáchiyana šmojtsajbanase.

<sup>22</sup> Bètscá šmochtsejuabnaye Bèngbe Bètsá puerte tsabia yomnama, pero cha tsatjayá yomnámna šmochtsejuabnaye; tsatjayá endmèna chë bacna soyènga tmojtsamèngaftaca, pero tsèngaftangaftaca puerte tsabia. Cha tsèngaftangaftaca chca echántsemna, tsèngaftanga chca chašmojtsomerecénèntscuana; pero ndóñesna, Bèngbe Bètsá echanjama tsèngaftàngnaca mo buacuètèšenëfjèngcá chašmoquedama, chë tsabe bendicionènga Bèngbe Bètsábentšana ntsoyèngacañcá. <sup>23</sup> Y ntšamo mora imojtsejuabnacá chë judiènga tmojatrocá y tmojontsé Jesucristbeñe jtsošbuáchiyana, chèngnaca cachiñe chë tsabe bendicionènga Bèngbe Bètsábentšana mochanjójèngacñe, y mochántsemna mo betiyiñe jena buacuafjèngcá, er Bèngbe Bètsá becá obenana endbomna jamama ntšamo chë judiènga tempo imojanbomn-cá cachiñe chamotsatsbomnama. <sup>24</sup> Chcasna, más paselo jtsemnana canye jena olivo betiyentša buacuètèšenëfja cach betiyiñe jétsjena, y ndoñe, chë tjoca olivos betiyentša buacuafja canye jena olivos betiyiñe chaójuama jájena. Cachcá, más paselo jtsemnana chë Jesucristbeñe ndoñe montsanošbuaché judièngbiama, jontšana jtošbuáchiyana y tsabe bendicionènga Bèngbe Bètsábentšana jójèngacñana, tsèngaftanga ndoñe judiènga chë tempo Bèngbe Bètsá ndoñe šmonjanábuatmèngbiama.

*Bèngbe Bètsá nyètscángaftaca puerte tsabia endmèna*

<sup>25</sup> Jesucristbeyeca catšátanga, atše séntseboše tsèngaftanga chašmotsetátšëmbo chë tempo Bèngbe Bètsá entsanga ndoñe tonjaninjanýe soyèngama. Atše séntseboše tsèngaftanga quem soyèngama chašmotsetátšëmbo, chca, tsèngaftanga ndoñe judiènga chë judièngbiama más uámanènga šmomma ca ndoñe chašmondètsejuabnama. Ndayá Bèngbe Bètsá tempo entsanga ndoñe tonjaninjanýecá, quem soye endmèna: Bèngbe Bètsá tojalesenciá, nje basefatescama banga Israeloquènga Bèngbe Bètsabe soyènga ainaniñe ndoñe chamondójèngacñama; pero chca echántsemna, chë ndoñe judiènguentše atsebácanènga jtsam-nama imommènga, atsebácanènga chamojtsemnèntscuana. <sup>26</sup> Chca chaojopasá ora, nyètsca Israelentša entsanga atsebácanènga mochántsemna; ntšamo Bèngbe Bètsabe uabemana pal-abrènguiñe endayancá:

Entsänge atsebacayá Israelocana echanjabo,

y echanjama nyètsca Jacóbèbentšana entsanga ndoñe más vida chamondètsebmna, bacna soyènga jtsamése ca.

<sup>27</sup> Y mèntšá endmèna ntšamo chèngbiama chjašebuachená:

chènga játsabacana, chèngbe bacna soyèngama chajaperdonaye ora ca —chiñe endayana.

<sup>28</sup> Chë tsabe noticiènga tmojtsanaboté causa, judiènga Bèngbe Bètsabe uayayènga mondmèna, chca, tsèngaftangbe tsabiama chaotsemnana. Pero Bèngbe Bètsá tojánabacayeca, chèngnaca Bèngbe Bètsabe bonshánènga mondmèna, er Bèngbe Bètsá chèngbe tempsca uámana bétš taitanga chca tojanásebuachená. <sup>29</sup> Chca endmèna, er Bèngbe Bètsá ndocna te juabna ntjatrocana; nyètscanga chabe entsanga chamotsemnana tojáchembènga, nyèts tempo cha echántsabuanýeshana, y echanjama chèngbeñe tsabe bendicionènga chaotsemnana. <sup>30</sup> Tsèngaftanga ndoñe judiènga tempo ndoñe šmonjánama ntšamo Bèngbe Bètsá inabošcá; y mora, Bèngbe Bètsá tmojalastemá, judiènga Bèngbe Bètsá ndoñe tmonjoyeuná causa. <sup>31</sup> Cachcá, Bèngbe Bètsá tsèngaftanga tmojalastemama, judiènga montsemna chë Bèngbe Bètsá ndoñe montsobedecèngcá, chca, Bèngbe Bètsá chèngnaca cháualastemama. <sup>32</sup> Er Bèngbe Bètsá tojinjanýe, cha ndoñe ntjoyeunayama juabnèngaca nyètscanga mandánènga imomnana, chca, nyètscanga jálastemama cha jobenayama.

<sup>33</sup> ¡Ndegombre, Bèngbe Bètsá n̄yetscangbiana puente t̄sabria endm̄ena, puente osertaná y puente obiašnjachá! Ndocná quenátobena in̄yenga jábuayenama ndayá Bèngbe Bètsá jamama inetsejuabnycá, y ndocná quenátobena corente josértana nt̄samo cha inetsamcá. <sup>34</sup> Nt̄samo Bèngbe Bètsabe uabemana palabrènguiñe endayancá:

Ndocná quenátstat̄sēmbo nt̄samo Bèngbe Bètsá inetsejuabnycá;  
ndocná quenátobena cha jábuayenama ndayá jamana ibomnana.

<sup>35</sup> Ndocná quenátobena ndayánaca cha natsana jshat̄setayana, chē t̄bojat̄setabiana ndebená cha jatsm̄enama,

y chē ndebénama ndayánaca jtoyiyama chabotsemnna ca.

<sup>36</sup> Er lempe cha tojama, lempe cha iútabna, y lempe chabiana yomna. ¡N̄yetscanga n̄yetsca tescama cha chamotsatschuaná! Chca chaotsemna.

## 12

### *Nt̄samo jtsiyen̄ese Bèngbe Bètsá jt̄seservénama*

<sup>1</sup> Chcasna, Jesucristbeyeca catsátanga, Bèngbe Bètsá bēnga ba soye šojalastemáyeca, puente cbontsaimpadana, t̄šēngaftanga Bèngbe Bètsá chašm̄eyana t̄ša šmojt̄seboše lempe jamana chábioye jadórana ca, Bèngbe Bètsá jadórana mo ndayá cuafjocabá y cuafjuat̄šēmoncá, mo cabá ainá cuaf̄tsomñcá. Smochjauyana t̄šēngaftanga sempre šmoch̄tsent̄šena cha servénana y jtsam̄ese cha t̄sabá bēngaftaca chaotsemnna. As, chca chašmojt̄sama ora, ndegombre oyejuayá Bèngbe Bètsá šmoch̄ántsebiamnaye. <sup>2</sup> Ndoñe šmatt̄siyena jtsam̄ese nt̄samo chē n̄ye quem luarama en̄ójuabnaye ent̄šanga monduamancá, y šmoch̄jaleséncia Bèngbe Bètsá mo t̄šēm ent̄šangcá chác̄mabiamama, t̄šēngaftangbe ainana y juabna mo t̄šēmcá chaom̄ese. Chca, t̄šēngaftanga šmoch̄anjobenaye jt̄sejuabnayana y šmoch̄ántsetat̄sēmbo nt̄samo Bèngbe Bètsá yobošcá: ndayá t̄sabá yomna, chē ndayá cha oyejuayá ibnabema, y ndayá ya ndoñe yondopodena más t̄sabá jt̄semnna.

<sup>3</sup> Ndayá Bèngbe Bètsá at̄šbiana t̄sabá jt̄sejuabnayešē šojat̄setama, n̄yetsca t̄šēngaftanga choch̄jáuyana, ndocná cachabiana chaond̄et̄sejuabná más uamaná yomna ca, n̄ye ntsachet̄šá jt̄senójuabnayana ibomna n̄yet̄šá. Más t̄sabá, cada ona cachabiana t̄sabá chaotsenójuabná, y chca chaotsenójuabná nt̄samo chabe ošbuáchiyana yomncá, chca, chē Bèngbe Bètsá t̄bojat̄setá ošbuáchiyana chabiana chaotsetrabájama. <sup>4</sup> Er, nt̄samo bēnga cada ona mondbom̄ena can̄ye cuerpo y chē cuerpiñe ba soyēnga jt̄sebonnana, y n̄yetsca soyēnga ndoñe cach soyama cuerpiñe nt̄soser̄vénana, <sup>5</sup> cachcá bēnga ošbuáchiyēnga, masque bētscanga imomna, Cristof̄taca can̄yñe mo can̄yacá mondm̄enayeca, bēnga mondm̄ēna mo chabe cuerpo cuaf̄tsemncá, y cada ona can̄yñe mo can̄yacá n̄yetscángaftaca.

<sup>6</sup> Bèngbe Bètsá tojama bēnga cada ona chamot̄sebonnana ndoñe cachca chabe t̄setana obenana, nt̄samo Bèngbe Bètsá cada ona bēngbe t̄sabiama inajuabnycá. Y chabe juábna bēnga jt̄soyebuambnayama jt̄sobenama Bèngbe Bètsá tojam̄ese, chca mochtsama ntsachet̄šá chábeñe bēngbe ošbuáchiyana yomncá. <sup>7</sup> Ošbuáchiyēnga bētscá jas̄erviana bēnga chamot̄sobenama Bèngbe Bètsá tojam̄ese, chca mochtsama. T̄sabá jt̄sabuátambayama bēnga chamot̄sobenama Bèngbe Bètsá tojam̄ese, chca mochtsama. <sup>8</sup> In̄yenga jañēmuama bēnga chamot̄sobenama Bèngbe Bètsá tojam̄ese, chca šontsamna. Lempe nt̄samo bēnga tmobomncá in̄yengbiámna chaotsemnna bēnga jamama chamot̄sobenama Bèngbe Bètsá tojam̄ese, n̄yets ainánaca chca šontsamna. Am̄ēndayēnga jt̄semnna bēnga chamot̄sobenama Bèngbe Bètsá tojam̄ese, šontsamna bētscá jamana t̄sabá jt̄sam̄ēndayama. In̄yenga jálastemama bēnga chamot̄sobenama Bèngbe Bètsá tojam̄ese, šontsamna oyejuayēnga chca jamana.

### *Nt̄samo bēnga Jesucrist̄beñe ošbuáchiyēnga jtsamana šojtsamna*

<sup>9</sup> In̄ya chašmojt̄sebonshana ora, n̄yets ainánaca chca šmoch̄tsama. Ndayá yomna ndoñe t̄sabe soye šmoch̄tsaboté y chent̄šana šmoch̄tsojuánañe; šmoch̄tsent̄šena nt̄samo t̄sabá yomncá jtsamna. <sup>10</sup> Cmotsamna n̄yetscanga puente jt̄senobonshánana, Jesucrist̄beyeca catsátanga quetsomñecá, chē in̄yenga bēngbiana más uamanēnga imomna ca jt̄sejuabnayešē.

<sup>11</sup> Ndoñe oyēnjayēnga šmatt̄semna, ndayá bētscá Bèngbe Utabnabiana šmoch̄tsetrabájaye; ainaniñe corente añemo jt̄sebonn̄ese, Bèngbe Utabná sempre šmoch̄t̄seservena.

<sup>12</sup> T̄šēngaftanga Bèngbe Bètsabeñe jt̄sošbuáchiyēse, chábeñe šmobat̄mánayeca, puente oyejuayēnga šmoch̄tsemna; padecena soyēnguiñe chašmojt̄sach̄ñejuana ora, puente uantadēnga šmoch̄tsemna, y sempre Bèngbe Bètsáftaca šmoch̄t̄sencuēnt̄yaye.

<sup>13</sup> Bèngbe Bètsabe ent̄šanga opresido bom̄nēnga šmoch̄júbuache, y šmoch̄t̄seprontana t̄šēngaftangbe yebnent̄še posada in̄yenga júyent̄šamiama.

<sup>14</sup> Bèngbe Bètsá šmoch̄t̄seimpadana, chē t̄šēngaftanga chašmosufrima amēngbiana t̄sabe bendicionēnga cha chaotsamama; aiñe, cha šmoch̄jaimpáda t̄sabe bendicionēnga chēngbiana chaotsamama, bacna soyēnga ndoñe.

<sup>15</sup> Oyejuayënga ínÿengaftaca šmochtsemna, chënga oyejuayënga chamojtsemna ora; ngmënaca šmochtsemna, ínÿenga ngmëniñe chamojtsemna ora.

<sup>16</sup> Smochtsiyena nÿetscanga jtsenÿeyuanëse. Nÿe cach tšëngaftanga uámanënga ndoñe šmattsenobiamnaye, sinó chë nduámanënga imomnëngaftaca tšabá mándbomnënga šmochtsemna. Ndoñe šmattsejuabnaye yapa osertánënga šmomna ca.

<sup>17</sup> Inÿenga bacá chacmojtaborlana ora, ndoñe šmattsatčhënguaye; corente šmochtsentsëna ntšamo nÿetsca entsangbiama tšabá yomncá jtsamama. <sup>18</sup> Ntsachetšá šmojobenacá, lempe šmochtsama natjëmbana nÿetsca entsángaftaca jtsiyenama. <sup>19</sup> Atšbe bonshánënga, ínÿenga bacá chacmojtaborlana ora, ndoñe šmatjama chënga chë causa chamotsesufrinama, ndayá Bëngbe Bëtsá šmochjaleséncia chënga cháucastigama; er Bëngbe Bëtsabe uabemana palabrenguiñe cha tojánayana: “Atše chanjama chënga chamosufrima, ínÿenga chamosufrima tmojama causa; y chënga chanjácastigaye, ínÿengbiye bacá tmojaborlá causa ca.” <sup>20</sup> Chca játamamna, mëntšá šmochjama, ntšamo cachánaca tojanayancá:

Acbe uayayá tbojtseshëntsanëse, saná cochjacaredáda,

y tbojtsajuendase, cochjuáfsiye.

Chca chacojamëse, cochanjama cha puerte chaotsëuatja ntšamo tcmojaborlama,

y ainana corente chabotsetšëna, mo chebana iñbenga chabe bestšašniñe cuafjacacá ca.

<sup>21</sup> Ndoñe šmatjaleséncia, ntšamo ndoñe tšabá tontsemncá tšëngaftanga chacmayëñjanama. Chamna, ntšamo tšabá yomncá jtsamëse, chë ndoñe tšabe soye šmochjayëñjaná.

## 13

<sup>1</sup> Nÿetsca entsanga entsamna jtsamana ntšamo chë amëndayënga tmojtsamëndacá, er ndocná obenana ntsebobnana, Bëngbe Bëtsá ndoñe chca tbonjalesenciase, y nÿe Bëngbe Bëtsá tojama amëndayënga obenana chamotsebobnana. <sup>2</sup> Chca, chë amëndayëngbe contra tmojtsemnënga, ntšamo chaotsemnana Bëngbe Bëtsá tojayancá contra chënga jtsemnana; y chca contra tmojtsemnënga, castigánënga mochántsemna; <sup>3</sup> er ntšamo tšabá yomncá amënga, ndoñe quenátamna ndayama chë amëndayënga jatebëuatjana, nÿe chë bacna soye amënga añe. Tšëngaftanga šmojtseboše jtsiyenama chë amëndayëngbiye ntjatebëuatjá; chcasna, ntšamo tšabá yomncá šmochtsama, y chë amëndayëngna tšabe bomínÿeca mochantsonÿaye ntšamo chašmojtsamcá; <sup>4</sup> er chë amëndayëngna Bëngbe Bëtsabe trabajo amënga mondmëna, tšëngaftangbe tšabiama. Pero bacna soyënga šmojtsamëсна, cmontsamna jtsiyenana chë amëndayënga jtsebëuatjëse, er chënga jacastigama obenana mondbomna, y chca mondbëtsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima. <sup>5</sup> Chíyeca, jtseytana ntšamo chë amëndayënga tmojtsichamcá jtsamana, pero ndoñe nÿe chë castigo ndoñe chašmondëtebobnana, ndoñe chca šmotsama causa, sinó chë ainanentša tšabe juabnënga ntšamo tbojtsëtsëtnacá joyeunayama yómnyayeca. <sup>6</sup> Cachca soyëngama, amëndayëngbiama impuesto tšëngaftanga jtsatsquécjnayana; er chë amëndayënga Bëngbe Bëtsabe oservénënga mondmëna, ntšamo chiñe jtsamama tojtsamncá corente tmojtsetšëna ora.

<sup>7</sup> Chcasna, tšëngaftanga šmochjáyentšbuachiye ntšamo chënga jtsebobnana tojtsamncá. Chë crocénana entsanga ayëngacayëngbiye, ndaye impuëstnaca šmochtëbuënyaye; chëngna šmochtsarrespetana ntšamo yomncá, y chënga uámanënga chamotsemnana šmochtsejuabnaye.

<sup>8</sup> Crocénana inÿa jëtsëntšabuáchiyama chacmojtsamñëse, nÿe ntoyiycá ndoñe šmatjoquéda, nÿets tempo ndebénënga; nÿe quem soye sempre šmochtsama: nÿetscanga šmochtsenbobonshana; er nda ndëmua entsábiye tbojtsebobonshana, ya tojama ntšamo leyinë yomandancá. <sup>9</sup> Quem mandënga, “acbe shema inÿaftaca ndoñe cattseíngñaye, inÿa ndoñe catjóbá, ndoñe catjathëba, inÿa tojtsebobna soye ndoñe nÿe acbiama cattseboše”, y chë inÿe mandënga leyinë lempe quem mandinë entsemna: “Ndëmua entsánaca cochtsebobonshana ntšamo cach aca cuenobobonshancá”. <sup>10</sup> Nda ndëmua entsábiye tojtsebobonshana, chábioye ndoñe bacá ntjabórlana; chca, ndánaca jtsebobonshánëse, entsá jamana lempe ntšamo leyinë yomandancá.

<sup>11</sup> Chë soyënga cmontsamna jtsamana, er bënga mondëtatšëmbo ya chë uámana tempinë imojtsiyenama, chë mocna ora šojtsamna prontánënga jtsemnana, mo ocnayentsana cuafjofšenangcá, Jesucristo jasërvíama jtsentšëñëse. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbëñe jtsošbuáchiyama tmonjanontsé ora enjamna. <sup>12</sup> Mora bënga mondoyena canÿe luar-entše bëtscá bacna soyëngaca y ngmenánaca, y chca jtsemnana mo bënga nÿets tempo ibetinë cuafstajncá. Pero ya entsobeco chë Bëngbe Bëtsá bënga játsebacama te, mo chë ibetinë ya jtso pochócama y binÿinñe ya jontšamcá. Chíyeca mochtsajbaná bacna soyënga



amana, y mochtsiyena tšabe soyënga jtsamëse, Satanás játsjama y jáyënjama bënga jtseprontánëse, mo canyë soldado jenëuyana y inya jayënjana ba soyënga tojenocjacá. <sup>13</sup> Ntšamo šojtsamncá mochtsiyena, ntšamo entšanga ndaye tšabe sóynaca jamama monduamancá, ín'yëngbiana lempe chaotsinýnëse. Chcasna, ndoñe quešnátamna yapa tmoýënga ntsemnana, ndoñe fiestënguenache ndoñe tšabe soyënga ntsamana, ndoñe bacna soye boyabása o shembásafaca ntsamana y jenomándama ntsobencá chca soyënga ndoñe ntsamana, nyëtscanga ndoñe cachcá ntsejuabnyama ndoñe ntsamana y ndoñe ín'yënga yapa ntsiyentšbuášana. <sup>14</sup> Chca játamamna, smochtsiyena jtsamëse ntšamo Bëngbe Utabná Jesucristo endbetsamcá, y ndoñe nye šmatjésejuabnaye jtsamana nye cach tšëngaftanga tšabá jtsomñama juabnëngaca, ndayá tšëngaftanga chašmotsamama chë juabnënguifne tojtsemncá.

## 14

*Ndoñe šmattsóyebuambnaye inye ošbuáchiyënga contra*

<sup>1</sup> Chë Jesucristbeñe nye batšatema ošbuáchiyënga tšabá šmochjúbuaja, y chëngaftaca ndoñe šmattsenatsëtsnaye ndayá aifne o ndoñe jamana yontsamnama. <sup>2</sup> Er básefta ošbuáchiyënga corente imotátšëmbo chënga nye ndayánaca jasama imobenama, pero chë Jesucristbeñe nye batšatema ošbuáchiyëngna, ndocna mëntsena ntseyayana, er chënga jtsejuabnyana aifne jasanya canyë bacna soye nántsemna ca. <sup>3</sup> Chë nyëtscá saná sayënga ndoñe chamondëtsejuabná chë inye soyënga ndoñe mondëtseyëngbiana, chë causa chënga más batšá uámanënga imomna ca; y chë ndaye soyënga ndoñe mondëtseyëngna, chë nyëtscá saná sayëngbe contra ndoñe chamondëtsoyebuambná, er Bëngbe Bëtsá chënga tojúbuaja mo chabe entšangcá. <sup>4</sup> Tšëngaftanga ndoñe quecmátamna chë ín'yabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chë oservená jamana ntšamo tbojtsemncá, er Bëngbe Utabná obenana endbomna cha chca chaotsamama.

<sup>5</sup> Báseftanga mondmëna, chënga jtsejuabnyana canyë te inye tescama más uámana te yomna ca; pero ín'yëngna jtsejuabnyana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo yojuabnacá ndáyeca chca ca. <sup>6</sup> Nda tojtsejuabná canyë te inye tescama más uámana te yomna ca, chca jamana Bëngbe Utabnábiama jtenójuaboyama. Y nda nyëtscá saná tojtsejá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuyana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnábiama jtenójuaboyama, y chánaca Bëngbe Bëtsábioye chë sanama jëtschuyana.

<sup>7</sup> Bënga ošbuáchiyënguentšana ndocná ainá ntsemnana nye cachabiana, ni jóbana nye cachabiana. <sup>8</sup> Bënga tmojtсийenëse, Bëngbe Utabnábiama jtsiyenana; y tmojóbanëšna, Bëngbe Utabnábiama jóbana. Chca, masque ainënga o obanënga, bënga Bëngbe Utabnábënga jtsemnana. <sup>9</sup> Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

<sup>10</sup> As, ¿ndáyeca tšëngaftanguentšë báseftanga, catšátangbe contra jtsóyebuambnyana, ndayá chënga tmojtšamama? ¿Y ndáyeca ín'yënga tšëngaftanguentšë jtsichámuana, catšátanga ndoñe uámanënga montsemna ca, ndayá chënga tmojtšamama? Er nyëtscanga šontsamna Bëngbe Bëtsabe delante jashjanguana, ntšamo cada ona tojéftsemcá tšabá o ndoñe tšabá bëtsemnana cha cháuyanama. <sup>11</sup> Er Bëngbe Bëtsabe uabemana palabrënguifne Bëngbe Utabná mëntšá tojánayana:

Ndegombre atšë ainá sëndëtsomñe, y chíyeca atšë šcojurá,  
nyëtscanga atšë delante mochanjoshëntsaméntšá atšë jadórama,  
y nyëtscanga šmochanjauyana, “ndegombre aca Bëngbe Bëtsá condmëna ca”.

<sup>12</sup> Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

*Ndoñe šmatjama inye ošbuáchiyënga bacna benachiñe chamótsatsama*

<sup>13</sup> Chíyeca, ya ndoñe quešnátamna ín'yëngbe contra jtsóyebuambnyana. Chca játamamna, smochtsejuabnaye y yejuana smochtsantješna ndocna te tondaye ntjamana, ndayá chaoma Jesucristbeyeca acbe catšata, chaojuabó y bacna soyënga chaoma. <sup>14</sup> Atšë sëndëtatšëmbo, mo canyá Bëngbe Utabnáftaca cánýifne mo canyáca quetsomñecá, ndocna soye yondmëna, nye cachabe ponto chaotsemna ndoñe tšabe soye. Pero canyë entšá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiana cocayé chë soye nyëtscá tempo jéftsemnana ndoñe tšabe soye. <sup>15</sup> Tšëngaftanga inya becá šmojtšatsëtsná, inye soyënga tšabá endmëna jasama ca, y cha tojtsejuabná,

chca soyënga jasama ndoñe tšabá yondmëna ca, pero tšëngaftanga tša šmojtšatsá causa, cha chca soyënga tojase, y chentšana tšojtsebiona puerta bacna soye tojamama, chca, tšëngaftanga jtsin'yan'nyayana ndoñe šmondoyena jtsamëse chë in'jenga jtsababuán'yeshanëse. Nye tšëngaftanga in'ye soyënga šmétsesayama ndoñe šmatjaleséncia chë soye chaoma in'ya, ndabiana Cristo tojanóbana, chë ndoñe ndegombre benachiñe chaoquedama. <sup>16</sup> Ndoñe šmatjaleséncia ndayá tšëngaftanga tšabá šmétsamama, in'jenga ndoñe tšabá tšëngaftangbiana chamotsóyebuambnama. Chca šmochanjobenaye, ntšamo šmojtšamcá jtsajbanase, in'jenga ndoñe tšabá tmontsoyebuambná ora. <sup>17</sup> Bëngbe Bëtsabe amëndayana bëngbeñe ndoñe quenátsmëna in'ye soyënga aiñe jasana o in'ye soyënga ndoñe, can'ye soye aiñe jofšiyana o in'ye soye ndoñe. Pero chabe amëndayana bëngbeñe aiñe endmëna jtsamana soyënga ndayama Bëngbe Bëtsá tojayana aiñe tšabá jamama yomna ca, cháftaca tempcá tšabá jtsatsmënana y ainaniñe oyejuayana jtseboamnana; y Uámana Espiritbeyeca bënga jobenayana chca jamana. <sup>18</sup> Y nda Crístbiye chca tšojtšeserverna, jamana Bëngbe Bëtsá cháftaca oyejuayá chaotsemnana, y entšangbe bomin'yiñe tšabia jtsemnana.

<sup>19</sup> Sempre šontsamna tšabe soyënga jtsamana y chë soyëngaca chaopodé jamana nyëtscanga natjëmmana chamotsiyenama, y ndaye sóynaca šmochtsama, ndayá in'jenga chaújabuache Jesucristbeñe corente jtsošbuáchiyama y ainaniñe bëtscá añemo jtseboamnana. <sup>20</sup> Tšëngaftanga ndaye sanánaca jasama šmobénayeca, ndoñe šmatjama chaotšopochocama ndayá Bëngbe Bëtsá ainaniñe tojamcá. Ndegombre, nyëtsca sananga tšabá jasama endmëna; pero ndayá tšëngaftanga šmojasama, in'ya bacna benachiñe chaótsatšama šmojamëse, chë soye cocayé ndoñe tšabá ntsemnana. <sup>21</sup> Tšabá endmëna mëntšena ndoñe ntjasana, vínoye ndoñe ntjofšiyana o ndayánaca ndoñe ntjamana, pero chë soye aiñe tojama ora, Jesucristbeyeca can'ye catšata chaojuaboma y bacna soye chaomama tojoservese.

<sup>22</sup> Asna, ntšamo tšëngaftanga chë soyëngama ndegombre šmošbuachecá, nye Bëngbe Bëtsá y tšëngaftangaftaca chaotsemna. Can'ye entšá ndegombre oyejuayá jtsemnana, can'ye soye jamama tšabá yomna ca tojtsejuabnase, y chë soye tojamentšana, ndoñe tšabá chca yonjamna ca juabnënga ainaniñe ndoñe tontseboñëse. <sup>23</sup> Pero can'ye entšá ndayá tojamentšana tojayana, bacna soye tojama ca chë ndayá tojasama o tojamama, as Bëngbe Bëtsánaca echanjayana cha ndoñe tšabá tonjama ca, er ntšamo tojamcá ndoñe tonjama chë soye aiñe tšabá yomna jtsošbuáchiyëse; y ndayánaca chca ora tojtšamëse, chca jamana bacna soye jtsemnana.

## 15

*Ntšamo in'jengbiana tšabá tojtsemncá mochtsama, ndoñe nye bëngbiana*

<sup>1</sup> Bënga, chë Jesucristbeñe corente ošbuáchiyënga, šontsamna chë nye batšatema ošbuáchiyënga jubabuáchana, chënga bacna soyënga tmojtšama ora, nye batšá ošbuáchiyana bomna causa; y ndoñe nye jatsënguayana nye ndaye soyëngaca yopodena bënga tšabá jtsemnana. <sup>2</sup> Cada ona bënga šontsamna jamana ntšamo cach bëngcá Jesucristbeñe ošbuachiyabiama tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bëtscá Jesucristbeñe chaotšošbuáchema, y ainaniñe más añemo chaotseboamnana. <sup>3</sup> Er Cristo, ntšamo tojanmcá cach ndoñe tonjanma nye cha oyejuayá jtsemnana. In'yetšá, cháftaca tojanopasá ntšamo Bëngbe Bëtsabe uabemana palabrénguiñe endayancá, mo Cristo Bëngbe Bëtsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsëtsná ca.” <sup>4</sup> Er lempe ntšamo tempo Bëngbe Bëtsabe uabemana palabrénguiñe tmojanabemcá, bënga jabuátambama endmëna. Ndayá bënga chiñe tmojtšajin'yama, bënga jtsobenanana padecena soyënguiñe tmojtšachnéjuana ora uantadënga jtsemnana, y ainaniñe más añemo jtseboamnana, y chíyeca bënga montsobena, chábeñe jtsošbuáchiyëse, chábeñe jobátmana, ntšamo tojanayancá chaomama. <sup>5</sup> Atše, Bëngbe Bëtsá sëntseimpadana, nda inétsama bënga padecena soyënguiñe uantadënga chamotsemnana, y nda inétsama bënga ainaniñe más añemo chamotseboamnana, cha chaoma nyëtscanga can'ye juabna chašmotseboamnana, ntšamo Cristo Jesús yojanjuabnacá tšëngaftanga jtsejuabnyëse; <sup>6</sup> cha chca chaoma, nyëtsca tšëngaftanga mo can'yiñe cuaftsemncá, y mo nyëtscanga can'ye ora cuafjayancá, Bëngbe Bëtsá, Bëngbe Utabná Jesucristbe Taitá, puerta bëtšá y uamaná yomnana chašmuin'yan'yema.

*Chë ndoñe judiëngbiámnaca chë tšabe noticiënga jtsemnana*

<sup>7</sup> Nyëtscanga oyejuayënga šmochjenofja, ntšamo Crístnaca tšëngaftanga tmojanëbuajcá, chca, entšanga chamuin'yan'yé Bëngbe Bëtsá puerta bëtšá y obená yomnana. <sup>8</sup> Atše sëntseboše ndayá jayanana, Cristo tojánabo judiënga jabáserviama ca, chca, jin'yan'iyama Bëngbe Bëtsá sempre inétsamama ntšamo tojašebuachenacá; tojánabo ntšamo Bëngbe Bëtsá bëngbe tempsca uámana bëtš taitanga tojanašebuachenacá chaocumplima; <sup>9</sup> y Bëngbe Bëtsá puerta bëtšá yomna ca chë ndoñe judiëngnaca chamuayanámnaca, cha chënga

inésalastemanama, ntšamo Bèngbe Bètsabe uabemana palabrénguiñe endayanca, y chca tojanocumplí:

Chíyeca, atše chë ndoñe judièngbeñe chaitsemna ora, aca cbochantsatschuanaye, Bèngbe Bètsá;

y jacántase chanjayana aca puente bètsá y uamaná comna ca.

<sup>10</sup> Inyoca mèntšá endayana:

Puente oyejuayènga chë ndoñe judiènga šmochtsemna, Bèngbe Bètsabe bocacana entšàngaftaca cányiñe ca.

<sup>11</sup> Y inyoca mèntšá endayana:

Bèngbe Utabná šmochtsatschuanaye tšèngaftanga ndoñe judiènga,

y cha šmochtsatschuanaye nyetsca tšèngaftanga nyets luarènguenache entšanga ca.

<sup>12</sup> Y Isaiásnaca Bèngbe Bètsabe uabemana palabrénguiñe mèntšá tojanábema:

Canya Isaibe entšanguentsana echanjabo,

y Bèngbe Bètsá chábiye uamaná bochanjábema, nyets luarènguenache entšanga chaot-saméndama,

y chènga chábeñe jtsošbuáchiyèse, chábeñe mochantsobátmana tšabe soyènga chèngbiama chaotsamama ca.

<sup>13</sup> Atše, Bèngbe Bètsá séntseimpadana, nda inésama bènga chábeñe chamotsobátmanama tšabe soyènga bèngbiama chaomama, cha chaoma tšèngaftanga ainaniñe puente oyejuayènga chašmotsemnana y ainaniñe tšabe ebionana chašmotsebmnama, chábeñe jtsošbuáchiyèse; y Bèngbe Bètsá chca tšèngaftangbiama chaoma, tšèngaftanga cada te más chábeñe chašmotsobátmanama, chë Uámana Espíritbe obenánaca.

<sup>14</sup> Jesucristbeyeca atšbe catšátanga, atše corente séndétatšémbo tšèngaftanga puente tšábenga šmornnama, ndayá cmannama corente šmotatšémbuama, y jtsenbuayinyayama šmobenámna. <sup>15-16</sup> Quem tsuanáchañe básefta soyèngama sènjuábema, ntšamo šmatjátsjuabnayama atšbe ntjatauatjác; chca sènjama, básefta soyèngama chašmuatenójuaboma; y chca séntsobena juabemana, er Bèngbe Bètsá tojama atšbe chaitsebmna chë uámana trabajo, Cristo jtseservénana, chë ndoñe judiènga jtšèjabuáchanèse. Atše bachnécá séntoservena, Cristo stseservena ora, entšanga tšabe noticièngama jtsabuayinyayèse; atšbe chca sèndama chë ndoñe judiènga Jesucristbeñe chamotsošbuáchemá, y ndayánaca chamotsamama Bèngbe Bètsá oyejuayá chèngaftaca chaotsemnana, mo chabiama canye uatšémbonancá. Chcánaca atšbe sèndama, ndoñe judiènga ndegombre Bèngbe Bètsábenga chamotsemnana, chë Uámana Espíritbeyeca.

<sup>17</sup> Chca, atšbe Cristo Jesúseftaca cányiñe mo canyáca quetsomnécá, ndegombre séntsobena jtsejuabnayana ntšamo Cristo jaserviama atšbe sèndamcá, puente uámana soye yomnna.

<sup>18</sup> Atšbe añemo séntsebmna nye chë ndayá Cristo átseftaca tojamama jóyebuambayama, ndoñe judiènga Bèngbe Bètsá chamóyeunama. Chca tonjopasá, ndayá tijayanama y tijamama, <sup>19</sup> chë Bèngbe Bètsabe obenana jinjanjyayama bèts soyèngama, chë chabe obenánaca tojopasá tšabe soyèngama, y chë Uámana Espiritu bèts obenánaca tojama soyèngama. Y chca, Jerusalenocana jaboatšase, nyetsca luarènguèjana Iliria luaróntsoñe, Cristbe tšabe noticièngama nyets luarènguenache entšanga tijabuayená. <sup>20</sup> Atšbe sempre canye soye inyè soyèngama más sènjánboše, y enjamna chë tšabe noticièngama jábuayenana, entšanga ndocna te Cristbiana oyeubambnayana tmonjanuena luarènguenache; y chca sènjanna, atšbe ndoñe játamama inya tojanbojatšé trabajo, mo inyabe bojatšena yebnentšé jajeubama cuafjatontšecá. <sup>21</sup> Ntšamo Bèngbe Bètsabe uabemana palabrénguiñe endayancá, chë tempo Cristbiana ndoñe tmonjanuenèngbiama:

Chë ndèmuanyènga tempo ndocná chabiama tonjanabuayená, chènga tšabá mochanjinnye ntšamo cha yomnna;

y chë ndocna te chabiama tmonjounènga, chabe soyèngama echanjósertaye ca.

#### *Pablo yojanjuabná Roma bèts puebløe jama*

<sup>22</sup> Y nya chë causa, atšbe ndoñe chiyjobená tšèngaftangbiøye jana tšèngaftanga jányama, masque ba soye tsjenojuabná chøye jama. <sup>23</sup> Pero mora atšbe trabajo quem luarènguiñe sènjapochocá y tèmpanca tšèngaftanga jányama tša sèndánbošeyeca, <sup>24</sup> séntsejuabná mora aifne chjobenaye chøye jama, tšèngaftanga jautsètsayama, chèjana chajjachnèngo ora, España luarøye chaitšá ora. Y baseftayté tšèngaftangaftaca chjèftsemna, cbochjányama tšèngaftangaftaca oyejuayá; chentsana Diosmanda šmochjuájabuache, y lempe ntšamo chašojtsajabotcá šmochjátsetaye jobenayama Españoøe ayana jtétóntšama. <sup>25</sup> Morna Jerusalenøye chanjá, choca entšanga Bèngbe Bètsábenga imomnènga jaujabuáchama; <sup>26</sup> er Jesucristbeñe ošbuáchiyènga Macedonia y Acaya luarentsènga, tmonjauabó tšabá yojtsemna crocénana jájubana chë Jerusalenoca entšanga, Bèngbe Bètsábenga imomnènga y ndbomnèjémènga imomnènga jujabuáchama; y oyejuayènga chca

tmonjama. <sup>27</sup> Cachënga chca tmonjajuabó, y chca jamana tsabá endmëna, er judiënga tmonjanma, chë Bëngbe Bëtsábocana tmojanóyëngacñe soyënga ndoñe judiëngnaca chamotsebonnama; chíyeca ndoñe judiënga entsamna chë Jerusalemoca judiënga ošbuáchiyënga jujabuáchana, ndaye soyënga jatšatayëse, chënga vida jtsebonnama chamotsobenama. <sup>28</sup> Y chca, quem trabajo chajapochocá ora, y chë ndoñe judiënga ošbuáchiyënga lempe tmojátbanana chajáftsayentšbuachiyë ora, chanjontsé Españaoye jama, y tsëngaftangbiajana chanjachnëngo tsëngaftanga jáftsanyama, tsëngaftangaftaca baseftayté jëftsemnama. <sup>29</sup> Atse corente sëntsetatšëmbo tsëngaftangbiocyte chajjá ora, chjášhango y chjama tsëngaftanga bëtscá tsabe bendicionënga Crístbentsana chašmotsebonnama, tondaye chacmondëtsabuáshebenëntscuana.

<sup>30</sup> Jesucristbeyeca catšátanga, Bëngbe Utabná Jesucristbeñe ošbuáchiyënga quetsomñecá, y bënga bonshánana chamotsebonnama chë Uámana Espíritu inétsamayeca, tsëngaftanga cbontsaimpadana, bëtscá chašmotsentsëna Bëngbe Bëtšá nyets ainánaca jtseimpadánama, ntšamo atše sëndbetsëimpadancá, cha atše chašotsinyënama. <sup>31</sup> Cha šmochtseimpadana chë Judea luaroca ndošbuáchiyënga ndocá chašmondëborlama, y chë Jerusalemocuënga Bëngbe Bëtšábënga, tsabá chamóyëngacñama ndayá chënga jujabuáchama chajáftsayentšbuachiyë ora. <sup>32</sup> Y chentšana, y Bëngbe Bëtšá chca chajábosenëse, atše chayobená bëtscá oyejuayá tsëngaftangbioca jashjanguana tsëngaftanga jányama, y tsëngaftangaftaca chaitsemna ora, batsá jóchnama chayobená. <sup>33</sup> Atše, Bëngbe Bëtšá sëntseimpadana, nda inétsama bënga ainaniñe tsabe ebionana chamotsebonnama, nyetsca tsëngaftangaftaca chaotsemnama. Chca chaotsemna.

## 16

### *Ubuátmënga jacheuayama*

<sup>1</sup> Atše sëntseboše tsëngaftanga jáuyanana Febe, Jesucristbeyeca bëngbe uabena, canye tsabe entsá endmënama; cha chë Cencrea puebloca enefjuana ošbuáchiyënga endujabuachana. <sup>2</sup> Tsabá cha šmochjofja, mo canya Bëngbe Utabnábia quetsomñecá, ntšamo Bëngbe Bëtšabe entsanga entsamncá inyëngaftaca jenofjana. Smochjuájabuache ntšamo tbojtsajabotcá, er cha banga tonjújabuache; átsbioynaca.

<sup>3</sup> Atšbe cuenta Prisca y Aquila šmochjácheuaye, chë átšeftaca tbonjatrabajata, Cristo Jesusbiana oservëniñe. <sup>4</sup> Jobanámna bonjanprontana, atše jatsbocama, ndoñe chašmondóbama. Atše chama chata sëntsatacheuaná; y ndoñe nye atše, sinó nyets luarenache enefjuana ndoñe judiënga ošbuachiyëngnaca chca. <sup>5</sup> Chë ošbuáchiyënga, chë Bëngbe Bëtšá jëtschuayama chatbe yebnentse jénefnama imuamanëngnaca, šmochjácheuaye. Atšbe bonshana Epeneto šmochjachuaye; cha endmëna chë natsaná Asia luaroca Jesucristbeñe jtsošbuáchiyama. <sup>6</sup> María šmochjachuaye; cha tsëngaftangebeñe bëtscá tojtrabajá. <sup>7</sup> Chë cach atšcá judeocata Andrónico y Junias šmochjácheuaye. Chata canye ora átšeftaca cárceloye bonjanëtámëna, y Jesucristbe ichmónëngbiama chata puerte uámanata bonjamna, y atšbiama más natsana tbojanontsé Jesucristbeñe jtsošbuáchiyama.

<sup>8</sup> Ampliato šmochjachuaye, atšbe bonshaná, er atšcá cha Bëngbe Utabnáftaca cányiñe mo canyáca bondmëna. <sup>9</sup> Urbano šmochjachuaye, chë bëngaftaca Crístbiana oservëniñe trabajayá; y atšbe bonshana Estáquisnaca šmochjachuaye. <sup>10</sup> Apeles šmochjachuaye; cha ba soye tonjinñayé Jesucristbeñe puerte yošbuáchemá; y Aristóbulbe yebnentšëngnaca šmochjácheuaye. <sup>11</sup> Chë cach atšcá judeocá Herodión šmochjachuaye, y chë Narcisbe pamillentsana Bëngbe Utabnábeñe ošbuachiyëngnaca. <sup>12</sup> Trifena y Trifosa šmochjácheuaye; chata Bëngbe Utabnabiama puerte bondëtrabajá; y bëngbe bonshaná Pérsidnaca šmochjachuaye; cha bëtscá endëtrabajá, Bëngbe Utabnabiama oservëniñe. <sup>13</sup> Rufo, chë Bëngbe Utabnabiama uámana trabajayá, šmochjachuaye, y chabe mamánaca; cha mo atšbe mamacá endmëna. <sup>14</sup> Asíncrito, Flegonte, Hermes, Patrobas y Hermas šmochjácheuaye, y chë inyënga Jesucristbeñe ošbuáchiyënga chëngaftaca inmënutanangnaca. <sup>15</sup> Filólogo y Julia, Nereo y chabe uabena, Olimpas y nyetsca Bëngbe Bëtšabe entsanga chëngaftaca inmënutanangnaca šmochjácheuaye.

<sup>16</sup> Nyetscanga mo Jesucristbeyeca catšatangcá šmochjenchuaye, jtenámochëse, ntšamo cach tsëngaftangbe pamíllanga puerte bonshanánaca šmondetsacheuanaycá. Nyets luarenache enefjuana Crístbeñe ošbuáchiyënga cmontsacheuaná.

<sup>17</sup> Jesucristbeyeca catšátanga, atše cbontsaimpadana tsabá šmochjuáfsna y cuedado šmochtsebonma chë cányënga inyëngaftaca contra chamotsemnama y inyënga Jesucristbeñe ošbuáchiyana chamotsajbanama inmëtsamëngbiama; chëngna, chë tsëngaftanga ndaye šmojóyëngacñe buatëmbana soyëngama contra jtsoyëbuambayana. <sup>18</sup> Er chca amënga, ndoñe ntsentšënaná Cristo Bëngbe Utabná jtseservënaná, sinó jtsamana ndayá cachënga tmojtsebošcá, nye cachëngbe cuerpama tsabá tojtsemncá; y tsabe y botamana palabréngaca

chë paselo jáingñama yomna entsanga jáingñana, chëngbe ainaniñe chëngcá chamotsejuabnama. <sup>19</sup> Nýetsca entsanga tmojouena, chë Bëngbe Bëtsabe soyëngama ntšamo ínÿenga tcmojabuatambacá, tšëngaftanga corente šmnétsayaunanama, y chíyeca atše puerte oyejuayá tšëngaftangafaca sëntsemna. Atše sëntseboše, tšëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamamna chašmotsemna mo ndoñe cuafsetatšëmbcá. <sup>20</sup> Y Bëngbe Bëtsá, nda inétsama bënga ainaniñe tšabe ebionana chamotsebonnama, ndoñe bën y echanjama tšëngaftanga Satanás chašmoyénjanama, mo cha tšëngaftangbe cucuatšíñe cuafjaboshjoncá. Atše sëntseimpadana Bëngbe Utabná Jesús, chaoma tšabe bendicionënga tšëngaftangbeñe chaotsemnama.

<sup>21</sup> Timoteo, chë átseftaca trabajayá, tšëngaftanga cmontsacheuaná; y Lucio, Jasón y Sosípater, cach atšcá Judeoquënga, chëngnaca tšëngaftanga cmontsacheuaná.

<sup>22</sup> Atšnaca Tercio, chë Páblëbe cuenta quem tsbuanácha uabiamnayá, tšëngaftanga cbontsacheuaná, tšëngaftanga y átšnaca Bëngbe Utabnáftaca cánÿiñe mo canÿacá quetsomñecá.

<sup>23</sup> Gayo cmontsacheuaná; atše Pablo chabe yebnentše posada sëntsebonna, y cha enduamana nýetsca chë muentša ošbuáchiyënga tšabá júbuajana. Erasto, chë quem pueblentša crocënana bojanÿá, tšëngaftanga cmontsacheuaná, y Jesucristbeyeca bëngbe catšata Cuártënaca.

<sup>24</sup> Atše, Bëngbe Utabná Jesucristo sëntseimpadana, cha chaoma tšëngaftangbeñe tšabe bendicionënga chaotsemnama. Chca chaotsemna.

*Quem tsbuanácha juapochócama, Pablo Bëngbe Bëtsábioye tbojtanchúá*

<sup>25</sup> Bënga sempre mochtsinÿanÿnaye Bëngbe Bëtsá puerte uamaná yomnama. Cha endobena jamama tšëngaftanga puerte chašmotsošbuáchema; y chca, cha echanjama ntšamo chë bënga fsëndabuayiná tšabe noticiënguiñe yomncá, ntšamo chë Jesucristbe buayenana soyënga yomncá, y ntšamo chë Bëngbe Bëtsá šojinÿanÿé ndegombre soyënga yomncá. Nýets tempo mëntscoñama, Bëngbe Bëtsá chë soyënga entsanga ndoñe tonjinÿanÿé, y chë causa chënga chë soye ndoñe ntsetatšëmbuana. <sup>26</sup> Pero morna, ntšamo Bëngbe Bëtsabe juabna oyebuambnayënga tmojanabemcá, tojama bëtscá entsanga chë ndegombre soyëngama chamotsetatšëmbuama; Bëngbe Bëtsá, chë nýets tempo vida bomná, tojanmandá entsanga nýets luarënguenache chë ndegombre soyëngama chamotsetatšëmbuama, chënga chábeñe chamotsošbuáchema y ntšamo cha yobošcá chamotsamama.

<sup>27</sup> Nýe canÿe Bëngbe Bëtsá endmëna, y cha nýets osertánana endbomna. ¡Nýetscanga chamotsinÿanÿná cha puerte bëtsá y uamaná yomnama, ndayá Jesucristo tojanmama! Chca chaotsemna.

## 1 Corintios

*Pablo chënga jacheuayama*

<sup>1</sup> Atše Pablo, ndábioye Bëngbe Bëtsá tbojanchembo Jesucristbe ichmoná jtsemnana, Bëngbe Bëtsá chca yojánbošeyeca, cányíñe chë Jesucristbeyeca catšata Sósteneseftaca, <sup>2</sup> quem tsbuanácha sentsabiarná tsëngaftanga chë Corinto bëts puebloca Jesucristbeñe ošbuáchiyëngbiama; ndëmuanyënga Cristo Jesúseftaca Bëngbe Bëtsá tojábiama chabe entsanga nýe chábioye oservénënga, ndëmuanyënga Bëngbe Bëtsá tojáchembo chabe entsanga chašmotsemnana, chë nýe quem luarama enójuabnaye entsanguentsana luarénënga, Bëngbe Utabná Jesucristbioye tmojotsëmbonëngaftaca, Jesucristo nda yomna Bëngbe Utabná y chëngbe Utabná. <sup>3</sup> Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnana, y tsëngaftangbe ainaniñe tsabe ebionana chašmotsebonnana.

*Bëngbe Bëtsá Jesucristbeyeca tojama tsëngaftanga ba tsabe bendicionënga chašmotsebonnana*

<sup>4</sup> Bëngbe Bëtsá tsëngaftangbiama sempre sëndbëtsatschuanaye, er tsëngaftanga cányíñe mo canýacá Cristo Jesúseftaca šmómnyeyeca, Bëngbe Bëtsá tsëngaftangbeñe tojajuabó, tsëngaftangbe tsabiama. <sup>5</sup> Chca Crístoftaca šmómnyeyeca, Bëngbe Bëtsá tojama tsëngaftanga chašmotsebonnana chábensana nýetsca tsabe soyënga, tsëngaftanga obenana chašmotsebonnana cha jamëse, Bëngbe Bëtsabe soyëngama jóyebuambayama y chë soyëngama chacmésertama. <sup>6</sup> Chca, ntšamo chonjanabuayinacá mo Jesucristbe ndegombre soyëngcá, tsëngaftangnaca inýengbioye tsábá šmojinýanýe ndegombre soyënga bëtsemnana, chë ntšamo jtsiyenama. <sup>7</sup> Y chca, Bëngbe Bëtsá chabe entsanga inétsatšatnaye tsabe soyënguentšana tondaye quecmochatabuáshebena, Bëngbe Utabná Jesucristo quem luarentše yochtonýna tescama Bëngbe Bëtsábeñe jtsošbuáchiyëse chašmojtsobatmanëntscuana. <sup>8</sup> Cha echanjama tsëngaftanga chábeñe corente chašmotsošbuáchemba y ainaniñe bëts añemo chašmotsebonnana, ndayá tsëngaftangftaca jamama cha yojuabnacá chaojapochocantscuana; chca, chë Bëngbe Utabná Jesucristo nýetsca entsangbiama tsábá o ndoñe tsábá tmonjamama yochjayana te, ndocná chaondobená jayanana tsëngaftanga ndoñe tsábá šmonjama ca. <sup>9</sup> Bëngbe Bëtsá nýets tempo jtsamana ntšamo tojašebuachenacá, y cha endmëna nda tcmojánachembo cányíñe mo canýacá chašmotsemnana chabe Uaquiñá Jesucristoftaca, Bëngbe Utabná.

*Chca ošbuachiyëngbeñe nýetscanga ndoñe cachcá montsanjuabná*

<sup>10</sup> Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nýetsca bëngbiama yomnana, tsëngaftanga nýetscanga cachcá chašmotsejuabnana, y tsëngaftangbeñe ndoñe más báseftanga canýe soye y inýenga inýe soye chamuajtjuabná. Y aíñe šmochtsiyena mo canýacá, nýetscanga cachcá jtsējuabnayëse y cachcá jamama jtsebošëse. <sup>11</sup> Jesucristbeyeca atšbe catšátanga, atše chca sënjayana, er Cloebe yebnentsënga šmonjabëuenaye, tsëngaftangbeñe šmojtšenpenzentserama. <sup>12</sup> Ntšamo sentsichamcá entsemna ndayá tsëngaftangbentše báseftanga šmojtšichamo: “Atše Páblëbe ustoná sëndmëna ca”; inýengna imojtsichamo: “Atšna Apólosbe ustoná sëndmëna ca”; inýengna: “Atšna Pédrëbe ustoná sëndmëna ca”, y inýengna: “Atšna Cristbe ustoná sëndmëna ca” imojtsichamo. <sup>13</sup> Chca šmojtšomama, jtsóbocanana mo cada básefta ošbuáchiyënga canýe Cristo tmojtšomomncá. ¿Pablo yojamna nda tmojanrucificá tsëngaftangbe tsabiama? ¿O tsëngaftanga uabáinënga šmomna, atše jótšëmbonëse, tsëngaftanga atšbe ústonënga bëtsemnana? <sup>14</sup> ¡Bëngbe Bëtsá sëndbëtsatschuanaye atše ndocná tsëngaftanguentsá tjanábayama; nýe Crispo y Gáybioye aíñe! <sup>15</sup> Chca, ndocná quenátobena jayanana, atše jótšëmbonëse uabainá cha tojanoquedá ca, mo atšbeñe ošbuáchiyënga cuaftsemncá. <sup>16</sup> Estéfanabe pamillentsëngnaca sënjanëbabe, pero ndoñe quetsatabouínýna inýa tjanábayama. <sup>17</sup> Er Cristo ndoñe chešnatánichmó inýenga jubáyama, ndayá chë chabe tsabe noticiëngama entsanga jábuayenama. Ndoñe chešnatánichmó chë soyënga jayanana, corente osertana entsangbe soyënga jtsichámëse; chca, entsanga Cristbeñe chamotsošbuáchemba, ndoñe chë atšbe osertánanentsana palabréngama, sinó nýe chë buayenánama, Cristo cruzoca bëngbiama tojanóbanama.

*Cristbeñe yomna Bëngbe Bëtsabe obenana y osertánana*

<sup>18</sup> Quem buayenánana, Cristo entsangbiama cruzoca tojanóbanama, chë pochocánënga jtsemnana tmojtšajnëngbioye jtsinýanana mo ndoñe corente juabna bomnëngbe soycá; pero bëngbiama, chë Bëngbe Bëtsá nýetsca tescama šochjátšëbacangbiama, quem buayenánana

jtsinyányayana Bèngbe Bètsabe obenana. <sup>19</sup> Ntšamo Bèngbe Bètsá chabe uabemana palabrènguiñe tojanayancá:

Atše chanjama chë tša osertánèngbe osertánana tondayama chaondètsoservénama; y chanjama chë ba soyèngama osertánèngbe osertánana tondayama chaondètsámanama.

<sup>20</sup> ¿Ntsachetšá yojtšamana chë tša osertaná y chë puerte uatsjinjyená tbojayana soyènga? ¿Ntsachetšá yojtšamana chë tša tsábá chë soyèngama juabnayá, morscá, y ínÿengaftaca enatsètsnaye ora chèngbe ayèñjanayá tojayana soyènga? Ndegombre Bèngbe Bètsá tojinjányé, chë quem luarentša bèts osertánánaca tmojayana soyènga tondaye yonduámanama. <sup>21</sup> Bèngbe Bètsá, nyets osertánana bomná quetsomñecá y puerte tsábá jtsejuabnayése, ndoñe tonjanalesenciá quem luarentša entsanga cha chamotsábuatmama, chë quem luarentšènga tša osertánènga tmojánayana soyèngama. Chamna, cha tsábá tbojanínynana chábeñe ošbuáchiyènga játsebacana chë bènga fsèndabuayiná soyèngama, masque ínÿengbioyna mo ndoñe corente juabna bomnabe soycá jtsinyánana.

<sup>22</sup> Judiènga tša jtsebošana y Bèngbe Bètsábioye jtsojtjanañana bèts soyènga chaomama, chabe obenana jinjányayama; y ndoñe judièngna tša jtseguayana chë puerte osertánèngbe soyènga jtsetatšèmbuama. <sup>23</sup> Pero bèngna Cristbiamá entsanga fsèndabuayiná, chë ínÿenga tmojancrucificabiamá. Quem buayenánana chë judiènga ndoñe tsábá ntjéuananana. Y ndoñe judiènga mondbètsejuabnaye chca yomna mo canÿe ndoñe corente juabna bomnabe soycá ca; <sup>24</sup> pero bèngbiama, nyetscanga Bèngbe Bètsá chabe entsanga chamotsemnana šojáchembèngbiama, masque judiènga o ndoñe judiènga, Cristbeñe endmèna nyets Bèngbe Bètsabe obenana y osertánana; <sup>25</sup> er ndayá Bèngbe Bètsá tojanmá, Cristo cruzoca chaóbanama jalesénciase, banga jtsinyánana mo canÿe ndoñe corente juabna bomnabe soycá, pero ndegombre endmèna canÿe puerte más osertaná tojama soye, lempe ntšamo entsanga imotatšèmbuama. Y ndayá cha tojamá masque bángbioye jtsinyánana mo canÿe tondaye obenabe soycá, ndegombre chë soye jtsinyányayana Bèngbe Bètsá puerte más obenana yobomnana, nyets obenana ntšamo entsanga imobomnana. <sup>26</sup> Jesucristbeyeca atšbe catšátanga, šmochtsejuabnaye ntšamo yojamnama, Bèngbe Bètsá chabe entsanga chašmotsemnana tmojánachembo ora. Tsèngaftangbentše nÿe báseftanga tša osertánènga šmojamna, ntšamo chë osertánana bomnènga imomnana entsanga mondbètsejuabnaycá; y báseftanga šmojamna becá mando atšetanènga o uámana pamillentsènga. <sup>27</sup> Pero Bèngbe Bètsá, quem luarentše ndoñe tša osertánènga tojanabacacá, chca, cha jamama chë quem luarentša soyèngama tša osertánènga chamotséuatjama; y cha, quem luarentše ndobenènga tojanabacacá, chca, chë obenana bomnènga chamotséuatjama. <sup>28</sup> Bèngbe Bètsá quem luarentšana tojanbocacá ndayá tondaye yonduamancá y ndayá ínÿenga imuabotencá; tojanbocacá ndayá tondaye yonduamancá, chca, ndayá quem luarentše tša uamancá tondaye chaondètsámanama. <sup>29</sup> Y chca, Bèngbe Bètsabe delante ndocná quenátobena jayanana tša bètsá cha yomna ca. <sup>30</sup> Bèngbe Bètsá tojama bènga Crístoftaca cányíñe mo canÿacá jtsemnèse chamotsiyenama, y chábeyeca tojama bènga tsábènga chabe bomínÿíñe chamotsemnana, chabe entsanga jtsemnana chamobenama, puerte tsábènga cach Bèngbe Bètsacá, y atsebácanènga chamotsemnana. <sup>31</sup> Y chca, ntšamo Bèngbe Bètsabe uabemana palabrènguiñe endayancá: “Nda tojtseboše jayanama cha canÿe uamaná yomna ca, chamna más tsábá cha bontsemna jayanama Bèngbe Utabná puerte uamaná yomna ca.”

## 2

### *Ntšamo Pablo Cristo crucificanábiamá chènga tojanabuayená*

<sup>1</sup> Pero, Jesucristbeyeca atšbe catšátanga, Bèngbe Bètsabe ndegombre soyèngama tsèngaftanga jábuayenama sènjána ora, chca sèñjanama ndoñe chë uámanèngbe palabrèngaca, ni chë tša osertánèngbe palabrèngaca. <sup>2</sup> Y tsèngaftangaftaca sèñjanama ora, ndoñe quetstétseboše nÿe ndayíñnaca jatsjuabnayana, ndayá nÿe Jesucristbeñe, nda bèngbe tsábiamá tmojancrucificá. <sup>3</sup> Atše tsèngaftangbèñe sèñjanama, mo canÿa ba soyènga jamama ndobenacá, y mo canÿa puerte auatjácá y tbojtsengmèmmnacá, chabe trabajo jamama ndoñe jobenayama juabnaye causa. <sup>4</sup> Ntšamo chonjanètsétsná y chonjanabuayiyincá atše sèñjanoyebuambá ndoñe chë tša osertánèngbe palabrèngaca, tsèngaftanga jáyèñjanama chiñe chašmotsošbuáchemá; pero aife tchonjanayèñjaná, Bèngbe Bètsabe Espíritu y chabe obenana tsèngaftanga jinjányiyése, <sup>5</sup> chca, tsèngaftanga Bèngbe Bètsábeñe chašmotsošbuáchemá, ndoñe nÿe entsangbe osertánánaca, sinó Bèngbe Bètsabe obenanama.

### *Uámana Espíritbeyeca, Bèngbe Bètsá jamana entsanga cha chamotsábuatmama*

<sup>6</sup> Pero, chë ya tmojashjáchènga Bèngbe Bètsábeñe puerte jtsošbuáchiyama y chabe soyèngama corente jtsoertánama, chèngbeñe bènga fchandóyebuambaye becá osertánana bomna soyènga. Pero ndoñe quenátomèna quem luarentša entsanga quem tempo

mondbétsichamo soyënga, ni mora quem luarentşe amëndayëngbe soyënga, ndëmuanyënga ndoñe bën y ndocna obenana bomnënga mochanjëftsoquëda. <sup>7</sup> Y aïñe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentşa entsángbioye baytentscuana ndoñe tonjaninýanyë soyënga, y chca, entsánga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsëtsanga y uámanënga jtsemnana, cháftaca chë nyetsca tescama yomna tsabe vida jtsebomnama. <sup>8</sup> Quem Bëngbe Bëtsabe puerte osertánana bomna soyënga endmëna canýe soye ndayá quem luarentşa amëndayënga ndoñe ntsësertánana, er chënga aïñe matëñjanësértase, Bëngbe Utabnábioye chënga ndoñe matmëñjanrucificá, Bëngbe Utabná nda puerte bëtsá y uamana yomna. <sup>9</sup> Bëngbe Bëtsabe uabemana palabrënguïñe quem Bëngbe Bëtsabe puerte osertánana bomna soyëngama mëntsó endayana:

Cha imobobonshánëngbiama Bëngbe Bëtsá tojaprontá soyënga, ndocná tonjinýe, ni tonjouena y ni mo tonjajuabó ca.

<sup>10</sup> Pero Bëngbe Bëtsá quem soyënga chabe Espíritoftaca bënga şojanýanyë, er chë Espiritu lempe jtsetatşëmbuana, chë Bëngbe Bëtsabe soyëngama puerte totcá josértama yomna soyëngámna.

<sup>11</sup> Entşángbeñe ndocná quenátobena jtsetatşëmbuana ndayá entsabe ainaniñe tomnana, sinó nýe chë entsabe espiritu, chë chábeñe yomná. Cachcá, nýe Bëngbe Bëtsabe Espiritu jtsetatşëmbuana ndayá Bëngbe Bëtsá tojuabnacá. <sup>12</sup> Y bëngna, Bëngbe Bëtsábicocana Espiritu tmojóyëngachë, ndoñe canýe quem luarentşa espiritu, chca, bënga chaşósertama chë Bëngbe Bëtsá tojama bënga chamotsebomna soyëngama, bëngbe tsábiamá cha jtsejuabnayëse. <sup>13</sup> Bënga chë soyëngama fsëndoyebuambná, ndoñe chë quem luarentşa entsángbentşana tífjuatsjinýe osertánana bomna palabrëngaca, sinó chë Bëngbe Bëtsabe Espiritu şojabuatambá palabrëngaca. Chca, Bëngbe Bëtsábicocana soyëngama bënga fsëndabuayinýa, Bëngbe Bëtsabe Espiritbentşana yóbocana palabrëngaca, chë Uámana Espiritu ainaniñe imobonngbioye.

<sup>14</sup> Bëngbe Bëtsabe Espiritu ndoñe tondbomná, chabe ainaniñe ndoñe tnojýëngachiana chë Bëngbe Bëtsabe Espiritbiocana yóbocana soyënga, er chë entsábiamá chë soyënga jtsemnana mo canýe ndoñe corente juabna bomnabe soyëngcá, y chabosertama cach ndoñe ntsobenana. Chca endmëna, er entsá jobenayana quem soyëngama jtsetatşëmbuana y josértama, nýe chabe ainaniñe chë Uámana Espiritu tbojtsájabuachanëse. <sup>15</sup> Pero nda aïñe chë Espiritu tbojtsëbomna jtsoebenana nyetsca soyënga tsábá jinýama chabosertama, y ndocná chë Espiritu ndoñe tbondbomná ntsobenana josértana ntşamo chë Espiritu bomná yomnama. <sup>16</sup> Er Bëngbe Bëtsabe uabemana palabrënguïñe mëntsó endayana: “Ndocná quenátubatma Bëngbe Utabnabe juabna, chábioye jabuátëmbama chaotsobenama ca.” Pero bënga, chë oşbuáchiyënga, mondobena jajuaboyana ntşamo Cristo yojuabnacá.

### 3

#### *Jatrabájama enutanánënga Bëngbe Bëtsá jasérviamá*

<sup>1</sup> Pero, Jesucristbeyeca atşe catsátanga, atşe ndoñe chiyatanobená jóyebuambayama, mo tsëngaftanga chë Uámana Espiritoftaca mandánënga şmojatsmëncá, sinó nýe cachënga tsábá jtsomñama juabnënga bomna entsángbioycá, mo basetemëngbioycá, Cristbe soyëngama josértama ndobenënga. <sup>2</sup> Mo canýe bebmácá, chabe basetëmbioye nýe létsiye jafşiyana y paselo jabmuánama sananga, chë básetema chcana jasama cabá ndoñe ntsoebenana causa, cachcá, atşe chbonjanabuatambá Bëngbe Bëtsábiamá nýe chë más paselo josértama soyëngama, y ndoñe inýe soyënga más totcá josértama soyënga, er tsëngaftanga ndoñe queşmëñjatobena chca soyëngama josértana. Y ni mora, tsëngaftanga queşmátobena Bëngbe Bëtsabe soyëngama josértana, chë josértama más totcá yomna soyëngama; <sup>3</sup> er tsëngaftanga cabá şmojtsama, nýe ntşamo cach tsëngaftanga tsábá jtsomñama tsëngaftangbe juabnënga yomncá. Y tsëngaftanga ínýengaftaca cabá yapa şmojtsenántaboşe y nýe ínýëngbioye jayénjanama soyënga şmojtsamëntscuana, tsëngaftanga şmojtsama nýe ntşamo cach tsëngaftanga tsábá jtsomñama tsëngaftangbe juabnënga yomncá, y chca, tsëngaftanga şmojtsiyena mo chë nýe quem luarama enójuabnayë entsángcá. <sup>4</sup> Er canýa: “Atşe Palëbe ustoná sëndmëna ca”, y ínýana: “Atşe Apólosbe ustoná sëndmëna ca” tojayana ora, chca jtsamana mo chë nýe quem luarama enójuabnayë entsángcá.

<sup>5</sup> Tsëngaftanga chca şmojamama, atşe şontsemna tsëngaftanga játjayana: ¿Ndayá Apolos yomna? ¿Ndayá Pablo? Chatna co nýe Bëngbe Bëtsábioye oservënata bondmëna, ndátbeyeca tsëngaftanga Jesucristbeñe şmojtsosbuachë, y bëndata cada ona fsënjama chë Bëngbe Bëtsá şojanýanyë trabajo. <sup>6</sup> Atşna, mo nda jajañe jénaye cuafuatbontsacá, tsëngaftangbeñe sënjanbojatsë chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguïñe béjaye cuaftebuescñnacá, enjantrabája cach atşe sënjanbojatsë



chiñe; pero Bèngbe Bètsá, ntšamo matatémenga chauájuaa endbetsamcá, tojama banga tsèngaftanguentše Jesucristbeñe chamotsosbuáchemá. <sup>7</sup> Ntšamo, chë jená y chë matènguifne béjaye buešcñayá ndoñe yapa ntsámanana chiñe shajuanènga chaóboconama, nye Bèngbe Bètsá aíñe, cachcá, nda Bèngbe Bètsabiama entšanga jábuayenama trabajo tojabojatšé y nda chentšana tojášhango cach trabajuifne jontšama, ndoñe ntjamana entšanga Jesucristbeñe chamotsosbuáchemá; nye Bèngbe Bètsá chca jamana. <sup>8</sup> Chë jená y chë matiñe béjaye buešcñayá cach trabajuifne jtsentsénana, y chatna mo trabajayatcá jtsámanana; y cada ona juácanana ntšamo chabe trabajo tomncá.

<sup>9</sup> Bëndata fsèndmèna trabájayata Bèngbe Bètsabiama oservèniñe, y tsèngaftanga šmondmèna mo Bèngbe Bètsabe jajañcá, ndayentše cha yojtseboše tsabe jaja saná chaóboconama, y šmondmèna mo chë cha yojtsejebuana bèts yebncá. <sup>10</sup> Er Bèngbe Bètsá atšbe tsabiama jtsejuabnayèše, chë trabajo sojabonyé, y atše mo canye puerte tsabe jebuanacá, canye yebna ndayiñe chaotséuatjonama tojapormacá, sèñjanbojatšé chë trabajo, Bèngbe Bètsabe soyèngama tsèngaftangbeñe jábuayenama. Chentšana inya, mo chë inye yebna jebuaná tojabojatšé jajuabuama chiñe más jatsjebuama nda tojatontšecá, cach atše sèñjanbojatšé trabajuifne tojanontšé. Pero cada ona botamana chaotsantješna ntšamo chë trabajo yojtsamama. <sup>11</sup> Mo chë canyábentšana inye trabajayacá, ndoñe ntsobenana chë yebna jajuabuama tojanbojatšé cha chë yebna chaotséuatjonama tojanpormañe inye soye cachcá choaservema jatspórmana, cachcá, ndocná chaondètsabuatambá inye soyènga, nye ntšamo Jesucristbeñe soyènga yomncá aíñe, chë ntšamo atše natsana sèñjanabuatambacá. <sup>12</sup> Chë Jesucristbiama más uámana soyènga buatèmbayá jtsemnana mo chë castellano, midyo y inye uámana soyèngaca yebna jebuanacá; y chë Jesucristbiama nye nduámana soyènga buatèmbayana mo chë niñèbenga, butsjajésha y tëshenjñèsheca yebna jebuanacá. <sup>13</sup> Y Cristo chaojésabo te, Bèngbe Bètsá echanjínjányiye ntšamo cada canyabe trabajo yomnana. Cha chë te iñesheca chca echanjínjányiye, y chë iñesheca, Bèngbe Bètsá echanjinye y echanjínjányiye ndaye trabajo cada ona tojamama. <sup>14</sup> Ntšamo cada canyabe trabajo yojtsámanama jtsetatšèmbuama Bèngbe Bètsá chaojinye ora, cha chabe trabajo aíñe yojtsámana ca queojayanèše, chë tsabe trabajayá Bèngbe Bètsábiocana canye uacanana soye echanjóyèngacñe, er cha jtsemnana mo canye entšacá, nda canye yebna tojtsejebuana jtsejuinjama ndoñe paselo tondmèna soyèngaca. <sup>15</sup> Pero chë te canyabe trabajo nye batšá yojtsámanama Bèngbe Bètsá iñesheca chaojinjánye, chora chabe trabajo echántsemna mo chë jtsejuinjama paselo tomna soyèngaca jebuanabe soyèngcá, chentšana nyets yebna jtsejuinjana. Chë jebuaná jtsachana, pero chabe trabajo lempe jobuétšana. Cachcá, chë Bèngbe Bètsabiama trabajo tojtsamá, nye batšá oservena trabajo, cha echanjobenaye atsbocaná jtsemnana, masque lempe ntšamo tojamcá tondaye queochaisoquéda.

<sup>16</sup> ¿O tsèngaftanga ndoñe šmondétatšémbo nyetscanga canyifne Jesucristbeñe ošbuachiyèngcá, mo chë Bèngbe Bètsabe bèts yebncá šmomnana, y tsèngaftanguentše Bèngbe Bètsabe Espiritu yomnana? <sup>17</sup> Nderado nda tojama, tsèngaftanga nyetscanga canyifne Jesucristbeñe ošbuachiyèngcá jtsemnana chaotsopochocama, Bèngbe Bètsá chábioye bochantsepochoá, er chë Jesucristbeñe ošbuachiyèngcá canyifne imomnènga, jtsemnana mo chë Bèngbe Bètsabe bèts yebncá, chabe entšanga nye chábioye jasérviamá; y tsèngaftanga chca šmondmèna.

<sup>18</sup> Ndocná cachá chaondètsenoingña. Nderado nda tsèngaftanguentšá tojtsejuabná cha tša osertaná yomna ca, ntšamo quem luarentša entšanga mondbétsejuabnaye ntšamo canye puerte osertaná inèsemnana, cha bontsemna jóbemama mo canya ndabiamá quem luarentša entšanga chamuayana cha corente juabna ndbomná yomna ca, chca, ndegom-bre corente osertaná jtsemnana chaobenama. <sup>19</sup> Er chë quem luarentša entšanga tša osertánènga imotátšémbo soyènga, Bèngbe Bètsabe bominyifne yomna mo chë corente juabna ndbomnabe soyá. Bèngbe Bètsabe uabemana palabrénguifne mèntšá endayana: "Bèngbe Bètsá chë tša osertánènga jáyèñjanana, ndayá cachènga inyènga jáingñama tša osertánanaca tmojtsama soyèngaca ca." <sup>20</sup> Y mèntšánaca endayana: "Bèngbe Utabná endétatšémbo chë tša osertánèngbe juabnènga tondayama yondoservènama ca." <sup>21</sup> Chiyeca, ndocná chaondètsichamo corente uamaná yomna ca, ndaye entšabe ustoná tomnana, er lempe ntšamo šmobomncá, Cristbeñe ošbuachiyènga bétsemnana, tsèngaftangbe tsabiama endmèna, y nyetscanga chë tcmojjubuachèngnaca cachcá. <sup>22</sup> Lempe tsèngaftangbe soye endètsomñe: ndayá Páblèbeyeca yomncá, Apólosbeyeca, Pédrèbeyeca, ndayá quem luarentše yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca. <sup>23</sup> Y tsèngaftanga Cristbenga šmondmèna, y Cristna Bèngbe Bètsábía.

## 4

<sup>1</sup> Entšanga entsamna bəngbiana jtsejuabnayana bənga fstsemna Cristbe uajabuáchanənga y Bəngbe Bətsabe soyəngama jtsabuátambayama trabajo bomnənga, chə Bəngbe Bətsá baytentscuana entšangbioye ndoñe tonjaninjanjé, pero mora añe tojinjanjé soyənga jtsabuátambayama trabajo bomnənga. <sup>2</sup> Chca, nda canjé trabajo tojtsebojanjəbiamna, chabe mandayá jtsobátmanana cha añe tšabe palabra bomná chaotsemnana. <sup>3</sup> Atšbe bariəna, tondaye quenatamana, ntšamo tijamcá šmojinjé y ndoñe tšabá tijama ca šmojayənəse, o inje entšanga cachcá tmojayənəse mo canjé tribunaliñcá. Ni cach atše ndoñe chca quetsátama, jtsetatšəmbuana ntšamo atšbe trabajuama tijayancá ndegombre tayojtsemnana. <sup>4</sup> Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bəngbe Bətsabe delante ndocna bacna soye ndbomná atše stsemna ca. Er Bəngbe Utabná endmėna nda atšbe trabajo yonjá y nda ndegombre yobena jayanama atše tšabá o ndoñe tšabá tijamama. <sup>5</sup> Chiyeca, tšəngaftanga ndoñe quecmátamna jinjana y jayanana injənga ndoñe tšabá tmonjama ca, chə nja chama tempo cabá ndóshjangüəntscuana. Bəngbe Utabná chama chaojésabo ora. Cha chaojésabo ora, puerte tšabá echanjinjanjəyie chə iytəmcá yomna soyəngama, mo ibetiñe cuaftsemncá, y botamana echanjinjanjəyie, mo binjiniñcá, ndayá jamama nje chəngbe ainanoca entšanga tmojuabocá. Y chora Bəngbe Bətsá cada entšabiana echanjayana tšabe soyənga, ntšamo tbojtsomerecencá.

<sup>6</sup> Jesucristbeyeca atšbe catšátanga, chə soyəngama tšabá jábuayenamna, atše sənjama ntšamo Apolos y atše tifjatrabájama botamana chašminjama, y chca sənjama tšəngaftangbe tšabiana, ntšamo bəndata tifjamentšana chašmuatsjinjama jtsiyenana nje ntšamo Bəngbe Bətsabe uabemana palabreñguñe iuayancá, y ndocná tšəngaftangüəntscá canjé entšabiana chaot-senábotamnaye, y injəbiana ndoñe tšabá chauátoyebuambnama. <sup>7</sup> Er, ¿nda chə injəngbiana más uámanənga tšəngaftanga cmojtsabiamná? ¿Y ndayá šmobomna, Bəngbe Bətsá ndoñe tcmojjatšatá soye? Y tšəngaftanga chca chašmotsebomnana cha tojanmėse, ¿ndayeca šmojtsenabotamná mo Bəngbe Bətsabe tšetana soyənga ndoñe tontsemncá, y nje cach tšəngaftangbeyeca šmojinjəncá?

<sup>8</sup> Tšəngaftanga šmojtsejuabná ya lempe ntšamo cməjabotcá Bəngbe Bətsábicana šmojtsebomna ca, y lempe ntšamo jtsebošama šmojtsobencánaca ca. Mo reyənga cuaftsemnəncá cmojtsabiana, bəngbentsana tondaye ntšəjabotcá. Malaye tšəngaftanga mo reyəncá šmojtsemna, Crístoftaca cənjiñe jtsemándayəse; chca, bəngnaca tšəngaftangaftaca jtsemnana, cənjiñe jtsemándayəse. <sup>9</sup> Atše šontsinjana, bənga chə Cristbe ichmónənga Bəngbe Bətsá šojábiana mo chə nyətscangbiana más nduamanəncá, mo chə jóbanama yojtsamna entšangcá. Nyətscanga chə Bəngbe Bətsá tojábiamənga bəngbioye jtsənyayana mo ndoñe cachca entšanga fstsemncá; angelənga y entšangnaca cachcá bəngaftaca montsama. <sup>10</sup> Bənga, Cristbiana oservena causa, quem luarentša entšangbiana fsəntsinjəna mo corente juabna ndbomnəncá; chə cuenta, tšəngaftanga šmojtsejuabná Cristbe soyəngama corente osertánənga šmomna ca. Bənga fsəndmėna chə entšangbe bominjəñe ndocna obenana ndbomnənga; y tšəngaftangna šmojtsejuabná puerte obenana bomnənga šmomna ca. Tšəngaftangbioye injənga puerte uámanənga y bətsətsanga jtsabiamnayana, pero chənga bəngbioye jtsəbuayənjana. <sup>11</sup> Y məntscoñama, bənga šontsabuashebianana saná, ndayá jofsiyama y entsáyá. Entšanga bəngbioye bacá jtsaborlánana, y tondaye yebna queftsátsbomna. <sup>12</sup> Y bənga puerte jabuache fsəndətrabája cach bəngbe cucuatšəngaca. Entšanga šojóyanguango ora, Bəngbe Bətsá fchandbətseimpadana cha chaoma chənga tšabe bendicionənga chamotsebomnana. Bənga chamosufriama injənga tmojtsama ora, bənga chə soye fchandbətsoyoye. <sup>13</sup> Injənga bəngbiana bacá tmojtsoyebuambná ora, jtsabuabuanjəshanəse fsənduamana jtəjuana. Quem luarentša entšangbe bominjəñe bənga jtsemnana chə puerte nduámanənga, mo chə quem luarentša basurəshəncá, chə quem luarentša entšanga tondayama ndoservənənga, mo chə quem luarentša tsəngacá; y chca endmėna məntscoñama.

<sup>14</sup> Quem soyənga ndoñe quechatəbuabiamná tšəngaftanga chašmotsəuatjama, sinó ndayá jábuayenamna mo cach atšbe basəngbioycá, atšbe bonshánənga. <sup>15</sup> Er masque tšəngaftanga mallajta abuátambayənga chašmotsóbomñe, jacúntama ntjobenaycá, Cristbiana chacmotsabuátambama, ndoñe banga quešmátabamna tšəngaftangbiana mo taitangcá, Cristo Jesúsbeñe jtsošbuáchiyama tcmojanəjabuachama. Nje atše səndmėna mo taitacá tšəngaftangbiana, mo ošbuachiyəncá, er atše natsana tcbonjanabuayəná chə tšabe noticiənga Jesucristbiana, y tšəngaftanga chiñe šmontsanosbuaché. <sup>16</sup> Chiyecna, cbontsaimpadana ntšamo atše tijamcá chašmotsamama.

<sup>17</sup> Chama Timoteo tšəngaftangbioye səntsichamná, atšbe bonshaná, canjé añe tšabe palabra bomná; Bəngbe Utabnábeñe tojanošbuachəyeca, atše Cristbiana sənjanbuayinjá ora, mo atšbe uaquinacánaca cha endmėna, ntšamo chabe ošbuáchiyana yomnana. Cha echanjama tšəngaftanga chašmuatenójuaboma ntšamo atše tšəngaftangbeñe tsjojenama, Cristbeñe

oşbuachiyacá, ndayama atşe nyets tempo oşbuáchiyënga sëndbetsabatambaycá nyets luare oşbuáchiyënga enefjuanenache. <sup>18</sup> Tşëngaftanguentşe báseftanga ya şmojatsjuabná puerte uámanënga şmojtsemna ca, er şmojtsejuabná atşe stsauatja tşëngaftangbiöye jama jányama ca. <sup>19</sup> Pero Bëngbe Bëtsá chaşojalesenciase, sentsobátmana betscó tşëngaftangbiöye jama jányama. As chjinýe ntsache obenana imobomna chë Bëngbe Bëtsabe entşangcá jtsiyenama tşa uámanënga imomna ca juabnayënga, y ndoñe nýe ntşamo jayanama imobencá. <sup>20</sup> Er Bëngbe Bëtsá canýe oşbuachiyabe ainaniñe tojtsemánda ora, chca jtsinýnana ndoñe nýe ntşamo tojtsichámuama, ndayá Bëngbe Bëtsabe obenana chábeñe tojtsemnama. <sup>21</sup> ¿Tşëngaftanga ndayá más şmattseboşe: atşe chayá tşëngaftangbiöye jauácánama, o chayá tşëngaftangbiöye jányama puerte bonshanánaca y ntsetşatjaycá tşëngaftanga jauyanama?

## 5

### *Ndaya cuanjama canýe boyabása shembásaftaca bacna soye amáftaca*

<sup>1</sup> Ndegombre nyets luariñe entsótatsëmbo tşëngaftanguentşe yojtsemna canýa, shembásaftaca bacna soye amá, y ntşamo cha yojtsamcá puerte bacna soye yojtsemna; ni chë Bëngbe Bëtsábiöye nduabuátmënga chca ntsamana: canýe entşá cachabe mamamnáftaca bacna soye yojtsama. <sup>2</sup> Y tşëngaftanga cabá şmojatsjuabná corente tşábenga şmomna ca, masque chca tşëngaftangbeñe yojtsopasánëse. Tşëngaftanga cmontsamna puerte ngmënaca jtsemnana, tşa uabouana soye cha yojtsama causa. Canýe entşá chca tojamáftacna, tşëngaftanga cmontsamna jamana cha ndoñe más tşëngaftangaftaca chaondenútanama mo oşbuachiyacá. <sup>3</sup> Y atşna, masque tşëngaftangaftaca chca ndoñe quetsásmëna, atşbe juabna choca tşëngaftangaftaca entsemna; y chca atşbe espírituca sëntsemnayeca, Bëngbe Utabná Sojéftsanatşetá mándoca, sënjajuabó y sëntsetatşëmbo ntşamo tşëngaftanga cmojtsamnama, chë entşá chca tojamáftaca. <sup>4</sup> Tşëngaftanga chaşmojënefjna ora, chentşe atşbe espírituca tşëngaftangaftaca atşe chántsemna, y atşbe espíritu chentşe echántsemna Bëngbe Utabná Jesusbe obenánaca. <sup>5</sup> Y chora tşëngaftanga cmontsamna jamándana chë entşá ya ndoñe más tşëngaftangaftaca mo oşbuachiyacá chaondenútanama, mo Satanasbe cucuatsiñe cha cuafjaboshjoncá, chca, chë quem entşá nýe cachá tşabá jtsomñiama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbocaná chaotsemnama.

<sup>6</sup> Tşëngaftanga şmojtsejuabná puerte tşábenga y uámanënga şmomna ca, pero şmojtseleséncia canýa tşëngaftanguentşe chca chaotsamama. Chca ndoñe tşabá quenátsmëna. Tşëngaftanga ya şmondëtatşëmbo, ntşamo chë nýe batşá levadura endbama, nyets arninýa chauábochema; cachcá, tşëngaftanguentşe canýa tşa bacna soye chca tojama ora, nyetscangbiama ndoñe tşabe soyënga jóbcnana. <sup>7</sup> Chiyeca, tşëngaftanga cmontsamna, chca uabouana bacna soye tojama jtabocnana, cha ya ndoñe más tşëngaftangaftaca mo oşbuachiyacá chaondenútanama; y chora tşëngaftanga şmochántsemna mo tsëm arninýacá, ndocna levadúraca, chë bacna juabnëngaca ya ndëmandánënga şmojtsëmnyayeca. Ndegombre tşëngaftanga chca şmondmëna, er Bëngbe Bëtsá tojama tşëngaftanga tsëm vida chaşmotsebobnama. Bashco fiesta ora, oveshá tmojanóba, Israeloca entşanga perdonánënga chamotsemnama. Cachcá Cristo, mo chë oveshacá, tojanóbana bacna soyënguentşana bënga játsebacama. <sup>8</sup> Ntşamo chë judiënga chë fiesta ora mondbamcá, nyets levadura ojamnana cachcá jonýayana, cachcá, bënga şontsamna jtsajbanana oyenana bacna soyënga inýengbiamama jamama jtseboşëse, y ndaye bacna soye jtsamëse, ntşamo tempo imojanamcá. Ntşamo chë judiënga chë fiestiñe nýe levadúraca ndëpormana tandëse mondbetsesaycá, cachcá, bënga şontsamna jtsiyenana nyetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnayëse y jtsamëse.

<sup>9</sup> Chë inýe atşbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chaşmondëtsoyebuambná nyetsca chë quem luarentşënga boyabása o shembásaftaca bacna soye amëngaftaca, chë nýe cachëngbiama bëtscá soyënga jtsebobnama tşa boşëngaftaca y atşbënanëngaftaca, y chë cachëngbe pormana soyënga diosënga yomnama jtsejuabnayëse adorayëngaftaca ca; er nýa chca jamamna, tşëngaftanga cmattsamna quem luarentşana jëftsebobcanana. <sup>11</sup> Ntşamo chora sënjanayancá endmëna ndayá tondayama ntscuëntayana, chë Crístbeñe oşbuachiyá yomna ca tojayanáftaca, y boyabása o shembásaftaca bacna soye tojtsama, o nda nýe cachabiamama bëtscá soyënga jtsebobnama tşa tojtseboşe, o chë cachabe pormana soyënga diosënga yomnama jtsejuabnayëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entşangáftacna, ni mo şmuatjótëbema chëngaftaca cánýiñe jasama. <sup>12-13</sup> Atşe ndoñe queşnátsmëna jayanana chë ndoşbuáchiyënga, chë bëngaftaca ndoñe mondbënutananga, aifne o ndoñe tşabá tmonjamama. Bëngbe Bëtsá echántsemna nda chëngbiama yochjayana

ntšamo tmojamcá tšabá o ndoñe tšabá bétsemnana, tšëngaftanga ndoñe. Ndegombre nje chë ošbuáchiyënga tšëngaftangaftaca innénutanangbiana cmontsamna chca jayanana. Chcasna, šmochjama ntšamo Bëngbe Bëtsabe uabemana palabrenguiñe endayancá: “Tšëngaftanga cmontsamna, chca bacna soye amá tšëngaftangbentšana jtabcnana ca.”

## 6

### *Ošbuáchiyënga jendemándama tojtsemna ora*

<sup>1</sup> Canye tšëngaftanguentša ošbuachiyá inye ošbuachiyabiama canye demanda tojtsemnana ora, ¿cha nanjá chë ndošbuáchiyënga mandadëngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entšangbioye nanjá chabe demanda chamouenama? <sup>2</sup> Tšëngaftanga ndegombre šmondétatšëmo, Bëngbe Bëtsabe entšanga mochjayanama quem luarentša entšangbiana tšabá o ndoñe tšabá tmonjamama. Y chënga quem luarentša entšangbiana chca jayanama tmojtobenëse, ¿ndoñe montsobena más base soyëngama chca jayanama? <sup>3</sup> Tšëngaftanga ndegombre šmondétatšëmo chë angelëngbiámna tšabá o ndoñe tšabá tmonjamama bënga mochjayanama. Chcasna, bënga más jtsobenana chë quem luarentše jëftsiyenama soyëngama chca játayanana. <sup>4</sup> Y chcase, tšëngaftangbeñe chca demandënga chë quem luarentše jëftsiyenama soyëngama tojtsemna ora, ¿ndáyeca šmatjátëbuayana chë ošbuáchiyëngbiana tondaye tmontsámama entšanga, chë soyënga chamojandmanama? <sup>5</sup> Chca sënjayana tšëngaftanga chašmotsëuatjama: ¿O tšëngaftanguentše ni mo canya yondmëna corente osertaná, ošbuachiyëngbeñe demandënga chaojandmanama? <sup>6</sup> Pero ndoñe chca: ošbuachiyëngbeñe demandënga tojtsemna ora, mandadëngbioye jana chë soyënga chamojandmanama. Y chca jamana ndošbuáchiyënga mandadëngaftaca.

<sup>7</sup> Y tšëngaftangbeñe nje demandënga jájandmanama tojtsemna ora, tšëngaftangbiana ya canye puerte bacna soye jtemnana. ¿Ndáyeca ndoñe šmattšoboyave inyënga bacá cmojtsaborlana ora? ¿Ndáyeca ndoñe cachcá šmatjonýave inyënga cmojtsabiabëbanana ora? <sup>8</sup> Pero cach tšëngaftangaftacna inyetšá copasana, inyëngbioye bacá jtsaborlánana y jtsabiabëbanana, y tšëngaftangcá Crístbeñe ošbuachiyëngbioynana.

<sup>9</sup> ¿Tšëngaftanga ndoñe šmondétatšëmo, chë bacna soye amënga Bëngbe Bëtsabe amëndayoye ndoñe mochanjámarshënguama? Ndoñe matenoíngñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejuabnayëse adórayënga, ni cachëngbe boyá o shema inyáftaca ingñayënga, ni chë boyabásënga mo shembasengcá jtsinýnama bošënga, ni chë boyabásënga inye boyabásëngaftaca bacna soye amënga, <sup>10</sup> ni chë atbëbanënga, ni chë nje cachëngbiana bëtscá soyënga jtsebojnana tša bošënga, ni chë tša tmoyënga, ni chë uayátšenayënga, ni chë inyëngbiana bacna soye jtsamëse innétsatbëbanënga, chënga nyetscanga ndoñe quemochatobentšaye Bëngbe Bëtsabe amëndayoye jamashjnana. <sup>11</sup> Y tempo báseftanga tšëngaftanguentšënga chca šmojamna, pero Bëngbe Bëtšá tšëngaftangbe bacna soyëngama tmojaperdoná, y chca entsemna mo bebënénga cuaftsemncá; cha tojama tšëngaftanga chabe entšanga chašmotsemnana, nje cha chašmotseservënama, y tojama tšëngaftanga mo tšabengcá chabe bominýiñe chašmotsemnana. Lempe chca Bëngbe Bëtšá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espíritu tojamama.

### *Bëngbe cuerpo chaotsemna Bëngbe Utabná jtsereservënama*

<sup>12</sup> Mondbëtšichamo: “Atšbiana entselesenciana ndayánaca jamama, ndayama Bëngbe Bëtšá ndocá tonjayana ca.” Pero básefta soyënga jtsamana ndoñe atšbe tšabiana ntsemnana. “Atšbiana entselesenciana ndayánaca jamama ca”, pero ndoñe quichatslesëncia ndaye sóynecna nyets tempo mandaná jatšmënanana. <sup>13</sup> Mëntšánaca mondébëtšichamo: “Saná uafsbiana y uafsbíá saná chaóyëngacñama ca.” Pero Bëngbe Bëtšá canye te echanjama chë uta soye chaotsopochocama. Bëngbe Bëtšá entšabiana cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservera, y Bëngbe Utabná bëngbiana tšabe bendicionënga chaotsamama. <sup>14</sup> Y Bëngbe Bëtšá, nda tojama Bëngbe Utabná cháuatayenama, bëngbiámna chabe obenána echanjama chámuatayenama.

<sup>15</sup> ¿Tšëngaftanga ndoñe šmondétatšëmo, Crístoftaca cányiñe mo canyacá šmomnana yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jaserviama endmënayeca, tšëngaftangbe cuerpo jtemnana mo Crístbe cuerpentša soycá. ¿Ntšamo atše chjátobena atšbe cuérpoca, chë ndayá yomna mo Crístbe cuerpentša soycá, canye bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe! <sup>16</sup> ¿O tšëngaftanga ndoñe šmondétatšëmo, canye entšá canye bacna vida bomna

shembásaftaca tbojéninyena ora, chë útata jóbemana mo canýacá? Er Bëngbe Bëtsabe uabemana palabrénguine boyabása y shembása tbojéninyenama mëntśá endayana: "Chë útata mo canýacá bochántsema ca." <sup>17</sup> Pero canýe entśá Bëngbe Utabnáftaca cánýiñe mo canýaca tojtsemna ora, jtsemnana mo chë útata cach canýe espíritu tbojtsebo mnca.

<sup>18</sup> Nña ndocna te canýe boyabása o shembásaftaca bacna soyënga šmattsama. Nderado ndaye inýe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nýe cachabe cuérpoca, y chë causa, chca jamëse, cachabe cuerpama más bacna soyënga jtsamana. <sup>19</sup> ¿Tšëngaftanga ndoñe šmondétatšëmbo tšëngaftangbe cuerpo yomna mo canýe yebncá Uámana Espíritbiam, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye. <sup>20</sup> Chca endmëna, er Cristo bënga játsebacama tojanóbana ora, yojamna mo cha bëtscá cuařjopagaca tšëngaftanga Bëngbe Bëtsábenga chašmotsemnana. Chíyeca, chë tšëngaftangbe cuerpëngaca chašmojtama soyëngaca šmochtsinýanýnaye Bëngbe Bëtsá puerte uamaná y bëtśá bëtsemnana.

## 7

### *Jobouamayama jábuayenama*

<sup>1</sup> Mora chanjóyebuambaye ndayá tšëngaftanga átšbioye šmojuábobemama. Ndegombre, canýe boyabásabiam más tšabá endmëna ndoñe chaondobouamá. <sup>2</sup> Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá. <sup>3</sup> Boyábioye bontsemna jamana chabe shembiam lempe ntšamo jamama ibomncá, boyá bëtsemnana; y chabe shémnaca cachcá chabe boyabiam chaoma. <sup>4</sup> Chë shembe cuerpo ndoñe nýe cha cánýabiam ntsemnana, sinó chabe boyabiámnaca. Cachcá, chë boyabe cuerpo ndoñe nýe cha cánýabiam ntsemnana, sinó chabe shembiámnaca. <sup>5</sup> Ni boyá, ni shema ndoñe chabondëtsejuabná jtsenbiátšbuana. Aíñe chca copodena, pero nýe chë útata chca básefta tescama tbojénoyeunase, Bëngbe Bëtsáftaca jencuéntama jtsentšénama. Pero chentšana chë útata entsamna cachíñe cánýiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

<sup>6</sup> Atše chca séntśichamo, tšëngaftanga jábuayenama, ndayá jamama šmojtselesenciana, y chca ndoñe chašmondëtšamama jamëndama. <sup>7</sup> Y atšbe bariëna, atšbe juabna entsemna malaye nýetscanga chë soyënguine mo atšcá šmattsemna. Pero Bëngbe Bëtsá cada ona obenana tbojatšétá tšabe soyënga jamama, Crístbeñe ošbuáchiyënga jujabuáchama, ínýenga canýe soyama, ínýengna inýe soyama.

<sup>8</sup> Chë cabá ndbouamnënga y viudanga séntśetsëtsná, chëngbiam tšabá yojtsemna ntjobouamaycá joquédana, atšcá. <sup>9</sup> Pero chca jtsemnana cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nýe boyabásabiam o shembásabiam tša nýets tempo jësejuabnyana.

<sup>10</sup> Pero chë bouamnënga séntśamënda shema chabe boyábioye ndoñe cachcá chabondetsonýá. Chca ndoñe nýe atše qusatamënda, ndayá cach Bëngbe Utabná. <sup>11</sup> Pero, shema cachcá chabe boyábioye tbojesonýase, cha bontsemna ntjobouamaycá jtsomñana o chabe boyáftaca cachíñe jtenútanana. Y cachcá, chë boyá ndoñe quebnátsmëna chabe shema cachcá jesonýayana.

<sup>12</sup> Chë ínýenga chjáuyana, atšbe juabncá y ndoñe Bëngbe Utabnabe soycá, nderado canýe ošbuachiyá tbojtsebo mnca canýe shema Crístbeñe ndošbuachiyá, pero chë shema tojtseboše cháftaca joquédana jtšiyenama, cha chë shëmbioye ndoñe cachcá chabondetsonýá. <sup>13</sup> Nderado canýe ošbuachiyá tbojtsebo mnca canýe boyá Crístbeñe ndošbuachiyá, pero chë boyá tojtseboše cháftaca joquédana jtšiyenama, chë shema ndoñe chaondëtsejuabná cha cachcá jesonýayana. <sup>14</sup> Er Bëngbe Bëtsá tojama, canýe shembása ošbuachiyá chabe entśá chaotsemnana, nýe chábioye chabotseservëna, y chca, chánaca jtsejuabnyana chë shembásabe boyá Crístbeñe ndošbuáchiyabiam mo chabiam oservena entśacá, cha chëngbeñe mo canýe pamillécá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnyana chabe shema Crístbeñe ndošbuáchiyabiam mo chabiam oservena entśacá, cha chëngbeñe mo canýe pamillécá jatrabájama tojtseboše ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondmënyeca, canýa o nýets uta bëtśëtsatbe ošbuáchiyama, Bëngbe Bëtsá jtsejuabnyana chë básengbiam mo chabe entšangcá. <sup>15</sup> Pero chë boyá o shema Crístbeñe ndošbuachiyá cachcá jtsenónýayama tša tojtsebošëse, chca chaboma. Chora, chë ošbuachiyá ndoñe ntsoacánana chë ínýaftaca cachíñe jtëtenútanama, er Bëngbe Bëtsá tcmojáchembo natjëmmana chašmotsiyenama. <sup>16</sup> Chca šmochjama, er aca

shema çntšamo cattsetátšëmbo, tacuatjobenaye acbe boyá jayénjanana Crístbeñe chaotsošbuáchema, y chca, atsbocaná chaotsemnana? o aca boyá çntšamo cattsetátšëmbo, tacuatjobenaye acbe shema jayénjanana Crístbeñe chaotsošbuáchema, y chca, atsbocaná chaotsemnana?

<sup>17</sup> Masque ntšámnaca, cada ona chaotsiyena jtsamëse ntšamo chë Bëngbe Utabná tbojatsëtá obenana yomncá, cada ona ndayá jamama Bëngbe Bëtsá tbojachembcá. Chca atše nyëts luare ošbuáchiyënga enefjuanenache sëndbëtsamëndaye. <sup>18</sup> Nderado Bëngbe Bëtsá cányábioye tbojachembo, y cha inýengbeyeca chë más delicadentse base bobachtema tëtšená tojtsemna, ntšamo chë judiënga monduamancá, cha ndoñe chaondëtsenobiámná mo ndoñe judío cuafjatsmëncá; y nderado Bëngbe Bëtsá cányábioye tbojachembo, y cha ndoñe chca tëtšená tontsemnëse, cha ndoñe chaondëtsejuabná tëtšená jatsmënnana, ntšamo chë judiënga monduamancá. <sup>19</sup> Er ndayá iuámana, ndoñe quenátšmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtšamana. <sup>20</sup> Cada ona bontsemna jtšiyëñana, ntšamo joyocñca, chabe entšá chaotsemnana Bëngbe Bëtsá tbojanchembo ora. <sup>21</sup> Bëngbe Bëtsá tmojanchembo ora, nyëts tempo inýabíama oservená cojamnëse, chama ndoñe cattsenócochinýena. Pero nderado tojtsemna ntšámose jashjáchama ndoñe más chca ntsemnana, cach acbiana jatrabájama, as chca cochjama. <sup>22</sup> Er chë nyë inýabíama nyëts tempo oservená yojamná, Bëngbe Bëtsá chabe entšá chaotsemnana tbojanchembo ora, cha mora ošbuachiyacá, jtsemnana canýa ya ndoñe más bacna soyënga jamama juabnëngaca mandaná, sinó Bëngbe Utabnabíama oservená. Cachcá, chë nyë cachabíama trabajayá yojamná, Bëngbe Bëtsá tbojanchembo ora, mora cha nyëts tempo Crístbe oservená jtsemnana. <sup>23</sup> Crísto bëngbíama tojanóbana ora, yojamna mo cha bëtscá cuafjopagacá, bënga Bëngbe Bëtsabe entšanga chamotsemnana. Ndoñe šmatjaleséncia nyë entsangbe juabnëngaca nyëts tempo mandánënga chašmotsemnana, y Bëngbe Bëtsabíama chamotsebnëtjomba. <sup>24</sup> Chcasna, Jesucrístbeyeca atšbe catšátanga, cada ona bontsemna Bëngbe Bëtsáftaca jtšiyëñana, ntšamo joyocñca Bëngbe Bëtsá tbojanchembo ora.

<sup>25</sup> Y chë ndëbouamna shembásengbíama, chënga aifne o ndoñe yontsamna jobouamayamna, atše chama ndoñe Bëngbe Utabnabe canýe mando quetsátsbomna, pero chanjayana ntšamo atše tsjuabnacá. Bëngbe Bëtsá atšbe tšabíama tojanjuabóyeca, entsanga montsobena jtsejuabnayana aifne tšabe palabra bomná chiñe atše tsmënnama. <sup>26</sup> Atše šontsinýana, entšá ibojtsemna jtsomñana nyë ntšamo mora yotsomñcá, er bënga mora montsiyena puerte padecena soyënguiñe. <sup>27</sup> Shema tcbomnëse, ndoñe cachcá catjéftsonýaye; y ndoñe tcondbomnëсна, ndoñe catjásënguaye. <sup>28</sup> Tcojobouamase, bacna soye ndoñe quecátama; y nderado canýe tobiáše tojobouamase, cach bacna soye ndoñe quenátama. Pero chë tmojtšobouamangna padecena soyënguiñe mochanjoyena quem luarentše chamojéftsemnëntscuana, y atše sëntseboše chënga jujabuáchama chca jatíyënnama ndoñe chaondëtsamnana.

<sup>29</sup> Jesucrístbeyeca atšbe catšátanga, ntšamo sëntseboše jayanamna mëntšá entsemna: Crísto quem luaroye yochjésabo orscama ya nyë batšá entsájamna. Chíyeca, morscana y nyëts tempo más chcoye, chë bouamnënga entsamna jtšiyënnana mo ndoñe bouamnënga tmontsemncá, o mëntšá, entsamna jtsentšënnana Bëngbe Bëtsabe soyënguiñe, y ndoñe nyë chë bouamná bëtsemnana tbojtsemna soyënguiñe. <sup>30</sup> Cachcá, chë puerte ngmëncá tša ošachiyiñe imomnënga, entsamna jtšiyënnana mo ndoñe chca tmontsemncá; y chë puerte oyejuayënga, chamotsiyena mo ndoñe chca tmontsemncá; chë soyënga buamnayënga chamotsiyena mo tondaye chëngbe soye tontsemncá. <sup>31</sup> Chë quem luarentša soyëngaca jtšiyënnama imojtsentšëngaca entsamna jtšiyënnana mo ndoñe chca tmontsemncá, er quem luare ntšamo bënga mora monduabuatmncá, pronto echanjochnëngo.

<sup>32</sup> Atše sëntseboše tšëngaftanga ndoñe chašmondëtsenocochinýenama. Canýe entšá ndoñe bouamná tontsemna ora, jtšobenana jtsentšënnana Bëngbe Utabnabe soyëngama jtsejuabnayama, y ntšamo oyejuayá cha jabemama; <sup>33</sup> pero chë bouamná nyëts tempo jtšenócochinýenana quem luarentša soyëngama, jtšiyënnama, y ntšamo chabe shema oyejuayá jtsebomnana; <sup>34</sup> y chca, cha uta soyiñe canýe ora jtsentšënnana. Chë ndëbouamna shembása y chë tobiáše bontsobena jtsentšënnana Bëngbe Utabnabe soyënguiñe sempre jtsejuabnayama. Chënga mondobena jtsentšënnana Bëngbe Bëtsá jasërviama, ndayá chëngbe cuérpoca y chëngbe espíritoca tmojamama. Pero inýetšá, chë bouamna shembásana, nyëts tempo jesenócochinýenana quem luarentše vida jtsebomnana soyëngama, y ntšamo chabe boyá oyejuayá jtsebomnana.

<sup>35</sup> Atše chca cbontšëtsësná tšëngaftangbe tšabíama, y ndoñe jamëndama ba soyënga jamama ndoñe chašmondëtsobenama, ndayá ntšamo tšabá yomncá chašmotsiyënnama, y nyë Bëngbe Utabná jtsešervënnama chašmotsentšënnama.

<sup>36</sup> Nderado nda tojtsejuabná chabe uatsëtsnaye tobiášeftaca jtšobouamayama ibojtsemna ca, chca jamama chë tobiáše ya bëtsá tojtsemnayeca, y chca jamama tša tšabá

yajtsemna ca tojtsejubnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntsamana. <sup>37</sup> Pero nderado inya, tondaye obligaciona tontsemna y lempe ntšamo tojtsebošcá cha tojt sobena jamama, cha tšabá tojajuabó y chabe ainaniñe corente tojtsetátšẽmbo, ndoñe ntsobouamayana tšabá yomna ca, cha tšabá chca jtsamana. <sup>38</sup> Chcasna, chẽ tobiáseftaca tojtsobouamá chana, canyẽ tšabe soye jamana; pero chẽ ndoñe cháftaca tonjobouamá chana, canyẽ más tšabe soye jamana.

<sup>39</sup> Chẽ shembása bouamná jtsotocánana chabe boyáftaca sempre jẽtsiyenana, chẽ boyá vida tojtsebošcá; pero chẽ boyá tojóbanese, cha jtsobenana cachiñe jtbouamayana, nda cha tojtsebošáftaca, pero chca chaoma mo canya Bẽngbe Utabnáftaca cányĩñe mo canyáca quetsomñecá. <sup>40</sup> Pero atse jayanamna, cha más oyejuayá nántsemna ndoñe tontóbouamase; y sentsẽjubná, átšnaca tsbomna chẽ Bẽngbe Bẽtsabe Espiritu chašotsebuayiyina.

## 8

### *Uátšẽmbona saná entsangbe pormana soyẽngama*

<sup>1</sup> Mora chanjóyebuambaye ndayá tšẽngaftanga atse šmojatjama, ndayá jtsesayama, chẽ tempo inyẽnga cachẽngbe pormana soyẽnga, diosẽnga yomna ca jtsejubnayese jadórana tmojanátšẽmbona soyẽngama. Bẽnga mondétatšẽmbo bẽnga nyetscanga osertánẽnga imomnana. Canya tbojtsosertana ora, cha nderado nanjájuaboye, chca bẽtsemnana puerte uamaná cha yajtsemna ca, pero canya, inyẽnga tojtsababuányeshana ora, cha jtsobenana chẽnga becá jujabuáchana. <sup>2</sup> Nderado nda tojtsejubná ndegombre canyẽ soye yotátšẽmbo ca, cabá ndoñe yontsetátšẽmbo ndayá jtsetatšẽmbuama ibojtsemncá. <sup>3</sup> Pero nderado nda Bẽngbe Bẽtsábioye tbojtsebobonshana, Bẽngbe Bẽtsá chábioye jtsabuutmana mo chabe entsacá.

<sup>4</sup> Y chẽ tempo inyẽnga cachẽngbe pormana soyẽnga, diosẽnga yomna ca jtsejubnayese jadórana uátšẽmbona soyẽngama, atse šcuayana: bẽnga corente mondétatšẽmbo chẽ chẽnga innétsadorana soyẽnga, diosẽnga yomna ca jtsejubnayese, ndegombre ndoñe dios quemátšmẽna y nye canya Bẽngbe Bẽtsá endmẽna. <sup>5</sup> Pero masque celoca y quem luarentse chamomna entsangbiama “diosẽnga ca” uabáinẽnga (ntšamo ndegombre endmẽncá, banga quem luarentsa tsbanánoca obenánaca mondmẽna, entsangbiama diosẽnga ca ubuátmẽnga, y banga bẽts mándoca entsangbiama “utabnẽnga ca” uabáinẽnga), <sup>6</sup> bẽnga chẽ ošbuáchiyẽngiamna nye canya Bẽngbe Bẽtsá endmẽna, Bẽngbe Taitá, ndábentsana nyetsca soyẽnga yóbocana, y nye nda jtseservẽnana bẽnga imoyena. Y nye canyẽ Utabnánaca endmẽna, Jesucristo, ndábeyeca nyetsca soyẽnga yomna, y cach bẽngnaca imomna.

<sup>7</sup> Pero nyetsca ošbuáchiyẽnga ndoñe chca quemátstatšẽmbo. Básefta entsanga, Cristbeñe cabá ntsošbuáchiyey ora, imojanamana ndaye sanánaca juatšẽmbonana, chẽ chẽnga imojanubná diosẽnga yojamna ca soyẽnga jadórana; chẽnga, chca uatšẽmbonana tmojtsesá ora, jtsejubnayana chca uatšẽmbonana bẽtsemnana, y ainaniñe juabnẽnga jtsebošmna ndoñe tšabá tmonjamama, chana tmojase causa. Chẽnga, ndayá tempo imojánamama, ndoñe quemátobena tšẽngaftangcá jtsejubnayana, chcana jasana bacna soye ndoñe yondmẽna ca. <sup>8</sup> Ndegombre, ndayá bẽnga tmojtsesacá ndoñe ntjamana bẽnga Bẽngbe Bẽtsábioye más chamuatobéconama. Bẽnga Bẽngbe Bẽtsabe bominyĩñe ndoñe quemochátšmẽna más tšábẽnga aĩñe tmojtsesama; ni ndoñe chcanga, ndoñe tmontsesá causa.

<sup>9</sup> Pero cuadado šmochtsebošmna, ndayá jamana yolesenciánama tšẽngaftanga corente tšabá smotatšẽmbuama, ndayánaca jatsmana, y chca causa inyẽnga, chẽ soyẽnguĩñe más batsá ošbuáchiyẽnga y osertánẽnga, ntšamo tšẽngaftanga šmojtsamcá chamuatšmama, y chentšana, chẽngbe ainaniñe juabnẽnga chamotsebošmna y chẽngbioyey chaotsẽtsẽsná ndoñe tšabá tmonjama ca. <sup>10</sup> Er, aca chẽ soyẽngama tatšẽmbuá, nderado tcojót bema jasana canyẽ luarentse, canyẽ soye ndayama entsanga dios yomna ca jtsejubnayese adórayentse, y canyẽ Cristbeñe ošbuachiyá tojtsebošmna ainaniñe juabnẽnga ndoñe tšabá tonjamama, chca tojáseyeca, aquécá chẽ soyẽngama ndoñe yondétatšẽmbo causa, y cha nderado chentse cojtsesama tmojinỹese, chẽ soye nanjobenayey chábioynaca jañẽmuana chẽ saná jasana, chẽ tempo chẽ soyẽngama tmojanátšẽmbona saná. <sup>11</sup> Y chca aca, chẽ soyẽngama ntšamo betatšẽmbuama tcojamama, catjama chẽ Jesucristbeyeca acbe catšata, chẽ ndoñe corente ošbuachiyá, y ndoñe aquécá chẽ soyẽngama corente tatšẽmbuá, cha pochocaná chaotsemnana, er chabe ainantse echántsemna juabnẽnga canyẽ bacna soye tojamama, chẽ saná tojasama. Chca nderado cányábioyey catjama, ndabiama Cristo tojanóbana, cha jatsbocama. <sup>12</sup> Jesucristbeyeca acbe catšatbiama chca bacna soye tcojama ora, chca causa cha canyẽ soye tojama, ndayama chabe juabnẽnga ainaniñe chabotsatsẽtsná ndoñe chca chaondétsama ca; y chca, chentšana tša tojesejubná cha canyẽ bacna soye tojamama, acna canyẽ bacna soye jamana, ndoñe nye chẽ catšatbiama, ndayá cach Cristbiámna. <sup>13</sup> Chiyeca, nderado

ndayá atše stsesama, atše tsjama Jesucristbeyeca atšbe catšata chaoma canje soye y chca jamama chabiamá canje bacna soye tojtsemnése, más tsábá nántsemna ndocna te chē soye atše ntjasana, chca, atše ndoñe jatsmama cha canje bacna soyiñe chaótsatsama.

## 9

### *Jesucristbe ichmónëngbe derecho*

<sup>1</sup> Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná sëntsemnama. Cach ndegombre endmëna, atše canje Jesucristbe ichmoná tsmënama y Jesús Bëngbe Utabná tijinyama; y cach tsëngaftanga mora ošbuáchiyënga jtsemnése, šmondmëna ndayá tojóbozna Bëngbe Utabnabiamá atšbe trabajuentšana. <sup>2</sup> Masque inyënga atšbiamá ndoñe quematsjuabná atše canje Jesucristbe ichmoná tsmëna ca, tsëngaftangbiamna añe chca endmëna; er tsëngaftanga Cristbeñe ošbuáchiyënga šmondmënama y Bëngbe Utabnáftaca cányñe mo canyáca šmondmënama, puerte tsábá šmontsinyanýna atše Jesucristbe canje ichmoná tsmënama.

<sup>3</sup> Mëntsá chanjayana chë atše ndoñe tsábá tijama ca imojtsichámëngbiamá: <sup>4</sup> Ndegombre bënga nyëts derecho fsëndëtsóbmñe jtsobátmanama tsëngaftangbentšana, chë tbojujabuáchëngbentšana, bëngbe trabajuama saná o ndayá jofšiyama chašcuacaredadama. <sup>5</sup> Y bëngnaca derecho fsëndëtsóbmñe canje shema nyošbuachiyá jtsebmnama y bëngaftaca cha jëfšbetsama inyë luaroye fstsajna ora, ntšamo chë Jesucristbe inyë ichmónënga, Bëngbe Utabnabe catšátanga y Pédrënaca mondetsamcá. <sup>6</sup> ¿O nýe Bernabé y atše sojtsëtocana cabëndatbe cucuátseca jatrabájana vida jtsebmnama, y ndoñe derecho fsëntsebmna ošbuáchiyënga chašotsacuédanama, Bëngbe Bëtsabiamá trabájayama? <sup>7</sup> ¿Ndëmua mo canje soldadcá tojtsoservená, ndayá tbojtsájabotama cachá nantsatopagana, vida jtsebmnama? Ndocná canje jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanýenana, chë tojabuatëba létšiyëntšana ndoñe ntjofšiyama. <sup>8</sup> Ntšamo atše muentše sëntsichamcá ndoñe nýe entšangbe juabna quenátsmëna; y Moisesbe leyifñaca cachcá endayana, <sup>9</sup> er chabe leyiñe mëntsá endayana: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtšenaye ca.” Y chca ndoñe quenátayana Bëngbe Bëtsá nýe toronga inétsanýena ca, <sup>10</sup> sinó inyë más bëts soye; chca endayana ndayá ndegombre bënga, chë Bëngbe Bëtsabiamá soyëngama abuyiynayiñe trabájayënga cha šnetsanýena ca. Chca tmojanábema bëngbiamá, er chë fshantse arayá y chë meshënga atbanayá, entsamna chca jamana jtsobatmanëse, chë tmojátabe shajuantšana batšá jóyëngañama. <sup>11</sup> Y chca, bënga chë tsabe noticiëngama tbojábuaenase, y chca, Bëngbe Bëtsábionaca tsabe bendicionënga chašmotsebmnama bënga tijama, ndoñe yapa tanandátsmëna tsëngaftanga jótjañana, chë šmobomma soyënguentsana bënga jëfšiyenama chašcuatšatama. <sup>12</sup> Inyënga derecho tmojtsebmna tsëngaftanga jótjañana chë šmobomntšana chašmuacaredadama, tsëngaftangbeñe chëngbe trabajuama, as bënga más derecho fstsebmna chca jamama.

Pero bënga tondaye checbatamëndá, bënga chë derecho bëtsebmnyeyeca. Chca játamamna, bënga lempe fsëntsoboyá, chca, bënga tondaye ntjátamama, y chë causa entšanga ndoñe chašondëtsayaunana, bënga chë tsabe noticiënga fstsabuayiyá ora. <sup>13</sup> Tsëngaftanga šmondëtatšëmo, Bëngbe Bëtsabe bëts yebnoca trabájayënga Bëngbe Bëtsabiamá oservëniñe, mondbóyëngacñe chënga jasama, ndayá entšanga Bëngbe Bëtsá jadórana chabe bëts yebnoye tmojiyëbo sananguentšana. Y chë Bëngbe Bëtsá jadórana soyënga amënga, altaroca, chë juatsëmbonama luarentše, chënga jasana ndayá chentše tmojuátsëmbona soyënguentsana. <sup>14</sup> Cachcá, Bëngbe Bëtsá tojamandá, chë tsabe noticiënga abuyiynayëngna, vida jtsebmnamna lempe ntšamo tojtsëjbotcá chamóyëngacñe ca, chë tsabe noticiënga abuyiynayama. <sup>15</sup> Pero atše ndocna te chiyaisemandá inyënga chca chašmotsecuedánama, atše chë tsabe noticiënga abuyiynayá bëtsemnama chca derecho tsóbómnyeyeca, y cach ndoñe mora quem soye quecbatëbuabiamná, tsëngaftanga ndayánaca atše chašmuatšëta. Atšbiamá más tsábá nántsemna jóbana, y ndoñe ntjalesénciana inyá chaoma atše cach atšbiamá oyejuayá ndoñe ntjátsmënama, inyëngbentšana soyënga stjóyëngacñe causa.

<sup>16</sup> Atše ndoñe quetsatsjuabná atše canye bëts soye stsama ca, chë tsabe noticiënga stsabuayiyama, er atše obligaciónaca sëntsemna chca jtsamama, Bëngbe Bëtsá chama šojanchëmboyeca. ¡Tša lastemcá atšbiamá nántsemna, chë tsabe noticiënga ndoñe sëntsabuayiyenase! <sup>17</sup> Chiyeca, atše chë tsabe noticiënga stsabuayiyá nýe atše chca jamama stsebóseyeca, atšbe uacanana soye ya stsebmna; pero atše chca stjama, y ndoñe tontsemna nýe atše chca jamama stsebóseyeca, masque chca, atše stsama, ndayá jtsamama Bëngbe Bëtsá šojanbonýecá. <sup>18</sup> Y chca, atšbe uacanana soye endmëna atše oyejuayá



jtsemnana chë tsabe noticiënga abuaiyinyayama, ošbuachiyëngbentšana atše vida jtse-bomnana tondaye ntjatoyëngacñëcá; chca, atše tondaye quetsátama chë tsabe noticiënga abuaiyinyayama tsomna derëchoca, chë atšbe trabajuentšana vida jtsebomnana.

<sup>19</sup> Atše, masque ndocna entšábeyeca nyëts tempo mandaná quetsátsmëna, puerte nduamáná sënjobema, mo canya nyëts tempo ínáyeyeca mandanáca, nyëtscanga jaserviama, chca, atše chca jtsamëse, jobenayama becá entsànga, ntšamo tojopodecá, jáyëñjanama Crístbeñe chamotsošbuáchemá. <sup>20</sup> Chë judiëngbiama atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyëñjanama Crístbeñe chamotsošbuáchemá. Y chë Moisesbe léyeca mandánënga imoyenëngbiama, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyëñjanama Crístbeñe chamotsošbuáchemá. <sup>21</sup> Pero chë Moisesbe léyeca ndëmandánënga oyenëngbiama, atše chëngcá sënjobema, chënga jáyëñjanama Crístbeñe chamotsošbuáchemá, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá. <sup>22</sup> Chë nýe batšatema ošbuachiyëngbiama y Bëngbe Bëtsabe soyëngama nýe batšatema osertánëngbiama, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchemá. Y lempe chca, chë atše jamana ntšamo nyëtscanga imomncá atše chaitsemnana, endmëna atše jobenayama báseftanga jáyëñjanama Crístbeñe chamotsošbuáchemá.

<sup>23</sup> Atše lempe chca sëndama, bëtscá entsànga chë tsabe noticiënguñe chamotsošbuáchemá, y chca, atše atsbocaná chaitsemnana y chëngcá atše chayóyëngacñama, chë atsebácánënga Bëngbe Bëtsá yochjatsataye tsabe soyënga.

<sup>24</sup> Tšëngaftanga šmondëtatšëmbo, canye luaroye jashjanguama entsànga tmojótjajo orna, banga tojtajuana, pero nýe canya chë uacanana soye jóyëngacñana. Chcasna, mo chë uacanana soye jóyëngacñama tmojotjajëngcá, tšëngaftanga cmontsamna jtsiyenana, chë Bëngbe Bëtsábociana uacanana soye josháchiñama. <sup>25</sup> Nyëtscanga chë tmojótjajënga ínýenga jáyëñjanama, chënga jopróntana nyëtsca soyënguñe jtsenomándayëse, chca, canye uacanana soye, tsbuanachëngaca uapormana coronésha juayëngacñama; y chësha betscó jtsanctana. Pero bënga ndoñe; bënga mondoyena Crístbiama soyënga jtsamëse, Bëngbe Bëtsábociana ba tsabe soyënga mo uacanancá jóyëngacñama, y chë soyënga nyëtsca tescama bënga mochanjëftsebmoma. <sup>26</sup> Y atšna, atšbe bariëna sëndëntšëna Bëngbe Bëtsá jtse-servénama, ndoñe mo canya ínýëngbiaye jáyëñjanama tojtajuacá, chë ndëmoye jashjanguama yomnana ntsetatšëmbcá; y cach ndoñe mo nda tojtsepelíá orcá, chora, cha nýe ínýoye chabe buacuatšënga tojtsëšana y chë ínýabe cuerpye ndoñe. <sup>27</sup> Mo canye tsabe peliayacá, chabe cuerpo játsetšëšana y chca chë cuerpo corente jtsemándayana, atše ndoñe quetsatsleséncia chë atše tsábá jtsomñama atšbe ainanentša juabñënga chašotsemándama; y chca, Crístbioye jtse-servénëse chamotsiyenama ínýëngbiaye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tsábá tjaservé causa.

## 10

### *Cach entsangbe pormana soyënga ndoñe chamondëtsadoránama jábuayenama*

<sup>1</sup> Jesucristbeyeca atšbe catšátanga, atše séntseboše tšëngaftanga chašmotsetátšëmbo bëngbe tempsca bëtš taitanga judiënga, chënga nyëtscanga Bëngbe Bëtsá canye jantšëtšesheca benache yojaninýanýná, y chënga nyëtscanga, chë Buángana ca uabaina mar bejayëjana tmojánachnëjina, chiñe mo bojojuiñe cuaftsomñcá. <sup>2</sup> Chë jantšëtšesheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga. <sup>3</sup> Chënga nyëtscanga tmojanse cachca saná, chë Bëngbe Bëtsá celocana tojanichmó saná; <sup>4</sup> y nyëtscanga tmojanofšë chë Bëngbe Bëtsá tojanma chë peñësentsana chaóbcna bėjaye. Cristo chëngaftaca yojtsemna jtsanýenama chënga imojtsajnëntscuana, y ntšamo chë peñësëntšë chëngaftaca tojanopasacá, yojaninýanýná Cristo chënga yojtsanýenama. <sup>5</sup> Masque chca, banga chënguentšënga ntšamo tmojanmama Bëngbe Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entsànga ndoyentšë.

<sup>6</sup> Lempe chca tojanopasá bënga jinýanýiyama y jábuayenama ntšamo inopása entsànga bacna soyënga jamama tmojtseboše ora, bënga chca jamama ndoñe chamondëtsëbošama. <sup>7</sup> Chíyeca, tšëngaftanga ndoñe šmattsadorana entsangbe pormana soyënga, ndayama ínýenga jtsejuabnayana diosënga yomna ca, ntšamo báseftanga israeloquënga tmojanmncá. Ntšamo Bëngbe Bëtsabe uabemana palabrenguñe chëngbiama endayanácá, chënga canye ternerá castellánoca tmojanpormá ora, mo dios cuaftsemncá jadórama: “Entsànga tmojanotbiama jasama y jatmuama, y chentšana tmojantsbaná joboyeuama ca”. <sup>8</sup> Boyabása o shembásaftaca bacna soyënga ndoñe šmattsama, ntšamo báseftanga chënguentšënga tmojanmncá, y chë causa, nýe canye te, uta bnëtsana y unga uaranga entsànga tmojanóbana <sup>9</sup> Bacna soyënga ndoñe šmattsama, jinýama buetatescama Bëngbe Utábná uantado

yochjëftsemnana y ndoñe šochanjacastígayama. Báseftanga chënguentsënga chca tmojanma, y chë causa tmojanóbana mëtscuayéngaca ftëtsenënga. <sup>10</sup> Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmca, y chë causa, chë ángel obanayá tojanma chënga chamóbanama.

<sup>11</sup> Lempe chca bëngbe tempca bëts taitángaftaca tojanopasá, bënga jinýanýiyama ntšamo jtsiyenana šojtsamnana, y Moisés, Bëngbe Bëtsabe uabemana palabrénguiñe chca tojéftsamboshjona bënga jabuátambama, bënga, chë Jesucristo yochjésabo orscama ya batsatema yojtsájama ora oyenëngbiama. <sup>12</sup> Chcasna, nda tojtsējuabná Bëngbe Utabnabiama tšabá yojtsama ca y bacna soyënga ndocna te yochanjama ca, cuedado chaotsebmna, bacna soyënga amiñe ndoñe chaondótsatsama. <sup>13</sup> Ndocna entšá jatócochënguana bacna soyënga jamama, ntšamo tempo ínýenga ndoñe tonjanocochëngcá cachca bacna soyëngama, pero tsëngaftanga corente šmondétatsëmbo Bëngbe Bëtsá sempre cmochtsëjabuachanama chë padecena soyënguiñe, y cha ndoñe yochanjalesénciama bacna soyënga jamama chacmócochënguana, tsëngaftanga chca soyënga jamama jtsóboyayama obenana ntsebmncá; pero chë padecena soyënguiñe chašmojtsemna ora, cha cmochanjínýanýiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

<sup>14</sup> Chýyeca, atšbe bonshánënga, ndocna te šmattsadorana cach entsangbe pormana soyënga, ndayama ínýenga jtsējuabnayana diosënga yomna ca. <sup>15</sup> Atše sëntsoyebuambná mo tsëngaftanga corente osertánënga cuaftsemncá. Cach tsëngaftanga šmochjenójuaboje y šmochjayana, ntšamo cbojtsëtsësnacá añe o ndoñe tšabá bëtsemnana. <sup>16</sup> Ntšamo Jesús chë coptema vinoyama Bëngbe Bëtsábioje tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinýanýayana bënga Crísoftaca cánýiñe mo canýácá imomnana, chabe buiñe juabuáshañe bëngbiama tojanóbanayeca. Y chë mondbajataye tandëse tmojase ora, jtsinýanýayana bënga Crísoftaca cánýiñe mo canýácá imomnana, cha bëngbiama tojanóbanayeca. <sup>17</sup> Bënga ošbuáchiyënga masque banga mondmëna, chca orna nyetscanga cach tandësentšana bënga jasana, y chýyeca bënga jtsemnana mo canýácá, mo Cristbe cuerpca.

<sup>18</sup> Tsëngaftanga šmochtsējuabnaye ndayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentsana jasana, y chca chënga chora jtsinýanýayana chënga cánýiñe mo canýácá imojtsemnana Bëngbe Bëtsáftaca, chë chca tmojtsadoranáftaca. <sup>19</sup> Y chca, atše ndoñe quetsátsboše jayanama chë entsangbe pormana soyënga mo diosënga cuaftsemncá, uamana soyënga yomna ca. Ni chë cach entsangbe pormana soyënga diosënga yomna ca jtsējuabnayëse jadórama uatšëmbona saná inýe sanama más uámana ca. <sup>20</sup> Pero añe, entsanga cach entsangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbioye jtsadoránana, y ndoñe Bëngbe Bëtsábioje. Y atše ndoñe quetsátsboše, tsëngaftanga chca uatšëmbonana šmojasama, cánýiñe mo canýácá chë bayjëngaftaca chašmotsemnana. <sup>21</sup> Tsëngaftanga ndoñe quešmátobena chë vínoye coptémentšana jofšiyana, ntšamo chë ošbuáchiyënga bëtsemnana mondbetsamcá, y chentšana chë cach entsangbe pormana soyënga, mo diosënga cuaftsemncá jadórama vínoye coptémentšánëncá. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëse jasana, ntšamo ošbuáchiyënga bëtsemnana mondbetsamcá, y chentšana cach entsangbe pormana soyënga mo diosënga cuaftsemncá jadórama fiestentšana sanánaca jasana, y chca chë bayjëngbioye jtsadoránana.

<sup>22</sup> Bënga chca tmojtsamama, bënga mochanjama Bëngbe Utabná puerte etonaná bëngaftaca chaotsemnana, er chë bayjëngaftaca bënga chca jtsamana. ¿O imojtsejuabná bënga chabiama más obenana bonmënga imomna ca?

*Lempe šmochjama Bëngbe Bëtsá puerte bëtšá y uamaná yomnana jinýanýiyama*

<sup>23</sup> Mondbëtsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nyëtscangbe tšabiama ntsemnana. “Entselesenciana ndayánaca jamama ca”, pero nyëtsca soyënga ntšamo bënga tmojamcá, ošbuachiyëngbioye ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebmnama. <sup>24</sup> Ndocna chaondëtsama lempe ntšamo tojobenacá nýe cachabe tšabiama, ndayá más chaotsama chë ínýengbe tšabiama.

<sup>25</sup> Lempe mercadoca tmojtsena soyënguentsana šmochjase, ntjatsjtjanaycá chë mëntšena añe o ndoñe tmonjuátšëmbona chë cach entsangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tsëngaftangbe ainaniñe juabnénga šmojtsebmnama; <sup>26</sup> er ntšamo Bëngbe Bëtsabe uabemana palabrénguiñe endayanca: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

<sup>27</sup> Nderado canýe ndošbuachiyá tmojúbuaja chábioca jasama, y tsëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentšana

chë saná tojóbcnana ndocá ntjatstjanaycá, ntšamo tšëngaftangbe ainaniñe juabnënga šmojtsebnama. <sup>28</sup> Pero nderado nda tcmojáuyana: “Quem méntšena cach entšangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canya chca tcmojáuyana, y ainanentše šmojtsebnoma juabnënga, chë chca jamama ndoñe tšabá bëtsemnana. <sup>29</sup> Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tšabá yondmënana, ndoñe chë tšëngaftangbe ainanentša juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bëtsemnana, ntšamo chë inýabe ainaniñe juabna yobomnana ca? <sup>30</sup> Y atše chë ndayá stsesama Bëngbe Bëtsá tijëtschuase, ¿ndáyeca inýa sochjauyana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?” <sup>31</sup> Masque ntšámnaca, cachcá, chašmojtšesá, o chašmojtsofšëšná, o ndaye inýe soye chašmojtšama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtšá y uamaná yomnana jtsinýanýnaya. <sup>32</sup> Tondaye šmatjama ndayá chaobená jamana, inýenga Cristo chamotsábotema. Ndoñe chca šmatjama, ni judiëngbiama, ni ndoñe judiëngbiama, ni chë Bëngbe Bëtsábeñe ošbuachiyëngcá enefjuanëngbiama. <sup>33</sup> Smochtsama ntšamo atše sëndëntšencá, nyëtšcanga nyëtšca soyënguñe oyejuayënga jtsabamnana, lempe ntšamo stjobenacá jtsamëse, ndoñe nýe atšbe tšabiama, ndayá masna chë inýenga tšabiama, chënga chamotsobenama chëngbe bacna soyënguentšana atsebácanënga jtsemnana.

## 11

<sup>1</sup> Tšëngaftanga šmochtsiyena ntšamo atše sëndamcá jtsamëse, cach ntšamo atše sëndoyencá, ntšamo Cristo inetsamcá jtsamëse.

*Ntšamo yomna shembásënga tšabá jtsemnana, ošbuachiyëngcá tmojënefina ora*

<sup>2</sup> Atše sëntseboše tšëngaftanga jáuyana tšabá šmojama ca, tšëngaftanga nyëtšca soyënguñe atšbiana šmnësenajuabnana, y tšëngaftanga šmojtšabuátambana y šmojtšamama ntšamo tcbonjanabuátambacá, cachcá ntšamo atše sënjëfšsanboshjoncá. <sup>3</sup> Pero atše sëntseboše tšëngaftanga chacmësértá: nda nyëtšca entšanga iuamënda cha, Cristo endmëna; y nda shëmbioye ibománda cha, boyá endmëna; y nda Crístbioye ibománda chana, Bëngbe Bëtsá endmëna. <sup>4</sup> Nderado canýe boyabása chabe bestšaše tojtšenátsbotse, inýe ošbuáchiyëngaftaca cánýiñe Bëngbe Bëtsáftaca tbojtscuënta ora o Bëngbe Bëtsabe juabna tojtsoyebuambná ora, cha jamana cachá chaotsëuatjama, chabe bestšašëca chca tojama causa. <sup>5</sup> Pero nderado canýe shembása chabe bestšaše ndoñe tontsenátsbotse, inýe ošbuáchiyëngaftaca cánýiñe Bëngbe Bëtsáftaca tbojtscuënta ora o Bëngbe Bëtsabe juabna tojtsoyebuambná ora, cha jamana chama cachá chaotsëuatjama; jtsëuatjama mo cha lempe jshetëtšëna cuaftsemncá. <sup>6</sup> Er, nderado canýe shembása ndocna te tontseboše chabe bestšaše jtsenátsbotsana, chabiama más tšabá nántsemna lempe chaotsenóshetëtše. Pero tojtsejuabná utšbotjená o chca lempe jshetëtšëná jtsemnana cha yochtsëuatja ca, as chabe bestšaše chaotsenátsbotse. <sup>7</sup> Boyabása ndoñe quebnátsmëna chabe bestšaše jtsenátsbotsana, er Bëngbe Bëtsá tojanma ntšamo cachá yomncá cha chaotsemnana, y chë boyabása chca jtsemnëse, jtsinýanýnaya Bëngbe Bëtsá chabe mandayá yomnana. Pero ntšamo chë shembása yomncá, jtsinýanýnaya chë boyabása chabe mandayá yomnana; <sup>8</sup> er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana. <sup>9</sup> Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca. <sup>10</sup> Chiyeca, y chca jamana angelënga tšabá jtsinýanánayeca, shembása jtsemnana chabe bestšaše chaotsenátsbotsama, chca, chaotsinýnana inýa chábeñe yomándama. <sup>11</sup> Pero, Bëngbe Utabnábeñe ošbuachiyëngcá jtsiyenamna, boyabásënga y shembásënga cachcá jtseytëtanana. <sup>12</sup> Er masque Bëngbe Bëtsá, shembása boyabásabentšana tbojanma, mora, shembásabentšana boyabása jóbcnana; y lempe Bëngbe Bëtsábiocana endóbocana.

<sup>13</sup> Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canýe shembásabiama Bëngbe Bëtsáftaca jencuëntana, bestšaše ntsenatsbotscá. <sup>14</sup> Ntšamo entšanga sempre mondbetsejuabnaycá, ndayá tšabá bëtsemnana, bëngbioye jtsabuátambayana, boyabása bën stjënësha chabuájuauma tojalesenciase, cha jamana cachá chama chaotsëuatjama. <sup>15</sup> Pero shembásabiama, chë bën stjënësha jtsinýanýnaya chabe botamanana y uamanana, er Bëngbe Bëtsá tojanma shembása bën stjënësha chaotsábomnana, chca, cha chaotsebnoma ndáyeca chabe bestšaše jtsenátsbotsama. <sup>16</sup> Masque ntšámnaca, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatsleséncia chca ndoñe chaondëtsemnana.

*Bëngbe Utabnabiama jtenójuaboyama jasama ora, chënga ndoñe tšabá imonjánama*

<sup>17</sup> Mora chochanjaménda soyënguine atse ndoñe quetsátobena tsëngaftanga jáuyana tsábá sñojama ca, er tsëngaftanga Crístbeñe ošbuachiyëngcá sñojénefña ora, Bëngbe Bëtsá jadórana, atse šontsinýana chë soye jajtsošservena tsëngaftanga más bacá chašmotsemnana, y ndoñe tsëngaftangbe tsabiama. <sup>18</sup> Natsana chochjáuyana, atse sënjouena tsëngaftanga ošbuachiyëngcá sñojénefña ora, báseftanga canýe soye inmñtsejuabnaye y ínýengna ínýtšá ca, y atse sëntsejuabná baššana ndegombre chca jajtsemna ca. <sup>19</sup> Ndegombre jtseytana tsëngaftangbeñe chamotsemna báseftanga canýe soye juabnayënga y ínýengna ínýtšá, chca, nyetscanga chamotsetatšëmbuama ndëmuanyënga imojtsemna chë Bëngbe Bëtsá tojayana chënga tsábá tmojama ca. <sup>20</sup> Tsëngaftanga tandëse jasama y vínoye jofšiyama sñojénefña ora, ntšamo bënga fsënduamancá, Bëngbe Utabná bëngbiama tojanóbanama jtenójuaboyama, ndayá chora tsëngaftanga šmnetšamcá, ndoñe quenátšmëna ntšamo ndegombre cmojtšamncá, chë Bëngbe Utabnabiama jtenójuaboyama jasama ora; <sup>21</sup> er chë jasama tojobuache ora, cada ona inóntša jasama ndayá tojiyëbcá, y ndoñe ntjatobátmanana nyetscanga ndayanaca jasama chamotsebomñentšcuana; báseftanga shëntseca joquédana, y ínýengna tša jéftsesana y jofšiyana jéftšótmenantšcuana. <sup>22</sup> ¿Tsëngaftanga ndoñe yebna šmondobomna ndayentse jasama y jofšiyama? ¿Ndáyeca tsëngaftanga sñojtsejuabná chë inmñénefña ošbuachiyënga nduámanënga imomna ca, y sñojama chë chentse tmojtsemnënga, tondaye ndobomnënga, chamotšëuatjama? ¿Tsëngaftanga sñojtsejuabná atse chochjáuyana tsábá sñojama ca, chë Bëngbe Utabnabiama jasama ora chca sñojamama? ¡Ndegombre ndoñe!

*Bëngbe Utabnabiama jtenójuaboyama saná*  
(Mt 26.26-29; Mc 14.22-25; Lc 22.14-20)

<sup>23</sup> Er atse cach Bëngbe Utabná bentsana ntšamo chontsabuatëmbacá sënjanóyëngacñe: Bëngbe Utabná cach uayayëngbe cucuatšifne tmojánboshjona ibeta, tandëse tojanca, <sup>24</sup> Bëngbe Bëtsábioye tbojtanchuá chentšana, tojanjatá y tojánayana: “Quem tandëse atšbe cuerpo entsemna; tsëngaftangbe tsabiama chanjóbana. Ntšamo mora montšamcá šmochtsama, atšbiama jtenójuaboyama ca.” <sup>25</sup> Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tsëngaftanga chašmotsetatšëmbuama, ntšamo Bëngbe Bëtsá entšanga tojanašebuachenacá pronto yochtsemnana. Cada vínoye chašmojtsofšëšná ora, chca šmochjama atšbiama jtenójuaboyama ca.” <sup>26</sup> Er tsëngaftanga cada quemëntša tandëse chašmojtšesá ora y quem coptementšaycá chašmojtsofšëšná ora, Bëngbe Utabná chaojésabëntšcuana tsëngaftanga šmochántsinyányñaye cha entšangbiama tojanóbanama.

*Ntšamo yomna jamana, Bëngbe Utabnabiama jtenójuaboyama jasama ora*

<sup>27</sup> Chcasna, Bëngbe Utabnabiama jtenójuaboyama jasama ora, ndánaca tandësentšana tojase y coptémentšana tojofšë, ndoñe chë ntšamo chaotsemnana Bëngbe Utabná yojanjuabnacá, chabiama Bëngbe Bëtsá jayanana cha puerte bacna soye tojama ca. Chë entšá chca tojama ora, cha jtsinýanýayana, Bëngbe Utabnabe cuerpo y buiñe chabiama tondaye yonduámanama. <sup>28</sup> Chiyeca, entsemna cada ona corente chauenojuabó jtsetatšëmbuama aiñe o ndoñe yontseprontana chca jasama y jofšiyama, cabá ndëse y ndofšë ora. <sup>29</sup> Er nderado nda tojase y tojofšë, chë Bëngbe Utabnabiama jtenójuaboyama jasama ora, cach Bëngbe Utabnabe cuerpo yomnana ntjajuaboycá, cha chë sóyeca jamana Bëngbe Bëtsá chabotsecastigama. <sup>30</sup> Chiyeca, banga tsëngaftanguentsënga šoquënga sñojtsemna, ínýengna añemo ndobomnënga, y ínýengna ndoñe nyë báseftanga tmojóbana. <sup>31</sup> Pero bënga corente tmojajuabó jtsetatšëmbuama aiñe o ndoñe montseprontana ntšamo šuamncá jasama y jofšiyama, cabá ndëse y ndofšë ora; chca, Bëngbe Bëtsá ndoñe buántsemna bënga játaçastigana, ntšamo tsábá yomncá ndoñe tmonjase causa. <sup>32</sup> Pero, Bëngbe Utabná castigoca chca šojabuayená ora, jtsemnana bënga más tsábá jtsamana chamuatsjínýama, y chca, Bëngbe Bëtsá ndoñe chabondëtsemna Bëngbe Bëtsá ndoñe chabondëtsemna játayanana bënga šojtsamna nyetsca tescama castigánënga jtsemnana ca, canýiñe chë nyë quem luarama enójuabnaye entšangtaçta.

<sup>33</sup> Chca, Jesucristbeyeca atšbe catšátanga, tsëngaftanga chë Bëngbe Utabnabiama saná jasama chašmojénefña ora, canýiñe nyetscanga šmochjabojátša. <sup>34</sup> Y nderado nda tbojtšëntšana, cachabe yebnoca chauëtseca, chca, Bëngbe Bëtsá ndoñe chabondëtsemna tsëngaftanga játaçastigana chora ndoñe tsábá šmonjama causa. Chë inýe soyëngama ndayama tsëngaftanga šmonjatjá, chamna chanjamánda tsëngaftanga jányama chaijá ora.

## 12

*Bëngbe Bëtsabe tšetana obenana, tšabe soyënga jamama*

<sup>1</sup> Jesucristbeyeca atšbe catšátanga, atse sëntseboše tsëngaftanga chašmotsetatšëmba Bëngbe Bëtsabe tšetana obenanama tšabe soyënga jamama, Crístbeñe ošbuachiyënga jujabuáçhama.

<sup>2</sup> Tsëngaftanga šmondëtatšëmo, tsëngaftanga Crístbeñe ndošbuáchiyënga šmonjamna ora, ínÿenga cmonjanabuatambá soyënga, y chora tsëngaftanga šmonjamna ínÿabeyeca uas-janëngcá, cach entšangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntsobenana. <sup>3</sup> Chíyeca, atše mora sëntsebošë tsëngaftanga chašmotsetátšëmo, ndocná ntsobenana jayanana: “Jesús ndoñe chë Cristo quenátšmëna, ni Bëngbe Utabná ca”, chë Bëngbe Bëtsabe Espírítbe obenánaca cha tojtšóyebuambnase. Y cach ndocná ntsobenana jayanana: “Jesús Bëngbe Utabná endmëna ca”, chë Bëngbe Bëtsabe Espírítbe obenánaca cha ndoñe tontšóyebuambnase.

<sup>4</sup> Espírítu jamana bënga ndoñe chamondëtsebonnana cachca tšetana obenana tšabe soyënga jamama, pero lempe jobayana cach canÿe Espírítbeyeca. <sup>5</sup> Bënga, Bëngbe Bëtsá mondëservedna, nÿetsca soyënguifne jtsetrabájayëse, pero cach Utabná nÿets chë trabajënga sojabanjé. <sup>6</sup> Nÿetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebonnana. <sup>7</sup> Bëngbe Bëtsá inétsama cada ošbuachiyá chaotsebonnana canÿe tšetana obenana tšabe soyënga jamama, y chë soye jtsinÿanÿayana Bëngbe Bëtsabe Espírítu chabe ainaniñe yomnana; y chë tšetana obenana jtsemnana nÿetscangbe tšabíama. <sup>8</sup> Bëngbe Bëtsá, Espírítbeyeca, canÿa obenana jatštayana puerte osertanánaca chaóyebuambama, y ínÿana obenana cach Espírítbeyeca ndayámnaca corente jtsetatšëmbëse chaóyebuambama; <sup>9</sup> ínÿana cach Espírítbeyeca, obenana Crístbeñe puerte chaotsošbuáchemana, y ínÿabíamna, cach nÿe canÿe Espírítbeyeca, obenana jatštayana šoquënga jáshnama; <sup>10</sup> ínÿana, obenana tšabe soyënga Bëngbe Bëtsabe obenánaca jamama, y ínÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espírítbeyeca o bacna espiritëngbeyeca tojtsemnana, y ínÿana, obenana chë tempo ndmabiyáfnaca chaóyebuambama, y ínÿana, obenana josértama ntšamo chë ndaye biyáfnaca jóyebuambayama obenana bomná tojtsichamcá, y ínÿengna chama jábuayenama. <sup>11</sup> Pero cach Espírítu, chë nÿe canÿe Espírítu lempe chca jamana, ntšamo tšabá bëtsemnana cha tojtsejuabnacá cada entšábioye jatštayëse.

*Nÿetsca ošbuáchiyënga cánÿiñe, mo Crístbe cuerpá jtsemnana*

<sup>12</sup> Cuerpo nÿe canÿe soye endmëna y chë cuerpna ba soyënga jtsebonnana; masque chë cuerpo ba soyënga jtsebonnana, nÿe canÿe cuerpo jtsemnana. Bëngaftácnaca cachcá. Bënga banga mondëmëna nÿetscanga Crístbeñe ošbuáchiyënga, pero Crístbeyeca, bënga cánÿiñe mo canÿacá jtsemnana. <sup>13</sup> Er bënga nÿetscanga, judiënga o ndoñe judiënga, nÿe ínÿabíama nÿets tempo oservënënga o cachëngbiana trabájayënga šojanëbaya, Crísoftaca cánÿiñe mo canÿacá, jtsemnana mo chabe cuerpá, y chca yomna cach Espírítbeyeca; y Bëngbe Bëtsá tojama cach Espírítu nÿetscangbe ainanoye cháumashënguama, bënga jtsemándayama.

<sup>14</sup> Cachcá, canÿe cuerpo ndoñe nÿe canÿe soye ntsebonnana, ndayá ba soyënga. <sup>15</sup> Nderado shecuatšë tojayana: “Cucuatšë ndoñe quetsátšmëna causa, atše cuerpentša soye ndoñe quetsátšmëna ca”. Chca tojayanamna, shecuatšë mo chë cuerpentša soye ndoñe cuaftsemncá ndoñe ntjátšmëna. <sup>16</sup> Nderado matscuatšë tojayana: “Bominÿe ndoñe quetsátšmëna causa, atše cuerpentša soye ndoñe quetsátšmëna ca”. Chca tojayanamna, matscuatšë chë cuerpentša soye ndoñe cuaftsemncá ndoñe ntjátšmëna. <sup>17</sup> Nÿets cuerpo bominÿe tojtsemnëse, bënga ndoñe muanjobenaye jonguëtsetšiyana. <sup>18</sup> Pero ndegombre endmëna, Bëngbe Bëtsá nÿetsca soye cuerpentšë tojancjá ndayentšë cha tojánbošenentšë. <sup>19</sup> Nÿetsca cuerpentša soyënga nÿe canÿe soye tojtsemnëse, ndoñe canÿe cuerpo nántsemna. <sup>20</sup> Pero ndegombre endmëna, masque ba soyënga cuerpentšë yomna, nÿe canÿe cuerpo jtsemnana.

<sup>21</sup> Bominÿe quenátobena cucuatšë jauyanana: “Ndoñe quecátsiyta ca”; y cachcá, bestšaše quenátobena shecuatšë jáuyanana: “Ndoñe quecátsiyta ca”. <sup>22</sup> Inÿetšá, chë cuerpentša soyënga, chë tojtsinÿana mo obenana ndbomna y nduámana soyëngcá, jtsemnana chë cuerpama más iyta soyënga. <sup>23</sup> Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entšayaca jtchëtjëse. Y chë cuerpentša soyënga, ndayama bënga jtsëuatjana ínÿenga chamotsonÿama, bënga jamana ínÿenga ndoñe chamondëtsonÿama, chiñe entšayaca jtchëtjëse. <sup>24</sup> Pero chë cuerpentša soyëngaca, chë nÿetscanga jtsonÿayana y botamana jinÿama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámana soyënga, más chaotsámanama, ntšamo chë soyënga bënga tmojtsinÿenama. <sup>25</sup> Cha chca tojanma, cuerpentša nÿetsca soyënga chë cuerpama trabajo cánÿiñe chamotsamama, y chca, cada soye chaotsama trabajo chë cuerpentša nÿetsca soyëngbe tšabíama. <sup>26</sup> Nderado canÿe cuerpentša soyama bacna soye tojopasá, chora nÿetsca chë cuerpentša soyëngámnaca chca ndoñe tšabe soye jtsebínÿana; pero

canýe cuerpentša tojoma más uámana soye chaotsemnana o ndaye tšabe soye tojopasase, chora nyetsca chë cuerpentša soyëngámmaca chca tšabe soye jtsebínýana.

<sup>27</sup> Cachcá, tšëngaftanga Crístbeñe ošbuáchiyënga, cháftaca cánýiñe mo canýacá jtsemnëse, mo chabe cuerpcá jtsemnana, y cada ona tšëngaftanguentsá mo chë cuerpentša soyëngcá, jtsemnana mo chabe cuerpentša soyëngcá. <sup>28</sup> Ntsamo Bëngbe Bëtsá cuerpentše soyënga tojancá ndayentše inabošcá, cachcá, ošbuachiyëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiama abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë ínýëngbioye puerte ujabuáchanënga, chë ínýe ošbuachiyëngbioye amëndayënga, y chë nyetsca biyañe jtsoýebuambnayama obenana bomnënga, tempo ndmabiyañe. <sup>29</sup> Ndegombre, ošbuachiyëngcá enefjuanëngbeñe nyetscanga ndoñe Jesucristbe ichmónënga ntsemnana, nyetscanga ndoñe Bëngbe Bëtsabe juabna oyebuambnayënga, nyetscanga ndoñe abuátambayënga, nyetscanga ndoñe Bëngbe Bëtsabe obenana bomnënga, bëts soyënga jamama. <sup>30</sup> Nyetscanga ndoñe šoquënga jáshnama obenana bomnënga; nyetscanga ndoñe nyetsca biyañe jtsoýebuambnayama obenana bomnënga, tempo ndmabiyañe; ni nyetscanga ndoñe obenana bomnënga quemátsmëna, chë tempo ndmabiyañe nyetsca biyañe jtsoýebuambnayama obenana bomnënga ntšamo tmojtsichamcá josértama y ínýëngbioye chama jtsubuayinyayama. <sup>31</sup> Pero tšëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftšashjáchama.

### *Bonshánana jtsebmomna*

Y ínýe soye más, atše cbochanjínýanýiye ntšamo šmojtsobena cabá más tšabá jtseyenana, Bëngbe Bëtsá jtsebvëñëse.

## 13

<sup>1</sup> Nderado atše stjóyeuambaye entsangbe biyañe y angelëngbe biyañe, pero ínýëngbioye ndoñe sentsababuányëshanëse, atše stsemna canýa tondayama uamaná, mo nýe canýe metalëshe tojtsenancá, o mo nýe canýe platillëšhcá ndoñe tšabá tontsenanëse. <sup>2</sup> Y atše obenana stsebmomna Bëngbe Bëtsabe juabna jóyeuambayama y nyetsca soyëngama, y chë Bëngbe Bëtsá tempo entsanga ndoñe tonjaninýanýe soyënga šojtsësertana, y Bëngbe Bëtsabe nyetsca soyëngama stsetátšëmbo, y Crístbeñe puerte stjesošbuáchiye, chca betsošbuáchemá nýa mo chë tjšahënga chamobonjoma jamama, pero ínýënga ndoñe sentsababuányëshanësa, atše tondaye sëntsemna. <sup>3</sup> Y atše lempe ntšamo stsebmomncá ndbomnëjëmënga stsëjátaye, y ínýëngbioye stjennontréga atšbe cuerpo chamojuinýëma, pero ínýëngbioye ndoñe sentsababuányëshanëse, atše ndocna uámana soye ntjšahjáchana.

<sup>4</sup> Canýe entsá ínýënga ababuanýëshaná, uantado jtsemnana masque padecena soyënguiñe tmojtsemna órnaca, y ínýëngaftaca tšabe ainánaca mando jtsebmomnana. Inýënga ababuanýëshaná ndoñe ntsántábošana ntšamo ínýa tojatsbmomncá, ni ntšenábotamayana, ni cachá chë ínýëngbiama más uamaná ntjätenobiamayana; <sup>5</sup> ndoñe bacá mandbomná ínýëngaftaca ntsemnana, ni nýets tempo ntsebošana y lempe jtšamana nýe chabiama tšabe soye jónýenama; cha nýe ndayámmaca ndoñe ntjetnana, ntšamo ínýënga tmojaborlá ora jtšaperdónayana. <sup>6</sup> Inýënga ababuanýëshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamma aiñe. <sup>7</sup> Inýënga ababuanýëshaná, ainaniñe añemo jtsebmomna nyetsca padecena soyënguiñe, lempe ntšamo más tšabá yomna soyënguiñe jtsošbuáchiyana, nyetsca más tšabá yomna soyëngama jtsobatmanana, y jtsoboyayana nyetsca toto soyënga.

<sup>8</sup> Bonshánana nyetsca tescama jëftsemnana. Canýe te echántsemna, chora chë Uámana Espíritu ndoñe más queochátama entsanga Bëngbe Bëtsabe juabna chamotsóyeuambnamna, ni chë ndocna te ndmabiyañe chamotsóyeuambnamna, ni chë puerte jtsetatšëmbëse jóyeuambayama obenama chamotsebmomnana; <sup>9</sup> er ntšamo mora bënga imotatšëmbcá y Bëngbe Bëtsabe juábnaca jóyeuambayëse tmojayana soyënga, nýe batšatema bëngbioye jtšinýanýayana Bëngbe Bëtsabe Bëtsabe soyëngama, ndoñe lempe; <sup>10</sup> pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiama yojanjuabnacá, quem soyënga, chë nýe batšatema bëngbioye jtšinýanýayana Bëngbe Bëtsabe soyëngama, ya ndoñe más queochátšinýana.

<sup>11</sup> Atše básetema ora, sënjanoyebuambná, sënjanjuabná, y soyëngama tšabá jtsetatšëmbuamna sënjanjuabná mo canýe basetemcá; pero bëtsá sënjanóbema orna, sentsanajbaná lempe amana mo canýe basetemcá. <sup>12</sup> Cachcá, mora bënga quem luarentše nýe batšatema Bëngbe Bëtsabe soyëngama jtsetatšëmbuana, mo canýe espejuiñe tmojtsonýacá, pero ndoñe nýa corente tšabá. Pero canýe te bënga mochántsetatšëmbo lempe nyetsca soyëngama, Bënga Bëngbe

Bètsabe delante chamojtsemna ora. Mora atše sèntsetatšëmbo nÿe batšatema Bèngbe Bètsabe soyèngama, pero chora lempe chanjuábuatmana, ntšamo Bèngbe Bètsá corente šuabuatmcá.

<sup>13</sup> Pero morna, Bèngbe Bètsábeñe jtsošbuáchiyana, chábeñe jtsobátmanana, y chábioye y inÿengbioye jtsababuánÿeshanana, chë soyèngna nÿetsca tescama jèftsemnana; pero chentšana chë más uámana soye endmëna inÿenga jtsababuánÿeshanana.

## 14

### *Ndmabiyañe obenana Bèngbe Bètsabe tšetánana*

<sup>1</sup> Bètsá šmochtsama nÿetscanga jtsababuánÿeshanëse chašmotsiyenama, y puerte šmochtseboše jtsebmomna chë Bèngbe Bètsabe tšetana obenana tšabe soyènga jamama; pero chentšana masna, chë Bèngbe Bètsabe juabna jóyebuambayama obenana. <sup>2</sup> Er chë tempo ndmabiyañe mora jóyebuambayama obenana bomná, Bèngbe Bètsábioye jtsatsètsnayana y ndoñe entšangbioye, er ndegombre entšanguentše ntšamo cha tojtsoyebuambnacá ndocná ntjosértana; chana chabe espíroftaca jtsóyebuambnayana y ndoñe nÿe chabe juábnaca, chë tempo Bèngbe Bètsá ndocna entšábioye tbonjaninÿinÿé soyèngama. <sup>3</sup> Pero chë Bèngbe Bètsabe juabna oyeuambnayana entšanga jtsètsètsnayana, chënga más chamotsošbuáchemá y ainaniñe añemo chamotsebmomna, Bèngbe Bètsabe soyèngama jábuayenama, y jamama padecena soyènguiñe tmojtsemna órnaca añemo chamotsebmomna. <sup>4</sup> Chë tempo ndmabiyañe mora jóyebuambayama obenana bomná, jtsamana nÿe cha más jtsošbuáchiyama y ainaniñe añemo jtsebmomna; pero chë Bèngbe Bètsabe juabna oyeuambnayana jtsamana chë ošbuachiyèngcá enefjuanènga chca soyènga chamotsebmomna.

<sup>5</sup> Atše sèntseboše nÿetsca tšèngaftanga chë tempo ndoñe šmonjanbiyañe mora jóyebuambayama obenana chašmotsebmomna, pero chama atše más sèntseboše tšèngaftanga chë Bèngbe Bètsabe juábnaca soyènga chašmotsóyebuambnana. Chë Bèngbe Bètsabe juábnaca soyènga oyeuambnayá más uamaná jtsemnana chë inÿe biyañe oyeuambnayabiama; chca ndoñe nántsemna, ntšamo canÿe biyañe tojayancá chë biyañe oyeuambnayá tojtsèsertánëse y chë ošbuachiyèngcá enefjuanènga tojábuayenase, y chca, chë soyènga tmojouenama, chënga chamotsobena más jtsošbuáchiyama y añemo jtsebmomna. <sup>6</sup> Y mora, Jesucristbeyeca atšbe catšátanga, atše nderado tchojábuache y nÿe inÿe biyañe tchojáuyanëse, ¿chca ntšamo chatjújabuache? Atše jtsobenana jujabuáchana, nÿe ntšamo chë biyañe tijayancá átšnacá šojtsèsertánëse, y ndayá Bèngbe Bètsá šojinÿinÿecá entšanga jábuayenama stjobenase, chë Bèngbe Bètsá tojama atše jtsetatšëmbuama soye, chë Bèngbe Bètsabe juábnaca stsoyebuambná soye o chë tšèngaftanga jabuátambama cha yoboše soye.

<sup>7</sup> Entšanga monduamana ndayánaca juénanana, mo flautéjfa o arpa, vida ndbomna soyènga; cada sóyeca inÿetšá juénanama ndoñe tontsopodénëse, ndocná nantsobëna jtsetatšëmbuama ndayá canÿa chë soyèngaca yojtšénanama. <sup>8</sup> Y nderado nda trompetéjfa tojujátéteta ora, soldadènga japéliama chamoprontama, chë uajatétaná inÿetšá, nÿa chama ndoñe tonjuátatétëse, ndocná buanjósérta y jempéliama ndoñe nanjprónta. <sup>9</sup> Tšèngaftangafatnacna cachcá jtsopasánana. Inÿenga paselo josértama jobenaycnana tšèngaftanga ndoñe šmonjóyebuambase, ndocná queochátatšëmbo ntšamo šmojtšicamcá. Nántsemna mo nÿe canÿenga cuaftsoyebuambnacá. <sup>10</sup> Atše sèntsejuabná, ndegombre quem luarentše ba inÿe biyañe entšanga imnètsoyebuambnayana, y ndaye biyáñnaca tmojyebuambá ora, sempre jtsemnana inÿenga ntšamo chënga tmojtšicamcá osertánënga. <sup>11</sup> Pero ntšamo inÿa chabe biyañe sojayuancá atše ndoñe šontsèsertánëse, atše stsemna canÿe chabiama ndosertana biyañe oyeuambnayá, y chánaca cachcá atšbiama. <sup>12</sup> Chcasna, chë Uámana Espíritu šondinÿanÿná obenana jtsebmomna tšèngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyèngacñama, chë ošbuáchiyènga más jtsošbuáchiyama y añemo jtsebmomna inétsama obenana.

<sup>13</sup> Chiyeca, chë tempo ndmabiyañe mora jóyebuambayama obenana tojtsebmomná, Bèngbe Bètsá chabotseimpadana, cha chaoma ntšamo chë inÿe biyañe tojayancá chabosertama y ošbuáchiyènga jábuayenama obenana chaotsebmomna. <sup>14</sup> Pero atše Bèngbe Bètsáftaca stjencuénta, chë ndmabiyañe jóyebuambayama cha obenana šojanatšetacá jtsóyebuambnayëse, atšbe espíritu cháftaca nantsóyebuambnayë, pero atšbe juabna ndoñe ntsetatšëmbuana ntšamo chë espíritu tojtsoyebuambnacá. <sup>15</sup> Y asna, ¿ntšamo atše chtsemana? Bèngbe Bètsáftaca chanjencuénta atšbe espíritoca, pero ntšamo stsihámuama jtsejuabnayësnaca. Bèngbe Bètsá jètschuayama chanjavérsia atšbe espíritoca, pero chca chanjama chíñnaca jtsejuabnayëse. <sup>16</sup> Nderado aca Bèngbe Bètsá cojtsatschuaná nÿe espíritoca, y canÿa quem Bèngbe Bètsabe tšetana obenanama ndosertaná tmojóyeyenase, cha ndoñe ntsoobenana jayanana “chca chaotsemna ca”, cach aquécá cha yojtsejuabnana jinÿinÿiyama, er ntšamo

cojtsichamcá cha ndoñe ntsésertánana. <sup>17</sup> Aca jtsobenana chca puerte tsábá Bèngbe Bètsá jètschuayana, pero ntšamo tcojtsamcá ndoñe ntjamana inya ndaye tsabe soye chaotsebonnana. <sup>18</sup> Atše, Bèngbe Bètsá sèntsatschuaná inye biyañe jóyebuambayama tsèngaftangbiama más tsobenama; <sup>19</sup> pero Crístbeñe ošbuachiyèngcá tmojënefjna ora, atše más sèndbètsese nje mo shachna palabratémnaca jóyebuambayana, chènga aife catafjosertacá, chca, inyenga jabuatambama, y ndoñe bnètsana uaranga palabrenga jatóyebuambnayana inye biyañe, chènga chaósertama ndoñe tontsopodénese.

<sup>20</sup> Jesucrístbeyeca atšbe catsátanga, šmochtsajbaná basetemèngcá juabnayana. Mo šešonatemèngcá šmochtsemna, bacna soyènga jamama ntsetatšèmbcá; pero mo bètsètsangcá tsábá šmochtsejuabnaye. <sup>21</sup> Bèngbe Bètsabe uabemana palabrenguiñe, Bèngbe Utabná mèntšá tojánayana:

Atše quem entšángbioye chanjáuyana,

inyenga inye luarèngocana ashjajnèngaftaca, chèngbiama canye ndosertana biyañe oye-  
buambnayènga;

y chanjáuyana ndayá chèngbe biyañe chamojtsichamo soyèngaca;

pero ni chca, chènga ndoñe quešmochatóyeunaye ca.

<sup>22</sup> Chcasna, inye biyañe jóyebuambayama obenana jtsebonnana endmèna, Bèngbe Bètsá ndayánaca chè chábeñe ndošbuachiyèngbioye jinýanýiyama, y chábeñe ošbuachiyèngbioyna ndoñe. Pero, Bèngbe Bètsabe juabna jóyebuambayama obenana jtsebonnana endmèna, Bèngbe Bètsá ndayánaca chábeñe ošbuachiyèngbioye jinýanýiyama, y chábeñe ndošbuachiyèngbioyna ndoñe. <sup>23</sup> Er tsèngaftanga nyètscanga ošbuachiyèngcá šmojënefjna ora, nyètscanga ba biyañe šmojtsoyebuambná, y choye tojámashèngo canya chca Bèngbe Bètsabe tšetana obenanama ndosertaná o chábeñe ndošbuachiyá, cha nanjáyuaboye tsèngaftanga opènga šmojtsóbema ca. <sup>24</sup> Pero nyètscanga tmojtsichamo, Bèngbe Bètsabe juábncaca jtsóyebuambnayèse, y choye tojámashèngo canya Bèngbe Bètsabeñe ndošbuachiyá o canya chca Bèngbe Bètsabe tšetana obenanama ndosertaná, ntšamo chašmojtsichamcá cha bochanjósértá; y chè soye cha bochanjayèñjaná cha bacna soyènga tojamama, y ndayá cha tojamiñe corente echántsejuabnaye, ntšamo nyètscanga tmojtsichámuama. <sup>25</sup> Y Bèngbe Bètsá chábioye bochanjinýinýiye ntšamo cha ainaniñe tojajuabó y tojabosencá, ndayá ndocnábioye tbonjinýinýecá, y cha echanjoshèntsamentšiyè Bèngbe Bètsá jadórama, y tsèngaftangbe delantechanjayana Bèngbe Bètsá ndegombre tsèngaftangbeñe yojtsemna ca.

*Ošbuachiyèngcá šmojënefjna ora, ntšamo tsábá yomncá lempe šmochtsama*

<sup>26</sup> Chcasna, Jesucrístbeyeca atšbe catsátanga, šmojënefjna ora, cada ona ndayánaca jtsebonnana nyètscangbiama: inyengna jtsobenana javérsiama, Bèngbe Bètsá jètschuayama, inyengna jtsobenana jabuatambana o jábuayenama ndayá Bèngbe Bètsá tojinýanýecá, o tempo ndmabiyañe chora jtsóyebuambnayana, o entšanga jábuayenana ntšamo inya inye biyañe tojayancá. Pero lempe šmochjama, ošbuachiyènga más chamotsošbuáchemá y más añemo chamotsebonnana Cristo jasérviamá. <sup>27</sup> Nderado inye biyañe jóyebuambayama tojtsemnèse, útata o nya másese únganga chca chamoyebuambá, y canýánýa; y jtseytana ndánaca ntšamo tmojtsichamcá chabosertá y nyètscanga chama chauabuayená. <sup>28</sup> Y chca chabosertama y nyètscanga jábuayenama ošbuachiyèngbeñe ndocná tontsemnèse, as ošbuachiyèngcá chamojënefjna ora chè chca oyeuambnayá bontsemna ndoñe chca biyañe ntsóyebuambnayana, sinó nje canya tojtsemna ora cha jtsobenana chca Bèngbe Bètsáftaca jencuéntana. <sup>29</sup> Utata o únganga entsamna jayanana soyènga, Bèngbe Bètsabe juábncaca jtsóyebuambnayèse; y chè inyenga jtsamnana botamana jajuaboyana y jayanana ntšamo chènga tmojayancá aife o ndoñe Bèngbe Bètsábiocana tayojsóbobocanama. <sup>30</sup> Pero canya Bèngbe Bètsabe juabna tojtsóyebuambnantscuana, inya chentše ouenana tthemanábioye Bèngbe Bètsá tbojinýinýe ndayánaca yojtsebonnana jayanama, as chè natsana oyeuambnayá iytéca chaóbema, y chabolesencia chè inya chaóyebuambama. <sup>31</sup> Chca, nyètscanga, canýánýa jtsobenana jayanana soyènga, Bèngbe Bètsabe juábncaca jtsóyebuambnayèse, nyètscanga chamuat-sjínýama y nyètscanga añemo jatšatayama. <sup>32</sup> Chè Bèngbe Bètsabe juabna oyeuambnayá endobena jtsemándayana ntšamo tojtsichamcá, cha cachabe espíritoca tojtsoyebuambná ora; <sup>33</sup> er Bèngbe Bètsá endmèna nda inétsama bènga natjèmbana chamotsiyenama, y ndoñe chè bènga nyètscanga cachcá ndoñe chamondètsejuabnana, y nje ntšamo cada ona tojtsebošcá chaotsamama.

Ntšamo nyets luarènguenache, chè ošbuachiyènga, chè Bèngbe Bètsabe entšanga mondbènefjna luarènguenache endbetsemncá, <sup>34</sup> tsèngaftangbèntšnaca, shembásenga entsamna iytéca jobiamèngana, ošbuachiyèngcá šmojënefjna ora, er ndoñe quenátslesenciana chènga chora chamuatóyebuambnana, y aife chènga entsamna chèngbe boyanga jtsayaunanana, ntšamo Moisesbe leyíñe endayancá. <sup>35</sup> Chènga ndayánaca jtsetatšèmbuama tmojtsebošèse, cachèngbe boyángbioye yebnoca chamotjanga; er ndoñe ndoñe tsábá



ntsemnana canye shembása jtsóyebuambnayana tsêngaftanga ošbuachiyêngcá šmojénefjna ora.

<sup>36</sup> ¿Tsêngaftanga šmojatsjuabná, Bêngbe Bětsabe tsábe noticiénga tsêngaftangbeñe tojanobojatšé ca, o nye tsêngaftanga chě soyénga šmojanóyêngacñe cá? Ndegombre ndoñe chca; chíyeca tsêngaftanga nye cányenga ndoñe ntsoebenana jayanama ndayá jamama cmojtsamnana. <sup>37</sup> Nda tojtsejuabná cha Bêngbe Bětsabe juabna oyebuambnayá yomna ca, o chabe ainaniñe chě Espíritu jtsemándayama yojtsebmna ca, cha bontsemna tsábá jtsetatšembuana, ntšamo Bêngbe Utabná sojamandacá atše stsabiamnana. <sup>38</sup> Pero cha ndoñe chca tontsetátšembo y chca ndoñe yondmēna ca tojayanēse, ndayá cha tojayancá ndoñe šmatjóyêngacñe.

<sup>39</sup> Chcasna, Jesucristbeyeca atšbe catšátanga, puerte šmochtseboše Bêngbe Bětsabe juábna soyénga jtsóyebuambnayama obenana jtsebmna, y ndoñe šmattsama chě tempo ndmabiyañe ín'yenga ndoñe chamondětsóyebuambnana; <sup>40</sup> pero lempe šmochjama ntšamo jamama yomncá, y ndoñe nye ntšamo cada ona tojatsjuabnacá.

## 15

### *Cristo tojtanayenama*

<sup>1</sup> Morna, Jesucristbeyeca atšbe catšátanga, atše sěntseboše tsêngaftanga chašmuatenójuaboma atše tcbonjanabuayená tsábe noticiénguñe, ndayá tsêngaftanga šmonjanóyêngacñe, chě ndáyeca tsêngaftanga Jesucristbeñe šmojtsošbuaché y cha jtse servénese šmojtseyena. <sup>2</sup> Chca šmobómnyeca, tsêngaftanga atsebácanénga šmojtsemna, pero tsêngaftanga sempre chíñe šmojtsošbuachese, ntšamo cbonjanabuayinacá; chca ndóñesna, nye ndoñe corente tsábá ntjajuaboycá chě buayenana soyénguñe šmojtsošbuaché.

<sup>3</sup> Er atše tsêngaftangbeñe sěnjěftsanboshjona, Bêngbe Bětsábocana atše tjanóyêngacñe más uámana buatēmbana soyénga. Atše tcbonjabuatambá: Cristo tojanóbana bēnga bacna soyénga tmojamama, ntšamo Bêngbe Bětsabe uabemana palabrénguñe chabe juabna oyebuambnayénga chama tmojanayancá; <sup>4</sup> chě Cristo tmojanatbontsá y unga tianoye cha cháuatayenama Bêngbe Bětsá tojanmama, ntšamo Bêngbe Bětsabe uabemana palabrénguñe chabe juabna oyebuambnayénga chama tmojanayancá; <sup>5</sup> chě Pédrēbloye tbojánēbēbocna, y chentšana chě bnětsana útata ca uabobáimēngbioyana. <sup>6</sup> Chentšana mo shachna patsama más chábeñe ošbuáchiyēnga tojánēbēbuacna, chēnga cányentšē imojtsemna ora; chēnguentsānga banga cabá vida imotsóbomñe, masque báseftanga ya tmojóbana. <sup>7</sup> Chentšana Santiāgbloye tbojánēbēbocna, y chentšana nyetsca chabe ichmónēngbioyē.

<sup>8</sup> Y chentšana átšnača šonjánēbēbocna. Mo canye šešona cabá shbená tojonýnacá, Cristo chabe ichmoná šonjānbema, chě tempo chama jopróntama ntsebmncá, ndayēntscuana ín'yenga cha tojanabuatambá. <sup>9</sup> Er atše sěndmēna chě más batšá uamaná Jesucristbe ichmónēngbeñe; y ni merecido taitatobuajoñe “chabe ichmoná ca” chašmotsábuatmama, er atše tša sěnjánama Jesucristbeñe ošbuáchiyēnga chamotsesufrínama. <sup>10</sup> Pero Bêngbe Bětsá atše tsábiana yojanjuabná, y chíyeca atše mora tsmēna ntšamo sěndmēncá, y chabe tsábe juábna atšbiana jtsamana, ndoñe nye bonamente quenátsmēna. Er atše más sěnjatrabajá, chě ín'yē Jesucristbe ichmónēngbiama; pero ndegombre atše ndoñe nye canya chca chiyatsma, sinó masna Bêngbe Bětsá chě trabajo tojama, tsábe juabna atšbiana jtsebmñese. <sup>11</sup> Ndayá más yojtsámama ndoñe quenátsmēna, atše o chēnga, Jesucristbe soyéngama abuayinayañe más tojatrabajá, sinó ndayá chě soyénga bēngbe buayenana soye yojtsemna, y tsêngaftanga chíñe šmojtsošbuaché.

### *Chě obanēnga cachñe vida mochtsatsbomnana*

<sup>12</sup> Pero bēngbe buayenana soye endmēna, Bêngbe Bětsá tojanma Cristo cháuatayenama; as čndáyeca básefta tsêngaftanga šmnětsichamo Bêngbe Bětsá ndoñe yochanjama chě mora obanēnga chámuatayenama ca? <sup>13</sup> Pero chca tojtsemna, chě obanēnga ndoñe mochántayenasna, Cristo cach ndoñe tontanayena; <sup>14</sup> y Cristo ndoñe matenjésayenēse, bēnga nye bonamente chabiana ftsabuayiná, y tsêngaftanga nye bonamente chábeñe šmojtsošbuaché. <sup>15</sup> Y canye más bēts soye: chca tojtsemñesna, bēnga muanjābocna mo chě Bêngbe Bětsábiana soyénga tmojinye ca ichamēngcá, pero ndoñe ndegombre chca tontsemna; er bēnga fsěndbētsichamo, Cristo cháuatayenama Bêngbe Bětsá tojanma ca. Pero chě obanēnga ndoñe mochántayenasna, Bêngbe Bětsá ndoñe tonjanma Cristo cháuatayenama. <sup>16</sup> Pero chě obanēnga ndoñe mochántayenasna, Cristo cach ndoñe tontanayena. <sup>17</sup> Y Cristo cháuatayenama Bêngbe Bětsá ndoñe matēnjanmēse, tsêngaftanga nye tondayama chábeñe šmojtsošbuaché; tsêngaftanga chě bacna soyéngama cabá ndoñe perdonánēnga šmontsemna. <sup>18</sup> Y chca, chě tmojanóbanēnga, Crístbeñe ošbuáchiyēnga, chēnga cach ndoñe chēngbe bacna soyénguentsāna atsebácanénga quemochátsmēna, sinó nyetsca tescama castigánēnga.

<sup>19</sup> Bënga tmojtsobátmana Cristo bëngbiana tšabe soyënga chaotsamama, pero chca nÿe quem luarentše bënga vida tmojtsebomnëntscuana, as bënga nÿetscangbiana más muantsomere-cena, nÿetscanga bëngbiana chaotsangmënama.

<sup>20</sup> Pero chca ndoñe ndegombre quenátsmëna, er ndegombre Bëngbe Bëtsá tojanma Cristo cháuatayenama. Mo chë uanatsena shajuancá, jtsinÿanÿayana más shajuaneña chentšana yochjóbcnama, cachcá, Cristo tojtanayena ora, cha tojaninÿanÿe Bëngbe Bëtsá yochjana inÿenga chábeñe ošbuáchiyënga chámuatayenama vida chamotsatsbomnana.

<sup>21</sup> Chca, ndayá canÿe entšá, Adán, tojanmama, nÿetscanga jóbanama yojtsamna, cachcá, ntšamo inÿe entšá, Cristo, tojanmama, Bëngbe Bëtsá yochjama entšanga chámuatayenama.

<sup>22</sup> Er ntšamo, Adánbentšana entšanga bëtsemnayeca jóbanama; pero Cristo último echanjama chabe obenana pronto chaotsopochocama. <sup>23</sup> Pero Bëngbe Bëtsá jamana chë nÿetsca tescama yomna tšabe vida chënga chamotsebomnana.

<sup>24</sup> Y chentšana, Bëngbe Bëtsá chë Taitábioye, Cristo chabe amëndayana chabojantsabuaché ora, nÿetsca mandadënga, mando y obenana bomnënga corente jtsayénjanayëse.

<sup>25</sup> Er Cristo bontsemna inÿenga mo reycá jtsamëndayana, chabe uayayënga chabe cucuatšine chamoquedama Bëngbe Bëtsá tojamëntscuana. <sup>26</sup> Canÿe uayayá inétsama entšanga jóbanama; pero Cristo último echanjama chabe obenana pronto chaotsopochocama.

<sup>27</sup> Er ntšamo Bëngbe Bëtsabe uabemana palabrénguifne endayancá: “Bëngbe Bëtsá tojama Cristo nÿetsca soyënguifne chaotsemándama ca.” Pero “tojama Cristo nÿetsca soyënguifne chaotsemándama ca” tojayana ora, jtstopodënama puerte tšabá jinÿama, chca ndoñe yontsayana, Bëngbe Bëtsá Cristbeyeca mandaná yojtsemna ca; Bëngbe Bëtsá nda tojanma Cristo nÿetsca soyënguifne chaotsemándama.

<sup>28</sup> Y Cristo nÿetsca soyënguifne chaotsemándama ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nÿetsca soyënguifne chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentše yobínÿifne.

<sup>29</sup> Inÿetšánaca, báseftanga cachiñe uabáinënga imojtsemna, chë ošbuáchiyënga ndu-abáinënga obanëngbe cuenta. Chca chënga jamana mo chë obanënga uabáinënga chamotsemnana cuaffamcá. Chë obanënga chámuatayenama ndoñe tontsemnëse, ñdayëca entšanga chëngbe cuenta muanténabaye? <sup>30</sup> Obanënga chámuatayenama Bëngbe Bëtsá ndoñe tonjamëse, ñdayëca bënga muántseprontana nÿets tempo resjuifne jtsajnana, Cristbiana oservena causa?

<sup>31</sup> Atšbiana cada te resjo endmëna jóbanama. Jesucristbeyeca atšbe catsátanga, atše séntsicahoma, chca ndegombre yómnayeca, atše oyejuayá stsemna ca, mo Cristo Jesús Bëngbe Utabnabe canÿe oservencá, tšëngaftanga chábeñe šmojtšošbuáchama.

<sup>32</sup> Mo canÿa tšátjaye bayëngaca tojtsentsjaná orcá, atšbiana puerte resjo enjamna jóbanama, Efeso puebloca; pero nÿe chë entšanga mondbëtsejuabnaye jéftsashjáchama soyënga jtsebošëse chca matsjamnëse, ñdaye tšabe soye matëñjanóbcna, chca atšbiana resjo jóbanama enjamna ora? Obanënga ndoñe mochántayenëšna, mochtsama ntšamo entšanga jayanana monduamancá: “¡Mochjase y mochjofšise, nderado yëfse muatjóbaná ca!”

<sup>33</sup> Ndoñe matenoíngñana. Ntšamo canÿa tojanayancá: “Nderado nda bacna amiguëngaftaca tojtsenutaná, cha jtsajbanana chë tšabe soyënga, ntšamo jtsamëse yojoyena.”

<sup>34</sup> Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentše Bëngbe Bëtsabe soyënga ndoñe quešmatábuatma. Atše chca séntsicahoma tšëngaftanga chašmotséuatjama.

#### *Ntšamo chë obanënga mochtayena*

<sup>35</sup> Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochteseomna ca?” <sup>36</sup> ¡Juabna ndbomna entšá! Ndayá tcojajé ora, jtseytana chë ñeyeca chaóbanama, chë matatema vida chaotsebomnana. <sup>37</sup> Ndayá tcojajecá ndoñe ntsemnana chë juábocnama matatema, ndayá nÿe chë meshe, trigo meshe o ndaye mata méšnaca jtsemnana.

<sup>38</sup> Pero Bëngbe Bëtsá jamana chë jénayentšana mata chauábocnama, ntšamo jamana cha tojajuabocá; y cha jamana cada jénayentšana canÿe mata chauábocnama, ntšamo chë jénayentšana chauábocnama tojtsemncá. <sup>39</sup> Nÿetsca cuerpënga ndoñe cachcá ntsemnana. Entšanga canÿe cuerpo mondbomna, bayënga inÿe cuerpo, shloftšënga inÿe cuerpo, y beongna inÿe cuerpo.

<sup>40</sup> Chë celoca vida bomnënga inÿetšá jtsinÿnana, y chë quem luarentše vida bomnënga inÿetšá. Pero chë buashinÿinÿanana y botamanana ntšamo celoca vida bomnënga jtsinÿnancá, ndoñe cachcá ntsemnana chë quem luarentše vida bomnëngbe botamanancá. <sup>41</sup> Cachcá, shinÿe ndoñe quenátsbomna cachca buashinÿinÿana juashconcá, ni estrellëngcá; y estrellënguentše cach ndoñe cachcá ntsebuashinÿinÿanana.

<sup>42</sup> Cachcá, chë obanënga chámuatayenama Bëngbe Bëtsá chaojama ora chamojtsebomna cuerpo, ndoñe queochátsmëna cachcá ntšamo quem luarentše imojaniyena

ora imojéftsebmoma cuerpcá. Ntšamo chë jénaye tcojuatbontsá ora chiye jóbana, cachcá, quem luarentse bënga mondbomna cuerpo jóbana, inyenga juatbontsana y jt-sopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántsatsbmoma y ndocna te queochatopochóca. <sup>43</sup> Chë óbana cuerpo tmojuatbontsá ora, chë cuerpo tondaye ntšamanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinýinýana y echantsámama. Bënga quem luarentse imoyenëntscuana imobomna cuerpo, nýe batšá obenana jtsebmomna; pero chë Bëngbe Bëtsá šochjatsataye tsëm cuerpo, puerte obenana bomna cuerpo echántsemna. <sup>44</sup> Quem luarentse imobomna cuerpo endmëna cam luarentse vida chaotsebmomna; pero bënga chámuatayenama chaojama ora, chë bënga mochtsebmoma tsëm cuerpo, puerte chë Espiritbeyeca echántsemandana. Canýe cuerpo quem luarentse vida chaotsebmomna yómnyeca, canýe cuérpënaca, jtsemnana celoca vida chaotsebmomna.

<sup>45</sup> Chca Bëngbe Bëtsabe uabemana palabrenguife endayana: “Bëngbe Bëtsá, chë natsana entsá tbojanma chaotsámama ca.” Adábentšana nýetsca entsanga jabocanana, pero Crístbeyeca, Bëngbe Bëtsá tojama banga mo tsmëma entsángcá chamotsemnana; chca, Cristo jtsemnana mo chë ústonoye Adancá; pero Crístna canýe espíritu endmëna, y chë espíritu jamana entsanga chë nýetsca tescama yomna tšabe vida chamotsebmomna. <sup>46</sup> Pero chë celoca nýetsca tescama vida jtsebmomna cuerpa ndoñe natsana ntjóbcnana, ndayá chë quem luarentse vida jtsebmomna cuerpo; chentšana chë celoca vida jtsebmomna cuerpo. <sup>47</sup> Bëngbe Bëtsá, chë natsana entsá tbojanma fshántseca, y chca, cha fshantsentšana tojánbocna; Crístna, mo entsángbentšana chë natsaná tsmácá bemanacá, celocana tojánbocna. <sup>48</sup> Adábentšana, chë natsana entsá, chë fshántseca tmojanmábentšana tmojábcnënga, ntšamo cha yojamncá jtsemnana. Cachcá, chë mo tsmëmangcá tojábiámënga, Crístcá jtsemnana; Cristo nda celocana tojánabo.

<sup>49</sup> Ntšamo bënga jtšinýnana chë Bëngbe Bëtsá fshántseca tbojánbema entsacá, cachcá bëngnaca mochtsinýna ntšamo chë celoca yomnacá.

<sup>50</sup> Jesucristbeyeca atšbe catsátanga, atše cbochjáuyana, nýe quem luarentse vida jtsebmomna cuerpëngaca, bënga ndoñe ntšobenana Bëngbe Bëtsabe amëndayoye jamashënguana; ni ndayá yochjopochóca soye, ntšobenana ndayá ndoñe yochanjopochóca soye jtsebmomna. <sup>51</sup> Smochjouena, atše canýe soye cbochanjáuyana, y chë soye Bëngbe Bëtsá entsanga tempo ndoñe tonjaninýanýe: Bënga ošbuáchiyënga nýetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá. <sup>52</sup> Nýe betscó, mo tcojofshetá y cachora tcojafšnacá, quem luare ya jopochócama ora, canýe ángel trompetéšjua chaojuátëta ora, er chora trompetéšjua echanjuénana, Bëngbe Bëtsá echanjama obanënga chámuatayenama, nýetsca tescama vida jtsebmomna; y bënga, chë ainënga mochtsebmomnënga, cha šochanjátrocaye mo tsmëmangcá jtsemnana; <sup>53</sup> er jtseytana Bëngbe Bëtsá chaotrocá chë bëngbeñe jopochócama yomna soye, ndocna te yochanjopochóca soyiñe; y ndayá bëngbeñe yochjóbana soye, ndocna te yochanjóbana soyiñe. <sup>54</sup> Bëngbe Bëtsá chca bëngaftaca chaojama ora, chë cha jatrócama ndayá bëngbeñe yochjopochocacá, ndocna te yochanjopochóca soyiñe, y ndayá bëngbeñe yochjobancá, ndocna te yochanjóbana soyiñe, chora echanjochnëngo ntšamo Bëngbe Bëtsabe uabemana palabrenguife chama endayancá: Bëngbe Bëtsá tojayëñaná chë entsanga chamóbanama endbëtsama obenana; entsanga ndoñe más quemochatóbana ca.

<sup>55</sup> ¡Mora entsanga chamuatóbanama chaotsama obenana ya ndoñe quenátsmëna;

Bëngbe Bëtsá chë obenana nýetsca tescama tojayëñaná ca!

<sup>56</sup> Entšanga bacna soyënga tmojana causa, obenana endmëna entsanga jóbana chaot-samnana. Ndayá leyiñe iuayanama, entsá jtsetatšëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabnëngaca mandaná jtsemnana, y cabana, jóbana jtsemnana. <sup>57</sup> ¡Pero Bëngbe Bëtsá mochtsatschuanaye, bënga mo ayëñanayëngcá cha šojábiamama, er ya ndoñe šontsamna chca jtsemnana, chë Bëngbe Utabná Jesucristo bëngbiamama tojanma sóyeca!

<sup>58</sup> Chiyeca, Jesucristbeyeca atšbe catsátanga, atšbe bonshánënga, Jesucristbeñe sempre puerte smochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre smochtsentšena bëtscá jtsamana Bëngbe Utabnabiamama trabájayiñe, er tšëngaftanga šmondétatšëmbo, Bëngbe Utabnabiamama trabájayiñe ndayá šmojamcá, ndocna te nýe bonamente ntsemnana.

## 16

### *Jerusalenoca ošbuáchiyëngbiamama crocenánama*

<sup>1</sup> Mora chanjóyebuambaye chë Jerusalenoca Bëngbe Bëtsabe entsanga nd-bomnéjëmëngbiamama tšëngaftanga smochjuíuchmua crocenánama. Atše séntseboše tšëngaftanga

chca chašmoma ntšamo chë Galacia luaroca ošbuachiyëngcá enefjuanenache chama atše sënjanabuayenacá. <sup>2</sup> Cada tmingo, cmontsamna batšá crocénana jaluárana ntšamo chë semaniñe šmojonýencá, y šmochtsejuabaye; chca atše choye chajjá ora, ndoñe chacmondëtsamna quem uajabótama chora crocénana játatbanayana. <sup>3</sup> Y atše choye chajjáshjango ora, Jerusalenoje chjichamuá chë tšëngaftanga mo tšabengcá šmojubuáyana entšanga, chë Jerusalenoca ošbuachiyëngbioje tšëngaftangbe chrocénana chámuayentšbuachema, y tsbuanachangá chanjúyentšbuachiye ndayá imojtsamama chënga jábuayenama. <sup>4</sup> Y nderado, átšnaca chëngaftaca jama tšabá tojtsemñe, chënga átšeftaca chamua.

*Ntšamo Pablo yojanjuabná chë luarëngoye jama*

<sup>5</sup> Atše sëntsejuabná tšëngaftangbioje jama jautšëtsayama, Macedonia luarëjana chajachnëngüentšana, chentšá ošbuáchiyënga jaftsanýëse, er atše sëntsejuabná natsana Macedonia luaroye jëftšana. <sup>6</sup> Nderado baseftaytë tšëngaftangbeñe chašutésetjana, o nderádose nyets uafena tempo; as tšëngaftanga inyë luaroye játama chašmuájabuachama, ndëmoje jama chašojtsemnoje. <sup>7</sup> Atše ndoñe quetsátsboše nye betso tšëngaftanga jaftsanýana, er atše sëntsobátmana más baytë tšëngaftangbeñe jaftsemnana, Bëngbe Utabná chca šojalesenciase. <sup>8</sup> Pero Efesoca šochanjajétana Pentecostés fiesta chaojobuáchéntscuana. <sup>9</sup> Er Bëngbe Bëtsá tojama atše jobenayama muentše chë tšabe noticiëngama banga jábuayenama, y chíyeca banga Cristbeñe montsošbuaché; pero bángnaca atšbe contra montsemna.

<sup>10</sup> Timoteo tšëngaftangbioje chaojase, yejuana šmochtsantješna cha tondayama chaondëtsauatjama, tšëngaftangbeñe tojtsemnëntscuana, er cha Bëngbe Utabnabiamana endëtrabája, ntšamo atše sëndamcá. <sup>11</sup> Chcasna, ndocná chábioje chabondëtsáboyëñja. Bëtscá šmochjama cha natjëmbana átšbioje chauatábama, er atše cha sëntsobátmana, chë ínýenga muentše Cristbeñe ošbuáchiyëngaftaca.

<sup>12</sup> Y Jesucristbeyeca bëngbe catsata Apólosna, atše bëtscá cha sënjaipadá, chë Jesucristbeyeca catsátanga tšëngaftanga jányama mochjángaftaca chaotsama, pero cha ndoñe chenátšbošena choye mora jama. Cha choye caochjá, chaojobená ora ca.

*Pablo chënga jtadióšofanama*

<sup>13</sup> Sempre šmochtsenocuedana chë Bëngbe Utabná ndoñe chašmondëtseservenama tojtšama soyëngama. Nyets tempo, Cristbeñe y chabe soyënguñinaca šmochtsosbuáchiye. Ainaniñe puerte añemo šmochtsobomna, y bëtscá šmochtsama Bëngbe Bëtsabe obenánaca. <sup>14</sup> Y nyetsca soyënga ntšamo chašmojtšamcá, bonshanánaca šmochtsama.

<sup>15</sup> Jesucristbeyeca atšbe catsátanga, tšëngaftanga šmondëtatšëmbo, Estéfanas y chabe pamillanga chë natsanënga monjamnama Jesucristbeñe jtsošbuáchiyama, Acaya luaroca, y bëtscá imojtsentšena Bëngbe Utabnabiamana jtsetrabájayana, chabe entšanga jtšëjabuáchanëse. <sup>16</sup> Atše chaimpadá, tšëngaftanga lempe šmochtsama ntšamo cmojtsamëndacá, chca entšanga mo tšëngaftangbe uanatsanëngcá, y ntšamo nyetsca chë ínýenga mo bëngcá quemuiñe uajabuáchanëse trabájayënga cmojtsamëndacá.

<sup>17</sup> Atše tša oyejuayá sëntsemna tšëngaftangbe pueblentšana Estéfanas, Fortunato y Acaico moye tmojáshjainama, er atše sëntsobena oyejuayá chëngaftaca jtsemnana, tšëngaftangaftaca choca jtsemnana cabá ndoñe sëntsobenëntscuana. <sup>18</sup> Er chënga átšbioje tmonjabo y tšëngaftangbiamana šmonjauyana, y chca chënga tmonjama, atše y tšëngaftanga natjëmbana ainánaca chamotsomñama. Chënga šmochtsétabna mo puerte uamana entšangcá.

<sup>19</sup> Asia luaroca ošbuachiyëngcá enefjuanënga cmontsachuaná. Aquila y Prisca y chatbe yebnentše mondbëtšenefjuana ošbuáchiyënga cmontsachuaná, Bëngbe Utabnábeñe ošbuachiyëngcá, tšëngaftangcá bëtsemnayeca. <sup>20</sup> Muentšá ošbuáchiyënga nyetscanga cmontsachuaná. Nyetscanga šmochjenchuaye mo Jesucristbeyeca catsatangcá, jtenámochëse, ntšamo cach tšëngaftangbe pamillanga puerte bonshanánaca šmondëtsachuanaycá.

<sup>21</sup> Quem palabrënga tšëngaftanga jacheuayama cach atšbe cucuátšeca sëntsabianná.

<sup>22</sup> Nderado nda Bëngbe Utabnábioje ndoñe tbontsebobonshana, Bëngbe Bëtsá nyetsca tescama chabocastigá. ¡Bëngbe Utabná cachiñe cochjésabol!

<sup>23</sup> Atše, Bëngbe Bëtsá sëntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnana. <sup>24</sup> Atše, nyetsca tšëngaftanga cbondábabanýeshana, canýa mo tšëngaftangcá, Cristo Jesúseftaca canýiñe mo canýacá jtsemñe.

## 2 Corintios

### *Jacheuayama*

<sup>1</sup> Atše Pablo, Jesucristbe canye ichmoná, Bèngbe Bètsá atše chca jtsemnana yojánbošeyeca, Jesucristbeyeca bèngbe catsata Timotéoftaca quem tsuanácha séntsabianná, Corinto puebloca Bèngbe Bètsábeñe ošbuachiyèngcá enefjuanèngbiama, y nyets Acaya luarentše Bèngbe Bètsabe nyetsca entsangbiámnaca. <sup>2</sup> Atše séntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tsèngaftangbeñe tsabe bendicionènga chaotsemnana y ainaniñe tsabe ebionana chašmotsebonnama.

### *Ntsamo Pablo tojansufrí*

<sup>3</sup> Bènga mochtsatschuanaye Bèngbe Bètsá, chë Bèngbe Utabná Jesucristbe Taitá, bèngbe Taitá, chë bèngbiama lastemado yomná, y ndaye padecena soyènguiñe tmojtsemna ora, bènga sòndbetsañemuayá. <sup>4</sup> Cha bènga jtsañemuayana padecena soyènguiñe tmojtsemna ora, chca, bènga chamotsobenama chë tmojtseufrinènga jañèmuayama, ntšamo Bèngbe Bètsá sojjuabuachcá chènga jujabuáchese. <sup>5</sup> Er ntšamo Cristo tojansufricá, bènga tša fsèndèsufrina chabiana oservèniñe; cachcá, Cristbeyècnaca Bèngbe Bètsá jamana bènga puerte añemo ainaniñe fchaitsebonnama. <sup>6</sup> Er bènga tmojtseufrinèse, jtsemnana bènga jobenayama tsèngaftanga jañèmuayama chë šmojtseufrina ora, y atsebácanènga chašmotsebonnama, Bèngbe Bètsabe soyèngama jounèse. Chë padecena soyènguiñe tmojtsemna ora Bèngbe Bètsá sojjañemose, jtsemnana bènga fchayobenama tsèngaftanga jañèmuayama, padecena soyènguiñe šmojtsemna ora. Chca, bènga jobenayama tsèngaftanga jujabuáchana, Bèngbe Bètsábeñe chašmotsebonnama, chábeñe jtsòšbuáchiyèse, y lempe jtsóboyayama, ntšamo bènga fsènjusufricá šmojtseufrina ora. <sup>7</sup> Bènga sempre fsèndóbátmana y tsábá fsèndétatšèmo chë padecena soyènguentšana tsábá šmochjábocanama, er bènga fsèndétatšèmo, chë ntšamo bènga fsènjusufricá tsèngaftanga šmojasufrina; y cachcá, Bèngbe Bètsá yochjama tsèngaftanga ainaniñe puerte añemo chašmotsebonnama, ntšamo bènga fchaitsebonnama cha tojamcá.

<sup>8</sup> Jesucristbeyeca atšbe catsátanga, bènga fsèntseboše tsèngaftanga chašmotsetátšèmo ntšamo bènga Asia luaroca tša fsènjusufrinama. Bènga puerte padecena soyènguiñe fsènjaniyena, nya ndoñe más jauantacá, chentšana vídaca jabocanama ntjatobamancá. <sup>9</sup> Bènga sòntsanènana mo jóbanama cuaftsamncá. Pero chë soye tonjanoservé, bènga jtsòšbuáchiyama Bèngbe Bètsábeñe, nda inétsama obanènga chámuatayenama, y ndoñe cabèngbeñe ntsošbuáchiyana. <sup>10</sup> Cha sojatsebacá bènga jóbanama puerte resjo enjamntšana, y cachcá sochjátsebacaye bèngbiama cachiñe cachcá tša resjuñe chamojtsemna ora. Bènga puerte chábeñe fsèndóbátmana, puerte padecena soyènguiñe bènga chamojtsemna ora, cha cachiñe sochjátsebacama. <sup>11</sup> Tsèngaftangnaca cmontsamna bènga jujabuáchana, bèngbiama Bèngbe Bètsá jaimpádase; chca, ba entsanga Bèngbe Bètsá mochanjètschuaeye, er cha tojama bènga chábentšana tsabe bendicionènga fchayoyèngacñama, cha jamèse ntšamo chènga bèngbiama tmojanimpadacá.

### *Ndáyeca Pablo Corinto puebløe ndoñe tonjána*

<sup>12</sup> Canye soye endmèna ndayá oyejuayènga sojtsabianná: bènga bèngbe ainantšá juabnèngaca jtsetatšèmbuana puerte tsábá jtsamèse fstsiyena ca, ntšamo chë Bèngbe Bètsabe entsanga endbetsamncá, nyetsca quem luarentša entsángbeñe, y más tsèngaftangbeñe, y bènga jtsetatšèmbuana ntšamo tsábá tifjamcá nyets ainánaca tifjamama. Bènga tondaye chibiatsma quem luarentša entsangbe osertanánaca, ndayá Bèngbe Bètsá tša tsabia bèngaftaca bétsemnayeca, sojjuabuache chca chamotsiyenama. <sup>13</sup> Er ntšamo fsèntsabiannamna ndoñe queftsátboše, ntšamo tsèngaftanga šmojtšalía y cmojtsešertánentšana inyetšá játayanana, y séntsobátmana puerte tsábá lempe chacmósertama. <sup>14</sup> Mora ndayá atše stsamama ndoñe lempe quecmátèsertana. Pero atše séntseboše tsèngaftanga chama corente chacmósertama; chca, Bèngbe Utabná quem luaroye chaojésabo ora, tsèngaftanga bèngbiama oyejuayènga chašmotsebonnama, ntšamo bèngnaca tsèngaftangbiama oyejuayènga fchantsemná.

<sup>15</sup> Chca ndegombre yomnana atše sèndétatšèmboyeca, atše sènjajuabná tsèngaftangbioye jshétsana jányama, y chca, chë tsabe soye tsèngaftangbiama uta soye jamana, tsèngaftangbioye uta soye jányèse. <sup>16</sup> Atše sènjajuabná tsèngaftanga jshaftsanýana, Macedonioye ayiñe chëjana matijánachnèngo ora; y chentšana, ya camoye ataboye ora, tsèngaftanga cachiñe jáftsanýana. Chca, tsèngaftanga mašmènjanoobená atše jujabuáchana Judea luaroye játama. <sup>17</sup> Atše chca jamama tsjanjuabná ora, ¿chca tjanma ndoñe corente tsábá ntjenoyuaboycá? ¿Tsèngaftanga smatjájuaboye, ntšamo nye quem luarama enójuabnaye entsanga monduamancá, cachora canye soyama “áiñe” y “ndoñe ca” jayanèse, atše ndayánaca jamama snétsajuabnaye ca?

<sup>18</sup> Canje soye ndegombre endmëna: Bëngbe Bëtsá sempre endbama ntšamo tojayanca, y chca puerte ndegombre endmënyeca, atše ndayánaca chjama ca stjayana ora, chca ndoñe questsbatayana chentsana atše juabna jatstrócama, mo canya cachora canje soyama “aíñe” y “ndoñe ca” cuafjatichamcá. <sup>19</sup> Er Cristo Jesús, Bëngbe Bëtsabe Uaquiná, ndabiamama Silvano, Timoteo y atše tšëngaftangbeñe fsëñjanabuayiná, ndoñe ntsejuabnayana canje soye jamana y chentsana jatsjuabnayana inyetsá jatsmama, mo canje entsá cachora canje soyama “aíñe” y “ndoñe ca” cuafjatichamcá, ndayá chana nyets tempo ntšamo tojtsejuabnacá jayanana y jamana ntšamo ndegombre yomncá, chentsana ntjatstrocyacá. <sup>20</sup> Er ndayá cha tojamiñe, lempe ntšamo Bëngbe Bëtsá tojašebuachenacá jocúmpiana, mo chë lempe ntšamo Bëngbe Bëtsá tojašebuachenama cha “aíñe ca” cuafitsichamcá. Chiyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”. <sup>21</sup> Pero Bëngbe Bëtsá endmëna nda inétsama bënga y tšëngaftanga puerte Cristbeñe chamotsošbuáchema, cháftaca canyiñe mo canyacá jtsemnëse; y Bëngbe Bëtsánaca endmëna nda bënga šojabacacá chabe entsanga chamotsemnana. <sup>22</sup> Cha tojama chë Uámana Espíritu bëngbe ainaniñe cháumashënguama jtsemándayama, y chë soye jtsinjanynayana bënga Bëngbe Bëtsabe entsanga imomnana. Y bëngbe ainaniñe chë Espíritu imobómnyeca, bënga corente jtsetatšëmbuana bënga mochjójyëngacñama lempe ntšamo Bëngbe Bëtsá bënga jatšatayama šojašebuachenacá.

<sup>23</sup> Bëngbe Bëtsá entsonyá atše ndegombre stsichámuama. Atše Corinto puebloye cabá ndoñe chiyjá, er atše ndoñe quetsátsbošë tšëngaftanga jašëchnana, chë bacna soyënga šmojamama, tchojaucacánëse. <sup>24</sup> Bënga ndoñe quetsátsbošë tšëngaftanga jamëndana ndayiñe tmojtsamna jtsošbuáchiyana; er tša šmojtsobuachëyeca, ndoñe quemochatajbaná Cristbeñe jtsošbuáchiyana. Bëngbe fsëntsebošë ndayá tšëngaftanga jujabuáchana, corente oyejuayënga chašmotsemnana.

## 2

<sup>1</sup> Chiyeca atše ndoñe chiyjá jautsëtsayama, er atše sënjanjuabó y sënjanënyana choye ndoñe jama ca, bacna soyënga šmojtsanmama jábuayenama, y chca, ngmënënga játabiamana, ntšamo chanje sënjamcá. <sup>2</sup> Tšëngaftanga ngmënaca chašmotsemnana atše stjamëse, ¿nda yochjama atše oyejuayá chaitsemnana, sinó nye tšëngaftanga, chë atše ngmënënga tijábiamënga? <sup>3</sup> Chiyeca tchbonjanëbuábiana chë ntšamo šmojualiacá, chca, atše choye stjášhango ora, tšëngaftanga átsbiroye ndoñe ngmená chašmondëbemama. Chca játamamna, tšëngaftangbiana más tšabá endmëna oyejuayá atše chašmobema. Atše tšabá sënjanátatšëmbo ndayá átsbiroye oyejuayá šojabemcá, tšëngaftángnaca chca mašmënjánbošëna y oyejuayënga chë soye matcmënjánabiana. Chiyeca atše ndoñe chiyataná, nyetscanga oyejuayënga jtsemnana ndoñe quenjatopodena ora. <sup>4</sup> Pero chë tsbuanácha tchbonjanëbuábiana ora, atše corente šonjanongmé y ainana šonjántsetšëna chca jabuache soyënga tšëngaftanga jubuábiamama, y chca jamama shëchbuýnaca sënjanoperdé. Pero atše ndoñe checbátanëbuábiana atše jatsmama tšëngaftanga puerte ngmënaca chašmotsemnana, ndayá chašmotsetatšëmbuama atše tša ctababuánjeshanama.

### *Perdón chë bacna soye amabiamama*

<sup>5</sup> Y mora, chë tšëngaftangbeñe puerte ngmënana chaotsemnana tojama boyabásabiamna, cha átsbiroye ndoñe ngmená chešnátsbema, ntsachetšá tšëngaftanga tcmojabiamcá, inyëngbiroye inyëngbiana más. Chca séntsichamo, er atše ndoñe quetsátsbošë jayanama ntsachetšá tojamama cha más bacna soyë tojama ca. <sup>6</sup> Banga tšëngaftanguentsënga ntšamo šmojamcá, chë entsábiana ya bëts castigo entsemna. Nye nyetsá ponto. <sup>7</sup> Chamna, ndayá mora cmojtsamna jamamna entsemna, cha jtseperdónana y jañëmuana, chca, ndocna tšabe soye jamana ndobená ndoñe chaondëitsemnana, chë castiguama puerte ngmënaca bëtsemna causa. <sup>8</sup> Chiyeca, tšëngaftanga chaimpadá cachife tšabá chašminyinyé chábiroye corente šmobobonshánama. <sup>9</sup> Tempo ya chama tchbonjanëbuábiana, atše jinýama tšëngaftanga aíñe o ndoñe šmontsanprontánama, lempe ntšamo tchbonjanamëndacá jamama. <sup>10</sup> Chcasna, ndánaca ndayánaca tšëngaftanga chašmojaperdóna ora, átsnaca cha chantseperdóna. Y atše cha chantseperdóna, ndayá japerdónama ndegombre tojtsemnëse. Y chca chanjama tšëngaftangbe tšabiana y Cristbe delante. <sup>11</sup> Atše tšëngaftangcá, quem entsábbiroye šcoperdoná chë bëngbiana tojama bacna soyë; chca, Satanás ndoñe chaondobenama bënga jáingñama, er bënga mondëtatšëmbo cha inétsbošë ndaye bacna soyë entsá chaotsamama.

### *Ndayeca Pablo ndoñe natjëmbana Troas puebloca tontsanoquedañe*

<sup>12</sup> Atše Troas puebloca sënjanashjango ora, Cristbe tšabe noticiënga jábuayenama, atše sënjaninýe Bëngbe Utaná tojanma chentse banga chë buayenana soyë chamouenama y

chëngbe ainaniñe chana chamóyëngacñama. <sup>13</sup> Masque chca enjamna, atše ndoñe quetstétsobena natjëmbana ainaa jtsebmnnana, er atše sënjanjuabná Jesucristbeyeca bëngbe catšata Tito chentše jinjenana, pero ndoñe chca. Chíyeca, Troas pueblentša entsànga séntanadiošoftaná, y Macedonia luaroye sënjánana.

*Cristoftaca cánýiñe mo canýacá jtsemnëse, bënga mo ayëñjanayëngcá jtsemnana*

<sup>14</sup> Atše Bëngbe Bëtsábioye sëndbëtsatschuanaye, bënga bacna soyënga jamama juabnënga cha tojanëñjanama, tempo sojanamënda juabnënga; y chë mora bënga Cristoftaca cánýiñe mo canýacá jtsemnëse, nyëts tempo cha snetsënachayama, mo canýe ayëñjanayacá, y chë nyëts luarenache entsànga Cristbiamá soyënga chamotsábuatmama bëngaftaca cha vojtsamama, mo nda canýe botamana uangüëtse soye nyëts luarënguenache chauáshanama cuaftsamcá. <sup>15</sup> Er chë incienso tojtsejuinýñana ora, entsábioye tsábá juanguëtšëñana; cachcá Cristbe tsábe noticiënga fstsabuayinýna ora, Bëngbe Bëtsabiamá bënga jtsemnana chë ndëmuanyënga tmojtsama cha oyejuayá chaotsemnama. Incienso tcojtsejuinýná ora, nyëtscángbioye juanguëtšëñana. Cachcá, Bëngbe Bëtsabe palabra fstsoyebuambná ora nyëtscanga jouenana, Cristo vojtsatsebacanga y chë pochocánënga jtsemnama imojtsajnëngnaca. <sup>16</sup> Chë pochocánënga jtsemnama imojtsajnëngna, pochocánënga mochanjábocana, er ntšamo bënga fsëndabuayinacá y tmojouencá chënga tmojtsaboté; y chca, chëngbiamá chë tsábe noticiënga jtsemnana mo canýe obanabe uangüëtšancá. Pero chë Cristo yochjátsebacangna, tsábe noticiënga tmojóyëngacñeyeca, mochanjobenaye tsábe vida nyëts tempo jtsebmnnama; y chca, chëngbiamá chë tsábe noticiënga jtsemnana mo canýe puerte botamana uangüëtšancá. Y asna, ¿nda obenana vojtsëbmna chë tsábe noticiënga jábuayenama trabajo jtsamama? <sup>17</sup> Bënga chë tsábe noticiënga ndoñe queftsatabuayinýna, ntšamo ba entsànga imojtsamcá mo nyë batšá uámana soyënga cuaftsemncá, y ndayánaca juácanama, mo nda ndaye nduámana soyënga cuaftsencá. Banga chca mondama; bënga ndoñe. Bënga, Cristoftaca cánýiñe mo canýacá jtsemnëse, fsëndabuayinýna mo Bëngbe Bëtsabe delante cuaftsemnëngcá, ndegombre nyë ntšamo tsábá yomncá nyëts ainánaca jtsebošëse, y mo Bëngbe Bëtsabe ichmonëngcá.

### 3

*Chë Bëngbe Bëtsabe tsëm tratama buayenana soye*

<sup>1</sup> Chca bëngbiamá fstsjayana ora, tsëngaftanga cmojtsinýana ¿bënga cachiñe tiftëtontsé cabënga bëtsétsanga enobiamnayana? ¿o bënga sojtsamna, mo inýëngcá, tsëngaftanga juyentšbuáchiyana o juátjañana tsbuanachangá, bënga tsábá fstsamama chëchangaca jinýanýiyama? <sup>2</sup> Bënga bëngbe ainaniñe puerte tsábá fsëndëtatšëmbo, nyëtsca entsànga, ntšamo tsëngaftanga jtsamëse šmoyencá tmojinýe ora, tsëngaftanga jtsinýanýñayana bënga ndegombre ntšamo tsábá yomncá fstsamama. Chca, tsëngaftanga jtsemnana mo canýe tsbuanachacá, nyëtscanga jtsabuutmana y jtsobenana jualiana, bënga tsábá fstsamama. <sup>3</sup> Nyëtscanga tsábá mondëtatšëmbo Cristo tojanma tsëngaftanga chábeñe chašmotsošbuáchemá, y bëngaftaca cha chca tojanmámna. Chca, tsëngaftanga šmondmëna mo Cristbe canýe tsbuanachacá, ndayëcha quem luarentša entsángbioye tojuyentšbuaché bëngaftaca. Tsëngaftanga ndoñe chešmatanobená Cristbeñe ošbuáchiyënga jtsemnama entsàngbe trabájoca, er Cristbeñe šmonjanošbuaché chë Bëngbe Bëtsá Ainabe Espiritbeyeca; y chca, tsëngaftanga šmondmëna mo canýe tsbuanácha cháftaca uabemanëchacá, y ndoñe mo entsángbeyeca uabemana tsbuanachacá. Bëngbe Bëtsá chë mandënga ndëtsbé tablëbenguiñe tojanábema, entsànga chamotsobedecénama, pero tsëngaftangna Cristbe buayenana soye tsëngaftangbe ainaniñe smojóyëngacñe.

<sup>4</sup> Cristbeyeca Bëngbe Bëtsábeñe jtsošbuáchiyëse, bënga corente fsëndëtatšëmbo chca ndegombre bëtsemnama. <sup>5</sup> Ndoñe quenátsmëna, nyë bënga cánýënga quem trabajo jamama ftsobena y játayanana bëngbe soye chë trabajo vojtsëmna ca, er bënga jtsobenana chca jamama, nyë Bëngbe Bëtsabe ujabuáchenanaca; <sup>6</sup> er cha tojama bënga fchayobenama quem trabajo jamama, chë entsànga jábuayenana Bëngbe Bëtsá chabe entsángbioye tojanašebuachená soyëngama, ndayá Cristo tojanma sóyeca, mo canýe tsëm tratcá, Bëngbe Bëtsá y chabe entsángaftaca. Quem soye ndoñe quenátsmëna mo chë Bëngbe Bëtsá tempo Israeloca entsángbioye léyeca tojanašebuachená soyëngcá. Inýëtšá; entsànga mondama Bëngbe Bëtsabe tsëm trató, Uámana Espiritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entsá jóbana jtsemnana; pero Cristbe tsábe noticiënga, chë tsëm trato, entsànga ainaniñe tmojóyëngacñe ora, chë Uámana Espiritu jamana, chë nyëtsca tescama yomna tsábe vida chënga chamotsebmnnama.

<sup>7</sup> Quem Moisesbe ley, chë ndoñe tmonjobedecema entsànga jóbana jtsemnana, ndëtsbé tablëbenguiñe letrëngaca tmojanábema, y Bëngbe Bëtsá Moisesbioye tbojanantšabuaché ora, cha tsá buashinýñaniñe tojánabo. Chë causa entsànga ndoñe

imontsobena ni mo jinýana Moisesbe jubíá, er tša ibojtsanjuebëbuashinýinýana, Bëngbe Bëtsáftaca thojanencuentëntšana tojtanabo ora. Pero betso tojanëjbana chë jubíá chca buashinýinýanana. Chë ley, chë natsana trato, Bëngbe Bëtsá tojanayentšbuaché ora, tša buashinýinýanánaca cha tojanmëse; <sup>8</sup> ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojtšama ora, chë Uámana Espíritu Bëngbe ainaniñe cháumashënguama Bëngbe Bëtsá tojama ora. <sup>9</sup> Bëngbe Bëtsá chë ley tojanayentšbuaché ora, chë ndáyeca entšanga jóbánama yojánamma, ntšamo chiñe betsayancá ndoñe tmonjama causa, chora cha chca tojanma puerte chabe buashinýinýanana jinýanyiyëse; ndegombre más bën y uámana tempo entsemna chë mocna ora Bëngbe Bëtsá yojtšama entšanga chabe hominýiñe tsábenga chamotsemnana. <sup>10</sup> Er chë Bëngbe Bëtsá ley tojanayentšbuaché ora tojaninýanyé buashinýinýanana, mora jtsinýnana mo ya tondaye cuabndëtsemncá, chë Bëngbe Bëtsá entšangbiamá tsëm soyënga tojtšamama tojtšonýá ora, chë tša buashinýinýanana yojtsemna ora. <sup>11</sup> Er chë leyama tempo, chë ya jochnënguama entsemna ora, Bëngbe Bëtsá chabe buashinýinýanana y uámanana tojinýanyëse; ndegombre chë Bëngbe Bëtsá tsëm soyënga entšangbiamá jamama ora, chë ndocna te yochanjochnëngo tempo ora, Bëngbe Bëtsá más chabe buashinýinýanana y uámanana echántsinýanyaye.

<sup>12</sup> Y chca, Bëngbe Bëtsá chca bëtš soyënga yochjamama fsëndobatmánayeca, bënga fsëntsobena jóyebuambayama, nyëtšca soyëngama jayanëse, tondayama ntjatauátjá. <sup>13</sup> Y chca, bënga ndoñe Moisescá queftsátama, chë chabe jubíá chaobuashinýinýenama Bëngbe Bëtsá tojanma ora, canýe entšëjuaca yojtšenamochëcjua; cha chca tojanma, chë Israeloca entšanga ndoñe chamondobená jinýama chë jubíá buashinýinýanana ya yojtšëchnëjuana ora. <sup>14</sup> Pero Bëngbe Bëtsá tojanma chënga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bëngbe Bëtsá Moisésbiyoe thojanšbuachenacá chëngbiamá jamama, Israeloca entšanga tmojtšalía ora, ndoñe ntsësertánana Bëngbe Bëtsabe Bëtsabe ndegombre soyënga, mo chëngbiamá iytëmena soyënga cuaftsemncá, mo chë Moisés yojtšenamochëcjua entšëjuacá. Y chca endmëna, er nýe Cristoftaca cánýiñe mo canýacá jtsemnëse, chënga jtsobenana chë soyëngama jósertana, y iytëmená ya ndoñe ntsemnana. <sup>15</sup> Y mëntscoñama, Moisesbe librëšangá chënga tmojtšalía ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtšayancá jamama ndoñe montseboše causa. <sup>16</sup> Pero canýe entšá chë Bëngbe Utabnabe benache tojishache ora, cha jtsobenana chë soyëngama jósertana. <sup>17</sup> Y Bëngbe Utabná y Espíritu canýa bondmëna, y Bëngbe Bëtsabe Espíritu tojtsemnntëse, chë bacna soyënga jamama juabnënga, ni chë ley ndoñe ntsemándayana. <sup>18</sup> Moisés chabe jubiañe Bëngbe Bëtsabe buashinýinýanana y uámanana tojaninýanyé, y chíyeca, canýe entšëjuaca yojtšenamochëcjua, chca, chënga ndoñe chamondinýama. Pero bënga ošbuachiyënga nyëtšcanga jtsinýanýanayana Bëngbe Utabnabe buashinýinýanana y uámanana, mo canýe espejo canýe soye tojtšinýanýnacá, y ndoñe queftsátšboše ntšámnaa jamëse chë soye jatsëytamianana. Cha Bëngaftaca yojtšama cada te más chë ntšamo cha yomncá bënga chamotsemnana, cada te más bëtšëtsanga chë ntšamo cha yomncá jtsemnëse. Chca endmëna ntšamo Bëngbe Utabná yojtšama; y Bëngbe Utabná y Espíritu canýa bondmëna.

#### 4

<sup>1</sup> Y chca, Bëngbe Bëtsá bëngbiamá lastemado yómnayeca, quem trabajo šojabanýé, jtsabuayinýayama chë Crístoftaca tojašebuachená soyënga; y chíyeca bënga ndocna te ntjájbánana ainaniñe añemo bomnna. <sup>2</sup> Bënga fsëntšaboté chë inýenga iytëmená innëtsama soyënga, chë inýenga tmojinýe ora chama jtsëuatjana, y chë inýenga entšanga jáingñama innëtsama soyëngnaca, y Bëngbe Bëtsabe buayenana soye ndoñe queftsátštróca ndoñe ndegombre soyëngaca. Chamna, bënga sempre nýe chë ntšamo ndegombre yomncá fsëndbëtšoyebuambnaye, mo Bëngbe Bëtsabe delante cuaftsemnëngcá jtsamëse; y chca, bënga fsëndbëtšsama cada entšabe ainanentša juabnënga chamuayanama, bënga ndegombre soyënga fstsoyebuambná ca. <sup>3</sup> Y nderado bënga chë tsabe noticiënga ftsabuayinýa ora, báseftanga chë soyënga chaósertama ndoñe tontsopodënëse, nýe chë pochocánënga jtsemnna tmojtšajñëngbiamá chca jtsemnana. <sup>4</sup> Chëngbiamá, chë Cristbeñe ndošbuachiyëngbiamna, chë quem luarentše mora mandayá, Satanás, tojama chë buayenana soye ndoñe chaondëtšësertánama; chca, chënga ndoñe chamondinýama chë tsabe noticiënguentšana puerte bëtš y tsabe soyënga, chë Cristo puerte bëtšá y obená yomnna inýanýnaye soyënga, nda nyëtšca soyënguiñe Bëngbe Bëtsacá yomna. <sup>5</sup> Bënga ndoñe nýe cabëngbe soyama queftsatabuayinýá, ndayá Jesucristbiamá mo Bëngbe Utabnacá. Bënga bëngbiamá fsëndbáyana mo oservenëngcá ftsmëna ca, tsëngaftanga jujabuáchama; y chca fsëndbëtšsama Jesús jaserviama. <sup>6</sup> Er Bëngbe Bëtsá, nda quem luare jobojátšama ora tojanmandá binýiñe ibetentšana chaóbcnana, chánaca tojama bënga ainaniñe tsábá chabe



soyëngama chašotsësertánama, chca bënga fchayobená juabuátmanana chë Bëngbe Bëtsabe uámanana y obenanentsána inétsobocana osertánana, ndayá Cristbeñe bënga mondonjá.

*Bënga fsëndoyena Cristbeñe jtsosbuáchiyëse*

<sup>7</sup> Pero chë puerte tsábe y bëts soye, chë Cristbe buayenana soye, bënga mondbomma cuerpiñe, bëngbe ainaniñe; y chë cuerpënga jtsemnana nÿe mo matbajëngcá, ndoñe yapa obenana ntsebmomnana, chca, jinÿanÿiyama tsá bëts obenana Bëngbe Bëtsábocana yóbocanama, y ndoñe bëngbentsána. <sup>8</sup> Y chca, bënga nÿetsca padecena soyënguiñe vida fsëndbomma, pero ndoñe queftsátsmëna ndobenënga chë padecena soyënguentšana tsábá jabocanama; y ndoñe queftsátstatšëmbo ndayá jamama šojtsamna, pero ndoñe queftsátsmëna ntsoencá jtsobátmanama quem padecena soyënguentšana tsábá jabocanama. <sup>9</sup> Inÿenga montsama bënga puerte fchaisufrima, pero Bëngbe Bëtsá ndoñe nÿe cachcá sentsabashëjuana; mo nda inÿabiye cuafjutsencá tmojtsentsaná ora, ya jóbama jtseprontánana, uayayënga bënga jtsébáyama imojtsejuabnangbe cucuatsiñe fsëntsemna, pero cabá ndoñe ntjobáyana. <sup>10</sup> Inÿenga sempre jtsamana bënga bëngbe cuerpiñe puerte fchaisufrima, y jobanámnaca resjo jtsemnana, ntšamo Jesúseftaca tmojanmca, cha chaosufrima y chaóbanama. Chca bëngaftaca endopasana, chca, inÿenga chamobená jinÿama Jesús bëngbeñe vida yobomnana. <sup>11</sup> Er bënga vida fchabomnëntscuana, sempre puerte resjo bëngbiama jëftsemnana jóbana, Jesúsbiye servena causa; y chca endmëna, inÿenga chamobená jinÿama Jesús vida yobomnana bëngbe cuerpiñe, chë canÿe te yochjopochóca cuerpo. <sup>12</sup> Y chca, bënga tsá fsëndësufrina y jobanámnaca resjo endmëna; y tsëngaftanga tsábe noticiënga šmojóyëngacñayeca, Bëngbe Bëtsá tojama chë nÿetsca tescama yomna tsábe vida chašmotsebmomnana.

<sup>13</sup> Bëngbe Bëtsabe uabemana palabrénguiñe endayana: “Atše sentsanošbuaché y chíyeca sënjanoyebuambá ca.” Bënga cachca ošbuáchiyana fsëndbomma chë chca tojanayanacá, y chíyeca bëngnaca Bëngbe Bëtsábeñe fsëntsošbuaché y chabiama fsëntsoyebuambáná. <sup>14</sup> Er bënga fsëndétatšëmbo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Cristoftaca cánÿiñe mo canÿyacá jtsemnëse, bënga chámuatayenama, y tsëngaftangaftaca cánÿiñe cha yochtsemnoye sochjúshejango. <sup>15</sup> Lempe ntšamo bënga ftsama y fstsesufrincá tsëngaftangbe tsábiamma endmëna; chca, más becá entsanga chábeñe chamojtsošbuaché ora, ba tsábe bendicionënga Bëngbe Bëtsá entsangbiama jtsamëna, más becá entsángnaca chábiye chamotsatschuaná, ndayá chëngbiama cha yochjamama; y lempe chca, Bëngbe Bëtsá puerte uamaná y obená yomnana nÿetsca entsanga chamotsichámuama.

<sup>16</sup> Chíyeca bënga ndoñe ntjájbanana ainaniñe añemo bomnana. Masque quem luarentša bëngbe cuerpo cada te jtsopochócyana, Bëngbe Bëtsá jamana chë bëngbentsána nÿets tempo vida yochtsebmomma soye, cada te más obenana chaotsebmomma; y chca, bënga jtsemnana mo tsmëma entsángcá. <sup>17</sup> Ntšamo bënga mora fsëndësufrencá endmëna nÿe quem luarentše vida tmojtsebmomnëntscuana, y chca, chë soye jtsemnana mo canÿe nduámana soycá; pero ntšamo bënga fsëndësufrencá josérviana bënga jtsebmomma chë Bëngbe Bëtsá sochjatsataye puerte bëts uámanana y obenana, cháftaca nÿets tempo vida jtsebmomma, chë ndayá yomna nÿetsca soyëngama más bëts y uámana soye. <sup>18</sup> Er bënga nÿe chë tojtsopodena jinÿama soyënguiñe ndoñe nÿets tempo queftsatsjuabná, ndayá chë ndoñe yondopodena jinÿama soyënguiñe; er chë bënga imobena jinÿama soyënga ndoñe nÿetsca tescama ntsemnana; pero chë bënga ndoñe mondbomena jinÿama soyënga cocayé nÿetsca tescama jtsemnana.

## 5

<sup>1</sup> Bënga mora mondbomma canÿe cuerpo quem luarentše vida jtsebmomma. Quem cuerpo yomna mo chë jtsatsjacama yopodena yebncá, cánÿentše ndoñe nÿets tempo ntjëftsemnana. Bënga mondétatšëmbo, quem cuerpo canÿe te tojtsopochocase, Bëngbe Bëtsá yochjama bënga tsmëma cuerpënga chamotsatsbmomma, celoca nÿetsca tescama vida jtsebmomma, Bëngbe Bëtsabe pormana cuerpënga y ndoñe entsangbe pormana cuerpënga. <sup>2</sup> Chíyeca, bënga quem luarentše chca vida tmojtsebmomnëntscuana, yapa tmojtsesufrina causa, bënga tsá jtsebošana betso Bëngbe Bëtsá celoye chašúyambama, y bënga nÿets tempo celoca jtsiyenama tsëm cuerpo jtsebmomma cha chaomama; <sup>3</sup> chca, Cristo yochjésabo ora, bënga chë tsëm cuérpoca chamotsemnana, y ndoñe nÿe espíritu ndocna cuérpoca. <sup>4</sup> Bënga quem cuerpiñe, chë quem luarentše vida jtsebmomma cuerpiñe chamojtsiyenëntscuana, yapa padecena soyënguiñe sufrina causa, bënga jabuache mochanjáshachna; chca echántsemna ndoñe nÿe chë espíritu ndocna cuérpoca jtsemnana bënga imojtsebóšeyeca, ndayá masna, bënga chë tsëm cuerpo chamotsebmomma Bëngbe Bëtsá chaomama imojtsebóšeyeca. Bënga fsëntseboše chë bëngbeñe jopochócama yomna soye Bëngbe Bëtsá lempe chaotscama, chca, bënga chamotsobenama celoca nÿetsca

tescama vida jtseboimnana. <sup>5</sup> Y Bèngbe Bètsá endmèna nda tojama bènga chamotseprontánama chë tsëm cuerpo jtseboimnana, y nda tojama Espiritu bèngbe ainaniñe cháuamashènguama, chca bèngbiöye jinñanñiyama, bènga ndegombre mochjóyèngacñe ndayá Bèngbe Bètsá tojašebuachenacá.

<sup>6</sup> Y chca, bènga sempre ainaniñe bèts añemo fchandbètseboimna. Bènga fsëndétatsëmbo, quem cuerpiñe cabá vida bènga mochjëftseboimnèntscuana, bènga ndoñe mochántsemna Bèngbe Utabná yojtsemnèntse. <sup>7</sup> Er mora bènga fsëndoyena jtsamèse, ntšamo Crístbeñe bènga imošbuachecá, y ndoñe nñe ndayá jinñama tmojtsoimnana. <sup>8</sup> Bèngbe fsèntsemna ainaniñe bèts añémoca, y más fsèntseboše jájbanana quem cuerpiñe vida jtseboimnana, jama Bèngbe Utabnáftaca nñetsca tescama vida jtseboimnana. <sup>9</sup> Chíyeca bènga bètsá fsëndèntseña Bèngbe Utabná sempre oyejuayá jabemama, masque bènga quem luarentse quem cuerpoca tmojtsoiyena, o ya ndoñe. <sup>10</sup> Er nñetscanga šontsamna jashjanguana Crístbe puestoca tribunalentse, cada ona ntšamo yomerecencá chaóyèngacñama, ntšamo tsábá o ndoñe tsábá quem luarentse chabe cuerpiñe vida yojjëftseboimnèntscuana tojjëftsemcá.

*Jábuayenama ntšamo Bèngbe Bètsá inama entsanga tempcá tsábá cháftaca chamotsatsmènama*

<sup>11</sup> Chcasna, Bèngbe Utabná nñetscangbiana chë más bètsá yomnana jtsejuabnaye, bènga bètsá fsëndama entsanga jáyèñjanama, bènga tsábá ftsamama chamotsejuabnana. Pero Bèngbe Bètsá ya endétatsëmbo ntšamo bènga ftsmènama, y atše sèntsobátmana tsèngaftàngnaca chca tsábá chašmotsetátšëmbo, tsèngaftangbe ainantša juabnèngaca, chë bèngbiana aña ca cmojtšetsètsná juabnènga. <sup>12</sup> Bènga ndoñe cachiñe cabèngbiana queftsatoyeuambná; chca fsèntsihamo ndayá tsèngaftanga oyejuayènga bèngbiana chašmotsemnana, chca, tsèngaftanga jojuama chašmobenama, chë uamana soyènga tmojtsebiomnàngbiöye ndayá entsanga canye entsábeñe tmojtsoñyáca y ndoñe chca chë entsabe ainaniñe tomna soyèngaca. <sup>13</sup> Er bènga mo chë ndoñe corente juabna ndobomnèngcá ftsamèse, ntšamo báseftanga mondbetsichamcá, jtsemnana Bèngbe Bètsá jasèrviam; y bènga corente juabna bomnèngcá ftsamèse, jtsemnana tsèngaftangbe tsábiana. <sup>14</sup> Bènga chca fsèndmèna, Cristo šondábuanayeshanayeca, y chë soye endama bènga nñe cha fchaitseervénama, er bènga fsèndenojuabná y puerte tsábá fsëndétatsëmbo, canya, Cristo, nñetscangbiana tojanóbana; y cha nñetscangbiana tojanóbana, endmèna mo cha tojanóbana ora, nñetscanga cháftaca cuafjobancá. <sup>15</sup> Y Cristo nñetscangbiana tojanóbana, chë quem luarentse vida bomnènga ndoñe más nñe cachèngbiana chamondètsiyenama, sinó chabiana, nda chèngbiana tojanóbana y tojtanayena. <sup>16</sup> Chíyeca, bènga ya ndoñe ndocnabiama queftsatsjuabná ntšamo entsanga quem luarentse jtsejuabnayama monduamancá; masque ndegombre bènga chca Crístbiana fsèñjanjuabná, mora ya ndoñe chca chabiana queftsatsjuabná. <sup>17</sup> Chcasna, nderado nda Crístoftaca cánñiñe mo canyáca tojtsemna, Bèngbe Bètsá tojama cha mo canye tsëm entsacá chaotsemnana. Ntšamo chë Crístbiöye cabá nduabuátmana ora cha yojamncá, mora ya ndoñe quenátsmèna. Morna cha jtsejuabnayana y jtsamana inñe soyènga y tsëm soyènga.

<sup>18</sup> Bèngbe Bètsá endmèna nda chca inètsama, entsanga mo tsëm entsàngcá jábiamama; y cha Crístoftaca tojama bènga tempcá tsábá cháftaca chamotsatsmènama. Y cha bènga canye trabajo šonjanabanñe, bènga entsanga jábuayenama, Bèngbe Bètsá inètsama entsanga tempcá tsábá cháftaca chamotsatsmènama, y entsanga jujabuáchama chca chamotsemnana. <sup>19</sup> O mèntšá, Cristo tojanama sóyeca Bèngbe Bètsá yojtsama entsanga chamotsobenama tempcá tsábá cháftaca jtsatsmènama, y chca, chènga chamotsobena chèngbe bacna soyèngama perdonánènga jtsemnana, y chë soyèngama nñetsca tescama castigánènga jtsemnana ndoñe chaondètsamnama. Y bènga šonjanabanñe chë trabajo, entsanga jtsabuayinayama ntšamo Bèngbe Bètsá inama entsanga tempcá tsábá cháftaca chamotsatsmènama. <sup>20</sup> Y chca, bènga jtsemnana Crístbe cuenta oyeuambnayènga y amènga, mo cach Bèngbe Bètsá bèngaftaca cmojtsoimnapancá. Crístbe cuenta cbaimpadá, bètsá šmochtsèntseña Bèngbe Bètsáftaca tempcá tsábá jtsatsmènama. <sup>21</sup> Cristo ndocna bacna soye tonjanma, pero bèngbe bacna soyènga jabuajuánama, Bèngbe Bètsá cháftaca tojanama mo cha canye bacna soyènga amá cuafsemncá, chca, bènga Crístoftaca cánñiñe mo canyáca jtsemnane, Bèngbe Bètsabe bominñiñe tsábènga jtsemnana chamotsobenama.

## 6

<sup>1</sup> Chcáyeca, bènga Bèngbe Bètsáftaca cánñiñe trabájayènga quetsomñecana, cbontsaimpadana ndoñe nñe bonamente chašmondóyèngacñe chë Bèngbe Bètsá yojtsama soyènga, tsèngaftangbiana tsabe juabna jtseboimnèse. <sup>2</sup> Er Bèngbe Bètsá chabe uabemana palabrènguiñe mèntšá tojánayana:

Chë tsabe soye jamama tsábá šonjaninñana ora, atše tcbonjanoyeuná;

chë ácbioye jatsbocama te, tchbonjanájabuache ca.

Smochjinýe. Mora entsemna chë mocna ora Bëngbe Bëtsá tsabá ibojtsinýana tsabe soye jamama; mora entsemna chë mocna ora Bëngbe Bëtsá yojtseboše aca jatsbocama.

<sup>3</sup> Bënga ndocna bacna soye queftsátama, ndayá chaoma entšanga chë tsabe noti-ciënga chamotšábotema, chca, ndocná podesca chaondëtsóyeuambnana bëngbe trabajuama, Cristbiamá. <sup>4</sup> Inýetsá, bëngna nyetsca soyënguife fsënjaniyena mo Bëngbe Bëtsabe oservenëngcá; Bëngbe Bëtsabeñe obatmancá puerte uantadënga jtsemnëse, fstsésufrina ora; puerte padecena soyënguife bëtsemna causa, ndayá jamama ndoñe fsëntsetatšëmbo ora; y ainaniñe puerte ngmënaca fstsemna ora; <sup>5</sup> inýenga šojtsatsetšená ora; cárceloye šojautame ora; entšanga bëngbe contra tmojtsenbouënana ora; jabuache trabájayife puerte uamëntsnyënga fstsemna ora; bayté ntsamanacá fstsemna ora; y jasama tondaye fsëntsebomna ora. <sup>6</sup> Bëgnaca fsëntsinýanýná Bëngbe Bëtsabe oservënënga ftsmënema, puerte tsabe vídaca, ndocna bacna soye ntjamcá jtsiyenëse; Bëngbe Bëtsabe soyëngama corente jtsetatšëmbe; inýenga ntšamo šojáborlaye ora puerte uantadënga jtsemnëse; inýengbioye puerte bonshanánaca jtsëñýayëse; Uámana Espiritu bëngbe ainaniñe jtsebomnëse; y ndegombre nyets ainánaca nyetscanga jtsababuánýeshanëse; <sup>7</sup> ntšamo Bëngbe Bëtsabiamá ndegombre yomncá jtsabuayinyayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyëñjanama y chëngbiamá jenëuyanama soyënga jtsebomnana, chë Satanásbioye jáyëñjanama y chabiamá jenëuyanama ndayá Bëngbe Bëtsá šojatšatacá jtsebomnëse; y Bëngbe Bëtsá chca tojama, er cha tojama bënga chabe hominýiñe tsábenga chamotsemnana. <sup>8</sup> Bënga fsëntsinýanýná Bëngbe Bëtsabe oservënënga ftsmënema, inýenga bëngbiamá tsabe soyënga tmojtsejuabná ora y bënga nduámanënga jtsemnana chënga tmojtsama ora; inýenga tsabe soyënga bëngbiamá tmojtsoyeuambná ora y chënga bëngbiamá podesca tmojtsichamo ora; bënga áingñayënga ftsmëna ca báseftanga tmojtsejuabná ora, pero bënga ntšamo ndegombre yomncá jtsóyeuambnayëse. <sup>9</sup> Mo nduámanëngcá bënga entšángbeñe jtsëñýayana, pero banga corente tsabá bënga šondëubuatma; bëngbiamá sempre resjo endmëna jóbana, pero šmochjinýe, bënga sempre vídaca chentšana jatóbocañana; bënga juatsjinyama jobenayama, Bëngbe Bëtsábeyeca castigánënga fchandbëtsemna, pero nýa jóbana ndoñe. <sup>10</sup> Masque ngmënënga fstsemna, ainaniñe sempre oyejuayënga fchandbëtsemnë; masque ndbomñejemëngcá, pero fchandbëtsemna banga Bëngbe Bëtsábicocana bëtscá chamotsebomnana; quem luarentša soyënga tondaye queftsátsebomna, pero Bëngbe Bëtsabe entšanga quetsomñecana, ndegombre lempe fsëndëtsóbomñe.

<sup>11</sup> Tsëngaftangbiamá, Corintoca entšanga, lempe fsëñjyana, tondaye ntjaitëmccá; nyets ainánaca, corente cbondábabanýeshana. <sup>12</sup> Bënga puerte cbondábabanýeshana, pero tsëngaftangna ndoñe yapa quešcátábabuanýeshana. <sup>13</sup> Atše chontsaimpadana, mo canýe taitá chabe básenga cuaftsaimpadancá, atše puerte chašmotsebobonshánama, er atše corente cbondábabanýeshana.

*Bënga mondmëna mo Bëngbe Bëtsabe bëtse yebncá*

<sup>14</sup> Cristbeñe ndošbuáchiyëngaftaca ndoñe šmatjenuaná ndayánaca jamama, er chca, chëngaftaca šmatjábocana mo chë jaárama uacnata ndoñe cachénchechata tbontsemncá. Ndegombre, chë tsabe soyënga amá y Bëngbe Bëtsabe bominýiñe tsabia mëná, nýa tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entšangbe juabna binýnayáftaca vida bomná, nýa tondaye ntsebomnana chë nýe mo ibetiñcá juabnayáftaca. <sup>15</sup> Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Cristbeñe ošbuachiyá y chábeñe ndošbuachiyáftaca. <sup>16</sup> Ndocna soyiñe cachcá ntsemnana, Bëngbe Bëtsabe bëtse yebna, chë nýe canýe Bëngbe Bëtsábioye jadórana yebna, y chë entšangbe pormana soyënga, mo diosënga cuaftsemncá jtsadoránana soyënga; chca endmëna, er bënga, nyetscanga cánýiñe Jesucristbeñe ošbuachiyëngcá, mondmëna mo Bëngbe Bëtsá Ainabe bëtse yebncá, ntšamo Bëngbe Bëtsá chabe uabemana palabreñguife chabe entšangbiamá tojanayancá: Chëngbeñe vida chántsebomna y chëngbenache chántšana; atše chëngbe Bëtsá chántsemna y chëngna atšbe entšanga ca.

<sup>17</sup> Chýeca mëntšánaca Bëngbe Utabná chabe entšanga tojanëyana:

“Chë bacna soye amëngbentšana smochjésebocana, y chëngbentšana šmochtsojuánañe; tondaye šmatsebana, ni šmatšana ndayá Bëngbe Bëtsabe entšangbiamá ndoñe tsabá tontsemncá.

As chochanjúbuaja,

<sup>18</sup> y chántsemna mo canýe taitacá tsëngaftangbiamá, y tsëngaftangna mo atšbe uaquiñënga y bembangcá.

Chca séntlichamo atše, tsěngaftangbe Utabná, njets obenana bomná ca” —chiñe enuábemana.

## 7

<sup>1</sup> Chcasna, atšbe bonsháněnga, chca endmėna ntšamo Běngbe Bětsá šojašebuachenacá. Chiyeca šontsamna, Běngbe Bětsabe delante njetsca soyėnguiñe tsábenga jtsemnana, bėngbe cuerpama o espirítibama bacna soye ndoñe más ntšamcá; y Běngbe Bětsá nyetscangbiama más uamaná yomna ca mondėjuabnáyeca, lempe ntšamo tmobjenacá mochsiyena mo chabe entsāngcá, njetsca soyėnguiñe puerte tsábenga jtsemnė.

*Ntšamo chė Corintoca entsānga juabna tmojantrocá*

<sup>2</sup> Běngbiama šmochtsenójuabnaye tsěngaftangbe ainaniñe puerte bonshanánaca. Běnga ndocnabiama bacna soye chibiatsma, ndocnabiama chibiatsma más bacna entsá chaotsemnana, y ndocnábioye chibiatsingñė. <sup>3</sup> Atše chca ndoñe tčsótáichamo, ndoñe tsábá šmonjama ca tsěngaftangbiama jayanama, er ntšamo ya tčsonjauyancá, atše tsěngaftangbiama sempre ainaniñe puerte bonshanánaca sėndbėtsenójuabnaye; y chca, mo átšefaca canyíñcá šmochántsemna, masque chayóbana o cabá vida chaitsóbmñėse. <sup>4</sup> Atše puerte tsábá sėndėtatsėmbo, ntšamo tsábá yomncá šmochtsamama; y tsěngaftangbiama puerte oyejuayá sėntsemna. Lempe ntšamo tsėsufrincá tsiyenama, atšbe ainaniñe bėts añemo sėndėtsóbmñe y corente sėntsoyejuá.

<sup>5</sup> Macedonia luaroye fsėnjánashjajna orscana, ndoñe luare queftsátsbomna jóchnama, sinó njetsca soyėnguiñe fsėndėpadecena: chė bėngbe buayenana soyama contra tmojtsemnėngaftaca jabuachana enatsėtnayėse, y bėngbe ainaniñe jtsauatjėse. <sup>6</sup> Pero Běngbe Bětsá, chė yapa añemo ndbomnėngbioye endbetsañemuayá, tojanma bėnga ainaniñe más añemo fchaitsebomnana, Tito moye tonjánashjango ora. <sup>7</sup> Y cha tonjánabo ora, bėnga ndoñe más añemo quefstėtsebomna nje cha tojánashjanguama, sinó tsěngaftanga šmojanájabuachama y ainaniñe añemo chaotsebomnana šmojanmama. Cha šonjanėyana tsěngaftanga tša šmojanboše bėnga jánjama ca, y šonjanacuntá ntšamo tsěngaftanga ngmėnacá šmojanma, atšbiama ndoñe tsábá šmonjanma causa, y ntšamo tsěngaftangbiama atšbe tsábiana puerte iuámanana; y quem chabe noticiėngaca, cabá más sėntsoyejuá.

<sup>8</sup> Er masque tsěngaftanga tša ngmėnacá šmojanma chė tčbonjanėbuábiana tsbuanáchama, mora ndoñe quetsatsjuabná más tsábá yojamna chca ndoñe jatėbuabiamana ca; masque tempo atše chca sėnjanjuabná, er atše sėntsetatsėmbo chė tsbuanácha básefta tescama ngmėnėnga tcmojánabiama, <sup>9</sup> mora atše puerte oyejuayá sėntsemna, ndoñe tsěngaftanga ngmėnėnga šmojanmama, ndayá chė šmojánbomna ngmėnana tojanmama tsěngaftanga chašmuenójuaboma ndoñe tsábá šmontsamama, y chca amana chašmotsajbanama, tsěngaftangbe juabnėnga jatrócase. Chca enjamna, er tsěngaftanga ngmėnana šmojánbomna ntšamo Běngbe Bětsá inabošcá; chíyeca, bėnga ndocna bacna soye tsěngaftangbiama chibiatšma. <sup>10</sup> Ntšamo Běngbe Bětsá tojtsebošcá ngmėnana bomnentsšana, jóbcocna chė bacna soyėnga tcojamama jenójuaboyana y juabnėnga jatrócana; y juabna jatrócana entsábioye juanatsana atsbocaná chaotsemnana, y cha ndocna te ntjátsjuabnayana más tsábá yojamna ndoñe chca ntjatstrócana ca. Pero ntšamo chė nje quem luarama enójuabnaye entsānga mondbetsebomncá ngmėnana bomnentsšana, ndoñe ntjóbcocna juabna jatrócana; chentšana jóbcocna nje njetsca tescama castiganá jtsemnana, mo njetsca tescama cuafjocabncá. <sup>11</sup> Šmochjinjė ndayá tojóbcocna, ntšamo Běngbe Bětsá inabošcá ngmėnana bomnentsšana: tojanma chė šmojanma soyiñe puerte chašmuenójuaboma; y ntšamo jájandmanana bėtscá chašmoungauama; tojanma tsěngaftanga chacmetonama chė bacna soye tojanmáftaca; y castigánėnga jtsemnana jtsauatjámna. Chentšana, tsěngaftanga tša šmojtsanboše atše jinjama; y šmojtsanprontana lempe jamama chca bacna soye ndoñe más chaondėtsemnana y chca tojanmábioye jacastigama. Nyetsca chė soyėnguiñe tsěngaftanga šmonjinjanjė chca bacna soye ndoñe šmonjanmama; y chca, mora tondaye quenátsemėna tsěngaftanga castigo jtsebomnana chacmotsamnama. <sup>12</sup> Y chca, atše chė tsbuanácha tčbonjanėbuábiana ora, ndoñe checbátanėbuabiana chė puerte bacna soye tojanmábeyeca, ni chė bacna soye tojanoyėngacñábeyeca; ndayá tsěngaftanga, mo Běngbe Bětsabe delante cuafsemnėngcá, chė šmojanma soyiñe bėtscá chašmuenójuaboma, y chca, cha chašminjanjė tsěngaftanga bėngbe tsábiana puerte šmenójuabnama. <sup>13</sup> Chíyeca bėnga más añemo ainaniñe fsėntsebomna.

Pero ntšachetsá añemo fstsobomnana, masna puerte oyejuayėnga fsėntsemna, er bėnga fsėnjinjė Tito tša oyejuayá, er chabe ainaniñe lempe natjėmbana yojtsemna njetsca tsěngaftangbiama. <sup>14</sup> Tito tsěngaftanga jánjama cabá nda ora, atše cha sėnjaniyana tsěngaftanga šmochjanóyeunaye chė atše tčbonjanėbuaja palabra ca; y tsěngaftanga ndoñe chešmatsma atše chaitsėuatjama chca tijánayanama. Injėtsá, lempe ntšamo tčbojauyancá ndegombre endmėna; cachcá, ntšamo bėnga Títbioye fsėnjaniyancá ndegombre entsemna, chė

tšéngaftangbiamá fstsóyejuama. <sup>15</sup> Y mora Tito más cmontsababuán'yeshana, ntšamo cha tcmojanaméndacá ndayá tšéngaftanga šmojanmama, y ntšamo puerte respétoca y mo uamaná cuaftsemncá chabiamá jtsejuabnayése šmojanofjama tojtenojuabó ora. <sup>16</sup> Atše puerte oyejuayá séntsemna, er atše séndétatšémbo tšéngaftanga ntšamo tšabá yomncá nyetsca soyénguiñe šmochtsamama.

## 8

*Chénga jañémuayama, inye ošbuachiyéngbioye nyets ainánaca jujabuáchama*

<sup>1</sup> Y mora, Jesucristbeyeca catšátanga, bēnga fséntseboše tšéngaftanga chašmotsetátšémbo ntšamo Bēngbe Bētsá bētsá tšabe bendicionēnga tojama Macedonia luarentše ošbuachiyéngcá enefjuanēngbiamá. <sup>2</sup> Chénga puerte tmojasufírí, y chora chca, chénga tmojin'yán'yé beca imošbuáchema y tša imoyejuama; y masque puerte ndbomnjémēngnga, chénga nyets ainánaca bētsá tmojanacaredadó Jerusalenentša ošbuachiyénga ndbomnjémēngbiamá. <sup>3</sup> Atše séndétatšémbo y séntsobena jayanama chénga ndegombre tojatšatá ntšamo tjobenacá, y ntšachetšá imobenitšana cabá más, chénga chca imobóseyeca. <sup>4</sup> Tša šonjánaimpadana chéngbioye jálesenciamá ndayánaca jamama, Jerusalenoca ošbuachiyéngbioye jujabuáchama. <sup>5</sup> Bēnga ftsjanobatmanama cabá más chénga tmonjanma; natsana, chénga Bēngbe Utanbá tmojanianana lempe ntšamo cha tojtsebošcá chénga jamama imojtseboše ca, y chentšana bēngaftácnaca cachcá tmonjanma; y lempe enjamna ntšamo Bēngbe Bētsá inabošcá. <sup>6</sup> Ndayá Macedonioca ošbuachiyénga tmojanmama bēnga añemo fsēnjanóyēngacñeyeca, bēnga Tito fsēnjaimpadá chē tšabe trabajo chaopochocama, chē tšéngaftangbeñe crocénana játbana, Jerusalenoca ošbuachiyénga jujabuáchama, ndayá cha jamama tojanbojatšecá. <sup>7</sup> Y morna, ntšamo tšéngaftanga nyetsca soyénguiñe tša šmómncá —puerte ošbuachiyénga, beca obenēnga Bēngbe Bētsabe soyéngama jóyebuambayama, puerte osertánēnga Bēngbe Bētsabe soyéngama, corente juabnayénga bētsá jamama Cristo jasérviamá y bēngbioye corente ababuán'yeshanēnga —cachcá, mórnaca bētsá šmochjama quem trabajuíñe chē ošbuachiyénga ndbomnjémēngbiamá, tšéngaftangbe bonshánana jtsin'yán'yayése.

<sup>8</sup> Chca ndoñe quechatétsétná mo canye mandcá; atše séntseboše ndayá nye tšéngaftanga jáuyanana ntšamo ín'yenga bētsá tmojatrabajá chē ndbomnjémēngbiamá, tšéngaftángnaca cachcá chašmotsamama; y chca, chašmin'yán'yema chē tšéngaftanga šmobomna bonshánana ndegombre bētsemnana. <sup>9</sup> Er tšéngaftanga šmondétatšémbo ntšamo Bēngbe Utanbá Jesucristo puerte tšabe soyénga bēngbiamá tojamama, bēngbioye puerte jtsababuán'yeshanése. Celoca, cha cabá quem luaroye ndabo ora, cha bētsá inabomna; pero tšéngaftanga ababuán'yeshanayeca, mo canye puerte nduamanacá tojanóbema. Y mora, Cristo mo canye nduamanacá tojóbmeyeca, Bēngbe Bētsá puerte tšabe soyénga šojatšatá.

<sup>10</sup> Tšéngaftangbe tšabiamá mēntšá cbabuayená, ntšamo quem soyíñe šmochjamama. Chē inye uata tšéngaftanga šmonjanbojatšé, ndoñe nye chē ndbomnjémēngbiamá jacjayama, ndayá chca jamama jtsebošámnaca. <sup>11</sup> Morna, chē ndbomnjémēngbiamá trabajo šmochjapochóca; chca, ntšamo tšéngaftanga beca šmonjanprontana y jujabuáchama tša šmonjanbošcá, mórnaca cachcá chašmomama chē trabajo japochócama, ntšamo šmojobenacá jacjayése. <sup>12</sup> Er canye entsá, jatštayama ndegombre tojtsebošése, ndayá cha tojatšatcá Bēngbe Bētsábioye oyejuayá jabemana, ntšamo cha tojtsobercá, y ndoñe ntšamo cha ndoñe tontsobencá.

<sup>13</sup> Ndoñe quenátsmēna, tšéngaftanga puerte ujabótēnga chašmoquedá, ín'yēngbioye atšatnaye causa, chénga ndoñe yapa ujabótēnga chamondétsēmnama. <sup>14</sup> Atše séntšicamo ndayá nyetscanga chamotsenajabuachana, chca tojtšéjotbo ora ca. Mora, chē bētsá šmobomnentšana šmotsobena chénga jujabuáchana, ndayá tojtšabuáshebencá jatšatayése; y inye orna, chénga entsamna tšéngaftanga jujabuáchana chē cmojtsabuáshebena soyéngaca. Chca, nyetscanga jóyēngacñana ndayá tojtšéjotbo ora. <sup>15</sup> Ntšamo Bēngbe Bētsabe uabemana palabrénguiñe endayancá:

Chē tša bomnábioye ndoñe chebatanójama;

y chē nye batšá bomnábioye, ndoñe quebēnjatanbuášbena ca.

*Tito y chabe enutēnga*

<sup>16</sup> Bēngbe Bētsá šcuatschuá, tšéngaftanga jtsan'yenama Tito ainaniñe juabnēnga chaotse-bomnana cha tojanmama, cachcá ntšamo bēnga fséndbomncá. <sup>17</sup> Er tšéngaftangbioye chaot-sama bēnga fsēnjanimpadá ora, cha oyejuayá añe ca tonjánayana choye jama; y chabiamá puerte enduámana tšéngaftangbe tšabiana; chíyeca mora echanjá tšéngaftanga jányama, chca jamama cachá yobóseyeca.

<sup>18</sup> Títoftaca, canya Jesucristbeyeca bēngbe catšata fsēntšichamná; chabiamá puerte tšabá ošbuachiyéngcá enefjuanēngbenache mondoyebuambná, chabe trabajuama chē tšabe

noticiënga abuayinyayama. <sup>19</sup> Y ndoñe nÿe chë soye, sinó quem luarentse ošbuachiyëngcá enefjuanënga cha tmonjuábuayana bëngaftaca Jerusalenoye jama, y jujabuáchama chë ndbomnjëmëngbiama trabajuíñe; chë trabajo endmëna bonshánana jinÿanÿiyama; chca fsëntsama, Bëngbe Utabná jtsatschuanayama y jinÿanÿiyama bënga chca jujabuáchama tša fstsbošama. <sup>20</sup> Títoftaca cha fsëntsichamná, chca, ndocná chaondëtsichamo bënga ndoñe tsábá tifjama ca, ntšamo játbanama cmojtsamniñe, chë becá juabónana játbanama, ndbomnjëmënga jujabuáchama; <sup>21</sup> er bënga fsëndama lempe ntšamo fstsobencá, ndoñe nÿe ntšamo Bëngbe Bëtsabe bominÿiñe tsábá yomncá jamama, ndayá ntšamo entšangbe bominÿiñe tsábá yomncánaca.

<sup>22</sup> Chátaftaca inÿa Jesucristbeyeca bëngbe catsátnaca fsëntsichamná; cha bënga ba soyiñe šonjinÿanÿé cha yojtseboše bëtscá jamama, Cristo jaserviama, y mora más, er cha puerte bëtscá entsejuabná tšëngaftanga puerte tsábá šmochjamama. <sup>23</sup> Y Titbiamna, cha quem trabajuíñe atšbe enutá endmëna, y atscá tšëngaftangbiama endëtrábaja; y chë inÿata Jesucristbeyeca bëngbe catsatadbiama, chata bontsemna quemuentša ošbuachiyëngcá enefjuanëngbe ichmónata, chëngbiama chabóyebuambama; y chë bontsama soyëcna, chata Cristbioye corente jtsatschuanayana. <sup>24</sup> Chiyeca, chëngbioca ošbuachiyëngcá enefjuanënga chca chamotsetatšëmbuama, chë ichmona boyabásengbiye šmochjinÿanÿiye tšëngaftanga ndegombre chënga šmojtsababuánÿeshanama, y bënga razón fstsobomnama tšëngaftangbiama oyejuayënga jtsemnana.

## 9

### *Chë inÿe ošbuachiyëngbiama crocénana játbanama*

<sup>1</sup> Chë Jerusalenoca Bëngbe Bëtsabe entšangbiama crocénana játbanama ndoñe quenásiyta tšëngaftangbiye jatëbuabiamnayama, <sup>2</sup> er atšbe ndegombre sëntsetatšëmo tšëngaftanga tša šmojtsboše chca jujabuáchama. Macedonioca entsanga puerte oyejuayá sempre sëndbëtsëtsësnaye, Acaya luaroquënga chë inÿe uatscana quem trabajuíñe jujabuáchama šmoprontánama; y chë jujabuáchama tšëngaftangbe bëtscá juabnënga tmojama banga quem luarentšënga bëtscá añemo chamotsebomnama, chëngnaca chë trabajo jamama. <sup>3</sup> Pero Jesucristbeyeca quem catsátanga sëntsichamná, ntšamo bënga oyejuayënga tífjayancá tšëngaftanga chašmotsamama, chë tšëngaftanga quem trabajuíñe bëtscá šmochjama ca; chca, ntšamo tijanayancá ndoñe nÿe bonamente chaondëtsemnana, y ntšamo sënjanayancá tšëngaftanga chašmotseprontánama; <sup>4</sup> er nderado báseftanga Macedonioquënga átšeftaca tmojá y choca ndëprontánënga tmojánÿena chë ndbomnjëmëngbiama ujabuáchenanaca, chë soye nanjama bënga fchaitšëuatjama, er ba soye fsënjayana bënga ndegombre fstsëtátšëmo tšëngaftanga prontánënga šmochtsemna ca; y ndegombre, tšëngaftangbiama cabá más ouatjca nántsemna. <sup>5</sup> Chiyeca, tsábá šonjuínÿnana Jesucristbeyeca quem catsátanga jáimpadana chënga atšbe natsana chamotsama tšëngaftanga jáñÿama, y chacmëjabuachama chë juabónana játbanama, ndayá tšëngaftanga tempo šmonjanašebuachenacá. Chca, atšbe choca chajjášhango ora, tšëngaftangbe juabónana chaotseprontana. Chca, tšëngaftanga šmochanjinÿanÿiye ndbomnjëmëngbiama šmojacá, chca jamama tša šmobóyeyeca, y ndoñe nÿe batšatema jatsatayama y tšëngaftangbiama bëtscá jobuájuama šmojtseboše.

<sup>6</sup> Quemuiñe šmochtsenójuabnaye: Nda nÿe batšá tojajé, cach batšá chentšana josháchiñana; y nda bëtscá tojajé, cach bëtscá chentšana josháchiñana. <sup>7</sup> Cada ona bontsemna jajájuana ntšamo chabe ainaniñe tojajuabocá; ndoñe ngmëyaca o nÿe inÿyenga chca jamama tmojtsemándayeca. Chca chaotsemna, er nda oyejuayá tojajajóbioye, Bëngbe Bëtsá jtsebobonshánana. <sup>8</sup> Bëngbe Bëtsá endobena jamana chábentšana nÿetsca tsabe bendicionënga y bëtscá soyënga tšëngaftanga chašmotsebomnama; chca, ntšamo nÿetsca soyënguñe cmojtsëjabotcá sempre chašmotsóbomna, y cabá más bëtscá chašmotsebomnama, nÿetsca tsabe obrënguñe inÿyenga chasmëjabuachama. <sup>9</sup> Bëngbe Bëtsabe uabemana palabrënguñe, mëntšá endayana chë bëtscá tojacjabiamana;

Cha nÿets ainánaca ndbomnjëmënga bëtscá jatsatayana; y chë tsabe soyënga ntšamo cha tojtsamcá nÿets tempo jëftsemnana.

<sup>10</sup> Bëngbe Bëtsá, nda endbama chaotsemna jënye jájema y sananga jasama, cmochanjatsataye lempe ntšamo cmojtsëjabotcá, y echanjama, tšëngaftanga cabá más tsabe soyënga chašmotsamama. <sup>11</sup> Bëngbe Bëtsá echanjama tšëngaftanga nÿetsca tsabe soyënga chašmotsebomnama, chca, tšëngaftanga nÿets ainánaca puerte inÿyengbiye chašmatsatama, y bëngbeyeca, chë mochjóyëngacñënga Bëngbe Bëtsá chamotsatschuanama; <sup>12</sup> er chë ujabuáchenana Bëngbe Bëtsabe entsanga tcojatsatá ora, ndoñe nÿe ndayá tojtsëjabotcá jatsatayana, ndayá chënga Bëngbe Bëtsá chamotsatschuanámna jamana. <sup>13</sup> Chënga Bëngbe Bëtsá mochántatschuanaye, er chë ujabuáchenanaca chëngbiye jinÿanÿiyana, ntšamo Cristbe tsabe noticiënguñe iuayancá tšëngaftanga šmobedecénama, y ntšamo tšëngaftanga

tšabá jamése, nyets ainánaca bètsá soyènga chènga y nyetscanga šmojátšatama. <sup>14</sup> Y chènga tša mochántseboše tšèngafanganga jányama y tšèngafangbiana Bèngbe Bètsá mochántsempadana, er cha bètsá tšabe soyènga tšèngafangbiana tojama. <sup>15</sup> ¡Bèngbe Bètsá šcuatschuá ndayá cha šojátšatama, canye puerte uámana soye, ndocná jobenayana tšabá jayanama ntšamo ché soye bétsemnana!

## 10

### *Ntšamo Pablo tojánayana ín'yenga chabe contra imojtsichamo ora*

<sup>1</sup> Y mora, atše Pablo, cbochanjáimpada, tšèngafangbioye puerte bonshanánaca jtsènyáyèse, y tšèngafangbiana tšabá jamama jtseprontánèse, ntšamo cach Cristo endbetsamcá. Báseftanga tšèngafangbioquènga imojtsichamo atše puerte nduamaná tsnenóbema atše tšèngafangtaftaca stsemna ora, pero corente añemo bomná tsnenóbema jabuache soyènga jayanama tšèngafangbentšana bènocá stsemna ora ca. <sup>2</sup> Tšèngafangtaftaca bcontsaimpadana, tšèngafanganga jányama chajá ora, atše ndoñe chašondètsemna puerte añemo bomná jtsemnana, jabuache soyènga tšèngafanganga jáuyanama, ndoñe ntšamo atše puerte tšabá sèntsetatsèmbcá ndayá báseftangtaftaca jamama šojtsotocana, ché ndèmuanyènga imojtsejuabná, nýe bènga tšabá jtsomñámana juabnèngaca bènga fstsiyena ca. <sup>3</sup> Ndegombre bènga quem luarentše fsèndoyena, pero ndoñe queftsátspelia Cristbiana, ntšamo quem luarentša entšanga monduamancá; <sup>4</sup> er ché ndaye sóyeca bènga Cristbe soyèngama fsèndépèlia, ndoñe quenátsmèna mo ché ndaye sóyeca ché nýe quem luarama enójuabnaye entšanga japéliama monduamancá, ntšamo nýe chènga tšabá jtsomñámana juabnènga yomncá. Inýetsá, ché ndaye soyèngaca bènga fsèndépèlia, Bèngbe Bètsá jtsinýanana puerte obenana bomna soyènga yomna ca; y endmèna ché Satanás tojtsemánda soyènga jayénjanama, puerte jabuache soyènga jayénjanama. Mo nda canye uayayábioye jtsepochoancá, ché Bèngbe Bètsabe osertánana ndoñe yonduámana ca jinýanýiyama soyènga ichámèngbiana, <sup>5</sup> y Bèngbe Bètsabe osertánana jtsabotema juabnènga bomnèngbiana, bènga fsèndama ntšamo chènga tmojtsichamcá tondaye chaondètšamanama. Y ché japéliama fsèndbomna soyèngaca, bènga fsèndbetsama chca juabnayana chamotsajbanama, y chamotsobena ntšamo Cristo yomandacá jtsamana. <sup>6</sup> Bènga fsèntseprontana ché Cristbiana nduauenanènga jácastigama, lempe ntšamo Cristo cmojtsamèndacá tšèngafanganga chašmojtsama ora.

<sup>7</sup> Tšèngafanganga ndayánaca jtsónýayana nýe ntšamo tbojtsabinýnécá. Nderado nda acá tojtsejuabná Cristbia yomna ca, cha bontsemna jtsejuabnayana bèngnaca Cristbenga fstmènama, ntšamo cha yomncá. <sup>8</sup> Er atše masque tša sèndbètsoyebuambnaye ché Bèngbe Utabná šojatšatá mandama, ché ndáyeca bènga jamama tšèngafanganga puerte chašmotsošbuáchemá y ainaniñe bèts añemo chašmotsebomnana, y ndoñe tšèngafanganga ntjapochócama, chama atše ndoñe quetsátéuatja. <sup>9</sup> Atše ndoñe quetsátseboše tšèngafanganga chacmotsinýana, tšèngafanganga jáutajjayama atše stseboše ca, ndayá atše tsbuanáchangañe tijuábemama. <sup>10</sup> Er báseftanga mèntšá atšbiana imojtsichamo: “Chabe tsbuanáchangañe cha šontsamènda bètsá soyènga jamama, y tša obenacá cha jtsóyebuambnayana; pero cha bèngtaftaca tojtsemna ora, cha jtsóyebuambnayana mo canye ndocna obenana ndbomncá, y ntšamo tojtsichamcá tondaye ntsámanana ca.” <sup>11</sup> Chca entšanga entsamna jtsetatsèmbuana, ntšamo bènga fstsichamcá, tsbuanachangá juichmuase, tšèngafangtaftaca cabá ndoñe fsèntsemna ora, tšèngafangtaftaca fchaitsemna órnaca, bènga chca fchjamama.

<sup>12</sup> Ndegombre bènga ndoñe tša añemo queftsátsebmoma jayanama nyetsá uámanènga fstmèna ca, mo ché cachènga jtsenábótamnyana uamanèngcá. Chènga jtsejuabnayana y jtsichámuana tšábenga imomna ca, nýe ntšamo cachèngbeñe ín'yenga imomnana jtsónýayèse; y chca tmojtsama ora, chènga juabna ndbomnènga jtsemnana. <sup>13</sup> Bènga ndoñe yapa quifchatóyebuambaye cabèngbiana, chca, tša tšábenga bènga imomna ca jtseábótamnyana; fchanjóyebuambaye ndayá ché bènga tifjama tšabe trabajuama, ndayá Bèngbe Bètsá šojabanýecá, y chiñnaca entsemna ntšamo tšèngafangbeñe Corintoca tifjamcá. <sup>14</sup> Chiyeca, bènga ndoñe queftsatoyebuambná ché bènga ndoñe derecho fsèntsebomnana, ntšamo ndegombre nántsemna bènga tempo tšèngafangtaftaca ndoñe mafsènjammèse; er bènga ché natsanènga fsènjamma tšèngafangbeñe jama, Cristbiana tšabe noticiènga jábuayenama. <sup>15</sup> Y ndoñe quifchatóyebuambaye tša tšabá bèngbe trabajo yomna ca, ché ndayama ndoñe šontsamna chca jatichámuana, ché trabajo ndoñe bèngbe soye, sinó ín'yèngbe soye yómnyeca. Chamna, bènga fsèntsobátmana tšèngafanganga Cristbeñe más chašmotsošbuáchemá, y chca chaojtsemna ora, bènga fchayobená ba luariñe entšanga jábuayenana, ntšamo tšèngafangbeñe fsèntsamcá. <sup>16</sup> Chca, fsèntsobátmana bènga jobenayama tšabe noticièngama jábuayenama, ché tšèngafangbentšana más chcoye imoyena entsángbioye; chca, bènga ndoñe yapa quifchatóyebuambaye ín'yèngbe trabajuama, Cristbe soyènga jábuayenama, mo ché soye bèngbe trabajo cuafjatsmèncá.

<sup>17</sup> Ntšamo Bēngbe Bētsabe uabemana palabrenguifē endayanca: “Nda tojtseboše jayanama cha canye uamana entšá yomna ca, más tšabá cha cháuyana Bēngbe Utabná puerte uamaná endmēna ca.” <sup>18</sup> Er Bēngbe Bētsá jayanana canye entšá ndegombre tšabá tojama ca, ndoñe nye cachá tojtsenábotamnabiam, ndayá Bēngbe Bētsá chca ndegombre tojama ca Bēngbe Bētsá tojtsejuabnabiam.

## 11

### *Pablo y chē ndoñe ndegombre ichmónēnga*

<sup>1</sup> Malaye atše šmēntjēuánta, atše básefta soyēnga mo canye opá tojtsoyebuambnacá stsihámēntscuana, cach atše stsenabotamná ora. Masque ntšámnaca šmochtsēuánta. <sup>2</sup> Bēngbe Bētsábeyeca atše tša chondábabuanýeshana y chbondányena, tšēngaftanga nye cha chašmotšestonama y ndoñe ínýengbioye. Er atše Cristo sēnjašbuachená tšēngaftanga sempre cha šmochtsēstónama, y sēntseboše, cha quem luaroye yochjésabo ora, chábioye tšēngaftanga júshejanguana, mo nye chábioye sempre ustonēngcá, ntšamo canye taitá chabe beme ndocna boyabása nduabatmá nye canye boyabásafata chaóbuamama jushjanguancá. <sup>3</sup> Mētscuaye Evábioye tbojaningñé, y cha tbojanínýnana puerte osertanabe soyēnga cuafatsatsēstnacá, pero ndegombre ndoñe chca yonjamna. Atše sēntsauatja nderado cachcá ínýenga tšēngaftangafata muanjama y tšēngaftange juabna chašmotrocá, y chca, tšēngaftanga chašmotsajbaná sempre jtsejuabnayana nye Cristo nýetsca soyēnguifē jtsestervénama. <sup>4</sup> Atše chama sēntsauatja, er ndánaca jashjanguana y Jesusbiam tojtšabuayíná, mo cha ínýe entšá cuafsemncá, ndoñe ntšamo bēnga Jesusbiam fsēndabuayínacá, y tojtsama tšēngaftanga chašmobená canye espíritu jtsebmónna, pero ndoñe ntšamo chē Bēngbe Bētsá tojama tšēngaftange ainaniñe cháumashēnguama espiritcá, chē Uamana Espiritu, tšēngaftanga tšabá cha jtseuántana. Y atše sēntsauatja, tšēngaftange ainaniñe ínýe buayenana chašmóyēngacñama ndánaca tojtsamama, ndoñe cachcá chē tšabe noticiēnga ntšamo ya bēngbentsana šmonjouencá, y chora tšēngaftanga chábioye beca tšabá jtseuántana. <sup>5</sup> Pero atše sēntsejuabná tondayiñe más batšá uamaná tsmēna ca, chē Jesucristbe puerte uamana ichmónēnga imomna ca juabnyēngbiama. <sup>6</sup> Atše ndoñe sēnjuatsjinýe ntšamo corente tšabá entšangafata jóyebuambayama; pero atše puerte tšabá sēndētatsēmbo ntšamo stsihámumuama. Bēnga puerte tšabá nýetsca soyēnguifē tšēngaftanga tchbonjanýanjé, ndegombre chca osertánana ftsbmónna.

<sup>7</sup> ¿O atše ndoñe tšabá sēnjama, tšabe noticiēnga chbonjanabuayíná ora, tšēngaftangbentsana atšbiam tondaye ntjotjañcá, nduamanacá jenóbemēse; chca, tšēngaftanga puerte uamanēnga chašmotsemnama Bēngbe Bētsá chaomama? <sup>8</sup> Mo ínýenache ošbuachiyēngcá nefjuanēnga crocēnana cuafjabaquécá, crocēnana sēnjanóyēngacñe chē ošbuachiyēngbentsana, tšēngaftanga jujabuáchama jobenayama. <sup>9</sup> Y tšēngaftangafata sēnjama ora y ndayánaca šojanájoboto ora, atše ndoñe checbátantjañe atšbe opresidama, chca, tšēngaftangbiama totcá ndoñe chaondētsemnama; er chē Jesucristbeyeca catšátanga Macedoniocana tmonjánashjajnēnga, šmonjanatšétá ntšamo šojanuashbencá. Chca, atše sēnjama, atšbe causa tšēngaftangbiama totcá ndoñe chaondētsemnama; y sempre chca chántsama. <sup>10</sup> Serto, Cristbe ndegombre soyēnga atšbe ainaniñe sēntsebmónna; chíyeca, atše corente sēntsetatsēmbo ndocná Acaya luarentse yochjama atše chayajbaná puerte oyejuayá jtsoyebuambayama, chē tšabe noticiēnga stsbuayíná ora; y chca chanjama atšbe opresidama chašmoyema ínýenga ntšamncá. <sup>11</sup> ¿Y ndáyeca chca stsama? ¿Yojtsemna ndoñe chondábabuanýeshana causa? Ndoñe. Bēngbe Bētsá endētatsēmbo tša chbondábabuanýeshanama.

<sup>12</sup> Pero atše sempre chántsama ntšamo sēndamcá, chca, chē ínýenga, chē Jesucristbe puerte uamana ichmónēnga imomna ca juabnyēnga ndoñe chamondētsebmónna ndáyeca jatenábotamayama, ntšamo bēnga ftsamcá chēnga imojtsetrabája ca. <sup>13</sup> Er chēnga ndoñe quemátsmēna Jesucristbe ndegombre ichmónēnga, mondēmēna chē ínýenga jángñama imotrabájanga, y mondama entšanga chaotsinýanama chēnga mo Jesucristbe ndegombre ichmónēnga cuafstsemncá. <sup>14</sup> Y chama ndoñe šmatjenjnaná, er cach Satanásnaca endbētsama mo canye buashinýinýana angelcá jtšinýnama; <sup>15</sup> chíyeca, ndoñe muatjenjnaná, chabe oservenēngnaca tmojtsamama mo tšabe entšangcá jtšinýnama. Pero chēnga mochanjopochóca, ntšamo tmojtsomerecencá, ndayá tmojamama.

### *Ntšamo Pablo tojansufrí, Cristbe ichmoná bētsemna causa*

<sup>16</sup> Cachiñe chochtētýana: ndocná chaondētsejuabná atše opá stsemna ca, cach atše stsenabotamná ora; pero chca šmojtsejuabnase, mo canye opabioycá šmochtsēuánta, chca, átšnaca jtsestervénayama jobenayama. <sup>17</sup> Chca jayanēse, ndoñe quenátsmēna ntšamo Bēngbe Utabná endbetsamcá, ndayá canye opá inetsamcá; atše tšabá jtsetatsēmbēse ndegombre stsebmónna ndáyeca jobenayama jtsestervénayana. <sup>18</sup> Banga



mondmëna, cachënga jtsenábotamnayana ndayá quem luarentse chënga tmojamama, as átsnaca chantsenábotamnaye. <sup>19</sup> Tšëngaftanga chë tša osertánënga, oyejuayënga opëngbioye jtsëuantánana. <sup>20</sup> Atše sëndétatšëmbo tšëngaftanga chë opëngbioye šmnetšëuantánana, er tšëngaftanga šmondbétsëuantana chë nýets tempo tšëngaftanga mo chëngbe oservenëngcá tcmojtsamëndayënga, o chë tšëngaftanga bëtscá tcmojtsabacanga, o tcmojtsaíngñianga, o chë uámanënga tmojtšenobiannanga tšëngaftanga mo nduamanëngcá jtsamëndayama, o chë tcmojtsajuebiantšëtaýënga.

<sup>21</sup> Atše chca séntšichamo masque séntšëuatja chca jayanama. Bënga fsënjamna corente obenana ndbomnënga, ntšamo tšëngaftanga bëngbiama šmojayancá, tšëngaftangafata chca jamama.

Inýënga, chë tšëngaftangbeñe imotrabájanga, ndayama jtsenábotamnayama tmojtsebonnëse, puerte uámana ichmónënga imomna ca jtsichámëse, átsnaca añemo séntsebonna chama jtsenábotamnayama; chca stjayana ora, mo canýe opá tojtsoyebuambnacá séntsoyebuambná. <sup>22</sup> Chënga jtsenábotamnayana hebreunga imomnama. Atšnaca hebreo séndmëna. Chënga jtsenábotamnayana Israeloquënga imomnama. Atšnaca Israelocá séndmëna. Chënga jtsenábotamnayana Abrahámbentšana entšanga imomnama. Atšnaca Abrahámbentšana entšá séndmëna. <sup>23</sup> Chënga jtsichámuana Cristo imoservenena ca. Atše chëngbiama cabá más tšabe oservená séndmëna. Chca stjayana ora, mo canýe opá tojtsoyebuambnacá séntsoyebuambná. Atše chëngbiama más tijatrabajá, más šmojutame, más šmojatsetšená y ba soye atšbiama resjo endmëna jóbana. <sup>24</sup> Shachna soye judiënga šmonjantsetšená chë unga bnëtsana y esconëfta soye jasachënjëse, ntšamo chënga jacastígana monduamancá. <sup>25</sup> Unga soye niñbëngaca šmonjanëtsjanganja, y ndëtsbëngaca canýe šmonjanatëchënganja. Unga soye chë atše sënjanenjaquena barco tontsanenatjëmbe, y chca ora, canýe šonjanotocá, chë mar béjayoca tsachocana bënoca canýe ibeta jëftsebobínýnana y canýe te jëftsejétanana. <sup>26</sup> Atše becá sënjánana, y chca atšbiama resjo enjamna bëtš fshajayënguñe y uacucuatšënga chašmuebiatšëbama; resjo cach atšbe entšángbentše, judiënga y ndoñe judiëngbentše; resjo bëtš publënguentše, entsanga ndoyenentše y mar béjayoca. Atšbiámna resjo enjamna chë Jesucristbeyeca atšbiama catšátanga imomna ca jtsichámuana, pero ndegombre chca ndoñe mondmëñëngbeñe. <sup>27</sup> Atše bëtscá tijatrabajá empás uamëntšnaya joquédantsuana; ba soye tijachnëgo ibeta ntsamanacá y ba soye tijachnëgo shëntseca y uajuendayá; ba soye ndayá jasama ntsebonncá; tijasufri sësnama y tondaye entšayama.

<sup>28</sup> Quem soyëngama y inýe ndoñe chiyátayana soyëngama más, atše cada te natjëmbana ainánaca ndoñe queschbatšmëna, er ndoñe quetsátstatšëmbo ntšamo nýetsca ošbuachiyëngcá enefjuanënga imojtsiyenana. <sup>29</sup> Ndnánaca tšabe soye jamama tondaye añemo tontsebonna ora, atše chabiama šochandbóngmia, mo átsnaca cach tondaye añemoca cuabndëtsemncá. Nderado inýënga tmojama ndánaca bacna soyiñe chaótsatšama, atše ndegombre puerte ngmëncaca chandbëtšesufrina. <sup>30</sup> Nderado nýa tojatsiyta atše ndayama jatenábotamnayama, as chë atše tondaye obenana ndbomná tsmënama inýanýnaye soyëngama chtsenábotamnaye. <sup>31</sup> Bëngbe Bëtšá y Bëngbe Utabná Jesucristbe Taitá, ndábioye nýetscanga nýetsca tescama jtsatschuanayama entsamna, cha edétatšëmbo atše ndegombre stšichámuama chë séntsoyebuambná soyënguñe. <sup>32</sup> Atše Damasco bëtš puebloca sënjamna ora, chë rey Aretasbe uabuáyana mandado tojanmandá chë puebloye amashjuaniñe soldadënga chamotsebojanýama, atše chašmishachama chëjana stsebocana ora; <sup>33</sup> pero básefta enutënga, canýe sbarëcuiñe šmontsanëštjango chë puebltša shëconana tapiësiñe canýe atëfñëjana, y chca atše sënjanobená chëngbe cucuatšentsana jótšobocana.

## 12

*Ndayá Pablo mo otjenayoquécá tojáninýe y ndayá Satanás tojanma, Pablo chaosufrima*

<sup>1</sup> Atše šontsemna más jtsenábotamnayana, masque chca tcojamentšana ndocna tšabe soye ntjóbocnana. Mora chanjóyebuambaye, chë mo otjenayoquécá sënjinýe Bëngbe Bëtšabe soyëngama y Bëngbe Utabná šojinýinýe soyëngama. <sup>2</sup> Atše canýe entšá sënduábuatma, cha Cristoftaca cánýiñe mo canýacá endmëna y nda bnëtsana canta uata entsemna, Bëngbe Bëtšá tbojanánatse, chë celoca más tsbanánoye, Bëngbe Bëtšá yomnoye. Atše ndoñe quetsátstatšëmbo Bëngbe Bëtšá cha tbojanánatse chabe cuérpoca o nýe chabe espiritiñe. jNýe Bëngbe Bëtšá chama yotátšëmbo! <sup>3-4</sup> Atše sëndétatšëmbo Bëngbe Bëtšá chë entšábioye celoye tbojanánatsama, nýetscanga oyejuayënga imomnoye (atše ndoñe quetsátstatšëmbo Bëngbe Bëtšá tbojanánatse chabe cuérpoca o nýe chabe espiritiñe; nýe Bëngbe Bëtšá chama yotátšëmbo), y chentše cha tojanuena palabrénga, ndocná bontsemna jayanama palabrénga, chë ndayama entšangbiama ndoñe yontselesenciana jatichámuana. <sup>5</sup> Atše chë

entsá sèndmèna. Canye entsá ndáftaca chca tojopasabiama, tšabá nántsemna chama jt-senábotamnayana; pero cach atšbiama jt-senábotamnayana ndoñe tšabá ntsemnana, ndayá nje chë atše mo obenana ndbomnacá tsmènama injinyñyaye soyèngama chantsenábotamnaye. <sup>6</sup> Y nderado jt-senábotamnayama atše stseboše, chca ora atše ndoñe stsama mo canye opá tojtsoyebuambnacá, er ntšamo ndegombre yomncá atše stsicoma. Pero chca ndoñe quetsáta, chca, ndocná chaondètsejuabná ntšamo atšbiama tbojtsinyñanama o ntšamo atšbiama cha tojouenama atše más tsmèna ca. <sup>7</sup> Chiyeca, tša uamaná tsjamna ca atše ntjátsjuabnayama, atše chë Bèngbe Bètsá tša bèts soyènga tbojaninyñyè entsá bétsemnayeca, Bèngbe Bètsá tojanma atše chaitsebomna ndáyeca puerte chaisufrima, mo canye bèts uch-mašèfja atšbe cuerpiñe tojtsashacuanca, mo Satanasbe ichmona soycá, atše chaisufrima chaomama. <sup>8</sup> Unga soye Bèngbe Utabná sènjaimpadá chca sufrínana chašotsebojuánama; <sup>9</sup> pero Bèngbe Utabná šonjauyana: “Nye atšbe bonshánana endmèna lempe ntšamo cmojtsajabotcá; nyètscanga atšbe obenana más tšabá jinýana, chë obenana ndbomna entsàngbeñe atšbe obenana stjinyñyaye ora ca.” Chcasna, atše puerte oyejuayá chanjòyebuambaye chë atše mo obenana ndbomnacá tsmènama injinyñyaye soyèngama, Cristbe obenana átšbeñe sempre chaotsomñama. <sup>10</sup> Chiyeca, Cristo jaserviama, oyejuayá chandbétsemna atše mo obenana ndbomnacá stsemna ora, inýenga šmojtsoyengúá ora, puerte padecena soyènga causa ndayá jamana ndoñe sèntsetatšèmo ora, atše puerte chaisufrima inýenga tmojtsama ora y puerte tšetsèna ainánaca stsemna ora; er chca soyènguiñe stsemna ora, mo canya obenana ndbomnacá, chora Bèngbe Bètsá jamana atše ainaniñe bèts añemo chaitsebomnama.

*Nderado ndayá Corintoca ošbuáchiyènga muanjamama Pablo yojánauatja*

<sup>11</sup> Atše chca chë soyèngama sèntsenabotamná ora sènjoyebuambá mo canye opá tojtsoyebuambnacá, pero ndegombre tšèngaftanga šmonjama atše chca chaimama. Er tšèngaftanga šmondmèna ndèmuanyènga yojtsamna atšbiama puerte tšabá jtšichámuana, atše chca jt-senábotamnayama ndoñe chašondètsemnana. Ndegombre, atše tondayiñe más batšá uamaná quetsátmèna, chë Jesucristbe puerte uámana ichmónènga imomna ca juab-nayèngbiama, masque atše šontsebiona mo atše tondaye cwaftsamancá. <sup>12</sup> Canya Jesu-cristbe ndegombre ichmoná bétsemnana injinyñyaye soyènga, tšèngaftangbeñe tonjanopasá atše choca sènjamma ora. Chca, chë Bèngbe Bètsabe obenana injinyñyaye soyènga y chë tšabe soyènga ntšamo chora tonjanopasacá, puerte tšabá jt-sinyñyayana atše canye ndegombre ichmoná tsmènama; y atše chca sènjamma, padecena soyènguiñe puerte uantado jtsemnèse. <sup>13</sup> ¿Ndayá tšèngaftanga ndoñe cachcá šmonjanóyèngacñe chë inye luarenache ošbuáchiyèngcá enefjuanèngbiama? Canye soye aífne, er tšèngaftangbioye tondaye ntjotjañcá, atše ndoñe chiyatslesenciá tšèngaftanga atšbe opresidama chašmuájabuachama, ntšamo inye ošbuáchiyènga aífne sènjalesenciá. Smochtseperdóna chca bacna soye tšèngaftangbiama tijamama.

<sup>14</sup> Atše ya sèntseprontana, móracna unga soyama jama tšèngaftanga jányama, y mora atše cach ndoñe quechochataimpáda atšbe opresidama chašmuatájabuachama. Atše ndoñe quetsátsboše chë tšèngaftanga šmobomna soye jatsbomnana, ndayá puerte sèntseboše tšèngaftanga Cristo sempre chašmotseservénama. Atše chca jamama sèntseboše, er atše tšèngaftangbiama mo canye taitacá, Cristbeñe šmonsanošbuachéyeca, atše chabiama tcbonjanabuayená ora; sèntsejuabná chë taitanga inétsamna crocénana jájuabana básenga jt-sanyènama, y ndoñe básenga chë taitangbiama. <sup>15</sup> Y atše corente oyejuayá lempe ntšamo tšbomncá chanjátsataye, y atše jopochócantscuanèncá, tšèngaftangbe tšabiama. Atše cada te más chojtsababuányèshanèse, ¿tšèngaftanga más batšá atše smochtsebošonshana?

<sup>16</sup> Ndoñe; tšèngaftanga tšabá šmondétatšèmo, atše uajabotá sènjamma ora, atše tondaye tcbonjanótjañama. Masque chca, básèftanga imojtsichamo ntšamo inýenga ndayáfnaca jáingñama atše tštátšèmo ca, chéngbentshana crocénana josháchiñama; y atše catijama, inýenga jáingñase, nje ntšamo atše tšbošcá chamotsamama ca. <sup>17</sup> ¿O nderado atše tcbonjané, canya chë tšèngaftangbioye sènjichamó chentšáftaca? <sup>18</sup> Tito sènjanimpadá tšèngaftanga jányama chaotsama, y cháftaca sènjnichmó chë inya bèngcá Cristbeyeca bèngbe catšata. ¿Nderado Tito tcmojaingñe? ¿Ndoñe ndegombre yondmèna, Tito y atše cachcá fstsjuabná y fstsboše y cachca soyènga jtsamèse fstsiyena? Ndegombre chca endmèna.

<sup>19</sup> Nderado tšèngaftanga šmojtsjuabná bènga jenéuyanama chca cbojtsètsètná ca; pero ndoñe chca quenátsmèna. Inyètsá, bènga Cristoftaca canýiñe mo canýacá entsàngcá, Bèngbe Bètsabe delante fsèntsoyebuambná, y lempe ntšamo tijayancá, Jesucristbeyeca atšbe bonshana catšátanga, tšèngaftangbe tšabiama tijayana, Cristbeñe corente chašmotsòšbuáchema y ainaniñe bèts añemo chašmotsebomnama. <sup>20</sup> Er atše sèntsauatja, atše jányama chajá ora, ndoñe chachondányena ntšamo tšbošcá, y tšèngaftanga atše ndoñe chašmondínýena ntšamo šmojtsebošcá. Sèntsauatja nderado bacna soyènga šmattsama: jt-senpenzentserana, inýengaftaca yapa jt-senántšabošana, ndayánaca rábiaca jtsamana, nje tšèngaftangbiama

tšabe soyënga jtsebomnama jtsebošana, ñyëngbiana podesca ichámuana, uayátsenayënga jtsemnana, ñyëngbiana cachënga más uámanënga jtse nobiamnayana, y nyëtscanga ndoñe cachcá ntsejuabnyana. Chca chacboján'yëñese, tšëngaftanga ndoñe quešmochátsbošëna jóyëngacñana ntšamo tšëngaftanga jucácanama atše šochtsemncá. <sup>21</sup> Atše sentsauatja, cachiñe jányama chají ora, atšbe Bëtsá chaoma atše chaitšëuatja chca šmojtšamama, y chašotsemna puerte ngménaca jošachnama ba tšëngaftangbiana, ndëmuanyënga ya baytë bacna soyënga imojtsama y chca juabnyana ndoñe tmonjatrocá, y ndoñe tmonjabaná chë bacna soyënga boyabása o shembásaftaca jtsamama juabnyana, y chca soyënga jtsamana y nyëtsca bacna soyënga jtsamana, jenomándama ntsobencá.

## 13

### *Ñyë soyëngama jábuayenama y jádišoŕftama*

<sup>1</sup> Móraca ya unga soyama tšëngaftanga jányama chanjá. Atše chajíshjango ora, tojtseytëse chanjayana ntšamo báseftanga tmojamcá tšabá o ndoñe tšabá bëtsemnana. Nda bacna soye ntšamo Moisesbe leyíñe endëmandancá tojama ora, atše chanjayana cha ndoñe tšabá tonjama ca; pero útata o únganga tmojtsemnëse, chënga chamuayanama cha ndegombre chca tojamama. <sup>2</sup> Atše tempo sënjanabuayená, chë tšëngaftanguentsënga bacna soye tmojánamënga y chë ñyënga, atše šojtsanmëna jácastigana, chca soyënga amana ndoñe tmonjábananga. Mora, tšëngaftangbentsana bënoca sëntsemna ora, cachiñe cachcá cbëtëtabuayená, ntšamo sënjanamcá chë tšëngaftangaftaca uta soyama sënjamna ora: atše cachiñe jányama chajase, ndoñe quichatslesëncia bacna soyënga chašmotsamama y chama ntjacastigacá jatabáshejuanana. <sup>3</sup> Atše chca chanjama, er tšëngaftanga šmotsenguá ndayánaca tšabá chacmin'yëma Cristo atšbiajana yoyebuambnama. Cristo ndoñe quenátsmëna mo canya obenana ndbomnacá, ntšamo tšëngaftangaftaca cha tojamama; ndayá chabe bëtš obenana tšëngaftangbeñe bëtscá jtsin'yánayana. <sup>4</sup> Er cha tmojanrucificá mo canya obenana ndbomnacá; pero mora, Bëngbe Bëtsá puerte obená bëtšómñeyeca, cha tojtayena. Cachcá bëngnaca, cháftaca canyíñe mo canyacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtsá puerte obená bëtšómñeyeca, tšëngaftanga jtsaservënama.

<sup>5</sup> Tšëngaftanga cada ona šmochjšhénojuaboje, tšabá jtsetatšëmbuama mocna entsanga bëtsemnana, jtsetatšëmbuama aífë o ndoñe sempre Crístbeñe puerte tašmuetsošbuáchema. Šmochjšhénojuaboje chca šmošbuáchema ntšamo šmojtsemnana y tšabá ñyënga šmochjín'yíyie. ¿Ndoñe šmondëtatšëmo Jesucristo tšëngaftangbe ainaniñe yoyenama? Ndoñesna, tšëngaftanga ndegombre ndoñe Crístbeñe ošbuáchiyënga šmontsemna. <sup>6</sup> Pero atše sentsobátmana tšëngaftanga ndegombre chašmotsejuabnama bënga Jesucristbe ndegombre ichmónënga ftsmënama. <sup>7</sup> Y Bëngbe Bëtsá fsëntseimpadana bacna soye ndoñe chašmondëtsamama, ndoñe chë Jesucristbe ndegombre ichmónënga ftsmënama tšëngaftanga jin'yán'yiyama, ndayá ntšamo tšabá yomncá chašmotsamama. Nyëtscanga chca tmojtšamëse, nántsin'yina mo Crístbe ndegombre ichmónënga bënga ndoñe cuabndmëncá, er chca ndoñe tašuatátëjaboto jin'yán'yiyana ntšamo bënga bëngbe mándoca ftsmënama mo ichmonëngcá, tšëngaftanga jábuayenama. Pero chë soye tondayana šattsentsamama, <sup>8</sup> er bënga queftsátobena tondaye jamana Bëngbe Bëtsabe ndegombre soyëngama contra; nyë ntšamo chabe ndegombre soyënga yomncá aífë. <sup>9</sup> Bënga fsëntseboše ntšamo tšabá yomncá tšëngaftanga chašmotsamama, er bënga oyejuayënga fchandbëtsemna, bënga mo chë obenana ndbomnëngcá ftssemna ora, bëngbe mando jácastigama ntjatin'yán'yaycá, y tšëngaftanga ainaniñe bëtš añémoca šmojtsemna ora y puerte tšabá šmojtšenománda ora. Bënga Bëngbe Bëtsá fchandbëtseimpadana, chca bacna soyënga amana jtsajbanase, chašmobená jtsemnana nyëtsca soyënguñe tšábënga, y lempe ntšamo tšëngaftanga chašmotsemnana Bëngbe Bëtsá yobošcá. <sup>10</sup> Quem tšbuanácha chontšëbuabiamná tšëngaftangaftaca cabá ndoñe sëntsemna ora; chca, atše choye chají ora ndoñe chašondëtsemna jabuache jucácanana, mo canya puerte mandayacá, ntšamo Bëngbe Utabná šojanbemcá, tšëngaftanga jujabuáchama chábeñe corente chašmotsošbuáchema y ainaniñe bëtš añemo chašmotsebomnama, y ndoñe tšëngaftanga jatapochócama.

<sup>11</sup> Morna, Jesucristbeyeca atšbe catšátanga, tšabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Šmochjouena ntšamo tconjabuayenacá, nyëtscanga cachcá šmochtsejuabnaye, nyëtscangaftaca natjëmbana šmochtsiyena, y Bëngbe Bëtsá, chë cmondababuan'yëshaná y tšëngaftangbe ainaniñe tšabe ebionana chašmotsebomnama endamá, tšëngaftangaftaca echántsemna. <sup>12</sup> Nyëtscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondëtsacheuanaycá. <sup>13</sup> Nyëtsca quem luaroca ošbuáchiyënga cmontsacheuaná.

<sup>14</sup> Atše, Běngbe Bětsá sěntseimpadana, Běngbe Utabná Jesucristo chaoma, nŷetsca tšěngaftangbeñe tšabe bendicioněnga chaotsemnana. Běngbe Bětsabe bonshánana sempre chašmotsóbomñe, y Uámána Espírítu sempre chašmotsóbomñe, y chě Uámána Espírítóftaca cánŷiñe mo canŷácá chašmotsomñe.

## Gálatas

### *Pablo Galacia luaroca ošbuáchiyënga jacheuayama*

<sup>1-2</sup> Atše Pablo, quem tsuanácha séntsabiamná Jesucristbeñe ošbuáchiyëngbiama, chë Galacia luaroca ošbuachiyëngcá enefjuanëngbiama. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnana. Ndocna entšá chešnatánabuayana atše Cristbe ichmoná jtsemnana; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë inyënga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná. <sup>3</sup> Atše séntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnana, y chaboma tšëngaftangbe ainaniñe tšabe ebionana chašmotsebonmna. <sup>4</sup> Cristo chabe derecho vida jtšobomñama cachcá tojanonýa y tojanóbana, bëngbe bacna soyënguentsána játsebacama, y bënga chamotsobena jtšiyenama ndoñe ntšamo quem tempo entšanga imoyencá, puerte bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá. <sup>5</sup> Nyetscanga nyetsca tescama Bëngbe Bëtsá chamotsatschuaná. Chca chaotsemna.

### *Nyë canyë ndegombre buayenana soyënga Cristbiana endmëna*

<sup>6</sup> Atše ainanoca inyëtšá šontsebiona, er nda nanjouena, tšëngaftanga nyë baseftayshinyë y ya juabna šmojatstrocá y Bëngbe Bëtsá stëtšoye šmojtsequedá, nda tšëngaftanga tcmojáchembo chabe entšanga chašmotsemnana. Cha chca tojanma Cristbeyeca, er mua puerte tšabia tšëngaftangaftaca enjamna. Tšëngaftanga Bëngbe Bëtsá stëtšoye šmojtsequedá, inyëngbe buayenana soye jouenama, y chë inyënga jtšichámuana chë buayenana soyënga chë tšabe noticiënga canmëna ca. <sup>7</sup> Ndegombre, ndoñe quenátsmëna inyë ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiana tšabe noticiënguentšë, ba ndegombre soyënga jtsejuánama, inyë soyënga jacjayama. <sup>8</sup> Nderado bënga o canyë celoca ángel soyënga cmojtsabuayinyá, y ndoñe tontsemna mo chë tšabe noticiënga bënga tempo tbonjanabuayenacá, as chë chca tojtsamabiama ¡Bëngbe Bëtsá chaoma infiernoca becá chaosufrima! <sup>9</sup> Tempo ya chca sënjánayana; mora cachñe šcutëtayana: Nderado nda soyënga cmojtsabuayinyá, y ndoñe tontsemna mo chë tšabe noticiënga, ntšamo tempo šmonjanoyëngacñëcá, ¡Bëngbe Bëtsá chabiama chaoma infiernoca puerte chaosufrima!

<sup>10</sup> Atše chca stjayana ora, tšëngaftanga cmojtsinýana atše soyënga stsama entšanga oyejuayënga átšeftaca chamotsemnana? Ndoñe chca quenátsmëna. Atše séndboše ndayá Bëngbe Bëtsá átšeftaca oyejuayá chaotsemnana. Entšanga oyejuayënga chamotsemnana, atše cabá soyënga stsamëse, atše ya ndoñe Cristbe canyë oservená stsemna.

### *Ntšamo Bëngbe Bëtsá Páblëbïoye tbojanchembo, Jesucristbe ichmoná jtsemnana*

<sup>11</sup> Atše séntseboše tšëngaftanga, Jesucristbeyeca atšbe catšátanga, chašmotsetátšëmbo chë tšabe noticiënga ntšamo séndabuayinyacá quem laurentšá entšangbe juabnentšana ndoñe yondóbocanama. <sup>12</sup> Ndocna entšá chë tšabe noticiënga chešnatanbuayená, ni chešnatanbuatëmbá, ndayá cach Jesucristo šonjaninýinyë.

<sup>13</sup> Tšëngaftanga šmojátatšëmbona ntšamo atše tempo tsjanamana jtšiyenana, ntšamo judiënga Bëngbe Bëtsá mondadorancá atše cha sënjanadorana ora, ntšamo atše becá tsjanamama chë ošbuachiyëngcá enefjuanënga puerte chamosufrima, y ntšamo atše becá tsjanamama ndocná Jesucristbeñe chaondëtsošbuáchemá. <sup>14</sup> Atše inyë judiënga cach atšcá uata bomnëngbiama más sënjánama Bëngbe Bëtsá adórayiñe, ntšamo judiënga cha jadórana monduamancá, y atše nyëts añémoca tša sënjantšëna jtšamama ntšamo bëngbe bëtš taitanga básenga jabuátambama monjanamancá. <sup>15</sup> Pero Bëngbe Bëtsá atšbe tšabiama yojanjuabná, y chíyeca, atše cabá ndonýna ora, canyë bëtš soyama cha šojanbocacá. <sup>16</sup> Y cha tojánbošëna ora, šonjaninýinyë ntšamo ndegombre chabe Uaquñá yomnana, y šonjanchembo. Cha chca tojanma, atše chë tšabe noticiënga ndoñe judiëngbeñe chayábuayenama. Y atše ndocnábiyoye chiyataná ndayá jamama šojtsanmënama chašobuayenama; <sup>17</sup> y Jerusalenoye cach ndoñe chiyataná chë atšbiana más natsana Jesucristbe ichmónënga imojamñëngaftaca jencuëntama. Chamna, cachora Arabia uabaina luaroye séntsanoye, y chentšana Damasco bëtš puebloye séntana.

<sup>18</sup> Jesucristbeñe jtšošbuáchiyama sënjanóntša orscana, unga uatëse Jerusalenoye sënjáná Pédroftaca jencuëntama, y cháftaca nyë uta semana sënjëftsemna. <sup>19</sup> Y ndocna chë Jesucristbe inyë ichmónënga chíyáisananyë; nyë Santiago añë, Bëngbe Utabnabe catšata. <sup>20</sup> Bëngbe Bëtsá sontsonýá, ntšamo tšëngaftanga cbontsëtsëtnacá ndegombre bëtsemnana.

<sup>21</sup> Jerusalenocana sējñéftsanbocentšana, Siria y Cilicia luarēngoye sējñána. <sup>22</sup> Pero chē tempo, chē Jesucristbeñe ošbuáchiyēnga Judea luariñe bomiñyeca ndoñe quešmējñatanábuatma. <sup>23</sup> Nye inyēngbioye imojtsayaunana: “Nda tempo bēnga puerte chamotsesufrínama enjanamá, mora entšanga entsabuayiyiná, Jesucristbeñe jtsosbuáchiyama caojtsamna ca. Y tempo cha tša enjánboše jamama entšanga Jesucristbeñe ndoñe chamondétsosbuáchemá ca” —chēnga imojtsichamo. <sup>24</sup> Y entšanga Bēngbe Bētsá imojtsatschuanaye, ndayá cha atšbiajana tojanmama.

## 2

### *Chē inye ichmónēnga tmojánayana Pablo aīñe tsabá yojtsama ca*

<sup>1</sup> Jerusalenoye sējñána orscana bnētsana canta uatēse, cachiñe choye sēñjesaná. Bernabé šonjantjēmbambá, y Tito bēndátaftaca fsējñéftsanbetse. <sup>2</sup> Choye sējñána, choye jama šojamnama Bēngbe Bētsá šonjaninñanyéyeca. Atše nye chē Jesucristbeñe ošbuáchiyēngbiama uámanēnga imojamnéngaftaca sēñjanencuentá, inyēngaftaca ndoñe; y chē tsabe noticiēngama chē ndoñe judiēngbeñe sēndabuayiyinama chēnga sēñjanacuntá. Chca sēñjanma atše jtsetatšēmbuama, ntšamo tijanma y sējñéftsamcá ndoñe nye bonamente yonjamnama. <sup>3</sup> Pero chēnga tmojánayana atše aīñe tsabá tijanma ca, y Tito, chē átseftaca enjamná, masque Grecia luarocá enjamna, chēnga ndoñe chematanmandá base bobachtema chē más delicadentše tētšená chaotsemnama, ntšamo judiēnga monduamancá, Bēngbe Bētsábēnga imomnama chaotsinñyama. <sup>4</sup> Chca tonjanopasá, masque inyēnga monjánboše Tito base bobachtema chē más delicadentše tētšená chaotsemnama. Chēnga tmojánayana bēngcá Jesucristbeñe ošbuáchiyēnga imojamna ca, pero ndoñe chca quemēñjatsmēna. Chēnga chē Jesucristbeñe ošbuáchiyēngaftaca tmojanenutaná, ndayá yojtsanopasánama chē ošbuáchiyēnga ntsetatšēmbcá, mo chē ošbuáchiyēngbiama bacna soyēnga jamama cuafseitēmena cuenta. Chēnga tmojánabo jtsetatšēmbuama ntšamo Jesucristo bēnga atsebácanēnga šojánabiamama, chē judiēngbe leyēngaca ndēmandánēnga, cháftaca cánñiñe mo canñyáca jtsemnēse. Chēnga chca tmojanma, er chēnga imojtsanboše jamana, bēnga chē judiēngbe leyēngaca nyets tempo mandánēnga chamotsiyenama. <sup>5</sup> Pero bēnga ndocna ora fchiyátanayana aīñe ca chē ntšamo chēnga monjánichamo bēnga šojánamna jamama soyēngama, er bēnga becá fsējñánboše tsēngaftanga nyets tempo Jesucristbe ndegombre tsabe noticiēnga chašmotsóbomñama.

<sup>6</sup> Pero chē ndēmuanñyēngbiama entšanga monjánichamo chē uánatsanēnga imojamna ca (ndayá chēnga tempo imojamna atšbiama ndoñe quenatámana; Bēngbe Bētsabiama nyetscanga cachcá monduámána), chēngna tondaye chešmatanbuayená, ntšamo tempo tijanmama inyētšá chaimama. <sup>7</sup> Masna, chēnga tmojánatšēmbona, Bēngbe Bētsá chē tsabe noticiēnga ndoñe judiēnga jábuayenama trabajo atše jamama šojanēntšabuáchemá, ntšamo judiēnga jábuayenama cachcá Pédrēbioye tbojanēntšabuachecá. <sup>8</sup> Er Bēngbe Bētsá atše chabe ichmoná šonjánbema, ndoñe judiēnga chabiamá jábuayenama, ntšamo cachá Pédrēbioye chabe ichmoná tbojanbemcá, judiēnga chabiamá jábuayenama.

<sup>9</sup> Santiago, Pedro y Juan, chē ošbuachiyēnguentša uánatsanēnga, atše canye bēts trabajo chaitsebomnama Bēngbe Bētsá tojanmama tmojánatšēmbona ora, cucuatše šontanatšataye atše y Bernabēbioye, jinñinñiyama chēnga šojanēbuajama mo cachēngbe trabajo amatcá. Y fsēñjanenoyeuná bēndata jama, masna ndoñe judiēnga jtsabuayiyayama trabajo jamama, y chēngna judiēngbeñe. <sup>10</sup> Chēnga nye šonjanaimpádaye chē ošbuáchiyēnga ndbomñéjémēnga Jerusalenoquēngbiama jtsenójuabnayama; y atše bētscá séntsama chēnga jujabuáchama.

### *Pablo Antioquioca Pédrēbiamá tojánayana cha ndoñe tsabá tojanma ca*

<sup>11</sup> Pero Pedro Antioquiá bēts puebioye tonjánabo ora, chabe delante sējñánayana cha ndoñe tsabá tonjanma ca, er ntšamo enjanamcá ndoñe tsabá quenjatmēna. <sup>12</sup> Mēntšá tonjanopasá: Santiago básefta entšanga Antioquiotoye tojanichmó, pero chēnga cabá choca ndáshjajna ora, Pedro yojanamana chē ndoñe judiēnga ošbuáchiyēngaftaca jtsesayana. Pero chē entšanga tmojánashjajñentšana, Pedro tojtsanajbaná chēngaftaca sayana y encuentayana. Cha chca tojanma, ntšamo chē ndoñe judiēnga ošbuáchiyēnga, chē base bobachtema chē más delicadentše tētšenēnga jtsemnnama yojánamna ca tmojánayanēnga, chabiamá muanjájuaoboyama yojsauatja causa. <sup>13</sup> Chē inye judiēnga ošbuachiyēngnacá tmojanontšé amana cachcá ntšamo Pedro yojsamcá, jtsamēse ntšamo chēnga imojántatšēmbó chca jamama ndoñe yonjanamncá. Y Bernabénaca, ntšamo chēnga imojtsamcá jtsonñayēse, chēngcá yojsama, jtsamēse ntšamo cha yojántatšēmbó chca jamama ndoñe ibonjamncá. <sup>14</sup> Chēnga ndoñe quemēñjataniyena jtsamēse ntšamo yojanamncá, ntšamo chē Jesucristbe tsabe noticiēnguentša ndegombre soyēnga endmēncá. Chca sējñaninñe ora, Pédrēbioye nyetsca ošbuáchiyēngbe delante sēñjanayana: “Aca canye judío, mo ndoñe judío bendmēncá

cojtsiyena, y ndoñe ntšamo chë judiënga jamama monduamancá; chcasna, ¿ntšamo cañjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

*Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchem*

15 Bënga judiënga fsëndmëna, bëngbe bëtsëtsanga judiënga monjámmayeca, y ntšamo judiënga chë ndoñe judiëngbiyoye mondubobuatmcá, chë “bacna soye amënga ca”, ndoñe queftsátmëna. <sup>16</sup> Y bënga mondëtatšëmbo, canyë entšá Jesucristbeñe tojtsošbuáchem, Bëngbe Bëtsá jamana cha chabe bominýiñe tšabia chaotsemnana, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entšá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominýiñe tšábënga chamotsemnana, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canyë entšá chabe bominýiñe tšabia chaotsemnana, ntšamo chë judiëngbe leyënguiñe iuayancá jamama ibomna ca cha tojamama.

17 Pero, bënga bëtscá mondënguá, Bëngbe Bëtsá chaomama bënga chabe bominýiñe tšábënga chamotsemnana, bënga Cristoftaca cánýiñe mo canýacá jtsemnëse, chábeñe imošbuáchem. Chca mondošbuaché, bënga chë bacna soyëngama perdonánënga chamotsemnana. Pero inýe entšanga jtsichámuana bënga bacna soyënga amënga imomna ca, ntšamo chë Moisesbe leyiñe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¿Ndoñe, ndegombre ndoñe! <sup>18</sup> Atše, ntšamo Bëngbe Bëtsá šojaninýinýecá, chë šojtsemna jájbanama soyënga, cachiñe jajuaboyama y jamama stëtontëse, mo chë Moisesbe ley jtsocumplínana perdonánënga jtsemnana, atše stsemna mo nda ndayá cachá tojtsembema y cachiñe tojtëtsjebuanacá; y ndegombre, atše stsemna canýa ntšamo ndoñe tšabá yondmëncá amá. <sup>19</sup> Chë judiëngbe leyëngaca atše sëndëtatšëmbo, ntšamo chë leyënguiñe iuayancá stsamëse, Bëngbe Bëtsá ndoñe yochanjama atše chabe bominýiñe tšabia chaitsemnana; y chca, atše jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbocaná jtsemnana. Chë lëyeca ndoñe más mandaná ntsemnana jtsebošëse, atše cachá chë ley sënjanonýá, Jesucristbeñe jtsošbuáchiyama; y chca, atše chaitsobena jtšiyenana Bëngbe Bëtsá jtšeservëse. Atše Cristoftaca cánýiñe mo canýacá sëndmënyeca, Cristo cruciñe tojanóbana ora enjamna mo átnaca cuafjobancá; <sup>20</sup> y mora entsemna mo nýe atše y ndoñe cuafjtsiyencá, Cristo becá vida atšbe ainaniñe entsebobmnyeca. Y ntšamo mora atše vida sëntsebobmncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtšobomñama cachá tojanonýá y atšbe tšabiamna tojanóbana. <sup>21</sup> Atše ndoñe quetsátobotena ntšamo Bëngbe Bëtsá entšangbe tšabiamna juabna yobomncá. Nderado Bëngbe Bëtsá tojama canyë entšá chabe bominýiñe tšabia chaotsemnana, ntšamo chë leyiñe jamama yomna ca iuayancá cha tojtsamama, as Cristo nýe tondayama matëñjanóbana.

### 3

*Ley jtšobedecëñe o Jesucristbeñe jtsošbuáchiyëse*

<sup>1</sup> ¿Tšëngaftanga Galacientša entšanga, yapa ndenójuabnáyënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana chonjanabuayinýá, Jesucristo cruciñe tojanóbana. <sup>2</sup> Atše sëntseboše nýe canyë soye atše chašmëyana: ¿Uámana Espiritu tšëngaftangbe ainaniñe tojanamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchem? <sup>3</sup> ¿Ndáyeca tša ndenójuabnáyënga šmomna? Bëngbe Bëtsabe Espiritbeyeca tšëngaftanga šmonjanontë mo tsmëma entšangcá jtsemnana. ¿Y mora šmojtseboše tšëngaftangbe vidënga jachnënguama nýe entšangbe juabnëngaca jtšiyenëse? <sup>4</sup> ¿Nýetsca soyënga ndáyëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna. <sup>5</sup> Bëngbe Bëtsá, chë Uámana Espiritu tšëngaftangbe ainaniñe cháumashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyiñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchem?

<sup>6</sup> Menójuabonga ntšamo Abraham tojanpasama. Bëngbe Bëtsabe uabemana palabrënguiñe mëntšá endayana: “Cha Bëngbe Bëtsábeñe yojtsošbuáchiye, y chiýeca Bëngbe Bëtsá tonjánayana cha chabe bominýiñe tšabia yojamna ca.” <sup>7</sup> Chiýeca tšëngaftanga cmontsamna jtsetatšëmbuana, Bëngbe Bëtsábeñe ošbuáchiyënga mondmëna mo Abrahábentšana entšangcá, cachá ošbuáchiyana bëtsebobmnama, chë chábensana ndegombre entšangbiama más. <sup>8</sup> Bëngbe Bëtsabe uabemana palabrënguiñe endopodena jualiama, Bëngbe Bëtsá yochjanma chë ndoñe judiënga chabe bominýiñe tšábënga chamotsemnana, chábeñe

tmojtsosbuáchemá ca. Y Bèngbe Bètsabe uabemana palabrénguiñe, cabá chca ndéma ora, Bèngbe Bètsá Abrahámioye quem tsabe noticiènga tbojanbuayená: “Acheyeca, atše chanjama nyetsca quem luarentša entsanga tsabe bendicionènga chamotsebomnama ca.”<sup>9</sup> Bèngbe Bètsá tojanma Abraham ba tsabe bendicionènga chaotsebomnama, cha chábèñe yojtsosbuáchemá. Chca, Bèngbe Bètsá, chábèñe ošbuachiyéngbiámnaca ba tsabe soyènga jamana, cachá ntšamo Abrahambiana tsabe soyènga tojanmá.

<sup>10</sup> Chè Bèngbe Bètsá chabe bominiñiñe tsábenga yochjábiamá ca juabnayènga, ntšamo leyíñe jamama yomna ca iuayancá lempe tmojtsobedecénama, chénga nyets tempo jtsiyenana jtsatatsèmbèse Bèngbe Bètsá nyetsca tescama chénga yochjácastigayama. Er Bèngbe Bètsabe uabemana palabrénguiñe mèntšá endayana: “Bèngbe Bètsá jayanana nyetsca tescama castigo chaotsebomna ca, nda nyets tempo ndoñe tontsama nyetsca mandènga ntšamo chè leyènguiñe iuabemancá ca.”<sup>11</sup> Ndegombre, puerte tsabá entsinñiyèna, Bèngbe Bètsá ndoñe yochanjama ndocná chabe bominiñiñe tsabia chaotsemnama, ntšamo chè leyíñe jamama ibomna ca iuayancá tojtsobedecénese. Chca ndegombre endmèna, er Bèngbe Bètsabe uabemana palabrénguiñe mèntšá endayana: “Nyè ndabiamá Bèngbe Bètsá tojama chabe bominiñiñe tsabia chaotsemnama, cha Bèngbe Bètsabèñe betsošbuáchemá, cha ndegombre chè nyetsca tescama yomna tsabe vida echántsebomna ca.”<sup>12</sup> Jtsamana ntšamo chè leyènguiñe jamama yomna ca iuayancá, ndoñe quenátsmèna mo Bèngbe Bètsabèñe cuaftsošbuachecá. Ntšamo Bèngbe Bètsabe uabemana palabrénguiñe endayancá: “Nda tojtsama nyetsca mandènga ntšamo chè leyènguiñe endayancá, tsabe vida echántsebomna, nyets tempo chè leyèngaca mandaná ca.”

<sup>13</sup> Pero, Cristo jóbanama ibojamna ca tmójányanama, y cha bèngbe causa chca chamomama chénga tojanalesénciayeyeca, Cristo tojama bènga nyetsca tescama castigánènga ndoñe chamondètsemnama, ntšamo chè leyíñe iuayancá ndoñe tmontsama causa. Ntšamo Bèngbe Bètsabe uabemana palabrénguiñe endayancá: “Nyetsca tescama castigo chaotsebomna, nda canye niñèšiiñe tmojajonýa chaóbanama cha ca.”<sup>14</sup> Chca tojopasá, Bèngbe Bètsá chaomama, chè tsabe bendicionènga ntšamo cha Abrahámioye tbojanšbuachenacá, ndoñe judièngnaca chamotsebomnama, Cristo Jesúsbeyeca; y Jesucristbèñe ošbuachiyánaca, Bèngbe Bètsá chaomama chè Uámana Espiritu bèngbe ainaniñe cháuamashèngo jtsemándayama, ntšamo Bèngbe Bètsá tojanašebuachenacá.

*Ndocna ley quenátobena Bèngbe Bètsabe šbuachenana soye jatrócama*

<sup>15</sup> Jesucristbeyeca catsátanga, chè ndayá séntsicamcá endmèna ntšamo nyets tempo entsángbèñe endbetsopasancá. Uta entsáta tbojenoyeuná canye trato jénbemama, y ntšamo tbojenšbuachenacá chaotsinñinama chatbe uabaina tsbuanáchañe tbojuábemèse, ndocná inya más ntsoberenama jayanana ntšamo tbojentratacá ndoñe yontsoserverna ca; y inye soyènga chiñe jacjayama cach ndoñe.<sup>16</sup> Chcasna, Bèngbe Bètsá ba soye Abrahámioye tbojanšbuachená puerte tsabe bendicionènga chabiamá jamama, y chabe entsanguentšana canyabiámnaca. Y Bèngbe Bètsabe uabemana palabrénguiñe ndoñe quenátayana: “chabe entsanguentšèngbiámnaca ca”, mo Bèngbe Bètsá ba entsangbiama cuaftsicamcá; sinó mèntšá endayana: “acbe entsanguentšana canyabiama ca”. Y chca entsayana, nyè canye entsá ca; y cha endmèna Cristo.<sup>17</sup> Atše ndayá mèntšá chontsètsètsná: Natsana, Bèngbe Bètsá Abrahánoftaca canye trato tojánbema, y tbojaniana “aíñe ca”, ntšamo tbojanšbuachenacá jamama. Chentšana canta patse y unga bnètsana uatèse, Bèngbe Bètsá Moisesbe cucu-atšiñe chè leyènga tbojanántšaboshjona; chíyeca, chè leyènga ndoñe ntsoberenama jamana chè Bèngbe Bètsá Abrahánoftaca tojánbema trato ndoñe chaondètsoservernema, ni jamana ndayá Bèngbe Bètsá tojanšbuachenacá ndoñe chaondètsoservernema.<sup>18</sup> Er ndayá Bèngbe Bètsá chabe entsanga tojatsatacá, tojsemna chénga ntšamo chè leyíñe jamama yomna ca iuayancá tmojtsamama, chca, chè tšetana soyènga ya ndoñe nantsóbocana ndayá Bèngbe Bètsá jamama tojanašebuachenantšana. Pero ba tsabe bendicionènga Abrahambiana jamama, Bèngbe Bètsá tbojanšbuachenáyeca, Bèngbe Bètsá chè soyènga Abrahambiana tojanma.

<sup>19</sup> Asna, ¿ndayama chè Moisesbe ley nantsoserverna? Bèngbe Bètsá chè leyènga tojanáboshjona, ba tsabe soyènga jamama Abrahámioye tbojanšbuáchenantšana baytese. Bèngbe Bètsá yojanjuabná chè ley chaoservé entsanga jinñaniñiyama ndayá tsabá o ndoñe tsabá jamama bètsemnama, chè Abrahámèntšana Uámana Entšá jashjanguèntscuana, ndabiamá Bèngbe Bètsá Abrahámioye tbojanšbuachená ba tsabe bendicionènga jamama. Bèngbe Bètsá angelèngaftaca chè ley Moisesbe cucuatšiñe tbojanántšaboshjona, y chè entsá Moisés enjamna chè oyebuambnayá Bèngbe Bètsáftaca y entsángaftaca.<sup>20</sup> Uta entsáta canye trato jénbemamna, jtseytana inye entsá chè uta entsátaftaca chaóyeuambama; pero Bèngbe Bètsá Abrahámioye ba tsabe soyènga jamama tbojanšbuachená ora, nyè canya chca tojanma, y ndoñe bonjanájaboto inya chabiamá Abrahánoftaca chaóyeuambama.



### *Ndayama chë ley yomna*

<sup>21</sup> ¿Chca nántsayana, ntšamo Moisesbe leyiñe iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entsangbe cucuatšifne canye ley tojanáboshjona, y chë ley tojtsovena jamana entsanga ndegombre tsabe vida chamotsebomnama, as Bëngbe Bëtsá nanjama entsanga chabe bominyiñe tsábenga chamotsemnama, ntšamo chë leyiñe jamama yomna ca iuayancá tmojtsamama. <sup>22</sup> Pero Bëngbe Bëtsabe uabemana palabrenguiñe endayana, nyetsca quem luarentša entsanga cachëngbe bacna soyënga jamama juabnëngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jójëngacñama. Y chënga, Jesucristbeñe imojtsošbuáchema imojtsebomna ndayá Bëngbe Bëtsá tojanášbuachenacá.

<sup>23</sup> Jesucristbeñe jtsošbuáchiyama entsanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárcelca utámenënga. Chë ley chca enjamna, ntšamo entsanga Jesucristbeñe muanjobenaye jtsošbuáchiyama Bëngbe Bëtsá jinñanyiyama tempo joshjanguëntscuana. <sup>24</sup> Cristo jabama tempo tonjanoshjanguëntscuana, chë ley bëngbiam enjamna mo canye pamillentsa oservenacá, cha jtsamana chentša básenga chamotsamama ntšamo tsabá tojtsemncá. Chë ley chca yojamna, bënga Crístbeñe jtsošbuáchiyama chamobenama, y chca, Bëngbe Bëtsá chaoma bënga chabe bominyiñe tsábenga chamotsemnama. <sup>25</sup> Pero Jesucristbeñe jtsošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canye entsacá, ndayá tsabá yomncá bënga chamotsamama cuaftsamcá. <sup>26</sup> Cristo Jesúseñe šmojtsošbuáchema, nyetsca tsëngaftanga šmojobená Bëngbe Bëtsabe básenga jtsemnama, Cristo Jesúseftaca cányiñe mo canyáca jtsemnëse. <sup>27</sup> Tsëngaftanga tcomjanëbaya, y chca, Crístoftaca cányiñe mo canyáca šmontsemna. Y mora šmojobená mo cach Crístcá jtsemnama. <sup>28</sup> Chýyeca, ndayá Bëngbe Bëtsá tojamama, judiënga y ndoñe judiënga cachcanga mondñënga; nyets tempo nye inñabiam oservenënga y chë nye cachëngbiam trabájayënga cachcanga, y boyabásenga y shembásëngnaca. Nyetsca tsëngaftanga mo canyáca šmondñëna, Cristo Jesúseftaca cányiñe mo canyáca jtsemnëse. <sup>29</sup> Tsëngaftanga Crístbe entsanga šmondñënyeyeca, šmontsemna mo Abrahábentšana entsanga cuaftsemncá; y chca, ntšamo Bëngbe Bëtsá Abrahábioye tojašbuachenacá, tsëngaftanga šmochanjójëngacñe.

## 4

<sup>1</sup> Atšnaca sëntseboše jayanama, chë uaquiñá nda yochjójëngacñe ntšamo tbojtsotancá, ntšamo chabe taitá jatšetayama tojašbuachenacá, cha cabá mo canye basacá tojtsemnëntscuana, ndocna derecho chë soyënguiñe ntsebomnana; y chca, cha jtsemnana mo canya nyets tempo nye inñabiam oservenacá, masque lempe ntšamo chabe taitá tojašbuachenacá chë uaquiñabiam tojtsemna. <sup>2</sup> Chë uaquiñá tojtsobóchantscuana, entsanga jtsemnana ndëmuanyënga ntšamo cha tbojtsajabotcá jtsoinayana, y inyënga jtsejuabnayana ndayá chë taitabe soyëngaca jamama, chë uaquiñá otocana soyëngaca. Y chca jtsemnana, chë taitá tojayana tempëntscuana. <sup>3</sup> Mo cachcá cuaftsemncá, bënga chë ndegombre soyëngama cabá ndosértaye ora, bëngnaca mandánënga monjamna mo nyets tempo nye inñabiam oservenëngcá, quem luarentše imománda espirítëngaca. <sup>4</sup> Pero Bëngbe Bëtsá chabe Uaquiñá quem luaroye tbojanichmó, nya chama tempo tojanóshjango ora; cha mo nyetsca entsangcá, canye shembásabentšana tojanonñná, y yojoyena jtsamëse ntšamo judiëngbe leyiñe jamama ibojamna ca yojanayancá jtsamëse. <sup>5</sup> Quem luaroye chca tojánabo bënga jabátsebacama, y chamotsobenama Bëngbe Bëtsabe basëngcá jtsemnama, bënga chë tempo šonjánamna chë ley jtsobedecënanana. <sup>6</sup> Y chca, tsëngaftanga ya chabe básenga šmojtsemnama jinñanyiyama, Bëngbe Bëtsá chabe Uaquiñabe Espíritu tbojanichmó, nyetscangbe ainaniñe cháuamashënguama, y chë Espíritu endama bënga Bëngbe Bëtsá chamochembo, “Atšbe Taita ca”. <sup>7</sup> Mëntšá, cada ona tsëngaftanguentšá ya ndoñe quenátsmëna mo chë nyets tempo nye inñabiam oservenëngcá, quem luarentše imománda espirítëngaca mandánënga, y aife Bëngbe Bëtsabe basa tojoquedá. Y chabe basa tojoquedáyeca, lempe ntšamo Bëngbe Bëtsá chabe básenga jatšatayama tojašbuachenacá cha echanjójëngacñe.

### *Pablo, Galacia luaroquëngbiam ngmënaca vojtsanjuabnyae*

<sup>8</sup> Tempo, Bëngbe Bëtsá ndoñe šmonjanábuatma ora, tsëngaftanga šmojamna mo nyets tempo nye inñabiam oservenëngcá, ndoñe ndegombre diosënga mondñëna espirítëngaca mandánënga. <sup>9</sup> Pero mora, Bëngbe Bëtsábioye šmonsábuatma ora, o tsabá jayanama, Bëngbe Bëtsá cmojtsëbuatma ora, ¿ntšámoyeca tsëngaftanga cachiñe chë quem luarentše imománda espirítënga šmojtsayaunana? Chënga ndocna obenana quemátšbomna, y nduámanënga

mondmëna. ¿Ndayëca tsëngaftanga šmojtseboše cachiñe jtsemnana mo chë nyets tempo nye inýabiamã oservenëngcá, chë espiritëngaca mandánënga? <sup>10</sup> Tsëngaftanga tša jtsejuabnayanã diënguiñe, shinýënguiñe, canýe uatentša tempënguiñe y uatënguiñe, mo uãmãna tempëngcá Bëngbe Bëtsá tsábã jadórãna, y chama bëts fiestënga jtsebmõnãna. <sup>11</sup> Atše corente šontsengmëna, nderado atšbe trabajo tsëngaftangbeñe tondayãna tonjoservé.

<sup>12</sup> Jesucristbeyeaca atšbe catsátanga, bëtscã bcontsaimpadana, šmochtsiyenã jtsemëse ntšãmo atše sëndamcã, er átsnaca sënjobemã ntšãmo tsëngaftanga ndoñe judiënga šmondmëncã. Tsëngaftanga ndocna bacna soye atše chešatsborlá. <sup>13</sup> Tsëngaftanga šmondëtatšëmbõ, atše sënjanobenã chë natsana soyãna tsëngaftanga chë tsãbe noticiënga jábuayenãna, canýe šocana šonjanontšáshjãngo causa. <sup>14</sup> Atše canýe šocana sënjanõmna causa, tsëngaftangbiamã ndoñe paselo quenjãtsmëna tsëngaftangbeñe atše jofjãna; pero masque chca, tsëngaftanga ndoñe chešmatanaboté, ni quešmatanãboyënja; masna, tsëngaftangbeñe tsábã šmonjanõfja; šmonjanõfja mo canýe ángel Bëngbe Bëtsãbe ichonã šmojõfjã, o cach Jesucristbioyã. <sup>15</sup> Ndayã chora tsëngaftangta enjanõpasacã, puerte oyejuayënga tcmõnjãnabiamã. ¿Y mora ndayã tojõpasã? Ndegombre, atše sëndëtatšëmbõ y sëntsobenã jayanãna, tsëngaftanga ndayë sóynaca atšbiamã mašmënjãnmãna. Chë mãs uãmãna šmojãnbomna soyënga atšbe cucuatšinë mašmënjãnbõshjõna, y nýã mo chë hominýëngnãca masmënjãnenõbuchjãtsëca atše jatšetayãna. <sup>16</sup> Y morna, ¿ntšãmo ndegombre yõmncã cbojtsëtsësnãna, atšbiamã šmojtsejuabnã mo tsëngaftangbe uayayã cuaftsemncã ca?

<sup>17</sup> Chë ndoñe ndegombre soyënga buátëmbayënga montsinýinýnã mo tsëngaftangbiamã ndegombre tsábã chašmotsiyenãna cuaftsebošcã, pero chca ndoñe quenãtsmëna; ndayã jamãna imõjtsebošcã, tsëngaftangbiamã ndoñe tsábã quenãtsmëna. Chënga montseboše atšbe contra y atšbe buátëmbãna soyëngãna contra chašmotsemnãna, chentšãna tsëngaftanga chëngaftaca jtsemnãna chašmotsebošãna y chënga chašmotsababuányëshanãna. <sup>18</sup> Puerte tsábã endmëna atše y inýënga chãftstseboše tsëngaftangta amigüënga jtsemnãna, canýe tsãbe soye jamãna tojtsemnëse; y sempre chca chauëtsemnã, tsãbiamã tojtsemnëse, y ndoñe nýe atše chentše tsëngaftangta stsemnã ora. <sup>19</sup> Tsëngaftanga, chë atšbiamã mo atšbe basengcã šmondmëñënga, Jesucristbeñe chašmošbuáchemã tbonjanëjãbuácheyeca; atše cachiñe sëntsesufrinã tsëngaftangbe causa, ntšãmo canýe šësonã jtsebmõnãna ora canýe shembãsa jtseufrinancã; y atše chca chanjëftsesentina, ntšãmo Cristo endmëncã tsëngaftangbe vidinë ndegombre chãojtsebínýnëntscuãna. <sup>20</sup> Malayë atše, mora tsëngaftangta stsemnã, atše jobenayãna jinýañiyãna, cach tsëngaftanga jáuyanëse, ntšãmo ndegombre atše tsëngaftangbiamã tsësentinãna. Atše tša šontsecochëngmëna tsëngaftangbiamã.

#### *Ntšãmo Agar y Sãraftaca tojanõpasã*

<sup>21</sup> Canýe soye šmochjauyãna, tsëngaftanga chë Moisesbe léyëca mandánënga jtsemnãna šmojtsebošënga. ¿Ntšãmo chë leyinë endayãncã tacmojtsësertana? <sup>22</sup> Chiñe endayãna, Abraham uta uaqüñãta yojãnabamãna ca; cãnyãna Agãrbeñe, canýã chãbe shembiamã nyets tempo oservenã; y chë inýãna, cachãbe shëmbëñe, Sara, y mua ndocnabiamã nyets tempo oservenã yõjamnã. <sup>23</sup> Chë chãbe shembiamã nyets tempo oservenãbe šësonã, tojanonýnã nýe Abraham y Agar chca chaõtsemnãna tbojãnbõšenayeca; y cachãbe shembë šësonã tojanonýnã, Bëngbe Bëtsá chë soye jamãna Abrahãmbioyë tbojãnšbuachenayëca.

<sup>24</sup> Ntšãmo Agar y Sara, y chatbe šëšõnãtaftaca tojanõpasacã, bënga canýe uãmãna soye šontsabuatambã. Ndayã chë uta shembãsãtaftaca tojanõpasacã, uta trato entsinýinýnã: chë shembãsa Agar, chë nyets tempo nýe inýabiamã oservenã yõjamnã, entsinýinýnã chë trato Bëngbe Bëtsá y Israelõca entsãngtaftaca, chë Moisesõftaca Bëngbe Bëtsá leyënga entsãngbe cucuatšinë tojanãbõshjõna ora. Agar bãsënga yojtsabamãna ora, chëngnã tmojanonýnã nýe inýabiamã nyets tempo oservëñënga jtsemnãna, y chë tratentša leyinë soyëngaca mandánënga jtsemnãna tmojtsebošëngnãca jtsemnãna mo nýe inýabiamã nyets tempo oservëñëngcã. <sup>25</sup> Ndayã Agãraftaca tojanõpasacã entsinýinýnã chë Sinã batsjõca tmojãnbemã trato, Arabia luarõca; y chë morsca bëts pueblo Jerusalëñëncã entsinýinýnã, er chentšã entsãnga moutsemnã chë leyëngaca mandánënga. Ntšãmo Agar y chãbe bãsënga nýe inýabiamã nyets tempo oservëñënga monjamncã, Jerusalëñentšã entsãngnãcachcã chëngcã mondmeñã, chë leyëngaca nyets tempo mandánënga bëtsemnayëca. <sup>26</sup> Ndayã Sãraftaca tojanõpasacã, chë nýe cachabiamã trabãjaye shembãsa, entsinýinýnã chë trato, chë tsãbe bendicionënga Abrahãmbiamã jamãna chãbioyë tbojãnšbuachëna ora. Chãnãca entsinýinýnã chë Bëngbe Bëtsãbe bëts pueblo celõca, Jerusalëñ ca uabainã pueblo, er chë chentšë mochjõyënanãna, mora ndoñe quemuãtiyëna chë leyëngaca mandánënga. Chë Cristbeñe ošbuãchiyënga mondmeñã chë celõca bëts pueblo Jerusalëñentšë jõyënanãna, y chca, ndegombre chënga mondmeñã celõcamã entsãnga. <sup>27</sup> Chë celõca Jerusalëñ endmëna

chë ndegombre bëts pueblo chë Jesucristbeñe ošbuáchiyëngbiana, y chca endmëna mo canyë shembása šešona ndabamná y aíñe chaotsabamnana Bëngbe Bëtsá cuafjamcá. Quem luarentša Jerusalén endmëna chë uamana luare chë léyeca mandánënga imomnëngbiana, y chca endmëna mo canyë shembása aíñe boyaftaquécá, er Bëngbe Bëtsabe uabemana palabrënguifne chë shembásatbiana mëntšá endayana:

Shembása šešona ndabamná, y ndocna te tsetšanënga ndbomná šešona jtsebmomna, moyejuá y moyó oyejuayá cojtsemnana.

Chca moma, er aca, chë shembása chabe boyabiana utšená, chë shembása boyá bomnabiama más básenga cochántsabamna ca.

<sup>28</sup> Chcasna, Jesucristbeyeca atšbe catsátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámbyoe tbojanšbuachenáyeca; cachcá, tšëngaftángnaca šmojobená Bëngbe Bëtsabe básenga jtsemnana, Bëngbe Bëtsá chca tojanšbuachenáyeca. <sup>29</sup> Ntšamo chë tempo tojanopasacá, chë Isaac chaosufrima Ismael tojanmá (Ismael, Abrahambe uaquiñá Agárbeñe, chë nýe chata chca tbojánbošenayeca onýnaná; Isaac, chë Bëngbe Bëtsabe Espíritbeyeca onýnaná), mórncaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá. <sup>30</sup> Pero, çndayá Bëngbe Bëtsabe uabemana palabrënguifne Abrahambe básatbiana iuayana? Mëntšá endayana: “Moma, chë nýets tempo nýe ínýabiana oservená y chabe basa acbe yebntšana chábuaisebocnana, er chë nýets tempo nýe ínýabiana oservenabe šešona ndoñe quenátobena chabe taitabe soyënga jtsebmomna. Nýe chë propio shembe šešona aíñe, er chë shemna ndoñe nýe ínýabiana nýets tempo oservená quenátsmëna.” <sup>31</sup> Chcasna, Jesucristbeyeca atšbe catsátanga, bënga ndoñe quemuátsmëna mo canyá nýe ínýabiana nýets tempo oservenabe básenga cuaftsemncá, er mora ya ndoñe más quemuátsmëna chë léyeca nýets tempo mandánënga. Y aíñe montsemna mo canyë shema ndoñe nýe ínýabiana nýets tempo oservenabe básenga cuaftsemncá, er Bëngbe Bëtsabe básenga bënga mondmëna.

## 5

### *Cristo bënga šojatsebacá*

<sup>1</sup> Cristo bënga šojatsebacá, ndoñe más mo chë nýets tempo nýe ínýabiana oservenëngcá chamondëtsiyenama, chë léyeca mandánënga. Nýa šmochtsentsëna nýets tempo chca atsebácanënga chašmoquëdama, y ndoñe šmatjaleséncia tšëngaftanga cachiñe chë léyeca mandánënga ínýenga chácmabiamama.

<sup>2</sup> Tšabá šmochjouena. Atšbe Pablo cbëyana: Nderado tšëngaftanga ndoñe judiënga, šmojalesenciá ínýenga chë tšëngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tšëngaftangbiana tojanmá tondayama nantsoservena. <sup>3</sup> Ndëmuanýe entšánaca, nda tojalesenciá ínýenga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nýetsca chë judiëngbe leyentša mandënga jtsobedecénana. <sup>4</sup> Ndëmuanýenga tšëngaftangbentšana šmojtsenguá, Bëngbe Bëtsabe bominýiñe tšábenga jtsemnana, ntšamo leyiñe jamama yomna ca iuayancá jtsemëse, tšëngaftanga chca šmojtsamama, šmojama Crístoftaca cányiñe mo canýacá ndoñe chašmondëtsemnana; Bëngbe Bëtsábentšanëncaca šmojtsoluaré, y chca, šmointsnyánýná tšëngaftanga ndoñe šmontseboše, Bëngbe Bëtsá tšëngaftangbe tšabiana jtsejuabnyëse, chácmatsebacana. <sup>5</sup> Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominýiñe tšábenga nýets tempo chamotsemnana. Y bënga chca mondobátmana, Jesucristbeñe ošbuáchiyana bómnyayeca, y chë ošbuáchiyana chë Uamana Espíritbijana bëngbyoe endobá. <sup>6</sup> Er Crístoftaca cányiñe mo canýacá tmojtsemna ora, aíñe base bobachtema tëtšenënga tmojtsemna o ndoñe, tondaye ntsámanana; ndayá puerte enduámama endmëna chë Jesucristbeñe bënga mondbomma ošbuáchiyana, y chca bëtsebmomnana bënga montsinýánýná ínýenga jtšababuánýeshanëse.

<sup>7</sup> Tšëngaftanga tšabá šmonjánama, chë jtšiyenana ntšamo Bëngbe Bëtsabe ndegombre soyënga yomncá jtsemëse. Y mora, çnda tojama tšëngaftanga chašmotsajbana chë Bëngbe Bëtsabe ndegombre soyënga jtšuyenanama? <sup>8</sup> Ndegombre, Bëngbe Bëtsá ndoñe quenátsmëna, er cha tšëngaftanga tcmojáchembo chabe entšanga chašmotsemnana. <sup>9</sup> Ntšamo entšanga mondentšayancá: “Nýe base levadura jamana nýetsana chauabochama ca”; cachcá, tšëngaftanga chë judiëngbe básefta leyëngaca mandánënga jtsemnana šmojabojátse, šmuatjábocna nýetsca leyëngaca mandánënga. <sup>10</sup> Bënga Bëngbe Utabnáftaca cányiñe mo canýacá bëtsemnayeca, atšbe corente sëntsetatšëmbo, ntšamo atšbe juabna yomncá tšëngaftángnaca cachcá šmochtsejuabnyayama; y átšnaca corente sëntsetatšëmbo Bëngbe Bëtsá puerte bochjacastíga, nda tšëngaftanga natjëmbana ainánaca ndoñe chašmondëtsiyenama tojtsamábíoye, masque ndánaca cha chaotsomñe.

<sup>11</sup> Y atsbiamá chanjayana, Jesucristbeyeca atšbe catšátanga, Jesucristbeñe ošbuáchiyënga base bobachtema chëngbe más delicadentše tétšenënga chamotsemnana entšanga cabá stsabuayiyñase, entšanga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entšanga stsabuayiyñá ora, chënga ya ndoñe átšeftaca nanjóntiaye. <sup>12</sup> Pero chë natjëmbana ainánaca ndoñe chašmondëtsiyenama imojtsamëngna, ¡malaye cachënga tsemjenocbóna!

<sup>13</sup> Pero tšëngaftanga, Jesucristbeyeca atšbe catšátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnana. Pero chca bëtsemnana, mora ndoñe šmatjätšjuabnaye šmojtšobena jalesénciana, nye tšëngaftangbe cuerpënga tšabá chamotsemnana juabnëngaca mandánënga jatiyenama. Chamna, tšëngaftanga šmuenbobonshánayeca, nyëtscanga šmochtsenájabuachana. <sup>14</sup> Er ntšamo Moisesbe leyentša nyëtscá mandënguiñe endayancá, nye canye mandíñe lempe chca entsayana. Y chë mando endmëña: “Ndëmua entšánaca cochtsebobonshana ntšamo cach aca cuenobobonshancá.” <sup>15</sup> Pero ñyënga chamotsesufrínama jtsamëse tšëngaftanga šmojtšiyenëse, mo tšátajaye bayënga tmojtšenashantsná y tmojtšenobanacá, cuedado šmochtsëbomna. Ndóñese, nyëtscanga šmatjánenpochocaye.

*Ntšamo chë Bëngbe Bëtsabe Espiritbeyeca vida jtsebomnana*

<sup>16</sup> Chiyeca chochjáuyana: Nyëtš tempo šmochtsiyena ntšamo chë Uámana Espiritu cmojtsamëndacá, y chca, tšëngaftanga ndoñe quešmochátama soyënga, nye cach tšëngaftanga tšabá jtsomñama juabnëngaca. <sup>17</sup> Er ndayá bënga, nye entšangbe juábnaca jamana mondbošcá, jtsemnana ndayá chë Uámana Espiritu bënga chamomama yobošcá contra; y ndayá chë Uámana Espiritu bënga chamomama yobošcá, jtsemnana ndayá bënga, nye entšangbe juábnaca jamana imobošcá contra. Chca endmëñayeca, ntšamo chë Uámana Espiritu chašmómama yobošcá šmojtšamëse, ndoñe quešmatobena jamana, ndayá cach tšëngaftanga, nye entšangbe juábnaca jamana šmojtšbošcá. <sup>18</sup> Tšëngaftanga, ntšamo chë Uámana Espiritu cmojtsamëndacá šmojtšamëse, ndoñe quecmátamna ntšamo chë leyíñe iuayancá játamama.

<sup>19</sup> Ntšamo entšanga, nye entšangbe juábnaca tmojtšamcá, nyëtscanga paselo jtsónyayana: chënga bacna soye boyabása o shembásaftaca jtsamana, nye chca soyëngama jësejuabnayana, y ndoñe ntšobenana cachënga jenomándama, chca soyënga jtsamëse. <sup>20</sup> Ba uabouana soyënga jtsamana, diosënga yomna ca tmojtsejuabná soyënga jadórama, jtscenjuanayana, ñyëngaftaca jtšenáyayana, nyëtscanga ndoñe cachcá chamondëtsejuabnana jtsamana, ñyëngaftaca yapa jtšenántšabošana, soyënga nye rábiaca jtsamana, ñyëngaftaca tša jesenaleganana, y cányënga ñyëngaftaca contra chamotsemnana jtsamana. <sup>21</sup> Nye jtsebošana ntšamo ñya tojashjachcá jtsebomnana, yapa tmoýënga jtsemnana, fiestënguiñe ndoñe tšabe soyënga jtsamana, y ñyë soyëngnaca mo chë soyëngcá jtsamana. Y mora atše cbabuayená, cach ntšamo tempo sënjanmá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátšbomna.

<sup>22</sup> Pero, Uámana Espiritu ainaniñe tojtsemánda ora, quem soyënga chentšana jóbocnana: nyëtscanga jtšababuáñyëshanana, jtšóyejuayana, natjëmbana ñyëngaftaca jtšiyenana, puerte uantado nyëtscá padecëniñe jtsemnana, nyëtscanga corente bonshanánaca jtšëñyayana, tšabe ainana jtsebomnana, y nyëtscáñe tšabe palabra bomnënga jtsemnana, <sup>23</sup> jtsejuabnayana chë ñyënga mo chabiamá más uamanënga cuaftsemncá, y cachá nyëtscá soyënguiñe jenomándama jtšobenana. Y ndocna ley quenátšmëna, chca soyënga tmojtšama entšangbiamá contra cháuyanama. <sup>24</sup> Jesucristbenga imomnënga tmojama, chënga chë nye entšangbe juabnëngaca mandánënga ndoñe ntsemnana; ya ndoñe más, chë nye cachënga tšabá jtsomñama bacna juabnëngaca mandánënga quemátšmëna, y chë nye cachëngbiamá soyënga jamana bëtscá juabnëngaca cach ndoñe. <sup>25</sup> Bënga ndegombre tšabe vida chamotsebomnana Uámana Espiritu yojtšamayeca, bënga mochtšiyena jtsamëse lempe ntšamo Uámana Espiritu šojtsamëndacá. <sup>26</sup> Ndoñe šmattsenábotamnaye, uamanënga jatenobiamnyëse, ndoñe soyënga mattsama ñyënga bëngaftaca chaoséntiyama, y ndoñe nye mochjätšboše ntšamo ñya tojashjachcá jatsbomnana.

## 6

*Nyëtscanga šmochtsenájabuachana*

<sup>1</sup> Jesucristbeyeca atšbe catšátanga, nderado ndánaca bacna soye tojamama šmojinje, tšëngaftangbentše ntšamo chë Bëngbe Bëtsabe Espiritu tojtsemandacá tmojtšamënga cmontsamna cha juajabuáchana, chë ndoñe tšabe soye amana chaotsajbanama; pero chca šmochjama becá bonshanánaca jtsonyáyëse. Cuedado šmochtsëbomna, er ndóñese, tšëngaftangnaca cmatjócochëngo cachcá soye jamama. <sup>2</sup> Chë soyënguiñe chašmojtšepadecena ora, šmochtsenájabuachana, mo chë uauta uasmanëshangá

šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

<sup>3</sup> Nderado nda tojtsejuabná, cha canýe uámana entšá yomna ca, pero ndoñe chca cha tondmënese, cachá jtsenoingñayana. <sup>4</sup> Cada ona chauenojuabó, ntšamo tojamcá tšabá o ndoñe tšabá bétsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ñyënga tmojamama más tšabá yojtsemna ca jatichámëse. <sup>5</sup> Er cada ona bontsemna jtsenójuabnayana, jtsetatšëmbuama ntšamo tojamcá tšabá o ndoñe tšabá bétsemnama.

<sup>6</sup> Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nyetsca tšabe soyënga jenájatayana.

<sup>7</sup> Ndoñe matenoingñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jaingñana. Ntšamo entšanga mondëntšayancá: “Ndayá točajé y cachá josháchiñana ca.” <sup>8</sup> Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nye cachá tšabá jtsomñama bacna juabnëngaca, cha echanjábozna jabuache castiganá nyetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espiritu tojtsemandacá jtsamëse, chë nyetsca tescama yomna tšabe vida echántsebozna. <sup>9</sup> Chasna, ndoñe chašondëmantsë tšabe soye jtsamama; er masque šojtsëmantsnasna, pero chë tšabe soyënga jtsamama ndoñe tmonjajbanase, canýe bëtse te echanjóshjango, bënga bëtscá tšabe soyënga josháchiñama, mo tša tšabe shajuana tšamo tmojashaquëcá. <sup>10</sup> Chiyeca, tmojtsobena ora, nyetscangbiama tšabe soyënga mochjama, pero masna chë Jesucristbeñe ošbuáchiyana bómmayeca, bëngcá Bëngbe Bëtsabe básenga imomnëngbiama.

*Quem tsuanácha juapochócama cach Pablo tojanábema*

<sup>11</sup> Jšmochjinýe, tša bëtse letrëngaca cach atšbe cucuátšëca mora cbontsëbuabiamná!

<sup>12</sup> Ndëmuanýënga imojtseboše, tšëngaftanga chë ndoñe judiënga jamëndama tšëngaftangbe más delicadentšë base bobachtema tëtšëñënga chašmotsemnana, ntšamo judiënga monduamancá, chënga chca jtsamana nye chë judiëngaftaca tšabá joquédama. Y chca jtsamëndayana, chënga chamosufrima ñyënga chamotsamama ndoñe mondbóseyeca; er judiënga muanjama chënga chamosufrima, Cristo cruzoca jóbanana entšangbiama puerte iuámana ca chënga tmojtsabuayiynase. <sup>13</sup> Pero ni mo chë más delicadentšë base bobachtema tëtšëñënga imomnënga, ndoñe quemátama lempe ntšamo chë leyiñe iuayancá. Pero chënga jtsebošana tšëngaftanga chca tëtšëñënga chašmotsemna, chënga jtsenábotamnyama jobenayama, ñyënga base bobachtema chacmatëtšama tšëngaftanga šmojalesenciamá. <sup>14</sup> Atšëftacna ndocna te chca chaondopasá. Atšë nyets tempo y becá chanjëtšóyebuambnaye ndayá atšbiama Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiama tondaye quenatámama ntšamo entšanga quem luarentšë imojuabnacá y chëngbiama puerte iuámana; y ndayá atšbiama puerte iuámana, entšangbiama tondaye quenatámama; y chë causa, atšë chëngbiama mo obanacá šëndmëna. <sup>15</sup> Chë más delicadentšë base bobachtema añe tëtšëñá o ndoñe, tondaye quenatámama. Ndayá puerte iuámana endmëna, Bëngbe Bëtsá mo tsmëna entšangcá bënga šojábiamá, Uámana Espiritu bëngbe ainaniñe jtsemándayëse. <sup>16</sup> Chë quem buatëmbana sóyeca jtsamëse šmoyenëngbiama, atšë, Bëngbe Bëtsá sëntseimpadana, cha chaoma tšëngaftangbe ainana natjëmbana chašmotseboznama y becá chacmotsalastemánama; y ndoñe nye chëngbiama chca quetsatsimpadana, ndayá nyetscanga Bëngbe Bëtsabe entšanga imomnëngbiámna.

<sup>17</sup> Y mora, nye canýe soye cbochjáuyana: morscana ndocná chaondëtsama atšë jasúfriama chašotsemnana; er atšbe cuerpiñe endëtínýna ntšamo atšë tijasufri, Jesusbe oservená bétsemnama.

<sup>18</sup> Jesucristbeyeca atšbe catšátanga, atšë sëntseimpadana Bëngbe Utabná Jesucristo chaoma tšabe bendicionënga tšëngaftangbeñe chaotsemnana. Chca chaotsemna.

## Efesios

### *Jacheuayama*

<sup>1</sup> Atse Pablo, Jesucristbe ichmoná Bèngbe Bètsá chca yobóseyeca, quem tsbuanácha sèntsabiamná Efeso puebloca Bèngbe Bètsabe entsanga y Cristo Jesúsbeñe ošbuáchiyènga imomnèngbiana. <sup>2</sup> Atse sèntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tsèngaftangbeñe tsabe bendicionènga chaotsemnana, y chata chaboma tsèngaftangbe ainaniñe tsabe ebionana chašmotsebonnana.

*Cristoftaca cányiñe mo canyáca jtsemnèse, bènga mochántsebonna nyetsca tsabe soyènga, ntšamo celoca yobinýncá*

<sup>3</sup> Bèngbe Bètsá y Bèngbe Utabná Jesucristbe Taitábioye mochjètschuaye, er bènga Crístoftaca cányiñe mo canyáca mondménayeca, Bèngbe Bètsá tojama bènga nyetsca tsabe soyènga chamotsebonnana, ntšamo celoca yobinýncá. <sup>4</sup> Bèngbe Bètsá bènga šojanabacacá Crístoftaca cányiñe mo canyáca chamotsemnana, cabá quem luare cha ndama orscana, bènga chabe delante chamotsemnana chabe entsanga, bacna soyèngama perdonánènga y chabe oservénènga, y bènga ainaniñe bacna soye ndbomnènga imomna ca cha cháuanama. <sup>5</sup> Bèngbe Bètsá šuababuánjeshanayeca, tempo cha tojanjuabó y tojánbošena bènga mo cachabe basengcá jábiamama, ché Jesucristo yochjanma sóyeca. <sup>6</sup> Chiyeca bènga Bèngbe Bètsábioye sempre jtsatschuanayana, cha bèngbe tsabiama juabna yobómnayeca, ndayá chabe Bonshana Uaquiñáftaca Bèngbe tsabiama cha tojamama. <sup>7</sup> Bèngbe Bètsá puerte bonshanánaca bèngbe tsabiama bètscá yojuabnýyeca, cha bèngbe bacna soyèngama šojtsaperdoná y šojatsebe, er Jesús bèngbiana tojanóbana, chabe buiñe juabuáshanése. <sup>8</sup> Bèngbe Bètsá tojama bènga nyets osertánana y becá juabna chamotsebonnana, cha becá bonshanánaca bèngbe tsabiama juabna yobómnayeca, <sup>9</sup> y tojama bènga chamotsetatšèmbuama ndayá jamama cha yobošcá, ndayá cachá tèmpanca yojanjuabná jamama, pero entsanga chca ndoñe tonjaninýanjé. Ndayá jamama Bèngbe Bètsá tempo yojanjuabnacá, ndayá cha tojama bènga chamotsetatšèmbuama, cachá yojanjuabná chca jamama. <sup>10</sup> Ndayá jamama Bèngbe Bètsá yojuabnacá, lempe echanjochnèngo nya chama tempo chaojóshjango ora, y quem Bèngbe Bètsabe juabna endmèna jamana, lempe ntšamo cha tojamcá celoca y quem luarentse, Cristo chamotsebonna nyetsca ché soyènguife mo ché mandayacá.

<sup>11</sup> Bèngbe Bètsá sempre jamana nyetsca soyènga ntšamo tojtsejuabnacá y tojtsebošcá. Y Bèngbe Bètsá bènga šojabacacá, ntšamo cabá chca ndama ora yojanjuabnacá; chca, bènga Crístoftaca cányiñe mo canyáca jtsemnèse, bènga chamóyèngacñama ndayá Bèngbe Bètsá chabe entsanga jatšatayama tojašebuachená, mo chèngbe otocana soyca. <sup>12</sup> Y Bèngbe Bètsá chca tojama, bènga ché Crístbeñe natsana imojtsanošbuachenga, cha bènga šochjánatsebacama, tsabe soyènga jtsamése chamotsiyenama, chca, ché inye entsanga Bèngbe Bètsabe obenanama cha chamotsatschuanama. <sup>13</sup> Y tsèngaftángnaca, ché ndegombre buayenánana šmojanuena ora, ché Bèngbe Bètsá bènga játsebacama buayenánana, y Crístbeñe šmojtsanošbuaché ora, Bèngbe Bètsá tojanma tsèngaftanga Crístoftaca cányiñe mo canyáca chašmotsemnana y tcmojanainýnaná tsèngaftanga chabe entsanga bètsemnana. Bèngbe Bètsá chca tojanma, Uámana Espíritu tsèngaftangbe ainaniñe cháuumashènguama tojanma ora, ntšamo tempo cha tojanašebuachenacá. <sup>14</sup> Bènga ché Uámana Espíritu bèngbe ainaniñe mondbómnayeca, corente mondtétatšèmbó ndayá Bèngbe Bètsá chabe entsanga tojašebuachenacá bènga mochjóyèngacñama. Uámana Espíritubeyeca bènga montsobena chca puerte tsabá jtsetatšèmbuama, ché Bèngbe Bètsá chabe entsanga nyetsca tescama játsebacama y ntšamo tojašebuachenacá jatšatayama tempo chaošhjanguèntscuana; y lempe ntšamo cha bèngbiana inétsamama, nyetscanga cha mochántatschuanaye, cha bètsá y obená bètsemnana.

*Pablo Bèngbe Bètsábioye tbojanimpadá, ošbuáchiyènga osertánana chamotsebonnana.*

<sup>15-16</sup> Chcáyeca, atšna, Bèngbe Bètsá tsèngaftangbiana stseimpadana ora, sempre cha sèndbètsatschuanaye, er atse sènjátatšèmbona ntšamo tsèngaftanga Bèngbe Utabná Jesúsbeñe tša šmojtsobuáchemá, y ntšamo tsèngaftanga nyetsca ché Bèngbe Bètsábenga imomnènga šmababuánjeshanama. <sup>17</sup> Bèngbe Bètsá, Bèngbe Utabná Jesucristbe Taitá, nda corente iuámana, sèntseimpadana cha chaoma Uámana Espíritu chacmèjabuachama, corente osertánènga chašmotsemnana, y chacminýanjé nda Bèngbe Bètsá yomnana, chca, más tsabá cha chašmotsábuatmama. <sup>18</sup> Atse, Bèngbe Bètsá sèntseimpadana, cha chaoma tsèngaftanga Bèngbe Bètsabe soyènguife corente osertánana chašmotsebonnana, tsèngaftanga chašmotsetatšèmbuama, ndayá Bèngbe Bètsábeñe jtsobuáchiyèse tsèngaftanga šmojtsobatmancá cha cmochjátatayama. Bèngbe Bètsá tcmojáchembo chábeñe

chca chašmotsobátmanama. Atše cha séntseimpadana, chaoma tséngaftángnaca chašmotsetátšémbo tša bétscá y bétš soyénga yomna ndayá chabe entsángca cha tojašebuachenacá; <sup>19</sup> y chašmotsetátšémbo tša bétš soye y ndocna te ntjéftšopochócama chabe obenana yomnama, chë ndayá bēngbe ainaniñe tšabe soyénga yojtsama, bēnga chë Crístbeñe ošbuachiyēngbeñe. Cach quem puerte bétš obenana endmēna, <sup>20</sup> ndáyeca Bēngbe Bétšá tojama Crísto cháuatayenama, y chabe catšbioica celoca tšojtantbema chaotsemándama. <sup>21</sup> Choca Crísto nyetsca soyēnguiñe yojtsemándá, y más bétscá obenana y mando yojtsebomna nyetsca mándayēngbiama, chë mando y obenana bomnēngbiama, y cha yomna más uamaná y bétšá nyetsca chë entsángbiama mo bétšétsangcá utabnēngbiama, chēngbe uabaina respétoca jtsichámese. Crísto puerte bétšá endmēna lempe ntšamo quem luarentše yobínynama y Crísto yochjésabentšana yochtsebinýnámna. <sup>22</sup> Bēngbe Bétšá tojama Crísto nyetsca soyēnguiñe chaotsemándama, y tšojanábuayana nyetsca soyēnguiñe chaotsemándama, chábeñe ošbuáchiyēngbe tšabiama. <sup>23</sup> Cha endmēna nyetsca chábeñe ošbuáchiyēngbe mandayá, y chēnga mondmēna mo cachabe cuerpo cuaftsemncá. Chēngbe ainaniñe cha endoyena y nyetsca luarēnguíñnaca, y lempe cha endēmándá.

## 2

### *Atsebácanēnga mondmēna, Bēngbe Bétšá šuababuányeshanayeca*

<sup>1</sup> Tempo tséngaftanga Bēngbe Bétšabiama mo obanēngcá šmonjamna, er tséngaftanga šmonjaniyena, ntšamo Bēngbe Bétšá yomandacá ntsamcá, y bétscá bacna soyénga šmojánama. <sup>2</sup> Chca, tséngaftanga šmonjánama mo chë nye quem luarama enójuabnayénga monduamancá, y šmonjanéyeunana Satanás, chë bacna espíritēnga obenana bomnēnga y quem luarentša tšbanáoca imonnēngbe amēndayá, chë Bēngbe Bétšábioye ndéyeunanēngbe ainaniñe yomándá espíritu. <sup>3</sup> Tempo bēnga nyetscanga fsēnjaniyena ntšamo tséngaftanga šmonjaniyencá. Bēnga soyénga fsēnjánama, nye ntšamo ftsjanbošcá nye bēngbe cuerpēngbe tšabiama, y nye ntšamo bēngbe juabna enjamncá bacna soyénga jamama. Bēnga fsēnjaniyena soyénga jtsamēse mo chë Bēngbe Bétšábioye nduabuatuema entsānga mondbetsamcá; chë causa bēnga fsēnjjanomerecena jtsebomnana chë Bēngbe Bétšabe uabouana castigo, cachcá chë Bēngbe Bétšábioye nduabuatumēngcá. <sup>4</sup> Pero Bēngbe Bétšá sempre tša lastemado entsángbiama endmēna y sempre corente bēnga sondábabuanýeshana; <sup>5</sup> y chíyeca, bēnga cabá mo obanēngcá chabiama fsēnjánama ora, bacna soyénga fsēnjánama causa, chora cha tojanma bēnga tšabe vida chamotsebomnana y Crístoftaca cányiñe mo canýacá chamotsemnana. Bēngbe Bétšá tséngaftangbe tšabiama juabna bómnyeyeca, bacna soyēnguentšana tcmojatsebacá. <sup>6</sup> Bēnga Jesucrístoftaca cányiñe mo canýacá bétsemnayeca, Crísto Jesús cháuatayenama Bēngbe Bétšá tojanma ora y celoca tšojtantbema ora, enjamna mo bēngnaca chámuatayenama Bēngbe Bétšá cuafjamá y Crísto Jesúseftaca celoca cuafatbiámá. <sup>7</sup> Chca enjamna, Bēngbe Bétšá entsānga cháuinýanýema nyetsca joshjanguama tempēnguiñe, ntšamo cha bēngbe tšabiama bétscá juabna bétsebomnana, cha Crísto Jesúseftaca bēngbioye tšabe juabnaca sojánanyē ora. <sup>8</sup> Er Bēngbe Bétšá tséngaftangbiama tšabe juabna yojánbomnyeyeca, tcmojatsebacá, Jesucrístbeñe šmojtsanošbuáchemá; pero atsebácanēnga šmondmēna, ndoñe cach tséngaftanga ndayá šmojánmayeca, ndayá atsbocaná jtsemnana endmēna Bēngbe Bétšabe canýe tšetana soye. <sup>9</sup> Atsebácanēnga šmondmēna, ndoñe cach tséngaftanga ndayá šmojánmayeca; chíyeca ndocná quenátobena jtšenábotamnayana atsbocaná yojtsemnana. <sup>10</sup> Bēngbe Bétšá šojtabiama ntšamo bēnga mondmēncá, y Crísto Jesúseftaca cányiñe mo canýacá bétsemnayeca, Bēngbe Bétšá mo tsmēma entsāngcá cuafatsmēncá šojtabiama, tšabe soyénga jtsamēse jtsiyenama. Y ndayá bēnga tšabá mondamcá, Bēngbe Bétšá tempo tojanprontá bēnga chamotsamama.

### *Crístbeyeca tempcá tšabá Bēngbe Bétšáftaca jtsatsmēnana*

<sup>11</sup> Tséngaftanga ndoñe judiēnga, ndēmuanýēnga judiēnga cmondubuatma “chë más delicadentše base bobachtema ndétētšenēnga ca”, chēngcá uinýnánánēnga ndoñe šmondmēnana; chēnga cachēnga jtšenábobuatmana “chë más delicadentše base bobachtema tētšenēnga ca”, y cachēnga cuerpēnguiñe chca jtsamana. Mēntšá, tséngaftanga chë ndoñe judiēnga, <sup>12</sup> smochjenójuaboye ntšamo tempo šmojamnama, Crístbeñe cabá ndošbuáchiye ora. Chora, tséngaftanga Crísto ndoñe šmonjánbomna, Israeloca entsángbiama stētšoye šmonjanquedana, y ndoñe šmonjantátšémbo lempe ntšamo Bēngbe Bétšá chabe entsānga tojanašebuachenacá. Tséngaftanga quem luarentše šmonjaniyena ndocnábeñe ntšobatmancá y Bēngbe Bétšá ntšabatmncá. <sup>13</sup> Pero mora tséngaftanga Crísto Jesúseftaca cányiñe mo canýacá šmontsemna, chë tempo Bēngbe Bétšá ndoñe šmonjanábuatmēnga, y cha tojama chábioye chašmotsábuatmama; y chca yomna, er Jesús, chabe buiñe juabuáshanēse, tséngaftangbiama tojanóbana. <sup>14</sup> Cach Crísto yojtsama bēnga tempcá tšabá Bēngbe Bétšáftaca chamotsemnana. Cha tojama judiēnga y ndoñe judiēnga nyetscanga mo cachca entsāngcá

chamotsemnana, mo nda canye tapiëse tojtsendbemcá, chë ndayëseca canye luarentsa entsanga tmojtsenjáta, chënga enáyaye causa. <sup>15</sup> Cristo chënga mo cachca entsangcá tojábiamana, judiëngbe leyënga y mandënga ndocna obenana chamondëtsebomnana jamëse. Chca tojama, cha jóbaniëse, chë útoica entsanga mo nye canye tsmëma entsangcá jábiamana, cháftaca cánýiñe mo canýacá jtsemnëse. Cha chca tojanma chënga nyëtsanga tsábá chamotsiyenama; <sup>16</sup> y Cristo cruciñe tojanóbaniyaca, cha tojanma chë útoica entsanga enáyayana chamotsajbanama, y tojanma chë útoica entsanga mo canye entsangcá chamotsemnana, chënga tempcá tsábá Bëngbe Bëtsáftaca chamotsatsmënama.

<sup>17</sup> Cristo quem luaroye tojánabo tsabe noticiënga jabábuayenama, tempcá tsábá Bëngbe Bëtsáftaca jtsatsmënama. Cha quem tsabe noticiënga tojanabuayená tsëngaftanga chë ndoñe judiëngbioyë, chë Bëngbe Bëtsá ndoñe smonjanábuatmënga, y chë judiëngbioynaca, chë Bëngbe Bëtsá imojanábuatmënga. <sup>18</sup> Er chábeyeca, canýánýenga y ínýenga montsobena chë Taitábioyë jobéconana, er bënga nyëtsanga cachca espíritu bëngbe ainaniñe mondbomna, chë Uámána Espíritu. <sup>19</sup> Chíyeca tsëngaftanga, Bëngbe Bëtsabe entsanguentse ndoñe queśmátsmëna mo inýe luarocana ashjainëngcá, y ni mo cachëngbe yebnentse ndoyenëngcá, tondayama derecho ndombomnënga. Inýetśá endmëna; tsëngaftanga derecho smondbomna cachcá ntśamo Bëngbe Bëtsabe entsanga mondbomncá, y Bëngbe Bëtsabe básenga smondmëna. <sup>20</sup> Jesucristo y chabe entsanga mondmëna mo canye jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtšbenga ndayíñe chë yebna tojtsëcuatjoncá; tsëngaftanga ošbuáchiyënga smondmëna chë jebna yebnentša soyëngcá, y cach Jesucristo mo chë más uámána luarentse uashacuana ndëtšbecá. <sup>21</sup> Quem más uámána luarentse uashacuana ndëtšbeñe, nyëtsca chë bëtš yebnentša soyënga jtsëcuatjonana, y tsbanánye más tmojatsjebëse, chë bëtš yebnentše tsëm jebna sóynaca chíñe jtsëcuatjonana. Cachcá Cristo, mo chë más uámána luarentse uashacuana ndëtšbecá, jtsamana nyëtsca chábeñe ošbuáchiyënga cháftaca cánýiñe mo canýacá chamotsemnana, y ínýengnaca cachcá chamotsemnana. Y nyëtsca ošbuáchiyënga Cristoftaca cánýiñe mo canýacá tmojtsëmna ora, chënga jtsemnana mo Bëngbe Utabnabiamana canye bëtš yebna jebncá, chábioyë jt-satschuanayama. <sup>22</sup> Y tsëngaftanga Efesoca ošbuachiyëngbiámnaca Cristo entsama, chë inýe chábeñe ošbuáchiyëngaftaca mo canye entsangcá chašmotsemnana. Y chë Uámána Espíritu bëngbe ainaniñe yojtsiyénayeca, bënga nyëtsanga cánýiñe mondmëna, mo canye bëtš yebncá ndayentše Bëngbe Bëtsá yoyena.

### 3

#### *Pablo Jesucristbe trabajo yojanbonýena, chë ndoñe judiëngbeñe jamama*

<sup>1</sup> Chca, atše Pablo utamená séntsemna, Cristo Jesusbiamana soyënga entsanga abuayinyaye causa, tsëngaftanga chë ndoñe judiëngbe tsábiamana. <sup>2</sup> Er tsëngaftanga ya cmontsamna jtsetatšëmbuama, Bëngbe Bëtsá tsëngaftangbe tsábiamana juabna yobomnana; y chca, chë trabajo atše šojabonyé, tsëngaftangbe tsábiamana jamama. <sup>3</sup> Tsëngaftangnaca cmontsamna jtsetatšëmbuama ndayá Bëngbe Bëtsá šojinýinyé, ntśamo cha jamama tempo tojanjubocá, pero entsanga chca ndoñe tonjaninýanyé, y chë soyama ya batsatema tbonjubuábiamana. <sup>4</sup> Chašmojualiá ora, smochanjátšëmbona Cristbe soyënga šosertánama, chë tempo ndocná yonjanábuatma soyënga, <sup>5</sup> chë tempo Bëngbe Bëtsá ndocnábioyë tbonjaninýinyé soyënga; pero mora cha tojinýanyé, Jesucristbe ichmónënga nýe Bëngbe Bëtsábiamana oservënëngbioyë y Bëngbe Bëtsabe juabna oyebuambnayëngbioyë; y cha chca tojama chabe Uámána Espíritoftaca. <sup>6</sup> Ndayá tempo Bëngbe Bëtsá ndoñe tonjaninýanyéca méntśa endmëna: chë ndoñe judiënga Jesucristbe tsabe noticiënguiñe chamojtsošbuaché ora, cachcá ntśamo chë judiënga ošbuáchiyënga Bëngbe Bëtsábiocana mochjoshachiñcá, chëngnaca chábiocana mo otocaná chë soye mochanjóyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšaënga y chënga nyëtsanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjóyëngacñe lempe ntśamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesuëftaca cánýiñe mo canýacá bëtsemnayeca.

<sup>7</sup> Masque ndoñe šonjanomerecena, mo ndayá cuafjatšetacá, Bëngbe Bëtsá šonjanábuayana cha jtseservënama, tsabe noticiënga entsanga jtsabuayinyayëse; y cha átšëftaca chca tojanma chabe obenánaca. <sup>8</sup> Atše nyëtsca chë Bëngbe Bëtsabe entsanguentše sëndmëna chë más nduamaná; pero Bëngbe Bëtsá bëtš pavor šontsebema, šonjalesenciá chë Cristbe bëtšcá tsabe soyënga chë ndoñe judiënga jábuayenama. Chë Cristbe soyënga tša bëtšcá endmëna, y chca, quenátopodena chë soyënguentšana lempe jtsabuatumana. <sup>9</sup> Y chë trabajo šonjabonyé jamama, nyëtsanga botamana jinýama chamotsobenama ndayá Bëngbe Bëtsá yochjama, ndayá cachá, chë nyëtsca soyënga tojamá, tempscana yojanjubnacá. Méntšcoñama



Bèngbe Bètsá chë soye ndocnábioye tbonjinjinyé, pero mora aife. <sup>10</sup> Chca, Cristbeñe ošbuachiyéngbeyeca, mora chë celoca mándayénga y obenana bomnènga, chamobená juabuátmanana nyets osertánana ntšamo Bèngbe Bètsá yobomncá. <sup>11</sup> Bèngbe Bètsá chca tojama, ntšamo cachá yojanjuabnacá nyetsca tescama jamama, y chca cha tojama Jesu-crístoftaca, Bèngbe Utabná. <sup>12</sup> Bènga Crístoftaca cánjiñe mo canyáca mondmèna, y chábeñe mondošbuachéyeca, bènga montsobena Bèngbe Bètsábioye jobéconama tondayama ntjatau-atjca, y corente jtsetatšembèse cha ndoñe chašondubatemala. <sup>13</sup> Chíyeca atše cbontsaimpadana ndoñe chašmondètsajbaná ainaniñe añemo bomnana, atše séntsesufrina causa, er chë tsèngaftangbe tsabiama tsèufrinentšana, tsèngaftangbiana tsabe soyénga endóbocana.

#### *Cristbe bonshánana*

<sup>14-15</sup> Y chca, Bèngbe Bètsá, chë Taitá, ndábentšana nyetsca pamíllanga celoca y quem luarentše uabaina imóyèngacañe, chabe delante joshaméntsase, <sup>16</sup> séntseimpadana, chabe bètsáca uámana bomnánaca chaoma, tsèngaftanga ainaniñe obenana y bèts añemo chašmotsebonnana, chabe Espíritbeyeca, <sup>17</sup> y tsèngaftanga Cristbeñe jtsošbuachiyése, mua tsèngaftangbe ainaniñe chaotsiyenama. Bèngbe Bètsánaca séntseimpadana, cha y inyenga nyets ainánaca jtšababuánýeshanése, <sup>18</sup> tsèngaftanga y nyetsca Bèngbe Bètsabe entšàngnaca tsèngaftangftaca, chašmotsobena josértama Cristbe bonshánana bèngbiana tsá bètsáca yomnana. Nderado nda tojontsé chabe bonshánana jatšèmbonana mo canye soye cuafsemncá, cha ndocna te nanjobenaye jtsetatšèmbuana tèntsoye ndayèntscoca yomna y nyanéjoye ndayèntscoca, jashenoye ndayèntsoñe y tsbanáoye ndayèntsoñe yomna. <sup>19</sup> Atše séntseimpadana tsèngaftanga chašmobená chë bonshánana juabuátmanana (chë bonshánana puerte bètsáca endmèna causa, bènga ndocna te quemochatobenaye josértama ntšamo chë soye lempe yomnana). Pero séntseboše, tsèngaftangbe ainaniñe nýe Bèngbe Bètsabe soyénga chaotsemna y tsèngaftanga chašmotsiyena jtsamése, ntšamo tsèngaftanga chašmotsamama Bèngbe Bètsá yojuabnacá.

<sup>20</sup> Y mora, nyetscanga Bèngbe Bètsá chamotsatschuaná. Cha obenana yobomna ntšamo bènga tmojtsojtjanañe o tmojtsejuabnama más soyénga jamama, chabe puerte bèts obenánaca; y chë obenana bèngbe ainaniñe yojtsemánda y yojtsama bènga ainaniñe sempre ošbuáchiyana chamotsebonnana. <sup>21</sup> ¡Entšanga Bèngbe Bètsá chamotsatschuaná nyets tempo y nyetsca tescama, ndayá Cristbeñe ošbuachiyénga tmojtsamama y cach Cristo tojamánaca! Chca chaotsemna.

## 4

#### *Uámana Espíritbeyeca bènga cánjiñe mo canyáca jtsemnana*

<sup>1</sup> As, atše chë cárceloye utamená, Bèngbe Utabnabiana trabájaye causa, tsèngaftanga cbontsaimpadana, ndèmuanyénga Bèngbe Bètsá tcmojáchembo chabe entšanga chašmotsemnana, sempre chašmotsiyena mo chë entšàngcá ndèmuanyénga Bèngbe Bètsá cach soyama tojánachembo y chca imomerecena. <sup>2</sup> Cada ona chamotsejuabuána mo chë inyenga chabiana más uámanénga tmojtsemncá, y nyetscángbioye puerte bonshanánaca šmochtsobátmana, y bètsáca bonshánana jtsebonnèse šmochtsenèuantana; <sup>3</sup> sempre šmochtsjuabnaye y šmochtsentšena tsèngaftanga nyets tempo cánjiñe mo canyáca chašmotsemnana, nyetsca tsèngaftanga natjèmbana jtsemnèse. Y tsèngaftanga šmotsobena cánjiñe mo canyáca jtsemnana chë Uámana Espíritbeyeca. <sup>4</sup> Bènga Jesucristbeñe ošbuachiyénga bétsemnayeca mondmèna mo cach cuerpentšèngcá, chë Cristbe cuerpo, y cachca Espíritu bènga nyetscanga ainaniñe mondbomna. Bèngbe Bètsá sojáchembo, bènga chábeñe jtsošbuachiyése, nyetscanga cachcá sochjátšatayama chamotsobátmanama. <sup>5</sup> Bènga nyetscanga cach Utabná mondbomna, cachca ošbuáchiyana Jesucristbeñe mondbomna, y bènga nyetscanga uabáinènga mondmèna chca betsošbuachiyama. <sup>6</sup> Bènga ošbuachiyénga nyetscangbiana cach Bèngbe Bètsá y Taitá endmèna. Cha bèngbe amèndayá endmèna, chabe obenana nyetscángbeñe jtšinýnana, y nyetsca bèngbe ainaniñe chabe Espíritu endmèna.

<sup>7</sup> Pero bènga, cada ona tšetana obenana tojóyèngacñe, tsabe soyénga jamama, ntšamo Cristo jatšatayama tojanbošencá, chábeñe ošbuachiyénga jujabuáchama. <sup>8</sup> Chíyeca, Bèngbe Bètsabe uabemana palabrènguñe Jesucristbiana mèntšá endayana:

Cha celoye tontantsjuá, y cháftaca tonjanéyamba nyetsca chabe uayayénga, chë tojánayèñjananga,

y chabe entšàngbioye obenana tonjanatšatá, tsabe soyénga jamama ca.

<sup>9</sup> ¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. <sup>10</sup> Y Cristo, chë tojanastjanguá, cachá endmèna nda celoca chë más tsbanánoye tojtantsjuá; chca, canye ora nyétscañe cha chaotsemnana. <sup>11</sup> Y cachá, chë tsabe soyénga jamama obenana tojanatšatá ora, tojanma chábeñe ošbuachiyénguentše

chamotsemna inýengna chabe ichmónënga, inýengna Bëngbe Bëtsabe juabna oyebuambnáyënga, inýengna tsabe noticiënga Cristbiana abuaiyinyayënga, y inýengna ošbuáchiyënga anyëngna y Bëngbe Bëtsabe soyëngama abuatambayënga. <sup>12</sup> Cristo tojanabacacangna chabe entšángbiyoe mochanjëabuache, cha tojanabanyé trabajo chënga chamotsamama, y nyetsca ošbuáchiyënga, chë nyetscanga cányíñe mondmëna mo Cristbe cuerpcá, cada te más ošbuáchiyana y bonshánana chamotsebonnama, <sup>13</sup> bënga nyetscanga chamobenantscuana cachca ošbuáchiyana Jesucristbeñe jtsebonnama, y Bëngbe Bëtsabe Uaquíñabiana nyetscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtšësanga bëtscá juabna bomnëngcá, <sup>14</sup> y ndoñe nýe mo basengcá, Bëngbe Bëtsabe soyëngama jtsetatšëmbuama. Chë soyënguifne ya ndoñe más nýe mo basengcá quemochátsmëna, ndëmuanyënga paselo jáingñama yomna. Mo canýe barquësha nýe ndaye binýiacnaca tojtsëyambancá, básefta entsanga nýe ndaye buatëmbana soye tmojatuenca jatsyeunanana; bënga ndoñe chca quemochátsmëna, y ndoñe más bëngbe juabna quemochatróca, nýe ndaye tmojatuenca tsëm sóyeca, inýengbiyoe áingñayënga. Chënga becá montsetátšëmbo ntšamo entsanga jáingñana, y montseboše chë montsabuatambá bostero soyënga bënga jtseyeunanama. <sup>15</sup> Chamna, chë Bëngbe Bëtsabe ndegombre soyëngama bonshanánaca jtsóyebuambnáyëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemandayancá. <sup>16</sup> Mo canýe bestšašcá, chëse jamana nyetsca chë cuerpentša soyënga ndayentše chamueneftnama y chiñe jobónjuama chamotsobenama, chë cuerpo saná chaotsebonnama jtsamëse, chca, nyets cuerpo tsábá chaóbochemá, cachcá Cristo, chë nyetsca ošbuáchiyënga amëndayá, chabe obenánaca jamana chënga cada te más ošbuáchiyana y bonshánana chamotsebonnama. Cada cuerpentša soye tojtsama ntšamo chë soye chaot-samama tomncá, as nyets cuerpo tsábá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nyetsca ošbuáchiyënga cada te más ošbuáchiyana mochántsebonna, puerte jtsebonshánëse.

*Cristoftaca cányíñe mo canýacá jtsemnëse tsëm vida šmochtsebonna*

<sup>17</sup> Mëntšá chaitsemna ntšamo chontšëtsëtsnácá, y Bëngbe Utabná endmëna nda tojama atše mando chamotsebonnama tsëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábíoye nduabuátmënga mondbetsamcá; chënga jt-siyenana jtsamëse ntšamo cachëngbe ndoservena juabnënga tojtsamëndacá. <sup>18</sup> Chëngbe juabnocá obenana mondbomna nýe ndoñe ndegombre soyëngama josértama. Chënga ndoñe quemátsbomna chë Bëngbe Bëtsábíocana yóbocana tsabe vida, er chënga ndoñe quemat-sleséncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaodómashënguama. <sup>19</sup> Chënga bacna soyënga tmojtsama ora, tondayama ntsenóochinýenana; chënga nyets tempo jesentšënaná nyetsca bacna soyënga amana, y chca jtsamana tondayama ntjatenouabnáyacá.

<sup>20</sup> Pero chca ndoñe quenjatsmëna ntšamo tsëngaftanga Cristbe soyëngama šmojanatsjinýe y ntšamo chábiyoe šmojanabuatmancá. <sup>21</sup> Ndegombre tsëngaftanga chabiana šmojanuena y inýengna tcmojanabuatambá mo chábeñe ošbuáchiyëngcá y ntšamo chë ndegombre soyënga Jesucristbeñe endbinýncá. <sup>22</sup> Chcasna, ntšamo tsëngaftanga šmojanjuabná, šmojanentina y šmojanamcá Jesucristbeñe cabá ndošbuachená ora, mora lempe stëtsoyë šmochjaquédá; ntšamo tempo tsëngaftanga šmojanjuabná, šmojanentina y šmojanamcá, canýe ondbiamnaye juabnentšana vojóbocana, tsëngaftanga bacna soyëngama juabnëngaca mandánënga jtsemnëse, y chë juabnënga tsëngaftangbiyoe cmojánaingñaye. <sup>23</sup> Tsëngaftanga cmontsamna tsëngaftangbe juabniñe tsëm y tsabe juabnënga jtsebonnama. <sup>24</sup> Tsëngaftanga cmontsamna jashjáchana mo tsmëna entsangcá jtsemnama, y chë ntšamo tempo šmojanamcá mora ndoñe cachcá chašmondëtsamama. Chca, tsëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca tsmëna entsangcá tcmojábiana, tsëngaftanga chašmotsiyenama jtsamëse Bëngbe Bëtsabe bominýíñe tsábá yomna soyënga y chábiyoe jadórana soyënga, chë ndegombre soyënguentšana óbocana soyënga.

<sup>25</sup> Chcasna, ya ndoñe más šmattsebostero, ndayá cada ona cháuyana ndegombre soyënga cachacá Jesucristbeñe ošbuáchiyáftaca, er nyetscanga cányíñe mondmëna mo nýe canýe entsangcá. <sup>26</sup> Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënama chacmetëna y ndoñe nyets te chacmondetëna. <sup>27</sup> Ndoñe šmatjaleséncia Satanás ndayánaca tsëngaftangaftaca chaomama.

<sup>28</sup> Chë yojanatbëbaná chauajbaná atbëbanama y jatrabájama chaotšé; cachabe cuatšëca tsabe trabajo chaotsóboma, chca, ndayánaca cha chaotsebonnama chë ujabótënga jatšatayama.

<sup>29</sup> Bacna palabrénga ndoñe šmattsichamo, pero aífne tšabe palabrénga y nŷa chorsca uajabótama palabrénga, chē inŷe entšangbiöye jujabuáchama más Cristcá chamotsemnana, chēnga Bēngbe Bētsábiocana tšabe bendicionēnga chamóyēngacñama, chē ndayá chašmojtsētsētná sóyeca. <sup>30</sup> Ndoñe šmattsama soyēnga, Bēngbe Bētsabe Uámana Espíritu chabongmema. Bēngbe Bētsá tojama Uámana Espíritu tsēngaftangbe ainaniñe cháuamashēnguama, y chca, tcmojanainŷaná chabe entšanga bēsemnayeca, chē yochjóshjango tescama, Bēngbe Bētsá chabe entšanga nŷetsca tescama yochjatsebacye orscama.

<sup>31</sup> Inŷengbiana bacna juabnénga ainaniñe ndoñe chašmondētsebomna, etonánēnga ndoñe chašmondētsemna, ni inŷengaftaca ndoñe chacmondētēna. Inŷengbiöye ndoñe chašmondētsebuachembuana, inŷengbiöye ndoñe šmatjójayánguango y ndaye bacna sóynaca ndoñe šmattsama. <sup>32</sup> Nŷetscángaftaca tšábēnga šmochtsemna, nŷetscanga šmochtsenlastemana y šmochjenperdóna, ntšamo Bēngbe Bētsá, Cristbeyeca tcmojaperdonacá.

## 5

### *Ntšamo yomna Bēngbe Bētsabe básēnga chamotsiyenama*

<sup>1</sup> Tsēngaftanga, Bēngbe Bētsabe bonshana básēnga quetsomñecá, nŷa šmochtsentšēna cachacá jtsemnana. <sup>2</sup> Smochtsiyena nŷetsca soyēnga bonshanánaca jtsamēse, ntšamo Cristo šojanabuanŷeshancá; chca, cha chabe derecho vida jtsobomñama cachcá tojanonŷá y bēngbiana tojanóbana. Y ntšamo Cristo tojanmca, yojamna Bēngbe Bētsábiöye jētschuanayama, y chabe bominŷiñe tša tšabá yojtsemna, mo ndaye ora Bēngbe Bētsá oyejuayá jóyēngacñana ndayá tcojóbá y altaroca tcojajuinŷese, y chē soye botamana jtsonguētsiyana.

<sup>3</sup> Tsēngaftanga, Bēngbe Bētsábēnga šmornēnga, ndoñe quecmátamna shembása o boy-abásaftaca bacna soyēnga jtsamana, ni chca játamama jtsejuabnayana y jtsebošana, y chē nŷe yapa jésebošana más soyēnga inŷengbiana jtsebomnana cach ndoñe. Ni chē soyēngama ndoñe šmattsóyebuambnaye. <sup>4</sup> Bacna soye ndoñe šmattsóyebuambnaye, ni corente ntjenouaboycá, ni nŷe ntšámnaca bacna soye jenbotatšēmbonana cach ndoñe, er chē soyēnga tsēngaftangbiana ndoñe tšabá ntsemnana. Chca játamamna, más tšabá, Bēngbe Bētsá šmochtsatschuanaye. <sup>5</sup> Er tsēngaftanga ya šmondētatsēmbo, ndocna chē shembása o boyabásaftaca bacna soye amá, ndocna chē nŷe chabe bacna juabnéngaca soyēnga jtsamama oyená, o chē nŷe más soyēnga inŷengbiana jtsebomnana bošá y amá (chca jtsayanana chabiana más iuámana soyēnga jtsebomnana, Bēngbe Bētsábiöye jats-bobonshánama), chca amēnguentsana ndocná tondaye queochatóyēngacñe ndayá Bēngbe Bētsá chabe entšangbiöye jatšatayama tojašebuachenantsana, Cristo y Bēngbe Bētsabe amēndayoca. <sup>6</sup> Ndocná chacmondainŷné ndoñe ndegombre tondmēna palabréngaca, bacna soyēnga chašmotsamama, er chē causa chē uabouana castigo echanjobaye, ndáyeca Bēngbe Bētsá chábiöye ndēyeunanēnga yochjácastigaye. <sup>7</sup> Chŷyeca, chca amēngbe soyēnga tondaye šmattsama.

<sup>8</sup> Tempo tsēngaftanga šmojaniyena bacna juabnénga jtsebomnēse y bacna soyēnga jtsamēse, mo ibetiñe cuafsiyencá, pero mora Bēngbe Utabnáftaca cánŷiñe mo canŷacá bētsemnayeca, chabe soyēnga šmontsetatšēmbo y sempre šmondētsemna cháftaca, chē entšangbe juabnénga binŷnayáftaca. Smochtsiyena jtsamēse mo chē binŷnayabe entšangcá. <sup>9</sup> Chē binŷnayábeyeca entšanga tšabe soyēnga jtsamana, chē Bēngbe Bētsabe bominŷiñe tšabá yomna soyēnga, y ndegombre soyēngnaca. <sup>10</sup> Nŷa šmochtsentšēna soyēnga jamama, Bēngbe Bētsá oyejuayá chaotsemnana. <sup>11</sup> Chē mo ibetiñe cuafsiyencá oyenēngbe bacna soyēnga tondayama ntoservénana, y tsēngaftanga chca ndoñe šmattsama. Chamna, chēngbiöye šmochjinŷanŷiye chēnga ndoñe tšabá tmonjamama. <sup>12</sup> Ndegombre, nŷe chē ndayá chēnga mo iytēmencá tmojamama jóyebuambayama ya cuantsēuatja; <sup>13</sup> pero nŷetsca soyēnga binŷiñe tmojacá ora jtsopodénana tšabá jinŷama ntšamo ndegombre tomncá. Cachcá, ntšamo entšanga tmojamcá chē binŷnayá chaojinŷanŷé ora, echantsopodena jtsotatšēmbuama ntšamo chē soyēnga yomnana; <sup>14</sup> er ndayánaca binŷiñe tojtsinŷyēna, jtsopodénana jinŷyama ntšamo ndegombre chē soye tomncá. Cachcá, ntšamo entšanga iytēmencá tmojtsamcá chē binŷnayá chaojinŷanŷé ora, chēnga mochántsetatšēmbo bacna soyēnga imojtsamama. Chŷyeca mēntšá jtsichámuana:

Botamana cochjájuaboye, aca ndoñe quecátobena jenomándana, mo canŷa cuaftsomañcá; chē bacna soyēnga ama causa, Bēngbe Bētsabe bominŷiñe mo obanēngcá imomnēnguentsana šmochtsojuánañe,

y Cristo acbe juabnénga echantsebinŷnaye ca.

<sup>15</sup> Chcasna, smochtsantješna ntšamo tšabá yomncá jtsamēse chašmotsiyenama. Ndoñe smattsiyena jtsamēse, mo chē Bēngbe Bētsabe soyēngama ndosertanēngcá, pero aífne chē chca

soyëngama osertanëngcá. <sup>16</sup> Lempe ntšamo chašmojobenacá nyets tempo tšabe soyënga šmochtsama, er quem tempo entšanga yapa bacna soyënga montsama. <sup>17</sup> Ntjenouabuacá ndoñe šmattsama, mo chë ndosertanëngcá. Pero aíñe bëtscá šmochtsentšena ndayá Bëngbe Utabná jamama yobošcá chacmósertama. <sup>18</sup> Ndoñe šmattsótmene, er chë soye entšábiye juanatsana jenomándama ndoñe chaondëtsobenama; chamna, šmochjama Uámana Espiritu sempre y bëtscá tšëngaftangbe ainaniñe chaotsemándama. <sup>19</sup> Smochjenatšetsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espiritu inétsama tšëngaftanga chašmotsobena jacántama soyëngaca; chca, nyets ainánaca Bëngbe Utabnabiama šmochjacántaye y cha šmochtsatschuanaye. <sup>20</sup> Nyets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

*Ntšamo yomna canye yebnentšënga chamotsemnama*

<sup>21</sup> Nyetscanga šmochtsenëyeunana, tšëngaftanga Crístbiye puerte šmorrespetánayeca.

<sup>22</sup> Shémanga, šmochtsatšëmbó tšëngaftangbe boyanga chë yebnentša mándayënga imonama; y nyets tempo chca šmochtsama, Bëngbe Utabná chašmotsobedecénama. <sup>23</sup> Er boyá endmëna shembe mandayá y inyëná, ntšamo Cristo chë ošbuáchiyëngbe mandayá y inyëná endmëncá. Cha chënga tojatsebacá y mora cha chënga entsamënda, mo chë bestšaë nyets cuerpo jtsemandayancá; <sup>24</sup> y chca, ntšamo chë ošbuáchiyënga, Cristo chëngbe amëndayá yomnama imotatsëmbcá y chca jtsamana, cachcá, chë shemángnaca entsamna jtsemnana nyetsca soyënguiñe chëngbe boyángaftaca.

<sup>25</sup> Boyanga, tšëngaftangbe shémanga šmochtsababuányëshana, ntšamo Cristo chábeñe ošbuáchiyënga yojanabuanýëshancá, y chca, chabe derecho vida jtsobomñama cachcá tojanonyá y chëngbiamá tojanóbana. <sup>26</sup> Chca tojanma, chënga chabe entšanga y puerte tšábenga jábiamama; y chënga tmojanenabaye ora, tmojaninñanyé Bëngbe Bëtsá chëngbe bacna soyënga tojánabuajuanama, y chabe delante tšábenga chamotsemnama cha tojanmama. Cha chca tojanma, er chënga chábeñe imojtsanošbuaché, chabiamá buayenana soyënga tmojanuena ora. <sup>27</sup> Cha chca lempe tojanma, chë ošbuáchiyënga japróntayama corente tšábenga y uámanënga cachabiamá chamotsemnama, ndocna bacna soye ndbomnënga, ni ndocna entšá chaondobená jayanama chënga imomna chë ndoñe tšabá tmonjamënga ca, ni ndocna inye cachca sóyeca. <sup>28</sup> Ntšamo canye boyá cachabe cuerpo endbetsobonshancá, cachcá cha bontsemna chabe shëmbiye jtsebobonshánana. Nda chabe shëmbiye tbojtsebobonshana, cachábíoye jtsebobonshánana, er chata cánýiñe jtsemnana mo nye canye entsá cuenta. <sup>29</sup> Er ndocná cachabe cuerpo jtsábóyënjana, ndayá saná janguangoñana y jtsinñenana, ntšamo Cristo bënga chë ošbuáchiyëngaftaca endbetsamcá; <sup>30</sup> er bënga nyetscanga cánýiñe mondmëna mo chabe cuerpo cuaftsemncá, y bënga mo chabe cuerpentša soyënga cuaftsemncá. <sup>31</sup> Ntšamo Bëngbe Bëtsabe uabemana palabrënguiñe endayancá: “Chiyëca, boyabása chabe taitá y chabe mamá echanjébashejuana chabe shëmaftaca jenútanama, y chë útata mo canýacá bochántsemna ca.” <sup>32</sup> Chë soyënga josértama puerte totcá comna, pero atše šcuayana, chë soye entsoyebuambná ntšamo Cristo chábeñe ošbuáchiyëngaftaca yomnama. <sup>33</sup> Pero morna, tšëngaftanga cada ona cachabe shëmbiye chabotsebobonshana, ntšamo cachá iuenobobonshancá, y shema boyábíoye ndoñe stëtsoye chabondëquedá.

## 6

<sup>1</sup> Básenga, Bëngbe Utabnáftaca cánýiñe mo canýacá bëtsemnayeca, tšëngaftangbe bëtšëtsangbiye šmochtsayaunana, er chca jamana tšabá endmëna. <sup>2</sup> Moisesbe leyíñe canye mando endmëna, y chentše endmëna chë Bëngbe Bëtsabe natsana mando, ndayentše cha tojašbuachená tšabe bendicionënga jamama: “Acbe taitá y acbe mamá ndoñe stëtsoye catjétsaquédaye, <sup>3</sup> tšabe vida chacuetso bomñama y quem luarentše bayté chacuetsiyenama.”

<sup>4</sup> Taitanga, ndoñe šmattsama tšëngaftangbe básenga chauetënama; más tšabana, chënga šmochtsabéchaye jtsabuátambayëse y jucacánëse, ntšamo Bëngbe Utabná endbetsabuutam-baycá.

<sup>5</sup> Tšëngaftanga, chë nyets tempo nye inýabiamá oservënënga, tšëngaftangbe nduiñënga šmochtsayaunana; chca šmochtsama puerte respétoca, bëtscá cuedádoca y nyets ainaniñe tšabe juabnëngaca, mo cach Crístbiye cuaftseservencá. <sup>6</sup> Y chca chë nduiñëngbiye šmochtsaservena, ndoñe nye chënga chacmojtšénýa ora, mo nda nye entšangbe delante tšabá joquédama cuaftsebošcá, ndayá Cristbe oservenëngcá, chënga nyets ainánaca jtsamana ntšamo Bëngbe Bëtsá tojtsebošcá. <sup>7</sup> Nyetsca trabajotëmënga šmochtsama nyets tšëngaftangbe añémoca, mo Bëngbe Utabnabiama cuaftsetrabajacá, y ndoñe nye entsangbiamá. <sup>8</sup> Er tšëngaftanga ya šmondëtatšëmbó, cada ona, nyets tempo nye inýabiamá trabajayá o nye

cachabiamana trabajayá tomna, ntšamo tšabe soyënga tojamcá Bëngbe Utabnábiocana yochjójëngacñe.

<sup>9</sup> Y tšëngaftanga, ndëmuanyëngbiamana ínÿenga nyëts tempo imoservena, cachcá tšabá chëngaftaca šmochjamna, tondayama ntsaútatjnayëse. Smochtsenójuabnaye, Bëngbe Utabná chë celoca endmëná, tšëngaftanga y chëngbe mandayá yomnama, y chabiamana nyëtscanga cachcá monduámána.

*Ndayá Bëngbe Bëtsá entsãnga tojatsatá Satanasbiamana jenëuyanama*

<sup>10</sup> Y morna, Bëngbe Utabnáftaca cánÿiñe mo canÿacá jtsemnëse, ainaniñe bëts añemo šmochtsebomna, chë Bëngbe Utabnabe bëts obenanentšana óbocana añemo. <sup>11</sup> Mo canÿe soldadcá, ba soyënga jtchëtjuana chë tmojtsentsjananga ora uayayëngbiamana jenëuyanama, tšëngaftãngnaca cachcá, nyëtsca chë Bëngbe Bëtsá cmojatsatá soyëngaca šmochtseprontana jenëuyanama, tšëngaftanga jáingñama Satanás ntšãmnaca tojtsama ora, ndoñe chacmondáyëñjanama. <sup>12</sup> Er bënga ndoñe quemuatenojuerzana cach quem luarentša entsãngaftaca jenëyëñjanama, ndayá bacna espíritënga mando bomnëngaftaca; bacna espíritënga obenana bomnëngaftaca; y quem luarentša entsãnga, chë bacna juabna bomna causa y Bëngbe Bëtsabe soyënga nduabatma causa, mo ibetiñe cwaftsoyencá oyena entsãngbiyoe amëndaye espíritëngaftaca; y chë tšabanánoca luarënguñe imomna y bacna soyënga chaotsebinÿinama ama espíritëngaftãcnaca. <sup>13</sup> Chiyeca, lempe ntšamo Bëngbe Bëtsá cmojatsatá šmochjójëngacñe y chë soyënga jtsamëse šmochtsiyena jtseprontánama, mo canÿe soldado jenëuyanama y jáyëñjanama bëtscá soyënga tojtochëtjácá. Chca šmochjama, chë uayayá Satanás tšëngaftangbiyoe jáingñama chaojtsama ora ndoñe chacmondáyëñjanama, y jenëuyanama lempe jtsamëse, chašmobená cha jáyëñjanama.

<sup>14</sup> Mo canÿe soldadcá, jabuache jtsanayana y cochaca canÿe morocho soye jenácochjatsana jtsevalentiamana y ndoñe chamondëyëñjanama, tšëngaftãngnaca cachcá, ntšamo ndegombre yomncá jtsamëse šmochtsiyena, mo chë jabuache cwaftasnacá, y chë Bëngbe Bëtsabe bominiñe tšabá yomna soyënga jtsamëse, mo chë morocho soye cochaca cwaftsecochjatscá, chca, Satanás tšëngaftangaftaca tondaye chaondobená jamama. <sup>15</sup> Mo canÿe soldadcá jtshëcochëtjuana betscó jobónjuama jtseprontánama, tšëngaftãngnaca cachcá, Bëngbe Bëtsabe obenánaca sempre šmochtseprontana jtsabuayiyayama ntšamo Bëngbe Bëtsá inëtšama entsãnga tempcá tšabá cháftaca chamotsatsmëñnama. <sup>16</sup> Canÿe soldado escudo jtsebomnana chë uayayabe uajuinÿinÿana flechëjuangá chabe cuerpiñe ndoñe chaoduámashënguama. Cachcá, tšëngaftanga cmontsamana Jesucristbeñe puerte jtsošbuáchiyana, mo escudo cwaftsebomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora. <sup>17</sup> Mo chë soldadcá, canÿe morocho buchtšanëse tojtabuchëtšëse chabe bestšaše jenëuyanama, tšëngaftãngnaca cachcá, sempre šmochjésejuabnaye Bëngbe Bëtsá cmojätsebacama, y chë juabna cmochanjújabuache, mo canÿe morocho buchtšanëse cwaftsbuchëtšancá. Mo canÿe soldadcá, chë uayayábioye jáyëñjanana, chabe espadéjaca japéliase, cachcá tšëngaftanga, Bëngbe Bëtsabe palabra šmochtsóyeuambnaye Satanás jáyëñjanama. Uámama Espiritu jtsamana, tšëngaftanga Bëngbe Bëtsabe palabra chašmotsebomnama. <sup>18</sup> Nyëts tempo chë Uámama Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yejuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jt-sobátmanëse, y Jesucristbeñe ošbuáchiyëngbiamana nyëtscangbiamana cha šmochtseimpadana.

<sup>19</sup> Atšbiámnaca Bëngbe Bëtsá šmochtseimpadana, atše jóyebuambayama chajontsé ora, cha chë buayenana soye chašúyanama; y atše chayobená tondayama ntjatauatjácá jóyebuambayana, y chca, entsãnga chayinÿanÿé Jesucristbiamana tšabe notiçiyënga, ndayá chënga tempo ndoñe monjántatšëmbo. <sup>20</sup> Bëngbe Bëtsá šojichmó mo canÿa chabe cuenta oyebuambnayacá, chë buayenánama entsãngbeñe jóyebuambayama, y chca bëtsamama, mora atše utamená sëntsemna. Atšbiamana Bëngbe Bëtsá šmochtseimpadana, atše chayobenama Cristbe buayenánama tondayama ntjatauatjácá jóyebuambayana, ntšamo atše jamama šojtsemncá.

*Pablo chënga jtadiósoftanama*

<sup>21</sup> Tíquico, Jesucristbeyeca Bëngbe bonshana catšata y canÿe entsá tšabe palabra bomná, Bëngbe Utabnabe trabajo jamama oservëniñe, ntšamo atše stemnana y ndayá stsamama tšëngaftanga chašmotsetatšëmbuama, lempe cmochanjácuntaye. <sup>22</sup> Chama cha tšëngaftangbiyoe sënjichmó, ntšamo muentše fstmennama chacmëyanama, y tšëngaftanga ainaniñe añemo chašmotsebomnama chaomama.

<sup>23</sup> Atše sëntseimpadana Bëngbe Bëtsá chë Taitá y Bëngbe Utabná Jesucristo, chaboma chë Jesucristbeyeca catšátangbe ainaniñe tšabe ebionana chašmotsebomnama, y Bëngbe

Bëtsábioye y ínÿengbioye puerte chašmotsababuánÿeshanama, Jesucrístbeñe tšëngaftangbe ošbuachiyánaca; <sup>24</sup> y chaboma, chë Bëngbe Utabná Jesucrístbioye bëts bonshanánaca imobobonshanëngbeñe tšabe bendicionënga chaotsemnana, canÿe ndocná yondobena jatrócama bonshanánaca.

## Filipeneses

### *Jacheuayama*

<sup>1</sup> Pablo y Timoteo, Jesucristbiana oservénata, quem tsbuanácha fséntsabiamná Filipos bēts puebloca Bēngbe Bētsabe entšanga imomnēnga, y Jesucristofaca cānyīñe mo canyáca imomnēngbiana. Fséntsabiamná nyetsca chē Jesucristbeñe ošbuáchiyēngbiana, nyetsca chentša uanatsanēngaftaca y chē inye ošbuáchiyēnga ujabuáchanīñe trabajayēngaftaca. <sup>2</sup> Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chaboma tsēngaftangbeñe tšabe bendicionēnga chaotsemnama, y chaboma tsēngaftanga ainaniñe tšabe ebionana chašmotsebonnama.

### *Pablo Bēngbe Bētsábioye tbojtanchuá ošbuáchiyēngbiana*

<sup>3</sup> Cada tsēngaftangbiana stenojuabó ora, Bēngbe Bētsá tsēngaftangbiana sēndbētsatschuanaye; <sup>4</sup> y Bēngbe Bētsá tsēngaftangbe tšabiana stseimpadana ora, atše corente oyejuayá chca sēndbētsama, <sup>5</sup> ntšamo tsēngaftanga atše šmojuájabuachama, tšabe noticiēnga Jesucristbiana entšanga abuayinyaniñe, tsēngaftanga Jesucristbeñe jtsošbuáchiyama šmonjanbojatsé orscana y méntsoñama. <sup>6</sup> Atše corente sēntsetatsēmo, Bēngbe Bētsá tojanbojatsé tsēngaftangbe ainaniñe tšabe soyēnga jtsamama, y más tšabe soyēnga yochtsamama. Y chca yochtsama, lempe ntšamo tsēngaftangbiana cha yojtsejuabnacá chaochnēnguēntscuana, y chca, Cristo Jesús yochjésabēntscuana. <sup>7</sup> Atše tsēngaftangbiana sempre ainaniñe sēndbētsenojuabnaye, chíyeca atšbiana puerte tšabá entsemna chca tsēngaftangbiana jtsejuabnayana. Tsēngaftanga nyetscanga atše šmonjuájabuache jamama chē Bēngbe Bētsá tša tšabia bētsemnayeca šonjanēntšabuaché trabajo. Atše chē Bēngbe Bētsabe trabajo sēndbomna jamama, mora sēntstámena ora o natjēmbana shjoca stsana ora, nyetscāngbioye tšabá inyināyīñe chē tšabe noticiēnga ndegombre soyēnga bētsemnama, y bētsá amiñe entšanga chē soyēnguiñe corente chamotsosbuáchemá. <sup>8</sup> Bēngbe Bētsá yotátsēmo ntšamo sēntschamcá ndegombre bētsemnama. Atše tša sēntseboše tsēngaftanga jánjama y chontsababuanyeshana cachcá ntšamo Cristo Jesús atše šondbobonshancá. <sup>9</sup> Atše, Bēngbe Bētsá sēntseimpadana tsēngaftanga cada te más cha chašmotsebobonshánama y chē inyēngbioynaca, chca, osertánana chašmotsebonnama ndayá chē ndegombre soye bētsemnama jtsetatsēmbuama, y chašmotsetátsēmo ndayá tšabá o ndayá ndoñe tšabá tondmēnama; <sup>10</sup> y chca, chašmotsobena sempre jabocacayama chē puerte tšabá yojtsemna jamama soye. Chca, Cristo yochjésabo ora, tsēngaftanga puerte tšabe vida šmochántsebonna, bacna soyēngaca ndēmandánēnga; y tondaye quešmochátama, chora chē entšanga chca ndoñe tšabá quenátsmēna ca chamuátichamuama. <sup>11</sup> Y lempe ntšamo chašmojtsamcá ndegombre tšabá echántsemna, y nye Jesucristo endobena jamama entšanga chca chamotsamama. Nyetsca chē tšabe soyēnga echántsemna, Bēngbe Bētsá puerte bētsá y uamaná bētsemnama jinyānyiyama.

### *Atšbe vida endmēna Cristo jtseservénama*

<sup>12</sup> Jesucristbeyeca atšbe catsátanga, atše sēntseboše tsēngaftanga chašmotsetátsēmo, ntšamo atše tijapasama, más bētsáca entšanga Jesucristbiana tšabe noticiēnguiñe chamotsosbuáchemá tojoservema. <sup>13</sup> Chca, nyetsca chē romanēngbe mandadbe bēts yebna bojanýá soldadēnga y chē inye entšanga quem luarentse montsetátsēmo atše utamená stsemna, atše Cristbiana tstrabája causa. <sup>14</sup> Atše utamená sēntsemnayeca, ošbuáchiyēnguentšana banga ainaniñe más añemo montsebonna, y chíyeca chēnga Bēngbe Bētsabe palabra más y más añemoca y tondayama ntjatauajcá entšāngbioye montsabuyayná.

<sup>15</sup> Ndegombre entsemna, bāseftanga Cristbiana entšāngbioye imojtsabuayiná, pero chēngna nye ntšamo tijashjachcá šmojtsántšabošama chca, y chēnga imojtseboše, bētsáca jtsamēse, atše chayotjāyanama; chíyeca chca imojtsama. Pero inyēngna, entšāngbioye montsabuyayná tšabe soyēnga inyēngbiana jamama ndegombre imojtsebóseyeca. <sup>16</sup> Mēnga chca montsama, atše šmondobonshánayeca y Bēngbe Bētsá chē trabajo šojanēntšabuáchemá mondētatsēmboye, Jesucristbiana tšabe noticiēnga ndegombre bētsemnama entšanga jtsinyānyayana; <sup>17</sup> pero chē inyēngna chca imojtsama, ndoñe tšabe soyēnga inyēngbiana imojtsebóseyeca, ndoñe chēnga chē inyēngbiana tšabe soyēnga imojtsebóseyeca. Chēnga Jesucristbiana imojtsoyebuambná nye entšanga chēnga chamotsarrespetánama, y nye cachēngbiana tšabe soyēnga jtsebonnama imojtsebóseyeca. Chēnga jtsejuabnayana mochjobenaye jamama atše más chašotsengmēnama ca, muentše utamená chjēftsemnēntscuana, chēnga entšāngbioye chca tmojtsabatambá ora. <sup>18</sup> Pero ¿ndayase chē soye atšbiana? Masque ntšámnaca, tšabe soyēnga inyēngbiana tmojtseboše o

ndoñe, Cristbiamá montsoyebuambná, y Cristbiamá chēnga montsoyebuambnama atše oyejuayá séntsemna.

Y cabá más chanjóyejuaye, <sup>19</sup> er atše séntsetatšēmo quem utámenentšana atše chjésebocnama. Atše séntsetatšēmo muentšana chjésebocnama, tšēngaftanga Bēngbe Bētsá šmoimpadánayeca y Jesucristbe Uámana Espíritu šuajabuachánayeca. <sup>20</sup> Atše corente jtsošbuáchiése Bēngbe Bētsábeñe séndobátmana, atše ndocna te tondaye chanjéftsema y chama chjaisēuatjama, pero aīñe nyetscangbe delante beca aīñemo chayoyebuambá, y nyets tempo pero más mora, lempe ntšamo stsamama y stsihámuaama, atše chaima entsānga chaminyāñyema Cristo puerte bētsá y uamaná bētsemnama, y chca chántsama masque ainá o obaná chaitsemnēse. <sup>21</sup> Chca entsemna, er atšbe vida Cristo jtseservénama endmēna, y nderado atše chajóbanēse, nyetscanga puerte bēts soye mochanjéftssashjache. <sup>22</sup> Pero atše ainá stsemnēse, chanjobenaye más uámana trabajo Cristbiamá jéftsemama. Chýeca, atše ndoñe corente quetsátstātšēmo ntšamo mora jobuáyanana, ainá jtsemnama o ndoñe. <sup>23</sup> Ndegombre mora puerte šontsētēmmana ntšamo jobuáyanana: atše tša séndboše ndoñe más quem luarentše ntjéftsemnana, Crístoftaca jtsatsmēnama, y ndegombre chca atšbiamá puerte tšabá nántsemna; <sup>24</sup> pero, inýoicana tšēngaftangbiamá šontsemna ainá jéftsemnana. <sup>25</sup> Atše corente séntsetatšēmo chca ndegombre yochtsemnama, y chýeca séntsetatšēmo atše cabá ainá chjéftsemnama, tšēngaftanga jujabuáchama más Jesucristbeñe chašmotsošbuáchema, y chiñe bētsá oyejuayana chašmotsebmnama. <sup>26</sup> Chca, atše tšēngaftanga jutsētsayama choye chajá ora, chašmobená inye soyama más Cristo Jesús jétschuayama.

<sup>27</sup> Morna, chē más uámana soye entsemna, tšēngaftanga chašmotsama ntšamo jtsiyenama ntšamo chē Cristbiamá tšabe noticiēnguiñe endayancá. Y mēntšá, cachcá, jutsētsayama chajá o ndoñe, atše chántsetatšēmo tšēngaftanga Jesucristbeñe ošbuáchiyama ndoñe šmontsajbanama, y aīñe beca ošbuáchiyana chábeñe šmotsobomñama; nyetscanga cachcá šmojtsejuabnáyeca y nyetscanga cach soye šmojtsebóšeyeca, cánýiñe nyetscanga enutanánēnga jtsenojuerzánēse, ndocná chē tšabe noticiēnguiñe tšēngaftanga šmobomna ošbuáchiyana chacmondábuajuanama. <sup>28</sup> Tšēngaftangbe uayayēngbiamá tondayama šmattsauatja, sempre bētsá añemo šmochtsebmoma. Chca tšēngaftanga šmochanjínýiñyē chēnga pochocánēnga mochtsemnama, y tšēngaftanga atsebácanēnga šmochtsebmoma. Y chē soye Bēngbe Bētsá tšēngaftangbiamá echántsama, Cristbeñe šmosbuachéyeca. <sup>29</sup> Chca echanjopása, er Bēngbe Bētsá tšēngaftangaftaca puerte tšabia endmēna, Cristbiamá oservénēnga Bēngbe Bētsá tcmojábiamá, pero ndoñe nye chábeñe chašmotsošbuáchema, ndayá chabiamá chašmosufrinnaca. <sup>30</sup> Tšēngaftanga y atše cachca soyama montsenojuerzana. Tšēngaftanga ya šmonjinýe ntšamo atše sēnjánenojuerzana, entsānga jinýanýiyama chē tšabe noticiēnga ndegombre soyēnga bētsemnama. Y mora, tšēngaftanga noticiēnga šmochanjóyēngacñe ntšamo atše cach soyama cachcá stsamama.

## 2

*Ndoñe uámanēnga šmattsenobiamnaye, ntšamo Cristo ndoñe tonjanmcá*

<sup>1</sup> Tšēngaftanga, Crístoftaca cánýiñe mo canýacá jtsemnēse, ainaniñe bētsá añemo šmotsobomna. Cristo cmondábabuanýeshana, y chē soye tšēngaftanga cmontsējabuachana nyetsca trabajēnguentšana tšabá jabocanama. Y tšēngaftanga Cristbe Espíroftaca cánýiñe mo canýacá šmontsemna; tšēngaftanga nyetscanga šmondénbobonshana y nyetscangbiamá jóngmiamá šmonduamana. <sup>2</sup> Tšēngaftanga lempe chca šmobómnyayeca, atše corente oyejuayá šmochjábema, er tšēngaftanga nyetscanga cachcá cánýiñe šmondéjuabná, cachcá nyetscanga šmondénbobonshana, nyetscanga mo canýe ainancá šmondobomna, y nyetscanga cachca soye šmondboše. <sup>3</sup> Tondaye šmattsama nye inýenga chē soyeca chamotjáyana, o nye tšēngaftanga tša bēts soyēnga amēnga šmomna ca entsānga chamotsejuabnama; pero ndoñe yapa uámanēnga šmojtsemna ca šmochtsejuabnaye, y cada ona chaotsejuabná chē inýenga bēngbiamá más uámanēnga imomnama. <sup>4</sup> Y ndocná tondaye chaondétsama, nye chabiamá tšabe soyēnga jónýenama, sinó ndayánaca chaotsama nyetscangbiámna tšabe soyēnga jónýenama.

<sup>5</sup> Tšēngaftanga cmontsamna jtsemnana ntšamo cach Cristo Jesús yojanjuabná y yojanamcá:

<sup>6</sup> Cha nyets tempo yomna cach Bēngbe Bētsá y uamaná cach Bēngbe Bētsá, pero masque chca, ndocna te yonjanjuabná:

“Atše séntseboše nyetsca entsānga nyets tempo atše chašmotserrespetana, ntšamo atšbe Taitá Bēngbe Bētsá mondérrespetancá ca.”

<sup>7</sup> Pero cha mo nduamanacá tonjanóbema, nyetsca chabe bomna soyēnga jéftsebohjonēse, y ndegombre, mo canýe oservenacá tojanóbema.



Cha canye entšacá tojanonyňa,

y entšanga canye ndegombre entšacá tmojáninye.

<sup>8</sup> Cachá tojanlesenciá nduamaná jtsemnama,

y sempre Bëngbe Bëtsábioye ibnayeunana, y jobanámna, cruciñe jóbaneše.

<sup>9</sup> Ndayá cha tonjanmama, Bëngbe Bëtsá, chë celoca más uámama luare tbojaninyé

y chë más uámama uabaina, chë más bëtsétsangbe uabaingentša uabaina tbojabuajo;

<sup>10</sup> y chca, celoca imomnënga, y quem luarentše y fshantše jashenoye imomnëngnaca

nýetscanga chamóshamentšema,

Jesúsbioye jëtschuayama, chabe uámama uabaina jayanëse;

<sup>11</sup> y chca, nýetscanga chamuayana Jesucristo chëngbe Utabná yomna ca,

chca, Bëngbe Bëtsá chë Taitá nýetscanga chamotsatschuanama.

*Cristbeñe ošbuáchiyënga entsamna mo buashinyëngana estrellëngcá jtsemnana*

<sup>12</sup> Chcasna, atšbe bonshana catsátanga, ntšamo atše tšëngaftangaftaca sënjamna ora, atše sempre šmonjanëyeunancá, mora más šmochtsatënëyeunana, mora atše tšëngaftangbiama bënoca stsemna ora. Bëtsétsanga ntjatenobiamnycá y Bëngbe Bëtsá jtserrespetánëse šmochtsama soyënga, chca, tšëngaftangbe tšabe videntše, Jesucristbeñe ošbuáchiyënga quet-somñecá, tondaye chacmondëtsabuáshebenama; <sup>13</sup> er Bëngbe Bëtsá nýets tempo tšëngaftangbe ainaniñe inétsama tšëngaftanga ndayánaca chašmotsebošama y chašmotsamama, ntšamo cha yoyuabná y yobošcá chaotsemnana.

<sup>14</sup> Ndayánaca jamama chacmojtšëjaboto ora, chë soye šmochjama, chca jamama yapa totcá comna ca ntjatichamcá y ingyengaftaca jabuachana ntjatenatsëtsnycá.

<sup>15</sup> Chca cmontsamana, chca, tšëngaftanga šmojtšama soyënguñe ndocná ndocna bacna soye chaondínënama, y puerte tšabe vida chašmotsebonnana. Bëngbe Bëtsabe

puerte tšabe basengcá šmochtsiyena, tšëngaftanga chë šmojtsemnënga canye luarentše puerte bacna entšangbeñe y sempre bëtscá bacna soyënga jtsamana uamanëngbeñe.

Chiyecna, tšëngaftanga šmochtsiyena puerte tšabe soyënga jtsamëse, y chca tšëngaftanga šmochántsemna mo canye ibetiñe luarentše buashinyëngana estrellëngcá. <sup>16</sup> Chë tšabe

soyëngaca entšangbioye chauñyanýe ntšamo muanjobenaye tšabe vida jtsebonnana. Chca chašmojamëse, Cristo cachiñe yochjésabo ora, atše chantsobena tšëngaftangbeyeca

puerte oyejuayá jtsemnana, er ntšamo chašmojamcá echanjinyányiye atše ndoñe nýe bonamente jabuache tijatrabajá. Chca atše chántsemna mo nda bëtscá tojoprontá, y

chentšana ingyengaftaca tojótjajo ora, chëngbioye tojtsayëñjanacá. <sup>17</sup> Mo chë altaroca canye bachna buiñe tojuabuashanacá, Bëngbe Bëtsá jëtschuayama tmojóba ovesháftaca,

cachcá nderado echántsemna atšbe buiñe, atše šmojbóse, chca, Bëngbe Bëtsábioye oyejuayá jabemama.

Tšëngaftanga bëtscá šmojalemošná, Cristbeñe tša šmošbuachëyeca, y tšëngaftangbe ošbuachiyánënga endmëna Bëngbe Bëtsábioye oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábioye oyejuayá

jabemama. Atše chca stjabanëse, puerte oyejuayá stsemna, y stjama tšëngaftangnaca cachcá chašmotsóyejuama. <sup>18</sup> Chca, tšëngaftanga cmontsamana oyejuayënga jtsemnana, y

šmochjama átšnaca oyejuayá tšëngaftangaftaca chaitsemnana.

*Timoteo y Epafrodito*

<sup>19</sup> Atše becá ošbuachiyánaca Bëngbe Utabná Jesúsbeñe jtsobátmanëse, sëntsejuabná pronto chjobenaye Timoteo tšëngaftangbioye jíchmuama, tšëngaftangbiama chašuabocuéntama, y

chca, atše más añemo chaitatsbonnana. <sup>20</sup> Er nýe cha endmëna canya cach atscá ainaniñe juabnayá, y cha ndegombre puerte enteboše tšëngaftanga tšabá chašmuetsiyenama; <sup>21</sup> chë

ínyengna nýetscanga nýe cachëngbe tšabiama ndayánaca jamama jtsejuabnayana, y tondaye ntsebošana Jesucristbiama jamama. <sup>22</sup> Pero cach tšëngaftanga ya šmondëtatšëmbo,

ntšamo Timoteo chë padecena soyënguentšana tšabá tonjëtsobocñama, y ntšamo Timoteo y atše, mo canye uaquiñá chabe taitábioye cuafsjabuachancá, cánýiñe fsëñjantrabájá, más

bëtscá entšanga chë tšabe noticiënga chamóyëngacñama. <sup>23</sup> Chcasna, atše sëntsobátmana cha jíchmuana, ntšamo átšëftaca jopásama chaitsetátšëmbo y cachora; <sup>24</sup> pero bëtscá

ošbuachiyánaca sëntsobátmanayeca, sëntsejuabná, Bëngbe Utabná chašojtábocnëse, pronto átšnaca chjobenaye choye jama.

<sup>25</sup> Atše sëntsejuabná yojtsemna, Jesucristbeyeca bëngbe catšata Epafrodítanaca choye jíchmuana, nda átšëftaca cánýiñe endëtrabájá y chë tšabe noticiënga ndegombre

soyënga bëtsemnana jinýanjiyama endenojuezana, nda tšëngaftanga šmojanichmó atše chašuabëuájabuachama. <sup>26</sup> Cha chanjíchmuá; cha puerte enteboše tšëngaftanga jányama, y yapa ngmënaca entsemna, cha šocá enjamnama šmojátatšëmbonama. <sup>27</sup> Y ndegombre

cha šocá enjamna, y enjëtsinýna mo jtsobanamcá; pero Bëngbe Bëtsá thonjalastemá, y ndoñe nýe chábioye sinó átšbioynaca, atše ndoñe más ngmenanënga chayátsbomnana,

ntšamo mora sëntsebonnana. <sup>28</sup> Chiyeca atše más sëntseboše cha pronto jíchmuana, as

tšëngaftanga cha chašmojtinýe ora, puerte oyejuayënga chašmotsemnana, y atše ndoñe yapa chašondëtsengmenama. <sup>29</sup> Smochjofja nyëts oyejuayánaca, Bëngbe Utabnábeyeca catšátanga quetsomñecá; y nyëts tempo chacá amëngbioye mo bëtsëtsangcá šmochtsëtabna, <sup>30</sup> er batšatema más y matënjëtsobana, Cristbiana trabajayiñe uajabuachaniñe. Cha chë trabajo tonjanma atše juajabuáchama, ntšamo cach tšëngaftanga ndoñe chešmatanobenacá, atše juajabuáchama.

### 3

#### *Ndayá Pablëbiana ndegombre corente yojanámana*

<sup>1</sup> Y morna, atšbe catšátanga, ndayá Bëngbe Utabná tojamama móyejuanga. Ndoñe bacá quešnatámana, ntšamo chë inýe tsbuanáchañe tcbonjanëbuabiamcá cachcá cachiñe jtëtyanama; y chë soye bëtscá cmochanjúbuache ndoñe resjuiñe chašmondëtsemnana. <sup>2</sup> Cuedado smochtsebomna chë ndoñe tšabe entsangbiana, mo quešëngcá imomnënga, chë puerte bacna soyënga mondbëtsamënga, y entsangbe más delicadentše base bobachtema jatëšana uamanënga; <sup>3</sup> er bënga mondmëna y ndoñe ínýenga, chë ndegombre uinýananana bomnënga, bënga Bëngbe Bëtsabe entsanguentšënga bëtsemnana, bënga chë Uámana Espiritbe uajabuáchenanaca Bëngbe Bëtsá mondadóránama, bënga chë Cristo Jesúsëftaca cánýiñe mo canýacá bëtsemnana mondbëtsoyejuama, y bënga chë ntšamo ínýenga monduamancá bëngbe cuerpiñe jamama tondayama yondoservënama mondbëtsejuabnayama.

<sup>4</sup> Masque atše razón sëndëtsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebomna chë soyënga yoservena ca jtsejuabnayama, ndegombre atše chabiana más razón chama stsóbomñe. <sup>5</sup> Sënjanonýná y posufta tianoye base bobachtema chë más delicadentše šmojantëtše; atšbe nyëts uta bëtsëtsata Israeloca entsanguentšata bonjanma, y atšna Benjamimbe bëts pamillentsá sëndmëna; atšbe tempsca bëts taitanga nyëtscanga hebreunga immanna. Atšna fariseo sënjamma. Atše sënjánama, lempe ntšamo judiëngbe leyënguiñe endayancá, ndayá jamama sojanmëncá. <sup>6</sup> Atše tša sënjánboše Bëngbe Bëtsá jtseservënama, chíyeca Jesúsbeñe ošbuáchiyënga bëtscá sënjaneçamena; y ndayá canýe entsá ibnëtsemna jtsamama, Bëngbe Bëtsabe bominiñe tšabia jtsemnana, judiëngbe ley jtsocumplinë, chama ndocná tondaye quenjátsbomna jayanama, atše ndoñe tšabá sentsanama ca.

<sup>7</sup> Pero lempe chca ntšamo atše sënjannama y ndayá sënjánamama, puerte sënjanjuabná atšbiana puerte yojanámana ca; pero mora, Cristo atšbe ainaniñe tonjámashëngoyeca, chë soyënga atšbiana y ndoñe quenatámana. <sup>8</sup> Y cabá más, tondaye atšbiana quenatámana, chë bëts soye jtsonýayëse, Cristo Jesús, Bëngbe Utabná jtsabuatmana. Chábeyeca, lempe chë nyë quem luarentša soyënga sënjëseboshjona, y lempe chë soyënga atšbiana tondayama quenátoservena; y chca entsemna, chë bëts soye jëftsashjáchama, Cristo jtsabuatmana, <sup>9</sup> y cháftaca cánýiñe mo canýacá jtsemnana. Atše ya ndoñe quetsatsngúá Bëngbe Bëtsabe bominiñe tšabia jtsemnana, nyë ntšamo atše tijamama chë judiëngbe ley jtsocumplinë, pero Cristbeñe jtsošbuáchiyëse añe; Bëngbe Bëtsá entsama atše chabe bominiñe tšabia chaitsemnana, atšbe bacna soyëngama jtseperdnase, y lempe chca entsemna atše Cristbeñe sëndošbuachéyeca. <sup>10</sup> Atše sëntseboše ndayá cha jtsabuatmana, chë obanënguentšana tojtanayenama cha tojaninýanýe obenana atše chaitsebomna, atše cháftaca cánýiñe mo canýacá chaitsemna ora; y ntšamo bënga játsebacama ora cach Cristo tojansufricá, átšnacá cachcá chaisufrima. Y cha tojanóbana orcá atše chaitsemnana; <sup>11</sup> y ntšamnaca, atše jëftsashjáchama Bëngbe Bëtsá chaoma atše chaitayenama.

#### *Yeuana jtsentsëñëse, Bëngbe Bëtsábicocana uacanánana josháchiñama*

<sup>12</sup> Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bëngbe Bëtsabe bominiñe stsemna ca, pero sempre natsanoye sentsá, mo nda canýe luaroye jashjanguama cuaftsëchamancá; y puerte jtsošbuáchiyëse sentsóbátmana atše chjobenaye jtsemnana, chë ndayama Cristo šojanchembo, er Cristo Jesús ya tonjama atše chabiana chaitsemnana. <sup>13</sup> Atšbe catšátanga, atše ndoñe quetsátichamo chca ya tijashjache ca. Pero chama canýe soye sentsama: chë tempo atše sënjánbomna y sënjánama soyënga, mora lempe stëtšoye sënjaquedá, y bëtscá sentsama jobenayama chë jashjanguama yojtsemnoye jashjanguama, <sup>14</sup> chë ndémoca yojtsemna jashjanguama luaroye jobenayama jashjanguama, mo nda canýe luaroye jashjanguama ndayánaca juácanama bëtscá jenujuérazese cuaftsëchamancá. Cachcá, átšnacá sentsá chë Bëngbe Bëtsá šojtsachembuana uacanánana josháchiñama, Cristo Jesúsbeyeca; y chë uacanánana entsemna chë nyëtsca tescama yomna tšabe vida jtsebomnana.

<sup>15</sup> Chca bënga šontsamna jtsejuabnayana, chë Jesucristbeñe puerte ošbuáchiyana y nyëts tempo cha ústonënga; y nderado tšëngaftanga ndayífnaca inýetsá šmojatsjuabná ora, Bëngbe

Bětsá chě sóynaca tšabá cmochanjínjanýiye. <sup>16</sup> Pero morna šontsamna jtsiyenana ntšamo mēntsoñama Běngbe Bětsabe soyēngama sojosertacá.

<sup>17</sup> Jesucristbeyeca catšátanga, ntšamo atše sēndmēncá tšēngaftanga šmochtsemna, y chě ntšamo jtsiyenama tcbonjaninýanýecá imojtsiyēngbioye šmochtsēnyaye. <sup>18</sup> Ntšamo cbochanjauyancá, ya ba soye tcbonjáyana y mora cachiñe chca chanjayana, pero chca jayanamna atše puerte ngmēnaca sēndbětsemna. Banga mondmēna, y chēnga ntšamo vida imojtsebomnama montsinýinýná, lempe ntšamo Cristo chě cruciñe jóbānēse bēngbiana iuayancá contra chēnga imojtsemnama, <sup>19</sup> y chēngbioye nyetsca tescama in-fiernoca mochāntsapochocaye. Chēngbiana chě más uamana soye yojtsemna jtsamana ntšamo cachēnga tmojtsebošcá, nýe cachēngbe cuerpiñe tšabá jytsemñama. Chēnga nýa mo bēts soye cuafjamcá jtsemnana chě soyēnga tmojtsama ora, pero ndegombre chēnga entsamna cach soyēngama jtsēuatjama; y chēnga sempre jēsejuabnaya chě nýe quem luarama enójuabnāyēngbe soyēngama. <sup>20</sup> Chě cuenta bēngna, ndegombre celocama entsānga mondmēna, y mora montsobātmana, chě luarocana chauabo bēngbe atsebacyá, Bēngbe Utabná Jesucristo. <sup>21</sup> Cha bēngbe cuerpēnga, chě pronto jopochócama cuerpēnga echanjātrocaye, jtsemnama mo chabe cuerpćá, chě obanēnguentšana tojtayenabe cuerpćá; y cha chca echanjama, cha puerte obenana lempe jtsemāndayama bómnyeca.

## 4

### *Bēngbe Utabnáftaca cānyñiñe mo canýacá jtsemñese oyejuayana jtsebomnana*

<sup>1</sup> Chcasna, Jesucristbeyeca atšbe catšátanga, Bēngbe Utabnábeñe ošbuáchiyana ntjajbanacá, y puerte chábeñe jtsošbuáchiyēse, cháftaca cānyñiñe mo canýacá šmochtsemna. Corente cbondábuanýeshana y tša sēntseboše tšēngaftanga jányama. Tšēngaftangbeyeca atše puerte oyejuayá sēntsemna, y atše corente sēndbětsoyejuaye tšēngaftangbiana inýēngbioye jáuyanama.

<sup>2</sup> Evodia sēntseimpadana y Sintiquenaca, chata chabuatenóyeunama, mo Bēngbe Utabnábeñe ošbuáchiyana quetsomñecá. <sup>3</sup> Y ácnaca, nda puerte tšabá átseftaca tconjatrabajá, cbontseimpadana chama chě shembásata chacújabuachama, er chata bētscá átseftaca tbonjatrabajá tšabe noticiēnga entsānga abuayinýa. Clemente y inýe entsānga átseftaca tmonjatrabajá cach soye amiñe. Nyetsca chēngbe uabaina entsábemana chě librēšañe, ndayentše yojtsábemana chě tšabe vida mochjónýēngbe entsāngbe uabaina.

<sup>4</sup> Sempre oyejuayēnga šmochtsemna, Bēngbe Utabnáftaca cānyñiñe mo canýacá jtsemñese, y cachiñe šcutétayana: ¡Móyejuanga! <sup>5</sup> Nyetscanga chamotsetátšēmo, tšēngaftanga tšabe juabna bomnēnga šmonama. Bēngbe Utabná jésabama tempo ya entsobeco.

<sup>6</sup> Tondayama šmattsenócochinýena, pero cada Bēngbe Bětsáftaca chašmojtsencuēnta ora, ndayá cmojtsējabotama cha šmochjaimpáda. Y chca chašmojtsama ora, chánaca sochtsatschuanaye. <sup>7</sup> Chca, Bēngbe Bětsá echanjama chě chabe ainaniñe tšabe ebionana tšēngaftanga chašmotsebomnama; chě tšabe ebionana puerte bētscá endmēna, y bēnga entsānga quetsomñecá ndoñe ntsobenana chama jósertana; y chca tšabe ebionánaca, tšēngaftangbe juabnēnguiñe y ainaniñe tondayama quešmochátenocochinýena, er tšēngaftanga cānyñiñe mo canýacá Cristo Jesúseftaca šmondmēna.

### *Lempe ntšamo tšabá yomncá soyēngama jtsejuabnayana*

<sup>8</sup> Cabana, atšbe catšátanga, lempe ntšamo ndegombre yomncá soyēnguiñe šmochtsejuabnaye, lempe chě respeto yomerecēniñe, nyetsca soyēnguiñe entsāngbe bominýiñe tšabá yomniñe, nyets tempo corente tšabá yomniñe, nyetsca soyēnga entsānga yogusetániñe, y lempe chě ndayama entsānga tmojtsejuabná tša iuámana ca soyēnguiñe. Lempe chě tšabá yomna soyēnguiñe y jtsatschuanayama yomna soyēnguiñe šmochtsejuabnaye.

<sup>9</sup> Sempre šmochtsama chě átšbentšana šmojuábouinýe soyēnga, chě atšbiajana šmojóyēngacñe soyēnga, chě atše šmojoyeuná soyēnga y ntšamo šmojinýcá atše jtsamana. Chca šmochtsama y Bēngbe Bětsá, chě bēnga ainaniñe tšabe ebionana chamotsebomnama amá, tšēngaftangaftaca echántsemna.

### *Pablo tojtanacheuá tmojanájabuachama*

<sup>10</sup> Atše corente sēndoyejuá Bēngbe Utabnáftaca cānyñiñe mo canýacá tsmēnana, er tšēngaftanga ba ishinye chentšana, cachiñe šmojatobená atše jatinyinýiyana ntsachetšá atšbe tšabiana tšēngaftangbiana iuámanana. Chca, atše ndoñe quetsátichamo tšēngaftanga atšbiana cmojtsanebnětjomba ca, ndayá ntšamo tšēngaftanga tšabá šmojuabnacá atše jinýinýiyama ndoñe yonjanopodena ca. <sup>11</sup> Atše chca, ndoñe quetsátichamo uajabotá stsemna ca, er atše sēnjuatsjinýe sempre oyejuayá jéftsemnana, nýe ndaye soyiñe masque batšatēmnaca stsebomñese. <sup>12</sup> Atše sēndētātšēmo ntšamo yomna jtsiyenana chě vida jtsebomnama uajaboto soyēnga tojtsashbēñese, y ntšamo yomna jtsiyenana chě tcuajabótama más bētscá

jtsebojnēse. Atše tijuatsjinjē oyejuayá jtsemnana masque nje ndaye soyēnguifnaca stsemna ora, jasama bētsá stsebojna ora o masque nje shēntseca jtsemnana šojtsemna ora, atše jtsiyenama bētsá soyēnga stsebojnēse o masque ndófnaca. <sup>13</sup> Atše lempe chca sēndobena, atše obenana jtsebojnana Cristo endbētsamayeca. <sup>14</sup> Masque chcasna, tšēngaftanga tšabá šmonjama, atše padecena soyēnguife sēnjamma ora atše juajabuáchana.

<sup>15</sup> Tšēngaftanga, chē Filipos puebloca Jesucristbe ošbuáchiyēnga, corente šmondētatsēmo, Macedonia luarentšana sēnjēftsanbočna ora, nje tšēngaftanga atše šmonjanájabuachama; injē ošbuáchiyēnga ndoñe. Chora enjamna atšbe bojatšena tempo tšēngaftangbe luarentšē chē tšabe noticiēnga entsānga abuayinayaiñe; y nje tšēngaftanga atše šmonjanájabuache. <sup>16</sup> Ba soye atše Tesalónica puebloca sēnjamma ora, y chašmuájabuachama šonjanájaboto ora, tšēngaftanga atšbe opresidēngama crocénana šmonjanafja. <sup>17</sup> Chca ndoñe quenátayana atše tsjuabná nje tšēngaftangbentšana ndayánaca jóyēngacñama ca; chē sóyeca atše sēntseboše ndayá tšēngaftanga más tšabe soyēnga chašmotsamama, Bēngbe Bētsá tšēngaftangbiamá más chaotsóyejuama. <sup>18</sup> Er atše ya lempe sēnjóyēngacñe, y chē šuajabótama cabá más sēntsebojna. Atše chē ntšamo šjuajabotcá lempe sēntsebojna, chē tšēngaftanga Epafrodítóftaca šmonjanichmó soyēngaca. Ndayá atše šmojanichmocá, Bēngbe Bētsabe bominjīñe puerte tšabá entsemna, mo juatšēmbonama ndayá tcojóba y altaroca tcojajuinjé y botamana tojtsonguētšecá, chora cha oyejuayá chca jóyēngacñana. <sup>19</sup> Atšbe Bētsá, chabe bētsá uámana y bēts bojnánaca, echanjama tšēngaftanga lempe ntšamo cmējabotcá Cristo Jesusbajana chašmóyēngacñama. <sup>20</sup> Entšanga nyets tempo chamotsinjanáná Bēngbe Bētsá y Bēngbe Taitá puerte uamaná bētsemnana. Chca chaotsemna.

#### *Chēnga jtadióšoftanama*

<sup>21</sup> Atšbe cuenta, nyetscanga chē Jesucristbeyeca Bēngbe Bētsábenga imomnēnga šmochjácheuaye. Atšeftaca montsemna Jesucristbeyeca catsátangnaca cmontsacheuaná. <sup>22</sup> Nyetscanga chē muentše Bēngbe Bētsábenga imomnēnga, y más chē romanēngbe mandadbe bēts yebnoca oyenēnga, cmontsacheuaná.

<sup>23</sup> Atše sēntseimpadana Bēngbe Utabná Jesucristo, chaoma tšēngaftangbeñe tšabe bendicionēnga chaotsemnana.

## Colosenses

### *Jacheuayama*

<sup>1</sup> Atse Pablo, Jesucristbe ichmoná Bèngbe Bètsá chca yobóseyeca, y Jesucristbeyeca bèngbe catšata Timoteóftaca, <sup>2</sup> quem tsbuanácha séntsabiamná ché Colosas puebloca Bèngbe Bètsábenga imomnèngbiana. Tšéngaftanga bèngcá Jesucristbeñe ošbuáchiyènga šmondmèna, y chca, Jesucristbeyeca bèngbe catšátanga. Atse séntseimpadana Bèngbe Bètsá Bèngbe Taitá, chaoma tšabe bendicionènga tšéngaftangbeñe chaotsemnana, y chaoma tšéngaftangbe ainaniñe tšabe ebionana chašmotsebmnama.

### *Pablo, Bèngbe Bètsábioye tbojanimpadá Colosas puebloca ošbuáchiyèngbiana*

<sup>3</sup> Bèngbe Bètsá, Bèngbe Utabná Jesucristbe Taitá tšéngaftangbiana fstseimpadana ora, cha sempre fchandbètsatschuanaye, <sup>4</sup> er bènga fsènjátatsèmbona ntšamo tšéngaftanga Cristo Jesúsbeñe tša šmojtsošbuáchemá, y ntšamo tšéngaftanga nyètscanga ché Bèngbe Bètsábenga imomnènga šmababuánjeshanama. <sup>5</sup> Natsanama, ché ndegombre buayenánama, ché tšabe noticiènga, tšéngaftanga tcmojanabuatambá ora, tšéngaftanga botamana šmojanuena ntšamo ché buayenániñe bejtsayancá, ché tšéngaftanga šmojtsobena tšabe soyama jobátmana, Bèngbe Bètsábeñe jtsošbuáchiyèse. Ché šmontsobatmana soye entsama tšéngaftanga Jesucristbeñe puerte chašmotsošbuáchemá y nyètscanga chašmotsababuánjeshanama. Bèngbe Bètsá celoca enduaquécjná ché tšéngaftanga šmojtsobatmana tšabe soye. <sup>6</sup> Ché tšéngaftanga tcmojanabuayená tšabe noticiènga más bètscá entšanga montsuenana; y chca, nyèts quem luarentše entšanga montsiyena más tšabe soyènga jtsamèse. Chca entsemna ntšamo tšéngaftangbèntše tojopasacá, ché natsana te ché tšéngaftanga Bèngbe Bètsabe tšabiánama šmojanuena orscana, y ntšamo Bèngbe Bètsá puerte bonshanánaca y tšabiánaca bèngbioye šuanjenama ndegombre cmojanosérta orscana. <sup>7</sup> Y chca Epafra tšéngaftanga tcmojanabuatambá, Bèngbe Bètsabe bonshánama y tšabiánama. Epafra endmèna canya bèngaftaca Cristbiana oservená, y cha bènga fsèndbobonshana; cha Cristbiana endètrabája bèngbe cuenta tšéngaftangbèntše. <sup>8</sup> Cha šonjáuyana ntšamo ché Uámana Espiritu yojtsama, nyètscanga Jesucristbeñe ošbuáchiyèngbioye chašmotsababuánjeshanama.

<sup>9</sup> Lempe ntšamo tšéngaftangaftaca tojopasama, ché natsana te tšéngaftangbiana fsènjauena orscana y méntsoñama, Bèngbe Bètsá sempre tšéngaftangbiana fchandbèntseimpadana, cháftaca ftsencuènta ora. Bèngbe Bètsá fsèndèimpadana, chabe Espiritu chaoma tšéngaftanga chašmotsobena jtsetatšèmbuana y jtsosertánana, chca, ntšamo Bèngbe Bètsá yobošcá chašmotsamama, tšéngaftanga tšabá chašmotsetatšèmbuama. <sup>10</sup> Y chca, tšéngaftanga šmochantsobena jtsiyenana jtsamèse ntšamo Bèngbe Utabná yobošcá, y sempre šmochántsama ntšamo chabiana tšabá yomncá. Ntšamo tšéngaftanga chašmojtсийencá tšabe soyènga jtsamèse, chentšana nyètca tšabe soyènga echanjóbocna, y tšéngaftanga más tšabá Bèngbe Bètsá šmochantsabuata. <sup>11</sup> Atse, Bèngbe Bètsá séntseimpadana, chabe puerte bètscá obenánaca cha chaoma tšéngaftangbe ainaniñe bèts añemo chašmotsebmnama; y chca, tšéngaftanga ché padecena soyènguiñe chašmojtsemna ora, puerte uantadènga chašmotsemnana, y ainaniñe añémoca Bèngbe Bètsábeñe becá chašmotsobátmanama. <sup>12</sup> Y puerte oyejuayènga Bèngbe Taitá šmochántatschuanaye, nda iuama bènga chamotsobena ntšamo cha chabe entšanga jatšatayama tojašebuachenacá jtsebmnama. Tšéngaftanga šmochanjóyèngacñe ntšamo cmojtsétocancá celoca, ché corente buashinjinyana luarentše. <sup>13</sup> Bèngbe Bètsá bènga šojatsebacá, Satanás, ché ibetiñe luarentša mandayabe cucuatšentšana, y tojama ché chabe bonshana Uaquiñabe amèdayana bèngbe ainaniñe chamotsebmnama; <sup>14</sup> chábeyeca Bèngbe Bètsá Satanásbe cucuatšentšana šojatsebacá; o méntšá, chábeyeca Bèngbe Bètsá bèngbe bacna soyènga šojtsaperdoná.

### *Cristo tojanóbanayeca, entšanga Bèngbe Bètsáftaca tšabá jtsatsmènana*

<sup>15</sup> Cristo tmojaníniñe ora, bènga tmojántatsèmbona ntšamo Bèngbe Bètsá yomnana; entšanga imojobena cha jinýama, pero Bèngbe Bètsábioye ndoñe. Cha, ché Bèngbe Bètsabe Uaquiñá, ya natsana yojtsemna lempe ché Bèngbe Bètsá tojanma soyèngama; y cha lempe ché soyèngama más uamaná endmèna. <sup>16</sup> Chábeyeca Bèngbe Bètsá tojama lempe ntšamo celoca y quem luarentše yobinjncá, lempe ntšamo ché entšanga imobena o ndoñe mondobena jinýama soyènga, y ché espírituèngnaca ché imobena inýèngbioye jtsamèdayana y obenana imobomna. Bèngbe Bètsá, chábeyeca y chabiana tojama, lempe ntšamo quem luarentše yobinjncá. <sup>17</sup> Bèngbe Bètsá cabá nyètca soyènga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnana yojamncá. <sup>18</sup> Cha endmèna nda nyètscanga Bèngbe Utabnábeñe ošbuáchiyènga iuamènda, ntšamo

chë bestšaşe nÿetsca chë cuerpentša soyënga jtsemandayaná. Cha endmëna nda iuama ošbuáchiyënga tsëm tšabe vida chamotsebomnana, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachiñe ainënga mochtsatsmënënguentšana, cha chë natsaná chaotsemnana; nÿe cha canÿa chë más uámana luare chaotsebomnana, nÿetscañe chaotsemándayama. <sup>19</sup> Er Bëngbe Bëtsá yojanjuabná cachabiana tšabá yojamna, lempe ntšamo cha yomncá, chabe Uaquiñábeñaca chaotsemnana, <sup>20</sup> y Bëngbe Bëtsá tojánbošena, Crístbeyeca nÿetsca soyënga quem luarentše y celoca, cháftaca tempcá tšabá chaotatsmënema. Bëngbe Bëtsá chë soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bëngbe Bëtsá tojanma nÿetsca soyënga quem luarentše y celoca, cháftaca tempcá tšabá chaotatsmënema.

<sup>21</sup> Tempo, tšëngaftanga Bëngbe Bëtsá stëtsoye šmojanquedá y chábioye uayayënga šmojanma, bacna soyënga šmojanjuabná y šmojánama causa; <sup>22</sup> pero mora chabe Uaquiñáftaca, cha mo canÿe entšacá jóbanëse, Bëngbe Bëtsá tojama tšëngaftanga tempcá tšabá cháftaca chašmotsatsmënema; y chca tojama, tšëngaftanga chabe delante nÿets tempo chašmotsemnana; chora tšëngaftanga, chabe entsanga, ainaniñe ndocna bacna soye ndbomnënga chašmotsemnana, y ndocná chaondayana ntšamo šmojamcá ndoñe tšabá yontsemna ca. <sup>23</sup> Pero tšëngaftanga cmontsamna chë bëtscá ošbuáchiyana šmondbnana nÿets tempo jtsebomnana, Bëngbe Utabnábeñe jtsošbuáchiyama ndocna te ntjabanacá. Nÿets tempo chë tšabe noticiënguñe šmochtsošbuáchiye, y ndoñe šmatjaleséncia ndocná tšëngaftangbe ošbuáchiyana chaotrocama; y nÿe chca puerte jtsošbuáchiyëse Bëngbe Bëtsábeñe šmochtsošbátmana, ntšamo tšëngaftanga šmojanmcá, Jesu-cristbiana buayenánama šmojanuena ora. Chë buayenánana endmëna ntšamo ba entsanga nÿetsca quem luarentša entšangbiöye tmojabuayenacá, y atšbe trabajo endmëna cach tšabe noticiëngama entšanga jtsabuayinyana.

*Pablo, ošbuáchiyënga jasérviana trabajo tmojanbonÿé*

<sup>24</sup> Atše corente sënjesoyejuá mora tšëngaftangbiana jasúfriama stsobenama. Ba entšanga entsamna jasúfria Cristo jasérviana, y atše sëntsesufrina ntšamo Cristo tojansufricá, mora atše jtsesufrinëse chabe cuenta, ntšamo jasúfria yomncá. Y ntšamo sëntsesufrincá entsemna Crístbeñe ošbuáchiyëngbe tšabiana, chë chabe cuerpá imomnënga, chënga Crístbenga bëtsemnana. <sup>25</sup> Bëngbe Bëtsá atše šojábema chë Jesucristbeñe ošbuáchiyëngbe canÿe ujabuachaná. Cachá chë trabajuama šojanábuayana, chca jamëse, tšëngaftangbe tšabiana chaotsemnana. Chë trabajo endmëna, lempe ntšamo cha tojayancá entšanga jábuayenana. <sup>26</sup> Bëngbe Bëtsá nÿetsca entšanga ndoñe tonjanalešona, quem luare jobojátšama orscana y nÿets tempo chë buayenánama chamotsetatšëmbuama; pero mora, chábënga imomnënga chë soye cha tojinÿanyé. <sup>27</sup> Bëngbe Bëtsá yoboše, chabe entsanga imomnënga chamotšabuatmama ndayá tempo chënga ndoñe tonjaninÿanyécá; y yoboše chë ndoñe judiënga jinÿanyiyama tša bëts y tšabe soye yomna chë ndegombre buayenánana, ndayá tempo inÿyënga ndoñe tonjaninÿanyécá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojsiyena, y chábëñe puerte jtsošbuáchiyëse šmojtsobera jtsošbátmanana, Bëngbe Bëtsá puerte bëtsétsanga y uámanënga chácmabiamama, batšá ntšamo cachá yomncá. <sup>28</sup> Bënga nÿetscángbiöye Jesucristbiana fchandbëtsabuayinyaye; fchandbëtsétsétsnaye ndayá chënga ndoñe yontsamna jtsamana, y fsëndbëtsabuatambaye nÿets osertánanaca ndayá chënga aiñe yojsamna jtsamana, y chca, nÿetscángbiöye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguñe, chënga Crísoftaca canÿiñe mo canÿacá jtsemnëse. <sup>29</sup> Chca chaotsemnana, atše bëtscá sëndëtrabája; y chca sëntsama, chë Cristo yojsama atše chaitsebomnana bëts obenánaca.

## 2

<sup>1</sup> Atše sëntseboše tšëngaftanga chašmotsetatšëmbo, Bëngbe Bëtsá becá tsimpadánama, tšëngaftangbiöye jujabuáchama, chë Laodicea puebloquënga Jesucristbeñe ošbuáchiyënga y nÿetscanga chë ndocna te atše šmonjinÿe ošbuáchiyëngnaca. <sup>2</sup> Atše chca sëndama, tšëngaftanga y chënga ainaniñe bëts añemo chašmotsebomnana, y canÿiñe mo canÿacá chašmotsemanama, nÿetscanga jtsebnobonshánëse. Chca, nÿets osertánana tšëngaftanga chašmotsebomnana, y chë tempo Bëngbe Bëtsá entsanga ndoñe tonjaninÿanyé buayenánama chašmotsetatšëmbuama, y chë buayenánana Crístbe soye entsemna. <sup>3</sup> Mo canÿe bëtscá bomnana iytëmena soyá pero mora ya uinÿenana, cachá Crístbeñe entsemna nÿets osertánana y obenana Bëngbe Bëtsá jtsabuatmama. Chë soye tempo Bëngbe Bëtsá entšanga ndoñe tonjaninÿanyé, pero mora Cristo yojsama bënga chë uámana soyënga chamotsebomnana. <sup>4</sup> Atše chca sëntsichamo, botamana palabréngaca ndocná chacmondáingñema. <sup>5</sup> Er masque choca tšëngaftangata atše ndoñe quetsátsmëna, atšbe

ainana aife choca tsëngaftangata entsemna; y atse puerte sëntsoyejuá tsëngaftanga smatenëyeunana y nyets tempo Bëngbe Bëtsábeñe šmojtsosbuáchema.

*Cristofata cányife mo canýacá jtsemnëse, entsanga ndegombre tsabe vida jtsebmna*

<sup>6</sup> Tsëngaftanga Jesucristbeñe ošbuáchiyënga šmojanóbiana ora, šmojanayana: “Cristo Jesús, Bëngbe Utabná entsemna ca”. Chcasna, tsëngaftanga cmontsamna jtseyenana soyënga jtsamëse mo chë cháftaca cányife mo canýacá tojtsemnacá. <sup>7</sup> Chca šmontsobena jamana, cháftaca cányife mo canýacá nyets tempo jtsemnëse. Smochtsiyena jtsamëse ntšamo cha tojabuatëmbacá y cada te más chca. Cabá más šmochtsošbuáchiye chë Cristbiana buayenana soyëngama, ntšamo tcmojabatambacá; y Bëngbe Bëtsá sempre šmochtsatschuanaye.

<sup>8</sup> Cuedado šmochtsebmna, ndoñe šmatjaleséncia ndocná chaondëtsamama tsëngaftanga jtsajbanama Cristbeñe ošbuáchiyana jtsebmna. Chca entsanga montseboše juabnëngaca tsëngaftanga jáingña, nye básefta entsangbe juabnënga y tondayama ndoserverna juabnënga. Chë juabnënga jtsóbocanana ntšamo bëts taitanga básengbiye mondbetsabuátambayentsana y chë espíritëngbentsana, ndëmuanyëngbiana entsanga jtsejuabnayana chënga nyetsca soyënguiñe imomána ca; pero Cristbentsana chë juabnënga ndoñe ntsóbocanana.

<sup>9</sup> Cristo endmëna cachcá ntšamo Bëngbe Bëtsá yomncá, masque mo canýe entsacá quem luarentse yojëftsiyena; <sup>10</sup> y Bëngbe Bëtsá tojama tsëngaftanga ndegombre tsabe vida chašmotsebmna, Cristofata cányife mo canýacá bëtsemnayeca; y Cristo, nyetsca chë mándayënga y obenana bomnëngbiana más uamaná endmëna. <sup>11</sup> Tsëngaftanga Cristofata cányife mo canýacá bëtsemnayeca, mo uinýnanëngcá šmontsemna, tsëngaftanga Bëngbe Bëtsabe entsanga šmomnana. Quem uinýnanánana ndoñe quenátsmëna mo chë más delicadentse base bobachtema tmojatëtscá, cach entsángbeyeca ntšamo judiënga monduamancá, pero aife entsemna cach Cristo nda tcmojauinýnaná; y chë uinýnanána entsemna, tsëngaftangbe ainanentsana Cristo bacna juabnënga jabaajuánayana. <sup>12</sup> Tsëngaftanga šmojanenabaye ora, enjamna mo ntšamo cach Cristo tomojanatbontsacá tsëngaftanga utebuantsánënga cuaftsemncá, er tsëngaftanga šmojanajbaná jtsamana chë tempo šmojanama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tsëngaftanga šmojanenabaye ora, enjamna mo tsëngaftanga chašmatayenama Bëngbe Bëtsá cuafjamcá, er mora tsëngaftanga mo tsmëma entsangcá šmondoyena. Chca tojanopasá, Bëngbe Bëtsá obená bëtsemnana tsëngaftanga šmojtsosbuáchema, y chë obenana tojama Cristo cháuatayenama.

<sup>13</sup> Inye tempo tsëngaftanga Bëngbe Bëtsabiana mo obanëngcá šmojamna, yapa bacna soyënga jtsamama šmojanamana causa y uinýnanánënga mo Bëngbe Bëtsabe entsangcá ndoñe šmonjámnayeca, pero aife šmojanamana bacna soyënga jtsamana nye ntšamo šmojanbošcá. Morna Bëngbe Bëtsá tojama tsëngaftanga tsabe vida chašmotsebmna, Cristofata cányife mo canýacá jtsemnëse, y Bëngbe Bëtsá bëngbe nyetsca bacna soyënga šojtsaperdoná. <sup>14</sup> Mo nda ba ndebëngca tojtsabamna y chama tsuanachangá tojtsamna y chiñe tojtsayana chënga obligaciönaca imojtsemna chë ndebënanana pronto jtohocana ca, pero chë entsá chëchangá tojtsandbiana chë entsanga cha ndoñe más chamondëtsendebënama, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebënanana tojtsanpochocá cuenta. <sup>15</sup> Jesucristo cruciñe tojanóbana yeca, Bëngbe Bëtsá tojanayëñaná Satanás y chabe bacna espíritënga obenana bomnënga y inýngbiye amëndayënga; y nyetsca entsangbe delante tojaninýnyé cha chënga jtsamëndayama yobenama, mo canýe reyca chë inýngca tojayëñaná ora, chabe entsángaftaca natsana jtsayana y chë ayëñanáñënga ústonoye.

*Ainaniñe becá jtsebošana chë ošbuáchiyëngbiana celoca yomna soyënga*

<sup>16</sup> Ndoñe caso šmattsabiamnaye, ndoñe tsabá šmontsama ca inýngca tsëngaftangbiana tmojtsichamo ora, ndayá tsëngaftanga šmétsesaye o šmétsfšëšayama, o ndayá aife o ndoñe šmondbëtsamama Bëngbe Bëtsá jadórana fiestënga ora o shbojueta fiesta ora, o jóchna tese. <sup>17</sup> Baytë entsemna, Bëngbe Bëtsá entsangbe cucuatšifne chë mandëngca tojaniboshjona, chë soyëngama bënga jabaúatambama. Chë mandëngaca Bëngbe Bëtsá yojaninýnyayey ndayá más chcoye jopásama; entsángbiye yojaninýnyayey ndayá Cristo yochjanmama. <sup>18</sup> Báseftanga mondmëna y chënga mo nduamanëngcá entsángbeñe jtsebínýnana, pero tsoye chachënga corente uámanënga jtsenobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tsëngaftanga ndoñe tsabá šmontsama ca chënga tmojtsichamo ora, ntšamo chënga tmojtsichamcá tsëngaftanga ndoñe šmontsámayeca. Chënga jtsichámuana bëts soyënga mo otjenayoquécá tmojinýe ca, y nye cachënga puerte jtsenábotamnayana, pero chca chamotsamama razón ndoñe quemátsbmna, er nye ntšamo

inÿe entsanga imnetsejuabnycá chéngnaca cachá jtsejuabnayana. <sup>19</sup> Chénga Jesu-crístofatacá cánÿiñe ndoñe tmonjoquedanga, y Cristo endmèna ché nyetsca ošbuáchiyèngbe amèndayá, mo ché bestšaše nyets cuerpo jtsemandayancá. Canÿe cuerpiñe ché bestšaše jtsamana nyets cuerpo chaóbochemá, ntšamo Bèngbe Bètsá tojtsebošcá, ché cuerpo ndayá jasama chaotsebonnana jtsamèse, y nyetsca ché cuerpentša soyènga chamenefjanama jtsamèse. Cachá, Cristo jtsamana nyetsca ošbuáchiyènga cánÿiñe mo canÿacá cháftaca chamotsemnana, y cada te más tšabá cha chašmotsábuatmama.

<sup>20</sup> Cristo tojanóbana ora enjamna mo tšèngaftàngnaca cuafjobancá, y Bèngbe Bètsá tšèngaftanga cmojatsebacá ché quem luarentše imománda espíritèngbe cucuatšentsana. As, ¿tšèngaftanga ndáyeca šmojtšiyena jtsamèse mo ché ñye quem luarama enojuabnayèngcá? ¿Ndáyeca tšèngaftanga cabá šmoberdecena chca mandènga, mo: <sup>21</sup> “Ché soye ndoñe matsbanana, chca soye ndoñe catjase, o ché soye acbe cucuatšeca ndoñe catjaca ca?” <sup>22</sup> Lempe ché mandènga, ché ndayá canÿa ndoñe bontsemna jamana, ñye soyèngama jtsayanana, y tempo tojochnèngo ora, ché soyènga jtsopochócana y chora tondaye ntsámanana. Ché mandènga jtsemnana ñye ntšamo entsanga mondbetsamcá y ínÿengbioye mondbetsabuatambaycá. <sup>23</sup> Ndegombre, ba entsanga jtsejuabnayana ché mandènga tmojamèngbiana, puerte osertanánaca chca tmojama ca, pero ndegombre chca ndoñe quenátsmèna; er chénga jtsichámuana, ntšamo Bèngbe Bètsá jadórana yomncá imojtsabuatambá ca, jtsabuátambayana entsá cabnmèna uamaná ndoñe ntsenobiamnayana ca, y jabuache cachabe cuèrpoca jtsamana ca. Pero ché mandènga tondaye ntsámanana, er ché mandènga entsangbe ainanentsana ndoñe ntjajuánana ché bacna soyènga jtsamama juabnènga.

### 3

<sup>1</sup> Cristo cháuatayenama Bèngbe Bètsá tojanma ora, enjamna mo tšèngaftàngnaca Crístbeñe ošbuáchiyènga, chašmatayenama cha cuafjamcá. Chíyeca, tšèngaftangbe ainaniñe puerte šmochtseboše ndayá Bèngbe Bètsá celoca tšèngaftangbiana yobomncá; y choca, Cristo uámana puestentše endètbemana, Bèngbe Bètsabe catšbioica. Y šmochtsinÿinÿinÿaye chca šmojtsebošama, ntšamo jtsamèse mora šmojtšiyenama. <sup>2</sup> Tšèngaftanga nyets tempo ché celoca soyèngama šmochtsejuabnaye, ndoñe ché ñye quem luarentše yomna soyèngama. <sup>3</sup> Tšèngaftanga Crístofatacá cánÿiñe mo canÿacá jtsemnèse, jtsemnana mo tšèngaftanga ya cuafjobancá, er mora ya ndoñe quešmátiyena tempcá jtsamèse. Cristo, Bèngbe Bètsáfatacá cánÿiñe mo canÿacá endmèna, y Cristo endmèna nda mora tšèngaftangbe vida yojtšinÿena. <sup>4</sup> Ndegombre, Cristo endmèna nda endama tšèngaftanga tšabe vida chašmotsebonnana; y quem luarentše cha cachiñe chaojtonÿiná ora, tšèngaftàngnaca chentše cháftaca šmochántsemna, y chora ntšamo Cristo corente uamaná y bètsá yomnama Bèngbe Bètsá yochjinÿanÿiyicá, tšèngaftangbiámnaca echanjinÿanÿiye más bètsétsanga y uamanènga šmojtsemnana.

#### *Tempscá vida y morsca vida*

<sup>5</sup> Tšèngaftanga, ntšamo ché ñye quem luarama enojuabnayènga mondbetsebošcá bošana lempe šmochtsajbaná. Ndocná chaondètseboše ndaye bacna soye boyabása o shembásafatacá jtsamana, ni chca soyènguiñe ndoñe chaondètsejuabná; ndoñe chaondètšiyena ñye ínÿengbiana bacna juabnènga jtsebonnèse, y ndoñe chaondètseboše ñye bètscá soyènga ínÿengbiana más jtsebonnana, er chca jtsamana jtsayanana, chabiana más yojtšamana soyènga jtsebonnana, Bèngbe Bètsá jatsbobonshánama. <sup>6</sup> Er entsanga mondmèna y chénga chca soyènga jtsamama jtsebošana, y Bèngbe Bètsá ndoñe ntseyeunanana. Chca entsàngaftaca Bèngbe Bètsá puerte bochanjetna, y echanjamánda ché uabouana castigo chéngbeñe chaotsemnana. <sup>7</sup> Y tempo, tšèngaftanga šmojaniyena jtsamèse, sempre ñye chca bacna juabnèngaca, <sup>8</sup> pero mora tšèngaftanga cmontsanna lempe quem soyènga stètsoye jaquédana: ínÿengaftaca jetnana, ínÿengaftaca rábiaca jtsemnana, ínÿabioye ntšamo jáborlama jtsebošana, ínÿengbioye joyánguanguana, y ndoñe tšabe palabrénga jtsóyeuambnayana. <sup>9</sup> Ndoñe šmattsenbuambnaye, er ntšamo tempo šmojamncá mora tšèngaftanga ya ndoñe cachcá quešmátsmèna, y mora ndoñe quešmátiyena jtsamèse ntšamo tempo šmojanamcá. <sup>10</sup> Y mora tšèngaftanga šmojashjache jtsemnana mo tsmèma entsàngcá, y ntšamo tempo šmojanamcá ndoñe cachcá quešmátama. Bèngbe Bètsá chca tsmèma entsàngcá tmojábiana; y cha nyets tempo yojtšama, tšèngaftanga cada te más ntšamo cha yomncá chašmotsemnana, chca, corente tšabá cha chašmuábuatmanama. <sup>11</sup> Chíyeca, ndayá Bèngbe Bètsá tojamama, ndoñe judiènga y judiènga cachcanga mondmèna; ché más delicadentše base bobachtema tètšenènga ndoñe más uamanènga quemátsmèna ché ndoñe chca mondmènèngbiana; ché inÿe luarèngocana áshjajnènga, bèn tjoye oyenènga, ché ñye ínÿabiana nyets tempo oservénènga y ché cachèngbiana trabájayènga, nyetscanga



cachcanga mondmëna. Chë nÿe ndayá iuámana endmëna Crístbeñe jtsosbuáchiyana y nÿetsca ošbuáchiyënge ainaniñe cha yojtsemna jtsemándayama.

<sup>12</sup> Tsëngaftanga Bëngbe Bëtsábenga šmondmëna. Cha cmondábabuanÿeshana y tcmojabacacá chabe entšanga chašmotsemnana; chíyeca, tsëngaftanga cmontsamna ínÿenga jtšinÿanÿnayana nÿetscangbiamá jóngmiamá šmuamanama, tšabe juabna ínÿengbiamá sempre šmnétsëbomnana, cada ona chë ínÿenga chabiamá más uáamanënga cuaftsemncá imnétsejuabnayama, nÿetscanga puerte bonshanánaca šmnétsënÿayama, y nÿetsca pade-cena soyënguñe corente uantadënga šmomnana. <sup>13</sup> Nÿetscanga šmochtsenëuantana y šmochjenperdoná, nderado ntšamo nda ínÿabioye tbojaborlá y chama cha tbojtsatsëtsná ora. Ntšamo Bëngbe Bëtsá tsëngaftanga tcmojaperdonacá, tsëngaftángnaca cachcá ínÿenga šmochjáperdonaye. <sup>14</sup> Lempe chë soyëngama más enduámana nÿetscanga jtsebbonshánana. Nÿetscanga šmojtsenbobonshánëse, tsëngaftanga šmochantsobena sempre lempe chë ínÿe soyënga corente tšabá jtsamana, ntšamo ndegombre chë soyënga jamama yomncá. <sup>15</sup> Crísto endama tsëngaftangbe ainaniñe tšabe ebionana chašmotsebomnana. Chë tsëngaftangbe ainaniñe tšabe ebionánaca šmochtsiyena nÿetscanga natjëmbana, Jesucrístbeñe ošbuáchiyënga quetsomñecá. Bëngbe Bëtsá tcmojáchembo tsëngaftanga nÿetscanga cánÿine mo canÿe cuerpcá chašmotsemnana, y chca, natjëmbana chašmotsiyenama. Bëngbe Bëtsá sempre šmochtsachuanaye.

<sup>16</sup> Chë Crístbe puerte tšabe buayenana soyënga tsëngaftangbe ainaniñe nÿets tempo šmochtsambaye. Nÿets osertanánaca šmochtsenbuátëmbaye y šmochtsenbuayiyinaye. Nÿets ainánaca šmochjacánta chë Salmos librëšañe uabemana cantënga, chë Jesucrístbe soyëngama cantënga, y chë Bëngbe Bëtsabe Espíritu iuama tsëngaftanga chašmotsobena jacántama soyënga; chca šmochjama Bëngbe Bëtsá jëtschuanaye. <sup>17</sup> Y lempe ntšamo chašmojtsama o chašmotsichamcá, Bëngbe Utabná Jesúsbëñe ošbuáchiyënga quetsomñecá chca šmochjama, sempre Bëngbe Bëtsá Bëngbe Taitábioye, chábeyeca jttsachuanayëse.

#### *Ntšamo ínÿengaftaca jtсийenama*

<sup>18</sup> Shémanga, šmochtsëtatšëmbo tsëngaftangbe boyanga chë yebnentša mándayënga imon-nama, y nÿets tempo chca jtsejuabnayëse šmochtsiyena, er tsëngaftanga Bëngbe Utabnábeñe ošbuáchiyënga quetsomñecá, chca cmontsamna. <sup>19</sup> Boyanga, tsëngaftangbe shémanga sempre šmochtsababuánÿeshana, y podesca palabrëngaca ndoñe šmattsëtsëtsnaye.

<sup>20</sup> Básenga, tsëngaftangbe bëtsëtsanga nÿetscañe šmochtsayaunana; chca šmojtsamëse, Bëngbe Bëtsá oyejuayá echántsemna. <sup>21</sup> Taitanga, ndoñe šmattsama tsëngaftangbe básenga chauetënana, ainaniñe tondaye añëmoca chënga ndoñe chamondëtsatsmënama.

<sup>22</sup> Tsëngaftanga chë nÿets tempo nÿe ínÿabiamá oservënënga, tsëngaftangbe nduiñënga nÿetscañe šmochtsayaunana, y ndoñe nÿe chënga tcmojtsënÿa ora, mo nda nÿe entšangbe delante tšabá joquédama tojsebošacá, ndayá chënga šmochtsayaunana nÿets ainaniñe ndegombre tšabe juabnéngaca, er tsëngaftanga Bëngbe Utabnabiamá corente respeto šmondobomna. <sup>23</sup> Lempe ntšamo chašmojtsamcá, nÿets tsëngaftangbe añëmoca šmochtsama, mo Bëngbe Utabná ndegombre cuafetservencá, y ndoñe nÿe entšangbiocá. <sup>24</sup> Tsëngaftanga ya šmondëtatšëmbo, ntšamo cha chabe entšanga tojašebuachenacá mo uacanancá, Bëngbe Utabná tsëngaftanga cmochjátsatayama. Er Crísto, chë Utabná, endmëna ndábenga tsëngaftanga šmomnana, y cha šmondëserveda. <sup>25</sup> Pero chë ndoñe tšabe soyënga tontsamábioye, Bëngbe Bëtsá bochanjacatíga, ntšamo chë entšá bacna soyënga tojamcá, er Bëngbe Bëtsabiamá nÿetscanga cachcá monduámana.

## 4

<sup>1</sup> Y tsëngaftanga, ndëmuanÿengbiamá ínÿenga nÿets tempo imoservena, nÿetsca soyënguñe tšabá šmochtsama, y nÿetscangbiamá cachcá šmochtsemna, chë nÿets tempo nÿe tsëngaftangbiamá oservënëngaftaca, er tsëngaftanga šmondëtatšëmbo celoca canÿa endmëna, ndabiamá tsëngaftángnaca oservënënga šmondmëna.

#### *Ošbuáchiyënga jábuayenama*

<sup>2</sup> Nÿets tempo Bëngbe Bëtsáftaca šmochtsencuëntaye, ntšamo šmojtsichámuama botamana jtsejuabnayëse y Bëngbe Bëtsá jttsachuanayëse. <sup>3</sup> Bëngbe Bëtsáftaca cha šmojtsencuënta ora, bëngbiámnaca chašmochtseimpadana, cha chaoma bënga fchayobenama Bëngbe Bëtsabe palabra Crístbiamá entšanga jábuayenama, chë buayenana soye ndayama tempo entšanga ndoñe monjántatšëmbo. Atše chë buayenana soye entšanga abuatambaye causa, mora cárceloye séntsëtámena. <sup>4</sup> Chcasna, Bëngbe Bëtsá atšbiamá šmochtseimpadana, atše chayobenama chë buayenana soyënga entšanga jabuátambama, y chë soye atše chaima chënga corente tšabá catafjosertaycá, er atše šontsemna chca jamana.

<sup>5</sup> Šmochtsiyena nÿetsca soyënga osertanánaca jtsamëse chë Jesucrístbeñe ndošbuáchiyëngaftaca, y chca, nÿets tempo ínÿenga šmochtsinÿanÿnaye tsëngaftanga

Jesucristbeñe ošbuáchiyënga bétsemnama. <sup>6</sup> Inyëngaftaca chašmojtsencuénta ora, šmochtsama ntšamo šmojtsoyebuambnacá chëngbiama tšabá chaotsemnana, y soyënga šmochtsichamo nyëtscanga oyejuayana chamotsebomnana; y šmochtsetátšëmbo ntšamo cmojtsamna cada cánýabioye jojuana.

*Jtadiósoftanama*

<sup>7</sup> Jesucristbeyeca bëngbe bonshana catšata Tíquico, canýe trabajayá tšabe palabra bomná y Bëngbe Utabnabiamana bëngaftaca oservená, tšëngaftangbioye noticiënga echanjuamba ndayá átšeftaca tojopasama. <sup>8</sup> Chíyeca cha tšëngaftangbioye sëntsichamná, chca, tšëngaftanga chašmotsetatšëmbuama ndayá bëngaftaca yojtsopasana, y cha chacmañémuayama. <sup>9</sup> Cháftaca Onésimo echanjá, Jesucristbeyeca bëngbe bonshana catšata; cha canýe tšabe palabra bomná endmëna, nda tšëngaftangbiocana tonjánabo. Chata tšëngaftanga cmochanjácuntaye lempe ntšamo muiñe yojtsopasancá.

<sup>10</sup> Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tšëngaftanga ya buayenánënga šmontsemna ndayá jamama cmojtsamnana, Marcos tšabá jofjama, cha tšëngaftanga jautsëtsayama tojase. <sup>11</sup> Jesús, chë Justo cánaca uabainá, chánaca cmontsacheuaná. Quem pueblentša nyëtsca judiënga ošbuáchiyënguentsana, nye chë unga átšeftaca mondëtrabája, Bëngbe Bëtsabe amëndayana entšangbioye chaóshjanguama, y chënga mondama atše ainaniñe bëts añemo chaitsebomnana. <sup>12</sup> Epáfrasnaca cmontsacheuaná, inyë tšëngaftangbiocá y cha Cristo Jesusbiamana jatrabájama endoservena. Cha nyëts tempo tšëngaftangbiama Bëngbe Bëtsábioye tša bochandbétseimpadana, tšëngaftanga Bëngbe Utabnábeñe ošbuáchiyana ndocna te chašmondájbanama, y nyëts tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojtsamncá; y chca, tšëngaftanga corente šmochántsetatšëmbo ntšamo šmojtsamcá ndegombre yomna ntšamo Bëngbe Bëtsá yobošcá. <sup>13</sup> Cach atše sënjinýe y sëntsobena jayanama ntšamo cha jabuache yotrabájama, tšëngaftanga jujabuáchama, chë Laodicea puebloquënga y Hierápolis puebloca oyenëngnaca. <sup>14</sup> Lucas, bëngbe bonshana ashnayá, cmontsacheuaná; y Démasnaca.

<sup>15</sup> Chë Laodiceoca Jesucristbeyeca catšátanga bëngbe cuenta šmochjácheuaye. Ninfábioynaca šmochjachuaye, y nyëtsca ošbuáchiyënga chë Bëngbe Bëtsá jëtschuayama chabe yebnentše jénefnama imuamanëngnaca. <sup>16</sup> Quem tsbuanácha chašmojualiá chentšana, Laodiceoca ošbuachiyëngbioye šmochjuíchmua, chócnaca mëcha chamualiamana; y tšëngaftángnaca šmochjualiá chë Laodiceoca ošbuachiyëngbioye tmonjanichmó tsbuanácha, chëcha tšëngaftangbioye chaojuášhango ora.

<sup>17</sup> Arquipo šmochjauyana yejuana chaotsantješna chë Bëngbe Bëtsá tbojabonyé trabajo sempre tšabá chaotsocumplinama.

<sup>18</sup> Atše Pablo, nye quem palabrénga tšëngaftanga jacheuayama cach atšbe cucuátseca sëntsabiamná. Šmochtsenójuabnaye atše utamená stsemnana. Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnana.

## 1 Tesalonicenses

### Jacheuayama

<sup>1</sup> Atse Pablo, Silvano y Timoteóftaca, quem tsbuanácha séntsabiamná tséngaftangbiamá, chë Tesalónica bëts pueblaca Jesucristbeñe ošbuáchiyëngbiamá, tséngaftanga chë Bëngbe Bëtsá chë Taitá y Bëngbe Utabná Jesucristoftaca cányíñe mo canýacá šmommënga. Atše séntseimpadana Bëngbe Bëtsá, chaoma tsabe bendicionënga tséngaftangbeñe chaotsemnama, y tséngaftanga ainaniñe tsabe ebionana chašmotsebmomma.

### Pablo Bëngbe Bëtsábíoye tbojtanchuá chë Tesalónica pueblentsa entsangbe ošbuáchiyama

<sup>2</sup> Bënga sempre Bëngbe Bëtsá fsëndëtschuaná tséngaftangbiamá, y bënga cháftaca ftsencuénta ora, tséngaftangbiamá fchandbëtseimpadana. <sup>3</sup> Bënga, Bëngbe Bëtsá chë Taitáftaca ftsencuénta ora, fsëndbëtsenojuabnaye ntšamo tséngaftanga šmotrabájama, Jesucristbeñe ošbuáchiyana šmobómnayeca; ntšamo tséngaftanga tša inýenga šmëjabuáchana, Jesucristo šmobobonshánayeca; y ntšamo tséngaftanga, ndocna te ntjajbanacá, jtšošbuáchiyëse Bëngbe Utabná Jesucristbeñe šmobátmanama. <sup>4</sup> Jesucristbeyeca catsátanga, bënga fsëndëttatsëmbo Bëngbe Bëtsá cmababuánýeshanama, y cha tcmojábacacama chábënga chašmotsemnama. <sup>5</sup> Bënga chë tsabe noticiënga Jesucristbiamá tcbonjanabuayená ora, ndoñe nýe bënga jóyebuambayëse chca quenjatsëmëna, ndayá chë Uámana Espírite obenanácnaca, y bënga corente jtsejuabnayëse chë buayenánana ndegombre soye bëtsemnama. Tséngaftanga corente šmondëttatsëmbo ntšamo bënga ftsjamna tséngaftangaftaca fsënjamna ora, tsabe soyënga tséngaftangbiamá nguayíñe.

<sup>6</sup> Chora, ntšamo bënga fsënjanamcá y ntšamo Bëngbe Utabná enjaníyencá, tséngaftanga šmonjanontsé amana; y chë buayenánana šmonjanóyëngacñe chë Uámana Espíritu tcmojanatsatá oyejuayánaca, masque inýenga tmojamna tséngaftanga puerte chašmosufrima. <sup>7</sup> Mëntsá, tséngaftanga uánatsanënga šmonjanobíama ntšamo ndegombre jtsiyenama, nýetsca Macedonia y Acaya luarentsa Jesucristbeñe ošbuáchiyëngbiamá. <sup>8</sup> Tséngaftanga šmojoyebuambá Bëngbe Utabná Jesucristbe palabrama. Mora, ndoñe nýe Macedonia y Acaya luarentše entsanga chama quemátstatsëmbo —nýets luarenache entsángnaca montsetátšëmbo ntšamo tséngaftanga Bëngbe Bëtsábeñe šmojtšošbuáchëma —y chca, bënga tondaye más quešnatëjaboto tséngaftangbiamá jatichámuama. <sup>9</sup> Cach entsanga montsoyebuambná chë bënga tcbonjánabuache ora tša tsabá tséngaftanga šcojanëbuajama. Chëngnaca montsichamo ntšamo tséngaftanga šmojtsajbaná chë šmojanjuabná diosënga yojamna soyënga adórayana y šmojanontsé chë tsabe benache jtshachama, y chë Bëngbe Bëtsá ndegombrá y ainá jasérvíama, <sup>10</sup> y chca, chabe Uaquíñá Jesús jobátmama; mua celocana echanjésabo; chabíama Bëngbe Bëtsá tojanma obanënguentšana cháuatayenama, y cha šochanjátsebacaye chë uabouana castigüentšana, Bëngbe Bëtsá entsangbe bacna soyëngama chëngbiamá yobomnentšana.

## 2

### Ntšamo Pablo yojantrabája Tesalónica pueblaca

<sup>1</sup> Cach tséngaftanga, Jesucristbeyeca catsátanga, šmondëttatsëmbo bënga tcbonjánabuache ora ndoñe nýe bonamente quenjatsëmënama. <sup>2</sup> Tséngaftanga šmondëttatsëmbo, bënga cabá tséngaftangbiyë nda ora, Filiposca šonjanëyánguango y macá šonjánaborlama; y masque tséngaftangbioca bëngbe contra entsanga monjamna, Bëngbe Bëtsá tonjanma bënga fchayobená chë tsabe noticiënga bëtscá añémoca jabuátambama. <sup>3</sup> Er bënga entsángbiyëse bostero soyënga ndoñe queftsatanabuayíyná, tséngaftangbiamá bacna soyënga ndoñe queftsátanboše, y entsanga jáingñama ndoñe queftsatanoyebuambná. <sup>4</sup> Bëngna inýetsá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, šonjanëbuáyana chabe tsabe noticiënga entsanga jabuátambama, y chca bënga fsëndoyebuambná; chíyeca bënga ndoñe nýe entsangbe bominýíñe tsabá chaotsinýnama queftsátama, ndayá nýe Bëngbe Bëtsábíama, nda chë ndayá bëngbe ainaniñe yomnama yotátšëmbo. <sup>5</sup> Ntšamo tséngaftanga corente šmondëttatsëmbcá, bënga ndocna te tséngaftangbiamá tsabe soyënga tifjánayana, tséngaftanga bëngaftaca oyejuayënga chašmotsemnama; y ntšamo tséngaftanga tcbonjanëtsëtsnacá ndoñe quenjatsëmëna nýe tséngaftangbentšana ba soyënga bëngbiamá josháchiñama. Bëngbe Bëtsá chama yotátšëmbo. <sup>6</sup> Ndocna te bënga queftsatsngúá entsanga más uamanëngcá bënga chašotsabíamnama, ni tséngaftangbentšana, ni inýëngbentšana.

<sup>7</sup> Masque bënga, Cristbe ichmónënga bëtsemnama, matifjanobená tséngaftanga nýe sempre jtsamëndayana, bënga ndoñe chca chibiátanma; bënga corente jtsababuánýeshanëse

chbonjánŷena, ntšamo canŷe mamá chabe básenga jtsabéchayana y corente bonshanánaca jtsanŷenana. <sup>8</sup> Tša chbonjánabuanŷeshanayeca, bēnga ndoñe nŷe chē Bēngbe Bētsabe tšabe noticiēnga checbēnjatanabuayená, tšēngaftanga chiñe chašmotsošbuáchemá ntšamo bēnga fsēndošbuachecá, ndayá bēngbe vidēnga jáshbiamnaca fsēnjanprontana tšēngaftangbe tšabíama. ¡Tša chondábabuanŷeshana! <sup>9</sup> Jesucristbeyeca bēngbe catšátanga, tšēngaftanga šmenabouinŷna ntšamo bēnga bētsá y jabuache fsēnjantrabajama. Bēngbe Bētsabe tšabe noticiēnga abuayinŷayinŷe y bēngbe vida onguayinŷe, chca, tšēngaftanga ndoñe chacmondētsammama bēngbe uajabótama bēnga jatatsatnayama.

<sup>10</sup> Cach tšēngaftanga šmondētatsēmbó y Bēngbe Bētsánaca, ntšamo bēnga ftsjamna tšēngaftanga chē ošbuáchiŷēngaftaca fsēnjamna ora; fsēnjaniyena ntšamo Bēngbe Bētsá tšabá tbojtsinŷancá, nŷetscāngaftaca fsēnjánama ntšamo jamama šojanamncá, y ndocná quenátobena jatichámuana ntšamo fsēnjanamcá ndoñe tšabá yonjamna ca. <sup>11-12</sup> Tšēngaftanga šmondētatsēmbó, bēnga bētsá jóyebuambayēse cada ona tšēngaftanguentšá chbonjanējabuachanama y chbonjánēmuama, ntšamo canŷe taitá chabe básēngaftaca endbetsamcá. Chēnga bētsá chbonjanētsēsná ntšamo Bēngbe Bētsá tšabá tbojtsinŷancá chašmotsiyenama; y Bēngbe Bētsá cmontsēbuájajana chabe amēndayoye jamashēnguama y chabe obenana y buashinŷinŷanana jinŷama.

<sup>13</sup> Bēnga, Bēngbe Bētsabe tšabe soyēnga chbonjanabuayinŷa ora, ntšamo tchbonjanēyancá tšēngaftanga šmonjanuena y šmonsanošbuaché mo Bēngbe Bētsábíocana buayenanancá, y ndoñe nŷe entšangbe oyebuambnayancá. Y ndegombre Bēngbe Bētsabe buayenánana endmēna, y chē palábraca, tšēngaftanga chē chábēne ošbuachiyēngbeñe Bēngbe Bētsá bētsá soyēnga yojtsama. Chama sempre Bēngbe Bētsá fsēndētschuaná. <sup>14</sup> Jesucristbeyeca catšátanga, cach tšēngaftangbe luarentša entšanga cmonjanēcamena ora y šmonjanufrina, šmonjanpasá ntšamo chē Judeoca Bēngbe Bētsábeñe ošbuachiyēngcá enefjuanēnga tmonjanpasacá, y chēngna Cristo Jesusbe entšanga mondmēna. Chēnga tmonjansufrí cach luarentša entšanga, chē judiēnga, chēngbiyoye monjanēcamena ora. <sup>15</sup> Chē judiēngbe bēts taitanga, Bēngbe Bētsabe juabna oyebuambnayēngbiyoye tmojtsanbēyaye, y ntšamo chēngbe bēts taitanga tmojanmá, chēngnaca Bēngbe Utabná Jesúsbiyoye tmojanóba, y chēnga mondama bēnga chaftsesufrinama. Chēnga ndoñe tšabēnga Bēngbe Bētsabe bominiŷe quemátsmēna, y nŷetsca entšangbe contra montsemna. <sup>16</sup> Chē ndoñe judiēngbiyoye, Bēngbe Bētsá cháuatsebacama jábuayenama ftsēboše ora, chē judiēnga bētsá jtsamana bēnga ndoñe fchandobenama chca jamama. Judiēnga nŷets tempo bacna soyēnga monjánama; pero chē entšanga jábuayenama bēnga ndoñe fchandobenama jtsamana, entsemna chē último bacna soye ntšamo chē judiēnga jamama imojtsobencá, más ya ndoñe; y mora, cabana, Bēngbe Bētsá ya puerte chēngaftaca tbojtna y echanjácastigaye.

### *Pablo tša yojánboše, Tesalónica pueblaca entšanga jányama*

<sup>17</sup> Jesucristbeyeca catšátanga, bēnga tšēngaftangbentšana baseftaytē jēftseboचना šonjanotocá ora, masque ndoñe choca tšēngaftangtaftaca queftšátanmēna, siempre tšēngaftangbiamá fsēnjanenujabná, y tša fsēnjánboše tšēngaftangbiyoye jtsana jautsētsayama. <sup>18</sup> Bēnga fsēnjánboše tšēngaftangbiyoye jésana; chíyeca cach atše Pablo, ba soye sēnjanóshēngūēnja jobenayama choye jésama, pero Satanás yojantrabája bēnga ndoñe fchandobenama chca jamama. <sup>19</sup> Atše séntsanboše tšēngaftanga jautsētsayama, er tšēngaftangbeyeca Bēngbe Utabná Jesusbe delante, cha yochjésabo ora, ntšamo tšēngaftanga šmoyenama, bēnga puerte jtsošbuáchiŷēse fchantsobátmana, corente oyejuayēnga fchtsemnama y más bētsētsanga fchtsemnama. <sup>20</sup> Añe, ndegombre, ntšamo tšēngaftanga šmoyenama, bēnga bētsá añemoca ntšamo tšēngaftangbeñe tifjamama fsēndbētsoyebuambnayey, y tša oyejuayēnga fsēntsemna.

## 3

<sup>1</sup> Chíyeca ya ndoñe chibiatanobená más jatobátmanana tšēngaftanga jautsētsayama; as fsēnjanjuabó nŷe bēndata Atenas bēts pueblentše joquédana, <sup>2</sup> y jíchmuana Jesucristbeyeca bēngbe catšata Timoteo, chē bēngaftaca trabajayá, Bēngbe Bētsábíoye oservēñe, tšabe noticiēnga Cristbiamá entšanga abuayinŷayinŷe. Fsēnjanichmó chacmañēmuayama y chaot-samama tšēngaftanga Jesucristbeñe más chašmotsošbuáchemá; <sup>3</sup> y chca, ndocná Jesucristbeñe ošbuáchiŷiyana chaondájbanama, masque tšēngaftanga Jesúsbeñe ošbuáchiŷēnga bētsēmnama, inŷēnga imojtsama chašmotsesufrinama. Er cach tšēngaftanga šmondētatsēmbó bēnga šojtsamna chca quem luarentše jēftsepadecēnana. <sup>4</sup> Y cabá tšēngaftangtaftaca fsēnjēftsemna ora, tchbonjanēyana bēnga šojánama jasúfriana; y ndegombre chca tonjopasá, ntšamo tšēngaftanga ya šmondētatsēmbcá. <sup>5</sup> As y chē tšēngaftangbiamá jtsetatsēmbuama más jatobátmanana ndoñe quetstétsobenayeca, sēnjanjuabó šojtsemna Timoteo jíchmuana.

Sénjanichmó atse jtsetatsëmbuama aífne bètsá o ndoñe tsëngaftangbe ošbuáchiyana Jesucristbeñe tayojamnama, er atse yapa sënjanjuabná nderado Satanás tojanma tsëngaftanga bacna soyënga chašmotsamama, y chca, bëngbe trabajo tondayama chaondëtsoservënama.

<sup>6</sup> Pero mora, Timoteo tsëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tsëngaftanga bètsá Jesucristbeñe šmojtsošbuáchema y nyëtsanga šmenbobonshánama. Cha šonjacuntá ntšamo tsëngaftanga corente oyejuayënga bëngbiana šmuatenujuabnama, y ntšamo tsëngaftanga tša šmojtseboše bënga jányama, cachcá ntšamo bënga tsëngaftanga jányama tša fsëntsebošcá. <sup>7</sup> Quem sóyeca, Jesucristbeyeca catšátanga, y mora chë bënga nyëtsca chë padecena soyënga fstsebošna ora y ínÿenga bënga jasúfriama imojtsama ora, bëts añemo fsëntsebošna, ntšamo tsëngaftanga tša Jesucristbeñe šmojtsošbuáchema jtsetatsëmbëse. <sup>8</sup> Jtsetatsëmbuana tsëngaftanga sempre puerte tsábá Bëngbe Utabnáftaca šmoyenama, entschua bënga más añémoca chaftsiyenama. <sup>9</sup> Mora fchantsobena Bëngbe Bëtsá jtsatschuanayana tsëngaftangbiana, y chë tsëngaftangbeyeca chabe delante bënga oyejuayana ftsbomnámnaca. <sup>10</sup> Cada te, bnëté y ibeta, tša Bëngbe Bëtsá fsëndëtseimpadana jobenayama tsëngaftanga jautsëtsayama chašualesenciama, Bëngbe Bëtsabe palabra tsábá chašmobedecema, chë buayenánana ntšamo yojtšashbencá jabuátambama.

<sup>11</sup> Bënga, Bëngbe Bëtsá fsëntseimpadana, cachá y Bëngbe Utabná Jesús, chašújabuache bënga fchayobenama tsëngaftangbioye jama jautsëtsayama. <sup>12</sup> Y Bëngbe Utabná chaoma más bètsá chašmotsenbobonshánama, y cachcá corente nyëtscángaftaca, ntšamo bënga cbond-ababuanÿeshancá. <sup>13</sup> Chca, tsëngaftangbe ainaniñe bètsá añemo šmochántsebošna; y Bëngbe Utabná Jesús cachángaftaca chaojésabo ora, Bëngbe Bëtsá Bëngbe Taitabe delante ndocná chaundayana, ntšamo tsëngaftanga šmojamcá ndoñe tsábá yontsemna ca, er tsëngaftanga šmondmëna Bëngbe Bëtsábenga, nyë cha jtseservënama.

## 4

### *Ntšamo jtsiyenama, Bëngbe Bëtsá oyejuayá chaotsemnama*

<sup>1</sup> Y mora ínÿe palabra šmochjatspasëncia. Jesucristbeyeca bëngbe catšátanga, tsëngaftanga bëngbentsana šmonjanatsjinÿe ntšamo jtsiyenana cmojánamna, ntšamo Bëngbe Bëtsábioye oyejuayá jabemama yomncá, y ndegombre chca tsëngaftanga šmondoyena. Y mora Bëngbe Utabná Jesusbe cuenta, cbontsaimpadana y becá cbontsëtsësná más chca chašmotsamama.

<sup>2</sup> Tsëngaftanga šmondëtatsëmbo ndayá tifjánayana ntšamo tsëngaftanga chašmotsiyenama, y chca fsënjanma Bëngbe Utabná Jesús chca jamama šonjanamëndáyeca. <sup>3</sup> Bëngbe Bëtsá endboše tsëngaftanga chašmotsiyenama mo Bëngbe Bëtsabengcá, ndocná bacna soyënga boyabása o shembásaftaca chaondëtsamama, <sup>4</sup> y nyëtscanga chamotsobena ntšamo canÿe shema jonguanguana, chë ntšamo canÿa Bëngbe Bëtsábia yomná jamama ibomncá, y ntšamo entsangbe bominÿiñe tsábá yomncá, <sup>5</sup> y ndoñe chabondónguango nyë cháftaca bacna soyënga chëngbe cuérpoca jamama, ntšamo chë Bëngbe Bëtsábioye nduabuátmënga mondbetsamcá. <sup>6</sup> Chë palabriñe ndocná chabe catšátbioye chabondëngñé, chë catšatbe shëmaftaca bacna soye jamëse, er chca amëngbioye Bëngbe Utabná corente echanjácastigaye. Chiyeca bënga ya bètsá chama tconjabuayená. <sup>7</sup> Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tsábá yomncá jtsamama, ntšamo chabe entsanga mondbetsamcá. <sup>8</sup> Mëntšá, nda quem buatëmbana soyënga tojtšábotena, cha ndoñe nyë entsanga jtsëbátanana, ndayá Bëngbe Bëtsábioye, nda tsëngaftangbe ainaniñe Uámana Espiritu cháumashënguama tojama.

<sup>9</sup> Atse ndoñe quešnátmëna juabuábiamana ntšamo cmojtmana ínÿenga Jesucristbeñe ošbuáchiyënga jtsababanÿeshanama, er cach Bëngbe Bëtsá tcmonjabuatambá nyëtscanga chašmotsenbobonshánama. <sup>10</sup> Y ndegombre, tsëngaftanga chca šmondama nyëtsca Macedonia luarentse Jesucristbeñe ošbuáchiyëngaftaca. Pero cbontsaimpadana, Jesucristbeñe catšátanga, más chca chašmotsamama.

<sup>11</sup> Nÿa sempre quem soyënguñe šmochtsentšena: natjëmbana jtsiyenana, ínÿengbe soyënguñe ndoñe ntsonremetënanana, y ndoñe ntjatobátmanana nyë ínÿenga tsëngaftangbiana chamotsetrabájama, ntšamo tconjanëyancá tsëngaftangaftaca fsënjanma ora; <sup>12</sup> chca šmochtsama, chë ínÿenga Jesucristbeñe ndošbuáchiyënga chacmotsarrespetánama, y ndocnábeñe ntjatobatmancá šmochantsobena jtsiyenana.

### *Bëngbe Utabná quem luaroye yochjésabo ora*

<sup>13</sup> Bëngbe catšátanga, bënga fsëntseboše tsëngaftanga ndegombre chašmotsetatsëmbo ntšamo chë obanëngaftaca yochjopásama, y chca, tsëngaftanga ndoñe ngmenánaca chašmondëtsemnama, mo chë ínÿengcá, chë tcojóbantšana ndoñe yontsemna jtayenama ca juabnayëngcá. <sup>14</sup> Bënga fsëndošbuaché Jesús tojanóbana y tojtanayenama, y cachcá bënga

fšëndošbuaché chë tmojóbanënga y Jesúsbeñe tmojtsošbuáchese, Bëngbe Bëtsá chëngbiana yochjama chë nyetsca tescama yomna tsabe vida Jesucrístoftaca chamotsebomnana, y quem luaroye cháftaca chamuatábama.

<sup>15</sup> Chë soyama bënga cbontsëtsëtsná ntšamo cach Bëngbe Utabná tojëfšsanabuatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátiñyena tsbanánoca, más natsana chë ya obanënga chë te mochtayenëngbiana. <sup>16</sup> Er entšanga mochanjouena canye mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetéřjua juajatëtámnaca, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena; <sup>17</sup> chentšana, chë ainënga chamojtsemnënga chëngaftaca cányiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšëtšhënga endmëñoca; as chentšana nyetsca tescama cháftaca bënga mochántsemna. <sup>18</sup> Quem palabrëngaca nyetscanga ndoñe más ngmëñana ainaniñe chašmondëtsebomna.

## 5

<sup>1</sup> Jesucrístbeyeca catšátanga, ndoñe quenátsiyta atše jubuábiamana mocna ora chë soyënga yochjopásama. <sup>2</sup> Cach tšëngaftanga corente šmondëtátšëmbo, Bëngbe Utabná yochjésabo chama ndocná chaondëtsejuabná ora, mo canye atbëbanacá jashjanguana ibeta ndocná chama tonjatsjuabná ora. <sup>3</sup> Entšanga chamojyana: “Lempe tsábá endëtšomñe y tondayama quešnátamna játauatjana ca”, chora nye ndeolpe chë entšangbiana tša jasúfriama echanjóshjango, mo canye shembása šešona jtsebomnana ora nye ndeolpe jasúfriama jontšancá; y ndegombre, entšanga chca jasúfriama quemochatotsbocá. <sup>4</sup> Pero tšëngaftanga catšátanga, ndoñe quešmátiyena mo ibetiñcá, bacna soyënga jtsejuabnayëse y jtsamëse; y chca, Bëngbe Utabná chaojésabo ora, tšëngaftanga ndoñe auatjanánënga quešmochámëna, mo ndábioye canye atbëbaná tbojotbá ora, chábioye cuafšsuaatjanacá. <sup>5</sup> Nyetsca tšëngaftanga šmondmëna entšangbe juabna binýnayabe básenga, y mo binýniñcá šmondoyena. Bënga ndoñe chë ibetiñe mandayabe básenga quemuátšmëna, y mo ibetiñcá ndoñe quemuátiyena; <sup>6</sup> chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuafšsemangcá oyenënga. Pero aiñe šontsamna mo chë fšñëngcá jtsiyenana, bëngbe cuerpo jtsemándayëse y nyets tempo jtseprontánëse. <sup>7</sup> Ibeta ora entšanga jtsemangana, y cach ibeta tojtsemna ora entšanga jotmenangana; <sup>8</sup> pero bënga, chë binýnentšëngna, šontsamna sempre bëngbe cuerpo jtsemándayana. Šontsamna Bëngbe Bëtsábeñe jtšošbuáchiyana y cha jtsebobonshánana, chë uayaná Satanasbiana jenëuyanama y cha jayëñjanama, mo canye soldadcá, canye morocho soye cochaca jenáčochjatsana jtševalentiana y ndoñe chamondëyëñjanama. Y chë castigüentsana Bëngbe Bëtsá šochjátsebacamnaca puerte jtšošbuáchiyëse jtsobátmanana; y chca, bënga mochántsemna mo canye soldadcá, cha canye casquëse juabuchëtsana jenëuyanama. <sup>9</sup> Er Bëngbe Bëtsá ndoñe šonjáchembo bënga chašotsamnama chë nyetsca tescama castigo jtsebomnana. Ndayá Bëngbe Bëtsá šojabacacá, Bëngbe Utabná Jesucrístbeyeca bënga chamótsbocama. <sup>10</sup> Cha bëngbiana tojanóbana, bënga cháftaca cányiñe jtsiyenama chamotsobenama, masque ainënga o obanënga chamojtsemnëse, cha chaojésabo ora. <sup>11</sup> Chíyeca, nyetscanga šmochtsenañëmuaye y šmochtsenájabuachana más jtšošbuáchiyama, ntšamo tšëngaftanga mora ya šmontsamcá.

### *Pablo choca ošbuáchiyënga jábuayenama*

<sup>12</sup> Jesucrístbeyeca catšátanga, cbontsaimpadana chašmotsarrespetana chë Bëngbe Bëtsabiana tšëngaftangbeñe trabajayëngbioye, y chë Bëngbe Utabná tšëngaftanguentše tojábacacanga uánatsanënga chamotsemnana y ntšamo jtsiyenama cmojtsamnama chácambuayenama. <sup>13</sup> Cmontsamna chënga jtsarrespetánana y jtsababuánýeshanana, ndaye trabajo chënga imojtsamama. Natjëmbana nyetscángaftaca šmochtsiyena.

<sup>14</sup> Quem soyënga chašmotsamámñaca cbontsaimpadana: jatrabájama ndoñe tmontsebošëngbioye šmochjúacana, añemo ndbomnéngbioye šmochjáñëmuaye, bëtscá ošbuáchiyana ndbomnéngbioye šmochjúabuache, y uantadënga nyetscángaftaca šmochtsemna.

<sup>15</sup> Cuedado šmochtssebomna, nderado nda bacna soye tbojaborlase, ndocná ndoñe cachcá chabondëtachnënguama. Masna, nye šmochtsentšena nyets tempo tsabe soyënga jtsamama cach tšëngaftanguentšëngaftaca y nyetsca entšangafštnaca.

<sup>16</sup> Nyets tempo oyejuayënga chašmotsemna. <sup>17</sup> Sempre Bëngbe Bëtsáftaca šmochtsencuëntaye. <sup>18</sup> Nyetsca soyënguiñe Bëngbe Bëtsá šmochtsatschuanaye; er chca entsemna ndayá cha yojtseboše, bënga Cristo Jesúsbeñe ošbuáchiyëngcá chamotsamama.

<sup>19</sup> Ndoñe šmattsama ntšamo chë Uámana Espiritu tšëngaftangbeñe yojtsamcá chaot-sopochocama. <sup>20</sup> Ndoñe šmattsábotena chë Bëngbe Bëtsabe juabna oyebuambnayëngbe

buayenana soye. <sup>21</sup> Yejuana šmochjájuaboye y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábiocana tayóbocanama, y chentša tšabe soyënga šmochjobuajo y sempre chca šmochtsama. <sup>22</sup> Njëtscá bacna soyënguentšana šmochtsajuánañe.

<sup>23</sup> Cach Bëngbe Bëtsá, chë bëngbe ainaniñe tšabe ebionana chamotsebomnama endamá, njëtscá soyiñe tšábenga chacá chacmabiama, y njëtš tšëngaftangbe espíritu, ainana y cuerpo chaotsinjëna, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaodayanama. <sup>24</sup> Nda tcmojúbuaja chábenga chašmotsemnama, cha sempre jtsamana ntšamo tojayancá, y lempe cha echanjama.

*Inye rueguënga chëngbiana y jtadiósoftanama*

<sup>25</sup> Jesucristbeyeca catšátanga, Diosmanda, bëngbiámnaca Bëngbe Bëtsá šmochtseimpadana.

<sup>26</sup> Njëtscángbioye mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamíllanga puerte bonshanánaca šmondbebsacheuanaycá.

<sup>27</sup> Chontsaménda quem tsbuanácha njëtscá Jesucristbeñe ošbuáchiyënga chašmëbuáliama, y chca séntsama, Bëngbe Utabná chca jamama šojanmandáyeca.

<sup>28</sup> Atše séntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

## 2 Tesalonicenses

### *Jacheuayama*

<sup>1</sup> Atse Pablo, Silvano y Timoteoftaca, quem tsbuanácha séntsabiamná tšéngaftangbiamá, chë Tesalónica bëtš puebloca Jesucristbeñe ošbuáchiyëngbiamá, tšéngaftanga Bëngbe Bëtšá chë Taitá y Bëngbe Utabná Jesucristoftaca cánýiñe mo canýacá šmommënga. <sup>2</sup> Atse séntseimpadana Bëngbe Bëtšá, chaoma tšabe bendicionënga tšéngaftangbeñe chaotsemnana, y tšéngaftangbe ainaniñe tšabe ebionana chašmotsebmomnana.

### *Cristo chaojésabo ora, ntšamo entšanga tmojamama Bëngbe Bëtšá echanjayana*

<sup>3</sup> Jesucristbeyeca Bëngbe catšátanga, šontsamna nyets tempo Bëngbe Bëtšá tšéngaftangbiamá jtsatschuanayana, ntšamo tšéngaftangbiamá jamama šojtsétocancá, er tšéngaftanga cada te más ošbuáchiyana šmontsebmomna, y ntšamo tšéngaftanga nyetscanga šmojtsenbobonshana, tempscama más yojtsemna. <sup>4</sup> Tšéngaftangbe ošbuáchiyama y bonshánama, bënga nyets tempo oyejuayënga fchandbëtsemna, chë inýenache Bëngbe Bëtšábeñe ošbuáchiyëngcá ene-fjuanëngbeñe tšéngaftangbiamá jóyebuambayama. Bënga fchandbëtsoyebuambnaye ntšamo tšéngaftanga inýetšá ntjatsjuabnacyá Jesucristo šméstonama, y ntšamo tšéngaftanga chábeñe tša šmošbuachëmnaca, masque inýenga tša cmécamena y chašmosufrima bëtšcá imojtšama, tšéngaftanga Jesucristbeñe ošbuáchiyënga bëtsemnana. <sup>5</sup> Tšéngaftanga chca Cristo šméstonayeca, corente entsinýinýena Bëngbe Bëtšá nyetsca soyënguñe tšabá amá yomnana, y entšanga ntšamo tmojamama tšabá o ndoñe tšabá bëtsemnana jayanama ora, cha chca echanjayana ntšamo entšanga tmojtsomerecencá. Y chca entsayana tšéngaftanga aiñe mercedo šmotsobuájoñe chabe amëndayoye jamashënguama ca; y mora, tšéngaftanga choye jobenayama jashjanguama šmojtsamama, inýenga imojtsama chašmotsesufrínama.

<sup>6</sup> Bëngbe Bëtšá echanjama ntšamo jamama ibomncá; echanjama chë tšéngaftanga chašmosufrima imojtsamënga bëtšcá chamosufrima; <sup>7</sup> y echanjama tšéngaftanga y bënga chë mondesufrinëngbiamá, ndoñe más chamondëtseufrinama. Cha quem soyënga echanjama, Bëngbe Utabná celoca chaojábobocna ora. Cha chabe puerta obenana bomna angelëngaftaca echanjabo, y chora bëtšcá inýtšënga echántsemna. <sup>8</sup> Cha echanjabo chë Bëngbe Bëtšábioye jtsabuattmama ndoñe montsebošënga jabácastigayama, y chë tšabe noticiënga Bëngbe Utabná Jesusbiamá ndoñe montsuanëngbioynaca. <sup>9</sup> Chënga Bëngbe Bëtšá echanjácastigaye, nyetsca tescama jtsapochócase; y Bëngbe Utabná bëtššana bënoca mochantsemnënga, y ndocna te quemochatobenaye jinýama Bëngbe Utabná tša bëtšá y obená bëtsemnana. <sup>10</sup> Quem puerta uámana te, Bëngbe Utabná chaojésabo ora, nyetsca chabe entšanga, nyetsca chábeñe ošbuáchiyënga cha mochántatschuanaye y mochántichamo: “¡Tša obená cha yomna ca!” Y tšéngaftanga chëngaftaca šmochántsemna, er tšéngaftanga šmotsanošbuaché bënga ndegombre fsënjántatšëmbo soyënguñe, chë bënga tcbonjanabuayená soyënguñe.

<sup>11</sup> Chiyeca, chca chaotsemnana, nyets tempo Bëngbe Bëtšábioye tšéngaftangbiamá fsëndëimpadana mercedo bomnënga chácmabiamama, chë vida chašmotsebmomnana, ndayama cha tcmojúbuaja, y chabe obenánaca bëtšcá chaoma tšéngaftanga chašmobená nyetsca tšabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtsamcá, Jesucristbeñe šmojtsošbuáchemá. <sup>12</sup> Chca jtsamëse, tšéngaftanga šmochanjinýanýiye Bëngbe Utabná puerta bëtšá y uamaná bëtsemnana, y cha echanjama tšéngaftanga más uamanënga chašmotsemnana. Chca echanjopása, er Bëngbe Bëtšá y Bëngbe Utabná Jesucristo tšéngaftangbiamá tšabe juabna ibobomna.

## 2

### *Chë Bëngbe Bëtšabe contra yomná*

<sup>1-2</sup> Mora atse séntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninýenama ora. Básefta entšanga imojtsichamo chë bëtš uámana te, chë Bëngbe Utabná jésabama te, ya tojóshjango ca; pero cbontsaimpadana, Jesucristbeyeca catšátanga, bëtšcá šmochtsentšena chënga ndoñe chamondobená jamana tšéngaftanga inýetšá juabna tšéngaftangbe ainaniñe chašmátsbmomnana. Ndoñe šmatjóyeunaye nderado nda mëntšá chacmojtšëtsëtsná ora: “Canýe Bëngbe Bëtšabe juabna oyeubuambnayá šonjáuyana chë Bëngbe Bëtšabe uámana te ya tojóshjango ca” o “canýa chca šonjabuayená ca” o “Páblëbiocana tsbuanácha fsënjushache y chiñe entsayana chë te ya tojóshjango ca”. <sup>3</sup> Bëtšcá šmochtsentšena ndocná tondáyeca chacmondáingñema. Er chë Bëngbe Utabnabe uámana te cabá ndóshjango ora, mallajta entšanga Bëngbe Bëtšabe amëndayama contra mochántsemna, y chë Bëngbe Bëtšabe contra yomná echanjábocna. Y cha entsemna nda ibojtsemna



infernoca pochocaná jtsemnana. <sup>4</sup> Cha Bèngbe Bètsabe contra echanjóyeuambaye, chë ndèmuanyèngbiana y ndaye soyèngama entšanga imojuabná diosènga imomnana contra echanjóyeuambaye. Chentšana cha echanjayana chèngbiana más obená yomna ca. Y Bèngbe Bètsabe bèts yebnóynaca cha echanjámashèngo, choca echanjót'bema y entšanga echantsètsèsnaye ndegombre cha Bèngbe Bètsá yojtsemna ca.

<sup>5</sup> ¿Chè soyama tsèngaftanga ndoñe šmondénabouín'ña? Atše cabá tsèngaftangaftaca sènjamna ora, chama sènjanyoyebuambná. <sup>6</sup> Y tsèngaftanga šmondétátšèmbó, nda mora yojtsama chë Bèngbe Bètsabe contra yomná ndoñe chaondon'ynama, cabá chë tempo chca jopásama ndóshjango ora. <sup>7</sup> Mora ya mallajta entšanga puerte bacna soyènga tmojontsé amana, ndoñe ntšamo Bèngbe Bètsá tojayancá chènga jamama yojtsamna ca, y bènga chë soyènga josértama ndoñe quemuátobena, ndayá n'ye Bèngbe Bètsá chca šojin'yan'yese; pero ntšamo t'bonjauyancá chë Bèngbe Bètsabe contra yomnabiana ndoñe queochatèchnèngo, n'ya nda chë soyènga ndoñe chaondètsemnana yojtsamábioye Bèngbe Bètsá chabojtsejuaná ora aífne. <sup>8</sup> Chora chë Bèngbe Bètsabe contra yomná echanjábocna; pero Bèngbe Utabná yochjésabo ora, echanjángouo y echanjama cha chaóbanama; y tša buashin'nyin'yanánaca y obenánaca echanjábocnama, chábioye bochantsepochóca. <sup>9</sup> Chë Bèngbe Bètsabe contra yomná, Satanabe obenánaca echanjabo, y entšanga bèts obenana echanj'in'yan'yiye, y chë bèts soyèngaca entšanga ingñénega mochántsemna. <sup>10</sup> Cha ba bacna soyènga echanjama ntšamo Bèngbe Bètsá ndoñe yondbošcá, chca, ba entšángbioye nyetsca soyènguiñe jáingñama. Y chènga ndegombre pochocánènga mochántsemna; Bèngbe Bètsá chca echanjama, chènga chë ndegombre soyènga Jesucristbiana chèngbe ainaniñe ndoñe tmonjanjóyèngacñe causa, y chë soyèngama mo uámana soyèngcá ndoñe tmonjanjuabó causa, chca, atsebácanènga jtsemnana. <sup>11</sup> Chca causa, Bèngbe Bètsá entseleséncia entšanga ingñénènga chamotsemnana, y chë ndoñe ndegombre soyènguiñe chamotsošbuáchema. <sup>12</sup> Bèngbe Bètsá chca echanjama, nyetscanga chë ndegombre soyènguiñe Jesucristbiana ndoñe tmonsošbuáchenga, chë bacna soyènga amama oyejuayènga tmojtsemnènga, chë nyetsca tescama castigo chamotsebonnana jayanama.

#### *Bèngbe Bètsá šojabacacá atsebácanènga jtsemnana*

<sup>13</sup> Pero bènga šontsamna nyets tempo Bèngbe Bètsá jtsatschuanayana tsèngaftangbiana, Jesucristbeyeca catšátanga, Bèngbe Utabnabe bonshánènga. Bènga, Bèngbe Bètsá fséndètschuaná cha quem luare cabá ndobojátsa ora, atsebácanènga chašmotsemnana tmojábacacama. Bèngbe Bètsá tmojatsèbacá er chë Uámana Espíritu Bèngbe Bètsabe entšanga tmojábiana, y tsèngaftanga chë ndegombre soyènguiñe šmojtsošbuaché. <sup>14</sup> Chë tšabe noticiènga bènga chondábuayinayeca, Bèngbe Bètsá tmojúbuaia chábenga chašmotsemnana. Cha tmojúbuaia Bèngbe Utabná Jesucristbe obenana y buashin'nyin'yanánèncaca chašmotsebonnana.

<sup>15</sup> Chcasna, ndocna te šmattsajbaná ošbuáchiyana chë ndegombre soyènguiñe ntšamo t'bonjabuatambacá, cach tsèngaftangbeñe jóyeuambayèse y tsuanácha jubuábiamèse, y ndocna te in'yetsá šmatjátsjuabnaye. <sup>16</sup> Bèngbe Bètsá puerte tšabia endmènayeca, cha šuababuán'yeshana y tojama bènga sempre aínaniñe chamotsebonnana y chë mochjóyèngacñe tšabe soyèngama corente jtsosbuáchiyèse chamotsobátmanama. Chábioye y Bèngbe Utabná Jesucristbioye fsèntseimpadana, <sup>17</sup> chata chaboma tsèngaftanga bètscá añemo ainaniñe chašmotsebonnana, y tsèngaftanga nyets tempo chašmotsobena ntšamo tšabá yomná jtšichámua y jtsamama.

### 3

#### *Bèngbiana Bèngbe Bètsá šmochtseimpadana*

<sup>1</sup> Y morna, Jesucristbeyeca bèngbe catšátanga, Diosmanda bèngbiana Bèngbe Bètsá šmochtseimpadana, nyetsca luarenache más ba entšanga chamotsobenama Bèngbe Bètsabe buayenánana jouenama, y chènga chë soye chamóyèngacñama, y puerte chamotserre-petánama, ntšamo tsèngaftanga šmonjanmáca. <sup>2</sup> Bèngbe Bètsánaca šmochtseimpadana cha chašotsèbuáyuyama, y chë puerte bacna entšanga ndoñe chamondobenama jamama bènga fchaisufrima, er nyetscanga ndoñe quemochatošbuáchiye chë fsèndbuayin'ña palabriñe. <sup>3</sup> Pero Bèngbe Utabná sempre jtsamana ntšamo tojayancá, y cha echanjama tsèngaftanga más chábèñe chašmotsošbuáchema, y ndoñe n'ye cachcá quematén'ña chë bacna soyènga mandayá n'ye ntšámna ndoñe chacmondáborlama. <sup>4</sup> Y Bèngbe Utabná entsama bènga ndegombre ainaniñe fchaitsejuabnana, ntšamo bènga t'bojanamèndacá mora šmojtsamama y cachcá sempre šmochtsamámna. <sup>5</sup> Bènga, Bèngbe Bètsá fsèntseimpadana, Bèngbe Utabná benache chacman'yan'yé bonshánana jtsebonnana ntšamo Bèngbe Bètsá endbonmáca, y chašmojtseufrina ora, corente añemo chašmotsebonnana, ntšamo Cristo tojansufrí ora yojanbonmáca.

*Nyetscanga entsamna jtsetrabájayama*

<sup>6</sup> Jesucristbeyeca catšátanga, Bëngbe Utabná Jesucristbe mándoca cbontsaménda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tbonjabuatambacá, cháftaca ndoñe šmattsóyebuambnaye. <sup>7</sup> Cach tšëngaftanga tšabá šmondétatšëmbo ntšamo cmojtsamna jtsiyenana, ntšamo bënga fsënjoyencá: bënga tšëngaftangbeñe fsënjaniyena ora, nye ntjatrabajacá oyënjayënga ndoñe queftsjatsmëna, <sup>8</sup> ni ndocnabe saná chibiáisesse, tondaye ntabuenaycá. Inyetsá enjamna; cada te bnëtë y ibeta jabuache fsënjatrabája, chca, tšëngaftanga ndoñe chacmondëtsamnama bëngbe uajabótama bënga jatatšatnayama. <sup>9</sup> Y ndegombre, bënga derecho fsënjánbomna tšëngaftanga jamëndama chašcújabuachama; pero masque chca, bënga jabuache fsënjatrabája tšëngaftanga chašmotsetatšëmbuama ntšamo yomna jtsiyenama, y chca chašmotsamama. <sup>10</sup> Bënga tšëngaftangaftaca fsënjamna ora, mëntšá tbonjanamëndá: Nda ndoñe tontseboše jatrabájama, cha cach ndoñe chaondëtsesá. <sup>11</sup> Chca fsëntsichamo, er bënga fsënjátatšëmbona, báseftanga tšëngaftanguentšënga imojtsiyena tondaye ntsamcá, pero tša chë inyëngbe soyënguiñe jtsontremeténese. <sup>12</sup> Chca oyena entšángbioye fsëntsabuayiyiná y fsëntsaménda Bëngbe Utabná Jesucristbe mándoca, natjëmbana cachëngbe vida onguayiyiñe chamotsotrabájajama.

<sup>13</sup> Jesucristbeyeca catšátanga, ndoñe chacmondëumantšé tšabe soyënga amana. <sup>14</sup> Nderado nda ntšamo quem tsbuanáchañe fsënjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotsëuatjama. <sup>15</sup> Mo canye uayayacá ndoñe šmattsonyaye; šmochjabuayená mo canye catšatcá, chca ndoñe chaondëtsamama.

*Jtadiósoftanama*

<sup>16</sup> Bëngbe Utabná fsëntseimpadana, cha, chë entšanga tšabe ebionana ainaniñe chamotsëbomna iuamá, chaoma tšëngaftanga nyets tempo y nyetsca tescama chca chašmotsebonnama. Bëngbe Utabná tšëngaftangaftaca chaotsemna.

<sup>17</sup> Nye quem palabrënga tšëngaftanga jacheuayama cach atšbe cucuátseca sentsabiamná. Atše chca sëndbauapochóca atšbe tsbuanachangá juabemama; ntšamo muentše entsabemancá entsinyinýná quem tsbuanácha atšbiácha iuamnama.

<sup>18</sup> Atše, Bëngbe Bëtsá sëntseimpadana, Bëngbe Utabná Jesucristo chaoma tšabe bendicionënga tšëngaftangbeñe chaotsemnama.

## 1 Timoteo

### *Jachuayama*

<sup>1</sup> Atše Pablo, Jesucristbe ichmoná sëndmëna. Bëngbe Bëtsá bëngbe atsebacayá endmëna y Bëngbe Utabná Jesucristo endmëna ndábeñe bënga, puerte jtsosbuáchiyëse mondobátmana ba soyënga bëngbiama cha yochjamama. Atše Jesucristbe ichmoná sëndmëna, er chata tbojanmandá atše chca jtsemnama. <sup>2</sup> Timoteo, atše quem tsbuanácha cbontsabobiamná. Atše Bëngbe Bëtsabe soyëngama entšanga sënjanabuayiyiná ora, aca Jesucristbeñe tconjanosbuaché, y chca, aca mo atšbe ndegombre uaquíñacá tconjanóbema. Atše sëntseimpadana, Bëngbe Bëtsá Bëngbe Taitá, y Cristo Jesús Bëngbe Utabná, chaboma aca tšabe bendicionënga chacotsebomnama, chata chacmolastemama y ainaniñe tšabiana ebionana chacotsebomnama.

### *Pablo chë ndoñe ndegombre soyënga abuatambayëngbiama chënga tojanabuayená*

<sup>3</sup> Ntšamo chë Macedonia luaroye chocana sënjëftsanbocna ora tconjanimpadacá, mora cachíñe cbochtëtsimpáda. Efeso puebloca cochjoquëda, básefta entšanga chácuamëndama chë ndoñe ndegombre soyënga ndoñe chamondëtsabuatambama, <sup>4</sup> ni nyëts tempo ndoñe nyë chamondetsejuabná anteungbe cuentëngama, ni chë ba uabemana uabáinënga chë tempca bëts taitangbiama. Er nyë chca yapa jesejuabnayanentšana, jóbocnana nyë inyëngaftaca jabuachana enatsëtsnayıñe, y chca chëngbioye tondayama ntjuababuachana ntšamo Bëngbe Bëtsá jamama yojuabnacá chaósertama. Chë soyna nyë chábeñe jtsosbuáchiyëse jobenayana josértana.

<sup>5</sup> Chca mando entsemna nyëtscanga chamotsenbobonshánama, y chë bonshánana endóbocana nda chabe ainanentše ndocna bacna soyënga tondbomnábensana, ntšamo tojtsamcá tšabá yojtsemna ca ainaniñe tojtsejuabná y tojtsetatšëmbuábentšana, y Jesucristbeñe ndegombre ošbuachiyábentšana. <sup>6</sup> Báseftanga tmojtsajbaná chca jtsemnana y inyë soyëngama tmojontšë juabnyana; chíyeca chënga mora imojtsentšana nyë ndayámna ndoserverna soyëngama enatsëtsnayına. <sup>7</sup> Chënga jtsëbošana Bëngbe Bëtsabe ley abuatambayënga jtsemnama, pero chënga ndoñe yontsósertana ni ntšamo imojtsabuatambacá, ni mo ndayánaca ntšamo chënga tmojtsichamcá, mo chë soyënga ndegombre cuaftsemncá.

<sup>8</sup> Pero bënga mondëtatšëmbo chë leyënga tšabá yomnama; tšabá endmëna, chë ndayama chë leyënga tmojuamcá entšá chë leyëngaca tojtsamëse. <sup>9</sup> Bëngnaca mondëtatšëmbo, chë leyënga ndoñe tmonjuama chë nyëtsca soyënguiñe tšabá amëngbiama. Chë leyënga tmonjuama quemëntša entšanga jácastigama: ntšamo leyënguiñe ndoñe tonselesenciancá amënga y ntšamo Bëngbe Bëtsá yoboscá ndámënga, chë Bëngbe Bëtsá ndoñe imondadoránënga y bacna soye amënga, Bëngbe Bëtsá ndoñe mondërrespetánënga y Jesucristbeñe jtsosbuáchiyana y Bëngbe Bëtsá jtsadoránana tondaye yondoserverna ca juabnyënga, cachabe taitá o mamá obányënga y ndëmuanyënga imomna entšanga obányënga, <sup>10</sup> boyabásaftaca o shembásaftaca bacna soye amënga y boyabásenga cach boyabásengaftaca bacna soye amënga, entšanga enënga nyë inyabiama nyëts tempo chamotseservënama, bosterënga y chë nyë bonamente Bëngbe Bëtsabiama júrayënga; chca entsayana, chë leyënga yomna jácastigama nyëtscanga ndëmuanyënga ndoñe tmontsama ntšamo chë ndegombre buatëmbana soyënguiñe iuayancá. <sup>11</sup> Ntšamo muentše chë leyëngama tijayancá, entsebuatëmbana chë Bëngbe Bëtsábiocana puerte tšabe noticiënguiñe, chë ndegombre buatëmbana soye; Bëngbe Bëtsá, chë corente bendición bomná, šonjichmó chë buayenánana entšanga jabuatambama.

### *Pablo Bëngbe Bëtsábioye tbojtanchuá, tbojanlastemama*

<sup>12</sup> Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedësama atše tsjëtseprontanama, y chíyeca šojanabuayana atše chabiamna chaitrabajama; y cha endmëna nda inétsama atše obenana chaitsebomnama chë trabajo jamama. <sup>13</sup> Cha chca átseftaca tonjanma, masque tempo atše chabe contra ba soyënga sënjánichamo, chabe ústonënga sënjanëcamena, y chabiamna tondaye respeto ntsebomncá sënjánenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjátanmëna, y chca, atše ndoñe quetsjátantatšëmbo ndayá tsjánamama. <sup>14</sup> Y chca, Bëngbe Utabná ba tšabe bendicionënga atšbiama tonjanma, y chábeñe ošbuachiyá šonjánbema, y tonjanma atše cha chaitsebobonshánama y inyëngbiyocna. Cha chca bëngbiama tojama, bënga cányiñe mo canyáca Cristo Jesúseftaca bëtsemnayeca.

<sup>15</sup> Ntšamo chanjayancá ndoñe nyë bostero soye quenátsmëna, y nyëtscanga entsamna chca ndegombre bëtsemnama jtsejuabnyama: Cristo Jesús quem luaroye tonjánabo, bacna soye amënga jabátsebacama, y chë bacna soye amënguentše atše chë más bëts bacna soye

amá sëndmëna. <sup>16</sup> Chíyeca, Bëngbe Bëtsá šonjanlasterná, jinjányiyama cha puerte uantado entšangafacta yomnama. Y chë soye inyëngbioye tojaninjanýé, chë nyetsca tescama yomna tšabe vida jtsebmomnama, chë chábeñe mochtsanošbuachëngbioye; chca tonjaninjanýé cachá átšeftaca uantado jtsemnëse, atše nyetscangbiama chë más bëts bacna soye amá jtsemnëse. <sup>17</sup> ¡Entšanga nyets tempo chamotsinjanýná, chë Utabná nyets tempo mandayá y puerte bëtsá y obená yomnama! Cha endmëna chë ndocna te echanjétsobaná, chë entšanga ndoñe ntsobenana jinýamá y chë nýe canýe Bëngbe Bëtsá yomná. Chca chaotsemna.

<sup>18-19</sup> Timoteo, aca mo atšbe uaquiníacá condmëna. Atše tcbonjaimpadá, ntšamo tcbonjauyancá entšanga chacúyanama, ntšamo báseftanga Bëngbe Bëtsabe juabna oyebuambnáyënga acbiama tmojanayancá, y chiñe jtsejuabnáyëse chë Jesucristbe soyëngama chacopeliá y nyets tempo chca chacotsama, Jesucristbeñe puerte jtsošbuáchiyëse, y lempe ntšamo tcojtsamama tšabá yojtsemnama ainaniñe jtsetatšëmbëse. Báseftanga, chënga ndoñe tšabá imonjétsama ca chë ainanoca juabnënga tmojánayana ora, chë soye ndoñe tmonjanuena y iñé causa, Jesucristbe soyënguiñe ošbuáchiyana tmojtšanjbananga y tmojanontšë inýe buatëmbana soyënguiñe jtsošbuáchiyana. <sup>20</sup> Chca tonjopasá Himeneo y Alejándroftaca, y atše sënjalesenciá Satanás chaoma chata chabosufrija; y chca, chata chabuatsjinýe Bëngbe Bëtsabiama ndoñe bacá ntsóyebuambnáyana.

## 2

### *Pablo tojanabuayená ntšamo Bëngbe Bëtsá jtsadoránama*

<sup>1</sup> Nyetsca soyama más cbontsaimpadana ndayá chë Jesucristbeñe ošbuáchiyënga Bëngbe Bëtsáftaca chamojtsencuénta ora, nyetsca soyëngama ntšamo tojtsëjajobotcá cha chamotseimpadana, nyetsca entšangbiama, y cha sempre chamotsatschuaná. <sup>2</sup> Entsemna, nyetscangbe tšabiama Bëngbe Bëtsá jtseimpadánama, pero masna quem luarentša reyëngbiama y inýe mándayëngbiama, chca, nyetscanga puerte natjëmbana jtšiyenama chamuetsobenama, y nyetsca soyënguiñe tšabá jtšamëse, Bëngbe Bëtsá jtsatschuanayama, y entšangbe juabniñe tšabá chamotsemnama. <sup>3</sup> Chca jtšamana tšabá endmëna, y Bëngbe Bëtsá, bëngbe Atsebacayá, chama jtsóyejuayana; <sup>4</sup> y chca jtsóyejuayana, er cha endboše nyetsca entšanga atsebácanënga chamotsemnama y chë ndegombre buayenánana chamotsábuatmama. <sup>5</sup> Chca nyetsca entšangbiama endmëna, er nýe canýe Bëngbe Bëtsá nyetscangbiama endmëna, y nýe canýa endmëna nda yobena jamama entšanga tempcá tšabá Bëngbe Bëtsáftaca chamotsemnama; cha endmëna Jesucristo, cach entšá. <sup>6</sup> Er Jesucristo, mo canýa inýënga játsëbacama cuaftopagacá, chabe derecho vida jtsebmomñama cachá tojanonýa y tojanóbana, chca, nyetsca entšanga chamotsobenama atsebácanënga jtsemnama. Chë soye cha tonjaninjanýé, nýa chama tempo yojtsemna ora, chë Bëngbe Bëtsá nyetsca entšanga atsebácanënga chamotsemnama yobošama. <sup>7</sup> Bëngbe Bëtsá chca nyetsca entšangbiama yobóseyeca, Jesucristo šojanabuayana chabe ichmoná jtsemnama, chabe soyënga entšanga jtsabuayinyayama; ndegombre soye sëntsoyebuambná, ndoñe quetsátsbostero. Sonjanmandá chë ndegombre buayenánana chë ndoñe judiëngbioye jabuátambama, y chënga entsamna chiñe jtsošbuáchiyana.

<sup>8</sup> Ntšamo sënjayancá, atše sëntseboše nyetsca chë Jesucristbeñe ošbuachiyëngcá enefjuana luarënguenache, boyabásenga Bëngbe Bëtsáftaca chamotsencuénta, y chora celoye, Bëngbe Bëtsábioye cucuatše chamatsbaná; pero chamna, ainaniñe bacna soyënga ntsebmomná, inýëngafacta ntjatentjayanaycá, y inýëngafacta jabuachana ntjatenatsëtsnycá chënga chamotsemna.

<sup>9</sup> Y atše sëntseboše shembásenga entšayangá chamuatíchéjtjo, mo chë tšabe shembásenga mondbetsichëtjoncá, ndoñe nýe entšanga chamotsëbuáuatjama y ntšamo tmojtsichëtjonama chënga uámanënga imomna ca entšanga chamotsejuabnama. Ndoñe quenátamma jtšenóbotamnyana, nýa mo chca chquëcnënga jtsemnëse, ni castellano soyëngaca o uámana fiantse ndëtšëngaca, o yapa uámana entšayangaca, chca, nýe entšanga jinýama tšabá jtsemnama. <sup>10</sup> Pero añe mo chë Bëngbe Bëtsá adóraye shembásenga mondbetsamcá jtšamëse, chë tšabe soyënga jtšamana.

<sup>11</sup> Nderado nda tojtsabuatambá ora, shembása bontsemna jtsatsjëndayana, chca ora tondaye ntjatichamcá, y chentša mándayënga chaotsayaunana. <sup>12</sup> Atše ndoñe quichatslesenciá, canýe shembása boyabásenga chaotsabuatambá, ni chaotsamënda. Canýe boyabása tojtsabuatambá o tojtsamënda ora, shembása ndocá chaondëtsichamo. <sup>13</sup> Chca chaotsemna, er Bëngbe Bëtsá natsana Adán tbojanpormá, y chentšana Eva; <sup>14</sup> y er Satanás Adánbioye ndoñe tbonjaningñé, ndayá chë shëmbioye; y chca tbojaningñé ora, chë shema tojanma ntšamo Bëngbe Bëtsá ndoñe tbonjanlesenciá. <sup>15</sup> Pero shembása atsbočaná echántsemna, básenga quem luaroye endbaúshejangoyeca, pero chamna, añe nyets tempo Bëngbe Bëtsábeñe tojtsosbuáchese, nyetscanga tojtsababuánýeshanëse, cachá nyetsca

soyënguiñe jenomándama tojtsobenëse, y nyëts tempo tšabe soyënga tojtsamëse, ntšamo Bëngbe Bëtsabe entšanga mondbetsamcá.

### 3

*Ntšamo ibojtsemna chë ošbuachiyëngcá nefjuanëngbeñe mandayá*

<sup>1</sup> Mëntšá ndegombre endmëna: nderado nda tojtseboše canye trabajo jtsebojnama, cán'yentšë ošbuachiyëngcá nefjuanentšë chë inye ošbuachiyënga jtsamëndayama, cha ndegombre yojtseboše canye puerte tšabe trabajo. <sup>2</sup> Chiyeca, chë ošbuachiyëngcá nefjuanëngbe mandayá bontsemna jtsiyenana ba tšabe soyënga jtsamëse, chca, cha ndoñe tšabá yontsama ca ndocná chaondëtsichamuama. Y mëntšánaca cha bontsemna jtsenama: nye canye shembásabe boyá; ntšamo jtsiyenama tšabá juabnayá chaotsemna, cachá nyëtsca soyënguiñe jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentšë posada entšanga júyentšamiama, y chaotsobena botamana abuatambayá jtsenama. <sup>3</sup> Ndoñe yapa tmoyá o penztersero chaondëtsemna; pero chaotsemna tšabá mandbomná, entšanga natjëmšana chamotsiyenama bošá, y ndoñe chaondëtsejuabná nye crocénana jésebojnama. <sup>4</sup> Chaotsetátšëmbo ntšamo nyëtsca chabe yebnentšá entšanga botamana jtsamëndayama, y chaoma chabe básenga chë ntšamo cha tojayancá chamotsamama, ndocna te stëtšoye chamondëquedama; <sup>5</sup> er, nda cachabe yebnentšá entšanga ndoñe tontsobena jtsamëndayama, chca, jntšamo nantsobena chë ošbuachiyëngcá nefjuanënga jtsanyënama? <sup>6</sup> Cha ndoñe chaondëtsemna cabá mora cuenta Jesucristbeñe ošbuachiyá; añe chca chë ošbuachiyëngcá nefjuanëngbe mandayá tojtsemnëse, nderado nye cachá uamana entšá nantsenobiamnaye, y ntšamo Bëngbe Bëtsá Satanásbiye tbonjancastigacá, chca bëtsemnana, cach soyama Bëngbe Bëtsá chë entšábíoye buanjacastíga. <sup>7</sup> Chánaca bontsemna jtsiyenana jtsamëse, y chca chaojtsama ora, chë Jesucristbeñe ndošbuachiyënga tšabá chabiama chamotsichamo. Chë entšá ndoñe chca tontsamëse, chënga chabiama mochanjayana ndoñe tšabá yontsama ca, y Satanás echanjama cha chabócochéngo bacna soyënga jamama.

*Ntšamo ibojtsemna chë ošbuachiyëngcá nefjuanënga ujabuachaná*

<sup>8</sup> Cachcá, chë mándayëngbe ujabuachanënga mëntšá entsamna: uamana entšangcá nyëtscanga chamotsétabna, uta palabra ndbomnënga; ndoñe yapa vínoye chamondëtsetmó, y ndoñe chamondëtseboše nye paselo becá crocénana jtsebojnama. <sup>9</sup> Chënga entsamna ndegombre jtsošbuachiyana chë Bëngbe Bëtsá tojinýanyë soyënguiñe, chë ndayíñe bënga mondošbuaché, chëngbe ainaiñe inyëtšá juabnënga ntjatsbomncá. <sup>10</sup> Natsana, chëngbiama botamana smochjshaurrepára jtsetatšëmbuama chënga añe o ndoñe montsobena mo chë ošbuachiyëngbeñe mándayëngbe ujabuachanëngcá josérvíama. Chënga nyëtsca soyënguiñe tšabá tmojtsemnëse, smochjálesenciaye chiñe chamoservema. <sup>11</sup> Cachcá, chë shémanga mëntšá entsamna: nyëtscangbiama mo uamana entšangcá utabnënga, ndoñe uayátšenayënga, cachënga nyëtsca soyënguiñe jenomándama obenënga, y nyëtscañe tšabe palabra bomnënga. <sup>12</sup> Canye ujabuachaná chaotsemna nye canye shembásabe boyá, y chaotsetátšëmbo ntšamo chabe básenga y nyëtscá chabe yebnentšá oyenënga jtsamëndayana. <sup>13</sup> Chë ujabuachanënga tšabá chiñe tmoservëñe, canye uamana puesto mochanjashjache, y chënga mochantsobena bëtš añémoca jtsóyebuambnayama ntšamo Cristo Jesúsbeñe tmošbuáchema.

*Ndayá Bëngbe Bëtsá bënga sojinýanyëcá, canye bëtš buatëmbana soye endmëna*

<sup>14</sup> Atšë sëntsobátmana pronto chjjobenaye jama aca jauatsétsayama; pero chca cbontsabiomná, <sup>15</sup> nderado atšë betscó jama ndoñe sënjobenase, chacotsetatšëmbuama ntšamo canya ibojtsemna nyëtsca chë Bëngbe Bëtsábenga imonnëngaftaca. Chënga mondmëna chë Jesucristbeñe ošbuachiyënga, chë Bëngbe Bëtsá Ainabe básenga. Chënga chë Bëngbe Bëtsabe ndegombre soyënga mondbomna chë más uamana puestoca quem luarentšë, y tša mondëntšena chama inyëngbiye jáyëñjanama. <sup>16</sup> Nya ndegombre endmëna, Bëngbe Bëtsá soyënga sojinýanyë, y chë soyëngacá bënga montsobena jtsiyenana, chë Bëngbe Bëtsabe entšanga imonnëngcá; chë soyënga bëngbiama ndegombre bëtš buatëmbana soye endmëna, y chë buatëmbana soye mëntšá endmëna:

Cristo quem luarentšë cach entšacá entšángbiye tojánëbëbuacna.

Chë Uamana Espiritu tojinýanyë cha nyëtsca soyënguiñe tšabá amá yomnana.

Angelënga cha tmojáninyë, y chabiama ba luarënguentšá entšángbiye tmojanabuayena.

Ba entšanga quem luarentšë chábeñe montsanošbuaché, y Bëngbe Bëtsá celoye tbonatanatsbaná, cha puerte bëtšá y obená yomnana jinýanyiyëse.

### 4

*Báseftanga chë tšabe benachentsana mochtsojuánañe*

<sup>1</sup> Uámana Espíritu, nýetscanga catafjosertaycá tojayana, quem luare jopochócama tempo chaojtsobeco ora, básefta entšanga camochtsajbaná ošbuáchiyana chë ndayiñe bënga Jesucristbiamá mondošbuaché soyënguifñe ca. Chëngna, espíritënga entšanga áingñayënga mochántsayauana, y chë ndoñe ndegombre soyënga chë bacna bayëjënga entšángbioye mochtsabuátambaye soyënguifñaca. <sup>2</sup> Chca buatëmbana soye jtsóboacanana chë bacna entšanga ntšamo ndegombre tmojuabnacá ndinýinýayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayana, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nýe chca chëngbe ainaniñe jésejuabnayana. <sup>3</sup> Quem entšanga ndoñe ntjalesénciana inýenga chamotsobouamama, y jtsemándayana básefta sananga entšanga ndoñe chamondëtsesama. Ntšamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñiama, Bëngbe Bëtsábioye chama jtsatschuanayëse. <sup>4</sup> Er lempe ntšamo Bëngbe Bëtsá entšanga chamosama tojamcá tšabá entsemna. Ndoñe queñátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëttschuase; <sup>5</sup> er chca saná Bëngbe Bëtsábioye tšabá jtsinýnana, cachá chca tojayánayeca, y bënga chë sanama cha mondbatschuayama.

*Jesucristbiamá trabájayiñe canýe tšabe oservená*

<sup>6</sup> Aca, chë soyënga ošbuachiyëngbioye chacojtsabuátambase, aca Jesucristbiamá trabájayiñe canýe tšabe oservená cochántsemna. Y mo nda bëtscá añemo jtsebomnana botamana tojtsesacá, cachcá, ácnaca puerte ošbuáchiyana y ainaniñe bëts añemo cochántsebomna; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguifñe endayanca sempre icuámayeca.

<sup>7</sup> Pero ndoñe nýe quem luarentša entšangbe cuentënga y ndoservena cuentënga cattsuenana. Ba soyënga cochjama aca bëts añemo ainaniñe chacotsebomnana, mo nda bëts añemo jtsebomnana cachabe cuérpoca ba soyënga cuaftsamcá, ntšamo Bëngbe Bëtsá jadórama yomncá jtsiyenama jtsamëse; <sup>8</sup> cachabe cuérpoca ba soyënga jamana más añemo jtsebomnana, añe batšatema endoservena; pero jtsiyenana Bëngbe Bëtsábioye jadórama yomncá jtsamëse, puerte enduámama y juajabuáchana nýetsca soyënga tšabá chaotsemnana; chca jtsamana puerte tšabá endmëna cachabe vidama quem luarentše, y chë inýe vidócnaca. <sup>9</sup> Ntšamo tijayancá ndegombre entsemna, y nýetscanga entsamna jtsejuabnayana chca ndegombre bëtsemnana. <sup>10</sup> Y chë soyama bënga puerte mondëtrabája y mondësufrina, er chë Bëngbe Bëtsá Ainábeñe puerte mondošbuachéyeca, bënga mondobátmana cha yochjama soyënga bëngbe tšabiamá. Cha endmëna chë nýetsca entšangbe atsebacayá, pero ndegombre masna, chábeñe ošbuáchiyëngbe atsebacayá cha endmëna.

<sup>11</sup> Ntšamo quem soyëngama tcbonjauyancá entšanga cochtsamëndaye y cochtsabuátambaye. <sup>12</sup> Ndoñe catjaleséncia, aca bobontse comnana, ndánaca chacmotsáboyënjama. Pero añe bëtscá cochtsama, chënga puerte chacmotserrespetánama, chca jtsamëse icoyenama jtsomýayëse, cachcá chamotsamama: botamana jtsóyebuambnayëse, nýets tempo tšabe soyënga jtsamëse, nýetscanga jtsababuánýeshanëse, Bëngbe Bëtsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndbomná. <sup>13</sup> Atše choca chaijashjanguëntscuana, cochtsentšëna chë Bëngbe Bëtsabe uabemana palabrénga entšángbeñe jtsaliayama, y chënga jtsabuátambayama y jtsabuayiynayama. <sup>14</sup> Achbioye Bëngbe Bëtsá obenana tmojanatšëta tšabe soyënga jamama chacotsobenama, ošbuáchiyënga jujabuáchama. Bëngbe Bëtsabe juabna oyeubuambnayënga achbiamá tmojanoyebuambá ora, y chë ošbuachiyënguentša bëtsëjëmënga chëngbe cucuatšënga ábeñe tmonjancá y Bëngbe Bëtsá achbiamá tmonjanimpadá ora, chca tšëтана obenana tcojanóyëngacñe. Chë soye sempre cochtsinýena.

<sup>15</sup> As, aca cmontsemna sempre jtsamana chë soyënga ntšamo tcbonjauyancá. Cochtsentšëna chë soyënga tšabá jtsamama, chca, entšanga chamobená jinýama, aca cada te más tšabá lempe cojtsamama. <sup>16</sup> Botamana cochtsantješna, aca chë tšabe soyënga jtsamëse cojtsiyenama, y chë tšabe buatëmbana soye inýenga cojtsabuátambama. Cada te chca cochtsama, y chca, cach aca cochanjenájabuache atsbocaná jtsemnana y chë ábioye ouenanëngnaca játsëbacama.

## 5

*Ntšamo Timoteo ibojtsemna chë inýe ošbuáchiyëngacñiama jtsemnana*

<sup>1</sup> Bëtsëjëmënga ndoñe catjucácana; chca játamama, cochjábuaayenaye, chënga mo cach acbe taitá cuaftsemncá; y chë bobontšëngacñiama cochjama, mo chënga acbe catšátanga cuaftsemncá. <sup>2</sup> Chë bëtsanana shembásëngacñiama tšabá cochtsemna, chënga mo cach acbe mamá

cuaftsemncá; y chë tobiasëngaftaca cochjama, chënga mo acbe uabénanga cuaftsemncá; chëngaftaca cmontsemna puerte tsabia jtsemnana, chëngbiama ndocna bacna juabnënga ainaniñe ntsebmncá.

*Osbuáchiyëngbenache viudanga tmojtsemna ora*

<sup>3</sup> Chë ndegombre viudanga, chë ndocná mondbomna chaújabuachama, chënga cochtsar-respetana y cochtsëjabuachana. <sup>4</sup> Pero canye viudá nderado básenga o nietënga tuabamna, chënga entsamna natsana jshauatsjínÿana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbiome jtsanÿenëse, y chëngbe bëtsëtsangaftaca tsabá chamotsama, ntšamo chënga chëngaftaca tmojanmca, er chca jtsamama, Bëngbe Bëtsá jtsóyejuayana. <sup>5</sup> Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochjuájabuachama jtsobátmanana, y nyëts tempo jtseimpadánana, bnëté y ibeta, cha chabuájabuachama. <sup>6</sup> Pero canye viudá, nye quem luarentša entšangaftaca oyejuayá jtsemnana soyënga tojtsamëse, cha masque ainá tojtsemna, Bëngbe Bëtsábe bominiñe mo canye obanacá jtsemnana, er chábioye ndoñe ntseeservénana. <sup>7</sup> Lempe chë soyënga chamotsamama osbuáchiyënga cochtsamëndaye, chca, ndocná ndocna bacna soye chëngbiama jatichámuama chaondëtsebmnama. <sup>8</sup> Er, nda cachabe entšanga y más, cachabe pamíllanga ndoñe tontsacuedana, cha chca jtsinÿinÿayana chë buatëmbana soyënga, ndayiñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe osbuáchiyëngbiama más bacna entšá jtsemnana.

<sup>9</sup> Chë jujabuáchama viudanga imuábemana lístañe, chaotsábemana chë viudá chnënguana bnëtsana uatama más yobomná, y nye canye boyá ibnabomná. <sup>10</sup> Entšanga cha chamotsábuatma mo canye tsabe soyënga amacá: chabe básenga botamana tojabëché, áshjajnënga chabe yebnentse posada júyentsámiamana prontaná, Bëngbe Bëtsábe entšanga imomnënga tojushecjabebé, chë imosufriñënga tojújabuache; jayanana, nda sempre nyëtsca tsabe soyënga jamama yontšená.

<sup>11</sup> Pero chë lístañe, chë viudanga chnënguana bnëtsana uata cabá ndbomnënga ndoñe catjúbiama; er chë chëfta uata ndbomnënga, yapa nye cachënga tsabá jtsemnana juabnënga jtsebmnnana y soyënga jtsamana. Chcase, chënga Jesucristbioye ya ndoñe ntseeservénana, y chora jtsebošana cachiñe jtëtóbouamayama; <sup>12</sup> y chca, inÿenga chëngbiama mochanjayana ndoñe tsabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama. <sup>13</sup> Y cabá más, tondaye ntsamcá tmojtsemna ora, chënga juabouinÿana oyënjayënga jtsemnana, y yebnënguenache jtsanama; y ndoñe nye oyënjayënga, sinó oinÿanëngnaca, inÿengbe soyënguife jtseyentsbëtsjuanëse, y ndoñe yontsemna jayanama soyënga jtsichámëse. <sup>14</sup> Chíyeca, atše séntseboše, chë viudanga cabá tobiasëngna chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondëtsama, chca, bëngbiome uayayënga chamuayana, chënga chca ndoñe tsabá montsama ca. <sup>15</sup> Atše chca séntsicamo, er básëfta viudanga cabá tobiasënga tmojtsajbaná Jesucristo obedecénana, y tmojontsé Satanás joye-unayana.

<sup>16</sup> Canye shembása, Jesucristbeñe osbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë osbuachiyëngcá enefjuanënga ndoñe chaondëtsemna chëngbiama játantješnana; chca, chë osbuáchiyënga mochanjobenaye chë ndegombre viudanga, chë chaújabuachama ndocná mondbomnëngbiome jujabuáchama.

*Ntšamo cuantsemna chë osbuachiyëngbeñe amëndayëngaftaca*

<sup>17</sup> Chë bëtsëjëmënga, tsabá chë osbuachiyëngcá enefjuanënga tmamëndangna, jtsomerecénana entšanga más chamotsarrespetánama, chca trabajo bëtsamama, y más, chë sempre entšanga jtsabuayinÿayama y jtsabuátambayama imontšëngbiome. <sup>18</sup> Er Bëngbe Bëtsábe uabemana palabrengüife endayana, mëntšá: “Aca canye toróftaca shajuana tmojtsatbaná luariñe chacojtsetrabá ora, ndoñe catjuanguëtseñe ca”; inÿoca: “Chë trabajayá merecido jtsebuájonana juacánama ca”. Chíyeca, chë bëtsëjëmëngcá amëndayënga jtsomerecénana entšanga chamotsarrespetánama.

<sup>19</sup> Nderado nda tcmojáuyana canye bëtsëjëma bacna soye tojama ca; pero úta o unga entšanga más ndoñe tmontsemna, chca tojamama tmojinÿe, y chë bëtsëjëma mal quedayá ndegombre soye yojtsichamo ca ndoñe tmonjayana, ndoñe catjóyeunaye.

*Inÿe soyëngama jábuayenama*

<sup>20</sup> Chë bëtsëjëmënga nye bacna soyënga tmojtsamënga, nyëtsca entšangbe delante cochjucána, chca nyëtsanga uatjana chamuishache, bacna soye amama castigo mochtsebmnama.

<sup>21</sup> Atše cbontsemánda, Bèngbe Bètsabe delante, Jesucristo y Bèngbe Bètsabe bocacana angelèngbe delante, chë mandènga chacotsamama; pero ndoñe catjayana canyë bètsèjema tšabá o ndoñe tšabá tonjama ca, cabá ndoñe lempe botamana ndabonyë ora, ni canyë entsá ñyèngbiana más tšabá ntjatabacacnyá. <sup>22</sup> Ndocnabe bestšašifne cucuatšènga catjajáua, Bèngbe Bètsábioye chabiana jaimpádama, jinjinyiyama cha mo canyë bètsèjema amèndayacá josérviana yojtsohenama, nýe betso, juabuáyana botamana ntjenjuaboycá. Pero nýe ntjenjuaboycá chca tcojamése, y cha canyë bacna soye amá tomnèsna, ácnaca cochántsemna mo chabe bacna soyènga cuafjamcá. Cochtsantjesna ndocna bacna soyènga ainaniñe chacondètsebonnana.

<sup>23</sup> Aca ba soye uafšbiaca condbètešoca causa, ndoñe más nýe ena búyeshe cattseftmana, sinó base vínoynaca.

<sup>24</sup> Entšanga mondobena tšabá jinýana, básefta entšangbe bacna soyènga, cabá chë soyèngama chéngbioye botamana ntjájaye ora; pero ñyèngbe bacna soyèngama, nýe tcojájayantsana entšanga chama jtsetatšèmbuana. <sup>25</sup> Cachá, báseftanga entšangbe delante tšabe soyènga jtsamana, y cachora chë soyèngama jtsoatšèmbuana; y ñyèngna iytemncá tšabe soyènga jamana, pero masque chca, ndayénaca chë tmojanma tšabe soyèngama ñyènga mochanjátatšèmbona.

## 6

<sup>1</sup> Chë nýets tempo nýe ñyábiana oservénènga entsamna, chéngbe nduiñèngbiana jtsejuabnayana, chénga uamana entšanga imomnana y nýets respeto jtsebonnana imomercénama. Chca entsamna, Bèngbe Bètsabe Uabainama y chabe soyèngama, ndayiñe bènga mondošbuaché y entšanga mondbétsabatambaye, ñyènga podesca ndoñe chamondètsóyebuambnana. <sup>2</sup> Y chë imobomna Jesucristbeñe ošbuáchiyènga nduiñènga, chéngbioye nýe batsá ndoñe chamondètsarrespetana, er chénga Jesucristbeyeca chéngbe catsátanga mondmèna, y entsamna más tšabá jtsaservénana, er chéngbe trabajuentša tšabe soyènga imóyèngacañe, Jesucristbeñe ošbuáchiyènga mondmèna, y Bèngbe Bètsabe bonshánènga.

*Jtsiyenana Bèngbe Bètsá jadórama soyènga jtsamése, endmèna chë ndegombre bomnana*

Quem soyènga cmontsamna entšanga jtسابuatambayana, y becá jtsètsèsnayana chca chacmóyaunama: <sup>3</sup> Nderado nda ñyè soyènga tojtsabatambá, y ntšamo bènga mondjéuabnacá, chë Bèngbe Utabná Jesucristbiana ndegombre buatèmbana soyama, ni chë buatèmbánana ntšamo jtsiyenama Bèngbe Bètsábioye jadórama yomna soyènga jtsamése, ndoñe cachá bèngcá tontsejuabnase, <sup>4</sup> cha nýe cachá puerte uamana entsá yojtsenobiamná, y tondaye ndosertaná yojtsemna. Cha tša jtsoğustánana ba soyèngama y palabrèngama jabuachana jtseñatsèsnayana, y cha nýe chama vida jésebonnana. Cha chca yomna causa, nýe jtsebošana chë ñyá tojashjache soyènga jtsebonnana, nýetscanga ndoñe cachá chamondètsejuabnana jtsamana, ñyèngbioye joyànguanguama jtsebošana, bacna soyènga ndoñe ndegombre soyènga ñyèngbiana jtsejuabnayana, <sup>5</sup> y ñyèngaftaca nýe sempre jtsepenzèntsiayana, er chéngbe juabniñe nýe bacna soyènga jtsebonnana, chë ndegombre soyènga quematábuatma, y jtsejuabnayana chë soyènga Bèngbe Bètsá jadórama jtsamana, nýe más soyènga jóyèngacñama yoservena ca. <sup>6</sup> Ndegombre canyë entsá bètscá tšabiana jèftsasháchana, cha tojtsiyena Bèngbe Bètsábioye jadórama soyènga jtsamése, y sempre oyejuayá nýe chë tojtsebonnana soyèngaca tojtsemnèse. <sup>7</sup> Er bènga tmojanonýná ora, quem luaroye bèngaftaca tondaye tmonjányèbo, y quem luarentšana cach tondaye quemochatobenaye jèftsoçñama. <sup>8</sup> As, bènga ndayá jasama y ndayá jtichètjuama tmojtsebonnèse, chë soyèngaca oyejuayènga mochtsemna. <sup>9</sup> Pero chë bomnènga jtsemnana tmojtsebošènga, bacna soyènga jamama tojócochéngo ora, ndoñe ntsemorochana y pronto chiñe jotsatsana, mo bayá uachmaniñe cuafjotsatšcá, chë entšanga Satanasbe cucuatšifne ndeolpe jotsatsana; chora chénga jtsamana soyènga mo chë juabna ndobomnèngcá, y chë cachèngbiana ndoñe tšabe soyènga tmojtsamèngbe juabnèngaca. Y mo chë uandbemana barco, bèts búyeshe asentoye tojtseñatjèmbcá, cachá, chë bacna juabnènga bomnana, chéngbioye mochántsapochocaye y nýetsca tescama mochántscastigaye. <sup>10</sup> Crocénana jtsebonnana yapa jtsebošana, jamana entsabe ainanentšana nýetsca bacna juabnènga y soyènga chaóbcnana; y básefta entšanga, crocénana jtsebonnana yapa jtsebošana causa, tmojtsajbaná ošbuáchiyana chë Bèngbe Bètsabe soyènguiñe, chë bènga mondošbuaché soyènguiñe, y chca cachèngbiana tmojana puerte chamosufrima y bèts ngmènana jtsebonnana.

*Chë tšabe soyama jtseñojuezánama, ošbuáchiyana sempre chaotsemnana*

<sup>11</sup> Pero aca, Bèngbe Bètsabiana oservená, chca benachentsana cochtsojuánañe. Nýa cochtsentsèna, chë Bèngbe Bètsabe bominiñe tšabá yomncá jtsamana, chë ndayá Bèngbe



Bëtsá jadórana yomncá jtsamama, Jesucristbeñe puerte jtsosbuáchiyama, nyetscanga jtsababuán'yeshanama, Bëngbe Bëtsábeñe jtsobátmanëse puerte uantado padecena soyënguñe jtsemnana, y corente jtsababuán'yeshanëse nyetscanga chacotsënjayama. <sup>12</sup> Chë tsábe soyama, ošbuáchiyana joboguiyanama cochtsenjuerzana. Chë nyetsca tescama yomna tsábe vida cochjashjache; chama Bëngbe Bëtsá tcmojanchembo y bëtscá entsàngbe delante tconjánayana tsábe soyënga Jesucristbiama, ndayiñe aca icošbuaché. <sup>13</sup> Y mora, Bëngbe Bëtsábe delante, nda endbama lempe ntšamo quem luarentše yobinýncá vida chaotsebmnama, y Jesucristbe delante, ntšamo cachabiama ndegombre bemncá Poncio Pilatbe delante lempe tojanayaná, chatbe delante cbontsemánda, <sup>14</sup> lempe cochjama ntšamo tcbonjauyancá, ndocna soye chacmondëntsashbe jamama, y cochtsiyena, ntšamo ndocná tondaye chaondëtsebmna jayanama aca bacna soye tcojama ca. Y chca cochtsama Bëngbe Utabná Jesucristo quem luaroye yochjésabëntscuana. <sup>15</sup> Y nýa chë soyama chë tempo chaojshjango ora, Bëngbe Bëtsá chca echanjínýanyie, er cha endmëna chë corente bendición bonná y chë nýe canýe Mandado. Cha nyetsca reyëngbiama, chë más uámana Rey, y nyetsca amëndayëngbiama, chë más uámana Utabná. <sup>16</sup> Nýe cha ndoñe bondmëna ndocna te ntjóbanana, y cha canýe bëts buashinýinýana luarentše endoyena y choye ndocná yondobena jobëconana. Cha ndocná tbonjinýe y ndocná yondobena jinýana. ¡Entšanga nyets chamotsinýanyná cha puerte bëtsá y obená bëtsemnana! Chca chaotsemna.

<sup>17</sup> Chë quem luarentša soyëngaca bomnënga imomnënga, cochjámëndaye enábotamnayënga ndoñe chamondëtsebmnama, ni lempe tsábá yochjóbcnana, bëtscá soyënga bëtsebmnama ndoñe chamondëtsobátmana, er chë tcbomna soyëngama ndoñe ntsótatsëmbuana ndayëntscóñama chca mochtsebmnama; pero aíñe, Bëngbe Bëtsábeñe jtsosbuáchiyëse, chënga chábeñe chamotsobátmana. Cha endmëna chë sempre bëtscá soyënga šnetsatšatnayá; y chca, cha jamana bënga chamotsobena nyetsca chë soyëngaca oyejuayënga jtsemnana. <sup>18</sup> Ntšamo tsábá yomncá chënga chamotsama, ba tsábe soyënga chamotsama, y siempre tsábe ainánaca chamotseprontana entsànga ba soyënga jatšatayama, y ndaye tmobomna soye entsàngaftaca jenájatayama. <sup>19</sup> Mo nda bëtscá shajuana tojtsábuajo y jtsatatsëmbuana yochtsebmna más chcoye jasama, cachcá, quem bomnënga ba tsábe soyënga tmojtsamëse, mochántsetatšëmbo chënga bëtscá tsábe bendicionënga más chcoye mochtsebmnama. Y chënga chë soyënga tmojtsamëse, chënga chë ndegombre vida, chë nyetsca tescama yomna tsábe vida mochanjëftsashjache.

*Inýe soye Timotéobioye tbojanbonýe*

<sup>20</sup> Timoteo, ndayá Bëngbe Bëtsá tcmojabonýecá, botamana cochtsinýena. Entšanga nýe quem luarentša soyëngama encuëntayana, ndoñe cattsuenana, ni chë ndoservena soyëngama jabuachana enatsëtsnayana, chë ndayama entsànga jtsichámuana becá osertánanentsana chca yóbocana ca, pero ndegombre chca ndoñe ntsemnana. <sup>21</sup> Atše chca sentsichamo, er báseftanga chca osertánana imobomna ca ichámënga, Jesucristbeñe ošbuáchiyana y chë bënga mondošbuaché soyënguñe ošbuáchiyana tmojtsajbaná.

Atše, Bëngbe Bëtsá sëntseimpadana, ácbeñe tsábe bendicionënga chaotsebmnama.

## 2 Timoteo

### *Jachuayama*

<sup>1</sup> Atše Pablo, Jesucristbe ichmoná sëndmëna, Bëngbe Bëtsá chca yobóseyeca. Jesucristo sönjichmó entsànga jábuayenama Bëngbe Bëtsabe šbuachenánama, ntšamo cha inétsamama entsànga chë nyëtsca tescama yomna tšabe vida chamotsebonnama; y chca vida montsebonna Cristo Jesúseftaca cánýiñe mo canýacá bétsemnayeca. <sup>2</sup> Atše quem tsbuanácha cbontsabobiamná, acbiamna Timoteo, aca mo atšbe bonshana uaquiñacá, Cristbeñe condobuachema. Atše sëntseimpadana, Bëngbe Bëtsá, Bëngbe Taitá, y Jesucristo, Bëngbe Utabná, chaboma ácebeñe tšabe bendicionënga chaotsemnana, chata ácbiye chacmolastemama, y acbe ainaniñe tšabe ebionana chacotsebonnama.

### *Ndoñe ntsëuatjana entšángbeñe Jesucristbiamna jóyebuambayama*

<sup>3</sup> Sempre Bëngbe Bëtsáftaca tsencuénta ora, acbiamna sëndbétseñojuabnaye, y acbiamna sëndbétatschuanaye bnété y ibeta; y Bëngbe Bëtsá endmëna nda atše sëndësverena, ainánaca jtsejuabnayëse y jtsetatšëmbëse, ntšamo atše stsamcá tšabá bétsemnana, cachcá ntšamo atšbe bëtš taitanga tmojanmca. <sup>4</sup> Atše sëndbëtéteñojuaboye ntšamo aca, chocana atše sëntanabo ora shëchbuiye tconjanoperdema, y chíyeca atše tša sëntseboše aca jtétinyama, atše puerte oyejuayá chaitsemnana. <sup>5</sup> Bëngbe Bëtsá acbiamna sëndbatschuaye, er atše sëndbátëñojuaboye aca Jesucristbeñe ndegombre ošbuáchiyana condbonnana. Natsana, acbe bëtš mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sëndétatšëmbo.

<sup>6</sup> Chíyeca sempre cochtsantješna quem uámana soyama: Mo nda canýe shinýañe tojt-sajunýinýnacá, chentše sempre chaotsoiñama, cachcá aca, chë Bëngbe Bëtsá tcmojatšétá obenana tšabe soyënga jamama, sempre cochtsinýena. Chë obenana aca conjanóyëngacñe, atšbe cucuatšënga acbe bestšašñe sënjanjajó y Bëngbe Bëtsá acbiamna sënjanimpadá ora. <sup>7</sup> Er Bëngbe Bëtsá tonjama bëngbe ainaniñe Uámana Espiritu chaotsemándama, uatjana ndoñe ntsebonnana, ndayá obenana bënga chaotsebonnana, bonshánana Bëngbe Bëtsabiamna y nyëtscangbiamna chamotsebonnana, y cabënga jenomándama chamotsobonnana. <sup>8</sup> Chíyeca, ndoñe cattšëuatja entsànga jáuyanama, ntšamo tcojinýe y cojtsetatšëmbcá Bëngbe Utabnabiamna ndegombre bétsemnana; ni atšbiamna ndoñe cattšëuatja, atše cárceloye sëndutámenama, chabiamna oserverna causa. Chamna, chë Bëngbe Bëtsá cmochanjátsetaye obenánaca, sempre cochtseprontana jasúfriama, átseftaca y inýengaftaca, entsànga tšabe noticiënga abuayinayeca causa. <sup>9</sup> Bëngbe Bëtsá endmëna nda bënga šojatsebacá, y šojáchembo jtšiyenama mo chábënga imomnëngcá jtsamëse. Y cha chca tojama, ndoñe nderado bënga ndaye tšabe soye tmojamama, ndayá cachá chca chaotsemnana inabóseyeca y bëngbe tšabiamna juabna bómnayeca. Cha chca inajuabnaye, cabá quem luare ndmëna orscana; y chca jamama Bëngbe Bëtsá inajuabnaye, chë ndayá Cristo Jesús bëngbiamna jamama sóyeca. <sup>10</sup> Y mora, Bëngbe Atsebacayá Jesucristo tojaboyeca, Bëngbe Bëtsá šojinýanýe cha bëngbe tšabiamna juabna yobonnana. Jesucristo tonjama, entsànga nyëtsca tescama obanënga ndoñe chamondétsemnana, y tonjama bënga chamotsetatšëmbuama, chë tšabe noticiënga chabiamna joudenëse y joyeyunayëse, bënga chë nyëtsca tescama yomna tšabe vida mochjábomnana, ndoñe nýe jopochócama cuerpënguñe.

<sup>11</sup> Bëngbe Bëtsá šojanábuayana tšabe noticiënga entsànga jábuayenama, Jesucristbe ichmoná jtsemnana y entsànga jabuátambama. <sup>12</sup> Chë causa, atše mora cárceloca quem soyënga séntsesufrina; pero chama atše ndoñe quetsátëuatja, er atše sëndétatšëmbo ndábeñe atše stsošbuáchemba, y corente sëndétatšëmbo cha yobena jtšinýenana ndayá šojabonýecá, chë ndayté cha yochjésabëntscuana.

<sup>13</sup> Nyëts tempo, chë ndegombre buayenánana, ndayá átsbentsana tconjanuencá, entsànga cochtsabuayinayeca, entsànga jtšinýanýnayëse aca Jesucristbeñe icošbuáchemba, y Bëngbe Bëtsá y nyëtscanga icuababuánýeshanama, y chca yomna aca Cristo Jesúseftaca cánýiñe mo canýacá bétsemnayeca. <sup>14</sup> Chë Uámana Espiritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonýecá sempre cochtsinýena.

<sup>15</sup> Ntšamo ya condétatšëmbcá, nyëtsca ošbuáchiyënga Asia luaroquënga cachcá šmonjesonýá, y chentše bontsemna Figelo y Hermógenes. <sup>16</sup> Pero Bëngbe Utabná Onesiforbe pamillanga chaotsalastemana, er cha ba soye šonjanañemó, y atše cárceloye utámenama cha ndoñe quenjatëuatja. <sup>17</sup> Masna, Romoye tojabánashjango ora, cha botamana šojánguango y šonjáninýena. <sup>18</sup> Bëngbe Utabná lastemado cháftaca chaotsemna, ntšamo nyëtscanga tmojamcá tšabá o ndoñe tšabá yontsemnana cha yochjayana ora. Aca corente condétatšëmbo ntsachetšá Onesiforo Efeso puebloca šonjanéjabuachama.

## 2

*Jesucristbiam canye tšabe soldado*

<sup>1</sup> Y aca, atšbe uaquiña, chë Cristo Jesús acbiam tšabe juabna yobomntšana, bëtsá aňemo ainaniñe cochtsebomna. <sup>2</sup> Ntšamo ba entšangbe delante šconjoyeunacá, cach buayenánana, boyabásenga nyétscañe tšabe palabra bomnënga cochjábaniyiye, y chamot-sobena inýenga cachcá jabuátambama.

<sup>3</sup> Aca, chë bënga fsëndbomna padecena soyëngama jasúfriama chacmojtsemna ora, Jesucristbe soyëngama entšanga abuayinyaye causa, ainaniñe bëts aňemo cochtsebomna, mo canye tšabe soldadca, cha chabe mándayabiam jasúfriana. <sup>4</sup> Ndocna soldado ntjatanana shjoca soyënguiñe vida jtsebomnama o crocénana juacánama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama. <sup>5</sup> Y canye travisiayá, inýenga jáyëñjanama, canye soye juacánama; pero ntšamo chë uacanána jocfiama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá. <sup>6</sup> Chë jajañe trabajayá derecho jtsebomnana chë natsaná jtsemnama, chë tmojatbaná sananguentšana ndayánaca jtsebomnama. Acaftaca cachcá echanjopása, chë trabajo tšabá chacojamëse. <sup>7</sup> Chë cbontsatsëtsnañe cochtsenójuabnaye, y Bëngbe Utabná echanjama lempe chacmósertama.

<sup>8</sup> Sempre cochtsenójuabnaye Jesucristbiam, ndabiam Bëngbe Bëtsá tojanma cháuatayenama y enjamna canya rey Davídbentšana entšá, ntšamo atše chabiam sëndabuayiná tšabe noticiënguiñe endmëncá. <sup>9</sup> Chca abuayinyaye causa, atše séntsesufrina, nya cadenëjuangácnaca utsbuaná, mo canye bëts bacna soye ochjajnayacá. Pero masque atše chca séntsemna, chë Bëngbe Bëtsabe soyëngama buayenánana inýenga entšangbiöyie montsabatambá. <sup>10</sup> Chíyeca atše nyétsca padecena soyëngaca sëndëtsóboyana, Bëngbe Bëtsabe bocacánëngbe tšabiam, chëngnaca atsebácanënga chamotsemnama, Cristbeñe jtsošbuáchiyëse; y Cristo Jesús bëtsëtsanga cháubiamama, y cháftaca nyétsca tescama chamotsiyenama.

<sup>11</sup> Mëntšá ndegombre endmëna:

Cristo Jesús tojanóbana ora, enjamna mo bëngnaca cuafjobancá, er bënga tmonsajbaná oyenana ntšamo tempo monjaniyencá y Jesucristbeñe montsošbuachë; y chca, bëngnaca cháftaca mochantsiyena;

<sup>12</sup> Bënga chë padecena soyëngaca tmojtseufrina ora, tmojtsemorochëse, bëngnaca Jesucristoftaca mochántsemandaye.

Bënga tmojayana, cha ndoñe monduabatma ca, as cha bëngbiámnaca cachcá echanjayana;

<sup>13</sup> Bënga chábeñe ndoñe tmontsošbuáchese, masque chca, cha cabá echanjama ntšamo tbojašebuachencá, er cha lempe jamana, ntšamo sempre iuetsemncá jtsinýanýnayëse.

*Canye trabajayá, ndáftaca Bëngbe Bëtsá jtsoyejuayana*

<sup>14</sup> Chë tcbonjayana soyëngama, cochjama chë entšanga chamotsenójuabnama, y Bëngbe Bëtsabe delante cochjábuyanaye chënga ndoñe yontsamna nye palabrënga jabuachana enatsëtsnayana; er chca, ndocna tšabe soye ntjamana, y chca tmojtseñatsëtsná ora, jamana chë soye ouenanënga más batšá chamotsošbuáchema, y jujabuáchana chëngbe tšabe juabnënga jtsondbiamama. <sup>15</sup> Lempe ntšamo icobencá cochtsama, aca chacotsemnama mo canye entšá ndabiam Bëngbe Bëtsá cháuyana nyétsca soyënguiñe tšabá amá yomna ca; aca chacotsemnama mo canye trabajayacá, nda tondaye tontsebomna ndayama jatëuatjama; y chacotsemnama chë ndegombre buayenánana corente tšabá buatëmbayá. <sup>16</sup> Entšanga nye quem luarentša soyëngama, ndoservena palabrënga tmojtseñcanta ora, chë soye ndoñe catsuenana; er chë soye jamana entšanga puerte inýetsá chamobocanama, ntšamo Bëngbe Bëtsá ndoñe yondmëncá, inýetsá jtsejuabnayëse y jtsamëse. <sup>17</sup> Chëngbe buatëmbana soyëngaca puerte bacá inýengbiöyie jáborlana, nya mo canye uabouana šocana chamotsebomnama cuafjamcá. Chca buatëmbayënguentše Himeneo y Fileto bontsemna. <sup>18</sup> Chata chë ndegombre benachentšana tbojtsojuánañe, y ibojtsichamo chë obanënga chámuatayenama Bëngbe Bëtsá ya catëñjama ca, y Jesús chaojésabo ora, nyétscanga chámuatayenama Bëngbe Bëtsá ndoñe yochanjama ca. Chë causa, chata bontsama básefta entšanga chë ntšamo Jesucristbeñe imojanošbuachecá, mora ya ndoñe chamondëtssošbuáchema. <sup>19</sup> Pero Bëngbe Bëtsabe ndegombre buayenánana nyéts tempo cachcá endesomñe, y ndocná quenátobena chë soye jatrócama. Chca endmëna mo chë ndëtsbenga ndayiñe canye bëts yebna tojebncá, ndayiñe mëntšá yojtšábemana: “Bëngbe Utabná endëubuatma chë chábénga imomnënga”, y “Nyétscanga chë Bëngbe Utabnábénga imomnënga ca tmojtšichámënga, chamuajbaná nyétsca bacna soyënga amana ca”.

<sup>20</sup> Canÿe uámana entšabe yebnentše, tsafjoca soyënga ndoñe nÿe castellano o midio soyënga ntsemnana, ndayá niñëse y fshantse soyëngnaca; chë natsana soyënga uámana tescama jtsebuájonana, pero chë inÿe soyëngna, nÿe nÿets tempo chauetsoservënama. <sup>21</sup> Chca endmëna chë Jesucristbeñe imojtsosbuachëngbeñe, ndoñe nÿetscanga tmontsajbaná bacna soyënga juabnayana y amana, ni chë chca tmojtsama entšángbentšana ndoñe tmontsojuaná. Pero, chca jtsojuánañama tojtsebošá, echántsemna canÿa Bëngbe Utabnabiama tšabe trabajayá; y chca, mo chë tsafjoca castellano y midio soyëngcá, canÿe uámana trabajuiñe echanjoservía, y cha sempre echántseprontana ndaye tšabe soye jamama.

<sup>22</sup> Chíyeca, ntšamo básefta bobontsënga bacna soyënga jamama mondbošcá, ndoñe cattsama; pero aínë cochtsiyena ntšamo Bëngbe Bëtsabe hominÿiñe tšabá yomncá jtsamëse, Jesucristbeñe puerte cochtsošbuáchiye, Bëngbe Bëtsá y inÿyenga cochtسابabuánÿeshana y nÿetscángaftaca natjëmbana cochtsoñe, chë chaújabuachama Bëngbe Utabná mondetsotšëmbuanëngaftaca cánÿiñe, ndocna bacna soye ainaniñe ntsebomncá. <sup>23</sup> Ndoservena soyëngama palabrénga y ndosertánentsana óbocana soyëngama ndoñe cattsuena; aca corente condëtatšëmbo chë soyënguentšana entšanga nÿe jabuachana enatsëtsnayeñe jabo-canana. <sup>24</sup> Pero chë Bëngbe Utabnabiama oservená ndoñe quebnátsmëna inÿyengaftaca jabuachana ntsenatsëtsnayana; chamna, cha bontsemna jtsababuánÿeshanëse nÿetscanga jtšëñyayana, jtsemnana tšabe बातëmbayá y inÿyengaftaca uantadá. <sup>25</sup> Cha bontsemna, chë chabe contra y chabe buayenánama contra imomnënga, chë ndegombre soyënga jabuatambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatšëmbuama; <sup>26</sup> chënga botamana chamuatsjuaboma, y Bëngbe Bëtsá, Satanase cucuatšënguentšana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canÿe uachmaniñcá.

### 3

#### *Ntšamo entšanga mochtsemna, Cristo jësbama chaojtsobeco ora*

<sup>1</sup> Pero aca cmontsemna jtsetatšëmbuana, Cristo jësbama tempo chaojtsobeco ora, entšanga echántsamna puerte padecena soyënguñe jtsiyenana. <sup>2</sup> Chca echántsemna, er entšanga, cada ona nÿe cachabe tšabiama echanjësenujuabnaye, crocëñana jtsebomnana tša mochtantseboše, mochtantsemna enábotamnayënga y inÿyengbiye mo nduamanëngcá mochtantsëñyaye. Bëngbe Bëtsabiama y inÿyengbiama bacá mochtantsöyebuambnaye, chëngbe bëtšëtsangbiye ndoñe quemochátayaunana, ni chëngbiama tšabe soyënga tmojtsamëngbiye quemochátacheuanaye, y Bëngbe Bëtsabiama y chabe soyëngama ndoñe respeto quemochátbomna, <sup>3</sup> ni cachëngbe pamílangbiye quemochátabuambnayeñeshana, mochtantseboše ndoñe natjëmbana jtsiyenama, uayátsenayënga mochtantsemna, cachënga jenomándama ndoñe quemochátobena, mo ainana ndbomnëngcá mochtantsemna, y nÿetsca tšabe soyënga uabotëñënga. <sup>4</sup> Chënga, uayayëngbe cucuatšëne entšanga ayentsbáshejuanënga mochtantsemna, mochtantsemna soyënga tondayama ntjatsrreparánëse, y cachënga uámana entšangcá mochtantsenobiambnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsoññama soyënga mochtantseboše. <sup>5</sup> Inÿyenga echantsinÿyana mo ndegombre Bëngbe Bëtsá adórayënga chënga cuaftsemncá, pero chë mochtantsama soyëngaca mochanjinÿanyaye, Bëngbe Bëtsá obená bëtsemnana chënga ndoñe mondošbuáchemo.

Nÿa tondayama chëngaftaca cattsencuëntaye. <sup>6</sup> Chënguentšë báseftanga mondëmna, y chëngna botamana palabréngaca yebnënguenache jamashjnana, y chenache, chë paselo yomna jáingñama shembásënga jtsaíngñayana, chëngbe बातëmbana soyënguñe chamotsošbuáchemo. Chë shembásënga bëtscá bacna soyënga tmojama, y chë causa ndoñe erant natjëmbana montsiyena, y ba ndoñe tšabe soyënga imojtsama nÿe cachënga tšabá jtsemnana, ntšamo tmojtsebošcá. <sup>7</sup> Chënga nÿets tempo nÿe ndaye tsëm soye jatóntšana jatatsjinÿyana, pero ndocna te ntjobenayana Bëngbe Bëtsabe ndegombre soyënga josértama. <sup>8</sup> Ntšamo Janes y Jambres Moisesbe contra ibojamncá, cachcá, chë inÿyenga jáingñama abuatambayënga nÿetsca ndegombre soyëngama contra jtsemnana. Chë entšanga chëngbe juabniñe nÿe bacna soyënga jtsebomnana, y Bëngbe Bëtsá chënga tojtsëbaté, chënga chë ndegombre soyënguñe ndoñe ntsošbuáchiyana causa. <sup>9</sup> Pero chënga ndoñe quemochatobenaye bëtscá entšanga jáyëñjanama, er nÿetsca entšanga mochanjátatšëmbona chënga nÿe bacna soyënga juabnayënga imomnana, mo chë Israeloca entšanga tmojantatšëmbonca Janes y Jambres nÿe chca juabnayata bëtsemnana.

#### *Inÿe soye Timotëobiye tbojanbonÿé*

<sup>10</sup> Pero acna, puerte tšabá condëtatšëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo inÿyengaftaca uantado tsmëna; ntšamo atše, Bëngbe Bëtsá y inÿyengbiye tsababuánÿeshana;

ntšamo atše, Běngbe Bětsábeñe jtsobátmaněse,<sup>11</sup> ínŷenga šmonjanacmena ora; y sěnjansufrina ora, padecena soyěnguiñe běts añemo tsjánbomna. Acnaca condětatsěmbo ntšamo atše chama Antioquía, Iconio y Listra běts pueblěngoca tsjansufrínama. Pero masque entšanga tša šmonjanacmena, atše lempe sějánauantana, Běngbe Bětsábeñe jtsobátmaněse, y cada ora, Běngbe Utabná chěngbentšana šonjanatsbocá.<sup>12</sup> Ndegombre endměna, nyetscanga chě Běngbe Bětsá jadórana soyěnga jtsaměse jtsiyenama bošěga, y Cristo Jesúseftaca cánŷiñe mo canŷacá imomněnga, puerte mochanjasúfria, chca bětsemnana, chěnga chamosufrina ínŷenga chamojtsama ora;<sup>13</sup> pero chě bacna entšanga y chě ínŷenga áingñayěnga, cada te más bacna entšanga mochántsemna, más bacna soyěnga jtsaměse; chěnga ínŷengbioye mochántseingñaye, pero cachěngnaca ingñěngnga mochántsemna.

<sup>14</sup> Pero aca, nyets tempo cochtsejuabnaye y cochtsama lempe ntšamo tcojuatsjinyěca, chě ndegombre soyěngcá cojtsosbuácheñe, er aca tsábá conděubuatma chě tmojanbuatěmbanga;<sup>15</sup> y aca, cabá básetema conjamna orscana, chě Běngbe Bětsabe uabemana palabréngama condětatsěmbo, chě ndaye sóyeca aca contsobena juatsjinyěna, Běngbe Bětsá chacmatsbocama, Cristo Jesúseñe jtsosbuáchiyěse.<sup>16</sup> Běngbe Bětsá, Uámama Espiritbeyeca tonjama, lempe ntšamo Běngbe Bětsabe uabemana palabrénguiñe yobinŷncá entšanga chamuábemama. Chě uabemana palabra endoservena, běngbioye chě ndegombre soyěnga jabuátambama; nderado ndaye soye ndoñe tsábá tmonjamama běnga chamotsetatsěmbuama, jímŷanyiyama ntšamo más tsábá chě soyěnga muanjobenaye jamama; y běngbioye jabuátambama ntšamo jtsiyenama chě Běngbe Bětsabe bominŷiñe tsábá yomna soyěnga jtsaměse;<sup>17</sup> chca, canŷe entšá Běngbe Bětsabiamama oservená y obená chaotsemnana, tsábá chaotsetatsěmbo y sempre chaotseprontana nyetsca tsabe soyěnga jtsamama.

#### 4

<sup>1</sup> Běngbe Bětsabe delante y Cristo Jesús, nda echanjabo mo reycá jabomándama y jabáyana chě ainěngbiamama y chě ya mochjóbáněngbiamama, ntšamo chěngbe viděnguiñe tmojtěsemcá tsábá o ndoñe tsábá bětsemnana, chatbe delante cbomandá,<sup>2</sup> Běngbe Bětsabe palabra entšanga chacoatsabuayinyayama; sempre chca jamama cochtseprontana, masque entšanga aiñe o ndoñe jouenama tmojtsebošěse. Cochjama, ínŷenga bacna soyěnga tmojtsamama chamotsetatsěmbo, chca tmojtsamama cochjucácana y cochjábuaenaye ndayá jamama yojtsammana. Sempre chca cochtsabuátambaye, chca ora puerte uantado jtemněse.<sup>3</sup> Chca cochtsama, er canŷe tempo echanjoshjango y chora entšanga chě ndegombre buatěmbana soye ndoñe quemochátuenana; chamna, nŷe chě último tsēm soyěnga jtsetatsěmbuama boše causa, ba abuátambayěnga mochanjuánguango, y chěnga mochántsicamo soyěnga nŷe ntšamo cach entšanga jouenama tmojtsebošcá.<sup>4</sup> Chěnga chě ndegombre soyěnga ndoñe quemochátuenana, y nŷe ndaye cuentěnga mochántseyeunana.<sup>5</sup> Pero aca, sempre botamana cochtsejuabnaye; chě padecena soyěngama chacojtsesufrina ora, añemo cochtsebomna; chě Jesucristbiamama tsabe noticiěnga entšanga abuayinyayabe trabajo cochtsama; y nŷa cochtsentšena ndayá Běngbe Bětsá tmojabonyěcá tsábá jtsamama.

<sup>6</sup> Er mo Běngbe Bětsábioye jětschuayama, canŷe bayá obanáftaca tcojabuešcja vínoye jt-sopochocancá, cachcá atšbe vídnaca ya jopochócama entsemna. Atše jóbanaama běcoñe entsemna; chanjóbana ora echántsemna Běngbe Bětsá oyejuayá chaotsemnana.<sup>7</sup> Cristo Jesúse soyěngama corente sějnenojuerzá. Mo canŷe travisiayacá, chě jashjanguama yomna luaroye ya tojashjangcá, átsnaca ya, ntšamo Běngbe Bětsá yobošcá atše jtsaměse, atšbe trabajo ya tijapochocá. Atše nyets tempo Jesucristbeñe sěndošbuaché.<sup>8</sup> Chcasna, atšbiamama canŷe uacanana soye echántsemna, er Běngbe Bětsá tojama atše chabe bominŷiñe tsabia chaitsemnana. Běngbe Utabná endměna chě ndegombre tsábá ichamuá entšanga aiñe o ndoñe tsábá tmonjamama, y cha chě uacanana soye šochántšetaye, entšanga ntšamo tmojamama cha chaojabáyana ora. Pero cha nŷe atše ndoñe chě uacanana soye quešochtětátšetaye, ndayá nyetscángbioye chca, nděmuanŷyenga puerte imoboše cha cachíñe cháuesabama, cha imobobonshánayeca.

#### *Inŷe soyěnga Timoteobiamama*

<sup>9</sup> Lempe ntšamo tcojobenacá cochjama betscó jabama atše jabínŷyama;<sup>10</sup> er Demas, cha yapa nŷe quem laurentša entšangbe soyěnga bošá enjamna, cha cachcá šonjesonŷá y Tesalónica puebloye tojtsoñe. Crescente Galicia luaroye tonjá y Tito Dalmacia luaroye.<sup>11</sup> Nŷe Lucas, chě šmonjanájabuachaněnguentšana, mora átseftaca entsemna. Marcos cochjatsenguango y ácaftaca cochjěftbetše, er cha atšbe trabajuama puerte oservená endměna.<sup>12</sup> Tíquico, Efesoye sějnichmó.<sup>13</sup> Chacojabo ora, uabonjanía šcochjesacñe, atše Troas běts puebloca, Carpbe yebnoca tijěsaboshjona; chě librěšangánaca, pero chě uámama uabemana tsbuanachangá ndoñe chacmonděsebnatjěmba.

<sup>14</sup> Alejandro, chë cobre soyënga pormayá, puerte bacá ñonjaborlá. Bëngbe Utabná bochanjacastíga, ntšamo atše ñojaborlama. <sup>15</sup> Chabíama cuedado cochtsebmna; cha tojobenase ntšámnaca cmatjabórla, er cha chë bënga mondabuayiyná soyëngama contra entsemna.

<sup>16</sup> Chë natsana soyama, mándayëngbe delante ñonjanotocá jenëuyanama ora, atše ndocná chešnátanajabuache; nyetscanga cachcá ñmonjésonyaye. Pero atše sentsobátmana, Bëngbe Bëtsá chama chënga chaotsaperdoná. <sup>17</sup> Pero Bëngbe Utabná aíñe ñonjanájabuache y tonjanma atše bëts añemo jtsebomnama, y chcase, atše sënjanobená Jesucristbíama nyetsca chabe tšabe noticiënga entšanga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canye uabouana resjuentsana ñonjanatsbocá, mo canye león jtsosañámentšana ndábioye cuafjatsbocacá, <sup>18</sup> y Bëngbe Utabná ñochanjatsbocá, bacna soye ndocná chañondëborlama; y sempre jtsinýenëse, celoye, chë ndayentše cha yománda luaroye ñochanjebetše. ¡Nyetscanga nyetsca tescama cha chamotsatschuaná! Chca chaotsemna.

*Pablo Timotéobioye jadiósoftanama*

<sup>19</sup> Atšbe cuenta cochjácheuaye Prisca y Aquila, y Onesíforbe pamílnaca. <sup>20</sup> Erasto, Corinto pueblaca tontsoquedañe, y Trófimo Mileto pueblaca ñocá sënjëftsebhona. <sup>21</sup> Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nyetscanga muentše Jesucristbeñe oñbuáchiyënga.

<sup>22</sup> Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngangbeñe tšabe bendicionënga chaotsemnama chaoma.

## Tito

### *Jachuayama*

<sup>1</sup> Atše Pablo, Bèngbe Bètsabe oservená sèndmèna y Jesucristbe ichmoná entsànga jábuayenama, chë Bèngbe Bètsá chabe entsànga chamotsemnama tojábacacanga, Jesucristbeñe chamotsošbuáchema y chë ndegombre soyèngama chamotsetatšëmbuama; chë soyènga endmèna ntšamo bènga, Bèngbe Bètsabe básenga bétsemnama, mondoyena jtsamése. <sup>2</sup> Lempe chca sèndama, er Bèngbe Bètsábeñe jtsošbuáchiyése, atše sèntsobátmana chë nyetsca tescama yomna tšabe vida jtsebomnana. Bèngbe Bètsá, chë ndocna te obosterayá, quem luare cabá ndmèna orscana tojanašebuachená entsànga chca vida jtsebomnana; <sup>3</sup> y nya chama tempo tojóshjango ora, chë entsànga jábuayenama, soyèngaca Bèngbe Bètsá chabe palabra šojinjanýé, ndayá Jesucristo entsàngbiana yochjanmama; y chca jábuayenama atše palabra šmonjabonýé, Bèngbe Bètsá, Bèngbe Bètsá, atšebacayabe mándoca. <sup>4</sup> Tito, quem tsbuanácha cbontsabobiamná. Atše Jesucristbe soyèngama entsànga sènjnanabuayiná ora, aca chábeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquifacá condmèna. Atše sèntseimpadana, Bèngbe Bètsá Bèngbe Taitá y Jesucristo Bèngbe Atšebacayá, ábeñe tšabe bendicionènga chaotsemnana chata chaboma, y chaboma aca ainaniñe tšabe ebionana chacotsebomnana.

### *Titbe trabajo Creta luaroca*

<sup>5</sup> Atše Creta luaroca tcbonjétsanboshjona, ntšamo chentše jamama enjetsashbencá chacomama, y nyetsca pueblènguenache chë ošbuachiyèngcá enefjuanèngbeñe bètsèjemèngcá amèndayènga jtsemnana chacubuáyanama, ntšamo tcbonjafsemnadacá. <sup>6</sup> Canya bètsèjémama uabuayaná mèntšá bontsemna: chaotsiyena ntšamo chabiana ndocná chaondètsichamo ndoñe tšabá yontsama ca; nye canye shembásabe boyá; chabe básengna, Jesucristbeñe ošbuáchiyènga chamotsemna, y chamotsiyena, ntšamo ndocná chaodayana chènga nye jenomándama ntsobencá y nye ntšamo tmojtsebošcá imojtsiyena ca, o chènga chèngbe bètsètsanga o mándayènga ndoñe montsayanana ca. <sup>7</sup> Er canyèntše ošbuachiyèngcá enefjuanèngbe mandayá, Bèngbe Bètsabe trabajo jamama tmojabonýéyeca, cha bontsemna jtsiyenana, ntšamo ndocná chaodayana cha ndoñe tšabá yontsama ca; ntjajuaboycá, nye ntšamo cha tojtsebošcá ndoñe chaondètsama; ndoñe chaondètsiyena nye rábiaca jtsemnana; ndoñe chaondètsètmó; penzentsero ndoñe chaondètsèmnana; y ndoñe chaondètsèboše nye paselo becá crocénana jtsebomnana. <sup>8</sup> Pero chabe yebnentše posada entsànga júyèntšamiama sempre chaotseprontana, tšabe soyènga chaotsebinýnana sempre chaotseñsena, botamana juabnayá chaotsemna, ntšamo Bèngbe Bètsabe bominýiñe tšabá yomncá chaotsiyena, nyets tempo Bèngbe Bètsábioye chabotsadorana, y cachá nyetsca soyènguñe jenomándama chaotsobena. <sup>9</sup> Cha bontsemna nyets tempo jtsošbuáchiyana y jtsobedecénana chë ndegombre buayenana soye, ntšamo tmojabuatèmbacá, chca, chë ndegombre buuatèmbana soyèngaca inýènga añemo chaotsatšatnana, y chë soyama contra tmojtsebnènga jáyèñjanama, ndoñe tšabá montsamama.

<sup>10</sup> Cha chca bontsemna, banga nye ndèmandánènga jtsiyenama bošènga mondmèna causa, y chènga mondmèna, nye ndaye ndoservena soyèngama yapa oyebuambnayènga y inýènga áingñayènga, y chcanga más mondmèna chë nyetsca ošbuáchiyènga base bobachtèma chë más delicadentše tètsenènga jtsemnana yojtšamna ca mondbètsichamènguentše. <sup>11</sup> Y entseyta chèngbioye jtayáchetana, er chènga jamana ba pamillanguentše nyetscanga Jesucristbeñe ošbuáchiyana chamotsajbanama. Chènga chca mondbètsama, chë ndoñe yontsamna jtsabuátambayama soyènga jtsabuátambayése, nye paselo crocénana jongánama.

<sup>12</sup> Enjamna canya, ndabiana entsànga jtsichámuana cach Creta luarentša diosèngbiana oyebuambnayá canjamna ca, y cha cachabe luarentša oyenèngbiana mèntšá tonjánayana: “Creta luarentše oyenènga, nyets tempo bosterènga mondmèna, ainana ndbomnènga y oyèñjayènga nye becá jasama bošènga ca.” <sup>13</sup> Y chca ndegombre cha tonjánayana; chiyeca chènga jabuache cochjucácana, chca, chènga Jesucristbeñe chamotsošbuáchema y chamotsobedecena chë buuatèmbana soyènga, chë ndayiñe bènga mondošbuaché; <sup>14</sup> y cach judièngbe cuentènga ndoñe chamondètsuenana, ni chë ndegombre soyènga uabotenèngbe mandènga.

<sup>15</sup> Chë ainaniñe bacna juabnènga ndbomnènga y chca juabnèngaca ndèmandánènga, nyetsca soyèngama jtsejuabnayana mo ndegombre tšabe soyènga cuaftsemncá; pero chë bacna soyèngaca mandánènga y Jesucristbeñe ndošbuáchiyènga, nye ndayámnaca jtsejuabnayana mo bacna soye cuaftsemncá. Chca entsemna, er chèngbe juabnoca nye ena bacna soyènga jésebomnana, y ndaye bacna soye tmojama ora, chèngbe ainaniñe juabnènga ndoñe ntsebomnana, bacna soye tmojamama chaúyanama. <sup>16</sup> Chènga jtsichámuana Bèngbe Bètsá

imuábuatma ca, pero ntšamo tmojtsama soyëngaca jtsinÿinÿayana chca ndoñe ndegombre yondmënama. Chënga Bëngbe Bëtsabe hominÿiñe puerte bacna entsangá mondmëna, y ntšamo cha tomandacá ndoñe ntsamana; chë causa chënga ndoñe ntsoberenana ndaye tšabe soye jamama.

## 2

*Soyënga ntšamo chë ndegombre buatëmbánana endmëncá*

<sup>1</sup> Ntšamo chacojtsoyebuambnacá sempre chaotsemna ntšamo chë ndegombre buatëmbánana endmëncá. <sup>2</sup> Cochjayana chë bëtsëjëmëngna chamotsemna cachënga nÿetsca soyënguifne jenomándama obenënga, nÿetscangbiamá mo uámana entsangá utabnënga, ntšamo jtsiyenama tšabá juabnayënga, nÿets tempo chë ndegombre soyënguifne chamotsošbuachë, Bëngbe Bëtsá y nÿetscanga chamotsababuánÿeshana, y padecena soyënguifne puerte uantadënga chamotsemna.

<sup>3</sup> Cachcá, chë bëtsanana shembásënga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoýënga. Entsamna chamotsiyena tšabe soyënga jtsamëse; <sup>4</sup> chë tobiasënga chacojtsinÿanÿná y chamotsabuatambá ntšamo chëngbe boyanga y básënga jtsababuánÿeshanana, <sup>5</sup> ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentšënanana, nÿetscángaftaca tšabënga jtsemnana, cachëngbe boyángbioye jtsayaunanana, chca, ndocná chaondëtsobera Bëngbe Bëtsabe palabrama bacá jatöyebuambnayana, ntšamo chë tobiasënga tmojamama.

<sup>6</sup> Cachcá, chë bobontsënga añemo cochtsatsatnaye cachënga jenomándama chamotsobenama, <sup>7</sup> y chënga cochjínÿanÿiye ntšamo yomna jtsiyenana, cach aca nÿetsca soyënguifne tšabá jtsamëse. Chca chacojtsabuatambá ora, nÿe chë ndegombre buayenánana cochtsabuátambaye y corente respétoca chca cochtsama, <sup>8</sup> chë ndegombre soyënga jtsöyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotsëuatja, er ndocna bacna soye quemochatobenaye bëngbiamá jayanama.

<sup>9</sup> Chë nÿets tempo nÿe inÿabiamá oservënënga cochjábuayenaye, chëngbe nduiñëngbioye chamotsobedecënana, soyënga chamotsama chënga chamotsóyejuama, y yajuatsanënga ndoñe chamondëtsemnana. <sup>10</sup> Ndoñe chamondëtsatbëbana, pero aifne nÿetscañe tšabe palabra homnënga chamotsemna. Chënga chca entsamna, chca, inÿënga chámuiñe y chamojuabó tša botamana chë buatëmbana soyënga, Bëngbe Bëtsá bëngbe Atsebacayabiamá yomna ca.

<sup>11</sup> Er Bëngbe Bëtsá bënga šonjinÿanÿé cha bëngbe tšabiamá juabnënga yobomnana, y chca, cha tojama nÿetsca entsangá chamotsobena atsebácánënga jtsemnana. <sup>12</sup> Chë Bëngbe Bëtsabe juabna bëngbe tšabiamá, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámna šontsabuatambá, cabënga jenomándama jtsobenëse, ntšamo Bëngbe Bëtsabe hominÿiñe tšabá yomncá y cha jadórama soyënga jtsamëse. <sup>13</sup> Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnana te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora. <sup>14</sup> Cha chabe derecho vida jtsobomñama cachcá tojanonÿá y bëngbiamá tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentšana bënga jätsebacama, ainaniñe ndocna bacna soye ndbomnënga jábiamama, bënga chábënga chamotsemnana, sempre prontánënga ntšamo tšabá yomncá jtsamama.

<sup>15</sup> Chca cmontsemna jtsabuátambayana, chënga becá añemo jtsatsatnayëse, y jtsinÿanÿayëse chënga bacna soye tmojamama, chë nÿets condbomna mándoca jucacánëse. Ndoñe catjalesëncia ndocná chaondayana aca mando ndoñe condbomna ca.

## 3

*Ndayá Jesucristbeñe ošbuachiyënga yojsamna jamana*

<sup>1</sup> Cochtsama chënga chamuatenójuaboma chë mandadënga y inÿe mándayënga chamotsayaunanama, chamotsobedecënana, y tšabá yomncá jamama sempre chamotseprontánama. <sup>2</sup> Ndocnabiamá ndocna bacna soye chamondëtsoyebuambná, penzenterënga ndoñe chamondëtsemna, ndayá nÿetscángaftaca natjëmbana jtsiyenama bošënga, tšabá mándbomnënga, nÿetscanga tšabe ainánaca imojtsénÿyama entsangá jtsinÿanÿayëse.

<sup>3</sup> Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjatanama, ingñëñënga y mandánënga monjamna nÿetsca



bacna soyënga jamama juabnëngaca y nÿe quem luarentşe tşabá jtsemnana juabnëngaca. Bënga monjaniyena nÿe bacna soyënguife juabnaye, ínÿenga uantşaboşe. Inÿenga bënga şonjanëbuayënja y bënga nÿetscanga monjanenáboyënja. <sup>4</sup> Pero Bëngbe Bëtsá, bëngbe Atsebacayá, bëngbe tşabiama juabna yobómnyeca y tşa şuababuánÿeshanama şonjaninÿanyé ora, <sup>5</sup> cha şonjanatsebacá, pero ndoñe nderado bënga ndaye tşabe soye tmojanmama, ndayá cha bëngbiana tbojanongméyeca. Cha şonjanatsebacá, bëngbe bacna soyënga jabua-juánase, y chë Uámana Espiritu jujabuáchëse, bënga mo tsmëma entşangcá chamotsemnana, ntşamo tempo yojamncá ntjatsjuabnaycá y ntjatamcá. <sup>6</sup> Bëngbe Atsebacayá Jesucristbeyeca, Bëngbe Bëtsá tojanma Uámana Espiritu bëngbe ainaniñe nÿets tempo chaotsemándama y bënga chaşotsëjabuachanama, <sup>7</sup> chca bënga, Bëngbe Bëtsá bacna soyëngama şojaperdónanga y bëngbe tşabiama juabna bómnyeca tojayana chabe bominiñe tşábenga imomnënga, chamotsobena cha yobomna soyënguentşana bënga mo ndayá cuaftşëtocancá jóyëngacñama, y chca, chábeñe jtsoşbuáchiyëse, chë nÿetsca tescama yomna tşabe vida chamotsobátmanama.

<sup>8</sup> Chca, lempe ntşamo tijayancá nÿa ndegombre endmëna, y atşe sëntseboşe chë soyëngama bëtscá chacotsabuatambá, chca, chë Bëngbe Bëtsábeñe tmoşbuachenga chamot-sentşena chë tşabe soyënga jtsamama. Chë buatëmbánana puerte tşabá endmëna y nÿetscangbiana bëtscá endoservena. <sup>9</sup> Inÿenga nÿe ndoservena soyëngama jabuachana tmojtseñatsësná ora, y anteungbe cuentëngama chamojtsoyebuambná ora, ndoñe cattson-tremetena; ndoñe cattsama cach tşëngaftanga ndoñe tşabá jtseñeyeanamcá, y judiëngbe leyëngama ndoñe ínÿëngaftaca cattsenpéliaye. Chca jtsamana tondayama ntsoservëna, y nÿe bonamente chca jtsamana.

<sup>10</sup> Nderado nda tojtsama entşanga ndoñe cachcá nÿetscanga chamondëtsejuabnama y chamotsenpéliama, canÿe o uta soye cochjabuayená ndoñe tşabá tonjamama; pero cha ndoñe tmonjóyeyenase, chentşana cháftaca ndoñe más cattsóyebuambnaye. <sup>11</sup> Chca cochjama, er aca cochanjátatşëmbona canÿa chca tojtsemná, chabe juabna tojatrocá bacna soyënga jtsejuabnayama. Chë soye y chë inÿe bacna soyënga ntşamo cha tojtşamcá, jtsinÿanyñayana cha ibojtsemna castiganá chama jtsemnana.

#### *Inÿe soyënga Titbiama*

<sup>12</sup> Atşe, Artemas o Tíquico ácbioye chaijichmó y choca chaojášhango ora, ndayánaca cochjama Nicópolis puebloye aca jama atşe jinÿama, er atşe sënjajuabó chentşe chë uaftenëntscuana jëftsemnana. <sup>13</sup> Lempe ntşamo chacojobenacá, cochjuájabuache chë ínÿenga obuauyayá Zenas, y Apólosnaca; lempe ntşamo chata ibojtsëjabotcá cochjátataye, ínÿoye jama jatóntşama chamobenama y benachëjana tondaye chaondëtşabuáshebenama. <sup>14</sup> Atşe sëntseboşe, bëngbe entşanga, chë bëngcá Jesucristbeñe oşbuáchiyënga, chamotsentşena chë tşabe soyënga jtsamama y chë puerte ujabótënga jtşëjabuáchanama, chca, chënga tondayama ndoservena vidënga ndoñe chamondëtsebonnama.

#### *Pablo Títbloye jadiósoftanama*

<sup>15</sup> Nÿetscanga chë átşeftaca montsemnëngnaca cmontsechuaná. Atşbe cuenta cochjácheuaye nÿetscanga chë bënga imuababuanÿeshanëngbloye, cach bëngcá Jesucristbeñe oşbuáchiyana bómnyeca. Atşe, Bëngbe Bëtsá sëntseimpadana, cha chaoma ábeñe tşabe bendicionënga chaotsemnana.

## Filemón

### *Jachuayama*

<sup>1</sup> Atše Pablo, mora utamená Cristo Jesusbiam a oservena causa, quem tsbuanácha séntsabianná, Jesucristbeyeca bēngbe catšata Timotéoftaca, acbiama Filemón, bēngbe bonshaná y nda bēngaftaca condētrabája Jesucristo jasérviam. <sup>2</sup> Atše séntsacheuaná, Jesucristbeyeca bēngbe uabena Apia y Arquípnaca, nda bēngaftaca cánýiñe Jesucristbe soyēngama endenojuerzana; y nýetsca ošbuachiyēgnaca, ndēmuanýenga imuamana acbe yebnentše jénefnama Bēngbe Bētsá jētschuayama. <sup>3</sup> Atše séntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tšabe bendicionēnga tšēngaftangbēne chaotsemnama, y chaboma tšēngaftangbe ainaniñe tšabe ebionana chašmotsebonnama.

### *Filemonbe bonshánana y ošbuáchiyana*

<sup>4</sup> Bēngbe Bētsáftaca stsencuēnta ora, acbiama sēndbētsenojuabnaye, y sempre acbiama Bēngbe Bētsá sēndbētsatschuanaye, <sup>5</sup> er atše sēnjátatšēmbona ntšamo aca nýetsca chē Bēngbe Bētsábenga imomnēnga icuababuánýeshanama, y ntšamo aca Bēngbe Utabná Jesúbeñe tša icošbuáchema. <sup>6</sup> Bēnga, Jesucristbeñe ošbuachiyēnga quetsomñecá, ácaftaca mo canýacá fsēndmēna. Chca endmēnayeca atše Bēngbe Bētsá séntseimpadana, tšēngaftanga chašmobená más botamana josértana nýetsca chē Bēngbe Bētsábocana tmojóýēngacñe tšabe bendicionēnga, bēnga Cristo Jesúseftaca cánýiñe mo canýacá bētsemnayeca. <sup>7</sup> Jesucristbeyeca atše bonshana catšata, aca chē Jesucristbeñe ošbuachiyēnga tša condábabuanýeshanama, atše corente oyejuayá séntsemna y bēts añemo séntsebonna. Y aca tcojama, nýetscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondētsemnama, chēnga jujabuáchēse.

### *Pablo, Filemónbiyoe Onésimbiam tbojanimpadá*

<sup>8</sup> Y chca, atše Cristbe ichmoná quetsomñecá séntsobena, aca nýe jamándana ntšamo yomncá chacotsamama, pero atše chca ndoñe quichatsma. <sup>9</sup> Y cbondbobonshánayeca, chca játamanna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiam a oservena causa, <sup>10</sup> canýe ruego cbochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyina. Cha Cristbeñe tonjanošbuachéyeca, cha mo atše uaquinacá tonjanóbema.

<sup>11</sup> Tempo, cha ácbiye tondayama quecmēnjátanservena, pero mora cha becá entsámama, acbiama y atšbiam. <sup>12</sup> Mora ácbiye séntsatichamná, y atše sempre chabiam sēndbētsenojuabnaye y sēndbobonshana. <sup>13</sup> Atšbiam puerte tšabá manmēna cha átseftaca matēñoquedase, acbe cuenta atše chašoservema, cárceloye utamená séntsemnēntscuana, chē tšabe noticiēnga entšanga abuayiyenaye causa. <sup>14</sup> Pero atše ndoñe chiyatsma cha chaoquedama atše chašujábuachama, er atše ndoñe quetsátsoše aca obligaciōnaca chaotsebonnama, atše juajabuáchama ndayánaca chacomama; y séntseboše aca ndayánaca chacoma, cach aca chca jamama puerte tcojtsebošēse. Chcasna, tondaye quichatsma, chē soye chca chaotsebonnama aca cabá ndocá ntjayancá. <sup>15</sup> Atše séntsejuabná nderado Onésimo ácbentšana básefta tescama tojanoluaré, mora ácaftaca nýets tempo jtsatsmēnaca ca, <sup>16</sup> y ndoñe nýe acbiama mo nýets tempo canýe oservenacá, ndayá chama más uamanacá, mo Jesucristbeyeca canýe bonshana catšatcá. Atše puerte Onésimo sēndbobonshana, y acna cmontsemna más cha jtsebobonshánana, er cha mora ndoñe quenátsmēna canýa nýe acbiama nýets tempo oservená, ndayá Bēngbe Utabnábeyeca canýe catšata, ntšamo cach aca condmēncá.

<sup>17</sup> Chca, aca atšbiam condējuabná mo ácaftaca cánýiñe Bēngbe Utabnabiam trabajayacá; chíyecna cmontsemna cha jtōfjana, mo atše šcojofjá. <sup>18</sup> Nderado ntšamo cha tmojanborlá o ndayánaca tcomdebena, atše chama chochjētséntšabuachiye. <sup>19</sup> Atše Pablo, cach atšbe cucuátšeca quem soye séntsabianná. Atše chama cbochanjētséntšabuachiye. Ndegombre, ndoñe quenátšiyta atše chacbēyana becá scondebena ca, ntšamo atšbocaná jtsemnama atše tbojánbuayenama. <sup>20</sup> Chcasna, Jesucristbeyeca atšbe catšata, Bēngbe Utabnáftaca cánýiñe mo canýacá quetsomñecá, Diosmanda chē pavor šcochtsebema. Diosmanda cochjama atšbe ainana ngmēnaca ndoñe chaondētsemnama.

<sup>21</sup> Atše chca cbontsabobiamná, er atše tšabá sēndétatšēmbo, ntšamo cbontseimpadancá cochjamama, y cabá más chama cochjatsmama. <sup>22</sup> Y mora inýe soye, Diosmanda posada šcochjaboprōnta, atše jányama chajábocna orscama, er atše puerte jtsošbuachiyēse Bēngbe Bētsábeñe sēndobátmana, cha tšēngaftangbiam yochjama lempe ntšamo atšbiam chašmojtjañcá, y chca, cha sochjalesēncia atše tšēngaftangbiyoe jésama.

*Pablo Filemónbiyoye jadiósoftanama*

<sup>23</sup> Epafras, muentše átšeftaca cárceloye utamená, Cristo Jesusbiama entšanga abuyayinaye causa, chánaca cmontsechuaná. <sup>24</sup> Y Marcos, Aristarco, Demas y Lucas, chë bëngaftaca mondëtrabájanga Cristo jasérviamá, chëngnaca cmontsechuaná.

<sup>25</sup> Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnana.

## Hebreos

*Bèngbe Bètsá bèngaftaca tojoyebuambá, chabe Uaquiñáftaca*

<sup>1</sup> Tempo, Bèngbe Bètsá ba soye y ba soyèngaca bèngbe bèts taitángbioye tojanéyana, chë chabe juabna oyebuambnayèngaftaca. <sup>2</sup> Pero quem tempo bèngaftaca tojoyebuambá, chabe Uaquiñá jíchmuase, bèngbíoie cha chaśúyanama. Bèngbe Bètsá tojama, lempe ntšamo chabe soye yomncá, chabe Uaquiñabiama chaotsemnana, y chábeyeca Bèngbe Bètsá quem luare y nyetsca inye luarènga tojama. <sup>3</sup> Cha endinýanýná Bèngbe Bètsabe corente buash-inýinýanana y uámanana, y cha endmèna cach Bèngbe Bètsacá, y chábeñe bènga mondobena jinýama ntšamo Bèngbe Bètsá yomncá. Chabe bèts obenánaca endútabna lempe ntšamo quem luarentše yobinýncá; cha tojayana y chca jtsemnana. Cha tojanóbana bèngbe bacna soyènga jabuajuánama, y chentsana Bèngbe Bètsá tojaninýanýé cha puerte bètsá y uamaná bètsemnana, celoca játbemèse, Bèngbe Bètsabe catšbioica, nyetscanga jtsaméndayama.

*Bèngbe Bètsabe Uaquiñá chë angelèngbiama más bètsá yomna*

<sup>4</sup> Y chca, Bèngbe Bètsá tbojánbema chë angelèngbiama más uamaná y obená, er Bèngbe Bètsá tbojanbuajó canýe más uámana uabaina y chë angelèngbiama canýe más uámana trabajo tbojanbonýé. <sup>5</sup> Ndegombre chca endmèna, er Bèngbe Bètsá ndocna te ndocna ángelbioie mèntšá tbonjaniyana, ntšamo chabe Uaquiñábioie tbojanianýncá:

Aca atšbe Uaquiñá condmèna.

Ménté entšanga sènjinýanýé aca atšbe Uaquiñá comnana ca.

Ni ndocna angelbiama mèntšá tojánayana, ntšamo chabe Uaquiñabiama tojanianýncá:

Atše canýe taitá chabiama chántsemna,

y cha canýe Uaquiñá atšbiama ca.

<sup>6</sup> Quem Bèngbe Bètsabe Uaquiñá endmèna nyetscangbiama más uamaná. Chca Bèngbe Bètsá tojánayana, chabe natsana Uaquiñá quem luaroye cháuashjanguama cha tojanma ora:

Bèngbe Bètsabe nyetsca angelènga cha chamotsatschuaná ca.

<sup>7</sup> Y chabe angelèngbiama, mèntšá tojánayana:

Atše sèndama atšbe angelènga, chë atšbe buayiynayènga, mo binýièngcá chamotsemnana, y chènga, atšbe oservénènga, mo inñèngcá ca.

<sup>8</sup> Pero chabe Uaquiñabiama Bèngbe Bètsá tojánayana:

Utabná, acbe améndayana nyetsca tescama echántsemna,

y aca nyetsca soyènguifé condbètsemmandaye, ntšamo tšabá yomncá jtsamèse.

<sup>9</sup> Aca icontšena ntšamo tšabá yomncá nyetsca soyènguifé jtsamama, y sempre chca jtsamama tša icoboše,

pero nýa tondayama cmondogustana bacna soyènga jtsamana, chë ndayá Bèngbe Bètsá ndoñe yondboše soye;

chíyeca Bèngbe Bètsá tcmojabocacá,

y tojama aca puerte oyejuayá chacotsemnana,

chë inýengbiama más oyejuayá ca —Bèngbe Bètsá tojánayana.

<sup>10</sup> Bèngbe Bètsá mèntšánaca chabiama tojánayana:

Utabná, quem luare jobojátšama ora, aca quem luare tconjanma,

y lempe chë celoca yomna soyèngnaca.

<sup>11</sup> Lempe chë soyènga nyets tempo ndoñe queochátsmèna;

aca nyetsca tescama cochántsemna.

Lempe chë soyènga echanjopochóca, mo tojuatanguaná entšayacá.

<sup>12</sup> Aca chë luarènga cochanjátrocaye, mo tsmècá cuafjabiamcá.

Chca, chë luarèngaca cochanjama, mo entšayá tcojtenéjonètse y tcojenotrocacá.

Pero aca nyets tempo cach aca cochandesomñe,

y nyets tempo vida cochandesóbomñe ca —cha tojánayana.

<sup>13</sup> Bèngbe Bètsá ndocna te ndocna ángelbioie mèntšá tbonjaniyana, ntšamo chabe Uaquiñábioie tbojanianýncá:

Atšbe catšbioica cochtsetbemana,

acbe uayayènga acbe cucuatšifne chamoquedama atšbe obenánaca chjamèntscuana ca.

<sup>14</sup> Ndegombre, nyetsca angelènga espíritènga mondmèna Bèngbe Bètsá jasérviana, ndémanýyènga cha tojanichamá bènga jabújabuachama, chë atsebácanènga mochtsemnèngbe tšabiama.

## 2

*Canýe bèts soye endmèna atsebácanènga jtsemnana*

<sup>1</sup> Chíyeca, bēnga šontsamna sempre Bēngbe Bētsabe soyēnga jtsuenanana, chē bēnga tmonjouena soyēnga, chē tšabe benachentsana ndoñe chamondojuánama. <sup>2</sup> Ndayá Bēngbe Bētsá tempo angeléngaca entšanga tojanamēndacá, canýe ndegombre soye endmēna, y entšanga entsamna chca jtsobedecénana; y chē bacna soye tmojanmēnga y ntšamo Bēngbe Bētsá tojanmandacá ndoñe tmonjanmēnga castigo tojanatšatá, chca tmojanama causa; y chca, <sup>3</sup> bēnga chca bacna soyēnga tmojtsamēse, ¿ntšamo mochjobenaye jtsejuabnyana Bēngbe Bētsá chama ndoñe šochanjacastígaye ca? Ndegombre cha chca echanjama, bēnga chábēñe ndoñe tmonsošbuáchese, chē bēts soye jēftsashjáchama, atsebácanēnga jtsemnana. Bēngbe Utabná chē natsaná yojtsemna nda entšanga tojanabuayená Bēngbe Bētsá entšanga yochjánatsebacama; y inýenga bēnga šonjanabuayená cachcá ntšamo chábioye tmojanoyeunacá. <sup>4</sup> Y Bēngbe Bētsánaca tonjaninýanyé, ndayá chēnga tmojanabuayenacá ndegombre bētsemnana, chabe obenana jinýanyiyama soyéngaca, entšanga chamenjaná soyéngaca, bēts soyéngaca, y entšanga chē Uámana Espíritu ainaniñe chamotsebomnana cha jtsamēse. Chca jamēse, cada ona chaotsobena jamama ntšamo Bēngbe Bētsá yobošcá.

*Bēngbe Bētsá tojanma Jesucristo entšangcá chaotsemnana*

<sup>5</sup> Bēngbe Bētsá angelēnga ndoñe tonjubuáyana chamotsemándama ndayá quem luarentše yochtsemniñe, lempe mo tsmécá chaotsemnana Bēngbe Bētsá chaojama ora, chē ndayama mora bēnga montsoyebuambná. <sup>6</sup> Chamna, inýoca Bēngbe Bētsabe uabemana palabrēnguiñe mēntšá endayana, ntšamo chábioye canýa tbojaniancá tojánayana:

Entšanga ndoñe yapa uámanēnga quemátsmēna, as ¿ndáyeca tša chēngbeñe cuanjésejuabnaye?

Chēnga entšanga mondmēna. ¿Ndáyeca tša chēnga cuanjésanyēna?

<sup>7</sup> Aca tcojama entšá puerte uamaná chaotsemnana, y chē angelēngna nýe batsatema chabiamá más uámanēnga mondmēna.

Aca tcojama cha puerte uamaná y respeto merecido bomná chaotsemnana,

<sup>8</sup> y cha chaotsemándama nýetsca chē inýe soyēnguiñe, chē quem luarentše aca tcojamiñe — chiñe canýa tojánayana.

Entšá lempe chaotsemándama Bēngbe Bētsá tojanma ora, tondaye tonjánboshjona entšáftaca ndēmándana soye ca. Pero mēntscóñama ndoñe nýa chca quemēntinýe, chē entšá lempe ntšamo quem luarentše yomncá jtsemándayana. <sup>9</sup> Pero bēnga mondētatsēmbo y corente mondonýá Jesús aínē chca tojanmama. Bēngbe Bētsá tojanma cha nduamaná chaotsemnana, mo canýe entšacá, baseftaytē chē angelēngbiamá más batšá uamaná. Bēngbe Bētsá, entšangbe tšabiamá jtsejuabnyése, yojánboše Jesús chaóbanama, corente jasúfriase; Bēngbe Bētsá yojánboše cha chca chaomama, nýets luarentša entšangbe tšabiamá. Y Jesús ya chca tojánmayeca, Bēngbe Bētsá ya tojinýanyé cha puerte bētsá y uamaná bētsemnana.

<sup>10</sup> Nýetsca soyēnga yobinýna Bēngbe Bētsabiamá y chábeyeca. Tšabá enjamna, Bēngbe Bētsá jamana Jesucristo chaotsemnana lempe ntšamo entšanga tmojtsajabotcá, nda chēngbe bacna soyēnguentšana cháuatsebacama. Bēngbe Bētsá chca tojanma, Jesús, chē entšanga atsebácanēnga jtsemnana unachayá, chaosufrima jamēse, chca, ba entšanga celoca, mo chabe basengcá, cháftaca bētsétsanga chamotsemnana. <sup>11</sup> Er Bēngbe Bētsá cach Taitá nýetscangbiamá endmēna: Jesús, chē entšanga Bēngbe Bētsábenga chamotsemnana iuamabiamá, y chē entšanga chca chamojtsemnēngbiámna. Chíyeca Jesús, Bēngbe Bētsabe Uaquiñá, ndoñe ntsēuatjana chēngbioye catšátanga ca jtsachembuanama. <sup>12</sup> Bēngbe Bētsabe uabemana palabrēnguiñe Bēngbe Bētsábioye cha mēntšá tbojanianya:

Atšbe uabentsēngbeñe acbiamá chanjóyebuambaye, y jacántase chochanjētschuaye, ácbioye adórayēnguentše ca.

<sup>13</sup> Y mēntšánaca cha Bēngbe Bētsabiamá tojánayana:

Atše atšbe Bētsábeñe chantsošbuáchiye ca.

Y más hcoye mēntšá tojánayana:

Muentše Bēngbe Bētsabe básengaftaca sēntsemna, chē atšbe cucuatšínē tojábashējuanēnga, atše jtsanýenama ca.

<sup>14</sup> Quem Bēngbe Bētsabe básenga nýetsca entšangcá mondmēnayeca, Jesúsna canýe entšá chēngcá tojanóbema. Cha chca tojanma, jóbanése, chē entšanga jóbanama chaot-samnana obenana bomná Satanás, jayénjanama. <sup>15</sup> Y chca, cha tojama chē jóbanama y ndayá chentšana yochjopásama auatjēnga ndoñe chamondétsauatjama; chēnga nýets tempo corente ngmēnaca inmoyena, jóbanama auatja causa. <sup>16</sup> Er ndegombre, cha ndoñe tonjánabo chē angelēnga jabújabuachama, ndayá chē Abrahámbeñtsana entšángbioye. <sup>17</sup> Y chama cha ibojamna jtsemnana nýetsca soyēnguiñe cachcá mo chabe uabentséngcá, chē entšanga, chca, jobenayama jtsemnana chēngbiamá mo bachnangbe canýe más uámana amēndayacá, Bēngbe Bētsá jtseimpadánama chēngbioye chēngbe bacna soyēngama cháuaperdonama, puerte lastemado méná y sempre ntšamo Bēngbe Bētsá tbojauyancá amá. Chca, cha jóbanése

jamama entšanga chamobenama perdonánënga jtsemnana, y chca, jobenayama Bëngbe Bëtsáftaca tšabá tempcá jtsemnëngama. <sup>18</sup> Y mora cha entsobena, ndëmuanyënga bacna soye jamama tojócohengüënga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojsentsëna ora.

### 3

*Cristo Moisesbiamá más uamaná endmëna*

<sup>1</sup> Chíyeca, Jesucristbeyeca catsátanga, Bëngbe Bëtsábënga, ndëmuanyënga Bëngbe Bëtsá tojáchembo chabe entšanga chamotsemnana, corente Jesucristbeñe šmochjésejuabnaye. Cha endmëna nda Bëngbe Bëtsá bëngbiroye tbojanichmó, y nda bëngbiamá yomna mo chë más uamana bachnangbe amëndayacá, Bëngbe Bëtsábroye jtseimpadánama bacna soyëngama chašotsaperdonama. Cha chca endmëna chë bënga mondošbuaché soyënguñe y chë mondbáyana ndegombre yomna ca soyënguñe. <sup>2</sup> Er Jesús nyets tempo tojanma ndayá chaot-samama Bëngbe Bëtsá tbojanianacá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbiroye cháuaservema. <sup>3</sup> Canye yebna jebuaná chë yebnama más uamaná jtsemnana; cachcá Jesús, nda inétsama entšanga Bëngbe Bëtsábënga chamotsemnana, más jtsomerecénana Bëngbe Bëtsá cha puerte bëtsá y uamaná bëtsemnana cháuinñanyëma, nye ntšamo Moisés, canya Bëngbe Bëtsabe entšanguentsá yojanomerecénama. <sup>4</sup> Ndëmuanyë yébnëna canye jebuaná jtsebomnana, pero Bëngbe Bëtsá endmëna nda tojanma lempe ntšamo yobinñcá. <sup>5</sup> Moisés yojsama ndayá chaot-samama Bëngbe Bëtsá tbojanmandacá, tšabe oservenacá nyetsca Bëngbe Bëtsabe entšángbeñe, y yojamna canya corente tatsëmbuá ndayá más chcoye yochjanopásama, ndayá Bëngbe Bëtsá yochjánayana. <sup>6</sup> Pero Cristo, ndayá Bëngbe Bëtsá tobošcá jamana, chë Bëngbe Bëtsabe entšángbeñe Uaquiñacá jtsemándayëse, ntšamo canye uaquiñá jtsemándayana ndayá nyetsca chabe pamillanga tmojtsamiñe; cha, chë Uaquiñacá y chënga chë Bëngbe Bëtsabe pamillentsëngcá. Bënga chë pamillentsa entšanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y sempre Bëngbe Bëtsá tšabe soyënga bëngbiamá yochjamama tmojtsobátmanëse, y bënga chca jtsebomnana puerte oyejuayënga tmojtsemnëse.

*Chë jóchnama uamana luare Bëngbe Bëtsabe entšangbiamá*

<sup>7</sup> Chcasna, ntšamo chë Uamana Espiritu Bëngbe Bëtsabe uabemana palabrenguñe tojanianacá:

Mënté tšëngaftanga ndayá Bëngbe Bëtsá tojtsichamcá šmojouenëse,

<sup>8</sup> ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama,

mo chë entšanga ndoyena luaroca Moisésoftaca imojëftsemnëngcá, Bëngbe Bëtsabe contra nyetsca soyënguñe imojtsemna.

Chënga bëtscá bacna soyënga tmojanma, mo ndayá cuaftsamcá jinýama ntsachetšá más muanjobenaye jamana y Bëngbe Bëtsá cabá uantado chëngaftaca tayojssemnana.

<sup>9</sup> Bëngbe Bëtsá tojánayana: “Chentše, tšëngaftangbe bëts taitanga bëtscá monjánama jinýama ndayëntscoñe atše uantado chëngaftaca tsjamnana;

chca chënga tmonjanma, masque canta bnëtsana uatëntscuana chënga chentše tmonjáninýe chë atše sënjánama bëts soyënga.

<sup>10</sup> Chíyeca, atše chorsca entšángaftaca sonjánëtna y sënjánayana:

‘Tšëngaftanga mora átšëftaca ndoñe quešmátajna, mo chë otšëñënga tmojtsemnëngcá, y ndoñe šmonjábošëna jtsiyenana ntšamo atše tšoščá jtsamëse.’

<sup>11</sup> Chíyeca, atše chëngaftaca etonaná sënjánayana, mo nda cuafjajuracá,

chënga ndocna te mochjéftsashjache chë átšëftaca jóchnama uamana luaroye jashjanguama ca” —cha tojánayana.

<sup>12</sup> Jesucristbeyeca catsátanga, yejuana šmochtsantješna ndocná tšëngaftanguentsá chaondëtsebomna canye ainana bëtscá bacna juabnëngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentšana, chë sempre iuetsemnábentšana chaotsojuánañe. <sup>13</sup> Chamna, nyetscanga añemo šmochtsatenatšëtnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrenguñe “mënté ca” uabaina tempo. Chca cmontsamna, ndocná tšëngaftanguentsá chaondëtsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnëngaca ingñená. <sup>14</sup> Er, ndayá Jesús chabe amëndayoca yobomnentsana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bëtsemnana, ntšamo bënga chábeñe jtsóšbuáchiyama tmonjanontsé ora monjanamcá.

<sup>15</sup> Ntšamo Bëngbe Bëtsabe uabemana palabrenguñe endayancá:

Mënté tsëngaftanga ntšamo Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama,

mo chë entsanga ndoyena luaroca Moisésoftaca imojëftsemnëngcá, Bëngbe Bëtsabe contra nyëtsca soyënguñe imojtsemna ca.

<sup>16</sup> ¿Y ndëmuanýenga imojamna, chë Bëngbe Bëtsá tojanëyancá tmojanuenentsana, nyëtsca soyënguñe chabe contra imojtsanmëna? Co chë Moisésbeyeca Egiptocana tmojánbocanënga.

<sup>17</sup> ¿Y ndëmuanýëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanýenga entsanga ndoyena luaroca tmojanóbana y chëngbe cuerpo chentše tojanoquedá. <sup>18</sup> ¿Y ndëmuanýenga tojanëyana, mo nda cuafjauracá, chënga ndocna te mochjëftsashjache chë cháftaca jóchnama uámana luaroye jashjanguama ca? Co chë ndëmuanýenga ntšamo cha tojanmandacá ndoñe tmonjanmënga.

<sup>19</sup> Y ndegombre, bënga montsobena jinýama chënga ndoñe tmonjëftsashjache chë cháftaca jóchnama uámana luaroye jashjanguama, Bëngbe Bëtsabeñe ndoñe imontsošbuaché causa.

#### 4

<sup>1</sup> Chýeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanašebuachenacá cachcá mëntscóñama iuëtsemna, puerte cuedado mochtsebomna, nderado ndánaca tsëngaftanguentsá ndoñe nanjobenaye chca jashjáchama. <sup>2</sup> Er bëngnaca chë tsabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tsabe soye chëngbeñe tonjanopasá, er chca tmojanuena ora, chë palabrënguñe ndoñe montsanošbuaché. <sup>3</sup> Pero bënga, chë Jesucristbeñe tmojošbuachengna, mochanjobenaye chë jóchnama uámana luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiana cha mëntšá tojánayana ora:

Chýeca, atše chëngaftaca etonaná, sënjánayana mo nda cuafjauracá, ndegombre chënga ndoñe mochjëftsashjache chë jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora; <sup>4</sup> er Bëngbe Bëtsabe uabemana palabrënguñe canýentše mëntšá endayana, chë canýsëfta tianoye ndayá cha tojanmama:

Bëngbe Bëtsá nyëtsca trabajëngama tonjanochná chë canýsëfta tianoye ca.

<sup>5</sup> Y cachentše Bëngbe Bëtsabe uabemana palabrënguñe endayana, chë tempo chábioye chca tmojtsanábotengbiana:

Chënga ndocna te quemocháishjache chë átseftaca jóchnama uámana luaroye jashjanguama ca.

<sup>6</sup> Chë entsanga monjamna chë natsanënga chë tsabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjëftsashjache, ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë Bëngbe Bëtsá tojánayana soyënguñe tmojtsanošbuachënga, mochjëftsashjache chë Bëngbe Bëtsáftaca jóchnama uámana luaroye jashjanguama. <sup>7</sup> Chë entsanga ndoyena luaroca, Bëngbe Bëtsá entsanga tojánachembo chë cháftaca jóchnama uámana luaroye chámuamashjnama, y chentšana ba uatëse cha cachiñe canýe tempo tojuinýnaná, chora entsanga chamobënama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyëbuambayëse, David Bëngbe Bëtsabe uabemana palabrënguñe mëntšá tojánayana ora:

Mënté tsëngaftanga, ndayá Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

<sup>8</sup> Josué, Israeloca entsanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnama cha choca matëñanmëse, Bëngbe Bëtsá bayté chentšana, David yojëftsiyena ora, inýe tempuama ndoñe matëñanoyëbuambá, chë ndaye ora entsanga muanjobenaye chë cháftaca jóchnama uámana luare jashjáchama. <sup>9</sup> Y chca, cabá endmëna canýe uámana luare ndayentše Bëngbe Bëtsabe entsanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nyëtsca trabajënga tojanpochocá ora; <sup>10</sup> er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nyëtsca trabajënga tojanpochocá ora. <sup>11</sup> Chýeca, sontsamna lempe ntšamo tmojobenacá jamana chë jóchnama uámana

luare jěftsashjáchama, ntšamo chě Běngbe Bětsábioye ndoñe tmonjanoyeunangcá ndocná chaondětsamama, y chě causa chěnga chě soye ndoñe tmonjěftsashjache.

<sup>12</sup> Er Běngbe Bětsabe palabra endmēna mo canye aina soycá, nyets tempo entšangbioye ndayánaca jtsabuátambayana, y bětscá jamana corente obenánaca, y ndocna te nye bonamente chě palabra jóyebuambayana. Mo chě nyets utoicajana más efsana espadějaquécá, jobenayana puerte jashenoye jatětsana canye cuerpo tojajtěse ora, cachcá y cabá puerte más Běngbe Bětsabe palábraca, cha bēnga jinyanjyana ntšamo bēnga nye bēngbe ainaniñe tmojtsejuabná y tmojtsebošcá, y chě ndocnábioye tmonjinjinyě sóynaca; y chě palábraca cha endobena jáuyanana ntšamo bēnga tmojajuabó y tmojabošencá aĩne o ndoñe tšabá bětsemnana. <sup>13</sup> Ntšamo Běngbe Bětsá tojamentšana tondaye quenátopodena chabiana iytēmenana jtsemnana. Běngbe Bětsá lempe bominjye iuetsequěcná, y nyetsca soyēngama y nyetscangbiana lempe yotátsēmo; Běngbe Bětsá, ndábioye šojtsamna sempre jojuana ndáyecaca canye soye chca tmojamama.

*Jesús endmēna chě más uámana bachnangbe bēts amēndayá*

<sup>14</sup> Jesús, Běngbe Bětsabe Uaquiñá celoye tojámashēngo, y mora cha endmēna nda chabe delante sempre bēngbiana ibuětseimpadana, mo chě bachnangbe canye más uámana amēndayacá. Chíyeca, bēnga šontsamna sempre chábēne jtsošbuáchiyana, ntšamo bēngbe ndegombre ošbuáchiyana yomncá, chě ndayama bēnga nyetsca entšangbeñe tmojayana. <sup>15</sup> Er chě bēngbiana impadaná, mo bachnangbe canye más uámana bēngbe amēndayacá, Jesús, yobena bēngbiana jōngmiana, bēnga inye ora ndoñe yapa obenana tmontsebomna ora, tšabe soye o ndaye sóynaca jamama. Chca endmēna, er Satanás tša yojtsentšena Jesúsbioye ba juabnēnga chabotsontšáshjajuanama, jayēnjanama bacna soye chaomama, nyetsca juabnēnga ntšamo bēngnaca mondbetsebomncá, pero Jesús ndocna te ndocna bacna soye tonjěftsema. <sup>16</sup> As, ndauatjca Běngbe Bětsá mochjótšēmbona, mo chábioye cuaft-sobecocnangcá; cha canye uámana tbe maniñe yojtsetbemana canye bēts reycá; chca moch-jama, bēnga cháśualastemama, y bēngbiana tšabe juabna jtsebomnēse, chašujabuachama bēnga chca chašojtsějajaboto ora.

## 5

<sup>1</sup> Ndēmuanyē bachnangbe más uámana amēndayánaca jtsemnana entšanguentšana bocacaná, y uabuayaná chēngbe cuenta Běngbe Bětsá jaserviama, chábioye juatšēmbonama y bayēnga jobáyama Běngbe Bětsá jětschuayama, chca, Běngbe Bětsá chě bacna soyēnga entšanga tmojamama cháuaperdonama. <sup>2</sup> Chě bachna jtsoobenana jōngmiana, chě bacna soyēnga amēngbiana chama ntsetatšēmbcá, y chě bacna soyēnga jamama ingñēnēnga imomnēnga, mo oštēngcá imomnēngbiana, er cachánaca inye ora ndoñe yapa obenana ntsebomnana, chě bacna soyēnga jamama juabnēngama jtocochbuáchama. <sup>3</sup> Y chíyeca cha jtsemnana bayēnga jobáyama Běngbe Bětsá juatšēmbonama, ndoñe nye entšangbioye bacna soyēngama cháuaperdonama, ndayá chábioye chaboperdonámnaca. <sup>4</sup> Ndocná quenátobena cachá quem uámana trabajo jentšetayana, bachnangbe más uámana amēndayá jtsemnana; cha jtsemnana, Běngbe Bětsábeyeca uabuayaná chca uámana trabajo jamama, ntšamo ndegombre Aarónofcaca tempo cha tojanmcá. <sup>5</sup> Cachcá, Cristo ndoñe cachá tonjanenábuyana jtsemnana chě Běngbe Bětsabe delante sempre bēngbiana impadaná, mo bachnangbe canye más uámana amēndayacá, ndayá Běngbe Bětsá tbojanábuyana chě uámana trabajo jtsebomnana. Cha endmēna nda Jesúsbioye mēntšá tbojaniana:

Aca atšbe Uaquiñá condmēna.

Měntě entšanga sēnjinyaně aca atšbe Uaquiñá comnaca ca.

<sup>6</sup> Y inyocnaca, Běngbe Bětsabe uabemana palabrenguiñe mēntšá tbojaniana:

Aca nyetsca tescama canye bachna condmēna,

canye bēts bachna ntšamo Melquisedec yojamncá ca.

<sup>7</sup> Jesús quem luarentše yojěftsiyeněntscuana, cha juayebuáchese y shěchbuíyeca Běngbe Bětsáftaca ibnécuentaye y ibnaimpadana, cha chě jobanámentšana jatsbocama yojanobená; y Jesús ntšamo Běngbe Bětsá yojanbošcá tojánmayeca y tša respeto chabiana bómnyeca, chábioye tbojanoyeuná. <sup>8</sup> Chca, Cristo masque Běngbe Bětsabe Uaquiñá inamna, jasúfriase tojanábouinje ntšamo jamana ndayá Běngbe Bětsá tojtsebošcá. <sup>9</sup> Chca, Běngbe Bětsá chábioye tbojánbema lempe ntšamo entšanga tmojtšajabotcá, nda chēngbe bacna soyēngama cháuatsebacama; chentšana cha, Cristo, tojanma lempe ntšamo yojaniytcá, nyetscanga chě entšanga chábioye imojánēyeunanēnga chamotsobemama nyetsca tescama atsebácanēnga jtsemnana; <sup>10</sup> y Běngbe Bětsá tbojanábuyana, chě chabe delante sempre bēngbiana impadaná, mo bachnangbe canye más uámana amēndayacá chaotsemnana, canye bēts bachna ntšamo Melquisedec yojamncá.

*Resjo endmēna, ošbuáchiyana jtsajbanana*



<sup>11</sup> Bëtscá entsemna quem palabrama jóyebuambayama, pero chë soyënga jayanama ntšamo tšëngaftanga catafjosertaycá, ndoñe paselo quenátsmëna, er tšëngaftanga nÿa uenana Bëngbe Bëtsabe soyëngama jósertana. <sup>12</sup> Tšëngaftanga ya bayté Jesucristbe soyëngama šmotátšëmboycá, tšëngaftanga cmontsamna ya jtsobenana inÿengbioye chë soyënga jtsabuátambayana; pero tšëngaftanga cmontsëjaboto ndánaca Bëngbe Bëtsabe soyëngama cachiñe chacmëtëtabuayená, chë jtsošbuáchiyama šmojtntsé ora natsana jshauatsjínÿana soyëngama. Y chca, tšëngaftanga šmojobiama mo šešonatëmëngcá, jtsëjabótana létšiyé jofšiyana y ndoñe jobenayana jasana chë jabmuánama ndoñe paselo tontsemna soyënga. <sup>13</sup> Chë nÿetsca soyënguñe ntšamo tšabá yomncá jtsamama buatëmbana soyënga ndoñe tontsabuatná cha, jtsemnana mo canÿe šešonatemcá, nda vida jtsëbnana nÿe létšiyé jtseftmanëse. <sup>14</sup> Pero chë tmojtsobena jajuaboyana y jtsetatsëmbuana ndayá tšabá yomna o ndayá ndoñe tšabá jamama, chca jtsamëse tmoyenamna, chënga jtsemnana mo bëtsëtsangcá, ndëmuanÿenga ndayánaca jasana, chë ndoñe paselo jabmuánama soyëngnaca.

## 6

<sup>1</sup> Chcasna, bënga šontsamna jtsajbanana nÿe jéseošana jtsatsjëndayana Cristbe buatëmbana soyënga, chë bënga chábeñe jtsošbuáchiyama tmojanontsé ora tmojanatsjínÿe soyënga, y šontsamna jtsatsjëndayana chabiama nÿetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtseyesana. Ndoñe más nÿe chë natsana buatëmbana soyëngama mattsatsjëndaye, mo chë ndayá yomna bacna soyënga jtsamana y chë bënga ndoñe vida ntsebnomna junatsana soyënga amana jt-sajbanana, y chë tšabe benache jtshachana; o ntšamo Bëngbe Bëtsábeñe jtsošbuáchiyana; <sup>2</sup> chë juabáyaná ndayá yomna; chë inÿabe bestšašñe cucuatšënga jacjayana Bëngbe Bëtsábioye chabiama jaimpádama; chë obanënga jtayenama Bëngbe Bëtsá yochjamama; y mocna ora ntšamo entšanga tmojamama Bëngbe Bëtsá yochjayanama, chënga chë nÿetsca tescama yomna tšabe vida chamotsebnomna o nÿetsca tescama castigánënga chamotsemnana. <sup>3</sup> Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

<sup>4</sup> Ndëmuanÿenga, canÿe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábinga bëtsemnana, y chë Uámana Espíritu chëngbe ainaniñe chaotsemándama imobomna, <sup>5</sup> y chë Bëngbe Bëtsá ntšamo tojašebuachenacá sempre inétsamama tmojinÿe, y ndëmuanÿenga tmojáninÿe Cristo jtsamana bëts soyënga chabe bëts obenánaca, chë ndaye obenánaca cha puerte bëts soyënga yochjama cha quem luaroye yochjésabo ora, <sup>6</sup> chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe Bëtsabe Uaquiñá chca stëtšoye jaquédana, y jtsemnana mo Bëngbe Bëtsabe Uaquiñábioye cachiñe chënga tmojtsecrucificacá, y entšanga cachiñe cha chamotsáboyejuanama chënga cuafjamcá. <sup>7</sup> Smochjinÿe: fshantse jamana chë ba uaftënga chiñe chaómashënguama, y chë chiñe trabájayëngbama bëtscá jaja sananga tojóbcocñe, Bëngbe Bëtsá jamana, chë fshantsentšana bëtscá tšabe soyënga entšangbiama chaotsebinÿnama. <sup>8</sup> Pero nÿe uchmašëshangá y matënga ucmëšfangaca chiñe tojuábocñe, chë fshantse tondaye ntsámanana; y nderado Bëngbe Bëtsá nanjama chiñe ndocna tšabe mata chaonduábocnana, y cabana, entšanga chiñe mochantsashaniñá. Cachcá, chë ošbuáchiyana tmojtsajbananga castigánënga mochántsemna.

*Bëngbe Bëtsábeñe sempre chamotsobátmanama y ainaniñe bëtscá añemo chamotsebnomna*

<sup>9</sup> Pero masque chca montsoyebuambná, atšbe bonshánënga, bënga tšabá fsëndëtátšëmbo tšëngaftangbeñe chë más tšabe soyënga echántsemna, chë atsocaná jtsemnana tojtsá cha yobomna soyënga. <sup>10</sup> Er Bëngbe Bëtsá sempre ntšamo tšabá yomncá nÿetsca soyënguñe jtsamana, cha ndegombre echántsejuabnaye ndayá tšëngaftanga šmojamama, y chë chabiama šmojinÿinÿe bonshánama, chabe entšangbioye jtsëjabuáchanëse, ntšamo mórnaca šmojtsama. <sup>11</sup> Pero bënga fsëntseboše, cada ona tšëngaftanguentšá, nÿets tempo y Jesús chaojësábëtsucana chaotsinÿanÿná corente yoboše chca jtsamana, Bëngbe Bëtsábeñe chca jtsošbuáchiyëse, chábeñe sempre chašmotsobátmanama, tšëngaftangbe tšabiama cha chaomama. <sup>12</sup> Ndoñe queftsátšboše tšëngaftanga oyënjayënga chašmotsobiama chë Bëngbe Bëtsá tmojabanÿé trabajo jtsamana, ndayá Jesucristbeñe ošbuáchiyana bomnëngcá y padecena soyënguñe uantado mënëngcá smochtsama. Chca, chënga mochanjóyëngacñe ndayá Bëngbe Bëtsá jatsatayama tojašebuachenacá, chabe entšanga bëtsemnana.

<sup>13</sup> Bëngbe Bëtsá Abrahámioye tbojansbuachená ora, chca tbojanÿana cachabe uabaina jayanëse, er inÿa chabiama más uamaná ndoñe yontsemna ndabiama jajúrama, ntšamo tbojansbuachenacá ndegombre chaotsemnana; <sup>14</sup> cha mëntšá tbojansbuachená: “Añe, atše chanjama aca bëtscá tšabe bendicionënga chacotsebnomna, y chanjama acbentšá

pamillentsana mallajta entsanga chamotsemnama ca.”<sup>15</sup> Y chca, Abraham Bèngbe Bètsábeñe jtsosbuáchiyése, puerte uantadiñe yojanóbátmana ntšamo tbojanšbuachenacá Bèngbe Bètsá yochjanmama, y pronto chca tojanóyèngacñe.

<sup>16</sup> Entšanga tmojajurá ora, chca jamana chèngbiana canye puerte más uámanabe uabaina jayanése, y chca chèngbiana más uamanabiama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más nt-jatenátsètsnayana. <sup>17</sup> Y chca, Bèngbe Bètsá tojánbošena botamana jinñanñiyana, ntšamo cha tojanašebuachenacá mochjanoyèngacñèngbioye, ntšamo tojanašebuachenacá cha ndegombre yochjanmama, y ndocna te chè ntšamo jamama yojanjuabnacá yoch-jantrócama. Chiyeca, botamana tojaninñanñyé cha chca yochjanmana, cachabiama jajúruse, chè ntšamo tojanašebuachenacá yochjanmama ndegombre bétsemnama. <sup>18</sup> Bèngbe Bètsabe šbuachenana soye y chama jinñanñiyama ntšamo tojanayancá, ntšamo to-janašebuachenacá ndegombre yochjanmama, chè uta soye ndocná ntšobenana jatrócama; y chca tojajana ora, ndoñe ntšopodénana Bèngbe Bètsá chaobená jobostérana. Y chca, chè uta soyama, bènga bètsáca añemo ainaniñe jóyèngacñana, bènga chè Bèngbe Bètsábioye tmojobéconanga, cha chásuatsebacama y chašotsanñenama, mo canye bèts resjuentsana tmotjsachetèngcá, ntšamo chentsana atsebácanènga jtsemnama cuaftsenguacá. Bèngbe Bètsá šojáuyana bènga imojtsobena chábeñe jtsobátmanama ca, y bèts añémoca chábeñe jtsosbuáchiyése, cha yejuana šochtsanñenama mondobátmana. <sup>19</sup> Mo ntšamo chè béjaye asentoca cuedádoca tcojajajo anclama, chè barcuñe enjaquenènga tšabá jtsetatsèmbuana chè barco ndoñe yochántsashatiyinnama, cachcá bèngnaca, Bèngbe Bètsábeñe imobátmanama, montsobena ainanoca jtsetatsèmbuana lempe tšabá yotsomñama. Bènga Jesucristeñe mondobátmana, y Bèngbe Bètsá yojtsemnoye celoca cha tojámarshèngo y chabe delante entsemna mo chè bachnangbe más uámana amèndayacá. Chana jamashènguana chè Bèngbe Bètsabe bèts yebnoca, “chè más uámana ca” uabaina luaroye, entšéjua ujonñana stètsolca, Bèngbe Bètsabe delante jtsemnama, <sup>20</sup> ndayentse Jesús celoca, Bèngbe Bètsabe delante tojámarshèngo bèngbe tšabiama soyènga jamama, bèngnaca chamobenama chabe delante jamashènguama; chca, Jesús tojanóbema chè bachnangbe más uámana amèndayá nyetsca tescama, canye bèts bachna ntšamo Melquisedec yojamncá.

## 7

### *Jesús, canye bèts bachna ntšamo Melquisedec yojamncá*

<sup>1</sup> Quem Melquisedec yojamna Salem puebloca rey y bachna chè celoca Bèngbe Bètsabiama; Bèngbe Bètsá, chè nyetscangbiana más uamaná. Abraham chè reyènga y chèngbe soldadèngaftaca imojentsjaná y tojanayèñjaná chentsana yojsatabó ora, Melquisedec tojánbocna cha jajébenguama, y chora Bèngbe Bètsábioye tbojanimpadá, Abraham bètsáca tšabe bendicionènga chaotsebonnama chaomama. <sup>2</sup> Chora Abraham chábioye tbojanatsetá, chè reyèngaftaca imojentsjaná ora, lempe tojanosháchiñentsana, bnètsanentsana canye soye. Chè palabra Melquisedec endayana “nyetsca soyènguiñe tšabá ama rey ca”; y chánaca yojamna Salem puebloca rey, y chca endayana “nyetscanga natjèmbana chamotsiyenama ama rey ca”. <sup>3</sup> Chabe pamillangbiana tondaye quenatótatsèmbo; chca cha endmèna mo ni taitá ni mamá ndoñe endbomnacá, ni bèts tai-tanga. Tondaye quenatótatsèmbo ntseco tojanonñnama, ni ntseco tojanóbanama; chca, inye soyènguiñe cha yojamna mo Bèngbe Bètsabe Uaquiñacá, y endmèna mo nyetsca tescama bachna cuaftsemncá.

<sup>4</sup> Y mora, šmochjúaboje tša uamaná Melquisedec inamnama, er bèngbe tempsca uámana bèts taitá Abraham chábioye tbojanatsetá, chè reyèngaftaca imojentsjaná ora lempe tojanosháchiñentsana bnètsanentsana canye soye. <sup>5</sup> Ntšamo Moisesbe leyíñe endèmandacá, chè bachnangbe más uámana amèndayá Leví, Aaronèna ca uabainabe pamillentsana tmomna bachnanga, jtsamnana chè Israeloca entsángbioye nyetsca chè tmobomna soyènguentšana bnètsanentsana canye soye jtsayèngacayana; y chca jtsamnana masque chè entsanga cachèngbe pamillentsènga tmomna y Abrahámantsana pamillentsèngnaca. <sup>6</sup> Pero Melquisedec, masque Aaronbe pamillentsá ndoñe yonjamna, Abraham, chè ntšamo Bèngbe Bètsá tbojanšbuachenacá tojanóyèngacñabentsana, cha tojanóyèngacñe nyetsca soyènguentšana bnètsanentsana canye soye, y Bèngbe Bètsábioye tbojanimpadá, Abraham bètsáca tšabe bendicionènga chaotsebonnama chaomama. <sup>7</sup> Y ndocná quenátobena jayanama ndoñe ndegombre yondmèna ca, chè Bèngbe Bètsábioye impadaná inñabiama tšabe soyènga chaomama, más uamaná inèsemna chè chca tojóyèngacñabiama, inñya chabiama Bèngbe Bètsábioye tbojaimpadá ora. <sup>8</sup> Quem tempo, bachnanga mochjóbanènga, entsángbioye jtsayèngacayana nyetsca chè tmobomna soyènguentšana bnètsanentsana canye soye, pero chè Bèngbe Bètsabe uabemana

palabra, Melquisedecbiana endoyebuambná cha mo canya cabá ainá totsomñá. <sup>9</sup> Y bēnga montsobena jayanama, Abraham Melquisedécbioye chē n̄yetsca soyēnguentšana bn̄etsanentšana canye soye tbojanoyé ora, yojamna mo Leví, chē n̄yetscāngbioye n̄yetsca soyēnguentšana bn̄etsanentšana canye soye ayēngacayá, Melquisedécbioye chca cuaftopagacá; <sup>10</sup> er cha Abrahambe pamillentsá inamna. Melquisedec yojtsabó ora y chábioye chē lempe tojanosháchiñentšana bn̄etsanentšana canye soye Abraham tbojanatsetá ora, yojamna mo n̄yetscanga, chē Abrahámbentšana entšanga más chcoye mochtsaniyenēnga, chēngnaca chē bn̄etsanentšana canye soye cuaftajajocá, masque Abraham chca tojanma ora, Leví y chē Abrahámbentšana inye entšanga cabá ndoñe tmonjanonyná.

<sup>11</sup> Israeloca entšanga Moisesbe ley tmojanáyēngaca, chē bēts taitá Levibe pamillentsēnga bachnanga imojamnēnga Bēngbe Bētsá imojtseservena ora, y chēnga monjamna Aarónbentšana entšanga. Ntšamo chē leyíñe yomandancá imojánamēnga perdonámēnga jtsemnama y Bēngbe Bētsabe bominíñe tsábēnga jtsemnama quem bachnanga jamama matmēnjanobenase, ndoñe manjanēyta Bēngbe Bētsá inye bachna chabuatschembuama, nda ndoñe yonjamna mo chē bēts bachna Aaroncá, ndayá ntšamo chē bēts bachna Melquisedec yojamncá. <sup>12</sup> Er, canye bachnanga Bēngbe Bētsábioye jtse servénama tmojanbaná y inye bachnanga chábioye jaserviama tmojatontšé ora, jtseytana chē natsana bachnanga imojanoservena ora mándaye leyēngnaca jtsetrócama. <sup>13</sup> Bēngbe Utabná, ndabiana quem soyēnga jtsoyebuambnayana, ndoñe Aaronbe pamillentsá quenjatsmēna, ndayá inye pamillentsá, y quem pamillentsá entšanga ndocna te bachnangcá Bēngbe Bētsá tmonjanservé, chē altar ndrichiñe Bēngbe Bētsabe bēts yebnoca. <sup>14</sup> Er n̄yetscanga mondētatsēmo Bēngbe Utabná Judabe pamillentsana bētsemnama, y chē pamillama Moisés ndocá tonjánayana, Bēngbe Bētsá mo bachnangcá chēnga jtse servénama.

<sup>15</sup> Y ntšamo tmojanancá montsobena más tsábá josértana, er chē tsēm bachna Cristo yojamna canya mo Melquisedec yojamncá. <sup>16</sup> Cha bachna yojamna, ndoñe chē bachnanga chabe pamillentsana jabocanama yojánamnama canye ley tojánayanayeca, ndayá n̄yetsca tescama jéftsienayana cha inobénayeca. <sup>17</sup> Er mēntšá endmēna, ndayá Bēngbe Bētsá chabiana tojánayana:

Aca bachna n̄yetsca tescama condmēna, canye bēts bachna ntšamo Melquisedec yojamncá ca.

<sup>18</sup> Cha tojánabo ora, Bēngbe Bētsá tojanma chē nda bachna jtsemnama y ntšamo joserviama mandēnga chaotsopochocama, er chē mandēnga ndoñe ntjobenayana entšanga juabuáchama atsebácanēnga jtsemnama, y chca, chēngbiana ndoñe bētscá yonjanoservena. <sup>19</sup> Er Moisesbe léyeca, entšanga ndoñe tmonjanobená Bēngbe Bētsabe bominíñe tsábēnga jtsemnama, pero mora chama canye corente más uamana soye montse bomna: Jesucristbeñe jtsošbuáchiyēse, chábeñe montsobátama Bēngbe Bētsáftaca tsábēnga chásubiamama, y chca, Bēngbe Bētsábioye bēnga jtobēconama.

<sup>20</sup> Y Bēngbe Bētsá lempe chca tojanma, cachabiana jajúrase, lempe ntšamo cha tojanayancá ndegombre chaotsemnama. Chē inye bachnanga, chē Aaronbe pamillentsēngbioye tmojanēbuáyana ora, Bēngbe Bētsá ndoñe chca tonjánayana, <sup>21</sup> pero mo bachnecá chaoservema Bēngbe Utabnábioye tbojanábuayana ora añe; cach Bēngbe Bētsabiana jajúrase, Bēngbe Utabná canye bachna yochtsemna ca tojánayana. Ntšamo Bēngbe Bētsabe uabemana palabrénguiñe endayancá:

Bēngbe Utabná Bēngbe Bētsá, Jesucristbioye tbojanianayana, cachabiana jajúrase, ntšamo tojanayancá ndegombre chaotsemnama, y juabna ndoñe ntjatrócama:

“Aca bachna n̄yetsca tescama condmēna ca.”

<sup>22</sup> Bēngbe Bētsá chca tojánayanama, Jesúsbeñe bēnga corente mondētatsēmo, ndayá Bēngbe Bētsá bēngbiana jamama tojanašebuachenacá, chē Jesúsbioye bēngbe bachna chaotsemnama juabuáyanana, más tsábá yojtsemna chē ndayá tempo cha chabe entšangbiana tojanašebuachená soyama. <sup>23</sup> Chē inye bachnanga banga imojamna, er ndocná yonjanobena Bēngbe Bētsábioye n̄yetsca tescama chca jtse servénana; cada ona básefta uatēngama tojéftsanoservé, tojanóbana y inyábioye chē trabajo jatontšabuáchana. <sup>24</sup> Pero Jesús ndocna te ntjobanámayecna, cha mo bachnecá Bēngbe Bētsábioye n̄yetsca tescama bochjéftseservena, y ndocna te chabe trabajo inyábioye bochanjéftsinyiníyie, chē inya cachcá jtsamama chauatontšema. <sup>25</sup> Chiyeca, cha yobena n̄yetsca tescama jatsebacana ndēmuanýēnga chábeyeca Bēngbe Bētsábioye tmojobeconá, er n̄yetsca tescama cha echanjéftsienayana Bēngbe Bētsábioye chēngbiana jtseimpadánama.

<sup>26</sup> Chcasna, Jesús ndegombre endmēna lempe ntšamo bēnga imuajabotcá nda Bēngbe Bētsábioye bēngbiana chabotseimpadánama, mo chē bēngbe bachnangbe más uamana amēndayacá. Cha sempre uamana endmēna, ndocna te ni mo canye juabna inyábe contra

yonjábomna, ainaniñe ndocna bacna juabna yonjábomna, chë bacna soyënga amënguentšana luaroca mëná, y Bëngbe Bëtsá tojanma celoca más bëtsá y obená nyëtsangbiana cha chaotsemnama. <sup>27</sup> Cha ndoñe bonjanájaboto canye te y inye te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entsanga tmojanmámna, mo chë inye bachnangbe más uámana amëndayënga mondbetsamcá, cachëngbiana y chë judiëngbiámna. Cha tojanma lempe ntšamo yojaniytá canye soye y nyëtsca tescama, entsanga bacna soyënga tmojanmama perdonánënga chamotsemnama. Cha chca tojanma, chabe derecho vida jtsobomñama cachcá tojanonýná ora; y tojanóbana entsanga chamotsobenama perdonánënga jtsemnama. <sup>28</sup> Ntšamo Moisesbe leyiñe yojanmandacá, chëngbiana mo chë bachnangbe más uámana amëndayëngcá tmojanëbuáyana entsanga inye ora bacna soye amënga; pero Bëngbe Bëtsá cabá chë ley entsangbe cucuatsiñe tojanáboshjonentsana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiana jajúruse, ntšamo tojanayancá ndegombre chaotsemnama. Bëngbe Bëtsá tojanma chë Uaquiñá chaotsemnama lempe ntšamo entsanga tmojtsajabotcá, nda cháutatebacama, ndocna te bacna soye ndamá, ni ainaniñe bacna juabnënga ndbomná.

## 8

*Cristo, nda jóbaneşe tojanma entsanga Bëngbe Bëtsáftaca mo canyáca chamotsemnama*

<sup>1</sup> Chë más uámana soye ndayama bënga montsichamo, chë Cristo mo bachnëcá yomnama montsoyëbuambná ora, entsemna: Bënga chábeñe imojtsebomna canya nyëtsca tescama Bëngbe Bëtsabe delante bëngbiana impadaná, mo chë bëngbe bachnangbe más uámana amëndayacá, Bëngbe Bëtsabe catšbioica yojtsebomana jtsemándayama, y Bëngbe Bëtsá chë más uámana tbermanente. <sup>2</sup> Chë inye bachnanga Bëngbe Bëtsabe bëts yebnentşe tmojánamashjna chë “más uámana ca” uabaina luaroye, Bëngbe Bëtsabe delante jtsemnama; pero chë luare celoca ndayentşe nyëts tempo Cristo mo chë bachnangbe más uámana amëndayacá yoserverna, entsanga ndoñe chca tmonjanpormá, ndayá Bëngbe Bëtsá.

<sup>3</sup> Nyëtscanga chë bachnangbe más uámana amëndayënga tmojanëbuáyana, entsangbiana soyënga y tojóba bayënga Bëngbe Bëtsábioye juatsëmbonama, chëngbe bacna soyëngama perdonánënga chamotsemnama; chíyeca, jtseytana Jesucristo ndayánaca chaotsebomnama, Bëngbe Bëtsábioye juatsëmbonama. <sup>4</sup> Cha quem luarentşe tojtsetrabájase, cha ni mo bachna ndoñe nántsemna, er muentşe ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyiñe yomandancá. Y chca, ndoñe nantseyta cha chca chauatoservénama. <sup>5</sup> Chë inye bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoserverna, ndoñe cachcá yontsemna chë ndayentşe Jesucristo celoca yoserverna luarcá, ni ntšamo cha yoservencá; nyë batšatema bëngbioye šuinjanýná ntšamo chë celoca luare yomnama, ndayentşe Cristo mo bachnëcá yoserverna. Y bënga mondetatšëmbo quem luarentşe chë soyënga chca yomnama, er chë Bëngbe Bëtsábioye jadórama yebna, chë jatsjagama opodena yebna Moisés japórmama ora, Bëngbe Bëtsá méntšá tbojanianyana: “Cuedado cochtsebomna chë atšbiana yebniñe nyëtsca soyënga jamama, ntšamo tcbonjaninýinjëcá chacomama, chë tjoca bonjamna ora ca.” <sup>6</sup> Pero bëngbe bachnangbe más uámana amëndayá Cristo, tojashjache canye más bëts trabajo jtsebomnama, ntšamo chë inye bachnanga imobomna trabajuama; cachcá, ndayá Bëngbe Bëtsá tojayancá Crístoftaca bëngbiana jamama, bënga tempcá tšabá Bëngbe Bëtsáftaca jtsemnama jtsamëse, puerte más tšabá endmëna, chë ndayá tempo chabe entsangbiana jamama tojanaşebuachená soyama. Ntšamo mora cha tojayancá puerte más tšabá entsemna, er tojanaşebuachená más tšabe soyënga bëngbiana jamama.

<sup>7</sup> Chë Bëngbe Bëtsá natsana tojanaşebuachená soyëngaca matënjjanopodë entsanga chamotsamama ntšamo yojanamncá, ntšamo tojanaşebuachenacá jóyëngacñama, as ndoñe manjanëyta Bëngbe Bëtsá cachiñe canye trato chauátsbemama entsangbiana. <sup>8</sup> Pero Bëngbe Bëtsá tojaninye ntšamo yojanamncá entsanga ndoñe tmonjanmama, ntšamo cha tojanaşebuachenacá jóyëngacñama, y Bëngbe Utabná Bëngbe Bëtsá chëngbiana méntšá tojánayana:

Canye tempo echanjóshjango, y chora Israel y Judabe pamillentša entsangbiana básefta soyënga jamama chanjaşebuachená,

chënga átseftaca tempcá tšabá jtsemnama chamotsobenama.

<sup>9</sup> Chë chanjaşebuachená soye ndoñe queochátsmëna cachcá ntšamo chë chëngbe bëts taitanga sënjanaşebuachená soye enjamncá,

atşe chënga sënjanënatşe ora, Egipto luarocana sënjésanëbuacna ora;

pero chëngna, ntšamo jamama enjanamncá, chë sënjanaşebuachená soye jóyëngacñama ndoñe chemátanma causa,

atše cachá chënga sënjesanënyäye ca, Bëngbe Utabná tojánayana.

<sup>10</sup> Chë Israeloca entsangbiana ndayá jamama canyë tempo chentsana chanjasebuachená soye,

mëntsá entsemna ca, Bëngbe Utabná tojánayana:

Atše chanjama chë chëngbe juabniñe chaitsemánda soyama chënga chamotsejuabnama, y chamotseboşe jtsamana ndayá chëngbe ainaniñe chaitsemánda soye.

Atše chëngbe Bëtsá chántsemna, y chënga atšbe entsanga.

<sup>11</sup> Chë tempo ndoñe queochátsiya cányënga ínÿënga chamotsabuátambama,

cachabe luariñe oyenábioye o cachabe pamillentsa entsábioye, atše chë chëngbe Utabná chašmotsábuatmama.

Ndoñe queochátsýta, er nyetscanga uámanënga y nduámanënga,

corente tšabá atšbe šmochantsábuatma.

<sup>12</sup> Chënga chanjástemaye y chëngbe bacna soyëngama chanjáperdonaye,

y ndocna te más chë bacna soyënga chënga tmojamama quichátsjuabnaye ca —cha tojánayana.

<sup>13</sup> Bëngbe Bëtsá, chë entsangbiana mora jamama tojasebuachenama tojtsichamo ora, chca jtsemnana, er cha tojama chë tempo entsangbiana jamama tojanašebuachená soye, mora ya ndoñe chaondëtsoservénama; ndayá mo tanguá soyá tojtsemna y ya ndoñe tontsoservena, chë soyna nÿe batšatema más y ya jtsopochócana.

## 9

### *Bëngbe Bëtsá jadórama muentša luare y chë celoca luare*

<sup>1</sup> Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nÿa chabiana pormana yebnentše quem luarentše.

<sup>2</sup> Chíyeca, Bëngbe Bëtsá tojanmandá chaotsemna canyë jatsjacama opodena yebna chábioye jadórama, mëntsá: Chë natsana tsañe quem Bëngbe Bëtsabiana yebnentše inauabaina “chë uámana luare ca”; chentše inamna chë canyëséfta quinÿenëfjuangá castellano candelersëñe, y canyë mesésha ndayiñe yojacjana chë luarentše Bëngbe Bëtsá bëtsemnana inÿinÿnaye tandëšënga.

<sup>3</sup> Inÿe ujonÿana entsëjua chentsana, inÿe luare inamna; inauabaina “chë más uámana luare ca”. <sup>4</sup> Chentše inamna chë castellano altar, incienso jajuinÿiyama, y chë cajontema nyetsiñe castellanoca pormánëtema. Quem cajontema yojaninÿanÿná ntšamo Bëngbe Bëtsá tojanašebuachenacá, chë Israeloca entsanga chabe uámana entsanga yochjánabiamama, y inauabaina “Bëngbe Bëtsabe šbuachenana soye inÿinÿnaye cajontema ca”; y chë tsoye quem soyënga inabomna: canyë castellano jarrëtema, maná ca uabaina tandëšëca, chë Bëngbe Bëtsá tojanma celocana chabe entsangbiana chaótsátsama saná; Aaronbe varëfja, chë tojanantsëfjonëfja; y chë ndëtsbé tablëbenga ndayiñe Bëngbe Bëtsá tojanábema chë bnëtsana uámana mandënga. <sup>5</sup> Chë cajontema juatsboca innamna chë juatëngmiášha uabomnënga, mo angelëngcá, “querubinënga ca” uabáinënga, y chënga imojaninÿanÿná chë Bëngbe Bëtsabe buashinÿinÿanana chëntsna bëtsemnana. Chënga, chë juatëngmiášhangaca chë cajontémentša nyets ústonëtema imojanëtsbotsana; chë ústonëtema inauabaina “entsanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuëscjana, chë Bëngbe Bëtsábioye cha ibnaimpadana te, entsanga cháuperdonama. Pero mora ndoñe quenátsiya chë soyëngama lempe jatóyeuambnayama.

<sup>6</sup> Lempe chca tmojanprontantšana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama. <sup>7</sup> Pero nÿe chë bachnangbe más uámana amëndayá yojobena chë inÿe luaroye jamashënguana, y nÿe canyë cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entsanga tmojanma bacna soyëngnaca. <sup>8</sup> Chca, chë Uámana Espíritu jamana bënga chašósertama, chë natsana luare cabá tojtsemnentscuana y chë bachnanga cabá chë soyënga chentše tmojtsamëntscuana, nyetscanga cabá ndoñe tmonjanobená chë inÿe luaroye jamashjnama, chë “más uámana luaroye”. <sup>9</sup> Chë soyëngaca jtsopodénana bëngbioye jinÿanÿiyana, chë tempo, chë Bëngbe Bëtsábioye jadórama yebnentše entsanga uta luare imojábomna ora, ndoñe yonjopodena Bëngbe Bëtsabe delante nyetscanga jatsmënana, mo chë bachnangbe más uámana amëndayacá. Y chë soyëngnaca jtsayanana, chë Bëngbe Bëtsabiana uátšëmbona soyëngaca y bachnanga tmojanóba bayëngaca, ndoñe tonjanopodé jamana canÿa Bëngbe Bëtsábioye adoraráy, Bëngbe Bëtsáftaca tempcá tšabá chaótsatmënama y Bëngbe Bëtsá chabe bacna soyëngama thojaperdonama ainaniñe corente chaotsetatšëmbuama. <sup>10</sup> Chënga, chë

uátšëmbona soyëngaca y tmojanóba bayëngaca tmojanma nÿe ntšamo Moisesbe leyíne yojanayancá, ndayá chiñe yojanlesenciancá, ndayá jasama o jofšiyama, y chë cuerpo jalebiana mo tšabe entšangcá Bëngbe Bëtsabe delante jtsatsmënama; nÿetsca mandënga nÿe cuerpama, pero ainanama tondaye ntjamana. Pero chë entšanga chca yojánama jtsamana, nÿe Bëngbe Bëtsá inÿe soyënga, más tšabe soyënga jamama tojamandantscuana, chë tsëm trato jóbama ora.

<sup>11</sup> Pero Cristo ya tojánabo, y cha yomna chë Bëngbe Bëtsabe delante bëngbiana impadaná mo chë bëngbe bachnangbe más uámana amëndayacá, chca, bëngbiana chaotsemnama chë tšabe soyënga ntšamo mochjoyëngacfiécá. Chë luare celoca ndayentše cha Bëngbe Bëtsabe delante mo bachnécá yotrabája, puerte tšabe luare yomna, y chentše cha, ndoñe chë quem luarentše bachnanga imomnëngcá, cha yobena jamana lempe ntšamo Bëngbe Bëtsá entšangbiana jamama inajuabnaycá. Chë luare ndoñe entšangbe cucuátšeca yondëpormana, y chca jtsayanana, quem luarentša soye ndoñe yondmëna ca. <sup>12</sup> Cha, canÿe y nÿetsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buíne tonjanabuyamba, ntšamo chë inÿe bachnanga imojuamancá; ndayá jóbánëse, chabe buíne juabuáshanëse, cha tojanma entšanga atsebácanënga jtsemnama chamotsobenama; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nÿetsca tescama yomna tšabe vida jtsebomnama chamotsobenama.

<sup>13</sup> Ndëmuanyënga ndayámna chë leyama tmojanoquedá mo chë Bëngbe Bëtsabe delante ndoñe tšabengcá, chë bachnanga imojuamana chëngbioye toronga y chivëngbe buíne jabuéscacjana, y chë altaroca tcojajuinÿé ternerabe jatinyá chëngbioye jatbótotana, chca, chënga jábiamama Bëngbe Bëtsabe delante mo tšabengcá. Chca tmojamentšana, chë bachnanga tmojánayana chënga imojtsobena chë inÿengaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca. <sup>14</sup> Ndayá bachnanga tmojanmca yojánamana entšanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë inÿengaftaca Bëngbe Bëtsábioye jadórama tmojanobenase, jtsachetšá más yojtsámama Cristbe buíne, ndëmuanyëye tojanábuashana bëngbiana cha tojanóbana ora! Chë nÿets tempo vida bomná Espiritbe obenánaca, Cristo, chabe derecho vida jtsobomñama cachcá tojanonÿá y bëngbiana tojanóbana. Cha, chë ndocna bacna soye ndbomná, tojanóbana ora yojamna mo canÿe bayá tondaye ndbemaná chë bachnanga cuafjocabá juatšëmbonama, entšangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiana tojanóbanayeca, Cristo yobena jamama bënga ainaniñe corente tšabá chamotsetátšëmbo, bacna soyënga bënga tmojamama, chë ndoñe vida jtsebomnama bënga junatsana soyënga, chama bënga perdonánënga imojtsemnama, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservënëse.

<sup>15</sup> Chiyeca, Cristo jóbánëse tojama entšanga Bëngbe Bëtsáftaca cánÿiñe mo canÿacá chamotsemnama, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entšanga chamotsemnama tojáchembënga perdonánënga chamotsemnama, chë Bëngbe Bëtsabe tempsca tratentša ley jtsocumplínama inamna ora imojoyenentscuana bacna soyënga tmojanmama; y chëngnaca chamotsobenama chë nÿetsca tescama mochtsebomna soyënga jóyëngacñama, ntšamo Bëngbe Bëtsá chabe entšanga tojanašebuachenacá.

<sup>16</sup> Ntšamo canÿe testamentiñe tojtsayancá chaopasamna, jtseytana chaotšotátšëmbo chë chca jamama tojašbuachená cha tojóbanama. <sup>17</sup> Canÿe testamento tondaye ntšamanana, chë chca jamama tojašbuachená cha cabá ainá totsomñëntscuana; nÿa cha tojóbana orna aiñe. <sup>18</sup> Chiyeca chë Bëngbe Bëtsabe natsana trato, entšangbeñe tojanobojatšë, chora tmojanóba bayëngbe buíne jabuéscjëse. <sup>19</sup> Moisés chë leyentša nÿetsca mandënga nÿetsca entšanga tojánabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buíne búyeshca enajuabnëyiñe tojanfhecuaçuá, y chora chë leyënga librëšañe tojanbuoscacja, y nÿetsca entšangbeñnaca. <sup>20</sup> Y mëntšá tojánayana: “Quem buíne entsinÿinÿná, ntšamo Bëngbe Bëtsá tojamandacá ndegombre yochtsemnama, y tšëngaftangbiana puerte yochtsámanama ca.” <sup>21</sup> Moisésnaca buíne tojanbuoscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoservena. <sup>22</sup> Er ntšamo leyíne iuayancá, yojtsemna nÿa mo nÿetsca soyënguiñe buíne jabuéscacjana, Bëngbe Bëtsábioye jadórama tšabá chaoservema; y buíne ndoñe tonjuábuashanësa, ndoñe ntsopodénana entšanga bacna soyëngama perdonánënga chamotsemnama.

*Cristo jasúfriase y jóbánëse, tojanma entšanga bacna soyëngama perdonánënga chamotsemnama*

<sup>23</sup> Chíyeca jtseytana chë Bëngbe Bëtsábioye quem luarentşe jadórama soyënga, chë bachnanga chamoma, Bëngbe Bëtsábioye jadórama tsábá chaoservema, chë Bëngbe Bëtsábioye jëtschuayama tmojóba bayëngbe buíñeca. Chë soyënga batsatema jtsinyányayana ntşamo chë celoca luare yomnana Bëngbe Bëtsabe delante, ndayentşe Jesús yoservena. Lempe ntşamo chë Bëngbe Bëtsábioye jadórama luarentşe yomncá, chabe delante celoca, Jesucristo tojanma, chábioye jadórama tsábá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentşe inmëtsama soyëngama. <sup>24</sup> Er Cristo ndoñe tonjánamashëngo canye luarentşe Bëngbe Bëtsá jadórama nye entsangbe pormánentşe, ndaye luare nye batsatema jtsinyányayana ntşamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiana jtseimpadánama. <sup>25</sup> Chë bachnangbe más uámana amëndayana chë “más uámana luaroye” jamashënguana canye cada uata, bayëngbe buíñeca, ndoñe cachabe buíñeca, chca, ndayánaca jamama entsanga bacna soyënga tmojamama perdonánënga chamotsemnana. Pero Cristo chë luaroye celoca ndoñe tonjánamashëngo, chentşana jtésebocnama, y chabe buíñe juabuáshanëse cachiñe jatóbanama, y ba soye cachcá chauëtsemnana. <sup>26</sup> Chca tojtsemnëse, Cristbiana manjanmëna jasúfriana y jóbana ba soye, chë Bëngbe Bëtsá quem luare tojanma orscana. Pero ntşamo tojopasacá entsemna, mora chë quem luare jopochócama tempo yojtsobeco ora, Cristo canye y nyetsca tescama tojenonjinyé quem luarentşa entsanga bacna soyënga jabuajuánama, chëngbiana jóbánëse, mo entsangbe bacna soyëngama canye tmojóba bayá, Bëngbe Bëtsábioye uatşëmbonacá. <sup>27</sup> Cachcá, ntşamo nyetsca entsanga jtsamnana nye canye jóbana, y chentşana Bëngbe Bëtsá chëngbiana jayanana chë imojëtsiyenëntscuana ntşamo tmojanmcá tsábá o ndoñe tsábá bëtsemnana, y chëngaftaca jamana ntşamo chora tojajuabocá, <sup>28</sup> cachcá, Cristnaca, nye canye chabe derecho vida jtsobomñama cachcá tojanonýa, chabe buíñe juabuáshanëse jóbana, ba entsanga bacna soyëngama jáperdonama; y chentşana cachiñe yochjésabo, ndoñe bacna soyëngama entsanga jabáperdonama, ndayá chë cha cháuesabama tşa tmojátmanënga jabátsebacama.

## 10

<sup>1</sup> Chë Moisesbe leyentşa mandënga, ntşamo chë bachnanga yojánamnama Bëngbe Bëtsá jadórama tmojóba bayëngaca y inyë soyëngaca, ndoñe ntsinyányayana lempe chë Bëngbe Bëtsá chabe entsanga jatsatayana puerte tsabe soyënga, pero aïñe batsatema jtsinyányayana ntşamo chë soyënga yochtsemnana. Chíyeca chë mandënga, chë uatşëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtseboşënga, chca soyënga tmojtsamama cada uata nyets tempo, chënga ainaniñe corente chamotsetatşëmbuama chëngbe bacna soyëngama nyetsca tescama perdonánënga imojtsemnana. <sup>2</sup> Er ndayá tcojtsamama Bëngbe Bëtsábiana uatşëmbona soyëngaca y chábioye jëtschuayama tmojóba bayëngaca, entsanga Bëngbe Bëtsábioye adórayënga, chabe delante tsábënga jtsemnana matmënjjanobenase, chënga chë bacna soyënga tmojanmama ainaniñe ngmënaca ya ndoñe mamënjëtsemna, y matmënsanajbaná soyënga amana chë tmojóba bayëngaca. <sup>3</sup> Pero juatşëmbonama entsanga bayënga tmojóba ora, josérviana entsanga bacna soyënga tmojamama cada uata chamuatenójuaboma; <sup>4</sup> er chë toronga y chivënga tmojóbanëngbe buíñeca ndoñe ntsopodénana entsangbioye bacna soyënga jabuajuánama.

<sup>5</sup> Chíyeca, Cristo quem luaroye tojánabo ora, Bëngbe Bëtsábioye mëntşá tbojanianana: Ndoñe tconjábosena entsanga chacmátşëmbona soyënga, ni tmojobaye bayënga, pero aïñe tcojama atşe canye entsacá chaitsemnana.

<sup>6</sup> Ndoñe tsábá quecmátinýana chë tmojóba y tmojajuinýe bayënga, entsanga bacna soyëngama chacotsaperdonama.

<sup>7</sup> As atşe Bëngbe Bëtsá sënjanianana: “Bëngbe Bëtsá, muentşe sëntsemna, ntşamo aca icoboşcá atşe chaimama, ntşamo acbe uabemana palabrenguñe atşbiana endayanca, chë ndayá atşe chjanmama ca.”

<sup>8</sup> Natsana, Cristo tojánayana, Bëngbe Bëtsá ndoñe tonjánboşena, ni tsábá tbonjaninýnana entsanga chamuátşëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinýe bayënga, entsanga bacna soyëngama cha chacotsaperdonama ca, masque chënga chë Bëngbe Bëtsábioye jadórama soyëngaca jamana, ntşamo leyinë uyayancá ndayá chënga jamama yojtsamna. <sup>9</sup> Y chentşana, Cristo Bëngbe Bëtsábioye tbojátaniana: “Muentşe sënjabo, chë ntşamo aca icoboşcá atşe chaimama ca.” Chca, Cristo tojinýanýe chë jtsamana soyënga tmojóba bayëngaca, tondaye yonduámana entsanga bacna soyënga jabuajuánama, y entsangbe bacna soyëngama jóbánëse tojaninýanýe chë ntşamo Bëngbe Bëtsá yoboşcá jtsamana, más uámana chë inyë soyënga játamama. <sup>10</sup> Bëngbe Bëtsá tojama,

bënga chabe entšanga y chabe delante tsábenga chamotsemnana, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñana cachcá jonýayése y entšangbe bacna soyëngama jóbaneše, canýe y nyëtsca tescama.

<sup>11</sup> Judiëngbe nyëtsca bachnanga nyëts tempo ba soye altarentša natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama. <sup>12</sup> Pero Jesucristo entšangbe bacna soyëngama tojanóbana ora, yojamna mo canýe tmojóba bayacá, Bëngbe Bëtsá entšanga bacna soyëngama cháuaperdonama; nyë canýe y nyëtsca tescama chca tojanma, y chentšana Bëngbe Bëtsabe catsbioica tojtanoítbema, canýe uámana puestentše, jtsemándayama. <sup>13</sup> Chentše cha yobátmana, Bëngbe Bëtsá chabe obenánaca Cristbe uayayënga chabe cucuatšife chamomedama yochjamëntscuana. <sup>14</sup> Er nyë canýe, entšangbe bacna soyëngama cruzoca jóbaneše, Jesucristo lempe tojama, entšanga chë Bëngbe Bëtsábenga jtsemnana chémbonënga, chabe delante nyëtsca tescama tsábengcá chamotsemnana. <sup>15</sup> Y Uámana Espíritnaca, Bëngbe Bëtsabe uabenana palabrënguife šontsinýanýná chca ndegombre bëtsemnana, mëntšá tojánayana ora:

<sup>16</sup> Ndayá entšangbiana chjama, canýe tempo chentšana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye, y chamotsejuabnana chë chëngbe juabniñe chaitsemánda soyama ca.

<sup>17</sup> Y chentšana mëntšá tojánayana:

Ndocna te más quichátsjuabnaye chënga bacna soyënga tmojamama,

y ntšamo atše stsebošcá contra soyënga chënga tmojamama ca.

<sup>18</sup> Chcasna, Bëngbe Bëtsá nyëtsca tescama entšanga bacna soyëngama tojaperdoná ora, ya ndoñe ntjátsiytana inyë soyënga más játamama, mo bayënga cuařjobaycá, entšanga bacna soyëngama perdonánënga chamotsemnana.

#### *Sontsamna Bëngbe Bëtsábioye jtobéconana*

<sup>19</sup> Y chca, Jesucristbeyeca catsátanga, Jesusbe buiñe tojanábuashanama y bëngbiana tojanóbana, chábeñe jtsošbuáchiyëse, bënga montsobena, tondayama ntjatauajcá Bëngbe Bëtsabe delante jamashënguama. <sup>20</sup> Bënga montsobena jamashënguama chë tsëm benachëjana, Cristo bëngbiana tojamëjana; cha nda inétsama chë nyëtsca tescama yomna tsabe vida chamotsebomnana. Mo chë quem luarentše chë bachnangbe más uámana amëndayacá, chë ujonýana entšëjuajana jamashënguana chë “más uámana ca” uabaina luaroye, Bëngbe Bëtsabe delante jtsemnana, cachcá, Cristo bëngbe bacna soyëngama mo entšacá tojanóbanayeca, bëngnaca montsobena Bëngbe Bëtsabe delante luaroye jamashënguama. <sup>21</sup> Bënga mondbomna canýe bëtš bachnangbe más uámana amëndayá, Bëngbe Bëtsabe entšángbeñe jtsemándayama, y cha endmëna Jesús. <sup>22</sup> Chýeca, Bëngbe Bëtsá jaserviama ndegombre ainaniñe corente jtsëbošëse, y chábeñe puerte jtsošbuáchiyëse, šontsamna Bëngbe Bëtsábioye jobéconana. Ntšamo chë bachnángbioye buiñeca tmojanabuešcaciá, Bëngbe Bëtsabe delante tsábengcá chamotsemnana cha jaserviama, cachcá, Cristbe buiñe juabuáshanëse y bëngbiana jóbaneše, bënga ainaniñe corente montsetátšëmbo Bëngbe Bëtsá nyëtsca tescama bëngbe bacna soyëngama šojtsaperdonama. Y bënga bëjeyeca uabainëngnaca mondmëna; chýeca bënga jtsobenana Bëngbe Bëtsábioye chca jobéconana.

<sup>23</sup> Bënga šontsamna nyëts tempo Bëngbe Bëtsábeñe puerte jtsošbuáchiyana, y ndocna te nyë ndayámnaca játajbanana entšángbeñe ichámuana, chë Bëngbe Bëtsábeñe jtsošbuáchiyëse bënga imobatmana soyënga cha yochjamama, er chë soyënga šojašebuachená cha, sempre jamana ntšamo tojayancá. <sup>24</sup> Bënga šontsamna janguanguana ntšamo muatjobenaye añemo jenatšetayana, nyëtscanga jtsenbobonshánana, y ntšamo tsábá yomncá jtsamana; <sup>25</sup> pero ndoñe quešnatáma játajbanana, Bëngbe Bëtsábioye jadórama enefjuana mo Cristbeñe ošbuáchiyënga quetsomñecá, ntšamo báseftanga imojtsamcá. Chamna, nyëtscanga añemo mochtsenatšetnaye Cristo nyëts tempo jtseservénana, y más mora, chë ndayá imojtsonýama, Bëngbe Utabná yochjésabama ya yojtsobecuama montsetátšëmbo ora.

<sup>26</sup> Er chë ndegombre soyëngama tsábá tmojátatšëmbonentšana y chë soyënga tmojoyeuná chentšana, bacna soyënga jtsamëse tmojtsiyena, nyë chca jamama tmojtsëboše causa, muattsaboté ndayá Cristo bëngbiana tojanmca, bëngbe bacna soyëngama cha tojanóbana ora, y ya tondaye nántsemna ntšamo Bëngbe Bëtsá bënga jtsaperdónama. <sup>27</sup> Y chca, ndayá bënga muattsobena jobátmana soye nántsemna nyë chë Bëngbe Bëtsábioyena castigo, chë ndayama šojtsamna uatjana jtsëbomnana; y nyë jobátmana chë tempo, ndaye ora Bëngbe Bëtsá puerte etonaná chabe uayayënga bëtscá iñesheca yochtsapochóçaye. <sup>28</sup> Ndnáca chë Moisesbe leyama tojayana tondaye yondovalena ca, y útata o únganga chca tmojouena y aife cha chca tojayana ca chënga tmojanayëse, jtsemnana chë entšábioye jtsóbana, tondaye ntjalastemacá. <sup>29</sup> Canýa, nyëts ainánaca Bëngbe Bëtsabe Uaquiñábioye tbojtsaboté; y tojayana Cristbe buiñe,



chê ndémuanÿeye tojanábuashana bêngbiana tojanóbana ora, tondaye yonduámama ca, ndayá nÿe ndaye entsábe buiñá ca, chê buiñe chê ndémuanÿeye sojtsinÿanÿná ndayá Bêngbe Bêtsá tbojasebuachenacá bêngbiana jamama, y ndáyeca Bêngbe Bêtsá chabe entsanga sojábiana, cha jaserviama; chê entsá Uámama Espíritbioye tbojóyenguango, nda inétsama bênga tsábe soyénga chamotsebonnama; y canÿa chca amá, ztséngaftanga ndoñe šmontsejuabná cha ibojtsomerecena Bêngbe Bêtsábicana canÿe puerte más uabouana castigo, chê Moisesbe leyama tondaye yondovalena ca tojayanabiama? <sup>30</sup> Bênga nÿetscanga mondétatšëmbo Bêngbe Bêtsá mentsá tojánayana: “Atše chanjama chénga chamosufrima, ínÿenga chamosufrima tmojama causa; y chénga chanjácastigaye, ínÿengbioye bacá tmojaborlá causa ca.” Y mentsánaca tojánayana: “Bêngbe Uatbná chabe entsangbiana echanjajana ntšamo tmojëftsemcá tsábá o ndoñe tsábá bétsemnama, y chéngaftaca echanjama ntšamo chora chaojajuabocá ca.” <sup>31</sup> ¡Tša uabouana, Bêngbe Bêtsá chê nÿets tempo ainabe cucuatšife joquédana, castiganá jtsemnama!

<sup>32</sup> Pero ntšamo tempo yojannama šmochtsenójuabnaye, chê ndegombre soyénga Jesucristbiana cabá chora šmonjanábuatmana ora, y chora tša jenojuéruzana cmonjanotocá padecena soyénguiñe, y chê causa tša šmojansufrí. <sup>33</sup> Báseftanga tséngaftanguentséngbioye entsangbe delante tmojanoyánguango, y ínÿenga tmojanma puerte chašmotsesufrínama; y ínÿenga tséngaftanguentséng ca imojansufrinéngaftaca šmojanama, chénga jujabuáchama. <sup>34</sup> Tséngaftanga šmojánalastemana chê chénguentšénga cárceloye imojanétámenénga; y oyejuayénga šmojanlesenciá ntšamo šmojanbomncá ínÿenga chacmotsabacama, er tséngaftanga šmojátatšémbona Bêngbe Bêtsábicana más tsábe soyénga šmojtsebonnama, chê nÿetsca tescama šmochtsebonna soyénga. <sup>35</sup> Chcasna, ndoñe šmatjabaná ainaniñe bétscá añemo jtsebonnana, ni Bêngbe Bêtsábeñe sempre jtsobatmanana; er chca šmobatmánayeca, Bêngbe Bêtsá echanjama tséngaftanga bétscá uacanana soyénga chábiocana chašmotssebonnama. <sup>36</sup> Tséngaftanga cmontsamna corente uantadénga jtsemnana, padeceniñe chašmojtsachñéjua ora, chca, ntšamo Bêngbe Bêtsá yobošcá tséngaftanga chašmotsamama, y ndayá Bêngbe Bêtsá tojanašebuachenacá chašmóyengacñama. <sup>37</sup> Er Bêngbe Bêtsabe uabemana palabrénguiñe cha mentsá tojánayana: Betsco, ndoñe bèn, y chê jabama ibomná echanjabo.

Ndoñe bèn quebochatóbema.

<sup>38</sup> Nÿe chê ndabiana atše chaijama atšbe bominÿiñe tsábia chaotsemnana, átšbeñe cha betsošbuáchema, cha ndegombre chê nÿetsca tescama yomna tsábe vida echántsebonna;

pero uatjana causa, átšbeñe ošbuáchiyana tojtsajbanase, atše cháftaca ndoñe quichátoyejuaye ca —cha tojánayana.

<sup>39</sup> Pero bênga ndoñe quemátsmèna chê uatjana causa Bêngbe Bêtsábeñe ošbuáchiyana tmojtsajbananga, y chca, nÿetsca tescama pochocánénga jtsemnana imojtsajnénga; pero añe mondmèna chê Bêngbe Bêtsábeñe ndegombre ošbuáchiyénga, y chca, chê atsebácanénga jtsemnana mochjashjáchénga.

## 11

### *Bêngbe Bêtsábeñe ošbuáchiyana jtsebonnana*

<sup>1</sup> Ošbuáchiyana jtsebonnana endmèna corente jtsetatšémбуana, ndayá tmojtsobatmancá ndegombre chca yochjopásama; endmèna ainaniñe corente jtsetatšémбуana, ndayá bênga mora ndoñe tmontsonýacá ndegombre chca yomnana. <sup>2</sup> Bêngbe Bêtsá tojánayana bêngbe bêtš taitanga tsábá imojánama ca, chénga chábeñe imojtsošbuachéyeca.

<sup>3</sup> Bênga, Bêngbe Bêtsábeñe mondošbuachéyeca, mondétatšémbo cha quem luare y nÿetsca luarénga tojanmama, chca chaotsemnana cha tojanmandá ora; chcasna, chê ndayá mora bênga jinÿyama imobencá, cha tojanma bênga ndoñe mondobena jinÿyama soyénguentšana.

<sup>4</sup> Abel Bêngbe Bêtsábeñe yojanošbuachéyeca, oveshatémènga chábioye tbojanátšémbona, y chê soye Bêngbe Bêtsábiana más tsábá yojtsemna, chê ndayá Caín, chabe catšata, Bêngbe Bêtsá jétschuayama tbojanátšémbonama. Chíyeca, Bêngbe Bêtsá tojánayana Abel chabe bominÿiñe tsábia yojtsemna ca, ndayá Abel chábioye jétschuayama tojanmcá oyejuayá tojanóyengacñeyeca. Ntšamo Abel Bêngbe Bêtsábeñe yojanošbuachecá, masque cha ya obaná yojtsemna, chê soye cabá bênga šontsabuatambá.

<sup>5</sup> Enoc Bêngbe Bêtsábeñe puerte yojanošbuachéyeca, Bêngbe Bêtsá celoye tbojesanbêtséñe, ntjobancá. Chentsana nodncá tonjanobená cha jtsinÿenana, Bêngbe Bêtsá tbojesanbêtséñe causa. Y Bêngbe Bêtsabe uabemana palabrénguiñe endayana, Bêngbe Bêtsá Enócaftaca oyejuayá canjamna ca, ntšamo jtsamése yojoyenama, y chentsana celoye tbojšanámabañe. <sup>6</sup> Pero Bêngbe Bêtsábeñe ntsošbuachiyá, ndoñe quenátopodena cha oyejuayá béngaftaca jabemama, er chábioye jobéconamna, entsá jtsemnana jtsóšbuáchiyana cha ndegombre

bétsemnana, y cha inétsamama chë cha jtsabuatumama tša tmošovëngbiama bëtscá tšabe soyënga chamotsebomnana, mo chábiocana uacanana soyëngcá.

<sup>7</sup> Bëngbe Bëtsá Noébiöye tbojanbuayená uabouana soyënga yochjanopásama, cachora ndopodena jin'yama soyënga, y cha Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá y barquëshá tojanapormá chabe pamúllanga játsebacama. Cha chca tojanma ora, ošbuáchiyana bómnyeca, cha tojanin'yányé tojanma tša bacna soyënga tmojanmama y chë causa castigánënga jtsemnana yojtsamnana. Chabe ošbuachiyánmna Noé tojánashjache Bëngbe Bëtsabe bomin'yíñe tšabia jtsemnana, y chca entšá jashjáchana, n'ye Bëngbe Bëtsábeñe jtsošbuáchiyëse.

<sup>8</sup> Bëngbe Bëtsá Abrahámioye tbojanchembo, in'ye luaroye cháuama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatšetayama luaroye, masque Abraham ndoñe yontsetátšëmbo ndëmoye yochjánama. <sup>9</sup> Bëngbe Bëtsábeñe yojanošbuachéyeca, yojobena mo in'ye luarocana ashjargonacá jtсийenaca, cachabe luarentse ndoyená, chë Bëngbe Bëtsá tbojanšbuachená luarentse. Entšëjuaca pormana tambënguiñe yojoyena, cachcá ntšamo chë chábentšana básenga Isaac y Jacob ibojéftsiyencá; y chátnaca Abrahamcá ibojanobátmana jóyëngacñama ntšamo Bëngbe Bëtsá Abrahámioye tbojanšbuachenacá. <sup>10</sup> Er Abraham corente uantadá yojanobátmana chë can'ye luaroye celoca jamashënguama tempo; chë luare inamna can'ye bëtš pueblo, puerte tšabe ucuatjoníñe pormana pueblo, can'ye luare chë ndayentšama Bëngbe Bëtsá tojanjuabó ntšamo chaotsemnana, y cachabe pormana luare inamna.

<sup>11</sup> Sara, Bëngbe Bëtsábeñe yojanošbuachéyeca, Bëngbe Bëtsá tojanma cha can'ye šešona chabotsebomnana, masque chora ya bëtšanánëjema yojtsemna, šešona jtsebomnana. Bëngbe Bëtsá chca tojanma, er Sara corente yojanjuabná, cha chë can'ye šešona yochtsanbomnana tbojanšbuachená cha, n'yets tempo ntšamo tojayancá amá yojamna ca. <sup>12</sup> Y chca, quem entšá Abraham, chë šešonga jtsabamnana y ndobenábentšana, ba básenga tmojanon'yná, tša mallajta mo chë celoca estrellëngcá, y tša chëftanga mo chë mar béjayoca chënyáñentša cascajácá, ndocná jacúntama ntjobenayana.

<sup>13</sup> N'yetsca quem entšanga imojéftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnana, y chama oyejuayënga chënga imojtsemna. Chënga tmojánayana quem luarentse chënga imojoyena mo cachëngbe luarentse ndoyëngcá, y quem luarëjana mo n'ye achñëjuayëngcá ca. <sup>14</sup> Y chca tmojtsichámëngna, puerte jtsin'yán'yayana chënga tša imojtseboše in'ye luaroca joyénanama, can'ye luare cachëngbiama. <sup>15</sup> Chënga n'ye chë ndayentšana tmojéftsanbocna luarama manjánjuabnase, matmënjánobená tšabá cachoye jeshšëconama. <sup>16</sup> Pero chëngna can'ye más tšabe luare inabnoše, can'ye luare celoca. Chiyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechembuanama, er celoca can'ye bëtš luare, mo can'ye bëtš pueblécá chëngbiama tojanprontá.

<sup>17</sup> Bëngbe Bëtsá Abrahámioye jin'yama, ndegombre aiñe o ndoñe Bëngbe Bëtsábeñe tayojtsanošbuachema, tbojanmandá chabe uaquiñá Isaac chabuánatse jóbama, chábioye jëtshuayama, ntšamo Abraham chë tojóba bayëngaftaca jamama yojanamancá. Cha Bëngbe Bëtsábeñe yojanošbuachéyeca, yojtseprontana chë n'ye can'ye uaquiñá ibnabomná jóbama, Bëngbe Bëtsábioye jëtshuayama, masque Bëngbe Bëtsá mëntšá tbojanšbuachená: <sup>18</sup> "Chë ácbentšana entšanga n'ye Isaacbiajana mochanjabo ca." <sup>19</sup> Abraham corente yojanjuabná y yojátatšëmbo, Bëngbe Bëtsá ndegombre obenana bomná bëtsemnana, chë obanënga chámuatayenama jamama. Chiyeca, Bëngbe Bëtsá Abrahámioye tbojtsanauyaná Isaac jóbama ora, yojamna mo Abraham obanënguentšana chábioye cuaftoyëngacñécá. Y chca, ntšamo Isaac tšaca tojanopasacá, batšá yojtsin'yán'yaye ntšamo Jesucristoftaca yochjanopasacá.

<sup>20</sup> Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiamá, Jacob y Esaú, bëtscá tšabe bendicionënga chabotsebomnana, chë joshjanuama tempënga ora.

<sup>21</sup> Jacob Bëngbe Bëtsábeñe yojanošbuachéyeca, ya jóbana ora, tbojanimpadá cada ona chë Josebe básëngbiama, Bëngbe Bëtsá chaoma bëtscá tšabe bendicionënga chamotsebomnana. Cha chca tojanma, jotsejbénase Bëngbe Bëtsábioye jadórana, y chabe jatjonëfiñe tšbanánoca jojuáchase.

<sup>22</sup> José Bëngbe Bëtsábeñe yojanošbuachéyeca, ya jóbana ora, tojánayana más chcoye chë Israeloca entšanga Egiptó luarentšana mochjéftsanbocna ca, y tojéftsanmandá ndayá jamana chabe óbana cuérpoca.

<sup>23</sup> Moisesbe bëtšëtsata Bëngbe Bëtsábeñe ibojanošbuachéyeca, cha tojanon'yná ora, unga shin'yëntscuana cha tmojtsaniytëme, er chata tbojánin'ye cha can'ye botamana

básetema bétsemnana, y ndoñe tbonjanéuatjana chë reybe mandama, chë nyetsca judiëngbe basetëmënga boyabásetëmënga jtsëbáyana.

<sup>24</sup> Moisés Bëngbe Bëtsábeñe yojanošbuachéyeca, ya bëtsá yojtsemna ora, ndoñe tonjánbošena chë Egiptoca reybe bembëbe uaquiniácá chamotsábuatmama. <sup>25</sup> Chamna, tojánbošena cha jasúfriama ínÿenga chamotsamama, canÿiñe chë Bëngbe Bëtsabe entsángaftaca, y ndoñe ñye baseftayté tsábá jatsmënana, bacna soyënga jtsamëse, ntšamo cachá tojtsejuabnacá, ñye cachá tsábá jtsomñiama. <sup>26</sup> Chamna, cha yojanjuabná, chë padecena soyënguñe jasúfriana ntšamo Cristo tojansufriá, más tsábá yojamna chë Egiptoca uámana soyëngama, er cha Bëngbe Bëtsábeñe jtsosbuáchiyëse chábeñe yojanóbátmana, ba tsabe soyënga mo canÿe uacanana soyá cha ibochjanatsetayama.

<sup>27</sup> Bëngbe Bëtsábeñe yojanošbuachéyeca, Moisés Egiptocana tojëftsanbocna, chë luar-entša rey cháftaca chábuatnana ntjatauatjácá. Cha ainaniñe nyets tempo añemo yojtsebomna, y hccha yojáninÿna mo chë ndocná jinÿama tondobenacá, Bëngbe Bëtsábioye cuaftsonÿacá. <sup>28</sup> Bëngbe Bëtsábeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë Israeloca entsángaftaca yebñëngoye amashjuaniñe buñfeca tojanbuéscacaja, hccha, chë ángel obanayá, chë Israeloca pamílangbeñe Egiptoca chë mayor uaquinënga ndocá chaondámama.

<sup>29</sup> Moisés y Israeloca entsanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuaftsomñácá; chentsana, chë Egiptoca entsanga cachcá jamama tmojánbošena ora, nyetscanga chiÿiñe tojtsanatajo.

<sup>30</sup> Israeloca entsanga Bëngbe Bëtsábeñe imojanošbuachéyeca, chë Jericó bëts pueblentša tapiëšënga shëconana canÿsëfta tentscuama chënga imojánajnentšana, chëšënga yojtsáshajaye.

<sup>31</sup> Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínÿengaftaca, chë bëts pueblentse oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entsanguentšana ichmónënga tsábá tojanëbuaja, chë jarrepárama tmojánanga ntšamose chë luarentse oyenënga jáÿëñjanama jobenayama.

<sup>32</sup> Atse sëntsobena banghiana más jóyebuambayama, Bëngbe Bëtsábeñe ošbuáchiyëngbiana, pero luare šattsëshbe hcchangbiana jóyebuambayama, mo Gedeonca, Barac, Sansón, Jefté, David, Samuel y Bëngbe Bëtsabe juabna oyebuambnayëngcá. <sup>33</sup> Chënga Bëngbe Bëtsábeñe imojanošbuachéyeca ínÿengbe mandadëngbe entsángbioye tmojanayëñjaná, bëtsá imojánama nyetsca entsángaftaca ntšamo tsábá yomncá jtsamama y nyetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuateráyëngboma, chentsana báseftangbioye ndocá chamondámama. <sup>34</sup> Ošbuáchiyana bómnyeca, Bëngbe Bëtsá tojanma lempe chaotsefsanama, chëngbioye iñeshiñe tmojanacá ora, chënga ndocá chamondëpasama; tmojanotsbocá espadëjaca jobanámentšana; ya tondaye añemo bëntsebomna ora, Bëngbe Bëtsá tojanma bëts obenana y puerte añemo chamotsebomnana; tmojánashjache bëts obenana jtsebomnana ínÿenga jáÿëñjanama, chëngaftaca imojtsentsjaná ora; y tmojanobená ñnye mandadënga y chëngbe soldadënga jáÿëñjanama, chamotsachetama jamëse. <sup>35</sup> Ošbuáchiyana bómnyeca, básefta shembásënga chëngbe óbana pamílangbioye cachiñe ainënga tmojtananÿe, chënga ainënga chamotsatsmënana Bëngbe Bëtsá tojanma ora.

Ošbuáchiyana bómnyeca, ínÿenga tmojanma básefta ošbuáchiyënga, puerte chamosufrima, y jobanámnaca; er chënga más tmojánbošena jashjáchana chë nyetsca tescama yomna tsabe vida jtsebomnana, y ndoñe ñye chë jótšocana batsatema más vida jtsebomnana. <sup>36</sup> Ošbuáchiyana bómnyeca, ínÿenga corente tmojanusufrí, ínÿenga chëngbioye tmojanoyánguango ora y tmojanatsetšená ora; y ínÿenga tmojanusufrí y cárceloje cadenëjuangaca utámenënga joquédamnaca. <sup>37</sup> Inÿëngbioye ndëtsbéngaca tmojtsanatëchënganja, serruchëshaca tmojtsanëjácacaye, espadëjaca tmojtsanëbaye. Inÿenga imojánajna canÿyentsana inÿecnoye ñye oveshá y chivëbe bobáheca uichëjtjonënga, ujabótënga, ainana tsetšanënga, y inÿëngbeyeca mocá borlánënga. <sup>38</sup> Chë ñye quem luarama enójuabnayënga ndoñe monjanomerecena chënga mëngaftaca jtsiyenama, chënga chë vida imojábomna canÿyentsana inÿecnoye aníñe, entsanga ndoyena luarënguenache, tjañenache, fshantsiñe atëbëñiñe y cuevëshënguñe.

<sup>39</sup> Nyetsca quem entsanga, ndëmuanÿëngbiana muentse tmonjoyebuambá, Bëngbe Bëtsá tsábá chëngbiana tojánayana, ošbuáchiyana imojánbomna ca; pero ni canÿa chënguentšá tonjanóyëngacñe, ndayá Bëngbe Bëtsá chëngbe entsanga jatsatayama tojanašebuachenacá, nyetsca tescama jtsebomnana. <sup>40</sup> Bëngbe Bëtsá, bëngbeñe jtsejuabnayëse, tojanjuabó canÿe más tsabe soye bëngbiana jamama, hccha, Bëngbe Bëtsá canÿe ora jamama, bënga nyetscanga,

chënga y bënga chamotsemnama lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jóyëngacñëse.

## 12

*Bënga mochtsejuabnaye ndayá Jesús tojanmama*

<sup>1</sup> Chíyeca, bënga mochtsejuabnaye ba entšangbiamá, chë bëngbiamá más natsana imojaniyenënga, ndëmuanýënga puerte tšabá bënga jtsinýanýnáyana ntšamo ndegombre yomnana Bëngbe Bëtsábeñe ošbuáchiyana jtseboamnana, mo chënga ndayá bënga tmojt-samama cuaftsonýangcá. Chcasna, mo chë tmochamanëngcá, ínýëngaftaca jenýëñjanama, chë jashjanguama tojtsemna luaroye natsana jashjanguama, chënga jotjajuamna, chë chorscama nduaserverna entšayá jtšenátsejcana, y lempe ndayá tojtsama más uenana chamotjajuama soyëngnaca jtseñójacana; bëngnaca cachcá, ndoñe matjaleséncia bënga Cristbioye ndoñe tšabá ndëtsošservénama, ni chë bacna soyënga jamama juabnënga, chë bëngbioye paselo jáyëñjanama juabnënga cachcá chamotsamama. Chamna, šontsamna sempre Bëngbe Bëtsá jtsešervénana, puerte uantadënga jtsemmëse masque padecena soyënguiñe tmoyena, bënga chamobená chë trabajo jamama, chë ndayama Bëngbe Bëtsá šojáchembo. <sup>2</sup> Jesusbiamá mochtsejuabnaye, nda šuebëñatsana bënga ošbuáchiyana chamotseboamnana, y šuinýanýná ntšamo nýets tempo nýetsca soyënguiñe Bëngbe Bëtsábeñe jtsošbuáchiyama. Cha chë cruzoca jóbanama sufrínana lempe tojanobuyá, er cha yojanobátmana chë chentšana yochtsanbomna bëts oyejuayánama; y yojanjuabná, chë más bacá uamana entšangcá jóbanana, chabiamá ndoñe canýe uamana soye yonjamna ca; y chentšana chë uamana puestentše tojtanoñbema, Bëngbe Bëtsábeñe catšbioica, jtsemándayama.

<sup>3</sup> Chíyeca, šmochtsejuabnaye ntšamo Jesús Bëngbe Bëtsábeñe jtsošbátmanëse, puerte uantado yojamnama, chë bacna soye amënga corente chabe contra imojtsemna ora. Chca chábëñe šmochtsejuabnaye, tšëngaftanga Cristbiamá oservëniñe ndoñe chacmondëumantšema, ni ainaniñe añemo jtseboamnana ndoñe chašmondájbanama. <sup>4</sup> Tšëngaftanga padecena soyënguiñe šmojachnëgo, entšanga bacna soyënga imojtsama causa, pero mëntsoñama ndoñe cmontsamna jóbanama, Cristbe soyëngama enojuerzáníñe; <sup>5</sup> y tcmojtsébnëtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuayenama. Chë Bëngbe Bëtsábeñe uabemana palabrénguiñe mëntšá endayana: Atšbe uaquíñá, Bëngbe Utabná aca jábuayenama tojtseboše ora, aca jasúfriase y padecena soyënga jauántase,

chora ndoñe catjásjuabnaye chíñe mo canýe nduámana soye cuaftsemncá;

y cha chacmojuácacana ora, ndoñe cattsajbaná ainaniñe añemo jtseboamnana.

<sup>6</sup> Er Bëngbe Utabná jábuayenana nda cha tboobonshanábioye,

y jácastigana chë mo chabe uaquíñacá tbojofábioye ca —chíñe endayana.

<sup>7</sup> Padecena soyënguiñe chašmojtseufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangftaca jtsamana mo chabe básenga quetsomñecá. ¿Nderado nántsemna canýe uaquíñá, y chábioye chabe taitá ndocna te buanjuácacana, más tšabá chaotsamama? <sup>8</sup> Nderado Bëngbe Bëtsá tšëngaftanga ndoñe tcmojábuayená, ntšamo nýetsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga. <sup>9</sup> Y bënga básenga monjamna ora, bëngbe bëtsétsanga quem luarentše monjanamana bënga jácastigana, y bënga chëngbioye ndoñe stëtsoye ntjaquédana. Y mora, bënga más šontsamna, jtsošbedecénana y más bëts respeto jtseboamnana celoca Bëngbe Taitabiamá, nda tojama entšanga espíritu chamotseboamnana, y chca, bënga tšabe vida chamotseboamnana. <sup>10</sup> Bëngbe bëtsétsanga quem luarentše, nýe básëfta tescama, bënga jéftsabuayinyana, y chca jamana chënga tšabá tojtsinýana ora; pero Bëngbe Bëtsá bënga šojtsabuayíñá ora, siempre chca jtsamana bëngbe tšabiamá, bënga chabe entšanga jábiamama, cachacá puerte tšábënga, ntšamo cha nýets tempo yomncá. <sup>11</sup> Sempre bënga ndaye castigo tmojtseboamna ora, chora bënga chama ndoñe oyejuayënga ntsemnana, pero añe cochtsetšëñánënga. Pero bënga chë castigüentšana tmojuatsjínýe ndayá Bëngbe Bëtsá chë sóyeca tbojtsabuayíñacá, as chentšana jóbocnana ntjëmbana oyenana, nýetsca soyënguiñe ntšamo tšabá yomncá jtsamëse.

*Bëngbe Bëtsábioye jtsabotena, entšangbiamá ndoñe tšabá ntsemnana.*

<sup>12</sup> Mo nda puerte uamëntšnayacá, jatrabájama tondaye añemo ntjtseboamná, tsátšëna buacuatséngaca y puerte uamëntšëna ntsamiaséngaca, tšëngaftangbentše básëftanga ya uamëntšayënga šmojtsemna Bëngbe Utabnabiamá trabájayíñe, y ainaniñe ndoñe añemo šmontseboamna. Cachiñe bëts añemo šmochtishache, y Bëngbe Bëtsábeñe obenana cachiñe šmochtsatsboamna. <sup>13</sup> Mo chë canýe benache tšabá y ndericho chaotsemnana tmojtsamëngcá, chca, chë coshetënga chíñe jama chamotsobenama y más tšabá jtsatanama chamuatatsjínýama, y chë benachentšana ndoñe chamondëtseboacanama; cachcá

tšëngaftanga, chë bëtsá ošbuáchiyana y Cristo jasérviana corente añemo šmobbomnënga, chë nÿe batšatema ošbuáchiyana y chca jatrabájama nÿe tondaye añemo ndbomnënga šmochjújabuache; chë soye šmochjama, ntšamo Cristo tšabá jasérviana yomncá jinÿanÿiyëse, y ntjalesenciá ndocna soye chaotsama chë tšabe benachentsana tšëngaftanga chašmotsojuánañama.

<sup>14</sup> Lempe ntšamo chašmojobenacá šmochjama nÿetscángaftaca natjëmbana jtsiyenama, y ntšamo Bëngbe Bëtsabe entšanga mondbetsamcá jtsamëse chašmotsiyenama, cha jtseservënëse; er chca ntjamcá, canÿa ndoñe ntsobenana Bëngbe Utabnábioye jinÿama. <sup>15</sup> Yejuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entšangbioye yochjatšataye tšabe soyënga chënga ndoñe chamondashjache. Smochtsantješna, tšëngaftanguentše ndocná chaondëtsemna, mo canÿe untja tbëtëjácá, chë chcaja sayëngbioye jásocayana, nda chaotsama, inÿyënga natjëmbana ainana ndoñe chamondëtsebonnama y bacna soyënga jtsamëse chamotsiyenama. <sup>16</sup> Yejuana šmochtsantješna ndocná tšëngaftanguentše shembása o boyabásaftaca bacna soye amá chaondëtsemnana, ni canÿa ndabiana Bëngbe Bëtsabe soyënga tondaye chaondëtsámana. Esaú chca tojanma, chë lempe yochjanashjachcá, mayor uaquiñá bëtsemnana, chabe uabentsábioye canÿe šcena sanama tbojtaname ora. <sup>17</sup> Y tšëngaftanga šmondëtatšëmbo, chca tojanopasá chentšana, Esaú tojánbošena chabe taitá Bëngbe Bëtsábioye chaompadama, chabiana tšabe bendicionënga chaomama, chë mayor uaquiñá bëtsemnana yojanobena jtsebonnana soyënga; pero chora chabe taitá ndoñe tbojanoyeuná, er masque Esaú chora juabna tojantrócá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuiyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

<sup>18</sup> Tšëngaftanga ndoñe chešmatobecná, mo chë entšanga Israeloca Sinái ca uabaina tjoye tmojanobecnacá, ndayá chënga imojobena jabojuama, y ifñesheca yojšángbototjuana, tondaye binÿinife luare, tša ibetiñe y puerte jabuache binÿiëngaca; <sup>19</sup> ni chešmatuena chëngcá, canÿe trompetëfjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtsoyebuambnana. <sup>20</sup> Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojyená, masque canÿe bayá chaotsomñe, entsemna chana ndëšbëngaca chamotsatëchënjanga jtsóbama ca.” <sup>21</sup> Ndegombre, ntšamo tmojaninÿcá tša uabouana yojtsemna, cach Moisésnaca mëntšá tojánayana: “Tša šontsengmëmna auatjananá sëntsemna causa ca.”

<sup>22</sup> Pero tšëngaftanga Bëngbe Bëtsábioye šmojobecná, y chca endmëna mo tšëngaftanga canÿe Sión ca uabaina tjoye celoca cuafjobecnacá, chë Bëngbe Bëtsá nÿets tempo vida bomnabe bëts puebløye, mo celoca Jerusalén cuenta; y ba uaranga angelëngbioye šmojobecná, canÿiñe oyejuayënga enefjuanënga imojtsemnëngbioye, Bëngbe Bëtsá jtsatschuanayama. <sup>23</sup> Endmëna mo tšëngaftanga chë Bëngbe Bëtsabe entšangbioye cuafjobecnangcá, chentše enefjuanënga mo Bëngbe Bëtsabe basengcá, chënga ndayá chë Taitá tojašebuachenacá jýëngacñama, ndëmuanyënga Bëngbe Bëtsá chabe librëšañe tojúbiana. Tšëngaftanga šmojobecná Bëngbe Bëtsábioye, ntšamo nÿetsca entšanga tmojamcá tšabá o ndoñe tšabá bëtsemnana yochjayanábioye. Endmëna mo tšëngaftanga cuafjobecnacá, chë entšanga mora ya obanënga y ntšamo tšabá yomncá jtsamëse imojëtsiyenëngbe espiritëngbioye, chë entšanga ndëmuanyëngbiana Bëngbe Bëtsá tojanma chamotsemnana lempe ntšamo chabe entšangbiana yojanjuabnacá, chca, cháftaca sempre vida jëftsebonnana. <sup>24</sup> Tšëngaftanga Jesúsbioye šmojobecná, chë jóbánëse, entšanga Bëngbe Bëtsáftaca mo canÿacá chamotsemnana tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiana cha tojanóbana ora tojanábuashana buiñioye tšëngaftanga cuafjobecnacá; chca tojanábuashana, bëngbioye Bëngbe Bëtsabe delante mo tšabengcá jábiamama, mo ntšamo entšangbeñe buiñe jabuëcacjama chë bachnanga imojuamancá. Cain chabe catšata Abëlbioye tbojanóba ora, yojamna mo chë Abelbe uabuáshanana buiñe Bëngbe Bëtsábioye cuafseimpadancá, chë bacna soyama castigo chaotsemnana; pero Jesucristbe buiñe ndoñe chca ntsamana, ndayá chíyeca bënga más tšabe soyënga jashjáchana; Jesusbe buiñeca, bënga montsobena atsebácanënga jtsemnana.

<sup>25</sup> Cuedado šmochtsebonna, bëngbioye tojtsoyebuambná ora cha joyeunayama. Chë Israeloca entšanga ndoñe tmonjánbošena Bëngbe Bëtsá joyeunayama, chë Sinái tjoca quem luarentše tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayinayá, ndoñe cachcá ndëcastigánënga quešochátabashejuana, ntšamo cha šojtsëtsësnacá ndoñe tmontseyeunanëse. <sup>26</sup> Bëngbe Bëtsá Sinái tjoca chë entšangbioye tojanoyebuambá ora, chabe oyebuambnayánaca tojanma quem luare chauangmëmanama, pero mora cha chabe uabemana palabrenguiñe tojašebuachená: “Atše cachiñe chanjatsma chauangmëmanama, ndoñe nÿe quem luare, sinó celócna ca.” <sup>27</sup> Bëngbe Bëtsá “cachifñe

ca” tojánayana ora, chë sóyeca yojsichamo, chë ndayté lempe chaongmémánama cha cachiñe yochjama ora, chë quem luarentse tmojama soyénga y chë jatrócama yopodena soyénga yochtsejuána ca, chca, nje chë nyetsca tescama yomna soyénga y ndoñe jatrócama soyénga chaouedama. <sup>28</sup> Chcasna, Bèngbe Bètsabe améndayoca, chë cha yochjama bènga chamuamashènguama luare, yomna cachcá nyetsca tescama y ndocna te ntjotrócana. Bèngbe Bètsá chama mochjètschuaye, y ntšamo cha tšabá tbojtsinýancá mochtsadorana, chabiama bèts respeto jtsebojnese, y nyetscangbiama más bètsá cha yomnama jtsejuabnayese. <sup>29</sup> Er Bèngbe Bètsá puerte etonaná chë chabiama nduauenanènga jabuache echanjácastigaye, y chca, cha jtsemnana mo canye ññeshe lempe jtsepochocamcá.

## 13

*Ntšamo jtsiyenama, Bèngbe Bètsá oyejuayá bèngtaftaca chaotsemnana*

<sup>1</sup> Sempre nyetscanga šmochtsenbobonshana, Jesucristbeyeca catšátanga quetsomñeá. <sup>2</sup> Sempre tšabá chë tšèngtaftangbe yebnoye inye luarèngocana tmojáshhajñènga šmochjúbuaja, er chca jamése, ntsetatšèmbcá béseftangna angelènga chèngbe yebnentse tmojanèbuaja.

<sup>3</sup> Chë utámenèngbiama sempre šmochtsenójuabnaye, mo tšèngtaftangnaca chèngtaftaca utámenènga cuaftsemncá. Chë inýenga tmojtsama chamotsesufriñèngbiama šmochtsenójuabnaye, er tšèngtaftangnaca nderado cachcá šmatjatspása.

<sup>4</sup> Boyabása y shembása tbojanobouamá ora, ntšamo tbojanensbuachenacá nyetscanga chamotrespetana; y chë útata chabotsama nje ndayá y nje ntšamo Bèngbe Bètsá bouamnatbiye tojanamèndacá, er Bèngbe Bètsá echanjácastigaye chë shembása o boyabásafaca bacna soye amènga, y chë shema o boyábiye inýaftaca ingñayèngnaca.

<sup>5</sup> Ndoñe šmattsiyena jtsejuabnayese nje mallajta crocèñana jèftsebojnama. Nje chë šmobomna soyèngaca oyejuayènga šmochtsomñe, er Bèngbe Bètsá tojánayana: “Ndocna te cachcá quechchatonýaye, ni canýa quechocháiseboshjona ca.” <sup>6</sup> Y chca, bènga montsobena corente añemoca jayanama:

Bèngbe Utabná endmèna nda atše šonduájabuachana; tondayama quichátatujta.

¿Ndayá canye entšá nanjobenaye átseftaca jamama ca?

<sup>7</sup> Tšèngtaftangbe améndayèngbiama, chë Bèngbe Bètsabe buayenana soyénga tcmojábuatambangiama, sempre šmochtsenójuabnaye. Sempre šmochtsenójuabnaye chë ntšamo chènga imojaniyenentšana tojanóbocna tšabe soyèngama, y šmochtsiyena jtsamése ntšamo chènga imojanamcá, Jesucristbeñe ošbuáchiyènga bétsemnana.

<sup>8</sup> Jesucristo cachá nyets tempo iuètsemna, tempo, mora y nyetsca tescama. <sup>9</sup> Ndoñe šmatjaleséncia inýenga chamotsamama tšèngtaftanga chë benachentšana chašmotsojuánañama, ndayá chènga tmojtsabuátambama, y chë Cristo tojánabuátambama contra soyèngaca. Más tšabá endmèna bènga ainaniñe añemo jtsebojnana, Bèngbe Bètsá tšabe juabna bèngbiama yobómnayeca, y ndoñe chë sanama, chë ndayá aife o ndoñe šontsamna jtsesayana soyèngama mandènga tcojtsamése. Chca mandènga ndocna te chë Israeloca entsangbiama tempo tonjanoservé.

<sup>10</sup> Bènga chë Jesucristbeñe mondošbuáchenga, canye soye mondbomna mo chë Bèngbe Bètsábiye jètschuayama altaroca juinýena soyca, bacna soyèngama perdonánènga jtsemnama. Bènga mondbomna chë Jesucristo bèngbiama tojanma soye, cruzoca tojanóbana ora, bèngbe bacna soyèngama; y chë nje tmojóba bayèngaca soyènga tmojtsama bachnanga ndoñe ntsebojnana, chë Cristo tojanóbana ora, ndayá tojanmentšana tojanóbocna tšabe soyènga. <sup>11</sup> Er chë juðièngbe más uámama bachnangbe améndayá, chë tmojóba bayèngbe buiñe chë “más uámama ca” uabaina luaroye juabuyambana, Bèngbe Bètsá entsangbe bacna soyèngama cháuperdonama, y chë bayèngbe cuerpènga jtsejuinýiyana entsanga tmojena luarentšana chaboca. <sup>12</sup> Cachcá, Jesúsna tojansufri y tojanóbana bèts pueblentšana chaboca, chabe buiñe tojanábuashana ora jóbaneše, entsanga Bèngbe Bètsábènga chamotsemnana, y chabe delante mo tšabengcá chamotsemnana. <sup>13</sup> Chýeca bènga šontsamna Jesúsbiye jobéconana, nda entsanga tmojtsanaboté y bèts pueblentšana chaboca tojanóbana. Cha mochjuasto, y ntšamo cha tojansufricá bèngnaca mochjasúfria. <sup>14</sup> Er quem luarentse bènga ndoñe quemátsbomna canye bèts pueblo bèngbiama, nyets tempo chauesomñe bèts pueblo, ndayá bèngna tša mondboše y puerte mondobátmana bènga joyénama chë celoca yochtsemna Bèngbe Bètsabe bèts pueblentse. <sup>15</sup> Chýeca, šontsamna sempre Bèngbe Bètsábiye jtsatschuanayana, Jesucristbiajana. Bèngbe Bètsá chca tmojtsadorana ora, jtsemnana mo chábiye jètschuayama canye soye cuafjuatšèmboncá. Chcasna, jtsóyebuambnayese cha mochtsadorana. <sup>16</sup> Sempre ntšamo tšabá yomncá šmochtsama, y chë šmobomncá inýèngbiámncaca chaotsemna. Chca šmochtsama, er chca tcojama ora, Bèngbe Bètsá oyejuayá jtsejuabnayana chca chabiama tcojama ca, y jtsinýnana bènga Bèngbe Bètsá imojtsatschuanama, ndayá cha tojamama.

<sup>17</sup> Sempre šmochtsama ntšamo chë tšëngaftanga ošbuachiyëngcá enefjuanëngbeñe amëndayënga tmojayancá, y sempre šmochtsiyena jtsamëse nýe ntšamo chënga tmojtsebošcá. Chënga sempre tšëngaftangbioye jtsanýenana, tšëngaftangbe tšabiama, ntšamo cmojánanýenama Bëngbe Bëtsábioye jojuama yojtsamnama chënga jtsetatšëmbëse. Jtsayau-nanëse, šmochjama chënga chëngbe trabajo oyejuayánaca y ndoñe ngménaca chamot-samama, er ndoñe chca šmonjamëse, chë trabajo tšëngaftangbe tšabiama ndoñe nántsemna.

<sup>18</sup> Bëngbe Bëtsá bëngbiana šmochtseimpadana, er bënga ainaniñe corente fsëndétatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse. <sup>19</sup> Tšëngaftanga bëtscá cbontsaimpadana, Bëngbe Bëtsá chašmoimpadama, atše chašolesenciamia tšëngaftangaftaca cachiñe jtsatsmënana.

*Bëngbe Bëtsábioye chëngbiana jaimpádama y chënga jacheuayama*

<sup>20</sup> Atše, Bëngbe Bëtsá sëntseimpadana, cha chë nda endbétsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondánýena mo oveshëngbe tšabe abujenýacá; y Bëngbe Bëtsá chca tojanma, Jesús, chabe buiñe juabuáshanëse tojanóbanayeca, chca, entšanga jinýanýiyama ndegombre bëtsemnama ntšamo Bëngbe Bëtsá chabe entšangbiana tojanašebuachenacá nýetsca tescama jamama.

<sup>21</sup> Cha sëntseimpadana chaoma tšëngaftanga chašmotsebomnama nýetsca tšabe soyënga ntšamo cmojtsëjbotcá, chca, lempe ntšamo cha yobošcá tšëngaftanga chašmotsamama; y cha Jesucristoftaca chaboma bëngaftaca ntšamo cha tšabá tbojtsinýancá. ¡Nýetscanga nýetsca tescama Cristo chamotsatschuaná! Chca chaotsemna.

<sup>22</sup> Jesucristbeyeca catšátanga, tšëngaftanga cbontsaimpadana, jábuayenama ntšamo tcbon-jauyancá, puerte uantádoca tšabá chašmóyëngacñama, er nýe básefta palabréngaca chama tcbonjubuábiana. <sup>23</sup> Atše sëntseboše tšëngaftanga chašmotsetatšëmbo, Timoteo Jesu-crístbeyeca bëngbe catšata, ya ndoñe utamená yontsemnama, y cha betesco átsbioye chaojtabëse, átsëftaca chanjëftbetše tšëngaftanga jányama chajjá ora.

<sup>24</sup> Tšëngaftanga ošbuachiyëngbeñe nýetsca amëndayënga šmochjacheuaye, y nýetsca Bëngbe Bëtsabe entšángnaca choca. Chë Italia luaroquënga ošbuachiyënga tšëngaftanga cmontsacheuaná.

<sup>25</sup> Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnama.

## Santiago

### *Jacheuayama*

<sup>1</sup> Atše Santiago, Bèngbe Bètsá y Bèngbe Utabná Jesucristbe canye oservená, tsèngaftanga cbontsèbuabiamná, tsèngaftanga chë bnètsana uta Israeloca bèts pamillangbioye nyets luranàna ujquëshenènga. Atše cbontsachuaná.

### *Chë Bèngbe Bètsábicocana osertánana*

<sup>2</sup> Jesucristbeyeca atšbe catsátanga, tsèngaftanga ndaye padecena soyènguiñe chašmojtсийena ora, chiñe šmochjájuaoye mo chca tsèngaftangbe tsábiamna cuafstsemncá y šmochjóyejuaye; <sup>3</sup> er tsèngaftanga šmondétatšëmbo, chcañe chašmojtšajna ora, šmochtsetátšëmbo cach tsèngaftanga Jesucristbeñe puerte šmošbuaché o ndoñe. Chca ora bèts ošbuáchiyana chašmojtsebojnèse, šmochanjobenaye, Bèngbe Bètsábeñe jtšobátmanèse añémoca jtsemnana, masque padecena soyènguiñe chašmotsomñèse. <sup>4</sup> Pero chca chašmojtsemnèse, šmochtšentšena jashjáchama ntšamo canye entšá Bèngbe Bètsabe soyèngama corente osertána yomncá chašmotsemnana, ntšamo Bèngbe Bètsá yobošcá chašmotsiyenama, chiñe ni mo canye soye jamama chacmondètsabuashebenèse.

<sup>5</sup> Nderado nda tsèngaftanguentsána ndoñe tontsobena corente osertánana jtsebojnama, cha bontsemna Bèngbe Bètsá jaimpádana cha chaoma aifne chana jtsebojnama, y Bèngbe Bètsá chana bochanjátšetaye; er Bèngbe Bètsá nyetscanga bètscá endbètsatšatnaye y ndocnábioye jatáboyènjana. <sup>6</sup> Pero cha bontsemna, Bèngbe Bètsábeñe puerte jtšošbuáchiyèse chama cha jaimpádana, y cha nderado ndoñe bochanjóyeunayama ntjatátèmnancá. Nda mèntšá tojtšamèse, inye ora aifne Bèngbe Bètsábeñe cuafstšošbuachecá y inye ora ndoñe, cha entsemna mo canye olèshcá, mar béjayoca binýia nje cátatoye jtšambayana. <sup>7</sup> Chca ama entšá ndoñe chaondètsejuabná, Bèngbe Utabnábentsána ndayánaca jatóyèngacñama. <sup>8</sup> Cha jtsemnana canye entšá, mora canye soye juabnayá, pero chentšana inyètsá jatójuabnañana. Chca, cha jtšiyenana nyetsca soyèngama uta soye jtsejuabnayèse, y chca cha ndoñe ntšobena tondaye puerte tsábá jamama.

<sup>9</sup> Chë Jesucristbeñe ošbuachiyá, ndbojnèjema y ndoñe yapa uámana entšá tomná, corente oyejuayá chaotsemna, er Bèngbe Bètsabe bominyiñe cha canye uámana entšá jtsemnana; <sup>10</sup> y chë bomnánaca puerte oyejuayá chaotsemna, Bèngbe Bètsá chábioye nduámana entšá chabojábema ora, er mo chë shacuanifne uantšefjushacá, cha ndoñe nyets tempo quem luarentše ntjèftšiyenana. <sup>11</sup> Shinye tojábocna y becá tojojènyana ora, chë shácuaña jtsebuashana, chë uantšefjúsha jtšátsatšana y chabe uabótamanana ya ndoñe más ntsebinyñana. Cachcá chë bomná, echanjóbana nje cachabiamna más becá crocénana onguayifne chaojtsemna ora.

### *Bacna soye ocochènguentšana tsábá jabocnana*

<sup>12</sup> Oyejuayá chaotsemna chë entšá chë padecena soyènguentšana tsábá tojètsbocná, cabá Jesucristbeñe ošbuachiyá; chama Bèngbe Bètsá chabiamna oyejuayá echántsemna y echanjama chë nyetsca tescama yomna tsábe vida cha chaotsebojnama, mo uacananancá chabe ošbuáchiyama. Chë soye Bèngbe Bètsá tojašebuachená nyetscanga cha imobobonshánèngbioye. <sup>13</sup> Nderado nda bacna soye jamama tbojócochéngo, ndoñe chaondètsejuabná Bèngbe Bètsá chca cháftaca yojtšama ca; er Bèngbe Bètsá ndocna te bacna soye jamama jócochénguana, y cha ndoñe ntšamana inyènga bacna soye jamama chaócochénguana. <sup>14</sup> Inyètsá endmèna, canya bacna soye jamama jócochénguana, bacna juabnènga tojtsebojnana ora; cha chiñe nje jèsejuabnayana y chë soye jtšasjayana cha chca jamama. <sup>15</sup> Nda yapa bacna soyènga tojtseboše, cabana cha pronto chë bacna soye jamana; y nda sempre bacna soyènga tojtšama, chama Bèngbe Bètsá nyetsca tescama bochanjacistiga.

<sup>16</sup> Atšbe bonshana catsátanga, ndoñe matenoingñana, jtsejuabnayèse Bèngbe Bètsá yojtšama tsèngaftanga bacna soyènga chašmotsamama ca. <sup>17</sup> Nyetsca tsábe soyènga y chë puerte tsábe soyènga tsbanáocana endobá, Bèngbe Bètsá chë Taitábicocana. Y cha chë shinye, juashcona, y nyetsca chë celoca yobuashinyinýana soyènga tojamá, nyets tempo nje cachá uesomñe y ndoñe inya ntjátsmènana. <sup>18</sup> Cachá jamama tojánbošenayeca, bènga chábenga šojánabiamna, bènga chabe ndegombre palabrénga jounèse. Cha chca tojama, lempe ntšamo Bèngbe Bètsá quem luarentše tojamentšana, bènga chë natsanènga chábenga chamotsemnana.

### *Ntšamo ndegombre yomna Bèngbe Bètsábioye tsábá jadórama*

<sup>19</sup> Atšbe bonshana catsátanga, quem soyama šmochtšenojuabnaye: nyetsca tsèngaftanga cmontšamna sempre jtseprontánana jounenama; pero jóyebuambayamna jobátmana y inyèngaftaca jetnámnaca. <sup>20</sup> Inyáftaca tbojetna ora, canye entšá ndoñe ntšamana ntšamo



Bèngbe Bètsá yobošcá, chë nyetsca soyënguiñe tšabá jtsamana. <sup>21</sup> Chcasna, šmochtsajbaná bacna soyënga jtsamëse oyenana, y amana nyetsca soyënga ndoñe ntšamo Bèngbe Bètsá yomandacá; y chë Bèngbe Bètsá tojama tšëngaftangbe ainaniñe chaómashënguama buayenánana, ntjatosoberbnaycá šmochjovýëngacñe. Chë buayenánana chašmojóyeunase, echanjopódia tšëngaftanga atsebácanënga jtsemnana.

<sup>22</sup> Ndoñe quemátamna nýe chë Bèngbe Bètsabe buayenánana jouenana, ndayá ntšamo cha tojayanca aife jtsamana; ndoñe chca šmontsamëse, cach tšëngaftanga šmontsenoingña. <sup>23</sup> Nda nýe chë buayenánana tojouena, pero betscó tbojtsebnatjëmbe y ndoñe tontsama ntšamo chiñe tojtsayancá, cha jtsemnana mo canýe entšá chabe jubíá espejuñe tojtsenonýacá: <sup>24</sup> chana cachá jtsenonýayana, pero chë espejo tojabuertaná ora, jtsenatjëmbana ntšamo cha bétsemnana. <sup>25</sup> Pero nda ntšamo tojouencá ndoñe tbonjebnatjëmbe, y sempre tojtsejuabná chë entšanga játsebacama Bèngbe Bètsabe puerte tšabe mando chabosertama, y tojtsiyena ntšamo chë mandënguentše endayancá, lempe ntšamo chë entšá chaojtsamiñe oyejuayá Bèngbe Bètsá bochanjábema.

<sup>26</sup> Nderado nda tojtsejuabná Bèngbe Bètsábioye ibojtsadorana ca y chë Bèngbe Bètsábioye adorayá ntšamo ibomncá cha vojtsama ca, pero ndoñe tontsobena bacna soye oyebuambnayana jtsajbanana, cachá vojtsenoingña, y nyetsca soyënga ntšamo tojtsamcá Bèngbe Bètsá jadórama, chabiamana tondaye ntšamanana. <sup>27</sup> Bèngbe Bètsá chë Taitabe bominyiñe, chë puerte tšabe y ndegombre soyënga, ndayá entšá ibojtsamna jamana endmëna: chë uajchonga y viudanga corente ngmëñënga tmojtsemna ora jujabuáchana, y ndoñe bacna soyënga játamana, mo chë nýe quem luarama enójuabnáyënga mondbetsamcá.

## 2

### *Nýetscanga tšabá jtsatenonýayëngana*

<sup>1</sup> Tšëngaftanga, Jesucristbeyeca atšbe catšátanga, šmondošbuaché Bèngbe Utabná Jesucristo, chë puerte bëtšá y uamanábeñe; chíyeca tšëngaftanga cmontsamna nyetsca entšanga cachá jtsatenonýayëngana. <sup>2-3</sup> Nderado tšëngaftanga cányentše šmojënefina, y chora canýe bomna entšá tojášhango castellano ntšabuchëtjonëñjãngaca y uámana entšayëjuangaca bopormaná, cha botamana šmojúmashëngo y mëntšá šmojayana: “Moca quëfseroca mabesótbema ca”. Pero cachca ora, canýe ndbomñëjema tojášhango uandocuenta entšayá uichëtjoná, y cha šmojayana: “Acna choca tsanana cochtsemna o chafjoca mót'bema ca”. <sup>4</sup> Chca tšëngaftanga ya šmontsama cach tšëngaftanguentše báseftanga más uámanënga inýëngbiam chamotsemnana, y chca šmojtsama, ana bacna juabnënga šmojtsebmna causa.

<sup>5</sup> Atšbe bonshana catšátanga, quem soye šmochjouena: Bèngbe Bètsá quem luarentše ndbomñënga imomñënga tojabacacá, chënga canýe puerte uámana soye chamotsebmna, Jesucristbeñe puerte chamotsošbuáchema; y mo otocana soycá Bèngbe Bètsabe amëndayama chamosháchiñama. Cha imobobonshániëngbioye chë soye játsátayama tojašebuachená; <sup>6</sup> pero tšëngaftanga chë cuenta, mo ndoñe cach tšëngaftangcá entšanga bendmëncá chëngbioye jtsenýayana. Ndegombre, chë bomñënga mondmëna chë nýe sempre cmondbëtsamëndayënga y chë sjojónana chë pueblentša mandadëngbioye cmondbáunatsënga. <sup>7</sup> Y cach bomñëngnaca mondmëna chë Cristbiamna podessa oyebuambnáyënga, ndábenga tšëngaftanga šmondmëna, y chabe uabaina tšëngaftangbiamna puerte enduámana.

<sup>8</sup> Bèngbe Bètsabe uabemana palabreñguñe mëntšá endayana: “Ndëmua entšánaca cochtsebobonshana ntšamo cach aca cuenobobonshancá ca.” Tšëngaftanga ntšamo chë Bèngbe Utabnabe mandíñe endayancá ndegombre šmojtsamëse, tšabá šmochántsama. <sup>9</sup> Pero tšëngaftanga ndoñe cachcá šmontsenonýase, chcana bacna soye jtsamana y šmojama ntšamo Bèngbe Bètsabe leyënguiñe ndoñe yondëlesenciancá. <sup>10</sup> Y mora, canýe entšá nyetsca chë leyentša mandënga tojtsobedecena, pero ndoñe tontsama ntšamo nýe mo canýe mando ntšamo iuayancá, cha Bèngbe Bètsabiamna jtsemnana canýa ntšamo nyetsca chë leyentša mandënguiñe ndoñe yondëlesenciancá amá. <sup>11</sup> Cach Bèngbe Bètsá, chë “acbe shema o boyábioye inýaftaca ndoñe cattseingñaye ca” tojanayaná, cachá mëntšánaca tojánayana, “inýabioye ndoñe catjóbá ca”. Chca, nda cachabe shëmbioye inýaftaca ndoñe tbonjaingñë, pero aife inýabioye tbojóbá, chca, Bèngbe Bètsabiamna cha jtsemnana canýa nyetsca chë leyentša mandënga ndocumpliná.

<sup>12</sup> Tšëngaftanga cmontsamna jtsóyeuambnayana y jtsamana ndayá Cristo sojanamëndacá, atsebacana entšangcá, er Bèngbe Bètsá echanjayana ntšamo tmojamcá aife o ndoñe tšabá bétsemnana. <sup>13</sup> Er chë inýëngbiam ndoñe ngmëñënga bomñëngbiam, Bèngbe Bètsá ntjongmicá echanjayana ntšamo tmojamcá aife o ndoñe tšabá bétsemnana; pero chë inýëngbiam

aíñe ngménana bomnëngbiama, ntšamo tmojamcá aíñe o ndoñe tšabá bétsemnama Bëngbe Bëtsá chaojayana ora, chënga tšabá chentšana mochanjábocana.

*Chë ndegombre ošbuáchiyana, soyëngaca jinÿanÿiyana*

<sup>14</sup> Atšbe catšátanga, ðndayama cánÿabioye buanjoservia jayanana aíñe Jesucristbeñe sëntsošbuaché ca, pero cha inÿengbiama tšabe soyënga ndoñe tontsama, y chca, ntšamo cha tojtsamcá ndoñe tontsinÿanÿiná cha Jesucristbeñe yošbuáchema? Ndegombre, cha nÿe chca tojtsichámëse, ndoñe ntsopodénana cha atsbocaná chaotsemnama. <sup>15</sup> Nderado canÿe boyabása o shembása ošbuachiyá entsáyá tbojtsabuáshbena y saná chë te jasámnaca tbojtsebuáshbena, <sup>16</sup> y canÿa tšëngaftanguentsá tbojayuana: “Diošoftá, sësnama ndoñe chacondëtsepadedena y becá chacuatoshachá ca”, pero chca chaotsemnama chábioye tondaye tbonjatšetase, ðndayama nantsoSERVERENA chca jayanana? <sup>17</sup> Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnama jinÿanÿiyama, nÿe chca ošbuáchiyana jtsebomnana tondayama ntsoservénana.

<sup>18</sup> Pero nderado ndánaca mëntšá echanjayana: “Aca Jesucristbeñe icošbuaché, pero atšna inÿengbiama tšabe soyënga séntsama ca.” Chora atše stjojuá: “Sminÿinÿé ntšamo canÿa nantsobena Jesucristbeñe jtsošbuáchiyana, chca chaotsinÿyana tondaye ntšamcá, y chora, ndayá tujamama atšbe ošbuáchiyana cbochjinÿinÿiye ca.” <sup>19</sup> Aca condošbuaché nÿe canÿe Bëngbe Bëtsá yomnama y chca tšabá contsama; pero chë bacna bayëjéngnaca chiñe jtsošbuáchiyana, y chë causa chënga uatjana jtsebomnana y jtsangmëmmayana. <sup>20</sup> Ndoñe obëjema cattsemna; ndegombre cbochanjinÿinÿiye nderado nda Jesucristbeñe tojtsošbuaché, pero tondaye tontsama chca chaotsinÿyana, chabe ošbuáchiyana tondayama ntsoservénana. <sup>21</sup> Bëngbe Bëtsá tojánayana chabe bominiñe Abraham, bëngbe tempsca bëtstaitá, tšabia yojamna ca; chca tojánayana, er Bëngbe Bëtsá tbojanmandá ora, yojtseprontana chabe uaquiñá altariñe jóbama, cach Bëngbe Bëtsábioye jëtšchuyama. <sup>22</sup> Aca contsobena Abrahámbeñe jinÿama, cha Bëngbe Bëtsábeñe yojanošbuáchema, y soyënga yojánama chca chaotsinÿyana; y ndayá cha tojanmama entsinÿinÿyena, cha ndegombre puerte bëtscá yojanošbuáchema. <sup>23</sup> Chca tojanopasá ntšamo Bëngbe Bëtsabe uabemana palabrënguñe endayancá, mëntšá: “Abraham Bëngbe Bëtsábeñe yojtsošbuáchiye, y chama Bëngbe Bëtsá tojánayana chabe bominiñe cha tšabia yojamna ca.” Y Abraham entsanabaina Bëngbe Bëtsabe amigo ca.

<sup>24</sup> Y tšëngaftanga šmontsetátšëmbo, Bëngbe Bëtsá ináyana canÿe entsá chabe bominiñe tšabia yomna ca, chë entsá ndayá tojtsamama, chabe ošbuáchiyana chaotsinÿyana, y ndoñe nÿe ošbuáchiyana tojtsebomnana. <sup>25</sup> Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominiñe cha tšabia yojamna ca, er cha canÿe tšabe soye tojanma. Cha chë noticia uambaye judiënga posada tojanÿeyentšame, y chentšana tojanëjabuache inÿe benachëjana chamuáisebocanama, chë pueblentša soldadëngbiama chamotsachetama. <sup>26</sup> Lempe básefta palabrënguñe jayanamna mëntšá entsemna: ntšamo canÿe cuerpo, espíritu ndobomna cuerpo, pronto jóbana, cachcá chë ošbuáchiyana, ndocna soyëngaca tontsemna, chca chaotsinÿyana, tondayama ntsoservénana.

### 3

*Bichtájaca tšabá jöyebuambayama endmëna*

<sup>1</sup> Jesucristbeyeca atšbe catšátanga, ndoñe yapa buátëmbayënga tšëngaftangbeñe chamondëtsemna; er tšëngaftanga ya šmondëtatšëmbo, bënga, chë entsanga abuátambayëngbiama, chë castigo más bëtscá yochtsemnama, Bëngbe Bëtsá ndoñe tmonjöyëunase, ntšamo entsanga tmojamama aíñe o ndoñe tšabá bétsemnama cha chaojayana ora. <sup>2</sup> Bënga nÿetscanga nÿetsca bacna soyënga mondbëtšama. Nderado nda oyeubambnayñe ni mo canÿe bacna soye tonjama, chë entsá puerte tšabia jtsemnana, ntšamo Bëngbe Bëtsá yobošcá jtsiyenëse, y cha yojtsobena cachá sempre jtse nomándayama.

<sup>3</sup> Chë couayëngbioye freno tmojuayashbé ora, ntšamo bënga tmojtsebošcá chënga mochántsama, y bënga cachora jtsoberenana ntšamo nÿets chëngbe cuérpoca tmojtsamcá jtsemándayana, y ndoñe nÿe chëngbe bestšaše. <sup>4</sup> Barquëshamnaca šmochjenóuaboye. Masque tša bëtšëtsacuemëngá y tša jabuache binÿiënga chë barco jtsëjuatsëntšayana, chë uamanéjayënga chë barco juyambana ndayëjana tmojtsebošcá, y chca, nÿe canÿe base soyetémaca, tímón ca uabainëtémaca. <sup>5</sup> Cachcá, chë bichtaja cuerpiñe canÿe base soyetema endmëna, pero chë bichtájaca entsanga jtšenábotamnayana bëtst soyënga tmojamama. Smochjouena, canÿe base iñeshe jtsoberenana canÿe bëtst tjañe juangbotjuama. <sup>6</sup> Y chë bichtaja endmëna mo canÿe iñeschá, mo canÿe luare ndayentse puerte bacna soyënga tobiniñcá. Chë bichtaja jtsoberenana bëngbe cuerpentše puerte bacna soyënga bëngbiama jamama. Mo canÿe iñeshe becá tojtse biamnaca, chë bichtájaca tcojtsichamo ndoñe

tšabe soye, jtsobenana bacna soyënga bëngbiana jamama nyëtsa tempo quem luarentše tmuetsiyenëtscuana; y mo nda ndayá tojtsangbotjuacá, Satanás jtsobenana chë bichtaja jtsemándayana, bacna soyënga chaotsamama.

<sup>7</sup> Entšá endobena jtsamëndayana nyëtsca tjoica bayënga, shloftšënga, osjojnayënga y buyeshiñe oyena bayënga; y ndegombre mora entsamënda; <sup>8</sup> pero ndocná tonjobená chë bichtaja jtsemándayana, chca, bacna soyënga amana chaotsajbanama. Chë bichtaja jtsamana bëtsá bacna soyënga cada te chauëtsebinýnama, y mo canýe mëtšcuaycá veneno jtsobomnana jóbama, chë bichtájñaca cachcá endmëna. <sup>9</sup> Bichtájaca bënga puerte tšabá Bëngbe Bëtsá y Taitabiama jtsichámuana, y cach bichtájaca bënga puerte bacá entsangbiana mondbëtsichamo, masque Bëngbe Bëtsá cachacá enoparecëñënga chënga tojábama. <sup>10</sup> Cach uayásentšana jtsóbocanana Bëngbe Bëtsabiama tšabe palabrenga y entsangbiana bacna palabrenga. Jesucristbeyeca atšbe catšátanga, chca ndoñe chaondëtsemna. <sup>11</sup> Canýe bëjaye obocanentšana ndoñe ntsopodëñana tšabe býyeshe chaóbcocna y cachentšana untja býyeshnaca. <sup>12</sup> Ntsamo canýe higo betiyentšana ndoñe ntsopodëñana olivosëšënga jashacama, y canýe uvas betiyentšana ndoñe ntsopodëñana higuëbënga jashacama, cachcá, atšbe catšátanga, tamona býyeshentšana ndoñe ntsopodëñana tšabe býyeshe chaóbcocna.

#### *Bëngbe Bëtsábiocana Óbocana osertánana*

<sup>13</sup> Nderado tšëngaftanguentšë tojtsemna canýe puerte tatšëmbuá y osertaná, cha bontsemna, chca yomnama entšanga jinýanýiyana, tšabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnana. <sup>14</sup> Pero tšëngaftangbe ainaniñe yapa inýabiye šmojtsántšaboše y nyë inýënga chamotjáyanama soyënga šmojtsama, as ndoñe šmattsenábotamnaye osertánënga y tšábënga šmonnana, er ndegombre Bëngbe Bëtsabe osertánana tšëngaftanga ndoñe šmontsebmna. <sup>15</sup> Er chca osertánana, Bëngbe Bëtsábiocana ndoñe ntsóbocanana, ndayá nyë quem luarama enójuabnayëngbentšana, nyë entsangbe juabnentšana, y canýe bacna bayëjbentšana. <sup>16</sup> Ndayentšë entšanga yapa tmojtsenántšaboše, y nyë inýënga chamotjáyanama soyënga tmojtsama, chentšë tondayama quemochátenëyeunana y nyëtsca bacna soyënga mochántsama.

<sup>17</sup> Pero chë Bëngbe Bëtsábiocana óbocana osertánana bomnënga, nyëtsca soyamna, natsana puerte tšabe vídaca jtsiyenana, bacna soyëngaca ndëmandánënga; y chënga jtsemnana chë inýënga ndoñe chamondëtšentsjanama amënga, tšábënga y sempre jtseprontánana inýënga joyaunayama. Y cach quemënga jtsemnana inýëngbiana ngmëñana bomnënga, sempre tšabe soyënga jtsamana, cachcá nyëtsca entsángbiye jtsëñýayana, y ntšamo ndegombre tojtsemncá jtsichámuana y jtsamana. <sup>18</sup> Ntsamo canýe jená, botamana shajuana jtsobomnana tšabe jénaye jájena, cachcá, sempre natjëmbana jtsiyenama bošëngna, natjëmbana inýëngaftaca jtsiyenana, chca, nyëtsca entsanga chamotsamama ntšamo Bëngbe Bëtsabe bominýiñe tšabá yomncá.

## 4

### *Smochtsiyena Bëngbe Bëtsá tšëngaftangbeñe jtsemándayëse*

<sup>1</sup> ¿Ndayentšana chë tšëngaftanga jtsentsjanayama y jtsenpenzëntsiayama yóbocana? Endóbocana chë tšëngaftangbe bacna juabnënguentsana, nyë cach tšëngaftanga tšabá jtsomñama; y chë soyënga tšëngaftangbe ainaniñe sempre chë tšabe juabnëngama contra jësemnana. <sup>2</sup> Tšëngaftanga ndayánaca jtsobomnana šmojtseboše, pero chca jtsobomnana ndoñe šmontsobena, as jtseprontánana inýëngbiye jtsëbáyama. Inýa ntšamo tobomncá tšëngaftanga tša jtsántšabošana, y chë soye jashjáchama ndoñe šmontsobena ora, inýëngaftaca jentjáyanangana y jtsenpenzëntsiayana. Ntsamo šmojtsebošcá ndoñe ntjobenayana jtsobomnana, Bëngbe Bëtsá chama ndoñe šmondbotjañe causa; <sup>3</sup> y chë soye šmojtjañe ora, tšëngaftanga ndoñe ntjójëngacñana, ndoñe botamana chë soye šmondbotjañe causa, er tšëngaftanga chë soye jtsebošana nyë chaoservema oyejuayënga bacna soyënguiñe jtsomñama.

<sup>4</sup> ¡Tšëngaftanga, Bëngbe Bëtsá bobonshánana šmojtsajbananga! ¿Ndoñe šmondëtatsëmbo, chë jtsebošana nyë quem luarama enójuabnayëngbe amigo jtsemnana y nyë quem luarëntša soyënga jtsobomnana, chca, canýe entšá Bëngbe Bëtsabe uayayá jtsemnana? Ndánaca tojajuabó nyë quem luarama enójuabnayëngbe amigo jtsemnana, chca, canýe Bëngbe Bëtsábiye uayayá jóbemana. <sup>5</sup> Ndoñe nyë bonamente Bëngbe Bëtsabe uabemana palabrenguiñe mëntšá endayana: “Chë Bëngbe Bëtsá tbojanichmó bëngbe ainaniñe chaotsiyenama Uámana Espíritu, puerte entseboše nyë Bëngbe Bëtsá canýa bëngbe amëndayá chaotsemnana ca.” <sup>6</sup> Pero Bëngbe Bëtsá, bëngbe tšabiama jtsejuabnayëse bënga jtsëjabuáchanana, chíyeca Bëngbe Bëtsabe uabemana palabrenguiñe mëntšá endayana: Bëngbe Bëtsá chë nyë cachënga uámanënga tmojtsenobiannangbe contra entsemna,

y chë ndoñe uámanënga montsenobiamnangbiamna, Bëngbe Bëtsá más tšabe juabna entse-bomna ca.

<sup>7</sup> Asna, tšëngaftanga šmochtseprontana nýe Bëngbe Bëtsá chacmotsamëndama; ntšamo Satanás tcmojtsamëndacá ndoñe šmattsama, y cha cachora tšëngaftangbentsána echantsachá. <sup>8</sup> Bëngbe Bëtsábioye šmochtobeconá, y cha echanjama tšëngaftanga ntšamo cha yomnaca chacmotsésertánama. Tšëngaftanga bacna soye amënga, cach tšëngaftangbe cucuatšëngaca tšabe soyënga šmochtsama, bacna soyënga ndoñe. Tšëngaftanga chë inýe ora jtsejuabnayana Bëngbe Bëtsá jtsebobonshánama, y inýe orna, nýe quem luarentša soyënga jtsebomnana, smochtsajbaná bacna soyënga jamama bošana, chca, nýe tšabe juabnënga tšëngaftangbe ainaniñe chašmotsebomnana. <sup>9</sup> Tšëngaftangbe bacna soyëngama ngmënaca šmochtsemna, šmochjenóbošachna y cochtsetšenánënga šmochjýeubuambaye. Jatenbiajuayamna, šmochjenóbošachna; y joyejuayëngamna, ngmënaca šmochtsemna. <sup>10</sup> Bëngbe Bëtsabe delante bëtsëtsanga ndoñe šmattsenobiamnaye, y cha más uámanënga cmochanjábiamna.

### *Inýengbiamna ndoñe ntsichámuana ndoñe tšabá tmonjama ca*

<sup>11</sup> Jesucristbeyeca catšátanga, inýengbiamna bacna soyënga ndoñe šmattsóyeubuambaye. Nda cachabe catšatbiamna bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chë leyentša mandënga ndoñe ntocumplínana y jtšichámuana chë leyentša mandënga tondayama yontsoserverna ca. Y chë leyama chca tcojtsichámëse, cach ley jocúmplia cuenta, contsobiamná canýe ichamuá chë ley aínë o ndoñe yondoservënama, y chca ndoñe quecmátsmëna jtsamana. <sup>12</sup> Chë ley tojuapormá cha nýe canýa endmëna, Bëngbe Bëtsá, y cachá endmëna ntšamo entšanga tmojamcá aínë o ndoñe tšabá bëtsemnana ichamuá, y cachánaca entsobena entšanga játsebacama o nýetsca tescama jácastigama. Y acna, ¿ndase cmëna ndëmuata entšabiámnaca jobenayama jatichámuama ntšamo tojamcá aínë o ndoñe tšabá bëtsemnana?

### *Ndayá yëfse yochjatëchnënguama ndoñe ntsótatsëmbuana*

<sup>13</sup> Y mora quem soye šmochjouena, tšëngaftanga chë šmondbëtsichamo: “Mënté o yëfse quemoye o chë inýe bëts puebloye fchanjanga, y chentše canýe uata fchanjëftsemna ba soyënguiñe trabájayiñe, y ndegombre becá fchanjónýena ca.” <sup>14</sup> ¡Pero ni mo ndayá yëfse tšëngaftangtafta yochjochnënguama ndoñe quešmátstatsëmbo! Tšëngaftanga ndoñe quešmátstatsëmbo ndayëntscuana vida šmochjëftsebmoma, y chca, tšëngaftanga šmondmëna mo canýe jantšetëshcá, chëshe mora jónýnana y nýe ndeolpe jatenatjëmbana. Tšëngaftangtafta cachcá echanjopása. <sup>15</sup> Tšëngaftanga mëntšá cmontsamna jayanama: “Bëngbe Bëtsá quešjalesenciase, ainënga fchántsemna y quem soye o chë soye fchanjama ca.” <sup>16</sup> Pero chë cuenta, tšëngaftanga bëts soyënga šmochjamama sempre jtšenábotamnyana, ndayá tšëngaftanga chašmomama Bëngbe Bëtsá yochjalesenciaca ntsetatsëmbcá; y chca jtsamana ndoñe tšabá quenátsmëna. <sup>17</sup> Nda tojtsobena ntšamo tšabá yomncá jamama, pero ndoñe chca tonjama, cha canýe bacna soye jtsamana.

## 5

### *Chë bomnënga jábuayenama*

<sup>1</sup> ¡Quem soye šmochjouena, tšëngaftanga chë bomnënga! ¡Chë tšëngaftanga šmochtsesufrinama šmochjenóbošachna y uatjananënga šmochtseyoye! <sup>2</sup> Tšëngaftangbe bomnana buajónana janguánana entsemna, tondayama quenátoserverna, y chë entšayëjuangá mejëjonga montsasá. <sup>3</sup> Tšëngaftangbe castellano y midio tojtsengúsheshe; y chë ngúshesha echántsinjýinýnaye tšëngaftanga chë crocenánaca ndoñe šmonjanmama ntšamo inýenga jujabuáchama yojamncá; chë causa, nýetsca tescama cmochántsapochocaye, ntšamo chë iñeshe canýe soye endbetsepochoacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco. <sup>4</sup> Tšëngaftanga chë tšëngaftangbe fshantsënguiñe tmojëftsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nýets obenana bomná, chë trabajayëngbe chembuanana ya tojouena. <sup>5</sup> Quem luarentše tšëngaftanga šmondoyena ba botamana soyëngaca y nýe ntšamo cach tšëngaftanga šmobošcá jtsamëse. Ntšamo canýe uacná jóbana, minýicá tojtsemna ora, cachcá tšëngaftangbiamna entsobeco chë te, ndaye ora Bëngbe Bëtsá echanjama castigánënga chašmotsemnana, er puerta bacna soyënga šmojama. ¡Chë castigo jtsebínýnana tempo ya entsobeco! <sup>6</sup> Tšëngaftanga, chë puerta tšabá amëngbiamna šmojayana jóbana yojtsamna ca y šmojtšëbaye, chca ndoñe chaondëtsemnana chënga ndocá jamama ntsobercá.

*Chë uantado jtsemnana y chë Bëngbe Bëtsáftaca jencuéntama ora*

<sup>7</sup> Pero tsëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tšabe shajuanënga jobuátbanama, jtsoacánana natsana uantádoca jobátmana chë jajañama uafena tempo chaóshjanguama. <sup>8</sup> Tsëngaftángnaca uantadënga šmochtsemna, y tsëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

<sup>9</sup> Jesucristbeyeca catšátanga, ntšamo inyënga tmojtsamama ndoñe nyë šmattsoquejana, Bëngbe Bëtsá tsëngaftangbiama ndoñe chaondayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entšanga tmojamcá aife o ndoñe tšabá bëtsemnana, ya entsebeconá. <sup>10</sup> Atšbe catšátanga, chë tempsquënga Bëngbe Bëtsabe juabna oyebuambnayënga, ndëmuanyënga entšanga tmonjanabuayená Bëngbe Utabná jótšëmbonëse, chënga bëngbiyoe šonjëfťsaninjanjyie ntšamo tmojansufrima, ntšamo šojtsamna uantadënga jtsemnana tmojťsesufrina ora; y chca tsëngaftanga cmontsamna jtsamana. <sup>11</sup> Bënga chëngbiama fsëndbëtsejuabnaye oyejuayënga imojamna ca, chë tmojan-sufri ora Bëngbe Bëtsábeñe imojanobátmana ainaniñe añemo jtsebomñëse. Tsëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerte pade-cena soyënguifne yojasufrina ora; y šmondëtatšëmbo ntšamo Bëngbe Bëtsá cabana chábioye tbojancuedama, y chca yojamna Bëngbe Utabná entšangbiama puerte ngmená yómnyeca.

<sup>12</sup> Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúruse ni celocama, ni quem luarama, ni ndocna inyë soyama. Tsëngaftanga aife ca jayanama šmojtsebošëse, nyë aife ca šmochjayana, y ndoñe casna nyë ndoñe; chca, Bëngbe Bëtsá ndoñe chaondayana ndoñe tšabá šmonjama ca júraye causa.

<sup>13</sup> Nderado nda tsëngaftanguentšá puerte ngménaca tojťsemna, cha bontsemna Bëngbe Bëtsá chama jaimpádama. Y nderado nda oyejuayá tojťsemna, cha bontsemna jacántana Bëngbe Bëtsá jěťschuayama. <sup>14</sup> Nderado nda šocá tojťsemna, cha bontsemna chentša ošbuachiyëngcá enefjuanëngbeñe bëtšëjemëngcá amëndayënga jáchembuana, chënga Bëngbe Bëtsá chabiamama chamoiimpadama, y Bëngbe Utabná jótšëmbonëse aceitiye chamuanëťjuama. <sup>15</sup> Y tsëngaftanga, puerte jtsošbuáchiyëse Bëngbe Bëtsá chašmojaimpadá ora, chë šocá salud echántinýena, y Bëngbe Utabná echanjama cha tšabá cachiñe chaotsatsmënama; y nderado cha bacna soyënga tojamëse, Bëngbe Bëtsá bochantseperdóna. <sup>16</sup> Chýecna, chë bacna soyënga šmojtsamama šmochjobuambaye, y Bëngbe Bëtsá nyěťscangbiama šmochtseimpadana, chca, tšabá mo shnanëngcá chašmotsemnana. Canya ndabiamama Bëngbe Bëtsá tojayana chabe bominyñe tšabia yomna ca, cháftaca tbojencuentá ora, chánaca ba tšabe soyënga jóyëngacñana, y jobenayana bëtš soyënga jamama. <sup>17</sup> Bëngbe Bëtsabe juabna oyebuambnayá Elías, mo cach bëngcá canyë entšá inamna, y puerte jtsošbuáchiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tsěntsañe ndoñe tonjanafté. <sup>18</sup> Chentšana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëtscá saná yoťtsats-binýna.

<sup>19</sup> Atšbe catšátanga, nderado nda tsëngaftanguentšá tojťsajbaná chë ndegombre soyënga jtsamana, pero inya chábioye tbojuájabuache cachiñe chë tšabe benache cháuatishachama, <sup>20</sup> tsëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuaisebocnana, cha chë nyěťsca tescama castigüentšana chábioye jatsbocana, y jamana ba bacna soyëngama cha perdonaná chaotsemnana.

## 1 San Pedro

### *Jacheuayama*

<sup>1</sup> Atše Pedro, Jesucristbe ichmoná, quem tsbuanácha sentsabiamná chë cachëngbe larentše ndoñe mondoyenëngbiamna, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiamna. <sup>2</sup> Sentsabiamná chë Bëngbe Bëtsá Bëngbe Taitá tojánabacacangbiamna, ntšamo cachá jamama yojanjuabnacá y ntšamo jopásama yojantatšëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tsëngaftanga chabe entšanga chašmotsemnana, Jesucristo chašmotseyeunanama y Bëngbe Bëtsabe delante tsábá chašmotsatsmënana, bacna soyënga abujauánënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá séntseimpadana Bëngbe Bëtsá, chaoma tsábe bendicionëga tsëngaftangbe chaotsemnana, y chaoma tsëngaftangbe ainaniñe tsábe ebionana chašmotsebmnama.

### *Bëngbe Bëtsábeñe jtsosbuáchiyëse vida jtsebmnama, atsebácänënga jtsemnana*

<sup>3</sup> Bëngbe Bëtsá y Bëngbe Utabná Jesucristbe Taitábioye matschuanga; cha puerte lastemado inyëngaftaca yómnyeca, tojanma bënga tsëm juábnaca vida chamotsebmnama, bëngbioye bacna soyënga jabujauánase, Jesucristo cháuatayenama tonjánmayeca. Chiyeca bënga montsobena chábeñe jtsobátmanana sempre y nyetsca tescama, ndayá cha sochjatsatayama. <sup>4</sup> Ndayá bënga sochjatsataycá ndoñe quenátsmëna jëtsopochócama opodena soyënga, ndayá nyets tempo tsábe soyënga. Y bënga mondobátmana jóyëngacñama ndayá Bëngbe Bëtsá chabe entšanga jatšatayama tojašebuachenacá, ndayá celoca bëngbiamna cha yojtsinýena. <sup>5</sup> Chë soyënga tsëngaftangbiamna entsemna, Bëngbe Bëtsábeñe šmošbuáchemna; cha chabe obenánaca cmondánýena, tsëngaftanga játsebacama. Cha chca jamama ya tojaprontá y echanjínýanyíye, Cristo jésabama tempo chaojódshjango ora.

<sup>6</sup> Chiyeca tsëngaftanga tsá oyejuayëga šmojtsemna, masque nderabad jtseytana inýe ora, nyetsca padecena soyënguiñe jasúfriase chašmuachnëngua. <sup>7</sup> Mo chë castellanama jtsetatšëmbuama aiñe o ndoñe tsábe castellano tomnana iñiñe fjuchnëngcá, padecena soyënguiñe tsábá chašmojachnënguse, Bëngbe Bëtsá echanjínýanyíye tsëngaftanga ndegombre taišmošbuáchemna. Chë castellano pronto endbetsopochóca, masque chca, chana puerte endbetsámána. Y tsëngaftangbe ošbuáchiyana chë castellanama puerte más enduámána. Tsëngaftanga padecena soyënguentšana bëts ošbuachiyánaca chašmojabocnëse, Jesucristo chaojésabo ora, entšanga mochanjínýe tsëngaftanga šmojtsomerecena chacmotsatacheuana, más bëtsëtsanga y obenëga chácmabiamama y uámanëngnaca.

<sup>8</sup> Tsëngaftanga Jesucristo šmondobonshana, y chábioye ndoñe chešmátaninýe; masque mora cha ndoñe quešmatonýá, tsëngaftanga chábeñe šmontsošbuaché, y šmontsebmna canýe puerte tsábe oyejuayana, y ntsachetšá chana yomnana ndoñe quešmátobena jayanama, tsá bëtscá causa. <sup>9</sup> Chca oyejuayana tsëngaftanga šmontsebmna, er ndayá tsëngaftanga jtsosbuáchiyëse šmobatmancá, ya šmojtsosháchichana, chë Bëngbe Bëtsá tsëngaftanga jtsatsebacyana.

<sup>10</sup> Bëngbe Bëtsabe juabna oyebuambnayënga ya imojanatsjendá y imojangú jtsetatšëmbuama, ntšamo Bëngbe Bëtsá entšanga játsebacama, y tmojanoyebuambá ndayá Bëngbe Bëtsá tsëngaftanga jatšatayama, tsëngaftangbiamna tsábe juabna cha yobómnyeca. <sup>11</sup> Chëngbe ainaniñe yojtsemna Cristbe espíritu, y ntšamo tojanéyancá, cabá chca ndochnëngo ora, yojamna Cristo jasúfriama y ntšamo chentšana Bëngbe Bëtsá chábioye puerte bëtsá bochjábemama, Bëngbe Bëtsabe juabna oyebuambnayënga imojanjuabná y imojanatsjendá jtsetatšëmbuama chë soyënga yochjanopása ora, ndaye tempo y ntšamo chë tempo yochtsemnana. <sup>12</sup> Pero tempo Bëngbe Bëtsá chëngbioye tojaninýanyé, chca jtsamana ndoñe cachëngbe tsábiamna yonjamnana, ndayá chca jtsamana yojamna tsëngaftangbe tsábiamna. Chënga tmojanoyebuambá, ntšamo chë tsábe notiçiënga oyebuambnayënga tsëngaftanga tmojayuancá. Y chca tmojáuyana chë Uámana Espírite obenánaca, nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tsábá jinýama, chënga chaósertama.

### *Bëngbe Bëtsá entšanga jtsachembuanana chabe entšangcá chamotsiyenama*

<sup>13</sup> Chiyeca, botamana jtsejuabnayëse tsábá jatrabájama, y cach tsëngaftanga jenomándama jtsobenëse, yejuana šmochtsobátmana, Bëngbe Bëtsá soyënga cmochjatsatayama tsëngaftangbe tsábiamna jtsejuabnayëse, Jesucristo quem luaroye yochjésabo ora. <sup>14</sup> Tsëngaftanga Bëngbe Bëtsabe básenga uauenanënga quetsomñecá, ndoñe šmattsiyena ntšamo cach tsëngaftangbe bacna juabnënga yomncá nýe tsábá jtsomñama, ntšamo Bëngbe Bëtsábioye cabá nduabuata ora šmonjanbomncá. <sup>15</sup> Chamna, šmochtsiyena

mo chë Bëngbe Bëtsabe entšangcá, puerte tšabe entšangcá jtsamëse, er Bëngbe Bëtsá, nda tcmojáchembo chca chašmotsemnana, sempre uamaná endmëna. <sup>16</sup> Er Bëngbe Bëtsabe uabemana palabrënguifë mëntšá endayana: “Tšëngaftanga Bëngbe Bëtsábeñe uámanënga šmochtsemna, er atše uamaná šendmëna ca.”

<sup>17</sup> Tšëngaftanga Bëngbe Bëtsábioye šmondbuyana “Taita ca”, šmondbótšëmbona ora. Bëngbe Bëtsabiana nyetscanga cachcá mondmëna. Chiyeca, ntšamo nyetscanga tmojamama tšabá o ndoñe tšabá yontsemna ca cha yochjayana ora, cha chca echanjama nyë ntšamo chënga tmojamcá jtsinýayëse. “Taita ca” chábioye šmondbuyánayeca, quem luarentšë šmochtsiyenëntscuana sempre šmochtsejuabnaye cha nyetscangbiana más bëtsá yomnana, chë šmojtsama soyëca chca jtsinýanýayëse. <sup>18</sup> Tšëngaftanga šmondëtatšëmbo, Jesucristo, mo nda ínýengbioye játsebacama crocénana cuafjëtšajocá, tonjanóbana tšëngaftanga játsebacama, chë nyetsca soyënga nyë bonamente jtsamëse oyenentšana, ntšamo jtsiyenama tšëngaftangbe bëts taitángbentšana šmojanatsjinýcá. Cristo ndoñe checmatanatsebacá, yopodena jt-sopochócama soyënga jëtšájuae, mo crocénana o castellancá, <sup>19</sup> ndayá cachá jóbanešë, chabe uámana buifë juabuáshanëse. Cristo chë ndocna bacna soye ndbomná, tonjanóbana ora enjamna mo canýe oveshatemcá, tondaye ndbemaná, ni tsengana ndbomná, Bëngbe Bëtsábioye jëtšchuayama altaroca obaná. <sup>20</sup> Chama Bëngbe Bëtsá Crístbeñe tojanjuabó y tbojanábuayana, cabá quem luare ndëtsemna ora; pero quem tempo, Cristo entšángbeñe tonjábocna tšëngaftangbe tšabiana. <sup>21</sup> Crístbeyeca, tšëngaftanga šmondošbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjánbema. Mëntšá, ndábeñe tšëngaftanga šmošbuaché y šmobátmana, Bëngbe Bëtsábeñe endmëna.

<sup>22</sup> Tšëngaftanga šmojama ndocna bacna soyënga ainaniñe ntsebonnama, Jesucristbeyeca catšátangbioye ndegombre jtsababuányeshanama, er tšëngaftanga ntšamo ndegombre yomncá jtsamëse, Bëngbe Bëtsá šmoyeunana. Chcasna, sempre nyets ainánaca nyetscanga šmochtsenbobonshana. <sup>23</sup> Bëngbe Bëtsá tojama tšëngaftanga tsëm vida chašmotsebonnama; pero tšëngaftanga tsëm vida šmontsebonna, ndoñe nyë quem luarentšá entšanga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe palábraca, ndayá endoyebuambná ntšamo entšanga muantsobena tšabe vida jtsebonnama y chë palabra ndocna te queochaisopochóca. <sup>24</sup> Ntšamo Bëngbe Bëtsabe uabemana palabrënguifë endayancá:

Nyetsca entšanga mondmëna mo shacuancá,  
y chënga imobomna tšabe soyënga, endmëna mo chë shacuanentšá uantšëfjushangacá.  
Chë shácuaña jtsanctana y chë uantšëfjushangá jtsatquécjanana;  
entšanga cachcá, nyets tempo quem luarentšë ndoñe quemochátiyena;  
<sup>25</sup> pero Bëngbe Bëtsabe palabra nyets tempo echanjesomñe ca —chiñe endayana.  
Y chë palabra endmëna chë Jesucristbe tšabe noticiënga, chë buayenánana ntšamo ínýenga tcmojabuayenacá.

## 2

<sup>1</sup> Chcáyecna, nyetsca tescama šmochtsajbaná nyetsca bacna soyënga amana, ínýengbioye áingñayana, bacna entšanga chë ntšamo ndegombre šmojuabnacá ndinýinýayënga ntsemnana, ínýengbioye untšabošana, y ínýengbiana uayátšenayana. <sup>2</sup> Mo cabá mora onýnana šešoncá, tša jtsebošana chabe mamabe létsiye, cachcá tšëngaftanga cmontsamna puerte jtsebošana nyets tempo Bëngbe Bëtsabe soyënga jtsebonnama, chë soyëngaca Jesucristbeñe corente chašmotsošbuáchema, y chca, atsebácanënga chašmotsemnama; <sup>3</sup> ntšamo Bëngbe Bëtsabe uabemana palabrënguifë endayancá: “Tšëngaftanga šmojátatšëmbona Bëngbe Utabná puerte tšabia nyetscángaftaca yomnana ca.”

*Cristo, chë mo aina ndëtšbecá endmëná*

<sup>4</sup> Bëngbe Utabnábioye šmochtobeconá, nda endmëna mo canýe aina ndëtšbecá, ndëmuanýëse tojtsama entšanga tšabe vida chamotsebonnama. Báseftanga cha tmojtsaboté, mo ntšamo chë ndëtšbëngaca canýe yebna tmojtsejebuana ora, luaroca tmojtsejajó ndëtšbecá; pero Bëngbe Bëtsá chábioye tbojuábuayana, y chabe bominýifë cha puerte uamaná endmëna. <sup>5</sup> Chábioye šmochtobeconá, tšëngaftanga chë tšabe vida šmojóyëngacñënga, cánýifë mo aina ndëtšbëngcá, Bëngbe Bëtsabiana jajebuama canýe yebnentšama chašmotsemnama; mo Bëngbe Bëtsabiana bachnangcá chašmotsemnama, nyë Bëngbe Bëtsábioye jtsešervénama jtsešentšënešë, chábioye jtsatschuanayama. Ntšamo Bëngbe Bëtsábioye jtsešervénama šmojtsamcá, chábioye tšabá jtsinýanana, ndayá Jesucristo tojanmama. <sup>6</sup> Chca ndegombre endmëna, er Bëngbe Bëtsabe uabemana palabrënguifë, Bëngbe Bëtsá Jesucristbiana mëntšá tojánayana:  
Smochjinýe, atše sënjama Jerusalenentšë canýa chaotsemna,

y cha endmëna mo chë canÿe yebna jajebuámentse chë más bëts uashacuanësentse jajona ndëtsbecá.

Cha atšbe Uabuayaná endmëna, y atšbiana puerte enduámána.

Nda chábeñe tojtsosbuaché, ndocna te nÿe bonamente chábeñe queochátobatmana ca.

<sup>7</sup> Tsëngaftanga, chábeñe ošbuáchiyëngbiama, nda endmëna mo chë yebna jajebuámentse más bëts uashacuanësentse jajona ndëtsbecá, cha puerte enduámána; pero chábeñe ndošbuáchiyëngbiama, entsopasana ntšamo Bëngbe Bëtsabe uabemana palabrenguiñe Cristbiana endayancá:

Chë yebna jebuanënga tmontsanaboté ndëtsbé,

mora chë más bëts uashacuanësentse entsejájona ca.

<sup>8</sup> Inÿoca, Bëngbe Bëtsabe uabemana palabrenguiñe mëntsánaca chabiana endayana:

Cha endmëna mo ndëtsbé ndayentse jtsojestjiyamcá;

y mo peñëscá yomna chënga chamotsótsatsámana ca.

Chënga Jesucristo jtsabotena, chabe buayenánana ndoñe ntjoyeunaycá; Bëngbe Bëtsá cabá chca ndopása ora tojanjuabó chca chaotsemnana.

<sup>9</sup> Pero tsëngaftanga šmondmëna Bëngbe Bëtsábeyeca bocacánënga, y mo canÿe rey tmojtseservena bachnangcá, y šmondmëna Bëngbe Bëtsabe entsanga nÿe chabiana jtsetrabájayama, y chë nÿe Bëngbe Bëtsábenga šmomnënga. Y chca endmëna, tsëngaftanga chë bëts soyënga ntšamo Bëngbe Bëtsá tojamcá chašmotsabuayiyama. Cha endmëna nda tcmojáchembo chašmotsajbanama oyenana mo ndoñe binÿniñcá jtsejuabnayëse y jtsamëse, cháftaca jtsemnana chašmotsobenama, chë tsëngaftangbe juabnënga puerte binÿnayáftaca. <sup>10</sup> Tempo tsëngaftanga ni mo cánÿntša entsangcá ndoñe quešmënjatsmëna, nÿe ujquëshenënga; pero mora, Bëngbe Bëtsabe entsanga šmontsemna; tempo šmonjamna entsanga ndocná tonjánalastemanga, pero mora, Bëngbe Bëtsá aíñe lastemado tsëngaftangaftaca entsemna.

#### *Bëngbe Bëtsá jtse servénama jtсийenana*

<sup>11</sup> Atšbe bonshánënga, ndayentse tsëngaftangbe ndegombre luare yomna, celoca endmëna, y muentse quem luarentse, tsëngaftanga šmondmëna mo inÿoicana ashjajnëngcá, y mo canÿe luarëjana nÿe achnëjuanëngcá, cach tsëngaftangbe luaroye átayiñe. Chiyeca cbontsaimpadana, ndoñe chašmondëtsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtsepenzéntsiayana, chentse jtsemándayama y Uámána Espiritu ndoñe chaondëtsemándama. <sup>12</sup> Chë Bëngbe Bëtsábioye nduabuatumëngbeñe sempre šmochtsiyena tšabá jtsamëse; chca chënga, masque mora tsëngaftangbe contra imojtsoyebuambná, tsëngaftanga mo bacá uamana entsanga cuaftsemnëngcá, chë tšabe soyënga ntšamo tsëngaftanga šmojtsamcá chamuinÿyama, y chca, Bëngbe Bëtsá chëngbioye chaojenonÿinÿé te, chábioye chënga chamotsatschuanama.

<sup>13</sup> Bëngbe Bëtsá šmoyeunanama, nÿetsca entsanga mando bomnëngbioye šmochtsobedecena; chë Romoca bëts mandádbioye, cha chë quem luarentsa más uámána puesto jtsemándayama endbómnyeca; <sup>14</sup> y chë tsëngaftangbeñe mandadëngbióynaca, ndëmunÿyënga cha jichamuana chë bacna soyënga amënga jácastigama, y chë tšabe soyënga amëngbiama tšabá imojtsama ca chamuayanama. <sup>15</sup> Chë mando bomnëngbioye šmochtsobedecena, er Bëngbe Bëtsá endboše tsëngaftanga tšabe soyënga chašmotsamama, chca, chë ndosertánënga chë tsëngaftangbiama podesca ichámënga, ntšamo ndegombre yomncá ntsetatšëmbcá, tondaye chamondëtsebomna tsëngaftangbe contra jayanama.

<sup>16</sup> Smochtsiyena tšabá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnana ndoñe šmattsejuabnayë nÿe ndaye bacna soye jamama šmojtsobena ca, y nÿe chca šmochjátama. Más tšabá endmëna jtсийenana, mo chë Bëngbe Bëtsá imoservenëngcá. <sup>17</sup> Nÿetscangbiama respeto šmochtsobomna, chë Jesucristbeyeca catšátangbioye šmochtsababuánÿeshana, sempre smochtsiyena Bëngbe Bëtsabiana jtsejuabnayëse cha chë más bëtsá yomnana, y chë Romoca bëts mandado šmochtsesrespetana.

#### *Cristo chabe entsanga tojinÿanÿé ntšamo yomna jasúfriana*

<sup>18</sup> Tsëngaftanga, chë nÿets tempo inÿabiana canÿe yebnentse oservénënga, tsëngaftangbe nduinëngbioye smochtsayaunana, puerte respeto chëngbiama jtsebomnëse; y ndoñe nÿe chë tšabëngbioye y nÿe tšabá mandbomnëngbioye, ndayá chë bacá mandbomnëngbióynaca. <sup>19</sup> Nderado nda, ntšamo Bëngbe Bëtsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfriana ndoñe tbondmëna, chca jamëse, Bëngbe Bëtsá corente tšabá jtšinÿanana. <sup>20</sup> Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtsama y chë causa šmojtsesufrina, y tša uantadënga chiñe šmojachnëngo, chë soye cocayé Bëngbe Bëtsá



corente tšabá jtsinjanana. <sup>21</sup> Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriama; chca ndegombre endmëna, er Cristo tšëngaftangbiam tonjansufri, y chca cha tcmonjaninjanýé, ntšamo jamama cmojtsamna, tšëngaftanga chca chašmotsamama. <sup>22</sup> Cristo ndocna te ndocna bacna soye chenáisema, ni ndocnábioye chebnaisëingné. <sup>23</sup> Chábioye tmojtsoyenguá ora, chëngbioye ndoñe ntéyánguanguana. Cha chaosufriama tmonjanma ora, cha ndocá ntjatëtsëtsnayana jaútatjama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nyëtscanga tmojamama tšabá o ndoñe tšabá yonjanma ca yochjayana ora, chca echanjama nyë ntšamo chënga tmojamcá jtsonjáyëse. <sup>24</sup> Cristo cruciñe tonjanóbana ora, cha tonjansufri chë castigo, chë bëngbe bacna soyëngama cach bënga šojánamna jasúfriama castigo, bënga chë bacna soyënga jamama juabnëngaca ndoñe más mandánënga chamondëtsemnana, y bënga ntšamo Bëngbe Bëtsabe bominiñe tšabá yomncá jtsamëse chamotsiyenama. Er Cristbioye chënga tmonjanlisiá chaóbanama y tonjansufri jobanëntscuana, y chca, bënga šonjanusebacá. <sup>25</sup> Er tšëngaftanga, tempo Bëngbe Bëtsábentšana bënoca šmonjanma, mo ótsëna ovshëngcá; pero mora Cristbe benache šmojtishache, y cha cmontsanjëna, mo ovshëngbe canýe abuañënjacá, y cha entsantjësna tšëngaftanga tšabá chašmotsemnana.

### 3

#### *Ntšamo iuamna chë bouamnëngbioye jtsiyenana*

<sup>1</sup> Cachcá mo chë oservenëngcá, tšëngaftangnaca shémanga, tšëngaftangbe boyángbioye šmochtsayaunana, chca, chë Bëngbe Bëtsabe buayenana soyënguñe ndošbuáchiye boyángbioye chašmobená jáyëñjanama, Jesucristbeñe chamotsošbuáchema, ntšamo tšëngaftanga šmojtisyenama. Ndoñe queochátsiyta chë buayanánama chënga jatëtsëtsnayana, <sup>2</sup> er chënga mochanjinýe tšëngaftanga šmojtisyena, Bëngbe Bëtsá nyëtscangbiam más bëtsá yomnana sempre jtsejuabnyëse, y ntšamo šmojtsamcá chca yojtšinýinýayëca. <sup>3</sup> Cach tšëngaftangbiam ndoñe mëntsá šmactsejuabnyaye: “Entšanga atše botamaná tsmëna ca chamotsejuabnana atše nýa mo chca chantenochquëca, chantenóbotamane ba castellano soyëngaca o ba uámana entšayangá chantichëtjo ca”; <sup>4</sup> ndayá chca chaotsemna, ntšamo tšëngaftanga chë Uámana Espiritbeyeca mandánënga jtsemnëse ainaniñe šmojuabnana, cmëbionama y šmobošama; ndocna te ndopochócaye botamanana jtsebonnana, ainaniñe nyë cach tšëngaftanga uámanënga jenobiamama juabnënga ntsebonncá, pero aiñe ainaniñe tšabe ebionana jtsebonnëse. Chë soyënga Bëngbe Bëtsabe bominiñe puerte enduámama. <sup>5</sup> Tempo chca, chë puerte tšabe shembásenga, chë Bëngbe Bëtsabe bocacänënguentšënga, imojanamana jtenóbotamayana; chënga Bëngbe Bëtsábeñe imojtsošbuaché y chábeñe imojanobátmana, y nyëtscanga chëngbe boyángbioye imojanayanana. <sup>6</sup> Chca yojamna Sara, Abrahámioye ibnayeunana y chábioye “Taita ca” ibojanábobuatma. Tšëngaftanga Sarabe bembangcá jtsemnana, tšabe soyënga šmojtsamëse, y tondayama uatjana šmontsebonnëse.

<sup>7</sup> Cachcá, tšëngaftanga boyanga, cada ona cachabe shëmaftaca chaotsiyena, tšabá jtsenëyeunanëse, y cha respeto buajoná chaotsemnana jtsamëse; pero chca, ndoñe nyë cha acbiam más batšá obenana bomná bëtsemnana, ndayá Bëngbe Bëtsá chabiam tšabe juabna yobómnyëca, ntšamo cach aca tšabe vida tcmojasbuachenacá chábionyaca tbojašbuáchenama. Chca šmochtsama, Bëngbe Bëtsáftaca jencuëntama totcá chaondëtsemnana.

#### *Chë tšabe soyënga amama jasúfriama yojtšamnënga*

<sup>8</sup> Y morna, nyëtsca tšëngaftanga cachcá šmochtsejuabnyaye, inýenga šmochtsalastemana, chë Jesucristbeyeca catšátangbioye šmochtsababuánýëshana, inýengbiam chacmóngmiaye, y cada ona chaotsejuabná chë inýenga chabiam más uámanënga imomna ca. <sup>9</sup> Inýenga tšëngaftangbiam ntšamo tcmojaborlá ora, ndoñe šmattëchenanguaye; ni chacmojtšëyanguá ora, chëngbioye ndoñe šmattoyánguango. Chca játamama cuentna, Bëngbe Bëtsá šmochjaimpáda, chëngbeñe tšabe bendicionënga chaotsemnana cha chaomama, er Bëngbe Bëtsá tcmojáchembo chca chašmotsamama, y Bëngbe Bëtsábicana tšabe bendicionënga chašmoháchiñama. <sup>10</sup> Ntšamo Bëngbe Bëtsabe uabemana palabrënguñe endayanacá: Nda toböse tšabe vida jëtsebonnana y puerte oyejuayá tempënga jtsebonnana, yejuana chaochtsenojuabná bacna soyëngama ndoñe chaondëtsoyëbuambnana, y ndoñe chaondëtseboosterama.

<sup>11</sup> Bacna soyënguentšana chaotsojuánañe y tšabe soyënga chaotsama, natjëmšana nyëtscängaftaca jtsiyenama chaotseboše, y chca chaotsemnana sempre chaotsentšëna.

<sup>12</sup> Chca bontsemna jamana, er Bëngbe Utabná, chabe bominiñe tšabe soyënga amëngbioye jtsanjenana, chëngbiam sempre jtsantjësñëse; y sempre chëngbioye jtsayaunanana, chábioye ndayámnaca tmojtsotjanañe ora;

pero chë bacna soyënga jamana uamanëngbe contra cha jtsemnana ca —chiñe endayana.

<sup>13</sup> ¿Nda nanjobenaye tsëngaftangbiamu bacna soyënga jamana, tsëngaftanga chë tsabe soyënga jamana sempre s'mojtsentsënëse? <sup>14</sup> Pero masque tsëngaftanga cmojtsamna jasúfriama tsabe soyënga s'mojtsamama, Bëngbe Bëtsá chama tsabe soyënga cmochántatsataye. Chë tsëngaftanga chašmosufrima amëngbiamu ndoñe matauatjëngana, ni ainana tsetsenánënga ndoñe matsmëñëngana, <sup>15</sup> ndaya ainaniñe sempre smochtsejuabnaye Cristbiamu mo Bëngbe Utabnacá y chabiamu respeto smochtsebomna; y sempre smochtseprontana jojuama ndëmuanyënga tcmojtsatjaná ndáyeca tsëngaftanga Bëngbe Bëtsábeñe jtsosbuáchiyëse, chabiamu ainaniñe smobátmanama. <sup>16</sup> Pero chca smochjama tsabe ainánaca jtsënyayëse y Bëngbe Bëtsabiamu respeto jtsebomnëse. Smochtsiyena tsabá jtsamëse, y chama ainaniñe ndoñe chašmondëtsebomna juabnënga y chamuayana chca ndegombre ndoñe tsabá smontsama ca, chca, inyënga tsëngaftangbiamu podësca chamojtsejuambná ora, tsëngaftanga Cristbeñe ošbuáchiyënga quetsomñëcá tsabe soyënga s'mojtsamama, chënga chamotséuatja chca tmojtsóyebuambnana.

<sup>17</sup> Más tsabá endmëna jasúfriana tsabe soyënga tcojamama, nderado Bëngbe Bëtsá chca chaotsemnana tojtsebošëse, y ndoñe chë jasúfriana ndaye bacna soye tcojamama. <sup>18</sup> Er Cristo nye canye tonjanóbana bënga bacna soyëngama jáperdonama; chë nyetsca soyënguifne tsabá amá, chë Bëngbe Bëtsabe bominyiñe ndoñe tsabá yondmëna soyënga amëngbiamu, tsëngaftanga Bëngbe Bëtsáftaca chašmotsatsmënamu. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsatsbomnamu. <sup>19</sup> Pero Cristo cháuatayenamu Bëngbe Bëtsá cabá ndëma ora, chabe espiritiñe cha tojána chë ndoñe tsabe entšanga imonjmnëngbe espíritënga utámenënga imojamnoye, chëngbiamu castigo tojtsemnëntscuana; y cha tojanayëñjanama chënga tojanabuayená. <sup>20</sup> Quem espiritënga bayté entsemna, Bëngbe Bëtsábioye ndoñe monjánëyeunana, Noebe yojétsiyena ora, chë bacna soyënga amënga chca amama chamotsajbanama y tsabe benache chámuatishachama Bëngbe Bëtsá bën yojanobátmanu ora, barquësha canduapormantscuana. Chentsana chë barquëshañe báseftanga tmojanotsbocá, posufta entšanga, búyeshe juatsbuacá chë barquësha yojtsámnyayeca. <sup>21</sup> Chë chënga chamótsbocama tojanëñjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnana. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtsenóbolimpiama, ndaya bëngbe ainaniñe ndocna bacna juabnënga ntsebomnamu Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenamu Bëngbe Bëtsá tojánmayeca. <sup>22</sup> Cristo celoye tojtantsjuá y Bëngbe Bëtsabe catsbioica yomna jamándama. Cha endmëna chë amëndayá angelëngbiamu y espíritënga mando y obenana bomnëngbiamu.

## 4

### *Entšanga entsamna jtsiyenana ntšamo Bëngbe Bëtsá yobošcá*

<sup>1</sup> Chcasna, ntšamo Cristo tojansufricá, chabe cuerpiñe mo entšacá játsetsenëse, tsëngaftángnaca cmontsama jtseprontánana chca jasúfriama. Er chë Cristbeñe ošbuachiyá nda chabe cuerpiñe tojasufrí, chë bacna soyënga amentšana tojtsojuánañe, <sup>2</sup> chca, chabe vidíñe, morscana y jobanëntscuana, jétsiyenama ntšamo Bëngbe Bëtsá yobošcá, y ndoñe nye entšangbe bacna juabnëngaca, nye quem luarentše tsabá jéftsemnana. <sup>3</sup> Tempo, bayté enjamna, ndayëntscuana tsëngaftanga smonjánama soyënga, mo chë Bëngbe Bëtsábioye nduabuátmënga mondbetsamcá; nya ndoñe más. Chë tempo, tsëngaftanga smonjaniyena nyetsca bacna soyënga jtsamëse, jenomándama ntsebencá; tsëngaftanga smonjánama soyënga nye ntšamo smojanbošcá, nye tsëngaftanga tsabá jtsomñama; smonjanamana jotmenangana y ba fiestënga jtsebomnana, y chora chë óñanënga tša jtsetmoyana y tša jtseyoyana, y ba uabouana soyënga smonjanamana jtsamana chë diosënga yojamna ca smojanjuabná soyënga jadórama. <sup>4</sup> Morna, chë Bëngbe Bëtsábioye nduabuátmënga montsenjaná, tsëngaftanga ya ndoñe más bacna soyënga jtsamëse s'mojtsiyenama, ntšamo tempo smonjaniyena, ntšamo chënga jtsamëse mondoyena, jenomándama ntsebencá; y chë causa, chënga bacna soyënga tsëngaftangbiamu jtsóyebuambnayana. <sup>5</sup> Pero chënga echanjótocaye jayanama ndáyeca chca tmojamama, chë entšangbiamu, chë ainënga y chë ya mochjóbanëngbiamu, ntšamo tmojamama, aiñe o ndoñe tsabá bëtsemnana jayanama entseprontanabe delante. <sup>6</sup> Chiyëca, Cristbeñe ošbuáchiyënga, chë mora obanënga imojtsemnënga, ainënga monjamna ora, inyënga chë tsabe noticiëngama chëngbioye monjanabuayiyiná, chënga chamobenama chë nyetsca tescama yomna tsabe vida chëngbe espíritofaca jtsebomnana, ntšamo Bëngbe Bëtsá yobomncá; masque mora quem luarentše, chëngbe cuerpo tojóbana, er Bëngbe Bëtsá tojayana nyetsca entšanga yojtsamna jóbanama ca.

<sup>7</sup> Ndoñe bayté y nyetsca soyënga echanjopochóca. Chiyëca, tsëngaftanga cmontsamna botamana jtsejuabnayana y jenomándama jtseobenana, Bëngbe Bëtsáftaca jencuëntama

chašmotsobenama. <sup>8</sup> Njetsca soyëngama, masna, sempre nyetscanga puerte šmochtsenbobonshana, er nda inyënga puerte tojtsababuanjeshaná, sempre jtseprontánana inyënga jáperdonama, chëngbiama bacna soyënga tmojamama. <sup>9</sup> Njetscanga šmochtsamana tšëngaftangbe yebniñe jenofjana, chca jamama totcá yojtsemna ntjatichamcá. <sup>10</sup> Njetsca tšëngaftanga Bëngbe Bëtsá tcmojatšatá obenana tšabe soyënga jamama; chca, chë obenánaca cmontsamna jtsamana soyënga chë inyëngbe tšabiama, chë Bëngbe Bëtsá cmojatšatá nyets obenánaca inyëngbiye jujabuáchama, nyets tempo tšabe soyënga jtsamëse. <sup>11</sup> Nda tojtsabuayiyíná, Bëngbe Bëtsabe palabra chaotsabuayiyíná mo Bëngbe Bëtsá chabijana cuaftsoyebuambnacá; nda inyënga tojtsaserverna, chca chaotsama chë Bëngbe Bëtsá yojtsama cha chaotsebomnama obenánaca. Njetsca soyënga ntšamo šmojtsamcá chaotsinjanáná Bëngbe Bëtsá puerte uamaná y obená bëtsemnama, Jesucristbeyeca. Chca šmochtsama, er Bëngbe Bëtsá puerte uamaná endmëna y obenana endbomna nyets tempo y nyetsca tescama. Chca chaotsemna.

*Puerte tšabá endmëna, Cristbeñe tcošbuáchema, jasúfriama tbojtsemnëse*

<sup>12</sup> Atšbe bonshana entsanga, ndoñe šmattsenjanayepadecena soyënguiñe šmojtsesufrinama; chiñe jtsinynana ntsachetšá ošbuáchiyana šmombomnama. Chca ora ndoñe šmattsejuabnaye, tšëngaftanga ndoñe cmondamna chca soyiñe jtsachñëjuanana ca; <sup>13</sup> chamna, šmochjójeyuaye chë ntšamo Cristo tojansuficá šmojtsesufrina ora, chca, Cristo corente obenánaca y uamanacá entsángbeñe chaojtonáná te, tšëngaftanga puerte chašmotsójeyuama. <sup>14</sup> Puerte šmochtsójeyuaye, nderado nda tcmojoyánguango Cristbiana bëtsoservernayeca, er Bëngbe Bëtsabe Espiritu, chë corente bëtšá endmëná, sempre tšëngaftangbe ainaniñe iuëtsemna. <sup>15</sup> Tšëngaftanguentšë ndocná chabondëtsemna jasúfriama inya óbanaye causa, atbëbanama, bacna soyënga inyëngbiama amama, o inyëngbe soyënguiñe ontremetënama. <sup>16</sup> Pero Cristbe ustóná tomnama tojasufri, chama ndoñe chaondëtšëuatj; chamna, Bëngbe Bëtsábíoye chabotsatschuaná, cha Cristbe ustóná bëtsemnama.

<sup>17</sup> Er chë tempo ya tojobuache, Bëngbe Bëtsá jayanama, cach Cristbeñe ošbuáchiyëngbiama, chabe entsángbiama, tšabá o ndoñe tšabá tmonjamama. Cha chca bëngbiama jayanama tojontese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiama chca chaojyana ora. <sup>18</sup> Y chca, chë Bëngbe Bëtsabe bominyiñe tšabá amabíama ndoñe paselo atsbocaná jtsemnama tontsemnëse, çntšamo yochjopása chë Bëngbe Bëtsábíoye ndoñe adórayënga y chë bacna soye amëngaftaca? <sup>19</sup> Chcasna, chë imosufriñëngaftaca Bëngbe Bëtsá chca yobóseyeca, entsamna chë tšabe soyënga jtsamana y Bëngbe Bëtsabe cucuatšíñe chëngbe espíritu chamoboshjona cha chaotsinjenama, er cha chënga tojánabiama, y nyetsca soyënguiñe tšabe palabra bomná cha endmëna.

## 5

*Cristbeñe ošbuáchiyënga jábuayenama*

<sup>1</sup> Y mora, chë tšëngaftangbentšë ošbuachiyëngcá enefjuanëngbeñe bëtšëjemëngcá amëndayënga chanjabuayená, atše cach tšëngaftangcá bëtšëjema, canya ntšamo Cristo tonjansuficá tonjaninýa y chama inyënga tonjanëyana, y canya ndábíoye cach tšëngaftangcá Bëngbe Bëtsá hochjábema más uamana y bëtšá, Cristo entsángbeñe chaojtonáná ora; tšëngaftanga cbabuayená. <sup>2</sup> Ošbuachiyënga šmochtsanýena; chënga chašotsanýenama Bëngbe Bëtsá chca tcmojábíama. Chca, chentšá ošbuachiyëngbeñe šmochtsama ntšamo canye tšabe abujënëña chabe oveshëngaftaca endbetsamcá. Bëngbe Bëtsabe trabajo ndoñe šmattsama, nye cmojtsëtocanama, ndayá chca jamama šmojtsebóseyeca. Chca ndoñe šmatjama nye paselo crocënaná juacánama, ndayá inyëngbiye jujabuáchama tša šmobóseyeca. <sup>3</sup> Chë cmojtsamna jtsanýenama ošbuachiyënga ndoñe nye bëtšcá šmattsamëndaye, mo chëngbe nduiñënga cuafjatsmënëngcá, ndayá ntšamo tšëngaftanga šmojtsiyenama, chënga šmochjinjanýe ntšamo yojtsamna jtsiyenana. <sup>4</sup> Chca, chë bënga nyetscanga, mo chë tšabe abujënëñacá suanýená, quem luaroye yochjésabo ora, mo canye uabuashinýinýana coronëša ndocna te tontsandbemëshacá, tšëngaftanga canye bëtš uacanana soye šmochanjóyëngacñe, y chë soye endmëna nyetsca tescama; Bëngbe Bëtsá uamanënga y bëtšëtsanga cmochanjábíama, cháftaca nyets tempo oyejuayënga jtsemnëse.

<sup>5</sup> Cachcá, tšëngaftanga chë bobontšëngnaca cbabuayená, sempre šmochtsejuabnaye chë bëtšëjemënga tšëngaftangbe amëndayënga imomnama, y chca šmochtsama. Cada ona tšëngaftanguentšá bontsemna jtsejuabnayana chë inyënga tšëngaftangbiama más uamanënga cuaftsemncá, inyëngbiye šmojtsaserverna ora; er ntšamo Bëngbe Bëtsabe uabemana palabrënguiñe endayancá:

Bëngbe Bëtsá chë nye cachënga uamanënga tmojtse nobiamnangbe contra entsemna, y chë ndoñe uamanënga montsenobiamnangbiama, Bëngbe Bëtsá más tšabe juabna entsebmomna ca.

<sup>6</sup> Sempre smochtsejuabnaye Bëngbe Bëtsá chë más bëtsá nÿetscangbiana yomnana, y nÿets mando y obenana bomná yomnana, y chabe delante ndoñe uámanënga šmattsenobiamnaye, cha más uámanënga chácmabiamama, chama chë tempo chao-jobuache ora. <sup>7</sup>Nÿetsca soyënga ndayama šmuenócochinÿenama Bëngbe Bëtsabe cucuatšife šmochjáboshjona, er cha tšëngaftanga yejuana cmondánÿena.

<sup>8</sup> Cach tšëngaftanga jenomándama chašmotsobena y sempre smochtseprontana, er tšëngaftangbe uayaya Satanás, mo canÿe león tojtsejató, nda jtsósañama tojtsana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmotsajbanama. <sup>9</sup> Puerte smochtomorócha, Jesucristbeñe bëtscá jtsošbuáchiyëse, chë uayayá tondaye chaondobená tšëngaftangaftaca jamama, cach tšëngaftangcá Jesucristbeñe ošbuáchiyënga nÿets luarënguenache cachcá jasúfriama yojtsamnama jtsetatšëmbëse. <sup>10</sup> Pero tšëngaftanga baseftayté chašmojasufrí chentšana, Bëngbe Bëtsá cmochanjábiana nÿetsca soyënguñe puerte tšábenga, puerte chašmotsemorochama, bëtscá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnama; Bëngbe Bëtsá, chë bëngbiama tšabe juabna bomná, bënga nÿetsca tšabe soyënga šonjatšatá, y nda bënga šojáchembo nÿetsca tescama bëtsétsanga jtsemnama, chca echanjama. <sup>11</sup> Cha nÿets obenana nÿets tempo y nÿetsca tescama chaotsebmna. Chca chaotsemna.

### *Jtadiósoftanama*

<sup>12</sup> Silvano, ndabiana sëndëjuabná atšbiana canÿe tšabe palabra bomná Jesucristbeyeca catšata yomnana, cháftaca quem base tsbuanácha tcbonjubuábiana. Atše sëntseboše tšëngaftanga añemo jatšatayana y jáuyanana, ndegombre ntšamo tcbonjubuabiamcá yojtsoyebuambná ntšamo Bëngbe Bëtsá tšabe bendicionënga cmatšatnama. Chíyeca, sempre smochjéftsiyena jtsamëse ntšamo chabe tšabe juabna tšëngaftangbiana yomncá.

<sup>13</sup> Ošbuáchiyënga muentše átšeftaca montsemnënga cmontsacheuaná. Chënga quem bëts pueblentše mondoyena bacá uamana entšángaftaca, mo chë tempo, Babilonia bëts pueblota imojoyena entšangcá, pero Bëngbe Bëtsá muentša ošbuáchiyënga tojabacacá cach tšëngaftangbioycá. Marcos, chë atšbiana mo uaquiñacá endmëná, chánaca cmontsacheuaná. <sup>14</sup>Nÿetscanga Jesucristbeyeca catšatangcá šmochjenchuaye, jtenámochëse tša šmojtsenbobonshánama.

Atše, Bëngbe Bëtsá sëntseimpadana cha chaoma tšëngaftanga chë Jesucristoftaca cánÿiñe mo canÿacá šmomnënga, nÿetscanga ainaniñe tšabe ebionana chašmotsebmnama.

## 2 San Pedro

### *Jacheuayama*

<sup>1</sup> Atše Simón Pedro, Jesucristbe oservená y chabe ichmoná, quem tsbuanácha séntsabiamná tséngaftangbiamna, ndēmuanýenga šmojashjache jtsebmnama canýe ošbuáchiyana Jesucristbeñe, cach bēngbe ošbuachiyancá uámanana, er Bēngbe Bētsá y Atsebacayá Jesucristo, jtsebošana ndánaca y nyetscanga chábeñe chamotsošbuáchemna. <sup>2</sup> Atše séntseimpadana, tséngaftanga Bēngbe Bētsabiamna y Bēngbe Utabná Jesusbiamna cada te más jtsetatšembēse, Bēngbe Bētsá chaoma tsábe bendicionēnga tséngaftangbeñe chaotsemnama y chaoma tséngaftanga ainaniñe tsábe ebionana chašmotsebmnama.

### *Chē Jesucristbeñe ošbuáchiyēngbe tsábe soyēnga*

<sup>3</sup> Bēngbe Bētsá chabe obenánaca tojama bēnga chamobená jtsebmnama, lempe ntšamo tmojtšejabotcá tsábe vida jtsebmnama y jtseyenama, Bēngbe Bētsá jadórama soyēnga jtsamēse. Cha chca tojama bēnga chábioye chamotsábuatmama tojanma ora. Cha bēnga šojáchembo, cachá obená y uamaná bētsemnama y bēts soyēnga jamēse, chabe entšanga chamotsemnama. <sup>4</sup> Chca, Bēngbe Bētsá šojatšatá ntšamo bēnga jatšatayama tojanašebuachenacá, bēts y uamana soyēnga, chca, quem luarentša bacna soyēnguentšana chašmotsojuánañama. Chē bacna soyēnga quem luarentše jtsebínýnana, entšanga nye cachēngbe bacna juabnēngaca jtseyenama yapa boše causa. Chánaca chē tsábe soyēnga šojatšatá, tséngaftanga cháftaca cánýiñe mo canýacá chašmotsemnama, cachacá jtsemnama jashjáchēse. <sup>5</sup> Chca, ndoñe quenátšmēna nye Jesucristbeñe ošbuáchiyana jtsebmnama; chiñe šmochjenobuáshjache, bētscá tsábe soyēnga jtsamēse; chora bētscá šmochtsama Bēngbe Bētsabe soyēngama chacmotsésertánama; <sup>6</sup> chora bētscá šmochtsama cach tséngaftanga jenomándama chašmotsobenama; y chca, tséngaftanga masque padecena soyēnguiñe chašmojtsachnējuana, ainaniñe puerte añemo jtsebmñēse, puerte uantadēnga chašmotsemnama; y chentšana bētscá šmochtsama, tséngaftanga Bēngbe Bētsá šmojtsadoránama jinýanjíyama; y <sup>7</sup> chca, nyetsca tséngaftanga ošbuáchiyēnga chašmotsenbobonshana; y chca, nyetsca entšanga chašmotsababuánýeshana.

<sup>8</sup> Tséngaftanga lempe chē soyēnga šmojtsebmna, y bētscá chca šmojtsamēse, smochantsiyena beca oservenana soyēnga jtsamēse, y chentšana puerte tsábe soyēnga echantsóbocana, corente tsábá Bēngbe Utabná Jesucristo chašmotsábuatmama. <sup>9</sup> Pero nda quem soyēnga ndoñe tontsama, Bēngbe Bētsabe soyēngama ndoñe ntosertánana; y chca, cha mo canýe jtaná o nduabinýnacá jtsemnama; cha tbojtsebnatjēmba Bēngbe Bētsá chabe tempsca bacna soyēnga tbojtsebojuánama, y Bēngbe Bētsabe delante cachíñe tsábá chaotsatsmēnama tojamama. <sup>10</sup> Chíyeca, Jesucristbeyeca atšbe catšátanga, nýa smochtsentšena chca tsábe soyēnga jtsamama, y chca, corente tsábá šmochanjátatšēmbona, Bēngbe Bētsá chabe entšanga chašmotsemnama tcmojáchembama y tcmojábacacama; y chca jtsamēse, Jesucristbeñe ošbuáchiyana ndocna te quešmochatajbaná. <sup>11</sup> Chca, Bēngbe Bētsá oyejuayá tséngaftangbiamna echanjama, Bēngbe Utabná y Atsebacayá Jesucristbe amēdayoye jamashēnguama ndegombre chašmobenama.

<sup>12</sup> Chcáyecna, atše séntsejuabná tséngaftangbioye sempre chē soyēngama jtsabuayiy-nayana, masque chē soyēngama ya šmotátšēmba, y tša šmojtsošbuaché Bēngbe Bētsabe ndegombre soyēnguiñe y chca šmojtsiyena, chē mora šmojtsetatšēmba soyēnguiñe. <sup>13</sup> Séntsejuabná, chajjēftsainēntscuana tsábá yojtsemna jamana, ainaniñe bētscá añemo chašmotsebmnama chē soyēnga jtsamama, ntšamo tijayancá jtsabuayiyayēse. <sup>14</sup> Atše séntsetatšēmba, ndoñe haytse y atšbe ainana Bēngbe Bētsábioye yochtá, ntšamo Bēngbe Utabná Jesucristo šonjētsanbuayenacá; <sup>15</sup> pero bētscá chanjēftsema, atše chajjóbona chentšánēnaca tséngaftanga nyets tempo chē soyēngama chašmotsenójuabnama.

### *Cristo corente uamaná y obená yojannama tmojáninýe ora*

<sup>16</sup> Bēngbe Utabnabe obenanama y cha yochjésabama ntšamo tbonjanabuatambacá, ndoñe quenjatsmēna entšangbe osertánaca pormanana cuentēngaca, er cach bēnga botamana fsēnjáninýe chabe uámanana y obenana. <sup>17</sup> Bēngbe Bētsá chē Taitá, Jesucristo puerte obenana bomná bētsemnama y cha corente bētsá y uamaná bētsemnama tonjaninýinýe ora, bēnga fsēnjáninýe. Chca fsēnjáninýe Bēngbe Bētsá, chē puerte uamana y bētsábocana oyebuambnayana Jesúbioye méntšá tbonjaníyana ora: “Mua atšbe bonshana Uaquiná endmēna, atše chabiamna séntsoyejuá ca.” <sup>18</sup> Cach bēnga chē oyebuambnayana fsēnjanuena, chē celocana tonjanóbocnana, er bēnga Bēngbe Utabnáftaca fsēnjanmēna, chē uamana tjoca.

<sup>19</sup> Chē sóyeca bēnga fsēntsobena corente jtsetatšēmbuana, ntšamo chē Bēngbe Bētsabe juabna oyebuambnayēnga tmojanayancá ndegombre bētsemnama, y tséngaftanga

tšabá šmochántsama, ntšamo chënga tmojanayancá šmojtseyeunanëse. Chca, chëngbe palabrëngaca entsopodena Bëngbe Bëtsabe soyëngama tšëngaftanga jinñanñiyana, y echántsemna mo canye uajuinñanëshsa canye ibetiñe luarentse tojtsebinñacá. Chë soyënga smochtsuenana Jesucristo yochjësabëntscuana; chora, cha nyëtsca soyënga cmochanjñanñiye, mo tšëngaftangbiana canye tšëm te cuaffabinñacá, y chë jabínñama ora binñaye estrella tojábozna tšëngaftanga jabuabinñacá. <sup>20</sup> Pero natsana chacmësértá, ndocna palabra Bëngbe Bëtsabe uabemana palabrënguiñe tojayana canye soye yochjopása ca, cabá chca ndopása ora, nye cach Bëngbe Bëtsabe juabna oyebuambnayëngbe juabnentšana tojanóbocnama; <sup>21</sup> er Bëngbe Bëtsabe juabna oyebuambnayënga ndoñe monjanoyebuambná nye chënga chca jamama innabóseyeca, ndayá Bëngbe Bëtsabe cuenta tmojanoyebuambá, chë Uámana Espíritu chënga chca chamóyeuambama tojánmayeca.

## 2

### *Chë ndoñe ndegombre soyënga buátëmbayënga (Jud 4-13)*

<sup>1</sup> Chë Bëngbe Bëtsabe juabna oyebuambnayëngbe tempo, Israeloca entšangbeñe baseftángnaca imojamna, ndëmuanyënga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tšëngaftangbeñe abuátambayënga mochántsemna, y chënga ndoñe ndegombre soyënga mochántsaubatambaye, pero ndegombre soyëngaca cánñiñe, chca, chënga chca imojtsabuátambama entšanga ndoñe chamondétátšëmbonama. Chë buátëmbana soyënga echanjama, entšanga ndoñe ndegombre soyënga y bacna soyënga chamotsamama. Ntšamo chënga mochántsama y mochántsaubatambaye soyëngaca, mochántsama Jesucristo ndoñe chëngbe Utabná chaondëtsemnama, cha nda chënga tojatsebacá, mo nda inñyënga játebacama crocénana cuaffjësajocá. Y chca, nye ndeolpe, chë Bëngbe Bëtsábiocana uabouana castigo nyëtsca tescama mochántsebmna. <sup>2</sup> Banga chëngbiyoye mochantsësetona, nyëtsca bacna soye, jenomándama ntsobencá jtsamëse; y chëngbe causa, inñyënga ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama. <sup>3</sup> Chënga bëtscá crocénana jtsebmnama yapa mochántsaiboye causa, ba bostero soyëngaca cmochántsaingñaye; pero Bëngbe Bëtsá tempo chëngbiana tojánayana, ndoñe tšabá imojtsamama y chëngbiana castigo nyëtsca tescama chaotsemnámmaca.

<sup>4</sup> Bëngbe Bëtsá chë bacna soyënga tmojanma angelëngbiyoye ndoñe tonjanaperdoná, ndayá infiernoye tojtansatsatse y puerte ibetiñe tojtansabáshejuana, chë uabouana thoca chamoquedama, Bëngbe Bëtsá chëngbiana nyëtsca tescama castigo chamotsebmnama yochjayana orscama. <sup>5</sup> Y cach ndoñe quem luarentša entšangbiyoye tonjanaperdoná Noé yojëtsiyena ora, y chënga jácastigama aiñe tojanma chë uabouana uaftena chëngbeñe chaotsemnama, chë nduauenana y bacna entšanga jtsebmnama yojánammama; y íñfeshca tojtсанapochocá, chë pueblënga y chentša entšanga jatínñá jtšabiamëntscuana. Y chë sóyeca Bëngbe Bëtsá tojaninñanñyé ntšamo bacna entšangaftaca yochjama, chë chentšana mochtšiyena bacna entšangbiana. <sup>7</sup> Pero Bëngbe Bëtsá Lótbodye thojanabocá, chë bëtš pueblënga pochócaiyentsana. Cha yojamna Bëngbe Bëtsabe bominñiñe tšabá amá, y ntšamo chë luarentša entšanga imojaniyenama, nyëtsca bacna soye jtsamëse, jenomándama ntsobencá, cha puerte ngmënana inabomna. <sup>8</sup> Er quem tšabe entšá, chëngbeñe oyená, chë entšanga imojtsama bacna soyënga cada te yojanonñaye y yojanuenana ora, puerte chabe tšabe ainaniñe inasufrina.

<sup>9</sup> Chca, Bëngbe Utabná endobena chë Bëngbe Bëtsábiyoye adórayënga játebacana padecena soyënguentšana y bacna soyënga jamama juabnënguentšana, y chë bacna soyënga jamama uamanëngna castigánënga jtšabamnna, chë ntšamo chënga imojaniyentšcuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nyëtsca tescama chë bëtš castigo chamotsebmnama jamándama. <sup>10</sup> Chca ndegombre endmëna, y más chë ndëmuanyënga nye cachëngbe cuerpëngama bacna juabnëngaca jtsamëse imoyenëngbiana, chënga chë Bëngbe Utabnabe mando jtšabotënaná. Chënga bacá buátseñanënga mondñëna y jtsebošana nye ntšamo cachënga tmojtsejuabnacá chaotsemnama, y ndoñe ntsauatjana chë espíritënga obenana bomnëngbiana puerte bacna soyënga jtšóyeuambnayama. <sup>11</sup> Chamna chë angelënga, masque más añemo y obenana bomnënga mondñëna, ndoñe jenñëmuana chë espíritënga obenana bomnëngbiana chca jayanama, chëngbiana ndoñe tšabe soyënga jtšóyeuambnayëse, Bëngbe Utabnabe delante.

<sup>12</sup> Pero chë buátëmbayënga, chë cachënga ndoñe tontsësertana soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nÿe ntšamo tojtsebiona y tmojtsebošcá, y chënga jónÿnana, chámuashebuayama y chamëbáyama. Chë buátëmbayënga mo chë bayëngcá mochántspochocaye. <sup>13</sup> Chënga mochanjasúfria, ínÿenga chamosufrima tmojama causa. Chëngbe oyejuayana endmëna nÿe chora chënga tšabá jtsemnana soyënga. Tšëngaftangaftaca cánÿiñe mo ošbuachiyëngcá tmojtsesá ora, tšëngaftangbiama ouatjácá jtsemnana y chëngbe causa, ínÿenga tšëngaftangbiama podesca mochántschamo, er chënga chentše oyejuayënga jtsemnana, nÿe chënga tšabá jtsemnana jtsamëse; y chënga tšëngaftangbeñe jtsemnana, tšëngaftangbioye jtsaíngñase.

<sup>14</sup> Chënga ndoñe ntšobenana canÿe shembásá jinÿana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nÿe batšá ošbuáchiyana bomnënga jtsaíngñayana, y sempre jtsentšëñana nÿe más soyënga jésebošama y jésebošama, ínÿenga tmobomnana más soyënga jashjáchama; chënga montsemna pochocánënga jtsemnana. <sup>15</sup> Chënga chë tšabe benachentsana tmojtsojuánañe, y mora mo otšenëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyeuambnayá Balaamcá, cha ndoñe tšabá tonjanma orca; Balaam Beorbe uaquiñá. Cha yapa inaboše bëtscá crocénana juácánama ínÿengbiama bacna soyënga jtsamëse; <sup>16</sup> y Bëngbe Bëtsá, chábioye chabe bacna soyëngama tbojanácana, cachabe asno chábioye chabuatsétsama jamëse; y chca, ndoñe tbonjanlesenciá jama chë ndocna juábna soye jamama.

<sup>17</sup> Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntšoservëñana, y chca, chënga jtsemnana mo búyeshe obocantšë tojtsebuashjá; y chënga mora canÿe soye jtsujuabnayana y chentšana ínÿetšá; chca chënga jtsemnana mo jantšëtšëhënga bëtš binÿiaca bonjnëshëngcá. Chëngbiama Bëngbe Bëtsá tojyana castigo chamotsebomnana, chë más ibetoca, tondaye binÿiñe luarentšë. <sup>18</sup> Chënga ba botamana palabréngaca jtsenábotamnyana, pero tondayama ntšoservëñana; y chë cabá mora Jesucristbeñe tmojtsošbuachëngbioye jtsaíngñayama, chënga ntšamo chëngbe enutënga Bëngbe Bëtsábioye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbioye jáyëñanase, nÿe cachënga tšabá jtsomñama bacna juabnëngaca soyënga chamotsamama, cachënga jenomándama ntšobencá. <sup>19</sup> Chë abuátambayënga jašebuachenana tšabe vida jónÿenama, nÿe ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnëngaca mandánënga, y chca, chënga montsajna pochocánënga jtsemnana, er ndaye entšánaca mandaná jtsemnana, chë nÿets tempo tobedecena sóyeca. <sup>20</sup> Er ndëmuanÿënga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nÿe quem luarama enójuabnaye entšangcá, nÿetsca bacna soye amana y tša bacna juabnënga ainaniñe bonnana, pero mora cachiñe chë soyënguiñe tmojtésajna, y cachiñe mandánënga tmojtsemna chë bacna juabnëngaca, chënga mora más bacá tempscama jabocanana. <sup>21</sup> Chëngbiama más tšabá manjanma ndoñe ntjobenayana jsetatšëmbuana ntšamo Bëngbe Bëtsabe bominÿiñe tšabá yomncá inétsamama, chë soye jatabuátmanana y chentšana játajbanana chë buátëmbana soyënga y chë abuyainÿëngaftaca chëngbioye Bëngbe Bëtsá tojanoyandënga jtsobedecánana. <sup>22</sup> Pero chëngaftaca tojopasá ntšamo entšanga mondëntšoyancá chca ndegombre bëtsemnana: “Chë queše chabe ashconánana tojtsemnoye jeshéconana ca” y “chë cotšë cabá chora bebená, ngüichetsoye jana jetsójanuouoyama ca”.

### 3

#### *Jesucristo quem luaroye jésabama ora*

<sup>1</sup> Jesucristbeyeca atšbe bonshana catšátanga, móraca ya uta soyama cbontsëbuabianná. Quem uta tsbuanáchaca atšë sënjábošena jamama tšëngaftangbe juabna nÿe ena tšabe soyëngaca chaotsemnana, y chca chaotsemnamna atšë jtsabuayinÿayëse chë tmojanabuatambá soyëngama. <sup>2</sup> Atšë sëntseboše tšëngaftanga chašmotsenojuabná, ntšamo chë ínÿe tempënga ora, chë nÿe Bëngbe Bëtsábioye jtsoservëñëse, chabe juabna oyeuambnayënga tmojánayanama, y chë Bëngbe Utabná y Atsebacayabe buátëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

<sup>3</sup> Pero masna quem soye chacmotsësertana: Jesucristo quem luaroye jésabama tempo chaojtsobeco ora, mochántsemna entšanga y chënga mochantsiyena nÿe cachënga tšabá jtsomñama bacna juabnëngaca, y cmochantsëbuayajuana, chë Cristo yochjésabama šmošbuáchema. <sup>4</sup> Chënga mëntšá mochántschamo: “Cristo tmojanášebuachená quem luaroye jésabama. ¿Ndegombre chca? Chcase, ¿ndayentšë cha yojtsemna? Bëngbe bëtšëtsanga, ndëmuanÿëngbioye cha tojanašebuachená quem luaroye jésabama, ya tmonjóbana, y quem

laurentše lempe cachá endesomñe, ntšamo quem luare tojanoboajtšé orscana enjamncá ca.”<sup>5</sup> Chë entšanga ndoñe ntsebošana jtsejuabnayana ya baytë yojtsemna, Bëngbe Bëtsá tojanmandá y chca tojanma celoca y quem luare chaotsemnana. Cha quem luare tojanma búyeshentšana y búyesheca;<sup>6</sup> y cach búyeshecnaca, chë uabouana uaftentša béjayecca, ya baytë yojtsemna, cha lempe quem laurentše yojanbinýncá tojtsanpochocá.<sup>7</sup> Pero chë mora entsemna celoca y quem luare, cach Bëngbe Bëtsabe mándoca, ndoñe quenátopodena chamotseepochocama, chë Bëngbe Bëtsá jayanama chábioye ndoñe mondadoránënga ntšamo tmojamcá ndoñe tšabá yonjamnana, y chë bacna soyënga tmojamama nyëtscá tescama castigo chamotseboamnana jamándama tempo candóshjanguëntscuana. Chora Bëngbe Bëtsá, celoca y quem luare íñesheca echantseepochóca.

<sup>8</sup> Pero, atšbe bonshánënga, canýe soye endmëna y chë soye ndoñe chacmondébnëtjomba: Bëngbe Utabnabe juabnana, canýe te endmëna mo canýe uaranga uatcá, y canýe uaranga uata mo canýe tecá.<sup>9</sup> Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betscó yochanjama ca, chë cha quem luaroye jésabama, ndayá chana puerte uantado tšëngaftangafata comna; er cha jtsebošana ndocná nyëtscá tescama castigo chaondëtseboamnana, ndayá nyëtscanga bacna soyënga amana jtsajbanase, Bëngbe Bëtsabe tšabe benache chamuashjáchama.

<sup>10</sup> Pero Bëngbe Utabná echanjésabo ndocná chama chaondëtsejuabná ora, mo canýe atbëbanacá jashjanguana, ndocná chama tontsejuabná ora. Chora celoca echanjopochóca, canýe jabuache shauenanáncá, y quem luare ndaye soyënguentšana yomnana íñesheca echántsefatëjo, y ndayá Bëngbe Bëtsá y entšanga quem laurentše tmojamcá, lempe echántsejuinýe.

<sup>11</sup> Lempe chca japochócama entsémnyayeca, ndegombre tšëngaftanga cmontsamna jtsiyenana ntšamo chë Bëngbe Bëtsabe entšanga jtsiyenana entsamncá, y nyëtscá tempo jtsamëse chë Bëngbe Bëtsábioye jtsatschuanayama yomna soyënga,<sup>12</sup> tšëngaftanga chë Jesucristo quem luaroye jésabama chaóshjanguama šmojtsobátmanëntscuana; y nýa šmochtsentšana cha más betscó cháuesabama. Chë te íñesheca celoca echántsejuinýe, y ndaye soyënguentšana quem luare yomnana cach íñesheca echántsefatëjo.<sup>13</sup> Pero bënga mondobátmana ntšamo cha šojašebuachenacá: canýe tsëm luare, mo canýe tsëm celoca y tsëm fshantscá, y chentše nyëtscanga mochantsiyena ntšamo Bëngbe Bëtsabe bominyíñe tšabá yomncá jtsamëse.

<sup>14</sup> Chíyeca, atšbe bonshánënga, chë soyënga chaotsemnana šmojtsobátmanëntscuana, nýa chíñe šmochtsentšana, chca, cha yochjésabo ora, chacmanýena oyeñiñe tšabá Bëngbe Bëtsáftaca jtsatsmëñëse, ínýengaftaca natjëmbana jtsiyenëse; chacmanýena ainaniñe ndocna bacna soye ndbomñënga, y puerte tšabá jtsamëse oyeñiñe; chca, ndocná chaondobená jayanama tšëngaftanga ndaye bacna soye šmojama ca.<sup>15</sup> Quem soye šmochtsejuabnaye: Bëngbe Atsebacayá ndoñe yapa betscó tonjésabëšna, chca jtsemnana cha puerte uantado nyëtscángaftaca yómnyayeca; chca cha yomna, ba entšanga chë bacna soyënga amana chámajbanama y chabe benache chámuatishachama y chca, atsebácanënga chamotsemnana. Cach quem soyëngámncá, Jesucristbeyeca bëngbe bonshana catšata Pablo tmonjanëbuábiana, chë Bëngbe Bëtsá tojanma cha chaotseboamnana osertanáncá.<sup>16</sup> Chë soyëngama, Pablo nyëtscá chabe tsbuanáchangañe tonjanoyebuambá. Chëchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínýënga, y chë mora canýe soye jtsejuabnayana y chentšana ínýtšá juabnayënga, jtsejuabnayana y ínýëngbioye jtsabuayinyayana ndoñe ndegombre yondmëna ca. Y cachcá jtsamana ínýe soyëngaca, Bëngbe Bëtsabe uabemana palabrënguiñe. Chca chënga montsajna pochocánënga jtsemnana.

<sup>17</sup> Chíyeca, atšbe bonshánënga, tšëngaftanga chë ya šmojtsetátšëmbo chë ndoñe ndegombre soyënga abuatambayënga mochtsemnana, yejuana šmochtsantješna; chca, chë Bëngbe Bëtsá ntšamo yomandacá ndobedecenëngbe soyëngaca ínýënga jáingñama, tšëngaftanga ndoñe chašmondëtsemna mo uambanëngcá, ndoñe chašmondëtšajbanama jtseboamnana chë Bëngbe Bëtsabe soyënga ntšamo šmojashjachcá.<sup>18</sup> Pero atšna, Bëngbe Utabná y Atsebacayá Jesucristo séntseimpadana, tšëngaftanga chašmotsiyena jtsamëse, chë chábensšana šmojóyëngacñe ba soyënga ntšamo tomnana jtsejuabnayëse, y chaoma tšëngaftanga cada te más tšabá cha chašmotsábuatmama. ¡Nyëtscanga cha chamotsatschuaná, mora y nyëtscá tescama! Chca chaotsemna.



## 1 San Juan

*Cristo, chë nyetsca tescama yomna tsabe vida entsanga chamotsebomnama amá*

<sup>1</sup> Bënga cbontsëbuabianná chë Bëngbe Bëtsá ndabiajana inétsoyebuambnabiamá, chë nyetsca tescama yomna tsabe vida entsanga chamotsebomnama iuamabiamá, chë Bëngbe Bëtsá cabá quem luare ndëma orscana ya yojamnabiamá. Bëngbe matscuašëngaca chabe oye-buambnayana fsënjouena y bëngbe bomínýeca cha tonjama soyënga fsënjinyë. Aíñe bënga cha fsënjinyë y bëngbe cucuatšeca fsënjábojajo. <sup>2</sup> Cha bëngbentše tonjanonýná y fsënjáninyë; chíyeca bënga chabiamá cbontsëtsësná y cbontsabuayíyná, nda sempre vida yobomna y nda chë nyetsca tescama yomna tsabe vida entsanga chamotsebomnama iuama. Chana, chë Taitá Bëngbe Bëtsáftaca inamna, pero mora bëngbioye sojinýanyé. <sup>3</sup> Bënga tsëngaftanga cbontsabuayíyná ntšamo tifjinyë y tifjouencá, tsëngaftanga cánýiñe mo canýacá bëngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaqiñá Jesucristoftaca. <sup>4</sup> Bënga quem soyënga tsëngaftanga cbontsëbuabianná, bëngbe oyejuayana corente bëtscá chaotsemnama.

*Bëngbe Bëtsá endmëna chë entsangbiamá binýnayá*

<sup>5</sup> Mëntsá entsemna ntšamo Jesucristbentsána tifjouencá y chca tsëngaftanga cbontsabuayíyná: Bëngbe Bëtsábeñe lempe binýniñe, lempe tsábá endmëna, y chábeñe tondaye ndoñe chca quenátsmëna. <sup>6</sup> Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuatšiñe, chë binýniñe tmontsemna, y chca, bacna soye juabnyënga y amënga tmojtsiyena, asna, bënga mojtsebohero y ndoñe montsama ntšamo ndegombre yomncá. <sup>7</sup> Pero bënga chë binýniñe tmojtsiyena, tsabe soye juabnyënga y amënga ntšamo Bëngbe Bëtsá iuamcá, as nyetsca cánýiñe mo canýacá mochántsemna, y chabe uaqiñá Jesucristbe uabuáshanana buiñeca, Bëngbe Bëtsá bëngbe bacna soyënga sempre šochántsabujuanaye, y echanjama bënga chabe delante tsábá chamotsatsmënama.

<sup>8</sup> Bënga bacna soyënga ndoñe queftsátsbomna ca tmojtsichámëse, chca cabënga jt-senoíngñayana y ainaniñe chë ndegombre soyënga ndoñe tmonjójyëngacñe; <sup>9</sup> pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanyíye cachá chë ntšamo šojitysašebuachecá amá y nyetsca soyënguñe tsábá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye. <sup>10</sup> Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canýe bostero cuaftsemncá, y ntšamo Bëngbe Bëtsá bënga sojauyancá ainaniñe ndoñe tmonjójyëngacñe.

## 2

*Cristo, bëngbe obuauyayá*

<sup>1</sup> Tsëngaftanga mo atšbe basengcá, er atše tcbonjanëjabuache Jesucristbe tsabe noti-ciënguñe chašmotsošbuáchema, quem soyënga cbontsëbuabianná bacna soyënga ndoñe chašmondëtsamama. Pero ndánaca Cristbeñe ošbuachiyënguentšá bacna soye tojamëse, bënga canýe obuauyayá Bëngbe Bëtsabe delante montsebomna, y cha endmëna Jesucristo, chë nyetsca soyënguñe tsábá amá. <sup>2</sup> Jesucristo tonjanóbana ndoñe nye Bëngbe Bëtsá bënga chášuperdonama bëngbe bacna soyëngama, ndayá quem luarentša nyetsca entságnaca chëngbe bacna soyëngama cháuperdonama.

<sup>3</sup> Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatsëmbo bënga cha imuábuatmama. <sup>4</sup> Pero nda tojyana: “Atše Bëngbe Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canýe bostero jtsemnana y ainaniñe chë Bëngbe Bëtsabe ndegombre soyënga ndoñe tonjójyëngacñe. <sup>5</sup> Pero nda ntšamo Bëngbe Bëtsá ibuamëndacá tojtsama, jtsinýanyayana chabe ainaniñe Bëngbe Bëtsabiamá corente bonshánana yomnama, y chca, mochántsetatsëmbo bënga sempre cánýiñe mo canýacá cháftaca imomnama. <sup>6</sup> Nda tojtsichamo Bëngbe Bëtsáftaca cánýiñe mo canýacá yojtsemna ca, bontsemna jtsiyenana soyënga jtsamëse ntšamo Jesucristo yojëtsiyencá.

*Canýe tsëm mando*

<sup>7</sup> Atšbe bonshana entsanga, ntšamo mora cbontsëbuabiannacá, ndoñe canýe tsëm mando quenátsmëna, pero aíñe canýe tempsca mando; entsemna cach tsëngaftanga Cristbe ústonënga šmonjanobiama ora šmonjanójyëngacñe mando. Quem tempsca mando entsemna ntšamo tsëngaftanga bëngbentsána šmonjouencá. <sup>8</sup> Pero masque chca endmëñe, quem cbontsëbuabianná soye tsëngaftangbiamá echántsemna mo canýe tsëm

mandá. Cristo enjëftsiyena ntšamo quem Bëngbe Bëtsabe mando ndegombre yomná y tsëngaftángnaca cachá smondoyena, er chë bacna juabnënga jtsebomnëse mo ibetiñcá jtsiyenana tempo ya echanjochnëngo, y chë entsangbe juabna ndegombre binÿnayá ya entseuashinÿinÿana.

<sup>9</sup>Nda tojayana chë binÿnayáftaca yojtsemna ca, pero cha chabe catsátbioye tbojtsáboyënja, cha cabá tempcá, bacna juabnënga jtsebomnëse yojtsiyena, mo ibetiñcá. <sup>10</sup>Nda chabe catsátbioye tbojtsebobonshana, cha chë binÿnayáftaca jtsiyenana, y tondaye queochásmëna cha bacna soye chaotsamama. <sup>11</sup>Pero nda chabe catsátbioye tbojtsáboyënja, cha bacna juabnënga jtsebomnëse jtsiyenana, mo canÿa ibetiñe oyenacá. Cha ndoñe ntsetatšëmbuana chë ndayá tojamama ntšamo chentsana yochjopása, er chë bacna juabnënga jtsebomnëse jtsiyenana chábioye ndoñe ntjalesénciana ntšamo tsábá yomná chaotsamama.

<sup>12</sup>Básenga, atše cbontsëbuabiamná Bëngbe Bëtsá tsëngaftangbe bacna soyënga tcmojáperdonama, ndayá Jesús tojanma sóyeca. <sup>13</sup>Taitanga, tsëngaftanga cbontsëbuabiamná, er tsëngaftanga ya smonjuabuatmana chë quem luare jobojátsama orscana ya inamná. Tsëngaftanga bobontsëngnaca cbontsëbuabiamná, er tsëngaftanga ya chë nyetsca bacna soyënga mandayá Satanás smonjayëñjaná.

<sup>14</sup>Básenga, tsëngaftanga tcbonjubuábiana, er tsëngaftanga chë Taitá ya smonjuabuatmana. Taitanga, tsëngaftanga tcbonjubuábiana, er tsëngaftanga ya smonjuabuatmana chë quem luare jobojátsama orscana ya inamná. Bobontsënga, tsëngaftángnaca tcbonjubuábiana, er tsëngaftanga bëtscá añemo ainaniñe šmambá, y Bëngbe Bëtsabe palabrama sempre tsëngaftangbe ainaniñe smondëjuabná, y chë nyetsca bacna soyënga mandayá smonjayëñjaná.

<sup>15</sup>Ndoñe matsbošana oyejuayënga jtsemnana nÿe quem luarentša soyëngaca, ni nÿe chë soyënga jtsebomnana. Nda yapa yojtseboše quem luarentša bacna soyënga jtsebomnana, cha ndoñe chë Taitábioye bondbobonshana. <sup>16</sup>Er chë nÿe quem luarama enójuabnayënga mëntsá juabnënga mondbomna: yapa jtsebošana jtsebomnana ntšamo chë ainaniñe bacna juabnënga bomnënga mondbetsebošcá; yapa jtsebošana nÿe ndayá tmojatinÿe soye; y yapa jtšenábotamnayana chë tmobonna soyëngama. Chë juabnënga Bëngbe Bëtsábocana ndoñe ntsóbocanana, ndayá nÿe chë quem luarama enójuabnayëngbentsana. <sup>17</sup>Pero quem luare echanjopochóca y nyetsca chentsa soyënga, chë entsanga bacna juabnëngaca yapa imoboše jtsebomnana soyëngnaca. Pero nda ntšamo Bëngbe Bëtsá yobošcá tojtsama, cha chë nyetsca tescama yomna tsábe vida echántsebonna.

### *Chë Cristbe contra yomná*

<sup>18</sup>Básenga, quem luare jopochócama tempo ya entsobeco. Ntšamo tsëngaftanga smonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábobcana. Chca bënga montsetátšëmbo chë quem luare jopochócama tempo ya yojtsebecuama. <sup>19</sup>Chënga cach bëngbentsana tmonjábobcana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmëñjoquedanga. Pero chca tonjopasá, ndegombre jtsoatšëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchemá.

<sup>20</sup>Pero Cristo, chë Uamaná, tsëngaftanga tcmojabacacá, y cha tonjama chë Uamana Espiritu tsëngaftangbe ainaniñe cháumashënguama; y nyetsca tsëngaftanga chë ndegombre soyënga smondétatšëmbo. <sup>21</sup>Atše cbontsëbuabiamná, ndoñe chë ndegombre soyëngama ndoñe smondétatšëmbuama, ndayá aife smotatšëmbuama; er tsëngaftanga smondétatšëmbo chë ndegombre soyënga y ndoñe ndegombre soyënga canÿiñe jtsemnana ndoñe yondpodénama. <sup>22</sup>Nda tojayana Jesús chë Bëngbe Bëtsabe Uamana Uabuayaná, chë Cristo ndoñe yondmëna ca, chana jtsebošterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiana ndoñe ntsejuabnayana cha chë Taitá bëtsemnana. <sup>23</sup>Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca canÿiñe mo canÿacá ndoñe ntsemnana. Pero nda entsangbeñe tojayana, Cristo aife Bëngbe Bëtsabe Uaquiñá endmëna ca, chana aife chë Taitáftaca canÿiñe mo canÿacá jtsemnana.

<sup>24</sup>Tsëngaftanga, chë Cristbe ústonënga šmojanóbiana orscana šmojanuena soye, tsëngaftangbe ainaniñe smochtsambaye. Chca chašmojtsamëse, tsëngaftanga chë Uaquiñá y chë Taitáftaca canÿiñe mo canÿacá smochántsemna. <sup>25</sup>Y quem soye entsemna ntšamo Cristo šojtsašebuachená: chë nyetsca tescama yomna tsábe vida jtsebomnana.

<sup>26</sup>Atše chca cbontsëbuabiamná, chë tsëngaftanga jáingñayama imojtsebošëngbiana chašmotsetatšëmbuama. <sup>27</sup>Pero Cristo tcmojanabacacá ora, Uamana Espiritu šmojanoyëngacñe, y mora tsëngaftangbe ainaniñe Uamana Espiritu smontsebonna, y ndoñe quenátsiyta ndocná más chacmotsabuátambama, er chë Uamana Espiritu lempe cmontsabuátambá; y cha endabuátambá ndegombre soyënga, y boistero soyënga ndoñe.

Měntšá, ntšamo chë Uámana Espíritu tcmojabuatambacá jtsiyenése, Crístoftaca cánýiñe mo canýacá šmochtsemna.

<sup>28</sup> Y mora básenga, Crístoftaca cánýiñe mo canýacá šmochtsemna, chca, cha chaojabáisebocna ora, chábeñe jtsóšbuáchiyése, bēnga añémoca chamotsemnana y ndoñe chamondětsēuatjama, bēnga chabe delante chamojtsemna ora. <sup>29</sup> Tsēngaftanga šmontsetátšēmo Jesucristo nýetsca soyēnguñe tšabá amá yomnana. Chcasna, cmontsamna jsetatšēmbuana, nýetscanga ntšamo Bēngbe Bětsá yoboščá tmojtsamēngna, Bēngbe Bětsabe básenga imonana.

### 3

*Crístbeñe ošbuáchiyēnga, Bēngbe Bětsabe básenga*

<sup>1</sup> Menójuabonga, ntsachetšá Bēngbe Bětsá chë Taitá šondábabuanýeshanama. Chabe bonshánana tša bētsá endmēnayeca, bēnga šondēubauatma chabe básenga ca, y ndegombre bēnga chca mondmēna. Chë causa chë nýe quem luarama enójuabnayēnga ndoñe quenátšertana ntšamo bēnga imonnama, er chēnga cha ndoñe tmonjanábuatmana. <sup>2</sup> Atšbe bonshana entšanga, mora bēnga ya Bēngbe Bětsabe básenga montsemna. Y masque cabá ndoñe quemuátstatšēmo ntšamo más chcoye bēnga mochjamnana, aiñe mondětátšēmo, Jesucristo chaojabáisebocna ora bēnga cachacá mochtsemnana, er bēnga mochanjobenaye jinýama ntšamo cha ndegombre yomncá. <sup>3</sup> Y nda chca chábeñe puerte jtsóšbuáchiyése tojtsobátmana, bacna soyēnga amana jtsajbanana, más tšabia jtsemnana, ntšamo cach Cristo yomncá, lempe tšabia y bacna soye ndbomná.

<sup>4</sup> Pero nda bacna soye tojama, chana ntšamo Bēngbe Bětsá tojěftsemandacá jtsaboténana; er bacna soye jamana endmēna, jtsabotena ntšamo Bēngbe Bětsá tojěftsemandacá. <sup>5</sup> Tsēngaftanga ya šmondětátšēmo Jesucristo quem luaroye tojánabo bēngbe bacna soyēnga jabětsabuajuanama, y cha ni mo canýe bacna soye ndoñe yondbomnana. <sup>6</sup> Chcasna, nda cánýiñe mo canýacá cháftaca nýets tempo tojtsemna, ndoñe ntsiyenana bacna soyēnga jtsamése. Pero nda tojtsiyena bacna soyēnga jtsamése, Jesucristbiana ndoñe tbonjosertá y ndoñe yondětátšēmo ntšamo cha bětsemnana. <sup>7</sup> Atšbe básenga, ndocná chacmondaingñe: nda nýetsca soyēnguñe tšabá tojtsama, cha canýe tšabá mándbomna entšá jtsemnana, ntšamo Jesucristo yomncá; <sup>8</sup> pero nda tojtsiyena bacna soyēnga jtsamése, chabe ainaniñe Satanás jtsemándayana, er Satanás quem luare jobojátšama orscana bacna soyēnga iuétšama. Bēngbe Bětsabe Uaquiñá nýa quem soyama tojabo: chë Satanásbe soyēnga jabětsepochocama.

<sup>9</sup> Ndocná Bēngbe Bětsabe uaquiñá tojtsemná jtsiyenana bacna soyēnga jtsamése, er cha jtsebomnana chë Bēngbe Bětsá tojuántšame tšabe vida, y Bēngbe Bětsá chabe Taitá endmēna. Chýeca cha ndoñe ntsiyenana bacna soyēnga jtsamése. <sup>10</sup> Corente jtsotatšēmbuana ndēmuanýēnga Bēngbe Bětsabe básenga imonnama y ndēmuanýēnga Satanásbe básenga; ndēmuanýēngnaca ntšamo tšabá yomncá ndoñe tmontsama o chabe catšata ndoñe tmontsebomshana, ndoñe ntsemnana Bēngbe Bětsabe básenga.

*Nýetscanga jtsenbobonshánana*

<sup>11</sup> Quem buayenana entsemna ntšamo tsēngaftanga šmojanuena, tsēngaftanga Crístbe ústonēnga šmonjanobiana orscana: nýetscanga šontsamna jtsenbobonshánana. <sup>12</sup> Ndoñe Caincá muatjama. Chabe ainaniñe Satanás yojamánda, y chýeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana aiñe; chýeca tbojtsanóba.

<sup>13</sup> Jesucristbeyeca atšbe catšátanga, ndoñe šmattsenjanayeye chë nýe quem luarama enójuabnayēnga cmojtsēbuayēnjama. <sup>14</sup> Bēnga mondětátšēmo, bēnga tempo monjaniyena chë nýe quem luarama enójuabnayēnga mondoyencá, y chca, Bēngbe Bětsabiana mo obanēngcá monjamna, er bēnga monjaniyena ntšamo Bēngbe Bětsá ndoñe yondēmandacá. Pero Bēngbe Bětsá tonjama mora bēnga tsēm vida chamotsebomnana, y chca, mo ndegombre ainēngcá montsemna. Chca mondětátšēmo, er bēnga bēngbe catšátangbioye mondábabuanýeshana. Nda chabe catšátbioye ndoñe tbonsebomshana, cha cabá mo obanacá jtsiyenana. <sup>15</sup> Nda cachabe catšátbioye tbojtsáboyēnga, cha jtsemnana mo entšanga obanayacá. Y tsēngaftanga šmondětátšēmo entšanga obanayá chë nýe ntsobenana jtsiyenana, chë nýetsca tescama yomna tšabe vida chabe ainaniñe jtsebomnése.

<sup>16</sup> Ndayá chë jtsenbobonshánana bětsemnana mēntšá montsetátšēmo: Jesucristo chabe derecho vida jtsobomñama cachcá tojanonýá y bēngbiana tojanóbana; cachcá bēnga šontsamna jtsemnana, sempre jtseprontánana chë Jesucristbeyeca bēngbe catšátangbiana jobanama. <sup>17</sup> Canýa bomnana tojtsebomna y catšátbioye uajabotá tbojtsónýá, pero chabiana ndoñe tbonjngmé y ndoñe tbonjuájabuache, cha ndoñe ntsobenana Bēngbe Bětsabiana ainaniñe bonshánana jtsebomnana. <sup>18</sup> Atšbe básenga, ndoñe quešnátamna nýe bēngbe catšátanga imuababuánýeshana ca jatichámuana, y nýe chë bonshánama jatóyebuambnayana;

pero ndegombre šontsamna ndayánaca jamana, chca, jinjanjyama, bēnga ndegombre in̄yengbiana imuababuán̄yeshanama.

*Bēngbe Bētsabe delante natjēmbana ainánaca entšanga*

<sup>19</sup> Chcase bēnga mochántsetatšēmo, ntšamo chē Bēngbe Bētsabe ndegombre soyēnga yomncá bēnga imojtsamama. Y bēnga ndoñe quemochátenocochin̄yena, Bēngbe Bētsábioca jtsemnana merecido ndoñe mondbuájona ca tmojtsejuabná ora; y bēngbe ainana natjēmbana Bēngbe Bētsabe delante echántsemna. <sup>20</sup> Bēnga chca bēngbe ainaniñe tmojtsejuabná ora, bēnga montsobena natjēmbana ainana jtsebomnana, er Bēngbe Bētsá corente jtsotatšēmbñana ntšamo bēngbe ainana yomnana, y cha lempe yotátšēmo. <sup>21</sup> Atšbe bonshana entšanga, bēnga ndoñe bacna soye tmonjama ca bēngbe ainaniñe tmojtsejuabnase, jtsoberana añémoca jtsemnana y tondayama ntsauatjca Bēngbe Bētsabe delante jtsemnana. <sup>22</sup> Y cha lempe ntšamo chamojotjañca šochanjátataye, er bēnga montsama ntšamo Bēngbe Bētsá ibuamandacá y ndayá chabe bomin̄yñe tšabá yomncá. <sup>23</sup> Y chabe mando endmēna: bēnga chabe Uaquiñá Jesucristbeñe jtsošbuáchiyana, y bēnga nyētsanga jtsebobonshánana ntšamo Jesús šojéftsamēndacá. <sup>24</sup> Ntšamo Bēngbe Bētsá tojéftsemandacá amēnga, Bēngbe Bētsáftaca cán̄yñe mo can̄yácá jtsemnana, y cha sempre chēngaftaca cán̄yñe mo can̄yácá echanjéftsemna. Y quem sóyeca bēnga montsobena jtsetatšēmbuana cha bēngaftaca iuétsemnana: Uámana Espiritu bēngbe ainaniñe cháumashēnguama cha tojama.

## 4

*Chē Bēngbe Bētsabe Espiritu y chē Cristbe uayayabe espíritu*

<sup>1</sup> Atšbe bonshana entšanga, nyētsanga chē Bēngbe Bētsabe juábna imoyebuambná ca ichámēngbioye ndoñe šmattsayaunana; botamana šmochjuarrepára corente jtsetatšēmbuama chēnga aife o ndoñe chē Bēngbe Bētsabe juábna imoyebuambnana. Quem tempo banga Bēngbe Bētsabe ndoñe ndegombre juabna oyebuambnayēnga quem luarējana mondajna. Chē causa tšēngaftanga cmontsamna botamana chēngbiana juarrepárana. <sup>2</sup> Chē Bēngbe Bētsabe Espiritu ndegombre imobomnēngbiana tšēngaftanga mēntšá šmontsobena jtsetatšēmbuana: nda tojajana Jesucristo quem luaroye aife entšacá tojánabo ca, cha ndegombre chē Bēngbe Bētsabe Espiritu yojtsebomna. <sup>3</sup> Pero nda ndoñe chca Jesucristbiana tonjayana, cha Bēngbe Bētsabe Espiritu ndoñe yontsebomna; in̄yetsá, chana chē Cristbe contra yomnabe espíritu yojtsebomna. Tšēngaftanga šmojouena chē espíritu yochjabama; pero ndegombre cha ya quem luarentše entsemna.

<sup>4</sup> Atšbe básenga, tšēngaftanga Bēngbe Bētsábenga šmondmēna y ndoñe šmonjalesenciá chē Bēngbe Bētsabe ndoñe ndegombre juabna oyebuambnayēnga tšēngaftangbioye chacmaingñema, er chē nyēts tempo tšēngaftangbe ainaniñe vida endbomná, chē n̄ye quem luarama enójuabnayēngbe ainaniñe mándayabiana más obená endmēna. <sup>5</sup> Chē Bēngbe Bētsabe ndoñe ndegombre juabna oyebuambnayēngna chē n̄ye quem luarama enójuabnayēnguentsana mondmēna, chíyeca chēnga n̄ye quem luarentša soyēngama jtsoyebuambnayana, y chē n̄ye quem luarama enójuabnayēnga chēnga jtsayaunanana. <sup>6</sup> Pero bēnga Bēngbe Bētsábenga mondmēna. Nda Bēngbe Bētsábioye tbojtsabatma, bēngbioye jtsayaunanana; pero nda Bēngbe Bētsábioye ndoñe tbojtsabatma, cha bēnga ndoñe ntsayaunanana. Chiñe bēnga montsobena jtsetatšēmbuana nda chē ndegombre soyēnga jóyebuambayama ama espíritu yobomnabiana, y nda chē in̄yengbioye jáingñama ama espíritu yobomnabiámna.

*Chē bonshánana Bēngbe Bētsábiocana yóbocana*

<sup>7</sup> Atšbe bonshana entšanga, chē bonshánana Bēngbe Bētsábiocana endóbocana; chcase, bēnga šontsamna nyētsanga jtsebobonshánana. Nda Bēngbe Bētsábioye y chē in̄yē entšángbioye tojtsababuán̄yeshana, cha Bēngbe Bētsabe uaqiñá jtsemnana y Bēngbe Bētsábioye jtsabatmana. <sup>8</sup> Nda ndoñe chca tontsebobonshana, cha Bēngbe Bētsábioye ndoñe ntsábuatmana, er Bēngbe Bētsá bonshanánaca nyētsca soyēnga jamana. <sup>9</sup> Bēngbe Bētsá sonjin̄yan̄yē bēnga šuababuán̄yeshanana, cha chē n̄ye can̄yē Uaquiñá ibobomná quem luaroye jíchmuase; cha tbojanichmó, bēnga chábeyeca chē nyētsca tescama yomna tšabe vida chamotsebomnana. <sup>10</sup> Bēngbe Bētsabe bonshánana mēntšá endmēna: ndoñe quenátsmēna bēnga Bēngbe Bētsá imobobonshánayeca, ndayá cha bēnga šojanababuán̄yeshanayeca, y chabe Uaquiñá tbojanichmó, cha jóbánēse, bēnga bēngbe bacna soyēngama perdonánēnga chamotsemnana.

<sup>11</sup> Atšbe bonshana entšanga, Bēngbe Bētsá chca suababuán̄yeshana; chcasna, bēngnaca šontsamna nyētsanga jtsebobonshánana. <sup>12</sup> Ndocná ndocna te Bēngbe Bētsábioye tbonjin̄yē. Bēnga nyētsanga tmojtsebobonshánēse, Bēngbe Bētsá nyēts tempo bēngaftaca echántsemna, y chabe bonshánana puerte bētsá bēngbeñe echántsemna. <sup>13</sup> Bēnga mēntšá montsobena ndegombre jtsetatšēmbuana bēnga Bēngbe Bētsáftaca imomnana y cha

béngaftaca: cha tonjanma chabe Espíritu béngbe ainaniñe cháumashénguama. <sup>14</sup> Y cach bénga fsénjinýe y entsanga fséntsétsétná, ché Taitá chabe Uaquiñá tbojchmoma, quem luarentša entsanga jabátsebacama. <sup>15</sup> Ndánaca tojayana Jesús Béngbe Bètsabe Uaquiñá yomna ca, cha Béngbe Bètsáftaca cánýiñe echántsemna y Béngbe Bètsánaca sempre cháftaca cánýiñe mo canýacá.

<sup>16</sup> Chcaxe bénga montsetátšémbo y montsošbuaché ndegombre Béngbe Bètsá bénga suababuánýeshanama. Béngbe Bètsá nyetsca soyénga bonshanánaca jamana y nda Béngbe Bètsá y ché inýe entsanga sempre tojtsababuánýeshana, cha Béngbe Bètsáftaca cánýiñe mo canýacá jtsemnana y Béngbe Bètsánaca sempre cháftaca cánýiñe mo canýacá. <sup>17</sup> Chca, Béngbe Bètsabe bonshánana puerte bètsá béngbeñe echántsemna, bénga bèts añémoca y tondayama ntsauatjá chamotsemnana, ché tšabá o ndoñe tšabá tmonjamama entsangbiamama jayanama Cristo yochjésabo orscama; er bénga Jesucristoftaca cánýiñe mo canýacá jtsemnëse, quem luarentše mondmëna ntšamo Jesucristo endmëncá. <sup>18</sup> Nda Béngbe Bètsá y ché inýe entsanga tojtsababuánýeshana, tondayama ntsauatjana; bénga corente tmojtsebbonshana ora, ndoñe ntsopodénana uatjana jtsebmomnana. Canýe entšá tojtsauatja ora, jtsemnana mo chabe castigo ya cuafjobjatsecá. Chca, nda uatjana tojtsebmomna, Béngbe Bètsábíoye y ché inýe entsanga cha ndoñe corente yondábabuanýeshana, ntšamo Béngbe Bètsá bénga suababuánýeshancá.

<sup>19</sup> Natsana Béngbe Bètsá šojánababuanýeshana, y chíyeca bénga, cha y ché inýe entsanga imuababuánýeshana. <sup>20</sup> Nda tojayana: “Atše Béngbe Bètsábíoye séndbobonshana ca”, pero cachca ora cachabe catsátbíoye tbojtsábíoyëña, cha canýe bostero jtsemnana. Canýa aife jtsobenana chabe catsáta jinýama; y cha ché catsátbíoye ndoñe tbojtsebbonshana, ndegombre cha Béngbe Bètsábíoye ndoñe bondbobonshana, ndábíoye jinýama ndoñe ntsobenana. <sup>21</sup> Y bénga quem mando chábéntšana tmonjanóyëngacñe: nda Béngbe Bètsábíoye tbojtsebbonshana, cachabe catsátbíoyenaca chabotsebbonshana ca.

## 5

### *Ché Jesucristeñe ošbuachiyá endobena Satanásbe soyénga jáyëñjanana*

<sup>1</sup> Nda tojtsóšbuaché Jesús ché Uámana Uabuayaná, ché Cristo yomnana, cha Béngbe Bètsabe uaquiñá jtsemnana; y nda canýe taitábíoye tbojtsebbonshana, ché taitabe uaquiñábíoyenaca cha jtsebbonshánana. <sup>2</sup> Bénga Béngbe Bètsá tmojtsebbonshana y ntšamo cha tojtsemandacá tmojtsamëse, bénga ndegombre mochántsetatšémbo, ché Béngbe Bètsabe basengbioynaca bénga imuababuánýeshanama. <sup>3</sup> Bénga Béngbe Bètsábíoye imobobonshánama quem soyiñe jtsinýana: bénga ntšamo Béngbe Bètsá tomandacá tmojtsamëse. Y ndayá Béngbe Bètsá yomandacá ndoñe yapa totcá quenátsmëna bénga chamotsamama. <sup>4</sup> Nda Béngbe Bètsabe uaquiñá tomna, chana jáyëñjanana quem luarentša entsanga y soyénga ntšamo Satanás yomandacá. Quem luarentša entsanga y soyénga ntšamo Satanás yomandacá, Crístbeñe bénga imošbuachéyeca montsobena bénga jáyëñjanana. <sup>5</sup> Nýe nda, Jesús Béngbe Bètsabe Uaquiñá yomnana tojtsóšbuaché, cha jtsobenana ché entsanga y soyénga ntšamo Satanás yomandacá jáyëñjanana; ndocná más.

### *Béngbe Bètsá tojinýanjé ntšamo chabe Uaquiñabiamama ndegombre yomncá*

<sup>6</sup> Cach Jesucristo endmëna nda quem luaroye tojánabo y mëntšá tojanenonýinýe: búyeshca cha tmojanabayora, y buiñe juabuáshanëse cha tonjanóbana ora. Cha ndoñe tonjanenonýinýe nýe búyeshca, ndayá búyeshca y buiñeca. Cach Uámana Espíritu entsobena jayanana chca ndegombre bétsemnana Jesusbiamama, er ché Espíritu endmëna ché sempre ndegombre oyebuambnayá. <sup>7</sup> Endmëna unga soyénga, ndayá iuinýanjá ntšamo ndegombre yomncá Jesusbiamama: <sup>8</sup> Espíritu, búyeshca y buiñe; y ché unga soyénga lempe cachcá Jesusbiamama jtsinýanjánayana. <sup>9</sup> Bénga mondbétsejuabnaye, ndayá entsanga tmojinýe ca tmojtsichámuama mo ndegombre cuaftsemncá, pero ndayá Béngbe Bètsá tojtsichamcá ché ndegombre soye jtsemnana y puerte jtsámanana, er ché ndegombre soye ntšamo cha tojtsichamcá, endmëna ndayá chabe Uaquiñabiamama iuichamcá. <sup>10</sup> Nda Béngbe Bètsabe Uaquiñabeñe tojtsóšbuaché, cha chca nýets tempo chabe ainaniñe jtsejuabnayana; nda Béngbe Bètsábeñe ndoñe tontsošbuaché, cha chca jtsamana mo Béngbe Bètsá canýe bostero cuaftsemncá, er ché Béngbe Bètsá chabe Uaquiñabiamama tojayana soyama cha jtsejuabnayanama ndoñe ndegombre yontsemnana. <sup>11</sup> Ntšamo Béngbe Bètsá chabe Uaquiñabiamama tojayancá mëntšá entsemnana: Béngbe Bètsá béngbiamama tojama ché nyetsca tescama yomna tšabe vida chamotsebmomnana; y quem vida chabe Uaquiñabeñe entsemnana. <sup>12</sup> Nda Béngbe Bètsabe Uaquiñáftaca cánýiñe mo canýacá tojtsemnana, cha ché tšabe vídnaca jtsebmomnana; pero nda ché Béngbe Bètsabe Uaquiñáftaca cánýiñe mo canýacá ndoñe tontsemnana, cha ché nyetsca tescama yomna tšabe vida ndoñe ntsebmomnana ca.

*Inýe soyéngama jábuayenama y jtadiósoftanama*

<sup>13</sup> Tšəngaftanga, chē Bēngbe Bētsabe Uaquiñábeñe šmošbuachéngbioye quem soyēnga cbontsēbuabianná, ndegombre chašmotsetatsēmbuama chē nýetsca tescama yomna tšabe vida šmojtsebomnana.

<sup>14</sup> Bēnga bēts añémoca y ndauatjácá Bēngbe Bētsabe delante mondmēna, er bēnga mondétatsēmbo, nderado ntšamo chaotsemnana cha tojtsebošcá bēnga tmojtjañe ora, cha bēnga šnētsayaunanama. <sup>15</sup> Nderado ndayá chca Bēngbe Bētsábioye tmojtsotjanañe ora, cha bēnga joyaunayana; bēnga mondétatsēmbo chca ndegombre yomnana, y chca, bēngnaca montsetátšēmbo, ndayánaca chábioye bēnga chamojtjañcá cha sochjátatayama.

<sup>16</sup> Nda cachabe catsátbioye tbojinýe canýe bacna soye tojtsamama, pero chē bacna soye tojamentšana cha perdonaná jtsemnana cabá tojtsopodénese, chábioye bontsemna Bēngbe Bētsá jaimpádana, y chca, Bēngbe Bētsá echanjama chē catsata chē nýetsca tescama yomna tšabe vida chaotsebomnana, cha chca tojamentšana perdonaná jtsemnana cabá tojtsopodénese. Pero canýe bacna soye endmēna, y chca tojamama canýa ndoñe ntsoobenana perdonaná jtsemnana, y chca, cha jabocnana canýa nýetsca tescama castiganá chaotsemnana, y atše ndoñe quetsátichamo chē bacna soyama yojtsemna Bēngbe Bētsá jtseimpadánana chaboperdonama ca. <sup>17</sup> Nda tojtsama ntšamo Bēngbe Bētsá ndoñe yondēmandacá, cha bacna soye jtsamana; pero nýetsca bacna soyēnga ntšamo canýa tojtsamcá, ndoñe ntjamana cha ndēperdonaná chaotsemnana.

<sup>18</sup> Bēnga mondétatsēmbo, nda Bēngbe Bētsábioye mo taitacá tbojtsebomna, cha ndoñe ntsiyenana bacna soyēnga jtsamēse, er chē Bēngbe Bētsábentšana Onýnaná chábioye jtsinýenana, y Satanás, chē nýetsca bacna soyēnga amēndayá, tondaye ntsoobenana chábioye jabórlana. <sup>19</sup> Bēnga mondétatsēmbo, bēnga chē Crístbeñe ošbuáchiyēnga Bēngbe Bētsábenga imomnana, y chē quem luarentša inýe entšanga Satanasbe cucuatšifne imomnana.

<sup>20</sup> Bēngnaca mondétatsēmbo Bēngbe Bētsabe Uaquiñá tojabama, y cha iuama bēnga osertánana chamotsebomnana, chē ndegombre Bēngbe Bētsá yomná jtsabuatmama. Bēnga chē ndegombráftaca cánýifne mo canýacá mondmēna, bēnga chabe Uaquiñáftaca cánýifne bétsemnayeca. Cha chē ndegombre Bēngbe Bētsá endmēna, y nda chē nýetsca tescama yomna tšabe vida entšanga chamotsebomnana iuamá. <sup>21</sup> Atšbe básenga, ndoñe šmattsadorana cach entšangbe pormana soyēnga, chē ndayama ínýenga mondbétsejuabnaye diosēnga yomna ca.

## 2 San Juan

### *Jtsiyenana ndegombre soyëngaca y nyëtscanga jtsenbobonshánëse*

<sup>1</sup> Atše chë bëtsëjema, quem tsbuanácha sëntsabiamná, chë uámana mamá, chë Bëngbe Bëtsabe bocacaná y chabe basengbiámna, ndëmuanyënga atše ndegombre sëndábabuanýeshana. Y ndoñe nye atše chënga quetsátababuanýeshana, ndayá nyëtscanga chë Bëngbe Bëtsabe ndegombre soyënga uabuátmëngnaca. <sup>2</sup> Atše cbontsababuanýeshana, chë ndegombre soyënga bëngbe ainaniñe mondbómnyeyca, y chë soyënga bëngbe ainaniñe sempre echántsemna.

<sup>3</sup> Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnana, chata tsëngaftangbioye chácmalastemama, y chaboma tsëngaftangbe ainaniñe tsabe ebionana chašmotsebonnana. Quem soyënga, bënga chë ndegombre soyënga uabuátmënga y nyëtscanga mondenbobonshánëngaftaca echántsemna.

<sup>4</sup> Puerte sënjoyejuá, er atše acbe básenguentše báseftanga sënjánýena chë ndegombre soyënga ntšamo Bëngbe Bëtsá chë Taitá šojamëndacá jtsamëse. <sup>5</sup> Y mora, uámana mamá, cbontseimpadana Diosmanda nyëtscanga chamotsenbobonshana. Chë cbontsebuabiamná soye ndoñe canýe tsëm mando quenátsmëna, ndayá cach Cristbe ústonënga tmonjanobiana ora tmonjanóyëngacñe mando. <sup>6</sup> Bënga, Bëngbe Bëtsá y chë inýe entšanga imababuanýeshanama jtsinýnana, bënga ntšamo Bëngbe Bëtsá tojamandacá jtsamëse tmojt-siyenama. Y chabe mando, ntšamo Cristbe ústonënga šmonjanobiana ora šmojanuencá, mëntšá endmëna: jtsiyenana Bëngbe Bëtsá y chë inýe entšanga jtsababuánýeshanëse.

### *Chë entsángbioye áingñayënga*

<sup>7</sup> Quem luarëjana banga entsángbioye áingñayënga mondajna, y chënga jtsejuabnyana Jesucristo quem luaroye ndoñe mo canýe ndegombre entsacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná. <sup>8</sup> Chëngbiama cuedado šmochtsebonna. Ndoñe chcase, tsëngaftanga ndoñe quešmochátsbomna chë Cristbiana cach tsëngaftangbe trabajuentsana tojóbozna soyënga, y ndoñe quešmochatosháchiñe lempë ntšamo Bëngbe Bëtsá tsëngaftangbioye jatšatayama yojtsebošcá.

<sup>9</sup> Ndánaca chë Cristo tojanabuatambá soyëngama inýe soyënga tojatabuatambá, cha ndoñe Bëngbe Bëtsáftaca cánýiñe mo canýacá ntsemnana; pero nda sempre ntšamo Cristo tojanbuatëmbacá tojtsebuatambá, cha aiñe chë Taitáftaca y chabe Uaquiñáftaca cánýiñe mo canýacá jtsemnana. <sup>10</sup> Ndánaca tsëngaftangbioye tojá jabuátambama, pero ndoñe ndayá Cristo tojanabuatambacá tojtsebuatëmbase, cha ndoñe šmatjofja, ni mo šmatjachuaye. <sup>11</sup> Er nda chábioye tbojachuase, chábioye jtsajabuáchanana chë bacna soye chaomama.

### *Jtadióšoftanama*

<sup>12</sup> Atše ba soyënga sëntsebonna tsëngaftanga jáuyanama, pero ndoñe quetsátsboše tsbuanáchañe jubuábiamama. Atše sëntsejuabná aiñe chjobenaye tsëngaftangbioye jama, jobenayama nyëtscángaftaca jencuéntama, chca, bëngbe oyejuayana puerte bëtscá chaotsemnana.

<sup>13</sup> Cristbeyeca acbe quenata, chë Bëngbe Bëtsabe bocacaná, chabe básenga cmontsacheuaná.

## 3 San Juan

### *Juan Gaybiam a puerte tšabá tojanoyebuambá*

<sup>1</sup> Atše chë bëtsëjema, quem tsbuanácha atšbe bonshana amigo Gaybiam a sentsabiamná. Chábioye atše ndegombre sëndbobonshana.

<sup>2</sup> Atšbe bonshaná y Cristbeyeca atšbe catsata, Bëngbe Bëtsá sëntseimpadana aca tšabia nÿetsca soyënguifne chacotsemnama y salud bomnánaca. Atše sëntsetatsëmbo aca ainaniñe tšabá cotsomñama, Bëngbe Bëtsabiam a bëtscá tšabe juabnënga chentše jtsebomne. <sup>3</sup> Er báseftanga Jesucristbeñe ošbuáchiyënga átšbioye tmonjabo y šmonjacentá ntšamo aca chë ndegombre soyënga yomncá icuamama, aca chë ndegombre soyënga jtsamëse icoyenama. Chiyeca atše bëtscá sëntsoyejuá. <sup>4</sup> Tondaye jamana atše nÿetsá oyejuayá chaitsemnama, ndayá nÿe joudenana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.

<sup>5</sup> Atšbe bonshaná, aca contsama ntšamo Jesucristo tonjanbuatëmbacá, aca chë inÿenga Jesucristbeñe ošbuáchiyënga jujabuáchama ndayánaca tcojama ora, y masna, chë inÿe luaroquëngocana ashjajnëngbiam ndayánaca tcojtsama ora. <sup>6</sup> Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mondbeneneñjñëngbe delante, aca tša chënga icuababuánÿeshanama. Diosmanda, ntšamo tojtsëjbotcá chënga cochjúabuache, chca, chënga chamobená tšabá inÿe luarëngoye játama. Chënga mondmëna Bëngbe Bëtsabiam a trabájayënga; chcasna, chëngaftaca cochjama ntšamo chënga chama merecido imobuajoncá. <sup>7</sup> Chca cochjama, er chënga chëngbe pueblënguentšana tmojëftsebobcana Jesucristbe soyëngama entšángbioye jábuayenama, y chënga chama tondaye crocénana quematoyëngacañe chë Jesucristbeñe ndošbuáchiyëngbe cucuatšentsana. <sup>8</sup> Chiyeca bënga sontsamna chëngbiam a jtsantješana y jtsëjabuáchanana, chca, bënga chamobená cãnyñe chëngaftaca jatrabájana, entšángbioye chë ndegombre soyëngama jábuayenama, ndayá chënga mondama.

### *Diótfes ndoñe tšabá tonjanma; Demetrio añe*

<sup>9</sup> Atše canÿe tsbuanácha chë Jesucristbeñe ošbuáchiyënga chentše mondbeneneñjñëngbioye sënjubuábiam a, pero Diótfes ndoñe yontsuenana ntšamo atše sentsichamcá, er cha yojtseboše chë inÿëngbioye nÿe jtsamëndayana. <sup>10</sup> Chiyeca atše choye chajjá ora, ndayá cha yojtsamama chanjauácacana. Cha sempre bacá yojtsoinÿana y uayátsenaye soyënga bëngbe contra yojtlichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe puebloye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bëtsemnama imnétsenefjuana luarentšana yojtatëbuacana.

<sup>11</sup> Atšbe bonshaná, ndoñe cattsama chë ndoñe tšabá yontsamacá, ndayá chë tšabe soyënga tmojtsamëngcá cochtsama. Nda ntšamo tšabá yomncá tojtsama, cha Bëngbe Bëtsábiam jtsemnama; pero nda ndoñe chca tontsama, cha cabá ndoñe yondëtatšëmbo ntšamo Bëngbe Bëtsá yomnama.

<sup>12</sup> Jesucristbeñe ošbuáchiyënga nÿetscanga tšabe soyënga Demetriëbiam a montsichamo, y Jesucristbe ndegombre soyënga entsinÿna ntšamo cha soyënga yojtсийenama. Bëngnaca chabiam a tšabá fsentsichamo, y aca condëtatšëmbo ntšamo bënga fsentsichamcá, ndegombre yomnama.

### *Jadiósoftanama*

<sup>13</sup> Atše ba soyënga sëntsebomna aca jauyanama, pero ndoñe quetsátsboše tsbuanáchañe juábobemana. <sup>14</sup> Atše sëntsejuabná betscó chjobenaye ábioye jama jauatsëtsayama y jobenayana ácaftaca jencuëntama.

<sup>15</sup> Puerte tšabe ebionana ainaniñe chacotsebomna. Quem luarentša amiguënga cmontsechuaná. Diosmanda, bëngbe amiguëngbioye choca cada ona cochjácheuaye.



## San Judas

### *Jacheuayama*

<sup>1</sup> Atše Judas, Jesucristbe oservená y Santiagbe catsata, quem tsbuanácha séntsabianná, ndémuanýngbioye Bèngbe Bètsá, chë Taitá chabe entsanga chamotsemnana tojáchembo, chabe bonshánènga, y ndémuanýngbe Jesucristo endányena. <sup>2</sup> Atše, Bèngbe Bètsá séntseimpadana, cha puerte lastemado tséngaftangafaca chaotsemnana, cha chaoma tséngaftanga ainaniñe tsabe ebionana chašmotsebonnana, y chaoma tséngaftanga cada te más Bèngbe Bètsábioye y inýngbioye chašmotsabuanýngshana.

### *Chë ndoñe ndegombre soyènga buátèmbayènga*

<sup>3</sup> Atše bonshánènga, atše tša séndboše tséngaftanga jubuábiamama, ntšamo Jesucristo bèngbe bacna soyènguentšana šojátsebacama, tséngaftangbioye y bèngbioynaca; pero atše séntsejuabná atše šojtsemna tséngaftanga jubuábiamana, jáimpadama bètsá chašmotsama Jesucristbe soyèngama, chë mondošbuaché soyèngama jenujúezama, ndoñe chaondopochama. Chë soyènga Bèngbe Bètsá chabe entsanga canýe tojatšatá, y nýetsca tescama. <sup>4</sup> Er tséngaftanga ntšamo inýngbe imomnana ntjatatšèmbonca, básefta entsanga tséngaftangafaca tmojenutaná. Chènga mondmèna Bèngbe Bètsá ndoñe adórayènga, y chë buátèmbana soyènga tmojtsetrocá. Bèngbe Bètsá bèngbe tsabiama juabna yobómnyeca, chènga jtsichámuana tséngaftanga šmotsobena nýetsca bacna soyènga jtsamése jtsiyenana, jenomándama ntšobencá ca; y chca, chènga montseboše jinýanýiyama, Jesucristo ndoñe bèngbe canýe Nduiño y Bèngbe Utabná chèngbiama yondmèna ca. Y bayté, Bèngbe Bètsabe uabemana palabrénguñe tmojanábema, chë chca amèngna jtsamnana nýetsca tescama castigánènga jtsemnana ca.

<sup>5</sup> Masque tséngaftanga lempe quem soyama ya šmondétatšèmo, atše séntseboše jamama tséngaftanga chašmotsenojuabná, Bèngbe Utabná, Israeloca entsanga Egiptoquèngbe cucuatšentsana tojanatsebacá chentsana, cachá chë Israeloquènguentse chábeñe ndošbuachiyènga tojánapochocama; <sup>6</sup> y cachcá chë angelèngbiánnaca, ndémuanýngbe ndoñe tmojananoquedá chë tmojanóyèngacñe mándoca, pero añe chèngbe luarènga cachcá imojéftsonýaye. Chë causa, Bèngbe Bètsá tojanmandá cadenýuangaca nýetsca tescama chamoquedama, chë más ibetiñe, tondaye binýniñe luarentše, chènga bacna soyènga tmojanmama nýetsca tescama castigánènga jtsemnana yojsamna ca, cha jayanama tescama. <sup>7</sup> Y chë Sodoma y Gomorra, y chë béconana pueblènguentse entsangbiánnaca; chèngnaca cach angelèngcá ndoñe tsabá monjánama, y nýetsca bacna soyènga imojánama boyabása o shembásafaca, y inýngaftaca y bayèngaftácnaca. Chýeca chènga tmonjansufrí chë inšesca castigo nýetsca tescama, y chca, nýetsca entsángbioye tmojaninýanýe, ndayá yochjopása chë chca Bèngbe Bètsábioye ndoñe tbontsobedecenáftaca.

<sup>8</sup> Cachcá, chë ndoñe ndegombre soyènga buátèmbayèngnaca chë mo otjenayoquécá tmojáninýe soyèngama jtsichámuana, y chë causa cachèngbe cuerpèngama bacna soyènga jtsamana, chë mando bomnèngbioye jtsèbátèna, y chë espíritènga obenana bomnèngbiama ndoñe tsabá ntsichámuana, mo chèngbioye cuafjoyanguangcá. <sup>9</sup> Pero ni mo chë angelèngbe mandayá Miguel quem buátèmbayèngcá tojanma. Cha chë diábloftaca ibojentsjaná ora, Moisesbe cuerpama cháftaca jabuachana ibojanenatsétsnaye ora, ndoñe tonjanenñemó jayanama chë diablèbiama podessa soyènga, jóyènguanguse, ndayá nýe mèntšá ibojauyana: “Bèngbe Utabná chacmácacana ca.” <sup>10</sup> Pero quem buátèmbayèngna, chë ndoñe tontsésertana soyèngama podessa jtsichámuana, y ntšamo tojtsebionama y tmojtsebošama, nýe mo bayèngcá, chë soyèngama tsabá josértama juabna ndbomnènga, ndayá chentsana tmojtsebertana jtsamése, jamana chènga nýetsca tescama castigánènga jtsemnana chamotsajnama.

<sup>11</sup> ¡Tša lastema quem buátèmbayèngbiama! Er chènga ndoñe tsabá tmojanma, mo Caincá; cha tojanaboté ntšamo Bèngbe Bètsá inétsama bacna soyènga japerdónama, y cabana chabe catsábioye tbojanóba. Chènga crocénana juacánama, mo Balaam tojanamcá, Bèngbe Bètsabe tsabe benachentsana tmojtsojuánañe, bacna soyènga jamama. Chènga chë amèndayèngcá Bèngbe Bètsá tojanabacacángbioye ndoñe ntsayaunanana, ntšamo Coré, Moisés y Aarónbioye joyauyama ndoñe tonjanbošencá; y chë causa chènga chènga pochocánènga mochántsemna, ntšamo Coré pochocaná chaotsemnana Bèngbe Bètsá tojanmá.

<sup>12</sup> Chèngna tséngaftangbiama jtsemnana mo canýe ndétsenga luarentše canýe bèts tsengacá, tséngaftangafaca tmojenutaná ora, cánýiñe jasama mo Jesucristbeñe ošbuachiyèngcá. Chènga chca jtsemnana, er chca fiestènguñe chènga oyejuayènga jtsemnana, nýe chènga tsabá jtsomñama soyènga jtsamése, y chènga chama ndoñe ntséuatjana. Chènga nýe

cachëngbiana jtsantješnana, ínÿengbiana ndoñe. Chënga tša jtsašebuachiyana, pero chëngbe buátëmbana soyënga ínÿengbiana tondayama ntoservënana; y chca, chënga jtsemnana mo chë tša jënyá ora jantšetëshëngcá, tondaye ntjuaftena, bínÿiaca ochñëjuañshënga; y mo betiyeshënga jashtsnëshënga y buashañshëngcá, chë jashacama tojtsemna ora tondaye shajuana causa. <sup>13</sup> Chënga nÿets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinÿanÿanayana chënga chë bacna juabnënga imobomnama. Chca, chënga jtsemnana mo mar béjayoca oleshëngcá, chentšana espumushënga bëtscá tsenguësheca jtsóbocanana. Y cabana, chënga jtsemnana mo estrellëngcá chëtëmëngbe benachentšana tmojtsebocna, y chentšana jtsefsanana. Bëngbe Bëtsá tojamamá, chë buátëmbayënga ntšamo tmojamamna, chë más ibetoca, tondaye binÿniñe luarentše nÿetsca tescama chënga chamoquedama.

<sup>14</sup> Adánbentšana chñënguana pamillo entšanga tmojánachñëjna chentšana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiana, mëntšá tojánayana ora: “Smochjinÿe, Bëngbe Utabná echanjabo bëtscá uaranga angelëngaftaca, <sup>15</sup> nÿetsca entšangbiana jabáyanama ntšamo tmojamcá tšabá o ndoñe tšabá bëtsemnana; y cha echanjamánda chë Bëngbe Bëtsábioye ndoñe adórayënga nÿetsca tescama castigánënga chamotsemnana, tša bacna soyënga chabe contra tmojamama, y bacna soyënga chabe contra tmojamayana, chënga, chë puerte bacna soyënga amënga ca” —tojánayana. <sup>16</sup> Chënga mondmëna chë tšabe soyëngama nÿets tempo podesca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nÿe cachënga tšabá jtsomñama, y puerte botamana palabrënga jtsichámuana uámanënga jtsenobiamnayëse, y tšabe soyënga ínÿengbioye jtsëtsënayana, chënga tšabá joquédama y chëngbentšana ndayánaca josháchiñama.

*Ošbuáchiyënga jábuayenama*

<sup>17</sup> Pero tšëngaftanga, atšbe bonshánëngna, šmochtsenójuabnaye ndayá chë Bëngbe Utabná Jesucristbe ihmónënga tcmojanéyanama, mëntšá: <sup>18</sup> “Jesucristo quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nÿe cachënga tšabá jtsomñama bacna juabnëngaca, y tšëngaftanga cmochantsëbuayajuana ca.” <sup>19</sup> Chënga mondmëna chë ošbuáchiyënguëntšë nÿetscanga ndoñe cachcá chamondëtsejuabnama amënga; chënga mondoyena jtsamëse cachëngbe bacna juabnëngaca y ndoñe quemátsbomna Uámana Espíritu, chëngbe ainaniñe chaotsemándama.

<sup>20</sup> Pero tšëngaftanga, atšbe bonshánënga, nÿets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábicana endóbocana ošbuáchiyana, y Bëngbe Bëtsáftaca smochjencuënta, ntšamo Uámana Espíritu tcmojtsamëndacá. <sup>21</sup> Yëjuana smochtsantješna tšëngaftanga nÿets tempo chašmotsiyenama, Bëngbe Bëtsá cmababuánÿeshanama jtsejuabnayëse, y smochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nÿetsca tescama yomna tšabe vida chašmotsebomnama.

<sup>22</sup> Chë inÿe ora añe y inÿe ora ndoñe Jesucristbeñe ošbuáchiyana bomnënga smochtsalastemana. <sup>23</sup> Bëtscá smochtsama, báseftanga chë uabouana castigüentšana atsebacánënga chamotsemnana, mo chënga iñeshentšana cuaftëbuacancá. Inÿengbiana chacmotsangmena, pero cuedado smochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondëtsamama; y chë bacna soyënga ntšamo chënga tmojtsiyena jtsamëse, chëngbe bacna juabnëngaca, nÿa tondaye chacmondëtsogetana.

*Judas, Bëngbe Bëtsá jëtschuayama*

<sup>24-25</sup> Chë nÿe canÿe Bëngbe Bëtsá, chëngbe Atsebacyá obenana endbomna tšëngaftanga jtsanÿenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye ndbomnënga chašmotsemnana y puerte oyejuayënga cachabe delante chašmotsemnana, cha canÿe puerte uamaná y obená bëtsemnana chaojinÿanÿé ora. Bëngbe Utabná Jesucristbeyeca, nÿetscanga Bëngbe Bëtsá chamotsatschuaná; y cha puerte bëtsá chauesomñe, nÿets obenana bomná y nÿets mando bomná, nÿets tempscana, tempo, mora y nÿetsca tescama. Chca chaotsemna.

## Apocalipsis

### *Ndayá quem librěšaňe yomna*

<sup>1</sup> Quemuentše entsábemana ndayá Běngbe Bětsá Jesucristbioye tbojaninjinjé, chě Běngbe Bětsabe oservénēnga cha cháuinjanyēma, ndayá jopásama yojtsobecuama chēnga chamot-setatšěmbuama. Jesucristo chama chabe ángel tbojichmó, chě soyēngama atše, Juan, chě Jesucristbe oservenábioye chašuinjinyēma. <sup>2</sup> Y atše sēnjayana lempe ntšamo ndegombre yomncá lempe chě tijinjē soyēngama, chě Běngbe Bětsabe buayenana soyēngama y chě Jesucristo šonjaniana ndegombre bětsemna soyēngama.

<sup>3</sup> Oyejuayá nda tojtsalía, y oyejuayēnga ndēmuanjēnga botamana tmojtsuenana quem yochjopásá soyēngama, chě muentše entsabemancá ndegombre tmojóyeunanga, er chca jopasa tempo entsobeco.

### *Asia luaroca ošbuachiyēngcá enefjuanēnga jacheuayama*

<sup>4</sup> Atše Juan, sēntsabiamná chě Asia luaroca canjśēftaňe ošbuachiyēngcá enefjuanēngbiama. Atše, Běngbe Bětsá sēntsempadana, tsabe bendicionēnga chábiocana chašmosháchiňe y ainaniňe puerte tsabe ebionana chašmotsebmoma, Běngbe Bětsábentšana, chě canjśēfta espírituēngbentšana y Jesucristbentšana. Běngbe Bětsá, chě mora endmēná, enjammá y sempre echantsemná; chě canjśēfta espírituēnga, chabe uámana puesto natsanoica mondmēnēnga; <sup>5-6</sup> y Jesucristo, chě ntšamo Běngbe Bětsabiama yotatšěmbcá ndegombre oye-buambnayá, chě natsaná ndabiama Běngbe Bětsá tojama obanēnguentšana cháuatayenama, y njetzca quem luarentša mandadēngbe amēndayá. Cristo šondábabanjeshana y Běngbe bacna soyēnguentšana šojatsebacá, cha tonjanóbanayeca, chabe buiňe juabuáshanēse. Cha tojama bēnga chamotsobena cháftaca jtsemándayana y uámanēnga chamotsemnama, y Běngbe Bětsá chabe Taitá mo bachnangcá chamotseeservénama. ¡Njētsanga njēts tempo chamotsinjanjána Cristo puerte bětśá y uamaná bětsemnama y obenana njētsca tescama yobomnama! Chca chaotsemna.

<sup>7</sup> Mouenēnga. Cristo jantšetěshēnguiňe echanjésabo.

Chábioye njētscanga mochanjinjē,

chě tmonjanrucificágnaca;

y quem luarentša njētsca entšanga puerte ngmēnaca mochántsemna

y mochantsošachna chábeyeca.

Ndegombre, chca chaotsemna.

<sup>8</sup> “Atše sēndmēna chě njētsca soyēnga bojatsayá y pochocayá ca,” Běngbe Utabná Běngbe Bětsá tojajana. Cha chě sempre endmēná, enjammá, njēts tempo echantsemná, chě njēts obenana bomná.

### *Juan mo otjenayoquēcá Cristbiama tojáninjē*

<sup>9</sup> Atše Juan, Jesucristbeyeca tšēngaftangbe catšata, cháftaca cánjiňe mo canjácá bětsemnama, cach tšēngaftangcá sēndēpadecena, tšēngaftangcá chanjěftsashjache Běngbe Bětsabe amēndayoye jamashēnguama, y tšēngaftangcá Běngbe Bětsábeňe jtsobátmanēse, uantado sēndmēna chě padecena soyēnguiňe. Běngbe Bětsabe palabra sēnjánabuayinama y Jesusbiana ntšamo ndegombre endmēncá sēnjanóyebuambnama, atše šmonjatsanětsena mar bėjayoca canjē fshantsentše, Patmos ca uabáinoca. <sup>10</sup> Y tonjanopasá, canjē tmengo, chě ošbuáchiyēnga Běngbe Utabnábioye cánjiňe jětschuayama te, atše sēnjanoquedá chě Uámana Espiritbeyeca corente mandaná, mo otjenayoquēcá soyēnga sēnjétsonjaye, y atšbe stětšoica canjē jabuache oyebuambnayana sēnjanuena, mo canjē trompetěfjua cuafjuajatětćá; <sup>11</sup> mēntśá sontsanatsětsná: “Canjē librěšaňe mábema lempe ntšamo contsonjácá y cochjuíchmua chě Asia luaroca canjśēftaňe ošbuachiyēngcá enefjuanēngbioye: Efeso, Esmirna, Pérgamo, Tiatira, Sardis, Filadelfia y Laodiceoquēngbioye ca.”

<sup>12</sup> Sēnjanobuértana jinjama nda chca šojtsanatsětsná, y chca sēnjanma ora, sēnjáninjē canjśēfta castellano candelersēngá; <sup>13</sup> y chě canjśēfta castellano candelersēnguiňe tsěntsaca canjā sēnjáninjē, mo entšacá injána, canjē bēn entšayá uichětjoná, y cochóntscoca canjē tēntśa castellano uasnanějaca. <sup>14</sup> Chabe stjēnashana uafjantsěsha, puerte uafjantsěsha mo canjē oveshabe boboshěshacá, y chabe fšněbēnga mo iňeshcá enjětsinjána. <sup>15</sup> Chabe shecuatšēnga enjětsēbuashinjinjána mo bronscá, ndaybē natsana iňějana tcojuchnēngo enabé chaotsemnama y chentšana entšějuaca becá tcojajojó corente chaotsebuashinjinjanama; y chabe oyebuambnayana jabuache enjětsenana mo bětścá bėjaye cuaftebuachquēcancá. <sup>16</sup> Chabe catšbioica cucuatšēne enjětsatbēna canjśēfta estrellēnga, y chabe uayoicana enjětsobocana canjē espadēja, njēts uitoicajana puerte efsánēja, y chabe

jubiá tša enjétebuashinjinñana, mo chë shinýe corente, lempe ntšamo tojobenacá tojtsebuashinjinñana orcá.

<sup>17</sup> Cha sënjininýe ora, chabe shecuatšentše mo obanacá sënjánshajaye. Pero cha, chabe catšbioica cucuatše átsbeñe jajájuase, šonjaniana: “Ndoñe matauatjana; atše sëndmëna chë nyetsca soyënga bojatsáyá y pochocayá, <sup>18</sup> chë sempre vida bomná. Atše obaná sënjamna, pero mora nyetsca tescama vida sëntsebomna. Atše obanana sëndbomna, y chë obenánaca entšángbiöye ndoñe quenátamna infernoca nyetsca tescama castigánënga jtsemnana, mo nyets tempo cuaftsobancá. <sup>19</sup> Ntšamo tconjinýcá mábema, chë quem tempo endmëna soyëngama y chë más chcoye echántsemna soyëngama. <sup>20</sup> Mëntšá endmëna chë atšbe catšbioica cucuatšine tconjinýe canýsëfta estrellëngaca y chë canýsëfta castellano candelersëngaca: chë canýsëfta estrellënga montsinjinýná chë canýsëftañe ošbuachiyëngcá enefjuanëngbeñe chamotsemándama uámana ichmónënga, y chë canýsëfta candelersëngna chë canýsëftañe ošbuachiyëngcá enefjuanënga.”

## 2

*Efesoca ošbuachiyëngcá enefjuanënga jábuayenama*

<sup>1</sup> Mëntšánaca cha šonjaniana:

“Mëntšá mabobema chë Efesoca ošbuachiyëngcá enefjuanëngbeñe chaotsemándama uámana ichmonábioyna:

Mëntšá entsichamo chë chabe catšbioica cucuatšine canýsëfta estrellënga entsatbëná y chë canýsëfta castellano candelersënga luarëjana entsaná: <sup>2</sup> Atše lempe sëndétatšëmbo ntšamo tsëngaftanga šmoyenana; atše corente sëndétatšëmbo tsëngaftanga jabuache šmotrabájama, y ntšamo tsëngaftanga Bëngbe Bëtsábeñe jtsobátmanëse šmnëtsauantana padecena soyënguiñe šmojtsemna ora. Y átsnaca sëndétatšëmbo tsëngaftanga ndoñe šmontsobena jtsëuantánana ntšamo bacna entšanga tmojtšamcá. Atšnaca sëndétatšëmbo tsëngaftanga yejuana šmojarrepará y becá šmojenojuabó jinýama chë Jesucristbe ichmónënga imomna ca tmojtšichamëngbiama; pero ndegombre chënga ndoñe chca quemátsmëna; y chca šmojámayeca, tsëngaftanga mora šmontsetátsëmbo chënga bosterënga imomnama. <sup>3</sup> Padecena soyënguiñe becá šmojoboyá y chca ora, Bëngbe Bëtsábeñe šmobátmana. Chë soyënguiñe šmojasufri, tsëngaftanga atše šmoservënama; y tsëngaftanga chca šmondësverna, ainaniñe añemo jtsebomnama ntjajbanacá.

<sup>4</sup> Pero canýe soye sëntsebomna tsëngaftangbe contra jayanama: Tsëngaftanga mora ya ndoñe cachca bonshánana quešmátsbomna ni atšbiama ni nyetsca entšangbiama, ntšamo átsbeñe jtsošbuáchiyama šmonjanbojatsé orcá. <sup>5</sup> Menójuabonga ntšamo chë tempo šmonjانبobonshanama, juabnayana motrocanga y cachiñe šmochtsama ntšamo chë átsbeñe jtsošbuáchiyama šmonjanbojatsé orcá. Ndoñe chchase, atše tsëngaftangbiöye chanjá jabuache jetsacastígama, jtsapochócantscuana, mo chë tsëngaftangbe cuenta entsemna candelersë chabe puestentsana cuaftsejuanacá. Chca chanjama, tsëngaftanga juabnayana ndoñe chašmonjatrocace. <sup>6</sup> Pero tsëngaftangbe pavor quem tsabe soye šmontsebomna: Tsëngaftanga šmonduábotena lempe ntšamo chë nicolaíta ca uabaina entšanga tmojtšamcá, ndayá átsnaca sënduábotena.

<sup>7</sup> Chë jouenama tmojtšobenënga, chamouena ndayá Espiritu chë ndayenache ošbuachiyëngcá enefjuanënga yojtšëtsëtnacá. Chë padecena soyënguentšana tsábá chamojábocana mo ayëñjanayëngcá, chëngbiama chanjama chë nyetsca tescama yomna tsabe vida chamotsebomnama, y chca chënga mochántsemna mo chë nyetsca tescama yomna tsabe vida jtsebomnama betiyeshentsana cuaftsesacá, chë entšanga siempre oyejuayënga mondbetsemnoca ca” —cha šonjaniana.

*Esmirnoca ošbuachiyëngcá enefjuanënga jábuayenama*

<sup>8</sup> Mëntšánaca cha šonjaniana: “Esmirna bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë nyetsca soyënga bojatsáyá y pochocayá, chë tonjanobaná y ndabiama Bëngbe Bëtsá tonjama cháuatayenama: <sup>9</sup> Atše sëndétatšëmbo tsëngaftanga tša jabuache šmojasufrima y ndbomnéjëmënga šmommna, pero ndegombre Bëngbe Bëtsábocana bëtscá tsabe soyënga šmondëtsóbonñe. Y sëndétatšëmbo tša bacá tsëngaftangbiama mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entšangcá; chca, chënga mondmëna mo Satanasbe entšangcá, nyë chábiöye jtseeservëne y jtsatschuanayëse.

<sup>10</sup> Ndoñe matauatjëngana chë ndoñe yapa bën y tsëngaftanga šmochjasufrima, er Satanás echanjama tsëngaftanguentšënga báseftanga cárceloye inýenga chacmëtámia, jinýama ntsachetšá Cristbeñe ošbuáchiyana šmobomnama, padecena soyënguiñe šmojtsemna ora; y entsamna baseftayté jasúfrana. Sempre bëtscá ošbuáchiyana, y

ainaniñe bëts añemo šmochtsebmoma, masque jobanámnaca chacmotsamna, Cristbiana trabájaye causa. Chca chašmojtšamëse, atše chanjama tšëngaftanga chašmotsebmomana mo canye uacana soycá, chë nyetsca tescama yomna tšabe vida.

<sup>11</sup> Chë jounama tmojtšobenënga, chamouena ndayá Espiritu chë ndayenache ošbuachiyëngcá enefjuanënga yojtšëtsësnacá. Chë padecena soyënguentšana tšabá chamojábocana mo ayëñjanayëngcá, ndegombre chënga ndoñe queochátamna játauatjana nyetsca tescama castigánënga jatsmënana ca” —cha šonjanaryana.

*Pérgamoca ošbuachiyëngcá enefjuanënga jábuayenama*

<sup>12</sup> Mëntšánaca cha šonjanaryana: “Pérgamo bëts pueblentše ošbuachiyëngcá enefjuanëngbeñe chaotsemándama uámána ichmonábioynaca mëntšá mabobema:

Mëntšá entsichamo chë nyets uitoicajana puerte efšana espadéja entsatbëná: <sup>13</sup> Atše sëndëtatšëmo ntšamo yomna tšëngaftangbe oyenentše, canye luare ndayentše Satanás entšángbioye puerte iuamënda. Masque chca, tšëngaftanga sempre nye atše šmondëseservena, y ndocna te chešmáisayana átšbeñe ndoñe šmondosbuaché ca, ni mo Antipas, chë canye nyets tempo atšbe ustoná y atšbiana ndegombre oyebuambnayá, inyënga tmonjanóba ora. Y lempe chca tojopasá tšëngaftangbe pueblentše, ndayentše Satanás bëtscá entsana.

<sup>14</sup> Pero básefta soyënga sëntsebmoma tšëngaftangbe contra jayanama: Chentše tšëngaftangbeñe báseftanga montsemna, soyënga montsabuatumá ntšamo bayte entsemna Balaam enjanabuatumacá. Cha rey Balácbioye tbojanbuayená ntšamo jamana Israeloca entšángbioye jáingñama, chënga chë ntšamo ndoñe tšabá yomncá chamotsamama; y chca, Balac tojanma chë inyënga diosënga yojamna ca imojanajuabná soyënga jadórama uátšëmbona saná chë Israeloca entšanga chamosama, y shembása o boyabásaftaca bacna soyënga chamotsamama. <sup>15</sup> Chëntšánaca inyënga montsemna, y chëngna chë nicolaitëngbe buatëmbana soyënguñe mondošbuaché, y chca buatëmbana soyënga ndoñe tšabá quenátsmëna. <sup>16</sup> Smochtsejuabnaye ntšamo šmojtšamama, chëngbioye tšëngaftangbeñe šmojtšëuantana ora, y chca jtsamana šmochjajbaná; er ndoñese, atše betso tšëngaftangbioye chanjá, y chë chca buatëmbana soyënguñe ošbuáchiyana ndoñe tmonjajbanángaftaca chanjéntsja chë atšbe uayoicana endóbocana espadéjaca.

<sup>17</sup> Chë jounama tmojtšobenënga, chamouena ndayá Espiritu chë ndayenache ošbuachiyëngcá enefjuanënga yojtšëtsësnacá. Chë padecena soyënguentšana tšabá chamojábocana mo ayëñjanayëngcá, chëngbioye maná chanjátšataye chamosama, chë celoca tandëse, ndayá Bëngbe Bëtsá tempo entšángbioye ndoñe tonjinñanyë; y canye fjantë ndëtsëtëma chanjáyentšbuachiyë, chënga oyejuayëngcá šmojábemama. Chiñe canye tšëm uabaina echantsábemana; ndocná chë uabaina quenátabuata, ndayá nyë chë chamojóyëngaciñënga ca” —cha šonjanaryana.

*Tiatiroca ošbuachiyëngcá enefjuanënga jábuayenama*

<sup>18</sup> Mëntšánaca cha šonjanaryana: “Tiatira bëts puebloca ošbuachiyëngcá enefjuanëngbeñe chaotsemándama uámána ichmonábioynaca mëntšá mabobema:

Mëntšá entsichamo Bëngbe Bëtsabe Uaquiñá, chë mo iñeshcá uafšná y mo entšëjuaca jojona puerte chaotsebuashinñinñanama bronce shecuatšënga bomná: <sup>19</sup> Atše sëndëtatšëmo ntšamo tšëngaftanga šmoyenama; sëndëtatšëmo ntsachetšá tšëngaftanga Bëngbe Bëtsábioye y nyetscángbioye šmababuánñeshanama, ntšamo tšëngaftanga Bëngbe Bëtsábeñe puerte šmošbuáchemo, ntšamo chábioye šmoservénama, ntšamo tšëngaftanga inyënga šmojuabuache y ntšamo Bëngbe Bëtsábeñe jtsobátmanëse becá šmojoboyá padecena soyënguñe; y sëntsetatšëmo mora más bëtscá tšabe soyënga šmojtšama, ntšamo tšëngaftanga átšbeñe jtsošbuáchiyama šmonjanbojattšé orscama.

<sup>20</sup> Pero canye soye sëntsebmoma tšëngaftangbe contra jayanama: Tšëngaftangbeñe šmondëuantana chë shembása, mo chë bacna reiná Jezabelcá endmënábioye. Chë shembása entsichamo Bëngbe Bëtsabe juabna oyebuambnayá canmëna ca; pero chabe buatëmbana soyëngaca atšbe oservénënga entsaíngña, shembása o boyabásaftaca bacna soyënga chënga chamotsamama, y chë inyënga diosënga yojamna ca imojanajuabná soyënga jadórama uátšëmbona saná chamosama. <sup>21</sup> Cha sënjuená atše chjacastíga ca, chca juabnayana ndoñe tonjatrocasa, y canye boyabásaftaca bacna soyënga amana ndoñe tontsajbanase. Cha jacastígama batšá sënjobatma, nderado chca amana nanjatróca, pero ndoñe chenátšbošëna. <sup>22</sup> Mora atše chanjama bëts šocana cha chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmontsajbanase, chëngbiana chanjama puerte chamosufrima; <sup>23</sup> y chë shembásabe básënga chantsëbaya. Chca, nyetsquénache ošbuachiyëngcá enefjuanënga mochántsetatšëmo, ndayá entšanga juabniñe y ainaniñe tmojuabnacá atše

tsuábuatmama; y cada ona tsëngaftanguentsá, chca bacna soye cháftaca tojamá, ntšamo ibojtsomerecencá chanjacastiga.

<sup>24</sup> Pero tsëngaftangbentše, ínŷenga Tiatira pueblentše šmojtsemnënga, chë shembásabe buatëmbana soyënguife ndoñe šmontsošbuachenga, y chë ínŷenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tsëngaftanga ndoñe quechocatamënda ínŷe más toto soye chašmotsamama. <sup>25</sup> Pero ñe sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtsábocana šmojóyëngacñe soyënga yomncá, atše quem luaroye jesabámëntscuana.

<sup>26</sup> Chë padecena soyënguentsana tsábá chamojábocana mo ayëñjanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye ñjetsca mándayëngbentša entsángbeñe jsemándayama, <sup>27</sup> ntšamo atšbe Taitá chabe obenana šojatšetacá; y chënga entsángbiye puerte obenánaca mochántsamëndaye, mo canŷe hierro varëfjaquécá, y chëngbe contra chamojtsamëngbiye mochántsapochocaye, mo ñŷe matbajënga tmojtsëtsjanjncá. <sup>28</sup> Y chë jabínŷnama ora bínŷnaye estréllnaca chanjátšataye.

<sup>29</sup> Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

### 3

#### *Sardisoca ošbuachiyëngcá enefjuanënga jábuayenama*

<sup>1</sup> Mëntsánaca cha šonjaniyana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë Bëngbe Bëtsabe canŷsëfta espíritënga y chë canŷsëfta estrellënga bomná: Atše lempe sëndëtatšëmbo ntšamo tsëngaftanga šmoyenama; atše sëndëtatšëmbo tsëngaftangiama ínŷenga tša jtsichámuana Bëngbe Bëtsá jaserviama bëtscá šmojtsama ca, pero ndegombre tsëngaftanga ñŷe batsatema šmotsama, y chca, chabiama mo obanëngcá šmondmëna. <sup>2</sup> Botamana šmochjenóbobonŷe y más šmochtsama chë Bëngbe Bëtsá jaserviama cabá šmondama básefta soyënga. Ndoñe yapa quenátajamna chë tsabe soyëngnaca chašmotsajbanama, er atše sënjinŷe chë Bëngbe Bëtsábioye jaserviama ntšamo jtsamëse šmoyencá, atšbe Bëtsabiama ndoñe yapa tsábá quenátsmëna. <sup>3</sup> Asna, šmochtsenójuabnaye ndayá Bëngbe Bëtsábocana šmojóyëngacñama, y chabiama šmojouena soyënguifnaca. Ntšamo chë soyënga yomncá šmochtsiyena, juabnayana šmochjatróca y šmochjontša bëtscá jtsamana Bëngbe Bëtsá jaserviama. Ndoñe tsábá cach tsëngaftanga chašmonjenójuabose y juabnayana ndoñe chašmonjatrocace, ñŷe ndeolpe chanjá tsëngaftangbiye, mo canŷe atšëbanacá, chabiama ndocná tontsejuabná ora, y ndegombre tsëngaftanga ndoñe quešmochátstatšëmbo mocna ora atše tsëngaftangbiye chjama.

<sup>4</sup> Masque chca, Sardisentše tsëngaftangbeñe básefta entsanga mondmëna, chënga ndoñe chematajbaná oyenana tsabe soyënga jtsamëse, bacna soyënga játamama. Chëngna átšeftaca mochántsjana uafjantsëjuangá uichëtjonënga, chënga chca mercedo montsebuajónayeca. <sup>5</sup> Chë padecena soyënguentsana tsábá chamojábocana mo ayëñjanayëngcá, chca uafjantsëjuangá uichëtjonënga mochántsemna, y chëngbe uabaina ndoñe quichat-sjuána chë tsabe vida mochjónŷenëngbe uabaina enduábemana librësentšana, ndayá atše, Bëngbe Bëtsabe delante y chabe angelëngbe delante, chënga atšbe entsanga imomna ca chanjayana.

<sup>6</sup> Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

#### *Filadelfioca ošbuachiyëngcá enefjuanënga jábuayenama*

<sup>7</sup> Mëntsánaca cha šonjaniyana: “Filadelfia bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë uamaná y ndegombre oyebuambnayá, chë jtsemándayama puerte obenana bomná, ntšamo Rey David enjanbomncá, chë nda ndayá chaotsemnana tojamandá ora, ndocná ntšobenana jamama chca ndoñe chaondëtsemnana, y ndayá ndoñe chaondëtsemnana tojamandá ora, ndocná ntšobenana jamama aife chaotsemnana: <sup>8</sup> Atše lempe sëndëtatšëmbo ntšamo tsëngaftanga šmoyenama. Minŷënga, atše sënjama tsëngaftanga bëtscá tsabe soyënga chašmotsebonnana, y ndocná quenátobena jamama chca ndoñe chaondëtsemnana; y chca entsemna mo atše tsëngaftangiama canŷe bësása cuaŷatëfjácá, y chëša jtatámia ndocná quenátobena. Atše sëndëtatšëmbo tsëngaftanga batsatema obenana šmobomnana, pero šmojouena ntšamo jtsamama tconjuayancá, y ndocna te chešmátayana atšbe entsanga ndoñe šmondmëna ca. <sup>9</sup> Atše chanjama, chë mo Satanasbe entsangcá imomnënga, ñŷe

chábioye jtseservénese y jtsatschuanayése, chë judiënga imomna ca ichámënga, pero chë Bëngbe Bëtsabe bocacana entsangcá ndámënga y bosterënga, chënga tšëngaftangbiye chamua y tšëngaftangbe delante chamoshamentšë, tšëngaftangbiamá respeto jinjányiyama, y chca, chënga chamotsetátšëmbo atšë sempre chababuánýeshanama. <sup>10</sup> Atšë tcbon-janamëndá, Bëngbe Bëtsábeñe jtsobátmanése, lempe chašmotsoboyá padecena soyënguifne, y tšëngaftanga chca šmonjama. Chíyeca, atšë puerte tšabá cbochántsanýena, chë quem luarentšë oyenënga nyetscanga jasúfriama y padecena soyënguifne jtsemnma chaojtsemna ora, Bëngbe Bëtsábeñe aifne o ndoñe mondošbuáchema jinjányiyama.

<sup>11</sup> Cachiñe quem luaroye betso chanjésabo. Sempre šmochtsama ntšamo mora šmondamcá, y Bëngbe Bëtsábocana šmojóyëngacñe soyënga šmochtsinýena; chca ndocná chaondobená ndayá jamana, y chë sóyeca chaoma tšëngaftanga ndoñe chašmondóyëngacñe ndayá Bëngbe Bëtsá chë chábioye jtseservénama ndoñe tmonsajbanángebioye yochjatšataycá, chëngbe uacanana soye. <sup>12</sup> Chë padecena soyëngentšana tšabá chamojábocana mo ayënjanyëngcá, chëngbiamá atšë chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëtš yebnentšá ucuatjoniñcá; ndocna te Bëngbe Bëtsábentšana quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëtš pueblentšá uabaina, chë tšëm pueblo Jerusalén, chë celocana yobá pueblo, Bëngbe Bëtsábocana. Y chëngbeñnaca chanjuábema atšbe tšëm uabaina. Lempe chca chanjama jinjányiyama chënga Bëngbe Bëtsábenga mochtsemnma.

<sup>13</sup> Chë jouenama tmojtsoebenënga, chamouena ndayá Espiritu chë ndayenache ošbuachiyëngcá enefjuanënga yojtšëtsëtnacá ca” —cha šonjaniyana.

#### *Laodiceoca ošbuachiyëngcá enefjuanënga jábuayenama*

<sup>14</sup> Mëntšánaca cha šonjaniyana: “Laodicea bëtš puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë sempre Ndegombrá endmëná, chë Bëngbe Bëtsabe soyëngama ndegombe oyebuambnayá, y chë ndábeyeca Bëngbe Bëtsá quem luare tojanmá: <sup>15</sup> Atšë lempe sëndëtatšëmbo ntšamo šmoyenama. Atšë sëntsetatšëmbo tšëngaftanga ndoñe yapa šmontseboše Bëngbe Bëtsá jasérviamá, pero Bëngbe Bëtsabe buayenana soyënga ndoñe lempe šmontsaboté. Y chca, nye batšatema šmojtseboše Bëngbe Bëtsá jasérviamá; chca, tšëngaftanga šmontsemna mo tibiye buyeshcá, ni ntšniñiye, ni shécbaniye. ¡Atšë sëntseboše tšëngaftanga chašmotsemna mo ntšniñiye o shécbaniye buyeshcá, tšabá jtsamése o tondaye! <sup>16</sup> Chca, tšëngaftanga tibiye buyeshcá šmondmëna, y ndoñe quešmátsoše bëtšcá jamama, pero Bëngbe Bëtsabe soyënga ndoñe lempe šmontsaboté. Chíyeca atšë sëntsejuabná jtsëbatena, mo nda tibiye býueshe tojtšbuashëtjca, chcaye ndoñe bondogustana causa.

<sup>17</sup> Er tšëngaftanga jtsichámuaa homnënga šmomna ca, puerte tšabá šmojábocana y tondaye cmontsabuáshebena ca, pero ndoñe quešmátstatšëmbo Bëngbe Bëtsabe soyënga bëtšcá cmojtsabuáshebena. Chca, tšëngaftanga šmontsemna nya ndoñe tšabá, inýenga ngmënanaca chacmotsabamna, mo ndbomnjëmëngcá, mo jtanëngcá, Bëngbe Bëtsabe soyëngama ntsoertancá, y mo enašëngcá, bëtšcá Bëngbe Bëtsabe soyënga ntsebomncá. <sup>18</sup> Chíyeca cbabuayená, átšbentšana chašmuatsjinýe chë Bëngbe Bëtsabe soyënga y uámana soyënga, mo chë ena castellano jabemama, inëjana fjëchnënguëse castellano átšbioye šmojtšontšabuamnañcá. Tšëngaftanga Bëngbe Bëtsabe delante mo enašëngcá šmondmëna, er cha endonýá chë ba bacna soyënga ntšamo tšëngaftanga šmojtšamcá. Šmochjaleséncia atšë chacbéjabuache tšëngaftanga Bëngbe Bëtsabe bominýiñe tšábenga chašmotsemnma, mo juichëtjuama uafantse entsáyá átšbioye šmojtšantsabuamnañcá. Chca šmochjama, tšëngaftanga Bëngbe Bëtsabe delante ndoñe chašmondëtsuatjama. Šmochjaleséncia atšë chacbéjabuache tšëngaftanga Bëngbe Bëtsabe soyëngama chaomšertama, mo tšëngaftanga bominýe šocanama šhnana átšbioye šmojtšontšabuamnañcá. Chca šmochjama, Bëngbe Bëtsabe soyëngama puerte tšabá chacmósertama.

<sup>19</sup> Atšë chë sëndábabuanýeshanënga sëndbaucácana y sëndbábuayenaye. Chíyeca, lempe ntšamo šmojobenacá šmochtsama Bëngbe Bëtsá jasérviamá, y juabnayana šmochjatróca, y nyets tempo puerte šmochtseboše Bëngbe Bëtsá jtseservénana. <sup>20</sup> Nderado canýe tšabe amigo yebnoye tojabo y tojachembo, tšëngaftanga šmojouenése y bësása šmojebiatëfjése, cha jamashënguana, y cánýiñe cháftaca joyejuayana y jasana. Cachcá, atšë entsangá sëntsachembuana chašmoleseñcá chëngbe ainaniñe jtsiyenama. Nderado nda šojóyeunase, atšë chanjámashëngo chabe ainaniñe jtsiyenama, y nyets tempo cháftaca cánýiñe mo canýacá chanjéftsemna.

<sup>21</sup> Chë padecena soyëngentšana tšabá chamojábocana mo ayënjanyëngcá, atšë chanjama chënga puerte bëtšëtsanga chamotsemnma ntšamo atšë sëndmëncá, y

átseftaca chamótbemama, atšbe uámana tbemanentše jtsemándayama, ntšamo atše atšbe uayayéngbioye sēnjayēnjanacá, y atšbe Taitáftaca chabe uámana tbemanentše tijotbemcá.  
<sup>22</sup> Chē jouenama tmojtsoebenēnga, chamouena ndayá Espiritu chē ndayenache ošbuachiyēngcá enefjuanēnga yojtsētsētnacá” —cha šonjaniana.

## 4

*Chē Ainēnga Bēngbe Utabnabe uámana tbemanentša natsana imojtsechuanaye*

<sup>1</sup> Chentsana mo otjenayoquēcá sēnjáninīye. Sēnjanrepará y sēnjáninīye celoca canīye bēsása enjétsatēfjna, y chē natsana sēnjanuena oyebuambnayana, chē enjamna mo canīye trompetēfjua cuafjuajatētcá, mēntšá šonjétsatsaye: “Moye másēngo, atše chochanjinīyīye ntšamo más chcoye yochjopasacá ca.”

<sup>2</sup> Cachora, chē Uámana Espiritbeyeca, mo atšbe ainana celoca cuaftsemncá atše sēnjanoquedá, y sēnjáninīye celoca enjésemna canīye reybe uámana puesto, y chentše canīya enjésetbemanana. <sup>3</sup> Chentše enjésetbemaná enjamna, puerte tēshinīná mo jaspe ndétsbecá, puerte buanganá mo cornalina ndétsbecá, y chē uámana puesto shēconana canīye tsēfuácuatjo enjamna, y enjétsēbuashinīyīyana mo canīye esmeralda ndétsbecá. <sup>4</sup> Chē reybe uámana puesto juachajana, inīye uta bnētsana y canta puesto sēnjáninīye, y chíne uta bnētsana y canta bētsējémēnga amēndayēnga monjésetbiamana, uafjantsējuangá uichētjonēnga, y castellano coronēshangá monjétsabestšajona. <sup>5</sup> Chē uámana puestentšana enjétsobocana tcuinīyējēnga, becá shauenanana y juesasanana; y chē uámana tbemaniñentša natsanoicna, canīysēfta uajuinīyanēsha enjétsangbototjuana; chē uajuinīyanēshangá entsayana chē Bēngbe Bētsabe canīysēfta espíritēnga. <sup>6</sup> Y chē uámana puestentšana natsanoica enjésemna mo canīye mar bejaycá, tēshinīniye mo canīye cristal ca uabaina ndétsbecá.

Chē luariñe tsēntsaca, chē uámana puesto enjésemmentše y chē shēconánējana monjésemna canta Ainēnga, nyētsañe fšnēbēngaca, natsanoica y stētsōica. <sup>7</sup> Chē natsana Ainá enjamna mo canīye leoncá, chē inīye Ainá mo canīye torošca, chē inīye Ainá enjānbomna mo canīye entsábe jubiacá, y chē inīye Ainá mo canīye águila tojtsongüēfjnacá. <sup>8</sup> Chē canta Ainēnga, cada ona chnēnguana juatēngmiáša enjanábomna, y tsoicajana y shjoicajana nyētsañe fšnēbēnga monjānbomna. Y chēnga nyēts tempo, ntjochnacá mēntšá monjānichamo:

¡Uamaná, Uamaná, Uamaná, Bēngbe Utabná,  
 Bēngbe Bētsá nyēts obenana bomná,

nda enjamná, endmēná y sempre echanjéftsemná ca!

<sup>9-10</sup> Chca chē Ainēnga Bēngbe Bētsá bētscá tmontanchuá, Bēngbe Bētsá chē uámana puestentše tbemaná, chē nyēts tempo y nyētsca tescama oyená. Chēnga puerte respeto chabiamana monjétsēbomna y bētscá tmontanchuá. Cada ora chēnga chca tmonjanma ora, chē uta bnētsana y canta bētsējémēnga amēndayēnga, chē uámana puestentše tbemanabe shecutšentše joshamentšiyana y chábioye jtsatschuanayana, chē coronēshangá chē natsanoica jutšananana, y mēntšá jtsichámuana:

<sup>11</sup> Aca nyēts mercedo condētsobuájoñe, Bēngbe Utabná y Bēngbe Bētsá,

entsānga chamotsinīyanīyana, aca puerte bētsá comnama, y chamotsichamo aca nyēts respeto buajoná comna, y nyēts obenana bomná comna ca,

er aca nyētsca soyēnga tcojama;

aca icnabóseyeca chē soyēnga yojtsemna y aca chca tcojanma ca.

## 5

*Chē uabemana uándmanana tsbuanácha y chē Oveshatema*

<sup>1</sup> Chē uámana puestentše enjésetbemanabe catšbioica cucuatšīne canīye uándmanana tsbuanáchanaca sēnjáninīye, y nyētsañe enjétsabemana tsoicajana y shjoicajana, y canīysēfta tsengáñe sellēngaca enjétsajandmanana. <sup>2</sup> Y canīye ángel puerte obenana bomná sēnjáninīye, y cha mēntšá enjétsayebuache: “¿Nda mercedo yobuájoña, quem uándmanana tsbuanácha jutēfjonama y chē sellēnga jutsēcama ca?”

<sup>3</sup> Pero, ni celoca, ni quem luarentše, ni quem luarentša jashenoye, ndocná quentšamēna obenánaca chē uándmanana tsbuanácha jutēfjonama, ni juinīyama. <sup>4</sup> Y atše puerte sēnjánenobošachna, er ndocná ntjónýnana mercedo buajoná chē uándmanana tsbuanácha chautēfjonama, ni chaurinīyama. <sup>5</sup> Pero canīya chē bētsējémēnguentšá šonjaniana: “Ndoñe más matenóbošachena; mouena, chē Judabe pamillentsá, León ca uabobainá, mando y obenana bētsēbomnama, chē rey Davidbentsana Entšá, tonjayējaná; cha entsobena chē uándmanana tsbuanácha jutēfjonama, y chē canīysēfta sellēnga jutsēcama ca.”

<sup>6</sup> Chora sēnjáninīye, chē uámana puesto y chē canta Ainēnga y chē bētsējémēngbe tsēntsaca, canīye Oveshatema tsanana, pero enjétsinīyana mo cuaftsobacá. Chē Oveshatema enjānbomna canīysēfta tsētjonēse y canīysēfta fšnēbé. Chē canīysēfta fšnēbé monjaninīyīyá chē Bēngbe



Bètsabe canyèsèfta espíritènga, chë Bèngbe Bètsá nÿets quem luarèjana tojánichamonga. <sup>7</sup> Chë Oveshatema tonjanobeconá y chë uándmanana tsbuanácha tonjanaca, chë uámana puestentše themanabe catsbioica cucuatšentšana; <sup>8</sup> y chabe cucuatšiñe tonjanaca ora, chë canta Ainènga y chë uta bnètsana y canta bètsèjémènga amèndayènga chë Oveshatembe shecuaatšentše tmonjanoshamentšé. Nÿetscanga monjètsètbèna arpagá y castellano cop-benga jútjena inciensiyea; chë copbenga inciensiyea enjamna chë Bèngbe Bètsabe entsanga tmojayana palabrènga, cháftaca jencuéntama ora. <sup>9</sup> Y quem tsëm canto montsancántaye:

Aca mercedo condètsobuájoñe, chë uándmanana tsbuanácha chacuacama y chë sellènga chacutsècama;

er acbe buiñe juabuáshanèse tconjanóbana, y chca enjamna mo crocénana cuafjètsajocá, Bèngbe Bètsabiana chamotsemnana,

entsanga nÿetsca cachca buiñe bomnènguentšana, nÿetsca biyana bomnènguentšana, nÿetsca canÿe entsanguentšana, y nÿetsca mándayèngbentša entsanguentšana.

<sup>10</sup> Aca tcojanga chènga chamotsobena ácaftaca jtsemádayama

y uámanènga chamotsemnana, Bèngbe Bètsábioye mo bachnangcá chamotseservénama, y quem luarentše chènga montsemánda ca —chènga monjètseversiaye.

<sup>11</sup> Y chca sènjétsonÿaye ora, mallajta angelèngbe oyebuambnayana sènjanuena, y chènga monjètsemna chë uámana puestentše, chë Ainènga y chë bètsèjémènga amèndayèngbe shèconana. Nÿetsá bètscá angelènga monjètsemna, corente mallajta; <sup>12</sup> y chènga mèntšá monjètsayebuache:

¡Chë Oveshatema cuafjobacá endmèná,

mercedo endètsobuájoñe, nÿets obenana, nÿets bomnana,

nÿets osertánana y nÿets añemo chaotsebomnana,

y entsanga chabiana chamotsichamo cha nÿets respeto buajoná yomna ca,

y chamotsinÿanÿama cha puerte bètsá y uamaná yomnana,

y nÿetscanga chamotsatschuanama ca! —chènga monjètsayebuache.

<sup>13</sup> Y sènjanuena, lempe ntšamo Bèngbe Bètsá tojanmcá aina soyènga, celoca, quem luarèntše, quem luarentša jashenoye y chë mar béjayoca, chèngnaca mèntšá monjètsichamo:

¡Chë uámana puestentše themanábioye y chë Oveshatema nÿetscanga nÿets tempo y nÿetsca tescama chamótsatcheuanaye

y chamotsichamo chata puerte uámanata y nÿets respeto buajonata ibomna ca,

y chamotsinÿanÿná chata puerte bètsètsata y obenata bètsemnana ca!

<sup>14</sup> Y chë canta Ainèngna monjètsichamo: “Chca chaotsemna ca.” Y chë bètsèjémènga amèndayèngna tmonjanoshamentšé y chátbioye monjètsatcheuanaye.

## 6

### *Chë Oveshatema chë canyèsèfta sellènga tonjanètsécá*

<sup>1</sup> Chentšana más sènjáninÿe; chë Oveshatema chë canyèsèftentšana natsana sello tonjanètsécá ora, sènjanuena canÿa chë canta Ainènguentšana puerte jabuache, mo cuafjajouescá, mèntšá enjètsichamo: “¡Mabo ca!” <sup>2</sup> Sènjánrepará y sènjáninÿe canÿe fjtante couaye, y chábeñe enjetsenjaquená canÿe arquèja enjètsatbèna. Chábioye canÿe coronèsha tmonjaninÿe, y mo canÿe ayèñjanayacá tonjèftsanbocna, y cabá más jatsyèñjanámna.

<sup>3</sup> Chë Oveshatema chë inÿe sello tonjanètsécá ora, sènjanuena chë inÿa chë canta Ainènguentšana mèntšá enjètsichamo: “¡Mabo ca!” <sup>4</sup> Y inÿe couaye tonjánbocna, canÿe buanganá; y chë enjetsenjaquená obenana tonjanóyèngacñe jamama chë fshantsentša natjèmbana vida chaotsoepochocama, entsanga chamotsenóbama; y canÿe bèts espadèja tmonjanoyé.

<sup>5</sup> Chë Oveshatema chë inÿe sello tonjanètsécá ora, sènjanuena chë inÿa chë canta Ainènguentšana mèntšá enjètsichamo: “¡Mabo ca!” Sèñjanontjèšé y canÿe ftsenga couaye sènjáninÿe, y chë enjetsenjaquená canÿe romanèsha enjètsètbèna. <sup>6</sup> Y chë canta Ainèngbeñe canÿe oyebuambnayana mèntšá sènjanuena: “Nÿe canÿe kilo trigo canÿe tesca trabajuama, y unga kilo cebadá canÿe tesca trabajuama; pero chë aceitíye y chë vínoyna ndoñe cattsepochoçaye ca.”

<sup>7</sup> Chë Oveshatema chë inÿe sello tonjanètsécá ora, chë ústonoca Ainá enjètsichamo: “¡Mabo ca!” <sup>8</sup> Sèñjanontjèšé y canÿe shatsèsiye couaye sènjáninÿe; chë enjetsenjaquená Obanana ca enjanabaina, y stètsioica bonjètsèstona canÿa, Obanènga imomna luare ca uabainá; y chátbioye obenana tmonjanatšatá cántañentšana cánÿentše quem luarèntše jtsepochoçama, chentša entsanga jtsepochoçase, entsanga tmojtsentsjanama, bèts shèntsánèngaca, šocanèngaca y quem luarentša tsátjaye bayèngaca.

<sup>9</sup> Chë inÿe sello tonjanètsécá ora, sènjáninÿe chë altarentša tajsoye chë tmojanóbanèngbe espíritènga, chë Bèngbe Bètsabe palabra entsanga abuaiynayama tmojanóbanènga. <sup>10</sup> Chora

chënga tmonjanontsé tša uayebuáchana: “Uamaná y ntšamo tojašebuachenacá lempe amá bëngbe Nduiño, ¿ntseco quem luarentša entšangbiana cochjayana ndoñe tšabá tmonjama, y chë bëngbioye obanayama cochjácastigaye ca?” <sup>11</sup> Chentšana nyetscángbioye uafjantse entsáyá tmonjaníyey y tmonjanéyana batsatema más chamobatmá ca, chë cachëngcá Cristbeyeca catšátanga y oservénënga, chë cachëngcá mochjanóbanënga, nyetscanga choca chamojtsemnëntscuana.

<sup>12</sup> Y más sënjáninýe; chë inýe sello cha tonjanëtsécá ora, jabuache fshantse tontsanangmëmmana; shinýe tontsanftšénganga, mo chë obaná tojtsemnama juichëtjuama entsáyacá, y nyets juashcona mo buiñcá enjétsinýna, <sup>13</sup> y estrellatémënga celocana fshantsoye tontsantquécjana, mo canýe higo betiye jabuache binýiaca tojtseshatiyeyna ora, chë nguëfshna higuëbenga cuafjatquécjancá. <sup>14</sup> Y celoca luare tontsanenatjëmba mo canýe tsbuanácha cuafjuandmanacá, y nyetsca tjañe y béjayoca fshantsënga, chë ndayentšë enjamnentšana tontsanojuaná; <sup>15</sup> y nyetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nyetscanga chë nyets tempo nýe inýabiana oservénënga y chë cachëngbiana trabájayëngnaca, chë cuevëshënguiñe y bëts ndëtsbenguenache tjañe tmonsantóitana; <sup>16</sup> y chë tjañëngoye y chë ndëtsbengoye montsanichamo: “¡Bëngbioye šmotsëtebuantsá y šmotsaitame, chë uámana puestentšë themanabe bominyëntšana, y chë Oveshatembe uabouana castigo, cha béngaftaca tbojetnama, bëngbeñe ndoñe chaondëtsemnama! <sup>17</sup> Er chë uachuana te chabe castigo jtsebinýnama te tojóshjango; y mora ¿nda nanjobenaye chë sóyeca ndoñe chamondëtsepochochocama ca?” —chënga montsanichamo.

## 7

*Chë Bëngbe Bëtsábioye oservénënga chë uabouana castigüentšana mochántsatsebacana*

<sup>1</sup> Chca tonjanopasá chentšana, canta angelënga sënjánanýe, monjétsatsana chë quem luarentša canta opochócayenache; chënga ndoñe quemënjatanleséncia chë canta binýiënga jtsebinýnama, ndoñe chaondëtsebinýiayama, ni fshantsentšë, ni mar béjayoca, ni ndocna betiyeshënguiñe. <sup>2</sup> Inýe ángelnaca sënjáninýe, shinýe bocana luaroicana enjestsabó, y chë Bëngbe Bëtsá Ainabe selló enjétsiyëboye. Chë ángelna chë inýe canta angelëngbioye, ndëmuanyëngbioye obenana tmojanatšatá chë fshantsentšë y mar béjayoca lempe jtsepochochocama, chëngbioye jabuache tonjánabachembo: <sup>3</sup> “¡Tondaye šmatjapochóca, ni fshantsoca, ni mar béjayoca, ni betiyeshënguiñe, chë Bëngbe Bëtsabiana oservénëngbioye chë sélloca juentsaca fchayauinýnanantscuana, ndoñe chamondëtsepochochocama ca!”

<sup>4</sup> Y sënjanuena buétanga chë sélloca tmojánauinýnanayama: canýe patse, canta bnëtsana y canta uaranga entšanga uinýnanánënga nyetsca Israeloquentša bëts pamillanguentšana.

<sup>5</sup> Judabe pamillentšana, bnëtsana uta uaranga uinýnanánënga;

Rubenbe pamillentšana, bnëtsana uta uaranga;

Gadbe pamillentšana, bnëtsana uta uaranga;

<sup>6</sup> Aserbe pamillentšana, bnëtsana uta uaranga;

Neftalibe pamillentšana, bnëtsana uta uaranga;

Manasesbe pamillentšana, bnëtsana uta uaranga;

<sup>7</sup> Simeonbe pamillentšana, bnëtsana uta uaranga;

Levibe pamillentšana, bnëtsana uta uaranga;

Isacarbe pamillentšana, bnëtsana uta uaranga;

<sup>8</sup> Zabulonbe pamillentšana, bnëtsana uta uaranga;

Josebe pamillentšana, bnëtsana uta uaranga;

y Benjaminbe pamillentšana, bnëtsana uta uaranga entšanga.

*Chë mallajta entšanga uafjantsëjuangá uichëtjonënga*

<sup>9</sup> Chentšana, sënjanrrepará y mallajta entšanga sënjánanýe, ndocná quentaisobenaye jacúntana, nyetsca mándayënguentšana, nyetsca cachca buiñe bomnënguentšana, nyetsca canýe entšanguentšana, y nyetsca biyana bomnënguentšana; chënga monjétsatsana chë uámana puesto chë Oveshatembe natsanentšë, uafjantsëjuangá uichëtjonënga y ramëshangá monjétsëtbëna. <sup>10</sup> Nyetscanga tša monjétsayebuache:

¡Bënga atsebacayana endobá, Bëngbe Bëtsá,

chë uámana puestentšë entsetbemanábentšana,

y chë Oveshatémbentšana ca!

<sup>11</sup> Y nyetsca angelënga, chë uámana puesto y chë bëtsëjëmënga amëndayënga y chë canta ainëngbe shëconana monjétsatsanënga, chë uámana puestentšana natsanoica tmonjanoshamentšë, fshantsóntscoñe jotsjëbnase, y Bëngbe Bëtsá tmonjanadorá, <sup>12</sup> mëntšá jayanëse:

¡Chca chaotsemna!

Bèngbe Bètsábioye nÿets tempo y nÿetsca tescama chamotsadorana

y nÿets ainánaca cha chamotsatschuaná.

Entsanga chamotsinÿanÿná cha puerte bètsá y uamaná bétsemnama;

cha endmèna nÿets osertánana bomná, y nÿets respeto buajoná, y nÿets obenana y añemo bomná.

¡Chca chaotsemna ca! —chènga monjétsichamo.

<sup>13</sup> Chentsana, canÿa chë bètsèjemènguentzá tonjanoyebuambá y ñonjantjá: “¿Ndèmuanyenga imomna chë uafjantsèjuangá uichètjonènga, y ndémocana tmojabo cá?”

<sup>14</sup> “Taita, aca chèngbiana cotátsèmbo ca” —atše sënjanjá.

Y cha ñonjanianya: “Chènga montsemna chë jabuache ngmenènguentšana tsábá tmojabocanènga; chë Oveshatema chèngbiana tojóbana y chèngbe bacna soyèngama perdonánènga montsemna; chèngbe uichètjonèjuangá tmojtsaboshabé y chë Oveshatembe buiñeca tmojtabofjanté.

<sup>15</sup> Chíyeca chènga chë Bèngbe Bètsabe uámana puestentša natsanoica montsemna,

y chábioye nÿets tempo chabe delante mondèservena,

y chë uámana puestentše entsetbemaná,

chèngbenache jtsemnése, chènga echántsanyèna, mo cuafjutsebotscá.

<sup>16</sup> Ya ndoñe más shèntsana, ni uajuendayana quemochátsbomna;

shinÿama, ni yapa jènÿama ya ndoñe más quemochátsufrina;

<sup>17</sup> er chë Oveshatema, chë uámana puestentša natsana tsèntsaca entsemná,

chèngbioye mo oveshèngcá echantsabuajèñya,

y echanjunatse béjaye vida bomniye yóbocana luaroye,

y Bèngbe Bètsá echanjama ya ndoñe más ngménana chamondètsebomnama ca” —cha ñonjanjá.

## 8

### *Chë ústonoca sello*

<sup>1</sup> Chë Oveshatema chë uándmanana tsbuanáchañe chë ústonoca sello tonjanètsécá ora, celoca ndocá quentétsènèna mo tsèntsa hora nÿetsá.

<sup>2</sup> Chora sënjanianÿe chë canÿsèfta angelènga, chë Bèngbe Bètsabe delante monjétsatsanènga; chèngbioye canÿsèfta trompetèfjuangá tmonjanianÿe.

<sup>3</sup> Chentsana inÿe ángel tonjánashjango, canÿe castellano mathbètémaca incienso jajuinÿiyama, y altar natsanoica tonjantsá; chábioye bètscá incienso tmonjanoyé chaojuinÿema chë castellano altaroca, chë uámana tbemana natsanoica enjèsemnoca. Chë ángel incienso tonjanjuinÿé Bèngbe Utabná jètschuayama, cánÿiñe nÿetsca chë Bèngbe Bètsabe entsanga tmojoyebuambá palabrèngaca, cháftaca jencuéntama ora. <sup>4</sup> Y chë incienso juinÿnentsá ngona, chë ángelbe cucuatèntšana Bèngbe Bètsabe delante tonjanótsjua, cánÿiñe chë Bèngbe Bètsabe entsanga cháftaca jencuéntama palabrèngaca. <sup>5</sup> Chentsana chë ángel chë incienso jajuinÿiyama mathbètéma tonjanca, chë altarentša chebánbengaca tonjanajutjé, y quem luaroye tonjanètsana. Chora enjèsemna tša juesasanana, corente shauenanana, bètscá tcuinÿènga, y quem luare tontsanangmèmana.

### *Chë trompetèfjuangá*

<sup>6</sup> Chora chë canÿsèfta angelènga, chë canÿsèfta trompetèfjua uabomnènga, tmonjanoprontá chëfjuangá juajatètama.

<sup>7</sup> Chë natsana ángel chabe trompetèfjua tonjanájetèto, y quem luaroye tmonjanètsana bèntstá y iñeshe, cánÿiñe buiñeca. Ungañentsana cánÿentse quem luarentse tontsanjuinÿe, úngañentsana cánÿentse betiyeshènguiñe y nÿetsca nguèfshna shacuanènguiñnaca.

<sup>8</sup> Chë inÿe ángel chabe trompetèfjua tonjanájetèto, y chora chë mar béjaye tmonjanètsana canÿe soye mo canÿe bèts tjañe tojtsangbototjuancá, y chë mar béjayiñe úngañentsana cánÿentse buiñe tontsanóbema. <sup>9</sup> Chë mar béjayiñe vida imobomnèngbeñe úngañentsana cánÿentse tontsanopochocá, y chë barquènguentšnaca úngañentsana cánÿentse.

<sup>10</sup> Chentsana chë inÿe ángel chabe trompetèfjua tonjanájetèto, y canÿe bèts estrella, mo canÿe uajuinÿanèshacá enjètsangbototjuana, celocana tonjanótsatše chë úngañentsana cánÿentse béjayènguiñe, y béjaye óbocanache. <sup>11</sup> Chë estrella enjanabaina Untjana ca; y chë úngañentsana cánÿentse buyeshènguiñe untjiye tontsanóbema, y chë untja búyeshe causa ba entsanga tmonjanóbana.

<sup>12</sup> Chë inÿe ángel chabe trompetèfjua tonjanájetèto, y chora tontsanóndbema chë úngañentsana cánÿentse shinÿiñe, y chë úngañentsana cánÿentse juashconiñe y chë estrellènguiñnaca. Chca, nÿetsca chentsá úngañentsana cánÿentse ibetiñe tonjanoquedá, y chë

causa ndoñe quemëntétebebinñaye posufta horéntscuana, bnèté canta hora y ibeta canta hora.

<sup>13</sup> Chentsana, sënjanrrepará y sënjanuena canye águila, tsbanánoca celoca enjetsongüefná, jabuache mëntśá enjétsichamo: “Tśa lastema, tśa lastema, tśa lastema quem luarentśa entsangbiama, chë inñe trompetéfuangá chë inñe unga angelénga chamojuátjêto ora ca!”

## 9

<sup>1</sup> Chentsana chë inñe ángel chabe trompetéfuja tonjanájetêto, y sënjáninñe canye ángel quem luaroye jastjanguana y enjétsinña mo canye estrella celocana quem luaroye cuaftsotsatsancá; y moye tonjánashjango ora, tmonjanoyé chë uabouana tboca atéfñentśa llayéftja. <sup>2</sup> Chë uabouana tboca atéfñentśe tonjánatêfjo, y chentsana becá nгона tonjanótsjua, mo bëtš hornentśa ngoncá; y chë uabouana tboye atéfñentśe nгона causa shinñe tontsanibétata y nyets celoca ena nгона enjésemna. <sup>3</sup> Chë ngonentsana ba tsátjaye chapulinga tmonjánbocana, y nyets quem fshantséjána tmonjánashana; y chëngbiroye obenana tmonjanatśatá, chánaca jándbemama, mo chë juetjuama alacranbe obenaná. <sup>4</sup> Chëngbiroye tmonjanamëndá tondaye ntjándbemana chë shacuanëngüiñe, ni ndocna nguëfshna matëngüiñe, ni ndocna betiyeshiñe; nye chë juentsaca chë Bëngbe Bëtšabe sëlloca nduinñyanana entsangna aífne. <sup>5</sup> Pero ndoñe chematanalesenciá entsangbiroye jobáyana, ndayá nye jamama chënga shachna shinñentscuana tsetśanana chamotsebonnama; y chë chënga monjánama chamotsebonnama tsetśanana enjamna mo canye alacranbe uetjoniñcá.

<sup>6</sup> Chca tempo chaojtsemna ora, entsanga mochántseguaye ntśamo jtsóbanama, chë tsetśanënga jauántama ndoñe quemochátobena causa, pero ndoñe quemochátinñena ntśamo jamëse jtsóbanama; y masque tśa mochántseboše jobanama, chora chëngaftaca ndoñe chca queochatopása, mo jobanama ndoñe tmontsobencá.

<sup>7</sup> Chë tsátjaye chapulinga monjétsinña mo couayëncá prontánënga jama entsangaftaca jétsjama; chëngbe bestśašñe monjánabomna mo castellano coronëshangacá, y chëngbe jubíá enjamna mo entsabe jubiacá. <sup>8</sup> Stjënashë monjánabomna mo shembásabe stjënashacá; y chëngbe juatsašënga mo leonbe juatsašëncá. <sup>9</sup> Chëngbe cuerpënga jenëuyanama cochaca monjánabomna morocho soyënga, mo hierro soyëncá, y chëngbe juatëngmiashangá tmojtšabonjá ora, chë shauenanana bëtšca enjamna, mo ba cochëshangá couayënga cuaftsasjojnacá, chë inñyengaftaca jétsjama tmojétsátjajo ora tojtšeshauenancá. <sup>10</sup> Chënga monjánabomna mo alacranbe uascuatšëjuacá, ba uetotjéftjagaca, y chë uascuatšëjuaca obenana monjánabomna shachna shinñentscuana entsanga mal chamotsepasama. <sup>11</sup> Chë tsátjaye chapulinga canye amëdayá monjánabomna, chë uabouana tboca mándaye ángel; hebreo biyaña cha uabainá Abadón ca y griegüiña Apolión o pochocayá ca.

<sup>12</sup> Chë natsana pochócayana ya tocjochnëngo, pero más chcoyë cabá inñe uta soye más pochócayana cachcá echántsemna.

<sup>13</sup> Chentsana chë inñe ángel chabe trompetéfuja tonjanájetêto, y canye oyebuambnayana sënjanuena, chë Bëngbe Bëtšabe delante enjésemna castellano altarentśa juatsboica lado sibienache obocanentsana enjétsobocana. <sup>14</sup> Y chë oyebuambnayana, chë trompetéfuja tonjanájetêto y enjétsétbëna ángelbiroye tbonjanianana: “Chë canta angelénga chë Eufrates bëtš fshájaye tsachoca utsbuanënga mëjafjoná ca.” <sup>15</sup> Y chë canta angelénga tmonjanëjafjoná; y nya chë ora, chë te, chë shinñe y chë uatama chëngbiroye tmojanaprontá, chë quem luarentśa entsangbëñe ünğañentsana cánñentsënga jtsëbáyama. <sup>16</sup> Atśe sënjanuena buëtanga imojamna chë angelëngaftaca tmojáná soldadënga, couayëngüiñe: uta patse millonënga ca.

<sup>17</sup> Mëntśá sënjánanñe mo tñenayoquëcá chë couayënga y chë chëngbëñe enjaquenënga: Chë enjaquenënga monjánabomna morocho soyënga cochaca, jenëuyanama, y chë soye buanganana enjáninñya, mo iñcá, y fchendana mo chë uámama ndëtšbé jacintcá y tsësiyana inñnana mo azufrcá; y chë couayënga monjánabomna mo leonbe bestśašcá, y chëngbe uayoicana enjétsobocana iñe, nгона y azufrana. <sup>18</sup> Y chë ünğañentsana cánñentsë entsanga tmonjanóbana quem unga uabouana pochócayë soyëngaca, chë couayëngbe uayoicana enjétsobocanana: iñe, nгона y azufrana. <sup>19</sup> Er chëngbe obenana entsanga japochócama monjánabomna uayáshañe y uascuatšëjuañe; er chëngbe uascuatšëjua enjuamna mo mëtscuayëncá, bestśašëngaca, y chëjuanga causa entsanga mal montsanpásaye.

<sup>20</sup> Pero chë inñe entsanga, chë uabouana pochócayë soyëngaca ndoñe tmonjanopochocanga, juabna ndoñe chematantrócá, y ndoñe chematanajbaná amana chë bacna soyënga ntśamo monjanamcá; ndoñe chematanajbaná adórayana chë bacna bayëjënga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtšbé y niñëbé soyënga; y chca soyënga ndoñe quemënjatobena ni jinñyama, ni jounama, ni jtsanama. <sup>21</sup> Juabna ndoñe chematantrócá y

ndoñe chematanajbaná entšanga obanayana, encjuanayana, bacna soyënga boyabása o shembásaftaca jtsamëse oyenana, ni atbëbanana.

## 10

*Chë ángel base uándmanana tsbuanáchaca*

<sup>1</sup> Chentsana sënjaninýe inýe ángel, puerte obenana bomná; celocana enjétsastjajuana, y chabe shëconana canýe jantšetése enjëtsemna; chabe bestšase tatsétsacá canýe tséfcuacuatjo. Chabe jubíá shinýcá enjëtsebuashinýinýana, y chabe shecuatšënga mo úcuatjona niñëbenga cuaftsoiñcá. <sup>2</sup> Chabe cucuatšifne enjétsëtbená canýe base uándmanana y utëfjna tsbuanáchaca. Chabe catšbioica shecuátšëca chë mar béjayoca tonjantsá, y chë uañicuayóicatšëca, quem fshantsentše. <sup>3</sup> Y jabuache tonjanoyó, mo canýe león cuaftseyocá; y tonjanoyó ora, canýsëfta juesasanentsá jabuache shauenanana sënjanuena. <sup>4</sup> Chë canýsëfta juesasana chca tmonjanoyebuambá ora, atšë sënjanoprontá ntšamo chënga tmonjanayancá juabemama; pero canýe oyeubuambnayana celocana sënjanuena, mëntšá šonjétsatsaye: “Nýe aca cochtsójuabnañe ntšamo chë canýsëfta juesasana tmonjayancá, ndocnábioye catjauyana, y chë soye ndoñe catjuábema ca.”

<sup>5</sup> Chora chë ángel, chë mar béjayoca y quem fshantsentše atsaná sënjaninýá, chabe catšbioica cucuatšë celoye tonjanatsbaná,<sup>6</sup> y tonjanjurá Bëngbe Bëtsabiamá, chë nýets tempo y nýetsca tescama oyenabiamá, chë celoca, quem luare, chë mar béjayoca, y lempe chë luarënguñe yobinýncá tojanmabiamá. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojašëbuachenacá,<sup>7</sup> er chë tempo chaojóshjango, chë ústonoye ángel chabe trompetšfjua juajatëtama chaojontšé ora, chora ya echanjochnëngo ntšamo Bëngbe Bëtsá jamama yajuabnacá; chë soye nýetsca entšángbioye cha ndoñe chenatinýanýé, ntšamo tempo cha chabe oservénëngbioye, chë chabe juabna oyeubuambnayëngbioye tojanabuayenacá ca” —cha tonjánayana.

<sup>8</sup> Chë atšë sënjanuena oyeubuambnayana celocana enjétsobocanana, cachiñe šonjanatsëtsá y šonjanayana: “Motsa y mauaca chë mar béjayoca y quem luarentše ángel entsemnabe catšbioica cucuatšifne base uándmanana y utëfjna tsbuanáchaca ca.”

<sup>9</sup> As atšë chë ángelbioye sënjáná; chë base uándmanana tsbuanáchaca chašuíyema sënjanianá, y cha šonjanjuá: “Quemécha, motsásañe. Ace uayoye uamesquénëcha mo tjuangbe meloycá echántsamna, pero ace uafsbioyna puerte uauntjëcha echantsábema ca.”

<sup>10</sup> As chë base uándmanana tsbuanáchaca chë ángelbe cucuatšentsána sënjanaca, y séntsanásañe; y atšbe uayoye meloycá enjétsamna, pero sënjanabmuaná y atšbe uafsbioyna puerte uauntjëcha tontsanábema. <sup>11</sup> Chora šmonjanianá: “Aca cmontsemna cachiñe jtëtabuayenana, ntšamo Bëngbe Bëtsá tojayancá chë ntšamo yochjopásama, ba canýe luarentša entšángaftaca, ba mándayëngbentsá entšángaftaca, ba biyana bomna entšanguentšëngaftaca y quem luarentša reyëngaftaca ca.”

## 11

*Chë útata Bëngbe Bëtsabe juabna oyeubuambnayata*

<sup>1</sup> Chentsana canýe medídaye niñëfja šmonjanoyé, mo jatšëmbonëfjácá, y šmonjanianá: “Motsa y Bëngbe Bëtsabe bëts yebna y chentsá altar cochjamedída, y cochjácutayé bueta entšanga chentše Bëngbe Bëtsábioye imojtsadorana. <sup>2</sup> Pero chë Bëngbe Bëtsabe yebnentše más shjoica luarna cacchá cochjonýaye, ndoñe catjamedída, er chiñe chë ndoñe judiëngbiamá endmëna; y chënga, chë uamana ca uabna bëts pueblama, canta bnëtsana y uta shinýëntscuana soyënga mochántsama chiñe jtsepochócama, mo cuaftsebotajncá. <sup>3</sup> Pero atšë, útata atšbiamá tatšëmbuata y oyeubuambnayata chanjichamuá atšbe cuenta entšángbioye jábuayenama, canýe uaranga y uta patse y chnënguana bnëtsana tentscuana. Chatna uajojësha entšayangá uichëtjonata bochántsemna, chca, ngmena bomnama jinýanýiyama ca” —chata tbonjánayana.

<sup>4</sup> Quem útata atšbiamá tatšëmbuata y oyeubuambnayata bontsinýinýena chë uta olivos betiyela y chë uta candelërëseca, ntšamo Bëngbe Bëtsá, chë quem luarentše mandayabe delante endmëncá. <sup>5</sup> Nderado nda tojtseboše chatbiamá bacna soye jamama, ndoñe quentatobenaye ntšámna jáborlana, er uayoicana iñeshe nanjóbočna y chë uayayëngbioye nantsapochócayé; nderado nda tojábóšena chatbiamá bacna soye jamama, cacchá cha buántsemna jóbana. <sup>6</sup> Chë útata obenana bondbomna celoca jtsachtama, ndoñe chaonduaftema, entšángbioye Bëngbe Bëtsabiamá chabojsabuayinýa tese; obenana béjayënga buñe jtsebiámama, y jamama quem luarentše chaotsóndbemama, nýetscna pochócayé soyëngaca, bueta sóynaca ntšamo chata tbojtseboščá.

<sup>7</sup> Pero ntšamo Bëngbe Bëtsabiamá ibotatšëmbcá entšángbioye jábuayenama chata chabojapochócá ora, chë uabouana bayá, chë corente bëts thóicana chaojabocná, chátbioye

echántsatsjaye, echantsayénjaná y echantsébaye. <sup>8</sup> Y chatbe óbana cuerpo, chë corente bêts pueblentsá tsáshenañe echanjoquéda, chë chatbe Utabná tmojanrucificá luarentse, y chë bêts pueblo inyétšá juabáyama nántsemna mo chë Sodoma y Egiptó luaroycá. Chentše endmëna mo chë bêts pueblënga Sodoma y Egiptcá, er chentše chë entsanga yapa bacna soyënga jtsamana. <sup>9</sup> Y unga y tsëntsá tentscuana, chë obanathe cuerpo mochantsonyaye, nyetsca canye luarentsa entsanga, nyetsca cachca buiñe bomna entsanga, ba biyana bomna entsanguentsana y ba mándayëngbentsá entsanga; ndoñe quenátslesenciana chata jutabuantsama. <sup>10</sup> Chata bochjóbanama, quem luarentse oyenënga mochanjóyejuaye; tša oyejuayënga mochántsemnama, ndayánaca mochanjénatsëtaye, er ntsamo chë Bëngbe Bëtsabe juabna oyebuambnayata tbojanayancá, tojanma quem luarentse oyenënga puerte chamofrima.

<sup>11</sup> Pero chë unga y tsëntsá te tonjanochnëngo ora, Bëngbe Bëtsá tonjanma chë obanata chábuatayenama; chentšana tfontantsata, y chë monjétsantješnënga tša uatjana tonjanëbuache. <sup>12</sup> Chora canye jabuache oyebuambnayana tbonjanuena, celocana mëntsá enjétsëtsësnaye: “Moye mašënguata ca.” Y chatna canye jantšetëshiñe tbonjántsjua, y chatbe uayayënga chca monjétsónyaye. <sup>13</sup> Cachora quem fshantse jabuache tontsanangmëmana, y chë bêts pueblentsé bnëtsanentsana cányëntše tontsanáshajaye, y canyšëfta uaranga entsanga tmonjanóbana. Chë ainënga tmonjanoquedanga, tša auatjánánënga, chë celoca Bëngbe Bëtsábioye montsanadorana.

<sup>14</sup> Chë inye uabouana soye quem luare japochócama, mora tocjochnëngo, pero betscó chë ústonoye uabouana pochócaye soye echanjóshjango!

#### *Chë ústonoye ángelbe trompetëfjua*

<sup>15</sup> Chë ústonoye ángel chabe trompetëfjua tonjanátjëto ora, celoca tša monjétsayebuache, mëntsá monjétsichamo:

Ora tocbuache, Bëngbe Utabná y chabe Uámana Uabuayaná Jesucristbe amëndayana quem luarentse chaotsemnama,

y chë amëndayana echántsemna nyets tempo y nyetsca tescama ca.

<sup>16</sup> Y chë uta bnëtsana y canta bëtšëjmënga amëndayënga, chë chëngbe uámana puestiñe Bëngbe Bëtsabe delante monjétsëbiamanënga, tmonjanoshamentšé, fshantsóntscoñe jotsejbnase, y Bëngbe Bëtsá tmonjanadorá, <sup>17</sup> mëntsá jayanëse:

Bëngbe Útabná, Bëngbe Bëtsá nyets obenana bomná, aca chë mora cha condmëná y chë tempo cha conjanná cbontsatschuaná, er nya mora acbe bëtš obenánaca soyënga cochjama, acbe amëndayana jontšama.

<sup>18</sup> Ba luarentšá entsanga ácaftaca tmonjanotšatjayená; pero chëngaftaca cmojetnama chë uabouana castigo jtsebínýnama te tocjóshjango, chë tempo tmojanóbánëngbiama jayanama tsábá o ndoñe tsábá tmonjétsëmama.

Tonjóshjango chë hora, uacanána jtatsatayama chë acbiama oservëngbiyoye, chë acbe juabna oyebuambnayëngbiyoye, chë acbe entsángbiyoye, y chë acbe uabaina nyetscangbiama más bëtš uabainana yomnama juabnayëngbiyoye, uámanënga y nduámanënga;

y chë tempo tonjóshjango, quem luare pochocayënga jtsapochócayama ca —chënga tmonjánayana.

<sup>19</sup> Chora, Bëngbe Bëtsabe bëtš yebna celoca tonjantëfjo, y choye enjétsëbinýna chë cajontema, ndayëtëma yojaninýanýná ntsamo Bëngbe Bëtsá chabe entsángbiyoye tojanašëbuachenacá; y chora enjétsëmna tcuinýënga, tša shauenanana, juesasanana, quem fshantse tontsanangmëmana y bëtscá bëntstá tonjantquécjana.

## 12

#### *Chë shembása y chë uabouana bayá*

<sup>1</sup> Chentšana, canye bëtš soye celoca tonjanonýná entsanga canye soye jinýanýiyama: canye shembása, shinýe mo chabe uichëtjoniácá, juashcona chabe shecuatšentšá tajsoye, y chabe bestšašifñe canye coronésha bnëtsana uta estrellëngaca. <sup>2</sup> Chë shembása ngomaná enjétsëmna, y chë šësona jónýnama yojétsobecuama jabuache enjétsëyoye, chë šësona jónýnama cha puerte jasúfriama ibojamna causa. <sup>3</sup> Y chora inye bëtš soye celoca tonjanonýná, entsanga inye soye jinýanýiyama: canye uabouana dragón buanganá, canyšëfta bestšašëngaca y bnëtsana tsëtjonëšëngaca y chë bestšašënguiñe enjanábomna canyšëfta coronëshangá. <sup>4</sup> Chabe uascuatšëjuaca úngañentsana cányëntše chë estrellatëmënga celocana tontsansojó, y quem fshantsoye chëtëmënga tontsanëtsana. Y chë dragón chë šësona jtsebomnama shembásabe delante tonjantsá, chë šësonatëmbyoye jtsósañama, cha tojonýná ora. <sup>5</sup> Chora chë shembása canye šësona boyabásetema bontsanbomna, nda nyets luarenache entsángbiyoye yochtsamëndaye mo canye hierro varëfjaquécá. Pero chë šësona

chábentsana tmonsanjuaná y Bèngbe Bètsábioye, chabe uamana puestoye tmonsanámbaife. <sup>6</sup> Chè shembásana entsanga ndoyena luaroye tontsanachá, Bèngbe Bètsá canye luare ibojabopróna choye, chentse saná chamocaredadoma, canye uaranga y uta patse y chnènguana bnètsana tentscuana.

<sup>7</sup> Chentšana celoca canye entsjanayana enjètsemna: Miguel, chè angelèngbe amëndayá, y chabe angelènga chè dragónaftaca monjétsentsjanaye. Chè dragón y chabe angelènga monjétsatsjanaye, <sup>8</sup> pero ndoñe chematanobená jáyèñjanama, y chèngbiana y ndoñe más luare celoca quentètsemna. <sup>9</sup> Chcase, chè uabouana dragón chocana tmontanábocna, chè tempsca mètscuaye, chè Diablo y Satanás ca uabainá, y chè bètsá entsángbioye aingñayá; quem fshantsoye cha tmonsantsatse, y chè cha yojanamènda angelèngnaca.

<sup>10</sup> Chora canye jabuache oyebuambnayana celoca sèñjanuena, mèntšá enjétsichamo:

Chè Bèngbe Bètsá entsanga játsebacama tempo ya tonjóshjango.

Mora Bèngbe Bètsá echanjñyanñiye chabe obenana y mándayana,

y chabe Uamana Uabuayaná Jesucristbe obenana jtsemándayama;

er chè Cristbe delante bèngbe catsátanga mal aquedayá ya tmontábocna,

nda nyets tempo Bèngbe Bètsabe delante mal enjaquedayá.

<sup>11</sup> Bèngbe catsátanga cha tmonjayèñjaná,

er Cristo, chè mo tmojóba Oveshatemcá, Bèngbe Bètsá bacna soyèngama entsanga cháuperdonama,

tonjanóbana, chabe buñe juabuáshanese,

y chè ndegombre soyèngama chènga monjanóyebuambnáyeca;

er chèngbe vida chèngbiana ndoñe quenjatámama;

Jesucristo jaserviama jóbanama chènga monjanprontana.

<sup>12</sup> ¡Chcasna, celoca corente oyejuayana chaotsemna,

y tsèngaftanga chè choca oyenèngbeñnaca!

¡Pero tša lastema chè fshantsoca y mar bėjayoca oyenèngbiana,

er chè diablo tsèngaftangbioye tonjástjango, corente tšatjayá,

er cha entetátšëmbo ya nye batšá yojtsábojamna chè chábioye mochjacastígama ca! — enjétsichamo.

<sup>13</sup> Chè dragón quem fshantsoye tmojtsantsatsama tonjáninye ora, chè šešona boyabásetema tbonjanèshjango shembásabioye tbonsanacmé. <sup>14</sup> Pero uta juatèngmiásha, chè bèts aguillbeshá, chè shembásabioye tmonjaninye, chabiana tmojanprontá luaroye chaongüefjoma, entsanga ndoyena luaroca, chè dragónbentsana bènoca; y chentse enjamna chè shembásabioye saná chamuájuatsema, unga y tsèntsa uatèntscuana. <sup>15</sup> Chora chè dragón, chabe uayoicana bèts bėjaye tonjanbuashètjo chè shembásabe stètsioca, chaouama y chabotsambama; <sup>16</sup> pero quem fshantse chè shembásabioye tbonjanájabuache, er chè fshantse mo uayašacá tonjantèfjo, y chè dragonbe uayoicana bėjaye obocniye tontsanobmuánañe. <sup>17</sup> Y chè dragón chè shembásabioye tondaye jamana chenatanobená causa, corente cacháftaca tbonjanetna, y tonjána chè ínnyenga, chè shembásabe basengcá mondmenènga játsjayama, ntsamo Bèngbe Bètsá yomandacá imobedecèñnga, y ntsamo Jesucristo tonjanabuayená ndegombre soyèngaca sempre imoyenènga. <sup>18</sup> Y chè dragón chè mar bėjaye tsachañe tonjantsá.

## 13

*Chè dragón tonjanma, chè mar bėjayoca uabouana bayá chabe obenana chaotsebomnama*

<sup>1</sup> Chentšana atse sèñjaninye, canye uabouana bayá chè mar bejajoicana tonjánbocna; enjánbomma canyèfta bestšašènga y bnètsana tsètjonèšènga, y chèšènguiñe bnètsana coronèshangá, y chè bestšašènguiñe bañe enjétsabemana Bèngbe Bètsabiana contra oye-buambnaye uabaina. <sup>2</sup> Chè uabouana bayá sèñjaninyá enjamna mo canye leopardcá, mo osbe shecuášangaca, y chè uayáshana mo leonbeshacá. Chora chè dragón tonjanma chè uabouana bayá chaotsebomnama chabe obenana, y chabe uamana puesto jtsemándayama, y chabe bèts mando. <sup>3</sup> Canye chabe bestšašènguentse enjétsinyá mo jóbanama tètšeniñcá; pero chentse thtonábema; y chora quem luarentša nyètsca entsanga ojananènga monjètsemna, y chè uabouana bayábioye montsanèyeunana. <sup>4</sup> Y chè dragón montsanadorana, chè uabouana bayábioye obenana tbojánatšetama; y chè uabouana bayábioynaca montsanadorana, mèntšá jayanèse: “Ndocná obenana quenátsbomma quem uabouana bayacá, y ndocná quenátobena chábioye jáyèñjanama ca.”

<sup>5</sup> Chè uabouana bayábioye tbonjanlesenciá corente podescá Bèngbe Bètsabiana chaotsóyebuambnana, y obenana tbonjanatšetá, canta bnètsana y uta shinýèntscuana chaotsemándama. <sup>6</sup> Y podescá Bèngbe Bètsabiana tonjánayana, soyènga chabe contra, chabe bèts yebnama y chè celoca oyenèngbe contra. <sup>7</sup> Chábioynaca tbonjanlesenciá chè

Bëngbe Bëtsábenga imomnënga játsjayama, jáyënjánantscuana; y obenana tbonjanatsetá chaotsemándama nyetsca cachca buiñe bomna entsángbeñe, nyetsca canye entsángbeñe, nyetsca biyañe bomnëngbeñe, y nyetsca mándayëngbentša entsángbeñe. <sup>8</sup> Chë uabouana bayá nyetsca quem luarentša entsanga mochántadorana. Chë entsanga mondmëna ndëmuanyëngbe uabaina ndoñe yontsábemana, chë Bëngbe Bëtsábioye jëtschuyama mo canye oveshatemcá, tojanóbanabe librësañe. Bëngbe Bëtsá quem luare cabá ndëma ora, quem librësañe tojanábema nyetscanga chë tsábe vida mochjónyëngbe uabaina.

<sup>9</sup> Chë jouenama obenënga, chamouena.

<sup>10</sup> Chë cárceloye jama ibomná, cárceloye bochanjotóca jama;

chë espadéjaca jobanamá, espadéjaca echanjóbana.

Chíyeca quem luarentse entseyta, chë Bëngbe Bëtsábenga imomnënga padecena soyënguñe tmojtsemna ora, puerte uantadënga jtsemnana y Bëngbe Bëtsábeñe joshbuáchiyana, mo chë Bëngbe Bëtsábe entsangcá.

<sup>11</sup> Chentshana inye uabouana bayá sënjáninyë, quem fshantsentshana enjétebocana; uta tsëtjonëse mo oveshabešca enjánbomna, pero mo canye dragoncá, mo canya Satanásbeyeca mandanacá enjéteyebuambnaye. <sup>12</sup> Y enjánama soyënga chë natsana uabouana bayabe nyëts obenánaca, chabe delante. Chë fshantsentša bayá tonjanma nyetsca luarentse oyenënga chamotsadoránama chë natsana uabouana bayábioye, chë jóbana tëtšeniñe thontanobemá. <sup>13</sup> Cha ba bëts soyëngnaca enjánama chabe obenana entsanga jimyanñiyama, entsangbe delante jamana iñe celocana fshantsoye chaótsatšamnaca. <sup>14</sup> Y cha tbonjanlesenciá chaoma chabe obenana jimyanñiyama chë natsana uabouana bayabe delante. Chë soyëngaca entsanga tonjanañgñé, y quem luarentša entsanga tonjányana canye soye chamopormá, y chë soye chaósinñya mo chë natsana uabouana bayacá, chë espadéjaca tëtšená enjamná, y chora tsábá enjetsatsmëná. <sup>15</sup> Y chë inye uabouana bayábioye tmonjanlesenciá obenana chaotsebomnana jamama, chë natsana uabouana bayábioye jadórana entsanga tmonjanma soye vida chaotsebomnana, y chë soye jóyebuambayama chaotsobenánmna, y jamama chë chábioye ndoñe tmontsadoránënga chamóbanama. <sup>16</sup> Y tonjanma, nyetscángbioye, básenga y bëtsëtsanga, bomnënga y ndbomnënga, cachëngbiama trabájayënga y nye inyabiamá nyëts tempo oservëngënga, catšbioica cucuatšñe o juentsaca chamuinñyanama. <sup>17</sup> Y ndocná quenjátanobena ni jiyama, ni jobuámiñama, chë uinñyanána ndoñe tontsebomnëse; chë uabouana bayabe uabaina o chë chabe uabainama yomna número.

<sup>18</sup> Chë número jimyanamna bëtscá osertánana jtseytana. Chë becá osertánana bomná cháuinñyena ntšamo chë uabouana bayabe número uayancá, er canye entsábe número endmëna. Chë número endmëna chë chñënguana patse y chñënguana bnëtsana y chñënguana.

## 14

### *Chë canye patse y canta bnëtsana y canta uaranga entsangbe canto*

<sup>1</sup> Y más sentsanonýa. Sënjáninyë, chë Oveshatema, enjétsatsjabna Sión ca uabaina tjoca, y cháftaca monjésemna canye patse y canta bnëtsana y canta uaranga entsanga, y chëngbe juentsaca enjétsabemana chë Oveshatembe y chabe Taitabe uabaina. <sup>2</sup> Chora sënjanuena celocana canye shauenanana, mo bëtscá béjayënga y bëts juesasana shauenanancá; y chë shauenanana enjamna mo chë arpësha uenanayënga chëngbe arpëshangá tmojtsubuas-tocá. <sup>3</sup> Chënga canye tsëm canto montsancánta Bëngbe Bëtsábe delante, chë chabe uámana puesto y chë cháftaca canta Ainënga y chë bëtsëjëmënga amëndayëngbe natsanentse. Y ndocná quenjátanobena chë canto juatsjinñyana, nye chë canye patse y canta bnëtsana y canta uaranga quem luarentsëngbentšana atsebácanëngna aiñe. <sup>4</sup> Chënga monjanmëna chë shembáaftaca ndocna bacna soye tmonjanmënga, er chënga imojanenománda chca bacna soyënga ndoñe ntsamama; chë Oveshatema ndëmoye tojtsá y chëngnaca choye jtšëstonana. Chënga imojamna chë natsanënga chë quem luarentša entsanguentse atsebácanënga jtsemnana, y chënga atsebácanënga imojsemna Bëngbe Bëtsá y chë Oveshatema jtsaservënama. <sup>5</sup> Chënga ndocna te tmonjanobosteró; ndocná quenátobena jayanama chënga bacna soye tmojanma ca.

### *Ntšamo chë unga angelënga tmojánayana*

<sup>6</sup> Chentshana inye ángel sënjáninyë, tsbanánoca celëjana enjétsongüefñyaye. Cha enjánbomna canye nyëts tempscama oservena buayenana soye, entsángbioye jáuyanama, nyëts quem luarentse oyenënga, nyetsca mándayëngbentša entsanga, nyetsca cachca buiñe bomna entsanga, nyetsca biyañe bomnëngbeñe y nyetsca canye entsangbiama. <sup>7</sup> Y jabuache mëntšá enjétsichamo: “¡Bëngbe Bëtsábiamá šmochjábuoye cha nyetscangbiama chë más uamaná endmënama, y cha šmochtsatschuanayey, er ya tonjoshjango chë tempo ntšamo entsanga



tmojamama tšabá o ndoñe tšabá bétsemnama cha cháuyanama! ¡Chè celoca y quem luare, chè mar béjaye y nyetsca chè fshantsentsana óbocana béjayenga tojamá smochtsadorana ca!”

<sup>8</sup> Chábentsana inye ángel mēntšá enjétsichamo: “¡Ya bēts castigo, ya bēts castigo chè Babilonia bēts puebloca entšángbeñe echántsemnal, ndēmuanýenga tmojinýanyé ntšamo puerte bacna soyēnga shembása o boyabásaftaca jtsamama y inye corente bacna soyēngnca, y chentšana nyets quem luarentša entsānga mo cach Babilonioquēngcá tmojama. Chè causa, Bēngbe Bētsá echanjama chēngbiámnaca chabe uabouana castigo chaotsemnama ca.”

<sup>9</sup> Chē útatbentsana inye ángel jabuache mēntšá enjétsichamo: “Nderado nda chè uabouana bayábioye y chè chábioye jadórana pormana soye tojtsadorana, y tojalesenciá chabe uinýnanana soye juentsca o cucuatšife chamojajoma, <sup>10</sup> chánaca bontsemna, chè Bēngbe Bētsabe uabouana castigo jasúfriana. Entšanga puerte bacna soye tmojamama, Bēngbe Bētsá puerte tbojetna, y chè causa echanjama chè castigo chēngbeñe chaotsemnama. Y chè uamana angelēnga y chè Oveshatembe delante, chè bayá adorayábioye puerte mochanjatsētšná, ifešhe y azúfeca. <sup>11</sup> Chca chamojtsesufrina ora, becá ngona echantsóbocana, y chè ngona nyets tempo chca echantsótsjuaye; y chēnga, chè uabouana bayá y chábioye jadórana pormana soye adórayēnga, y chabe uinýnanana soye bomnēngbiama, ndocna te chè tsetšanana queochatējbana ca” —cha enjétsichamo.

<sup>12</sup> Chiyeca quem luarentše entseyta, chè Bēngbe Bētsabe mandēnga obedecēnēnga y Jesúsbeñe puerte ošbuáchiyana bomnēnga, chè Bēngbe Bētsabe entsānga, padecena soyēnguiñe tmojtsemna ora, puerte uantana jtsemnana.

<sup>13</sup> Chentšana canye oyeubuambnayana celocana sēnjanuena, mēntšá šonjétsatsaye: “Mēntšá mábema: ‘Tša oyejuayēnga mochántsemna chè mēntescana mochjóbanēnga, Bēngbe Utabnáftaca cánýiñe mo canýacá jtsomñēse ca.’ ”

“Añe ca” —chè Uamana Espiritu tonjayana —, “chēnga ya ndoñe más queochátamna jatrabájana, ni jasúfriana, er chēnga tmojama tšabe soyēnga Jesús jasérviamo, y chè soyēngama chēnga tšabe bendicionēnga mo uacancá celoca mochanjóyēngacñe ca.”

### *Ndayá chē angelēnga quem luarentše tmojanatbaná*

<sup>14</sup> Chora más sēnjáninýe; sēnjáninýe canye fjantse jantšetšeshe, y chēshiñe canýa enjétsētbemana. Cha enjamna mo canye entšacá; chabe bestšašife enjanábomna canye castellano coronēsha, y cucuatšife canye puerte efsana mētšá enjétsatbēna. <sup>15</sup> Chentšana, chè celoca Bēngbe Bētsabe bēts yebnentšana inye ángel tonjánbocna, y jabuache bonjétsatsaye chè jantšetšifeñe themanábioye: “¡Acbe mētštaca machbonja y shajuanēnga matbaná, er chè játbanama tempo ya tonjóshjango; chè quem luarentša shajuana ya tonjaboche ca!” <sup>16</sup> Y chè jantšetšifeñe enjantbemaná chabe mētštaca quem luariñe tonjánachbonja, y nyets quem luarentše atbanániñe tonjanoquedá.

<sup>17</sup> Chentšana inye ángel chè celoca Bēngbe Bētsabe bēts yebnentšana tonjánbocna; chánaca canye puerte efsana mētštaca. <sup>18</sup> Y chè altarentšana inye ángel tonjánbocna, chè mando bomná ifešheca castigo entsāngbiama jamama; y chè puerte efsana mētšá bomna ángelbioye jabuache tbonjanayana: “¡Acbe mētštaca machbonja y chè fshantsoca nyetsca uvas betiyeshēnguentša uvasēngá mátabe, er ya uabochenēngá entsamna ca!” <sup>19</sup> Y chè ángelna chabe mētštaca quem luariñe tonjánachbonja, y nyetsca quem luarentša uvasēngá tonjanátabe, y lempe chè juantšētetjama luaroye tonjanētšana. Chè soye entsinýinýná ntšamo yochtsemnana Bēngbe Bētsabe uabouana castigo. <sup>20</sup> Chè uvasēngana, chè bēts pueblentšana chaboye tmonjanantšētetje, y chè luarentšana tša buiñe tonjanóbocna; tonjanoutjé couayēngbe uayashbenēshantscoñe y mo unga patse kilómetrēnga tonjanábuashana.

## 15

### *Chē angelēnga chē canýsēfta pochócaye soyēngaca*

<sup>1</sup> Chentšana, inye bēts soye entsānga inye soyama jinýanyiyama, celoca sēnjáninýe, canye puerte bēts soye: canýsēfta angelēnga canýsēfta pochócaye soyēngaca, chè ústonoye pochócaye soyēnga. Chè soyēnga chaojtsemnentšana ya ndoñe inye pochócaye soye yochántsemna, er chēntscōñe Bēngbe Bētsá yochjacistá, lempe ntšamo cha jamama tojanjuabocá.

<sup>2</sup> Canye mar béjaynaca sēnjáninýe, mo cristalca enjétsinýna ifeñca enájuañe; y chè béjaye juachaca monjétsatsana chè tšabá tmojanbocnēnga, y ni chè uabouana bayá, ni chè chábioye jadórana pormana soye ndoñe tmonjánadoranga, y chè uabouana bayabe uabainama yomna número chēngbeñe chaotsemnama ndoñe tmonjanlesencianga. Nyetscanga chēnga monjétsabomna Bēngbe Bētsá tojanētšatá arpangá. <sup>3</sup> Chēnga, canye canto monjétsacantaye ntšamo Moisés, chè Bēngbe Bētsabe oservená tojancantacá, y ntšamo chè Oveshatema tojancantacá. Mēntšá monjétsacantaye:

Puerte bēts soyēnga y tšabe soyēnga entsemna lempe ntšamo aca tojanmca,

Bëngbe Utabná Bëngbe Bëtsá nyëts obenana bomná;  
 lempe ntšamo jtsamëse aca icyena, acbe bominiñe puerte tšabe y ndegombre soyënga yomna,

nyëts luarënguenache entšangbe Rey.

<sup>4</sup> Bëngbe Utabná, çnda nanjájuaboeye aca nyëtschangbiama ndoñe más bëtsá condmëna ca, o ndoñe cmantsatschuanaye?

Nye aca uamaná condmëna;

nyëtsca mándayëngbentša entšanga ácbioye mochanjabo,

ácbentse mochanjoshamentšiyë aca jadórama,

er ntšamo tcojamcá lempe entšangbioye mora tcojinýanýé,

y lempe ntšamo aca tcojamcá tšabá jtemnana ca —monjëtsecantaye.

<sup>5</sup> Chca chentšana sënjanontješë y sënjáninyë chë celoca Bëngbe Bëtsabe bëts yebna tonjantëfo, chë Bëngbe Bëtsá Moisésbioye tbojaníyë leyënga uajajómentšë. <sup>6</sup> Y Bëngbe Bëtsabe bëts yebnentšana tmonjánbocna chë canýsëfta angelënga, chë canýsëfta pochócayë soyënga uambayënga, uafjantse lino entšëjuangá uabuashinýinýanëjuangá uichëtjonënga, y tëntša castellano uasanëjëngaca cochóntscóne. <sup>7</sup> Chentšana, canya chë canta Ainënguentšá chë canýsëfta angelëngbioye tonjanoyé canýsëfta castellano copbenga jútjena chë Bëngbe Bëtsabe uabouana castígoca; Bëngbe Bëtsá chë nyëts tempo y nyëtsca tescama vida bomná.

<sup>8</sup> Chorna, chë Bëngbe Bëtsabe bëts yebna celoca becá ngónaca tonjanoutjé, y chë ngona enjétsobocana Bëngbe Bëtsábentšana, chabe buashinýinýanana y obenana jtsinýanýnayëse; y Bëngbe Bëtsabe bëts yebnoye ndocná quenjátanobena jamashënguana, chë canýsëfta angelëngbe canýsëfta pochócayë soyënga candochnënguëntscuana.

## 16

### *Chë castígoca copbenga*

<sup>1</sup> Chentšana, canye jabuache oyebuambnayana sënjanuena, chë celoca Bëngbe Bëtsabe bëts yebnentšana enjétsobocana, y chë canýsëfta angelëngbioye mëntšá enjétsëtsnaye: “Motsajna y quem canýsëfta copbenga, chë Bëngbe Bëtsábicocana endóbocana uabouana castígoca, fshantsoca šmochjabuashcja ca.”

<sup>2</sup> Chora chë natsana ángel tonjána y chabe copbé quem luariñe tonjanbuashcja, y nyëtsca entšanga chë uabouana bayabe uinýnanana soye bomnënga y chë chábioye jadórama pormana soye adórayëngbe cuerpiñe bañe bacna nguayanana tonjanóbocna, puerte tsetšénana.

<sup>3</sup> Chentšana, chë inyë ángel chabe copbé mar béjayoca tonjanbuashcja, y choca búyeshe buiñcá tontsanóbema, mo canye entšá obanabe buiñcá, y nyëtscanga chë mar béjayoca vida bomnënga tmontsanóbana.

<sup>4</sup> Chora chë inyë ángel chabe copbé béjayënguñe y béjaye obocanënguñe tonjanbuashcja, y buiñe tontsanobíama. <sup>5</sup> Chentšana sënjanuena, chë béjayënguñe mando bomna ángel mëntšá enjétsichamo:

Aca nyëtsca soyënguñe tšabá amá condmëna,

er aca tcojayana chë quem luarentša entšanga chca castigánënga chamotsemnana.

Bëngbe Bëtsá, Uamaná, mora chca condmëna y chca conjamna;

<sup>6</sup> er chënga tmonjama, chë acbe entšanga

y acbe juabna oyebuambnayëngbe buiñe chauábuashanama, jtsëbáyëse;

y mora tconjama chënga buiñe chamofšema.

Nyëts mercedo imobuájona chca japásama ca —cha enjétsichamo.

<sup>7</sup> Altarocánëna canye oyebuambnayana sënjanuena, mëntšá enjétsichamo: “Aíñe, Bëngbe Utabná, Bëngbe Bëtsá, nyëts obenana bomná condmëna, y ntšamo entšanga contsacastígocá, ndegombre y tšabá entsemna ca.”

<sup>8</sup> Chentšana, chë inyë ángel chabe copbé shinýiñe tonjanbuashcja; chë shinýe corente tontsanobonýaná y chíyeca entšangbioye iñesheca tontsanajuinýé. <sup>9</sup> Y nyëtscanga uabouancá juinýnënga tmonjanquedá; pero chënga ndoñe chemátanbošëna bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócayë soyënga jíchmuama, chënga chamosufrima.

<sup>10</sup> Chentšana chë inyë ángel chabe copbé chë uabouana bayabe uámana puestiñe tonjanbuashcja, y nyëts chabe amëndayíñe ibetiñe tonjanquedá. Chë entšanga bichtaja montsanenójantsnaye, yapa tsetšë causa; <sup>11</sup> pero ni chca, chë entšanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

<sup>12</sup> Chentsana chë inye ángel chabe copbé chë bëts fshájaye Eufrates ca uabáiniyiñe tonjanbuashcja y chë béjaye tontsanbuashjo, japróntama chë shinýe bocanoica luarënguentša reyënga y chëngbe soldadënga chëjana chámuachnëjnama.

<sup>13</sup> Atše sënjäninýe, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnaye uayoicana tmonjánbocna unga bacna espíritënga; mo saposëngcá monjétsinýna. <sup>14</sup> Chënga monjamna bayëjëngbe espíritënga; bëts soyënga monjánama obenana jinýanýiyama, y montsanbocana nyëts luarentša reyënga jáchembuama, chë uámana te, ndayté Bëngbe Bëtsá, chë nyëts obenana bomná yochjabo entsangbiana jabáyanama ntšamo chënga tmojamama, chë te chënga chabe contra chamotsetsjama.

<sup>15</sup> Bëngbe Utabná Jesucristo mëntšá tojayana: “Smochjinýe, atše nyë ndeolpe chanjabo, mo canýe atbébanacá, chabiana ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefsna y chabe entsáyá totsaboprontañacá, nyë enašá ndoñe chaondëtsemnana, y entsánga chca tmojinýe ora ndoñe chaondëtsëuatjama ca.” <sup>16</sup> Y chë bacna espíritënga chë reyëngbioye tmonjanënatse canýe luare, hebreuñe Armagedón ca uabáinoye.

<sup>17</sup> Chentsana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana puestentšana canýe jabuache oyebuambnaye tonjanóbocna, mëntšá enjétsichamo: “¡Chë jopásama enjamna soye ya tojochnëngo ca!”

<sup>18</sup> Chora enjëtsemna tcuinýënga, shauenanana y juesasanana, y quem luariñe tontsanangmëmana, yapa jabuache quem luare tontsanëbanjó causa; quem luarentše entsánga imobinýna orscana, ndocna te nýa chca quem luare tontsanëbanjó. <sup>19</sup> Chë puerte bëts pueblo úngañe tontsanajatá, y nyëts luarentša bëts pueblënga tontsanáshajaye, y Bëngbe Bëtsá tojanenjuabó chë puerte bëts pueblama, Babilonia ca uabaina pueblama, chentša entsánga chë uabouana castigo chamotsebomnana, Bëngbe Bëtsá tša tbojánëtna causa, tša bacna soyënga chentše tmojanmama. Y chca, chë chëngbe bëts pueblo úngañe tontsanajatá ora, cha chënga tonjanacastigá. <sup>20</sup> Mar béjayoca nyëtsca fshantsënga y quem luarentša nyëtsca tjañe tontsanenatjëmba. <sup>21</sup> Celocana bëtsëtsa bëntstbenga entsángbeñe tonjantquécjana, chëbenga canta bnëtsana kilama más utbenga; y entsánga Bëngbe Bëtsabe contra ba soyënga tmonjánayana, er chënga tša montsansufrina chë bëts pochócaye bëntstá causa, y chë pochócaye bëntstá chëngbiana puerte jabuache castigo enjamnana.

## 17

### *Chë puerte bacna vida bomna shembásabe castigo*

<sup>1</sup> Canýa chë canýsëfta angelënguentšá, chë canýsëfta copbenga monjanatbënënguentšá, tonjánabo y šonjanayana: “Mabo; cbochanjinýinýiye ntšamo yochtsemna chë puerte bacna vida bomna shembása, chë béjayënguñe entsetbemanabe castigo. <sup>2</sup> Quem luarentša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerte cuafjotmenangcá ca.”

<sup>3</sup> Chentsana chë ángel, atše chë Uámana Espíritbeyeca corente mandaná jtsemnëse, šonjanánatse entsánga ndoyena luaroye. Choca sënjäninýe canýe shembása, canýe uabouana buángana bayábeñe enjaquená; chë bayabe cuerpiñe nyëtsañe Bëngbe Bëtsabiana puerte bacá oyebuambnaye uabaina enjëtsebemana, y enjánbomna canýsëfta bestšaše y bnëtsana tsëtjonëse. <sup>4</sup> Chë shembása enjanichëtjona uámana shbuenda uafjatsenga y buángana entsáyá, y entsanbotamana castellánoca, uámana botamana ndëtšëtëmëngaca y pérlica. Chabe cucuatsiñe canýe castellano copbé enjëtstbëna, jútjena puerte uaboyëña soyëngaca, y chë boyabásengafitaca cha tojanma puerte bacna soyëngaca. <sup>5</sup> Y chabe juentsaca canýe uabaina enjëtsebemana, ndoñe josërta soye, mëntšá: “Chë puerte bëts pueblo Babilonia, tša bacna entsánga chentše, mo chë puerte bacna vida bomna shembásengbe bebmá cuaftsemncá; chentsana tojanóbocna quem luarentša nyëtsca puerte uaboyëña soyënga ca.” <sup>6</sup> Atše sënjäninýe chë shembása tëmía, er cha tojanofše chë Bëngbe Bëtsábenga imojamnëngbe buiñe, ndëmuanyëngbioye tmojanëbaye Jesusbiana oyebuambnaye causa.

Chca sënjäninýe ora, tša sënjanenjananá. <sup>7</sup> Chora chë ángel šonjanayana: “¿Ndáyeca tcojenjaná ca? Atše cbochanjauyana ntšamo yojsayana chë shembása y chë chábioye bontsambá uabouana bayá, chë canýsëfta bestšaše bomná y bnëtsana tsëtjonëse; chë soye ndocná quenátstatšëmbo. <sup>8</sup> Chë tconjinýe uabouana bayá, tempo chca enjamna, pero mora ya ndoñe. Chë corente bëts thoicana cha echanjesetsjuá, pero lempe pochocaná jtsemnana chca echántsaye. Quem luarentše oyenënga, ndëmuanyëngbe uabaina quem

luare jobojátšama orscana ndoñe yonduábemana, chë tšabe vida mochjónyēnēngbe uabaina iuábemana librěšañe, chēnga mochanjenjaná, chë bayá chë tempo enjaniyená y mora ya ndoñe, pero cachiñe yochjěsabama chamojinjē ora.

<sup>9</sup> “Muentše canjē soye entsemna chë chca josértama chamojobenangbiana: chë bayabe canjěsfta bestšaše endmēna canjěsfta tjañe ndayiñe chë shembása entsetbemana; chë bestšašēngnaca mondmēna canjěsfta mandadēnga. <sup>10</sup> Chentšana, shachnēngbe amēndayana ya tonjochnēngo, canjā mora entsetbemana jtsamēndayama y chë injā cabá ndoñe tonjášhango. Y cha chaojášhango ora, ndoñe bēnama cha queochaisemánda. <sup>11</sup> Chë tempo enjaniyena uabouana bayá pero mora ya ndoñe, endmēna chë canjěsfta mandadēnguentšana injē mandado, pero chánaca chë injē canjěsftangcá endmēna y lempe pochocaná jtsemnama entsá.

<sup>12</sup> “Chë tconjinjē bnětsana tsětjoněše mondmēna bnětsana mandadēnga, jamēndama cabá ndoñe tmonjójayenga; pero bāsefta tescama cánjiñe chë uabouana bayáftaca, mando mo reyēngcá mochanjójēngacñe. <sup>13</sup> Quem bnětsanēnga njetścanga cachcá mochántsejuabnaye, y chë uabouana bayábioye chēngbe obenana y mando mochanjátsetaye. <sup>14</sup> Chë Oveshatembe contra mochántsejšanaye; pero chë Oveshatema echantsayējaná, er chë Oveshatema endmēna njetšca amēndayēngbiana chë más uamana Utabná y njetšca reyēngbiana chë más uamana Rey. Chë bnětsana mandadēnga cháftaca mochántsejšanaye ora, cha chentše chabe entsāngaftaca cánjiñe echántsemna. Chēnga mondmēna chë cha tojáchembo y tojubuáyanēnga y chábeñe sempre ošbuáchiyēnga ca” —cha šonjaniyana.

<sup>15</sup> Chë ángel mēntšánaca šonjaniyana: “Chë tconjinjē bėjayēnga, ndayiñe chë bacna vida bomna shembása entsetbemana, mondmēna njetšca canjē luarentša entsānga, enutanana entsānga, njetšca biyañe oyebuambnaye y njetšca mándayēngbentša entsānga. <sup>16</sup> Y chë uabouana bayábeñe tconjinjē bnětsana tsětjoněše y chë uabouana bayá, chë bacna vida bomna shembásabioye mochantsáboyēnja; enašá cachcá mochanjesonjaye; chabe cuerpentša mēntšana mochantsósañe y iñesheca mochántsejuinjiye, chaopochantsuana. <sup>17</sup> Bēngbe Bětsá tojama chë bnětsanēnga ainaniñe tša chamotseboše, ntšamo cha yo-bošcá chamotsamama. Chca, chēnga mochanjēnoyēunaye chēngbe mando chë uabouana bayábioye jantšabuáchiyana, ntšamo Bēngbe Bětsá tojayancá chaojopasantsuana. <sup>18</sup> Chë tconjinjē shembása chë puerte bēts pueblo endmēna, chë ndayentša mandadēnga njetš quem luarentša mandadēngbeñe mando mondbomna ca” —cha šonjaniyana.

## 18

### *Babilonia japochócama*

<sup>1</sup> Chentšana injē ángel sēnjáninjē, celocana enjětsastajuana, puerte obenana bomná, y chabe buashinjinjanánaca njetš quem luariñe entsanbinjāna. <sup>2</sup> Chë ángel jabuache mēntšá enjětsichamo:

¡Ya mochantsepochóca, ya mochantsepochóca chë uamana pueblo Babilonia!

¡Chentše tojtsóbema diablēngbe oyeniñe,

njetšca bacna espiritēngbe oyeniñe,

y ndoñe tšabe y uaboyēnja shloftšēngbe oyeniñe!

<sup>3</sup> Er njetšca quem luariñe mándayēngbentša entsānga puerte bacna soyēnga tmojama chentša entsāngbe causa,

mo chë bacna vida bomna shembásaftaca bacna soyēnga cuafjamcá,

mo puerte cuafjotmenangcá chë bacna vida bomna shembásabe vínoyeca.

Njetšca luarēnguentša mandadēnga puerte bacna soyēnga tmojama,

mo chë shembásaftaca bacna soye cuafjamcá,

y quem luarentša obuámañēnga y enēnga, monnēnga tmojobiama chentša entsānga yapa crocénana nje ndayíñnaca ntsejuabnaycá gástaye causa ca —cha enjětsichamo.

<sup>4</sup> Chentšana, celocana injē oyebuambnayana sēnjanuena, mēntšá enjětsichamo:

¡Chë bēts pueblentšana maisebocana!, tšēngaftanga chë atšbe entsānga šmommēnga,

chë chentša entsānga mondbětsama bacna soyēnga ndoñe chašmondětsamama,

ni chë chēngbioye japochócama soyēnga tšēngaftangbiana cach ndoñe chaondětsemnama.

<sup>5</sup> Chēnga tša bacna soyēnga tmojama, tša bētscá nja mo celóntscōñe cuafjotjutecá,

y Bēngbe Bětsá mora entsejuabná chēnga tša puerte bacna soyēnga tmojama causa, chë soyēngama jácastigama.

<sup>6</sup> Ntšamo chentša entsānga injēngbiana ndoñe tšabá tmonjamcá,

chë entsāngbiámna cachcá chaotsemna;

ntšamo tmojamama, cabá uta soye más cachca soye chēngbiana chaotsemna;

ntšamo chentša entsānga injēnga chamosufrima tmojamcá,

chēngnaca cachcá uta soye más chamosufrí.

7 Chënga corente jtsenábótamnayana y yapa crocénana nÿe ndayíñnaca ntsejuabnycá jtsegástayana;

chë causa, chënga entsamna puerte jasúfriama y becá tsetšanana jtseboamna.

Er chëngbe ainaniñe mëntśá jtsejuabnycana:

“Muentše mo reyëngcá mondëbíamana.

Viudacá ngmënaca ndoñe quemuátsmëna; tondayama quemochátsufrina ca.”

8 Chíyeca, canÿe ora pochócaye soyënga chëngbiana echanjóshjango:

jóbanama socanënga, puerte ngmënana y jabuache shëntsana,

íñshëca lempe chëngbeñe echántsejuinÿe;

er Bëngbe Bëtsá corente obenana bomná endmëna,

Bëngbe Utabná chë chënga chca castigo chamotseboamna tojayaná ca —cha enjétsichamo.

9 Quem luarentśa mandadënga, chentśa entsángaftaca puerte bacna soyënga tmojamënga, y chëngaftaca nÿe ndayíñnaca yapa crocénana, ntsejuabnycá tmojagastanga, mochanjóshchna y puerte ngmenánaca mochántsemna, chë bëts pueblo chaojtsangbototjuanentśa ngona chamojinÿe ora. 10 Chentśana bënoca mochanjóquëda antjeśna, chë uabouana castiguama auatja causa, y chentśa entsangbiana mochanjayana:

¡Tśa lastema, tśa lastema tšëngaftanga chë uamana bëts pueblo, Babilonientše oyenëngbiana, chë tśa obenana binÿentše!

Canÿe ora tšëngaftangbe castigo tojóshjango ca —mochántsichamo.

11 Chë quem luarentśa obuámañënga y enëngnaca mochanjóshchna y ngmenánaca mochántsemna chë pueblentśa entsangbiana, er chora ya ndocná queochátsmëna chë chënga tmojúshjango soyënga chamobuámiñama: 12 tmojúshjango castellano soyënga, midio soyënga, uamana y botamana ndëtsbënga, perlënga, uamana lino y shbuenda uafjatsenga entsáyá y sedëjua y uamana uabuángana entsáyá; nÿetsca botamana uanguëtse betiyënga, marfílocá pormana soyënga, uamana niñëšëngaca pormana soyënga, bronce soyënga, hierro y marmol soyënga; 13 bëtscá canela y inÿe botamana uanguëtse y tamna soyënga, botamana uanguëtse béjayënga, incienso y mirra; vínoye, aceitiye, uamana arninÿá, trigo; bayënga ndayánaca uasmëmnyënga, oveshënga, couayënga, cochëshangá y entsanga nÿets tempo nÿe ínÿabiana oservenëngnaca. 14 Y chë pueblentśa entsangbiana mochanjayana:

¡Chë tśa cmonjanogúsetana jtseboamna soyënga, mora ya ndoñe quemátsbomna;

chë uamana y buashinÿinÿana soyënga y tśa bomnana lempe šmojobuetše,

y ndocna te más cachca soye quemochátsbomna ca!

15 Chë soyënga enënga, chë bëts pueblentśa entsángbeyeca bomnënga tmojanobiamënga, bënoca mochanjóquëda antjeśna, chë bëts pueblentśa entsangbiana tśa bëts castiguama auatja causa; mochanjóshchna, puerte ngmenánaca mochántsemna. 16 Y mëntśá chentśa entsangbiana mochanjayana:

¡Tśa lastema, tśa lastema tšëngaftanga chë uamana bëts pueblentše oyenëngbiana!

Chë enjáninÿna mo canÿe shembasacá, uamana lino entsëjua uichëtjoná,

uamana shbuenda uafjatsenga y uabuángana entsáyá uichëtjoná,

botamananá castellanoca, perlënga y uamana botamana ndëtsbëngaca.

17 ¡Y canÿe ora chabe tśa bomnana lempe tojtsopochocá ca! —mochanjayana.

Nÿetsca chë barquënguentśa mándayënga, chentśa entsanga inÿe luaroye ajnënga y chentśa trabájayënga, y nÿetscanga chë vida onguayiñe mar béjayoca trabájayëngnaca, chentśana bënoca mochanjóquëda antjeśna, 18 y chë bëts pueblo chaojtsangbototjuanentśa ngona chamojinÿe ora, jabuache mochanjayana: “¡Quem uamana bëts pueblécá ndocna inÿe pueblo cachcá quenátsmëna ca!” 19 Chca chamojinÿe ora, ngmënana bestśašinÿe polvëshe mochántsenotboto, y mëntśá mochántseyona ošachiyënga y puerte cochtsetšenánënga:

¡Tśa lastema, tśa lastema tšëngaftanga chë uamana bëts pueblentše oyenëngbiana!

Chentśa bomnánaca bomnënga tmojanobiana nÿetscanga chë mar béjayoca barco bomnënga.

¡Canÿe ora lempe tojtsopochocá ca! —chënga mochántseyona.

Chora chë ángel tonjánayana:

20 ¡Celoca oyenënga móyejuanga

chë pueblo chca tojapasama;

y tšëngaftángnaca móyejuanga, Bëngbe Bëtsabe entsanga, Jesucristbe ichmónënga y Bëngbe Bëtsabe juabna oyebuambnycënga,

er chca jacastígase, Bëngbe Bëtsá tojama chënga chamosufrima,

ntśamo tšëngaftanga chašmosufrima chënga tmojanmca ca! —cha tonjánayana.

21 Chentśana, canÿe ángel puerte obenana bomná, canÿe ndëtsbé tonjanatsbaná, mo canÿe bëts nantsnëbé ndëtsbecá, mar béjayoye tonjanashbuetše y mëntśá tonjánayana:

Mëntśá, nÿe ndeolpe y jabuache, Babilonia chë uamana bëts pueblo mochántsetsatše,

y ndocna te más quem pueblo queochátsmëna.

<sup>22</sup> Chentše, ndocna te más quemochátuenana arpagá uabuástoyana, ni cantayana, flautëfjenga y trompetëfjuangá cach ndoñe; ndocna te más quemochátsmëna obrerënga, ni chë nantsnëbeñe trabájayana quemochátuenana.

<sup>23</sup> Chentše, ndocna te más ndocna uajuinñanësha queochátsbinñyaye, ni casamento fiententša enbouenanana quemochátuenana.

Er chë bëts pueblo chca mochantsepochóca, masque chentša obuámnañenga y enënga nyets quem luarentše chë más bomnënga monjamna, y chentša bocjuanánaca nyetsca luarënguentsa entsanga ingñënënga monjamna ca —cha tonjánayana.

<sup>24</sup> Bëngbe Bëtsá chca chë bëts pueblentše echanjama, er chentše tmojinñena chë Bëngbe Bëtsabiana trabájaye causa tmojanóbanëngbe buiñe; chë chabe juabna oyebuambnayënga, chabe entsanga, y chë chábioye oservénama nyets quem luarentše tmojtšëbayëngbe buiñe.

## 19

<sup>1</sup> Chentšana celoca sënjanuena mo mallajta entsanga cuaftsayebuachcá, mëntšá monjétsichamo:

¡Bëngbe Utabná matschuanga!

Bëngbe Bëtsá endmëna nda chabe entsanga tojatsebacá; cha puerte uámanana, buashinñinñana y mando endbomna,

<sup>2</sup> er ndayama cha tojayancá ndegombre jtsemnana, y ntšamo tšabá chama tojtsemncá.

Cha chë uachuana bacna vida bomna shembásabioye tojacastigá.

Chë shembásabe puerte bacna soyënga causa, nyets luarentša entsángnaca bacna soyënga tmojama.

Chábioye chca jacastígase,

Bëngbe Bëtsá tojama ntšamo jamama ibomerecencá, chábioye oservénënga chë shembásabeyeca tmojóbana causa ca —chënga monjétsichamo.

<sup>3</sup> Y cachiñe mëntšá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentša ngona nyetsca tescama chca echanjótjuaye ca!

<sup>4</sup> Y chora, chë uta bnëtsana y canta bëtsëjëmënga amëndayënga y chë canta Ainënga tmonjanoshamentšé, y Bëngbe Bëtsá, chë uamana tthemanentše enjëtsetbemanabioye tmonjanadorá, mëntšá jayanëse: “¡Chca chaotsemna! ¡Bëngbe Utabná matschuanga ca!” <sup>5</sup> Y chë uamana puestentšana canye oyebuambnayana tonjanóbocna, mëntšá:

Bëngbe Bëtsá matschuanga, nyetsca chabe oservénënga

y chë nyetscangbiama cha chë más uamaná yomnama juabnayënga, básenga y bëtsétsanga ca.

### *Chë Oveshatembe casamento fiesta*

<sup>6</sup> Y sënjanuena mo mallajta entsangbe oyebuambnayancá, mo bëtscá béjaye cuaftsobonjnacá y mo bëts juesasanana shauenanancá; mëntšá monjétsichamo:

¡Bëngbe Utabná matschuanga!

Er Bëngbe Utabná, Bëngbe Bëtsá nyets obenana bomná tojontšé jamándana.

<sup>7</sup> Puerte móyejuanga y mochjñinñaniye

Bëngbe Bëtsá puerte bëtsá y uamaná bëtsemnana,

er mora entsemna mo chë Oveshatembe casamento te cuafjoshjangcá;

chabe shema yochjabocná puerte tojtenobotamá;

<sup>8</sup> tmojalesenciá cha chauatíchéto uamana, nduatsenga uafjantse y uabuashinñinñana lino entsáyá.

Chë shema entsinñinñaná chë Bëngbe Bëtsabe entsanga;

y chë lino entsáyá jtsichétjonana entsinñinñaná

chënga lempe ntšamo tšabá yomncá jtsamëse imoyena ca —chënga monjétsichamo.

<sup>9</sup> Chentšana chë ángel šonjaniyana: “Mëntšá mábema: ‘Oyejuayënga chë Oveshatembe casamento fiestama óñanënga ca.’ ” Y mëntšánaca šonjaniyana: “Chca, ndegombre Bëngbe Bëtsabe palabrenga endmëna ca.”

<sup>10</sup> As chabe shecuatšentše sënjanoshamentšé cha jadórana, pero cha šonjaniyana: “Ndoñe, átseftaca ndoñe chca mátamana, er atše Bëngbe Bëtsabe canye oservená sëndmëna, ntšamo aca condmëncá, y chë Crístbeyeca acbe catšátanga, ntšamo chabiana motatšëmbcá y chabe

ndegombre palabrenga nÿets tempo imabuayiyanga mondmëncá. Aca cmontsemna Bëngbe Bëtsá jadórana ca.”

Ndayá Jesús tojanma y tojanayancá, endama chë Bëngbe Bëtsabe juabna oyebuambnáyënga chëngbe ainaniñe osertánana y añemo chamotsebomnana, chë soyëngama entšángbiye jábuayenama.

### *Chë fiantse couayiñe enjaquená*

<sup>11</sup> Chora sënjáninÿe celoca atëfñiñe; canÿe fiantse couaye enjëtsemna y chë chábëñe enjaquená enjanabaina “Ntšamo tojašebuachenacá amá” y “Ndegombre oyebuambnáyá ca”, er ntšamo tšabá yomncá cha tojanjuabó y tojanma entšángaftaca; y chca chabe uayayëngaftaca monjánentsjanaye. <sup>12</sup> Chabe fšñëbenga mo iñeshcá enjáninÿna, bestšašifñe ba uabuashinÿinÿana coronëshangá enjanábomna, y canÿe uabaina chábëñe enjanábemana; nÿe cha chë uabaina yojanábuatma. <sup>13</sup> Cha enjanichëtjona buiñeca unëtjona entšayá y chabe uabaina enjamna “Bëngbe Bëtsabe palabra ca”. <sup>14</sup> Y chabe ústonoye monjëtšajna mallajta soldadënga celouënga, nduatsenga uafjantse y uámana lino entšayá uichëtjonënga, fiantse couayënguiñe enjaquenënga. <sup>15</sup> Chë enjëtsebnatsanabe uayoicana enjanóbocana canÿe puerte efsana espadëja, chë Bëngbe Bëtsábeñe ndošbuáchiyënga játatsetšama. Cha puerte obenánaca echántsamëndaye, mo canÿe hierro varëfjaquécá. Cha echanjama entšángaftaca mo nda uvasëšangá juantšëtetjama tojtsabotajná ora cuafjamcá; y echanjama chënga chamotsebomnana chë puerte uabouana castigo, Bëngbe Bëtsá chë nÿets obenana bomná tbojetna causa. <sup>16</sup> Chabe uabonjaníyane y chabe mëntjoca canÿe uabaina enjanábemana: “Nÿetsca reyëngbiama chë más uámana Rey, y nÿetsca amëndayëngbiama chë más uámana Utabná ca”.

<sup>17</sup> Chentšana canÿe ángel sënjáninÿe, shinÿiñe enjëtšatsana, chë celoca tšbanánoca nÿetsca monjanongüefñá shloftšënga jabuache mëntšá enjëtšëtšsnaye: “¡Mabënga, menefñna chë Bëngbe Bëtsá tojaprontá bëtš saná jasama; <sup>18</sup> chašmosama reyëngbe mëntšëna, soldadënga amëndayëngbe mëntšëna y valente entšangbe mëntšëna, couayënga y chëngbeñe enjaquenëngbe mëntšëna, y nÿetsca entšangbe mëntšëna, cachëngbiama trabájayënga y nÿe inÿabiama nÿets tempo trabájayënga, básesenga y bëtšëtšanga ca!”

<sup>19</sup> Chora atše sënjáninÿe chë uabouana bayá y quem luarentša reyënga chëngbe soldadëngaftaca tmojánenefñna, chë fiantse couayiñe enjaquená y chabe soldadëngaftaca jëntsjama. <sup>20</sup> Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambnáyá, chë bayabe delante ba bëtš soyënga tonjanmá obenana jinÿanÿiyama; y cha chë soyëngaca tojanaingñë chë uabouana bayabe uinÿnanana soye chamuayentšajoma tmojanlesencianga, y chë chábíoye jadórana pormana soye adórayënga. Y chë útatbioyna ainata tmontsanatmetše chë iñeshëca uafjajónayoye, chë azufre endëjuinÿinÿanentše. <sup>21</sup> Chë inÿengbioyna tmontsanapochocá chë fiantse couayiñe enjaquenabe uayoicana enjanóbocana espadëjaca, y nÿetsca shloftšënga chëngbe mëntšëna yapa tmontanoshachá.

## 20

### *Chë uaranga uata*

<sup>1</sup> Chentšana canÿe ángel sënjáninÿe celocana entsanastajuana chë corente asentoye tboca llavëfjaca, y canÿe bëtš cadenëjua entsanëtvena. <sup>2</sup> Chë ángel tbontsanbá chë dragónbiye, chë tempca mëtscuaye, chë Diablo y Satanás endmëná, y canÿe uaranga uatama tbontsanbátsëca. <sup>3</sup> Chë corente asentoye tboye tbontsantsatše, chentše tbontsanëtame, y chentše bëtšáša tsengájšëca tonjaninÿnaná, ndotatsëmbcá jatëfjuama ndocná chaondobenama; y chca, chë dragón ndoñe chaondobená jabocnama entšanga jáingñama, chë uaranga uata candochnënguëntscuana; y chora, básefta tescama chë dragón mochanjëtšboshjona.

<sup>4</sup> Uámana puestënga sënjáninÿe, y chiñe tmonjanotbiamá chë entšanga tšabá o ndoñe tšabá tmonjamama jayanama obenana tmojanóyëngacñënga. Chë bestšaše jtsëstjanguëse tmojanóbanëngbe espíritëngnaca sënjananÿe. Chënga chca tmojanóbana, Jesús tojánayana soyënguiñe y chë Bëngbe Bëtsabe buayenana soyënguiñe sempre ošbuáchiye causa. Chënga ndoñe tmonjanadorá ni chë uabouana bayá, ni chë chábíoye jadórana pormana soye, y ndoñe tmonjanlesenciá chë bayabe uinÿnanana soye juentsaca o cucuatšifñe chamuayentšajoma. Y sënjáninÿe chëngna tmontanayena y Cristoftaca canÿe uaranga uatama montsanmánda. <sup>5</sup> Chë entšanga mondmëna chë natsanënga jtayanama, pero chë tempo chë inÿe obanënga ndoñe chemëntétanayena, ndayá nÿe chë canÿe uaranga uata chentšana. <sup>6</sup> ¡Oyejuayënga y Bëngbe Bëtsabe entšanga, chë tmojtanayenënga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nÿetsca tescama castigo jtsebomnana, ndayá Bëngbe Bëtsá y Cristbiye mo bachnangcá chënga mochántseserverna, y Cristoftaca chë uaranga uatama mochántsemundaye.

*Satanás japochócama*

<sup>7</sup> Chê uranga uata chaojochñengo ora, Satanás chabe utámenocana mochanjétsboshjona; <sup>8</sup> y cha echanjáucana nyets luarentsa entsángbiöye, chë Bëngbe Bëtsabe soyëngama contra imomnëngbiöye jáingñama, chë ntšamo Bëngbe Bëtsabe contra Gog y Magog tempo ibojamncá imomnënga. Satanás, chë entsanga echanjáchembo Bëngbe Bëtsabe contra jéntsama, y tša chéftanga cha echanjáchembo, nya mo chë mar béjaye chënyöca cascajá mochántsemna.

<sup>9</sup> Chënga nyetscanga nyets luarëjana mochanjásjua, y chë Bëngbe Bëtsabe entsanga oye- nentse y chabe bonshana entsangbe bëts pueblo shëconana mochanjotsaye. Pero celocana iñe echanjatquëcjana y chë Bëngbe Bëtsabe contra imomnënga lempe echántsajuinÿe. <sup>10</sup> Y Satanás, chë aingñayá, mochántsatmetše chë iñeshe y azúfrecra uafjajónayoye, ndayentše chë uabouana bayá y chë Bëngbe Bëtsabe ndoñe ndegombre juabna oyeuambnaya tmonsantmetše. Chentše bëts castigo nyets tempo, bnëté y ibeta mochanjasufrina.

*Chë obanëngbiam tmonjánayana ntšamo chëngaftaca jamama yojtsemnana*

<sup>11</sup> Chentsana sënjaninÿe canÿe bëts uamana fjantse puesto jamándama y nda chiñe en- jetsetbemaná. Celoca y quem luare chabe delante lempe tonjanenatjëmbe, y ndócentše más chenatanobinÿná. <sup>12</sup> Y chë obanënga sënjaninÿe, bëtsétsanga y básesenga, chë uamana puestentša natsanoica monjétsatsana; y chë librëšangá tmonjanëtëfjo, y inÿe librëšanaca, ndëmuanÿenga nyetsca tescama tšabe vida mochjónÿenëngbe uabaina uabemana librëša. Chë obanëngbiam tmonjánayana ntšamo chëngaftaca jamama yojtsemnana, cachënga vida imojábomna ora ntšamo tmojëftsema soyëngaca, ntšamo chë librëšangañe yojanabe- mancá. <sup>13</sup> Chë mar béjayoye tmojanóbanënga choicana tmontanbocna, y chë obanënga tmo- janoquedanga luarënguentšana tmontanbocna, y cada cányabiama tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyëngaca. <sup>14</sup> Chentsana ya ndoñe más obenana quentëtsemna entsanga chamóbanama chaomama, mo chë obenana chë iñesheca uafjajónayoye cuaftsëtšencá; quem iñesheca uafjajónaye endmëna chë nyetsca tescama castigo jtsebomnama luare; chë choca cas- tigënënga jtsemnana yojtsamñëngbiam entsemna mo chënga cachiñe cuaftatobancá; <sup>15</sup> y ndëmuanÿengbe uabaina chë tšabe vida mochjónÿenëngbe uabaina iuábemana librëšañe ndoñe yonjanabemana, chë iñesheca uafjajónayoye tmonsantmetše.

**21***Celoca tsmiñe y fshantse tsmiñe*

<sup>1</sup> Chentsana atše sënjaninÿe canÿe celoca tsmiñe y canÿe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentëtsemna, y chë mar béjaye chora cach tondaye. <sup>2</sup> Sënjaninÿe chë “uamana ca” uabaina bëts pueblo, chë tsëm bëts pueblo Jerusalén, Bëngbe Bëtsabiocana celocana enÿetsostajuana, puerte botamaniñe, mo canÿe shembása puerte botamananá, chabe boyá jábocnabiam. <sup>3</sup> Y chora canÿe jabuache oyeuambnayana Bëngbe Bëtsabe uamana puestentšana sënjanuena, mëntšá: “Mouena. Bëngbe Bëtsá entsángaftaca echántsemna y cha chëngbeñe echantsiyena. Chënga chabe entsanga mochántsemna, cach Bëngbe Bëtsá chëngaftaca echántsemna, y cha chëngbe Bëtsá echántsemna. <sup>4</sup> Cha echanjama chënga ndocna te más ngmënënga chamondëtsemnana, y ndoñe más chamondóbanama, ndoñe más chamondošachema, ni ngmënaca ndoñe chamondëtšoyeuambnana y ndoñe más tsetšanana chamondëtsebomnana; er ntšamo chënga entsangcá fshantsoca tempo imojëtsiyena ora enjamncá, chora ya ndoñe chca queochátsmëna ca.”

<sup>5</sup> Chë uamana puestentše enjantbemaná šonjanianya: “Atše lempe mo tsëm soyëngcá sëndbama ca.” Y mëntšanaca tonjánayana: “Chë soyënga mábema, er chë palabrenga endmëna ntšamo ndegombre yomncá, y nyetscanga mondobena chiñe corente jtšošuáchiyana ca.”

<sup>6</sup> Chentsana šonjanianya: “Lempe tonjochñengo. Atše sëndmëna chë nyetsca soyënga bojatsayá y pochocayá, chë natsaná y chë ustonoyá. Mo nda tša uajuendayana tojt- sebomná canÿe béjaye fshantsiñe obocanentšana cuafojtšecá, cachcá nda tša tojtseboše atšbe soyënga jtsebomnana, atšbe chanjama cha chë soyënga chaotsebomnana, y chë nyetsca tescama yomna tšabe vídnaca, chca jtsebomnana chábiöye tondaye ntsojtjañá. <sup>7</sup> Nda nyetsca soyënguentšana tšabá chaojabocná mo ayëñjanayacá, lempe echanjyëngacñe ntšamo atšbe entsángbiöye jatšatayama tijašebuachenacá, y atšbe chabe Bëtsá chántsemna y cha atšbe uaquiniá. <sup>8</sup> Pero chë auatja causa Crístbiöye ndoñe mondëservénënga, chábeñe ndošuáchiyënga, chë bacna soyënga causa Bëngbe Bëtsabiam puerte uaboyëñjanënga imomnënga, chë inÿengbiöye obánayënga, chë shembása o boyabásaftaca bacna soye amënga,



chë bocjuana soyënga amënga, chë soyënga adórayënga diosënga yomna ca jtsejuab-nayëse, y nÿetscana bosterënga imomnëngbiamna, chënga entsamna chë ifhesca uaf-jajónayoca jasúfriana, chë azufre yojúinÿinÿanentse. Chentse puerte castigánënga sempre mochanjéftsemna, mo uta soyama cuafjobancá ca.”

### *Chë tsëm bëts pueblo Jerusalén*

<sup>9</sup> Chentsana canÿa chë angelënguentsá, chë canÿsëfta codbenga bomnënga jútjena chë canÿsëfta ústonoye pochócaye soyëngaca, átšbioye tonjánabo y šonjaniyana: “Mabo, chochanjinÿinÿiye chë tojobouamá shembása, chë Oveshatembe shema ca.” <sup>10</sup> Y atše chë Uámana Espíroftaca corente mandaná jtsemnëse, chë ángel šonjanánatse canÿe bëts y tsbanana tÿoye, y šonjaninÿinÿé chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsábocana enjétsostjajuana. <sup>11</sup> Chë bëts pueblo enjëtsebuashinÿinÿana Bëngbe Bëtsabe buashinÿinÿanánaca; enjëtsebuashinÿinÿana mo canÿe uámana botamana ndëtsbecá, mo jaspe ndëtsbecá, pero mo cristal cá tëshinÿniñe. <sup>12</sup> Chë bëts pueblo shëconana canÿe bëts y tsbanana tapiëse enjamna, chë tapiëšiñe bnëtsana uta bëshashangá y cada bëshashentse canÿe ángel, y chë bëshashangañe enjanábemana chë Israeloca bnëtsana uta bëts pamillangbe uabaina. <sup>13</sup> Shinÿe bocanoica unga bëshashangá, shinÿe uenatjëmbambanoica ungashá, tsjuanoica unga bëshashangá, y tsmanoica ungashá. <sup>14</sup> Chë tapiëse enjanéuatjona bnëtsana uta ndëtsbenguinÿe, y chëbenguinÿe enjanábemana Jesucristo chë Oveshatembe bnëtsana uta ichmónëngbe uabaina.

<sup>15</sup> Chë ángel átšeftaca oyeuambnayá canÿe castellano juinÿinanëšëfja enjánatbëna jamedídama chë bëts pueblo, chentsa bëshashangá y chentša tapiëse. <sup>16</sup> Chë bëts pueblo cach medida enjábomna nÿets cantoica, cach medida tëntsoye y nÿanëjoye. Chë ángel chabe juinÿinanëšëfjaca chë bëts pueblo tonjanmedidá: enjábomna uta uaranga y uta patse kilómetrënga; tëntsoye, tsbanánoye y nÿanëjoye cach medida enjábomna. <sup>17</sup> Chentsana chë tapiëse tonjanmedidá, enjábomna chnënguana bnëtsana y shachna metrënga; ntsamo entsanga chca soyënga jamedídama mondëtatšëmbcá chë ángel tonjanmedidá.

<sup>18</sup> Chë tapiëse enjanpormana jaspe ndëtsbeca, y chë bëts pueblo ena castellánoca, tša chca nÿa mo cristal cá tëshinÿniñe enjáninÿna. <sup>19</sup> Chë ndëtsbenga ndayiñe chë tapiëse enjanéuatjona enjábotamanana nÿetsca uámana botamana ndëtsbëngaca: canÿebé jaspe ndëtsbeca, chë inÿebé zafíroca, chë inÿebé ágata ndëtsbeca, chë inÿebé esmeráldaca, <sup>20</sup> chë inÿebé ónice ndëtsbeca, chë inÿebé cornalina ndëtsbeca, chë inÿebé crisólito ndëtsbeca, chë inÿebé berilo ndëtsbeca, chë inÿebé topácioca, chë inÿebé crisoprasa ndëtsbeca, chë inÿebé jacintoca y chë inÿebena amatista ndëtsbeca. <sup>21</sup> Chë bnëtsana uta bëshashangá enjuamna bnëtsana uta perlënga; cada bëshásha nÿe canÿe pérlica uapormanësha. Y chë más bëts tsáshenëjana enjamna ena castellánoca; mo cristal cá tëshinÿniñe enjáninÿna.

<sup>22</sup> Chë bëts pueblentse ndocna Bëngbe Bëtsabe bëts yebna chiyátaninÿe, er Bëngbe Utabná, chë Bëngbe Bëtsá nÿets obenana bomná y chë Oveshatema chentse bonjamna, y chata nÿetscangbiama chë bëts pueblentse ndayéntsnaca adoránata bonjétssemna. <sup>23</sup> Chë bëts pueblentse ndoñe quenjatsiyta shinÿe o juashcona chaotsebinÿnaye, er Bëngbe Bëtsabe buashinÿinÿanana chentse enjëtsebinÿnaye, y chë Oveshatembe buashinÿinÿanana mo uajuinÿanëshacá enjamna chë bëts pueblama. <sup>24</sup> Chentša binÿnayánaca, entsanga nÿetsca mándayëngbentse mochantsiyena, y quem luarentša mandadënga chëngbe uámana y bëts soyënga chë bëts pueblöye mochanjÿeyëbo. <sup>25</sup> Chë bëts pueblentsa bëshashangá ndocna te quemochtétatame, y chentse ndocna ora ibeta queochátsmëna. <sup>26</sup> Chë bëts pueblöye mochanjÿeyëbo chë nÿetsca luarënguentsa entsangbe uámana y bëts soyënga, y chë nÿetsca luarënguentsa entsangbeñe bëtsétsanga y uámanënga iuabiamná soyëngnaca. <sup>27</sup> Pero ndocna te queochatómashëngo ndayánaca, y chë soye chaotsama entsanga ndoñe tsábënga chamotsemnama Bëngbe Bëtsá jadórama; ni ndocná queochátamashëngo, Bëngbe Bëtsabiama nÿa tondayama ogustana soyënga amá o inÿëngbioye jáingñama soyënga amá. Choye mochanjámashjna nÿe chë ndëmuanyëngbe uabaina yojtsábemana chë Oveshatembe librëšañe, chë nÿetsca tescama tsabe vida mochjónyëngbe uabaina uábemanentse.

## 22

<sup>1</sup> Chë ángel šonjaninÿinÿé chë enjanobëjna bëjaye vida bomniye. Chë búyeshe enjamna ndëtsenguinÿe y tëshinÿniñe mo cristal cá. Enjanóbocana chë Bëngbe Bëtsá y chë Oveshatembe uámana puestocana, <sup>2</sup> y chë más bëts tsashená tséntsajana enjanobëjna. Chë fshajayentša catoica lado enjanójuajna betiyeshënga chë nÿetsca tescama yomna tsabe vida jtsebomnama, canÿe uatiñe bnëtsana uta soye jashájonana, canÿe cada shinÿe; chë betiyeshentša tsbuanáchënga josérviana nÿetsca mándayëngbentša entsanga jáshnama. <sup>3</sup> Choca ndocna soye queochátsmëna chë ndayama Bëngbe Bëtsá tojayana ndoñe tsábá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana

puesto chë bëts pueblentše echántsemna, y chatbe oservénënga mochántadorana. <sup>4</sup> Chënga mochanjinÿe Bëngbe Bëtsabe jubíá, y chabe uabaina chëngbe juentsaca mochantsambaye. <sup>5</sup> Chentše ndocna ora ibeta queochátsmëna, y chentša oyenënga ndoñe queochátëjaboto canÿe uajuinÿanësha o shinÿe chaotsebínÿnaye, er Bëngbe Bëtsá Bëngbe Utabnabe buashinÿinÿanana chëngbiana echantsebínÿnaye, y chënga mochántsemna mo reyëngcá uámanënga, y Bëngbe Bëtsáftaca nÿetsca tescama mochántsemdaye.

*Jesucristo jésabama entsobeco*

<sup>6</sup> Chentsana chë ángel šonjanianaya: “Quem palabrenga endmëna ntšamo ndegombre yomncá, y nÿetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbioye jinÿanÿiyama ndayá betscó yojtsemna jopásama ca.”

<sup>7</sup> Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayanana soyënga, ntšamo ndegombre jopásama, chë Bëngbe Bëtsabe juábna oyebuambana soye toyoyeuná, chë ndayama quem librëšañe entsábemana ca.”

<sup>8</sup> Atše Juan, chë soyënga sënjanuena y sënjaninÿe. Y chca sënjanuena y sënjaninÿentsana, chë chca šonjaninÿinÿe ángelbe delante atše sënjanoshamentsé, cha jadórana. <sup>9</sup> Pero cha šonjanianaya: “Ndoñe, átšeftaca ndoñe chca mátamana, er atše canÿe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catšátanga, chë Bëngbe Bëtsabe juabna oyebuambnayënga y nÿetscanga chë ndayá quem librëšañe endayanama tmojóyeunanga mondmëncá. Aca cmontsemna Bëngbe Bëtsá jadórana ca.”

<sup>10</sup> Chora mëntšánaca šonjanianaya: “Ndoñe mo iytëmencá catjáboshjona ndayá quem librëšañe entsabemancá, chë ndegombre jochnënguama soyënga, er chca jopásama chë tempo ya entsobeco. <sup>11</sup> Cachcá monÿá chë bacna entšá bacna soyënga chaotsama; chë puerte bacna soyënguñe jtsiyenama bošá, cachca soyënga chaotsama; pero chë tsábiana ntšamo tsábá yomncá chaotsama, y chë Bëngbe Bëtsabe entšá, nÿets tempo nÿets ainánaca chábioye chabotseserverna ca” —cha šonjanianaya.

<sup>12</sup> Chora Jesús cachiñe tonjánayana: “Mouena. Atše quem luaroye betscó chanjésabo, y átšeftaca chanjiyëbo chë uacanana soye, y cada ona tsëngaftanguentsábioye chanjoyiye ndayá tojamama ntšamo tbojtsomerecencá. <sup>13</sup> Atše sëndmëna chë nÿetsca soyënga bojatsáyá y pochocayá, chë natsaná y ustonoyá, chë ndábeyeca y ndabiama lempe yomna ca” — šonjanianaya.

<sup>14</sup> Oyejuayënga chë bacna soyëngama perdonánënga imojtsemnënga, mo chënga chëngbe entšáyá botamana cuaftsaboshabecá. Chca chënga mochantsobena chë nÿetsca tescama yomna tsabe vida jtsebomnama uacanánana jashjáchama, mo chë nÿetsca tescama yomna tsabe vida jtsebomnama betiyeshentsana cuaftsesacá, y mochanjobenaye chë tsëm bëts puebloye bësásajana tsábá jamashjnana. <sup>15</sup> Pero ndoñe quemochatobenaye jamashjnana chë ba ndoñe tsabe juabnënga ainaniñe bomnënga, chë bocjanënga, chë shembása o boyabásaftaca bacna soye amënga, chë inÿenga obánayënga, chë soyënga adórayënga diosënga yomna ca jtsejuabnayëse, y nÿetscanga chë bostero soyënga ogusetánënga y chca jtsamëse oyenënga.

<sup>16</sup> Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanëngbioye lempe chámabuayanama. Atše sëndmëna chë Rey Davídbentsana Entšá. Atše sëndmëna mo chë binÿanoye puerte binÿnaye estrellcá ca.”

<sup>17</sup> Chë Uámana Espíritu y chë Oveshatembe shema bondbëtsichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebomna, tojabo y bëtscá béjaye cuafjofšecá, cachcá nda tša tojtseboše Jesusbe soyënga jtsebomnama, chábioye chaobconá y cha echanjama chë soyënga cha chaotsebomnama y chë nÿetsca tescama yomna tsabe vídnaca, chca jtsebomnama tondaye ntsojtjañcá.

<sup>18</sup> Nÿetscanga ntšamo quem librëšañe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojaboté, Bëngbe Bëtsá echanjama cha chaosufrí chë quem librëšañe entsábemana pochócaye soyënga. <sup>19</sup> Y nderado nda ntšamo quem librëšañe entsabemancá, chë ndegombre echanjopásama soyënguñe ndayánaca tojajuaná, Bëngbe Bëtsá chábioye hochantsebojuána ntšamo chabiama yomncá chë nÿetsca tescama yomna tsabe vida jtsebomnama betiyeshentsana y chë tsëm bëts pueblentsana, chë ndayama quem librëšañe entsábemana.

<sup>20</sup> Quem soyënga oyebuambnayá, chë lempe ndegombre echantsemnama tonjayaná, atše, Jesús sentsichamo: “Añe, betscó chanjésabo ca.”

Chca chaotsemna. ¡Cochjabo, Bëngbe Utabná Jesús!

<sup>21</sup> Bëngbe Utabná Jesús chaoma tsabe bendicionënga tsëngaftangbeñe chaotsemnama.